


Ja øgyajpxy ja ømyadya'aky midi xukpaajtimp

ja nitso'ok'ajtin



New Testament in Mixe, Tlahuitoltepec (MX:mxp:Mixe,
Tlahuitoltepec)

Ja ɔgyajpxy ja ɔmyadya'aky midi xukpaajtamp ja nitso'ok'ajtin

New Testament in Mixe, Tlahuitoltepec (MX:mxp:Mixe, Tlahuitoltepec)

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mxp], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Tlahuitoltepec

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022

422dcf73-46a5-5403-b423-8406ed76ac1d

Contents

MATEO	1
MARCOS	45
LUCAS	75
JUAN	121
HECHOS	157
ROMANOS	200
1 CORINTIOS	217
2 CORINTIOS	234
GÁLATAS	245
EFESIOS	252
FILIPENSES	258
COLOSENSES	262
1 TESALONICENSES	266
2 TESALONICENSES	270
1 TIMOTEO	272
2 TIMOTEO	277
TITO	280
FILEMÓN	283
HEBREOS	284
SANTIAGO	296
1 PEDRO	300
2 PEDRO	305
1 JUAN	308
2 JUAN	313
3 JUAN	314
JUDAS	315
APOCALIPSIS	317

JA ØGYAJPX̄Y JA ØMYADYĀ'ĀKY MIDI JA MATEO YJAĀY

Ja Jesucristo tyeety'aptøjk

¹ Ja' idø'øn ja yiknajtskajpx̄ip pøn jaty ja nwindson'ajtim Jesucristo tyeety'apip ku ja teety'api ja Abraham jøts ja David,

² ku Abraham t'u'ngi ja Isaac, jøts ja Isaac t'u'ngi ja Jacob, jøts ja Jacob t'u'ngi ja Judá. Namay ja'adi møøt y'uch myigu'ukti. ³ Ja Judá møøt ja ñidø'øxy Tamar ja'ats t'una'jk'ajttip ja Fares jøts ja Zara. Jøts ja Fares t'u'nk'aty ja Esrom, jøts ja Esrom t'u'nk'aty ja Aram. ⁴ Jøts ja Aram t'u'nk'aty ja Aminadab, jøts ja Aminadab t'u'nk'aty ja Naasón, jøts ja Naasón t'u'nk'aty ja Salmón. ⁵ Jøts ja Salmón møøt ja ñidø'øxy Rahab tmajnk'atti ja Booz, jøts ja Booz møøt ja ñidø'øxy Rut tmajnk'atti ja Obed, jøts ja Obed t'u'nk'aty ja Isai. ⁶ Jøts ja Isai t'u'nk'aty ja rey David, jøts ja rey David møøt ja tø'øxyøjk midi ja Uriás wyinaty tø t'atsnidø'øxy'aty, ja'ats idø'øn tmajnk'ajttip ja Salomón.

⁷ Jøts ja Salomón t'u'ngi ja Roboam, jøts ja Roboam t'u'nk'aty ja Abías, jøts ja Abías t'u'nk'aty ja Asa. ⁸ Jøts ja Asa t'u'ngi ja Josafat, jøts ja Josafat t'u'ngi ja Joram, jøts ja Joram t'u'nk'aty ja Uzías. ⁹ Jøts ja Uzías t'u'ngi ja Jotam, jøts ja Jotam t'u'nk'aty ja Acáz, jøts ja Acáz t'u'ngi ja Ezequías. ¹⁰ Jøts ja Ezequías t'u'ngi ja Manasés, jøts ja Manasés t'u'ngi ja Amón, jøts ja Amón t'u'nk'aty ja Josías. ¹¹ Jøts ja Josías t'una'jk'aty ja Jeconías, namay ja'adi møøt y'uch myigu'ukti. Winet ets ja israelit jaä'y idø'øn yiknajtswa'wigyøjxtøø jam jadu'ukpi etjotp midi yiktejp Babilonia.

¹² Tøts ja jade'en wyinaty y'ukjaty ku ja Jeconías tpaajty ja y'u'nk midi txøøw'ajtp Salatiel, jøts ja Salatiel ja Zorobabel ja y'u'ngip. ¹³ Jøts ja Zorobabel t'u'ngi ja Abiud, jøts ja Abiud t'u'ngi ja Eliaquim, jøts ja Eliaquim t'u'ngi ja Azor. ¹⁴ Jøts ja Azor t'u'ngi ja Sadoc, jøts ja Sadoc t'u'ngi ja Aquim, jøts ja Aquim t'u'ngi ja Eliud. ¹⁵ Jøts ja Eliud t'u'ngi ja Eleazar, jøts ja Eleazar t'u'ngi ja Matán, jøts ja Matán t'u'ngi ja Jacob. ¹⁶ Jøts ja Jacob t'u'ngi ja José midi tñidø'øxy'ajtp ja María midi tyaagip ja nwindson'ajtim Jesus, ja Cristo midi yiknitsokp.

¹⁷ Makmajkts najtska'axits idø'øn ja tpaajty ku ja cho'onda'aky Abraham ñikøjxp jøts ja ttamigugøxi ja David. David ñikøjxpts jadu'uk cho'onda'aky jøts ja jaduk jade'en ñajtska'axidyøø kunim ja israelit jaä'y yikwaanøjkxtøø aguwan'ampy jam Babilonia. Winetnims jadu'uk cho'ondaajky, ja'ats najtska'axidyøø jaduk jadine'en ja makmajkts najtska'axi kunim kyaxi'jky ja Cristo ja yiknitsokpi.

Ku ja Jesucristo kyaxi'jky

¹⁸ Yide'en idø'øn y'ejxi tyiyi sa jaty yjajty kyubejty ku nwindson'ajtim Jesucristo ojts kyaxi'iky: Ja María midi tyaagip, ja' idø'øn wyinaty najts'awani'ejtnip jøts ja tmøøt'amajtskit ja José; nawyaawajnidipnim ja wyinaty ku ja María jam tñikøjxp'ajtni ja mutsk, Dios idø'øn ja tuujnip jøts ja Espíritu Santo myøk'ajtin jade'en tyikmajada'aky. ¹⁹ Øy yikxonts ja José yjaa'y'aty midi idø'øn ñiyaa'y'ajtpy, ka'ap ja pøn sa tjadyimñøjmi jøts ja María kyayikpøky'ext; myajtstu'utwampy ja' jøts ja ka'ap pøn ttuknijawiwya'añ. ²⁰ Exam idø'øn ja wyinaty jade'en wyinmay ku ja ojts agumaä'y'ampy tyuk'ijxyi ja Dios y'ankilis jøts ja ojts ñi'mxyi:

—José, metsxi mdeety'amøjip ja David, kidits mdsø'øgi, møøt amajtski yø María. Yikaxø'økwampy mutsku'nk tu'uk, Dios y'Espíritu Santo jade'en myøk'ajtin tyikwingaxø'økp. ²¹ Mixyu'nk ja yikaxø'kp, ja'ats meets ja xyøøw mbiktaajkip JESÚS. Jade'en'ampy idø'øn ja jade'en txøøw'att ja agøjxp ku ja pojkpitumbi jaä'y ja ttuknitsø'ok'att ja pyøky.

²² Tyimyjajt tyimgyubajts idø'øn ja jade'en sa nwindson'ajtim Dios wyinaty tø tyikwa'añ ja kyugajpxy ku ja wyaañ:

²³ Jøtpyp tu'uk ja kiixye'dø'øxy midi amaay tsinaapy, yikaxø'økpts ja tu'uk myajnkun'k, Emanuel ja xyøøw'atp, midi ayuujk pidsømp: Dios adøm møøt.

²⁴ Xjats kuts ja José ojts ñiwijy, jøts idø'øn ja jade'en tpaduun sa Dios y'ankilis ja wyinaty tø y'ane'emyiyi, jøts ja ojts tñidø'øxpyiky ja María. ²⁵ Jøts idø'øn ja ka'ap jade'en tmøøtsøøninim sam amajtsk'ajtin ñaxy kunim ja tø'øxy tyikaxi'iky ja myijawyeenu'nk; jøts ja ojts txødijy JESÚS.

2

Ku ja wijyjaä'y ojts t'ats'ejxti ja maxu'nk Jesús

¹ Jam ja Jesús ojts kye'exy Belén, jam kajpjtøp midi Judeit etjotp, ja Herodes idø'øn jam wyinaty windsøn'ajtp, ja' wyinaty tuki'iyi tñitanaapy ja naajx jøts ja kajp. Xjats

jam Jerusalén yja'attøø winaagin wijyjaa'dyi midi tsoo'ndip xøøbidsimy, ² ja'ats jam ojts tyiknidøwidi, yide'en ja wyandøø:

—¿Ma dø'øn ja tø kye'exy ja' pøn tniwindsøn'atp ja ya'it israelit jaa'y? Tøts øøts ja n'ejxpaajti ja myaadsa' ma øø tø ndsøøñ, icyaats øøts ja tø nnimiñ jøts øøts ja nwindso'øgiwya'añ.

³ Kuts ja windsøn Herodes ja ojts jade'en tniwadøø jøts ja tyatøjkyyi ja jotmay, nayide'en niduki'iyyi ja Jerusaléngit jaa'ydyi. ⁴ Winets ja windsøn Herodes tñankñamyujki niduki'iyyi ja israelit teety windsøndøjkti jøts nayide'en pøn jaty tkajpxwejtjip ja jaa'y, ja'ats idø'øn ja ojts ttiibyiky ma et idø'øn ja Cristo wyinaty kyaxø'økwa'añ. ⁵ Xjats ja tniimaadyøø:

—Jam Judeit etjotp ma kajp jam txøøwi Belén; pø yide'enimxi ja Dios kyugajpxy jekyip tjaadya:

⁶ Ja kajp midi yiktejp Belén, midi jam Judá etjotp, kidi tyimñugo kajpjp yø' sam o midi kajp ma jaty jam yikutukti ja windsøndøjkti wine'enin yjam'atti jam Judá;

jam ja kyaxø'økt tu'uk ja møj windsøn, midi øts nIsraelit kajp x'ejx'ejtjip.

⁷ Winets ja Herodes amaa'tsk twaadsøø ja wijyjaa'dyi midi idø'øn jam wyinaty tø choondi xøøbidsimy, jøts ja ojts ttiibyiky juuni dø'øn ja wyinaty tø t'ejxpaatti ja maadsa'.

⁸ Jøts ja ojts tkexy jøts ja ñøjxktit jam Belén, yide'en ja tniimaay:

—Nøjxkti jam, øyim yikxonim idø'øn xyiknidøwidit ja mixyu'nk; kuts xpaattit, jatyits meets ja xnigajpxt jøts meets ja kukmado'ot, jøts øts ja nayide'en n'atswindsø'øgit.

⁹ Kuts idø'øn ja windsøn Herodes ja jade'en ñimaajyidøø, xjats idø'øn ja wijyjaa'y choo'ndøø. Jøts ja maadsa' ja wyinyø'øyiidi midi ja jam wyinaty tø t'ejxti ma dø'øn ja jam choo'ndi xøøbidsimy, yø'øpy idø'øn ja' kunim ja yja'jty jam ma dø'øn ja mutsku'nk Jesús wyinaty, jamnimts ja yø'ø'y'amøjkyyi'ñ. ¹⁰ Ku dø'øn ja wijyjaa'y ja jade'en t'ejxti ja maadsa', xjats ja yjantyimxyondaktøø; ¹¹ kuts ja tyøjkidøø jam tøjktjotp, japts ja tpaadtøø t'ejxtøø ja mutsku'nk jøts ku ja tyaak María ja jap møøt. Winets ñagyuxendyyaajkidøø jøts ja twindsø'jkidøø ja mutsku'nk. Ojts ja tyikni'awa'atsti ja oori, ja poom, jøts ja pa'akxuu'kpi midi tyejtjip mirra. Jade'en ja tyikni'awa'atstøø, ja'ats ja ojts ttamay'atti, ja' ja ojts ttawindsø'øgidi. ¹² Kuts idø'øn ja wyinaty jade'en tø t'ukwindsø'øgidi, xjats ja yikutukmadoodøø agumaa'yjøtjy jøts ku ja ka'ap nayide'en y'ukwimbejtñidit midi ja wyinaty tø tmendi, ma ja windsøn Herodes ja jam wyinaty tø t'ukpaatti. Xjats idø'øn ja wyimbejtñidøø, abiktyuu' tpojktøø jøts ja ñøjxknidi jam pyuxkøjpx kyajpkøjpx.

Ku ja maxu'nk Jesús ojts yikmiguyexy jøts yikminijky jam Egipto

¹³ Tøts idø'øn ja wijyjaa'y jam wyinaty choondi, ku ja nwindso'ajtim ja y'ankilis ñanky'ejxøø jøts ja José ja agumaa'yjøtjy ojts t'ixy, yide'en ankilis ja ñimaajyøø:

—Tsojk pidø'øk, møøt tsoon yø mutsk møøt yø tyaak jøts mgaknøjxktit jam Egiptit etjotp, taa'nidi jam. Pøni wine'en jam mdaa'nidi øtsnim ja kø'øm nnigajpxp, ja'agøjpx ku Herodes yø t'ixa'awa'añ yø mutsk jøts yø tyik'ookwa'añ.

¹⁴ Xjats ja José ojts pyidi'iky, jøts ja ojts koots tsa'angue'eky ja mutsku'nk, jøts ja tmøødiyøø ja tyaak jøts idø'øn ja ojts tmøøtnijkxy jam Egipto. ¹⁵ Jam ja chinaadyi jeky kunim ja Herodes y'ø'jky. Jade'en'ampy idø'øn ja jade'en tyimyjajty ti mibaat ja Dios kyajpxy jadi'iñi y'uknaxt pø patyxi wyinaty yide'en tø tyikwaañ ja kyugajpxy: “Egiptit etjotp øts ja n'U'nk nyiktsø'øn ku øts ja nwaadsøøy.”

Ku ja Herodes tyikutuky jøts ja mutsk mixyuna'jk y'oo'køxtit

¹⁶ Kuts ja Herodes tñija'wiyi'ñ jøts kudam ja wijyjaa'y ja wyinaty tø wyin'iiñiyi, xjats ja yjantyim'yambijky; jøts ja ojts tni'ane'emy ku y'oo'køxtit ja mixyuna'jk. Majtsk jumøjtjibaat ja ojts tñankyik'øgyiyi wine'enin ja mixyuna'jk jam wyinaty Belén, jøts nayi wine'en ja kajp jam tniwington'aty. Ja jumøjt idø'øn ja pyayo'øpy sa ja wijyjaa'y ja wyinaty tø tyukmadøøyi. ¹⁷ Ka'pxy idø'øn ja jade'en yjajty sa ja kugajpxy Jeremías wyinaty ja nøky tø tja'ay ku ja wyaañ:

¹⁸ Yikmadoop ayuujk jam Ramá, sam yjawi øy pøn ti tpaji'y tpayaxp;

ja tø'øxyøjk Raqueldam idø'øn y'u'nk y'una'jk tpajjy tpayaxp jade'en, jøts ja ka'ap tkupiky jøts ja yikpa'ayo'ot, pø tøxi y'u'nk y'una'jk ja y'oo'køjxni.

¹⁹ Xjats ku y'o'jky ja Herodes, winets nay'agumaa'yjotjy tja'wiyi'ñ ja José jøts ku t'iixy tu'uk ja Dios y'ankilis jam Egiptit etjotp, jøts ja ñimaajyøø:

²⁰ —Pidø'øk, jøts xmøødit yø mixyu'nk yø Jesús møøt yø tyaak, wimbejtñidit nøjxknidi jam Israelit etjotp, tø ja y'oo'køjxni pøn jaty y'ijty tyik'ookwandip yø mutsku'nk.

²¹ Winets ja José pyidi'jky jøts ja tyiktsø'øn ja mutsku'nk. Ja Jesús idø'øn yikwaa'dso'omp møøt ja tyaak jøts ja ojts ñøjxkti jam Israelit etjotp. ²² Kuts ja José tñija'wiyi'ñ jøts kudam

ja Arquelao jam wyinaty wyindsøn'aty Judeit etjotp, ja tyeety Herodes ja kyudanaapy ku dō'ōn ja wyinaty tō y'ōōky, jōts ja José tsō'jkip ja', jade'ents ja jade'en'ampy kyanijkxy; tōts idō'ōn ja wyinaty yiktukmadoogjomi agumaa'y'ampy jōts ja ojts ñōjkxti jam Galileit etjotp. ²³ Kuts idō'ōn ja jam yja'attōō, jōts ja ñōjkxti tsinaabyi mā kajp txōōwi Nazaret. Ka'pxy idō'ōn ja jade'en tyuujni yjajty sa Dios kyugajpxy wyinaty tō wya'andi jōts ku ja nwindson'ajtim Jesús jam kyugajpi Nazaret.

3

Ku ja Juan Bautista kya'amaay jam abak etjotp

¹ Tōts ja tiempi wyinaty ñaxy jōts ja Juan Bautista midy yiknōbajtp, jam wya'kaxi'jky Judeit y'abak'etjotp, jōts ja jam kyajpxwa'kxy, ² yide'en ja jam wya'añ:

—Jawidi mbōky, yiktigajtsti mdsinaa'yindi, ja wyingōñ ja Dios kyutujk midy ja tyanitanaapy ja yjaa'y.

³ Yō Juan idō'ōn ja' midy ja kugajpxy Isaias ñigajpx ku ja yide'en tjaadyaañ: Yikmadoop ayuujk jam abak etjotp ku wya'añ mōk'ampy:

“Awejxidi ja nwindson'ajtim y'ixpōjkin; yiktōwdi yiktuuda'akti mwinmaa'ñ.”

⁴ Kameeyi pōjk idō'ōn ja Juan jam wyinaty wyet'ajtpy, jōts jiyujk'ak tendsum'aty, ja mu' dō'ōn ja jam chu'chpy jōts jiyujk pa'ak ja tji'kxy midy jam muum ujtsjotp, ja'ats idō'ōn ja jam ñidsinaapy. ⁵ Jōts idō'ōn ja jam øy pōn jaa'y ñimiñiyi jōts ja tmdowdi sa wya'añ, mendip ja' pōn tsoo'ndip jam mōj kajpkōjpx Jerusalēn, nayide'en wine'enin jam pōngapōn chōōnidi jam Judeit etjotp, midy tmāwingon'ajtp ja nōō midy txōōwip Jordán; ⁶ kuts idō'ōn ja jaa'y ja pyōky tmyatsti, jōts ja Juan ja tyknōbety mā ja Jordāngit nōō jam.

⁷ Jōts ku dō'ōn Juan ojts t'ixy jōts ku ja fariseotōjk may'ampy yjanchmendi nōbajtpi mōōt ja saduceotōjkti, jōts ja tmāay:

—¡Mee miku'! ¿Pōn mee tō mnñi'mxyi jōts ku jade'en mgayiktabayō'odyit ja mbōky, jōts ku yō'ōyi chōkyi ku meets ya nōbajtpi tō mnñiñ? ⁸ Yikxon idō'ōn mjaa'y'attit, wan idō'ōn tyik'ijxy jōts ku ja mdsinaa'yin tō xyiktigatsti, ⁹ jōts kidi mee kō'ōm mnawya'añidi namyikajxim: “Tixi ka'ap ti chōkyi kumi ja Abraham adōm n'apteety'amōj'ajtyindip”; jōts ka'ats yjade'eni ti Dios kamajyp øy ja pōn ttukmigu'uk'att ja Abraham pōni pōn ja kō'ōm y'a'ejxp. ¹⁰ Jōts tsojk ja nōjxk yiktiidyuñ pōn jaty tkami'oy'ajtp ja Dios. ¹¹ Tiy janch ixym ndymdyukmadowdi jōts ku øts yō'ōyi tō nmimiñ jōts meets nōō nduktanōbattit. Jade'en'ampy yikñijawit jōts ku mdsinaa'yindi tō xyiktigatsti; jats øts tu'uk ix'oojk xpamiñ pōn meets Espiritu Santo mduktatōkiyp jōts ja' tmime'ent ja tiidyu'unin. Mōk'ampy kutujk ja tmimiñ, nijuuni øts ja mōōt ngranamybaat'atit. ¹² Jade'en ja ttu'unt ja naxwii'ñit jaa'y sam ariidōōm yikwigumyjn, abiky ja tpiktaajkt ja y'ak jōts ja tñitō'ety ja jōōn midy nijuuni kape'tsp, jōts ja ariinbajk abiky yikpōjk'ōkt. Jade'ents idō'ōn ja jaa'y yiktu'undit sa pōnjabōn tmi'oy'aty tkami'oy'aty ja Dios.

Ku ja Jesús ñōbejty

¹³ Xjats idō'ōn ja Jesús yja'jty jam mā ja Jordánk nōō, jam ja chōōñ Galileit etjotp jōts idō'ōn ja jam yja'jty mā ja Juan wyinaty, ja' ja ñinijkxy jōts ja yiknōbatit. ¹⁴ Ka'ap ja Juan ja twa'añ jōts ja tyknōbatt, yide'en ja Jesús yikñimaay:

—¿Jawyeen me xtsōky jōts me nyiknōbatt? Pō metsxi dō'ōn ndijy xyiknōbatp.

¹⁵ Yide'en ja Jesús y'adsōy:

—Wan idō'ōn t'ukjaty; jade'en ne'egi ndymdyōō'jint jōts ku ja'ayi nbadu'unint sa Dios Teety tyiy'ajtin wya'añ.

Kyupōjk idō'ōn ja Juan ja jade'en. ¹⁶ Ja'ayi ja Jesús ñōbejty, jōts ja pyidsiimy jam nōōjotp. Winets nay jaty; adsu'jky y'awaajch ja tsajp, jōts ja ojts t'ejxpaahti ja Dios y'Espiritu Santo ku ja ñigida'agy sam tsapakin jōts ja tyakapajti. ¹⁷ Winets ja Dios Teety y'ayuujk yikmadōōy, yide'en ja jap tsajpjōtpy wya'añ:

—Yā'at øts idō'ōn n'U'nk'ajtpy, yō' øts idō'ōn ndsōky'ajtpy, njantyajotkujk'ajtpyts øts yō'.

4

Ku ja Jesús yikjot'amutsk'ejxwa'añ

¹ Xjats ja Dios y'Espiritu Santo ojts yiknijkxyi ja Jesús jam abak etjotp, jōts miku' ja jam yjot'ejxit.

² Wixijxxyōōw wixijxchuu' idō'ōn ja jam y'ayuu'ajty, jōtsnim yuu ja pyaajti. ³ Winets miku' ja jam ñimeejni jōts ja yikpōkyunwa'añi, yide'en ja ojts ñi'imxyi:

—Pōni janch ku me mjanchdious'ngi, yiktsapkaakyjat yō tsaa.

⁴ Xjats ja Jesús y'adsōy:

—Yide'en Dios kyajpxy wya'añ: “Kuuyi Dios kyajpxy myøji, kidi ja'ajip naxwii'ñit jaa'y nugo tyajujky'attip ti jaty yikjø'kxp.”

⁵ Winets miku' ja ojts yikniikxyi jam Jerusalén midi Dios kyunuu'kxkajaj'ajtpy, jamts ja ojts yikøxpetyi tsaptøjk kubajk ⁶ jøts ja ojts ñii'mxyi:

—Pøni janch Dios U'nk mets, kajtswoon ya; pø nømpxi ja Dios kyajpxy jøts ku: Ja tnøjmit y'ankilis jøts me myik'ejx'ett jøts ku me ka'ap ti mjattit.

Jøts ku mets ja ankilis mdsa'anjø'økit, jøts mdeky tsaa kyakumit kyayo'odsit.

⁷ Xjats ja Jesús t'adsøoy jøts ja tnimaay:

—Janch nayinømts Dios kyajpxy: “Kidi mDios xjot'ixy.”

⁸ Xjats ja miku' ja ojts wyaanøjkxkøjmiyi jam møj kojpkøjxp, jøts ja jam tyuk'ejxøø wine'en ja kajp naxwiiñ jøts ku janchkumeeñ janchjotkujk; ⁹ yide'en ja ojts ñii'mxyi:

—Ngøyajkøjxp øts yø kajp tuki'iyi jøts mets yø xja'bøkøxt, pøni xwinguxanaapy øts, pøni xwindsø'jkip øts.

¹⁰ Winets ja Jesús wyaañ jøts ja tnimaay:

—Miku', jiwa'ak, kidi øts ya xwin'ixy, pø yide'ents Dios kyajpxy wya'añ: “Ja Dios Teety tu'ugyi mwindsø'øgip, ja' mbadu'ump pøni sa ja wya'añ.”

¹¹ Xjanimts ja nwindson'ajtim Jesús ja miku' myajstujtyøø, jøts ja ankilis ja ñimeejnøø, ja'ats ja ojts pyudøkiyi.

Ku ja Jesús tpadøjkijii'ñ ja tyunk

¹² Kuts ja nwindson'ajtim Jesús tnimadøoy jøts ku ja Juan jam wyinaty puxøjkjotp, winets ja ojts ñijky jam Galileit etjotp. ¹³ Jøts nika'ap ja tyaa'niyi'ñ jam Nazaret, ne'egi ja ojts ñijky tsinaabyi ma ja kajp jam mejy'am midi Zabolón etjotp jøts Neftali etjotp, jam idø'on ja ojts ñijky Capernaumit kajpkøjxp. ¹⁴ Ka'pxy idø'on ja jade'en tyuujni yjajti sa ja Dios kyugajpxy Isaias wyinaty tø wya'añ ku ja yide'en tjaadyaañ:

¹⁵ Meets Zabolónit jaa'y, meets Neftaliit jaa'y, ma tuu' wingon ñaxy jam mejy'am, midi yiknido'onip xøøbidsimy ku nnøjkxint jam Jordán. Meets Galileit tsinaabyidi, pøn ka'israelit jaa'dyi.

¹⁶ Jade'en meets x'ejxpaattit midi Dios Teety ñajtskajxip sam ja jajin pøn wimbeets kugoots tyimyejtnidip,

nisudso mgawinmaa'nbyaatti pøni sadam idø'on ja Dios mdsøkyidi, tøts ja tyikujajtaagi tyikudøø'kxaagi pøn ja pyøky tmi'ookwanidip jadi'iñi, jøts tø ja Dios mduu'mø'øyidi sudso mnitso'ok'attit.

¹⁷ Kuts ja Jesús ja'ayi jam Capernaum kyajpkøjxp yja'aty, yide'en ja kyajpxwa'kxnibøjkijii'ñ:

—Jawidi mbøky, yiktigatsti mdsinaa'yindi, ja'agøjxp ku ja wyingøñ ja Dios kyutujk midi ja tyanitanaapy ja naxwii'ñit jaa'y.

Ku ja Jesús twaadsøoy nimaktaxk ja ajkxmakpi

¹⁸ Jam ja Jesús wyinaty ñaxy mejpya'am midi jam Galilea etjotp, ku ja t'ejxpaajty namajtsk ja jaa'y midi ttukmiga'ax'ajttip, tu'uk txøow'aty Simón, nayi yikxøømøøpy ja Pedro, jøts jadu'uk Andrés. Ajkxmakk idø'on ja tyunk'ajttip ixam ja wyinaty tyimñiwejtspatti ja tya'ajkxmajk. ¹⁹ Winets ja nwindson'ajtim Jesús ja ñimaajyidøø:

—Mada'akti, møøt widettik øts jøts nduknijawidit sudso jaa'y ja nitso'ok'ajtim tpaatt.

²⁰ Jøts idø'on ja nay jatyi tñajtswojdidøø ja tya'ajkxmajk jøts ja ojts tmøødidi.

²¹ Tø wyinaty waani yø'odyi, jamts ja Jesús ojts t'ejxpatkøjmi nayi namajtsk ja jaa'dyi midi tukjaa'dyi: tu'uk yJacobø'aty jøts jadu'uk Juan txøøwi, ja Zebedeo dø'on ja y'una'jk. Jam ja wyinaty møøt ja tyeety barkijotp, ja tya'ajkxmajk ja jam wyinaty y'adajkidip. Winets Jesús ja ojts yaajxyidi, ²² jøts ja nay jatyi tñajstuttøø ja tyeety jam barkijotp, jøts idø'on ja tmøødidøø ja Jesús.

Ku ja Jesús tyik'ixpijky ja mayjaa'y

²³ Øy ja Jesús øy madsoo tyimwyidity jam Galileit etjotp, ku ja øy magajp yja'aty jøts ja yik'ixpijky jam tsaptøjkjotp, jøts ja tkajpxwa'kxy ja Dios y'øgyajpxy midi ja tyanitanaapy ja yjaa'y, jøts ja øy pønjabøn tyiktsø'øky pøn jam tigati pa'am øjkjip. ²⁴ Jøts ja Jesús yiknija'wiyii'ñ, ñija'wigyøjxtøø ja' pønity tsinaadyip jam Siria etjotp, ja'ats ojts ja pyamaa'y tyikmendi pøn jaty jam o tigati pa'am øjkidip ajnidip, jøts ñayikmemidi ja' pøn ja miku' tø tyatøkiyidi jøts pøn ja mø'odyi pa'am øjkidip, pøn køxujxtip pakxujxtip. Xjats idø'on ja nwindson'ajtim Jesús ja tyiktsokijxy. ²⁵ Jøts idø'on ja mayjaa'y jam jade'en yja'atti choondi pøn tso'ondip jam Galileit etjotp, jøts ja yikpawidity ja Jesús. Jam ja'adi pøn kugajp'ajttip ma jaty ja kajp midi kyutujktaajk tjagyajtip Decápolis jøts Jerusalén, jøts nayide'en pøn

tso'ondip Judeit etjotp, jøts nayide'en jamidi pøn kugajp'ajttip jaduktamajñ'ampy ma ja Jordánit nøø tyañ.

5

Ku ja Jesús ojts kya'amay jam kojpkøjxp

¹ Xjats ku ja Jesús ojts t'ixy ja mayjaa'y jam, winets ja ñijkxy kojpkøjxp jøts ja jam y'ixaajky, jamts pyabøjkpitøjk ja ñachinaa'y'awidejtøø, ² jøts ja ojts yide'en tyik'ixpøjktøki:

Ja' pøn nekim t'ejxtip

³ —Tya'øy'ajtidip ja' Dios kyunuu'kxin pøn ja y'amutsk'ajtin yja'wip, ja'ats pyaattip ja Dios kyutujk midí ja tyanitanaapy ja yjaa'y.

⁴ Tya'øy'ajtidip Dios kyunuu'kxin ja'adi pøn jotmayaxtip pøn jotmay'oo'ktip, ja' idø'øn Dios ayo'ejxidip.

⁵ Tya'øy'ajtidip ja' Dios kyunuu'kxin pøn myiduda'aky'ajttip ja y'awejx'ajtin, ja'ats pyaattip ja øy'ajtin midí ja Dios tø tni'adsowi.

⁶ Nayide'ents ja tta'øy'ajtmidit ja Dios kyunuu'kxin pøn tjantymtyojktip ja øy'ajtin ja tiy'ajtin midí Dios yja'ajip, pudøkiyidipts ja' jøts ja jade'en ttu'undit sam idø'øn ja ttsokti.

⁷ Nayi tya'øy'ajtidip Dios kyunuu'kxin ja'amidi pøn t'ayo'ejxtip ja myigu'uk, ayo'ejxidipts Dios ja nayide'endi.

⁸ Tya'øy'ajtidip Dios kyunuu'kxin ja'adi pøn ja yjanchja'win tu'ugyi yik'ejttip, kuwanits ja Dios ja tpaattit.

⁹ Tya'øy'ajtidip Dios kyunuu'kxin ja'adi pøn yikxon tkajpx'øyidip jøts tsep tkananktyuñidi, ja'abi jaa'y idø'øn Dios u'nk'atidip unaj'k'atidip.

¹⁰ Nayi tya'øy'ajtidip Dios kyunuu'kxin ja'amidi pøn tku'ayo'ombaajtidip ja øy chinaa'yin, jøts yikjemdundi yiktedundi, ja'abits idø'øn paat'ajtidip ja Dios kyutujk midí ja tyanitanaapy ja yjaa'y.

¹¹ Nayi tya'øy'ajtidip Dios kyunuu'kxin ja'amidi pøn yikjemmaadyip yiktenimaadyip uk yikjemdundi yiktedundi, yikniwambatti a'øy'ampy øts køjxp. ¹² Kidits xkumayjawidi, xonjajti jotkujk'atti meets, møj'ampy meets ja nøjxx mwingaxø'jkxiyi jap tsajpjøtpy, pø nayide'enxi ja yikjemdundøø yiktedundøø pøn jaty tø y'atstsøøndi y'atstanidi pøn kuga-jpxy'ajtidip ja Dios.

Ja' pøn jade'en naxwiiñ tundip sam ja jaj tyuñin sam ja kaan tyuñin

¹³ Jade'en meets idø'øn sam kaan tyuñin midí wa'ats midí naxwiiñit jaa'y yiktundip jøts чул'ч kyawindigø'ødyit. Nayide'en idø'øn ndejint mdunkpaattit ku mmigu'uk xuk-mado'odit ja Dios yja' sudso'ampy y'anmija'win kyawindigø'ødyit. Kuts ka'ap jade'en mdu'undit tø wyinaty mbidsømdi ejxim ja kaanin midí kawa'ats midí katump.

¹⁴ Kuwaní myik'ejxtit myiknijawidit nayide'en sami kajp yik'ixjxin midí jam ejxin'am midí jam kojpkøjxp. Jade'en meets idø'øn ejxpajt mwa'andip sam jaj yjajyin tyi'kxyin.

¹⁵ Kidi ja'apxi yø jaj tnidøøbyøki jøts ja yikpikta'akt kajuun patki'py, pø ja'axi ja wya'ant jøts ja yikpikta'akt jam ejxin'am ma ja tyikujajit tyikudøø'kxixt pøn jaty tsinaadyip jam tøjkjotp. ¹⁶ Nayide'ents meets idø'ønmi, tuk'ejxti ja jaa'y ja øy'ajtin ja xondaajkin jøts t'ejxtit tñijawidit jøts kudam meets xuñ ja tiy'ajtin, mjaotwamp tam meets, myijawidipts kyunuu'kxyjawidipts ja' ja Dios Teety midí mee mnitanaajyip o maðsoo midí jap tsajpjøtpy.

Ku ja nwindso'entim Jesús tñigajpxy sa tyu'unt ja Moisés kyutujk

¹⁷ Kidi meets jade'en mwinmaañidi jøts ku øts ja' tø nniñiñ jøts øts ja Moisés kyutujk jøts øts ja Dios kyugajpxy y'ixpøjkin nyikudigøjyidit; kidi ja'apts ø tø nniñiñ, ja'axi ø nniñimpy jøts øts ja jade'en yikxon njaaktyimñigajpxy sa jaty ja tø wya'andi. ¹⁸ Janch øts idø'øn nwa'añ, pøni wine'en iiy tyaa'ni yø naajx yø tsajp, niwine'enints ja kutujk kyagudigø'øty kunim ja tuki'yi ka'pxy jade'en tymyjatt pøni ti jaty idø'øn tunipnim. ¹⁹ Paty ja ka'øy yikmøj'ext ku Dios kyutujk ttanitanit ja yjaa'y pøni pøn yiin waan tkayikmøjip ja Dios kyutujk, kuts ja myigu'uk ja nayide'n ttukpabiky sam ja kø'øm tpaduñ yiin waan, ja'ats idø'øn ja Dios kamøj'ejxip nayide'en. Pønts ka'pxy tpadump jøts myigu'uk ja nayide'en ttukpabiky, møj'ejxipts Dios ja' ku kyutujk ja ttanitanit ja yjaa'y. ²⁰ Paty mee ndukmadøy, pøni ka'øy yikxon mjaa'y'atti, pøni mdundip nayide'en sam yø fariseotøjkti sam yø kajpxwejpitøjkti, nijuunits meets Dios kyutujk jade'en xkapaajtiyidit midí yjaa'y ja tyanitanaapy.

Ku ja Jesús tñigajpxy sa kya'øyi ja aki jøts ja jotma'jtin

²¹ Tøxi xnimadowdi ku ja n'apteety'amøj yikniimaadyøø: “Kidi myikjaa'y'øøky, pøni pøn yikjaa'y'oo'kp yiktiidyu'ump ja'.” ²² Yide'ents mee nnøjmi pøni pøn ja myigu'uk tmi'ambøjkp, nayi yiktiidyu'ump ja'. Uk jam o pøn ja myigu'uk tjemnojmí ttenøjmi,

tiidyunidipts ja' ja kutujk adsinaabyidi ma ja kutujktaajk jam; uk pøn tnimaapy ja myigu'uk jøts ku ja myø'øty, paat'ajtip ja' jøts ja y'ayo'ot ma jøøn jap ayodaajkjotpy.

²³ Paty pøni mbiktā'akwāndip ja myøxy jam altajrwemp, kuts jam mja'atti jøts winet xja'myatsti jøts kudam ja mmigu'uk jap tu'uk pøn mmidsep'ajtip, ²⁴ jamyits ja altajrwemp xmajstutu'ttiti midy myoxwāndip, jøts ja jawyeen x'atskajpx'øyiidi møøt ja mmigu'uk. Pøni ti dø'øn mnadyami'ambøjkidip jøts mnamyijotjimbetidit xem yam møøt ja mmigu'uk, winetnimts jadigojk mnøjkxt jam altajrwemp, jøtsnim ja xyoxtit midy jam tø x'ukyiknøjkxti.

²⁵ Ku pøn mni'øøniwya'añidi jøts ja myiknøjkxwā'añidi jam kudunk wyindum, namga'anim jam myiknijkxyidi, tiku yikxon xkakajpx'øyiidi jøts ja møøt mnamyijotjimbetidit jadigojk, jøts kidi myiknijkxyidi jam windsøn tiidyumbi wyindump. ¿Ja ti nø'ømp ja windsøn jam? Pø mgøyakidipxi ja jam jøts mee myikøyakt ma ja tajk mayojr jamdi, ja'ats mee myikpuxøjktøkiyip jøts mee myiktsu'umt. ²⁶ Øts idø'øn wamp, jøts ku jaanin mbidsø'ømdit ku wyinaty tø ja multi xkubatkjøxti.

Ku ja Jesús tnigajpxy pøn tø'øxy yaa'y nabyøjkxidip

²⁷ Tø meets inet ja xnimadøwi ku jekyip yide'en yjawa'andi: "Kidi mmigu'uk ñiyaa'y ñidø'øxy xpøjkxyi." ²⁸ Yide'ents øts nwa'añ, pøn ja'ayi t'ejxkip ja tø'øxyøjk øy ja nugo y'am yjotp yjawnmay, pøktympts idø'øn ja jade'en.

²⁹ Pøni ka'ap yø mween y'øyi ku yø mduktunk'aty jøts myikpøktyunwā'añ, jade'en ne'egi mdyindyø'øt jøts ku mnawyenjuudit, jøts jagam xpikta'akt ja mween; ne'egi øy'ajtp jade'en ku ja'ayi wyindigø'øty midy myikpøktyunwājnip, jøts kidi amuum mwindigøøgyixy, jøts kidi amuum mnijky jap ayodaajkjotpy. ³⁰ Uk nayide'ents mgø' myikpøktyunwā'añi, ne'egits xkajtspoott jøts køtuk mda'ant; ne'egi øy'ajtp jade'en ku ja'ayi wyindigø'øty midy myikpøktyunwājnip, jøts kidi amuum mwindigøøgyixy, jøts kidi amuum mnijky jap ayodaajkjotpy.

Ku ja Jesús kyajpxwiyj sudso ja amajtsk'ajtin ñaxy

³¹ Nayi tø jekyip yiknigajpxy: "Pøni pøn ñidø'øxy tmajstutu'utwamp, tiy'ajtingøjxpts ja tminawya'lkxit, kojip tu'uk ja nøky." ³² Yide'ents ø nwa'añ, ku pøn yaa'dyøjk ñidø'øxy tminawya'lkxyi a'øy'ampy, ku ka'ap ja wyinaty ja wenk yaa'dyøjk tmøøt'aty, møj tundigø'øyin ja tyumpy, jøts ja tø'øxy pyøktyuñ ku ja wenk yaa'dyøjk ja møøt y'amajtskimyi. Nayi pøky ja yaa'y nayide'en taja'jtipp pøni myøøt'amajtskip ja tø'øxyøjk ja' midy tø wyinaty yikmajtsu'tuty.

Ku ja Jesús tnigajpxy ku ka'ap Dios køjpx nugo ndaay'ajtint

³³ Nayi tøts inet xnimadowdi ku ja mdeety'aptojk jekyip yiknimaadyi: "Pøni ti mni'adso'owip Dios wyingujkp, kidits meets ja xka'ukyik'adujkni ja mgajpxy ja m'ayuujk." ³⁴⁻³⁵ Øtsts wamp jøts pøni ti ja mmigu'uk mdamin'adso'owip, ka'ap ja Dios nugo xyiktestigi'att. Ni xkakajpxpaattit ja tsajp jøts ja naajx, jabi Diosxi ja nayide'en yja'ajtpy; ni ja Jerusalén kajp xkakajpxpaattit, jabi nay ja Dios møj yikutujkpxi kyajp ja'. ³⁶ Uk kø'ømbaat mgubajk x'awanidip ku ja kyayikmibiky midy mjadudjanchjawiwyandip o pøn, kidits jade'en nugo mwā'andi, kidi kø'ømipxi meets mwāay mgubajk xyik'øyi, pø nay Dios ja jade'en kø'øm mmøøjyidip. ³⁷ Ka'ap nugo ti xkajpxjimbettit xkajpx'adøjtitt pøni ka'adam ja ka'pxy xnijawidi, jade'ents idø'øn ja miku' ja tyunkjøøjp tyikyø'øy ku xkajpxyondi.

Ku ja Jesús tnigajpxy sa pøn ja pyøky ñanktyukubetyidi

³⁸ Nayi tø net xnimadowdi ku ojts jekyip yide'en yiknigajpxy: "Jøts nayide'en pøngapøn ja myigu'uk tyik'ayo'ombaat pøni ti ayo'on ja jade'en ttuñ, nayide'ents idø'øn ja tyimykту'unt." ³⁹ Yide'ents ø nwa'añ: Jøts kidi mee nayide'en xuñ sam ja ka'øyja'yindi; pøni mgøjxip mdse'jkip, ja' øy ku xmaa'kxuktit. ⁴⁰ Kuts øy pøn mniwambatwā'añidi jøts adsepkojpx myikpøjkxiwya'andi ja mnijan, mo'odits, jøts pøn yjaaktymyøkwampy ja yukwop, kidits ayuujk nugo xyikyondi, mo'odi. ⁴¹ Pøni myiktaguwa'anidip jøts tsimy xpadsø'ømdit, jøts ja jam xyikja'attit pøni ma tø t'a'ejxidi, mjaaktymdyuujnidipts ja may'ajt ja' jøts ja jawaani jagam xyikja'jtidit. ⁴² Pøni myik'amidoodip øy ti, mo'odits, kidi meets ja kamø'øyin x'ixy; nayide'en pøni pøn anuu'kxy øy ti m'amidojdidip, kidi mee tø mwā'akjimbejtni jøts mmigu'uk møj may x'adsowdi.

Sudso yikminamyayit ja midseptøjk

⁴³ Nayi tø xnimadowdi ku jekyip yide'en yiknigajpxy: "Ja' møøt mnamyayit pøn møøt mnamyigu'ukwā'añi, jøts ja kawin'ixyim xjawit pøn møøt mnamyidsep'aty." ⁴⁴ Yide'en ø nwa'añ: Jøts xtsoktit xmsiyujy'attit ja mmidseptøjkti, ødyejti ja' pøn mga'ødyejyidip, pudøki ja mmigu'uk pøn mjami'ajkidip mjamiotmā'jtidip, ku amidowidi meets ja' pøn mjemnimajyidip mdenimajyidip, pøn mjemduujnidip mdeduujnidip. ⁴⁵ Jade'en'ampy meets ja Dios Teety tsajjotpit mja'bøkidit jøts ja m'u'nk'atidit; pø tum ja'axi tyikni'amp tyiknijajp ja øyjaa'y ja ka'øyjaa'y, uk ku tyu'uy ja'ats ja nøø tuu tkajpx. ⁴⁶ Kuts meets ja'ayi

møøt mnamyayi pøn mee mmiyujy'ajtip, çtits ja jade'en ñiwy'a'ant, ti may'ajit meets ja jade'en myiktagumøyip? Pøn ja jade'en tkajajtp, yikugubajtpi paat ja jade'en ttuñ. ⁴⁷ Uk xkajpxpoo'kxtits ja'ayi pøn jaty mmigu'uk'ajtip pøn tu'ugyi ja mdsinaa'yin møøt ñabyaadyi, çti øy'ajtin meets idø'on jade'en mdumpy? Ti pøn ja jade'en tkajajtp, pø nayide'enxi ja y'adø'øtsti pøn Dios tkajanchja'widip. ⁴⁸ Yikxonts mjaa'y'attit øy wa'ats, nayide'en sam ja mgunuu'kxyteeyi mididi jap tsajpjøtpy.

6

Ku ja Jesús tnanky'ixpiky'ja ødyu'unin

¹ Øyim x'ejxtit, jøts kidi mdsinaa'yin nugo xa'ødyøki ñadyijyi ja mmigu'uk xuk'ejxti øy paat. Pøni m'adø'øtswandipts jade'en, niwine'enants meets Dios Teety may'ajtin ja mgadagumøyidit ja' mididi jap tsajpjøtpy. ² Paty ku xpudøkidit øy pøn ayoobi jaa'y, kidits meets ja niduki'iyi jaa'y xamimadyakixy, kidi mee nayide'en m'adøtsni sam ja jaa'dyi mididi jam tsajptøjkjøtp, mididi jam nøø'am tuu'am win'øø'ndip. Jade'en'ampy idø'on ja jade'en y'adø'øtsti jøts ja kajxa'aky pyidsø'ømdit, jade'enits may'ajtin ja tpokti. ³ Jøts ku xmo'ot øy ti ja ayoobi jaa'y, tunts idø'on jade'en jøts kidibaat ja xuknijawi pøn me mjadyimjamøjigiu'uk'ajtpy, ⁴ ne'egi øy ku ka' pøn xuknijawit ku jade'en xu'unt. Jøts ja Dios Teety wa'ats ja t'ixy ti jaty me mdumpy øy ja pøn xjagaduknijawi, mbaajtipts mets ja may'ajtin ja'.

Ku ja Jesús tnanky'ixpiky'ja Dios'ajot'ajtin

⁵ Jøts ku mdsapkajpxtit, kidi jade'en xundi sam ja jaa'y mididi win'øø'ndip, ja' mididi tsojktip jøts ja tani Dios'ajot'attit jap tsaptøjkjøtpy, uk ma jaa'y y'ejxidit jøts ja jade'en yikajxa'aktit. Jade'enits ja køø'm ñadyukpikyidi ja myay'ajtindi. ⁶ Kuts ja Dios x'ajot'attit, tøkidi mdøjkjøtpy, agø'ødi ja mdøjk jøts xminuu'kxa'aktit anadyu'uk'ampy ja mDios Teety, pø ixajpxi ja nayide'en jøts y'ijxpy ja' ti jaty mee mdumpy, øy meets ja pøn xjagaduknijawi.

⁷ Jøts ku dø'on jade'en ja Dios x'ajot'attit, kidi ja xkajpxjimbetti xkajpx'adøjti mididi ø xja'ukajpxti, kidi jade'en m'adøtsnidi sam ja jaa'dyi pøn Dios tkanija'widip, pøn winmaadyip ku ja y'øømayidit kyajpxmayidit winets Dios ja myadowidit. ⁸ Kidits meets nayide'en m'adi'ich sam ja y'adø'øtstin; pø wa'atsxi Dios Teety ja ne'egi tnijawi pøni ti meets idø'on mga'ejtxip, pøni ti meets idø'on mdsøjkpy, wa'ats ja tnija'wiñi yam meets ja xka'amidøynim. ⁹ Paty idø'on yide'en ja Dios x'ajot'atti:

Dios Teety tsajpjøtpit,
kuuyi mets jadu'uk øy wa'ats.

¹⁰ Øyts ku xmimiñ ja mgutujk mididi mdanitanaapy ja mjaa'y.

Yikjatts ya naxwiñ nayide'en kø'ømdsojkingøjxp pøni sa xamidsøky nayide'en sam jap xuñin tsajpjøtpy.

¹¹ Møøkyts øøts ixayam ja ngaajyik n'uujkik mididi øøts xka'ejtxip.

¹² Maa'kxik øøts ja nga'øy'ajtin ti jaty øø tø nduñ, kumi tø øøts nayide'en mmaa'kxuky pøn øøts xjemdump xedump.

¹³ Agidyujk øøts axajtujk øøts, kidi øøts xmajtstu'uty jøts kidi myajada'aky ja miku' yja'.

Pø metsxi ja' mgutujk mididi ja mjaa'y mdanitanaapy, mets amuum møk'ajtin, jøts ja øy'ajtin xondaajkin mididi xemikøjxp. Jade'en idø'on ja yjatt.

¹⁴ Pøni mmaa'kxuktip ja jaa'y pøn mjemduujnidip mdeduujnidip, nayide'ents meets ja Dios Teety mmaa'kxukidit pøn jap tsajpjøtpy; ¹⁵ kuts pøn xkamaa'kxuktit, ka'ats meets ja Dios Teety mbojkipmaa'kxidit.

Ku ja Jesús tnigajpxy ja amaay'ajtin

¹⁶ Jøts ku m'amaay'attit ku ø kxagugayidit xkagu'uugidit, kidi meets jotmay'øøgyim x'ejxnidi, kidi meets ja jade'en xyiknigaxi'iky sam y'adø'øtsti ja win'øø'mbi jaa'dyi; jade'en'ampy ja jade'en ttundi jøts ja ttuk'ejxti øy pøn jaa'y ku ja jade'en y'amaay'atti. Jade'en'i ja tpaatti ja may'ajtin jøts ja ka'ap Dios yja' tpaajtidi. ¹⁷ Kuts mee m'amaay'att, nawyoogi nagaaxi, puj mween m'aaw, ¹⁸ jøts ja jaa'y kidi tnijawidi jøts kudam me m'amaay'aty. Ja Dios Teety ja tu'ugyi tnija'wip, pø ixajpxi mets ja møøt. Øy mets ti xuñ xkajpxy, ñija'wipts ja wa'ats; nay ja'ats mets ja may'ajtin mmo'ojip.

Ja kunuu'kxy jujky'ajtin mididi jap tsajpjøtpy

¹⁹ Kidi meen kidi pikta'aky ya naxwiñ nugo x'abøjktøkidi ma ja'ambi jøø'kxpi tyikudigøy ja pikta'aky, jøts ma maa'tspi kadye'ebyi tyøkidi jøts ja tuki'iyi tyikpidsømguxy ja pikta'aky.

²⁰ Ne'egi øbyidsø'ømp jade'en ku xjøp'ijxy'attit jøts xpaattit ja jujky'ajtin mididi jap tsajpjøtpy, mididi ka'ap mwindingø'xiyidip. ²¹ Pøni ma xnajtsjawidi xpaatwa'andi ja jujky'ajtin, nay japts meets ja mwinmaa'ñ y'ity.

Ja øy jaj mididi ja jaa'y tyikja'gyukip

²² Xjats ja Jesús yjaakwaañ:

—Jade'en idø'øn yø mween n'ukpiktaajkint sam ja jajin, yø'øts tyikujajtaajkip tyikudøø'kxaajkip amuum ja mne'kx mgojpk; kuts ja mween y'øy'aty, nayide'ents ja amuum tjagyepy ja ne'kx ja kojpk, ka'ap ja ttuktuñ ja kya'øybi; ²³ kuts ja mween kya'øyi, nayide'ents ja tyikjaty ja ne'kx ja kojpk sam pøn kube'ets kugoots y'ity. Pøni jamts ja jaj xmoødi jøts kuts ja xjaaktyimyk'ookni ku ja jade'en yjaaktyimyjajtni sam kyoots'ityin, ijaaktyimyjajnxpts ja' yam ja tø yjakoodsimy!

Ku ka' tuk'ojkyi majtskjøøjp n'ajot'ajtn jade'en ja Dios jøts jade'en ja meen

²⁴ 'Ka' pøn tumbi namaajtsk wyindsøn tmiduñ, ku ja jade'en ttu'unt, tu'ukts ja pyidsø'ømt pøn ja wyinjawip, jøts ja yjadu'ukpi ja tkawinjawit, tu'uk ja t'ømyidu'unt jøts ja yjadu'ukpi ja tka'ømyidu'unt. Paty nayide'en ka' pyaat'aty: jøts nmidu'unin ja meen ixyadamt Dios njamidu'unma'andi, tu'ugyi Dios n'ajot'ajtn.

Ku ja Dios t'ejx'ity pøn jaty ja y'u'ngip y'una'jkip

²⁵ 'Ja'agøjxp øts idø'øn nwa'añ, jøts kidi xjotmay'atti pøni ti dø'øn mga'adyip m'uuktup, pøni ti dø'øn mdajuky'attip, ni ja mwet mnaamy xkajotmay'attit ti dø'øn mnadyaxoxidip. ¿Ti jade'en ja juky'ajtn yikpaaty sami kaaky jii'kxyin? Pø ka'axi. ¿Jøts ja wet naamy mibaat ja t'uk'amibaat nayide'en pøni sa dø'øn ja ne'kx ja kojpk yikmøø'aty? ²⁶ Ejxti yø joon, ejxti yø jiyujk midì kakwidejttip jam tsajpwemp, ka'axi yø ñe'epti kyojti, ka'axi pyikta'aky yø tyikpidø'økti, ka'axi pyikta'aky yø tpøkjø'økti jøts tpiakta'aktit jap tsa'jxjøtpy; øy yø jade'en yjagatundi, yikmøødyipts yjii'kxy yø', ja' yø tmøøpy pøn mee m'ajot'ajtn, ja Dios Teety pøn jap tsajpjøtpy. ¡Tits mee mdsow sa ja jiyujk jade'en ja yja' yikmo'odi! ²⁷ ¿Pøn kø'ømdsøky tyim'yuknankyojnip jagujkp metrìn, øy ja mabaat jade'en tjadyimyjatsøky?

²⁸ ¿Jøts tiku xjotmay'atti ja wet ja xox? Ejxti yø ujts ejxti yø pijy midì yomp aayjøøjty ujtjsoøjty, ka'axi yø pyeetti kyojti, ka'axi yø ti ttundi; ²⁹ jøts øts idø'øn yam wamp, jøts ku ni ja rey Salomón jade'en ojts kyanadyaxøxyi ja xyox ti jaty ja jam wyinaty myøø'ajtpy, sam yø ujts sam yø pijy tmidsujkaxi'iky ja xyox. ³⁰ Pøni xyøjxpy tamts Dios jade'en ja ujts midì ja ixyam yomp ja aayjøøjty ja ujtjsoøjty, øy ja jabom wixøjpk yjayiknitsaañit, ¡tits mee mdsow sa ja ujts sa ja pijy jade'en yjaakyixxøxy, meets kaja'gyukibidi meets ka'ajot'ajtpidi! ³¹ Paty kidi mmaydi mdajti, jøts kidi mwa'andi: “¿Ti dø'øn ngaa'yim njøø'kxim? uk ¿ti dø'øn n'uujkim? uk ¿ti dø'øn nwet'ajtn nnaamy'ajtn?” ³² Tum yø yjade'embì pikta'aky pyawinmaadyip ja ja' y pøn Dios yja' tkaja'gyukyiyidip; meetsts mjagyajppip ja Dios Teety midì jap tsajpjøtpy, ja' ja tnija'wip pøni ti mee mga'ejtxip. ³³ Ja'ats meets jawyeen mjotmay'atp sa xpaattit ja Dios kyutujk midì ja tyanitanaapy yjaa'y, jøts nayide'en ja y'øy'ajtn chuj'ajtn midì yja'ajtpy, mbaatpts meets ja yjade'embì pikta'aky tuki'iyi. ³⁴ Paty kidi nugo xjotmay'atti pøni ti me'emp kida'akp jabom wixøjpk, jabi kø'ømxì ja ñanky'ejxti ñankñijawiyit ja jabomi'ajtn.

7

Kidi pøn o ti xawindsø'ødyi

¹ 'Kidi pøn nugo o ti xapøky'ejxti, jøts Dios nayide'en mgapøky'ejxidit. ² Nayide'en meets Dios ja mdagubatyit pøni sa meets ja mmigu'uk xuñ, nay ja'ats ja yik'awetsp. ³ ¿Sudso dø'øn ja mmigu'uk pyøky x'ejxpaajtiyi, jøts ja mja' ne'egi xka'ixy kudam ja jawaani møj? ⁴ Jøts, ¿sudsots mets idø'øn namykajxibim xkajpx'øyiwyaañ yam mets ja mdsinaa'yin øy xkayikyø'øy? ⁵ ¡Meets win'øø'mbi ataaadyi! yik'øyidi jawyeen ja mga'øchinaa'yindi, winetnimts ja mmigu'uk chinaa'yin xkajpx'øyiyidit.

⁶ 'Jøts kidi nugo ajawi øy pøn xmo'odi midì ja Dios yja'ajip, kidi jade'en xundi sam uk'otigati nugo ajawi yikmøø'øy, ku ja nay ja'ayi m'uktanibidø'ljknnyidit, jøts tsojkt tatsu'utsa'am m'ukyik'ejxnidit. Jøts kidi nugo ajawi xukmadowdi Dios kyajpxy pøn tkaja'gyukidip, ku ja nugo t'uk'amnixeknidi t'uktsaachnixeknidi, taxi'iky nugo tjawidi.

Amidowdi pøktsowdi, ixa'adi kugajpxidi øy ma

⁷ 'Amidowdi pøktsowdi, jøts Dios mmo'ojidit; ixa'adi pøni ti mga'ejtxidip, mdukpaadip meets Dios ja'; uk ku mgugajpxidit muum, yik'awa'atspts øy pøn ja tøj'aaaw. ⁸ Ti ja kidyim'yukyikmøøpy pøn t'amidow pøn tpøktsoop, pyajtpy ja' pøn tigati t'ixaaapy; uk ku pøn kyajpxwidity kyugajpxi, øy muum yik'awajtsxyiyps ja tøj'aaaw ja øy pøn.

⁹ ¿Ti wan meets ja ndejin winaagin pøn y'u'nk y'una'jk tmøøpy tsaa ku ja t'amidøy tsapkaaky? ¹⁰ ¿Uk tmøøy tsaañ ku ja t'amidøy ajkx tsa'ay? ¹¹ Øyts mee mabaat mja-gatyim'yøjjaa'y'atti, mjaajtipts ku xmo'odit m'u'nk m'una'jk midì øy tsuj pidsømp, ¡tits Dios tyungip pø tsajpjøtpyxi ja', myo'opts ja' ja øy'ajtn ja tsuj'ajtn pøni pøn ja amido'oxiyip!

¹² 'Jade'en idø'øn xun'ettit, meets idø'øn ja mmigu'uk mwindsø'øgip sam meets ja kø'øm xjatsøky ja nawyindsø'øgi; kumi yø' idø'øn ja Moisés kyutujk ñi'ane'empy, jøts nayide'en wya'añ ja kugajpxtyøjk ja ñøtkyi.

Ja mutsk tøjkaaw

¹³ Jap idø'øn mdøkidit ma ja tøjkaaw kadanaxyim midi mutsk midi xu'uts. Møj ñidøjk'aaw ja', møj ñiduu' ja' midi nøjkxp jap ayodaajkjøtpty manim idø'øn tuki'iyi wyindigøøgyixy, may ja' pøn jap tøjkidip; ¹⁴ jøts ja tøjkaaw, jøts ja tuu' midi nøjkxp jap ma tsinaa'yin xemikøjxp nbaajtindit, mutsk ja' xu'uts ja', niwaani ja iidiy pøn idø'øn ja tøjkidip.

Pøni sa wyimbidsimy øy ti, ja'ats tyikwingaxø'kp pøni sa ti y'øyi kya'øyi

¹⁵ Øyim mnay'ejx'etidit, øyim x'ejxtit ja jaa'y pøn win'øø'ndip, ñadyijiywya'andi jøts ku Dios yja' ja tkajpxidi. Ñadyijiyi ja mninijkxyidi amyujy tsaachuyuy, ja' y'aawidip yjojtīdip ja kubety'ajtin, ja' wyinmaa'ñ'ajttip ja kya'øybi. ¹⁶ Ja' meets ja mda'ejxkap pøni ti jaty tyundip, pøni sa jaty y'adø'tstī; ka'axi uvi tsa'am yikwiduky jam kujp kipkyøjxp, ni iigi tsa'am kyawinaky jam kujp'aagyipkyøjxp. ¹⁷ Paty idø'øn ja kipy midi øy, pøni øgyipy ja', nayide'ents tyøøm ja øy tyikpidsimy; midi'its ka'øy, nayide'ents tyøøm ja tyikwingaxi'iky ka'øy. ¹⁸ Ka'ap ja øgyipy tyøøm tyikwimbidsimy ka'øy, ni ja ka'øgyipy ka' tyøøm tyikwingaxø'okmi janch øy. ¹⁹ Ja kipy midi jaty ja tyøøm ka'øy, jøts kumi nayide'en idø'øn ja kipy kya'øyi, yikpootp ja' jøts ja ñitø'ty jap jønjøtpy. ²⁰ Jade'en meets idø'øn ja jaa'y x'ejxkapt, ja' ja tñigajpxp pøni ti jaty tyundip pøni sa jaty y'adø'tstī.

Ku ka'ap pøn nugo ajawi tyøkit ma Dios ja kyutujk ja naxwii'ñit jaa'y ttanitani

²¹ Pøni pøn jaty øts jade'en nugo xkajpxpatp, jøts nika'ap ja Dios Teety yja' tpaduujniyidi, ja'ats ka' tpaatti ja Dios kyutujk. ²² Ku tpaatt ja'abi tiempi, ku yja'att ja xøøw jumøjt, may øts ja jaa'y xnøjmidit: "Windsøn'ajtim, windsøn'ajtim, ja'ats øøts tø ngajpxwa'kxy mets ja mja', mets køjxp øøts ja jade'en tø nduñ ku øøts ja miku' tø ngajpxpidsimy jøts øøts jaa'y ja ndukmajtstu'uty, jøts ku øøts ja milagri nayide'en may'ojk tø nduñ." ²³ Kuts ja jaa'y jade'en xnøjmit, winets n'adso't: "Ka'axi mee ma møøt nnay'ijxy'aty, jiwā'akti ya kidi øts ya xwin'ejxti, ku meets kawine'en tø mgawindiy'aty jøts xundi ja kya'øybi."

Majtskjøøjp ja pøch kyøjpk

²⁴ Pøn ø xnimadoop jøts jade'en ttuñ sa nwa'añ, jade'en idø'øn ja' sam ja jaa'y midi wijy midi tyøjk tkøj tsaagøjxp, tum tsaā ja amuum tyukøjpk'ajtpy. ²⁵ Kuts ja tuu myiñ, jøts ja nøgom pyidi'jky, amuum ja nøø'aaw nøøjojt kyombejty, jøts ja poj jadi'iñi tyikpojwimbetwani ja tøj; jøts ja nigidi kyidaay, kumi tum tsaā ja jap wyinaty amuum kyøjpk'ajtpy. ²⁶ Pønts ø xkamimadoop ku ka'ap jade'en ttuñ sa nwa'añ, jade'en idø'øn ja' sam ja jaa'y midi tkaja'gyukip o ti, midi ja tyøjk ojts tkøjy jam pu'jotp. ²⁷ Ku ja tuu øjts myiñ, jøts ja nøø'aaw nøøjojt kyøømy, jøts ja poj jadi'iñi tyikpojwimbetjni ja tøj, ojts ja tøj kyiday. jAdso'jkibim ja ojts yjanchkujeti!

²⁸ Ku dø'øn ja nwindson'ajtim Jesús kyajpx'abajtiyii'ñ jøts ja jaa'y janchñigyumaap tja'widøø ja ixpøjkin; ²⁹ pø jade'enxi ja yik'ixpikyidi sam o pøn møk'ampy kutujk tjagyepy, ka'ap ja jade'en yik'ixpikyidi sam ja kajpxwejpitøjkti.

8

Ku ja Jesús tyiktsøøjky ja jaa'y pyu'uts

¹ Ku Jesús chøø'ñ jam kojpkøjxp jøts kyidaajky, may jaa'y ja ojts pyadsøøni. ² Xjats jaa'y ja ojts tu'uk wingon ñinijkxyi, møj pu'uts pa'am ja pøjkip, ja'ats idø'øn jam ojts ñagyuxendya'agy jam nwindson'ajtim Jesús wyingujkp, jøts ja tñimaay:

—Teety, mmøøt'ajtpy ja møk'ajtin jøts xyiktso'okt, yiktsokts øts mdsojk'ajtingøjxp.

³ Xjats ja ojts ja'ayi tkønixajy, yide'en ja tñimaay:

—Ndsøky'ajtpy øts jøts mdso'okt. Tsokni.

Ja'ayi ja jade'en wyaañ, jøts ja pu'uts pøjkibi jaty ñajxy ja pya'am, jaty tyaagyijxy ja pyu'uts. ⁴ Jøts nwindson'ajtim ja ojts ñi'mxyi:

—Øyim x'ext, kidi pøn xukmadøy; øy ja'ayi xninøjkxt ja teety ja', ja'ayi m'atspaatp jøts ja myøxy ja'ayi xpikta'akt midi ja Moisés ojts tni'ane'emy, jøts ja jaa'y t'ejxtit jøts ku tø mdso'øky.

Ku ja Jesús tyiktsøøjky ja romanit soldadi tyumbi

⁵ Xjats ku ja Jesús kyajptøjkyii'ñ ma ja kajp jam txøøwi Capernaum, jamts ja tu'uk ñimejni ja romanit jaa'y midi wyinaty tñiwindsøn'ajtp nidukpiky ja soldadidi, ja'ats ja møk'ampy nimaajyøø, ⁶ yide'en ja wyaañ:

—Teety, ixajp øts tu'uk ndumbi pa'am tñigo'kni ndøjkjøtpy, jadi'iñi tø myujkni xyujxni, yjanchkupijky idø'øn ja jap ja jayyi tøøyi.

⁷ Winets ja nwindson'ajtim Jesús ja tñimaay:

—Øy øts ja n'atsyiktso'okt.

⁸ Jøts ja jaa'y yide'en y'adsowimbijty midi idø'øn twindsøn'ajtp nidukpiky ja soldadidi:

—Teety, ka'ap ø xpaat'aty jøts mets mdøkit ndøjkjōtpy; ana'am ja'ayi jøts cho'okt øts ja ndumbi. ⁹ Nayide'en øts ane'emy n'ity, nay jats øts ndumbimi midi n'ana'amp. Ku øts nidu'ugin nnøjmidi, nøjkx, nøjkpts ja jaty; uk nnøjmits øts jadu'uk jøts mye'ent, mempts ja jaty; uk nduktunwa'añ øts ja ndumbi øy ti pøn øts jadi'iñi ñyiktumpy ndøjkjōtpy, tyumpts ja' pøni sã øts ja n'ane'emy.

¹⁰ Xjats ku Jesús ja jade'en tmadøø, ñigyumaap ja tjã'wiyi'iñ, jøts ja tñimaay pøn jaty ja jam wyinaty payø'oyiyip:

—Janch øts idø'øn nwa'añ, ni Israelit jaa'y øts ya ma jade'en ngapaadynim sam ya'at jaa'y tmøødin ja janchja'win møk'ampy. ¹¹ Øts idø'øn wamp jøts ku may nayjade'embj jaa'y øy maðsoo choondit, jøts møøt jujky'ajtpi y'ixa'aktit ja Abraham, ja Isaac jøts ja Jacob; yik'ejxti jap ma Dios kyutujk ttanitani ja yjaa'y; ¹² jøts pøn japaat'ajtidip jøts ja yjap'attit ma Dios kyutujk ttanitani ja yjaa'y, yikajxpidsø'ømdipts ja jap jøts ñøjkxtit ma kube'ets kugoots, jøts ja jap chabaawidettit y'amdøtskaattit chaachtøtskaattit.

¹³ Jøts idø'øn ja nwindson'ajtim Jesús tñimaay ja jaa'y midi tñiwindsøn'ajtp tukpiky ja soldadidi:

—Nøjkxni mdøjkwindum, jøts sã tø xjanchjawi yiktu'umpts ja jade'en.

Jøts ja tumbi nay jaty myøkpiky.

Ku ja Jesús tyiktsøøjky ja Pedro tyaa'kmø'jt

¹⁴ Winets ja Jesús ojts ñijxy Pedro tyøjkwindum, jøts ja jam ojts tpaajti ja tyaa'kmø'jt, jøts kudam ja møk jømba'am ja jam tmigo'kni. ¹⁵ Ojts ja tñixaji kyø'køjxp, jøts jømba'am ja ojts jaty ñiwa'açhiy; ojts ja jaty wyã'kuki jøts ja nay jaty wyindsø'jkidyøjkidyidøø.

Ku ja Jesús tyiktsøøjky ja maabyamaaq'y

¹⁶ Xjats ku kyoodsyi'iñ, jøts ja nwindson'ajtim Jesús may'ampy ja jaa'y yiktanimiñi midi ja miku' wyinaty tø tyatøkiyidi; jøts ja ojts ja'ayi tuk'aawy tñigajpxy, ja'ayits ja tyuktapidssøøm ja maamyiku' jøts ja tyikmø'køjkixy niduki'iyi ja pamaaq'y. ¹⁷ Jade'en'ampy idø'øn ja jade'en yjajty, jøts idø'øn ja jade'en tyimyjaty sã wyinaty tø tñigajpxy ja kugajpxy Isaias, ku ja yide'en wyaañ: “Ja' tuki'iyi tmidanaagyøjxp adøm n'ayo'on, nay ja' tmidanaapy adøm ja nbøjkin n'aa'nin.”

Ja jaa'y midi wyinaty tpawidewamp ja Jesús

¹⁸ Xjats ku ja nwindson'ajtim Jesús ojts t'ixy ku mayjaa'y ja yjanchtamujkniyi, winets ja ojts wyã'añ jøts ttanaxtit ja nøø jøts ñøjkxtit jam jaduktamajñ. ¹⁹ Winets tu'uk ja kajpxwejpi myiñi ma ja Jesús jam wyinaty, jøts ja Jesús ojts yiknøjmi:

—Windsøn, tsoomp øts, nbanøjkxp mets øy maðsoo pøni ma me mniijky.

²⁰ Jøts ja nwindson'ajtim Jesús y'adsøø, yide'en ja wyaañ:

—Ne'egi jaa ja waajx yjut, ne'egi jaa ja joon pya'an; øtsts, niti ø xka'ejtxy øyik øts idø'øn ma n'øøni'int.

²¹ Xjats ja jaa'y jadu'uk wyami midi ja wyinaty pyabøjkpi'ajtpy, yide'en ja ñimaajyøø:

—Windsøn'ajtim, tñijxy øts jawyeen ja ndeety t'atsyiknaxøki.

²² Winets ja Jesús y'adsøø jøts ja wyaañ:

—Møødik øts, majtsu'ut yø oo'kpi, wan ja tyikpidø'økti ja myi'oo'kpi pøn y'amnija'win jajujky tø tyik'oo'knidi.

Ku ja Jesús tyiknaxjy ja møk poj jøts ku ja tyik'amøkiyi'iñ ja mejy

²³ Jøts ja nwindson'ajtim Jesús tyøjkiñaa jam barkijotp møøt ja pyabøjkpitøjk. ²⁴ Winets ja poj møk'ampy yjantymyiñi jam mejyotp, jadi'iñi ja nøø yjanchtojmjø'kni jøts jap barkijotpy yjanch'ayo'øyini. Maapts ja nwindson'ajtim Jesús wyinaty. ²⁵ Winets pyabøjkpitøjk ja ojts yuxyiyi, yide'en ja ojts ñi'i'mxyiyi:

—iWindsøn'ajtim, ejx øø nnøøjøm'kxni, yiknitsok øøts! iPøø ndøjkjy'adøjtsnampts!

²⁶ Jøts ja t'adsøø yide'en:

—¿Ti mdsø'jkidip ku mdsø'øgidi? iJanch yii'nim meets ja janchja'win xmøøt'aty!

Xjats ja tyanaagyukyiyi'iñ, jøts ja ojts tñøjmi ja poj jøts wan tñaxy jøts ja mejy kya'uk'adøtsnit; jøts idø'øn ja jadi'iñi myøøñ, nayide'en jotkujk'atym tyaañ sam idø'øn ku ja et kyapøy. ²⁷ Jøts ñigyumaap ja tyimyja'widøø, nømdip ja':

—¿Ti pøn jaa'y yø jade'en, mimadoojipaap poj yø', mimadoojipaap mejy yø'?

Ja Gadarit jaa'y pøn wyinaty ja miku' tø tyatøkiyi

²⁸ Xjats ku ja nwindson'ajtim Jesús yja'jty jaduktamajñ mejy'agø'øm, jamts ñaxwimbidsømdøø Gadara y'etjotpti, winets jaa'y namajtsk pyidsømdøø jam kamsantijotp ma oo'kpi ñaxøkidi, jøts ja ojts tñimendi ja nwindson'ajtim Jesús. Miku' ja wyinaty tø tyatøkiyidi tum jade'en ja namajtskti, janch tyimgyubetyts idø'øn ja'adi, ka'ap idø'øn ja jam øy pøn tkunaxi jam tuu'am. ²⁹ Jøts ja yjanchabaabinaxwa'a'aktøø:

—¿Ti øø xanibøjkp, ti tsepxik adøm njagyejpyim, mets Jesús, mets Dios U'nk? ¿Ja' mets ya tømniñ jøts øøts istryami xtyimyk'ayo'ombaawangøjy?

³⁰ Nay jamyits idø'øn wingon wyinaty y'ojkwidejtmidi maagyuch; ³¹ winets ja miku' nuu'kxajkingøjxp t'amidoodøø ja Jesús, yide'en ja tnimaadyøø:

—Pøni xyikpidsømwaamp øøts, wants øøts yø' kuch ttatøki.

³² Xjats ja Jesús wyaañ, yide'en ja tnimaay:

—Nøjkxti.

Jøts idø'øn ja miku' jade'en pyidsømdøø, ojts tmajtstu'utti ja jaa'y jøts ja maagyuch ja ttøjkidyøø; winets ja kuch niduki'iyi yjanchnabyagunajxidøø jap jaa'ljøtpy jøts ñaxkidaktøø jap nøøjøtpy, japts ja ñøøjøø'kxkøjxtøø.

³³ Jøts ja jaa'y midi wyinaty kuch'ejxtip, ojts ja kya'akti, janch tsø'jkidip ja', jøts ku ja jam kajpjtøp yja'ttøø, jamts ja tuki'iyi tnimadyakøjxtøø sa wyinaty ja jaa'y tøm yjatti kyubatti pøn ja miku' wyinaty tøm y'uktatøkiyidi. ³⁴ Winets ja jaa'y niduki'iyi cho'onðøø pøn jaty jam wyinaty kajpjtøpti, jøts ja ojts ñøjkxti ma ja Jesús jam wyinaty; kuuyits ja ojts t'ejxti, jøts ja tnimaadyøø møk'ampy jøts ja jam tymbyidsø'mt ja' y'etjotpti.

9

Ku ja Jesús tyiktsøøjky ja køuxjxi pakxujxpi

¹ Xjats ja Jesús tyøjkijii'ñ barkijotp, jøts ja ojts ñijky jam jaduktamajñ, ojts ja ñøønaxy jøts ja yja'lty kyajpkøjxp. ² Jamts jaa'y ja ojts tu'uk yiktaninjky midi køuxjxp pakxujxp, ki'iy ja jam ojts tyiknøjkxti. Jøts ku dø'øn ja nwindson'ajtim Jesús ojts jade'en t'ixy ja jaa'y jøts kudam ja møk'ampy ja janchja'win tjanchmøødidi, jøts ja pamaa'y ja tnimaay:

—Kidi u'nk nugo mdyimyjotmay'øøky; nbøjkpimee'kxpy mets.

³ Winets winaaagin ja kajpxwejpitøjk wyinmaadyøø jøts ja wyandøø: “Dios yø jade'en kya'ømyigajpxpy, pø nugo jaa'yxi yø.” ⁴ Jøts kumi wa'ats ja nwindson'ajtim Jesús ja tnijawi sa jaty ja wyinmaydi, jøts ja tnimaay:

—¿Tigøjxp ku jade'en ka'øwvinmaa'ñ xjagyapti? ⁵ ¿Ja ti ne'egi jawaani jajtne, kuts yø pa'amjaa'y nnøjmit: “Nmee'kxpy øts yø mbøky”, uk ku nnøjmit: “Wa'kuki, pøkmukni yø nmaaabajt jøts nøjkxni mdigam”? ⁶ Ixyamnim meets inet x'uk'ext mabaat øts idø'øn ja møk'ajtin nmøøt'aty ya ñaxwiñ jøts ø nmaa'kxt ja pøky.

Xjats ja tnimaay ja køuxjxi pakxujxpi:

—Pidø'kni wa'kukiñi, wejtsjø'øk yø nmaaabajt jøts mnøjkxnit mdigam.

⁷ Winets ja pamaa'y jatyi wya'kukijii'ñ jøts ja ojts ñijky jam tyøjkwindum. ⁸ Kuts ja mayjaa'y ja ojts jade'en t'ejxti, xjats ja yjanchø'jkñidi, winets ja tjamyajtsti ja Dios jøts ja tmøja'widøø tkunuu'kxyja'widøø, ja'agøjxp ku ja jade'en t'ejxti jøts kudam ja Dios Teety myøø'ajtin tmøøt'ajiti, pø niñugo jaa'yxi ja ttejti.

Ku ja Jesús tpawaay ja Mateo

⁹ Xjats ja nwindson'ajtim Jesús jam ojts chøøñ, jøts ja ojts t'ejxpaaty tu'uk ja jaa'y pøn txøøw'ajtp Mateo, jam ja wyinaty chøøni ma ja yikugubajtpi y'ixa'akti, jøts idø'øn ja tnimaay:

—Mada'ak, møøt widetk øts.

Winets ja Mateo tyanaagyukijii'ñ, jøts ja ojts pyadsøøñiyi.

¹⁰ Ku wyinaty ja nwindson'ajtim Jesús jam kyay Mateo tyøjkjotp, winets ja mayjaa'y jam mendøø pøn yikugubajtpi, møøt ja'adi pøn ka'øy jaa'y yiktejtjip. Ja'ats idø'øn ojts yjam'atti, jøts ja tmøøt'ixaktøø jam kaadyaajk windum møøt ja Jesús jøts ja pyabøjkpitøjkti. ¹¹ Ja'ayi ja fariseotøjk ja ojts jade'en t'ejxti, xjats ja nwindson'ajtim Jesús pyabøjkpitøjk yik'amidoodøø:

—¿Tigøjxp ku yø mwindsøn tmøøtkay yø yikugubajtpitøjkti møøt yø kawindijjaa'dyi?

¹² Ojts ja nwindson'ajtim Jesús ja tmadøy, xjats ja kø'øm tnimaay ja fariseotøjk:

—Pøn møk pøn kasajajtpi, ¿ti ja tyikwa'andit ja tsøøyibi? Ja' ja tsojktip pøn pøjkidip. ¹³ Kidi ja'ajip ø tømniñ pøn øy pøn wa'atsti, ja' ø tømniñ pøn pøkyundip jøts ja chinaa'yin tyiktigatstip. Nøjkxti jiw'a'akti, pamaadyi padajti pøni ti dø'øn tyijpy ya'at Dios kyajpxy: “Ja' ø ndsøjkpy jøts xmøøt'attit ja pa'ayo'owin ja ayo'ejxin, jøts ne'egi kidi xyik'ookti yø jiyujk yø tsakaq midi jaty myøjxtip.”

Ku ja Jesús yiktiibyijky tigøjxp ku ja kya'ayuu'atti

¹⁴ Winets ja Juan Bautista tyumbi myendøø ma ja nwindson'ajtim Jesús jam wyinaty, jøts ja ojts tyiktøwdi, yide'en ja tnimaadyøø:

—¿Tigøjxp ku øø n'amaay'aty møøt ja fariseotøjkti, ngakay nga'uuky øøts jøts mets yø mbabøjkpitøjk jaayi yjanchkaydi yjanchjøø'kxti, niwine'en kya'amaay'atti?

¹⁵ Xjats ja nwindson'ajtim Jesús y'adsøøy jøts ja tnimaay:

—¿Ma meets jade'en tøm x'uknijawi jøts ku tømniñaabyi tømni'ukpi winet y'amaay'atti winet kyakaydi kya'uukti ku ja jemaa'y jamni? Abikñimts ja tiempit yimija'tmit ku

ja jemyaa'y wyinaty kya'uk'ejtñi ku ja jam wyinaty tō cho'oni, jaanimts idō'ōn tiy pōn kya'ukaaniit kya'uk'ukniit; jaanim idō'ōn ja y'amaay'attit.

¹⁶ 'Ka'axi pōn wyetpach tta'agiyi jemwyet midi tyimyjemñim, ku ja jade'en yiktu'unt jōts kumi mujkpi ja jemwyet jōts ja tjaaktyimgyōō'tsni ja wetpach, jaaktyimyiwenip ja kyōōts'ajtin ja'. ¹⁷ Jōts nayide'en ka' y'ōyi jōts yikpikta'akt ja vino jap po'dukjōtpy midi nāmii'kxñim; ku ja jade'en ndu'unint, takōō'tsipts ja po' jōts jade'en nugo wyindigōy, windigōōpy ja po' jōts nayide'en ja vino. Paty ja vino midi nāmii'kxñim nda'ada'amyin ja jembyo'ak jōts jade'en nimidi kyawindigō'ōty.

Ja Jairo ñōōx, jōts ja tō'ōxyōjk pōn ja Jesús ja wyet ojts ttojñi

¹⁸ Exam idō'ōn ja nwindson'ajtim Jesús jade'en wyinaty wya'añ, ku yja'jty tu'uk ja windson pōn tñigubajk'ajtip ja israelit jaa'y, jōts ja ojts ñagyuxendya'agiyi ja' wyinguikp, jōts ja ñimaajyōō:

—Tō ōts nnōōxu'nk y'ōōky tyimyi'ixanim; kudsik mets inet ja'ayi mme'ent jōts waani xkōnixajt, jujkpyōjkp inet ja jadigojk.

¹⁹ Xjats ja nwindson'ajtim Jesús wya'kukiyii'ñ jōts ja ojts tmōōdi ja jaa'y mōōt ja pyabōjkpiōjk. ²⁰ Winets tu'uk ja tō'ōxyōjk myiñ jam nwindson'ajtim Jesús yjixkō'ōm jōts wyet pa' ja ojts yiktōñ. Myakmajtsk jumōjtíp idō'ōn ja wyinaty tō pyaajtniyi ja taxnaxyi jōts ja jadine'en tmi'ity; ²¹ jōts kumi yide'en idō'ōn ja wyinmay: "Ja'ayik ōts ja wyet inet yō ndojnit jōts ōts inet ndso'okt." ²² Jōts ja nwindson'ajtim Jesús ojts wya'kjimbity, ojts ja tyimyi'ixy ja tō'ōxyōjk jōts ja tñimaay:

—Kidi u'nk mdsō'ōgi; ja'agōjxp tō mdsō'ōky ku ō tō xjanchjawi.

Jōts idō'ōn ja nay jatyi myōkpijky.

²³ Kuts ja nwindson'ajtim Jesús yja'jty jam israelit windson tyōjkwindum, jōts ojts t'ixy ku ja xuxpi ixapnidi, ja oo'kpi ja yikpidō'ōkwandip, jōts ja mayjaa'y xem yam yjanchya'a'xti, ²⁴ xjats ja tñimaay:

—Pidsōmdi; ka'ap yō kiixyu'nk y'ōōgyi, maap yō ja'ayi.

Jōts ja yjanchyikniixijky ku dō'ōn ja jade'en wya'añ. ²⁵ Kuts ja tyikpidsōmgijxy ja mayjaa'y, winets ja tyōjkii'ñ jōts ja ojts kyō'kōjxp tmach ja kiixyu'nk, jōts ja nay jatyi pyidi'ijky. ²⁶ Jōts idō'ōn ja jam jade'en ōy mā yikni'ia'wiyii'ñ ja kajpxy ja ayuujk midi wyinaty tō tyuñi.

Ku ja Jesús tyikwin'ejxwa'kxy ja winap jaa'y

²⁷ Kuts ja nwindson'ajtim Jesús jam chōō'ñ, winets ja winap jaa'y namaajtsk tuu'ajy pyadso'oniyi, mōk ja yjanchnōmdi:

—iRey David me m'ap'ajtip, ayo'ejxx ōōts!

²⁸ Kuts ja Jesús tyōjkii'ñ jap tōjkjōtpy, winets ja namaajtskpi winap jaa'y ñimejni, xjats ja tñimaay jōts ja ttiibyijky:

—¿Mwandip idō'ōn amumjoojt jōts ku ōts yō yjade'embi xma'aty?

Jōts ja ñōmdōō:

—Windson'ajtim, wamp ōōts idō'ōn jade'en.

²⁹ Winets ja nwindson'ajtim Jesús ja mimōj twingudo'oniyii'ñ, yide'en ja tñimaay:

—Wan idō'ōn jade'en tjaty pōni mābaat mee nayide'en ja mjanchja'win xmōōt'aty.

³⁰ Jōts wyeen ja ōy tyandōō, ojts ja wyin'ejxpōkti. Jōts ja nwindson'ajtim Jesús ja mōkta'aky tñimaay:

—Ōyim mnay'ejxidit jōts kidi pōn xukni'jawidi.

³¹ Jōts ja'ayi ja jap ñibyidsōmdōō, ojts ja tñimadyakōxti sa nwindson'ajtim Jesús ja wyinaty tō yikmōkpiyidi, ojts ja tñimadya'akti ōy mādsōo wine'enin ja et jam.

Ku ja Jesús tyikajpxpiky ja uum jaa'y

³² Kuts ja jam wyinaty wya'kpidsōmdi, winets winaagin ja jaa'y tñanimendi ja nwindson'ajtim Jesús tu'uk uum jaa'y, miku' idō'ōn ja wyinaty mi'ejtjyp, ja'ats ja ka'ukyikajpxniyip. ³³ Ja'ayits ja nwindson'ajtim Jesús tyikpidsimy ja miku', jōts ja uum jaa'y jatyi jadigojk y'awijy. Jōts idō'ōn ja mayjaa'y ñigyumaap yjajtōō, yide'en ja wyandōō:

—Ka'anin ya Israel pōn jade'en t'ijxñim sam ixyam yik'ijxyin.

³⁴ Ja fariseotōjkti yide'en ja wyamidi:

—Jade'en'ampy yō jaa'y tyikpidsimy yō miku' ku yō nayi' wyindsōn myōk'ajtin tyiktu-ujniyi.

Ku ja Jesús t'ayo'ijxy ja mayjaa'y

³⁵ Widejtp idō'ōn ja nwindson'ajtim Jesús ōy mādsōo wan tkamjōtpi wan tkajpōtpi, jōts ja yik'ixpiky mā jatyi ja tpaaty ja tsapōjk kajp kajp. Ja Dios y'ōgyajpxy y'ōmyadya'aky ja kyajpxwa'kxip sa tñanitit ja yjaa'y, jōts ja tyiknaxy ōy ti pa'am, ōy ti pōjkin aa'nin. ³⁶ Ku ja ojts t'ixy ja mayjaa'y, jōts ja ojts t'ayo'ixy ku ja tsaach'ijxyimidi, janchjōtmay'ōōk'tip ja',

nugo ja jadi'iñi myondi tyukti, jade'en ja yjawi yjajtnidi sam borreek ñi'ejxpi kya'ejtxiyidi. ³⁷Xjats ja nimaay ja pyabøjkipitøj:

—Janch øts idø'on nwa'añ, ku ja jaa'y may pøn tnijawiwandyip ja Dios yja', jats ka'ejtjp pøn ttukmadowidip. ³⁸Paty x'amido'odit ja Dios Teety jøts ja tyumbi ttanigaxt ja'abi jaa'y.

10

Ku ja Jesús twiwijch ñimakmajtsk pøn wyinaty kyudanaabyi'atwampy

¹Xjats ja nwindson'ajtim Jesús tyaxmujky ja pyabøjkipitøj mididi ñimakmajtskti, jøts myøk'ajtin ja ojts tmø'øj, ja'ats ja ttuktabidsø'ømdit ja miku'jøts ja tyikmøkpøktit pøn øy tigati pa'am pøjkidip.

²Yide'en idø'on ja ñimakmajtskpi pabøjkipitøj ja xyøøwdi: tu'uk Simón txøøwi, nayi yiktejp ja Pedro, jøts ja y'uch txøøwi Andrés; Jacobo møøt ja' y'uchmi mididi txøøw'ajtp Juan, ja Zebedeo y'unaj'jk; ³Felipe, Bartolomé, Tomás, jøts Mateo ja yikugubajtp; jøts ja Alfeo myajnk pøn txøøw'ajtp Jacobo; jøts Lebeo pøn nayi yiktejp Tadeo; ⁴jøts jadu'uk Simón cananista; jøts ja Judas Iscariote pøn tnankmyajtsip ja nwindson'ajtim Jesús.

Ku ja Jesús tkexy ja pyabøjkipitøj kajpxwa'kxpi

⁵Yide'en ja nwindson'ajtim Jesús t'ane'emy ja ñimakmajtskpi pabøjkipitøj ku ja ojts tkajxtsøø'ñ:

—Kidi jam etjotp mnøjkxti ma chøønidi pøn ka'israelit jaa'dyi, ka'abaat mnøjkxtit ma jaty ja kajp jam Samaria; ⁶ja'ayi mee mninøjkxp mididi ja Israelit naxjøøjty, ja' idø'on ejtnidip sam ja borreek tyigøydi. ⁷Nøjkx xkajpxwa'kxti jøts ku Dios kyutujk wyingøñ mididi ja tyanitanaapy yjaa'y. ⁸Yiktso'okti pøn pøjkip ja møk pu'uts pa'am, jøts pøn tigati jajtjidip, yikjujkyøkti ja oo'kpidi, jøts kajpxpidsømdidi ja miku'jøts tmajtstu'utt ja jaa'y. Meets idø'on yø yjade'embidi møk'ajtin tøn mniyikmø'øj; nayide'ents xyiktunkpaattit sam tøn myikmo'odi.

⁹Kidi ti meeñ xkondi, ni oori, ni plati, ni cobre, ¹⁰ni pejnbaat xkawetstet. Mnimdjak niti xkako'ondit, tu'ugyi mwet xminøjkxtit mididi ixja mwet'ajttip; tumbixi mnøjkxti, mgaabyaatp meets.

¹¹Ku øy ma mja'attit wan tkamjotpi wan tkajpjotpi, jamts x'ixa'adit tu'uk ja jaa'y mididi nijawi, mididi tsojpk ja Dios yja', ja' tyøjkjotp nja'da'aktit kunim mdsøondit jam kajpjotp, winetnimts jam mbidsø'ømdit. ¹²Ku mdøkidit tøjkjøtpy, kajpxpoo'kxti ja jaa'y. ¹³Pøni m'adsojidiid ja jaa'y, øy'ajtp; kuts ja ka' t'adsojimbity, majtstu'uttits ja'. ¹⁴Jøts ku pøn mgagupøkidit, uk ka' paat tmadowa'andi pøni sa me mjawa'añ, pidsømdits jam ja'abi tøjkjotp uk ja'abi kajp. Winapti ja pu'ux mididi jam mdekyøjxp, jøts jade'eñi xuk'ejxtit jøts ku jade'eñi tøn mnañiwa'a'achidi. ¹⁵Øts idø'on wamp ku wyinaty yja'aty ja tiidyu'unin, ne'egi kajaa yø yjade'embidi jaa'y ja ayo'on tymbyaattit, jøts nigidi jade'en y'ayo'ombaattit ne'egi ja kawindiy jaa'dyi pøn jam tsinaadyøø jam Sodoma jøts jam Gomorra.

Ku ja yiknigajpxy jøts ku ja pabøjkipitøj yikmatswa'andit

¹⁶Yim xmadø'odit jøts xnijawidit jøts ku meets jam nguexy ma ka'ap nugo ajawi øy pøn tyøki! Mjadyimñay'ejx'etidip, yikxonim mnañiwijy'atidit, kidi øy ti xtsepøkti, yuyj køøm mnabyikta'agidit. ¹⁷Øyim x'ejxtit, øyxi dø'øn jaa'y mgøyaditidit ma kudunktøjkj jamdi, jøts myikwinwoptit myikjøpwoptit jam tsaptøjkjotp. ¹⁸Myiknøjkxi paat meets ja jaa'y jam ma jaty ja møj windsøn yikutukti, ja'agøjxp ku øts nja' xpabøjkidi; jats idø'on ja ñibidsømit jøts meets ja xukmadø'ot pøni sa øts idø'on ja n'ixpøjkin, ja'abaat meets xukmadø'odit pøn ka'israelit jaa'dyi. ¹⁹Kuts myikøjaktit jam kudunk wyindumdi, kidi xkumayjawiidi, kidi meets ja xpamaañi xpadajni pøni ti dø'øn jam mgajpxtip, uk pøni sa dø'øn jam mwa'andit; ja'ayi ja y'ukja'att pøni juuni dø'øn mgajpxtit, nagyø'ømts Dios mmo'ojidit ja ayuujk pøni sa dø'øn mwa'andit. ²⁰Kidi meedsipxi ja mmiwinmaa'nbyaatp ku mee mgajpxt, pø ja Dios Teetyxi y'Espiritu Santo myikajpxidip.

²¹Jade'en nøjkx jaty kyubety pøni pøn øts nja' wyinaty xkupøjkiyip, jøts ja myigu'uk paat ja tyamidsepøktit jøts ja tnankyik'loogit, jøts ja u'nkteety jøts ja u'nktaak nayide'en ttumidit ja y'unaj'jk nay ja'agøjxp ku øts nja' janchpabøjkidi nidu'ugin; jøts ja u'nk unaj'jk nayide'ents ttumidit ja tyeety tyaaq, tyik'ooktit paat ja'adi. ²²May jaa'y mee mmi'akiyip mmijotma'adiyip ja'agøjxp ku meets nja' xpabøjkiy; pønts tmidanaapy øy wine'en paat, ja yjade'embidi jaa'yts idø'on nitso'ok'atp. ²³Ku myiktabawiditit ja kipy ja tsaq, kaknøjkxtits ma kajp jam jadu'uk; øts idø'on wamp, jøts ku øts wyinaty jawyeen tøn nmeni yammim meets ja kajp xka'ayø'øj'abidsømdidi mididi jaty ja israelit jaa'y kyajp'ajttip.

²⁴Ka' pøn ixpøjkpi tjaaktyimyjaxy ja mya'estri, jøts ni ja tumbi tkajinaxy ja wyindsøn. ²⁵Tyajotkujk'attip idø'on ja ixpøjkpi, janch møj idø'on ja wyinaty ku yja'attit jade'en sam ja mya'estri, jøts ja tumbi sam ja wyindsøn. Pøni miku'dam ø nyiktijy ku mee nniwindsøn'aty, çtits meets mdsow, ti meets jade'en mjaakayiktejp?

Ja' midi yiktsø'ogip

²⁶ Paty ka' pøn xtsø'ogidit. Ka'axi ti kyanigaxi'iky øy pøn ti tjadyimy'ama'atsk'aty, ka'ats ja kyayiknijawi øy pøn ti tjadyimyjayu'uch'ity. ²⁷ Pøni ti mee nda'agajpxip, tukmadowdits meets ja jaa'y ja'; nigajpxtits ja yikxon pøni ma x'a'ejxidi myikmadowdi ømyadsowi. ²⁸ Kidi yikjaa'y'oo'kpi xtsø'ogidi, pø ka'axi anmija'win ja tjadyimyik'ookti; ja Dios ja' idø'on tiy ne'egi mdsø'ogidip, pø ja'axi møk'ajtin tjagyajp jøts ja jaa'y tyikwindigøy møøt ja y'anmija'win jap ayodaajkjøtpy.

²⁹ O dø'on ja joon mabaat kyidyimchobaaty, nayide'en idø'on ja Dios Teety ja t'ejx'ity. Ni tu'ugin ja kyawindigøy pøni ka'ap ja kø'øm tyikutuky. ³⁰ Tu'uk tu'uk meets mwaay machø y'ity. ³¹ Kidi mdsø'ogidi, ne'egi jawaani jinaxy mee mnibayø'øyi, ¿ti ti meets mdsow, ti sa ja mayjoon chobaaty?

Pøn tmøjpiktaktip ja Jesucristo jam mayjaa'y agujkp

³² Pøn jaty ø xpukajpxip, pøn wamp mayjaa'yjøøjty jøts ku øts ja xpabiky, nayide'ents øts ja møk nnitanit jam Dios Teety wyingujkp pøn jap tsajpjøtpy. ³³ Pønts ø xkabukajpxip, pøn wamp mayjaa'yjøøjty jøts ku øts ja ka' xpabiky, nayide'ents øts ja niwine'enin nga'ejxjimbett, niwine'enin nganitanit jam Dios Teety wyingujkp.

Jesús køjx ja jaa'y ñawya'kxyidi

³⁴ Kidi mee mwani jøts ku øts jaa'y kuwani xtyimyjatyajotkujk'attit, pø may idø'on ja nøjx kyanachokidit øts køjx. ³⁵ Jade'en ja tpatni jøts jaa'y ja y'u'nk y'una'jk y'ukmidsepøjkniyt, ja u'nk ja xa'kxy ja u'nk ja nøøx ñamyatsidit; ³⁶ tukmigu'uk ja jade'en y'uknamyidsepøjkniytidit.

³⁷ Pøn tyeety tyaak jawaani tyikmøjtøjkip sam ø ka'ap xmøjpikta'agyin, ka'ap øts ja mibaat nja'aty; jøts nayide'en pøn y'u'nk y'una'jk jawaani tyikmøjtøjkip jøts nigidi ka'ap øts, nayide'en øts ja ka'ap mibaat nja'biky; ³⁸ jøts pøn ø xkagu'ayo'ombaadiwyamp ku jaa'y yik'ookwa'anit, jøts øts ja nja' jade'en xkatunwajni, ka'ats øts ja mibaat nja'bøkt. ³⁹ Pøn kasajatyim nay'ejxip, pøn nabya'ayojip, ka'ap ja mibaat ja nits'ok'ajtin tpaaty; pønts kanabya'ayojip wan tjaty sa yjaty øts køjx, ja'ats idø'on tpaatp ja nits'ok'ajtin.

Ja may'ajt

⁴⁰ Ja jaa'y pøni pøn mgupøjkidip, øts idø'on ja wyinaty jade'en xkupøjktip; jøts pøn øts jade'en xkupøjkp, ja'ats ja nayide'en kyupijky pøn ø xkajx. ⁴¹ Pøni pøn tkajpxkyupøjkp ja Dios kyugajpxy, jøts kumi Dios ja kajxip, nayide'en ja jaa'y yikmay'att sam ja Dios kyugajpxy yikmay'atyin; jøts pøn tkajpxkyupøjkp ja øyjaa'y ja'agøjx ku y'øyjaa'y'aty, nayide'en ja yikmay'att sam ja øyjaa'y yikmay'atyin. ⁴² Jøts pøn ø xmøjyjp ja n'u'nk n'una'jk øy tukvasin ja tsujxk nøø jøts kumi øts ja nja'ajtpy, jøts janch øts idø'on nwa'añ ku ja nayide'en yikmay'att.

11*Ja jaa'dyi pøn ja Juan Bautista ojts tkexy*

¹ Xjats ku nwindson'ajtim Jesús tta'ana'am'abajtiyi'ñ ja nimakmajtskpi pabøjkpitøjk, winets ja ojts chøøñ, jøts ja ñijky yik'ixpøjkpi kajpxwa'kxpi ma jaty ja kajp jam ja'abi etjotp.

² Jøts ja Juan Bautista, ku ja jam wyinaty puxøjkjotp, jøts ja tnija'wiyi'ñ ti jaty wyinaty tyump ja Cristo ja yiknitsokpi, winets ja tkejxy namaajtsk ja pyabøjkpi jøts ja t'ats'ejxtit ja nwindson'ajtim Jesús, ³ jøts ja t'atsyiktø'ødit yide'en:

—¿Mjanchjacristo mets idø'on, ja yiknitsokpi midi tijy menwamp, uk njøp'ejxp øøts idø'on jadu'ukpi?

⁴ Xjats ja nwindson'ajtim Jesús y'adsojimbijty:

—Nøjxiti jøts jade'en xukmado'odit ja Juan sa jaty ti jaty m'ejxtip mnija'widip.

⁵ Tamimadya'akti sa winap jaa'y wyin'ejxwa'kxti, sa pakma'at jaa'y yø'øyjø'økti, sa yø pu'uts pøjkibi cho'okti tuki'iyi, sa nat jaa'y myadoobøkti, sa oo'kpi yjujkyøkti, jøts sa ayooobi jaa'y ja Dios kyajpxy yiktuukmadowdi. ⁶ Nekim ja'adi pøn tu'ugyi ja janchja'win tmøøt'ajttip, ka'ap winguwopi jøpkuwopi midajttit ku ø xjanchjawidi.

⁷ Ixanim idø'on ja wyinaty tyimchoondi ja Juan Bautista yjaa'y midi ja pyabøjkpi'ajtpy, ku ja nwindson'ajtim Jesús tnmadyaktøjkii'ñ ja Juan, yide'en ja tniimaay ja mayjaa'y:

—¿Ti ojts x'ejxti jam abak etjotp ku jam ojts mnøjkxti? ¿Ojts meets jam yjawi x'ixy tu'uk ja jaa'y midi jade'en jajt p sam kapy pyojimbity pyoj'adijy? Pø ka'axi, pø tu'ugyixi ja tni'ity ja wyinmaa'ñ. ⁸ ¿Tits idø'on ojts x'ats'ejxti? ¿Uk ojts x'ejxti tu'uk ja jaa'y midi janchweti janchnaamyi, midi janch tsuj ja wyet tø tyikpety? Pø wa'atsxi xnijawidi pøn jade'en naxyojxidip jøts ku ja jam ñachøkyidi ma ja windsøndøjk jam chøøni. ⁹ ¿Tits inkwan idø'on mjantyim'ats'ejxtøø? ¿Tu'uk ja Dios kyugajpxy? Janch ja'ats idø'on pøn jawaani

tjaaktyimyøj, nigidibaat ja yjadu'ukpi jade'endi. ¹⁰ Ja Juan idø'on jade'en yiknigajpx ku wya'añ Dios kyajpxy yide'en:

Ngajxjawyenip øts, u'nk, ja ngugajpxy tu'uk,

jøts ja jaa'y ja wyinmaa'ñ ja tyiktøøjit tyiktuudaajkit, jøts mets ja m'ixpøjkin yikjøp'ext.

¹¹ Tyiibyi øts idø'on nmadya'aky, jøts ku ka'ap jade'en pøn myajada'akñim Dios kyugajpxy sam ja Juan Bautista; pøni pønts øts nja' xpaduujnip jøts ku tyøki ma øts ngutujk ttanitanit ja jaa'y, ja'ats ne'egi yikmøjpiktaktip jøts nika'ap ja Juan Bautista.

¹² Jaayip ja Dios kyutujk cheptak'okwani ku yø Juan Bautista myiñ jøts ixymbaagtñim kyakixy kyanaxy. Aguwani ja tjadyimyjammajada'akwa'andi pøn nadya'aja'wiyidip ja yjotmø'ajtindi. ¹³ Pøn ja Dios kyutujk yjawi tka'uknigajpxip, ni'ijtyi ja tñigajpxti pøn Dios kugajpxy'ajtidip, jøts nayide'en ja Moisés kyutujk tyikwa'añ jøts jaabaatñim ja tø yikni'amøñ ku ja Juan Bautista yam tø myiñ; ¹⁴ jøts pøni mjantymyjanchjawiwyaandip, ja Juan idø'on ja' pøn yiknigajpxp jøts ku mye'ent jadigøjk ja Dios kyugajpxy miditøøw'ajtp Eliás. ¹⁵ Pøni pøn yikxon tñimadoop, wants tja'gyuki.

¹⁶ Jade'en meets mdami'ejxi sam ja mutskuna'jk muum y'adø'øtsti jam maayjotp, ku ja my'una'jk nisudso'ampy tkagupøjkiyidi ja kyuyajtin midit ja yja' ttsøjkpy yjaguyatwampy, jade'en ja yiknimaadyi: ¹⁷ "Tø øø njaxu'uxy, ka'ats m'atswa'andi; tø øøts ja cancion jotmay'øøgyim nja'øømi, ni jade'ents tø mgaya'axti." ¹⁸ Tøxi yø Juan myiñ jøts ka' yø kyay jøts ka' yø y'uuky, jøts mwa'andi jøts ku miku'yø myøøt'ajtpy. ¹⁹ Xjats ø tø njamemi, kaapy ukpts øts, jøts mwamidi jøts ku øts janchkaxim ngay n'uuky, jøts ku øts ja møøt nnamyayi pøn yiktejtj jantymbyojkpitumbijaa'dyi, jøts nayide'en møøt ja yikugubajtpitøjkti. Pøni pønts ja Dios yja' tkupøjkip, ja'ats tja'gyukip sam ja Dios yja' tsøkyin.

Ja kajp midit kamadoodip

²⁰ Xjats ja nwindson'ajtim Jesús ttamigajpxkixy ja kajp ma jaty ja wyinaty tø ttuñ ja milagri'ajtin, ku dø'on ja jaa'y jam ka' tyimykigtatstñim ja chinaa'yin. Yide'en idø'on ja wya'añ:

²¹ —iMjanch'ayøøy meets, Corazingit jaa'dyi! iMjanch'ayøøy meets Betsaidit jaa'dyi! Ku jeexyip ja milagri'ajtin tyuñi jam Tiro jøts jam Sidón midit meets ya tø myiktu'unxi, ku ja jeexyip jam yiktuujnidi ja milagri'ajtin, windi'ixyip ja jeexyip tyiktigajtsnidi ja chinaa'yindi, ku ja pyøky jeexyip tymchaachjawidi. ²² Øtsts yam wamp jøts ku nøjkk ja tiidyu'unin ñaxy, mgu'ayowip meets ja jinaxy, nika'ap ja ne'egi jade'en y'ayo'odit pøn tsinaadyip jam Tiro jøts Sidón. ²³ Jøts meets Capernaumit jaa'dyi, ¿ma mee xijy mnøjxkti tsajpøtpy? Pø japxi meets ayodaajkjøtpy mnøjxktit. Ku jeexyip ja milagri'ajtin yiktuñ jam Sodoma midit meets ya tø myiktu'unxi, ne'egi nay jaa ja kajp jeexyip, ka'ap ja jeexyip sa yjaty. ²⁴ Øtsts idø'on tymwyamp ku wyinaty ja tiidyu'unin ñaxy, ne'egi yikxon mee ne'egi mjaaktyimy'ayo'onbaat, jøts nigidi jade'en pøn jaty tsinaadyøø jam Sodoma.

Yq mendi jøts mboo'kxtit

²⁵ Xjats ja nwindson'ajtim Jesús yjaakwaañ:

—Dios Teety tsajpøtpit, yikjujky'ajtpi ya naxwiñ, nmøja'wip mets ngunuu'kxyja'wip mets, ja'agøjxp ku tø xamidsøky o pøn ja mniitsojkin jøts yø wijy jaa'y ja tø tkaja'gyukidi kø'øm, ne'egi tøts ja xuk'ixy xuknijawi pøn idø'on ka'ejxiyimdi. ²⁶ Jade'ents Teety tø xuñ sa kø'øm xamidsøky øy pøn.

²⁷ Xjats ja Jesús tñimaay ja mayjaa'y:

—Tum ja' øts ndeety xuktump midit ja kø'øm tyunwampy. Ka'ap øts pøn jade'en xnijawi sam øts ndeety kø'øm xnijawi; nika'ats øts ndeety pøn wa'ats ñijawiyi sam øts ja kø'øm ndyimñijawi, jøts pøni pøn øts ja nduknijawiwampy, ja'ats tñijawidip ja Dios Teety. ²⁸ Øts idø'on xnime'endip pøn jaty agøjxtip jotkøjxtip, pøn jaty ø xku'ayo'ombaa'ajtidip, øts mee nyikpoo'kxp. ²⁹ Kupøjkidik øts ja n'ixpøjkin jøts mwinnaa'nbyaattit jade'en sa meets tø ndaniwinmayi, yujy øts winmaa'ñ njagyepy; pyaattpts meets ja m'anmija'win ja øy'ajtin ja kunuu'kx'ajtin. ³⁰ Yø ixpøjkin midit meets yam nmøøpy, ka'ap yø chepi, jajtñi yø', ja'ayi xka'ixmatsttit.

12

Ku ja Jesús ttjøttøø ja ariin yam poo'kxin xøøw

¹ Tuu'yø'øpy ja nwindson'ajtim Jesús wyinaty, poo'kxin xøøwts idø'on, jøts ja jam wyinaty ñaxti ma kam jam. Janch yuu'oo'kktipts ja pyabøjkpitøjk jøts ja ariin uun ja ttjøppinaxwa'ktøø, jøts ja pyajk ja tjøø'lxxiyidi. ² Xjats kuts ja fariseotøjk ja jade'en t'ejxtøø, winets ja ttamajstøø ja nwindson'ajtim Jesús:

—Ejx yø mbabøjkpitøjk jade'en y'adø'øtsti, jøts ka'ats pya'at'aty jøts yø jade'en y'adø'øtstit ku poo'kxin xøøw.

³ Xjats ja yide'en yiknimaadyøø:

—¿Ti ka'anim meets ja Dios kyajpxy x'i'xy midí t'nigajpxp sa ja David tuk'o'jk t'nøø't'adiijch ja myigu'uk, ku yuu ja wyinaty yik'ookwa'aníyidi? ⁴ Tsaptø'jkøtpyxi ja ojts t'yøki, adjts ja ojts tkay ja kunuu'kxy chapkaaky midí ja Dios yiktamiyoxp, midí ja ka'ap pyaat'atyí jøts ja tka'aty, uk jøts ja ttuka'aty ja myigu'uk, ja'ayi ja paat'ajtidip pøn teety'ajtip. ⁵ ¿Jøts nigidibaatnim meets ja kutujk x'e'xjin midí ja Moisés yjaay, midí wamp jøts ku teetyø'jk ka' pyoo'lxkti jap tsaptø'jkøtpy ku poo'lxkin xøøw, jøts nika'ats ja pyøkyi? ⁶ Øts wamp jøts ku ja jadu'uk jawaani møj, nika'ap tsaptø'jk yja' jade'en. ⁷ Ka' meets yø xnimadø y pøni sa dø'ø'n yø t'jatijy ya'at Dios kyajpxy ku ja Dios Teety wyaañ: "Ja' ø ndsø'jkpy jøts xmoø't'attit ja pa'ayo'owin ja ayo'e'jxin, jøts ne'egi kidi xyik'ookti yø jiyujk yø tsakaa midí jaty myoxtip." Kuk y'ijty xja'gyukidit, ka'abik mmigu'uk y'ijty xpøky'e'jxtit øy ja ti pøky t'jagatundi. ⁸ Ngudanaapy øts ja naxwii'nit jaa'y jøts øts wamp ti paat'ajtip kapaat'ajtip yiktu'unt ku poo'lxkin xøøw.

Ja jaa'y midí ja kyø' jadi'iñi tøtsnip

⁹ Xjats ja nwindson'ajtim Jesús jam chøø'ñ jøts ja ojts ñijky, tyøjkiy'i'ñ jam tsaptø'jkøtp ¹⁰ ma wyinaty jam tu'uk ja jaa'y midí ja kyø' jadi'iñi tøtsnip tuktamajñ; jøts kumi øy idø'ø'n ja tyimy'ixa'adi ti ja yjadyimy'uktani'øønidip ja nwindson'ajtim Jesús, jøts ja tyiktøødøø t'amidoodøø ñadyijyi:

—¿Kutujk yø' ku pamaa'y jaa'y nyiktsojkin ku poo'lxkin xøøw, u ka'?

¹¹ Jøts ja nwindson'ajtim Jesús ja ojts t'adsø yide'en ja t'nimaay:

—¿Wan meets ja mborreek ndejin jadi'iñi xmajtstu'utt ku ja wyinaty tø kyunaxy jap jutjøtpy yam poo'lxkin xøøw? Pø kuwanixi ja xninø'jkxtit jøts ja x'atsjuuttit. ¹² ¿Ti sats ja jiyujk jade'en yjaakyikjotmay'aty, jøts ja jaa'y jadi'iñi yikmajtstu'utt? iPø ka'axi, pø jaa'yxi ja'! Paat'ajtip n'ødyu'unin øy pøn ku poo'lxkin xøøw.

¹³ Xjats ja yiknimaay midí ja kyø' wyinaty tøtsp:

—Xajtøw.

Jøts ku dø'ø'n ja ojts xyajty, tyimyø'kpø'jk ja kyø' ja', nayide'en ja tyimya'wiyi'i'ñ sam ja yjadu'ukpi køø' midí møk. ¹⁴ Winets ja fariseotø'jk wya'kpidso'mdøø, jøts ja tka-jpxy'ajtipnibø'jkidøø sudso ja t'jadyimy'ukyik'ooktit ja nwindson'ajtim Jesús.

Ku ja Dios kyugajpxy Isaías t'nigajpxy sa ja Jesús jyatwa'añ kyubatwa'añ

¹⁵ Kuts ja nwindson'ajtim Jesús ja t'nija'wiyi'i'ñ, winets ja jam ojts cho'oni jøts mayjaa'y ja ojts pyadsøøñi. Yikmø'kpø'jkijpxy idø'ø'n ja pamaa'y ja', ¹⁶ jøts ja yikxon ttukmadø y jøts ja ka'ap ñimadya'agidit pøni pøn idø'ø'n ja'. ¹⁷ Jade'en'ampy idø'ø'n ja jade'en yjaty, jøts ja jade'en ka'pxy tyimyjatt sa wyaañ Dios kyugajpxy midí Isaías'ajtp, ku ja yide'en wyaañ:

¹⁸ Yø' øts idø'ø'n tø n'a'e'jxi, øts yø' ndumbi,

yø' ø ndsø'jkpy jøts yø' ø ndajotkujk'ajtpy.

Nmo'op øts yø' ja nmøk'ajtin ja n'Espiritu Santo,

jøts øts yø x'nigajpxit ja ndiy'ajtin o magajp.

¹⁹ Ka'ap yø cheekt, ka'ap yø wyo'pt, ka'ap yø ya'axt yjokt, niduk'aawin yø kyayikmado't ja y'aaw y'ayuujk ja nøø'ajy tuu'ajy.

²⁰ Ka'ap yø øy pøn nugo tyimdy'a'oo'kpety,

ka'ap yø nugo tukmajada'ak tyimyajada'aky øy pøn mabaat tyimyjatundigø y,

kunim yø yikxon t'pikt'a'kt ja kyutujk ja tyiy'ajtin.

²¹ Jøts yø ødyimbyøngajpi y'ajot'attit.

Ku ja Jesús yiknimaay jøts ku miku' myø'ajtin ja tyiktuujni

²² Xjats ja nwindson'ajtim Jesús ojts yiktaninijky tu'uk ja jaa'y midí winap midí uum, jøts tø miku' ja wyinaty tyatø'kyi. Ojts ja tyikmø'kpjky jøts ja jaa'y wyin'e'jxwa'kxy jøts ja y'awijy jadigo'jk. ²³ Jøts idø'ø'n ja jaa'y ja ñigumaay tyimya'widøø, yide'en ja ojts wya'andi:

—¿Ti ya'at ndejin, ja rey David y'apip?

²⁴ Xjats ja fariseotø'jki ja'ayi ja ojts jade'en t'nimydowdi, xjats ja wyandøø:

—Jade'en'ampy ya'at jaa'y tyikpidsimy yø miku' kumi ja møj miku' myø'ajtin yø yiktu-ujnip, jøts yø ttuktabsimy ja myimiku', yø'øts yø wyindsøn'ajtip.

²⁵ Wa'ats ja nwindson'ajtim Jesús ja t'nijawi sa jaty ja wyinaty wyinmaydi, jøts ja t'nimaay: —Ñimidi'ibi kutujk kø'ømyi ñamyidsep'atyí, kuts ja cheptundi ja xem yam jadi'iñits ja ñankyudigøyidi; u ku kajp u ku jaa'y tukmigu'uk ñamyidsepikyidi jøts ñawya'kxyidi, ka'ap ja yikjøp'ijxy'aty jøts ja jeky ñankchøøniyidit. ²⁶ Jøts nayide'en yjaty ku ja møj miku' tyikpidsimy ja myimiku', tøts idø'ø'n ñamyayi ñawya'kxniyi; ¿sudso'ampyts ja jade'en y'lett ja myø'ajtin? ²⁷ Pø jade'enxi mee mwa'añ jøts ku øts jade'en'ampy ja miku' nyikpidsimy ku øts ja møj miku' myø'ajtin nyiktuujniyi; pøni janch jade'ents, çpønts meets ja mmigu'uk ja myø'ajtin yiktuujnip ku ja miku' ja nayide'en tyikpidsø'mdi? Ja'axi mee mni'øø'niyidip jøts ku nugo jade'en nugo mjadyimgyajpxigøydi. ²⁸ Kuts øts, jade'en'ampy øts ja miku'

nyikpidsimy ku øts ja Dios myøk'ajtin nyiktuujniyi, jade'ents meets idø'øn yø xja'gyukit jøts ku Dios ja kyutujk tø mdanija'adyidi midi ja tyanitanaapy yjaa'y.

²⁹ '¿Pønts øy nugo tyimy'uknidøjkip ja jaa'y jap tyøjkøtjopy midi janch kamaabyim, øy ja pøn tyimyjapøjkxiwyajni ja pyikta'aky? Jawyeenxi ja yikøwøønt yikpakwøønt, winetnims ja yikpøjkøjxit ja pyikta'aky, pø tøxi øts nayide'en ja miku' yja' nmimajada'aky.

³⁰ 'Pøn ø xkabudøjkip, ja' øts idø'øn xmidsepwamp; jøts ku øts pøn ti møøt njapøk mukwa'añ, jøts ja jinaxy tpøkwa'kxy.

³¹ 'Paty meets idø'øn nnøjmi, jøts ku øy tyimyjapøni yikmaa'kxkøjxp ja' pyøky, pøni ti jaty pøn tyumpy kyajpxpy; kuts pøn tka'uk'ømyigajpxt ja Espiritu Santo, niwindem ja mibaat kyayikpojkpimee'kxy. ³² Jøts øy øts pøn xjaga'ømyigajpxy, jaakyikpojkpimaa'kxp ja'; jøts ja' pøn tka'ømyigajpxp ja Espiritu Santo, ka'ap ja mibaat yikpojkpimee'kxy yä naxwiin, jøts øy tyimyjamadso'ji.

Pøni sa wyimbidsimy øy ti, ja'ats tyiknigaxø'kp pøni sa ti y'øyi kya'øyi

³³ 'Ku kipy y'øyi, nayide'en ja øy tyøøm tyikwingaxi'iky; jøts midi ka'øy, nayide'ents tyøøm ja tyikwingaxi'iky ka'øy. Ja tyøømts ja kipy yikta'ejxkajp pøni sa øy ka'øy tyøømi. ³⁴ 'Meets win'øø'mbidi! ¿Sudso mee m'øgyajpxt jøts ka'ats m'øyyjaa'yidi? Jøts pøni sa y'awa'kxy yø aaw, tum jamts yø chøøñ midi jam ujts abøki yikmøøt'ajtp jam amjotp. ³⁵ 'Pøn øy jaa'y, jade'en'ampy ja tyikpidsimy ja øgyajpxy ja øwyyinmaa'ñ, kumi tum'øwyyinmaa'ñ ja yjagejpy jam y'am yjotp; jøts idø'øn ka'øyyjaa'myidi jade'en'ampy tkayikpidsimy ja øwyyinmaa'ñ, kumi tum ja ka'øybi ja jam myøøt'ajtpy y'am yjotp. ³⁶ 'Øtsts mee nnimaapy jøts ku wyinaty ja tiidyu'unin ñaxy, ja'abi xøøwts tuki'iyi yikøyajxøxt ja øgyajpxy ja ka'øgyajpxy pøni sa pønjabøn tø wya'añ. ³⁷ 'Pøni sa ja m'ayuujk pøni sa ja mwinmaa'ñ, nayide'ents myiktidiyu'undit, nay ja' myiktapøky'ejxtip, nay ja'ats mgayiktapøky'ejxtip.

Ku ja ka'øyyjaa'y t'amidowdi jøts yiktuk'ejxtit ja milagri

³⁸ 'Winets ja nwindson'ajtim Jesús ja fariseotøjk ñimaa'jyøø møøt ja kajpxwejpitøjkti:

—Windsøn, ja' øø n'ejxwampy jøts øøts xuk'ext tu'ugin ja milagri'ajtin, pøni janch ku mjanchdiosu'ngi:

³⁹ 'Xjats ja nwindson'ajtim Jesús ja t'adsøøy:

—Ja' idø'øn ja milagri'ajtin amidoodip pøn kawindiyyaa'y'ajttip; ka'ats ti milagri'ajtin y'ukyiktuk'ejxnidit, wan ja'ayi sa yjajty kyubejty ja Jonás ja Dios kyugajpxy. ⁴⁰ 'Nayide'en ja Jonás y'ljity tigøøk xøøw tigøøk tsuu jam ajkx yjotp jøts pyidsimy jujky, nayide'ents øts idø'øn jap naxpatki'py n'ett tigøøk xøøw tigøøk tsuu jøts nbidsøømt jujky. ⁴¹ 'May'ampy pyidøøktit ja jaa'y pøn jaty tsinaadyøø jam Ninive ku yja'att ja tiidyu'unin xøøw, ku yø jaa'y yiktidiyu'undit pøn jaty ixyam tsinaadyip jujky'ajttip yä naxwiin, yø'øts idø'øn yikpøky'ejxtip; kumi ne'egi yiktigajtstøø ja Ninive jaa'y chinaa'yindi ku ja Jonás ja ojts tyukmadøyidi ja Dios kyajpxy, jadyimy'ixyats idø'øn ja' midi jawaani møj jøts nika'ap jade'en Jonás, jøts ka'ap meets ja xmøjpikta'aky. ⁴² 'Nayi pidøø'økp nayide'en ja windsøn'øxy ku tiidyu'unin xøøw, ku ya'at naxwii'ñit jaa'y yiktidiyu'undit jøts pyøky ja yiktani'øønidit; kumi jagam et ja ojts chøøñ, jøts ja ojts jaldine'en t'nimiin ja Salomón ja t'patmadoo'wajni ja kyajpxwejin, ixyats jadu'uk midi jawaani tñija'wip jøts nigidi jade'en Salomón, jøts ka'ap meets ja xmøjpikta'aky.

Ku ja miku'jadigojk t'awimbeti ja chinaadyaajk

⁴³ 'Ku miku' t'ajtstut'uty ja jaa'y, jøts ñijkxy widejtpi tø'øts etjotp, tja'ixa'ay ja pyoo'kxaajk; jøts kuts nimä tkapaaty, xjats wyinmay: ⁴⁴ "Nay ja ndøjk ø n'awimbetip ma ø tø ndsøøñ." Kuts wyimbity, jøts ja jaa'y jade'en yikpaaty sam tøj kawa'ats, pe'ety jaaxy ja jap. ⁴⁵ 'Xjats ja chøøñ, jøts ja tjaaktyimy'atsway ja niwixujk ja myimiku' midi jawaani ka'øydi, jøts ja niduki'iyi ttatøkidi ja jaa'y, tsinaadyaajk ja tyikwa'andi. Nayide'ents idø'øn yø kawindy jaa'y yjattit.

Ja Jesús tyaak jøts ja y'uch

⁴⁶ 'Exam idø'øn ja nwindson'ajtim Jesús wyinaty jade'en tmigajpxñim ja jaa'y, ku ja tyaak yja'jty jøts y'uchti myigu'ukti. Japyi ja ojts tøk'agui'py y'awejxti, ja' ja tyimy-jamigajpxwandip. ⁴⁷ 'Jøts ja nwindson'ajtim Jesús yiktukmadøøy, jam idø'øn ja pøngapøn tñigajpxkøjy:

—Ixap ja mdaak tøjkwimpy y'awixy møøt ja m'uch, jøts mets mmigajpxwajnip.

⁴⁸ 'Jøts ja tñimaa'y pøn wyinaty jade'en tø tyukmadøyi:

—¿Pøn øts ndaa'gip, pøn øts idø'øn n'uchip?

⁴⁹ 'Winets ja tñigu'umiyi'ñ ja pyabøjkpitøjk jøts wya'añ:

—Yø' øts idø'øn ndaa'gidip, yø' øts idø'øn n'uchidip. ⁵⁰ 'Pøn øts ja ndeety kyutujk tpadu-ujniyipi midi jap tsajpjøtjpy, yø' øts idø'øn nmigu'ugidip, yø' øts idø'øn ndaa'gidip.

13

Ku ja Jesús tmadyakpaaty ja jaa'y pøn nøjx neppi

¹ Jøts ja nwindson'ajtim Jesús jam tøjktotp pyidsiimy, jøts ja ojts ñijkxy jam mejy'am, jamts ja y'ixaajky. ² Jøts kumi janch may ja jaa'y ñamyujikidi ma ja jam wyinaty, winets ja nwindson'ajtim Jesús tyøjkiyi'ñ jap barkijøtpy, japtis ja y'ixaajky, jøts ja mayjaa'y jam niduki'iyi tyandøø nøø adsajotp. ³ Xjats ja ttuk'ixpijky ja y'ixpøjkin, ñimyay idø'on ja ojts tñigajpxkøjy. Tum ejxpajtin madya'aky ja tyanimadyakpy pøni mididi idø'on ja y'ukyiktamija'gyukip, yide'en ja wyaañ:

—Tu'uk ja jaa'y chøø'ñ neppi; ⁴ jøts ku ja ojts twijy ja tyømt, xjats ja tømt winaagin ñaxkidaajky jam tuu'am, ja'ats ja joon ojts tñimendi jøts ja wa'ats tpeemujkøjxtøø. ⁵ Winaagin ja tømt ñaxkidaajky jam tsaajotp ma ja naajx kyamajpxyi; ja'ats ojts tsojkk myujxkojti kumi ka'ap ja naajx kyøjki. ⁶ Kuts ja xøøw ja'ayi pyidsiimy, ja'ats ja ojts chaa'iyi, yats y'aats ja yjaakidyimy'ejtnidi, xjats ja tuki'iyi ojts tyøtskøjxni. ⁷ Jøts ja tømt winaagin ñaxkidaakmøø jam maagyujp'aguikp, jøts ku ja maagyujp yøøñ, ja'ats ja ojts ñi'aa'mbajtniyi. ⁸ Jøts ja tømt ojts waani ñaxkidaakmi ma øñaajx, ja'ats janch'øyiyi'ñ; winaagin magø'pxy pyajkpejty ja tu'ukpi tømt, winaagints tugui'pxy, jøts winaagin ee'pxmajk. ⁹ Pøni pøn ja ja'gyukin tmøøt'ajtp, wan tja'gyukidi.

Tigøjxp idø'on ja Jesús ejxpajtin madya'akyøjxp ja y'ixpøjkin tyaky

¹⁰ Winets ja nwindson'ajtim Jesús ja pyabøjkpitøjk ñimejnyiyi wingon jøts ja tyiktøødøø:

—Jadits ku yø jaa'y jade'en xamimadya'aky ejxpajtin madya'aky ku xyrik'ixpijky?

¹¹ Jøts ja t'adsøoy:

—Meets Dios ja'ayi mduknija'wiyip ja kyutujk jap tsajpjøtpy mididi pøn tkanija'wipnini; jøts ka' yø mibaat tñijawidit. ¹² Pønts tjagyajp ja ja'gyukin, jaaktyimyikmo'opts ja' jøts yixxon tyimyjja'gyukit; jøts pøn kaja'gyukip, jaaktyimyikpøjkxiptis ja' pøni wine'en paadin ja jap tjaakjamøødi ja wyijy'ajtin. ¹³ Paty øts yø jade'en ndukmadowdi wenk madya'akyøjxp; yjadymy'ejxtipxi jade'ents yjattit sam tø tkidyimy'ejxti, yjadymyjamadoodip jade'ents yjattit sam ti tkidyimñimadowdi, uk sam pøn ti tkidyimyadøyin. ¹⁴ Jade'en idø'on ixyam tyimyjati sam wyaañ ja Isafas ja Dios kyugajpxy, ku ja yide'en wyaañ: Mjadyimyjamado'odip jøts ka' xnimado'odit;

mjadyimyjaj'ejxtip jøts jade'en mjattit sam pøn ti tkidyimy'ijxñim.

¹⁵ Nisudsøampy yø yjade'embi jaa'y kya'ukmadoonidi ja y'anmija'win, tum ka'øy tñimadowdi,

jøts wimbeets kugoots y'ejtnidi;

ka'ap ja wyeen ttawin'ejxti,

nika'ap ja tyatsk ttamadowdi,

nika'ap ja kyubajk yja'gyukidi,

jøts ni øts xkanimendi øyik øts idø'on nyiktso'oktit.

¹⁶ Xjats ja Jesús tjaaknimaay ja pyabøjkpitøjk:

—Meets idø'on janchjotkujk'atym, kumi mda'ejxtip ja mween jøts kumi mdamadoodip ja mdatsk. ¹⁷ Jøts janch øts idø'on nwa'añ, jøts ku may ja jaa'y pøn jaty Dios kugajpxy'ajtidip, pøn jaty øyjaa'y'ajttip, jade'en tyimyjawemp'ejxwandi pøn meets ixyam m'ijxpy, jøts nijuunits tø tka'ejxti; yjadymyjamadoowandi ya'at jade'en mididi meets ixyam mmadøøpy, nijuunits ja tkamadowdi.

Ku ja Jesús tñigajpxy sudso døø'n yikja'gyukit ku jaa'y neppi ñijkxy

¹⁸ 'Ukpatmadowdim meets, jøts xja'gyukidit pøni sudso'ampy idø'on ya'at madya'aky tijy ku ja jaa'y chøø'ñ neppi. ¹⁹ Pøn tjamadoidip ja Dios kyajpxy sa ja ttanitanit ja yjaa'y jøts nika'ap tmøjpkta'akti, ja'ats idø'on jade'en jajtjip sam ja tømt mididi ñaxkidaajk jam tuu'am; jøts miku' ja jaty ñimiñiyi jøts ja pyøjkiyi ja Dios kyajpxy mididi ja tø tja'ukja'gyuki. ²⁰ Jøts ja tømt mididi ñaxkidaajk jam tsaajotp, jade'en idø'on ja ñamyayi yjaty sam jadu'uk ja jaa'y pøn tpatmadoidip ja Dios kyajpxy jøts ja jotkujk'atym tkupøjkojti, ²¹ jøts kumi jade'ents yjattit sam ja ujts y'aats kya'ejtxiyi, jøts ja nigidi jeky tmi'etti; ku ja tku'ayo'ombaaðidi ja Dios kyajpxy uk yiktabawopti paat, jøts ja jaty tyimy'ayojidi. ²² Jøts ja tømt mididi yikwøj jam maagyujp agujkp, jade'en idø'on ja n'ukpiktaajkin sam ja jaa'y pøn tpatmadoidip ja Dios kyajpxy, jøts ja pikta'aky jøts ja jotkujk'ajtin ja' ne'egi yjotmay'ajttip, ja' ja win'øø'nidip, jøts ja Dios yja' tyigøøñi jøts ja jaa'y ja yjanchja'win nika'ap tyikwingaxi'iky. ²³ Ja tømt mididi ojts ñaxkida'aky jam øñaxjotp, jade'en ja nbiktaajkin sam ja jaa'y pøn tpatmadoidip ja Dios kyajpxy jøts yja'gyukidip, jøts yikwingaxø'øktip. Jade'en ja winaagindi sam ja tu'ukpi tømt pyajkpety magø'pxy, jøts winaagin jade'en sam ja' mididi pajkpaajtp tugui'pxy uk ee'pxmajk.

Ku ja ariin yiktamineejpi ja ka'øy ujts

²⁴ Jøts ja nwindson'ajtim Jesús tjaaktamimadyaajky jadu'uk ja madya'aky, jøts ja mayjaa'y yide'en tnamaay:

—Jade'en idø'on ja Dios kyutujk midu yjaa'y ja tyanitanaapy sam tu'uk ja jaa'y twijyjn ja ødyømt jam kyamjotp, ²⁵ jøts ku ja wyinaty ixjam myaanidi niduki'iyi, winets ja kugam myidsep ojts tyatøjkxiyi ja kyam, jøts ja ojts t'atswiy ja ka'ø yjts jam ariinjotp. ²⁶ Kuts ja ariin yøøn ku ja y'uuniyii'n, jøts ja ka'ø yjts jam nayide'en pyidsiim. ²⁷ Winets ja tumbi t'atsnimaadyøø ja wyindsøn: "Windsøn, pø janch tum ødyømts mets ojts xijy xwiy jam mgamjotp, çmats yø ka'ø yjts tø chøøn?" ²⁸ Jøts ja wyindsøn ja ñimaajyidøø: "Ja ta'ajkibi ja tajotm'a'tpi net jade'en tø y'adøø'tsti." Xjats ja tumbi tyiktøwidi jøts ja wyandøø: "çMdsøjkpy jøts øøts ja ka'ø yjts n'atswejxkøxt?" ²⁹ Yide'ents ja ojts y'adsøyidi: "Ka', ku net ja ka'ø yjts yjayikwext, nayide'ents inet ja ariin yikwejxnit. ³⁰ Ne'egi tyimy'ø'y'atp jøts jade'en xmajtsu'uttit, wan jade'en tyondi, jaanim ku wyinaty tø tymbyaaty jøts yikwejxnit; winets øts ja tumbi ngaxt jøts ja jawyeen twejxmujkøxtit ja ka'ø yjts, yikxon t'adsu'umdit tuk'øøxy jaty jøts ja jade'en yiknitsa'at, jøts ja ariin yikpøkjøøkt jap abøjk'ii'ñjotpy."

Ku ja Jesús tmadyakpaaty ja mortas tømt

³¹ Ñayi myadyaajk ja nwindson'ajtim Jesús jadu'uk ja madya'aky:

—Jade'en idø'on ja Dios kyutujk midu yjaa'y ja tyanitanaapy sam ja møj mortas tømdin midu jaa'y wyijpy kyamjotpy. ³² Jøts kumi jaaktyimchuu'kxni ja ñidømt yø', ka'ap jadu'uk jade'en ujts midu yjamigu'uk'ajtpy; kuts yøñ, yikxon yjantyimyøñ møj tukmøj kipyjn, janch møj idø'on yøñ ti sa øy ti joon myendi kixy kida'aky, jøts ja ñabye'eñidi jam kipy awajkøjpx.

Ku ja Jesús tmadyakpaaty ja lewaduri

³³ Ñayi tyamimadyaajk jadu'uk madya'aky:

—Jade'en idø'on ja Dios kyutujk midu yjaa'y ja tyanitanaapy sam ja lewaduri midu tø'øxyøjk tyamimøø'kxyip ja ariin way ku ja tø tkijpxy tigøøk ojk a'ejxi, jøts ja jich yikxon yaa'kpiky.

Tigøjpx ku Jesús xumi jade'en tyik'ixpiky ja jaa'y ejxpajtin madya'akyøjpx

³⁴ Ejxpajtin madya'akyøjpx idø'on ja nwindson'ajtim ja y'ixpøjkin tñigajpxy, jøts tum jade'en idø'on ja tñigajpxy pøni ti dø'on ja ñimadya'akwampy. ³⁵ Ja'agøjpx ja jade'en yjajty jøts ka'pxy wyimbidsøømt sa wyaañ ja Dios kyugajpxy ku ja yide'en tjaadyaañ: Ejxpajtin madya'aky ø nyiktu'ump ku ti ngajpxwa'ant; jøts nnigajpxp øts ja' midu ka' pøn tñigajpxnim, wine'en yam kujk y'ity kuuyip ja Dios tyik'øyiyii'n ja naxwii'ñit jøts ixyaambaat.

Ku ja Jesús tñigajpxy sudso dø'on yikja'gyukit ku ja ariin yiktamineejpi ja ka'ø yjts

³⁶ Xjats ja nwindson'ajtim Jesús ojts tminawya'kxyi ja jaa'y jøts ja tyøjkii'ñ tøjktøjty, japts pyabøjkpitøjk ja ojts ñimiñiyi, jøts ja ñimaajyiyi:

—Tuknimadook øøts yikxon ja madya'aky ku tø xnimadya'aky ja ka'ø yjts midu yomp jam kamjotp.

³⁷ Winets nwindson'ajtim Jesús ja ñimaajyidi:

—Ja tømt wøjpi, øts idø'on ja', ³⁸ jøts ja kam, naxwii'ñit ja'. Jøts ja ødyømt, ja jaa'dyi pøn Dios kyutujk tpaduujnidip, jøts ja ka'ø yjts, ja jaa'yts ja'adi pøn ja miku' yja' tpaduujnidip, ³⁹ jøts ja ta'ajkibi tajotm'a'tpi midu tnepp ja ka'ø yjts, nay ja miku' ja køøm. Jøts ku tpaaty ja ariin wejxk'aats, ja dø'on ja' ku naxwii'ñit jaa'y yiktu'dyu'undit, jøts pøn tøkmuक्ति ja pikta'aky, ja ankilis ja'adi. ⁴⁰ Nayide'en idø'on yjatt ku naxwii'ñit kyøxt sam ja ka'ø yjts yikpøkmukeyn, sam ja yikpikta'agyn jap jønjøty jøts ja jap ñitøy. ⁴¹ Ngaxp øts ja n'ankilis jøts ja twaamujkøxtit pøn jaty ja myigu'uk tyikpøktyundip, jøts pøn nayide'en ttunk'ajttip ja pøkyunk, jøts ja ttukmajtsu'uttit øts ja ngutujk jøts kidi mibaat ttatøkidi. ⁴² Jap ja møj jøndøødyajkøjtpy pikta'aktit ma ja yikxon tmijøødit tmiya'axtit, tmiwingidsetstit tmi'agidsetstit ja jøøn. ⁴³ Jøts pønts ja Dios tpadundip pøni sa ja wya'añ, ja'ats idø'on jap ja møj kunuu'kxin tmøø'ajttip ma ja Dios Teety ja kyutujk ttanitani ja yjaa'y. Pøni nmøø'ajttip ja ja'gyukin, ija'gyukidits!

Ku ja Jesús tmadyakpaaty ja meen midu jaa'y yikyu'uch y'ijtpy naxjøtpy

⁴⁴ Nayide'en idø'on ja Dios kyutujk sam meen yu'uch'ityin ya naxjøøjty kamjøøjty. Xjats jaa'y ja tpaaty jøts ja nay jap jadigojk tyu'uch; jøts kumi yjantyaxondakpy winets ñijxy jøts t'atsto'okixy tuki'iyi ja pyikta'aky ti jaty jam yjagyeyjpy, jøts ja naaxj tjuy ma tø t'ukyu'uch ja meen midu tø tpaaty.

Ku ja Jesús tmadyakpaaty ja tsaa meen

⁴⁵ Nayide'en idø'on ja Dios kyutujk midu yjaa'y tyanitanaapy sam tu'uk ajuubyi agajpxpi, pøn t'ixaapy tum ja øybi tsaa meen midu ja chow kawinmaani, ⁴⁶ kuts ja tpaaty tu'uk midu janch tsobatp, winets ñijxy jøts tuki'iyi y'atsnawyidoo'kixyi ti jaty jam yjagyeyjpy, jøts ja tjuy ja tsaa meen.

Ku ja Jesús tmadyakpaaty ja xuummy midi' yikta'ajkxmaḵp

⁴⁷ Nayide'en idø'øn ja Dios kyutujk sam tu'uk ja xuummy midi yikta'ajkxmaḵp, kuts ja yiknøwøjtspeḵy jam mejyotp, jøts ja tyikpidsimy kox kidā'ak ja ajkx. ⁴⁸ Jøts ku ja xuummy tø y'uch, winets ja ajkxmaḵpi ja twejtspidsømdi jøts ja tyiknøjkxti jam nøø'adsayjotp, jøts jam y'ixa'akti jøts ja jam twi'ejxti ja ajkx; kachjotpy ja tpiḵta'akti midi janch tum'øḵy jøts ja ka'øḵy ajkx yik'ixwjiy. ⁴⁹ Jade'ents idø'øn yjatt ku naḵwii'ñit jaa'y kyøxt; nibidsømidip ja' ja ankilis jøts ja abiky pyiḵta'agidit pøni sa pønjabøn y'øḵi kya'øḵi, ⁵⁰ jøts ja ka'øḵybi yikpiḵta'aktit jap møj jøndøødyajkjotpy ma ja yikxon yjø'ødit ya'axtit, wyingidsetstet y'agidsetstet.

Sa ja Dios kyutujk nyiknigaxø'jka'ant

⁵¹ Winets ja nwindson'ajtim Jesús ja yiktøøjidi:

—¿Mnimadoodip idø'øn tuki'iyi?

Xjats ja wyandøø:

—Nnimadøøpy øø nwindson'ajtim yø'.

⁵² Winets ja ñimaajyidi:

—Ku tu'uk ja kajpxwejpi t'ukni'ixpøki sudso tñijawit ja Dios kyutujk midi yjaa'y ja tyanitanaapy, jade'ents ja pyidsimy sam tu'uk ja windsøn midi tjaḵtp tyikwingaxø'kp ja yjotkujk'ajtin ku ja tñanky'ijxyi øḵy ti kox kidā'ak, wan tjemyi wan tku'aamyi.

Ku ja Jesús yja'jty jadigojk Nazaretit kajpjotp

⁵³ Xjats ku ja nwindson'ajtim Jesús jade'en tñimadyak'abajtyii'ñ, winets ja jam chøø'ñ ⁵⁴ jøts ja ojts yja'aty jam kyø'øm etjotp ma ja kyugajpi. Jamts ja yik'ixpøjktøjkøø tsaptojkjotp midi jam wyinaty, jøts ja jaa'y ñigyumaap yjanchjajtøø, yide'en ja wya'andi:

—¿Ma yø jaa'y jade'en tø tjaty yø'øbi'ixpøjkin? ¿Sudso yø jade'en ttuñ milagri'ajtin? ⁵⁵ Pø ja tsajtspits yø' y'u'nk, jøts ja Maria ttaagi. Kidi ja Jacobo yø' y'ajichti, jøts ja Josè møøt ja Simón, jøts Judas. ⁵⁶ Nayats ja y'uch kiixy yø chinaamyidi ma adøm ya. ¿Ti mats yø jade'en tuki'iyi tø tjaty?

⁵⁷ Patyts idø'øn ja jade'en ka' tmøjpiḵta'akti. Xjats ja nwindson'ajtim Jesús ja ñimaajyidi:

—Tum yiktsojqp ja Dios kyugajpxy øḵy ma, kuts kyø'øm kajpkixy ku kyø'øm tøjkjøøjty, ka'abimts ja tiyy yiktsøky.

⁵⁸ Jøts idø'øn ja jam ka'ap jadine'en ttuñ ja milagri, kumi ka'ap ja tjanchjawidi.

14

Ku ja Juan Bautista ja o'jkin tpaajty

¹ Nayi winet ets ja nwindson'ajtim Jesús yiknimadøøḵy jam Galilea, ja Herodes idø'øn ja tñimadoop pøn jam wyinaty windsøn'ajtp. ² Jøts ja tñimaay pøn jaty ja wyinaty møøt tyuñ:

—Ja Juan Bautista net ja' midi y'ijty yiknøbajtp, ja' inet tø yjujkyiky jadigojk. Paty yø jade'en tmøø'taty ja møk'ajtin jøts yø jade'en ttu'unt ja milagri'ajtin.

³ Jøts kumi ja Herodes ja Juan wyinaty tø chumyi, ja' ja wyinaty tø ñi'ane'emyi jøts ja puix kadeen ja yiktagwøønt yiktabakwøønt jap puxøjkjotpy, ja'agøjpx ku ja ojts ttamigajpxy ja Herodias, pøn ja Herodes ja y'uch Felipe ñidø'øxy'ajtpy. ⁴ Yide'en idø'øn ja Juan wyinaty tø tñimaani ja Herodes:

—Ka' pyaat'aty jøts yø jade'en xtyimñidø'øxy'att.

⁵ Jøts idø'øn ja Herodes tyimyjayik'ookwa'añ ja Juan, ja mayjaa'yts chø'jkip; kumi tyunnijawidip ja' jøts ku ja Juan tum ja Dios yja' tkajpxi. ⁶ Kuts ja Herodes ja xyøow ja yjumøjt txøduuñ, winets ja Herodias ñøøx pyidsimy ajtspi ma ja mayjaa'y jam wyinaty tø yikwawdi yikwetsi migaabyi mi'ukpi, ja'ats ja Herodes yjantyaxondaajk, ⁷ jøts ja tñimaay møk'ampy jøts ku ja tmo'ot øḵy ti pøni ti ja kø'øm y'amidoowampy. ⁸ Xjats ja kiixy, tø tyaak ja wyinaty jawyeen y'agajpxiyi ku ja tñimaay ja Herodes:

—Møøky øts platijotp ja Juan Bautista kyubajk.

⁹ Ja'ats ja windsøn Herodes kyujotmaadyøjkii'ñ; jøts kumi tøts ja wyinaty kø'øm møk'ampy ñimy jøts ku ja tmo'ot øḵy ti, tøts ja jaa'y ja wyinaty tmadowdi pøn jaty jam wyinaty migaadyip mi'uktip, xjats idø'øn ja ojts wya'añ jøts yikmo'ot. ¹⁰ Ojts tyikutuky jøts ja Juan Bautista ja kyubajk y'atsyikajtspoot jap puxøjkjotpy; ¹¹ jatyi dø'øn ja ojts tyikmendi jap platijotpy jøts ja kiixy ja yikmøøpy, jøts tyaak ja tmøøpy.

¹² Xjats ja Juan Bautista yjaa'y yja'atti, ja'ats ja ñine'kx ja ojts yiktsoo'nxiyi jøts ja y'atsyiknajt; kuts ja t'ukyiknaxøjkidøø, winets ja ñøjkxtøø jøts ja ojts t'atstumadowdi ja nwindson'ajtim Jesús.

Ku ja Jesús tyikaay ja nimagoxk milbi jaa'y

¹³ Kuts ja tñija'wiyii'ñ, jøts ja chøø'ñ nadyu'uk jap barkijøtpy, jøts ja ñijky ma jam nipøn kya'ity. Jatyts ja jaa'y ja tñija'widøø, winets ja ojts choondi ma jaty ja kajp jam, jøts ja tpanøjkxti tekyjø'øm. ¹⁴ Kuts ja Jesús pyidsimy jam barkijotp, jøts ja ojts t'ixy jøts kudam

jaa'y jam wyinaty janch namaydi, jøts idø'on ja ojts t'ayo'ixy, may tyikmøkpijky ja pamaa'y midi ja jam yiktanimeen. ¹⁵ Tsuu'jiñipts wyinaty, winets ja pyabøjkpitøjk ja ojts ñimiñiyi jøts ja ñimaajyøø:

—Tøts ja et chuul'jiñi, jøts ka' ya pøn chøøni. Kajxni yø jaa'y, jøts wan tnøjkxnidi ma jaty kajp jøts jam tju'udyit kyaaky tyojkx.

¹⁶ Xjats nwindson'ajtim Jesús ja tnimaay:

—Ka' yø ñøjkxtit; yikaydi meets yø'.

¹⁷ Jøts ja wyandøø:

—Ka'ap øøts ya ti nmøødi, ja'ayi tsapkaaky jap ja magoxkyi, jøts ajkx jamajtskyi.

¹⁸ Winets ja nwindson'ajtim Jesús ja ñimaajyidi:

—Ya yikmendi.

¹⁹ Jøts ja ojts tnøjmi jøts y'ixa'aktit jam miyjotp. Xjats ja tnixajiyi'ñ magoxk ja tsapkaaky jøts majtsk ja ajkx, jøts ja ojts tkunuu'kxy jøts ja ttatujkiyi'ñ, jøts ja tkømøoy ja pyabøjkpitøjk, ja'ats ja ojts tyikwa'kxti jøts ja tmøødyi ja mayjaa'y. ²⁰ Niduki'yiyi ja kyaydi ku'uxyi; jøts ja makmajtsk kach ujts wyindaañ ja aga'ak abu'xk. ²¹ Nimagoxk mil ja jaa'y kyaydi tum yaa'dyøjk, jøts abiky ja tø'oxyøjkti møøt ja mutsk una'jkti, ka'ap ja yikmachowdi.

Ku ja Jesús yø'øy jam mejwyingøjxp

²² Xjats ja nwindson'ajtim Jesús nay jaty tyiktøjkijyi'ñ ja pyabøjkpitøjk jap barkijøtpy, jøts ja ñøjkxtit jawyeen jam jaduktamajñ, yam ja ixjam tyañim jøts ja tminawya'kxit ja mayjaa'y. ²³ Kuts ja t'ukminawya'kxøø, xjats ja nadyu'uk pyatøjkijyi'ñ tsapkajpxpi jam kojpkøjxp. Jøts ku kyoodsiñaa, ixjam idø'on ja wyinaty nadyu'uk, ²⁴ jøts ja barki ixjamni ja mejkyujk'am jagamni ja wyinaty. Janch jadi'iñi ja jam yikwibejpyø'øñi ku ja nøø tyojmji'iky, jade'en'ampy ja poj myiñ midi ja ñøjkxtip. ²⁵ Xjats ku yjøkyoost'ajty, winets ja nwindson'ajtim Jesús ja jam ñimejnidøø, jadi'iñi ja yø'øy jam nøøwingøjxp. ²⁶ Kuts ja pyabøjkpitøjk ja ojts jade'en y'lijxyiyi jøts ku ja yø'øy jam nøøwingøjxp, xjats ja jyantyim-chø'jkidøø, jøts nay ja tsø'øgi ja møk'ampy yikwajnidøø:

—i'Ti miku' yø jade'en!

²⁷ Jøts ojts ja nwindson'ajtim Jesús ja myigajpxyidi, jøts ja ñimaajyidøø:

—iKidi mdsø'øgidi, yikmøjkidi m'aaw mjoort; øts idø'on wamp!

²⁸ Winets ja Pedro wyaañ, xjats ja tnimaay:

—Windson'ajtim, pøni janch mets idø'on, yikyø'øky øts nøøwingijxy jøts øts xyiknøjkxt ma mets ixjam.

²⁹ Xjats ja nwindson'ajtim Jesús ja ñimaajyøø:

—Men.

Winets ja Pedro pyidsiimy jam barkijotp, jøts ja yø'øchøø'ñ nøøwingøjxp, jøts ja ñijky ma ja nwindson'ajtim Jesús jam wyinaty. ³⁰ Kuts tja'wiyi'ñ ja møk poj, ja'ats chø'jkiñøø; jøts enkyi køjk yjøptak'adøtsni, winets møk chabaguejky jøts wyaañ:

—i'Windson'ajtim, yikpidsømk øts!

³¹ Jøts ja nwindson'ajtim Jesús nay jaty tmajch kyø'køjxp, jøts ja tnimaay:

—iTyimwyinii'nxyip mets mjanchja'win? iTiku tø mnayjøppajwiyi?

³² Xjats ku ja tyøjkidøø jap barkijøtpy, jøts ja poj jaty y'amø'jty. ³³ Winets ja jaa'y ja wyingxanaajyi pøn jaty jap wyinaty jap barkijøtpy, yide'en ja wya'andi:

—Mets tam idø'on mjantymdiosu'nk.

Ku ja Jesús tyiktsøøjky ja mayjaa'y jam Genesaret

³⁴ Xjats ja ttanajxtøø ja mejy jøts ja naajx ja tpaattøø yja'ttøø Genesaret. ³⁵ Xjats ku ja jaa'y t'ejxkapti ja nwindson'ajtim Jesús pøn jaty jam kugajp'ajtip, ja'ats ja ayuujk tyikyø'ødyøø, jøts tnija'wigyøjxtøø pøn jaty jam tsinaadyip ja'abi et, jøts ja tyikmendøø niduki'yiyi pyamaa'y ma ja nwindson'ajtim Jesús wyinaty. ³⁶ Møk ja ttanuu'kxa'akti øy ja ja'ayi tyukpaadidit ja wyet pa'; jøts pøn ja wet jade'en yjøjxtøø, møkpojkøjxtøø ja'.

15

Ja ka'øy winmaa'ñ ja jaa'y tyikpøkkpyajtp

¹ Winets ja fariseotøjk winaagin tnimendøø ja nwindson'ajtim Jesús, møøt ja kajpxwejpitøjkti midi jam wyinaty tø choondi Jerusaléngit kajpkøjxp, jøts ja ojts yiktøwdi:

² —iTigøjxp ku yø mbabøjkpitøjk tkabadundi ja møjaa'ychinaa'yin? Ka'ats ttundi ja windsø'jkin ku kyøbujti ku kyawya'andi.

³ Jøts ja nwindson'ajtim Jesús ja ojts nayide'en tyiktøøjimbity:

—iJøts tigøjxpts ku meets ja Dios Teety kyutujk xkamimadojyiyi, jøts ja' mee myikma-jadakpy ja møjaa'ychinaa'yin? ⁴ Jøts yide'ents Dios wyaañ: “Windsø'øgi mdeety mdaak”, jøts “Pøni pøn tyeety tyaak tka'ømyigajpxp, wan tpa'øøky.” ⁵ Jøts ka' meets jade'en mwa'añ, pø mnømpxi meets jøts wan jaa'y tnøjmi ja tyeety tyaak: “Niwine'enin ngabudøkit, tø øts

Dios ndamay'ajtkøjxni ti jaty øts jap nmøøt'ajtpy";⁶ jøts ku jade'en pøn wya'añ, ka'ats tyeety tyaak ja t'ukpudøjkiñi. Jade'ents meets ja Dios kyutujk xka'ukmøjpiktaajkiñi: jøts meets ja mgostumbri xyikmajadañki. ⁷ iMeets win'øø'mbidi! Yikxon yjawaañ ja Isaias ja Dios kyugajpxy jøts mdi meets msa meets, ku ja nøky ja yide'en tjaa'y:

⁸ Nugo aaw nugo ayuujk, yø' øts yø jaa'y xawindsø'jkidip, pø ma yø y'aaw yjooyt yø'ødi.

⁹ Jøts ti yø ñiwya'ant øy øts yø wine'en xjawindsø'ogidi, pø ja'axi y'ixpøjkin'ajtip pøni sa jaa'y kø'øm tyikutuky.

¹⁰ Winets ja tyaxtsøoy ja mayjaa'y jøts ja tñimaay:

—Ukmadowdi meets jøts xja'gyukidit: ¹¹ Kidi yø'øjip jaa'y yikpøkyajtip midi tøjkip y'aawjøtpy. Yø' jaa'y yikpøkyajtip midi pidsømp y'aawjøtpy.

¹² Xjats ja pyabøjkpitøjk ja ñimejniyi, jøts ja ñimaajyøø:

—¿Tø x'ixy yø fariseotøjk, ku jade'en tø tñadowdi sa tø xnøjmi jøts yikxon tø yjanty-imy'ambøkti?

¹³ Jøts ja Jesús yide'en y'adsojimbijty:

—Øy ja tyimyidi ixpøjkin, pøni ka'ap ja tminabyaadyi ja Dios yja' møøt, windigøøpy ja y'ity.

¹⁴ Ixmatsi: jade'en yjati sam ja winap jaa'y ttuu'wawdi ja myiwinap jaa'dyi. Jøts ku ja winap jaa'y tjanch'uktuu'way ja myiwinap jaa'y, kuts jut ja tpaattit namajtskts ja jap kyunaxtit.

¹⁵ Winets ja Pedro wyaañ, jøts ja tñimaay ja nwindson'ajtim Jesús:

—Tukmadoo øøts ti yø yjade'embi madya'aky tyijpy.

¹⁶ Xjats ja nwindson'ajtim Jesús wyaañ:

—¿Ni meets paat yø xkanimadoodni? ¹⁷ ¿Yø' idø'øn mgaja'gyukidip, midi tøjkip aawjøtpy jøts ja ñijky jam maatsjotp, jøts pyidsimy ku nnawiyiyø'øyin? ¹⁸ Midi'its yø aaw yikpidsimpy, jam idø'øn ja chøøñ amjotp; yø'øts idø'øn jaa'y yikpøkyajtip. ¹⁹ Jam ja amjotp chøøñ ja ka'øwynmaa'ñ ku jaa'y myigu'uk tyik'øøky, ku jaa'y ñiyyaa'y uk ñidø'øxy tøjki, ku jaa'y kyawindiy winmaa'ñ tyiktuñ, ku jaa'y myeech, ku jaa'y tyaay, jøts ku jaa'y øy ti tumjiwimbet tmadyaknaxy. ²⁰ Yø yjade'embi winmaa'ñ idø'øn ja jaa'y yikpøkyajtip; jøts kidi yø'øjip ku jaa'y tkatuñ jade'en ja windsø'jkin ku tkapujy ja kyø' ku kyaawya'añ.

Ku ja Tiro tø'øxyøjk tjanchja'wiyi'ñ ja Jesús

²¹ Xjats ja nwindson'ajtim Jesús jam choo'naa, jøts ja ojts ñijky ma ja jaa'y y'et jamdi, pøn kugajp'ajttip Tiro jøts Sidon. ²² Jøts tu'uk ja tø'øxyøjk myiññ midi tso'omp cananea, midi jam wyinaty tsinaapy ja'abi etjotp, jøts ja tñimiñ ja nwindson'ajtim Jesús, yide'en ja møk'ampy tñimaay:

—iWindsøn'ajtim, metsxi rey David m'u'nk'ajtip m'ap'ajtip, ayo'ejxk øts! Yø nøøx øts idø'øn ja miku' tø tyatøjkiñi, jøts yø' møk yjanchyik'ayojip.

²³ Jøts ja nwindson'ajtim Jesús ka'ap ja t'adsøy niwine'enin ja'agøjpx ku ja tkamigugajpi, winets ja pyabøjkpitøjk myendøø, jøts ja møkta'aky wyandøø, møkta'aky yiknimaay:

—Kajxni, janch na'ambim adøm yø xpayø'øyim.

²⁴ Winets ja nwindson'ajtim Jesús wyaañ:

—Yø'øyi øts Dios Teety xanigajpx pøn ja Dios kyutujk kapaajtipnim ya Israelit najjøøjty, ya Israelit kajjøøjty.

²⁵ Jøts ja tø'øxyøjk myiññ wingon jøts ja ojts wyinguxaniyi, yide'en ja wya'añ:

—iWindsøn'ajtim, pudøjkik øts!

²⁶ Jøts yide'en nwindson'ajtim Jesús ja t'adsøoy:

—Ka' y'øyi ku u'nk una'jk yikpøjkxit ja chapkaaky jøts uk ja yikmo'ot.

²⁷ Jøts ja tø'øxyøjk wyaañ:

—Nwindson'ajtim, janch jade'en idø'øn ejx ixa mwa'añ; ja ukts yjøø'kxmukøxtip ja kaaky abu'xk midi ja wyindsøn yika'adip jap mesi patki'py.

²⁸ Jøts ja nwindson'ajtim Jesús ja ñimaajyøø:

—janch møj mjanchja'win! Wan jade'en tyiktuñ sam idø'øn xtsøky'aty.

Jøts ja nay jatyi myøkpiky ja ñøøx.

Ku ja Jesús tyiktsøøjky ja mayjaa'y

²⁹ Xjats ja nwindson'ajtim Jesús jam chøø'ñ, jøts ja ñajxy Galileit mejpya'am; winets ja pyatøjkiyi'ñ ma jam ja kojpk tu'uk jøts ja y'ixaajky. ³⁰ Janch namay ja jaa'y jam yja'tti ma ja jam wyinaty, jade'en ja tyikmendi pøn tekmya'at, pøn winap, pøn uum, pøn køma'at, jøts pøn tigati pa'am pøjkidip. Jøts ja jam tyimwyingon tpiktaktøø ma ja nwindson'ajtim wyinaty, xjats ja tyikmøkøjkijxy. ³¹ Janch ñigyumaap idø'øn ja jaa'y ja tyimya'widøø ku ja jade'en t'ejxti y'awijy ja uum jaa'y, jøts ku kyø' ja myøkpøkti pøn køma'atti, jøts ku yø'øyjø'økti pøn tekmya'atti, jøts ja winap jaa'y wyin'ejxwa'kxti. Xjats ja tjanchtukmøja'widøø ja Dios Teety pøn ja Israelit jaa'y Dios'ajtip.

Ku ja Jesús tyikaay ja ñimaktaxk milbi jaa'y

³² Winets ja nwindson'ajtim Jesús tyaxtsøoy ja pyabøjkpitøjk jøts ja tnimaay:
—Njanch'ayo'ijxpy øts yø jaa'y, tigøøk xøøw øts yø kujk xmøøtsinaañidi, jøts tø ja kyaaky kyøjxnidi. Ka' øts yø ayuu ngaxwa'andi jam tyøjkwindum, kuts yø jadi'iñi tuu'ajy y'ukjotkøjxnidit.

³³ Xjats ja pyabøjkpitøjk ñimaajiyi:

—¿Mats ya jadine'en nbøjkin ja kaaky ja jii'kxy jøts yø mayjaa'y jadine'en kya'adyit, jøts nipønts ya?

³⁴ Jøts ja ojts tyiibyikyidi:

—¿Winaak mdsapkaaky japti?

Jøts ja wyandøø:

—Wixujkyi, jøts ja ajkxuna'jk waani.

³⁵ Xjats ja wyaañ jøts ku ja jaa'y y'ixa'aktit, ³⁶ jøts ja tnixajiyi'ñ wixujk ja tsapkaaky møøt ja ajkx. jøts ttamøja'wiyii'ñ ja Dios Teety. jøts ja ttatujkyii'ñ jøts ja ojts tmø'oy ja pyabøjkpitøjk, ja'ats ja yikwa'kxti jøts ja tmøødyi ja mayjaa'y. ³⁷ Niduki'iyi ja jaa'y ojts kyaydi jøts niduki'iyi kyujxidi. Yjaaktyimbyøkmujktinim ja' ja kaakwyindank ja wixujk kach. ³⁸ Nimaktaxk mil idø'øn ja jaa'y ojts kyaydi tum yaa'dyøjk, abiky ja tø'øxyøjkti møøt ja mutskuna'jkti, ka'ap ja yikmachowdi. ³⁹ Jøtsnim ja nwindson'ajtim Jesús tminawya'kxi ja jaa'y, jøts ja ojts ttatøjkiñi ja barki jøts ja ñijkxy jam Magdala etjotp.

16

Ku ja fariseotøjk t'amidoodøø ja Jesús jøts ja ttuk'ejxtit ja myilagri'ajtin

¹ Kuts idø'øn ja jam jade'en ñijkxy, xjats ja fariseotøjk ja nimejniyøø møøt saduceotøjkti, jøts ja nugo kyajpxy'ejxwa'añiyi. Ja' ja ojts t'amidowdi jøts ja myilagri'ajtin ja ttu'unt, jøts tyuk'ejxidit ja myø'ajtin jam tsajpwemp, pøni janch ku dø'øn ja y'ukdiosu'ngi. ² Jøts ja yide'en t'adsøoy:

—Ku ja et chuu'ji, pø mnømpxi meets: “Tø'kxwamp tam yø et, kumi tsajpts yø tsajp kyaxi'iky”; ³ jøts ku yjøpy'aty jøts mnømidi: “Ka' tam yø et yam tøy'kxwa'añ, kumi tsajpts yø tsajp kyaxi'iky jøts yoots møøt.” ¡Meets win'øø'mbidi! ¿Sa ja tsajp wa'ats xnijawidi ku ja jade'en kyaxi'iky, jøts meets øts nja' ka' xnija'wiyi ku ja mjayiktuk'ejxti? ⁴ Yø tsaachka'øyjaa'y øts idø'øn jade'en x'amidoodip jøts yiktuk'ejxtit ja mlagri; ja'ayits jadu'uk y'ukyiktuk'ejxnidit nayide'en sa ja Dios ttuuñ ja Jonás.

Xjats ja twinwa'ktuujty, jøts ja tyuu'døjkyii'ñ.

Ja fariseit jaa'y y'ixpøjkin

⁵ Kuts ja pyabøjkpitøjk ñajxtøø jam nøø agø'øm jam jaduktamajñ, jøts ja tjä'dyigøydi ja chapkaaky, ka'ap ja wyinaty tø tkondi. ⁶ Winets ja nwindson'ajtim Jesús ja ñimaajiyidi:

—Ukmadowdim; øyim mnay'ejx'etidit, ejxim yø fariseotøjk, ejxim yø saduceotøjk xkaajiyidi yø chapkaaky midit wenk levaduri møøt.

⁷ Jøts ja pabøjkpitøjk agø'ømyi ñawambi ñaxwa'jkidøø:

—Ja'agøjxp yø jade'en wya'añ ku ndsapkaaky tø ngakø'øñidi.

⁸ Myadoow ja nwindson'ajtim Jesús ja', jøts ja tnimaay:

—¿Tigøjxp ku jade'en mwa'andi jøts ku mdsapkaaky kya'etti? ¡Niwine'enin meets ja janchja'win xkidyimyjagyepy! ⁹ ¿Ka'ap meets ja xja'gyuki, jøts ka' meets ja xja'myech ja tsapkaaky midit magoxk, midit øts ojts nyikwa'kxy, jøts øts ja ojts nmo'odi ja ñimagoxk milbi jaa'y, jøts ka' meets ja xja'myech winaak kach ojts xpøkmukti ja abu'xk? ¹⁰ ¿Jøts ni ja'baat xkaja'myatsti ja wixujkpi tsapkaaky midit ndagumaay ja maktaxk milbi jaa'y, jøts winaak kach ojts xjaakpøkmukti? ¹¹ ¿Sudso'ampyts ka' xja'gyukidi jøts ku øts ka' ndijj ja tymchapkaaky midit wenk levaduri møøt, midit yja'ajttip ja fariseotøjk møøt ja saduceotøjkti?

¹² Xjaanims ja tjä'gyukidi jøts ku ja nwindson'ajtim Jesús kidi tymjyatsapkaagyip ja wyinaty tø tnigajpxy midit wenk levaduri møøt, pø ja ixpøjkinxi ja wyinaty tø tijj jade'en midit ñanky'ixpøjkidip ja fariseotøjkti saduceotøjkti.

Ku ja Pedro wyaañ jøts ku ja Jesús yja'aji yiknitsokp, ja Cristo

¹³ Xjats ku ja nwindson'ajtim Jesús yja'jty jam etjotp midit ja Cesarea de Filipit kajp y'etip, jamts ja tyiktiiy ja pyabøjkpitøjk, jøts ja tnimaay:

—¿Sa jaa'y wya'andi, pønik øts?

¹⁴ Jøts ja wyandi:

—Jade'en winaagin wya'andi jøts ku mets Juan Bautista; jøts jadu'uk wyamidit jøts ku mets mElias, jøts pømbits wamidip jøts ku mets mJeremias, uk pøngapøn Dios kyugajpxy.

¹⁵ Winets ja Jesús tyiktiiy:

—Jøts meets, ¿sa mee mwa'añ, pøn øts idø'øn?

¹⁶ Xjats ja Simón Pedro t'adsøøy:

—Ja yiknitsokpi mets, ja Cristo, ja Dios U'nk.

¹⁷ Jøts nwindson'ajtim Jesús ja t'adsøøy, jøts ja tnimaay:

—Mets Simón idø'on janchjaakxønim, Jonás myajnk'u'nk, ka' pøn jaa'yip mets yø jade'en mduk'eixip, ja Dios Teetyxi dø'on yø jade'en mduknija'wiyip pøn jap tsajpjøtpty. ¹⁸ Tiyy me mwinmay, møk me mwinmay, patyts idø'on myixxømøøy Pedro midu tyijpy tsaa. Tøts mets nikøjxp øts yam nyiktso'onda'akwa'añ ja nja!; jøts øts ja nyikmøjt'a'akt, ni o'jkin niti ja mibaat kyamimada'agit. ¹⁹ Øts me nmøøpy ja kutujk'ajtin; pøni pøn mets ya ja pyøky maa'kxujukip, nayide'en ja tsajpjøtpty yikmaa'kxukt. Jøts pøni pøn mets ya mgamaa'kxujukpy, nayide'en ja tsajpjøtpty kyayikmaa'kxukt.

²⁰ Xjats ja nwindson'ajtim Jesús tnimaay møkta'aky ja pyabøjkpitøjk, jøts ja ka'ap pøn ttukmado'odit ku ja' Cristo, ku ja yiknitsøøky.

Ku ja Jesús tniagjpxy ja y'o'jkin

²¹ Winetyipts ja nwindson'ajtim Jesús wa'ats tniagjpxøjkiiy'iñ, jøts ja ttukmadøy ja pyabøjkpitøjk jøts ku ja ñøjkxt jam Jerusalén, jøts ku ja mōjaa'dyøjk ja yixxon yik'ayo'ombaa'diyit møøt ja teetywindsønøjkti jøts ja kajpxwejpitøjkti. Ojts ja ttukmadøy jøts ku ja yik'oogit, juikpyøkppts ja jadigojk, jøts ja kyidigøøk xøøw pyidsøømt jadigojk oo'kpi jutjøtpty. ²² Winets ja Pedro ja ojts yikniyxxyi abiky, jøts ja møkta'aky ñimaajyi:

—jWindsøn'ajtim, katsojknim Dios Teety jøts jade'en mjatt! iKa'ap jade'en mdyimyjatt mdyimgyubatt!

²³ Xjats ja nwindson'ajtim Jesús tniwa'kjimbijty ja Pedro, jøts ja tnimaay:

—jMets miku' jawa'ak, majststutk øts!, nugo mets njanchyik'adukti. Ka' mets jade'en mwinmay sam Dios Teety wyinmayin, jade'en me mwinmay sam øy pøn naxwii'ñit jaa'y.

²⁴ Winets ja nwindson'ajtim Jesús tnimaay ja pyabøjkpitøjk:

—Pøni pøn tsojkin tmøøt'ajtp jøts øts nja' jade'en xpadauujnit, ka' mibaat køøom ñadyunk'atit, ja'ayi ku amumjoojt ñadyamiyoxit ja ayo'on jøts idø'on jade'en tpadu'unt. ²⁵ Pønts kajade'enduñim nay'eixip, niwindem ja tkapaaty ja nitsø'ok'ajtin; jøts pøn ø xku'ayo'ombajtip, ja' idø'on tpaapt ja nitsø'ok'ajtin. ²⁶ Ja ti ja ñiwy'a'ant øy ja jaa'y tjaja'bojkixy ja naxwii'ñ'ajtin, jøts ja y'anmija'win ne'egi wyindigøøy? Jabi ka'axi mibaat ja ñitsø'ok'ajtin ja tkuju'uty. ²⁷ Ja Dios Teety øts myøk'ajtin nmimejnip møøt ja ankilistøjkti, jøts øts nwindu'undit sa jaty nidu'uk nidu'uk pyaat'aty yiktu'undit. ²⁸ Janch øts idø'on nwa'añ, jøts ku ya ja winaagindi pøn ka'ooktip kunim ja jawyeen tyimy'uk'ejxjtit ku ø nmime'ent ja Dios Teety kyutujk midu yjaa'y ja tyanitanaapy.

17

Ku ja Jesús adsu'jky y'atstigajch, amuum chamambøjkijxy

¹ Xjats ku kyidudujk xøøw'ajty, winets ja nwindson'ajtim Jesús tmøødiyii'ñ ja Pedro, jøts ja Juan møøt ja y'ajch Jacobo, jøts ja ojts ñøjkxti ma ja kojpk jam janch køjxp; ² jamts ja ñanktyigajtsi, wemp am ja tyimy'ejxti ku wyeen y'aaw ja jade'en yjajty sam xøøw y'añin, jøts ja wyet jade'en pyoobiyii'ñ sam ja jain. ³ Jøts ja jotmøñ t'ejxpaa'tti ja Moisés jøts ja Elías, ku nwindson'ajtim Jesús ja tmøøtmadya'aky. ⁴ Winets ja Pedro tnimaay ja nwindson'ajtim Jesús:

—Windsøn'ajtim, jtyimy'øy'ajtp ku øø ndyimyam'aty! Pøni mdsøjkpy jøts øøts ujts'aadyøjk tigøøk nyik'øyt; tu'uk mets mja', tu'uk Moisés yja' jøts tu'uk Elías yja'.

⁵ Nay ixamnim ja Pedro jade'en wya'añ ku ja yoots jam yja'jty janchyikwin'oo'kpim, jøts ja tuki'iyi tyik'adigøøy; jøts jap yootsjøtpty ja Dios Teety y'ayuujk yikmadøøy ku yide'en wya'añ:

—N'u'nk øts idø'on ya'at, yø' øts idø'on njaaktajotkujk'ajtpy. Mimadowdi pøni sa wya'añ.

⁶ Kuts ja jade'en tmadowdi, xjats ja winda'ak ñaxkidakti, yixxon ja yjantymchø'jkidøø.

⁷ Jøts nwindson'ajtim Jesús ja ñimejnidi, jøts ja tyojnidi, yide'en ja ñimaajyi:

—Pidø'økti; kidi mdsø'øgidi.

⁸ Xjats ku ja y'ejxjøøktøø nima ja pøn tka'uk'ejxpatnidi, nadyu'uk ja nwindson'ajtim Jesús jam.

⁹ Jøts ja kyida'knidi, ku kojpkøjxp choondi, jamts ja nwindson'ajtim Jesús ja møkta'aky y'ana'amidøø:

—Kidi yø pøn xamimadya'akti midu tø x'ejxti, jaanim ku øts wyinaty tø njujukpyiky jadigojk.

¹⁰ Winets ja pyabøjkpitøjk ja tyiibyøjkiiy:

—¿Tigøjxpimts yø kajpxwejpitøjk jade'en wya'andi jøts ku ja Elías jawyeen mye'ent, jøts ix'oojknim ja yiknitsokpi?

¹¹ Xjats ja nwindson'ajtim Jesús ja ojts yide'en t'adsøøy:

—Janch me'emp idø'øn ja Elías, jøts ja tuki'iyyi tyik'øygyøxt. ¹² Øtsts wamp jøts meets nnøjmi jøts ku Elías tø y'atsmengojmi, jøts nigidi tø t'ejxkapti, tø ja twandundi sam y'anmija'win tyimñekti. Nayide'ents øts yø xyik'ayo'ombaattit.

¹³ Jaanims ja pyabøjkpitøjk ja tja'gyukidøø, jøts kudam ja nwindson'ajtim Jesús ja ja' tyamimadya'agyidi ja Juan Bautista ku ja Elías tijy tø y'atsmengojmi.

Ku ja Jesús tyikmøkpjky tu'uk ja mixyu'nk pøn wyinaty ja miku' tø tyatøkiyi

¹⁴ Xjats ku ja ojts yja'atti mā jaa'y jam wyinaty, jamts ja nwindson'ajtim Jesús tu'uk ja jaa'y ñimejniyi jøts ja ojts wyinguxanay'øyi, yide'en ja ñimaajyi:

¹⁵ —Me teety, ayo'ejxik øts n'u'nk, adsu'jky adsu'jky mø'ødyi pa'am yø pyaadyiyi jøts tsaach'ijxyim tyuñiyi; atsnaxkidakp may'ojk jam jønjojp, uk nøøjøtpy paat ñøðøki. ¹⁶ Ixyats mets yø mbabøjkpitøjk yø tø njadanimiñ, ka'ats yø myayidi jøts yø tyikmøkpøktit.

¹⁷ Jøts ja nwindson'ajtim Jesús y'adsøø, jøts tnøjmi pøn jam wyinaty:

—iMee kajanchja'wibidi, yø mbøky nugo myikmajadaktip! ¿Mā windemnim meets nga-jpxy n'ayuujk xpabøjk? ¿Jøts windemnim meets yø yjade'embi xuktatso'okt ku øts yø ejtp njanchjanigajpx'ity? Meets, yikmen yø pamaa'y.

¹⁸ Jøts ja nwindson'ajtim Jesús ojts tkajxpidisimy ja miku', ojts ja ttukmajtstu'uty ja mixy jøts idø'øn ja jade'en jaty tyimykpijky.

¹⁹ Winetnims ja nwindson'ajtim Jesús ja pyabøjkpitøjk myigajpxi jibiky'ampy, jøts ja ojts yiktiiyi:

—¿Tigøjxp ku øøts yø miku' tø ngayikpidsimy?

²⁰ Xjats ja nwindson'ajtim Jesús ja ñimaajyi:

—Ja'agøjxp ku mjanchja'win kyamøkidi. Janch øts idø'øn nwa'añ ku jeexyip ja mjanchja'win ñiyjade'en xmøø'tatti sam mortas pajkin, øyts meets yø kojpk xnøjmit: “Jiwa'ak ya jøts mnøjxkt abikytsøø”; jiwa'akpts ja kojpk. Ka' mee ti mgamayit ku janchja'win møk xjanxmøø'tattit. ²¹ Yø yjade'embi miku' ja yø iyy pyidsimy ku Dios n'ajot'ajtant, ku n'amaay'ajtant ngagugaa'yint ngagu'uujka'ant.

Ku ja Jesús tniagajpxy jadigojk ja y'o'jkin

²² Nay ixjammim idø'øn ja wyinaty wyidetinim mā ja et txøøwi Galilea, ku ja nwindson'ajtim Jesús ja ojts tyukmadøydi jøts ku mayjaa'y ja kyøyakit, ²³ jøts ja yik'oogit, jujkpyøkppts ja jadigojk kyidigøøk xøøw. Ja'ats ja tyimchaachjotmayja'widøø ku ja jade'en tnija'widøø.

Ku ja tsaptøjk yikugubety

²⁴ Xjats ku ja nwindson'ajtim Jesús tmøøtja'jty ja pyabøjkpitøjk jam Capernaumit kajpkøjxp, jamts ja jaa'dyi pøn yiktsaptøjkugubajttip, ja'ats idø'øn ojts tniñøjxkti ja Pedro, jøts ja ojts tyiktøwdi:

—¿Ka' meets yø myik'ixpøjkpi tkugubety yø tsaptøjk?

²⁵ Jøts ja Pedro y'adsøø:

—Kyugubejtpyxi yø'.

Xjats ku ja Pedro tyøjkjy'iñ tøkjøtpy, japts ja nwindson'ajtim Jesús ja jawyeen ñimaajyi:

—¿Sā me Simón mwinnmay? ¿Pøn yjawi yø windsøndøjk tyukugubajttip, ja kyø'ømigu'uk uk ja wenk jaa'y?

²⁶ Jøts ja Pedro y'adsøø:

—Ja wenk jaa'y yø tyukugubajttip.

Jøts ja nwindson'ajtim Jesús y'adsowimbijty:

—Aaa ka'ats tam adøm idø'øn xpaat'ajtyim nyajkint ja tsaptøjk kugubajtin, pøni abiky jaa'y tyukugubajttip. ²⁷ Jøts nipøn ngayik'ambøjkin, nøjx mejy'agø'øm jøts jam xjuutt ja ajkx, pøni midi inet mijawyeen mjuu'tpy, ja' y'aawjøtpyts inet meen xpaatt tu'uk. Pyaatpts inet ja' jøts ja namajtsk ngugubajtin'ajtin; ja'ats myiknøjxk jøts x'atsmo'ot ja yikugubajtpi.

18

Pøn idø'øn jawaani møj mā Dios ja yjaa'y ja kyutujk ttanitani

¹ Ñiñayi winets ja nwindson'ajtim Jesús pyabøjkpitøjk ñimejniyi, jøts ja ojts yiktiiyi:

—¿Pømbi øø nidu'ugin ja tyim'y'ukmøjtøkip ku ja mgutujk xyiknaxkida'akt?

² Winets ja nwindson'ajtim Jesús tyaa'jy'iñ tu'uk mutsk mixyu'nk, jøts ja tyikwa'l'øyi'iñ ja' y'agujk'amdi, ³ jøts ja tniimaay ja pyabøjkpitøjk:

—Janch øts idø'øn nwa'añ, pøni ka' meets ja mdsinaa'y'in xyiktigach, pøni ka' meets jade'en mnabyikta'agyi sam ne'egi mutskuna'jk yja'gyukindi, ka' mee mibaat jade'en myikupøkt jøts mdøkidit mā Dios ja kyutujk ttanitani ja na'xwii'ñit jaa'y. ⁴ Patyts ja' myøjtøkit jam mā Dios ja kyutujk ttanitani ja na'xwii'ñit jaa'y ja' pøn yik'ayowim jaa'y'ajtp, pøn

jade'en nabyiktaajkip sam ya'at mutsku'ngin. ⁵ Jøts øy pøn pøni xukpøjkidip øts ja nja' midi yik'ayowim jaa'y'ajttip sam ya'at mutsku'ngin, øts idø'øn ja wyinaty kø'øm xkupøjkp.

Ja' midy iypkøpyajtp

⁶ Jøts pøni pøn t'ukyikpøkyu'ump øts ja nja' pøn ø xjanchja'widip, ne'egi ja øyik y'ijty jøts ja mejjyøtpy yikuwibeipit, ku møj paandaak ja y'ukyiktayukxotsit. ⁷ Janch kawindøøp yø naxwii'ñit ku ja y'ity midy jaa'y tyikpøpyajtp! Nøjkx naxpyim yø jade'en, jøts iyjanch'ayøøp ja' pøn ja myigu'uk yikpøkyundip!

⁸ Paty nayide'en pøni myikpøpyajttip mgø' mdeky, ja'ayi ku xtyimwyiboottit jøts jagam xpikta'aktit; ne'egi øy'atp ku køtuk paktuk mdøkit jap mā Dios jam, jøts kidi ka'pxy xminijky ja mgø' mdeky jap infierno. ⁹ Jøts pøni yø mween myikpøkyuujnip, nawyeen-juudis jøts abiky xpikta'akt; ne'egits øy'atp ku ne'egi wendu'uk mdøkit jap mā ja Dios, jøts kidi yø mween ka'pxy xmidøki ku myikuwibeipit jap jønpyty midy jap infierno.

Ku ja Jesüs tmadyakpaajty tu'uk ja borreek midy tigøøpy

¹⁰ Kidits øts ja n'u'nk n'una'jk xmijsotmā'jtidi. Janch øts idø'øn nwa'añ jøts ku y'ankilis ja jap tsajpøtpty Dios Teety wyingujkpy. ¹¹ Pø ja'axi tøn nimiñ jøts øts ja nyiknitso'ok'attit pøn ja pyøky yikwindigø'øyiñidip.

¹² ¿Sa mee m'ukwa'añ? Ku jaa'y jam wyinaty tmøø'taty nimagø'pxy ja borreegi, jøts kuts ja tu'uk tyigø'øty, ¿ti ka'ap ja t'ats'ixa'at? Kuwanixi ja jam kojpkøjpx tyikta'ant ja ñimakta'pxy myaktaxujkpi, jøts ja t'ats'ixa'at midy tø tyigø. ¹³ Kuts ja tpaatt, ne'egi tyaxonda'akpts ja' midy tø y'uktigøp jøts nika'ap ja jade'en ne'egi yiktaxonda'akti ja ñimakta'pxy myaktaxujkpi midy kadigøødyip. ¹⁴ Jade'ents meets idø'øn ja Dios Teety mjawiyidi pøn jap tsajpøtpty, ka'ap ja ttsøky jøts y'u'nk y'una'jk ja jade'en tyigø'øty.

Sa nmigu'uktøjk nmaa'kxuujkint

¹⁵ Pøni jam nmigu'uk mga'ødyuñiyi, nagyajpxidits anadyu'uk jøts xukwinjawit ja pyøky. Pøni kyupijkypts, tøts ja mja' wyinaty myajada'aky jøts ja pyøky nayide'en tkagu'ayo'ombaadit. ¹⁶ Kuts mgagupøkit ku ka' mmaadoowa'anit, winets tu'uk majtsk jaa'y xwaadso'ot jøts ja t'ejxtit tñjawidit pøni sa jam pøn wya'añ. ¹⁷ Kuts ja kyayikmøjpiktakmidit, winets xukmado'ot ja mayjaa'y pøn tjanchnja'widip ja Dios; jøts ku ni ja'baat kyayikmøjpiktakmidit, winets ja jade'en xpikta'aktit sam ja jaa'y pøn Dios tkajanchja'widip, uk jade'en sam yikugubajtpitøjk yikwa'andi yiktejtj.

¹⁸ Janch meets idø'øn nnøjmi, pøni pøn meets ya ja pyøky maa'kxuujkip, nayide'en ja tsajpøtpty yikmaa'kxukt. Jøts pøni pøn mets ya mgamaa'kxuujkpy, nayide'en ja tsajpøtpty kyayikmaa'kxukt.

¹⁹ Nayi ndukmadoodip ixayam, pøni pøn tu'uk majtsk nagyajpxidip, jøts t'amidoowa'andi tpoxtsoowa'andi tigati ja Dios Teety, mo'ojidipts ja'. ²⁰ Pøni mā tu'uk majtsk ñamyukyidi ja jaa'y øts køjpx, jamts øts ja møøt n'ity.

²¹ Xjats ja Pedro ojts tñinijky ja nwindson'ajtim Jesüs, jøts ja ttiibyiky:

—Windsøn'ajtim, ¿winaak ojkin øts ja nmigu'uk nmaa'kxt ku øts ja xka'ødyu'unt kawinaak ojk? ¿Øy ku wixujk ojk?

²² Jøts ja nwindson'ajtim Jesüs y'adsøøy:

—Ka'axi me nnøjmi jøts ku ja'ayi wixujk ojk. Nømpxi øts yam nwa'añ jøts kawinaak ojk pøni winaak ojk meets ja jaa'y nmidundigøyidi.

Ku ja Jesüs tmadyakpaajty ja tumbi pøn tkamaa'kxuujk ja myigu'uk

²³ Jade'en idø'øn ja Dios kyutuyk sam tu'uk ja windsønin pøn ja tyumbitøjk ojts tyoypayø'ø. ²⁴ Exam idø'øn wyinaty tñibøkinim, ku ja ojts yiktaniway tu'uk ja tyumbi midy ja wyinaty kawine'en miyoj'ajtyip. ²⁵ Kumi ka'ats ja tyumbi myeeñ ti ja tyagubatp ja yoj, winets ja windsøn wya'añ jøts wan tyiknitookti møøt y'u'nk ñidø'øxy, jøts pøni ti jaty jam pyikta'aky'ajttip. Jøts pøni wine'en ja choobaatti, ja'ats ja yoj kyudøkip. ²⁶ Xjats ja tumbi tminuu'kxaajky ja wyindsøn, ojts ja twinguxani, yide'en ja tñimaay: "Windsøn, miduda'aky'ajtk øts, ngubatp øts ja tuki'iyi." ²⁷ Xjats ja windsøn ja ojts y'ayo'ijxyi, jøts ja yoj ja tyamaa'kxuujkiyi jøts ja yik'awa'atspidsøøjmiyi. ²⁸ Kuuyi ja tumbi ja'ayi pyidsiimy, jøts ja ojts tu'uk tminabyaadyisi ja myigu'uk ja myøøtumbi, ja' ja miyoj'ajtyip tu'uk pesi majtsk pesi. Yukpajkiixpy ja ojts tyimyach jøts ja jadi'iñi tyukpani, yide'en ja møk'ampy tñøjmi: "iPe'tpy xkubatt ja yoj, yak putyi!" ²⁹ Winets ja myigu'uk ñagyxendyaajkøø ja' wyindum jøts ja ojts myinuu'kxa'agyiyi: "Miduda'aky'ajtk øts, ngubatp øts ja tuki'iyi." ³⁰ Jøts ja yjadu'ukpi, ka'ap ja tkupijky, ojts ja ñijky jøts ja ojts tpiikta'aky ja myigu'uk jap puxøjkøtpty kunim ja tyimgyubatt ja yoj. ³¹ Kuts ja yjadu'ukpi ja jade'en t'ejxtøø, tyimy'ayojidi ja' jøts ja ojts t'atstukmadowdi ja wyindsøn sa jaty ja wyinaty tø t'ejxti. ³² Winets ja windsøn ja tyumbi tñankwyadsojøø midy idø'øn jade'en adøtsp, jøts ja tñimaay: "iMets miku!, burri! Tø mets ja myoj ndamee'kxy ku me tø xminuu'kxa'aky. ³³ Nayide'en me ndijy jeexyip ja nmigu'uk

x'ayo'ijxy sa me tɔ n'ayo'ijxyin." ³⁴ Yikxon ja windsøn yjantyimy'ambijky, jɔts ja tkejxy ayooi kunim ja myigubajtɔxit.

³⁵ Jɔts ja nwindson'ajtim Jesús yide'en myadyak'abajtyii'ñi:

—Nayide'en meets ja Dios Teety mduniyit pɔni ka' amumjoojt xmaa'kxukti ja mmigu'uk.

19

Ku ja Jesús kyajpxwiy sudso ja amajtsk'ajtin ñaxy

¹ Ku ja nwindson'ajtim Jesús jade'en wyinaty tɔ wya'añ, xjats ja chøø'ñ Galilea etjotp, jɔts ja ñijxy jam Jude'it etjotp midì tamp nøøbukø'øm Jordán. ² May jaa'y ja pawidejtyip, jɔts ja jam may tyiktsøøjky ja pamaa'y.

³ Winets ja fariseotøjk winaagin tñimendi ja nwindson'ajtim Jesús jɔts ja tkajpxy'ejxwá'andi, ojts ja tyiktøwdi:

—¿Kutuky yø jade'en jɔts øy pøn tñajtsstu'utt ñidø'øxy ku ja yiin waan tyundigø'y?

⁴ Jɔts ja t'adsøøy:

—¿Ka'anìm meets ja Dios kyajpxy x'ejxi? Pø patyxi ja yaa'y ja tø'øxy tyik'øyyii'ñ pøn xyiktsø'ondaajkindip. ⁵ Nayi nøøm ja': "Ja'agøjpx ja yaa'dyøjk ja tyeety ja tyaak tñajtsstu'utt, jɔts ja ñidø'øxy ja møøt tu'ugyi ja'ayi chøønit." ⁶ Tu'ugyi ja ñamyayi tyimbyaaty øy ja jaa'y yjanamajtskidi, paty ka'ap pyaat'aty: jɔts jaa'y ja tñankñawya'kxi midì Dios tø tñanibiktaagi tu'uk yaa'y jɔts tu'uk tø'øxy.

⁷ Xjats ja ttiibyøjkti:

—¿Jøts tigøjxpts ja Moisés tyajky ja tyi'ajtin ja tø'øxyøjk jɔts øy ja yikmajtsstu'utt?

⁸ Jɔts ja nwindson'ajtim Jesús ja t'adsøøy:

—Meets jade'en ja mgawindiy'ajtin myikmajadakpy ku ja Moisés ojts tyikutuky jɔts øy xminawya'kxidit ja mñidø'øxy; ka'a'pts yø y'ijty jade'en tso'onda'agyip. ⁹ Øts wamp, pøni pøn tñinawya'kxi ja ñidø'øxy a'ø'y'ampy, ku ja wenk yaa'dyøjk ja wyinaty tñagamøøt'aty, jɔts ja tñøøt'amajtskiyøjmi ja wenk tø'øxyøjk, ja' idø'øn pøkyump; nayi pøky ja nayide'en pøn tñøøt'amajtskiyip ja tø'øxyøjk midì tø yikmajtsstu'uty.

¹⁰ Xjats ja pyabøjkpitøjk ja ñimaajyiyøø:

—Pøni jade'endam yaa'dyøjk tñøøtsøøni ja ñidø'øxy, ne'egi øy tamts ja' ku nguidy-imy'amajtska'ant.

¹¹ Jɔts ja nwindson'ajtim Jesús ja ñimaajyidøø:

—Pø janch jade'en, ka'a'pts niduki'iyi tkupøkti. Ka'ap ya'at winmaa'ñ pøn nugo ajawi tja'gyuki, ja'ayi dø'øn tkupøjktip pøn Dios møøjyidip. ¹² Ja mayjøøp ja winmaa'ñ jɔts jaa'y kya'amajtskidi: ku winaagin ka'pxy kyamendi naxwiñ, winaagints kø'øm ñadyuñidi ku ñay'isabikyidi jɔts ka' y'amajtskidi, jɔts ja winaagin pøn tkagu'amajtskip ja Dios kyutujk. Pøni pøn jade'en ttunwamp, wants jade'en ttuñ.

Ku ja Jesús tkunuu'kxy ja mutskuna'jk

¹³ Winets ja nwindson'ajtim Jesús yiktanimiñ mutsk mixyuna'jkti jɔts ja tñønixajt jɔts ja tku'amidowit; jɔts ja pyabøjkpitøjk yide'en ja tñimaay ja jaa'y pøn twaamendip ja mutskuna'jk jɔts kyatøkidit ja mutskuna'jk. ¹⁴ Yide'ents ja nwindson'ajtim Jesús wyaañ:

—Majtsstu'utti, wan øts yø mutskuna'jk xnimendi, kidi meets yø xkayiknajxni; yø' dø'øn Dios ja'ajtidip pøn jade'endi sam yø mutskuna'jkindi, ja'ats tpaattip ja Dios kyutujk.

¹⁵ Jɔts ja ojts tkunuu'kxy ja mutskuna'jk, jɔts ja jam ojts cho'oni.

Ja kumeeñ jaa'y

¹⁶ Tu'uk idø'øn una'jk jaa'y, ja'ats ojts t'ats'ixy ja nwindson'ajtim Jesús, jɔts ja t'atsnimaay: —Mets øyjaa'y yik'ixpøjkpi, ¿ti øy'ajtin ø ndu'ump jøts øts ja n'anmija'win ja jujky'ajtin tpaatt xemikøjxp?

¹⁷ Xjats ja nwindson'ajtim Jesús ja tñimaay:

—¿Tiku ø xnøjmi jɔts ku ø n'øyi? Tu'ugyi ja' midì øy, jɔts ja Dios idø'øn ja'. Pøni mbaatwampyts ja jujky'ajtim xemikøjxp, paduujnits ja Dios kyutujk.

¹⁸ Jɔts ja una'jk jaa'y wyaañ:

—¿Midi'ibi?

Jøts ja nwindson'ajtim Jesús tñimaay:

—Kidi myikjaa'y'øøky; kidi mmigu'uk ñidø'øxy xpøjkxi; kidi mmeech; kidi pøn xwindaa'y'aty; ¹⁹ windsø'øgi mdeety mdaak; jøts tsok mmigu'uk sam kø'øm mnachøkyin.

²⁰ Jøts ja una'jk jaa'y yide'en tñimaay ja nwindson'ajtim:

—Tø øts yø jade'en njatunguixy, jaayim øts yø jade'en mbaduñ ku nmutsk'aty. ¿Tits øts idø'øn njaaktu'ump?

²¹ Jøts ja nwindson'ajtim Jesús ja ñimaajyøø:

—Pøni øy yikxon mjaa'y'atwə'añ, nøjkk x'atsto'okjə'økixy ti jaty jam mjagyeyjy jøts xmo'ot ja ñimeeñ ja ayoobi jaa'y, winets xpaa'tt ja øy'ajtin ja xondaajkin jap tsajppjøty; ku jade'en x'uktu'unt, winets nme'ent jøts ø xpawidett.

²² Xjats ku ja jade'en tmadøø, jøts ja yjotmadyøjkijii'ñ, kumi jantyimgyumeeñ, kumi jantyimgyubikta'aky idø'on ja'.

²³ Winets ja nwindson'ajtim Jesús tnimaay ja pyabøjkpitøjk:

—Øts yam tyimwyamp jøts ku møk y'aduky: jøts kumeeñ jaa'y tpaajttit ja Dios kyutujk midu jap tsajppjøty. ²⁴ Jøts jaaktyimwyamp øts jøts ku ja kumeeñ jaa'y janch apeni ñaxti ma Dios ja kyutujk ttanitani tuki'iyi, pø ne'egi tsojk ñaxt ja møj jiyujk jap xu'unjutjøty.

²⁵ Kuuyi ja pyabøjkpitøjk ja jade'en tmadoodøø, janch ñigyumaap ja tyimyja'widøø, jøts ja xem yam ñayiktøøjidøø:

—¿Pønimts idø'on nitso'ok'atp?

²⁶ Xjats ja nwindson'ajtim Jesús ja ojts y'ijxyidi, jøts ja ñimaayjøø:

—Ka'ap yø øy pøn jaa'y kə'øm ñankñitso'ogiyit, ja Dios ja'ayi myøøt'ajtpy ja møk'ajtin sudso xyikñitsoojkint, niiti Dios tkatsepjawi.

²⁷ Xjats ja Pedro tyiktiy:

—Windsøn'ajtim, tø øø tuki'iyi n'ixmajtskixy ti jaty øøts y'ity njagyeyjy, jøts øø tø ndsøøñ jøts me myikpawidity. ¿Tits øøts idø'on nbaatp, ti øøts idø'on nbøkp?

²⁸ Jøts ja nwindson'ajtim Jesús ja t'adsøøy:

—Janch øts idø'on nwa'añ, ku yja'att ja xøøw ja jumøjt ku tuki'iyi yjemyigyøxt jadigojk, ku ø n'ixa'akt ngutujktaajkjøtpy ku øts ja møk'ajtin nmi'ixa'akt, jøts meets wine'enin meets ixa xpawidity, xnayimøøt'ixa'akp meets nayide'en nimakmajtsk jap kutujktaajkjøtpy, jøts xiidyu'undit ja Israelit jaa'y niduki'iyi. ²⁹ Jøts nayide'en pøn jaty tø tmatjstutkøxti ja tyøjk, ja myigu'uktøjk, chø' y'uch, tyeety tyaak, y'u'nk ñidø'øxy, uk ñaajx kyam tmatjstut'uttibaat øts ngutujkøjpx, yikmo'odipts ja jinaxy jinaxy øy ti, jøts pyaattip ja' ja jujky'ajtin midu xemikøjpx. ³⁰ Jøts may ja wyindigø'ødyit pøn ixyam namyøjpiktaajkidip kə'øm; jøts pøn ixyam ne'egi windigø'y'ejttip, ja'ats ne'egi nøjkk møjtøkidip.

20

Ku ja Jesús tmadyakpaajty ja tumbitøjk

¹ Jade'enin idø'on ja Dios kyutujk midu yjaa'y tyanitanaapy sam tu'uk jaa'y kyugam'atyin jøts ja chøøñ jøpyi jøpyi tumbi ixaabyi jøts ja y'uvitsa'am pyidø'økt. ² Ojts ja tyikwin'øyidi møøt ja tumbitøjk, øy ja tmiju'uty tu'uk puxmeeñ tukxøøw, jøts ja ojts tkexy tumbi jam kyamjotp. ³ Jøts idø'on ja ojts cho'ongojmi, ja xøøw wyinaty tuk'ajopu'nk, jøts ja jap maayjøtpy ojts tjaak'ixy ja jaa'y pøn awatsidip. ⁴ Yide'en ja tnimaay: “Nøjkk mee nayide'en mduñ jap kamjøtpy, jøts nmiju'udyit nayide'en sam pyaatt'aty.” Winets ja ojts ñøjkxti. ⁵ Xjats ja windsøn cho'ongojmi ku ja xøøw kyukiyii'ñ, nayide'en winakxyøøw nay ja tumbi dø'on ja y'ats'ejxkojmip. ⁶ Jøts ku ja xøøw jawaani kyajajxni, xjats ja ojts cho'ongojmi tumbi ixaabyi, jøts ja ojts ñijky nay jap maayjøtpy, jøts ja ojts tjaakpaaty ja jaa'y pøn wyinaty awatsidip, yide'en ja tnimaay: “¿Tiku meets ya nugo mxinaxy, ti kidi mee mdunwə'añ?” ⁷ Yide'ents ja y'adsøødøø: “Kumi ka'ap øø pøn xyiktunkpaatwə'añ.” Xjats idø'on ja tnimaay: “Nayi nøjkkts mduñ øts ngamjøtpy, jøts nmiju'udyit.” ⁸ Xjats ku y'ux'ajty, winets ja windsøn tnimaay ja tyumbi midu yiktump: “Yaajxi yø tumbitøjk jøts xmo'ot myijuu'ñ yø' jawyenidip pøn ix'oojk tø tyøkidi tumbi, jøts ja ix'oojk xmiju'uty pøn jawyeen tø tyøkidi tumbi.” ⁹ Winets ja myendøø pøn wyinaty ix'oojk tø tyøkidi tumbi ku ja xøøw jawaani kyajajxni, jøts ja myijuu'ñ ja ojts ka'pxy t'axajidi tu'uk puxmeeñ nidu'uk nidu'uk. ¹⁰ Xjats ku yja' ja tyaja'jtidøø pøn wyinaty jawyeen tø tyøkidi tumbi, jade'en ja wyinmaydi yikmiju'udyip ja tijy jawaani tsowi; nayide'en myijuu'ñ ja ojts t'axajidi tu'uk puxmeeñ nidu'ukjaty. ¹¹ Ku ja jade'en ojts t'axajidi ja myijuu'ñ, xjats ja tmi'ambøjktøø ja wyindsøn, ¹² yide'en ja tnimaadyøø: “Pøn ne'egi oojk tø yja'atti, ja'ayi tø tyundi tuk'hori; jøts ne'egi nayide'en tø xmiuju sam øø tø xmiujuyn, jøts tøts øøts yikxon nduñ jøts øøts yikxon tukxinaxy tø nni'añ.” ¹³ Jøts ja windsøn y'adsøøy, yide'en ja winaaagin yiknimaadyøø: “Ka' me migu'uk yam sa nduñ. ¿Ti kidi tø nnagyajpxyn jøts ku nmiju'uty tu'uk puxmeeñ?” ¹⁴ Axaji yø nmijuu'ñ jøts mnøjknit. Nayide'en øts yø nmijuuwya'añ pøn oojk tø tyøkidi tumbi sam mee tø myikmijuyin. ¹⁵ ¿Pøn øts yø ndejin jade'en xkaduktu'ump pøni sa øts nmeeñ kə'øm nyiktunkpaatwə'añ? ¿Uk yø' idø'on m'amə'at'ajtpy ku n'øyjaa'y'aty?”

¹⁶ Jøts ja Jesús jadigojk yide'en wya'añ:

—Jade'ents idø'on ejx øts ja nwa'añ, pøn tandip ix'oojk, ja'ats ne'egi jawyenidip, jøts pøn jawyenidip, ja'ats ta'andip ix'oojk. Kumi may ja'adi pøn yiktukmadoodip jøts mye'endit, niwaanits ja'adi pøn yik'a'ejxidip jøts tyə'andit. Nayide'ents ja Dios Teety ttu'unt ja ñaxwii'ñit jaa'y.

Ku ja Jesús tniġajxpy jadigojk ja y'o'jkin

¹⁷ Xjats ku ja nwindson'ajtim Jesús jam wyinaty tuu'amni midu Jerusaleń nõjkp, winets ja abiky tjiwaay ja pyabøjkpitøjk midu nimakmajtskti, jøts ja tniġaay:

¹⁸ —Ixya tø nbejtyindi Jerusaleń ma øts nyikøyakt, jøts øts ja teetywindsøndøjk, jøts øts ja kajpxwejpitøjk nyiktagidøkit pøn ø xyik'oooktip. ¹⁹ Ja'ats ø xkøyaktip jøts øts ja xagidøkidit pøn ka'israelit jaa'dyi, ja'ats ø xnixe'ektip xjaxe'ektip, ja'anim ø xwinwoptip xjipwoptip jøts øts ja xyikruspattit; kidigøøk xøøwts øts ja o'jkin nmimada'akt jøts ø njujkpyøkt jadigojk.

Ku ja tøøxyøjk t'amidøø ja may'ajtin midu tyaak'ajtp ja Jacobo møøt ja Juan

²⁰ Winets ja Zebedeo y'unaj'k jam myendøø møøt ja tyaak ma ja nwindson'ajtim Jesús jam wyinaty. Ja Juan idø'on ja møøt ja Jacobo, ja'ats idø'on ja tyaak jam ojts twinguxani ja nwindson'ajtim Jesús, jøts ja t'amidoowa'añ tu'uk ja may'ajt. ²¹ Jøts nwindson'ajtim Jesús ja ojts yiktiiyi:

—iTi dø'on mdsøjkpy?

Jøts ja t'adsøø, yide'en ja tniġaay:

—Tun may'ajt, jøts øts n'u'nk xyik'ixajkit adsow aduuk ku mgutujk xyiknaxkida'akt, tu'uk aga'n jøts jadu'uk anajy, jøts jade'en ja kutujk tmid'a'andit.

²² Jøts ja nwindson'ajtim Jesús ja y'adsoojidøø:

—Ka' mee xnijawidi pøni ti mee m'amidoodip. iMgupøkp meets ja ayo'on midu ø nbaatp?

Jøts ja wyandi:

—Ngupøkp øøts ja'.

²³ Xjats ja tniġaay:

—Janch tūgyajxpy. Mgupøkp meets ja' sã jaty ø njatt ngubatt; jøts kuts øts idø'on xmøøtsinaawya'andi tu'uk aga'n jøts jadu'uk anajy, ka'øtsip ja xpaat'ajtip jøts meets jade'en nyik'ixa'akt, ja' ja yikmo'odip pøni pøn ja Dios Teety kø'øm jade'en tø tyanibiktaagiyidi.

²⁴ Xjats ku ja jade'en tmadowdi ja jyanimajkpidi, jøts ja tjantymy:ambøjktøø ja ñamajtskpidi midu tukjaa'dyi. ²⁵ Jøts nwindson'ajtim Jesús ja ojts yjayaxniyidi niduki'iyi, jøts ja ojts ñii'mxyidi:

—Jade'en sam x'ejxtin xnijawidi, ja jaa'y pøn tnitanaadyip ja naajx ja kajp, øy ja sagasa y'adøtsnidi pøni sã ja kø'øm ttsokti; kuts jam pøngapøn møk yjaakyikutujkni, tu'ugyits yja' ja tyikmøji. ²⁶⁻²⁷ Jøts ka' meets mja' jade'endi, ne'egi yide'en meets mja'. Pøni pøn namyøjpikta'akwajnip, ja' idø'on paat'ajtip jøts ja tuki'iyi ttu'unt pøni ti myigu'uk ejtxidip ka'ejtxidip, ja' idø'on ja twindsø'øgip, ²⁸ jade'en sam ø nduñin, kaja'ajixpi ø tø nmimiñ jøts øts jawyeen nyikwindsø'øgit, pø ja'axi ø tø nmimiñ jøts øts ja windsø'jkin nyakt, jøts øts kø'øm ngudanit ja pojkpitumbi jaa'y pyøkyi, jøts ja may ñitso'ok'attit.

Ku ja Jesús tyikwin'ejxwa'kxy ja winap jaa'y

²⁹ Xjats ku ja jam wyinaty cho'onidi jam Jericó, jøts nwindson'ajtim Jesús may ja jaa'y ja ojts pyadsøøñiyi. ³⁰ Jamts wyinaty namajtsk winap jaa'y chøøni tuu'am, jøts ku ja tmadowdi ku ja nwindson'ajtim Jesús jam wyinaty ñaxy, jøts ja møkta'aky tniġaadyøø:

—iWindsøn'ajtim, rey David y'u'nk y'ap, ayo'ejxk øøts!

³¹ Jøts ja mayjaa'y ja ojts y'øjyidi, ojts yiknøjmidi jøts y'amo'ondit, jøts ja tjaaktyimykjinajxtøø jawaani møk:

—iWindsøn'ajtim, rey David y'u'nk y'ap, ayo'ejxk øøts!

³² Winets ja nwindson'ajtim Jesús wya'k'øiyi'ñ, jøts ja tyaajxiyi'ñ ja winap jaa'dyi jøts ja ttiibyjky, yide'en tniġaay:

—iTi dø'on mdsøjkpit, ti ø ndu'ump?

³³ Jøts ja ojts y'adsowdi:

—Windsøn'ajtim, jawin'ejxwamp øøts.

³⁴ Winets ja nwindson'ajtim Jesús ja jaa'y ojts t'ayo'ixy jøts ja ojts twinguxaji. Jøts ja winap jaa'y nay jaty wyin'ejxwa'kxtøø, jøts ja ojs tpadsoondi ja nwindson'ajtim Jesús.

21

Ku ja Jesús kyajtpøkyi'ñ Jerusaleń

¹ Kuts jam Jerusaleń wyinaty yja'atwanidi, jøts ja kajp ojts tpaatti midu tæøw'ajtp Betfagé, midu jam tmiwington'ajtp ja kojpk midu yiktejp Olivos, winets ja nwindson'ajtim Jesús tkejxy namajtsk ja pyabøjkpi, ² yide'en ja tniġaay:

—Nøjkxti ixø kajpøøjty ixø wingon. Jamts inet buuri tu'uk xpaattit kuwiiñ møøt y'u'nk. Ja'ats inet migajidip jøts ja xyikme'endit. ³ Jøts ku pøn sã wya'añt, jade'en xnøjmidit jøts ku ø ndsøky, jøts ku ø tsojk ngøyajkojmit.

⁴ Jade'en'ampy idø'on ja jade'en yjajty, jøts tyimyjade'en yjatt sã wya'añ ja Dios kyugajxpy ku ja yide'en tjaa'y ja nõky:

⁵ Nøjmidi ja Israelit kajp:

“Ejx yø mwindsøn mnimiñiyi mniija'adyiyi, amyuyj tsaachyuyj, taku'xni byuur'u'nk.”

⁶ Xjats ja pyabøjkpi ojts choondi jøts ja ojts ñøjkxti, ojts ja jade'en ttundi sa nwindson'ajtim Jesús ja wyinaty tø y'ane'emyidi. ⁷ Ojts ja twetsti ja buur møøt y'u'nk, jøts ja ojts wyet ttajiba'andi jøts nwindson'ajtim Jesús ja ojts ttawaa'tspety. ⁸ Jøts ja jaa'dyi janch namay ja'adi, jøts ja ojts tya'apti ja wyet jam tuu'am; pømbi twidøwti ja ujts'aay jøts ja ojts tpikta'akti jam tuu'am. ⁹ Jøts ja jaa'y møk wyambinaxwa'ktøø pøn jawyeen yø'ødyip, jøts nayide'en pøn ix'oojk payø'odyip:

—iDios Teety tsajpjotpit! iKunuu'kx yø rey David y'ap y'u'nk pøn me tø xkexy! iKuuyi Dios Teety jadu'uk yjaak'øyi!

¹⁰ Xjats ku ja nwindson'ajtim Jesús kyajtpøjkii'iñ jam Jerusalén jøts ja kajp kyajotkukidi, may ojts ja jaa'y wya'andi:

—¿Pøn yø jade'en?

¹¹ Jøts ja jaa'y wyandøø:

—Ja Jesús yø' ja Dios kyugajpxy, pøn kyugajp'ajtp Nazaret jam Galile'it etjotp.

Ku ja Jesús twojpidsonguixy ja too'kpitøjk jam tsaptøjkjotp

¹² Jøtsnim ja nwindson'ajtim Jesús tyøjkii'iñ møj tsaptøjkwimpy, jøts ja ojts tka-xpidsonguixy pøn jaty jap wyinaty too'ktip yajktip, juudyip kajpxtip jap tsaptøjkwimpy. Ojts ttejtsapwajkixy ja mesi midi ja jaa'y yiktundip pøn ja myigu'uk myeeñ tkugojnidip, jøts nayide'en chinaabyajt ja yiktejmbejtøø ja paktoo'kpidi; ¹³ jøts ja tnimaay:

—Yide'en jap nøkyixpy wya'añ, jøts ku ajot'ajtaajk ja chaptøjk wya'ant, jøts jade'ents meets yø tø xpiktakni sam maa'tspitøjk chinaadyøjkti.

¹⁴ Jøts ja nwindson'ajtim Jesús jam tsaptøjkjotp winaagin ñimejniyi ja jaa'dyi pøn winapti pøn pakma'atti, jøts ja ojts tyikmøpkøjkixy. ¹⁵ Kuts ja teetywindsøndøjk jøts ja kajpxwejpitøjk ojts t'ejxti ku ja jade'en ttuñ milagri, jøts ku ja ojts tmadowdi ku ja mutskuna'jk jap tsaptøjkjotpy møk wya'andi: “iDioskujuyip rey David y'ap y'u'nk!”, jøts ja jantyimy'ambøjktøø ¹⁶ jøts ja ojts tnøjmidi ja nwindson'ajtim Jesús:

—¿Madøøpy yø' ku yø ixa jade'en wya'andi?

Jøts ja nwindson'ajtim Jesús ja t'adsøøy:

—Nmadøøpy øts yø'. ¿Ti ka'ananim meets ja Dios kyajpxy x'ejxi ku yø tø tjanigajpxy? Yide'enxi ja wya'añ:

Tø ndanibiktaagi jøts øts mutskuna'jk xjanchjawidit xjanchkunuu'kxyjawidit.

¹⁷ Xjats ja Jesús tmatjstuuity, jøts ja ojts chøøn jam Jerusalén jøts ja ñijky Betania, jamts ja ojts mya'ay.

Ku ja Jesús ojts t'ayo'onmigajpxy ja iigi tsa'amguipy midi ja tyøøm ka'ejtp

¹⁸ Xjats ku jyøpy'ajty, jøts ja wyimbejtkojmi ñøjkkojmi jam kajpjotp, winets yuu ja ojts pyaadyiyi. ¹⁹ Xjats ja t'ejxpaajty tu'uk iigi kipy jam tuu'ba'am, jøts ja ojts tninijky, ojts ja kipy tjawi'ixy jøts ja ni tu'uk tyøøm tkapajtøø, nugo janchtum'aay ja'. Winets ja nwindson'ajtim Jesús ojts tnøjmi ja iigi kipy:

—iNijuuni mga'uktøømiñit!

Jade'en ja ojts wya'añ, jøts ja iigi kipy jaty tyimdyijch. ²⁰ Xjats ku ja pyabøjkpitøjk ja ojts jade'en t'ejxti, jøts ja jantyimyñigyumaap jantyimyja'widøø, winets ja tyiktøødøø ja nwindson'ajtim Jesús jøts ja tnimaadyøø:

—¿Sudso yø iigi kipy tosjk tø tyimdyi'ich?

²¹ Jøts ja nwindson'ajtim Jesús ja t'adsøøy:

—Janch øts idø'on nwa'añ, pøni mjanchmøøt'ajttip ja janchja'win, jøts ku kø'øm ka' xwinma'adyit majtsk'aaw majtskjoajt, kidi yø'øypts mee mjatp sam øts yø iigi kipy ixa tø nduñin, yø kojpk paat mee xnøjmit: “iJiwa'ak ya jøts mnøjkxt mejjyotp”, jantyimyjatpts idø'on ja jade'en. ²² Jøts ku øy ti x'amido'odit xpøktso'odit ajot'ajtingøjpx, pøni amumjoojt ja janchja'win xmøøt'atti, myikmo'odipts ja' pøni ti m'amidoodip.

Ja Jesús myøk'ajtin

²³ Jøts ja nwindson'ajtim Jesús tyøjkii'iñ tsaptøjkjotpy, ixap ja wyinaty yik'ixpiky ku winaagin jap myendøø ja teetywindsøndøjkti jøts ja møjaa'dyøjkti, jøts ja ojts tyiibyikyiyi, yide'en ja ñimaajyøø:

—¿Pøn yø yjade'emb i mdanigutujk'ajtip jøts yø jade'en xu'unt? ¿Pøn yø kutujk jade'en tø mmø'øyi?

²⁴ Jøts ja nwindson'ajtim Jesús t'adsøøy:

—Nayide'en meets yam nyiktøøwami; jøts pøni m'adsowimbejt ipnet, winets meets ja ndukmado'ot pøni pøn øts yø jade'en xanigutujk'ajtp ku øts yø jade'en nduñ. ²⁵ ¿Pøn ojts Juan Bautista tyanigutukyiyi jøts ja ya yiknøbatt? ¿Dios, uk jaa'y?

Jøts ja xem yam kə'θomyi tkajpxy'ajtpinaxwə'ktəθ, yide'en ja ñawyə'añidi:

—Ku net yə njanima'ayin jəts ku Dios ja tni'ane'emy, yide'ents inet yə x'adso'owin: “Jəts ɕitigəxp ku ja ojts xkajanchjawidi?”²⁶ Jəts ku net njanima'amyə'an jəts ku nugo jaa'y ja ojts kyexyi yiknəbatpi, winets yə mayjaa'y x nibidə'jka'andit; kumi niduki'iyi yə jade'en tnija'widip jəts ku ja Juan tum ja' tkajpxy mididi Dios yja'ajip.

²⁷ Jəts ja ojts nugo t'uknimaañidi ja nwindsə'n'ajtim Jesú: s:

—Ka'ap əθ nnijawı.

Winets ja ojts ñi'mxyidi:

—Ni əts meets inet ja ngadukmado'ot pəni pən əts yə jade'en xanigtujk'ajtp ku əts yə jade'en nduñ.

Ku ja Jesús tmadyakpaajty namajtsk ja jaa'y tukmiga'axpi

²⁸ Xjats ja tjaaknimaay:

—ɕsə meets idə'ən x'ukja'gyuki ya'atpi ayuujk? Tu'uk idə'ən jaa'y, jamts namajtsk myajnk; jəts ja tu'uk tniimaay: “Mets u'nk, ıxyam mnəjkxt tumbi jəts ə x'atstujkit ja n'uvi tsa'am.”²⁹ Jəts ja myajnk ojts yide'en y'adsəyiyi: “ıKa' nənəjkxwə'añ!” Winmaadyigajts ja jadigojk xjats ja ñijky tumbi. ³⁰ Jəts ja u'nkteety ojts ja tniñijky ja yjadu'ukpi majnk, jəts ja ojts nayide'en tənəmi, jəts ja ojts yide'en y'adsəyiyi: “Əyip teety, əy ə nənəjkxt.” Jəts ja nigidi y'uknəjkxni. ³¹ ɕPəmbits ja tpaduun jade'en sə ja məjaa'y tjatsəky?

Jəts ja wyandəθ:

—Ja' mididi ja jaween y'uknimaay.

Xjats ja nwindsə'n'ajtim Jesú wyaañ:

—Janch əts idə'ən nwa'añ, jəts ku ja ne'egi jaween ja Dios kyutujk ttətəkiyidit ja'adi pən pətktyun'ejtkunajxtip, jəts nigidi meets. ³² Kumi ja' meets ja Juan Bautista tə mđanimiñiyi jəts ja mdukl'ixpiyidi sə mdsəənidi mđanidit sə mjujky'attit, jəts ka'ats ja tə xmbəkti; ne'egi ja' ja ojts tjanchjawidi ja jaa'dyi pən pətktyun'ejtkunajxtip. Jəts kuts meets əy ja ojts jade'en xja'ejxti, ka' meets ja ojts xjanchjawidi, jəts ka' mđsinaə'yin xyiktigajstəθ.

Ku ja Jesús tmadyakpaajty ja ka'ədyumbi

³³ Ukmadowdım jadu'uk ya'at madyə'aky: Tu'uk ja jaa'y mididi ja kam kaja'ampy tjagyajp, ja'ats ojts tni'ipy ja uvi kipy jam kyamjətp, jəts ja ojts tnaguemy; jəts ja ojts tyik'əyi tu'uk ja abəjk'i'ñ mə ja uvi nəθ yik'aməθ'kxıt, jəts tu'uk ja ne'ey janch kəjxp mə ja kam yik'ejx'ett.

Xjats ja ojts winaagin ja tyumbi tmə'əy əjuudyujk ja kyam, jəts ja ojts tkəmə'əy jəts ja chəθ'ñ widejtpi. ³⁴ Xjats ku tpaajty ja uvi tujk'aats, winets ja ojts tkexy winaagin ja tyumbi, jəts ja ttaniguexy ja yjadu'ukpi tumbidi mididi ja wyinaty tyuk'ajuudyujkpy ja kyam, jəts ja yik'amidə'odit ja pikta'aky mididi ja pəat'ajtiyip. ³⁵ Ka'ap ja ñəmdəθ, ojts ja tmajtsti ja tumbi mididi yikajxtip, pəmbi yikwojpy yiktse'jk, pəmbi o'jk jəts pəmbi yikwinga'jts yikjəpkə'jts. ³⁶ Jəts ja kugam ojts tjaakajxkojmi ja tyumbi jawaani namay, nigidi jade'en səm ja yjawyeembidi; nayide'ents ja kam ejx'ejtpi ja ojts tyungojmiyidi.

³⁷ Jətsnim ja ojts tkexy ja kyə'əm'u'nk, yide'en idə'ən ja y'ukwinmay: “Yikwindsə'əgip əts n'u'nk.”³⁸ Jəts kuts ja ojts ja'ayi yik'ixy, winets ja kam ejx'ejtpi ñawyajnidəθ: “Yə' yə kam yə' yə pikta'aky tmidənwəngəjxp, yə' yə tmaəbyəkwəmp; wan tyimiykpa'ə'jkyindi jəts adəm yə nmidaəngəjxınt.”³⁹ Xjats idə'ən ja tmajtstəθ, jəts ojts tyikpidsəmdı jam kamjətp, jəts ja ojts tyik'oəkti.

⁴⁰ Winets ja nwindsə'n'ajtim Jesú ttəbyijky, jəts ja wyaañ:

—Ku mye'ent ja kugam, ɕsəts ja tumbitəjk yiktu'undit mididi kam'ejx'ejtip?

⁴¹ Jəts ja teetywindsəndəjk jəts ja məjaa'dyəjk wyandəθ:

—Niwine'en ja tkidyim'yə'ə'ext yə yjade'embi ka'əy jaa'dyi, yikpa'oəkp ja', jəts ja t'ayajknaxt jadigojk ja ñajx, jəts ja abiktyumbi ja tmo'ot pən ja mo'əjyiyip ja pyikta'aky pəni wine'enin ja pyəat'aty.

⁴² Winets ja nwindsə'n'ajtim Jesú ja ñimaajyidəθ:

—ɕNiwindinim meets Dios kyajpxy xka'ejxi? Yide'enxi ja wyə'añ:

Ja tsəə mididi ja pojtspi kya'uk'a'ejxidəθ,

ja'ats ne'egi ıxyam tə y'ukyikpiktakni jam pəch kyubajkp jəts ja t'amajtsmujkixy ja pəchi.

Ja Dios Teety idə'ən yə jade'en tə ttuñ,

əy yə ñigyumaap njaja'wandi.

⁴³ Jade'ents ja Dios kyajpxy wyə'añ, paty mee nənəmi jəts ku ka' myikmo'odit jəts xətəjkidit ja Dios kyutujk, ja' ja ne'egi yikmo'odip pən tyikwingaxə'jkidip ja Dios yja' mididi ja yja'ajtpy.

⁴⁴ Jəts ja tsəə ku jam pən y'uknəxkidə'akt, windigə'əpy ja ayoobi; jəts ku ja tsəə pən y'uktanəxkidə'akpatit; yikpu'xkiyip ja'.

⁴⁵ Kuts ja teetywindsəndəjk jəts ja fariseotəjk jade'en tmadoodəθ ja madyə'aky mididi ja nwindsə'n'ajtim Jesú ja tamimadyəajkidip, ojts ja tja'gyukidi jəts ku ja' yiknimadyə'akti.

⁴⁶ Winets ja tjadyimyjamaṭswandøø, ja mayjaa'yts chø'jkidip pøn tnija'widip jøts ku ja nwindson'ajtim Jesús ja Dios Teety yja' tkajpxi.

22

Ku ja Jesús tmdyakykpaajty sam tu'uk windsøn tyik'amajtski ja myajnk

¹ Xjats ja nwindson'ajtim Jesús ojts jadigojk ttamimadyaktøjkigyojmi jadu'uk madya'aky, yide'en ja wyaafi:

² —Jade'en ja Dios kyutujk midy yjaa'y ja tyanitaanaapy sam tu'uk windsøn pøn xødump jøts myajnk ja tyik'amajtski, ³ jøts ja tyumbi ja ttaniguexy pøn jaty ja yikaawyampy yik'uukwampy jøts ja t'atswa'adit, ka'ats ja jaa'y ja pyadsoo'nidøø. ⁴ Jøts ja ojts abikytyumbi tjadanigajxkojmi, yide'en ja t'uknimaay: “Nøjxk ja x'atstukmadowdi pøn jaty ø nwaawampy, jøts ku ja kaaky jii'kxy ya abaadi y'ejtni. Tø øts ndsakaa nyik'øøky jøts tyimdyumjane'kxpi tyimdyumjayeekpyi, abaadi a'ejxi y'ejtni, wan tmenidi t'øxniigaabyi t'øxni'ukpidi.” ⁵ Kidyimyøjpiktakti ja' pøn idø'on jayikwaadsodid migaabyi mi'ukpi. Pømbi nøjxni kyamjotp, jøts pømbi tyunk tniyø'øyini ma jaty pøngapøn myeembiky, ⁶ jøts pømbi axaji tyikja'jttøø ja windsøn tyumbi jøts ja tjemdunidi tedunidi, yik'oo'ktibaat ja'. ⁷ Winets ja windsøn yixxon yjantyimy'ambijky, jøts ja ojts tkexy syoldaditøjk jøts ja tyikpa'ooktit ja jaa'y pøn tyimykjaa'y'oo'knidip, jøts ja tnitsaajyidi ja kyajp. ⁸ Winets ja tnimaay tyumbitøjk: “Tum ja abaadi y'ejtni jøts xøow yiktu'unt, ka'adams yø yjade'embi jaa'y pyaat'atyidi jøts yø nyikmiga'ayin nyikmi'uujkin. ⁹ Nøjxktits jam ma jaa'y ñaxy tyøki, jøts ja niduki'yiyi xwa'adit t'øxniigaabyi t'øxni'ukpi pøni pøn jaty jam mbattip.” ¹⁰ Jøts ja tumbi cho'ondøø ñøjxktøø jam tuu'am, jøts ja ojts twaamukti pøn jaty ja jam pyattøø, jam øyjaa'byi ka'øyjaa'byi; jøts ja mayjaa'y jade'en tyik'ujttøø ja tøjkojti.

¹¹ Xjats ja windsøn jam tyøjkii'ñ jøts ja t'ejxwa'añ pøn jaty tø yja'atti migaabyi mi'ukpi, winets ja jap t'ejxpaajty tu'uk ja yaa'dyøjk, jøts ku ja ka'ap jade'en xyøxyi sam idø'on pyaat'atyidi ñaxyoxidit ja t'øxniigaabyidi ja t'øxni'ukpidi. ¹² Jøts ja tnimaay: “¿Sudso mets ya tø mdøki, jøts ka'ats jade'en mxøxyi sam idø'on pyaat'atyidi ku t'øxniigaaky ku t'øxni'ukkk ñaxy?” Jøts ja nisa kidyimwya'añ, amøni ja y'ity. ¹³ Winets ja windsøn ja tnimaay pøn jaty jam wingiidyip wimbøjktip, yide'en ja tnimaay: “Ixe køwøøndi pakwøøndi jøts xwiøbjpidsø'mdit, wan tniyxky agugootstujpy ma yjø'øt ma ya'axt, ma wyingidsetst y'agidsetst.” ¹⁴ Kumi may ja yjayikwaadsowdi øy pøn, jøts waanits ja'adi pøn yik'a'ejxidip.

Ku yikajpxy'aty ja kugubajt

¹⁵ Jøts ja fariseotøjk jam ojts choondi, jøts ja ojts tkajpxy'ejxwa'andi, ja'ats ja tyikpøky'attip jøts ja ttani'øøndit pøni sa jyadyimy'ukwa'añ. ¹⁶ Xjats ja jade'en winaggin tkajxtøø ja yjaa'y møøt ja Herodes yjaa'myi, jøts ja t'atstuknimaawya'andi ja nwindson'ajtim Jesús:

—Windsøn, tø øø nnijawi jøts ku tiy mgajpxy, jøts ku tiy janch ja Dios yja' xnigajpxiyi, ka' xmojpkta'aky øy jaa'y sa yjawa'andi kumi ka' mets pøn xkupiky xkagupiky. ¹⁷ Tukmadooks øøts sa me m'ukwa'añ: ¿Nmo'op øøts kugubajt ja møj windsøn midy jam Roma tsinaapy? ¿Nmo'op øøts u ka'?

¹⁸ Yja'wiyii'ñts ja nwindson'ajtim Jesús ja' jøts ku ja kya'ødyunwa'añiyi, jøts ja tnimaay:

—Meets win'øømbidi, ¿tiku øts jade'en xkajpxy'ejxti? ¹⁹ Tuk'ejxtik øts ja meeñ midy myiktundip ku ja kugubajt xyakti.

Jøts ja ojts t'atskondi tu'uk ja pujxmeeni. ²⁰ Ku ja ojts t'uk'ixy ja nwindson'ajtim Jesús, jøts ja tyiktiiy:

—¿Pøn yø' wyeen y'aaw, jøts pøn yø' xyøow ixa kyøxja'ayiy?

²¹ Jøts ja t'adsodøø:

—Ja nwindson.

Winets ja tnimaajyidi ja nwindson'ajtim Jesús:

—Yø'øts meets yø windsøn mmo'op midy yø yja'ajtpy, jøts Dios yø xmo'odit midy Dios yja'ajtpy.

²² Xjats ku ja jade'en tmadoodøø, ñigyumaap idø'on ja tyimyjajtøø; jøts ja ojts jade'eñi tmatstututti jøts ja choo'nidi.

Ku ja jaa'y tyiktøwdi pøni janch idø'on ja' ku oo'kpi jadigojk yujkpyøktit

²³ Jøts nay ja'abi xøow ja saduceotøjk ojts t'ats'ejxti ja nwindson'ajtim Jesús. Jade'en idø'on ja' ja wyinmaa'ñ tjagyapti jøts ku oo'kpi ka' y'ukjuykpyøjknidit; paty ja yide'en tnimaadyøø ja nwindson'ajtim Jesús:

²⁴ —Windsøn, yide'en ja Moisés wyaafi: kuk pøn tku'ookt ñidø'øxy jøts ku ka' tyiktañ ni tu'uk y'u'nk, pøni jamts y'ajch uk y'uch, ja'ats ja ku'økytø'øxy tmøøt'amajtskip jøts ja tyika'axt, jøts ja myigu'uk kyagudigø'øty midy tø y'øøky. ²⁵ Jats øøts y'ity nmigu'uk tu'uk midy jaa'y'ajttip niwixujk yaa'y. Jøts ja jagyoop y'amajtskiyi'ñ, o'jks ja'. Jøts kumi ka' y'u'nk y'una'jk tyiktaañ, jøts ja y'uch ojts tmda'ñ ja kyap, ja ku'økytø'øxy. ²⁶ Jøts nayide'en yajty

ja myimajtskpi, jøts ja myidigøøkpi nayide'en, tumjade'en ñajxkøjxti niwixujk. ²⁷ Jøts ku ja jade'en y'oo'køjxtøø, jøts ja tø'øxyøjk yjaaktyimy'ø'jky. ²⁸ Jøts kuts ja jadigojk pyidsø'ømdit jujky'ajtpi, çmidi'ibits ja tnið'øxy'atp. pø tøxi ja t'atsnið'øxy'ajtkøxti?

²⁹ Jøts ja ojts yide'en y'adsøyidi ja nwindson'ajtim Jesús:

—Kajaa mdigøydi, ja'agøjxp ku ka' xnija'wiyidi ja Dios kyajpxy, ni ja myøk'ajtin xkanija'wiyidi. ³⁰ Kuts jadigojk ja oo'kpi yjujkpøøktit nipøn kya'uk'amajtskiñit, ka' pøn y'u'nk ñøøx tkøyakt jøts ja y'amajtskit, jade'ents ja chinaañidit sam ankiñisti midi jap tsajpjøtpy. ³¹ Jøts ku ja oo'kpi yjujkpøøkti, çka'aním meets ja nõky x'ixy sa Dios kø'øm tø wya'añ? Nøømxi ja': ³² “Tum øts xDios'ajttip ja Abraham, ja Isaac, jøts ja Jacob.” Kidi oo'kpipts ja ñiDios'ajtpy, pø ja'axi ja ñiDios'ajtpy jøts ja tyikjujky'att øy pøn.

³³ Ku ja jaa'y jade'en tmadoodøø, jøts ja ñigyumaap tja'widøø ku ja jade'en yik'ixpikyidi.

Ja møj kutujk midi ja Dios ñi'ane'empy

³⁴ Winets ja fariseotøjk ojts tñimadowdi jøts ku ja nwindson'ajtim Jesús wyinaty tø tyik'amøn ja saduceotøjkti, jøts ja ñamyujkidøø; ³⁵ jamts tu'uk kajpxwejpi tmøødidi, ja'ats ja tja'ukajpxy'ejxwaan ja nwindson'ajtim Jesús. Jøts ja tyiakti'y:

³⁶ —Windsøn, çmidi'ibi kutujk jawaani møj midi ja Dios kyutujk myøøt'ajtpy?

³⁷ Jøts nwindson'ajtim Jesús t'adsøøy:

—“Windsø'øgi ja Dios amumjoojt, jade'en xtsokt mabaat myajada'aky m'anmija'win, mabaat myajada'aky m'aaw mjojt.” ³⁸ Yø' idø'øn møj jøts yø' idø'øn jawyenip. ³⁹ Jøts ñiñayjade'en ja myimajtskpi, yide'en ja wya'añ: “Jade'en mmigu'uk xtsokt sam kø'øm mnachøkyin.” ⁴⁰ Yø'øbi kutujk majtsk møj midi ja Moisés tø tja'ay jap kyutujkjøtpy, jøts midi ñigajpxtip ja Dios kyugajpxy ku yik'ixpøkti.

çJanç idø'øn ku ja David t'ap'aty ja Cristo?

⁴¹ Nay ixamnim ja fariseotøjk wyinaty amuki y'etininim, ⁴² jøts ja nwindson'ajtim Jesús ttiibyijky:

—çSa mee mwinmay, pøn yø Cristo? çPøn yø' y'u'nk?

Jøts ja tñimaadyøø:

—Ja rey David yø' y'ap.

⁴³ Winets ja nwindson'ajtim Jesús ja tñimaay:

—çJøts sudsomts ja rey David ja Espiritu Santo yikwajinøø jøts ja ojts tijy windsøn? Tiku ja David yide'en wya'añ:

⁴⁴ Nømp ja nwindson'ajtim ja Dios Teety ñimaajyøø:

“Putsinaaky øts n'aga'ñ'ampy, kunim øts yø nmimajadaqøxt pøn jaty mmidsep'ajtip.”

⁴⁵ çSudso ja Cristo ja yiknitsokpi, sudso ja David ja y'ap'aty, jøts yide'ents ja David kø'øm wya'añ jøts ku ja twindsøni?

⁴⁶ Jøts nipøn nišã kidyimwya'añ, jøts ja'abi xøøw ttamajstuttøø, jøts ka'ap pøn y'uktiiyøjkniiyi tigati.

23

Ku ja Jesús ttamigajpxy sa y'adø'øtsti ja fariseotøjkti møøt ja kajpxwejpitøjkti

¹ Xjats ja nwindson'ajtim Jesús tñimaay ja mayjaa'y jøts ja pyabøjkpitøjkt:

² —Yø kajpxwejpitøjkti jøts yø fariseotøjkti, jade'en yø wya'andi jøts ku yø tyimbyaat'atyidi, yø' idø'øn ja tyimñigajpxtip wa'ats, yø' idø'øn ja tyimñija'widip ja Moisés kyutujk. ³ Jade'ents meets yø xpadu'unt, tundi dø'øn jade'en tuki'i'iyi pøni sa mñii'mxyidi; kidits nayide'en m'adø'øtsti sam yø y'adø'øtsti, kumi jade'en'ajttip yø', wenk yø jaayi y'ukwa'andi jøts wenk y'adøtskojmidi. ⁴ Nugo tukmajadaq'ak myajadaq'akti midi janch kamaabyim, jøts ja'ats ja jaa'y tyukpadunwandip; jøts niwine'enin ja kø'øm jade'en tkatunwa'andi. ⁵ Jade'en'ampy jade'en y'adø'øtsti jøts ja kajp y'ejxidit, jøts ja mayjaa'y y'ejxidit. Wyet nikijxy tkøxja'adi wan jaty ja Dios kyutujk, jøts yik'agajpxtip ja ta tjantymbyadundi, jøts nayide'en ñaçojkmiiyi jøts wyet tum yøn tñajtskudiiyi tñiwidettit, ka'ap jade'en tyiktundi sam o pøn jaa'y. ⁶ Ja' chojktip jøts tum jam tyimy'ixa'aktit ma ja windsøn tsinaabyajt jam ku xøøw ku ti tyuñi tsaptøjkjøtpy, ⁷ jøts jade'en ttsokti jøts ja jaa'y nøø'ajy tuu'ajy wyindsø'øgiyidit kyajpxpoo'kxiyidit, jøts ja tyimiyktejt ku ja kyajpxwejti.

⁸ Jøts meetsts kidim jade'en jaa'y xnimaañidi jøts jade'en yiknøjmidit jøts ku mee mgajpxwijy, pø tu'ugyixi mee tum jade'en mnay'uch'atidit mnay'ajch'atidit, jøts tu'ugyits ja mgajpxwejpidi midi mgajpxwejidip, ja Cristo ja', ja yiknitsokpi. ⁹ Jøts kidi pøn xejti teety ya naxwiin naxkijxy, tu'ugyixi meets mdeety ja' pøn jap tsajpjøtpy. ¹⁰ Jøts nika' mnawyindsøndejidit, pø tu'ugyixi ja' pøn mwindsøn'ajtip, ja Cristo, ja yiknitsokpi. ¹¹ Pøn ja myigu'uk twindsø'jkip, ja' idø'øn møj, ja' idø'øn nmigubajk'ajtidip. ¹² Pøn

ja namyøwpikta'akwajniyip kò'òm, yik'amutski ja nøjx yjaty, jòts pònts nabyiktaajkip yik'ayowim, ja'ats idò'òn nøjx møjtojkip.

¹³ 'iTi jade'en mnadyatuujnidip meets kajpxwejpitòjkti meets fariseotòjkti, wine'enin win'òò'ndsòòndi! Meets ja m'agajpxujkpy jòts mmigu'uk xkaduktatòkiwya'andi ja Dios kyutujk. Jòts ka'ats kò'òm mdòkidi, jòts nika' xyiktòkiwymidi pòn ja tsojkin tjàjagyajp.

¹⁴ 'iMjanch'ayòøy meets kajpxwejpitòjkti, meets fariseotòjkti, wine'enin xnidunk'atti ja win'òò'nk!, ku ja ku'òktyò'øxy ja tyòjk ja pyikta'aky xpòjxkidi jòts ñadyijyi xkayiknigaxò'òkti, ñadyijyi ja tsapakajpxy janch yòñ xkajpxti, yò' meets yikxon myiktagubatp.

¹⁵ 'iTi jade'en mnadyatuujnidip meets kajpxwejpitòjkti, meets fariseotòjkti, wine'enin ja mmigu'uk xwin'òòndi! Mjantyimyijotigòødyip meets, jòts ja jaa'y xukupòktit ja mdsinaa'yindi sa mee m'adò'òtsti, jòts kuts ja jaa'y jade'en tò xundi, ne'egi jawaani ka'òy meets ja jaa'y xjaaktyimdyuñ, jade'en ja tpatni sa ja øy øy tymñòjkt jap infierno, jòts nigidi meets jade'en mdyimyjatt.

¹⁶ 'iMjanch'ayòøy meets tuu' niwaabidi, jade'ents xundi sam winapjaa'yindi!, ku mee mwa'añ: "Ku pòn wyanda'aky jòts tyiktestigi'aty ja tsaptòjk, jade'ents ja yikpikta'aky sam pòn kyawanda'agyn; jòts pònts wandakp jòts tyiktestigi'aty ja oori midì ja tsaptòjk yja'ajtpy, ja'ats idò'òn tiy janchwandakp." ¹⁷ 'iMeets mo'otpidi, jade'en xundi sam winap jaa'yindi! 'iMidi'ibi dò'òn jawaani jaaktyimyoj: ja oori, uk ja tsaptòjk midì tyikunuu'kxy jajtp ja oori ku ja yikajpxpaaty? ¹⁸ Jòts nayide'en mwamidi: "Ku pòn wyanda'aky jòts tyiktestigi'aty ja altajr, ka'ap ja wyanda'agyi; kuts pòn wyanda'aky jòts tyiktestigi'aty ja limunsi midì yikyojxp jam altajrkòjxp, ja'ats idò'òn tiy janch wanda'aky." ¹⁹ 'iMee mo'otpidi, mee wimbeets kugoots ejtpidi! 'iMidi'ibi jawaani jaaktyimyoj: ja yojxin, uk ja altajr midì tyikunuu'kxyjajtp ti jaty jam yikyojxp? ²⁰ Jòts pònts tyiktestigi'ajtp ja altajr ku wyanda'aky, kidi ja'ayip ja nugo yiktestigi'ajtpy, nayide'en ja tyestigi'aty ti jaty jam altajrkòjxp; ²¹ jòts pòn tyiktestigi'ajtp ja tsaptòjk, kidi ja'ayip ja nugo yiktestigi'ajtpy ku ja wyanda'aky, nayide'en Dios ja tyiktestigi'aty pòn ja chaptòjk'ajtpy. ²² Nayide'en pòn wandakp jòts tyiktestigi'aty ja tsajp, ja Dios idò'òn chinaadyaajk ja yiktestigi'ajtp, jòts ja Dios kò'òm midì jap tsinaapy.

²³ 'iMjanch'ayòøy meets kajpxwejpitòjkti, meets fariseotòjkti, ku ja win'òò'nk xunk'atti! Kòx kida'ak meets xjanchkugubatkiyx, jòts ka'ap ne'egi xpadu'unxidi midì ja Dios kyutujk jawaani ne'egi yjani'ane'empy ku ja ttsòky ja ødyiidyu'unin, ja pa'ayo'ejxk jòts ja janchja'win. Ya'atpi meets idò'òn ne'egi jawaani mjapaat'ajtp mbadu'ump. ²⁴ 'iMeets winap tuu'waabidi, ku ti x'uukiti tum axity ja xyiknaxti jòts ja uux jam kyatòki, jòts nika'ats xjawidi ja møjpi jiyujk ku ja amuum xjòòndi!

²⁵ 'iTi jade'en mnadyatuujnidip meets kajpxwejpitòjkti jòts meets fariseotòjkti ku xunk'atti ja win'òò'nk! Ja'ayi mee mjanchkamijotkukip sudso ja texy ja tas nikijxyi nadyijyi wa'ats y'ett, jòts ka'ap ja xunk'atti pòni sadam ja yjòtpy. Ni xkaja'gyukidi kudam m'amp mjotp tum ja axòòkpi yigaappi xjamòò'tti, ku jaa'y nugo xwin'òòndi xwimaatsti. ²⁶ Meets fariseo winapti: jawyeen yò mga'òy'ajtin xmajtstu'ttitt, jòts jade'en ja m'anmija'win ttaniwa'ats'attit ejxim n'uk'ejxint tasi nyikwaajtsin, jade'en nikijxy jade'en jòtpyi.

²⁷ 'iMjanch'ayòøy meets kajpxwejpitòjkti jòts meets fariseotòjkti, meets win'òò'mbidi!, jade'en mee mgaxi'iky sam ja oo'kpi nipotsin midì tò yikpòobi jòts ja janch tsuj nikijxy kyaxi'iky, jòts ku jap jòtpy ujts abòki oo'kpi pajk jap, jòts tum ja axòòk ja jap myòòt. ²⁸ Jade'enxi meets idò'òn; wemp am ñadyijyi xuk'ejxti ja jaa'y jòts ku mee m'òyjaa'y. Midì'its jap m'agwidip mjoojtidi, tum ja taay'ajtk, tum ja kya'òybi jap mwinmaa'n'ajttip.

²⁹ 'iMjanch'ayòøy meets kajpxwejpitòjkti jòts meets fariseotòjkti, meets win'òò'mbidi! Meetsxi ja Dios kyugajpxy ja ñipots myik'òyidip ku ja y'oookti, jòts ja xyò'òm yik'òyidi wyingi'jy pòn tò y'ats'òyjaa'y'atti, ³⁰ jòts mjanch'uknòmdì: "Kuk adòm jeexyip n'ukja'ajtyindi, ka'ap adòm ja mójaa'dyòjk jeexyip tò nbudòjkindi ku ja tò tyik'ookti ja Dios kyugajpxty." ³¹ Yò'òyits meets kò'òm mnadyani'òò'niyip jòts ku ja xeety'apidi pòn ja Dios kyugajpxy tò tyik'ookti. ³² 'iYik'abaadidits inet midì ja mdeety'aptòjk tò ttunjòpidi!

³³ 'iMeets win'òò'mbidi! 'iMeets kawindiyjaa'dyi! 'iSudso meets xijy ja ayo'on m'ukniwaajtsniyidit midì jap ayodaajkjòtpy mbaattip? ³⁴ Yò'ògòjpx òts kugajjy ngaxt mòòt ja wijyaa'dyi mòòt ja yik'ixpòjkpidi. Jòts myik'oopts meets ja winagxin jòts ja xyikruspattit, jòts pòmbi yiktseepk yikwopp jap tsaptòjkjotp, jòts pòmbi yik'ixa'ap yikpawidètp kajp kajp. ³⁵ Jade'ents meets ja pòky mdaja'adit, jòts ja xkubattit ku ja øyjaa'y kawiene'en tò xyik'òò'knidi, Abel ñikòjxp cho'onda'aky pòn øy pòn yikxon jaa'y'ajtp, kunim ja Zacarias ttamigugoxi pòn ja Berequias myajnk'ajtpy, pòn mee myik'ò'jk jap tsaptòjkjòtpy ma ja altajr y'ity. ³⁶ Janch òts idò'òn nwa'añ, ku jade'en yiktuñ yò'òbi pòky, yò ya'atpi jaa'y yò taja'adidip jòts yò yiktagubattit pòn jaty ja ixyam tsinaadyip.

³⁷ 'iJerusaléngit kajp, Jerusaléngit kajp, meetsxi miyk'øø'kpy ja Dios kyugajpxy, jøts xwinga'atsti xjöpka'atsti pøn ja Dios kyajpxy tyikyø'øyidip, pøn ja Dios mjadanigajxidip! iTø meets njapeemukwa'añ njakonmukwa'añ kawinaak ojk, sam tsikuna'lk ja tyaaq ñimu'uxyi, ka'ats meets ja jade'en tø xkupiky! ³⁸ Ejxtits inet ja tsaptøjk ku ja abak tyani; ³⁹ øts idø'on wamp jøts ku meets xka'uk'ejxnit tsojk, jøts ku meets jaanim x'ejxtit pøni juuni ja tiemp jya'aty ku mnø'ømdit: "Ejxik Dios ja kyunuu'kxyu'nk ñadyaguguexyi midi mmime'enxiyip ja kyutujk."

24

Ku ja Jesús tñigajpxy jøts ku ja tsaptøjk kyida'att

¹ Xjats ja nwindson'ajtim Jesús pyidsiimy jam tsaptøjkjotp, jøts ixam ja wyinaty ñajxnü ku ja pyabøjkpitøjk ja jam wingon ñimejniyøø, jøts ja tyukmadooðinaxwa'jkøø sa jaty ja tsaptøjk jam t'ixy ku ja janch tsuj janch øy. ² Jøts nwindson'ajtim Jesús ja t'adsøøy:

—¿M'ejxtip ixa jade'en tuki'iyi? Øts wamp jøts ku ya nitu'ugin ja tsaa kyata'ant nikiibyety, kuja'jigyøxp yø tuki'iyi.

Ja ejxa'an midi yik'ejxp ku wyinaty yiktiidyunwanidi ja naxwii'ñit jaa'y

³ Winets ja ojts ñøjkxti jam kojpkøjpx midi yiktejp Olivos; jøts ku ja nwindson'ajtim Jesús ixam wyinaty tø y'ixa'aky, winets ja pyabøjkpitøjk ja ojts ñiniikxyiyi, jøts ja ojts ñimaajyidi amaa'tsk:

—Ja' øø ndsøjkpy jøts øøts xukmado'ot windem idø'on ja jade'en yjatt. ¿Ti ejxpajt ti ejxa'an øø n'ejxp jøts ku wyinaty mmenwa'añ, jøts ku wyinaty yja'atwa'añ ja tiidyu'unin xøøw?

⁴ Jøts nwindson'ajtim Jesús ja ñimaajyidøø:

—Øyim mnay'ejx'etidit jøts kidi øy pøn nugo mwin'iiñidi. ⁵ Kumi may ja jaa'y mye'endit jøts ja jade'en ñadyejidit jøts ku ja y'øtsi, yide'en ja wya'andit: "Øts idø'on Cristo ja yiknitsokpi"; jøts mayts ja jade'en twin'øøndit ja jaa'y. ⁶ Jøts mmado'op meets jøts ku jaa'y tñigajpxit ja tsep, uk tñigajpxit sa jaty ja tsep yjaaktunit, sa jaty ja ayo'on yikpaatt; kidits mdsø'øgidi, jatp idø'on ja jade'en; ka'anims wyinaty tmibaat'aty jøts ja naxwii'ñit jaa'y yiktiidyu'undit. ⁷ Kumi tseptu'undip ja jaa'y pøn ki'abikñaajx ki'abikyajpti jøts ñañibidø'øgidit xem yam, jøts ja windsøndøjk nayide'en cheptu'undit ja xem ja yam pøn jaty ja kajp ja naajx tñitanaadyip naxwiiñ; etp yuu xøøw, jøts pa'am køx kida'ak jøts ujx ñaxt maawyeen. ⁸ Tso'ondakpnim ja ayo'on wyinaty jade'en midi yixkon jøt'ejxpnim.

⁹ Winets meets miykøyajt jøts myikjemdu'undit myiktedu'undit, jøts jaa'y yik'ooigidit, jøts nipøn mgatsokidi o magajp, ja'agøjpx ku mee xjanchjawi. ¹⁰ Winet øts ja jaa'y may ja yjanchja'win t'ixmatstít, yja'dyigøøgyøxnidip ja Dios yja' ja'ami jøts ja myigu'uktøjk tkøyajknidit. ¹¹ May ja windaay'ajtpi pyidsø'ømdit, ñadyijiywa'andit jøts ku Dios yja' ja tñigajpxidi, jøts may ja myigu'uk twin'øøndit. ¹² Kawine'en ñaxt ja ka'ødyu'unin jøts ja ka'øwvinmaa'ñ, may ja jaa'y xem yam kawin'ijxim ñayajwyidit. ¹³ Jøts pøn tñidanaapy jøts pøn tu'ugyi winmaapy, ja'ats idø'on nøjx nitso'ok'ajtp ja y'anmija'win. ¹⁴ Jøts ya'at øy madsøø yikajpxwa'kxt wine'enin naxwii'ñit y'ity, ya'at Dios y'øgyajpxy y'ømyadya'aky, jøts naajx kajp ja møj ja mutsk tñajawidit; jats idø'on tmibaat'att jøts naxwii'ñit jaa'y yiktiidyu'undit.

¹⁵ Ja Daniel, pøn ja Dios kyugajpxy'ajtpy, ja' yide'en tñajtsja'wyii'ñ jøts tñigajpxy ti yikpøkyajtp, ti midundxygøøpy; jøts kuts x'ejxtit jøts ku ja'baat jap yik'ejxni yikpatni ma ja tsaachjagunuukxy chapøjk jap, japts ja mga'ukmaa'kxniyidit. Pøni pøn ya'atpi nøky kajpxp, wan tja'gyuki. ¹⁶ Wants ja tka'akti pøni pøn tsinaadyip jam Judea jøts kyaknøjkxtit jam kojpkøjpx. ¹⁷ Jøts pøni jam wyinaty pøngapøn tø pyety tyøjkøjpx ja'abi xøøw, ka'ats t'ukniwinajknit ok idø'on ti tjaak'atsjuutt jap tyøjkjøtpy; ¹⁸ jøts pøni jam wyinaty pøngapøn wyidity kyamjotp, wan ka' t'ukwimbejtni, ni wyet ni ñaamy tka'atswetst. ¹⁹ iAyo'ijxyim ja tø'øxyøjk yjanchjattit pøn jaty mutsk jam wyinaty tnikøjpx'ajttip, pøn jaty myaxu'nk jam wyinaty tø tyiakxø'økti! ²⁰ Amidowdi pøktsowdi Dios jøts kidi ja et mga'akti ku ja et y'amxuxy chaachxuxy, jøts kidi wyinaty jyaty ku poo'kxin xøøw; ²¹ møk ja ayo'on yik'ext sam ka' windi jyatyin wine'en ixyam kujk ñaxy ku ñaxwii'ñit cho'ondaajky. Jøts ku ja ñaxt ni kya'ukyik'ejxnit jadu'uk nayide'en. ²² Jøts ku Dios tyikjakt ja ayo'on jøts jeky y'ett, ka' pøn ñitsoojkin tpaatt; jøts ka'apts jade'en ttu'unt, ja'agøjpx ku tsoky ja jaa'y jøts tpa'ayøp pøn ja kø'øm tø twi'ixy.

²³ Jøts ku winet pøn mnøø'mxidit: "Ejxti, ixya ja Cristo midi yiknitsokp", uk ñø'ømdit "Ejxti, ixem ja", kidi xmibøkti. ²⁴ May ja windaay'ajtpi mye'endit jøts myikwin'øøndit, ñadyijyi ja ñadyejidit Cristo midi yiknitsokp, uk ñadyijyi ja ñabyikta'agit jade'en sam ja jaa'y pøn Dios yja' tkajpxxidip; jøts tñanky'ejxidit ja ejxa'an ja ejxpajt, ñadyijyi ttu'undit ja milagri jøts ja jaa'y ttawin'øøndit, ja'baat ja twin'øønwa'andit pøn ja Dios kø'øm tø wyi'ijxyidi. ²⁵ Patki'jyi meets yø ixyam ndukmadøy, ²⁶ kuxip myiknøjmidit: "Ejxti, ixem ja abak etjotp",

kidits jam mnõjxkti; uk mjayiknõjmidits; “Ejxti, ixyajp tam ja tõjkjõtpy”, kidits meets ja xmbiky. ²⁷ Ku ø nme'ent, jade'en ø nme'ent sam wyidsukyin ku ja kyaxi'iky jam xõbidsimy, nayide'ents ja nay jatyi kyaxø'kmi xõjexy jam tsajpwemp. ²⁸ Niduki'iyi meets ja xnijawit ku nme'ent.

Sq mye'ent ja Dios ja myõjkudanaabyi ja yiknitsokpi

²⁹ Kuuyi ja ayo'on jade'en y'uknaxt, winets ja xøøw y'ookt, winets ja po' ka' y'uk'anit, jøts ja maadsa' kya'adit. Ku ja tsajp y'adøtspõjkõxnit, tuki'iyi tum jade'en yjattit ti jaty jam ejtp tsajpwemp. ³⁰ Winetnimts ja x'ejxtit jam tsajpwemp midi øts jawyeen nanky'eixip, jøts ja naxwii'ñit jaa'y ni'ijtyi ya'axtit, jøts t'ejxtit jøts ku ø nmime'ent yootsõtpty ja nmøk'ajtin jøts ja kunuu'kxin. ³¹ Winets ja puxujx yikmado'ot møk'ampy jøts ø ndanigaxtit ja ankilistõjk, ja'ats twaamukõjxp pøn jaty ø nja'ajtpy wine'en naxwii'ñit jaa'y amuum tuk'ojkyi tuk-tsajp'agida'aky.

³² Øy x'ukja'gyukidit yø madya'aky ku yø iigi kipy yiknimadya'aky: Ku ja y'awaj y'axeeñ u'nkniim, jøts pyidsimy ja y'aay, jade'ents meets ja xnijawit ku ja y'anda'akwani. ³³ Nayide'ents idø'øn ja nbiktajjki ku ja ayo'on jade'en x'ejxtit, jade'ents meets ja xnijawit jøts ku wyingõñ juuni ja tiidyu'unin ñaxkida'akt, tyimy'ixaani dø'øn ja wyinaty jøts ja jade'en yjatt. ³⁴ Jade'en øts idø'øn nwa'añ, jøts ku ja jaayi jade'en yjatt namga'anin y'oo'kõxti pøn jaty ja juiky'ajttip ixyam. ³⁵ Najxp y'ity yø naajx tsajp, øy yø juuni kyudigø'øty, jøts øts n'ayuuik nijuuni yø kyakixy kyanaxy kunim jade'en tyimyjatt.

³⁶ Ka'ats pøn tnijawi pøni ti xøøw pøni ti jumøjt ja jade'en yjatt, ni ja ankilistõjk ja tkanijawidi pøn jap tsajpõtptyti, jøts ni øts ja kø'øm nganijawi. Tu'ugyi ja Dios Teety ja tnijawi.

³⁷ Nayide'en sam ja Noé yjajty, nayide'ents jadigojk yjatt ku ø nme'ent. ³⁸ Ku dø'øn jekyip, ku ja ayo'onduu wyinaty ka'anin myiñ, jøts ja jaa'y wyinaty yikxon yjanchkaydi yjançh'uukti jotkujk, pømbi amajtskip, pømbi y'u'nk ñøøx jam tni'adsø'owip jøts yaa'byøkt, jaabaat jade'en yjaaktyimy'adø'tsti ku ja Noé tyøjkiyi'ñ jap møj barkijõtpy; ³⁹ jøts nigidiyi ja tyimy'ejxtøø ku ja møkttu ku ayo'onduu myiñ, jøts ja nøøgom ja ojts yiktsø'onguixyidi. Nayide'ents idø'øn nõjk jyaty ku ø nmemit, ka'ap pøn xjõp'ejxtit. ⁴⁰ Winaagin jaa'y jam wyinaty namajtsk tyundi jam kamjotp; tu'ukts ja ñitso'ok'att jøts jadu'uk wyindigø'øty. ⁴¹ Jøts winaagin tø'øxyøjk jam wyinaty namajtsk yjõtssti; tu'ukts ja ñayide'en ñitso'ok'att jøts jadu'uk wyindigø'øty.

⁴² Nayjõp'ejxidits meets, kumi ka' xnijawidi pøni juuni ø nme'ent. ⁴³ Ukmadowdam ya'at, ku n'ukmadyaajkint ku pøn kudøjk wyinaty t'uknijawi juuni yja'att ja maa'tspi ku koots, çti jats ja juiky kyadsunaxt, ti jaa ja tmatst'utt ja tyøjk jøts wan ja maa'tspi tyik'awatsnidi? ⁴⁴ Paty idø'øn nnõjmidi, jøts jõp'ijxy xyik'ettit yam meets ja xkagumay ku øts jotmøñ nme'ent.

Ja ødyumbi ejx'ejtpi

⁴⁵ Pømbi tumbi dø'øn wijy, ja'ats idø'øn ja tyimyida'amp pøn jaty ja windsøn jam yiktsinaapy tyøjkjotp, jøts ja abaadi tmo'ot kyaaky yji'lkxy. ⁴⁶ ¿Kidi ja'ajip nekim pøn ja wyindsøn paajtp, jøts ku ja ixam ka'pxy tpaduñ sa ja tø yik'ane'emy ku ja wyindsøn yja'aty? ⁴⁷ Janch øts idø'øn nwa'añ, ja'abi tumbi dø'øn ja windsøn pyikta'akp jøts ja ttuk'ejx'ett tuki'iyi pøni ti jaty ja jam yjagyeyjy. ⁴⁸ Kuts ja tumbi kya'ø'y'att, ku nichøky wyinma'aty jøts ku wyindsøn ka' chojkja'aty, ⁴⁹ jøts ja tjemdumbinaxwa'jki ttedumbinaxwa'jki ja wyindsøn tyumbi, uk myu'ugyi kyu'uxyi møøt ja amu'ukyjaa'dyi, ⁵⁰ jøts kuts ja wyindsøn wyimbett agumoni yam ja tkajõp'ijxy ja'abi xøøw; ⁵¹ jøts ja yikxon tyagubat, nayide'en yiktu'unt sam ja jaa'dyi pøn ja win'ø'nk ttunk'ajttip. Jøts ya'axt yjõ'øt tmiwingidsetst tmi'agidsetst ja ayo'on.

25

Ku ja Jesús tmdyakraajty nimajk ja kiixye' una'jk

¹ Jøts ja Dios kyutuujk jade'en yjatt midi yjaa'y ja tyanitanaapy sam nimajk ja kiixye' una'jkindi, midi ja yjaj ojts t'ukondi jøts ja tminõjxkti ma ja jaa'y jam y'amajtskiwya'andi, jøts ja jemyaa'y twindsø'øgiwya'andi. ² Nimagoxk ka' ti møj tjawidi, jøts ja nimagoxk janchwiji ja yjaa'y'atti. ³ Pønts ka' ti møj tjawidi ku ja tkondi yjaj, nika'ap ñøø ja ojts tkonjidi, ka'ap ja te midi ja tyukta'utstip jadigojk ku ja kyøxt ja yjaj; ⁴ pønts wijtyi ojts ja abiky tkondi ja nøø midi ja yjaj tyuktatøødyip, jøts abiky ja' midi ja jaj jap yjaakmøø'ajtpy. ⁵ Jøts kumi ka'ap ja jemyaa'y chojkja'tni, xjats ja niduki'iyi maa'y'øøgyi pyaajtniyidøø, jøts ja ojts jyadyim'y'ukma'oo'kõjxniidi. ⁶ Xjats tsuu'em et tmadoodøø ja ayuujk kuk yjawi wya'añ møk: “ixxa myiñ ja jemyaa'y; pidsømdi jøts xjõpkubaadidit!” ⁷ Jøts ja kiixye' una'jk pyidø'kõjxtøø, jøts ja yjaj ja t'a'ejxidøø. ⁸ Jøts ja ñimagoxkpi midi ka'ap øy ti tmøjawidi, ja'ats ja yjanimagoxkpi tniimaadyøø midi wijtyi midi winmaadyip: “Møøky øøts yø mjajnøø waani, oo'knip øøts yø njaj.” ⁹ Jøts ja ñimagoxkpi y'adsøodøø: “Ka' øøts yø nyaky, ku øøts inet yø nyakt ka' øøts

inet nja' tpaatt, jøts ni meets inet mja' yø tkapatmit. Jam ne'egi mninøjkxtit ma tyøøgyi jøts jam mnadyanijuyidit." ¹⁰ Exam ja wyinaty tø tymñøjkxti jøts ja t'atsjuuwya'andi ja jainøø, ku ja jemyaa'y yja'jty. Jade'ents ja tyøjkidi pøn a'ejxi nayjagyajpidip, jøts ja ojts tmøøøkidi ja jemyaa'y ma ja jap y'amajtskiwya'añ, jøts ja tøjk'aaw y'adujknaa. ¹¹ Jøts ja yjanimagoxkpi kiixye' oojknim yja'ukja'tnidøø, jøts ja yja'ukwanidi: "i;Yik'awa'ats windsøn yø tøjk!" ¹² Jøts ja ojts yide'en yik'adsowid: "Ka'axi mee nnijawa pøni mbøn meets."

¹³ Jøts idø'on ja nwindson'ajtim Jesús ja pyabøjkpitøjk yide'en tnimaay:

—Jøp'lijxy mnanky'etidit, kidi nugo mdyimyaanøjkxti, kumi ka' xnijawidi pøni juuni øts ja tiidyu'unin nmime'ent.

Ku ja Jesús tmadyakpaajty ja tumbiktøjk pøn ja wyindsøn ja myeeñ tyaniipiky

¹⁴ Nayide'en idø'on Dios kyutujk midi yjaa'y ja tyanitanaapy, sam tu'uk jaa'y wyinaty choonwani, jøts ja ñøjkxwani abikñaajx abikyajp, winets ja ojts twaadsoy pøn jaty ja jam yiktumpy jøts ja ttanipijky ja myeeñ.

¹⁵ Tu'uk tmøøy magoxk mil, jøts jadu'uk majtsk mil, jøts jadu'uk tukmil, jade'en ja ojts tmø'øy sa pønjabøn ja wijy'ajtin tmøødi. Jøts ja chøø'ñ ñijxy widejtpi abiky'et. ¹⁶ Ja tumbi pøn ja meeñ yikmøøy magoxk mil, ojts ja tta'ajuy tta'agajpxy jøts ja tyik'u'nkjajty ja nayidinø'on. ¹⁷ Nayide'en jadu'uk ja meeñ ojts tyiktunkpatmi pøn yikmøøy majtsk mil, jøts jaa ja nayide'en tyik'u'nkjajty majtsk mil. ¹⁸ Pønsts ja meeñ yikmøøy tukmil, myidso'on ja' jøts ja ayu'uch etjotp tu'uk ja jut tyik'ø'yiyi'ñ, japts ja meeñ ja tñitajy.

¹⁹ Xjats kyimjekñim ja tumbitøjk wyindsøn wyimbijty, xjats ja tyikwingukidi ja meeñ. ²⁰ Jaweyen yja'jty pøn ja meeñ wyinaty tø yikmø'øy magoxk mil, jøts ja tjaakmøøy jamagoxk mil ja wyindsøn midi ja wyinaty tø tyik'u'ngi, yide'en ja tnimaay: "Magoxk milxi, windsøn, ojts xyaky ja meeñ, ixysats jamagoxk mil midi tø nyik'u'ngi." ²¹ Xjats ja windsøn ja ojts y'adsoyi: "Øy'ajtp, øy idø'on mduñ jøts øy idø'on mjaa'y'aty; nayide'en sam øy tø x'ejx'ity yø meeñ øy yø kyamabaadi, ndanipøkp inet ja myayjawibi. Jøts ya men, naξ, jøts jawaani may xpøkt ja n'øy'ajtin." ²² Jøts jadu'uk yja'tmi pøn ja meeñ yikmøøy majtsk mil, jøts ja yyaañ: "Windsøn, ixya ja meeñ majtsk mil midi øts ojts xmø'øy, jøts ixya ja majtsk mil midi tø nyik'u'ngi." ²³ Jøts ja wyindsøn ja y'adsoyi: "Øy'ajtp, øy idø'on mduñ jøts øy idø'on mjaa'y'aty; nayide'ents sa tø x'ejx'ity yø meeñ øy yø kyamabaadi, njaakmo'opts nayide'en jawaani may. Men, tøki ndøjkjøøjty, paat ja m'øy'ajtin." ²⁴ Jøts ku yja'jty ja tumbi pøn ja meeñ wyinaty tø yikmø'øy tukmil, yide'en ja tnimaay ja wyindsøn: "Windsøn, nnija'wipxi øts ku mets ka' ti jadi'iñi xnajtsjawi, ja'baat me xpayø'øy øy mets ja xjagaja'aji, myikpidø'økwambyaagat mets ja piktā'aky øy me mjagan'i'py. ²⁵ Paty ø ndso'øgi, paty øts ojts n'atsyu'uch ja meeñ jap naxjøtpy. Ixyats ja', pø mja'ajtpxi yø." ²⁶ Jøts ja wyindsøn ja ojts yide'en y'adsoyi: "Tsaachnuuxjaa'y mets ka'ødyumbi, pøni mnija'wip tam ku øts jade'en njaa'y'aty, ku øts nbøkmuky midi ø ngapiktakpy, ku øts ja xijy nyikpidø'økt paat midi ø ka' nni'ipy, ²⁷ jøts çti kuts øts ja nmeeñ tø xka'anuu'kxyajki, jøts ja meengyojpk ja jeexyip tø nbaaty møøt ja meeñ'nk ku tø nja'aty?" ²⁸ Winets ja windsøn tnimaay ja jaa'y pøn jaty jam wyinaty jam'ajtip: "Pøjkxidi yø meeñ midi tukmil, jøts ja xmo'odit pøn ja yja' majk mil. ²⁹ Pøn ja yja' jam, jaaktyimykmo'opts ja', jøts ja may'ampy tjagyapt; pønsts niti tkamøø'ajtp, jøts ku jap yii'nim tjaakjamøødi, ja'baats ja yjaaktyimykpøjkxti. ³⁰ Yø yjade'embi tumbi midi niti kawamp, ixep wibejpidso'mdi agugootstujpy, japts ya'axt yjø'øt tmiwingidsetst tmi'agidsetst ja ayo'on."

Ku ja naxwii'ñit jaa'y yikt#dyu'undit

³¹ Ku ø nme'ent windsøn'ajtpi, ni'awidity niduki'iyi ja ankilistøjk nmøøtme'ent, jøts ø n'ixa'akt jam kunuu'kxy kyutujktaajk jøp'am. ³² Jøts ja naxwii'ñit jaa'y niduki'iyi ñamyukidit øts nwingujpk, jøts øts ja nwejtswa'kxtit jade'en sam ja jiyujk'ejxpi ja byorreek t'awojpakyin møøt ja chiiibi. ³³ Aga'n'ampy øts ja borreek nbikta'akt jøts anajy'ampy ja chiiibi ndejint. ³⁴ Jøts winets ø nnøjmmit ja n'aga'ñ'ambiyitti: "Ya mendi pøn tø tpaajtidi ja Dios Teety kyunuu'kxin; kupøjkidi ja Dios kyutujk midi yjaa'y ja tyanitanaapy, jaayip yø myiktanibiktaajknidyit ku Dios ja naxwii'ñit tyik'ø'yiyi'ñ. ³⁵ Tø nyu'øøky nxø'øøky, meests ojts xyikay; tø øts adøødsi n'ity, jøts meests ojts xyik'uuky; jøts ku øts ojts nja'ajtn ndsoøñ øy magajp, meests ojts xmø'øy nja'ataajk. ³⁶ Ku øts nwet ojts xka'ejtxi, meests ja ojts xmø'øy; jøts ku øts ojts nbiky, meests ojts x'atskajpxjot'amøki; ku øts ojts nyiktsumy, jap meests ojts xkugajpxi." ³⁷ Jøts pønsts wyinaty tø yikupøkti jøts øts ja xnøjmidit: "Windsøn'ajtim, çwindiixik me n'ijxy jøts ku me myu'øøky, jøts øø nyaky kaaky? çUk windits me myik'lijxy mdøødsi, jøts øø nyaky ja nøø? ³⁸ çUk windits øø n'ijxy jøts ku me mja'aty mdsøøñ ma jaty kajp, jøts øø nyaky ja ja'taajk, uk windits øts ja wet naamy nyaky? çJuuni øøts ja tø n'uk'ixy jøts ku ja mga'ejtxyi? ³⁹ çUk windits me m'ukyik'lijxy jøts ku me mbiky, uk windi øø n'uk'ijxy ku me myiktsumy, jøts øø n'atsku'ejxi jap puxøjkjøtpy?" ⁴⁰ Jøts yide'en ø n'adso'ot:

“Janch øts idø'øn nwa'añ, øy yiini wyaani midit tø xuujnidi, midit øts tø xmøøjiyidi ja nmigu'uk pøn ka'ejtxadip ja pudøjkin, øts idø'øn ja jade'en ñamyayi tø xundi.”

⁴¹ Winets øts ja nnøjmidit ja n'anajy'ambiyiti: “Jiwə'akti, kidi øts ya xwin'ejxti meets kawindidyumbidi; nøjxkti jap mā ja jøøn jap nijuuni kya'øøky, midit ja miku' yiktajøp'ejxtip møøt ja miku'ankilistøjkti. ⁴² Tøxi ø nyu'øøky, jøts meets ojts ka' xmø'øy ja ngaaky; ojts ø ndøødsi, jøts meets ojts ka' xyik'uuky; ⁴³ ojts ø nja'aty ndsøøñ mā jaty kajp, jøts mee ka' xyikja'taajky. Ku øts nwet ojts kya'ity, jøts meets ja nwet ojts ka' xmø'øy; ka' meets ojts xku'ejxi ku øts ojts nbiky, ku øts ojts nyiktsumy.” ⁴⁴ Jøts øts ja xnøjmidit: “Windsøn'ajtim, zwindixik me n'ijxy jøts ku mets wyinaty yuu xøøw myik'ookwə'aniyi, uk tøødsi wyinaty myik'ookwə'aniyi, uk ku me mja'aty mdsøøñ øy magajp, uk ku mwet mñaamy kya'ityxi, uk mbiky m'añ, uk myiktsumy myikty, jøts øøts idø'øn niti pudøjkin nguidymdyuñ?” ⁴⁵ Jøts øts ja yide'en n'adso'odit: “Janch øts idø'øn nwa'añ, øy yiini wyaani jøts ku ka' tø xuujnidi niti pudøjkin pøn ja ayo'on tyanaxpy, ni øts køjxp ja tø xkatuujnidi.” ⁴⁶ Winets ja jatyi ñøjxktit ayoobi xemikøjxp, jøts pøn wyinaty yikupøkti jøts ja ñøjxkmidit tsinaabyi xemikøjxp mā ja tpaajtidit ja Dios kyunuu'lxkin jøts ja tsinaa'yin øy yixxon.

26

Ku ja Jesús yikajpxy'aty sudso ja yikmatst

¹ Ku ja nwindsøn'ajtim Jesús jade'en y'ukwan'abajtiyiñ, jøts ja tnimaay ja pyabøjkitøjk:

² —Mnija'widipxi jøts ku ja paski xøøw ja majtsk xøøwni; jade'ents ø nyikøyakt jøts øts jaa'y xyikruspattit.

³ Jøts ñiñayjaty ñamyujkidøø ja teetywindsøndøjkti, ja kajpxwejpitøjkti, jøts ja israelit møjaa'dyøjkti, jam ja tøjkwemp ñamyujkidøø mā ja Caifás jam kyutujktaajk midit ja teetywindsøndøjk wyindsøn'ajttip. ⁴ Jam ja ojts tkajpxy'atti jøts ja ttanibiktaajkidøø sudso ja yiknidaayit ja nwindsøn'ajtim Jesús jøts ja tyimyatstit, jøts ja tyimyk'ooktit. ⁵ Jøts yide'en idø'øn ja wyandøø:

—Ka' y'øyt ku xøjøjty jade'en ndu'unindit, jøts jaa'y kidi xem yam nañibidi'igyidi.

Ku ja Jesús yiktatagutajmji'iky ja pa'akxuu'kpi

⁶ Jøts ja nwindsøn'ajtim Jesús jam ja wyinaty Betania, jam Simón tyøjkwindum pøn ja møj pu'uts pa'am pøjkp; ⁷ jøts tø'øxyøjk ja jam ñimejni pøn t'ukoon tukmøj abøjk'i'ñu'nk ja aceite midit pa'akxuu'kpi, ujtskoni ja tmimiiñ jøts ja'abi midit idø'øn janch tsowi. Xjats ku ja nwindsøn'ajtim Jesús jam wyinaty tø twingu'ixaagi ja mesi, winets ja tø'øxyøjk tpiaktaajky ja aceite midit pa'akxuu'kpi jam nwindsøn'ajtim Jesús kyubajkøjxp. ⁸ Jøts ku ja pyabøjkitøjk jade'en ojts t'ejxti, jøts ja yjantymy'ambøjktøø jøts ñømbinaaxwə'ktøø:

—Zjøts tigøjxp ku yø jade'en nugo wyindigøy? ⁹ Tøxik yø jeexyip yiktøøky jøts maamyeen jeexyip yikpøjkp, jøts ayoobi jaa'y ja jeexyip yiktatadøkidi.

¹⁰ Tyimjadoow ja nwindsøn'ajtim Jesús ja', jøts ja tnimaay ja pyabøjkitøjk:

—ZTigøjxp ku yø tø'øxyøjk jade'en jotkøjxpim xnøjmidi? Pø yø'øxi dø'øn øy'ajtp ku øts yø jade'en tø xuñ. ¹¹ Jaakmbaagt yø ayoobi jaa'dyi, ka'axi yø mā ñøjxkti, ejtpyim yø xmøøt'ejtkunaxtit; øtsts ka', ka' mee xumi ya nwindsinaagyunaxt. ¹² Yø' midit'ibi yø tø'øxyøjk tø tuñ, ku øts nne'kx aceite yø tø xpiktaajkiyi midit pa'akxuu'kpi, ja'agøjxp yø jade'en tø tuñ kuts ja n'o'jkin wyingoni. ¹³ Janch øts idø'øn nwa'añ, ømyadso'att pøni mā yikajpxwa'kxy ya'at øgyajpxy ya'at ømyadya'aky midit tnigajppx sa nitso'ok'ajtin yikpaaty, jøts yiktukmidøy ja naaxwiñ'ñit jaa'y, yikajppxim yikmadya'akpim yø' midit yø tø'øxyøjk yam tø tuñ.

Ku ja Judas ñay'awajniyi jøts ja tkøyakt ja Jesús

¹⁴ Xjats nidu'ugin ja ñimakmajtskpi pabøjkitøjkti, pøn txøøw'ajtp Judas Iscariote, ja' ojts tminijxxy ja teetywindsøndøjkti, jøts ja ojts tminagyajpxyi, ¹⁵ yide'en ja tnimaay:

—ZWine'en ø xmiyu'udyit jøts øts ja nwindsøn'ajtim Jesús ngøyakt?

Xjats ja ojts tmijuydi ee'pxmajk, jade'en ja meen ja ojts tmo'odi tum puxplati. ¹⁶ Jøts jaayip ja Judas ja twinmaa'ñ'ajtni juuni ja tjadyimy'ukøyakt ja nwindsøn'ajtim Jesús.

Ku nwindsøn'ajtim yjaak'uk'a'ux'ajtni møøt ja pyabøjkitøjk

¹⁷ Xjats ku ja xøøw midukxøøw tyuujnøø, ku ka' pyaat'aty jøts ja tsapkaaky yika'aty levaduri møøt, ja'abi xøøwts idø'øn ku ja nwindsøn'ajtim Jesús ja pyabøjkitøjk ñimejniyi wingon jøts ja ojts tyiibyikyiyi, yide'en ja wyandøø:

—ZMa xtsøky nyiknaxjint ja paski a'ux jøts øøts ja n'a'ejxit?

¹⁸ Jøts ja tnimaay:

—Nøjxkti jam kajpjtøp mā chøøni ja jaa'y, tø xnijawidi pøni pøn, ja'ats mnøjmidip: “Yide'en ja windsøn wya'añ: Wingomp øts ja n'o'jkin, jøts mets mdøjkjøtpy øts ja paski a'ux nyiknaxwə'añ møøt øts ja nbabøjkitøjk.”

¹⁹ Jøts ja ojts jade'en tpadundi sã ja nwindson'ajtim Jesús ja wyinaty tø y'ane'emnyidi, ojts ja tyik'øyidi ja paski kaaky jøts ja yik'a'ux'att.

²⁰ Xjats ku kyoodsiyi'ñ, winets ja nwindson'ajtim Jesús tmøøt'ixaajky nimakmajtsk ja pyabøjkpitøjk mã ja mesi jam wyinaty; ²¹ jøts ixam wyinaty tyimgyaydi ku tnimaay ja pyabøjkpitøjk:

—Janch øts idø'øn nwa'añ jøts ku mee nidu'ugin amaa'tsk'ampy xkøyakwa'añ.

²² Jøts ja yjotmadyøjkidøø, jøts xem yam wyandøjkidøø:

—¿Øts me windsøn'ajtim ndejint xejp?

²³ Jøts nwindson'ajtim Jesús ja ojts yide'en y'adsøyidi:

—Pøn ø møøt tø ngay tø nji'kxy, ja'ats øts idø'øn xkøyakwamp. ²⁴ Janch jajtp øts inet icyam jade'en sam ja Dios kyajpxy wya'añ. ¡Yjanch ayøøy ja jaa'yu'nk pøn x'ukøyajk'oo'kp! Ne'egi tyimdyøøbik jeexyip ku jeexyip kyidyimgye'exy.

²⁵ Winets ja Judas ojts kyajpxy, pøn idø'øn wyinaty køyakwajnip, jøts ja wya'añ:

—Windsøn, ¿ti wan ja ndejin y'øtsi?

Jøts nwindson'ajtim Jesús ja t'adsøøy:

—Paty mets.

²⁶ Ixam wyinaty kyaydi, jøts ja nwindson'ajtim Jesús tnixajiyi'ñ tu'uk ja tsapkaaky, jøts ja ttukmøja'wiyi'ñ ttukunuu'kxyja'wiyi'ñ ja Dios Teety, jøts ja ojts t'adujkpany, winets ja tmøøy ja pyabøjkpitøjk, yide'en ja wya'añ:

—Kaydi ya'at; yø' øts idø'øn ñamyayi nne'kx'ajtpy.

²⁷ Winets ja tnixajigyojmi tu'uk ja uuik'i'ñ, jøts ja ojts ttukmøjawi ttukunuu'kxyjawi ja Dios Teety, jøts ja ojts tmø'øy ja pyabøjkpitøjk, jøts ja t'ukwa'kxtit, yide'en ja tnimaay:

—Uukti ya'at niduki'iyi, ²⁸ øts idø'øn yø' ñamyayi nni'jpy mididi yam jadigojk tñankñamyi'øbyøjkp ja jaa'y møøt Dios, mididi ø nyikwidsump nyikwidajpxy ja'agøjpx jøts pojkpitumbi jaa'y yikpojkipmaa'kxtit, jøts ja Dios Teety ja wyanda'aky jade'en tyik'adukt. ²⁹ Janch øts idø'øn nwa'añ jøts ku øts ya'at uvi nøø ka' tsojk n'uk'uknit, jaanin jadigojk n'uujkindit jotkujk ku Dios Teety ja kyutujk tyiknaxkida'akt mididi yjaa'y ja tyanitanaapy.

Ku Jesús ja ojts kø'øm tñagajpxy jøts ku Pedro ja kyu'øøniyit

³⁰ Xjats ku ja t'øøgøjxtøø ja iy mididi ja Dios yja'ajpty, winets ja ñøjktøø jam kojpkøjxp mididi yiktejp Olivos. ³¹ Jamts ja nwindson'ajtim Jesús ja ojts ñii'mxyidi:

—Kuwan meets inet mrajtstutkøxt ya'atpi koots; pø yide'enxi jap nøkyijpxy wya'añ: "Nyik'ookp øts ja borreegi ejxpi, wan ja byorreek jadi'iñi tyø'øwya'kxy." ³² Kuts øts ja o'jkin n'ukmimajada'akt ku øts jadigojk njujkyøkt jøts ø nbidsø'ømt jap oo'kpi jutjøtpy, winets ø nnøjkt jawyeen jam Galilea, namga'anin meets jam wyinaty mniikxy.

³³ Xjats ja Pedro ja ojts y'adsøyiyi:

—Øy me niduki'iyi jaa'y mja'ajdyigøøgyixyi, øts niwindem ø ngaja'dyigøø.

³⁴ Winets nwindson'ajtim Jesús ja yide'en tnimaay:

—Janch øts idø'øn nwa'añ, jøts ku yam koots inet ku ka'ap tsapni'aaw y'ayajxji'ikñim, tigøøk ojk mets wyinaty tø xku'iñ jøts ku me xka'ijxy'aty.

³⁵ Jøts ja Pedro tjaaktyimñimaay ja nwindson'ajtim:

—Nijuuni øts jade'en nga'adi'ich, njadyimya'øøky me møøt.

Jøts ja yjadu'ukpimidi, nayide'en ja wyamidi.

Ku ja Jesús t'ajot'ajty ja Dios Teety jam Getsemani

³⁶ Jøts idø'øn ja nwindson'ajtim Jesús tmøøtja'jty ja pyabøjkpitøjk mã ja et jam txøøwi Getsemani, jamts ja tnimaay:

—Ya awejxti, wan øts ja Dios Teety t'ats'ajot'aty.

³⁷ Jøts ja tmøødyi'ñ ja Pedro møøt namajtsk ja Zebedeo y'una'jk, jøts ja jotmay yjanchtatøjkiniyi. ³⁸ Xjats ja tnimaay ja pyabøjkpi mididi ja y'ukwaaw nidigøøk:

—Janch køjxp øts njoojt jadi'iñi, o'jkin'ampy ø tø njotmaadyøki. Awejxtits ya, kidim mma'oo'knidi, møøtwijj'ejtik øts.

³⁹ Winets ja nwindson'ajtim Jesús jawaani yjaaknajtsyø'øiyi'ñ, jøts ja ojts jadi'iñi ñagyuxendya'agiyi, jøts ja ojts t'ajot'aty ja Dios Teety, yide'en ja wya'añ:

—Dios Teety, øyik jade'en xjanchkayikjatt, jøts øts kidi jadine'en ayo'on ndyimbaaty; øy idø'øn kidyimjade'eni sam ø ndyimyatsøkyin, jade'en øts idø'øn ngupøkt pøni sã me xamidsøky.

⁴⁰ Xjats ja wyimbijty nay jam mã ja pyabøjkpi jam wyinaty nidigøøk tø t'ukyiktañ, kuts ja tpaajty tødamik ja mya'oo'knidi; winets ja ojts tñøjmi ja Pedro:

—¿Niwine'enin mee tø mguidyimyajada'aky jøts meets jeexyip xmøøtwijj'ity? ⁴¹ Wejti kajti, ajot'ajty ja Dios Teety, nay'ejx'etidi jøts kidi mmimajada'agidi ja ayo'on mididi wingomp. Janch øts idø'øn nwa'añ ku ja winmaa'ñ yjanchja'ødyunwa'añ, ja ne'kxts jaayi ja ka'øybi tumbi amutsk'ejxyip.

⁴² Xjats ojts ñøjkkokjomi nay jam jadigojk, winets ojts yide'en t'ajot'aty ja Dios Teety:

—Dios Teety, põni ka'ap jade'en xyikjaty jøts øts ja ayo'on xkadukpaatt, wants idø'on jade'en tjaty põni sã me kō'om xamidsøky.

⁴³ Xjats jam yjaakwimbijty jøts ja pyabøjkpitøjk jadigojk tpatkojmaa, janchmaadip ja jam, wimbeets ja tsuu ja yik'ejtñiyidi. ⁴⁴ Jøts ja nay jam tñikejky, jøts midigøøk ojk ñijkyx Dios Teety ajot'ajtpi, nayide'en wyangojmaa. ⁴⁵ Winetnims ojts ñijkyx ma ja pyabøjkpitøjk jam wyinaty, jøts ja tnimaay:

—Tøts inet, maanidi poo'kxnidi, wan jade'en tjaty. Tø dø'on tymbyaaty jøts ku ø nyikøyakt jøts ø nyiktagidøkit ja pojkpitumbi jaa'dyi. ⁴⁶ Pidø'økti, wan tjaa'myindi; ixa wyingøñ põn ø xkøyakwamp.

Ku ja Jesús yikmajch

⁴⁷ Nay ixamnim ja nwindson'ajtim Jesús wyinaty jade'en wya'añ ku yja'jty ja Judas, põn ja y'ukpabøjkpi'ajtpy jøts ja mōøt tyika'pxy nimakmajtsk ja pyabøjkpitøjk, ja'ats idø'on jam tmōøtmeen ja mayjaa'y tum tsujx mōøt jøts tum kipyapidi. Ja teetywindsøndøjk, ja israelit mōjaa'dyøjk, ja' dø'on ja kajxidip. ⁴⁸ Jøts ja Judas, põn ja nwindson'ajtim tkøyajkp, yide'en ja wyinaty ja tiy'ajtim tø tyaky, yide'en ja wyinaty tø wya'añ:

—Pøni põn øts inet ndsu'kxpy, ja' idø'on ja wyinaty; jøts ja' idø'on mmætstip.

⁴⁹ Xjats ja myiñ jøts ja nwindson'ajtim Jesús yikniñ, yide'en ja tnimaay:

—jøts windsøn memp!

Jøts ja ojts tsu'kxy. ⁵⁰ Jøts ja nwindson'ajtim Jesús ja ojts yide'en y'adsøyiyi:

—¿Ti migu'uk mnimimpy? ¿Ti mdsøjkpy?

Winets ja jaa'y ja wingon ñimejniyøø jøts yikñixajiyi'ñ ja nwindson'ajtim Jesús, ojts yikmajtsni.

⁵¹ Winets tu'uk ja nwindson'ajtim Jesús myigu'uk tju'jty tu'uk ja tsujx, jøts ja ojts ttaxikpo'otu'uty tu'uk ja teetywindsøn tyumbi. ⁵² Winets ja nwindson'ajtim Jesús ja tnimaay:

—Øødyuñ yø mdsujx nay jap xtyimbyikta'akt ma yø tø xjuuty. Pøni põn ttatseptump ja tsujx, nay ja'ats ja ty'a'ookp. ⁵³ ¿Ka' xñijawi jøts ku øts jotmøñ n'amido'ot ja Dios Teety, jøts øts ja xanigaxt ixayamy; naxy nimakmajtsk piky ja ankilistøjk midi tseptundip? ⁵⁴ Kuts ja jade'en yjatt, ¿ti jats jade'en y'adukt ja Dios kyajpxy? Pø yide'enxi ja wya'añ jøts ku tymiyjade'en yjatt sã dø'on yam yjatwa'añin.

⁵⁵ Xjats ja nwindson'ajtim Jesús tnimaay ja mayjaa'y:

—ja tsujx, ja kipy, ja tsaa meets yam x'uktanimenip, tø øts yjawi nmaa'tsni! Ejtp meets jam y'ijty jabom jabom nmōøt'ixakunaxy, jøts mee nyik'ixpiky jam tsapøjkjotp, ¿tikuts øts jami xkamajtstøx? ⁵⁶ Ja'agøjpx ya'at jade'en yjaty jøts ka'pxy pyidsø'omt sã jaty ja Dios kyugajpxy wyandøø, ku ja tñigajpxidi ja Dios kyajpxy.

Winets ja nwindson'ajtim Jesús pyabøjkpitøjk ojts kyaakøxti jøts ja nadyu'uk y'ukyikmajtstutnaa.

Ku ja Jesús yikwaanijkyx jam kutujktaajkjotp

⁵⁷ Jøts ja jaa'dyi põn ja majtsiyi, jam ja tyiknøjkxti Caifás wyindum, ja teetywindsøndøjk myøjwindsøndi ma wyinaty tø ñamyukyidi ja kajpxwejpitøjkti mōøt ja mōjaa'dyøjkti. ⁵⁸ Jøts ja Pedro ja ojts pyanijkxyi, jagam ja pyayø'øyi jøts ja ojts tpaja'aty jap mōj windsøn tyøk'agui'py, jøts ja jap tyøjkijyi'ñ jøts ja tmōøt'ixaaiky ja ejx'ejtpitøjkti, jøts ja t'eixwa'añ sã dø'on ja yjade'embi yjadyimy'ukugøxit.

⁵⁹ Jøts ja teetywindsøndøjk, jøts ja mōjaa'dyøjkti, jøts nuduki'iyi ja kutujk adsinaabyidi, ja' ja yjadyimy'ixaadyip ti ja yjadyimy'uktani'øønidip ja nwindson'ajtim Jesús, øy ja yja-gajade'eni jøts ja ttaguwaniwya'andi ja o'jkin. ⁶⁰ Ja'ats kyapattip sudso tyädyøkit, may ja jaa'y yjamendøø, jøts ja tjadyimni'øøndaagidi ja nwindson'ajtim. Xjats yja'tinim namaajtsk ja ni'øø'ndaajkibidi midi ñadyijyi tsaach'a'ejxnaxtip, ⁶¹ jøts ja yide'en wyandøø:

—Yø jaa'y yide'en waan: “Ixe øts yø Dios chaptøjk nyikiday, jøts øts yø kyidigøøk xøøw nyik'øygyomit.”

⁶² Winets ja teetywindsøndøjk myøjwindsøn wya'kukiyi'ñ, jøts ja nwindson'ajtim Jesús yik'amidøøy:

—¿Niwine'enin yø xka'adsowimbetwa'añ? ¿Ti dø'on yø' ixa jade'en myiktani'øøni?

⁶³ Jøts ja Jesús ka'ap ja ojts t'adsøy. Xjats ja wyindsøn ojts ñi'mxyi:

—Tuk'ejx Dios, jøts xñigajpxt tiy janch. Tukmadook øøts põni mets idø'on mjanchCristo põn ja Dios Teety y'u'nk'ajtpy.

⁶⁴ Jøts ja nwindson'ajtim Jesús ja tnimaay:

—Øts ja', sam ixa tø mwa'añin. Jøts nayi ndukmadoodip ixayam jøts ku ø x'ejxtit ku n'ixa'akt jam Dios Teety kyutujktaajk jøp'am.

⁶⁵ Winets ja teetywindsøndøjk myøjwindsøn ttakø'jtsiyi'ñ ja wyet, jøts ja wya'añ:

—Tø ya'at jaa'y tmgajpxigø y ja Dios; çti ejxpi ti nija'wibi jaaktsojkiyip? Tøxi xmadojidi ja y'ayuujk jøts ku kya'øgyajpxy, ⁶⁶ çsa mee m'ukwa'añ?

Xjats ja wyandøø:

—Taja'jtíp pøky yø', wan t'øøky.

⁶⁷ Winets ja ojts twingutsujidi, jøts twojptøø jøts tsee'ktøø, pømbi ja kojxiyip wemp'am, ⁶⁸ jøts ja yiknøjmi:

—Pø metsxi mCristo, çuknajtsjawits pøn tø mgøxyi!

Ku ja Pedro tku'ññ jøts ku ja ka' t'ijxy'aty ja Jesús

⁶⁹ Ixap idø'on ja Pedro chøøni tøjkwimpy, jøts ja tu'uk tø'øxyøk ñimejni midi jam tump, jøts ja ojts ñii'mxyiyi:

—çKidi metsip y'ijty mmøøtwidijtpy yø Jesús midi Galileit etjotp tsoo'mp?

⁷⁰ Ka'ats ja Pedro ja tkupiky ma ja mayjaa'y jam wyinaty, yide'en ja wyaañ:

—Ka' nnijawi pø ti mets jade'en mgajpxpy.

⁷¹ Ixap ja Pedro wyinaty pyidsømwaní ma ja tøjka'aw, ku ja ojts jadu'uk ja tø'øxyøk y'ijxyi, jøts ja ojts ttukmadø y pøn jam wyinaty:

—Yø jaa'yxi tmøøtwidijtpy yø Jesús pøn Nazaret kugajpip.

⁷² Jøts ja Pedro jadigojk tkagupøjkøjmi, yide'en ja tyimwyaañ:

—Ka' øts yø jaa'y n'ijxyi.

⁷³ Xjats ku jawaani y'ijty, jøts ja Pedro ja jaa'y ñimejnøø pøn jaty jam wyinaty, jøts ja ojts ñii'mxyiyi:

—Janch nayide'endam mets, nayi Jesús tam me mjanchmigu'uk'ajtpy, kø'ømts yø m'aaw m'ayuujk myiknigaxi'igyí.

⁷⁴ Jøts ja Pedro janch wenk ja kø'øm ñawya'añi ñadyijyi, ka'ap ja tyimgyupiky, tyuk'eix ja Dios ja', tiy janch ja tyimwya'añ ku ja tka'ijxyi:

—Nguidyimy'ijxy'ajtpy øts yø jaa'y.

Winets ojts nay jatyi y'aya'axy tu'uk tsapni'aaw. ⁷⁵ Xjats ja Pedro ja tja'myejchnim ku ja nwindson'ajtim Jesús ja wyinaty tø ñii'mxyiyi: “Yam ja tsapni'aaw kya'aya'axñim, tø mets wyinaty tigøøk ojk mwani jøts ku me xka'ijxy'aty.” Jøts ja Pedro jam pyidsiimy, jøts ja nugo y'uk'amyaxni y'uktsaachyaaxni.

27

Ku ja Jesús yiktagidøjkiyí'ñ ja Pilato

¹ Xjats ku yjøpy'ajty, jøts ja teetywindsøndøjk møøt ja israelit møjaa'dyøjkti ojts ja tka-jpxy'atti, jøts ja tu'ugyi tñiwinmaa'yidøø jøts ja tyik'ooktit ja nwindson'ajtim Jesús. ² Xjats ja køwññ tyiknøjkxti jøts ja yiktagodøkiyí'ñ ja Poncio Pilato, pøn jam wyinaty windsøn'ajtp.

Ku ja Judas y'ø'jky

³ Jøts ku ja Judas ojts t'ixy, pøn tkøyajkp ja nwindson'ajtim, jøts ku ja nwindson'ajtim Jesús tø yiktaguwa'a'ñiñ ja o'jkin, ja'ats ja ojts jadigojk tsaachkuwinmayi jøts ja tyikwimbijty ja meen ee'pxmajk tum plati, jade'en ja tkømøø y jadigojk ja teetywindsøndøjk jøts ja israelit møjaa'dyøjkti, ⁴ yide'en ja tñimaay:

—Tø njantyimdyundigø y, møk ø tø njantyimdyundigø y ku øts yø tø ngøyaky jøts yø y'ookt, jøts niti tundigø'øyin yø tkamøø'taty.

Jøts ja ojts yide'en yik'adsø y:

—Jøts, çti øøts ja ndungi? çMgø'ømwinmaa'ñxi mets yø!

⁵ Winets ja Judas tñajtswøjjiyí'ñ ja meen jap tsaptojkjøtpy, jøts ja chøø'ñ jøts ja ñijky nayuktsuujmibi.

⁶ Jøts ja teetywindsøndøjk tkonjø'ktøø ja meen jøts ja wyandøø:

—Ka'ap yø kyutuykji jøts yø meen jap ngugo'ona'andit jap limunsi abøjk'i'ñjøtpy, kumi jaa'y chow yø'.

⁷ Jøts ja nay jatyi tkajpxy'ajttøø, tyiktunkpaatwa'andi ja meen jøts ja ttaju'udyit naajx jøts y'øyt jadu'uk kami santi ma ñaxøkidit ja jaa'y pøn tso'ondip abikyajp. Campo del Alfarero, ja' ja naajx xyøøw. ⁸ Ja'agøjxpts ixymbaqaat ja naajx yiktijy Ni'jpkayam. ⁹ Jade'ents ja Jeremías ja y'ayuujk tyi y ku ja Dios ja wyinaty yide'en jekyip yikwa'añiyi: “Jøts ja tñixajidøø ja meen ee'pxmajk tum plati (ja' ñimejni midi ja Israelit jaa'y ja wyinaty tø pyiktaajkxiyi), ¹⁰ jøts ja ttajuudyøø ja naajx, jade'ents øts ja Dios Teety xñimaay.”

Ku ja Jesús twinguwa'jkiyí'ñ ja Pilato

¹¹ Jøts idø'on ja nwindson'ajtim Jesús ja jaa'y yiknøjkxiyi jam øyikutuykpi wyingujkp, jøts ja yide'en tyi byøjkiyi:

—çMets idø'on israelit jaa'y mjanchniwindsøn'ajtpy?

Jøts ja nwindson'ajtim Jesús yide'en tñimaay:

—Janch jade'en idø'øn ja', sam ixa tø mwā'āñin.

¹² Jøts ku ja teetywindsøndøjk kyajpxjø'ktøø møøt ja møjaa'dyøjkti, jantyimy'øø'ndip idø'øn ja', jøts ja nwindson'ajtim Jesús ja tkidyimy'adsøy. ¹³ Winets ja Pilato ja ñimaajyøø:

—¿Ka'ap yø xmadøy sã jaty ixa myikni'øøni?

¹⁴ Jøts ja nwindson'ajtim Jesús ka'ap y'adsøy; ja'ats ja yikutujkpi ñigyumaap yja'wiyi'ñ jøts ka'ap ja y'uktaabyatni.

Ku ja Jesús ñidujkyi'ñ jøts ja y'ookt

¹⁵ Jade'ents idø'øn ja yikutujkpi txumikostrumbri'aty ku xøøw tyuñi, jøts ja tu'uk tyik'awa'atspidsimy ja tsumyjaa'y, ja mayjaa'y ja kø'øm twi'ejxtip, pøni pøn ja chojktip ja'ats ja yik'awa'atspidsømdip. ¹⁶ Jamts idø'øn tu'uk ja tsumyjaa'y wyinaty, Barrabás ja xyøøw. Tyimyjanjawi ja' ku ja møj tundigøøbyi; ¹⁷ jøts ku ja jaa'y ñamyujkøjxidøø, winets ja Pilato yiktäy:

—¿Pømbi mdsøjktip jøts ø nyik'awa'atspidsø'ømt: yø Barrabás, uk yø Jesús, midi yiktejp Cristo?

¹⁸ Tøts ja wyinaty tñijawi ja yikutujkpi jøts ku ja ja'agøjxp tkøyakti ku ja nawyinaxi tjawidi.

¹⁹ Ixam ja Pilato wyinaty chøøni kyutujktaajkjotp, ku ja ñidø'øxy ñimaajyøø: "Ti yø øyjaa'y tø xanibøjkiñi; majtsu'tut, janch wenk ø ngumaay tsu'uuy yø'øgøjxp."

²⁰ Jøts ja teetywindsøndøjkti møøt ja møjaa'dyøjkti ojts ja ttukmibøkti ja mayjaa'y jøts ja t'amido'odit jøts wan t'awa'atspidsimy ja Barrabás, jøts y'ookt ja nwindson'ajtim Jesús.

²¹ Xjats ja yikutujkpi ja jadigojk ñimaajyidøø, jøts ja ojts tyiktäy:

—¿Pømbi mee ndsøjkpy jøts ø nyik'awa'atspidsø'ømt?

Jøts ja mayjaa'y ñømdøø:

—Wan yø Barrabás t'awa'atspidsimy.

²² Jøts ja Pilato tjaa'kyiktäy:

—¿Jøts sã øts yø ndu'unt yø Jesús midi yiktejp Cristo?

Jøts ja ojts niduki'i'y y'adsowdi:

—¡Yikruspat!

²³ Winets ja Pilato ja ñimaajyidøø:

—¿Ti tundigø'øyin yø tø tuuñ?

Jøts ja jadigojk jawaani møk wyandøø:

—¡Yikruspat!

²⁴ Xjats ku ja Pilato ojts t'ixy jøts ku nisudso'ampy kya'øyi, ne'egi jinaxy ja jaa'y tseeni mo'tsni y'adøtsnidi, winets ja nøø ja ojts t'atsnankyi'i'y, jøts ja kyøbujy jam mayjaa'y wyingujkp, yide'en ja wyañ:

—Kidi øtsip wamp jøts yø y'ookt, ka' øts yø nbøky'ixy. Meets yø mnija'wip pøni sã yø xunwa'andi.

²⁵ Xjats ja jaa'y niduki'i'y y'adsoodøø:

—¡Niduki'i'y øøts yø xpaat'aty ja y'o'jkin, nayide'en ja møj ja mutsk, u'nk una'jk, pøn yø kapaadip!

²⁶ Xjats ja Pilato tyik'awa'atspidsiimy ja Barrabás; jøts ja ojts tni'ane'emy jøts ja nwindson'ajtim Jesús yikwopt, jøts ja ojts tkøyaky jøts wan tyikruspatti.

²⁷ Jøts nay ja' ja syoldadi tyiknøjktøø ja nwindson'ajtim Jesús jam kutujktaajk agø'øm, jøts ja jam ojts twa'amujkøxti niduki'i'y ja soldadi, jøts ja ojts tnabejkidi ja nwindson'ajtim Jesús. ²⁸ Jøts ja wyet ja ojts tjajnidi, jøts ja tsajpts wet ja ttanijandøø. ²⁹ Jøts koroni ja ojts ttagujandi tum kujp awiiti ja', jøts ja kipy ja ttagøkajpidøø y'aga'ngyøj'øm. Winets ja twinguxanaadyøø jøts ja ojts tjanchaxe'ekti, yide'en ja tnøjmidi:

—¡Dios kunuu'kxip ya'at israelit jaa'y wyindsøn!

³⁰ Jøts ja tñitsujidi, jøts ja jamyi tñixajidi ja kipy jøts ja ttaguwøjppø'økti. ³¹ Xjats ku ja jade'en t'uktageyajtøø, t'uknixektøø t'uktaxe'ktøø, winets ja ttanijanduttøø ja tsajpts wet jøts pktaajkidi jadigojk ja kyø'øm wet. Jøts ja tyiknøjktøø jøts ja kyiruspatt.

Ku ja Jesús kyiruspejty

³² Tyimy'ixam wyinaty tø choondi ku ojts tpaatti tu'uk jaa'y pøn kugajp'ajtp Cirene, Simón'ajtp ja'; ja'ats ja ojts ttaguwanidi jøts ja ttsøjmit ja nwindson'ajtim Jesús kyirus.

³³ Jøts idø'øn ja jade'en yja'ttøø ma ja et txøøwi Gólgota, midi yide'en ayuujk pidsøømp: Oo'kpi Kyubajk Pajk. ³⁴ Jamts ja tmøødyi ja vino adaamuky møøt ja ujts ta'am nøø; kuts ja tja'gyajpy xjats ja nika'ap t'uujky.

³⁵ Kuts ja wyinaty tø tyikruspajtnidi, winets ja soldadi tñiguyajtidøø ja nwindson'ajtim Jesús wyet, jøts ja ojts twejtswa'kxti. Jade'ents ja Dios kyugajpxy tyimdyiy ja y'ayuujk ku ja wyañ: "Tø øts nwet ja xwejtswa'kxidi, tø ja tñiguyatti jøts ja t'ejxti pøn uktaja'atip."

³⁶ Winets ja jamyi y'ixaktøø jøts ja t'ejx'etwa'andi. ³⁷ Jøts ja jam y'agubajkp ojts tkøxjajyidi

ja letri midì wamp jòts ti tyuku'o'jkidip. Yide'en ja wya'añ: “Ya'at idø'øn txøw'ajtp Jesús, israelit jaa'y wyindsøndi.”

³⁸ Namajtsk møj maa'tspi ja ojts tmøøtkruspety, tu'uk y'aga'ngyøjø'øm jòts tu'uk y'anajkyøjø'øm. ³⁹ Jòts ku jam pøn ñaxy tum wenk ja myigajpxyi, tum kubajkwibejtipp ja', ⁴⁰ jòts ja wya'andi:

—Metsxi xijy tsapøjik myikidaapy jòts jadigojk xyik'øyi kyidigøøkxøøwyi, wants mga'uk'øøky. Pøni mjanchDiosu'nk tam mets, winak jam kruskøjxp.

⁴¹ Nayide'en ja tyaxejkmiyi ja teetywindsøndøjkti ja kajpxwejpitøjkti, ja fariseotøjkti, jòts ja møjaa'dyøjkti, yide'en ja agø'ømyi ñawya'añidi:

⁴² —Tø wyenkpi tyiktsø'øky, ka'ats tjaty jòts kø'øm ñankcho'ogit. Pøni janchts ku ja Israelit jaa'y tjanchwindsøndi, wan jam t'ukwinaky kruskøjxp, jaanimts idø'øn njanchja'want.

⁴³ Pø Diosxi y'ajoojtipp; wants inet idø'øn t'ukpidøkiyi jòts kyayik'ooogit, pøni janch ku ja yjanchøkyi; tøxi yø kø'øm wya'añ jòts ku yø Dios U'ngi.

⁴⁴ Ja maa'tspibaat ja nayide'en yjanchka'uk'ømyigajpxmiyi midì ja jam wyinaty møøt tø kyiruspety.

Ku ja Jesús y'ø'jky

⁴⁵ Winets ja et kyoodsiyi'ñ kujkxyøøw, jòts møj winakxyøøwnim yjajtaajky jadigojk. ⁴⁶ Jòts nay jatyi ja nwindson'ajtim Jesús møk wya'añ:

—Elí, Elí, ¿lama sabactani? —midì yide'en tyijpy: Dios Teety, Dios Teety, ¿tigøjxp ku øts jade'en tø xnanktyuñi?

⁴⁷ Ojts ja winaagin tmadowdi pøn jatyi jam wyinaty, jòts ja ñømdøø:

—Ja Elías yø jaa'y wyaadsøøpy, ja Dios kyugajpxy.

⁴⁸ Winets ja jatyi nidu'uk putyi t'atskøøn tu'uk ja tanøxe'jts, jòts ja ojts ttabadijy ja vino ta'am, winets ja kipy jøp'am tkøxkøøn, jòts ja ojts tta'agonji'iky jòts ja txeetst. ⁴⁹ Yide'ents abiky wyamidøø:

—Majtsu'ut; wan t'uk'ijxyim pøni janch nimejnip inet ja Elías jòts ja o'jkin kyadukpaadit.

⁵⁰ Jòts ja nwindson'ajtim Jesús jadigojk ojts møk ja y'ayuujk pyidsimyi, jòtsnim ja y'o'jky.

⁵¹ Winets ja møj tsapøjik awejtstuk nay jatyi tyakø'øtsiyi'ñ, kubajkp ja kyø'øts'awiyi'ñ jòts ja ok'am kyø'øtskidaajky. Jòts ja ujj ñajxy jòts ja tsaa kyu'kx'awigyijxy, ⁵² ojts ja oo'kpi nipots may y'awa'ach; jujkpyøjktibaat ja oo'kpidi pøn wyinaty ja Dios tø tjanchjawidi ku ja yjujky'ajttøø. ⁵³ Jòts ja pyidsømdi jap yjutjøtpy ku ja nwindson'ajtim Jesús wyinaty tø yjujkpyiky jadigojk, jòts ja kyajptøjkidøø jam Jerusalen midì ja Dios kyunuu'kxkyajp'ajtpy, ma mayjaa'y ja ojts y'ijxyidi.

⁵⁴ Xjats ku dø'øn ja capitán pøn jatyi ja jam wyinaty møøt t'eix'ity ja nwindson'ajtim Jesús, ku ja ojts t'eixti jòts ku ja ujj ñaxy jòts tuki'iyi sa jatyi ojts yjaty, jòts ja yjadyimchø'jkidøø, yide'en ja wyandøø:

—Janch ja' tam yø jaa'y tø y'ity, ja Dios U'nk.

⁵⁵ Jòts ja maadyø'øxyøjk jam wyinaty a'ejxujktipp jagam, tum ja' pøn jam wyinaty Galilea tø tpadsoondi ja nwindson'ajtim Jesús, jòts pøn jatyi ja wyinaty tø pyudøkiyi. ⁵⁶ Ja María Magdalena dø'øn jam, jòts jadu'uk ja María pøn ja Jacobo tyaaqip møøt ja José, jòts ja Zebedeo ñidø'øxy.

Ku ja Jesús ja ñine'kx yikpiktaajky jap oo'kpi tsaa jutjøtpy

⁵⁷ Xjats ku ja et yjoo'xni jòts kyoodsiwyani, winets myiññ tu'uk kumeeñ jaa'y pøn txøw'ajtp José, jam ja kyugajpi Arimatea, jòts nayi tø dø'øn ja wyinaty tpabøjki ja nwindson'ajtim Jesús yja'. ⁵⁸ Ja'ats ojts t'ats'ixy ja Pilato jòts ja t'amidøøpy ja nwindson'ajtim Jesús ñine'kx. Jòts ja Pilato ja ojts tyikutuky jòts wan tyikø'ø'øy. ⁵⁹ Winets ja José ja t'axajøø, jòts ja wa'ats wet ja tta'abijty, ⁶⁰ jòts ja t'atspiktaajky jam oo'kpi jutjøtp midì ja wyinaty tø tyimykijemy'øyinim. Kø'øm jap y'uktøkiwya'añ ma ja tsaa jut jam. Xjats ku ja møj tsaa ja tu'uk t'ukta'agiñaa ma ja yiknidøki, jòts ja ojts ñøjxni. ⁶¹ Nay ixam idø'øn ja wyinatymidì ja María Magdalena møøt jadu'uk ja María, jam ja wyinaty chøøndi jam oo'kpi jut agø'øm.

Ja soldaditøjk pøn jam y'ejx'eittip ja oo'kpi jut

⁶² Xjats ku kymjabom'pøn ku wyinaty tuki'iyi tø yik'a'ejxigyøxni, tum abaadi y'ejtni ti jatyi tsojkip ku poo'kxin xøøw, winets ja teetywindsøndøjk møøt ja fariseotøjk ojts t'ats'ejxti ja Pilato, ⁶³ jòts ja t'atsnimaadyi:

—Windsøn, ja' øøts yam tø nja'myech ku yide'en wyaañ ja windaay'ajtpi jaa'y, ku ja wyinaty jaak ja yjujk'aty, ku ja tiji kyidigøøk xøøw yjujkpyøkt jadigojk, jade'en pyidsø'ømt jadigojk jap oo'kpi jutjøtpy. ⁶⁴ Paty jade'en tigøøk xøøw xjadyimñank'y'ejx'etit ja oo'kpi jut, jòts ja pyabøjkpitøjk kidi myendi koots jòts ja kidi tmaatsti ja oo'kpi ñine'kx ku ja tñømidit ja jaa'y: “Tø ja tmimajada'aky ja o'jkin, tø ja yjujkpyiky jadigojk.” Kuts jade'en tyaa'y'attit, yø'øts ne'egi janchka'ukmaañip, ne'egi ka'ap ja jawyeembi taay.

⁶⁵ Winets ja Pilato ja ñimaajyidoo:

—Ixyadi yò mdsoldadi ka'pxy niwine'enin yò y'ejx'etti. Nòjkxti meets jòts yikxon xyik'adujkòxtit mabaat meets jam kò'òm x'ixy.

⁶⁶ Winets ja ñòjkxtòò jòts ja ojts yikxon tyik'adujkòxti ja oo'kpi jut, ojts ja t'axotsti ja tsaa midì tya'agidyip jòts ja t'adsaadyòò, ojts ja seeyi tpiakta'akti jòts ja jam tyiktandòò ja soldaditòjk pòn jam ejx'ejttip.

28

Ku ja Jesús yujkpyiky jadigojk

¹ Xjats ku wyinaty tò ñaxy ja poo'kxin xòòw, jòts wyinaty kyujajta'aky kyudòò'kxa'aky myidukxòòw ja yjadu'ukpi samaan, winets ja María Magdalena mòot jadu'uk ja María tñinòjkxti ja oo'kpi jut jòts ja t'ats'ejxwa'andi. ² Jòts jotmòñ myiñ ja uix janch mòk, ja nwindson'ajtimdamik ja y'ankilis jam wyinaty kidakp tsajpwemp, jòts ku ja ojts yja'aty ma ja oo'kpi jut jam, jòts ja tjiigiy ja tsaa midì ja tò yikta'agi'y, jòts ja tta'ixakpejty. ³ Jade'en ja yjaj tyii'kxy sam widsukin, jòts ja wyet jade'en pyoobi sam tsap'òò'pkyin. ⁴ Xjats ku ja soldadi jade'en t'ejxtòò, jòts tsò'ògi ja yjanchyikmibejpniyidi, jòts jade'en tyandòò sam ja jaa'y oògyindi. ⁵ Winets ja ankilis tñimaay ja tò'xyòjkti:

—Kidi mdsò'ògidi. Nniija'wip òts jòts ku ja nwindson'ajtim Jesús x'ixa'adi pòn kruskòjxp o'jk. ⁶ Ka'ap ja ya ukpòni, tò ja yujkpyiky, tò ja tmimajada'aky ja o'jkin, tò ja jade'en yjaty sam ja ojts kò'òm tñigajpxyin. Men x'ejxti ma ojts yikpikta'aky. ⁷ Tsojk nòjkxti, jòts x'atstukmado'odit ja pyabòjkpitòjk jòts ku ja tò yujkpyiky jadigojk, jòts ku ja jawyeen ñòjkt jam Galilea jòtsnim mee mnòjkxt; jamts ja x'ejxtit. Yò'òyi dò'òn ja ndukmadoowandip.

⁸ Xjats ja tò'xyòjk jam putyi cho'ondòò ma ja oo'kpi jut jam, jade'en ja chò'ògidi jòts jade'en ja yjanchxonda'akti; jòts ja ojts tsojk tyiknòjkxti ja kajpxy ja ayuujk ma ja nwindson'ajtim Jesús pyabòjkpitòjk jam. ⁹ Exam ja wyinaty jade'en ñaxti ku ja nwindson'ajtim Jesús wya'kaxi'jky jòts ja ojts kyajpxpòò'kxyidi. Winets ja wingon twingunòjkidòò jòts ja twinguxanaay'òyidi, nagyumajtsidi ja' tyekeyòjxp, ¹⁰ jòts ja yide'en ñimaajyidi:

—Kidi mdsò'ògidi. Nòjkx òts ja nmigu'uktòjk x'atstukmadojidi pòn jaty ø nbabòjkpi'ajtip jòts ñòjkxtit jam Galilea, jam øts ja xpaattit x'ejxtit.

Ku ja soldadi t'atstukmadowdi ja teetywindsòndòjk sa ja jut y'awajch

¹¹ Examnim ja tò'xyòjk wyinaty yò'òdyi, jòts ja soldadi winaagin ñòjkxtòò jam kajjpotp pòn ejx'ejttip, jòts ja t'atstukmadoodòò ja teetywindsòndòjk ti jaty wyinaty tò tyuñi. ¹² Winets ja teetywindsòndòjk ojts tñinòjkxti ja mójaa'dyòjk jòts ja tkajpxy'ajtti kyijpxy kyajpxy; ojts yikxon ja maameeyè tmo'odi ja soldaditòjk, ¹³ jòts ja tñimaadyòò:

—Jade'en mee mwa'ant jòts ku koots, ixap mee wyinaty mmò'ay, ku ja Jesús pyabòjkpitòjk ojts yja'atti jòts ja ojts t'atsmaatsti ja oo'kpi ñine'kx. ¹⁴ Jòts øy ja windsòn ja wyinaty tjanijawi, øòts ja mòot nnagyajpxit jòts ja ka' sa wya'ant, jòts mee ka' ti pòky mdaja'adit.

¹⁵ Xjats ja soldaditòjk t'axajidòò ja meen, jòts ja ojts jade'en tpadundi sa jaty ja wyinaty tò yik'ana'amdi. Jòts jade'en ixymbaagat tñimadya'akti ja israelit jaa'dyi.

Ku ja Jesús ttaguwa'anayii'ñ ja tunk ja pyabòjkpitòjk

¹⁶ Jòts jade'en ñòjkxtòò ja ñimaktu'ukpi jaa'dyi jam Galilea, ja nwindson'ajtim pyabòjkpitòjk. Ja'ttòò ja jam kojpkòjxp midì ja wyinaty tò tyukmadòyidi. ¹⁷ Jòts ku ja t'ejxpattòò ja nwindson'ajtim Jesús, jòts ojts ja ñagyuxendya'agyidi, øy ja jam winaagindi kò'òm pòn ja tkamibòjktip. ¹⁸ Winets ja nwindson'ajtim Jesús wingon wyingunòjkiyidi jòts ja ñimaajyidi yide'en:

—Tò øts mòk'ajtin nyikmòoy jòts øts ja nyiktu'unt wan tsajjpotpyi jòts wan tñaxwiñi. ¹⁹ Ninòjxtits ja jaa'y øy manaajx øy magajp jòts ø kuxpabòjkpi'attit; myiknòbattipts ja' Dios Teety kòjxp, Dios y'U'nk kòjxp, jòts Dios y'Espiritu Santo kòjxp, ²⁰ jòts yik'ixpòkti jòts tpadu'undit tuki'yiyi ti jaty mee tò ndani'ane'emy. Jòts nimadowdi jòts ku meets ejtp nmòò'tiy øy juuni xòòw, kunim ø nme'ent jadigojk. Jade'en idò'òn ja y'ejxi.

JA ØGYAJPYX JA ØMYADYA'AKY MIDI JA MARCOS YJAAY

Ku Juan Bautista kya'amaay abak etjotp

¹ Yide'en yiknimadyak'okwaañ ja øgyajpxy ja ømyadya'aky midi ja nwindson'ajtm Jesu-cristo yja'ajtpy, ja Dios U'nk. ² Yide'en ja y'ejxi tyiyi tø dø'on ja Dios wyinaty kø'øm tñimaañi ja kyugajpxy Isaías, jøts ja yide'en tjaadya'ant ja ayuujk ku ja Dios Teety ja y'u'nk yide'en tñimaaay:

Ngajxjawyeenip øts, u'nk, ngugajpxy tu'uk pøn nøjxpx jawyeen kugajpxy'ajtpi, ja'ats ja naxwii'ñit jaa'y tñøjmip, jøts wan ja tyiktøwdi tyiktuuda'akti ja wyinmaa'ñ, jøts mets ja m'ixpøjkin jade'en yikupøkt.

³ Pø patyxi ja kugajpxy ñijky jawyeen abak etjotp jøts myigu'uk ja tñøjmit møk'ampy: "Awejxidi Dios y'ixpøjkin, yiktøwdi yiktuuda'akti mwinmaa'ñ yikxon."

⁴ Ja Juandam idø'on jam jade'en memp abak etjotp jøts jaa'y ja tyknøbety, yide'en ja wya'añ jøts ku ja jaa'y tuki'iyi tja'dyigøøgyøxti ja kya'øyjaa'y'ajtin jøts wan tñøbajtkøxti, kuts idø'on ja jade'en ttu'undit winets ja yikpøjkipimaa'kxtit. ⁵ Mayjaa'y idø'on ja jam nimejnyip jøts ja pyatmadøyi, mendip ja jaa'y jam pøn tsinaadyip Jude'it etjotp, jøts nayide'en pøn kugajp'ajtmidip Jerusalén; jade'en Juan ja mayjaa'y jam ñimiñiyi møj nøøjotp midi txøow'ajtp Jordán, jøts ja jam ñøbatti ku pyøky ja tkajpxnaxkøxti.

⁶ Kameeyi pøjk wyet'ajtpy idø'on ja Juan wyinaty, jøts po'ak ja tsum'aty; ja' ja tø ñadyatsumyi jøts møj mu' ja jam tñidsønini møøt ja jiyujk pa'ak, ja' ja jam yji'kxpy. ⁷ Yide'en idø'on kya'amay mayjaa'y agujk:

—Ja øts ja jaa'y tu'uk ix'oojk xpamiñ pøn møkta'aky yikutukp ja'agøjpx ku kutujk ja tmimiñ møk'ampy, ka'ap øts ja nmi'abaqy jade'en sa yikutuky, nijuuni øts ja møøt nganamiyibaat'atyi. ⁸ Paty meets ixyam tyy janch ndyimdyukmadøy, jøts ku øts ja'ayi tø nmiñiñ jøts meets nøø nduktanøbatt; jøts ku dø'on ja yja'att pøn øts idø'on ndijpy ix'oojk memp, jawaani øy ja tyunk ja ttu'unt kumi Espíritu Santo ja tyuktatøkip ja jaa'y.

Ku ja Jesús ñøbejty

⁹ Xjats ja Jesús winet et chøø'ñ Nazaret, jam kajpkøjpx midi wyinaty Galile'it jaa'y y'etjotp, jøts ja ñijky nøbajtpi møj nøøjotp midi txøow'ajtp Jordán, ma Juan ja yiknøbajti. ¹⁰ Xjats ku ja pyidsimyi møj nøøjotp, winets ja ojts t'ixy ja tsajp jøts ku ja y'awa'ach, jøts Espíritu Santo ja jade'en ñigida'agyí sam ja tsapak. ¹¹ Xjats yikmadøøy ja Dios Teety y'ayuujk jap tsajpjøtpy, yide'en ja wya'añ:

—Øts me n'u'nk'ajtpy; njanchøjkpy mets jøts njanchtajotkuj'ajtpy mets.

Ku ja Jesús miku' øjts yjot'ixxy

¹² Winets ja Espíritu Santo yiknøjkxøø jam abak etjotp, ¹³ jøts ja Jesús jam wixijkyøøw chinaay. Xjats ja miku' ja yikpøjkipitunwa'añi, jøts ja nijuuni tkamimadøøy. Jam idø'on ja chinaay ma ja may awa'añ jiyujk jam chøøñidi, xjats ja ankilis ja pyudøjkøø.

Ku ja Jesús tpadøjkyi'ñ ja tyunk

¹⁴ Jøts ku ja Juan wyinaty tøykpiktakni jap puxøjkjøtpy, winets ja Jesús chøø'ñ jøts ja ñijky Galile'it etjotp, ma ja tñiga'amaay ja øgyajpxy ja ømyadya'aky, midi ñigajpxpy sa Dios ja yjaa'y ttanitanit ja kyutujk. ¹⁵ Yide'en ja wya'añ:

—Tønim inet ja xøow ja et yja'aty, wingomp ixyam ja Dios kyutujk midi ya tu'ump. Yiktigatsti ja mdsinaa'yindi, ja'dyigøøgyøxti tuki'iyi ja mga'øyjaa'y'ajtindi, jøts janchjawidi ja øgyajpxy ja ømyadya'aky.

Ku ja Jesús twaødsøøy nimaktaxk ja ajkxmakpi

¹⁶ Jam idø'on mejpya'am midi txøow'ajtp Galilea, jam ja Jesús wyinaty ñaxy ku ja t'ejxpaajty namaajsk ja jaa'y, ja Simón jam wyinaty møøt ja y'uch Andrés. Ajkxmaktip idø'on ja tyunk'ajttip, xyuumy ja jam wyinaty ñøøwejtspajttip midi ja tya'ajkxmaktip. ¹⁷ Xjats Jesús ja tñimaaay:

—Mada'akti, møøt widettik øts jøts nduknijawidit sudso jaa'y ja nitso'ok'ajtin tpaaty.

¹⁸ Ku ja jade'en yiknimaydi, winets ja jatyí tmajtstuttøø ja xyuumy midi ja wyinaty tya'ajkxmaktip, jøts ja tpadsoo'ndøø.

¹⁹ Jawaani ja Jesús ojts yø'øy xjats ja ojts t'ejxpaaty ja Jacobo, pøn ja Zebedeo wyinaty myajnk'ajtpy. Ja' jam wyinaty barkijotp t'adajkyidip ja xyuumy møøt ja y'uch Juan. ²⁰ Xjats ja tyaajxyi'ñ, wyaadsoow ja'; winets ja tyeety ja tunk ja ttukmidandøø jam barkijotp møøt ja tyumbi, jøts ja Jesús ja tmøøtnøjkxti.

Tu'uk ja yaa'dyøjk pøn ja miku' wyinaty tøyatøkyi

²¹ Xjats ja ojts yja'atti Capernaum, jam møj kajpkøjxp; jøts ku poo'kxin xøøw tpaajty, winet ja Jesús ñijky yik'ixpøjki jam israelit jaa'y chaptøjkjotp. ²² Xjats ja jaa'y ja jam ñigyumaap tjawidi, ku Jesús ja jade'en yik'ixpikyidi sam ja jaa'y pøn ja møk kutujk tmøøt'ajtp, ka'ap ja jade'en yik'ixpikyidi sam ja kajpxwejpitøjk pøn yik'ixpøjktip jap israelit jaa'y chaptøjkjøtpy. ²³ Japts wyinaty tu'uk ja jaa'y tsaptøjkjøtpy pøn wyinaty ja miku' tø tyatøkiyi, ja' møk yide'en waan:

²⁴ —¿Mets Jesús, Nazaretit jaa'y, tiku øø tø xnimiñ, sã øø xunwa'añ? ¿Ja' mets tø xnimiñ jøts øø xyikudigøgyøxt? Wa'ats me n'ejxkapy pøni pøn mets. Ka'axi me mbøkmyøødi, Dios jaa'xyi mets.

²⁵ Xjats ja Jesús møk twingugajpxiyi'ñ ja miku', jøts ja tnimaay:

—¡Amøñi, kidi nugo mgajpxy, tsojk majtstu'ut yø jaa'y!

²⁶ Xjats ja miku' møk'ampy tyikmibejpiky ja jaa'y, jøts ja møk chabaay, winets ja pyidsiimy. ²⁷ Xjats ja mayjaa'y janchnygumaap tjawidøø, jøts ja xem yam ñadyiibyikyidi køøm, yide'en ja ñawa'añidi:

—¿Ti wenk ixpøjkin ya'at? ¿Ti tunk yø jade'en tyumpy? ¡Janch møk kutujk tmøødi, mimadojip paaat ja miku' yø' ku yø t'ane'emy!

²⁸ Xjats ja jaa'y ja tnimadoogøxti pøni niwine'en ja jam wyinaty chøøni Galile'it etjotp. Niduki'iyi ja tnija'wigyøjxtøø ku ja Jesús jade'en t'ødyuñ ja jaa'y.

Ku ja Jesús tyikmøpkijky ja Simón Pedro tyaaqmøjt

²⁹ Xjats ku ja Jesús pyidsiimy jam tsaptøjkjotp, winets ja tmøøtnijky ja Jacobo møøt ja Juan jam Simón tyøjkwindum, ma ja wyinaty tmøøtsøøni ja y'uch Andrés. ³⁰ Jamts pamaa'y ja wyinaty tmøødidi, tyaaqmøjt ja Simón wyinaty pøjkip, møwa'añ jømba'am ja yjanchpiky; jøts ja Jesús ja ttukmadowdi ku ja jade'en pyiky. ³¹ Xjats ja Jesús twingume'eniyi'ñ ja pamaa'y, jøts ja ojts tweeksji'iky; ja'ayi ja jade'en ttuuñ, winets ja pya'am jaty ñiwaajtsøø; kuts ja jade'en yjajty, xjats ja tø'øxyøjk ja yikaajtyidi nayjaty ku ja chøøjky.

Ku ja Jesús tyikmøpkijky ja maabyamaa'y

³² Waani y'ijty ku ja xøøw yjejxy jøts ku kyoodsiñaa, winet ja Jesús yiktanimiñ ja mayjaa'y pøn wyinaty pøjkidip, jøts ja jaa'y pøn wyinaty tmøøt'ajttip ja miku'; ³³ niduki'iyi ja kajp jaa'y myendøø tøk'agøøm ma ja Jesús jam wyinaty. ³⁴ Xjats ja may tyiktsøøjky ja pamaa'y pøn wyinaty tigati pøjkidip, ojts ja tyiktsokixy jøts ja miku' ja tyikpidsømgijxy midu ja jaa'y wyinaty myøøt'ajttip; jøts ka'ap ja miku' ja tyikajpxy, kumi ñija'wip ja' paty ja jade'en ttuñ jøts ja kyadamigajpxiyit jøts ku ja Dios U'ngi.

Ku ja Jesús kya'amaay

³⁵ Xjats ku yjøkyoøts'ajty, jaakmøñim ja et wyinaty, winets ja Jesús myaabi'di'jky jøts ja chøøñ jam kajpjojp, Dios Teety ja wyinaty y'ajot'atwampy, paty ja ñijky abak etjotp. ³⁶ Xjats ja Simón choo'ndøø ixaabyi møøt ja myigu'uk, jøts ja tpaatwa'andi ja Jesús, ³⁷ xjats ku ja tpattøø winets ja tnimaadyøø:

—Mdum'ixaajyip jaa'y ixyam.

³⁸ Winets ja ñimaajyidøø:

—Wan tjaa'myindi abikyajp midu wingon tandip, jøts øts jam nayide'en nniga'ama'aty ja øgyajpxy ja ømyadya'aky; kumi ja' ø tø nnimiñ jøts øts jade'en ndu'unt.

³⁹ Xjats ja Jesús jade'en t'ayoøøy ja kajp midu jam wyinaty Galile'it etjotp, jøts ja kya'amay jam tsaptøjkjotp, jøts ja nayide'en tyikpidsimy ja miku' midu ja jaa'y wyinaty winaagin myøøt'ajttip.

Ku ja Jesús tyiktsøøjky ja jaa'y pyu'uts

⁴⁰ Xjats Jesús ja jaa'y tu'uk ñimejnøø pøn wyinaty axøø'kpim puts, jøts ja wyinguxanaajyi, yide'en ja wyaañ:

—Møøt'ajtpy mets ja møk'ajtin jøts ø xyiktsø'okt, yiktsokts øts mdsojk'ajtingøjxp.

⁴¹ Xjats ja Jesús ja y'ayo'ejxi, jøts ja tnixajiyi'ñ, yide'en ja tnimaay:

—Ndsøky'ajtpy øts jøts mdso'okt, tsokni.

⁴² Ja'ayi ja jade'en wyaañ, xjats ja jaa'y ja pyu'uts jaty ñiwaajtsiyøø jøts ja myøpkijky, møk møjaaaw ja ñaja'wiyøø. ⁴³ Winets ja Jesús ja pyagaxøø, yikxon ja y'ukyik'ane'emy, yide'en ja tnimaay:

⁴⁴ —Madow, kidi jaa'y xukmadøø, ka'ap pøn sã xnøjmit, nøjx jam teety wyindum jøts ja xuk'ext ku tø mdso'øky, jøts nay jam idøø'n mdamiyoxp ja Dios ja jiyujk sã Moisés jekyyp tyikutuky, jade'en ja jaa'y tnijawidit jøts ku me tø mjanchøøky.

⁴⁵ Xjats ja jaa'y ñijky, jøts ja tuki'iyi ttamimadyakijxy ja mayjaa'y sudso pu'uts ja wyinaty tø ñiwa'a'achiyi. Paty ja Jesús øy ma kya'ukajtpøjkini, jagam ja wyidity ma ja et janch abak; jamts ja øy magama pøn ñidsøøñi jøts ja yikninijky.

2

Ku ja Jesús tyikpidi'jky ja koxujxpi pakxujxpi

¹ Ku wyinaty kawinaak xooow tō ñajxni, xjats Jesús jadigojk kyajptōjkiyi'ñ jam Capernaum; jōts jaa'y ja tñija'widōō ku ja wyinaty tō yja'aty jam tōjktōtp. ² Xjats ja mayjaa'y jaty ñamyujkidōō, yikxon ja tōjk yjanch'ujch, ka'ap ja y'uknibaajitni; jōts ja Jesús jam tniga'amay ja ogyajjxy ja omyadya'aky. ³ Winets ja jaa'y yja'ttōō nimaktaxk pōn tkiyja'ttōō tu'uk ja pamaa'y pōn wyinaty koxujxp pakxujxp. ⁴ Xjats ja Jesús ja tjpaatwa'andi, jōts kumi nima kya'awa'adsi kumi tō ja mayjaa'y wyinaty t'awa'kta'tsnidi ja tōjka'aw, winets ja tñitajuttōō ja tōjk jōts jut ja tyik'awatstōō. Japts pamaa'y ja tyikwinajktōō mōōt ja myaabajt jap Jesús wyindujpy. ⁵ Xjats ku ja Jesús ojts t'ixy ja jaa'y pōn tyikmendōō ja pamaa'y jōts ku ja amuum yjanchjawi, winets ja pamaa'y ja tñimaay:

—Nbojkipimee'kxpy mets u'nk.

⁶ Jamts wyinaty ja kajpxwejpitōjk chōōnidi pōn wyinaty ttuk'ixpōjktip ja Moisés kyutujk jam tsaptojktōtp, ja'ats yide'en winmaadyōō: ⁷ “¿Ti yō jaa'y jade'en kyuwa'anip, sa yjaty? ¿Tiku yō jade'en wya'añ? ¡Ka'ap idō'ōn jade'en y'ōyi! ¿Pōn ja pōky ya t'ukmaa'kxp, kidi Diosip tu'ugyi tmaa'kxp ja pōky?” ⁸ Xjats ja Jesús ñija'wip ja wa'ats ku ja jaa'y jade'en wyinaty wyinmaydi, winets ja tñimaay:

—¿Tiku jade'en nichōky mwīnmaydi? ⁹ ¿Ja ti ne'egi jawaani jajtni, kuts yō pa'amjaa'y nnōjmit: “Mee'kxpy ots yō mbōky”, uk ku nnōjmit: “Wa'kuki, pōkmukni yō mmaabajt jōts nōjxni mdigam?” ¹⁰ Ixyannim mets inet x'uk'ext mabaat ots idō'ōn ja mōk'ajtin nmōōt'aty ya naxwīñ jōts o nmaa'kxt ja pōky.

Xjats ja tñimaay ja koxujxpi pakxujxpi:

¹¹ —Pidōkni, wa'kukiñi, wejtsjō'ok yō mmaabajt jōts mnōjxni mdigam.

¹² Xjats ja pamaa'y jaty pyidi'jky; ojts ja myaabajt ja twejtsji'iky, jōts ja jam cho'oni mayjaa'yjōtp. Paty ja jaa'y niduki'iyi ñigyumaap tja'widōō ku ja pamaa'y jade'en myōkpijky, xjats ja Dios ja ttamōja'widōō, jōts ja wyandōō:

—Nima niwindinim jade'en nga'ijxyindi.

Ku ja Jesús tpawaqy ja Levi

¹³ Waani y'ijty, winets jadigojk chōō'ñ ja Jesús jōts ja ñijxxy jam mejy'agō'ōm; jamts jaa'y ja yikxon yjanchnimiñi, jōts ja jam tyik'ixpiky. ¹⁴ Xjats ku dō'ōn ja ojts ñijxxy, winets ja t'ejxpaajty ja Leví, ja Alfeo y'u'nk, jam ja wyinaty chōōni mā ja ttukugubety ja jaa'y ja pyikta'aky, xjats ja Jesús wyaañ jōts ja Leví yiknimaay:

—Wan tjaa'myim jōts ots n'ixpōjkin xpabōjkit.

Winets ja Leví jaty tyanaagyukiyi'ñ, jōts ja Jesús ja tpanijjxy.

¹⁵ Xjats ja Jesús yikwaay migaabyi Leví tyōjkwindim, winets ja yikugubajtpi yja'tmidōō, mōōt jadu'ukpi jaa'y pōn kyabadundip ja myigu'uk chinaa'yin, jōts ja tu'ugyi twinguwa'jtsidōō ja kaabyajt mōōt ja Jesús jōts ja pyabōjkitōjk; janch namay ja jaa'y jam wyinaty pōn ja Jesús pawidejtyip. ¹⁶ Xjats ku ja kajpxwejpitōjk jōts ja fariseotōjk jade'en t'ejxtōō jōts ku ja Jesús jam wyinaty tmōōtkay tum ja ka'ōyjaa'dyi, winets ja tñimaadyōō ja pyabōjkipidi:

—¿Jadits ku yō mwindsōn tmōōtkay yō yikugubajtpidi jōts yō ka'ōyjaa'dyi?

¹⁷ Xjats ku Jesús ja jade'en tmadōōy, winets ja wyaañ:

—Ka'ap ots nyiktaniguexy jōts nbudōkit pōni pōn janch wa'ats ñayja'winiyip, ja'agōjxp ku ja pōky kapōkyjawidi. Ja'ayi ja nbudōkip pōni pōn ñadyapōkyja'wiyidip ja pōky. Nayide'en ots idō'ōn njaty sam ja tsōyibi kyanijjxxy mā ja pamaa'y kya'ity. Jamy ja ja'ayi ñijxxy mā ja pa'amjaa'y jam.

Ku ja Jesús yikti'ibiyjky tigōjxp ku ja kya'ayuu'atti

¹⁸ Tuk'ojk idō'ōn yjajty, ixam idō'ōn Juan Bautista pyabōjkitōjk wyinaty y'amaay'atti mōōt ja fariseotōjk, ayuu'ajttip ja jam wyinaty, Dios idō'ōn ja jade'en wyindsōj'kidip, winets ja jaa'y winaggin tñimendōō ja Jesús mā ja wyinaty jōts ja ttiibyōkti, yide'en ja tñimaadyōō:

—¿Jadits ku Juan pyabōjkitōjk y'amaay'atti jōts ja fariseotōjk nayide'endi, ka'axi ja kyaydi, jōts sudso mets yō mbabōjkitōjk nayide'en kya'amaay'atti, sudso meets yjawi amgujk jotkujk mgaydi? Ka'ap meets yjawi ti xkumay.

¹⁹ Jade'en ja wyandōō, xjats ja Jesús yide'en y'adsōōy:

—¿Winaak ojkimts meets jade'en tō x'uktani'ixy, winaak ojk meets jade'en tō x'uknijawi ku tō'ōxnigaabyi tō'ōxn'i'ukpi tō y'uk'ayuu'atti ku ja jemyaa'y jam tō yja'tni? Ka'axi jade'en pōn y'ayuu'aty, ka'ap jade'en pōn tō t'amaay'aty. ²⁰ Jaanim idō'ōn tiy yjanch'amaay'atti pōni ku ja wyinaty tō yiktawinwaadutnidi ja jemyaa'y, jam ja jade'en kyaydi amgujk jotkujk jōts ja jemyaa'y ja myidsep ja o'jkin jaty tyuk'anōjkiyi. ¿Pōnts jade'en kidi yjotmay'ōōky? ¿Sudso

dø'øn jotkujk ngaa'yint n'uujkint? Pø nayide'enxi øts idø'øn yø nbabøjkpitøjk yam xjawidi ku njaakyam'aty.

²¹ 'Ka'axi pøn wyetpach tta'agiyi jemwyet midi tyimjemñim; ku ja jade'en yiktu'unt, jøts kumi mujkpi ja jemwyet, jøts ja tjaaktyimgyøø'tsni ja wetpach, jaaktyimiywenip ja kyøøts'ajtin ja'. ²² Jøts nayide'en ka' y'øyi jøts yikpikta'akt ja vino jap po'dukjotpy midi namii'kxñim; ku ja jade'en ndu'unint, takøø'tsips ja po' jøts jade'en nugo wyindigøy, windigøøpy ja po' jøts nayide'en ja vino. Paty ja vino midi namii'kxñim nda'ada'amyin ja jembyo'ak, jøts jade'en nimidi kyawindigø'øty.

Ku ja Jesús pyabøjkpitøjk poo'kxin xøøw et y'ariindøjtøø

²³ Tuk'ojk idø'øn yjajty ku poo'kxin xøøw wyinaty tø tpaaty, winet et ja Jesús ja pyabøjkpitøjk tmøøtnajxy jam kamjotp ma ariingam jam wyinaty; jam idø'øn ja wyinaty ñaxti ku ja pyabøjkpitøjk ttøppinaxwä'ktøø ja ariindøøm. ²⁴ Xjats ku ja fariseotøjk ja ojts jade'en y'ijxyidi jøts ku ja jade'en y'adø'øtsti, winet ja Jesús jatyi yiknimaay:

—Ejx yø mbabøjkpitøjk! ¿Tiku yø jade'en y'adø'øtsti, tiku ariin yø ttøjt, kumi ka'ap jade'en kyutuky jøts yø jade'en y'adø'øtstit ku poo'kxin xøøw?

²⁵ Winets ja Jesús y'adsøøy, jøts ja wyaañ:

—Nugo meets mjanchkajpxy. Tø meets ja nøky xja'ixy midi wamp jøts ku ja David yide'en y'adijch møøt ja myigu'uk ku yuu ja pyaajtidøø, ku ja wyinaty niti kya'ijtxyidi. ²⁶ Winets ja ñjxktøø jap tsaptøjkjotpy ma ja Abiatar jap wyinaty tyeetywindsøn'aty, japts ja t'amidøøy ja tsapkaaky midi ja Dios yja'ajtpy jap wyinaty. Ja'ats ja ojts tkaydi midi ka'ap kyutuky jøts nugo jaa'y ja tka'adyit. ¿Jøts tiku dø'øn ja jade'en y'adijch pøni ka'adam ja jade'en kyutuky? ¿Tiku myigu'uk ja nayide'en ttukaay ja tsapkaaky, pøni jade'endam ja kyutuky jøts ja ja'ayi tka'adyit pøn teety'ajttip?

²⁷ Nayi waan ja Jesús yide'en:

—Ja'agøjpx ja poo'kxin xøøw yikpiktaajky jøts ja jaa'y yikpudøkit, kidi ja'ajip poo'kxin xøøw yiktanibiktaajkyi'ñ jøts jaa'y niti kyidyimdyu'undit. ²⁸ Ngudanaapy øts ja ñaxwii'ñit jaa'y, jøts øts wamp ti paat'ajtip kapaat'ajtip yiktu'unt ku poo'kxin xøøw.

3

Ja jaa'y pøn wyinaty ja kyø' jadi'iñi tøøtsnip

¹ Xjats ja Jesús jadigojk tyøjkii'ñ jam tsaptøjkjotp ma yaa'dyøjk ja tu'uk tpaajty, midi wyinaty tuktamajñ køxujpx. ² Jøts ja Jesús jam a'ejxuky y'ity, ja' ja jaa'y y'ejxwandip pøni y'ukyiktsokpy idø'øn ja jaa'y ku poo'kxin xøøw, winets ja jatyi tni'øønidit. ³ Xjats ja Jesús tniimaay ja yaa'dyøjk pøn ja kyø' wyinaty xujpx:

—Pidø'øk jøts ixø nøjkx mdani kuk'ajy.

⁴ Xjats ja Jesús ttiibiyiky ja jaa'y pøn ja jam wyinaty a'ejxukiyidip, yide'en ja tniimaay:

—¿Midi'ibi icyam kutuky, ku jaa'y n'ødyu'unint, uk ku jaa'y nga'ødyu'unint? ¿nyiknitsoojkimp ja jaa'y, uk nyik'oo'kimp ku poo'kxin xøøw, midi'ibi øy?

Xjats ja jaa'y amøñi y'etti, nipøn sa kyawa'añ. ⁵ Winets ja Jesús ja twin'ejxji'jky ambøjken'ampy, jøts ñiyjotmay'oo'kni dø'øn ja Jesús y'ejxji'jky, ja'agøjpx ku ja jaa'y niwine'en tkaja'gyukidi. Jøts ja tniimaay ja jaa'y midi wyinaty køxujpx:

—Xajtøw.

Xjats ja xyajtii, jøts ja kyø' ja møk tyaañ, ojts ja chø'øky. ⁶ Winets yø'øpyidsømdøø ja fariseotøjkti, jøts tminagyajpxidi ja Herodes myigu'uk, ja' ja kyajpxy'ajttøø sudso t'ukyik'ooktit ja Jesús.

Ja mayjaa'y pøn jam wyinaty mejy'agø'øm

⁷ Xjats ja Jesús chøø'ñ, jøts ja pyabøjkpitøjk ja ojts tmøøtnijky jam mejy'agø'øm, winets mayjaa'y ja pyanøjkxidøø pøn jam wyinaty Galilea kugajp'ajttip. ⁸ Xjats ku mayjaa'y ja ojts tniadowdi jøts ku ja Jesús jade'en tjanch'ødyuñ ja jaa'y, winets jam øy pøn jaa'y myendøø, pømbi tsoo'ndip jam Jude'it etjotp, pømbi Jerusaléngit kajpjotp, pømbi Idume'it etjotp, pømbi tsoo'ndip wingon ma ja møj nøø midi txøøw'ajtp Jordán, pømbi tsoo'ndip jam Tiro etjotp, jøts pømbi tsoo'ndip jam Sidón etjotp, jade'en ja mayjaa'y ja jam ñimejniyøø. ⁹ Ja'agøjpx ja Jesús ojts t'ane'emy ja pyabøjkpitøjk jøts ja jam tyik'awejxtit tu'uk ja barki, jøts mayjaa'y ja kya'adejmukiyit. ¹⁰ Kumi tø ja wyinaty kawinaak tyiktsø'øky ja jaa'y, tum jam ja pamaa'y wyinaty tø ñaxkida'akti ja' ñikøjpx jøts ja cho'okti. ¹¹ Jøts ku ja Jesús maamyiku' y'ejxpaadyiyi midi ja mayjaa'y jam myøøt'ajttip y'am yjotp, jatyi ja wyinguxaniyi jøts ja ñii'mxyi:

—Dios U'nk mets.

¹² Xjats ja møk tnøjmi jøts ja ka'ap ttukmado'odit ja mayjaa'y jøts ku ja Dios U'ngi.

Ku ja Jesús twiwijch ja jaa'y nimakmajtsk pøn ja wyinaty kyudanaabyi'atwampy

¹³ Xjats ja Jesús pyatøjkiiy'iñ kojpkøjxp, ma ja jaa'y ja twaadsøoy pøni pøn idø'on ja kø'øm chøjkpy, winets ja jam ñimejniyøø ja jaa'y pøn ja wyinaty tø twaadsøoy. ¹⁴ Jøts ja nimakmajtsk twiwijch pøn ja ejtp myøøtwidewampy, jøts pøn tniga'ama'adyip ja øgyajpxy ja ømyadya'aky; ¹⁵ xjats ja ktutujkmøoy jøts ja tyiktso'oktit ja pamaa'y, jøts ja miku' ja tyikpidsø'ømdit midt ja jaa'y winaagin myøøt'ajttip. Jade'en tyajky ja kutujk. ¹⁶ Nimakmajtsk idø'on ja jaa'y jam wyinaty: jam ja Simón wyinaty pøn nayide'en yiktejp Pedro; ¹⁷ jøts nay jam ja Jacobo wyinaty: møøt ja y'uch Juan, ja Zebedeo y'unaj'k midt xøbajtøø Boanerges, ja idø'on tyijpy midt møk møk ja jaa'y myigajpxtip ejxim ja anaaw pyijy, ka'ap idø'on chø'ogidi; ¹⁸ Nay jam ja jaa'y wyinaty: midt txøow'ajttip Andrés, Felipe, Bartolomé, Mateo, Tomás, Jacobo ja Alfeo y'u'nk, Tadeo, jøts ja Simón midt tsoo'mp canaangit jaa'y y'etjotp, ¹⁹ jøts nay jam ja Judas Iscariote wyinaty: midt tkøyajk ja Jesús.

Ku ja Jesús yiknimaay jøts ku miku' myøø'ajtin ja tyiktuujni

Xjats ku ja Jesús wyimbijty kojpkøjxp, winets pyabøjkpitøjk ja tmøøtøjkiiy'iñ tøjktøtpy, ²⁰ jøts ja jaa'y yikxon ñamyujkidi jadigojk, nigidibaat ja Jesús y'ukaaniidi møøt ja pyabøjkpitøjk. ²¹ Xjats ku ja Jesús myigu'uk ñimadojyøø jøts ku ja jam wyinaty, winets ja ñimejni jøts ja yiktsoonwa'añi kumi jade'en ja wyinaty wyimaydi jøts ku myø'øty ja Jesús.

²² Nayi tø ja kajpxwejpitøjk wyinaty myeemidi jam pøn tsoo'ndip Jerusalén, xjats ja wya'andi:

—Miku' windsøn yø jaa'y myøøt'ajtpy, ja Beelzebú, ja yø tyamøj paty yø myayi jøts yø tyikpidsimy myimiku' midt yø jaa'y jadu'uk myøøt'ajttip.

²³ Xjats ja Jesús twaadsøoy ja jaa'y, jøts ja ttukwinjawiwy'a'añ tu'uk ja madya'aky, paty ja wya'añ:

—¿Sudso ndejint miku' kø'øm ñankpyidsømiyit aguwanikøjxp? ²⁴ Jøts nayide'en ku tu'uk kajp ñawya'kxyi, jøts ja tsep ttundi agø'ømyi, ka'ap ja kajp jeky y'ity, jaty: ja jaa'y jadi'iñi ñankyixyidi; ²⁵ nayide'en jyaty ku jaa'y ñachiigyidi ni'u'nk ni'unaj'k, ka'ap ja jeky chøøniidi. ²⁶ Jøts ku miku' kø'øm ñañibidø'ogyit, tø dø'on ja wyinaty kyawindi, ñankyudigøjyip idø'on ja wyinaty kø'øm.

²⁷ Nipøn midsep jap jadi'iñi kyatøki jap jotmøk jaa'y tyøkjøtpy, kunim ja tkøwøøndit tpaqwøøndit; winetnims ja tøkøjxidit ja pyikta'aky. ¿Ti sudso øts yø jaa'y jeexyip ja miku' ndukmajtstu'uty kuk øts ja miku' windsøn jawyeen tø ngamimada'aky?

²⁸ Njanch meets idø'on nnøjmi, jøts ku ja jaa'y ja pyøky tuki'iyyi yikmee'kxy, tuki'iyyi yikmaa'kxkixy ja ka'øñigajpxy ja ka'øñimadya'aky; ²⁹ ja ni'ujuuni kyayikpojkrimaa'kxpx pøni pøn tka'øñigajpxp tka'øñimadyakp ja Espiritu Santo, ejtp ja pyøky ja tmi'ity.

³⁰ Ja'agøjxp ja Jesús jade'en wya'añ ku ja wyinaty jade'en tø yiktijy jøts ku miku' ja tmøødi, jøts Espiritu Santo tkamøøt'aty.

Ja Jesús tyaaq jøts ja y'uch

³¹ Waani y'ijty, xjats ja Jesús y'uch yja'ttøø møøt ja tyaaq, jøts ja jap tøk'agi'py wya'k'øyidi, japts ja tñankwyaadsøjidøø ja Jesús. ³² Winets Jesús ja jaa'y ñimaajyøø pøn ja jap wyinaty wingon windsinaajyip, yide'en ja wyandøø:

—Ixap ja mdaak y'awijxy tøk'agi'py møøt ja m'uch, mets myik'ixaapy.

³³ Xjats ja tñimaay:

—¿Pøn øts idø'on xuktaak'ajttip, jøts pøn øts idø'on xuk'uch'ajttip?

³⁴ Winets ja twin'ejxi'jky ja mayjaa'y, jøts ja tñimaay:

—Yø' øts idø'on ndaak'ajtpy, jøts yø' øts idø'on n'uch'ajtpy pøn øts ya wingon xwindsinaadyip. ³⁵ Ja' øts idø'on n'uchip, jøts ja' øts idø'on ndaagip pøni pøn tpadundip sa ja Dios chojkin.

4

Ku ja Jesús tmdyapkaaty ja jaa'y midt nøjx neppi

¹ Xjats ja Jesús jadigojk yik'ixpøjktøjkiiy'iñ jam mejpya'am ma ja jaa'y ja ojts ñimiñiyi may'ampy, jøts ja jam ñañimukpajtidøø. Ku dø'on ja jade'en janch namaydi, winets ja Jesús tyøjkiiy'iñ jam barkijotp midt wyinaty nøøjotp, jamts ja y'ixaajky jøts ja mayjaa'y jam nøø adsayjotp tyandøø. ² Jamts ja tyik'ixpijky jade'en, may ja ejxpajtin madya'aky ja jam tnigajpxy, yide'en idø'on ja tñimaay ja mayjaa'y ku ja jam yik'ixpijky:

³ —Øyim idø'on xmado'odit: Tu'uk idø'on jaa'y chøø'ñi ariin wøjpi. ⁴ Jøts ku dø'on ja ojts twøjwidity ja tyømt, winet ja tømt waani ñaxkidaajky jam tuu'ba'am, ja'ats ja joon jam ñimejen jøts ja wa'ats tpeemujkixy. ⁵ Nayide'en ja tømt jam waani ñaxkidakmøø tsaajotp ma ja naajx øy kya'ity; xjats ja ariindømt jam janch tsojk myujxy, kumi ka'ap ja naajx wyinaty myajpxyi. ⁶ Jøts ku ja xøø'an myiñ, winets ja tyijch, ja'agøjxp idø'on ja jade'en yjajty ku y'aats ajawi kya'ity. ⁷ Nayi ñaxkidaajky ja tømt jam kujp agujkp; jamts ja yjanchni'aa'mbejty ku ja kujp yikxon yondøø jøts ja jade'en kyatøømiy'iñ. ⁸ Nayi

naxkidaajk ja tøm jam õñaxjotp. Ojts ja yikxon yõñ, yikxon ja jam yjanchtøømiyihñ midihibi ee'pxmajk ja pyajkwimbejt tu'ukpi tøm, midihibi tugi'pxy pajkiyihñ, jøts midihibi magø'pxy, jade'en ja ariindømt pyajkpejty.

⁹ Xjats ku ja Jesús jade'en myadyakijxy, winets ja tnimaay ja mayjaa'y:

—iPõni pøn ja'gyukiwyampy, wan tjä'gyuki!

Tigøjxp idø'øn ja Jesús ejxpajtin madya'akyøjxp ja y'ixpøjkin tyaky

¹⁰ Xjats ku ja mayjaa'y choo'ndi, jøts ja Jesús jam tyaañ, winets ja tyiktøødi ja namakmajtsk pyabøjkpitøjk, jøts nay ja pyabøjkpitøjk pøn ja jam wyinaty myøøt'ajtpy, ja' ja ñijawiwandip ti dø'øn ja madya'aky jade'en tyijpy, sudso ja yikja'gyuki. ¹¹ Xjats Jesús ja ñimaajyidøø:

—Meets nugo myiktukmadoop ja' midihibi ka'ap y'ijty yiknijawi pøni sa ja Dios kyutujk y'ejxi tyiyi midihibi ja tyanitanaapy ja yjaa'y; jøts pøn øts ngutujk xkababøjkidip ka'ap ja jade'en tiy yiktukmadowdi, ejxpajtin madya'akyøjxp ja yiktukmadowdi; ¹² jøts ja jade'en kyawinmaa'nbyaattit ku ja ti tjaniwinmayidi, ka'ap ja tmadoogukidit pøni sa jaty ja yjayiknøjmidi, paty idø'øn ja jade'en yjatti ku øts ja kø'øm xkajanchjawi, kø'øm idø'øn ñadyuñidi paty ja pyøky kyayikmaa'kxtit.

Ku ja Jesús tnigajpxy sudso dø'øn yikja'gyukit ku jaa'y neppi ñijky

¹³ Winetnimts ja wyaañ:

—¿Ka'ap xja'gyukidi yø ejxpajtin madya'aky, sudsomts meets ja xjanchja'gyukigyøxt jadu'uk ja ejxpajtin madya'aky? ¹⁴ Pøn ja ariindømt twøjp, jade'en idø'øn ja n'ukpiktaajkint ejxim ja jaa'y midihibi ja øgyajpxy ja ømyadya'aky tkajpxwa'kxpx. ¹⁵ Jøts winaagin jaa'y jade'endi ejxim ja tøm midihibi naxkidaajk jam tuu'ba'am: y'amidoodujktip ja' ja øgyajpxy ja ømyadya'aky, jøts ku ja jade'en tmadowdi, winets ja miku' ja jaty ñimiñidi jøts ja pyøjkxyidi ja øgyajpxy ja ømyadya'aky midihibi wyinaty tø y'ukjotøkiyidi. ¹⁶ Nayide'en ja jaa'y winaagin n'ukpiktaajkma'ant ejxim ja tøm midihibi naxkidaajk jam tsaa'jotp: pyatmadoodip ja' ja øgyajpxy ja ømyadya'aky ñixyondakni, jøts kumi ka'ap ja tmimø'etti, ¹⁷ jade'en ja yjatti ejxim ja ariin y'aats ajawi kya'ityin; ka'ap ja jeky tm'etti ja'agøjxp ku ja tku'ayo'ombaa'didi ja øgyajpxy ja ømyadya'aky, winets ja tmatstututti, ka'ap ja tu'ugyi tpadundi. ¹⁸ Nayide'en jaa'y winaagin yjatti ejxim ja tøm midihibi jam yikwøj kujp agujkp: yjapatmadoodip ja' ja øgyajpxy ja ømyadya'aky, ¹⁹ jøts ja' ja ne'egi tyajotigøødyip ja pyikta'aktyi ja juky'ajitindi midihibi naaxwiin, ja' møjtojkidip jøts ja tyikudigøy ja øgyajpxy ja ømyadya'aky, jøts ja jaa'y tkayikwingaxø'øktit ja Dios kyajpxy. ²⁰ Ja jaa'y nayide'en winaagin pøn tpatmadoodip ja øgyajpxy ja ømyadya'aky jøts ja yjotøkiyidi, winets ja tyikwingaxø'økti jade'en ejxim ja tøm midihibi yikwøjp jam õñaxjotp. Winaagin ja jaa'y jade'endi ejxim ja tøm midihibi tyøømt tyikwimbejtp may, midihibi ee'pxmajk pajkiyihñ, midihibi tugi'pxy jøts midihibi magø'pxy.

Niti jadi'itni kyatañ, kuwañim ja tyimiyiknijawi

²¹ Nayide'en pyabøjkpitøjk ja tnimaay:

—¿Ti ja' ndejint jaj wya'añ jøts ja yiknijupt jap kajuun patki'py, uk jøts ja yikpikta'akt jap maabajt patki'py? Ka'ap ja jade'en pøn tyiktuñ, køjxp ja yikpikta'aky, jamts ja yjajy. ²² Ti yjawi ka'ukyikpatp ku ti yjaju'uch'ity, ti tunk uk ti winmaa'ñ yjawi ka'ukyiknijawip ku ti yik'amaa'tsk'aty. ²³ Jamxi mdatskiti, tamadowdi yikxon.

²⁴ Nayide'en pyabøjkpitøjk ja tnimaay:

—Øyim xpatmado'odit yø ixpøjkin midihibi myiktukmadoodip. Nayide'en meets ja wijy'ajtin myikmo'ot pøni sa meets ja jaa'y xukniweji ja Dios y'ixpøjkin; jøts mjaaktyimñijawip meets ja jawaan pø xmadooxpi meets yam kø'øm. ²⁵ Jaaktyimiyikmøøpy ja wijy'ajtin ja' pøn ja'gyukip; jøts pøn kaja'gyukip, jaaktyimiyikpøjxip tuki'iyi ja' ja wijy'ajtin.

Ku yiknimadyaajky ja tøm midihibi mujxp jøts midihibi yomp

²⁶ Nayide'en pyabøjkpitøjk ja tnimaay:

—Jade'en idø'øn ja Dios kyutujk midihibi ja tyanitanaapy ja yjaa'y, jade'en idø'øn ja n'ukpiktaajkint sa ja jaa'y yjatyin ku tyømt ja twøjy naxjotp; ²⁷ mya'ay ja koots pyidi'iky ja jøpy, najxpts idø'øn ja xøøw tsuu jade'en, mujxp ja tøm jap, yomp idø'øn ja jap, jøts ja jaa'y ka'ap tnijawi tigøjxp idø'øn ja jade'en yjaty. ²⁸ Jøts kumi ja naajx idø'øn ja jade'en ñamyayi kø'øm nanқтыøømbidsøjmijip; ku jawyeen pyidsimy ja ariindeky, jøtsnim ja kyojki, jøtsnim ja tyøømbajtni; ²⁹ kuts ja myijay, winets ja jaa'y choondi jøts ja twejxwa'andi, kumi tø ja ariin wejx'laats tpaaty.

Ku ja Jesús tmadyakpaaty ja mortas tøm

³⁰ Nayide'en ja Jesús tnimaay ja pyabøjkpitøjk:

—¿Ti ja Dios kyutujk møøt ndami'ejxi'int midihibi ja tyanitanaapy ja yjaa'y, ti ixpøjkin ti madya'aky ja ndamimado'owint? ³¹ Jade'en idø'øn ja n'ukpiktaajkint ejxim ja mortas tøm midihibi yikwøjp jam naxjotp. Ka'ap jadu'uk ujtspajk te ya naxwiin midihibi janch mutsk sa ja møj

mortas tōōmdin; ³² jōts ku ja yikwiyj, janch yikxon ja yōñ, wyinajxkijxpy ja tuki'iyyi ja ujts midj yikjagyajp jap kemyjōtpy, yikxon ja janch mōj y'awajj y'axeeñi, japts ja joon patki'py y'aptsō'okti.

Tigōjxp ku Jesús xumi jade'en tyik'ixpijy ja jaa'y ejxpajtin madya'akyōjxp

³³ May ja Jesús ja jaa'y jade'en ejxpajtin madya'akyōjxp tyik'ixpijy ku ja tnanky'ixpōjkōō ja ogyajpxy ja omyadya'aky, jade'eñi paat ja y'ijty tmadya'aky mabaat ja kō'ōm tnajtsjawi ja jaa'y tnmadowdi. ³⁴ Jōts ejtp idō'ōn ja Jesús jade'en tyik'ixpijy ja jaa'y ejxpajtin madya'akyōjxp, jōts tyukmadōōpy pyabōjkpitōjk ja wa'ats pōni ti dō'ōn ja jade'en tyijpy.

Ku ja Jesús tyiknaxjy ja mōk poj, jōts ku ja tyik'amōkiy'iñ ja mejy

³⁵ Xjats ku kyoodsiy'iñ ja et nay ja'abi xōōw, winets ja tniimaay pyabōjkpitōjk:

—j'wan tjaa'myindi jaduktamajñ'ampy jam nōōba'am!

³⁶ Xjats ja jade'en tminawya'kxidōō ja mayjaa'y, jōts ja jap barkijōtpy tyiktsoō'ndōō ja Jesús mayim ja jap wyinaty, ojts abikbyarki ja pyadsōōñidi, ja' ja ojts tmōōtnōjkxti.

³⁷ Xjats ja poj jam janch mōk myiñ, jōts ja nōō mōk'ampy y'adōtspinaaxwa'jky, yikxon ja yjanchtojmj'jky jōts ja kom nōō tyōjkijy'iñ jam barkijōtp, ujtsnip ja wyinaty. ³⁸ Jamts ja Jesús wyinaty mya'ay barki ix'am, tō ja jam wyinaty ñagyukōyiyi; winets pyabōjkpitōjk ja ojts yuxyi, jōts ja ojts ñii'mxyi:

—j'windsōn! ¿Kidi mdsō'ōgi ku nnōjōō'kxin uk ku n'oo'kin?

³⁹ Xjats ja Jesús pyidi'jky jōts ja mōk twingugajpxiy'iñ ja poj; jōts yide'en ja mejy tniimaay:

—j'mimadook ots et, kidi m'adi'ich!

Winets ja mejy jatyi y'amōkiy'iñ jōts ja tu'ugyi tyaañ.

⁴⁰ Xjats ja tniimaay pyabōjkpitōjk:

—j'jadits ku mdsō'ōgidi, tigōjxp ku o xkajanchjawi?

⁴¹ Winets ja yjanchō'jkidōō, yide'en ja kō'ōm ñawyajnidōō:

—j'pōnimts idō'ōn ya'at ndejint, sudso poj sudso mejy yō myimadōyi!

5

Ja Gadarit jaa'y pōn wyinaty ja miku' tō tyatōkiyi

¹ Xjats ja ttayō'ōñajxtōō ja nōō, jōts ja yja'ttōō jam nōōba'am mā dō'ōn ja naajx wyinaty txōōw'aty Gadara. ² Xjats ku ja Jesús yō'ōpyidsiimy jam barkijōtp, winets jaa'y ja tu'uk ñimejnōō midj jam wyinaty tsoō'mp jam kami santijōtp mā ja oo'kpi ñaxōkidi, miku' ja wyinaty myōōt'ajtpy. ³ Jam idō'ōn ja wyinaty tyimchinaadyakni mā ja oo'kpi ñaxōkidi, jōts ka'ap idō'ōn ja pōn puix kadeen y'uktaxgixōjtsiniyi y'uktakxōjtsiniyi. ⁴ Kumi tō ja wyinaty kawinaagk ojk jade'en yjayiktuñ, xjats ja jatyi tpatoti, jadi'iñi ja pu'xk tanuki, ejtp idō'ōn ja jade'en txumituñ jōts ja jade'en nipōn kyamayi. ⁵ Ejtp idō'ōn ja xyumiwidity xanaxy tsunaxy, jam ja kojpkōjxp jam ja kami santijōtp muum chabaawidity, jōts tsaa ja jam kō'ōm yjanchnadyuktatsaachiyi. ⁶ Xjats ku ja jagamyi t'ejxpaajty ja Jesús, winets ja ojts putyi tñinijky jōts ja twinguxanaay, ⁷ yide'en ja mōk'ampy tniimaay:

—j'Jesús, Dios U'ñk, ti o xanimemp, sã o xunwa'añ? Njanchminuu'kxakpy tun may'ajt Dios kōjxpit, kidi o xyik'ayo'ombaaaty.

⁸ Ja' idō'ōn ja jade'en kyuwa'aniiyi'iñ kumi yide'en Jesús ja wyinaty tō ñii'mxyi:

—j'Miku', majtstu'ut yō jaa'y!

⁹ Xjats ja Jesús wyangojmōō:

—¿Ti me mxōōw?

Winets ja miku' y'adsōōy jam jaa'y y'am yjōtp, jōts ja wyaañ:

—Legiōn oō nxōōw, ja'agōjxp ku oō nnamayi.

¹⁰ Yikxon idō'ōn ja tjanchminuu'kxa'jky ja Jesús, jōts idō'ōn kyayikajxpidsō'ōmt jam naxjōtp mā ja wyinaty chōōni. ¹¹ Jōts kumi jamdam magyuch wyinaty tyimjōō'kxwidejtmidi jam kojpk wingon, ¹² xjats ja miku' ñuu'kxaktōō, jōts ja wyandōō:

—Tanigajxk oōts yō kuch; wan oōts jam ttōki.

¹³ Xjats ja Jesús tyajky ja tiy'ajtin, yikjajt idō'ōn ja jade'en, winets ja miku' tñajtsstut-tōō ja jaa'y, jōts kuch ja tñimajtskojmidi, ja' ja tyatōjkidōō. Namajtsk milin idō'ōn ja kuch jam wyinaty tyanidi, ja'ats kō'ōm ñanktyejmidōō jap jaa' jutjōtpy jōts ja nōōjōtpy tyimñaxkidaktōō, japts ja ñōōjōō'kxkōxtōō.

¹⁴ Xjats ja jaa'y ojts kyakōxti pōn jam wyinaty kuch'ejxtip, jōts ja t'atsnimadya'akwa'andi jam mōj kajpōtp, jōts nayide'en jam kamjōtp. Winets ja jaa'y myendōō, jōts ja t'ejxwa'andi tñijawiwya'andi ti dō'ōn wyinaty tō tyuñi. ¹⁵ Ja Jesús idō'ōn ja ñimendōō, winets ja ojts t'ejxti ja jaa'y pōn wyinaty t'ukmōōt'ajtp ja miku' jōts ku ja jam chinaañi wet xōōw, tō ja yikxon wyejni kyajni; winets ja jaa'y yjanchō'jkidōō. ¹⁶ Pōn ja jaa'y wyinaty tō twin'ejxti, ja'ats ja tñimadyaktōō sã jatyi ja wyinaty tō jyaty tō kyubety ja jaa'y pōn tmōōt'ajtp ja

miku', jøts maagyuch ja nayide'en tñimadyaktøø ku ja wyinaty tø y'oo'køjxnidi. ¹⁷ Winets ja tminuu'kxakaktøø ja Jesús jøts wan ja jam tymbyidsimy etjotp midi ja ñax'ajttip.

¹⁸ Xjats ku ja Jesús tyøjkiyi'ñ jam barkijotp, winets ja jaa'y ja ñimaajyøø midi ja miku' wyinaty jekyip t'ukmøø'tajtp jøts ku ja pyadsoonwa'añiyi. ¹⁹ Xjats Jesús ka'ap tkupijky, yide'en ja tñimaay:

—Nøjx mdøjkwindum, ninøjx mmigu'uk jøts xukmado'tot ku Dios tø mjanchpudøkiyi, tamimadya'ak sudso Dios tø m'ayo'ijxyi.

²⁰ Xjats ja jaa'y ojts ñijky, jøts ja tñimadyakwidejtøjkiyi'ñ kajp kajp jam Decápolis etjotp sa Jesús ja wyinaty tø yjanchpudøkiyi; winets jaa'y ja ñigymaap tjanchja'widøø.

Ja Jairo ñøøx, jøts ja tø'øxyøjk pøn ja nwindson'ajtim Jesús wyet ojts ttojni

²¹ Xjats ku ja Jesús wyimbijty jap barkijøtpy, ku ja ojts ñijky jam nøøba'am, winets mayjaa'y ja jam ñimejnøø, jøts ja Jesús jamyi tyaañ. ²² Tø dø'øn ja jam wyinaty tyañ ku jaa'y jam tu'uk yja'jty midi yik'ixpøjpk jam tsaptøjkjotp. Jairo, ja ja' ja xyøøw'ajtpy. Xjats ku ja t'ejxpaajty ja Jesús, winets ja ñagyuxendyaajkøø jam Jesús wyindum ²³ jøts ja tjanchminuu'kxaajky, yide'en ja tñimaay:

—Jotkøjxnip øts n'u'nk xjap; men mgø' xanixajy, jøts myøkpøkt jøts yjujky'att.

²⁴ Xjats ja Jesús ojts tpanijky ja jaa'y; namay ja ñøjxiti, may jaa'y ja janchpadsoo'nøø, yikxon ja yjanchyik'atejmuky. ²⁵ Jamts ja tø'øxyøjk wyinaty tu'uk jam mayjaa'yjotp midi wyinaty pøjkp, myakmajtsk jumøjtíp taxnaxyi ja wyinaty tø pyaajtniyi, jade'en jumøjt ja wyinaty kujk tñi'ty ja pa'am. ²⁶ Yikxon ja wyinaty tø tku'ayowi ja pya'am ku tsøyi'bi ja may tjayiktuñ, tø myeeñu'nk ja wyinaty tyik'oo'køjxni pøni wine'en ja jam wyinaty tmøødi, jøts niwine'en ja wyinaty tø tkadamøkpiky, ne'egi ja pa'am yjinax'adøtsni. ²⁷ Xjats ku ja ojts tmadøy jøts ku yiknimadya'aky ja Jesús, winets ja tpmiñ jap mayjaa'yjotp, jøts ja ttojni ja wyet. ²⁸ Kumi yide'en idø'øn ja ñawa'añiyi: "Ja'ayi øts wyet inet yø ndojnit, tso'okp øts inet jatyi." ²⁹ Xjats ku dø'øn ja jade'en ttuuñ, winets ja taxnaxyi jatyi y'amøkiyi'ñ; tyimya'wiyi'ñ ja kø'øm jøts ku ja wyinaty tø chø'øky ku pya'am ja wyinaty tø ñaxy. ³⁰ Xjats ja Jesús tja'wiyi'ñ, jøts kudam ja wyinaty tø tyiktsø'øky tu'uk ja jaa'y ku ja myøk'ajtin ja wyinaty tø tyik'awa'añ; xjats ja t'ejxwimbijty ja mayjaa'y, jøts ja ojts tyiktyi yide'en:

—¿Pøn øts nwet tø xojni?

³¹ Winets ja pyabøjkpitøjk y'adsoji:

—Jabi kawine'ents ja jaa'y mjanch'atejmuky, jøts mjanch'ukwa'añ: "¿Pøn ø xomp?"

³² Ejxwidejtp idø'øn ja Jesús, ja' ja tyimy'ejxwampy pøn idø'øn ja wyinaty tø jyaty-imy'uktøfi. ³³ Winets ja tø'øxyøjk tso'øgi yjanchyikmibejpniiy, ñija'wipts ja' jøts ku ja wyinaty ja tyaxnaxyi tø ñaxy, xjats ja ojts twinguxanaay'øyi ja Jesús, tyamimadyakøjx ja tuki'iyi pøni sa jatyi ja y'ejxi tyiyi. ³⁴ Winets ja Jesús tñimaay ja tø'øxyøjk:

—Ja'agøjxp u'nk tø mdsø'øky ku ø tø xjanchjawi. Nøjxni, Dios mgunuu'kxip, jøts kidi pa'am m'ukpaajtniyi.

³⁵ Examñim ja Jesús jade'en wyinaty wya'añ, ku jaa'y jam yja'ttøø midi wyinaty tso'ondip jam møjaa'y tyøjkwindum, ja møjaa'y midi wyinaty tump jam tsaptøjkjotp, xjats ja yiknimaa'y:

—Tø ja mnøøx y'oo'kni. ¿Tiku yø windsøn nugo xyikjotkøjx'adi'ich?

³⁶ Myadøøpy idø'øn Jesús ja' ku ja møjaa'y jade'en yiknøjmi, xjats ja tñimaay:

—Kidi mdsø'øgi; ja'ayi amumjoojt xjanchjawit.

³⁷ Jøts ja ojts ñøjxiti, ka'ap ja Jesús tkupijky ja mayjaa'y jøts ja myøøtwidetiyit, Pedro ja nugo myøø'tajt, møøt ja Jacobo, jøts ja Juan midi ja Jacobo y'uch'ajtpy. ³⁸ Xjats ku ja jam yja'ttøø ma ja jaa'y jam wyinaty chøøni pøn tump tsaptøjkjotp, winets ja ojts t'ixy jøts ku ja jaa'y nugo xem yam y'adøtsnidi, pømbi jap waani yaxp, jøts pømbi jap janch møk yaxp. ³⁹ Xjats ja Jesús tyøjkiyi'ñ jap tøjkjotpy, jøts ja tñimaay ja jaa'y:

—¿Tiku jadine'en mna'amdi, jadits ku mya'axti? Ka'ap yø kiixyu'nk y'øøky, maap yø'.

⁴⁰ Winets ja jaa'y ojts tñix'ekti. Xjats ja Jesús t'ixkajxpidømgijxy ja jaa'y, nugo u'nkteety u'nktaak ja ojts tmøødi jøts ja pabøjkpitøjk midi ja jam wyinaty myøø'tajtpy, xjats ja tyøjkiyi'ñ ma ja kiixyu'nk jap wyinaty, ⁴¹ jøts ja ojts tñixaji kyø'køjxp, yide'en ja tñimaay:

—Talita, cumi —yide'en idø'øn ja tijy: Mets u'nk idø'øn nnimaapy, pidø'øk.

⁴² Xjats ja kiixyu'nk jatyi tyanaagyukiyi'ñ jøts ja yø'øbyiky jadigøjky, makmajtsk ja jumøjt ja wyinaty. Winets ja jaa'y yjanchø'jkityigøødyøø ku ja jade'en t'ejxtøø. ⁴³ Jøts ja Jesús møk'ampy t'ane'emy ja jaa'y, jøts ka'ap pøn ttuknijawidit ku ja kiixy jade'en wyinaty tø yjujppyiky, yide'en ja møjaa'y yiknimaa'dyøø jøts wan kyaaky tmo'odi ja kiixyu'nk.

6

Ku ja Jesús yja'jty jadigøjk Nazaretit kajpjotp

¹ Xjats ja Jesús jam chøø'n jøts ja ñøjknimøø jadigojk y'etjotp, ja pyabøjkpitøjk ja myøøtnøjkx. ² Xjats ku tpaajty ja poo'kxin xøøw, winets ja yik'ixpøjktøjkijii'n jam tsapøjktotp. Jøts ja mayjaa'y pøn ja wyinaty patmadojyiyip, ñigyyumaap ja tyimyja'widøø ku ja jade'en yik'ixpiky, xjats ja wyandøø:

—¿Ma yø jade'en tø y'ixpiky? ¿Ti wijy'ajtin yø jade'en tø yikmø'øy, jøts sudso yø jade'en ja tunk tjaty midì naxwii'ñit jaa'y ni tu'ugin kyajajtip? ³ ¿Ti kidi ya'at ja tsajtspi, ja Mariyixi yø y'u'nk, ja Jacobo y'ajch, møøt ja José, møøt ja Judas, jøts ja Simón? Pø yø'øxi ja y'ajch'ajttip, jøts nayø' ja kiixyuna'jk y'ay'ajttip pøn ya tsinaadyip, ¿kidi?

Jade'en ja wyandøø, xjats ja jade'en tkamibøjkidøø ja Jesús y'ixpøjkin. ⁴ Winets Jesús ja ñimaajyidøø:

—Niduki'iyi jaa'y twindsø'øgidi ja Dios kyugajpxy, ja'ayi ja nugo kawindsø'jkijiyip pøn ja myigugajp'ajtpy, pøn ja møøt tyukjaa'y'aty, jøts pøn ja myøøtsinaapy jam tyøjkjotp.

⁵ Xjats ja jam jade'en niti tkatuun, nugo ja waani tyiktsøøjky ja pamaa'y ku ja ojts tkønixajy. ⁶ Jøts nugo ja jadi'iñi tkumaa'yiyii'n tkudajiyii'n ku jaa'y ja kyajanchja'wiyøø. Xjats ja jade'en kajp kajp wyidijty ma jaty ja kajp jam wyinaty wingon tyañ, jamts ja yik'ixpiky.

Ku ja Jesús tkexy ja pyabøjkpitøjk kajpxwa'kxpi

⁷ Ku dø'øn ja wyinaty jade'en tø yik'ixpiky, winets ja tyaajxyii'n ja myakmajtskpi jaa'y, jøts ja tpauejxy namaajtsk jaty, ojts ja tkutujkmøøgyixy sudso ja kuwani tyikpidsø'ømdit ja miku'. ⁸ Yikxon ja ojts t'ane'emy jøts ja niti tkako'ondit ñiduu'yø'øyik, nugo tyaaj ja ja'ayi kyaptip. Ka'ap ja ti tminøjkxtit, ni pejni, ni tsapkaagy, ni meeñi, niti tkako'ondit. ⁹ Nugo kyø'øku'nk ja ja'ayi ttuktawa'agidit, jøts nijan tu'ugyi twetstet, ka'ap majtsk, jade'en ja yik'ana'amdøø. ¹⁰ Xjats ja yjaaktyimykniimaadyøø:

—Ku muum tøjkoøjty mdøøkidit, tu'ugyi mja'ta'aktit, jam idø'øn mja'attit mdsoondit kunim mdsoondit jam kajpkøjxp, winetnims mbidsø'ømdit jam. ¹¹ Jøts pøni magajp mgayikupøkt, pøni ma pøn niwine'enin mgapatmadoowa'añidi, jøts ku jam mdsoondit, winets pu'ux xwinapit mdekyøjxp, jøts jade'eñi xuk'ejxtit jøts ku jade'eñi tø mnañiwa'achidi. Janch øts idø'øn nwa'añ, janch meets idø'øn nnøjmi, ku Dios mye'ent tu'ukpi xøøw jøts tiidyunwa'ant ja jaa'y, winets ja kajp nøjkx jinaxy yiktiidyuñ pøni ma mgayikupøkti, jøts ne'egi ka'ap ja Sodomit kajp møøt ja Gomorrit kajp jade'en nøjkx yiktiidyundi sa ja nøjkx yiktiidyundi.

¹² Xjats ja pyabøjkpitøjk ojts choondøø, jøts ja ojts yide'en kya'amaawiyidetti jøts wan ja jaa'y chinaa'yin tyikktigatsti, wan tja'dyigøøgyøxti tuki'iyi ja kya'øyjaa'y'ajtindi pøni sa ja wyinaty tø chøøni. ¹³ Jøts may ja nayide'en tyikpidsømdøø ja miku' midì jaa'y jam wyinaty myøøt'ajttip, jøts ja nayide'en tyiktsøktøø may ja pamaa'y ku aceite ja ojts tjaajaaxti.

Ku ja Juan Bautista ja o'jkin tpaajty

¹⁴ Xjats ja windsøn Herodes ja tñimadøøy ku ja Jesús øy pøn jaa'y ñija'winiyi jøts ku ja tyikutuky, winets ja Herodes wyaañ:

—Ja Juan midì ja jaa'y ojts tyiknøbety, ja' inet tø pyidsimy jadigojk jap oo'kpi jutjøtpy.

¹⁵ Xjats jadu'ukpi jaa'y ñømi:

—Elias ja'.

Jøts pømbi wamip:

—Dios ja' kyugajpxy, nayide'en sam jekyiy myemidi ja Dios kyugajpxy.

¹⁶ Winets ja Herodes wyaañ ku ja jade'en tmadøøy:

—Ja Juan inet ja' pøn øts ojts nnankyajtspøødyi ja kyubajk, ja' inet yø tø pyidsimy jadigojk jap oo'kpi jutjøtpy.

Jade'en ja Herodes wyaañ.

¹⁷ Kumi ja' ja wyinaty tø tsumy, ja' ja wyinaty tø tkøwiñ tpaakwiñ jap puxøjkjøtpy ja'agøjxp jøts ja Herodias yjotkujk'att, ja tø'øxyøjk pøn ja Felipe jawyeen y'atsnidø'øxy'ajt, pøn ja Herodes wyinaty tø t'atskap'aty. Ja'ats ja Herodes nugo myøøtsinaapy. ¹⁸ Paty ja Juan ja wyinaty yide'en tø ñi'mxyi:

—Ka'ap kyutuky jøts m'uch ja ñidø'øxy nugo xmøøt'atit.

¹⁹ Xjats ja Herodias wyinaty jade'en tø tjanchmi'ambiky ja Juan jøts ja tyimyk'ookwa'añ, xjats ja ka'ap tñiwinmaa'nbyaaty sudso ja t'ukyik'ookt; ²⁰ kumi ñija'wip ja Herodes wyinaty jøts ku ja Juan wyinaty øy tsuj yjaa'y'aty ku pøky tkamøødi, paty ja ttsø'øgi jøts paty ja ñidø'øxy ja sa tkaduktuñ. Pyatmadoojip yikxon ja kyajpxy ku ja Juan janch tsuj myadya'aky, øy ja mabaat tjananimadøø. ²¹ Xjats ja tiempi tpaajty ku ja Herodias jotkumoni wyaañ sudso ja tyik'ookt ja Juan. Winet et ja Herodes twaadsøøy ja tyumbitøjk migaabyi mi'ukpi, ja'agøjxp ku syandi xøøw ja wyinaty tyiknaxy. Ja may soldadi windsøn ja wyaadsøow møøt ja riki jaa'y, jøts nayide'en ja møjaa'dyøjkti pøn ja kutujk jam wyinaty t'adsinaadyip Galilea. ²² Winets ja Herodias ñøøx tyøjkijii'n jap ma ja jaa'y jap wyinaty

kyaydi y'uukti jøts ja jap y'ejch, xjats ja Herodes ja ojts tjanchuj'ixy ja y'ajtsk, nayide'en ja jaa'myidi pøn ja jap wyinaty myøøtkaapy. Winets ja tnimaay ja kiixy midy jap wyinaty tø y'ech:

—Amidook øts pøni ti mdsøjkpy, nyakp øts inet øy midy.

²³ Ojts Dios ja ttuk'ixy jøts ku ja tmo'ot pøni ti ja kiixy kø'øm y'amidøøpy, pikta'aky paat kutujk paat ja kukwa'kxy tyakwa'añ. ²⁴ Xjats ku ja kiixy jade'en tmadøøpy winets ja pyidsiimy, jøts tyaak ja t'atsnimaay:

—¿Ti n'amido'op?

Xjats ja ojts ñi'mxyi:

—Ja Juan kyubajk m'amidoøjyip pøn ja jaa'y tyiknøbajt.

²⁵ Winets ja kiixy jaty: tyøjkjy'i'i'ñ nay jap ma ja windsøn jap wyinaty, jøts ja tnimaay:

—Xyamyi ndsøky ja Juan kyubajk pøn jaa'y tyiknøbajt, ja' øts kyubajk xmøøjyip txyjyøtpy.

²⁶ Winets ja windsøn yjanchjotmay'oo'kpijky ku ja kiixy jade'en wyaañ; jøts kumi tø ja wyinaty Dios ttuk'ejxn jøts ku ja tyakt tuki'i'yi pøni ti ja kiixy y'amidøøpy, tø migaabyi mi'ukpi ja wyinaty jade'en tmadowdi, xjats ja jade'en sa tkanimaay, kyupøjk ja' midy idø'on ja kiixy wyinaty y'amidøøpy. ²⁷ Jaty: syoldadi tu'uk tkejxy pøn wyinaty y'ejx'ejtip, jøts ja t'atsyikwinajkit ja Juan kyubajk, jøts tyikme'ent møkta'aky'ampy. ²⁸ Xjats ja soldadi chøø'ñ, jøts ja ojts ñijky jap puzøjkjyøtpy, japs Juan kyubajk ja ojts tkajtspo'jt'iyi, jøts ja tyikmiin txyjyøtpy. Jade'en ja kiixy ja yikmøøpy, jøts ja jade'en tmøøpy ja tyaak.

²⁹ Xjats ku ja Juan pyabøjkpitøjk ñija'wiyøø, winets ja yikpøjkj'knøø, ojts pyabøjkpitøjk ja yikpidøøgyi, ja' ja ojts yiknaxøkiyidi.

Ku ja Jesús tyikaay ja nimagoxk milbi jaa'y

³⁰ Xjats ja Jesús ja kyudanaabyi tminabyaajtøø, jøts ja ojts tyamimadyakixy ti jaty ja wyinaty tø ttundi, jøts ti ja wyinaty tø ttuk'ixpøkti ja jaa'y. ³¹ Xjats Jesús ja tnimaay:

—Mendi, wan tjaa'myindi poo'kxpi ma et abak.

Ja'agøjxp idø'on ja jam jade'en ñøjkxwa'andi ku ja mayjaa'y ja myiyø'owyimbityidi myiyø'oy'adijyidi, niwinea'en ja yikxon kyakaydi kya'uukti. ³² Winets ja barki ja ttatøjkidøø, jøts ja ñøjkxtøø abak etjotp. ³³ Mayjaa'y ja y'ejxidøø ku ja jade'en choo'ndøø. Yik'ejxkajp ja Jesús; xjats ja choo'ndøø pujt'pim, kawinaak kajp ja jaa'y jam ñøjkxtøø jøts ja ojts t'anajxukti ja Jesús, jawyeen ja mayjaa'y jam ne'egi yja'ttøø ma ja wyinaty y'ukja'atwa'andi. ³⁴ Xjats ku ja jam yja'ttøø, ku ja Jesús pyidsiimy jap barkijøtpy, winets ja t'ejxpaajty ja mayjaa'y, jøts ja ojts t'ayo'ixy ku ja jam yik'ayowim tyanidi mabyorreegin midy ñi'ejxpi ka'ejtp; jøts ja tyik'ixpøjkjy'i'i'ñ, jeky ja tyik'ixpijky. ³⁵ Xjats ku ja et chuu'ñøø, winets ja pyabøjkpitøjk ja wingon ñimejnøø, jøts ja ñimaajyøø:

—Tøts ja et chuu'ñi, pø ka'apts ya pøn chøøni. ³⁶ Kajxni yø jaa'y, wan tnøjkxnidi kamjøøjty, wan tnøjkxnidi ma kajp wingon, jamts tju'udyit ja jii'kxy, kumi janch yu'oo'knidip yø'.

³⁷ Winets ja Jesús y'adsøøpy jøts ja wyaañ:

—Ka'ap idø'on mwa'ant, mo'odi chapkaaky, yikaydi.

Xjats ja pyabøjkpitøjk wyandøø:

—¿Nøjkxp øøts jøts øøts tsapkaaky n'atsju'uty majtsk magø'pxy denario, jøts øøts yø jaa'y nyika'aty?

³⁸ Winets ja Jesús wyaañ:

—¿Ja winaak jap mdsapkaaktyi? Nøjkx x'ats'ejxti.

Xjats ku ja t'ejxtøø, winets ja tnimaadyøø:

—Magoxk ja tsapkaaky jap jøts majtsk ja ajkx.

³⁹ Xjats ja Jesús tyikutujky jøts wan ja jaa'y wanjaty t'ixa'akti jam tsuxk miyjøtp; ⁴⁰ winets ja jaa'y y'ixaktøø tukpiky jaty, pømbi niwixijxmyajk ixaktøø, jøts pømbi nimagø'pxy. ⁴¹ Xjats ja Jesús magoxk tñixajy'i'i'ñ ja tsapkaaky jøts majtsk ja ajkx, winets ja ojts tpat'ixy yø tsajp, jøts ja ojts tkunuu'kxy ja tsapkaaky xjats ja ojts ttukwa'kxy, jøts ja pyabøjkpitøjk ja tmøøpy jøts ja ttaguma'adyit ja jaa'y jøts ja tyikwa'kxidit. Tuki'i'yi ja jaa'y ajkx yiktagumaagøjxtøø, ojts ja yikmøøgyøxti, ⁴² xjats ja kyaadyøø ku'uxy; ⁴³ winets ja tsapkaaky windank makmajtsk kach yikpøkmøøpy møøt ja ajkx windank. ⁴⁴ Janch namay ja jaa'y jam wyinaty yjøø'kxti, ja yaa'dyøjk ja yikmachodøø nimagoxk mil.

Ku ja Jesús yø'øpy jam mejwinygøjxp

⁴⁵ Xjats ja Jesús ja pyabøjkpitøjk tkugajxyjyixy jap barkijøtpy, jøts ja ojts tyikniykxy jawyeen jam Betsaida, kyajxjawyeeni jaa' jøts ja nøø ja ttanaxtit. Xjats ja yjaaktaañ jøts ja jaa'y ja tminawya'kxiti. ⁴⁶ Xjats ku ja jade'en tminawya'kxant ja mayjaa'y, winets ja ñijky Dios'ajot'ajtpi kojpkøjxp. ⁴⁷ Jøts ja barki jam ja wyinaty kujk ñaxy mejkyujk'am ku ja et kyoodsiyi'ñ, jøts ja Jesús jam wyinaty nadyu'uk tø tyañ jam naxkøjxp. ⁴⁸ Xjats ja ojts t'ixy ja pyabøjkpitøjk jøts ku ja ka'ap y'ukmaa'niyidi sudso tkaaptit ja nøø, ja'agøjxp ku ja poj wyinaty yø'øpy wimbet'ampy. Xjats ku yjøøkyoos'ajty winets ja Jesús ojts tñinijky wingon

ja pyabøjkpitøjk, jadi'liñi ja nøøwingøjxp yø'øy, jøts tyimy'ukwinaxwampy ja pyabøjkpitøjk ja wyinaty. ⁴⁹ Ku ja ojts y'ejxpaadyi jøts ku ja yø'øy jam nøøwingøjxp, winets ja pyabøjkpitøjk yjanchabaagaktøø, miku' ja wyinaty tø tyimwyinmaydi; ⁵⁰ kumi tø ja wyinaty niduki'i'yi t'ejxti, janch tsø'jkidip ja'. Xjats Jesús ja ojts myigajpxyidi, yide'en ja ojts yiknøjmidi:

—Jotmøkpøkti; øts idø'øn, kidi mdsø'øgidi!

⁵¹ Xjats ja kyøxpejty jam barkijotp ma ja jam wyinaty, jøts ja poj jaty'i ñajxy; ñigyumaap ja tyimya'widøø, ⁵² kumi ka'anim ja wyinaty tñijawidi yikxon pøni pøn ja Jesús, øy ja tsapkaaky ja' tjajikmayi, janch kujuun idø'øn ja'adi, ka'ap idø'øn ja tja'gyukidi.

Ku ja Jesús tyiktsøøjky ja mayjaa'y jam Genesaret

⁵³ Xjats ja ttanajxtøø ja mejy, jøts ja ojts yja'atti jam Genesaretit jaa'y y'etjotp, jamts byarki ja ojts tmixojtspatti nøøba'am. ⁵⁴ Ja'ayi ja pyidsømdøø jap barkijøtpty, winets ja Jesús jaty'i yik'ejxkajpy. ⁵⁵ Jøts ja jaa'y jaty'i ttukmadow'abidsømdøø ja myig'uk ma jaty ja kajp jam wyinaty jøts ku ja Jesús tø yja'aty, xjats ja jaa'y tkiyja'tpinibøjkidøø maabajtkøjxp ja pamaa'y ma ja jam wyinaty tñijawidi ja Jesús. ⁵⁶ Jøts ku ja Jesús yja'lity ømyadsowi, ku ja tñiyø'øyi ja kajp møj mutsk, uk ku ja yja'aty kamjotp, ejtp idø'øn ja jaa'y tuu'am tpikta'akti ja pamaa'y, jamts ja tminuu'kxa'akti ja Jesús jøts wyetpaa' ja wine'enin tyukpaadidit; jøts pøni pøn ja wet paajtyip, jaty'i ja cho'okti.

7

Ja ka'øwymaa'ñi ja jaa'y tyikpøkpyajtp

¹ Winets ja Jesús yiknimiñi ma ja jam wyinaty, ja fariseotøjk ja ojts ñimiñi møøt ja kajpxwejpitøjk, pøn jam wyinaty winaggin tø choondi Jerusalén. ² Ja'ats t'ejxtøø kudam ja Jesús pyabøjkpitøjk kyøbujti ku kyaydi, jøts ka'ap idø'øn ejxim ja møjaa'y chinaa'yin, ja'agøjxp ja ojts wenk tñigajpxti tñimadya'akti. ³ (Kumi yide'en ja fariseotøjk kostumbri tmøøt'atti jøts nayide'en ja myig'uk israelit jaa'y, ja' idø'øn ja pyadundip pøni sa jaty ja møjaa'dyøjk wyinaty tø y'atsøøniidi, ka' pøn kyay kunim ja kyagøbujti may ojk, winetnims ja wa'ats ñajjawiyidi. ⁴ Nayide'en pøni pøn maayjotpty tsoo'mp, jøts pøni ku ja ka'ap kyøbujñim kawinaak ojk, ka'ap ja nayide'en kya'aty. May idø'øn ja kostumbri jade'en midi ja pyadundip, ejtp idø'øn yikpujy uujk'i'i'ñ, tsajpts'øøy, møøt texy tas midi tum pujx, jøts maabajt, jade'en ja wa'ats tyik'etti.) ⁵ Paty fariseotøjk møøt ja kajpxwejpitøjk tñimaadyøø ja Jesús:

—¿Tigøjxp ku yø mbabøjkpitøjk jade'en ja kyø' tkapujti ku yø kyaydi sa ja møjaa'y chinaa'yin wya'a'ñ?

⁶ Xjats ja Jesús y'adsøøy jøts ja wya'a'ñ:

—Meets win'øø'mbi, yikxon ja Isaias midi Dios kyugajpxy'ajtpy ojts tja'ay ja Dios kyajpxy ku ja wya'a'ñ:

Nugo yø jaa'y jade'en y'aaw ttakajpxy ku øts yø xwindsø'øgi,

jøts niwine'enin øts n'ayuujk yø xkaja'gyukiyi.

⁷ Niti yø kyawa'a'ñ jade'en, øy øts yø mabaat xjawindsø'øgi,

ja'agøjxp ku tyikyø'ødyi ja jaa'y ixpøjkin jøts wya'andi kuts ja nja'aji.

⁸ Nayide'en ja Jesús wyami:

—Jøts meets idø'øn jade'en, kumi jade'en meets Dios kyutujk x'ixwejtsi, jøts xpadundi midi jaa'y kyostumbri'ajtpy: ja texpuyjk, ja tsapujk, jøts pøni ti jaty meets jade'en mdumpy.

⁹ Jade'en ja tñimaay:

—Janch wijy mee mnayjawiniyi jøts ku mgostumbri jade'en xpadundi, m'ixwijchp meets ja Dios kyutujk. ¹⁰ Øy ja Moisés yide'en yjawaan: “Windsø'øgi mdeety mdaak”, jøts “Pøni pøn tyeety tyaak tka'ømyigajpxp, wan ja jaty'i t'øøky.” ¹¹ Jøts ku meets, mdanigutujk'ajtpy meets ja jaa'y, ka'ap idø'øn tyimy'aguwanikøjxpi jøts ja tyeety tyaak ja tyimwyindsø'øgit, wan ja tñøjmidi ja tyeety ja tyaak: “Ka'ap inet ixyam nbudøkit, ka' ti nmo'owa'a'ñ, ja'agøjxp ku øts nbikta'aky tmøøt'aty Corbán.” (Corbán, ja' tyijpy ayuujk, tø ndamiyøxy ja Dios tuki'i'yi nbikta'aky); ¹² jøts ku ja jade'en wya'a'ñ, nijuunits meets ja xka'uktukpudøjkyini ja tyeety ja tyaak. ¹³ Jade'en'ampy meets ja xka'ukyikmøjtøjkiñi ja Dios kyajpxy, ja'agøjxp ku ja mgostumbri xuk'ixpøkti xem yam ja u'nk ja unaj'jk, jøts nayide'en ja mdsinaa'yin xyikyø'ødyi.

¹⁴ Xjats ja tyajxmujkøx ja jaa'y jadigojk, jøts ja tñimaay:

—Patmadoodik øts ni'ijtyi, jøts xnimado'odit tu'uk ja ayuujk: ¹⁵ Niti jii'kxy jaa'y kyayikpøkpyetyi ku jaa'y ti tji'i'kxy. Ja' jaa'y yikpøkpyajtip midi tsoo'mp jam anmija'winjotp.

¹⁶ Madowdi yikxon, pø jamxi mdatskti, yø'øts mdamado'odip.

¹⁷ Xjats ku ja Jesús tminawya'kxøø ja jaa'y, winets ja tyøjkiyi'i'ñ tøjkjøtpty, japts pyabøjkpitøjk ja ojts yiktiyi ti ja'abi madya'aky jade'en tyijpy. ¹⁸ Xjats ja tñimaay:

—¿Ni meets paat yø xkanimadooni? ¿Ka'ap xnijawidi ku jaa'y niti jii'kxy kyayikpøkpyetyi ku jaa'y ti tjii'kxy? ¹⁹ Ka'ap jii'kxy tyøki anmija'winjotp, maatsjotp ja jii'kxy tyøki ma ja tinch, jøts pyidsimy ku jaa'y ñijky nawyiyø'yibi.

Jade'en idø'øn ja ojts tniagajpxy jøts ku jii'kxy tum wə'əts mido yikjø'kxp, ka' yikpøkpyety. ²⁰ Yide'en ja wyaañ:

—Ja' jaa'y yikpøkpyajtip mido pidsømp y'anmija'winjotp. ²¹ Kumi jam pyidsimy ja ka'øwynmaa'ni ku jaa'y kya'øwynmay, jam pyidsimy ku jaa'y ñiyaa'y ñidø'øxy ñabyøjkxyidi, ku nadyu'uk jaa'y ñamyøø'tatyidi, ku jaa'y yikjaa'y'øøky, ²² ku jaa'y myeech, ku jaa'y wenk jaa'y pyikta'aky tsojkiyi, ku jaa'y ti tka'ødyuñ, ku jaa'y tyaa'y'aty, ku jaa'y najts'aaw najtsjoojt yjaa'y'aty, ku jaa'y myigu'uk ti ttami'ama'at'aty, ku jaa'y pyagajpxy, ku jaa'y ñamyikxyi, ku jaa'y niti tkawinmay. ²³ Tum anmija'winjotp yø ka'ødyunk jade'en chøøñ mido jaa'y tyikpøkpyajtp.

Ku ja Tiro t'øxyøjk tjanchja'wiyii'ni ja Jesús

²⁴ Xjats ja Jesús jam chøø'ni jøts ja ñijky Tiro jøts Sidón, jade'en ja et jam txøøw'aty ma dø'øn ja ñijky. Xjats ku tøk ja jam tpaajty jamts ja tyøjkxyi'ni, ka'ap ja pøn t'uktuknijawiywa'añ ku ja jam. Ma ka'ap ja jade'en yjajty ojts ja jatyi yiknijawi. ²⁵ Jatyi t'øxyøjk ja tu'uk ñija'wiyøø pøn ñøøxu'nk jam wyinaty miku' tmoø'tajtp; ja'ats jam meen jøts ja wyinguxanaajyi. ²⁶ Ojts ja t'øxyøjk wya'añ jøts ja Jesús tyikpidsø'tamti mi ku' mido ja kiixy'uk jam wyinaty myøø'tajtp, sirofenicyit jaa'y idø'øn ja t'øxyøjk pøn jam jade'en meen, jøts griego ayuujk ja kyajpxy. ²⁷ Xjats ja Jesús y'adsøø jøts ja wyaañ:

—Jawyeen øts ja israelit jaa'y nbudøkit, jøts meets ix'oojknim.

²⁸ Winets ja t'øxyøjk y'adsøø jøts ja wyaañ:

—Janch jade'en teety, ka'ap kyajade'eni. Jade'en øts ixyam nnayjawi ejxim ja uku'ngin, jøts ja israelit jaa'y ndejint ejxim jaa'y una'jkin kyaydi, jøts ja kyaaky abu'xk tyika'adi jøts ja uku'nk ja jatyi tkaamyuky. Paty teety nnøjmi jøts mdu'ump may'ajt jøts ø xpudøkit.

²⁹ Xjats ja Jesús tniimaay ja t'øxyøjk:

—Janch idø'øn mwa'añ; nøjxkti. Tø ja m'u'nk ja miku' myajtstuujtniyi.

³⁰ Xjats ja t'øxyøjk ojts ñijky tyøjkjotp, kuts ja jam yja'aty jøts ja ñøøxu'nk ja tpaajty maabajtkøjxp. Ka'ap miku' ja wyinaty t'ukmøø'tajtni, tø ja wyinaty myajtstuujtniyi.

Ku Jesús ja nat jaa'y tyatsk tyik'awajtsyi

³¹ Xjats ja Jesús jam choo'ngojmøø Tiro, jøts ja ñijky Sidón, tyimñajxts ja jam jøts magyajp ja ttanajxy jam Decápolis etjotp, jøts ja yja'jty ma ja mejy txøøw'aty Galilea. ³² Jamts jaa'y jadu'uk yiktanimiini pøn wyinaty nat, pøn wyinaty atoojts, ka'ap ja y'øgyajpxy, winets ja yikniimaay jøts ja kyø' ja ttanixajt jøts ja tyiktsø'okt. ³³ Xjats Jesús ja ojts abiky tsoo tyiknijky, ojts ja nadyu'uk tjaway ma ja mayjaa'y jam wyinaty, jøts kyøtsa'jx ja ojts tkudeji jap nat jaa'y tyatskjøtpy, ojts kyø' ja ttsujwyeej jøts jaa'y tyoojts ja ojts tpaajti. ³⁴ Winets ja Jesús chajp'ixy, jøts ojts myøkxejy, xjats wyaañ:

—¡Fata! —mido ayuujk tyijpy: ¡Awa'ats!

³⁵ Winets ja nat jaa'y jatyi ja tyatsk y'awaajch, jøts ja tyoojts nayide'en y'øyyii'ni, xjats ja jade'en kyajpxijky øy, ojts ja yikxon y'awijy. ³⁶ Winets ja Jesús yikxon ojts t'uk'ane'emy jawyeen ja mayjaa'y jøts ja pøn ka'ap ttukmado'odit; ku ja jade'en tniimaay, ne'egi jinaxy ja ojts tniimadya'akti. ³⁷ Xjats ja jade'en ñigyumaap tjawidi, yide'en ja wyandøø:

—Tyum'ødyumpy øy ti; yikmadøøpy nat jaa'y, jøts yik'awijpy uum jaa'y.

8

Ku ja Jesús tyikaay ja ñimaktaxk milbi jaa'y

¹ Winet ets mayjaa'y jam wyinaty t'ø ñamyukyidi, jøts ja kyaajyk ja kya'etti. Xjats ja Jesús tyaa'xyii'ni ja pyabøjkpitøjk, jøts ja tniimaay:

² —Njanch'ayo'ijxpy øts yø jaa'y, kumi tyigøøkxøøwyip øts yø ya xnimenidi, jade'en øts yø ya kujk nmøøtsinaañidi jøts ja kyaaky t'ø kyøjxnidi. ³ Ku øts inet yø ayuu axøøw njakaxt jam tyøjkjotp, jadi'ini net yø muum yjotkøjxnidit tuu'ajy, kumi ja winaagin pøn t'ø choondi jagam et.

⁴ Xjats pyabøjkpitøjk ja ojts y'adsøy, jøts ja ñimaajyøø:

—¿Sudso yø jaa'y ya yjanchka'adyit, pø ka'ats ya pøn chøøni?

⁵ Winets ja Jesús tyiktiiy ja pyabøjkpitøjk, yide'en ja tniimaay:

—¿Winaak tsapkaaky jap xmøødidi?

Winets ja wyandøø:

—Wixujk.

⁶ Xjats Jesús tniimaay ja jaa'y jøts wan t'ixakøxti jam naxkøjxp, winets ja tniixajyii'ni ja tsapkaaky, jøts ja ttamøja'wiyii'ni ja Dios. Xjats ja ojts ttukwa'kxy ja tsapkaaky jøts ja tmoøy ja pyabøjkpitøjk, winets ja ttagamaadyøjkidøø ja jaa'y. ⁷ Jamts winaagin ja mutsk

ajkxu'nk ja wyinaty tmøøt'ajtmidi, ja'ats ja Jesús ojts tkunuu'kxy, jøts pyabøjkpitøjk ja ttaguwa'anijy'i'ñ jøts wan ja jaa'y ja ttagumaagyøxti. ⁸ Xjats ja jaa'y ni'lijtyi kyaagyøjxtøø, ojts yikpøkmuky wixujk kach. ⁹ Jøts ja jaa'y pøn wyinaty tø kyaydi, nimaktaxk milin ja jam wyinaty ñamay'atti. Xjats ja Jesús ja ojts tminawya'kxniyi, ¹⁰ jøts ja tyøjkināa jap barkijøtpy møøt ja pyabøjkpitøjk, jøts ja ñjøkxtøø jam Dalmanutit jaa'y y'etjotp.

Ku ja fariseotøjk t'amidoodøø ja Jesús, jøts ja ttuk'ejxtit ja myilagri'ajtin

¹¹ Winets ja fariseotøjk jam myendøø, jøts ja tminagyajpxøjkidøø ja Jesús. Ja' ja ojts t'amidowdi, jøts ja dios'ajtin tyikwingaxø'økt ya ñaxwiñ, nugo dø'øn jade'en tjot'ejxti. ¹² Xjats Jesús ja tkumøkxajiyi'ñ, jøts ja wya'añ:

—¿Tigøjxp ku jaa'y ya'atpi xøøw ya'atpi jumøjt t'amidowdi jøts yiktuk'ejxtit ja dios'ajtin? Janch meets idø'øn nnøjmi, jøts ku jade'embj jaa'y ni tuk'ojkin kyayiktuk'ejxtit ja dios'ajtin.

¹³ Xjats ja tmatjstuujty, jøts ja tyøjkijy'i'ñ jap byarkijøtpy, jøts ja ñijky jaduktamajñ'ampy jam nøøba'am.

Ja fariseit jaa'y y'ixpøjkin

¹⁴ Nika'ap kyaaky ja wyinaty tø tkondi, tø ja wyinaty tja'dyigøydi, tu'ugyi tsapkaakyu'nk ja wyinaty jap tkonidi jap barkijøtpy. ¹⁵ Xjats ja Jesús tñimaay ja pyabøjkpitøjk:

—Ejxim Herodes, ejxim fariseotøjk lyevaduri xkupøjkid, øyim mñay'ejx'etidit.

¹⁶ Winets ja pyabøjkpitøjk jatyi myadyaktøjkidøø, yide'en ja ñwajynidøø:

—Ja'agøjxp yø jade'en wya'añ ku adøm tsapkaaky tø ngayikmi'iñindi.

¹⁷ Wa'ats Jesús ja tñijawi ti ja wyinaty kyajpxy'ajttip. Ka'ap ja tsapkaaky ja tijy midi ñimadoodip ja pyabøjkpitøjk, ja Herodes ja fariseotøjk ndejint ja y'ixpøjkin ja y'ayuujk tyijpy. Paty ja Jesús yide'en tyiktiy:

—¿Tiku mwa'andi ku mdsapkaaky xijy kya'etti? ¿Ka'anim xnimadowdi, jøts nika'ap xñijawidinim, janch juun mgubajk xmøødidi? ¹⁸ ¿Ka'anim mgø'øm ween xawin'ejxti, jøts ni mdatsk xkadamadoodinim, niwine'enin xkaja'myatsti? ¹⁹ Ku øts ojts tsapkaaky magoxk nyikwa'kxy, jøts ojts nmø'øy ja magoxk milbi jaa'y, ¿winaaq kach ja kaaky windank ojts xpøkmukti?

Xjats ja wyandøø:

—Makmajtsk kach.

²⁰ —¿Jøts mja'myajtstip nayide'en ku øts ojts ja tsapkaaky wixujk nyikwa'kxy, jøts øts ja myaktaxk milbi jaa'y ojts nmø'øy? ¿Jøts winaaq kach ja kaaky windank xpøkmuktøø?

Xjats ja wyandøø:

—Wixujk.

²¹ Winets Jesús ja pyabøjkpitøjk tñimaay:

—Ka'animdam meets idø'øn xja'gyuki. Ja tsapkaaky yø meets ja'ayi mdajotmay'øø'kpy.

Ku ja Jesús tyikwin'ejxwa'kxy tu'uk ja winap jaa'y jam Betsaida

²² Jawaani y'ijty, xjats ja yja'tti jam Betsaida mā ja kajp wyinaty jade'en txøøwi; jamts ja Jesús yiktanimiñ tu'uk ja winap jaa'y, jøts ja ojts yikminuu'kxa'aky, jøts ja tñixajit jøts ja tyiktsø'økt. ²³ Xjats ja jade'en tñixajiyi'ñ kyø'køjxp, jøts ja tyikpidsiimy kajpjtøp. Winets tsujy ja ojts ttawenjaaxy jøts ja tñixajiyi'ñ, xjats ja tyiktiy jøts pøni kujk wyinaty wine'enin t'ixy øy ti. ²⁴ Winets ja winap jaa'y wyin'ejxwa'kxy, jøts wya'añ:

—N'ijxpy øts yø jaa'y ku yø'ødyi, ja ku jade'en kyaxø'økti sã kipyin.

²⁵ Winets ja Jesús jadigojk twinguxajiyi'ñ ja winap jaa'y, jøts ja yikxon tyik'ejxmøkiyi'ñ, ojts ja winap jaa'y ja wyeen y'awa'ach, tum wa'ats ja t'ejxni øy tyii'ji. ²⁶ Xjats Jesús ja tkajxni jam tyøjkwindum, yide'en ja tñimaay:

—Kidi mgajptøki, jøts nipøn jam sã xkanøjmit.

Ku ja Pedro wya'añ jøts ku ja Jesús yja'aji yiknitsokp, ja Cristo

²⁷ Tø dø'øn ja jade'en wyinaty y'ukjaty, xjats ja Jesús ja pyabøjkpitøjk tmøøtsøø'ñ jøts ja ñjøkxti jam Cesarea Filipino. Jade'en ja et xyøøw mā dø'øn ja ñjøkxti. Xjats ja Jesús tuu'ajy ja pyabøjkpitøjk tø tñimaay, jøts ja tyiktiy:

—¿Pønik øts, sã jaa'y wya'andi?

²⁸ Winets ja pyabøjkpitøjk y'adsøøøø, jøts ja wyandøø:

—Winaagin jaa'y wya'andi jøts ku mets Juan Bautista, pømbi nømidip jøts ku mets Elías midi jekyibim yiknija'wip, jøts ku mets Dios kyugajpx'ajtpi midi jekyibim yikniagajpxp yiknimadyakp.

²⁹ Xjats ja kø'øm ja Jesús yiktøøjidøø yide'en:

—Jøts meets, ¿Sã meets m'ukwa'añ, pøn øts idø'øn?

Winets ja Pedro y'adsøøy jøts ja wya'añ:

—Ja yiknitsokpi mets, ja Cristo.

³⁰ Xjats Jesús ja ñimajyidøø jøts ka'ap pøn ttukmado'odit jøts ku ja kyiristi.

Ku ja Jesús kò'òm tnigajpxy jòts ku ja y'oookt

³¹ Xjats ja Jesús tyik'ixpòjktòjkijyii'ñ ja pyabòjkipitòjk, ja' ja tyukmadoow sa ja y'ayo'ombaatt ja Dios, ja naxwii'ñit jaa'y ja myòjkudanaabyi, kò'òm idò'on ja jade'en ñadyijyi. Yide'en ja Jesús ttukmadòoy jòts ku ja mòjaa'dyòjk, ku ja israelit jaa'y tyeetywindsòn, jòts ku ja kajpxwèjpitòjk ja y'ixwetsiyit. Jade'en ja tnimaay ja pyabòjkipitòjk jòts ku ja ja' yik'oogit, tyukmadoow ja' ku ja jade'en y'oookt jòts ku ja kyidigòok xòow pyidsò'òmt jap oo'kpi jutjòtpy ku ja yujjkyòkt. ³² Wà'ats ja ttukmadoogijxy ja pyabòjkipitòjk. Xjats ja Pedro ka'ap t'òyja'wiyii'ñ ku ja wyinaty tò wya'añ kuk ja y'oookt. Ja'agòjxp ja Pedro mòk twingugajpxiyii'ñ ja Jesús. ³³ Xjats ja Jesús wya'k'jimbijty, jòts ja pyabòjkipitòjk ja ojts twin'ixy, xjats ku Pedro miku'jin wyinaty tò kyajpxy, winets Jesús ja twingugajpxiyii'ñ nayide'en, jawaani mòk'ampy ja tnimaay:

—iMets miku', jiwa'ak, majstutk òts! Ka' mets jade'en mwinmay sam ja Dios Teety wwinmayin, jade'en me mwinmay sam oy pòn naxwii'ñit jaa'y.

³⁴ Winets ja Jesús ja pyabòjkipitòjk tyajpxiyii'ñ, tuki'iyi ja tyajxmukijxy ja mayjaa'y jòts ja tnimaay:

—Pòni pòn tsojkin tmòot'ajtp jòts òts ja nja' jade'en xpaduujnit, ka' mibaat kò'òm ñadyunk'atit, ja'ayi ku amumjoojt ñadyamiyoxit ja ayo'on jòts idò'on jade'en tpadu'unt. ³⁵ Pònts kajade'endufinim nay'ejxip, niwindem tkapaaty ja nitsò'ok'ajtin; jòts pòn ø xku'ayo'ombaajtip, ja' idò'on tpaatp ja nitsò'ok'ajtin. ³⁶ ¿Ja ti ja ñiwy'a'ant oy ja jaa'y tjaja'bojkiy ja naxwii'ñ'ajtin jòts ja y'anmija'win ne'egi wyindigòy? ³⁷ Jabi ka'axi mibaat ja ñitso'ok'ajtin ja tkuju'uty. ³⁸ Jòts pòni pòn ø xatsò'odyump, pòni pòn òts n'ògyajpxy n'òy'ayuujk xatsò'odyuujnip ya jaa'y wyinduujy midì jekyip t'ukpadundip ja Dios, ya pojkpì jaa'y wyinduujy, nayide'ents òts ja tsò'odyumbi nòjkx ndatsò'odyuñ ku òts ja Dios Teety kyutujk nmimejnit, ku òts ja ankilis nmòotme'ent pòn tsinaadyip jap tsajjòtpy. Òts idò'on ja naxwii'ñit jaa'y nmòjkudanaabyi'ajtpy.

9

¹ Janch meets idò'on nnòjmi, ja jaa'y ya winaagin tyanidi pòn ka'oooktip kunim ja t'ejxtit tnijawidit ja Dios kyutujk ku ja tpikta'akt mòk'ampy.

Ku ja Jesús adsu'jky tuki'iyi y'atstigajch, amuum chamambòjkijxy

² Tyuduujkxòowip ja Jesús wyinaty jade'en tò wya'añ, xjats ja pyabòjkipitòjk ja nidigòok t'ukwaa'y, ja Pedro ja y'ukwaa'w mòot ja Jacobo jòts mòot ja Juan, jade'en ja ojts tmòotnijky jam kojpkòjxp mà ja Jesús adsu'jky tyigajch, jamts ja pyabòjkipitòjk wyinaty t'ukmòotani. ³ Yikxon wyet ja chamambòjky janch poop ejxim tsap'òò'pkyn, nipòn jaa'y wyet ya jade'en tkayikwa'ach sa dò'on wyet ja pyoobiyii'ñ. ⁴ Winets ja pyabòjkipitòjk t'ejxpattòø ja Elias mòot ja Moisés, jòts ku ja tmòotmadya'akti ja Jesús. ⁵ Xjats ja Pedro tnimaay ja Jesús:

—Windsòn, ityimy'òy'ajtp ku øø nyam'aty! Nyik'òyip øòts ujts'aadyòjk, tu'uk mets mja', tu'uk Moisés yja', jòts Elias yja' tu'uk.

⁶ Tò ja pyabòjkipitòjk wyinaty yjançh'ògidyòjkinidi, ka'ap ja y'ukwinmaa'nbyatnidi sa ja tnòjmidit ja Jesús paty ja Pedro jade'en nugo y'ukwanaa. ⁷ Winets yoots myiiñ mà ja jam wyinaty, ja'ats ja ojts yik'adigòyidi, jòts jap yikmadòoy ja Dios y'ayuujk midì waa'n:

—Ya'at n'U'nk òts idò'on njanchòjky, mimadojidi pòni sa wya'añ.

⁸ Xjats ku ja jatyi y'ejxjò'ktòø, winets ja nipòn tka'ejxpattòø mà ja Jesús jam wyinaty, ja'ayi jam wyinaty nadyu'uk tanaapy.

⁹ Xjats ku ja choonidòø jam kojpkòjxp ku ja kyidàknidi, winets Jesús ja tya'ana'amidòø, jòts ja ka'ap pòn ttamimadya'aktit midì ja wyinaty tò t'ejxti, jaanin ja tmadya'akyo'òdyit kunim ja kò'òm oo'kpi jutjòtpy pyidsò'òmt jadigojk, jaa pòn myòjkudanaabyi'ajtpy ja naxwii'ñit jaa'y. ¹⁰ Xjats ja pyabòjkipitòjk jade'en kò'òmyi t'amaa'tsk'ajttòø, kò'òmyi ja jade'en tkajpxy'atti ti dò'on ja jade'en tyijpy ku ja pyidsò'òmt jap oo'kpi jutjòtpy jadigojk. ¹¹ Xjats ja tyiktòødòø ja Jesús, yide'en ja tnimaadyòø:

—¿Tigòjxp ku ja kajpxwèjpitòjk yide'en wya'andi jòts ku Elias jawyeen mye'ent, jòts ix'oojknim ja yiknitsokpi?

¹² Winets ja Jesús y'adsòoy jòts ja tnimaay:

—Janch me'emp ja Elias jawyeen, ja'ats nòjkx nayide'en tyikajtp ja øgyostumbri midì Dios ojts tpikta'aky. ¿Jòts sa ja Dios kyajpxy wya'añ, sa òts ja nyiknigajpxy pòn mòj kudanaabyi'ajtp, sak njatt? Yide'en ja Dios kyajpxy wya'añ jòts kuk ø n'ayo'ombaat, ka'abik òts ja jaa'y xtsokt, x'ixwetspik òts ja jaa'y. ¹³ Jòts ndukmadòopy meets ixyam ku ja Juan Bautista tò y'atsmiñ, jòts tò kyugajpx'aty nayide'en ejxim Elias, jòts jaa'y ja ojts yjemduñi tyeduñi pòni sa y'anmija'win ja tyimñekti, jajt idò'on ja jade'en sa Dios kyajpxy wyinaty wya'añ.

Ku ja Jesús tyikmòjkijky tu'uk ja mixyu'nk pòn wyinaty ja miku' tò tyatòkyi

¹⁴ Jawaani y'ijty xjats ja Jesús tmøøtja'aty ja nidigøøk ja myigu'uk ma ja pyabøjkpitøjk jam wyinaty tø yjaaktandi, jøts ja t'ejxpattøø ja mayjaa'y ku ja pyabøjkpitøjk jam wyinaty tø yiknabejkinidi; jøts kajpxwejpitøjk ja jam tmøøtnay'øjyidi. ¹⁵ Xjats ku ja Jesús yik'ejxpaajty, winets ja jaa'y niduki'iyi nigyumaap yjajtøø, jatyi ja tñibujtø'ktøø ja Jesús, jøts ja ojts tkajpxpoo'kxti. ¹⁶ Xjats Jesús ja yiktøøjidøø, yide'en ja ñimaa'yidøø:

—¿Sats yø nbabøjkpitøjk xnøjmidi, ti yø møøt mnadyamigajpxidip?

¹⁷ Winets ja mayjaa'y nidu'ugin y'adsøø y jøts ja wyaañ:

—Windsøn, ixya me tø ndanimiñ tu'uk nmajnku'nk pøn ja miku' tmøøt'ajtp, jøts ja' yø kayikajpxip. ¹⁸ Jatyi miku' yø myachi ku yø ma ñiikxy, ja'ats yø yiknaxkidajkip, jamts yø yjanch'a'øøpy jøts yjanchtøtskaaty, jade'en'ampy yø tø yjanchwindigøøñi, ka'ap myøjaaw yø ukteeni. Tø øts yø mbabøjkpitøjk njanøjmidi jøts tyikpidsø'ømdit yø miku' midit øts yø n'u'nk myøøt'ajtpy, jøts ka'ap yø tø myayidi.

¹⁹ Xjats ja Jesús y'adsøø y jøts ja wyaañ:

—Mee kajanchja'wibidi, yø mbøky nugo myikmajadaktip. ¿Ma windemnim meets ja ngajpxy ja n'ayuujk xpabøjkit, jøts windemnim meets yø jade'embid xuktatso'okt ku øts yø ejtp njanchjanigajpx'ity?

²⁰ Winets ja tyikmendøø, xjats ku Jesús ja miku' y'ejxpaajti, winets ja mixy yikxidejtyø'jy møk'ampy, ja miku' ja jøts jade'en tyuñi, xjats ja kyidaay, kawinaak ojk ja kyibejp'awidijty jøts ja yjanch'a'øøpy. ²¹ Winets ja Jesús tyiktiy ja u'nkteety, yide'en ja tñimaa'y:

—¿Windii yø jade'en pyaadyi, windii yø jade'en yjajt'okwā'añ?

Xjats ja u'nkteety wyaañ:

—Jaayip yø pyaajntiy ku yø myutsk'ajty, ²² may ojk ja miku' yø jønjøtpy tø yiktøkiyi, may ojk yø tø yiktøkiyi møj nøøjøtpy, jøts yø jade'en yik'ookwā'añi. Ukwanik sa xu'unt, ayo'ejxk øøts, pudøjkik øøts.

²³ Xjats ja Jesús wyaañ:

—Pøni mjanchja'wip ja Dios, tum'ø y jaa'y pyidsø'ømxiyi ø y tyii'ji pøni ku tjanchjawi ja Dios.

²⁴ Winets ja mixy tyeety møk'ampy wyaañ:

—ñNjanchja'wip øts ja Dios; jøts pudøjkik øts jøts njaakjanchjawit!

²⁵ Xjats ku ja Jesús ojts t'ixy ja mayjaa'y jøts ku ja ñamyuk'adi'ichidi, winets ja møk'ampy twingugajpxiyi'ñ ja miku', yide'en ja tñimaa'y:

—Miku', mets ja jaa'y myik'uu'mpy jøts mets ja jaa'y myiknajtpy, øts nyikutujkpy jøts mbidsø'ømt; majtstu'ut yø mixy, jøts kidi m'uktøjkini jadigojk.

²⁶ Xjats ja miku' møk'ampy chabaagujky, jøts ja mixy ojts møk'ampy yikxidejtyø'ø y, winets miku' ja ojts myajtstu'udyi, jade'en ja yiktaajni ejxim ja jaa'y y'øøky, may ja jaa'y wyanidi jøts ku ja tø y'oo'kni. ²⁷ Xjats Jesús ja ojts twejtsji'iky; jøts ja mixy tyanaagyukyiyi'ñ.

²⁸ Winets ja Jesús tyøjkini tøjkjøtpy, jøts ja pyabøjkpitøjk ja yiktøøjiyøø yide'en:

—¿Tigøjxp ku øøts yø miku' tø ngayikpidsimy?

²⁹ Xjats ja Jesús wyaañ:

—Yø miku' jade'en'ajttip, winet yø pyidsømdit ku ja Dios n'ajot'ajtin jøts ku yø ngu'amaay'ajtin.

Ku ja Jesús tñigajpxy jadigojk jøts ku ja y'ookt

³⁰ Xjats ku ja ojts choondi jam, winets ja ñajxtøø Galilea. Jøts ka'ap Jesús ja pøn ttuknijawiyā'añ ku ja jam wyinaty, ³¹ kumi yide'en ja pyabøjkpitøjk ja wyinaty yik'ixpiky, yide'en ja tñøjmi:

—Øts idø'on nmøjkudanaabyi'ajtpy ja naxwii'ñit jaa'y, jøts meets idø'on nduknijawi sa njatt sa ngubat yā naxwiiñ. Jade'en øts ja jaa'y xkøyakt, ku øts ja mayjaa'y xmatst jøts ø jatyi xyik'ookt; jøts ku jade'en n'uk'ookt, winets øts kyidigøøk xøøw nbidsø'ømt jap oo'kpi jutjøtpy.

³² Xjats ja pyabøjkpitøjk ja ka'ap tñimadowdi ku ja jade'en yiknøjmidi, jøts tsø'jkidip ja' øyik idø'on ja tyiktø'ødit ti jade'en tyijpy.

Pøn idø'on jawaani møj ma Dios ja yjaa'y ja kyutujk ttanitani

³³ Xjats ja Jesús jam tmøøtsøø'ñ ja pyabøjkpitøjk jøts ja yja'tti Capernaum, jade'en ja møj kajp xyøøw ma dø'on ja ojts yja'tti; jøts ku ja tyøjkidøø tu'ugyi tøjkjøtpy, japts ja Jesús pyabøjkpitøjk tyiktiy, yide'en ja tñimaa'y:

—¿Ti meets ukwan ja mgajpxy'ajtpy tuu'ajy?

³⁴ Xjats ja pyabøjkpitøjk amøñi y'amidoodukti, ka'ap ja sa wya'andi, kumi ja' ja jam wyinaty tø tñadyamigajpxyidi pøn pyabøjkpitøjk idø'on ja tyimyjawaani møj pidsømp. ³⁵ Winets ja Jesús y'ixaajky jøts ja tyaajxyiyi'ñ ja ñimajmajtskpi jaa'y pøn ixpøjktip, jøts ja tñimaa'y:

—Pøni pøn namyøjpiktā'akwajnip, wan ja myigu'uk tpuðøki, ø y ti tunk ttu'unt ejxim ja jaa'y pøn ja ñitanaabyi ka'ejtp.

³⁶ Winets ja tñixajiyi'iñ tu'uk ja mutsku'nk jøts ja tpiaktaajky jam agujk'am, jamts ja ojts tsa'anji'iky, jøts ja wyaañ:

³⁷ — Pøni pøn tkupøjkp øy midu unaj'jku'nk øts køjxp, øts ja wyinaty jade'en xkupøjkp, kumi tum øts ja unaj'jk nja'ajtpy; jøts pøni pøn øts idø'øn jade'en wyinaty xkupøjkp, kidi øtsip ja wyinaty nadyu'uk xtyimgyupøkp, nayi kyupøkp ja nøjx pøn ø xkajx.

Ku ja Jesús wyaañ: Adøm ja' nbudøjkibi pøni ka'ap adøm ja xmidsep'ajtyindi

³⁸ Winets ja Juan tñimaay ja Jesús:

— Windsøn, tø øøts ja jaa'y tu'uk n'ixy pøn tyiktump mets mmøk'ajtin, jøts miku' ja ttukmajtstu'uty ja jaa'y, jøts kumi ka'ap ja yik'ijxyi xjats øøts ja tøndukmajtstu'uty jøts ja ka'ap jade'en y'uk'adøtsnit.

³⁹ Winets ja Jesús wyaañ:

— Janch øy midu yø jaa'y tyumpy, kidi xukmajtstu'utti; pøni yø' ja jaa'y tyiktsojpk øts køjxp, sudso øts yø jadigojk xmigajpxigøøgyojmit. ⁴⁰ Pøn adøm xkamidsep'ajtimp, xmidu'ukwa'animp adøm ja'. ⁴¹ Jøts ku pøngapøn ja tsuxk nøø mmo'ojidit tuktsemu'ngin, ku ja ttagyakit øts køjxp, jøts kumi øts meets njaaktyimyjaa'y'ajtnip, wimbejtxiyip tigajtsxiyip ja nøjx jawaani øy, kumi øts idø'øn meets xkristi'ajtp.

Ja' midu yikpøkyajtp

⁴² Øy pøngapøn pøni pøn øts n'unaj'jk nidu'ugin xyikpojpkituujniyip, pøni pøn øts n'unaj'jk nidu'ugin xyiktundigøjyiyip pøn jaty ø xjanchja'widip, ne'egi ja øyik y'ijty jøts paandaak yiktayukwøønt ja jaa'y pøni pøn jade'en adøtsp jøts ja mejjyotp yikuwibepit. ⁴³ Pøni myikpøkyuujnip yø mgø', ne'egi øy ku xkajtspoott jøts mjaakayikpojpkitutit; ne'egi øy jade'en ku mgø' tuktamajñ xmidøkit jap tsajpjøtpy, jøts kidi xmidøki ka'pxy jap miku' ku'py ma jøønyow nijuuni kyapi'ich, ⁴⁴ ma tinø'øk nijuuni kya'øøky. ⁴⁵ Pøni myikpojpkituujnip yø mdeky, ne'egi øy ku xkajtspoott jøts mjaakayikpojpkitutit; ne'egi jade'en paktuk mdøkit jap tsajpjøtpy, jøts kidi myikpikta'aky ka'pxy møøt mdeky jap miku' ku'py, ⁴⁶ ma tinø'øk nijuuni kya'øøky jøts ma jøøni nijuuni kyapi'ich. ⁴⁷ Jøts pøni ku yø mween myikpojpkituniyi, ne'egi øy jøts mnawyenjuudiyit; ne'egi øy jade'en ku windu'uk mdøkit ma Dios kyutujk tñitani ja jaa'dyi, jøts kidi myikpikta'aky miku' ku'py møøt mween ka'pxy, ⁴⁸ ma nijuuni kya'øøky, ma jøøni ejtp tyøøy.

⁴⁹ Niduki'iyi ja Dios yjaa'y nøjxk ayo'ombaaty ya naxwiññ, jøts ku dø'øn jade'en tpaaty t'ixy winets ja nøjxk jawaani øy pyidsømni. Jade'en idø'øn ndejnt n'ukpiktaajkint ejxim ja jiyujk yöxy ku ja kaan ja møøt yiktamiyoxi, jawaani øy ja nøjxk pyidsømni. ⁵⁰ Kaan amuum tyik'øyigyøjxp o ti, nayide'en meets idø'øn ndejnt m'ødyu'unt ku mmigu'uk xukmadø'ot ja Dios yja' sudso y'anmija'win kyawindigø'ødyit. Kuts ka'ap jade'en mdu'undit, tø wyinaty mbidsømni ejxim ja kaanin midu kawa'ats midu katump. Møøt mnamyayidi o pøngapøn.

10

Ku ja Jesús kyajpxwiy jøts kidi amajtsk jaa'y ñawya'kxyidi

¹ Xjats ja Jesús jam chøø'ñ Capernaum, jøts ja ñijky Judea, jøts ku ja jam ñajxy winets ja møj nøø ja ttanajxy midu txøøw'ajtp Jordán. Jøts ja tñiyø'øyi ja kajp midu jam wyinaty tamp jaduktamajñ'ampy, jamts ja jaa'y may'ampy ñamyukojmiyidøø ma ja wyinaty, jøts ja ojts tyik'ixpiky jade'eñim sayim ja wyinaty jekyip tø ttuñ. ² Xjats ja fariseotøjk winaagin tñimendøø ja Jesús jøts ja nugo tkajpxy'ejxwa'andi, yide'en ja tñimadyi pøni øy idø'øn jade'en ku ñiyaa'y ja tmajtstu'utwa'añ ja ñidø'øxy, jade'en ja ojts tyiktøwdi. ³ Xjats ja Jesús y'adsøøy jøts ja wyaañ:

— ¿Sā Moisés yikutujky?

⁴ Winets ja y'adsøøð jøts ja wyandøø:

— Ojts Moisés tyikutuky jøts ja nøky tu'uk kyojt ku ja yaa'dyøjk tmajtstu'utt ja ñidø'øxy.

⁵ Xjats ja Jesús y'adsøøy jøts ja wyaañ:

— Ja'agøjxp ja Moisés jade'en tyikutujky ku mee niwine'enin mgamadøy, ku mee niwine'enin mgaja'gyuki. ⁶ Kumi Dios tyiktso'ondakijxy tuki'iyi ku yaa'dyøjk ku tø'øxyøjk tyiknajtskojy'i'iñ jøts ja jaa'y y'amajtskidit. ⁷ Paty yaa'dyøjk kuwani tmajtstu'utt ja tyeety ja tyaak, jøts ñidø'øxy tu'ugyi tmøøtsøønit nadyu'uk, ⁸ ku jaa'y y'amajtsk'atti ka'ap ja y'uknamajtskinidi, tu'ugyi ja ñamyayi ñabyaajtniyidi. ⁹ Paty ka'ap y'øyi ku jaa'y tyik-nawya'kxiti midu ja Dios tø tyik'amajtski.

¹⁰ Xjats ku ja tyøjkidøø tøjkjøtpy, winets ja pyabøjkpitøjk tyiktøððøø jadigojk midu ja Jesús wyinaty tø tmadya'aky. ¹¹ Nigajpx idø'øn ja Jesús ja', yide'en ja wyaañ:

— Pøni pøn ja ñidø'øxy tmajstutp jøts jadu'uk tmøøt'amajtskigoyimi, ja jawyeen ñidø'øxy idø'øn ja wyinaty kya'ødyumpy jøts ja pyøkyuñ; ¹² jøts ku ja tø'øxyøjk tmajtstu'uty ja ñiyaa'y, jøts ja tmøøt'amajtskimi ja wenk yaa'dyøjk, pøkyump idø'øn ja nayide'en.

Ku ja Jesús tkunuu'kxy ja mutskuna'jk

¹³ Xjats ja jaa'y y'una'jku'nk tyikmendøø, ja' ja tyuknimendøø jøts ja Jesús ja tkønixajt, jøts ja mōjaa'y jade'en yja'attøø jam mōøt ja mutskuna'jk; winets ja pyabøjkpitøjk ja ojts mōk'ampy wyingugajpxiyidi. ¹⁴ Xjats ku ja Jesús ja jade'en ojts t'ixy ja pyabøjkpitøjk, winets ja yjanch'ambijky jøts ja wyaañ:

—Majtstu'tut yø una'jk, wan øts yø xnimendi, kidi xnøjmidi kuts yø xkanime'endit, kumi tum jade'embi jaa'y nøjxx nitanaajy'ip ja Dios kyutujk. ¹⁵ Janch øts idø'øn nwa'añ, pøni pøn tkagupøjkp ja Dios kyutujk midi ja tyanitanaapy ja yjaa'y, niwindem xøøw ja jaa'y ja nøjxx tkadatøki jadigojk pøni ku ja wyinaty jade'en tø tkagupiky ejxim mutsku'nk yikupikyin.

¹⁶ Winets ja tsa'anji'jky ja mutskuna'jk jøts ja ojts tkunuu'kxy, ojts ja kyø' ja ttanixajikxy.

Ja kumeeñ jaa'y

¹⁷ Xjats ku ja yjaakwidijty, winets ja jaa'y ja tu'uk putyi ñimejnøø jøts ja wyinguxanaajyi, yide'en ja ñimaajyøø:

—Mets øyjaa'y yik'ixpøjkpi, ¿ti ø ndu'ump jøts øts n'anmija'win tpaatt ja nitso'ok'ajtin xemikøjxp?

¹⁸ Xjats ja Jesús wyaañ:

—¿Ti jade'en myikwajnip ku øts jade'en xnøjmi jøts ku øts janchtyimy'øyjaa'y? Ka'ap pøn y'øyjaa'y, tu'ugyi Dios y'øyi. ¹⁹ Mnija'wipxi dø'øn ja Dios kyutujk midi nømp: “Kidi mmigu'uk ñiyaa'y ñidø'øxy xpøjksi; kidi myikjaa'y'øøky; kidi mmeech; kidi mmigu'uk xwindaay'aty; windsø'øgi mdeety mdaak.”

²⁰ Xjats ja jaa'y y'adsøøy jøts ja wyaañ:

—Windsøn, jaayip øts yø tuki'iyi nbadundøjkinu ku nmutsk'aty.

²¹ Winets ja Jesús twin'ejxji'jky ja jaa'y amyuyj tsaachyuyj, jøts ja tnimaay:

—Jap jadu'uk midi mjaakabadumpy: nøjxx, tuki'iyi x'atsto'okixy ti jaty jam mmøøt'ajtpy, jøts ja ayooobi jaa'y xabudøkit, winets ja Dios mjotkujk'ajtin mmo'o'ojyit jap tsajjptøpy; nøjxx x'atstuñ midi ndijpy, winets ø xpadsoont.

²² Xjats ku ja jaa'y jade'en tmadøøy, winets ja nugo tkumaa'yiyi'ñ tkudajiyi'ñ, janch ñiyjotmay'oo'kpim ojts ñøjxni, kumi janch kumeeñ jaa'y idø'øn ja wyinaty.

²³ Xjats ja Jesús twin'ejxjø'kijxy ja jaa'y pøn ja jam wyinaty nidanaajy'ip, winets pyabøjkpitøjk ja tnimaay:

—iøy yjanchepi sudso ja kumeeñ jaa'y tkupøjkj ja Dios kyutujk midi yjaa'y ja tyanitanaapy!

²⁴ Xjats ja pyabøjkpitøjk jadi'iñi myondi tyukti ku ja Jesús jade'en wya'añ; winets ja Jesús wyaañ jadigojk:

—U'nk una'jkti, ijanch tymchep sudso ja kumeeñ jaa'y ttatøkidit ja Dios kyutujk, kumi myeeñ ja amuum yikmøjøjkidip! ²⁵ Ne'egi tsojk ñaxt tu'uk ja mōj jiyujk jap xuu'ñ jutjtpy, jøts nigidi tu'uk ja kumeeñ jaa'y tyøkit jade'en ma Dios kyutujk ttanitani ja yjaa'y.

²⁶ Xjats ku ja jade'en tjaaktymadoodøø ku ja Jesús wya'añ, winet ja tymñigyumaap yjajttøø, jøts ja xem yam ñawyajnidøø:

—¿Jøts pønims idø'øn nitso'ok'atp?

²⁷ Xjats ja Jesús y'ejxi'jky, jøts ja wyaañ:

—Ka'ap yø øy pøn jaa'y kø'øm ñankñitsø'ogiyit, ja Dios ja'ayi myøøt'ajtpy ja mōk'ajtin sudso xyiknitsoojkint; ti Dios tkatsepjawi.

²⁸ Winets ja Pedro kyajpxøjkii'ñ jøts ja wyaañ:

—Tø øø tuki'iyi ñmajtstutkixy ja nbikta'aky, jøts ixyam øøts idø'øn jade'en nwidity mets møøt.

²⁹ Xjats ja Jesús y'adsøøy:

—Janch meets idø'øn nnøjmi, pøni pøn tmajstuttip tyøjk, pøn tmajstuttip y'ajch y'uch, jøts chø', ja tyeety ja tyaak, uk ja y'u'nk ñidø'øxy tmajtstu'tuty møøt ja naajx ja kam, pøni pøn jade'en tmajstutp ja pyikta'aky øts køjxp, ja øgyajpxkyøjxp ja ømyadya'akyøjxp, ³⁰ pyaattp ja nøjxx ja tøjx may'ampy, may'ampy ja nøjxx tpaaty y'uch y'ajch, ja tyeety ja tyaak, ja ñaajx ja kyam, øy ja tjaku'ayo'ombaadi øts køjxp; pøni myidanaapy idø'øn ku sa yiktu'unt, winets y'anmija'win ñøjxkt ma Dios. ³¹ Jøts may ja jaa'y Dios nøjxx yik'amutskiyidi, pøn nugo namyøjpkta'ejtip; ja' ne'egi ja Dios kajxa'aky yikpidsø'ømp, pøn yik'ayo'om'ejtp.

Ku ja Jesús tñigajpxy jadigojk jøts ku ja y'oøkt

³² Jam idø'øn ja wyinaty pyatti ma jam ja tuu'pyety midi nøjxkp Jerusalén, ja Jesús wyinaty jawyeen yø'øpy jøts ja pyabøjkpitøjk ix'oojk yø'ødyi. Xjats ja pyabøjkpitøjk ja ñigyumaap tjawidi ku ja Jesús jade'en ñijxxy, jøts janch tsø'jkidip ja'. Winets Jesús ja yjiwa'widøø nimakmajtsk, jøts ja ojts tyukmadoowinibøjkidi jadigojk sa jaty ja wyinaty yjatwa'añ kyubatwa'lgxañ. ³³ Yide'en ja ñimaajyidøø:

—M'ejxtip ku ixyam nbejtyindi jøts nniikxyindi jam Jerusalén ma øts jaa'y xkøyakt, pøn møj kudanaabyi'ajtpy ja naxwii'ñit jaa'y, jøts øts ja israelit jaa'y tyeetywindsøn jam xmatst jøts ja kajpxwejpitøjk, ja'ats tyikutuktij jøts ø n'ookt, jam øts ja xkøyaktit ma ja wenk jaa'y yikutukti møk'ampy. ³⁴ Yikxon ø nyiktaxe'ekt, yikwop yikoxp øts, xniidsujip øts ja jaa'y, jøts øts ja jaa'y xyik'ookt; jøts ku øts wyinaty jade'en tøn'øøky, kyidigøøk xøw øts jadigøjkb nidsø'ømt jap ø'kpi jutjøtpy.

Ku ja Jacobo møøt ja Juan t'amidoodøø ja may'ajtin

³⁵ Xjats ja Jacobo, møøt ja Juan pøn ja Zebedeo myajnk'ajttip, ja' ojts tñimendi ja Jesús jøts ja tñimaadyi:

—Windsøn, ja' øø ndsøjkpy jøts øø xuujnit ja may'ajt, ja' øø n'amidoowampy.

³⁶ Winets ja Jesús tyiktiiyi yide'en:

—¿Ti dø'øn mdsøjktp, ti ø ndu'ump?

³⁷ Xjats ja wyandøø:

—Xmøøtsøøni øøts ku myikutukt, adsow aduuk øøts xyiktsøønit mgutujktaajkjøtpy, jøts øøts ja jaa'y xwindsø'øgit.

³⁸ Winets ja Jesús wyaañ:

—Ka'ap meets yø xnijaw i pø ti mee m'amidøøpy. Ngupøkp øts ja ayo'on jøts pøni sã øts ja jaa'y x'uktu'unt. ¿Jøts meets, mgupøktip meets nayide'en ja ayo'on jøts pøni sã meets ja jaa'y m'uktunit?

³⁹ Xjats ja y'adsoodøø jøts ja wyandøø:

—Ngupøkp øøts, tiku øøts ndejint ngagupøkt.

Winets Jesús ja tñimaay:

—Janch jade'en, mjanchkupøkp meets nayide'en ja ayo'on midi ø ngupøkp, jøts mjanchkupøktip meets nayide'en pøni sã øøts ja jaa'y x'uktu'undit; ⁴⁰ tyimyo' ku meets xmøøtsinaawya'añ adsow aduuk, kidi øtsip meets ja nmo'op, ja Dios Teety ja tyakp jøts ja' ja myo'op pøni pøn ja jade'en tøn'øøky.

⁴¹ Xjats ku ja yjadu'ukpi pyabøjkpitøjk tmadoodøø jade'en, winets ja yjanch'ambøjktøø, jøts ja Jacobo yikmi'ambøjktøø møøt ja Juan. ⁴² Winets ja Jesús pyabøjkpitøjk tyajxmujky, jøts ja tñimaay:

—Yide'en'ampy ja jaa'y wyindsøn'aty pøn Dios kyajpxy tkabadundip, ja'ayi nugo ja jaa'y tyiktuñ, jøts ja tu'ugyi tja'abøjkøxni. ⁴³ Jøts ka' mee nøjcx jade'en mjatti. Wenk meets mja'am i, pøni pøn namyøjpikta'akwajniip, ja' idø'øn jade'en møjtkøp pøni pøn ja myigu'uk twindsø'øjk; ⁴⁴ jøts pøni pøn tsuj windsøn'atwamp, ja' idø'øn windsøndøjk pøni pøn tuki'iyi ja jaa'y jade'en tpuðøjk. ⁴⁵ Ja'agøjxp ø nmiñ jøts ja jaa'y nbudøkit øy ti tunk ndu'unt, kidi ja'ajip øts tønmiñ jøts øts jaa'y øy ti tunk xuujnit, ja' ø tønmiñ jøts øts pøkyjaa'y ngubajtit ja pyøky ku n'ookt winets ja mayjaa'y yikpojkipmaa'kxt. Øts idø'øn ja' myøjkudanaabyi'ajtpy ja naxwii'ñit jaa'y.

Ku ja Jesús tyikwin'ejxwa'kxy ja winap jaa'y pøn txøw'ajtp Bartimeo

⁴⁶ Xjats ja yja'ttøø Jericó. Jøts ku ja Jesús pyabøjkpitøjk jam wyinaty tmøøtpidsimy kajpjoth møøt ja mayjaa'y, winets winap jaa'y ja tu'uk tpatthø pøn txøw'ajtp Bartimeo, ja Timeo y'u'nk, jam ja wyinaty chøøni tuu'am jøts ja tigati tyikmuky. ⁴⁷ Xjats ku ja tñimadøøy jøts ku ja Nazaretit jaa'y jam wyinaty ñaxy midi txøw'ajtp Jesús, winets ja winap jaa'y møk'ampy kyajpxkejky jøts ja wyaañ:

—i'Windsøn'ajtim, rey David y'ap y'u'nk, ayo'ejxk øts!

⁴⁸ Xjats ja mayjaa'y ja møk'ampy wyingugajpxiyøø jøts ja y'amo'ont, ka'ap ja winap jaa'y y'amøñ, ne'egi ja tjaakkyikjinajx'adi'ich, yide'en ja wyaañ:

—i'Mets myimajtsk'ap'ajtip ja møj windsøn David, ayo'ejxk øts!

⁴⁹ Xjats ja Jesús wya'k'øyyi'ñ, jøts ja pyabøjkpitøjk ja tñøjmi:

—Nøjcx x'atswawdi.

Winets ja winap jaa'y y'atsyikwaay, yide'en ja t'atsnimaadyøø:

—Tsojk, pidø'øk, ixam idø'øn myikwaadsøy.

⁵⁰ Xjats ja jaty tñajtswøjy'ñ ja yukwop, wo'onjø'kp inet ja adsu'jky, jøts ja tñinikxy ja Jesús. ⁵¹ Winets Jesús ja yiktøøjøø:

—¿Ti mdsøjkpy, sã me ndu'unt?

Xjats ja winap jaa'y y'adsøøy jøts ja wyaañ:

—Windsøn, ja win'ejxwamp øts.

⁵² Winets ja Jesús ja tñimaay:

—Nøjcxni; tøn me mdsokni kumi tøn me xjanchjawi.

Xjats ja winap jaa'y jaty wyin'ejxwa'kxy, jøts ja tpanijky ja Jesús jam tuu'am.

11

Ku ja Jesús kyajtpøjkijy'iñ Jerusalén

¹ Xjats ku ja jam wyinaty yja'atwanidi Jerusalén, winets ja tyandøø jam Betfagé midi ja kajp Betania wyinaty møøt ñamyiwíngon'aty, ja kajp midi jam wyinaty tandip kojpk ix'am midi txøøw'ajtp Olivos, jamts ja Jesús pyabøjkpitøjk namajtsk tkajxtsøø'ñ. ² Jøts ja tñimaay:

—Nøjkxti ixem ma yø kajpu'nk wingon, jøts ku net jam mja'attit, jamts inet buuru'nk tu'uk kuwiiñ xpaattit midi tsotsnim, midi ka'anim pøn ttatsøøni. Nøjkx x'atmigajidi jøts xwejtsme'endit. ³ Jøts ku pøn myiktøwidit tiku jade'en m'adøø'tsti, jade'en xnøjmidit jøts ku t'anuu'kxw'a'añ nwindson'ajtim, jøts ku ja jatyi tyikwimbejtkojmit.

⁴ Xjats ja pyabøjkpitøjk ñøjkxti, jøts ja buuru'nk ja ojts tjanchpaatti kuwiiñ jam tøk'agøø'm, jam ja tpaatti tuu'am jøts ja tmgajidøø. ⁵ Winets ja jaa'y winaagin tyiktøødøø pøn jam wyinaty, yide'en ja ojts ñii'mxyidi:

—¿Ti mdundip? ¿Tigøjpx ku yø buur xmigajidi?

⁶ Xjats ja pyabøjkpitøjk y'adsøødøø jade'en sa Jesús ja wyinaty tø ñii'mxyidi; winets ja ojts yikmajtsu'utti jøts ja jam choo'ndi. ⁷ Xjats ja jade'en tyiktsø'ondøø ja buur, jøts Jesús ja ojts tñaninøjkxti; winets ja wyet ja ttajiba'andøø ja buur, jøts Jesús ja ttawaa'tspejty ja jiyujk. ⁸ May jaa'y ja wyet ojts tya'apti jam tuu'am, jøts may ujts'aay ja ojts ttu'kxti jøts ja jam nayide'en tpiaktaktoø, jøts ja Jesús jade'en tpaatsowa'andi ejxim møj windsønin. ⁹ Xjats ja niduki'iyi møk'ampy kyajpxkaktøø, jøts ja niduknax wyandøø:

—¡Dios Teety tsajjotpit, kunuu'kx yø windsøn pøn me tø kxexy! ¹⁰ ¡Kunuu'kx yø windsøn midi mgutujk mimejniyip, wan ja tyety'ap David tyikmøjtajki ja kyutujk jadigojk! ¡Kuuyi ja Dios Teety jadu'uk yjaak'øyi!

¹¹ Xjats ja Jesús jade'en tyøjkijy'iñ Jerusalén, jade'en ja yja'jty jam tsaptøjkjotp. Jøts ja ojts t'ejxkixy tuki'iyi ti jaty jam wyinaty ejtp; jøts ku ja ojts jade'en t'uk'ejxkixy, winets ja ñøjkxni jam Betania møøt nimakmajtsk pyabøjkpitøjk, ja'agøjpx ja ojts ñøjkxnidi ku ja et wyinaty tø chuu'ñi.

Ku ja Jesús t'ayo'onmigajpxy ja iigi tsa'anguipy midi ja tyøø'm ka'ejtp

¹² Xjats ku ja Jesús kyimjabom choo'ndøø Betania, winet yuu ja pyaajtøø. ¹³ Jøts ja jagam t'ejxpaajty tu'uk ja iigi kipy midi jam wyinaty janch'aamyøøt; xjats ja ojts tñinijky jøts ja t'ats'ejxw'a'añ pøni jam idøø'n ja tyøø'm. Jøts ku ja ojts t'ixy, ni tu'ugin ja tyøø'm ja tkapaajti, nugo ja wyinaty janch'aay ja ñaxy, kumi ka'anim ja tiempi wyinaty tpaaty ku ja iigi tyøø'mi.

¹⁴ Winets ja Jesús tmgajpxy ja iigi kipy, yide'en ja tñimaay:

—¡Nijjuuni mga'uktøømiñit!

Ku ja Jesús jade'en wya'añ, myadowdi ja pyabøjkpitøjk ja'adi.

Ku ja Jesús twøjpidsoinguixy ja too'kpitøjk jam tsaptøjkjotp

¹⁵ Jawaani y'ijty, xjats ja yja'ttøø jam Jerusalén. Jøts ku ja Jesús tyøjkijy'iñ tsaptøjkjotp, winet ja t'ixwøjpidsoingixy ja jaa'y pøn jap wyinaty too'ktip yajktip, midi jam wyinaty juudyip kajpxtip, tuki'iyi ja t'ixkajxpidsoingixy. Nayi yikpidsøø'm ja jaa'y ja' pøn jam wyinaty meñt tkugondip, tuki'iyi myesi ja yiktejsapwajkojxtøø, jøts nayide'en ja pak too'kpi chinaabyajt yiktejimbajtøjxtøø; ¹⁶ jøts ja Jesús ja jaa'y tka'uktuk'anajxni ja tsaptøjk ku ja jam tigati tjatsømnaxw'a'andi. ¹⁷ Yide'en ja Jesús tñimaay ja jaa'y ku ja yik'ixpijky:

—Yide'en jap nøkyjpxy wya'añ: "Ja' øts ndøjk wya'ant jøts naxwii'ñit jaa'y jap t'ajot'attit ja Dios Teety"; jøts ka'ap meets ja jade'en ti xyiktuñ, maa'tstaajk meets ja' tø xyikwani.

¹⁸ Xjats ku ja jade'en tmadoodøø ja israelit jaa'y tyeetywindsøn møøt ja kajpxwejpitøjk, winets ja t'ixaadyøjkidøø ja taa'y jøts ja ttuku'oogiwy'a'andi, chø'jkidip idøø'n jaa ku ja yjaa'y yikpøjkxniyidit, paty ja jade'en tñidaayiwya'andi kumi tyunnija'winiyip ja mayjaa'y ja wyinaty ku ja janchnigyumaap yik'ixpiky. ¹⁹ Xjats ku ja et chuu'ñaq kyoodsiñaq, winets ja Jesús tmøøtsoo'ñaq ja pyabøjkpitøjk jam møj kajjotp, jøts ja jam ñøjkxti ma ja chøø'nidi.

Ku ja iigi tsa'anguipy tyiijch

²⁰ Xjats ku kyimjabom'ajty, winets ja jam jøpyi ñajxtøø ma ja iigi kipy jam wyinaty tyani, jøts ja ojts t'ejxti ku ja wyinaty tø tyøjtsjø'kni y'aqtsjøtpy. ²¹ Winets ja Pedro ja tja'myejch, jøts ja tñimaay ja Jesús:

—Windsøn, ejx ja iigi kipy tø tyøøtsni midi ojts x'ayo'onmigajpxy.

²² Winets ja Jesús y'adsøøy jøts ja wya'añ:

—Janchjawidi Dios møk'ampy. ²³ Janch meets idøø'n nnøjmi, pøni pøn tñimaapy ya'at kojpk: "Nøjkx mejjotp, jamts mdøkit", pøni ku amumjoojt jade'en mwinmay ku ka'ap mmay mdajy, jøts ku køø'm xjanchjawi ja m'ayuuik pøni sa wyinaty tø mw'a'añ, jatp idøø'n ja jade'en pøni ku wyinaty jade'en ja janchja'win xmøø'taty. ²⁴ Paty mee nnøjmi pøni ti jaty m'amidoodip ja Dios, pøni ti mgu'amidoowidip jøts ku xjøp'ejxtit jade'en, jatpys ja jade'en. ²⁵ Jøts ku mdios'ajot'attit, pøni jam ja mmidsepti, maa'kxukti, jøts Dios Teety nayide'en

mbojkipimaa'kxidit pøn jap tsajppøtpty. ²⁶ Pøni ku ka'ap xmaa'kxukti ja mmigu'uk, nayide'en meets ja Dios Teety mgapojkipimaa'kxiti pøn jap tsajppøtpty.

Ja Jesús myøk'ajtin

²⁷ Xjats ja jade'en jadigojk ñøjktøø jam Jerusalén. Jøts ku ja Jesús jap wyinaty wyidity jap tsaptøjkjøtpty, winets ja jap øjts ñimiñi ja teetywindsøn, ja kajpxwejpitøjk, jøts ja møjaa'dyøjkti pøn ja kutujk jam wyinaty t'adsinaadyip, ²⁸ ja'ats ja øjts yiktiyi, yide'en ja wyandøø:

—¿Pøn jade'en tø mdanigutujk'aty ku jade'en m'adi'ich ya tsaptøjkjøjty? ¿Pøn mets jade'en mgutujkmø'øyi?

²⁹ Xjats ja Jesús y'adsøø y jøts ja wyaañ:

—Nayide'en mee nyiktøøwami; pøni x'adsoowimbejtíp øts inet, winets inet ndukmado'odit pøn øts yø jade'en tø xanigutujk'aty ku øts jade'en n'adi'ich. ³⁰ Ku ja Juan Bautista øjts yiknøbeti, ¿pøn ja øjts tyanigutujk'aty ku ja jade'en y'adijch? ¿Sa mee m'ukwa'añ, Dios ja øjts tyanigutujk'aty jøts ja jade'en y'adø'tst? Adsoojimbejtík øts.

³¹ Winets ja kø'ømyi ñagyajpxkaajkidøø, yide'en ja ñawya'añidi:

—¿Sa njanch'uknimaay'int? Ku net yø njanimaay'int: “Dios ja øjts kyutujkmø'øyi”, yide'en adøm inet yø x'adso'owint: “¿Jøts tigøjpx ku ka'ap xjanchjawidi pøni jade'endam ja'?” ³² Jøts ja jaa'y inet xmi'ambøjkma'ant ku net njawa'anma'ant jøts ku jaa'y ja øjts kyutujkmø'øyi.

Jade'en ja kø'øm ñawyajnidøø, jøts kumi ñija'widip ja jaa'y wyinaty may ku ja Juan ja Dios kyugajpxy'aty, paty ja jade'en chø'jkidøø. ³³ Jøts ja yide'en tñimaadyi ja Jesús:

—Ka'ap øøts ja nnijawi.

Xjats ja Jesús tñimaay ja jaa'y:

—Nayide'en meets ja ka'ap ndukmado'ot pøn øts jade'en xanigutujk'ajtp ku øts jade'en n'adi'ich.

12

Ku ja Jesús tmdyaykpaajty ja ka'ødyumbi

¹ Winets ja Jesús tmgajpxøjkyyi'ñ ja jaa'y ejxpajtin madya'akyøjpx, yide'en ja wyaañ:

—Jaa dø'øn jaa'y wyinaty tu'uk pøn ja uvi tsa'am øjts tteñ kyamjotp; jøts ja yikxon tnagueemy tñabijky, jøts ku ja jade'en t'uktuuñ winets ja tyik'øyyi'ñ tu'uk ja uvi kumdaajk ma ja uvi tsa'am nøø øjts idø'øn ja jade'en tyik'øyi, xjats ja tøjch tu'uk tøjch janch køjpx jam kyamjotp. Kam ejx'etaajk idø'øn ja yik'øyyi'ñ, øjts idø'øn ja jade'en tyik'øgyixy.

'Winets ja tamuky tkyøjknaj ja kyam, tumbi ja øjts ttukmidañ, jøts ja ñøjknxi abiky et. ² Xjats ku ja tiempi tpaajty juuni cha'amy ja uvi tsa'am, winets ja windsøn tkejxy tu'uk ja tyumbi jam ma ja jaa'y ja tsa'amgam jam wyinaty tø tmidandi jøts ja jam t'atstuk'amidoowa'añ ja tsa'am kikujkp midi jam wyinaty ejtp kyamjotp. ³ Xjats ku ja tumbi jam yja'jty, winets ja jatyi yikmajch jøts ja kam ejx'etpi ja øjts chiigyiyi, ka'ap ja ti yikmøø, jadi'ini ja jam wyimbijty. ⁴ Winets ja kugam tkejxy jadu'uk tyumbi nay jam; øjts ja ñijky jøts ja jam nayide'en yiktuuñ, yikxon ja jam øjts tyika'ach, øjts ja chaachi kyubajkiixpy, janchiktsepmigajpx ja jam. ⁵ Xjats ku ja nay jadi'ini wyimbijty, winets ja kugam tjaakejxy jadu'uk tyumbi pøn ja kam ejx'etpi øjts tyik'ookti. Janch namay ja tumbi tmøø'taty jøts ja xymikexy tu'uk jatyi ja tsa'am tsømbi; ja'ats jam øjts ja kam ejx'etpi kya'ødyuñidi, pømbi yikwojpx yikojx, jøts pømbi winaagin oo'ktøø.

⁶ Jamts ja kugam myajnkun'k wyinaty tø tmøø'tañ, tu'ugyi ja t'u'nk'aty, ja'ats ja jam kø'øm myøø'taan, ja'ayi ja yjanchøjky; xjats ja øjts ix'oojk tkeñim, yide'en ja wyaañ: “Yikwindsø'øgip yø kumi øts n'u'nk yø.” ⁷ Jøts ja tumbitøjk pøn jam wyinaty t'eix'ejttip ja tsa'amgam, ka'ap ja jade'en wyandøø jøts ja twindsø'øgidit, t'ixwibejpidsojmidøø ne'egi jinaxy ja ñawya'añidøø: “Ya'at inet ja' pøn kugam'atp; wan tyikpa'øjkyimp jøts adøm yø tsa'amgam nja'bøjknant.” ⁸ Xjats ja jade'en tmajstøø, jøts ja tyik'oo'ktøø, øjts ja ñine'kx ja t'ixwibejpidsojmidøø jam tsa'amgamjotp.

⁹ Jøts, ¿ti tyu'ump ja kugam kø'øm ku ja y'u'nk jade'en y'ø'jky? Kuwani ja kø'øm tñime'ent, winets ja tyikudigøgyøxt ja kam ejx'etpi, jøts ja abikyjaa'y ja t'ixa'att, ja'ats ja myo'op ja cha'amgam.

¹⁰ ¿Ka'anim ja nøky xkajpxidi ma yide'en wya'añ?

Ja tsa' midi ja pojtspi kya'uk'a'ejxidøø,

Ja'ats ne'egi ixyam tø y'ukyikpiktakni pøch kyubajk jøts ja ttamajtsmujkixy ja pøch.

¹¹ Ja Dios Teety idø'øn jade'en tø ttuñ, øy yø nigymaap njaja'wandi.

Jade'en ja Dios kyajpxy wya'añ.

¹² Winet et ja israelit teetyewindsøn tmajtswandøø ja Jesús, ja'agøjpx ku ja wyinaty tø myigajpxyidi jade'en. Jøts kumi chø'jkidip ja mayjaa'y ja wyinaty, paty ja ojts jadi'iñi tmajtstu'utti, jøts ja jade'en choo'nidøø.

Ku yikajpxy'aty ja kugubajt

¹³ Waani y'ijty, xjats ja Jesús winaagin yiktaniguejxy ja fariseotøjk møøt ja Herodes myigu'uk, jøts ja nugo yjot'ejxw'a'ñi, ja' ja nugo chojktip jøts ja kyajpxigø'øty, ja'ats ja yiktani'øønip. ¹⁴ Ojts idø'øn ja Jesús jam yiknimiñ, jøts ja yiknimaay:

—Windsøn, nnija'wip øøts jøts ku mets tiy janch mgajpxy, ku me ka'ap xmøøpikta'aky pøni sa jaty ja jaa'y wya'andi, jøts kumi ka'ap mets pøn x'ejxkapy xka'ejxkapy, mdum'ejxkajpxkijxy mets ja jaa'y, jøts tu'ugyi mets tiy janch xuk'ixpiky ja jaa'y sudso nnøjxin ma Dios, paty øø nyiktøwa'añ: ¿Øy ku øøts ja windsøn César nmiaqt nmigubatt, uk ka'ap? ¿Nmo'op øøts ja meeñ, uk ka'ap?

¹⁵ Xjats kumi ñija'wip ja Jesús wyinat jøts ku nugo yjot'ejxw'a'ñi, winets ja tnimaay:

—¿Tiku ø xjot'ejxti? Yakti tu'uk meeñ, wan ø t'uk'ijxy.

¹⁶ Xjats ja ojts tmo'odi, xjats ku Jesús ja twin'ixy winets ja ojts tyiktty, jøts ja wya'añ:

—¿Pøn ya'at ja wyeen y'aaw, jøts pøn ya'at ja xyøøw ixya kyø'jxa'ay?

Xjats ja y'adsøødøø jøts ja wyandøø:

—César yø' yja'.

¹⁷ Winets Jesús ja tnimaay:

—Mo'odi ja César ja yja' pøni midi ja yja'ajtpy, jøts ja Dios xmo'odit pøni midi ja yja'ajtpy. Jøts ku ja Jesús jade'en wya'añ, winets jaa'y ja ñigyumaap tjá'widøø ku ja jade'en y'adsøøy.

Ku ja jaa'y tyiktøwdi pøni janch idø'øn ja' ku oo'kpi jadigojk jyu'kpyøktit

¹⁸ Xjats ja Jesús ja saduceotøjk ojts ñimiñiyi. Ja' ñimejnyiyi pøn nømdip jøts ku oo'kpi nijuuni kya'ukpidsømmidit jap oo'kpi jutjøtpy; ja'ats ja ojts yikttyi jøts ja ojts ñi'mxyi:

¹⁹ —Windsøn, yide'en ja Moisés ojts tjaadya'ñ tu'uk ja kutujk pøni pønuk tku'oo'kp ja ñidø'øxy, jøts ku ja y'u'nk ja ni tu'uk tkayiktañ, winets ja ku'økytø'øxy tmoøt'amajtskit ja ñiyaa'y oo'kpi myigu'uk midi nadyu'uk jøts ja jade'en yika'axiyit. ²⁰ Jøts ja dø'øn ja jaa'y wyinat niwixujkti, jade'en ja tyukjaa'y'atti. Xjats ja myøjpi jawyeen y'amajtskiy'iñ, jøts ja jatyi tku'ø'jky ja ñidø'øxy, ka'anim ja y'u'nk ja wyinaty tpaatinim. ²¹ Ku dø'øn ja jade'en y'ø'jky, winets ja mutskpi midi ja oo'kpi wyinaty myijidsimy'ajtpy, ja' ojts tmoøt'amajtski ja ku'økytø'øxy, jøts ja nayide'en y'oo'knimøø, ni tu'ugin ja y'u'nk ja tkayiktaañ; nayide'en ja myidigøøkpi yaa'y yjajty. ²² Niduki'yiyi ja tø'øxy ja tyikna'jxkijxy ja yaa'dyøjk niwixujk yaa'y, jøts nipøn ja y'u'nk ja ojts kyadukpaadyi, nipøn ja y'u'nk tkayiktaañ. Xjats ja tø'øxyøjk nayide'en y'oo'knimøø. ²³ Jøts ku ja jadigojk pyidsø'ømdit jap oo'kpi jutjøtpy, ¿pømbi ja tø'øxy nõjx jadigojk tniðø'øxy'aty, kumi tø ja niduki'yiyi t'atsnidø'øxy'ajtkøxti?

²⁴ Xjats ja Jesús y'adsøøy jøts ja wya'añ:

—Ka' mee m'øwyinmay, ja'agøjpx ku xkanijawidi ja Dios kyajpxy, ku xkanijawidi ja Dios myø'ajtin. ²⁵ Ku dø'øn ja oo'kpi nõjx pyidsømdi jadigojk jap oo'kpi jutjøtpy, nipøn nõjx kya'uk'amajtskiñi, nipøn nõjx kya'uktø'øxmyiyø'øñi, nipøn y'u'nk tka'ukyik'amajtskiñit. Jade'en ja tsinaa'yin ja nõjx tyikna'xiti ejxim ankilis pøn tsinaadyip jap tsajjøtpy. ²⁶ ¿Ka'ap meets xnijawí, jøts ku ja Dios kyajpxy wya'añ ku ja oo'kpi pyidsø'ømt jadigojk jap oo'kpi jutjøtpy? ¿Ka'anim ja nõky x'ixpøkti midi ja Moisés ojts tjá'ay, ma ja tniagajpxy sudso Dios ja ojts myigajpxy jam ujts aayjotp? Ku ja ojts ñi'mxyi: “Tum øts xdios'ajttip ja Abraham, ja Isaac jøts ja Jacob.” ²⁷ Kidi oo'kpits ja ñidios'ajtpy, pø ja'axi ja ñidios'ajtpy jøts ja tyikjujky'att øy pøn. Jøts mga'øwyinmaapy meets idø'øn ku xkanchjawidi.

Ja møj kutujk midi ja Dios ñi'ane'empy

²⁸ Xjats winet yja'jty tu'uk ja kajpxwejpitøjk ja myigu'uk midi wyinaty tø tmadøy ku ja Jesús jam jade'en tniagajpxy ja saduceotøjkti, jøts kumi ja wyinaty tnijawí ku ja Jesús wyinaty øy tø y'adsøy, winets ja tyikttyi, yide'en ja tnimaay:

—¿Midi'ibi ja Dios ja kyutujk jawaani møj jøts nmimado'owint?

²⁹ Xjats ja Jesús y'adsøøy jøts ja wya'añ:

—Ja' Dios jawaani møj kyutujk'ajtpy midi wamp yide'en: “Israelit jaa'y, ukmadowdi meets, tu'ugyi ja Dios pøn adøm ndios'ajtindip. ³⁰ Jøts tsokti ja jawaani ejxim niti jade'en xkatsokti, amumjoojt ja xwindsø'øgidit, ja' tu'ugyi mjetmay'attip, ja' tu'ugyi møk m'ajot'attip.” Ya'at idø'øn øgyutujk'ajtp. ³¹ Jøts jap jadu'uk midi ñiñayjade'en møj, yide'en ja wya'añ: “Tsok mmigu'uktøjk, windsø'øgi mmigu'uktøjk, jade'en xtsokt jøts jade'en xwindsø'øgit sa kø'øm mnachøkyi, jøts sa kø'øm mnawyindsø'øgyi.” Ka'ap jadu'uk kutujk te midi jawaani møj sa ya'adindi.

³² Xjats ja kajpxwejpitøjk wya'añ:

—Windsøn, ka' me mgajpxigoy. Tiy janch me mwa'añ jøts ku Dios ja tu'ugyi, ku ka'ap jadu'uk pøn. ³³ Janch me mwa'añ jøts ku Dios amumjoojt ndsojkint, jøts ku ja amumjoojt nwindso'jkint, jøts ku ja tu'ugyi møk n'ajot'ajtint, tyimdy'iguyajpxy jade'en ku nmigu'uk ndsojkint jade'en sa kò'øm mnachøjkjy'i'imp. Ne'egi tyimy'øy yø jade'en ne'egi Dios chøjkpy, jøts ka'ap jadine'en yiktsøky ku jiyujk ku ja ti ndawindsø'jki'int, ku ja ti ndamiyojxin jam altajrkøjpx.

³⁴ Xjats ku ja Jesús ojts t'ixy ja jaa'y ku ja Dios kyajpxy twinmadooji, ku ja yikxon øy tsuj y'adsoojyøø, winets ja tnimaay:

—Tyimyjawaani kya'ity jøts mets ja Dios kyutujk xkupøjkid midy yjaa'y ja tyanitanaapy. Jøts jade'en ka'ap pøn y'uknay'a'ejxiniyi jøts tyiktøø'adøø'tst øy tyii'ji.

¿Janch idø'øn ku ja David t'ap'aty ja Cristo?

³⁵ Jam ja Jesús wyinaty yik'ixpiky tsaptøjkjotp, jamts ja yide'en wyaañ:

—¿Sa dø'øn ja kajpxwejpitøjk wya'andi? ¿Nugo idø'øn tijy pøn ja Dios Teety ya pyiktaajk naxwiiñ jøts wyindsøn'att? ¿Nugo ja møj windsøn David y'ap ja tijy, kidi? ³⁶ Janch jade'en wya'andi, ka'ap idø'øn ja kya'pxyi kumi kò'øm ja David wyaañ ku Espiritu Santo ja ojts y'agajpxiyi, winets ja Dios kyajpxy ja ojts tjaa'ji ma wyaañ yide'en:

Yide'en ja Dios Teety tnimaay ja nwindso'n'ajtim:

“Èxa'ak jøts ø xpudsøønit n'aga'n'ampy, jøts øts yø mmidsep nmimajadakøxt.”

³⁷ ¿Pøni yø' wyindsøn'ajtim, sudso yø ndejint nugo t'ap'att?

Jade'en ja Jesús wyaañ. Janch namay ja jaa'y jam wyinaty, jøts janch jotkujk ja jam wyinaty pyatmadøyi.

Ku ja Jesús ttamigajpxy sa y'adøø'tsti ja jaa'y midy yik'ixpøjkjotp jam tsaptøjkjotp

³⁸ Yide'en ja Jesús wyaañ ku ja jam wyinaty yik'ixpiky:

—Øyim mnay'ejx'etidit, ejxim meets kajpxwejpitøjkin, mnay'ejxniyi pøn ja wyet yøñjawi t'rajidøjtipp ku yø'ødyi, pøn muum tuu'ajy nagyajpxpoo'kxi ttsojktip windsø'øgi winjawi, ³⁹ pøn ja øybi tsinaabyajt ttsojktip jap tsaptøjkjotpy, pøn ja tsinaabyajt twi'ejxtip ku kyaawya'andi, ⁴⁰ jøts ja' ja ku'økytø'øxyøjk pyøjkidip ja myeeñ, jøts ja jaty tku'øø'ndi, ñadyijyi ja øy Dios'ajot'atti. Janch møk ja nøjx tku'ayowidi ku jade'en y'adøø'tsti.

Ku ja ku'økytø'øxy tpiktaajky ja lyimunsi

⁴¹ Tuk'ojk ja Jesús y'ixaajky jap møj tsaptøjkjotpy, jap ja wyinaty chøøni jap kajuun winduypy ma ja jaa'y ja myeeñ tpikta'akti midy ja yojxtip, jap ja t'a'ejxuky ja jaa'y sa jaty jap pøn myeeñ wyinaty tpikta'akti, namay idø'øn ja'adi. ⁴² Winets yja'jty tu'uk ja ku'økytø'øxy pøn wyinaty janch ayoop, pøn wyinaty niti ka'ejtxip. Ja'ats pyujxmeeñ'nk majtsk tkugo'oniyii'ñ jap meeñ abøjk'ii'ñjotpy, tuki'iyi dø'øn ja tpiktaajky midy ja wyinaty myøø't'ajtpy. ⁴³ Winets ja Jesús tyaa'jxiyi'ñ ja pyabøjkpitøjk, jøts ja tnimaay:

—Janch meets idø'øn nnøjmi ku yø ku'økytø'øxy janch ne'egi jawi ndejint ja myeeñ tø tyøxy. Nipøn jaa'y ja myeeñ jade'en tø tkayøxy pøn jaty ja myeeñ tø tja'agonidi jap kajuunjøtpy; ⁴⁴ kumi ja myeeñ windank yø jap nugo tø tpikta'akti; jøts yø tø'øxyøjk øy idø'øn yø ayøy, ne'egi tø yø tpikta'akixy ja ñidsinaajyk midy yø jam myøø't'ajtpy.

13

Ku ja Jesús tnigajpxy jøts ku ja tsaptøjk yjett

¹ Xjats ku ja Jesús pyidsiimy jam møj tsaptøjkjotp, winet ja pyabøjkpitøjk ja tu'uk ñimaajyøø:

—j'windsøn, ejxik mets, ti tsaay yø jade'en jøts ti tøjky yø jade'en!

² Xjats ja Jesús y'adsøoy jøts ja wyaañ:

—¿M'iixpy yø møj tøjky? Ni tu'ugin yø tsaay ja nøjx kyatañ niki'byety. Me'endip ja jaa'y jøts ja nøjx tjaagøxtø tuki'iyi yø tøjky.

Ja ejxa'an midy yik'exp ku wyinaty yikti'dyunwanidi ja naxwii'ñit jaa'y

³ Xjats ja jade'en ñøjktøø jam kojpkøjpx midy txøøw'ajtp Olivos, ja kojpk midy jam wyinaty tsaptøjk awemp tamp. Jamts ja Jesús y'ixaajky, jøts pyabøjkpitøjk ja jam amaa'tsk yiktøø'jyøø, yide'en ja Pedro wyandøø møøt ja Jacobo, møøt ja Juan, jøts møøt ja Andrés:

⁴ —Ja' øø ndsøjkpy jøts øøts xukmado'ot windem idø'øn yø tsaptøjk jade'en yjatt. ¿Ti tiy'ajtin øøts jawyeen n'exp jøts ku dø'øn ja jade'en wyinaty yjatwa'añ?

⁵ Xjats ja Jesús y'adsøoy jøts ja wyaañ:

—Øyim mnay'ejx'etidit, ejxim mee pøn mwini'øø'niyi. ⁶ Kumi may jaa'y nøjx myendi jøts øts ja x'adunaxtit, jøts ja ñøø'mdit: “Cristo øts”, mayjaa'y ja jade'en wyindaay'attip.

⁷ Jøts ku meets ja tsep øy ma xnimado'ot ku ja tsep wyingoni, kidi mdsø'øgidi kumi jatp idø'øn ja jade'en, ka'ap ja ñaxt jøts ka'ap ja' tiidyu'unin xøøwi. ⁸ Kumi ja møj ja

mutsk ja kajp nøjx cheptundi xem yam, windsøndøjk ñaḡibidø'ogidit pøn jaty yikutujktip ya naxwiiḡ; maawyeen ja ujn nøjx ḡaxy, me'emp ja yuu, may'ampy ja jaa'y nøjx ja myigu'uk tmidsepøkti a'ø'y'ampy pøn ja nugo tyikma'attip. Jøts ku dø'øn ja jade'en yjatt tso'ondakpnim idø'øn ja ayo'on wyinaty jade'en.

⁹ Jøts øyim mnay'ejx'etidit; kumi myikøyakp meets ma kuduntøkjk yikutukti, jøts mee nøjx myiktsiiky myikwøpy jap tsaptøkjtøpy. Mwinguwa'agip mee nøjx ja møj windsøndøjk; øts meets jap xkunøjkxp jøts ja windsøndøjk myikmadya'agidit, xjats meets idø'øn ja nja' xnigubojkit. ¹⁰ Namga'anim ja tiidyu'unin xøøw tpaaty ku ja øgyajpxy ku ja ømyadya'aky øy magajp yikajpxwa'kxt. ¹¹ Jøts ku jade'en ja kudunk øy madsoo myik-tawinguwawidit, kidi xkumayidi xkudajidi sudso x'adsojmbettit. Jade'en idø'øn mwā'andit pøni sa Espiritu Santo winet myik'ayukpaadyidi; kidi meedsip kø'øm mgajpxp, ja Espiritu Santo meets m'agajpxiyip. ¹² May ja jaa'y ttukmigā'axwa'kxy ḡagyøyakidit jøts y'ooktit, may ja u'nkteety ja y'una'jk nøjx tmidsepøkti jøts ja tkøyaktit, nayide'en ja una'jk nøjx tmidsepøkti ja tyeety ja tyaak kunim o'jkin ja ttukpaattit kø'øm. ¹³ Jøts mdumidsep'attip meets ja jaa'y ja'agøjpx ku meets øts xjanchjaw; jøts pøni pøn ja ayo'on jade'en tmidanaapy kunim y'ookt, ja' idø'øn nøjx nitso'ok'ajtp.

¹⁴ Jade'en ja Dios kyugajpxy Daniel tjaay tu'uk ja nøky ma ja ojts tñigajpxy midī ja jaa'y tyikma'atp, jøts ku meets ja jade'en x'ext ku ja ma tø yikpikta'aky ma ja kyapaat'atyī —pøni pøn ya'at nøkyajpxy, wan tja'gyuki—, jøts pøni pøn jam Judea tsinaadyip wan tkaknøjkxti jam kojpkjotp. ¹⁵ Jøts pøni jam wyinaty tø pyety tøjøkøjpx ja'abi xøøw, jøts ku ja wyinakt ka'ap ja yjaaktyim'yatstøkit jap tøjkjøtpy jøts ja tjaakyikpidsø'ømt øy ti, ne'egi tø'øp ja' ku ja jadi'iḡi yjaaka'akt; ¹⁶ jøts pøni pøn jam wyinaty kyamjotp, ka'ap ja y'ukwimbejtnit jam tøjøk windum jøts ja wyet ja tjaak'atswetst. ¹⁷ iTi yjanch'ayøøy ja tø'øxyøjk pøn wyinaty jøtpyti, pøn jam wyinaty myutsku'nk tmøøt'ajttip ja'abi xøøw! ¹⁸ Ajot'att amidowdi ja Dios jøts kidi yja'aty ja tiempi winet et ku ja et wyinaty xyuxy, jøts kidi ja'abi xøøw mga'akti; ¹⁹ kumi ja dø'øn nøjx ja møk ayo'on tyuḡiyi midī ka'anim yik'ixy nijuuni wine'en ḡaxy kujk ja tiempi jaayip ku Dios tyiktso'ondaajky yø naxwii'ḡit, nika'ap nøjx jaduk'uk ja ayo'on jade'en yik'ixy sa ja'ajin midī idø'øn me'emp. ²⁰ Jøts ku Dios Teety ja jeexyip tø tka'agajpxuky kon ja ayo'on, ti pøn xijy jade'en nitso'ok'atp; jøts ja'agøjpx Dios Teety ja tø tyikøḡ ku ja tso'ky ja yjaa'y pøn ja tø twiwich.

²¹ Pøni pøn mdukmadojidip, pøni pøn mnimaajyidip: “Ejxti, ixya dø'øn ja Cristo”, uk ku myiknøjmidit “Ejxti, ixem ja Cristo tyani”, kidi xmibøkti. ²² Ja' idø'øn nøjx jade'en wandip pøn ḡadyiyi jade'en sa Cristo sa ja Dios kyugajpxy, pøn ja miku' myøk'ajtin nøjx tyiktuujnidip jøts ja nayide'en ttu'unt sa Diosin, yjawn'øø'mbaatwa'amp ja nøjx pøn ø tø nwiwich. ²³ Jøts nay'ejx'etidit meets, nayjøp'ejxidi jøts kidi mwindaay'atyidi ja miku'; patki'jyi meets yø yam ndukmadoy.

Sa mye'ent ja naxwii'ḡit jaa'y myøjkudanaabyi

²⁴ Ku dø'øn ja tiempi ḡaxt ma et ja ayo'on tyuniyit, winet ja xøøw y'ookt, winet ja po' y'ookt, jøts ja ka'ap y'uk'andit, ²⁵ ka'agøjpx yø maadsa' jam tsajpwemp, jøts naxp ja ujn jam tsajpwemp. ²⁶ Xjats t'ejxtit ja naxwii'ḡit jaa'y ja myøjkudanaabyi ku ja kyutujk tmime'ent møk'ajtingøjpx yoots agujkp. ²⁷ Winets øts ja n'ankilis ngajxwa'kxt, ja'ats øts ja njaa'y xwaamujkip pøn øts tø nwiwetsti øy madsoo, yikwaaamuktup ja' øy ja wyinaty ma tyimyjatsøøndi.

²⁸ Uk patmadoidik øts ja n'ixpøjkin: Ku ja iigi kipy y'awaj y'u'nk'aty jøts ku ja kujk xyimumbøjkni, jade'en yiknijawi ja et jøts ku y'anda'akwani. ²⁹ Nayide'en idø'øn ja n'ukpiktaajkint sa ja ayo'on nøjx ḡaxy; jøts ku ja jade'en x'ejxtit, jade'ents meets ja xnijawidit jøts ku øts wyinaty nmenwani. ³⁰ Janch meets idø'øn nnøjmi, jatp idø'øn ja jade'en namga'anim jaa'y wyinaty y'ookti. ³¹ Najpx yø naajx yø tsajp y'ity, jøts niwindem øts n'ayuujk kyanaxy.

³² Ka'ap ja et ja xøøw yiknijawi pøni juuni dø'øn ja jade'en yjatt, nipøn ja tkanijawi, ni ankilis ja tkanijawi, jøts ni Dios U'nk ja tkanijawi. Ja Dios Teety ja tu'ugyi tñija'wip.

³³ Jøts nayjøp'ejxidi meets ejtp, ejtp ja Dios x'ajot'attit kumi ka'ap meets ja xnijawi pøni juuni øts wyinaty nwimbejtkojmit. ³⁴ Jade'en idø'øn ja ndejint n'ukpiktaajkint ejxim ja jaa'y midī nøjx jagam widejtpi, jøts ku ja chøøḡ y'uk'ane'empy ja tumbi ja', tu'uk jaty tyumbi ja t'uktunkmø'øy jøts y'ukpiktakpy tøj adinaabyi ja tu'uk, pøn t'ejx'etp ja tøj. ³⁵ Jøts ejtp idø'øn mjøp'ejxtit, kumi ka'ap meets ja xnijawi pøni juuni yja'att ja mwindsøn midī kudøjk'ajtp, jotmøn ja yja'aty ux, uk jotmøn ja yja'aty tsuu'm, jotmøn ja yja'aty ku tsapni'aaw y'ayajxnidi, uk jotmøn ja yja'aty jøpkyoots; ³⁶ ka' ti nnija'win pøni juuni ja yja'att, kuts meets ja jotmøn mmaagubaadyit yam meets jap wyinaty mmaa'y. ³⁷ Midī mee ndukmadøøpy, niduki'iyi øts idø'øn ja jaa'y jade'en nnøjmi jøts tjøp'ejx'ettit.

14

Ku ja Jesús yikajpxy'aty jøts ja yikmatst

¹ Ja majtsk xøow wyinaty kya'ity jøts ja paski xøow tpaatt ku ja jaa'y tkaydi ja tsapkaaky jadi'iñi midì ja levaduri tkamøøt'ajtp. Winet et idø'on ja teetywindsøn møøt ja kajpxwejpitøjk t'ix'a'adi ja taay ja winmaa'ñ sudso ja tjadyimy'ukmatstìt ja Jesús awin'øøni'ampy, jøts ja tyik'ooktit. ² Xjats ja yide'en kø'øm ñawyajniðøø:

—Ka'ap ja jade'en y'ø'y'att ku ja nmajtsint xøjøøjty, tsojk ja jaa'y jade'en xem yam pyidø'øktit jøts adøm ja sagasa xu'unindit.

Ku ja Jesús yiktagutajmji'iky ja pa'akxuu'kpi

³ Jam ja Jesús wyinaty ma ja kajp txøow'aty Betania, jam ja wyinaty tyøk'ayø'y Simón wyindum, ja jaa'y pøn wyinaty axøø'kpm putsp; jam ja Jesús wyinaty twindsøøni ja mesi ku tø'øxyøjk tu'uk tmija'jty ja poop tsaadu'jts midì wyinaty tmøøt'ajtp ja aceite midì janch pa'akxuu'kp, jøts midì janch tsowi to'jkip. Ja'ats ja tø'øxyøjk ojts tkupu'udu'uty, jøts ja Jesús kyubajk ja ojts ttanitajmijy. ⁴ Winets ja jaa'y y'ambøjktøø pøn jam wyinaty winaa'gindi, yide'en ja ojts ñawy'a'añidi:

—¿Tigø'jpx ku yø pa'akxuu'kpi jade'en nugo tø wyindigø'y? ⁵ Tø yø jeexyip ne'egi yiktøøky tigøøk magø'pxy denarios, jøts ayooði jaa'y ja jeexyip ja meen yiktabudøki.

Jøts ja tjanchmy'i'ambøjktøø ja tø'øxyøjk.

⁶ Winets Jesús ja ojts ñi'i'mxyidi:

—Majtsu'utti; ¿ti yø mdamigajpxtip? Øts yø jade'en tø x'ødyuñ. ⁷ Kumi ejtp meets ayooði jaa'y xpaatt x'ext, jøts ødyundi meets ja' pøni juuni meets ja kø'øm xmay'atwa'añ; jøts kidi xjöp'ejxti jøts øts meets ejtp xpaatt x'ext. ⁸ Tø øts idø'on yø tø'øxyøjk jade'en xuñ pøni sa øts idø'on yø xamidsøkyin; tø øts ja pa'akxuu'kpi yø xanitemy kumi x'ookjøp'ejxnip øts idø'on ja', paty idø'on xyik'øø'y'iñi xyikpaajitiñi kumi wingonip øts ja n'o'jkin. ⁹ Janch meets idø'on nnøjmi, ku øy madsoo yikajpxwa'kxt ja øgyajpxy ja ømyadya'aky yä naxwiññ, nayide'en yø øy madsoo yiknimadya'akt ku øts yø tø'øxyøjk jade'en tø xmay'aty, yikja'myatsp yø øy juuni ku yiknimadya'akt.

Ku ja Judas ñay'awajniyi jøts ja tkøoyakt ja Jesús

¹⁰ Winets ja Judas Iscariote chøø'ñ pøn ja Jesús pyabøjkpitøjk wyinaty møøt ñimajtsk'aty, jøts ja ojts tniñikxy ja teetywindsøn, ja'ats ja møøt tkajpxy'ajty jøts ku ja tkøoyakt ja Jesús. ¹¹ Xjats ku ja jade'en tmadoodøø, winets ja jyanchxondaktøø, jøts ja Judas ja meen jaty; yiktami'awa'aniyi'iñ. Ja'agø'jxpts ja Judas t'ixaa'y ja taay ja winmaa'ñ juuni et ja t'ukøoyakt ja wyindsøn.

Ku ja nwindson'ajtm yjaq'a'ux'ajtni møøt ja pyabøjkpitøjk

¹² Xjats ku ja xøow tpaajty midì ja israelit jaa'y yjanch'amaay'ajttip, ku chapkaaky ja jadi'iñi tkaydi midì levaduri tkamøøt'ajtp, ja'abi xøow idø'on wyinaty tø tpaaty jøts ku ja xøow midukxøow tyuñi, ja' ja tyejtip paski, ja'abi xøow idø'on ja tyukni'o'jkidip ja borreegi maxu'unlk, paty ja pabøjkpitøjk winet et tyiktøøðøø ja Jesús jøts ja tñimaadyøø:

—¿Ma øøts ja paski a'ux nyik'awext jøts ni'amuki n'a'ux'ajttidit?

¹³ Xjats ja Jesús ja pyabøjkpitøjk namajtsk tkajxtsøø'ñ, yide'en ja t'ukni'maay:

—Nøjkxti jam møj kajpjtøp, jamts inet jaa'y tu'uk x'ejxpaattit pøn jam wyinaty tsiy tyanigo'onip, ja'ats mbanøjkxtip, ¹⁴ jøts pøni ma ja yja'aty, japts ja kudøjk xnøjmidit: “Yide'en ja windsøn wya'añ: ¿Mak idø'on ja tøjkjoojt, mak idø'on ja pyabøjkpitøjk ja tmøøtka'aty tmøøt'uukt, mak idø'on paski a'ux ja tka'adyit?” ¹⁵ Winets meets inet ja myiktuk'ext tu'uk ja tøjkjoojt jap nipat tøjkiñxy midì jap a'ejxi abaadi ejtnip; japts meets ja jii'kxy xyik'øyidit midì njøø'kxindip.

¹⁶ Xjats ja pyabøjkpitøjk namajtsk ñjøjkxtøø jøts ja ojts yja'atti jam møj kajpjtøp, jamts ja jade'en tjanchpaattøø sa Jesús ja wyinaty tø tyukmadøyidi, jøts ja jam tyik'øyidøø ja paski a'ux, winets ja wyimbejtøø ma choo'ndøø.

¹⁷ Xjats ku ja et kyoodsiyi'iñ, winets ja Jesús ja pyabøjkpitøjk nimajtsk jam tmøøtja'jty. ¹⁸ Jøts ku ja twinguwa'atsidøø ja kyaabyajt, kuts ja jam wyinaty kyaañidi, winets ja Jesús ja pyabøjkpitøjk tñimaay:

—Janch meets idø'on nnøjmi jøts ku ja ixyam nidu'ugin nmøøtkay pøn øts inet amaa'tsk'ampy xkøyakp.

¹⁹ Xjats ja pyabøjkpitøjk yjanchjotmay'oo'kpøjktøø, jøts ja nidu'uk jaty tyiktøøðøø:

—¿Wan ja ndejint y'øtsi?

Nayide'en jadu'uk wyamøø:

—¿Øts ndejint jade'en adøøtsp?

²⁰ Winets ja Jesús y'adsøøy jøts ja wyaañ:

—Tu'ugyi ja' pøn øts idø'øn jade'en xu'ump, jøts ka'ap ja yjagami, ixya adøm idø'øn ja nmøø't'a'ux'ajtindi, nidu'ugin meets jade'en xunwə'añ. ²¹ Jade'ents idø'øn yjatt ja naxwii'ñit jaa'y myøjkudanaabyi sam ja Dios kyajpxy wya'añin; jøts iti ja jaa'y yjanch'ayøø y pøn øts jade'en xkøaykp amaa'tsk! Tø ja jeexyip ne'egi tyiy ku jeexyip kyidyimgye'exy.

²² Ku dø'øn ja jade'en ixam wyinaty kyaydi, winets ja Jesús tñixajiyi'ñ tu'uk ja tsapkaaky, jøts ja ttamøja'wiyi'ñ ja Dios Teety, xjats ku ja t'aduikpajky, winets ja tmøø y ja pyabøjkpitøjk, yide'en ja wya'añ:

—Kaydi, yə'at øts idø'øn ñamyayi nne'kx'ajtpy.

²³ Xjats ja nayide'en t'adam'ujch tu'uk ja uujk'i'ñ, jøts ku ttamøja'wiyi'ñ ja Dios Teety, winets ja ttuk'uk'abidsimy ja pyabøjkpitøjk midi ja wyinaty tø t'adami jap uujk'i'ñjøtpy, niduki'iyi ja t'uktamujktøø. ²⁴ Yide'en Jesús ja ojts ñi'mxyidi:

—Yø øts idø'øn ñamyayi nni'jpy'ajtpy midi widsu'ump widaxp øts nnikøjpx øts ngubajkp ku nyikpikta'akt jam kruskøjpx. Ja'ats may jaa'y y'ajot'attip jøts ja ñitso'ok'attit. Jade'en'ampy idø'øn ja Dios Teety tyik'adukwa'añ ja wyanda'aky sam idø'øn ja ttami'awa'anii'ñ ja nitso'ok'ajtin. ²⁵ Janch meets idø'øn nnøjmi, jøts ku ka'ap n'uk'uknit yø vino, jaanim øts yø nøjcx n'uuky jadigojk ku Dios kyutujk yja'att, ku kyutujk ja ttanitanit ja yja'a'y.

Ku ja Jesús kø'øm tñigajpxy jøts ku Pedro ja kyu'øøniyt

²⁶ Xjats ku ja t'øøgjxtøø ja Dios kyajpxy, winets ja ñjōjxtøø jam kojpkøjpx midi txøøw'ajtp Olivos. ²⁷ Jøts ja Jesús pyabøjkpitøjk tñimaay:

—Niduki'iyi meets inet xatsø'ødyu'unt ixyamgoots; kumi yide'en Dios kyajpxy wya'añ: "Yikøaykp ja borreegi ejxpi jøts ja y'oook, jøts ja borreegi jadi'iñi kyaakwa'kxnidit." ²⁸ Jøts ku ø nbidsø'ømt jadigojk jap oo'kpi jutjøtpy, winets ø nnøjcxjawenyit jam Galilea, jamts mee xpaatt.

²⁹ Xjats ja Pedro tñimaay ja Jesús:

—Øy mets mbabøjkpitøjk niduki'iyi mjadatsø'ødyu'unt, nijuuni me ngadatsø'ødyuñ.

³⁰ Winets Jesús ja ñimaajyøø:

—Janch mets idø'øn nnøjmi jøts ku yamgoots inet mnø'ømt ku me ka'ap x'ijxy'aty, ka'anim tsäpni'aaw wyinaty myajtsk'aya'axy ku mets inet tigøøk ojk mwa'ant jade'en jøts ku me ka'ap xñijawi.

³¹ Xjats ja Pedro møk'ampy tyimwyindani ja Jesús, yide'en ja tñimaay:

—Nja'øøky me møøt, nijuuni øts jade'en ngawa'ant.

Tum jade'en ja yjadu'ukpi pabøjkpitøjk wyandøø sam ja Pedro wya'añ.

Ku ja Jesús t'ajot'ajty ja Dios Teety jam Getsemani

³² Xjats ja yja'ttøø ma ja et txøøw'aty Getsemani, jamts ja Jesús pyabøjkpitøjk tñimaay:

—Yə tsøøniidi, wan ø t'ats'ajot'aty ja Dios Teety.

³³ Winets ja t'ukwaay ja Pedro, ja Jacobo, jøts ja Juan, jøts ja ojts tmøøtnijky, xjats ja Jesús yjantyimchø'jkii'ñ, ka'ap ja y'ukwinmaa'nbyatni, ja'agøjpx ku ja y'ayo'on wyingøñ. ³⁴ Jøts pyabøjkpitøjk ja tñimaay:

—Janch tyimyjotmay'oo'kp øts, øy øts yø yjawi jadi'iñi ngu'oogit. Awejxti yə ejxim mma'oo'knidi, wijy m'ettit.

³⁵ Xjats ja Jesús jawaani yjaaknajtysø'øyiyi'ñ, japts ja ojts ñagyuxendya'agiyi, jøts Dios Teety ja ojts t'amidøø jøts ja jade'en kidi tyim'yayo'ombaaty sə dø'øn ja wyinaty yjatwa'añ ja'abi xøøw. ³⁶ Yide'en ja wya'añ ku dø'øn ja ojts dios'ajot'aty:

—Mets Teety, øyik jade'en xjanchkayikjatt, jøts øts kidi jadine'en ayo'on ndyimbaaaty; øy idø'øn kyidyimjade'eni sam ø ndyimyjatsøkyin, jade'en øts idø'øn ngupøkt pøni sə me xamidsøky.

³⁷ Ku ja jade'en wya'añ, xjats pyabøjkpitøjk ja tñimiiñ, maadip ja jap wyinaty ku ja ojts tpaaty; winets ja tñimaay ja Pedro:

—Simón, ztø me ma'oo'kni? z'Niwine'en me waani tø mgawijy'ity?

³⁸ Wejti kajti jøts ja Dios x'ajot'attit, nay'ejx'etidi jøts kidi mmimajada'agidi ja ayo'on midi wingomp. Janch øts idø'øn nwa'añ ku ja winmaa'ñ janchja'ødyunwa'añ, ja ne'kxts jaay ja ka'øybi tumbi amutsk'ejxiyip.

³⁹ Xjats ja ñjōkxojmøø Dios Teety ajot'ajtpi, nayide'en ja ojts wyangojmi sə ja wyinaty jawyeen tø wya'añ. ⁴⁰ Winets ja myengojmøø ma pyabøjkpitøjk ja jam, maagojmidip ja wyinaty ku ja tpaajty, kumi janchmaa'y'oo'ktip ja'. ⁴¹ Jøts ku ja tigøøk ojk ojts t'ixy ja pyabøjkpitøjk, jaanims ja tñimaay:

—Tøts inet, maanidi poo'kxnidi. Wan jade'en tjaty, tø dø'øn tyimbyaaty jøts yikøaykt ja naxwii'ñit jaa'y myøjkudanaabyi. ⁴² Pidø'økti, niwejti, wan tjaa'myindi; ixa ja ixyam wyingøñ pøn øts inet xkøaykp.

Ku ja Jesús yikmajch

⁴³ Nay jamnim ja Jesús wyinaty jade'en wya'añ ku ja Judas yja'jty, pøn ja pyabøjkpitøjk wyinaty møøt ñimajmajska'atti, ja'ats ja mayjaa'y jam tmøøtja'jt tsujx møøt jøts kip-kyapidi. Ja teetywindsøn idø'on ja wyinaty tø kyexyidi, møøt ja kajpxwejpitøjk, jøts møøt ja møjaa'dyøjkti. ⁴⁴ Yide'en idø'on ja Judas wyinaty tø wya'añ jøts ja tu'uk tpikta'akt ja ejxa'anin midì ja y'ejxtip ku ja tkøyakt ja Jesús, yide'en ja wyinaty tø wya'añ:

—Pøni pøn øts inet ndsu'lkxpy, ja' idø'on ja wyinaty; ja'ats idø'on mmatstip, jøts ja xyiknøjxtit ta'tspiky'ampy.

⁴⁵ Xjats ku dø'on ja jam jade'en yja'jty, winets ja twinguwa'jkiyii'n ja Jesús, yide'en ja tnimaay:

—Øts, windsøn, memp.

Jøts ja ojts jade'en tssu'lkxy. ⁴⁶ Xjats ja Jesús yiknaxajiyii'n, jøts ja jade'en yikmajch.

⁴⁷ Jøts ja jaa'y pøn ja Jesús jam wyinaty myøøt'ajtpy, ja' tsujx tu'uk tñaxajiyii'n jøts ja ttaxikja'tstuupty ja teetywindsøn tyumbi, ojts ja tyatsk ja tyikwinajki. ⁴⁸ Winets ja Jesús tnimaay ja jaa'y pøn ja wyinaty tø myachi.

—¿Ti mee x'ejxni ku xanimenidi ja kipy jøts ja tsujx? ¿Ti mee x'ejxni, maa'tspi, ku meets jade'en xmatswa'añ? ⁴⁹ Jabom jabom meets jam y'ijty nyik'ixpiky tsaptøjkjotp, ¿ti kuts meets jam xkamajch? Paty idø'on ya'at icyam jade'en yjaty kumi Dios kyajpxy jade'en wamp, ¿sudsø'ampy idø'on ja kyatø'ot?

⁵⁰ Winets ja pyabøjkpitøjk tmatstuttøø nadyu'uk ja wyindsøn Jesús, jøts ja ojts jadi'iñi y'agakpajknidi.

Ja una'jk jaa'y pøn jadi'iñi kaktigøø

⁵¹ Jamts ja Jesús wyinaty pyayø'øyi tu'uk ja una'jk jaa'y pøn ja poop wet wyinaty tyukwop'ajtp, ja'ats ja yikmach; ⁵² winets ja wyet ja tmatstuupty, jøts ja jadi'iñi niwa'ats kyejky.

Ku ja Jesús yikwaanijxxy jam kutujktaajkjotp

⁵³ Xjats ja Jesús yiknajtswa'awiyii'n jam møj windsøn wyindum pøn ja teety windsøn'ajtip, jam idø'on ja windsøndøjk ñamyujkøjxidøø møøt ja møjaa'dyøjkti. ⁵⁴ Jagam idø'on ja Pedro tpayø'øyi ja wyindsøn ku ja yiknajtswa'awiyii'n jam windsøn kyutujktaajk agø'øm, jade'en ja tpaja'jty, jamts ja Pedro tmøøt'ixaajky ja tajk, ja' ja jam myøøtjo'kxpjiky ma ja jøøn jam wyinaty tø myøji.

⁵⁵ Jøts ja teetywindsøndøjk møøt tuki'iyi ja kutujk adsinaabyidi t'ixaadyøø tu'uk ja pøky, jade'en ja t'ixaadyøø ja pøky jøts ja tuku'oogiwya'andi ja Jesús; xjats ja ñiti tkapattøø. ⁵⁶ Kumi øy ja tigati ttaniwambatti jøts ja jade'en xem yam kyanabyaadyidi ja y'ayuujk. ⁵⁷ Winaagin pyidø'økti møk'ampy jøts ja nugo tni'øøniidi øy ja yjagajade'eni, yide'en winaagin wyandøø:

⁵⁸ —Tø øøts yø nmadøy ku yø yide'en wya'añ: “Nyikida'ap øts yø tsaptøjk midì yø jaa'y tø tyik'øyiidi, jøts øts kyidigøøk xøøw jadu'uk nyikwa'kukit midì ja jaa'y kyayik'øyp.”

⁵⁹ Jøts ni jade'embaat ja kø'øm kyanagyupikyidi ku ja øy sa yjawa'andi.

⁶⁰ Winets ja teetywindsøn tyanaagyukiyii'n jam mayjaa'yjotp, jøts ja tyiktiy ja Jesús, yide'en ja tnimaay:

—¿Ka' idø'on m'adsøy? ¿Ti dø'on jade'en myiktani'øø'ñip?

⁶¹ Xjats ja Jesús amøñi tyik'ity, jeky ja niwine'enin kyidyim'adsøø. Winets ja teetywindsøn ja ojts jadigojk tyiibyikyiyi, yide'en ja ojts ñi'mxyiyi:

—¿Mets idø'on ja' pøn Dios Teety pyiktaajky jøts mets mwindsøn'att? ¿Mets idø'on ja Dios Teety m'U'nk'ajtip?

⁶² Xjats ja Jesús y'adsøø yøts ja wya'añ:

—Øts idø'on ja'. Øts idø'on ja naxwii'ñit jaa'y nmøjkudanaaby'ajtpy, jøts x'ejxtip meets ku n'ixa'akt aga'ñ'ampy ma Dios Teety, jøts ku nayide'en ø nme'ent yoots agujkpy jap tsajpøtpy.

⁶³ Winets ja teetywindsøn ja wyet kø'øm ttakø'jtsiyii'n ku ja y'oj'abajtiyii'n, ja' idø'on tyijpy ku tø ja jaabaat y'oj'amø'øty, xjats ja wya'añ:

—¿Ti ejxpi ti nija'wibi jaaktsojkiyiy? ⁶⁴ Tøxi xmadowdi sa tø wya'añ ku ja Dios Teety yø tø twingajpxnaxy; ¿sa dø'on xjawidi ku jade'en wya'añ?

Winets ja niduki'iyi ttanikajpxtøø ja o'jkin.

⁶⁵ Jøts winaagin jatyi tñidsujidøø, jatyi twinmajtstøø jøts ja tsee'ktøø, yide'en ja wyan'adø'øtsti ku ja jade'en ttundi:

—iNajtsjawi pøn tø mgøxyi!

Jøts ja tajk ja twingoxti tjøpkoxti awa'an'ampy.

Ku ja Pedro tku'iñ jøts ku ja ka' t'ijxy'aty ja Jesús

⁶⁶ Jap ja Pedro wyinaty tøk'agi'py ku yja'jty tu'uk ja tøk'oxyøk pøn ja teetywindsøn tyumbi'ajtpy; ⁶⁷ ja'ats ja ojts y'ijxyiyi ku ja jap wyinaty jøn'ajpy yjo'kxpiky, tøyim ja wyinaty wyin'ejxniyi xjats ja yide'en ñimaajyøø:

—Nayide'en mets y'ijty xpawidity ja Jesús ja Nazaretit jaa'y, ¿kidi?

⁶⁸ Xjats ja Pedro ja ka'ap tniagajpxy, yide'en ja wya'añ:

—Ka'ap øts ja n'ijxy'aty pø pøn ja', jøts nguidyimñija'wip øts pø ti me mgajpxpy.

Xjats ja jade'en yø'pypiðsiimy jam tajjyøp'am. Winets ja tsapni'aaw y'ayajxi'jky. ⁶⁹ Jøts ja tøk'oxyøk ojts twin'ixy jadigojk ja Pedro, xjats ja ttukmadoobinaxwa'jky ja jaa'y pøn jam wyinaty, yide'en ja wya'añ:

—Ya'at jaa'y tmøøtwidejtp yø Jesús.

⁷⁰ Winets ja Pedro ja ka'ap tkupijky jadigojk. Waani y'ijty, xjats Pedro ja jaa'y ñimaajyøø jadigojk pøn jam wyinaty:

—Mets inet mdyimyøøtwidijtpy yø Jesús; kumi Galile'it jaa'y mets, jøts jade'en me mgajpxy sa yø kyajpxti.

⁷¹ Winets ja Pedro kø'øm kyanay'ømyigajpxiyøø møk'ampy ja jaa'y yide'en:

—Tyimy'ijxpy ja Dios jøts ku nguidyimñijawi pøni pøn jaa'y meets jade'en mdijpy.

⁷² Xjats ja tsapni'aaw myajtsk'ayajxy. Winets ja Pedro tjä'myejch ja Jesús y'ayuujk sa ja wyinaty tøk'ni'mxyi: “Ka'anim wyinaty ja tsapni'aaw myajtsk'aya'axy ku mets inet wyinaty tigøøk ojk tøk mwani ku me xka'ijxy'aty.” Jøts ja tkuyajxiy'ñ ku ja jade'en tjä'myejch jøts ku ja wyinaty jade'en nichøky tøk wya'añ.

15

Ku ja Jesús twinguwa'jkiyi'ñ ja Pilato

¹ Xjats ku xyijndyaa'ky, winets ja teetywindsøn ñamyujkidøø møøt ja møjaa'dyøjkti, møøt ja kajpxwejpitøjkti, tuki'iyi wine'en ja t'adsøonidi ja kutujk jam tsaptøjkjotp. Jøts ja ojts tyiknøjkxti ja Jesús kowiiñ jam Pilato wyindum, jamts ja tkøyakti. ² Xjats ja Pilato tniimaay ja Jesús:

—¿Janch mets idø'øn windsøn'ajtp ya israelit jaa'y y'etjøøjty?

Winets ja Jesús y'adsøoy jøts ja wya'añ:

—Øts ja'.

³ Xjats ja teetywindsøn janch may ja øø'nin tpiktaktøø, yikxon ja Jesús yikni'øø'niyi'ñ.

⁴ Winets ja Pilato tyiktiy jadigojk, yide'en ja tniimaay ja Jesús:

—¿Ka'ap idø'øn m'adsøy? ¡Ejx! Yikxon mjanchyikni'øøni. ¡Ejx! Ja pøky kawinajkøøjp myiktani'øøni.

⁵ Jøts kyidyimy'adsøop ja Jesús ku Pilato ja jade'en ñii'mxyi; jøts ñigyumaap idø'øn ja Pilato ja kø'øm tjawi ku ja jade'en kyidyimy'adsøy.

Ku ja nwindson'ajtim Jesús ñidujkyi'ñ jøts ja y'ookt

⁶ Yide'en idø'øn ja Pilato wyinaty ja kostumbri tmøøt'aty ku ja paski xøøw tpaaty, winets ja tyik'awa'atspidsimy nidu'ugin ja tsumyjaa'y, pøni pøn ja mayjaa'y yik'awa'atspidsømwandip. ⁷ Jamts wyinaty tu'uk ja pøkyjaa'y tsumy pøn txøøw'ajtp Barrabás, ja' ja jap møøt chum'ity pøn ja wyinaty møøt tøk yikjaa'y'øøky ku tsep ja wyinaty tøk ttundi møøt ja kudunktøk. ⁸ Xjats ja mayjaa'y jam jade'en myendøø, jøts ja t'amidoobinaxwa'aktøø ja Pilato jøts tsumyjaa'y ja tyik'awa'atspidsø'omt nidu'ugin sa kyostumbri ja wyinaty tmøøt'aty. ⁹ Winets ja Pilato y'adsøoy jøts ja tniimaay:

—¿Sa mee m'ukwa'añ, wan yø israelit windsøn tyikmajtstu'uty?

¹⁰ Jade'en ja wya'añ kumi tøk dø'øn ja wyinaty tjä'gyuki jøts ku ja teetywindsøn wyinaty nugo tøk tkøyakti ja Jesús tanejkingøjxp. ¹¹ Xjats ja teetywindsøn tkajpxwejkjotøø ja mayjaa'y. Ojts ja t'agajpxidi, jøts ja wya'andit jøts wan ja Barrabás t'awa'atspidsimy jøts ka'ap ja Jesús. ¹² Xjats ja Pilato tyiktiy ja mayjaa'y, yide'en ja tniimaay:

—¿Jøtsimts yø israelit windsøn, sa yø yiktu'unt?

¹³ Winets ja y'adsøodøø jøts ja wyandøø møkta'aky:

—¡Yikruspat!

¹⁴ Xjats ja Pilato tniimaay ja mayjaa'y:

—¿Ti tundigøø'yin yø tøk ttuñ, ti yø kyubatp?

Winets ja tjaaktyimykjinajxtøø, møk'ampy ja yjaaktyimwyandøø:

—¡Yikruspat!

¹⁵ Jøts kumi yikjotkukiwyampy ja Pilato wyinaty ja mayjaa'y, xjats ja tyik'awa'atspidsimy ja Barrabás; jøts ku ja t'uknankwoyjøø ja Jesús, winet ja ojts tkøyaky jøts ja kyiruspatt.

¹⁶ Xjats ja soldaditøk tyiknøjkxtøø ja Jesús jap kutujktaajk'agui'py ma ja ttejt Pretorio, ma ja masyoldadi jap wyinaty chøø'nidi, japts ja myisoldadi ja twaamukøxti. ¹⁷ Winets ja tsuu'nk wet ja ttuktatøjkidøø ja Jesús mididi ja windsøndøk nugo myiwindsøn'ajtip, jøts ja

kujp awiity ttukoron'i'atti. ¹⁸ Jøts ku ja jade'en t'uktundøø, winets ja wyambinaḡwa'ktøø møk'ampy, yide'en ja tkajpxpoo'kxtøø:

—iMay xøøwim may jumøjt'im mdsøønit mdanit mets israelit jaa'y wyindsøn!

¹⁹ Jøts ja kipy ja ttaxikwojppø'ktøø, ojts ja tñidsujidi jøts ja ñadyiyyi twinguxanidi, ñadyiyyi ja twindsøø'gidi. ²⁰ Xjats ku dø'øn ja jade'en t'uktaxe'ktøø, winets ja tsuu'nk wet ja ojts tjaj'nidi jøts ja ttuktatøjkidøø ja wyet mididi ja wyinaty wyet'ajtpy. Xjats ja jaty: twaḡbidsømdøø jøts ja kyiruspatt.

Ku ja nwindson'ajtim Jesús kyiruspejty

²¹ Xjats ku ja Cirenit jaa'y jam wyinaty ñaxy pøn txøøw'ajtp Simón, kyamjotp ja wyinaty chøøn; ja'ats ojts yiktaguwani jøts Jesús kyirus ja tpadsøjmit, ja' idø'øn jade'en jajtp pøn ja Alejandro møøt ja Rufo tyeety'ajttip.

²² Xjats ja mayjaa'y tyiknøjkxtøø ja Jesús jam Gólgota, ma ja et jade'en txøøw'aty mididi jade'en tyijpy ayuujk Oo'kpi Kyubajk Pajk. ²³ Jamts ja tmøødyøø ja vino mididi wyinaty tø yik'adamuky møøt ja tsøøy mididi yiktejp mirra, ja' ja ojts tmo'odi ja Jesús, jøts ja ka'ap tkupijky, ka'ap ja t'uujky. ²⁴ Winets ja tyikruspajttøø; jøts ja soldaditøjk tyikwa'kxtøø ja Jesús wyet, ojts ja tniguyatti, jøts pøni pøn majadaḡp ja'ats ja wet twejtstøø.

²⁵ Jaa dø'øn ja xøøwu'nk wyinaty waani pyety ku dø'øn ja jade'en tyikruspajttøø. ²⁶ Jøts letri ja jam tkøxjaadyi; yide'en ja tyikwa'andi: "Israelit jaa'y ya'at ja wyindsøn." Ja' dø'øn ja ojts ttagubatti kidi tiil'jip. ²⁷ Namajtsk ja maa'tspi ja tyikruspajttøø nay jam møøt ja Jesús, tu'uk aga'ñ'ampy jøts tu'uk anajy'ampy. ²⁸ Janch jajt idø'øn ja jade'en sa jap nøkyijxpy wya'añ, ku yide'en wya'añ: "Møøt ja yiktamimacho'owiyii'ñ ja møj ka'øy jaa'y."

²⁹ Xjats ku dø'øn ja jaa'y jam ñaxti kruswemp, ka'ap ja tjanch'ømyigajpxti, wyibejtpit ja kyubajk ja jam, jøts ja tnøjmidi:

—jøj! Metsxi xijy tsaptøjk myikidaapy, jøts mets xijy jaty kyidigøøk xøøw xyik-tanaagyukigyojmi, ³⁰ ñankñitso'ok'atits me kø'øm jøts mwinakt jam kruskøjx.

³¹ Jade'en ja jaa'y wya'añdi, nayide'en ja teetywindsøn wyamididi møøt ja kajpxwejpitøjkti, yide'en ja kø'ømyi ñawa'añidi:

—May abiky jaa'y tø tyiknitsø'ok'aty, jøts ka'ap kø'øm tjaty sudso ñankñitso'ok'atiyit. ³² Pøni ku net njanch'ejxint yø Israelit jaa'y wyindsøn wyinakt jam kruswemp, winet inet njanchja'win jøts ku yø yjanchja'aji ja Cristo.

Ja jaa'ybaat ja kya'ømyigajpxøø pøn ja jam wyinaty møøt tø yjakruspety.

Ku ja nwindson'ajtim Jesús y'ø'jky

³³ Xjats ku kyujkxøøw'ajty, winets kyoodsiyii'ñ ja naḡwii'ñit, jaanim ojts yjajta'aky møj winakxyøøw. ³⁴ Jøts ja Jesús møk'ampy wya'añ:

—Eloi, Eloi, ¿lama sabactani? —mididi tyijpy: Dios Teety, Dios Teety, ¿jadits ku ø tø xnanktyuñi?

³⁵ Winaagin ja jaa'y jade'en tmadoodøø pøn jam wyinatyi jøts ja wyandøø:

—Madowdi, ja Elias yø wyaadsøøpy.

³⁶ Xjats tu'uk myiiñ janch pujtprim pøn tnixajiyii'ñ ja tanøxe'jts mididi jade'en t'ejxp ejxim ja xa'akjoptsin, ja'ats ja ojts tyikxøøky jap vino ta'amjotpy jøts ja tpiktaajky jam kipy jøp'am, winets ja jade'en tta'adejyiyii'ñ ja Jesús jøts ja ttukwimuukwa'añ, yide'en ja wya'añ:

—Majtstu'utti; wan t'uk'ijxyim pøni janch'ukyikwinajkip inet idø'øn ja Elias jam kruskøjx ku inet ja mye'ent.

³⁷ Winets ja Jesús møk'ampy yaajxy, jøtsnim ja y'ø'jky. ³⁸ Jøts nay jaty ja wet kujkwa'kxy y'akø'øtpajky mididi ja tsaptøjk jam wyinaty y'awejtstuk'ajtpy, kubajk'ampy ja kyø'øtstøjkjyiyii'ñ jøts ja kyø'øtskidajky ok'am'ampy. ³⁹ Jøts ku ja soldadi windsøn jade'en ojts t'ixy pøn ja Jesús jam wyinaty twindanaapy, winets ja wya'añ ku ja Jesús wyinaty jade'en møk'ampy tø ya'axy, jøts ku ja wyinaty tø y'øøky, yide'en ja wya'añ:

—Janch tiy tam idø'øn Dios tam ya'at y'ity y'U'nk.

⁴⁰ Jam ja tø'øxyøjk wyinaty tyanaamyidi pøn jam jagam a'ejxujktip; ja Salomé, jøts ja María Magdalena jam wyinaty møøt jadu'uk ja María mididi ja Jacobo tyaak'ajttip møøt ja José. ⁴¹ Ja tø'øxyøjk idø'øn wyinaty tø tpawidetti ja Jesús, jøts ja' ja wyinaty tø t'ejx'etti ku ja Jesús jam Galilea wyidiyty. Jøts jam ja tø'øxyøjk wyinaty y'a'ejxujkmidi pøn ja Jesús jam wyinaty tø pyanijxxyi Jerusalén, møøt ja jam wyinaty tø yja'atti.

Ku ja nwindson'ajtim Jesús ñe'kx yikpiktaajky jap oo'kpi tsaq jutjøpy

⁴² Xjats ku chuu'wiyii'ñ ku ja poo'lxin xøøw wyinaty kyimjabom tpaatwani, ⁴³ winet ja José myiiñ, ja Arimate'it jaa'y pøn wyinaty ja kutujk t'adsinaadyip. Ja'ats idø'øn tjøp'ejxp jøts ja ttatøkiwya'añ ja Dios kyutujk mididi ja yjaa'y ja tyanitanaapy, jøts ja ojts amumjoojt myiiñ ma dø'øn ja Pilato jam wyinaty, jøts ja t'amidooji ja Jesús ñe'kx ku ja wyinaty tø y'øøky. ⁴⁴ Xjats ja Pilato ñigumaap yjajty ku dø'øn ja wyinaty tø y'oo'kni, winets ja tyaajxyiyii'ñ ja

soldadi windsøn jøts ja tyiktiiy pøni janch ku dø'øn ja wyinaty tøy'øøky. ⁴⁵ Xjats ku ja soldadi windsøn ja ojts tñigajpxy jøts ku ja janch jade'en, winets ja Pilato tkøyajky ja oo'kpi jøts José ja yikmøøy. ⁴⁶ Xjats ja tjuuy tu'uk ja poop wet midi øy midi majpxy, jøts ku ja tyikwinajky ja oo'kpi, ja'ats ja ty'a'amojts, jøts ja tpiктаajky jutjøtpy midi ja wyinaty tøy tyikjuty jam tsaajotp. Jøts ku dø'øn ja jade'en tpiктаajky, winets ja mõj tsaä ja tta'agiiy. ⁴⁷ Ojts idø'øn ja María Magadalena mõøt jadu'uk ja María, pøn ja José tyaak'ajtpy, t'ejxtøø ma ja Jesús wyinaty tøy yikpikta'aky.

16

Ku ja nwindson'ajtim Jesús yujkpyijky jadigojk

¹ Xjats ku ja poo'kxin xøøw ñajxy, winet ja María Magdalena t'atsjuudyøø ja pa'akxuu'kpi mõøt Jacobo tyaak, mõøt ja Salomé, jade'en ja ojts t'atsjuudyi jøts Jesús ja t'atspikta'akwajniidi ku ja wyinaty tøy y'oo'kni. ² Xjats ja ojts ttaninøjkxti jøpyi ku ja samaan wyinaty tøy abety, xøbidsimyu'nk ja yja'ttøø jam mõj tsaä agujkp ma ja Jesús jam wyinaty tøy yikpikta'aky. ³ Yide'en ja kø'øm ñawyajniidøø:

—¿Pøn inet ja tsaä tjanch'agiidyu'tut jøts ndøjki'int?

⁴ Xjats ku ja yja'ttøø, winets ja t'ejxtøø ku ja mõj tsaä ka'ap ja jap wyinaty ukteeni jap jut'agui'py, tøy ja wyinaty yikiiy'øñi. ⁵ Jøts ku ja tyøjkidøø jap mutsk tøjjøtpy, winets ja t'ejxpattøø tu'uk ja ankilis midi ja wyinaty pya'ajpy tsinaapy, jøts midi wyinaty nayide'en ja poop wet myøøt'ajtpy. Xjats ku ja t'ejxpattøø waajtyøjk ja tijy, jøts ja ojts jantyimchø'jkidi.

⁶ Jøts ja ankilis ja ojts ñii'mxyidi:

—Kidi mdsø'øgidi; nniija'wip øts ku meets ja Jesús ja ñe'kx x'ixaajiyidi. Tøy ja jadigojk yujkpyiky, øy xtyimye'ejxtit ma ja yikpiktaajky. ⁷ Nøjkx ja pyabøjkpitøjk xukmadojidi mõøt ja Pedro, jøts ñøjkxtit jam Galilea; jamts meets ja x'e'ejxtit jadigojk, jamts meets ja xminabyaagyid jade'en sa ja kø'øm mnimajyidøø.

⁸ Xjats ja choo'ndøø jam mõj tsaä agujkp ma Jesús ja wyinaty tøy yikpikta'aky, jøts ja ñøjktøø. Jadi'iñi tsø'øgi ja yjantyikmibejpniiyidi jøts nipøn ja sa tkanøjmidi, kumi jantyimchø'jkidip ja wyinaty.

Ku ja Jesús ñanky'ejxøø jadigojk ma ja María Magdalena jam wyinaty

⁹ Ku ja Jesús domingi jøpy wyinaty tøy pyidsimy jadigojk jap oo'kpi jutjøtpy, ja María Magdalena ja ojts jawyeen y'ijxyiyi, pøn ja wyinaty tøy tyikpidsøjmi niwixujk ja miku'. ¹⁰ Ja'ats ojts ñijky jøts ja ojts t'atstukmadøø pøn jaty ja Jesús wyinaty tøy tmøøtwidetti, pøn jam wyinaty jidyip yaxtip, maadyip tajtip. ¹¹ Jøts ku ja jade'en tñimadoodøø ku ja Jesús yujky'aty, ku ja tøyxyøjk ja wyinaty tøy t'ixy, ka'ap ja tjanchja'widøø.

Ku ja Jesús ñanky'ejxøø jadigojk ma wyinaty ja namajtsk pyabøjkpitøjk

¹² Xjats ku dø'øn ja jade'en y'uknajxy, winets ja Jesús ñanky'ejxkojmiiyøø abiky tsoo ku wyinaty ja pyabøjkpitøjk namajtsk yø'ødyi jam tuu'am. Ka'ap idø'øn ja pyabøjkpitøjk y'ejxkapyidi kumi wenk idø'øn ja kyaxi'jky. ¹³ Jawaani y'ijty, jøts ku ja t'ejxkajptøø winets ja jatyi jam wyimbejtøø kyamjotp, jøts ja ñøjktøø Jerusalén ma ja myigu'uk ja t'atstukmadoowa'andi. Kuts ja jam yja'ttøø, winets ja myigu'uk ttukmadoodøø jøts ja nika' yjanchja'wiyi.

Ku ja Jesús ttaguwa'aniyi'ñ ja tunk ja pyabøjkpitøjk

¹⁴ Waani et xøøw ñajxy, xjats ja Jesús ñanky'ejxkojmiiyøø ku pyabøjkpitøjk ja jam wyinaty nimaktu'uk twindsøøniidi ja kaabyajt; jamts ja mõk'ampy twinguagjpxy'iñ ja'agøjxp ku ja niti janchja'win tkamøøt'atti ku ja jadine'en kyjuuunidi, kumi ka'ap ja wyinaty tøy tjanchjawidi ku ja yiktukmadoodøø jøts ku ja Jesús wyinaty tøy yik'ixy, ku ja wyinaty tøy jadigojk yujkpyiky. ¹⁵ Yide'en ja yiknimaadyøø:

—Niyø'øygyøxti naxwii'ñit, jøts ja øyajpxy jøts ja ømyadya'aky xkajpxwä'kxtit ma jaty ja jaä'y yujky'atti. ¹⁶ Pøni pøn øts xjanchja'wip jøts pøni pøn nõbajtp, ja' nõjkx nitsø'ok'ajtp ja y'anmija'win; jøts pøni pøn øts xkajanchja'wip, ja' yiktagubatp ja pyøky. ¹⁷ Ja jaä'y pøn øts xjanchja'widip, yide'en idø'øn ttu'undit øts køjxp: Yikpidsø'ømdip ja' ja miku'; kyajpxtip ja wenk ayuujk ja'; ¹⁸ pøni ayo'ombattip ja', pøni tsu'utsidip ja' ja tsaä'n adsu'jky, jøts pøni y'uuktip ja veneni ja', ka'ap idø'øn ja sa yjattit; jøts nayide'en ku pamaä'y ja ja'ayi tkønixajtit, jatyi ja tyiktso'oktit.

Ku ja Jesús chajpejty

¹⁹ Xjats ku ja pyabøjkpitøjk ja jade'en t'uknimaay, winets ja chajpejty, ojts Dios Teety ja tsajjøtpy yikpatøkiyi, jøts ja tpuwa'jtsiyi'ñ aga'ngyø'ampy. ²⁰ Xjats ja pyabøjkpitøjk choo'ndøø, jøts ja ojts tkajpxwä'kxti ja øyajpxy ja ømyadya'aky øy madsoo. Ja nwindson'ajtim Jesucristo ja kø'øm pudøjkayidip, jøts nay ja Jesús ja tmøøy ja myø'ajtin jøts

ja ttu'undit jade'en midi nipøñ jaa'y ya naxwiiñ kyajajtpy, paty ja mayjaa'y ja tjanchja'widi dø'øn ja pyabøjkpitøjk ja kyajpxy. Jade'en idø'øn ja y'ejxi.

JA ØGYAJPTY JA ØMYADYA'AKY MIDI JA LUCAS YJAAY

Ja Teófilo ya'at yiktanija'ayi

¹⁻⁴ Migu'uk Teófilo, may ja jaa'y tɔ tjaajaadyanwa'andi tyimjade'en ja madya'aky sam øøts ja nmigu'uk tɔ t'ejxti pɔn ja Jesús kyudanaadyip. Nayide'en sam øøts ja tɔ nyiktuk'ejxyin, sam øøts ja tɔ n'ixpikyin, jade'ents ja tjaja'wa'andi pɔn jaty t'ejxtøø tnija'widøø sa jaty cho'ondaajky. Ja'ats tɔ pyudøkiyidi jøts ja øgyajpty ømyadya'aky ja tkajpxwa'kxtit. Nay tɔts øts ja nbemuky ngonmuky ti jaty tuujnøø ku ya'at øgyajpty ømyadya'aky cho'ondaajky. Ixyamts mets ja jade'en ndyimdyanijayi, jøts wa'ats xnijawit ja tiy'ajtin, sa jaty tɔ myiknøjmi ku ja tɔ myiktukmadø y'øbi ixpøjkin.

Ku ja ankilis tniqajpty jøts ku ja Juan Bautista kyaxø'økwa'añ

⁵ Ixyam idø'øn cho'onda'aky ja madya'aky. Ku dø'øn ja Herodes wyinaty rey'aty jam Judea, jamts ja teety wyinaty tu'uk chøøni pɔn txøøw'ajtp Zacarias, ja' y'ijty møøt tyuñ tukpiky ja teetyøjkti pɔn yiktejp Abías. Elisabet ja ñidø'øxy xyøøw, teety Aarón ja ty-eety'ap'ajtmip. ⁶ Janch øy jaa'y idø'øn ja amajtskti, pyaduujnidip idø'øn Dios kyutuik ja' pøni ti ja yikta'ana'amdip. Jade'ents ja ka'ap pɔn sa ñi'ixmxyidi, jade'en ja ka'ap pɔn pyøky'ijxyidi. ⁷ Ka'ats ja y'u'nk ja teedi, ni ja Elisabet ka'ap ja y'u'nkpaaty, tyimyajaa'ñidi ja namajtsk wyinaty.

⁸ Xjats tuk'ojk ja Zacarias yjaa'y tyaja'jtidøø jøts ja ttuujnidit ja windsø'jkin ja Dios. ⁹ Jade'en idø'øn ja tkostumbr'i'atti ku ja teetyøjk ja jade'en tyaja'adyidi, winets ja tniwøjti pɔn jap uktøkip jap mā ja Dios yikwindsø'øgi, mā poom tyøy. Xjats Zacarias ja ojts tyimdyaja'adyi, ja' ja poom ojts tyiktøy. ¹⁰ Ixam ja poom wyinaty jade'en tyøy, jøts niduki'yiyi ja mayjaa'y ixap yjanchapkaajpxmidi jap tsaptøjkwimpy. ¹¹ Winets ja Zacarias t'ejxpaajty tu'uk ja Dios y'ankilis jøts ku ja jap aga'ñ'ampy tyani mā ja poom yikpikta'aky. ¹² Ku Zacarias ja ojts jade'en t'ejxpaaty, ni sudso'ampy ja kya'ukwinmaa'nbyatni, tsø'øgi ja janchyik'o'jkniiyip. ¹³ Xjats ja ankilis ja ñimaa'jyøø:

—Zacarias, kidi mdsø'øgi, tɔ Dios mgajpxaa'jkin mmado'oxiyi jøts pyaatp mñidø'øxy Elisabet tu'uk ja mutsku'nk. Mbaattip m'u'nk tu'uk, Juan ja mdukkxøøw'attip. ¹⁴ Mdaxonda'akp ja' mdajotkujk'atp ja', jøts may ja jaa'y ja nayide'en ttajotkujk'attit ku ja kyaxø'økt. ¹⁵ Ja'ats møk nøjx ja kunuu'kxin tmøøt'aty jam Dios wyingujkp. Niwine'enin ja nøø ja tkatunk'att, ka'ap ja y'amu'ukyjaa'y'att. Jaayip ja Espiritu Santo tyuktatøjkniiyi ja wyinmaa'ñ yam ja ka'anin myiñ naxwiin. ¹⁶ Ja'ats ja Israelit jaa'y tyukja'myatsp tyukja'byaatp ja Dios Teety jadigojk. ¹⁷ Jawyeen ja Juan mye'ent, jaanims ja nwindson'ajtim mye'ent. Nayide'en winmaa'ñ nayide'en kutujk ja tmime'ent sam ja Dios kyugajpxyin, ja Elias'ajtpi. Jade'ents ja u'nkteety u'nktaak ja tyikjotimbett, jøts ka' ti tsep niti aki møøt chøønidit y'u'nkti y'una'jkti, jøts ñayikmado'op ja' pøni kidyimyadoodip. Jade'ents ja tyiktøjti tyiktuudaajkit ja jaa'y wyinmaa'ñ jøts ja tjøp'ejxtit ja nwindson'ajtim.

¹⁸ Jade'en ja Zacarias yiknimaay, xjats ja ankilis ja t'amidøøy:

—;Sudso'ampy øts ya'at ndajotkujk'att jøts ku yø tiy janch, pø tum møjaa'ñits øøts amajtsk?

¹⁹ Xjats ankilis ja y'adsøøø:

—Gabriel'ajtp øts, jøts Dios ø nmidumpy; ja' øts idø'øn tɔ xkexy jøts mets ya'at aaw ayuujk ndukmado'ot. ²⁰ Jabi ka'apxi jatyi tɔ xniibiky sa me tɔ nnøjmi, tants inet uum, jaanim me mgajpxt ku ja m'u'nk kya'axt. Jatp kubatp idø'øn ya'at jade'en sa ø tɔ nwa'añ.

²¹ Ixap idø'øn mayjaa'y t'awejxti ja Zacarias, maadyip tajtip ja jap ku ja jade'en tya'ñini jeky jap tsaptøjkjotpy. ²² Xjats ku ja pyidsiimy, ka'ap y'aaw y'ayuujk ja t'ukyajkni, jøts ja tyimyjaty; tjä'gyukidøø kudamik ja wyinaty tɔ y'ejxjøøxy y'ejxma'aty jap tsaptøjkjotpy. Nugo ja ja'ayi tniðoni, tøyi ja wyinaty y'uu'mni.

²³ Kuts xyøøw ja ojts tyika'pxy winaaak xøøw ja wyinaty tɔ yiktaguwan t'adsøønit ja tsaptøjk, winets ja nøjxni tyigam. ²⁴ Jøts ja ñidø'øxy Elisabet ja nay jatyi yjotpy'ajtni ku ja et ja xøøw jade'en y'uknajxy, magoxk po' ja y'ijty jap tyøjkjotpy jadine'en ja kya'ukpidsømni. Yide'en ja wyinmay jøts ja wya'añ: ²⁵ “Ja'agøjxp Dios tɔ ttuñ ja may'ajt jøts øts ja jaa'y xka'ukmi'ajkniiyt.”

Ku ja ankilis tniqajpty jøts ku ja Jesús kyaxø'økwa'añ

²⁶ Xjats ja Dios kidudujk po' tkejxy ja y'ankilis Gabriel jam Galileit naxjotp mā ja kajp txøøw'aty Nazaret, ²⁷ jøts ja t'ats'ext ja tø'øxyøjk pɔn txøøw'ajtp María, øy yikxon ja yjaa'y'aty. Niwa'añ ja wyinaty y'e'ejtni jøts ja tmøøt'amajtskit tu'uk ja yaa'dyøjk midi txøøw'ajtp José, ja rey David y'aptatsk. ²⁸ Xjats idø'øn ankilis ja jam tniðøjkiyi'ñ mā ja jam wyinaty chøøni jøts ja tniimaay:

—jDios kəjxp ngajpxpəø'kxy, tə ja mmay'atyiyi! İxa mets ja nwindson'ajtim məøt m'ejtni; tə ja Dios njantyimgyunuu'kxyi ku nadyu'uk tə myik'a'ejxi wine'enin mdəøxyəjk'atti naxwiin.

²⁹ Kuts ja twin'ejxpejty ja ankilis jəts ku ja jade'en myi'gajpxyi, nigyumaap ja tyimya'wyyii'n, jade'en ja kəø'm nawaynmaa'nxyiyi ti ja jade'en təkajpxpəø'kxyiyip. ³⁰ Jəts ja ankilis nimaajyəø:

—María, kidi mdsəø'əgi, tə Dios m'əy'ijxyiyi, mjanchtajotkuj'ajtip ja'. ³¹ Mjətpyip mets, mbaatp tu'uk mmajnkun'k, JESÚS ja mduksəøw'atp. ³² Mək winmaa'n mək kutujk ja myəøt'atp; Dios U'nk ja yiktejt, yikutujkpi Dios Teety ja pyiktə'agiyit sam ja y'apteety'aməj David, ³³ jəts ja wyindsən'att jam Israelit y'etjotp xemikəjxp; niwindem ja kyutujk ja kyakəxt kyanaxt.

³⁴ Xjats ja María tyiktiiy ja ankilis:

—¿Ti sudso dəø'n ja ndejin jade'en yjatt? Pə ka'anims əts nniyaa'y nbaaty.

³⁵ Winets ja ankilis y'adsəøy jəts ja wyaañ:

—Ja Espiritu Santo mnimeniyip, jəts ja Dios Teety tsajpjətpyit ja' myə'kajtin jade'en mduniyip. Jəts paty ja niwine'enin tkayikpəkyu'unt, wa'ats ja y'ett mididi idəø'n myika'axp. Tə ja jade'en ttanibiktaagi jəts ja Dios U'nk yiktejt. ³⁶ Nayi pyaatp ja mmigu'uk Elisabet myajnkun'k tu'uk, əy idəø'n ja yjaməjaa'yiiñi. İxyam ja tudujk po' kujk tsmə'lity ja y'u'nk yam ja ka' tyimy'ukyikjəp'ijxy jəts y'u'nk ja tpaatt. ³⁷ Ka' Dios ti kyamayiyi.

³⁸ Xjats ja María wyaañ:

—Ane'emy əts ja Dios xyik'lity; wan əts ja jade'en xuñ sam ja tə wya'añin.

Winets ja ankilis jatyi choo'nəa.

Ku ja María nijky jəts t'ats'ijxy ja Elisabet jam tyəjkwindum

³⁹ Jəts ja María nayi winet et anəø adsu'jky ojts nijky jam kojpkjotp mə ja kajp wyinaty tu'uk jam Judeit naxjotp, ⁴⁰ jəts ja ojts tyəki Zacariás tyəjkjotp, jamts ja ojts tkajpxpəø'kxy ja Elisabet. ⁴¹ Kuts Elisabet ja jade'en tmadəøy ku María ja jade'en kyajpxpəø'kxyi, jatyi ja tyimya'wyyii'n yjotp ku ja mutsk y'adijch, winets ja Espiritu Santo ja amuum tyatəkiyəø. ⁴² Jəts ja yide'en mək yjantyimwyaañ:

—Tə Dios mjantyimgyunuu'kxyi ku tə myik'a'ejxi wine'enin ndəøxyəjk'ajtindi naxwiin, jəts yə m'u'nk nayide'en tə yikunuu'kxyi. ⁴³ Tyimdyi əts tyimbyə'n əts ku əts nwindson'ajtim tyaagu'ndk xkugajpxi! ⁴⁴ Ja'ayi ja mgajpxpəø'kxin tə ndyimyadəy, jatyi əts n'u'nk ja xonda'agy tə yjantyimyk'adi'ichiyi. ⁴⁵ Nekim xəñim mets ku ja tə xjanchjawi xkunuu'kxyjawi, jatp kubatp idəø'n yə jade'en sə yə Dios tə tyikutuky.

⁴⁶ Xjats ja María wyaañ:

Əy tsuj ngunuu'kxyjawi ja nwindson'ajtim,

⁴⁷ myinijxpy əts n'aaw njoojt ja nDios Teety Yiknitsokpi.

⁴⁸ Tənim ja Dios tnijawi jəts tə t'ejxjimbity ja y'u'nk ja myaaay, yannim əts inet ejtp ejtni xoni nyiktejt wine'enin ja naxwii'ñit jaa'y yja'atti yə naxwiin.

⁴⁹ Janch məj ja Dios myə'kajtin ku əts ja jade'en tə xuñ; pə wyandijpyts idəø'n yjanchwa'adsı yjanchkapəkməyəødi.

⁵⁰ Ejtp ja tpa'ayo'ot pə'n jatyi ja windsə'jkiiyip.

⁵¹ Tə tyikwingaxi'iky ja myə'kajtin ku ja tə tmamajadaajki ja namyikaxi jaa'dyi wyinmaa'n.

⁵² Tə tyik'amutski pə'n jatyi kamaabyim yikutujktip,

jəts ja tə tyikjot'aməkpiky ja ayoobidi pə'n jatyi aay pista'ak yik'ejxtip.

⁵³ Pə'n jatyi ayoodip winmaadyip, təts ja tmə'əy ja jotkujk'ajtin,

jəts ja kumeeñ jaa'y jadi'iñi wa'ats wiwəpy tə yikpagajxnidi.

⁵⁴ Tə ja tpuđəki ja Israelit kajp ejxim ja y'u'nk t'ejxkapyin;

ka'ap ja tja'dyigəy paty ja tə t'ayo'ixy,

⁵⁵ sam ja ojts yiktukmadowdin ja n'oktaakti ja n'apteetyi, məøt ja Abraham, ku ja y'u'nk y'unaj'jk jade'en kyakəxt kyanaxt.

⁵⁶ Xjats ja María jam tməøtaa'niyii'n tigəøk po' ja Elisabet; ku jade'en njaxy, jaanims ja niojknəa tyəjkwindum.

Ku ja Juan Bautista kyaxi'iky

⁵⁷ Xjats ja xəøw ja po' tpaajty juuni et ja Elisabet kya'axt. Jade'ents idəø'n yikaxi'iky tu'uk ja myajnk'u'nk. ⁵⁸ Jatyi ja myigu'uktəjkti myigujəøndi myigudəjkti nimejnidi. Janch yikajxakp ja' ku ja tnija'widəø jəts ku ja Dios wyinaty ja kunuu'kxin məj tə myə'əyiyi. ⁵⁹ Jəts ja kiduktujk xəøw tyiknəjktəø ja maxu'nk jəts ja ejxa'an yikmo'ot n'ekxəjxp, jamts ja tpiktə'akwajxnidi ja xyəøw sam ja tyeety xyəøw'atyin Zacariás. ⁶⁰ Jəts ja tyaak, ka'ap ja tkupiky, yide'en ja wyaañ:

—Ka', ka'ap yə jade'en txəøw'att. Juan yə xyəøw'atp.

⁶¹ Xjats ja yiknimaay:

—¿Tiku yø jade'en yiktejt? Pø ka'ats ja mmigu'uktøjk jade'en pøn txøøw'aty.

⁶² Winets ja tyiktøøðøø ja u'nkteety ti tyukxøøw'atp ja y'u'nk, nugo ja tñanidonidi. ⁶³ Jøts ja ojts t'amidøy tu'uk pedasi ja puu'y'u'nk ma ja tkøxajjyt ja xyøøw, xjats tpiaktaajky: “Juan yø xyøøw.” Jøts ja jaa'y ñigyumaap yjanchjajttøø ku ja t'ejxtøø jade'en. ⁶⁴ Jøts ja Zacarias nay jaty'i ojts y'awijy jadigojk, jaty'i Dios ja tkajpxpøø'kxy, møk ja ttukmøjawi. ⁶⁵ Ja'agøjxp ja ñigyumaap tja'widøø ja tøk'ayø'øbyidi, jaty'i ja ojts tkajpxyø'øgyoji sa wyinaty tø yjaty kyubety, jøts ja yiknija'wiyi'i'ñ wine'enin ja Judeit jaa'y jam chøøniidi y'etjotp. ⁶⁶ Pøn jaty ja jade'en tñimadoodip, nugo ja tkumayidi tkudajidi jøts ja xem yam ñayiktyidi ñay'amidøyidi: —¿Ti yø tyu'ump, ti yø pyaagt yø mutsku'nk ku yø yaakt?

Jabi janchmøøjyipts ja Dios kyunuu'kxin yø'.

Ku ja Zacarias ja Dios yikajpxøø

⁶⁷ Xjats ja Zacarias ja Dios tyukajpxøø ja ayuujk ku ja wyinaty tø tyatøkiyi ja Espiritu Santo, jøts ja wyaañ:

⁶⁸ Janch møj ja Dios ja kyunuu'kxin tmø'y ja Israelit kajp,

ku tø tñimiñ tñija'aty ja y'u'nk y'unaj'jk wine'enin adøm ja xja'ajtindi, tøts nitsoojkin ja xukpaajtyim.

⁶⁹ Tø ja tu'uk tkexy ja yikutujkpi pøn xuknitso'ok'ajtindip ja nbøky,

nay ja David y'ap y'ok pøn y'ijty ja Dios tmidump.

⁷⁰ Jade'en sa ja Dios Teety jawyeenip ojts ttuknigajpxy ja kyugajpxy,

⁷¹ jøts ku ja xaniguwandujtin ja nmidsep ja nmi'ajkibi jøts niduki'iyi pøn x'øy'ejxim xka'øy'ejxim,

⁷² jøts ku ja ndeety'ap yik'ayo'ejxtit ku ja ka'ap tja'dyigø y ja y'ayuujk.

⁷³ Ku ja wyinaty tø twanda'aky, jade'en ja ndeety'amøj Abraham yiktamiwandaagi

⁷⁴ jøts ku ja xukmimadaajkin ja nmidsep,

jøts ja jotkujk nmidu'unin, nisudso ngatsø'jka'ant,

⁷⁵ øy tsuj tiy janch ndsinaa'yindit, jade'en ja nwindso'jka'andit ejtp.

⁷⁶ Jøts mets u'nk, mets ja Dios tsajppjøtpyt mgugajpxy'atityip,

kumi mets ja jaa'y wyinmaa'ñ ja myiktøøjip myiktuudaajkip jøts ja nwindso'n'ajtim yikjøp'ext,

⁷⁷ jade'ents ja jaa'y tñijawidit jøts ku ja mye'ent yiknitsokpi jøts ku ja pyojkpimaa'kxt.

⁷⁸ Jadine'en ja Dios xtsøjkyim xpa'ayø'øyindi jøts ja xanikejxyim ja y'u'nk ja yiknitsokpi,

⁷⁹ ja'ats xyikwejim xyikajim, kujaj kudøø'kx xyiktsinaa'yindit. Ja' xukmajtstujtim ja nga'ødyu'unin ja ngugoots'ajtin,

jøts ja xuk'ejxint xuknija'wa'ant ja tsinaa'yin midi øy midi tsuj, jotkujk'atyim Dios wyingujkp.

⁸⁰ Jade'ents ja mutsku'nk ye'jky, møk møjaaaw, wijy quejy, jøts øy tsuj ja winmaa'ñ tjagyepy. Jøts ja y'atsinaay jawyeen jam abak etjotp ma niti kya'ity, winetnims ja ñanky'ejxi ma ja Israelit jaa'y jamdi.

2

Ku ja Jesús kyaxi'iky

¹ Xjats ja møj windso'n Augusto winet et ojts tñi'ane'emy møk'ampy jøts ja naæwii'ñit jaa'y niduki'iyi yikjaamyuktit. ² Ja Cirenio jam wyinaty Siria kudunk'ajtp ku døø'n ja jade'en miduk'ojk tjaamyuk'okwandøø ja jaa'xyøøw jøts ja jumøjt. ³ Xjats ja jaa'y jade'en ñøjkxti kyø'ømgajpkøjxpti, jøts ja xyøøw jøts ja yjumøjt tkøyaktit jam. ⁴ Jade'en'ampyts ja José jam Galilea chøø'ñ ma ja kajp txøøwi Nazaret, jøts ja ñøjkxtøø Belén jam Judeit y'etjotp ma ja David wyinaty tø kyaxi'iky, kumi ja' ja José tyeety'ap'ajtpy. ⁵ Patyts ja jam tmøøniijkxy ja María jøts ja tkøyaktit ja xyøøw ja yjumøjt, tøts wyinaty ja kajpxy ttunidi jøts y'amajtskidit. Jøtpynim ja wyinaty. ⁶ Winets ja y'u'nk ja nay jam pyaajtøø, jam ja ojts pyo'ga'pxy. ⁷ Jøts ja tpaajty ja yjagyooobu'nk, ojts t'abity jøts ja ojts tkø'øky jam jiyujkjøø'kx'i'i'ñjotp. Ka'ap ja ja'taajk jam wyinaty tø ñibaadi, patyts ja jamy tyandøø.

Ku ja borreek'ejpxi ja ankilis pyaadyidi

⁸ Jamts wyinaty jiyujk'ejxpidi tsigi'ejxpidi wingon ma ja kajp txøøwi Belén, ja'ats t'ejx'ejtipp tsunaxy'ampy ja byorreegidi. ⁹ Xjats ja jam jotmøn t'ejxpattøø ja Dios y'ankilis. Jade'eñi ja jam tyimyikjajtaajky ma ja wyinaty, jøts ja yjantyimchø'jkidøø. ¹⁰ Nimaajyidibik ja ankilis inet ja'adi:

—Kidi mdsø'øgidi, øgyajpxy øy'ayuujk ø nmimimpy. Ja' mee ndukmadoowampy, ni'ijtyi ja jaa'y ja tjantyajotkujk'attit: ¹¹ tø ixyam kye'exy ja CRISTO, ja nwindso'n'ajtim, ja yiknitsokpi ma ja David jam kyugajp'ajty, ja' kyajpkøjxp. ¹² Ja' idøø'n ja wyinaty ku inet xpaattit tu'uk ja maxu'nk mots'abidity kyø'øgyi jam jiyujkjøø'kx'i'i'ñjotp.

¹³ Jaaktyimgyaxo'k'tip inet ja may ankilis jam ma ja tyu'ukpi wyinaty, jots ja Dios ja moek ttukmojawawi ttukunuu'kxyjawi, yide'en ja wya'andi:

¹⁴ Kunuu'kxy mets Dios Teety tsajpjotpit

ku oy'ajtin tsuj'ajtin tyaky ya naxwiiñ naxkijxy, jots ja jaa'y yikmo'odi pøn tmijotkujk'atwandip ja Dios!

¹⁵ Xjats ku ja ankilis wyimbejtnidoo ku ja ñojkxnidoo jap tsajpjotpy, winets ja jiyujk'ejxpidi nixem niyam ñawyambinaxwa'jkidoo:

—Wants id'oñ tja'myindi Belén, jamts ja t'ats'ijxyindi midi Dios tō xuknija'windi.

¹⁶ Xjats id'oñ putyi ñojkxtoo, jots ja Maria jam ojts tjanchpaatti moot ja José, janch jamdamik ja mutsku'nk tō yik'o'ky jiyujkjo'o'kx'iñ'ñjotp. ¹⁷ Kuts ja jade'en t'ejxtōo, winets ja tmimadyaktōjkidoo sa ja ankilis ja wyinaty tō tyamimadya'agyidi ja maxu'nk, ¹⁸ jots ja ñigyumaap yjanchjajttōo pøn jaty jam wyinaty. ¹⁹ Jots ja Maria ja'myech ja tyik'ity sa ja wyinaty tō yikno'jmi, ja' ja wyinmaa'ñ'ajtnip. ²⁰ Xjats ja jiyujk'ejxpi wyimbejtnidoo. Moek ja Dios ja ttukmojawawi ttukunuu'kxyjawi ja'agōjxp ku ja wyinaty jade'en tō t'ejxti tñijawidi jots ku ja jade'en tō yjantyimjyaty.

Ku ja maxu'nk Jesús y'atsyiktuk'ijxy ja Dios Teety tsaptōjkjotp

²¹ Kiduktujk xōow ja mutsk ojts yikpiktaajki ja ejxa'an ñe'lkkōjxp jots ja yixxōomōoy JESÚS. Nay ja' ttukxōow'ajty midi ja María ja ankilis wyinaty tō tyukmadōyi ku ja wyinaty ka'anim tōtpy'aty.

²² Xjats ku ja tiemp' tpaajty wine'en ja wyinaty tō t'a'ejxidi wya'atsti sam ja Moisés kyutujk wya'añin, winetnims ja maxu'nk ja jam Jerusalén ttanijōkxtōo ja Dios. ²³ Jade'en'ampy id'oñ ja jade'en ttundōo kumi yide'en ja Dios kyutujk yja'ayi: “Tum Dios ja mixyuna'jk yiktamiyoxtip pøn jagyoobi'ajtp.” ²⁴ Xjats id'oñ ja jade'en t'atswindsō'jkidoo sam ja Dios Teety tō tyikutukyin: namajtsk naxpak, pōni ka'ats ja te winets ja tsapak nayide'en namajts yiktawindsō'ogit.

²⁵ Jamts wyinaty ja jaa'y tu'uk chōoni Jerusalén pøn txōow'ajtp Simeón. Janch oy jaa'y id'oñ ja'. Yjanchja'myechp id'oñ Dios ja'. Ja'ats id'oñ tōp'ejx'ejtp ja Israelit kajp juunim id'oñ ja jyadyim'y'uknitsō'ok'att. Jam ja Espiritu Santo ja wyinaty tmōodi, ²⁶ jots tō ja wyinaty twanda'aky jots kunim ja jawyeen t'uk'ext ja Cristo pøn ja Dios Teety kyaxp, winetnims ja y'ookt. ²⁷ Xjats ja winet ñijky tsaptōjkjotp, ja Espiritu Santo ja yiknōjxip; kuts ja maxu'nk Jesús jam wyinaty ja tyeety tyaak tō yiknijkyi jots ja jade'en tpadundi ja kutujk, ²⁸ jots Simeón ja jam tñixajiyi'ñ kyō'kōjxp jots ja tsaa'ñ'ijty, jots Dios ja ojts ttukmojawawi ttukunuu'kxyjawi, yide'en ja wya'añ:

²⁹ Dios Teety, tōts inet, wan o'ts inet jotkujk t'oo'kni.

Tō xpaduñ ja m'ayuujk sa o xnimaa'y.

³⁰ Tōnim o nwemp'ixy ja yiknitsokpi

³¹ midi tō xanibiktaagi ja naxwii'ñit jaa'y.

³² Yō' id'oñ tu'ump ja may'ajtin jots ja jaa'y mja'myatstit mja'byaadit pøn ka' y'Israelitjaa'yidi.

Yō'ogōjxp id'oñ yik'ejxkaptit ja Israelit kajp midi tō xwi'ixy.

³³ Xjats ja José janchñigyumaap yjajtōo moot ja ñidō'oxy ku Simeón ja mutsk jade'en tñigajpxy. ³⁴ Winets Simeón ja kyunuu'kxmygajpxidoo. Yikajxaktip ja' jots ja María yiknimaay, ja Jesús tyaak:

—Ejx madow, ja' yō mixyu'nk tō yiktanibiktaagi jots Dios Teety y'oy'ajtin ttukpaajtit may ja Israelit jaa'y. Nay mayts ja tkapaattit ku jaa'y yō may kyagupōkit. ³⁵ Jade'ents id'oñ ja yiknijawit sa pōnjabōn wyinmay y'am yjotp. Mdyimchaachkuwinmayip mets ja o'y, tyimchaachjawip mets m'anmji'win ja'.

³⁶ Jamts wyinaty tu'uk Dios kyugajpxymi, Ana ja tō'oxyōjk xyōow, ja Fanuel ñōox, ja Aser ja y'aadsidip kyugojidip. Mōjaa'tyigōynits id'oñ ja'. Tyimy'una'jkyi ja y'amajtskiyi'ñ jots ja ja'ayi wixujk jumōjtyi tmōōtsinaay ja ñiyaa'y. ³⁷ Makta'pxy myaktaxk jumōjts ja wyinaty, jots ejtpts id'oñ ja jap tsaptōjkjotpy tmiduñ ja Dios xinaxy tsunaxy, y'amaa'y'ajtpy id'oñ ja', ka'ap ja tkugayi tku'uugi, ejtp Dios ja t'ajot'aty. ³⁸ Ja Ana dō'ōn jap ojts myiñ winet, jots ku Dios ja ojts ja t'uktukmojawawi t'uktukunuu'kxyjawi, winets ja tñigajpxōjkijyi'ñ ja mixy Jesús. Ja' ja tyukmadōopy pøn jaty wyinaty tōp'ejxtip jots ku ja Jerusalēngit jaa'y ñitso'ok'attit.

Ku ja wyimbettōo yja'ttōo jadigojk Nazaret

³⁹ Xjats ja wyimbejtnidoo ñojkxnidi jam kyajpkōjxp Nazaret, jam Galileit y'etjotp, ku ja jade'en wyinaty tō tpadungōjxidi ja Dios kyutujk. ⁴⁰ Jots id'oñ ja mixyu'nk jam jade'en yeeky, mōj mōjaaw, wijy kejy. Dios ja amuum jantyimkyunuu'kxiyip.

Ku ja mixy Jesús yikpaaty jam tsaptōjkjotp

⁴¹ Xumi nõjxktipts idøøn ja tyeety tyaak jam Jerusalén winjumøjt ku ja paski xøøw jam tpaaty. ⁴² Jøts ku ja Jesús yjumøjt wyinaty makmajtskni, winets ja ojts nõjxkti niduki'iyi Jerusalén, jøts ja xøøw ja t'anøjxkidi kumi jade'en ja kostumbri. ⁴³ Xjats ku ja wyimbajtndidøø xøøguixy, winets ja mixy Jesús jami tyaanaa Jerusalén, ka'ap ja José ja tkumaydi. ⁴⁴ Jade'en ja wyinmaydi, jam ja tity pyamiñidi mayjaa'y agujkp, jøts ja jade'en yø'øxyinajxtøø; jøts ja tja'ixaadyøø tjayiktøødøø tjayik'amidooðø ja myigu'uktøjkti pøn jaty ja møøt ñay'ijxy'atyidi, ⁴⁵ nima ja tkapattøø. Xjats ja tñiwimbajtøø jadigojk Jerusalén jøts ja jam t'ixaadyøjkidøø.

⁴⁶ Kidigøøk xøønim ja tpattøø, jamdamik ja wyinaty tsaptøjktøp chøøni jam may kyajpxwejpi y'agujkp, jamik ja pyatmadøy jøts ja jam t'amidøy tyiktiy tyiktu'ugi. ⁴⁷ Jøts ku ja jaa'y ja jade'en tmadoodøø, ñigyumaap ja tyimyja'widøø ku ja amwijy tsaachwijy, jøts ku ja tity janch y'adsøy. ⁴⁸ Xjats ku ja tyeety tyaak ojts y'ijxyi, ñigyumaap ja tyimyjaa'widøø jøts ja tyaak ojts ñii'mxyi:

—¿Ti, u'nk, jade'en myik'adøøstip? ¿Ti øøts jade'en xjantyatump? Møk øø tø xjanty-imyikjotmadyøki wine'enin øøts ixa njawidity, mjayik'ixa'ay.

⁴⁹ Xjats ja Jesús y'adsøøy jøts ja wyaañ:

—¿Tiku ø x'ixa'adi? ¿Ti kidi xnijawidi ku øts nDeety yja' nduujniyit?

⁵⁰ Niwine'enin ja tkaja'gyukidøø ku ja jade'en ñimaajyidøø.

⁵¹ Xjanimts ja tmøødidøø Nazaret, etpts idøøn ja myimadøyidi jøts ja tyaak nugo tja'myats'ijty sa yjajty. ⁵² Yaak'adøtspts ja Jesús, wej'adøtsp kaj'adøtsp ja'. Jade'ents Dios ja tyajotkujk'atyi ku ja jade'en y'ijxyi, jøts myigu'uk nayide'en yjotkujk'atti.

3

Ku ja Juan Bautista kyajpxwa'kxy abak etjotp

¹ Makmojkx jumøjt wyinaty kujk yikutuky ja mõj windsøn Tiberio ku ja Poncio Pilato wyinaty wyindsøn'aty jam Judea, jøts ja Herodes jam Galilea, jøts ja myiga'ax Felipe jam Iturea jam Traconite, jøts ja Lisaniás jam Abilinia wyindsøn'aty. ² Ja Anás møøt ja Caifás ja' idøøn wyinaty mõjteetywindsøn'ajttip ku ja Juan, ja Zacariás myajnk, ja Dios tyukmadøji ja y'øgyajpxy ja y'ø'yayuujk jam abak etjotp. ³ Xjats ja ojts t'ayø'øy'abidsimy ja et jam mõj nõøba'am midit txøøw'ajtp Jordán, jøts ja jaa'y ttukmadøy jøts ku ja ñøøbattit, jøts ja tyiktø'ødit tyiktuuda'aktit ja wyinmaa'ñ, wan tyiktigatsti ja chinaa'yindi winets ja yikpojkpimaa'kxtit. ⁴ Xjats ja jade'en yjanchtuujnøø yjanchajttøø sa ja Dios kyugajpxy Isaías wyinaty tø tjaadyañ ja ayuujk ku ja wya'añ:

Paty ja kugajpxy ñøjkt jawyeen jam abak etjotp jøts ja myigu'uk ja tñøjmit møk'ampy:

“Awejxidi ja Dios y'ixpøjkin, yiktøwdi yiktuuda'akti ja mwinnmaa'ñ yikxon.

⁵ Pønts ja kya'ukupøkp wan ja tyimyjapøni, ni'ijtyi ja tum jade'en tkupøkt.

Yik'øyip yiktuuda'akp ja' winmaa'ñ ku wyinaty pønjabøn tø wyinnaamaaya'aty.

⁶ Jade'ents ja naxwi'ñit jaa'y ni'ijtyi t'ejxtit sa døøn ja Dios tyaky ja nitsø'ok'ajtin.”

⁷ Xjats ku ja Juan ja mayjaa'y jam ñimejniyøø jøts ja tyiknøøbatt, jøts ja tñimaay:

—Mee miku! ¿Pøn mee tø mni'mxyi jøts ku jade'en mgayiktabayø'ødyit ja mbøky, jøts ku yø'øyi chøkyi ku meets ya nõøbjtpi tø mmiñ? ⁸ Yikxon idøøn mjaaa'y'attit, wan idøøn tyik'ijxy jøts ku ja mdsinaa'yin tø xyiktigatsti. Kidi mee kø'ømyi mnawya'añiyi: “Tixi ka'ap ti chøkyi, kumi ja Abraham adøøm n'apteety'amø'ajtyindip”; jøts ka'ats yjade'eni, ti Dios kamaajyip, øy ja pøn ttukmigu'uk'att ja Abraham pøni pøn ja kø'øm y'a'ejxip. ⁹ Jøts tsojk ja nõjcx yikti'dyuañ pøn jaty tkami'øy'ajtip ja Dios.

¹⁰ Xjats ja mayjaa'y ja yiktøøjøø y'amidoojøø:

—¿Ti øø ndu'ump? ¿Sudsø'ampy øø nwinnmaa'nbyaatt?

¹¹ Jøts ja Juan y'adsojimbijty:

—Pøni pøn ja pyikta'aky, pøni pøn ja yjujky'ajtin may'ampy tjagyajptip, wants ja tmo'odi kujkwa'kxy pøn niti kidyim'yajtixidip; pønts ja kyaajyik yjøø'kxik jam, wan ja nayide'en møøt tjøø'kxwa'kxtit pøn ja kyaajyik y'uujkik kidyim'yajtixidip.

¹² Winets ja yikugubajtpidi myemidi jam nõøbjtpi, jøts ja Juan yik'amidøøy:

—Windsøn, jøts øøts, ¿ti øø ndu'ump?

¹³ Jøts ja Juan ja y'adsoojidøø:

—Kidi kugujuu'ñ ne'egi ne'egi x'amidowdi, ja'ayi døøn mbadu'undip sa kyutuky.

¹⁴ Jøts ja tseptumbidi winaagin tyiktøømidøø:

—¿Jøtsimts øøts, ti øø ndumip?

Xjats ja t'adsøøy:

—Kidi pøn o ti xpøjxkidi aguwaniøkøxp, kidi pøn o ti xanitaayibyatti; tajotkuk'atti ja mmijuu'ndyi.

¹⁵ Ixjam idø'øn ja mayjaa'y wyinaty y'awejxti, ja' ja tyajotkukiwyandip, yide'en idø'øn ja wyinmaydi jøts ku ja Juan ja' idø'øn Cristo. ¹⁶ Jøts ja Juan ojts tnigajpxy, ttukmadøø ja mayjaa'y:

—Tiy janch ixyam ndyimdyukmadowdi jøts ku øts yø'øyi tø nniimiñ jøts meets ja nøø nduktanøbattit; jats ø tu'uk ix'oojk xpamiñ pøn meets ja Espíritu Santo mduktatøkiyip, jøts ja' tmime'ent ja tiidyu'unin. Møk'ampy kutujk ja tmimiñ, nija'baat ø xkapaat'aty jøts øts ja nugo nwinaxt. ¹⁷ Jade'en ja ttu'unt ja naxwii'ñit jaa'y sam ariin yikwigumyin. Abiky ja tpiktaajkit ja y'ak jøts ja tñitø'oty ja jøøn midì nijuuni kape'tsp, jøts ja ariinbajk abiky yikpøkjø'økt, jade'ents idø'øn ja jaa'y yiktu'undit sam pøñjabøn tmi'øy'aty tkami'øy'aty ja Dios.

¹⁸ Jade'en idø'øn ja Juan ja t'ana'amin'aty, jade'ents ja ttukmadøø ja mayjaa'y ja øyajpxy ja øy'ayuujk. ¹⁹ Ñayi wyingugajpxiyi'ñ ja møk ja windsøn Herodes ku ja tñidø'øxy'aty ja Herodias, ja myiga'axy Felipe ja ñidø'øxy, jøts ñayi tyamigajpx ja' sa jaty ja jam wyinaty tyundigøø; ²⁰ xjats ja Herodes ka'ap ja tmøjpikta'aky, jaaktyimdyundigøø ja', ojts Juan ja tyikpuxøktøki.

Ku ja Jesús ñøbety

²¹ Ku ja Juan wyinaty ka'anìm yiktsumy, ku ja jam tyiknøbejty ja mayjaa'y, winets ja Jesús jam ñøbajtmøø; ixjam ja wyinaty Dios'ajot'aty ku ja tsajp y'awaajch ²² jøts ja Espíritu Santo ja jade'en ñigida'agyi ejxim tsapak, wa'ats ja yik'ijxy, winets ja Dios Teety y'ayuujk yikmadøø, yide'en ja jap tsajpjøtpy wya'añ:

—Øts me n'U'nk'ajtpy; ndsøky'ajtpy mets jøts njantyajotkujk'ajtpy mets.

Ja jaa'dyi pøn jaty ja Jesús tyeety'apip

²³ Ee'pxmajkin ja Jesús wyinaty ja yjumøjt ku ja tyunk ja tjøpwa'jkii'ñ. Nømdip idø'øn jøts ku ja teedyi ja José. Jøts ja José tteety'aty ja Eli, ²⁴ jøts ja' ja Matat, jøts ja Matat ja Levi. Jade'en ñabayø'øyi Levi ja Melqui, Melqui ja Jana, Jana ja José, ²⁵ José ja Matatías, Matatías ja Amós, Amós ja Nahum, Nahum ja Eslí, Eslí ja Nagai, ²⁶ Nagai ja Maat, Maat ja Matatías, Matatías ja Semei, Semei ja José, José ja Judá, ²⁷ Judá ja Joana, Joana ja Resa, Resa ja Zorobabel, Zorobabel ja Salatiel, Salatiel ja Neri, ²⁸ Neri ja Melqui, Melqui ja Adi, Adi ja Cosam, Cosam ja Elmodam, Elmodam ja Er, ²⁹ Er ja Josué, Josué ja Eliezer, Eliezer ja Jorim, Jorim ja Matat, ³⁰ Matat ja Levi, Levi ja Simeón, Simeón ja Judá, Judá ja José, José ja Jonán, Jonán ja Eliaquim, ³¹ Eliaquim ja Melea, Melea ja Mainán, Mainán ja Matata, Matata ja Natán, ³² Natán ja David, David ja Isaí, Isaí ja Obed, Obed ja Booz, Booz ja Salmón, Salmón ja Naasón, ³³ Naasón ja Aminadab, Aminadab ja Aram, Aram ja Esrom, Esrom ja Fares, Fares ja Judá, ³⁴ Judá ja Jacob, Jacob ja Isaac, Isaac ja Abraham, Abraham ja Taré, Taré ja Nacor, ³⁵ Nacor ja Serug, Serug ja Ragau, Ragau ja Peleg, Peleg ja Heber, Heber ja Sala, ³⁶ Sala ja Cainán, Cainán ja Arfaxad, Arfaxad ja Sem, Sem ja Noé, Noé ja Lamec, ³⁷ Lamec ja Matusalén, Matusalén ja Enoc, Enoc ja Jared, Jared ja Mahalaleel, Mahalaleel ja Cainán, ³⁸ Cainán ja Enós, Enós ja Set, jøts Set teedyi ja Adán, jøts ja Adán ja Dios Teety.

4

Ku ja Jesús ja miku' tyaguwaníyi jøts ja yikpøkyunwá'añi

¹ Xjats ja Jesús wyimbijty jam Jordángit nøø agø'øm. Tø ja Espíritu Santo ja tyatøjkiniyi jøts ja jam yiknøjkxøø tø'øts etjotp ma' niti kya'ity. ² Jamts ja ojts chøøni wixijkyøøw jøts ja miku' ja jam yjot'ejxwá'añi. Niti ja tkaji'kxy jadine'en jøtsnim ja pyaajtøø ja yuu. ³ Winets ja miku' ja ñimaajyøø:

—Pøni janch ku me mjanchDios U'ngi yik'øyi yø tsaa tsapkaaky.

⁴ Jøts ja Jesús t'adsojimbijty:

—Yide'en jap nøkiyixpy wya'añ: “Kuuyi Dios kyajpxy møj, kidi ja ayip ja naxwii'ñit jaa'y nugo tyajujky'ajttip ti jaty yikjøø'kxp.”

⁵ Xjats ja miku' ja ojts wyaanijkyi jam møj kojpkøjpx, jøts ja jam tyuk'ejxøø wine'enin ja kajp naxwii'ñ. ⁶ Yide'en ja miku' ñimaajyøø:

—Nmøøgyøxp mets ya'at tuki'iyi wine'en øts yø kajp nnitani ja møj ja mutsk. Jade'en øts yø tø nyikmø'øy, øyts øts yø pøn ndyimyo'ot pøni pøn øts yø nmo'owampy. ⁷ Pøni xwinguxanaapy tøts jøts ø windsø'øgit, winets mets yø tuki'iyi xja'ajtkøxt.

⁸ Xjats ja Jesús t'adsøøy:

—Miku' jiwa'ak. Kidi øts ya xwin'ixy, pø yide'ents ja Dios kyajpxy wya'añ: “Ja Dios Teety tu'ugyi mwindsø'øgip, ja' tu'ugyi mduujnip ja yja' pøni sa ja wya'añ.”

⁹ Xjats ja miku' ja wyaanøjkxkøimiyøø jam Jerusaléngit kajpkøjpx jøts ja tsaptøjkøjpx yikpajtyøø, jøts ja ñimaajyøø:

—Pøni janch Dios U'nk mets, katswoon ya; ¹⁰ pø nømpxi Dios kyajpxy jøts ku ja tnøjmit ja y'ankilis jøts me myik'ejx'ett, jøts ku me ka'ap ti mjatit. ¹¹ Mets ja mdsa'anjø'øgit jøts mdeky ja tsaa kyakumit kyayo'odsit.

¹² Xjats ja Jesús t'adsøøy:

—Janch nayide'ents ja Dios kyajpxy wya'añ: “Kidi mDios xjot'ixy.”

¹³ Jade'ents ja miku' nisudso'ampy kya'ukwinmāa'nbyatnaa sa ja tjaakjot'ejxkojt ja Jesús, jøtsnim ja jade'en ñimyjststuujtøø.

Ku ja Jesús tjøptøki ja tyunk Galileit etjotp

¹⁴ Jøts ja Jesús ñøjkxnaa Galilea, møk'ampy ja Espíritu Santo ja wyinaty tø tyatøkiyi, jade'en ja tmøøt'aty, tum ja' idø'on ja jaa'y wyinaty y'aawidip y'ayuujkidip o madsøo. ¹⁵ Yats ja yik'ixpiky ma jaty ja tsaptøjk jam, jade'ents ja o pøn kyajxa'agiyi.

Ku ja Jesús yja'jty jadigojk Nazaretit kajjotp

¹⁶ Jøts ja ojts ñijky Nazaret, jam kojpkøjxp ma ja wyinaty tø myutsk'aty. Poo'kxin xøøw wyinaty ku ja tyøjkiyi'ñ jam tsaptøjkjotp, jade'en idø'on ja tkostumbri'aty, xjats ja tmiwa'kukiyi'ñ ja Dios kyajpxy jøts ja tkajpxy. ¹⁷ Ja nøky ja wyinaty tø yikømø'øy midi ja Dios kyugajpxy Isaias yjaay; jøts ku ja ojts t'agiibyaky, ja' ja jap pyaajt ma jap wyinaty yide'en kyøxja'ayi:

¹⁸ Dios Teety øts ja y'Espíritu Santo xpudøjkp,

ja' ø xmøøpy, ja' ø xpiktakp jøts øts ja ayoobi jaa'y ndukmado'odit ja øyajpxy ja øy'ayuujk; ja' ø tø xkexy jøts øts ja ngajpxjot'amøkidit pøn amjotmay'oo'ktip tsaachjotmay'oo'ktip, jøts øts ja nyik'awa'atspidsø'ømdit pøn jade'en ejtnidip sam tsumy jaa'yindi, jøts øts ja nyikwin'ejxwa'kxtit pøn wimbeets kugoots ejttip; jøts øts ja nyik'awa'atspidsø'ømdit pøn øy sagasa yiktundip;

¹⁹ jøts øts ja Dios Teety ja yiknitso'ok'ajtin nnigajpxiyit.

²⁰ Winets ja Jesús t'agiimyujky ja nøky, jøts ja ojts tkømø'øy ja tumbi, jøts ja y'ixaajky, jøts ja mayjaa'y ka'ap ja y'ukni'ejxujniyi. ²¹ Xjats ja kyajpxøjkiyi'ñ jøts ja wyaañ:

—Ixymts idø'on yø jade'en tø jyaty tø kyubety mee mwingujky sa ja Dios kyajpxy wya'añin.

²² Jøts ja ni'ijtyi t'ødyejtøø ja Jesús, ñigyumaapts idø'on ja tjawidi ku myadya'aky ja amdsuj tsaachuj pøni sa jaty ja ñii'mxyidi, jøts ja xem yam ñayiktyidi:

—¿Kidi ja Joséjip idø'on ya'at ja y'u'nk?

²³ Jøts ja Jesús wyaañ:

—Tiigyajpxy yide'en meets inet mdyimwya'añ: “Tsøøyibi, nachøøyi kø'øm”; mnayinømdipts inet: “Jade'en sa øø tø nnimadøy m'ad'ich jam Capernaum, tu'unts inet ya nayide'en mgø'ømnaæxkijxy mgø'ømkajpxkijxy.”

²⁴ Jøts ja yjaakwaañ:

—Tiy janch meets idø'on nnøjmi jøts ku ni tu'ugin Dios kyugajpxy kyayikupiky kyø'ømnaæxkijxy kyø'ømgajpxkijxy. ²⁵ Tyimñømp øts, kawinaak ja ku'økyø'øxy ja wyinaty ya Israelit etjøøjty ku ja Dios kyugajpxy Elías y'atsinaay, ku et kyatuuy tigøøk jumøjt jagujkp winets ja yuu yjanch'ijty o magajp; ²⁶ ni tu'ukts ja kyayiktanigajxtøø ja Elias ya Israel, ne'egi ja' Dios ja tyanigajx pøn jam wyinaty tsinaapy Sarepta, jam Sidón kajp wingon. ²⁷ Nay jats jaa'y wyinatymidi ya Israel pøn putstip ku ja Dios kyugajpxy Eliseo yjaa'ajty, jøts ja ni tu'ugin kyataadyøø ja pyu'uts. Pøn txøøw'ajtp Naamán, ja' ojts ne'egi ja yja' tyay pøn jam Siria kunaajx'ajtp kugajp'ajtp.

²⁸ Xjats ku ja jade'en tmadoodøø jøts ja yjantyimy'ambøjktøø pøn jaty jam wyinaty tsaptøjkjotp. ²⁹ Ojts ja tmiðidø'økti ja Jesús, jøts ja tkajpxpidsømdit jam kajjotp, jøts ja tyiknøjktøø jam kojpkubajkp ma jam tu'uk ja kats'aaw, jamts ja tkutejnaxwa'andi. ³⁰ Jøts ja Jesús jadi'iñi jam mayjaa'y agujkp ñajxy jøts ja jade'eñi chøø'ñ.

Tu'uk ja yaa'dyøjk pøn ja miku' tø tyatøkiyi

³¹ Jøts ja ojts ñijky Capernaumit kajpkøjxp midi jam Galileit etjotp tæmp, jamts ja tyik'ixpiky ja jaa'y ku poo'kxin xøøw. ³² Nigyumaap ja tjawidi ku ja jade'en yik'ixpikyidi, kumi tum ja' ja kyajpxy midi kutujk møøt.

³³ Jamts tsaptøjkjotp wyinaty tu'uk ja jaa'y pøn ja miku' wyinaty tø tyatøkiyi, ja'ats ja møk yikwajnøø:

³⁴ —Majstutk øøts; ¿ti øø xanibøjkp, mets Jesús Nazaretit jaa'y? ¿Ja' me tø xnimeni jøts øø xyikudigø'øty? Wa'ats me n'ejxkapy mbøn mets, pø Diosxi me m'u'nk'ajtp.

³⁵ Xjats Jesús ja miku' t'adsøøy, yide'en ja tnimaay:

—¡Amøñi et, kidi mgajpxy, jøts majsttu'ut yø jaa'y!

Winets ja miku' tyiknaxkidaajky ja jaa'y jøts ja ttawaajch ja jaa'y, nika'ap ja sa ttuuf. ³⁶ Ni'ijtyi ja jaa'y yjantyimchø'jkidøø jøts ja xem yam ñawyajnidøø:

—¿Ti kajpxy ti ayuujk yø jade'en kyajpxpy? iMøjt'a'aky yø t'ane'emy yø miku' jøts yø jatyi chø'øgi!

³⁷ Ja Jesús idø'øn yik'aawip yik'ayuujkijp øy madsøo.

Ku ja Jesús tyikmøpkiky ja Simón Pedro tyaqkmø'jt

³⁸ Xjats ja pyidsiimy jam tsaptøjkjotp jøts ja ojts ñijkxy jam Simón tyigam, jamts ja tyøjkijii'ñ. Pøjkijp tamik ja Simón jam wyinaty ja tyaqkmø'jt, jantyimyjøn'oo'kp ja wyinaty. Winets ja Jesús yikniimaay jøts ja ttu'unt ja may'ajt jøts ja t'ext. ³⁹ Jøts ja ojts t'ixy, ojts ja ñaxkøy ma ja pamaa'y jam wyinaty, jøts ja møk twingugajpxiyii'ñ ja jøømba'am, jøts ja jatyi wyinaajky, jøts ja jaa'y nay jatyi tyanaagyukiyii'ñ, jøts ja kø'øm t'ejxpinaxwä'aky ja kaaky ja jii'kxy.

Ku ja Jesús tyikmøpkiky ja maabyamaa'y

⁴⁰ Kuts ja xøøw yjaxnaa, winets ja Jesús ojts yiktaniniikxy ja maabyamaa'y pønity jam sagasa jajtp; jøts ja ojts tu'uk tu'uk tkønixajy, jøts ja jade'en tyiktsokijxy. ⁴¹ Nay jamts ja winaaginmidi pøn ja miku' ttawajtsidøø nayide'en, jøts ja yjanchnømdi møk:

—Dios U'nkxi mets.

Jøts Jesús ja møk twingugajpxiyii'ñ, ka'ap ja tyikjaty jøts ja kyajpxtit, pø ñijaa'widipxi ja' jøts ku ja' Cristo.

Ku ja Jesús kyajpxwa'kxy jam Galilea

⁴² Xjats ku xyiijndyaajky, jøts ja Jesús chøø'hñ kajpjotp jøts ja ñijkxy jam ma pøn kya'ity. Jøts ja mayjaa'y ja yjanch'ixa'ayi jøtsnim ja yikpaajty ma ja jam wyinaty. Yikta'aniwyandip idø'øn ja', ka'ap ja tmajtstu'tutwä'andi jøts ja choont, ⁴³ yide'ents Jesús ja ñimaajyidøø:

—Nayi nnigajpxwampy øts ja Dios y'øgyajpxy y'ømyadya'aky o magajp, pø ja'agøjpxxi ø tø nyikexy.

⁴⁴ Jøts ja Jesús jam jade'en kyajpxwa'kxy ma jatyi ja tsaptøjk jam Galilea.

5

Ku ja ajkx may'ampy yikma'aky Jesús myilagri'ajtingøjxp

¹ Tuk'ojk idø'øn ja Jesús jam yikpaajty mejy agø'øm ma txøøwi Genesaret; jamts ja mayjaa'y ja ñimejniyøø jøts ja t'amidodukwä'andi ja Dios y'øgyajpxy y'ømyadya'aky. Janch yik'atejmujknipst idø'øn ja Jesús jam wyinaty ²ku ja t'ejxpaaajty majtsk ja barki tawa'ats jam nøø adsay agø'øm, tø ja ajkxmaakpi jam wyinaty pyidsømgøxti, jam tya'ajkxmaajk ja wyinaty tpujti. ³ Winets ja Jesús tu'uk ja barki ttatøjkijii'ñ midi ja Simón yja'ajtpy jøts ja tniimaay wan tniyikiwä'aky waani jøts jam wingon kidyimdyä'ant møøt ja tsayjoajt. Jøts ja jam jade'en y'ixaajky, jøts ja jam tyik'ixpøjktøjkijii'ñ ja mayjaa'y. ⁴ Xjats ku ja kyajpx'abajtyii'ñ jøts ja tniimaay ja Simón:

—Yiknøjxk yø barki jam ma yø nøø køjnkjawi, jamts xniwejtspattit yø mda'ajkxmaajk.

⁵ Jøts ja Simón t'adsøøy:

—Windsøn, tuktsunaxy øø tønjanchnatuñ, ni tu'ukts øøts n'ajkx tøn gapaaty; nøøwejtspatp øts inet yø nda'ajkxmaajk jadigojk, pø tøxi me mwa'añ møk'ampy.

⁶ Jøts ku ja jade'en ttundøø, may ja ajkx ja ojts tmatsti, janch køøtswambim ja tya'ajkxmaajk ja'adi. ⁷ Winets ja tniyamdøø ja myigu'ukti pøn jam wyinaty jadu'ukpi barkijotp jøts ja pyudøkiyidit. Nøjkxti dø'øn ja jam, ojts ja barki ja majtsk tyik'ujtskøxti øy ja yjawi yjanchkøjnkjkinidit. ⁸ Xjats ku ja Simón Pedro ja ojts jade'en t'ixy, winets ja twinguxanaay ja Jesús jøts ja tniimaay:

—Windsøn'ajtm, majtstutk øts, ka'ap øts yø xpaat'aty jade'en, pojkpitumbi jaa'y øts.

⁹ Janch tsø'jkiñip idø'øn ja Simón wyinaty jøts nayide'en ja myigu'ukti, ja'agøjxp ku ja ajkx ja wyinaty jadine'en tma'akti. ¹⁰ Nayi tsø'jkips idø'øn ja Jacobo møøt ja Juan, ja Zebedeo y'una'jkti pøn ja Simón møøt ñamyigu'uk'atyiyi. Jøts ja Jesús tniimaay ja Simón:

—Kidi mdsø'øgi, ixayamyi nduknijawidit sudso jaa'y ja nitso'ok'ajtm tpaatt.

¹¹ Jøts ja byarki ja jam nøøba'am tyikja'attøø, jøts ja jamyi tnikakøjxtøø tuki'iyi, jøts ja tmøødidøø ja Jesús.

Ku ja Jesús tyiktsø'øky ja jaa'y pøn jadi'iñi putsnip

¹² Kuts ja Jesús jam wyinaty tu'ukpi kajpjotp, winets yja'jty tu'uk ja jaa'y, møj pu'uts pa'am ja pøjkijp, jøts ku ja Jesús yik'ejxpaaajty jøts ja twinguxanaay. Jamyi ja ñamyutstaajkøø jøts ja tminuu'kxaaajky, yide'en ja tniimaay:

—Teety, mmøøt'ajtpy mets ja møk'ajtm jøts ø xyiktsø'okt, yiktsokts øts mdsøjk'ajtingøjxp.

¹³ Jøts ja Jesús ja ojts tkønixajy, yide'en ja tniimaay:

—Ndsøky'ajtpy øts jøts mdsø'okt, tsokni.

Ja'ayi ja jade'en wyaañ, jatyi ja pu'uts wyinaajky. ¹⁴ Xjats ja Jesús møk'ampy tniimaay ja jaa'y jøts kidi ja pøn ttukmadøø. Yide'en ja tniimaay:

—Jamyi døʔon mnøjkxt jam teety wyindum, jamts xpikta'akt ja myojxin midi ja Moisés ñi'ana'am, ja'agøjxp ku tø wya'a'ch ja mbu'uts. Jade'ents ja jaa'y ja t'ejxtit tnijawidit jøts ku tø mdsø'øky.

¹⁵ Yikmøjpiktak'adøtsp idøʔon ja Jesús, may ja jaa'y ja ñimen'adi'ichiyyi, namay ja ñamyukyidi jøts ja pyatmadøyi, jøts ja tnankyikts'okwa'añidi ja pya'am. ¹⁶ Ja Jesús jam ja ñijky ma abak et ma niti kya'ity, jamts ja Dios Teety t'ajot'ajty.

Ku ja Jesús tyiktsøjky ja køxujxpi pakxujxpi

¹⁷ Tuk'ojk idøʔon, jam ja Jesús wyinaty yik'ixpiky, jamts idøʔon ja fariseotøjk møøt ja kajpxwejpitøjk wyinaty chøøni wine'enin ja wyinaty tø choondi o magajp, pømbi mendip Galileit etjotp, Judeit etjotp, jøts Jerusaléngit etjotp; ku ja Jesús tnankyjay'ijxyi ja Dios Teety myø'ajtin ku ja pamaa'y ja tyiktsø'øky. ¹⁸ Winets ja jaa'y tkiiyja'jtøø tu'uk ja pamaa'y pøn køxujxp pakxujxp, jøts ja jap tøjktøpy tyiktøkiwya'andi jøts ja ttawingugiiyidit ja Jesús. ¹⁹ Nimats kya'awa'adsis ma ja tyøkidit kumi janch mayjaa'y jam wyinaty. Xjats ja tøjkiixpy pyajttøø, jøts ja ojts tnikiidyu'utti ja tøjik, japts ja tyikwinajktøø ja pamaa'y jøts ja ttawingugii'yidøø ja Jesús jap mayjaa'y agujkpy. ²⁰ Kuts ja Jesús ja ojts jade'en t'ixy kudam ja amumdu'uk ja yjanchja'win tjagyapti, jøts ja pamaa'y ja tnimaay:

—U'nk, nbøkmyee'kxpy mets.

²¹ Winets ja wyinmaadyøjkidøø ja kajpxwejpitøjk møøt ja fariseotøjk, yide'en ja wyinmaydi: “¿Pøn yø jaa'y jade'en, tigøjxp ku Dios yø jade'en twingajpxnaxy? ¿Pøn ja pøky ya t'ukmaa'kxp, kidi tu'ugyip Dios pyojkpmee'kxy?”

²² Wa'ats ja Jesús ja tnijawi sa ja wyinaty wyinmaydi, jøts ja tnimaay:

—¿Tigøjxp ku jade'en mwinnmaydi? ²³ ¿Ja ti ne'egi jawaani jajtni, kuts yø pa'amjaa'y nnøjmit, “Mee'kxpy øts yø mbøky”, uk ku nnøjmit: “Wa'kuki, pøkmukni yø mmaabajt jøts nnøjmit mdigam?” ²⁴ Xyamnim meets inet x'uk'ext mabaat øts idøʔon ja møk'ajtin nmøø'taty ya naxwiin jøts ø nmaa'kxt ja pøky.

Xjats ja tnimaay ja køxujxpi pakxujxpi:

—Pidøkni, wa'kukiñi, wejtsjø'øk yø mmaabajt jøts mnøjknit mdigam.

²⁵ Jaty ja køxujxpi pakxujxpi pyidi'jky, jøts ja tyanaagyukiyi'ñ jam mayjaa'y agujkpy. Wyejtsmujk ja myaabajt ja' ma ja jam wyinaty kyo'kni, jøts ja ñøjknnaa tyøjkwindum, møk ja Dios ja ttamøjawi. ²⁶ Jøts ja ñigyumaap tja'widøø ni'ijtyi, ojts Dios ja ttukmøjawi ttukunuu'kxyjawi, yide'en ja wya'andi ja ñichø'øgi adøtsni:

—Ixyamnim inet ja tø n'ijxyindi midi niwindi kayik'ejxpnim.

Ku ja Jesús tpawaay ja Levi

²⁷ Ku ja jade'en y'ujajty, xjats ja Jesús jam pyidsimy, ojts chøøni jøts ja t'ejxpaapty tu'uk ja yikugubajtpi, jam ja wyinaty chøøni ma ja ttukugubety ja jaa'y øy tyii'ji, jøts ja tnimaay:

—Møødik øts, møøt widejtk øts.

²⁸ Winets ja jaty tyanaagyukiyi'ñ, jøts ja tuki'iyi tum jam tnikakijxy, jøts Jesús ja tmøødiyii'ñ.

²⁹ Jøts ja Levi xøøw ttuuñ jam tyøjkwindum jøts ja twindsø'jkii'ñ ja Jesús, mayts ja yikugubajtpi jam wyinaty møøt jadu'ukpi jaa'dyi. Jade'en ja jam møøt twindsøøni ja kaabyajt. ³⁰ Xjats ja fariseotøjk møøt ja kajpxwejpitøjk tpaagajpxnibøjkidøø ja Jesús pyabøjkpi, jøts ja tnimaadyøø:

—¿Tiku meets yø xmøøtkay yø yikugubajtpitøjk møøt yø ka'øyjaa'dyi?

³¹ Winets ja Jesús y'adsøoy jøts ja tnimaay:

—Pøn tkaja'widip ja pya'am, ti tsøøyibi ja t'ukyikwa'andit. Ja' ja tyik'amaadyaktip pøn pamaa'dyi, pøn pya'am tja'wiy'ejtipp.

³² Kidi ja'ajipts ø tø nnimiñ pøn niwine'en kanabyøkyja'wiyidip. Ja' ø tø nnimiñ pøn tja'widip ja pyøky jøts ku ja pyøkyøødidi, jøts tyiktigatstis ja chinaa'yindi.

Ku ja Jesús yikti'byijky tigøjxp ku ja kya'ayuu'atti

³³ Xjats ja tiibyøjktøø ja Jesús jøts ja tnimaadyøø:

—¿Tiku yø mbabøjkpitøjk janch nekim kyaydi tyo'jxty, jøts yø Juan yja' yjanch'amaay'atti møøt yø fariseotøjk? Ni kyakaydi kyajøø'kxti, janch tsapakajpx'ejtipp yø'.

³⁴ Winets ja Jesús t'adsøoy:

—¿Ma meets jade'en tø x'uknijawi jøts ku tø'øxy ñigaabyi tø'øxy ñi'ukpi winet y'amaay'atti winet kyakaydi kya'uukti ku ja jemyaa'y jamni? ³⁵ Abikñimts ja tiempi tyimya'tmit ku ja jemyaa'y wyinaty kya'uk'eitni ku ja jam wyinaty tø cho'oni; jaanims idøʔon tiy pøn kya'ukaañit kya'uk'uknit, jaanim idøʔon ja y'amaay'attit.

³⁶ Jøts ja nay ja'agøjxp ya'at ttanimadyaktøjkii'ñ:

—Ka'axi pøn wyetpach tta'agiyi jemwyet midi tyimjemñim, ku ja jade'en yiktu'unt jøts kumi mujkpi ja jemwyet jøts ja tjaaktyimgyøøtsni ja wetpach, jaaktyimiyiwenip

ja kyøøts'ajtin ja'. ³⁷ Jøts ka'ap pøn vino tta'adami po'duk midu nãmi'kxñim, ku ja jade'en ndu'unint jatyi ja tyikmigøødsi ja po'duk, windigøøpyts tuki'iyi, windigøøpy ja vino, windigøømyipts ja po'ak. ³⁸ Paty ja vino midu nãmi'kxñim nda'ada'amyin ja jembyo'ak jøts jade'en nimidi kyawindigø'øty. ³⁹ Nayide'ents ka' pøn t'uukwa'añ ja vino midu nãmi'kxñim. Pøn tø t'uukyujni ja vino midu jekyip mi'kxñi, xumi ja' ja chøjkpy, kumi nømp ja tukajpxy: "Yø jekyip mi'kxyip tyimy'ø, ka'ap yø midu tmi'abaaty."

6

Ku ja Jesús ttøjtøø ja ariin yam poo'kxin xøøw

¹ Poo'kxin xøøw idø'øn, winets ja Jesús jam wyinaty ñaxy jam kamjotp møøt ja pyabøjkpitøjk, ja'ats jam wyinaty ttøjtøjt ja ariin tøøm; jøts ja twixatsti ja ariinbajk jøts ja tjøø'kxti. ² Jøts ja fariseotøjk winaaagin yiktøøjdøø, yide'len ja yiknimaadyøø:

—¿Tiku jade'en m'adø'øtsti midu ka'ap pya'at'aty yiktu'unt poo'kxin xøøw?

³ Xjats ja Jesús y'adsøøy:

—¿Ka'anin meets ja Dios kyajpxy x'ijxy midu tnigajpxp sã ja David tuk'ojk tmøøt'adiijch ja myigu'uk ku ja wyinaty yjantymyuu'ookti? ⁴ Pø tsaptøjkøtpymxi ja tøykijyi'ñ, jøts ja tnixajjyi'ñ ja kunuu'kxy tsapkaaky, jøts ja tkaadyøø møøt ja myigu'uk pøn jaty ja jam wyinaty myøøt. Yam ja ka'ap yjapa'at'atyidi jøts ja tka'adyit ja'abi tsapkaaky, ja teetyøjkti ja paat'ajtidip kya'adyip.

⁵ Nayide'ents ja wyaañ:

—Ngudanaapy øts ja nãxwii'ñit jaa'y, jøts øts wamp ti paat'ajtip kapaat'ajtip yiktu'unt ku poo'kxin xøøw.

Ja jaa'y pøn ja kyø'jadi'iñi tøtsnip

⁶ Jadu'ukpi poo'kxin xøøwts idø'øn ja agøjmyi ku ja Jesús tøykijyi'ñ jam tsaptøjkjotp, jamts ja yik'ixpøjkøtkijyi'ñ. Jøts wyinaty tu'uk jaa'y midu y'aga'ngyø' xujxp; ⁷ jøts ja kajpxwejpitøjk jam tpa'ejxti tpagowdi ja Jesús, ja' ja y'ejxwandiip pøni y'ukyiktsøky idø'øn ja pamaa'y ja' ku poo'kxin xøøw, jade'ents ja tni'øøniwya'andi. ⁸ Ti wa'ats ja tnijawi sã jaty ja wyinaty wyinmaydi jøts ja jaa'y ja tnimaay midu wyinaty kyø' xujxp:

—Tani, jøts ixem nøjkx mdani kujk'am.

Jaty ja jaa'y tyanaagyukijyi'ñ jøts ja jam ñijky tanaabyi. ⁹ Winets ja Jesús tnimaay ja mayjaa'y:

—Nyiktø'dip nyik'amido'odip inet yam: ¿Midi'ibi ndu'unimp ku poo'kxin xøøw, midi'ibi kutuky ku n'ødyu'unint u ku nga'ødyu'unint? ¿ku nyiktsoojkint u ku nyik'o'jkint?

¹⁰ Jøts ja twin'ejkxjxy pøn jaty ja jam wyinaty ttamujkiyip, jøts ja tnimaay ja pamaa'y:

—Xajtøw.

Tsoojk ja' jøts ja xyajtiiy. ¹¹ Jøts ja yjadu'ukpi jaa'y yjanch'ambøjktøø, jøts ja xem yam ñawyajnidøø, agø'ømyi sudso'ampy ja tjadyimy'ukyikpøky'a'adit ja Jesús.

Ku ja Jesús twiwijch nimakmajtsk pøn wyinaty kyudanaabyi'atwampy

¹² Winet ets ja Jesús ñijky Dios'ajot'ajtpi jam kojpkøjxp, jam ja Dios Teety ja tnigajpxy tuksunaxy. ¹³ Jøts ku xyijindyaaiky, jøts ja twaadsogijxy pøn jaty ja pabøjkp, jøts ja twiwijch nimakmajtsk pøn ja tyejtip kudanaabyitøjkti. ¹⁴ Ja'ats idø'øn ja'adi ja Simón midu ja xyødejtigajts jøts ja tpiktaajky Pedro; møøt y'uch Andrés ja', møøt ja Jacobo, møøt ja Juan, møøt ja Felipe, jøts møøt ja Bartolomé. ¹⁵ Jam ja Mateo, Tomás, Jacobo pøn ja Alfeo myajnk'ajtpy; jøts ja Simón ja cananista; ¹⁶ jam ja Judas ja Jacobo y'uch; jøts ja Judas Iscariote, pøn wyinaty tkøyakwamp ja Jesús.

Ku ja Jesús tyik'ixpijky ja mayjaa'y

¹⁷ Xjats ja Jesús tmøøtkidaajky ja kyudanaabyitøjk, jøts ja tmøøtja'jty jap jøjyøtpy niduki'iyi møøt ja pyabøjkpitøjk; nay jam wyinaty øy pøndi pøn jaty tso'ondip jam Judea, jam Jerusalén, jøts jam mejy agø'øm jam Tiro jam Sidón. Ja' ja jam wyinaty tø tniemendi jøts ja tpatmado'odit ja Jesús, jøts ja pyamaa'y ja tnãnyiktso'okwa'añidi. ¹⁸ Winaaagin jam pøn ja miku' tø tyatøkiyidi, tsokøxtits ja'. ¹⁹ Jøts ja jaa'y ni'ijtyi tnixajjwya'andi ja Jesús. Pya'atwandiip ja' ku ja ttuktatsø'øky ja myø'ajtin ja pamaa'y.

Ja xondaajkin jøts ja ayo'owin

²⁰ Winets ja Jesús y'ejxi'jky ma ja pyabøjkpitøjk jam wyinaty jøts ja tnimaay:

—Tya'øy'ajtidip ja' Dios kyunuu'kxin pøn ja y'amutsk'ajtin yja'wip, ja'ats pya'attip ja Dios kyutujk midu ja tyanitanaapy ja yjaa'y.

²¹ 'Nay Dios ja tkunuu'kxp pøn yu'oo'ktip xø'oo'ktip, ja' ja tyiknaxjkøjxp.

'Jøts pøn yaxtip jiidyip, kunuu'kxy Dios ja nayide'en yik'ityidi, ja'ats ja ttukpaadidip ja xondaajkin.

²² 'Mgunuu'kxip meets Dios øy meets ja jaa'y mjamidsep'atyidi øts køjxp, øy ja mjabawøpyidi, øy ja mjaga'ømyigajpxyidi, øy mjaagayiktsokti, øy mxøøw mguya'axy kamadøyim pyajikjawidi ja'agøjxp ku ø xpabøkti. ²³ Kidits mjotmay'ookti, kidi x'ayoojidi, japnim ja tsajpjøtpy mwingaxø'økxyidit; pøn jade'en mduujnidip, yø jade'embi jaa'y tyeety'ap tka'ødyundøø nayide'en ja Dios kyugajpxtyi.

²⁴ 'Jøts mjanch'ayøøy mees kumeeñ jaa'y, yaayi meets iij jotkujk mdsinaagyoti.

²⁵ 'Mjanch'ayøøy meets pøn tum jaa o ti tmøøt'ajttip, mjanch'ayuu'ajttip mjanch'axøøw'ajttip meets nøjx.

'M'ayøøy meets pøn yam agujk jotkujk yiknajxtip, mdaya'axtipts meets ja mwinmaa'ñ jadigojk.

²⁶ 'M'ayøøy meets ku mee myik'ødyij myik'øñjmi, pø nayide'ents ojts yiktejt yik'ødeyjt pøn ojts nugo ñadyiji ja Dios kyugajpxy.

Paat'ajtip jøts ja mmidsep yikmijotjimbett

²⁷ 'Ni'ijtyi madowdi wine'enin mja'atti: Tsokti miyujy'atti ja mmidseptøjki, pudøkidi ja' pøn mjaatsojkidip, ²⁸ amidowdi ja Dios jøts tkunuu'kxt ja mmidsep pøn o sagasa mnimaajyidip, ku'amidowi pøni pøn mmi'ambøjkidip pøni pøn sagasa mduwajnidip. ²⁹ Pøni ngojxip mdse'ekip, ja' øy ku xmaa'kxuktit; jøts ku pøn mbøjxkidit ja yukwop, jaaktyimyo'odipts ja mnijan. ³⁰ Kidi kanajtsjawim xjawidi ku tigati myik'amidowdi; jøts kidi jatyi o pøn xamatsti ku pøn o ti tø tnixaji. ³¹ Kidi meets ja jawyeen jade'en xjøp'ixy pøni sa mee xjatsøky, meets idø'øn mbaat'ajtip jawyeen mnajstunip sa dø'øn ja yjawi tsoktin jøts meets ja jade'en xu'unt.

³² 'Øy meets ja'ayi møøt mjanamyaawya'añiyidi pøn mee møøt mnachøkyiyi, ðti øy'ajtints meets jade'en mdumpy? ðTi ja' ja ka'øy jaa'y kyajajitp. Pø tyundipxi ja nayide'en.

³³ ðTi øy'ajtin meets jade'en mdumpy øy meets ja'ayi xjamay'aty pøn mee nayide'en mdu'unxiyip? Pø tyundipxi ja ka'øy jaa'y ja nayide'en. ³⁴ Uk ja'ats meets o tigati mduk'anuu'kxpy pøn mee m'a'ejxip tyikwimbetp jawaani mayjawi, ðti øy'ajtints meets jade'en mdumpy? ðTi ja ka'øy jaa'y ja jade'en tka'anuu'kxyajktip o tigati ja yja' jøts ja myiga'øy jaa'y ja nayide'en ttukubatti jawaani may? ³⁵ Ka'ats meets idø'øn xmidsepøkt ja mmidsep, tsokti xmiyujy'attit, mduujnip meets ja may'ajt ja'. Øy meets ja tigati xuk'anuu'kxt jadi'ñi, kidits meets ja xjøp'ixy'aty jøts ja mmigubajtxidit jawaani møj jawaani may. Møjts meets ja myikwimbetjxyidit, ja Dios Teety tsajpjøtpyt jade'en meets ja m'u'nktejyit; ti sa ja Dios Teety tmi'øy'aty nayide'en ja ka'øy jaa'dyi ja namyikaxi jaa'dyi. ³⁶ Mja'myatstip meets jøts mba'ayo'odip o pøn nayide'en sam ja Dios Teedyin ja tpa'ayøyin.

Kidi pøn o ti xawindsø'ødyi

³⁷ 'Kidi pøn nugo o ti xapøky'ejxti, jøts Dios ja nayide'en mgapøky'ejxidit. Maa'kxukti, jøts ja Dios nayide'en mmaa'kxukidit. ³⁸ Mo'odi o ti pøn, winets o ti nayide'en mmo'ojidit ja Dios. Nayide'en meets ja mmo'ojit mgamo'ojit pøni sa meets ti xyaky xkayaky møj may o ti. Nayide'en meets ja Dios mdunit pøni sa meets mmigu'uk xuñ. Nay ja'ats ja yik'awetsp.

³⁹ Xjats ja Jesu's ttanimadyaktøjkiy'i'ñ jadu'uk ja madya'aky, yide'en ja wyaan:

—Ma ja winap jaa'y tø t'uktuu'niway ja myiwinap jaa'y? Pø namajtskxi dø'øn ja tyimgyunaxtit ku et'aaw ja ma tpaattit. ⁴⁰ Uk kuts pøn, pøn tni'ixpøjkiymiyidip o ti tunk, ka'axi mibaat twinaxtit ja yik'ixpøjkipidi; pø wan idø'øn jaanim wyinaty.

⁴¹ 'Jøts meetsmi, ðsuso dø'øn ja mmigu'uk pyøky x'ejxpajtyi jøts ja mja' ne'egi kxa'ixy kudam ja jawaani møj? ⁴² Jøts, ðsudsots mets idø'øn namyikajxibim xkajpx'øyiwy'añ yam mets ja mdsinaa'yin kujp aatskøjxp. ⁴³ Jade'ents idø'øn ja øyjaa'y pøn øyjaa'y, ka'ap ja t'aawi tjootti ja ka'øybi winmaa'ñ, ka'ap ja yjemwa'añ tyewa'añ kumi øyjaa'y ja'; pønts ka'øyjaa'y'ajtp ja ka'øybits ja y'aawip yjoottip, yjemwa'andi tyewa'andi kumi jam idø'øn ja tyimyoødidi ja kya'øy'ajtindi y'am yjotp. Tum jam ja pyidsømguixy jøts ja tkajpxnaxti jade'en.

Pøni sa wyimbidsimy øy ti, ja'ats tyikwingaxø'kp pøni sa ti y'øyi kya'øyi

⁴³ 'Ma meets øcha'amguipy tø x'uk'ixy jøts ku ja tyiktøømi ja ka'øcha'am; uk ja ka'øcha'amguipy tyiktøømi ja øcha'am, nima. ⁴⁴ Ja tyøøm ja kipy yikta'ejxkajp pøni sa ja tyøømi øy ka'øy: ka'axi ja iigi tsa'am yikwiduky kujp kipyøjxp, ni jam ja uvi tsa'am kyawinaky jam kujp aatskøjxp. ⁴⁵ Jade'ents idø'øn ja øyjaa'y pøn øyjaa'y, ka'ap ja t'aawi tjootti ja ka'øybi winmaa'ñ, ka'ap ja yjemwa'añ tyewa'añ kumi øyjaa'y ja'; pønts ka'øyjaa'y'ajtp ja ka'øybits ja y'aawip yjoottip, yjemwa'andi tyewa'andi kumi jam idø'øn ja tyimyoødidi ja kya'øy'ajtindi y'am yjotp. Tum jam ja pyidsømguixy jøts ja tkajpxnaxti jade'en.

Majtsk jøøp ja pøch kyøjpk

⁴⁶ 'Niti øy'ajtin meets jade'en xkatuñ ku mee xjanøjmi, "Nwindsøn'ajtim, nwindsøn'ajtim", jøts ka'ats xpadundi pøni sa njawa'añ. ⁴⁷ Ya net ndukmado'odit pønin ja kyaxø'økti ja jaa'y pøn ø xnimemp jøts øts n'ayuujk ja xpatmadoojidi, jøts ja jade'en tpadundi sa nwa'añ. ⁴⁸ Jade'enin idø'øn ja nbiktaajkin sam ja jaa'y tyøjkøyin, jawyeen ja køjnk øy øy tñidajyii'ñ ja tyøjk, jøts ja tsaaj ja amuum ttukpøchkojpk'ajty. Xjats ku ja møj nøøgom jam

wyinajky, aguwani ja tyimiykjō'tjō'okwa'añ ja tōjk, jōts ja niwine'enin nisā tkatuufi, kumi tsaa ja wyinaty tyeky'ajtpy. ⁴⁹ Pōnts ø xjapatmadoojidip ja n'ayuujk jōts ka'ap jade'en tpadundi sa nwa'añ, ja'ats idō'ōn jade'endi sam ja jaa'y midī tōyōjk tkoj xixñaxkijxy. Niti ja tkadukpōchkōjk'ajty, jōts ku ja mōj nōōgom jam wyinaajky jaty; ja tmimajadaajky, ojts ja tyikiday jōts ja tyimiykudigōōy.

7

Ku ja Jesús tyiktsō'ōky ja romanit soldadi ja tyumbi

¹ Xjats ku ja Jesús jade'en tnimaagyjxy ja jaa'y, winets ja ñijkxy Capernaum. ² Jamts wyinaty chōōni ja soldadi windsōn, romanit jaa'y ja'. Jamts tyumbi ja tu'uk midī ja janchka-majtsu'udyim yja'wip, mōwa'añ ja yjančpikiyi, ookwanip ja wyinaty. ³ Ku ja soldadi windsōn tnimadoōy ja Jesús, winets ja ttanigüejxy winaaagin ja israelit mōjaa'dyōjkti, jōts ja t'atstuk'amidoowa'añ ja may'ajt, wan tmiñ ja Jesús jōts cho'okt ja tyumbi. ⁴ Xjats idō'ōn ja tninōjktōō ja Jesús jōts ja ojts t'amidowdi ja may'ajt mōk'ampy, yide'en ja tnimaadyōō:

—Paat'ajtip xpudōkit yō soldadi windsōn; ⁵ kumi chōjky yō' adōm ngajp, nayō'ōts tō tni'ane'emy jōts ja tsaptōjk tō kyōjy.

⁶ Winets Jesús ja tmōōdiyii'ñ. Jōts ku ja jam wyinaty yja'atwanidi mā ja tōjk jam, jōts ja soldadi windsōn ttukjōpkubajtyii'ñ pōn jaty ja minamyaajyip, jōts ja ttuknimaay ja Jesús:

—Mets teety, kidi xka'ōyjawī, ka'ap ø xpaat'aty jōts mets ya mdōkit ndōjkjōōjty; ⁷ paty ø kō'ōm tō nganay'a'ejxyi jōts mets jeexyip kō'ōm tō n'ats'ixa'ay. Ana'am ja'ayi, jōts ōts ja ndumbi cho'okt. ⁸ Ane'emy ø nayide'en nwindōn xyik'ity, nay ja ōts ndumbitōjkmidi pōn ø n'ana'amidip. Ku pōn nnōjmi: "Nōjx", nōjxpts ja'. Uk nnōjmits ōts yō ndumbi o ti, jatyi'ts yō jade'en tpaduñ.

⁹ Ja'ayi Jesús ja jade'en tmadoōy ñigyumaap ja tja'wiyii'ñ ku ja jaa'y jade'en, jōts ja tniwa'akjimbijty pōn jaty ja jam wyinaty payō'ōyip, jōts ja tnimaay:

—Tyimyjanch, ni Israelit jaa'y ōts ya mā jade'en ngapaadynim sam ya'at jaa'y tmōōdin ja janchja'win mōk'ampy.

¹⁰ Jōts ku ja waabi yja'ttōō mōōt ja jōpkuyō'ōyibidi jam tōjkjōtp mā ja pamaa'y jam wyinaty, tōdamik ja wyinaty myōkōjki ja pamaa'y.

Ku ja Jesús tyikjujkyiky ja ku'ōktyō'ōxy myajnkun'k jam Nain

¹¹ Ukjajts ja jade'en, xjats ja Jesús ñijkxy jam mā kajp txōōwi Nain, mayjaa'yts idō'ōn ja jam wyinaty pawidejtip, may ja pyabōjkpitōjk ja jam tmōōdi. ¹² Kuts ja yja'jty jam kajpwingon, jōts ja ojts t'ejxpaaty tu'uk ja oo'kpi yikpāgi'y jōts ja y'atsnaxōkit, tu'umchi dō'ōn ja tō'ōxyōjk ja t'u'nk'aty, jōts ku'ōktyō'ōxy ja'. Mayts ja yik'oo'kpi pidō'kpi jamdi. ¹³ Jōts ku ja nwindōn'ajtim ojts t'ixy ja ku'oo'gi, yik'ayo'lijxyim, jōts ja tnimaay:

—Amon, kidi mya'axy.

¹⁴ Winets ja Jesús twingunōjkxyii'ñ ja oo'kpi, jōts ja kajuun ja tniyajyii'ñ, jōts ja oo'kpi kiibyī ja tkāidyaktōō, jōts ja Jesús tnimaay ja oo'kpi:

—Mets u'nk idō'ōn nnimaapy: ¡Pidō'ok!

¹⁵ Xjats ja kyu'xkukiyii'ñ pōn idō'ōn wyinaty tō y'ōōky jōts ja kyajpxpinibōjkxyii'ñ, xjats ja u'nktaak ja yiktagidōjkiyii'ñ ja y'u'nk, ja Jesús ja kōmōōjyiyip. ¹⁶ Jōts ku ja jade'en niduki'yī t'ejxtōō, jōts ja yjančō'jikidōō, jōts ja ttukmija'widōō ttukunuu'kxyja'widōō ja Dios, nōmdip ja':

—Ya Dios ja myōjkugajpxy tō kyaxi'iky adōm njaa'yjōōjty.

Nayide'en ja wya'andi:

—Dios tō tniñiñ ja kyajp jōts tpuđōkit.

¹⁷ Yiknija'wigyōjx ja jam wine'enin ja jaa'y jam chōōnidi jam Judeit etjōtp, ku wyinaty ja Jesús tō tyikjujkyiky ja oo'kpi.

Ku ja Juan Bautista tkexy ja kyugajpxy

¹⁸ Xjats ja Juan Bautista ja tnija'wiyii'ñ, nayide'en ja pyabōjkpi ja wyinaty tō tyamimadya'agiyi, winets ja tyajxyiyii'ñ namajtsk ja pyabōjkpi, ¹⁹ jōts ja ojts ttanigüexy ja Jesús, jōts ja t'atsyiktō'ōdit pōni ja 'a idō'ōn janch Cristo pōn wyinaty menwamp yiknitsokpi. Uk kidi ka'ats, winets ja abikpyi ja tjo'p'ejxti. ²⁰ Jōts ja wingon twingunōjkxidōō ja Jesús pōn ja Juan wyinaty tō tyanigüexyidi, jōts ja tnimaadyōō:

—Ja Juan Bautista ø tō xkexy jōdsik ø nyiktō'ōt pōni janch ja Cristik mets idō'ōn midī yiknigajpxp menwamp yiknitsokpi. Pōni ka'ats, winets øōts jadu'ukpi njōp'ext.

²¹ Ku ja wyinaty tō yja'atti, winets ja Jesús nay jaty tyiktsōōjky may ja jaa'y pōmbi pa'am pōjkidip, pōmbi o ti ja'ambi tmōōt'ajttip, pōmbi ja miku' tmōōt'ajttip, ñayikwin'ejxwa'kxmip ja' ja may winap jaa'y. ²² Jōtsnim ja y'adsojimbijty jōts ja wyañ:

—Nōjxti jōts xukmado'ōdit ja Juan ti jaty ya tō x'ejxti xmadowdi. Tamimadya'akti jade'en sa yō winap jaa'y wyin'ejxwa'lxkti, sa yō pakpamaa'y yō'ōdyi, sa yō putspi cho'okti, sa jaty

yø nat jaa'y myadowdi, sã oo'kpi yjujkyøkti, jøts sã ayoobi jaa'y yiktukmadowdi ja øgyajpxy ja ømyadya'aky midi yiknitsokp. ²³ Ejtni xoni ja'adi pøn ø xmibøjktip, ka'ap twinmayimbettit twinmay'adøjt sats ø xjanchjawidi.

²⁴ Xjats ku ja wyimbejtnidøø midi ja Juan wyinaty tø tkexy, jaats ja Jesús ttamimadyaktøjkii'ñ ja mayjaa'y, ja Juan yiknimadyakp, yide'en ja wyaañ:

—¿Ti meets ojts x'ats'ixy jam abak etjotp? ¿Tu'uk ja jaa'y midi jade'en ejxim kapy midi poj yik'ø'yimbejtijp yik'ø'y'adøjip? Ka'axi ja yjade'eni, pø tu'ukyixi tmi'ity ja wyinmaa'ñ. ²⁵ ¿Tits idø'on ojts x'ats'ejxti? ¿Tu'uk ja jaa'y pøn janch øybi wet tø ñadyaxoxiyi? Pø wa'atsxi mee xnijawidi pøn tsuj wet nadyaxojxidip, pøn nekim taxondip pyikta'aky, jamts ja ñachokj'ityidi jam windsøn tyøjkjotpi. ²⁶ ¿Tits idø'on mjanch'ats'ejxtøø? ¿Tu'uk Dios kyugajpxy? Janch ja', ja' midi jawaani mõj, nika'ap yjade'eni sam yjadu'ukpidi. ²⁷ Yø Juan idø'on yiktejp ku Dios kyajpxy yide'en wyaañ:

Ixya ngajxjawyeni tu'uk ja nngugajpxy,

pøn tyiktøøjip tyiktuudaajikp ja jaa'y wyinmaa'ndyi jøts myikupøkt ku xipøjkin xminøjkt.

²⁸ Ndukmadoodip ixyam jøts ku ni madsoo ka'ap pøn jade'en pyidsimñim ja Dios kyugajpxy sam yø Juan Bautista; pøni pønts øts nja' xpaduujnip jøts ku tyøki ma øts ngutuik ndanitanit ja njaa'y, ja'ats ne'egi mõj yikpiktakp jøts nika'ap ja Juan Bautista.

²⁹ Jøts ku ja jaa'y ni'ijtyi jade'en tmadoodøø pøn jaty wyinaty tø yiknøbetiydi ja Juan, nayide'en ja yikugubajtpidi, jøts ja tjanchmibøjktøø ja Dios jøts kudam ja ka'ap jade'en mibaat wyinmaamy'a'aty; ³⁰ ka'ats ja tmøjpiaktøø ja fariseotøjkti jøts ja kajpxwejtøjkti sã Dios ja wyinaty tø tyamidsokyidi, jøts ja ka'ap tkupøjktøø jøts Juan ja yiknøbatidit. ³¹ Jøts ja nwindson'ajtim wyaañ:

—¿Pønxik øts jade'en meets n'uktami'ejxip? ³² Jade'en meets ndami'ejxi sam mutsk una'jkindi muum y'adø'øtsti jap maayjotpy ku myi'unaj'jk tkagupøjkiiyidi ja kyuyajtin midi yjatsøjkpy yjaguyatwampy, jade'ents ja ñawya'añidi: "Tø øø yikxon njaxu'uxy jøts ni mga'atsti; tø øø jotmay'øøgyim nja'øømi, nijade'ents mgajotmay'oo'kmidi." ³³ Kuts ja Juan Bautista tø myiñ jøts ja kyakay kya'uuky ku ja ka'ap vino t'uuky, jøts meets mnimy jøts ku mikul' ja myøøt'ajtpy. ³⁴ Jøts ku ø tø njamemi jøts ku ø ngaamyi n'ukmi, jøts mnømididi jøts ku øts janch kaxim ngay n'uuky, jøts ku øts ja møøt namyigu'uk'atyiyi ja yikugubajtpidi møøt ja ka'øyjaa'dyi. ³⁵ Pøni pønts ja Dios yja' tkupøjkip, ja'ats tjä'gyukip sam ja Dios yja' tskyin.

Ku ja Jesús jam fariseo tyøjkjotp wyinaty pøn txøøw'ajtp Simón

³⁶ Xjats ja fariseit nidu'uk tñimaay ja Jesús jøts ja tmøødit kaabyi tyøjkwindum. Jøts idø'on ja ojts tmøødi, ojts ñijky, tyøjkii'ñ jam fariseit tyøjkjotp, ja kaabyajt twinguwa'jtsiyi'ñ.

³⁷ Winets ja tøøxyøjk tu'uk pøn ka'øyjaa'y'ajtp midi jam tsinaapy jam kajjotp, ku ja tñija'wiyi'ñ jøts ku ja Jesús wyinaty tø ñijky kaabyi jam fariseit tyøjkjotp, jamts ja ojts tmija'aty ja pa'akxuu'kpi, tsagueegi tu'jtsjotpy. ³⁸ Niyaxpim ja twingugu'xii'ñ ja Jesús tyeky, jøts ja wyeenøø ja ttuktaxø'jky. Jøts ja nay jaty ja wyaay ttawibø'øty jøts ja ojts tssu'kxy, ojts ja ttabajä'axy ja pa'akxuu'kpi. ³⁹ Jøts ku ja fariseo ja ojts jade'en t'ixy pøn ja Jesús wyinaty tø wyayi migaabyi, yide'en ja wyinmaa'ñ ja jap tyikyø'øy: "Pøni janch Dios kyugajpxy yø jaa'y jeexyip, tø yø jeexyip tjä'wyini pøn yø ixa tojnip majtsip, pøni pøn tø'øxyøjk yø', pø ejtpts yø yjantyimpøkyun'ity yø tø'øxyøjk." ⁴⁰ Winets ja Jesús tñimaay ja fariseo:

—Simón, nmigajpxwampy.

Jøts ja fariseo y'adsøøy:

—Yinet Windsøn.

⁴¹ Xjats ja Jesús wyaañ:

—Namajtsk idø'on ja jaa'dyi pøn tmiyoj'ajttip tu'uk ja meen'anuu'kxyajkpi. Tu'uk tmiyoj'aty magoxk magø'pxy denario jøts jadu'uk wixijxkmyajk; ⁴² jøts kumi ka' idø'on ja tkubatti nipøn tkagubety ja yoj, jøts ja meen'anuu'kxyajkpi ka'ap ja sã tijy øy ja tkagubattit, ojts ja ttaamee'kxy ja myiyoj. Nigajpxts inet, ¿pømbi ja jawaani tsojkip, pømbi ja jawaani takajxajkpi?

⁴³ Jøts ja Simón y'adsøøy:

—Ja' yjawi pøn ja yoj kajaa tmøøt'ajtp.

Jøts ja Jesús wyaañ:

—Janch tiy idø'on mwa'añ.

⁴⁴ Xjats ku ja Jesús ojts t'ixy ja tø'øxyøjk jøts ja tñimaay ja Simón:

—M'ijxpxyi yø tø'øxyøjk, ku tø ndøki ya mdøjkjøøty ka' mets ja nøø tø xmø'øy ja ndekpyujik; tøts øts yø tø'øxyøjk ne'egi xapakpujy ja wyeenøø jøts ja wyaay yø tø ttuktati'ich.

⁴⁵ Ka'ats mets ndeky tø xtsu'kxi, jøts ku yø tø'øxyøjk, jaayip ku tø ndøki ixa øts ndeky yø jade'en xtsu'kxi. ⁴⁶ Ka' mets ngubajk aceite tø xpiktaajkxiyi, tøts øts yø tø'øxyøjk ja pa'akxuu'kpi ndeky xpiktaajkxiyi. ⁴⁷ Paty mets idø'on nnøjmi, pøni pøn ja tsojkin waani

tmøøt'ajtp nayide'ents ja waani yikpojkpimaa'kxt; jøts yø tø'øxyøjk møj ja tsojkin yø tmøøt'aty paty pyaat'aty jøts ja pøky yikmaa'kxkøxt.

⁴⁸ Jøts ja tnimaay ja tø'øxyøjk:

—Nmee'kxpy øts, u'nk, yø mbøky.

⁴⁹ Winets ja migaabyidi pøn jaty ja jam wyinaty møøtsinaajyip yjanch-nawyambinaxwaj'kidøø:

—¿Pøn jaa'y ya'at ndejint, sudso pøky paat yø tme'e'kxy?

⁵⁰ Jøts ja Jesús yide'en ja tnimaay ja tø'øxyøjk:

—Ja'agøjxp mets ja mbøky tønmaa'kxi ku me tøn xjanchjawi, nøjknits jotkujk.

8

Ja tø'øxyøjk pøn jaty ja Jesús pyudøjkidip

¹ Tøts ja wyinaty y'uknaxy jade'en, jøts ja Jesús t'ayø'øgyijxy ja kajp ja møj ja mutsk møøt ja pyabøjkpitøjk namakmajtsk, jøts ja tkajpxwa'kxy ja øgyajpxy ja øy'ayuujk mididi yjaa'y ja tyanitanaapy. ² Nay jam idø'øn ja yjamyøøt'ajtmiiyidi ja tø'øxyøjkmididi pøn ja wyinaty tøn tyik-tsø'øky, jøts pøn ja wyinaty tøn tkajpxpidsøjmi ja miku' jøts ja ttukmajtstu'uty. Ja María dø'øn jam wyinaty pøn yiktejp Magdalena, pøn ja miku' wyinaty niwixujk tøn myajtstu'udyi; ³ nay jam ja Juana wyinatymi, ja Chuzá ñidø'øxy, ja' ñidø'øxy pøn ja Herodes tumbi'ajtip, pøn tuki'iyi t'ejxp tnija'wip ti jam ejtp ka'ejtp ma ja Herodes jam wyindsøn'aty; jam ja Susana wyinatymi jøts may abikpyi jaa'dyi pøn jaty ja tigati tabudøjkiiyidip.

Ku ja Jesús tmadyakpaaty ja jaa'y pøn nøjkn neppi

⁴ May jaa'y ja Jesús jam øjts ñimiñiyi pøn jaty tsoo'ndip o ma abikyajp jøts ja Jesús yik'ejxwa'añ; jøts ku ja jaa'y ja may'ampy myujkpejty, jøts ja ttamimadyaktøjkiiy'iñ tu'uk ja ejxpajtin madya'aky. Jøts ja wya'añ:

⁵ —Tu'uk idø'øn ja jaa'y chøø'ñ tømto'wøpi. Jøts ku ja twijy, øy ja tømto o ma ñaxkidaajky. Mididi'ibi ñajtswøjiiyi'ñ jam tuu'am, ja'ats yiktaa'nbu'uxkigyøjx jøts ja joon ja wa'ats tpeemujkijxy. ⁶ Mididi'ibits ñajtswøjiiyi'ñ jam tsaa' agujkp, øjts ja jam yjamuxy jøts ja jaty; tyøtsj'ø'knaa ja'agøjxp ku ja naajx jam kyaneki. ⁷ Mididi'ibits ñajtswøjiiyi'ñ ma ja maguyup jam wyinaty myuxwa'añ, ja'ats ja øjts ñi'aa'mbajtiniiyi. Ku ja myuxmi winet jøts ja niwime'en kyayikyonmøjkiiyøø. ⁸ Mididi'ibits ñajtswøjiiyi'ñ jam pu'uty ñaxkøjxp, jøts ku ja yøøñ jøts ja øjts yikxon yjantyimdyøømi, magø'pxy magø'pxy ja pyajkpejty ja tu'ukpi tømto.

Ku ja Jesús jade'en myadyak'abajtiyi'iñ, jøts ja møkta'aky wya'añ:

—Pøni pøn ja'gyukiwyamp, wan tjä'gyuki.

Tigøjxp idø'øn ja Jesús ejxpajtin madya'akyøjxp ja y'expøjkin tyaky

⁹ Winets ja pyabøjkpitøjk ja yiktøøjiiyøø ti dø'øn jade'en tyijpy, sudso yikja'gyukit ja'abi madya'aky. ¹⁰ Xjats ja t'adsøøy jøts ja tnimaay:

—Meets yø Dios mduknija'wiyip ja y'ayu'uch winmaa'ñ sa ja' kyutujk mididi ja tyanitanaapy ja yjaa'y, jade'ents meets ja mdyimyiktukmadø; ka'ats ja abiky jaa'y nayide'en madya'akyøjxp tnijawidit, ejxpajtin madya'akyøjxp øts yø ja'ayi ndamimadya'aktit jøts kø'øm tñimado'odit tñanimado'odit nayide'en pøni sa ø xpabøkti xkapabøkti.

Ku ja Jesús tñigajpxy sudso dø'øn yikja'gyukit ku jaa'y neppi ñijky

¹¹ Yide'en idø'øn yø madya'aky tiji: Jade'en ja tømto yikpikta'aky sam ja Dios kyajpxy y'ayuujkin; ¹² jøts mididi yiknaajtswøjiiyi'ñ jam tuu'am jade'en ja yikpikta'aky sam ja jaa'y pøn ja tpatmadoodip ja Dios kyajpxy, jøts ku ja t'ukja'gyukididi xjats ja miku' ja jaty; pyøjkxiyididi jøts ja ka'ap tñibøktit, jøts ja nisudso'ampy kyanitso'ok'attit. ¹³ Jøts ja tømto jade'en yikpikta'aky mididi yiknaajtswøjiiyi'ñ jam tsaa' agujkp sam ja jaa'yindi pøn tñimadoodip ja øgyajpxy ja øy'ayuujk, jøts ja ejtni xoni t'ukpabøjkojti y'ukjanchja'widip ja'; kuts ja yiin waan sa tkujatididi jøts ja jaty; tmajtstu'utti, jaty; ja ñajyibikpyikta'agyididi ja'agøjxp ku ja jade'endi sam ja ujts kya'aa'tsmiweninim. ¹⁴ Jøts ja tømto mididi ñajtswøjiiyi'ñ jam kujp agujkp, jade'en ja yikpikta'aky sam ja jaa'dyi pøn tñimadoodip ja øgyajpxy ja øy'ayuujk, yjajanchja'widip jøts nika'ap t'ukpadunididi, ja' ja ne'egi yikmajadaktip ja pyikta'aky, ja myeeñ, ja yjingaap, ja yjotkujk'ajtindi. Jade'ents ja tka'ukyikmøjkinididi ja øgyajpxy ja øy'ayuujk jøts ja niti tkayikwingaxø'økti Dios wyindum. ¹⁵ Jøts ja tømto mididi ñajtswøjiiyi'ñ jam pu'uty ñaxkøjxp, jade'en ja'ami sam ja jaa'dyi pøn amumjøoit nadyamiyojxidip ja Dios, jøts ja jade'en tpatmadojidi ja y'øgyajpxy y'ø'y'ayuujk. Møk ja yjanchja'win ja tpi'akta'akti, ka'ap ja juuni ttamajtstu'utti, ja'ats idø'øn tyikwingaxø'ktip ja øgyajpxy ja øy'ayuujk.

Niti jadi'iñi kyatañ, kuwaañim ja tyimiyiknijawi

¹⁶ Kidi ja'ajip ja jaj yiktaguno'kp jøts ja yikumtst uk jøts ja yikpikta'akt jap maabajit patki'py; ja' ja wya'añ jøts ja yikpikta'akt jam køjxp ma yjajt tyøø'kxt, jøts ku jam pøn tyøkti

ka'ap ja jam kube'ets kugoots yja'attit. ¹⁷ Ti ka'uckyikpatp ku ti yjaju'uch'ity. Øy kajpxy ayuujk yjagayiknigajpxwa'añ, kuwanits ja yiknijawi pøni sa ja y'ejxi tyiyi.

¹⁸ Jade'ents idø'on øy xmadø'odit; pøn tpabøjktip jøts tmadogukiwya'andi øy øy, jaakyikpudøkipts ja yikxondi jøts ja tjä'gyukidit. Pønts ka', jaaktyimiykpojkxidip ja' ja wyijy'ajtindi mididi ja jaakjanadyaja'wiyidip jøts ja nisudso'ampy tkidyimya'gyukidit.

Ja Jesús tyaak jøts y'uch

¹⁹ Winets ja Jesús y'uch yja'ttøø møøt ja tyaak ma ja jam wyinaty, nika'ap idø'on ja tpaatti wingon kumi janch mayjaa'y jam wyinaty. ²⁰ Xjats ja Jesús yiktukmadøø jøts ja yiknimaay:

—Ja mdaak møøt ja m'uchti ja' mmigajpxwajnip, ixap ja tøkwiumpyti.

²¹ Jøts ja t'adsøøy:

—Ja' øts idø'on ndaagip, ja' øts idø'on n'uchidip nmigu'ugidip, pøn tmadoodip ja Dios y'øgyajpxy y'ø'y'ayuujk jøts ja jade'en tpadundi pøni sa nwa'añ.

Ku ja Jesús tyiknajxy ja møk poj jøts ku ja tyik'amøkiyü'ñ ja mejy

²² Winets ja nay ja'abi xøøw tyøjkiyü'ñ barkijøtpy møøt ja pyabøjkpitøjk, jøts ja tnimaay:

—Wan tjaa'myindi jam jaduktamajñ.

Jøts ja ñøjkxtøø, ²³ jam ja wyinaty mejkyujk'amdi ku ja Jesús mya'oo'knaa. Jøts ja møk poj ja jam jøtmøñ pyaajtidoø, yikxon ja nøø jam barkijøtp yjanchtøjkyini øy ja tyiknigtøøñit.

²⁴ Jøts ja tyujxtøø ja Jesús jøts ja tnimaadyøø:

—iWindsøn! iWindsøn! iNøøjøø'kxwaa'nindip!

Winets ja Jesús pyidi'jky jøts ja møk'ampy twingugajpxiyü'ñ ja møk poj ku ja nøø ja tyiktømjü'iky adsø'jkibim; jøts ja poj jaty: yjanch'amø'jty, jadi'iñi ja myøøñ. ²⁵ Jøts ja tnimaay ja pyabøjkpitøjk:

—¿Ma dø'on ja mjanchja'windi xyiktunwa'andi?

Tø ja yjanchnichø'jkidyigøøñidi, ñigumaap ja tyimya'widøø jøts ja xem yam ñawajnidøø:

—¿Ti pønims ya'at jade'en, pø mimadojpts ja poj yø', pø mimadojpts ja nøø yø' ku yø t'ane'emy?

Ja Gadarit jaa'y pøn wyinaty ja miku' tø tyatøkiyi

²⁶ Jøtsnim ja yja'ttøø jam Gadarit etjotp mididi idø'on ja jaduktamajñ tamp Galileit et wingon. ²⁷ Jøts ku ja Jesús jam wyinaajky, yø'øpyidsiimy, jøts ja ñimejnøø tu'uk ja kugajp pøn ja miku' wyinaty jekyip tø tyatøjkiyi. Niwa'ats ixwa'ats ja wyidejtni, ka'ap ja tyøjktøp y'uktsinaañ, jam ja chinaadyakni ma ja oo'kpi ñaxøkidi. ²⁸ Jøts ku ja t'ejxpaajty ja Jesús jøts ja jaty twinguxanaay, yide'en ja tjantyimñøjmi møkta'aky:

—Jesús, Dios U'nk tsajjøtpyit, ¿ti ø xanibøjkip? Tun may'ajt kidi xjantyimy'ayo'onduñ.

²⁹ Ja' idø'on ja jade'en tyikwamp ku ja Jesús ja miku' møk'ampy t'ane'emy jøts ja jam pyidsø'ømt ja jaa'y y'am yjotp. Ejtp idø'on ja miku' ja xyumim'adi'ichiyi ku ja jyayik-tagiwü'ñ jyayiktapakwü'ñ puix kadeen; jaty ja ttapøjtiguixy yam ja jaa'y ja jade'en tø yja'uktajøtkujk'ajtmiyi jøts ja nima kyanøjkxt, jøts idø'on ja miku' ja yikakwidityi o ma jam abak etjotp. ³⁰ Jøts ja Jesús yide'en tyiktüy:

—¿Ti mxøøw?

Jøts ja y'adsøøy:

—Legión ø nxøøw.

Ja'agøjpx ja jade'en ñaxyøømø'øyi kumi janch may miku' ja wyinaty tø tyatøkiyi. ³¹ Ja'axi dø'on jade'en kø'ømt wandip jøts ja tnimaadyøø ja Jesús jøts ja ka'ap kyaxidit jap ma miku' y'ayo'ombaatii. ³² Jamts wyinaty ja kuch yjøø'kxwidejtnididi jam kojpkøjpx ku ja miku' ñuu'kxaktøø jøts ja ttatøkidit ja kuch; yikjajt idø'on ja Jesús ja jade'en. ³³ Xjats ja miku' tmajt-stuttøø ja jaa'y jøts ja kuch ja ttatøkidøø, winets ja jiyujk niduki'iyi yjanchepkuwo'ongøjxtøø jøts ja nøøjøtpy ñaxkidakøjxtøø, japts ja ojts ñøøjøø'kxkøxti.

³⁴ Jøts ja jaa'y pøn wyinaty kuch'ejxtip ku ja jade'en t'ejxtøø yjatti kyubatti ja kyuch, jøts ja jyantyimchø'jkidøø, jøts ja kyaknøjkxtøø jam ma jaty pøngapøn chøøni kamjotp jøts nayide'en jam kajjøtp, jamts ja tuki'iyi ttamimadyakøjxtøø. ³⁵ Jøts ja jaa'y ja tniidso'ongøjxtøø jøts ja t'ejxwä'andi pøni janch idø'on jade'en. Jøts ku ja yja'ttøø jam ma ja Jesús jam wyinaty, xjats ja t'ejxpattoø ja jaa'y pøn ja maamyiku' wyinaty tø myajtstu'udyiyi jøts ku ja jam chøøni wijy keji, xøxy piky ja jam ma ja Jesús wyinaty tyani, jøts ja jyantyimchø'jkidøø. ³⁶ Jøts ja jaa'dyi pøn wyinaty kø'ømt tø tyim'y'ejxti, ja'ats ja tmadyaktøø sudso'ampy ja ja'aa'y wyinaty ja maamyiku' tø myajtstu'udyiyi. ³⁷ Ja'agøjpxts ja jaa'y ni'ijtyi ñuu'kxaktøø pøn jaty jam wyinaty tsinaadyip Gadara jøts ja Jesús jam pyidsø'ømt etjotp, pø jantyimchø'jkidipxi dø'on ja'adi. Jade'ents ja Jesús ttatøjkiyü'ñ ja byarki jøts ja chø'jñ. ³⁸ Jøts ja jaa'y pøn wyinaty tø myajtstu'udyi ja maamyiku', ja'ats møk'ampy nuu'kxakmaaj jøts ja

yikmøødit jøts Jesús ja tmøøtnøjkxt, jøts ja ojts t'ane'emy jøts ku ja ne'egi tya'ant, yide'en ja tnimaay:

³⁹—Nøjkx mdøjkwindum, jamts xnigajpxt xnimadya'akt sa Dios tø m'ødyuñiyi.

Nøjkx id'øñ ja jaa'y jøts ja ttamimadyaktøjkijyi'n amuum ja mayjaa'y sa Jesús ja wyinaty tø yikmøpkijiyi yik'øy'atyi.

Ja Jairo ñøøx, jøts ja t'øxyøjk pøn ja Jesús wyet ojts ttojni

⁴⁰ Jøts ku ja Jesús wyimbejnnaa ñøjkxnamaa jam jaduktamajñ, pøkpaat may jaa'y ja jam yjanchja'wiyøø, pø tum awejxipxi ja jaa'y ja wyinaty. ⁴¹ Xjats tu'uk yaa'dyøjk yja'lty pøn txøøw'ajtp Jairo, ja id'øñ jam wyinaty tniwindsøn'ajtp ja tsaptøjk. Jøts ja ñagyuxendyaajkøø jam Jesús tyekyjø'øm jøts ja tnimaay, ojts ja ñuu'kxa'aky jøts ja myøøtnøjkxiyit jam tyøjkwindum. ⁴² Jam ja tyu'ukpi nøøxu'nk, makmajtskin ja yjumøjt ja wyinaty, ja'ats jam wyinaty oo'kp ka'oo'kp. Jøts ku ja Jesús ojts ñijxy, janch may jaa'y ja pyadso'onøø, janch yikxon ja yik'atejmuky.

⁴³ Jamts tu'uk t'øxyøjk pamaa'y, myakmajtsk jumøjtyip ja tajxnaxyi ja pyaajtniyi. Tø ja tnidyayadøjkini ku tsøoyibi ja jadine'en tjamijuy jøts ja nipøn yjanchkayikts'øgyiyi. ⁴⁴ Xjats ja ojts wingon tjiguyø'øyi ja Jesús, jøts ja wyet pa' ja ojts tjøjxi, jøts ja tyajxnaxyi ja nay jatyi y'adujky.

⁴⁵ Jøts ja Jesús yide'en tyiktiyi:

—¿Pøn ø tø xøñ?

Kuts nipøn tkanigajpxy, jøts ja Pedro møøt ja myigu'uk wyandøø:

—Windsøn, pø mjanchyik'atejmujkpts, nugots mjanchyiktejmiñ mjanchyiktejixy, jøts mnimy: “¿Pøn ø tø xøñ?”

⁴⁶ Jøts ja Jesús wyaañ:

—Tø ø nyiktøñ, tø njawi jøts ku øts nmøk'ajtin tø nduktamøpkiky tu'ugin ja jaa'y.

⁴⁷ Xjats ja t'øxyøjk, pø ja'axi tam id'øñ yiktejp, jøts ja ojts ñimyibejñni ñichiyuñi ñagyuxendya'agyi jam Jesús tyekyjø'øm, jøts ja ojts ttukmadøy jam mayjaa'y agujk tūgøjxp ku ja wyinaty tø ttøñ jøts ku ja nay jatyi myøpkijky. ⁴⁸ Winets ja Jesús ja ñimaajyøø:

—Ja'agøjxp u'nk tø mmøpkiky ku ø tø xjanchjawi. Nøjkxni amgujuk jotkujk.

⁴⁹ Ixam ja Jesús wyinaty jade'en wya'añim, ku yja'lty tu'uk ja jaa'y pøn tsoo'mp jam tsaptøjk windsøn tyøjkwindum, ja Jairo. Jøts ja Jairo yiknimaay:

—Tøts ja mnøøx y'anuu'kxiñi, kidi yø windsøn nugo x'adsejp'adi'ich.

⁵⁰ Jøts ku Jesús ja jade'en tmadøøy, jøts ja tnimaay:

—Kidi mdsø'øgi, møk m'aaw mjoojt xpikta'akt, tu'ugyi ø xjanchjawit, jujkpyøkp ja m'u'nk inet.

⁵¹ Jøts ku ja jam tøjkwindum yja'ttøø, ka'ap ja jap tøjkjøtpy pøn tyiktøjkijyi'n, ja Pedro ja ja'ayi myøøtøjkijyi'n møøt ja Jacobo møøt ja Juan jøts ja u'nkteety u'nktaak jade'eñi.

⁵² Janchyaxtip ja wyinaty, ja y'u'nk ja tymchaachpa'ayoodip. Jøts ja Jesús ja ñimaajyidøø:

—Kidi mya'axti; ka'ap yø kiixy y'øøky, maapts yø ja'ayi.

⁵³ Jøts ja yjanchyikniixijky, pø ñija'widipxi ja jøts ku ja wyinaty tø y'oo'kni. ⁵⁴ Xjats ja Jesús ja tmajch kyøjøp'am, jøts ja møk'ampy tnimaay:

—Pidø'øk, u'nk.

⁵⁵ Jøts ja yjujkpyijky, nay jatyi ja pyidi'jky; jøts ja Jesús ja ojts tni'ane'emy jøts ku ja tyika'adyit. ⁵⁶ Nigyumaap ja møjaa'y ja tyimya'widøø jøts ja Jesús ja tnimaay jøts ka' pøn ttukmado'odit ku dø'øn ja wyinaty jade'en tø tyuñi jyaty.

9

Ku ja ñimakmajtskpi pabøjkpitøjk yiktanipøkti ja tunk jøts ja yikajxtsoondi

¹ Xjats ja Jesús tnanñamuyikøø nimakmajtsk ja pyabøjkpitøjk jøts ja myøk'ajtin ja tmøøy, ojts ja tkutujkmø'øy jøts ja tyikpidsøjmidit ja jaa'y ja miku', jøts ja tyikmøpkøktit ja pamaa'y. ² Ojts ja tkexy jøts ja Dios y'øgyajpxy y'øy'ayuujk ja tkajpxwa'kxidit midit ja tyanitanaapy ja yjaa'y jøts ja tyiktso'oktit ja pamaa'y. ³ Jøts ja tnimaay:

—Ka' mniyø'øyk xko'ondit, niti xkako'ondit, ni tajk, ni pejn, ni tsapkaaky, ni meeñ. Tu'ugyi mwet xminøjkxtit midit ixja mwet'ajtp. ⁴ Jøts ku mdøjk'amido'odit o ma pøni ma mja'atti, tu'ugyits jam mja'ta'aktit kunim jam mdsøonditnim. ⁵ Jøts ku ma pøn mgagupøkidit, tanaxtits ja kajp, ja'ayi ja pu'ux x'ukwinaptit jøts jade'eñi xuk'ejxtit jøts ku jade'eñi tø mnañiwa'achidi.

⁶ Jøts id'øñ ja yø'øwya'kxtøø, ñøjkxtøø o magajp, jøts ja jam tkajpxwa'kxti ja øgyajpxy ja øy'ayuujk jøts ja pamaa'y ja tyiktso'okti o madsøo.

Ku ja Juan Bautista ja o'jkin tpaqjty

⁷ Xjats ja windsøn Herodes ku ja tnija'wiyii'ñ sã jaty ja Jesús wyinaty y'adi'ich, jøts ja ka'ap ti tabyajitin tpaajty pømbi ja nimaajyip jøts ku ja Juan wyinaty tø yjujkyiky, ja' wyinaty tø pyidsimy jadigojk jap oo'kpi jutjøtpy. ⁸ Pømbits wãndip jøts ku ja yja'aji ja Dios kyugajpxy Elías, jøts ku ja' wyinaty tø kyaxi'iky; pømbits nõmidip jøts ku ja yja'aji ja Dios kyugajpxy pøn wyinaty windi'ixyip tø y'atsmendi, ja' nidu'ugin tø pyidsimy jadigojk. ⁹ Jøts ja Herodes wyaañ:

—Pø øtsimpts ja Juan kyubajk kø'øm nãnykikwinajkøø. ¿Pønts idø'øn ndejin yø' ixa njamado'ity yiknimadya'aky janch ñigyumaap?

Jøts idø'øn Herodes ja tjadyimwysin'ejxwaañ.

Ku ja Jesús yikaay ja nimagoxk milbi jaa'y

¹⁰ Xjats ku ja Jesús kyudanaabyi wyimbejtøø, ojts ja tyamimadyakixyi ti jaty ja wyinaty tø ttundi. Winets ja ojts twaadsøøn jøts ja tmøøtniikxy mã nipøn kya'ity jam Betsaida kajp wingon. ¹¹ Kuts ja jaa'y ja tnija'widøø, jøts ja ojts tpanøjkxti; kyupøjkts ja Jesús ja' jøts ja ojts ttamimadya'aky sã ja y'ejxi tyiyi ja Dios kyutujk midi ja tyanitanaapy ja yjaa'y, jøts ja tyiktsøjky may ja pamaa'y.

¹² Jøts ku ja et chuu'ñaã, xjats ja ñimakmajtskpi kudanaabyi ja ñimejnøø jøts ja ñimaajyøø: —Kajxni yø mayjaa'y, jøts nøjkk pyoo'kxnidi jøts nøjkk t'ixaañidi ja kyaajyik yjøø'kxik o magajp midi yã wingon tãmp, nitits yã kya'ity mã adøm yaadi.

¹³ Jøts ja Jesús ja ñimaajyidøø:

—Yikaydi meets.

Jøts ja tnimaadyøø:

—Ja'ayits tsapkaaky jap jamagoxkyi jøts ajkx majtskyi, pø winet inet idø'øn pøni nda'ajuu'yigyøjxp øøts inet yø jaa'y ja kaaky ja jii'kxy.

¹⁴ Nimagoxk milin ja jaa'y jam wyinaty. Xjats ja Jesús tnimaay ja pyabøjkpitøjk:

—Yik'ixa'akti tukpik jaty niwixijkxmyajk jaty.

¹⁵ Jøts idø'øn ja jade'en tpadundøø, ojts ja jaa'y y'ixakøxti. ¹⁶ Winets ja Jesús tniixajiyii'ñ magoxk ja tsapkaaky jøts majtsk ja ajkx. Ojts chajp'ixy jøts ja ttamøja'wiyii'ñ ja Dios Teety. Jøts ku ja t'adujkpajky, jøts ja ojts ttagøðøki ja pyabøjkpitøjk jøts ja mayjaa'y ja ttagama'adyit. ¹⁷ Ojts idø'øn ja niduki'iyi kyay'abidsømdi, niduki'iyi ja kyujxidøø; jøts ja kaaky wyindank ja makmajtsk kach ujts ujts yikpøkmujk.

Ku ja Pedro wyaañ jøts ku ja Jesús yja'aji pøn yiknitsokp

¹⁸ Tuk'ojk idø'øn ku ja Jesús jam wyinaty ja Dios Teety t'ajot'aty nadyu'uk, jamts idø'øn pyabøjkpitøjk ja pyawiditiyiyi jøts ja tyiktiy:

—¿Sã jaa'y wya'andi kyajpxti, pønik øts idø'øn?

¹⁹ Xjats ja y'adsoodøø:

—Pømbi wãndip jøts ku mets Juan Bautista; pømbits wãmidip jøts ku mets m'Elías, nõmidipts jadu'uk jøts ku me mja'aji ja Dios kyugajpxy pøn mendøø jekyiyip jøts ja' nidu'ugin tø wyimbity jadigojk.

²⁰ Jøts ja tjaakyiktiiy:

—Jøts meets, ¿sã mee mwaa'añ, pøn øts yjawi?

Jøts ja Pedro wyaañ:

—Cristoxi mets, ja yiknitsokpi, ja Dios U'nk.

Ku ja Jesús tniagajpxy ja y'o'jkin

²¹ Winets Jesús ja ojts møkta'aky t'ane'emy jøts ja ka'ap tmadyakyø'ødyit. ²² Yide'en ja yiknimaadyøø:

—Møk øts ja ayo'on nbaatt, ka' øts ja møjaa'dyøjk xkupøktit, ka' øts ja teetywindsøndøjk xkupøktit, ni ja kajpxwejpitøjk ø xkagupøktit. Xyik'ooktip øts ja', ja kidigøøk xøøwts ø nbidsø'ømt jadigojk oo'kpi jutjøtpy.

²³ Jøts ku ja jade'en wyaañ, winets ja tnimaay niduki'iyi pøn jam wyinaty:

—Pøni pøn ø xpabøkwamp, jawyeen ja kø'øm kyanabya'ayowit, jabom jabom øts ja xku'ayowit, ja'ats øts idø'øn xpabøjkp. ²⁴ Pønts kø'øm nabya'ayojip, pøn kasaduñim nay'ejxip, windigøøpyts y'anmija'win ja y'ity; pønts ø xku'o'jkip xkudigø'oyip, ja'ats ja yja' nøjkk nitso'ok'ajtp. ²⁵ ¿Ja ti ja ñiwyaa'ant øy ja jaa'y tja'a'bøjkixy ja naxwiin'ajtin jøts ja y'anmija'win ne'egi wyindigøy? ²⁶ Jøts pøni pøn ø xatsø'ødyump, pøni pøn øts n'øgyajpxy n'øy'ayuwjks xatsø'ødyuujnip, nayide'ents øts ja tsø'ødyumbi nøjkk ndatsø'ødyufi, ku ø nme'ent yikutujkpi, ku øts ja ndeety kyunuu'kxy'ajtin nmimejnit møøt ja ankilistøjk yja'adi. Øts idø'øn ja naxwiin'it jaa'y nmøjukdanaabyi'ajtpy. ²⁷ Tiy janch mee nnøjmi jøts ku jaa ja jaa'y yã winaggin tyanidi, pøn ka'ooktip kunim ja tyimy'uk'ejxtit sã Dios kyutujk tmime'ent midi ja tyanitanip yjaa'y.

Ku ja Jesús adsu'jky y'atstigajch amuum chamambøjkixy

²⁸ Tø dø'øn ja wyinaty tyuktujkxøwip jade'en y'ukjaty, jøts ja Jesús pyatøjkii'i'n jam kojpkøjxp Dios'ajot'ajtpi, myøødiyii'n ja Pedro ja', møøt ja Jacobo jøts ja Juan. ²⁹ Kuts ja Jesús jam wyinaty Dios'ajot'aty, xjats ja wyeen y'aaw ja tyigajch, jøts ja wyet ja ñaamy ja pyoobiyii'n tøø'kxpm tsamambim. ³⁰ Winets jam kyaxøktøø namajtsk ja jaa'y, ja'ats ja jam møøt myadya'aky, ja Moisés idø'øn ja' møøt ja Elías, ³¹ nabejk'ampyaju'uk ja ñi'awidiyidi jøts ja tkajpxy'atti ja o'jkin midu ja Jesús wyinaty pyaawwampy jam Jerusalén. ³² Øy ja Pedro møøt ja myigu'uk yjamaa'y'ookti, wiji'ejttip idø'øn ja'. Jøts ja ojts t'eixidi ja Jesús y'aju'uk møøt ja ñamajtskpi yja' nayide'endi pøn ja jam wyinaty møøt tyani. ³³ Jøts ku ja jaa'y jam wyinaty jagamnidi, jøts ja Pedro tñimaay ja Jesús:

—Windsøn, ityimy'ø'yajtp ku øø nyam'aty! Nyik'øyip øø tigøøk ja ujts'aadyøjk; tu'uk mets mja', tu'uk Moisés yja', jøts tu'uk Elías yja'.

Ka'ap idø'øn ja Pedro y'aaw tjawi pø ti dø'øn ja kyajpxy. ³⁴ Exam ja jade'en wya'añ ku yoots jam ñaxkidaajky, jøts ja yjanchø'jkidøø ku ja jap yoots agujkpy ñay'ejxpajtidøø. ³⁵ Winets ja tmadodøø ku jap yoots agujkpy kyajpxy ku jap ñimy:

—Øts idø'øn ya'at n'u'nk njanchøjkpy; mímadojtidip pøni sa wya'añ.

³⁶ Ku ja wyinaty jade'en tø tmadowdiwya'añ, xjats ja t'ejxpattøø ja Jesús jøts ku ja jam nadyu'uk. Amøñi ja y'ejttøø, ka'ap ja pøn tukmadowdi ku ja wyinaty jade'en tø t'ejxti.

Ku ja Jesús tyikmøjkpijky tu'uk ja mixyu'nk pøn wyinaty ja miku tø tyatøkiyi

³⁷ Jøts ku kyimjabom'ajty, ku ja ojts kyidaknidi jam kojpkøjxp, jøts mayjaa'y ja Jesús yjøkubajtyøø. ³⁸ Jøts ja jam nidu'ugin møk'ampy ñimaajyøø:

—Windsøn, tun may'ajt, win'ejxik øts n'u'nk, yø'øyi ø tu'ugyi n'u'nk'ajtpy; ³⁹ miku' idø'øn yø xumitatøjkii'yip, jøts yø yjanchxumiyiktsabaayi, yikmo'jtñiyip yø', jøts janchyik'a'oo'pniyip tñankwyinwøpyi tñankjyøpwøpyi. Nijade'ents kyamajtsu'udyi, am'ijxyim tsaach'ijxyim jyaty. ⁴⁰ Tø øts yø mbabøjkpi njanøjmidi jøts jeexyip yø miku' tyikpidsimdi, nika'ats yø tø myayidi.

⁴¹ Xjats ja Jesús wya'añ:

—iMee kajanchja'wibidi, yø mbøky nugo myikmajadaktip! ¿Ma windemnim meets ngajpxy n'ayuujk xpabøjkit? ¿Windemnim meets yø yjade'embu xuktatso'okt ku øts yø ejtp njanchjanigajpx'ity? Mets, yikmen yø m'u'nk.

⁴² Xjats ku ja mixy wingon myiiñ, jøts ja miku' ja ojts yiknaxkida'agyiyi jøts ja tyukpatkojmiiyi ja mø'ødyi; winets ja Jesús ja miku' twingugajpxiyii'n jøts ja tyikmøøy møk møjaa'w. ⁴³ Ñigyumaap ja jaa'y ja ni'ijtyi tja'widøø ku ja Dios ja myøk'ajtin jade'en tyikwingaxi'iky.

Ku ja Jesús tñigajpxy jadigojk jøts ku ja y'ookt

Exam idø'øn ja jade'en wyinaty ku ja Jesús tñimaay ja pyabøjkpitøjk:

⁴⁴ —Madowdi ya'at, jøts kidi xja'dyigoydi nijuuni; øts, yikøyapk øts jøts øts ja mayjaa'y nyiktagøðøkit.

⁴⁵ Jøts ja pyabøjkpitøjk ka'ap ja tja'gyukidi ku ja jade'en wya'añ, jøts nika'ap idø'øn ja ttuknimadøy; tsø'jkimidipts ja' jøts ja tyiktø'ødit ti dø'øn ja jade'en tyijpy.

Pøn idø'øn jawaani møj ma Dios ja yjaq'y ja kyutujk ttanitani

⁴⁶ Xjats ja tkajpxy'ajtpinibøjkidøø pømbi jadyimy'ukmøjtøkip, ⁴⁷ wa'ats ja Jesús ja tñijawi sa ja wyinaty wyinmaydi. Winets ja ojts tsa'anji'iky tu'uk ja mutsku'nk jøts ja ñadyawingudsaa'niyøø, ⁴⁸ jøts ja wya'añ:

—Pøni pøn øts ya'at mutsku'nk xkupøjkxip, øts idø'øn ja wyinaty xkupøjkp; pøni pønts øts jade'en xkupøjkp, ja'ats idø'øn ja wyinaty kyupijky pøn ø xkajxp. Pønts kanamyøjkpiktaajkip wine'enin meets ixaadi, ja'ats idø'øn nøjx møjtojkp.

Ku ja Jesús wya'añ: Adøm ja' nbudøjkibi pøni ka'ap adøm ja xmidsep'ajtyindi

⁴⁹ Xjats ja Juan tñimaay ja Jesús:

—Windsøn, tø øø n'ixy tu'uk ja jaa'y tyikpidsimy ja miku' mets mmøk'ajtingøjxp; tøts øøts ja ndukmajtsu'uty kumi ka'ap adøm ja xmøøtwidijtyim.

⁵⁰ Jøts ja Jesús ja ñimaajyøø:

—Kidi xuktamajtsu'utti; adøm ja' nbudøjkibi pøn ka'ap adøm ja xmidsep'ajtyindi.

Ka'ap ja Jesús tyikajty sa wya'andi ja Jacobo møøt ja Juan

⁵¹ Jøts ku ja et ja xøow tpaajty ku ja Jesús wyinaty ñøjkwani tsajpøtpy, xjats ja jotmøk'ampy chøø'ñ jøts ja ñijky jam Jerusalén. ⁵² Ojts ja tkajxjawyeni kyugajpxy, jøts ja ñøjxtøø jam Samariit etjotp jøts ja jam t'ixaajyidit ja yja'taajk; ⁵³ ka'ats ja Samariit jaa'y ja tkupøjktøø ja'agøjxp ku ja tñija'widøø jøts ku ja ñijky jam Jerusalén. ⁵⁴ Kuts ja Juan ja jade'en t'ejxtøø møøt ja Jacobo midu ja pyabøjkpi'ajtpy, jøts ja ojts ñii'mxyi:

—Windsøn'ajtim, ztuñ øø nayide'en sam ja kugajpxy Elias y'adiijch, n'amido'op øøts ja jøøn tsajpjøtpy, wan yø jaa'y tkudigøøgyøxti?

⁵⁵ Jøts Jesús ja nugo twini'ijxy jøts ja møk'ampy twingugajpxiyi'ñi, yide'en ja tnimaay:

—Ka' meets yjawi xja'gyukidi pøn meets myøk'ajtin mmøø'tajtxiyip.

⁵⁶ Nmøjkudanaaby'ajtpy øts ja naxwii'ñit jaa'y, kaja'ajip ø tø nnimiñ jøts øts ja jaa'y nyik'ookt nyiktigø'øty, ja' ø tø nnimiñ jøts øts ja jaa'y nyiknitso'ok'att.

Xjats ja choo'ndøø jøts ja ñøjkxtøø abikyajp.

Ja jaa'y pøn tpawidetwandip ja Jesús

⁵⁷ Jøts ku ja wyinaty jam tyuu'yø'ødyi, jøts ja Jesús ja jaa'y tu'uk ñimaajyøø:

—Windsøn, tsoomp øts, nbanøjkxp mets o madsøo pøni mā me mnijjxpy.

⁵⁸ Jøts ja Jesús y'adsøøy:

—Ne'egi jaa ja waajx ja yjut, ne'egi jaa ja joon ja pya'an; jøts øts niti ø xka'ejtxi øyik øts idø'on mā n'ønø'ønt.

⁵⁹ Xjats ja Jesús jadu'ukpi jaa'y tnimaay:

—Møødik øts.

Jøts ja wyaañ:

—Windsøn'ajtim, wan øts ndeety jawyeen t'atsyknaxøki.

⁶⁰ Jøts ja Jesús y'adsøøy:

—Majstut, wan ja tyikpidø'økti ja myi'oo'kpi pøn y'anmija'win jajuky: tø tyik'oo'knidi; jøts mets, nøjkx mets ja Dios y'øgyajpxy y'ø'yayuyk xkajpxwā'kxi.

⁶¹ Jøts ja jade'en ñimaajyøø:

—Windsøn'ajtim, nmøødiwyampy mets, nijjx øts nmigu'uk t'atstukmadøy, nijjx øts t'atsnagajpxpidsimi jawyeen jap ndøjkjøtpy.

⁶² Jøts ja Jesús ja tnimaay:

—Ku jaa'y yu'uy, ja' ja y'ijxpy ja tyunk; pønts ejximbejt'adøstp, tits ja nyikwā'anint. Jade'ents idø'on ja Dios wyingujkp mā ja ttanitani kyutujk ja yjaa'y; pøn ja tu'ugyi amumjoojt kamiduujniyip, tits ja jam ñiwyā'ant.

10

Ku ja Jesús tkajxwā'kxy ja ñidugui'pxmyajkpi jaa'y

¹ Jøts ku ja jade'en y'ukjajt, jøts ja nwindsøn'ajtim twiwijch ja nidugui'pxmyajk ja yjaa'y, jøts ja tpaguejxy namajtsk jaty. Jade'en ja ojts tyiknijjx ø magajp mā dø'on ja kø'øm wyinaty ñøjkxwā'añ, ² jøts ja tnimaay:

—Janch may pikta'aky pyidø'økwa'añ, ka'ats ja tumbi myayidi. Paty mee x'amido'ot ja kubikta'aky jøts tjaakaxt ja tyumbi jøts pyidø'økt ja pyikta'aky. ³ Nøjkxtits meets; jade'enxi mee mnøjkxt sam borreek ñijjx mā may miy'uk jamdi. ⁴ Ni mbejn xkawetstít, ni mmeen'abøjk'i'ñ, ni mgø'øk, niti xkako'ondit; jøts kidi pøn xmi'øømayidi xmigajpxmayidi ku pøn xkajpxpoo'kxtit tuu'ajy. ⁵ Jøts ku mā mja'taajk x'amidowa'andit yide'en jawyeen mgajpxpoo'kxtit: “Mā meets, Dios mjagyepyi.” ⁶ Pøni jamts pøn jotøjkijip ja Dios, ja'ats idø'on Dios janchjagyapip; pøni ka'ats pøn m'adsojimbejtxiyidi ja mgajpxpoo'kxindi, anaxtits ja tøjk. ⁷ Jøts jam mda'andit ja' tyøjkjøtpi pøn Dios jotøjkijidip, mga'adyip mjøø'kxtip idø'on pøni ti ja nmøøjyidip, mbaat'ajttip ku jade'en myikmo'odit. Kidits tøjkp tøjkp nugo mwidetti. ⁸ Ku o magajp mja'attit, pøni mā myikupøkti mga'adyipts mjøø'kxtipts ja' pøni ti myikmøødyip; ⁹ myikmøkøpøktip ja pamaa'y jam, jøts ja jaa'y xnøjmidit: “Jaani Dios kyutujk ya midi ja tyanitanaapy yjaa'y, ja adøm ja nmøø'tajtna'andi.” ¹⁰ Kuts mā ja kajp xpaattit mā mgayikupøktit, yø'øpyidsømdits jam jøts tuu'am mnø'ømdit: ¹¹ “Pu'uxpaat øø ndekyijxy tø tyat'spøjkiñi midi ya kajpjøjty, ixyamts øøts nyikwā'ach meets køjxp, ejxti sa x'ejxti, nañiwaajtsip øøts jade'en. Ja ti winets xkanijawidit, jaa Dios kyutujk wyingøñ midi ja tyanitanaapy ja yjaa'y.” ¹² Ixyamts mee ndukmadøy jøts ku nøjkx ja tiidyu'unin ñaxy, ne'egi kajaa yø yjade'embj jaa'y ja ayo'on tymbyaattit, jøts nigidi jade'en y'ayo'ombaaattit ne'egi ja kawindiy jaa'dyi pøn jam Sodoma kugajp'ajttøø.

Ja ayo'on midi tyanaxtip ja ka'øgyajp

¹³ iCorazingit jaa'dyi, Betsaidit jaa'dyi, mjanch'ayøøy meets, ti jade'en mnadyatuujnidip! Ku jeexyip jam kajpjøtp jam Sidøn jam Tiro ne'egi yiktuñ ja milagri'ajtin midi meets ya tø myiktu'unxi, windi'ixyip ja jeexyip ja chinaa'yin tyiktigajtsni, ku ja pyøky jeexyip tymichaachjawidi. ¹⁴ Kuts nøjkx ja tiidyu'unin ñaxy, mgu'ayowipts meets ja jinaxy, nika'ap ja ne'egi jadine'en y'ayo'odit ja jaa'dyi pøn tsinaadyip jam Tiro jøts jam Sidøn, ¹⁵ jøts meets Capernaumit jaa'dyi, zma mee xijy tø mdyimya'aty, tsajpjøtpy? Pø japxi meets ayodaajkjøtpy mnøjkxtit.

¹⁶ Jøts ja Jesús ja pyabøjkpitøjk ja tnimaay:

—Pøni pøn mbatmadoidip, øts idø'øn ja wyinaty xpatmadoodip; pønts mgagupøjkidip, øts idø'øn ja wyinaty xkagupøjktp; pønts øts jade'en xkagupøjpk, ja'ats idø'øn ja wyinaty kyagupøjktip pøn ø xkajxp.

Ku wyimbejtøø ja ñidugui'pxmyajkpi jaa'y

¹⁷ Xjats ja ñidugui'pxmyajkpi jaa'y ejtni xoni yjanchwimbejtnidøø, jøts ja wyandøø:

—Windsøn'ajtim, tøbæt øøts ja miku' xmimadøø ku øøts ja tø ngajpxpidsimy mets mmøk'ajtingøjxp.

¹⁸ Jøts ja Jesús ja tnimaay:

—Janch jade'en, ojtsts øts ja miku' n'ixy ku ja kya'ukmajadakni ja myøk'ajtin ja'agøjxp ku ja pyidsiimy jap tsajpjøtpty. ¹⁹ Øtsts meets ja nmøk'ajtin tø nmø'øø jøts ka' sa mjattit. Øy meets ja tsaa'ñ øy meets ja kajpy xjadawa'kpety, øy meets ja miku' ja myøk'ajtin sa mjadatunwa'añidi, mimajadaajkip meets yja' ja' jøts meets ja ka' sa mdunit. ²⁰ Kidits yø'øyi tu'ugyi xajotkujk'atti ku yø miku' mmimadøøyidi, ja' mdajotkujk'attip ku ja Dios m'ejxkapyidi xemikøjxp jap tsajpjøtpty.

Ku ja Jesús xyonda'aky

²¹ Winets ja Jesús tjantyaxondaajky ja Espíritu Santo, jøts ja wyaañ:

—Dios Teety tsajpjøtpt, yikjujky'ajtpi ja naxwiiñ, nmøja'wip ngunuu'kxyja'wip ja'agøjxp ku tø xamidsøky o pøn ja mnitsoojkin, jøts yø wijyja'a'y ja tø tkaja'gyukidi kø'øm, ne'egi tøts ja xuk'ixy xuknijawi pøn idø'øn ka'ejxiyimdi. Jade'ents Teety tø xuñ sa kø'øm xamidsøky o pøn.

²² Tum ja' øts nDeety xuktump midi ja kø'øm tyunwampy. Ka'ap øts pøn wa'ats xnijawi sam øts nDeety kø'øm xnijawin, nika'ats øts nDeety pøn wa'ats ñijawiyi sam øts ja kø'øm ñijawin. Jøts pøni pøn øts ja nduknijawiwypy, ja'ats tnijawidip ja Dios Teety.

²³ Winets ja pyabøjkpitøjk ja twin'ejxi'jky jøts ja yide'en ja'ayi yiknimaadyøø:

—Janch nekim meets ku meets ja kø'øm xtyimy'ijxy xtyimñijawi midi meets ixa kø'øm mdyimy'ijxpy mdyimbyatpy; ²⁴ may Dios kyugajpxy, may windsøndøjk yø kø'øm tja'ejxwandøø tjanijawiwya'andi midi meets ixyam kø'øm m'ijxpy mnija'wip, nika'ats ja t'ejxtøø; ojtts ja tjamadowa'andi midi meets ixyam kø'øm mmadøøpy, nika'ats ja tmadoodøø.

Ku ja samariit jaa'y yjotwa'añ

²⁵ Xjats tu'uk wya'kukiyi'ñ ja kajpxwejpidi jøts ja nugo kajpxy'ejxwa'añ ja Jesús, yide'en ja tyiktiy:

—Windsøn, zsudso ø ndu'unt jøts øts n'anmija'win ñitso'ok'att xemikøjxp?

²⁶ Jøts ja Jesús ja y'adsojimbajtøø:

—Zkidimts jap tø x'ixy nõkyjøtpty midi ja Moisés kyutujk myøø'tajtpy, sa ja xja'gyuki?

²⁷ Jøts ja kajpxwejpi y'adsøø jøts ja wyaañ:

—“Amunjoojt x'ajot'att ja Dios, ma'in m'anmija'win ma'in mwimmaa'ñ myajada'aky jade'en ja xwindsø'øgit; jøts nayide'en ja mmigu'uk xpa'ayo'ot sam kø'øm mnabya'ayøyin.”

²⁸ Winets ja Jesús ja ñimaajyøø:

—Tiy janch idø'øn mjanchwa'añ. Pøni mbadumpy yø jade'en, nitso'ok'atpsts ja m'anmija'win.

²⁹ Jøts ja kajpxwejpi ka'ap ja ttajotkuki ku ja jade'en yik'adsøø, jøts ja tnimaay ja Jesús:

—Zpøndsik øts idø'øn ndsaachmigu'uk'ajtpy?

³⁰ Jøts ja Jesús y'adsøø jøts ja tnimaay:

—Tu'uk idø'øn ja jaa'y, jam ja wyinaty kyida'aky ma ja Jerusaléngit tuu' jøts ja ñijxy Jericó, xjats maa'tspi ja pyajttøø jøts ja wa'ats yikwimaa'tskijxy, wyet ñaamy yikpøjkijxy; øy øy yikwinwøjpy yikjøpøwøjpy jøtsnim ja yiknikejky, jawaani ja tkayik'oo'knidi. ³¹ Xjats jam jøtmøñ wyinaajky nay jam tu'uk ja israelit teety; øy ja tja'ijxy, wyinajaajk ja'. ³² Jøts jadu'uk kyidakmøø ja Leví yjaa'y jøts ja nayide'en twininaajkmaa, øy ja tja'ijxy. ³³ Winets jadu'uk ja tuu'yø'øyi kyidaajky Samariit jaa'y, jøts ku ja ojtts jade'en t'ixy xjats ja wyimmaa'ñ ja tymchaachmiin ku ja jade'en yik'ayowim. ³⁴ Jøts ja wingon twingunøjkxyi'ñ ja tsaachibi, xjats chaachi ja tsøøyi, ojtts ja tpikaajki ja aceite møøt ja vino jøts ja t'adsujmi ja chaachi. Winets ja ojtts tyikpety kyø'øm jiyujkøjxp jøts ja ojtts tyikja'aty ja'taajkjotp, jamts ja tpa'am'ejx tsunajxy. ³⁵ Jøts ku kyimjabom'ajty ku ja samariit jaa'y wyinaty choonwani, jøts ja tju'jty majtsk ja myeeñu'nk jøts ja tkømøøø ja kudøjk, yide'en ja tnimaay: “Ejx'et yø jaa'y, mo' pøni ti ka'ejtxip, jøts pøni ka' yø meeñ tpaaty ixa nmø'øø, yiktunts mgø'ømeeñu'nk, ja øts ja ngubatt ku nwimbett jadigojk.”

³⁶ Xjats ja Jesús tyiktiy:

—Zpønts me m'a'ejxip migu'uk'ajtip ja jaa'y pøn ja maa'tspi yiktsaachidyøø?

³⁷ Jøts ja kajpxwejpi wyaañ:

—Ja' ja migu'uk'ajtip pøn ja ojtts y'ayo'ijxyi.

Jøts ja Jesús ja ñimaajyøø:

—Nøjksats jøts nayide'en xu'unt, jøts nayide'en mjaa'y'att sam ja jaa'y'in pøn ja myigu'uk ojts t'ayo'ixy.

Ku ja Jesús yja'aty jam Marta jøts María tyøjkwindum

³⁸ Xjats ja Jesús jade'en wyidity jøts ja yja'jty ma kajp wyinaty tu'uk, jamts ja tø'oxyøjk ja tu'uk wyadsooøø jøts ja ojts wyayi tyøjkjøtpy, Marta dø'øn ja xyøøw. ³⁹ Jamts myiga'ax ja tu'uk, María'ajtp ja', ja'ats twingu'ixajkiyi'ñ ja Jesús jøts ja tpatmadøy pøni sa ja wya'añ.

⁴⁰ Jøts ja Marta, ja' ja jam kyami'awatsip ja tyøjkunk, jøts ja tñimiñ ja Jesús jøts ja tñimaay: —Windsøn'ajtim, ikidi sa mwa'añ ku øts yø nmigu'uk nadyu'uk xuktunwanguixy yø tunk? Nøjmi waani jøts ø xpudøkit.

⁴¹ Jøts ja Jesús y'adsøøy:

—Marta, Marta, yø' me nugo mdajotkijxpy mdajotmay'øø'kpy yø mdunk. ⁴² Ka' mets yø ne'egi x'øyjawi yø øybi winmaa'ñ midì xemikøjxp tamp, ja'ats yø María tø tja'gyuki midì paat'ajtp. Ti pønts yø xijy ukpøjkxiniyip jadigojk.

11

Ku ja Jesús tñanky'ixpiky ja Dios'ajot'ajtin

¹ Xjats idø'øn ja Jesús jam ja wyinaty ja Dios Teety t'ajot'aty, jøts ku ja y'abajtyi'ñ, winets ja pyabøjkpitøjk ja nidu'ugin ñimaajyøø:

—Windsøn'ajtim, tukjajtk øøts ja Dios'ajot'ajtk, ti sa ja Juan ttukjajty ja Dios'ajot'ajtk ja pyabøjkpitøjk.

² Jøts ja Jesús y'adsøøy jøts ja wya'añ:

—Ku mdsapkajpxtit, yide'en mwa'andit:

Dios Teety tsajpjotpit,

kuuyi mets jadu'uk øy wa'ats.

Øyts ku xmimiñ ja mgutujk midì mdanitanaaapy ja mjaa'y.

Yikjatts ya ñaxwiñ nayide'en kø'ømdsojkingøjxp pøni sa xamidsøky nayide'en sam jap xuñin tsajpjøtpy.

³ Møøkyts øøts ixyam ja ngaajyk n'uujkik midì øøts xka'ejtxip.

⁴ Maa'kxik øøts nbøky, kumi tø øøts nayide'en nmaa'kxuky pøn øøts xjemdump xedump.

Agidyujk øøts axajtujk øøts, kidi øøts xmajtstu'uty, jøts kidi myajada'aky ja miku' yja'.

⁵ Jøts ja yjaakwaañ:

—Jade'enin n'ukpiktaajkin jøts ku o pøn ja myigu'uk jam tu'uk, jøts ja tñidsøøñ møjtsuu'm jøts ja t'atsnøjmi: “Migu'uku'nk, tun may'ajt t'uk'anuu'kxk øts tigøøk ja mdsapkaaky, ngu-batp øts. ⁶ Nmigu'uk øts idø'øn tø yja'aty ndøjkjøtpy, ja'ats øts idø'øn njadukaawyampy, ka'ap øts nja' tyimñiti.” ⁷ Jøts ja yjadu'ukpi yide'en n'ukpiktaajkmant y'adsøy japyi tyøjkjøtpy: “Kidi øts jadine'en nugo xjanchnel'emy; aduky yø tøj jøts ixyp øts n'una'jk nmøøtma'ay maabajtkijxpy; ka'ap øts yap nbidø'økwa'añ, jade'ents øts inet ka' ti nyakt.” ⁸ Yide'ents øts ja ndyimi'a'ejxi pø myigu'ukxi ja', øy ja yjagabidø'økwa'añ jøts ja t'atmo'ot midì ja myigu'uk ja amidojyip, kuwanan ja tjançhjatunt jade'en, y'atsmøøgyøxp idø'øn ja' pøni ti jaty ja çhøjkpy jøts ja jade'en ka'ap y'ukna'amniyit, pø naña'amixi ja kyatsøjkpy. ⁹ Paty mee yikxon ndukmadøy: Jøts x'amido'odit xpøktso'odit ja Dios, mmo'ojipts meets ja'; mdukpaadip meets ja' pøni ti meets mga'ejtxidip; myik'awaajtsxiyidip meets tøjka'aw ja' ku øy ma mgugajpxidit. ¹⁰ Paty ku pøn o ti t'amidøy, yikmøøpyts ja'; ku pøn o ti t'ixa'ay, pyatpyts ja'; ku pøn tøjka'agaj twingøxy, yik'awaajtsxiyipts ja o pøn.

¹¹ “Ku mee wyinaty m'uk'u'nkteety'aty jøts ku m'u'nk m'amidowidit ja tsapkaaky, wan meets m'aa'w mjoajt ndejin myajada'akt jøts meets tsaa ja xkøjyit? Çuk xmo'odit ja tsaa'ñ yam meets ja ajkx ja mja'amidøjyiyi? ¹² Çuk xmo'odit ja kajpy yam meets ja tutu'uty ja tø mja'amidøjyiyi? ¹³ Øyts mee mabaat mjagatyimy'øyjaa'y'atti, mjajtipts ku xmo'odit ja m'u'nk m'una'jk midì øy tsuj pidsømp, itits ja Dios tyungip, pø tsajpjøtpyxi ja', myo'opts ja' ja Espiritu Santo pøni pøn ja amido'oxiyip!

Ku ja Jesús yiknimaay jøts ku ja miku' myøk'ajtin ja tyiktuujni

¹⁴ Xjats idø'øn jade'en nğøjmyi, jam ja Jesús wyinaty tyikpidsimy ja miku' midì jam wyinaty tyik'ejtnip uum tu'uk ja jaa'y; jøts ku ja miku' pyidsiimy jøts ja jaa'y jaty kyajpxpiky. Jøts ja mayjaa'y janch ñigyumaap ja tyimya'widøø ku ja jade'en, ¹⁵ jøts ja winaagin ñømdøø:

—Ja møj miku' yø jaa'y ja myøk'ajtin yiktuujnip, ja' yø tyuktapidsimpy yø myimiku' midì yø jaa'y myøøt'ajtp, yø' wyindsøn myøk'ajtindi yiktuujnip.

¹⁶ Pømbits nugo ttatundip jøts ja tjøt'ejxwa'andi, ja milagri'ajtin ja y'amidoodip jøts ja tyimdyuk'ejxidit midì kidakp tsajpjøtpy. ¹⁷ Wa'ats ja tñijawi sa jaty ja wyinaty wyinmaydi, jøts ja tñimaay:

—O pøn windsøn, ku kyutujk ja chepta'aky jøts yjaa'y ja ñawya'kxyi kawinækpiky jøts ja xem yam cheptundi agø'omyidi, nanckyøjxidipts ja jade'eñi jøts ni ja kutujk niti kya'ukwani, uk kuts tu'uk migu'uk agø'omyi cheptundi jøts ja ñawya'kxnyidi, agø'omyits ja xem yam ñankyudigøyidi. ¹⁸ Nayide'ents miku'mi pøni nawyanwa'kxip ja kø'omyi jøts ja agø'omyi ñanky'ayo'ombaa'dy, ζwindemts ja jeky y'ejtnit ja myøk'ajtin, kidi ja jatyi kyudigøøñit? Yø' øts idø'øn jade'en xyikwamp ku meets mw'a'añ jøts ku øts ja miku' myøk'ajtin nyiktuujniyi ku øts yø jaa'y ja miku' ngajpxpidsøjmiyi; ¹⁹ pøni ja'ats øts ja myøk'ajtin njanchyiktuujnip, ζpønts meets mmigu'uk yja' yiktuujnidip ku ja tkajpxpidsømdi ja miku'? Pø yø'øxi mee kø'øm mni'øø'niyip jøts ku mee nugo mgajpxigøy. ²⁰ Diosts øts ja myøk'ajtin nduktapidsøjmip yø miku'di, yide'en idø'øn xja'gyukidit jøts ku ja Dios tø tyikmeni ja kyutujk mididi ja tyanitanaapy yjaa'y.

²¹ Ku tu'uk jotmøkjaa'y t'ej'ity tyøjk, janch yikxon ja ta'tspiky tø tsøøjmjø'kixy ja ta'o'jk, pønts ja mayip jade'en, jade'ents pyikta'aky ja jap tøjkjøtpy jotkujk tyik'ity, ka'ap ja ti tkumay. ²² Jøts kuts jam jaduku'uk jawaani jotmøk yja'aty jøts ja myimajada'agiyi, tuki'iyi tya'o'jk ja pyøjkxyi mididi ja y'uktamøj, jøts pyikta'aky ja yikja'abøkøjxni ti jatyi ja jam yjagyeypy.

²³ Pøn ø xkabudøjkip, ja' øts idø'øn xmidsepwamp; jøts ku øts pøn ti møøt njapøk mukwa'añ jøts ja jinaxy tøkwa'kxy.

Ku ja miku' jadigojk t'awimbeti ja chinaadyaajk

²⁴ Ku ja miku' tmajtstu'uty ja jaa'y, jøts ja nugo wyidity o ma tø'øts etjøøjty, tja'ixa'ay ja pyoo'kxaajk; jøts ku ja nima tkapaaty, jøts ja wyinmay: "Tiku øts ndøjk jadigojk nga'awimbeti ma tø ndsøøñ." ²⁵ Jøts ku ja wyimbity, jade'ents ja jaa'y ja tpaaty sam tu'uk ja tøjk tawa'ats, pe'ety jaaxy ja jap. ²⁶ Winets ja chøøñ jadigojk jøts ja janixwixuk tjaaktyimyi'atswaja ja myimiku' jawaani ka'øydi sam ja kyamajada'agiyin, jøts ja jadine'en ttatøkidi ja jaa'y, tsinaadyaajk ja tyikwa'andi, jøts ja jaa'y jade'en jinaxy myøwa'añ, nigidi ja y'ijty jade'en øyim idø'øn wyinaty ja miku' ja jam tjamøø'taty tu'umchi.

Pøn ja xemikøjxpit xondaajkin myøøt'ajtpy

²⁷ Exam idø'øn ja Jesús wyinaty jade'en wya'añ ku tu'uk tø'øxyøjk jam jaa'y agujkp møk'lampy wya'añ:

—Janch kawinmaañi tmøø'taty ja xondaajkin pøn tø myike'exyi jøts pøn ja che'tsk tø mduktayeegy!

²⁸ Xjats yide'en ja Jesús y'adsøvy:

—Janch nekim ja'adi pøn tpatmadoodip ja Dios kyajpxy jøts ja jade'en tpadundi!

Ku ja ka'øyja'y ttamidowdi jøts yiktuk'ejxtit ja milagri

²⁹ Namyuk'adøjtsidip ja jaa'y jam wyinaty ma ja Jesús, jøts ja tnimaabyinaxwa'jky: —Niwine'en ja yambi jaa'y kya'øyidi, ñadyijyi tñijawiywa'andi pøni janch ku nDios U'ngi, paty t'amidowdi jøts yiktuk'ejxtit ja milagri'ajtin; niwine'ents kya'ukyiktuk'ejxnidit, wan ja'ayi mididi ja kugajpxy Jonás øjts tyuk'ijxyidi. ³⁰ Nayide'ents sa ja Jonás øjts t'ejxpaj'aty ja Ninive jaa'dyi, nayide'ents øts ya'atpi jaa'y x'ejxpaj'att. ³¹ Ku wyinaty kyutuky ja et ja xøøw, ku ya'atpi jaa'y nøjx yiktii'dyundi, jøts ja windsøndø'øxy yø ñidanaagyukiyidit jøts ja ñi'øøniyidit pøn tñids'o'on jagam et ja Salomón, jøts ja t'ejxøø tñija'wiyøø ja wyijy'ajtin; ixyats jadu'uk tø kyaxi'iky jawaani wijy mididi tñinajpx ja Salomón, nayide'ents meets ja xkagupiky. ³² Nay jats ja Ninive jaa'y wya'kukidit ku ja tiidyu'unin ñaxt ku yiktii'dyundit ya'atpi jaa'dyi, jøts yikni'øønidit; ja'agøjpx ku ja Ninive jaa'y ne'egi tyiktigajstøø ja chinaa'yindi ku ja Jonás ja øjts tyukmadøyidi ja Dios kyajpxy ja Dios y'ayuujk; ixyats jadu'uk tø kyaxi'iky pøn tyimñija'wip wa'ats, nigidi ja Jonás y'ijty jade'en tñijawi, nayide'ents meets ja yam xkagupiky.

Ja øy jaj mididi jaa'y tyikja'gyukip

³³ Ka'axi pøn jaj ttuknidøøbyøki jøts ja yikyu'utst o ma, uk jøts ja yikujupt kajuun patki'py, ja'agøjpx ja tyøøbyiky jøts ja yikpikta'akt ma yjajt, kuts jam pøn tyøkit tyuk'ejxpaatpts ja o ti. ³⁴ Jade'en idø'øn yø mween n'ukpiktaajkin sam jajin, yø'øts tyikujajtaajkip tyikudøø'kxaajkip amuum ja mne'kx ja mgojpk; kuts ja mween y'ø'y'aty nayide'ents ja amuum tjagyeypy ja ne'kx ja kojpk, ka'ap ja ttuktuñ kya'øybi. ³⁵ Øyimts x'ejxtit jøts kidi xyik'oo'ki ja jaj mididi wa'ats jajp, jøts kidim jade'en mjatti sam jaj kya'ityin, sam ja jajin mididi kawa'atsjajp jøts yik'ayowin kube'ets kugøøts. ³⁶ Pøni mwijnmaa'nbyattipits øy yikxon, ja jajts idø'øn ndejint mgayik'oo'ktpit jøts ka' jade'en m'etti sam o pøn kugøøstujpy chøønin niti winmaa'ñ, o nugo chaachjawn'ejx'ookti. Kuts meets, wa'ats meets ja mduk'ejxpaadyidi pøni ti dø'øn m'ejxwändip, ka' ti jadu'uk chøkyi, jade'en ja myikujajtaagyidi myikudøø'kxaagyidi sam jaj wa'ats mduk'ejxpaadyidi o ti.

Ku ja Jesús ttamigajpxy sa y'adø'østi ja fariseotøjkti møøt ja kajpxwejpitøjkti

³⁷ Kuts ja Jesús jade'en kyajpx'abajtiyih'ñ, xjats fariseo ja tu'uk wyaajøø tyigam kaabyi. Kuts ja jam tyøjkiiyih'ñ jøts ja y'ixaaiky, kaabyajt twinguwa'atsiyih'ñ. ³⁸ Jøts ja fariseo janch ñigumaap tyimya'wiyih'ñ ku ja t'ijxy ja Jesús kyagøbujy yam ja kyaawya'andi, jade'en idø'on ja tsinaa'yin'atti ka'ap ja nugo kyøbujti, yide'en ja tyikajpxti jøts ja' ja tyaniwa'ats'ajttip ku ja kyøbujti, jøts ja kyapøkpyatti. ³⁹ Yide'ents nwindsøn'ajtim ja tnimaay ku ja jade'en t'ijxy wyinmay:

—Jade'en mee fariseotøjk mjaa'y'aty, ja'ayi mee mjanchkamijotkukip sudso ja texy ja tas nikijxyi nadyijyi wa'ats y'ett, jøts ka'ap ja xunk'atti pøni sadam ja yjøtpy. Ni xkaja'gyukidi kudam m'amp mjotp tum ja axøøkpi yigaappi xjamøø'tatti ku jaa'y nugo xwin'øøndi xwimaatsti. ⁴⁰ ¡Nugo mee mdyimyo'ty! ¿Ka' xnijawidi ku tu'ugyi ja kojpi ø tyik'øyi ja m'anmija'windi jøts ja pikta'aky? ⁴¹ Jade'eni Dios mgupøkyiyidit ku amumjoojt mdsojkingøjpx xunk'attit ja pudøjkin. Jade'en ja m'anmija'win ja wa'ats'ajtin tpaattit.

⁴² ¡Mjanch'ayøøy me fariseotøjkti! Køx kida'ak meets xjanchkugubatkiy jøts ka'ap ne'egi xpadu'unxidi midu ja Dios kyutujk jawaani ne'egi yjani'ane'empy, ku ja ttsøky ja øy tiidyu'unin, ja pa'ayo'ejxk, jøts ja janchja'win. Ya'atpi meets idø'on ne'egi jawaani mjapaat'ajtip mbadu'ump.

⁴³ ¡Mjanch'ayøøy mee fariseotøjkti!, ku mee tum jam mnachøkyidi mdsinaawya'andi tsaptojk'okp windsønin. Jøts ku tuu'ajy, øy paat meets ja nagyajpxpo'kxi xtsokti, myikwindsø'øgip myikwinjawip meets, ejxim meets jadi'ini myikwinajxni.

⁴⁴ ¡Meets tsaach'ataayjaa'dyi, jøts m'ayøøy mee kajpxwejpitøjkmidi! Jade'en mee mnankyaxji'igy: sam ja oo'kpi kajuunin øy nikøjx kyaxji'iky jøts ka' nadyijyi tyikaxji'iky pøni sadam ja yjøtpy.

⁴⁵ Xjats ja kajpxwejpitøjk nidu'uk y'adsøøy jøts ja wyaañ:

—Windsøn, ku jade'en mwa'añ xuk'ayojip øøts yø nayide'en.

⁴⁶ Jøts ja Jesús yide'en y'adsøøy:

—¡Mjanch'ayøøy mee kajpxwejpitøjk nayide'endi!, ku ja kutujk xyik'øyidi kamaabyim, ka' meets ja køø'm x'uktuni, ja pujx ja kajp meets ja mdukmidanaapy, kamadøyim meets ja x'ukja'wiñi.

⁴⁷ ¡Mjanch'ayøøy meets!, ku yam xjanch'ukyik'øyidi xyikpaadidi ja oo'kpi nipots pøn ja m'apteety yik'ooktøø, ja Dios kyugajpxy. ⁴⁸ Jade'en yø yikja'gyukiñi sam o ti pøn kajpxy'aty tyik'ity, kajpxy meets ja yjawi xyik'eitni møøt ja mdeety'apti ku ja tyik'oo'ktøø ja Dios kyugajpxy, jøts meets ixym xyik'øyimi xyikpajtimi ma ja ñaxøjkidøø. Mdsaaçpa'ayøøpy meets ja xijy jade'en.

⁴⁹ 'Paty tam idø'on ja Dios kyajpxy wya'añ yide'en: “Ndanigaxp meets ngugajpxy møøt ngudanaabyidi, myik'ookpts meets ja winaagin; jøts pønts jaakjata'andip, myik'ayo'ombaattpis meets ja'.” ⁵⁰ Meets Dios ja mdagabatidip wine'enin ixa mnaxwii'ñitjaa'y'atti ku ja m'apteetyi ø tyik'ookti ja Dios kyugajpxy. Tuki'iyi ja tpayø'øgyøxt, jaayip ja tpayø'øbyinaxwa'akt kuuyip ja naxwii'ñit cho'ondaajky, ⁵¹ kuuyip ja Abel t'oo'k'awiyih'ñ jabaat ku ja Zacarias y'o'jky, ku jaa'y ja yik'o'jkøø jap tsaptojkjøtpy ma ja altajr jap. Paty me ndukmadøy jøts ku Dios ja ttabayø'ty ja yamit naxwii'ñit jaa'y.

⁵² ¡Mjanch'ayøøy mee kajpxwejpitøjkti!, ku x'ama'at'ajtidi ja Dios kyutujk; køømyi meets ja mnadyamidsøkyi, ni xkabadumidits ja', jøts ni xkaduknija'wimidits ja abikpyidi pøn ja tjanijawiyandip.

⁵³ Ku ja Jesús jade'en wyaañ, jøts ja kajpxwejpitøjk møøt ja fariseotøjk yjantyim'ambøjktøø. Jantyimyikmi'ambøjk ja Jesús jøts ja tanejkin'ampy tjantyimyiktøwdi ñadyijyi tigati. ⁵⁴ Øyik idø'on ja ti t'ukmado'odit, y'amaa'tsk'ejxwändipxi ja' jøts ja jatyi ttani'øønidit pøni ti ja kya'uk'ømyadoodip.

12

Ku ja Jesús tnigajpxi ja fariseotøjk kya'øwiyinmaa'ñ jøts yikjøpjawit

¹ Yikxon ja jaa'y yjantyimñañimujkpajtidøø mil'ampy, nugo yjanch'adøtsnidi, xem yam yjanchnadyateeni. Jøts ja Jesús ja pyabøjkpitøjk tnimaabyinaxwa'jky:

—Øyim mnay'ejx'etidit ejxim yø fariseotøjk kya'øwiyinmaa'ñ mdawin'ihñidi ti sa yø iiy wyanidi, jabi wa'atsts yø iiy ñadyijyidi. ² Wants uk jade'en, ka'axi ma ti yu'uch'ity, kuwanixi ja øy juuni yjadyimyikpaaty; uk kuts o ti yjayik'amaa'tsk'aty, kuwanits ja yiknijawi.

³ Jade'en'ampy ja wa'ats nøjx yiknijawi ti jaty mee mdumpy amaa'tsk, ti jaty mee mgayiknigaxji'kpy, adsu'jkyts ja y'uknigaxjø'knit sam o ti xinaxy wa'ats kyaxji'iky. O me ti amaa'tsk xjakajpxy, øy meets ja pøn xjadudukmadøy, wa'ats ja nøjx yikajpxnaxy ejxim ti tøjkjøpx yikajpxwa'kxyin jøts yiknijawit.

Ku ja Jesús tnigajpxy jøts ku ja tu'ugyi pøn yikts'øgip

⁴ 'Mee migu'uktøjkti pøn jaty ø xpabøjpk, meets idø'øn nnimaapy jøts kidi xtsø'øgidi ja yikjaa'y'oo'kpidi, pø ka'axi anmija'win ja tjadyimyik'ookti øy ja wyinaty tø tjayik'øøky ja ñine'kx. ⁵ Ja'ats mee ndukmadoowampy jøts ku ja' xtsø'øgidit ja Dios pøn tyikutujkpk jøts mnøjktit ayodaajkjøtpty yam meets ja o'jkin tø xja'ixy. Ja'ats idø'øn mdsø'øgidip.

⁶ 'Ka' meets Dios m'ejxigøyi, çti sa ja nimagoxkpi joon chobaaty jøts ja yiktagujuy majtsk ja junmeeñ? ⁷ Machøybaat meets mwaa'y ja myik'ejtniyi. Paty ka' mdsø'øgidit, ti sa ja mutsk jonuna'jk ja tkaja'dyigøy; mats meets ja ndejint mja'dyigøø'ñiyit.

Pøn jaty t'øñigajpxp t'øñimadyakp ja nwindson'ajtim Jesucristo jam mayjaa'y agujkp

⁸ 'Yikxon mee x'ukmado'ot, pøn ø xpukajpxip, pøn wamp mayjaa'yjøøjty jøts ku øts ja xpabiky, nayide'ents øts ja møk nñitanit jam Dios wyingujkp mā myay'ankilis ja jam møøt; ⁹ pønts ø xkabukajpxip, pøn wamp mayjaa'yjøøjty jøts ku øts ja ka' xpabiky, nayide'ents øts ja niwine'enin nga'ejxkapt, niwine'enin nganitanit jam Dios wyingujkp mā may'ankilis ja jam møøt.

¹⁰ 'Jaakyikmaa'kxtip ja ne'egi pøn ø tø xkaguidyimy'ødyejti, ja'ats nima niwindem ja kyayikmaa'kxtit pøni pøn tka'ømyigajpxtip ja Espiritu Santo.

¹¹ 'Kuts pøn myiknøjkkidit jam tsaptøjkjotp uk myikwaanøjkkidit mā kutujktaajk mā kudunk mā tñidyumbi, kidits meets ja xajotmay'oo'kni, kidi meets ja xkumayjawi sa dø'øn jap mwa'andit, sa dø'øn jap m'adso'odit, ¹² pø ja Espiritu Santoxi meets ja mda'awa'anijip pøni sa dø'øn jap mwa'andit, ja' meets jap myikajpxiyip ku tpaat ja et ja xøøw juuni mgajpxtit.

Sa ja kumeeñ'ajtin xyikwinmaa'nmya'jtint

¹³ Xjats jam tu'uk wyaañ jam mayjaa'y agujkp jøts ja tñimaay ja Jesús:

—Windsøn, nimaajyik øts yø nmigu'uk jøts wan ø xmø'øy ja nmaay.

¹⁴ Jøts ja Jesús wyaañ:

—Yikxon me waani m'ukjaa'y'att. Ka'axi ø pøn tø xpikta'aky jøts meets ja mbikta'aky nyikwa'kxiyit, uk jøts øts jade'en ndu'unt sami kundugin.

¹⁵ Nayide'en ja wyaañ:

—Øyim x'ejxtit, nay'ejx'etidim jøts kidi o ti kayakyim x'ejxti, kaja'ajip jaa'y ja y'anmija'win tyajujky'ajtpy xemikøjxp ku pyikta'aky ja may'ampy tmøøt'aty.

¹⁶ Jøts ja yide'en tmdyajakpaajty tu'uk ja ejxpajtin madya'aky midi ja kø'øm ñajtsja'wip jøts ja yiktamija'gyukit midi ja ñimadya'akwampy, jøts ja wyaañ:

—Jaa dø'øn wyinaty tu'uk kumeeñ jaa'y jøts jantyimy'ejtp idø'øn pyikta'aky ja jam kyamjotp. ¹⁷ Winets ja tñiwinmaa'yiyi'ñ jøts ja wyaañ: “çTi sudso ndabyaatt, sudso øts yø nbikta'aky ndu'unt? Ka'ats øts n'abøjk'i'ñ mā øts yø nbøkjø'økt.” ¹⁸ Jøts ja yjaakwaañ: “Tø nniwinmayi sudso øts yø ndu'unt. Yø ndsa'l'x tam ø nyikida'ap jøts ø nyik'øyit jawaani møjpi, japts øts ja nbikta'aky nbøkjø'økt ti jaty øts ja nmøøt'ajtpy. ¹⁹ Winets ø kø'øm nnañø'ømxiyit: Ja tidsik winmaa'ñu'nk xijy mjadyimyjadsojky jabi ixyats may pikta'aky midi kawinaak jumøjt m'ajot'atp; poo'kx pøk mets, kay uk mets jotkujk xoni.” ²⁰ Yam ja wyinaty jade'en wya'añ jøts Dios ja ñimaajyøø: “Jaa'gyumo'tpi, ixyam koots inet m'ooknit; jøts midi jap tø xpøkj'i'ky, çpøn yø tj'a'atp?” ²¹ Jade'en idø'øn jaa'y jyaty pøn ja pyikta'aky nugo tñipøkpajtp jøts ja ya jotkujk ttuktanaxy ja et ja xøøw, ayoopts ja y'anmija'win ja jyaty jam Dios wyingujkp ja'agøjxp ku pyikta'aky ja ya kø'ømyi tø t'ajot'aty.

Ku ja Dios t'ejx'ity pøn jaty ja y'u'ngip'y'una'jkip

²² Xjats ja Jesús oojknim tñimaay ja pyabøjkipitøjk:

—Yikxon ndukmadowdi: Kidi nugo xpamaydi xpadajti ja mgaajyik m'uujkikti, ti mñidsøn'idip, ni ja mwet ni ja mnaamy mee xkaguma'aty ti mwet'attip. ²³ çTi jade'en ja jujky'ajtin yikpaaty sam ja kaaky jii'kxyin? Pø ka'axi. çJøts ja wet ja naamy mibaat ja t'uk'amibaat nayide'en pøni sa dø'øn ja ne'kx ja kojpk yikmøøt'aty? ²⁴ Ejxti yø jøøky, ka'axi yø ñe'epti kyojti, ka'axi pyikta'aky yi tyikpidø'økti, ka'axi pyikta'aky yø tpøkjø'økti jøts tpikta'aktit jap tsa'jxjøtpty; øy yø jade'en yjagatundi, ja Diosts yø yikjujky'ajtidip. çTits mee mdsow sa ja jiyujk jade'en ja yja' yikmo'odi! ²⁵ çPøn kø'ømdsøky tyimy'uknankyojnip jagujkp metrin øy ja mabaat jade'en tjadyimyjatsøky? ²⁶ Pøni ka'ats tam ja jade'en jyaty, çtigøjxpts ja yikmijotmay'ookt?

²⁷ 'Uk'ejxtim sa o ti pijy yøñ, çti pee'tip kojtp yø? Jøts tij janch meets idø'øn nnøjmi jøts ku ja windsøn Salomøn nijade'en kyanaxyjxøø sam yø pijyin, øy ja mabaat tjabiktakijxy ja xyox. ²⁸ Sats idø'øn ja Dios jade'en txøxy ja pijy midi jaty ixyam o madsøo yondip øy ja jabom jyayiknitsaañit; kuts meets, çtiku meets idø'øn ja mgaxoxit? çSudso meets ja xpamay xpadajty ti jaty mga'ejtxiyidip? ²⁹ Paty wingujk jotkujk mwidettit, kidi meets ja xkumayja'wiñi mā xpøktit ti mga'adyip m'uuktip. ³⁰ Jade'en naxwi'i'ñit jaa'y ixyamdi pøn ja Dios yja' tkaja'gyukidip, ja' pyawidejtip tpamaydi tpadajti ja pikta'aky ti jaty chojktip;

kuts meets, wa'ats meets Dios Teety mnijawiyidi ti jaty mga'ejtxidip. ³¹ Ne'egi kupøjkidits ja Dios chinaa'yin ja kyutujk mididi ja tyanitanaapy yjaa'y, jade'ents meets ja mmo'o'jidi ti jaty mga'ejtxidip.

Ja kunuu'kxy jujky'ajtin mididi jap tsajpjøtøpy

³² Kidits mdsø'ogidi, jade'en me n'ejx'ity sam pøn ja byorreegu'nk t'ixy; o meets idø'øn mganamayi, mdanitanijypts meets Dios Teety ja kyutujk, jade'en meets ja mdamidsøkyi. ³³ Tookti pøni ti jaty jam mmøø'tajttip jøts ja Dios jade'en'ampy xamiyoxtit ku xmo'odit pøn jam ti ka'ejtxidip pøn ayoodip; jade'en y'øpyidsø'ømt ku xpaattit ja jujky'ajtin mididi jap tsajpjøtøpy, mididi ka'ap mwindigø'xyidip. ³⁴ Pøni ma xnaajtsjawidi xpaatwa'andi ja jujky'ajtin, nay japts meets ja mwinnaa'ñ y'ity.

Ku ja Jesús wya'añ ku jøp'ejx'ity n'ejtindit

³⁵ 'A'ejxi abaadi mnanky'etidit. ³⁶ Jade'en sam tumbi tjøp'ixy ja wyindsøn ku ja ñijky tø'øñi'ukpi, jøts kuts ja wyimbett jøts ja jaty tyik'awaajtsit ja tøk'aaw ja'ayi ja yja'att, ja'ayi ja kyugajpxit. ³⁷ Nekim ja tumbidi pøn kajxa'aky pidsømdip ku ja wyindsøn ja pyaadyidi wijy keji, ku ja kyama'adi kya'letti yam ja yja'aty; jøts tiy janch meets idø'øn nnøjmi, wan ja tka'uknagymayi kø'øm jøts ja tyik'ixa'akt ja tyumbitøk jøts ja ttukwinguwaadsit ja kaabyajt, wan ja tka'uktawindsø'øgi ja kaaky ja tojkk. ³⁸ Øy ja juuni yjaja'aty, yjaja'aty ja tsuu'm yjaja'aty ja jøpkyoots, kuts ja kyayikmaa'gyubaadidi ja'abi tumbits idø'øn nekim t'ejxtip. ³⁹ Ku o pøn pyikta'aky t'ejx'ity tyøjkøtøpy, ejtp ja tjøpja'wigyunaxy ja maa'tspi, ka'ap ja ñagyumaadigøyi pøni juuni dø'øn ja y'ukja'att. ⁴⁰ Nayide'ents meets idø'øn mjøp'ext ejtp; ku øts jade'en jotmøn nme'ent yam ø ngayikumay, pøn ja naqxwii'ñit jaa'y ja myøjkudanaabyi'ajtpy.

Ja tumbi pøn øy ejx'ejtp

⁴¹ Winets ja Pedro wyaañ jøts ja tyiktiiy:

— Windsøn'ajtim, çøøts yø dø'øn yø jade'en xamimadyakp, uk niduki'iyyi dø'øn xnøjmi?

⁴² Jøts ja nwindson'ajtim wyaañ:

— Ja tumbi pøn yiktump ku ja myadøy ku ja yja'gyuki, ja'ats ja wyindsøn tanipøjkip pøn jaty ja jap tyøjkøtøpy jøts ja tyika'aty sa pyaat'atyin. ⁴³ Nekimts ja'adi pøn jade'en tpadundip ti jaty ja wyindsøn ja tø tyanipikyidi. Øy ja juuni yja'aty, ixapts ja jade'en ttayø'øbyety, ixap ja jade'en tyundi. ⁴⁴ Ndyimñajtsja'wip øts jøts ku ja wyindsøn ja pyikta'agit jøts ja tyuk'ejx'etit tuki'iyyi pøni ti jaty ja jam yjagejpy. ⁴⁵ Pønts tkajøp'ejxp ja wyindsøn, pøn jade'en winmaapy, jekñim ja tiy yja'att, ku ja yiktaminikaagi ja myøøtumbi jøts ja jaty øy sagasa tuñ ja myøøtumbi, ja yaa'y ja tø'øxy, ja'ayi ja chøø'ti ja wyindsøn nekim ja winet kyay y'uuky, jøts ja myuktigøøñi, ⁴⁶ kuts ja wyindsøn wyimbity øy juuni yam ja ka' tjøp'ixy yam ja niwine'enin tkagumay; ixadam ja yja'aty jøts ja tyagubety ja'agøjxp ku kya'ø'yaty, çma dø'øn ja yiktumbi jade'en?

⁴⁷ Pønts wa'ats tjanija'wip sa dø'øn ja wyindsøn tjatsøky jøts ja nika' tjøp'ixy jøts ja nika' tmimadøy pøni sa ja yjawa'añ, yikxonts ja nøjkk yiktagubety, yikxon ja yjantyimyikwo-jpmatst. ⁴⁸ Pønts tkidymñija'wip pøni sa tam idø'øn ja wyindsøn ja tjatsøky, jøts ja ka'ap tjøp'ixy jøts ja ka'ap tmimadøy, ñiwyaanits ja ne'egi yiktagubatt, ka'ap ja ne'egi jadine'en yikwopt. Ti sa o ti jade'en pøn o ti may yikmøøpy, nayide'ents ja yik'amido'oxit may'ampy; pønts o ti yiktami'ajot'ajtip, jinaxys ja yikxon yiktabayø'ty.

Jesús køjxp jaa'y ñawya'kxyidi

⁴⁹ Ja tiidyu'unin øts ya tøn nmimiñ naqxwiñ; ijanch tyimjyawamp øts idø'øn jøts ja jeexyip yam nyiktunkpatni! ⁵⁰ Nnija'wip øts ku ndanaxt ja møj ayo'on, indajotmay'oo'kunaxp øts ja jaanin kunim øts ja wyinaty tøn ndanaxy! ⁵¹ Sa mee m'ukwinmaw, çø'y'ajtin xondaajkin ti øts yjawi tøn ndanimiñ naqxwiñit jaa'y? Nømp øts jøts ku ka', nanñkñawya'kxip øts jaa'dyi. ⁵² Yamnim inet tøn cho'onnda'aky, nøjkkp naaxpts idø'øn jade'en tukmigu'uk xyiktsept'a'akti øy ja tu'ugyi yjatsøonidi, nideety nidaa'kti, ni'u'nk ni'unaj'kti. Pøn nimagoxkti, nawya'kxidipts ja', jøts ja ñayjibøkidit jagam ixkø'øm namaajtsk jaty nidigøøk jaty. ⁵³ Øts køjxp ja kawin'ixjyim ñayjawiidit ja u'nkteety ja u'nkta'akti møøt ja y'u'nk y'unaj'kti, ja yaa'y ja tø'øxy, tum jade'en y'adø'tøsttit ja tsu' ja xa'kxy, ja u'nk ja mø'jt.

Ja ejxa'an sudso yiknijawit jøts ku wyinaty tøn tmibaa'taty jøts kyøxt ja naqxwii'ñit

⁵⁴ Ñayi ñimaamyøø ja Jesús ja mayjaa'y:

— Ku x'ejxti ja yaak pyidi'iky ma xøøw yjexy winets mnømdi, tu'up tam inet, janchjajpts idø'øn ja jade'en. ⁵⁵ O kuts ja poj wimbet'ampy yø'øy ku kyaxuxpyøy, jats mnømdi, janch'anwamp tam, janch tøødipts idø'øn ja m'ayuujk, janchjajtpxi dø'øn ja jade'en. ⁵⁶ iMee win'øø'mbidi! Pøni mnija'widip tam sa kyaxi'iky ja et ja tsajp ku ti tyunwa'añi, çtikuts

nayide'en xkanijawidi pōni ti dō'on tunwajnip ya'atpi xōōw ya'atpi jumōjt ku ja mōk'ajtin wyingaxi'iky jōts ja ōy sagasa mjayiktuk'ejxti?

Kajpx'ōyidi jōts mnamyijotjimbetidi mōēt ja mmidsep

⁵⁷ ʔTiku yilxon xkawinmagyukidi pōni sa dō'on chōkyi, pōni sa dō'on pyaat'aty? ⁵⁸ Ku pōn mni'ōōniwya'āñidi jōts ja myiknōjkxwā'āñidi jam kudunk wyindum, namga'anim jam myiknijkyxidi tiku yilxon xkakaajpx'ōyidi jōts ja mōēt mnamyijotjimbetidi jadigojk, jōts kidi myiknijkyxidi jam tiidyumbi wyindum; ʔja ti nō'ōmp ja windsōn jam? Pō mgōyākidipxi ja jam jōts mee myikōyakt mā ja tajk mā ja mayojr jamdi, ja'ats mee myikpuxōktōkiyip jōts mee myiktsu'umt. ⁵⁹ Ōts idō'on wamp jōts ku jaanim mbidsō'ōmdit ku wyinaty tō ja multa xkubatkōxti.

13

Yajkpy ōy'ajtin ja' ku ja tsinaa'yin tyigach

¹ Nayi winet et idō'on ja Jesūs jam nimejnōō wingaagin ja jaa'dyi jōts ja ojts tyamimadya'agyi ku ja Pilato wyinaty tō tyik'ōōky ja Galileit jaa'y, jōts ku ja jaa'ñi'jpy ja ttukmiyō'ōyiyi'ñ ja jiyujkni'jpy mididi ja wyinaty kō'ōm tō t'ukyik'ōōkti mididi ja wyinaty kō'ōm tō tyoxti. ² Jōts ja Jesūs wyaāñ:

—Jade'en mee mwinmay jōts ja' ja Galileit jaa'y kyujajitidip jade'en ku ja yjantymbyōktyundi sam jam jade'en ka' pōn jam y'etjotpti kyajpjtpti. ³ Ōts wamp jōts ku ka'; ti pōn idō'on ka'ōokp, nayide'en mee m'ōokt pōni ka' mdsinaa'yin xyiktigatsti. ⁴ Jade'en meets yjawi mwinmaāñi, ja jaa'y pōn ō'ōktōō nimaktuktujk ku ja pōch ja pyajitdōō mididi wyinaty janch kōjxp tanaapy mididi yiktejp Siloé, jade'ents meets yjawi mwinmay jōts ja' ja kyubajtip ku ja jawaani pōky tyaja'adyidi sam ka' pōn pōn jaty jam Jerusalén tsinaadyip. ⁵ Nōmpts ōts ku ka'; nayide'en mee m'ō'ōkōxt sam ja'ajindi pōni ka' mdsinaa'yindi xyiktigatsti.

Ku ja Jesūs tmadyakpaaty ja iigi kipy mididi katōōmip

⁶ Xjats ja Jesūs tmadyakpaaty tu'uk ja ejxpajtin madya'aky jōts ja wyaāñ:

—Tu'uk idō'on jaa'y, jamts ja y'iigi tsa'am kam ja', ja'ats ja y'ats'ijxpy pōni tō dō'on ja wyinaty tyōōmi, jōts ja ni tu'ugin tkapaajtōō ja tyōōm. ⁷ Jamts idō'on tyumbi tu'uk pōn ja kam t'ejx'ejtp jōts ja tnimaay: “Ukmadowim, tigōōk jumōjt ōts ixyam kujk njamiyō'ōy jōts ōts ja iigi tsa'am njatukwā'āñ, nijuunits ō ni tu'uk ngapaatynim. Yikidaagōjxnits yō ñiguipy; nugots ja naajx yō yjawi tyikwindujkni.” ⁸ Jōts ja kam ejx'ejtpi y'adsōōy jōts ja wyaāñ: “Wanims, windsōn, tjaak'uk'lity jadukjumōjt; n'ukuyu'up ōts, n'uktajyuu'ngip ōts yō naajx jōts ōts ja pu'uty nbiktajkit. ⁹ Kidi wan jade'en tyōōmi; pōni ka'ats, winets yikpō'tjō'ōkt.”

Ku ja Jesūs tyikmōkpiky tu'uk ja tō'ōxyōjk poo'kxin xōōw et

¹⁰ Jōts idō'on ngōōmyi, poo'kxin xōōw wyinaty, jōts ja Jesūs yik'ixpiky jam tsaptōjkjotp. ¹¹ Jamts idō'on tu'uk tō'ōxyōjk myaktuktujk jumōjt ip pa'am ja wyinaty tō pyaājtniyyi. Jōts ja jadine'en kyatso'ōky, tō ja yjigujxkidiyigōōni, miiku' idō'on ja wyinaty jade'en tō tyuñi jōts ja niwine'enin kya'ukoogukini. ¹² Ku Jesūs ja y'ejxi, winets ja yaajixiyi, xjats ja ñimaajyōō:

—Tō mba'am mniwaajtsniyyi, mōk mōjaawni mets.

¹³ Jōts ja ojts tkōnixajy, jōts ja tō'ōxyōjk nay jatyi kyoogukiyi'ñ jōts ja tiy tyaañ jadigojk, winets ja ttukmija'wiyi'ñ ttukunuu'kxyja'wiyi'ñ ja Dios. ¹⁴ Jōts ja mōjaa'y mididi tnigubajk'ajtp ja tsaptōjk tjantjami'ambijky ja Jesūs, tigōōxp ku ja yiktsō'ōky poo'kxin xōōw, jōts myigu'uk ja tnimaay:

—Paty tu'unin xōōw jaa tudujk xōōw tō yikpiktā'aky jōts jaa ndu'unindit; mendits ōy juuni nugo ku kyapoo'kxinxōōwi, jade'en mme'endit pōn jaty ja nankcho'ogē ttsojktip.

¹⁵ Jōts nwindōn'ajtim yide'en t'adsōōy:

—Mee win'ōōmbidi, ʔm'ukyik'ijtpy meets mjuyujk mdsakaa miwō'ōmbety, jōts adōōdsi xyik'etti ku pyoo'kxinxōōwi? ʔTi kidi meets ja xyikwinayk jōts meets nōō ja xaniwōpy?

¹⁶ Tits ya'at tō'ōxyōjk kyubatp ku yō kyatso'okt ku poo'kxin xōōw, pōō Abraham's yō tyeety'apip jōts ja miiku' yō myaktuktujk jumōjt ip yikpa'ambajtniyyi, ʔsudsō'ampyts yō kyamōkpōkt ōy yjapoo'kxinxōōwi?

¹⁷ Ku ja Jesūs jade'en wyaāñ, jōts ja myidsep chō'dyunnbattōō; jōts ja mayjaa'y tyaxondaktip ja' ku ja t'ejxti jade'en ja Jesūs myōk'ajtin tyikwingaxi'iky.

Ku ja Jesūs tmadyakpaaty ja mortas tōmt

¹⁸ Yide'ents ja wyaāñ:

—ʔTixik ja y'ukyiktam'ejxip ja Dios Teety kyutujk mididi ja tyanitanaapy yjaa'y? ʔTixik jade'en? ¹⁹ Jade'en idō'on n'ukpiktaajkin ja' sa mōj mortas tōmt mididi ja jaa'y wyōjpy kyamjōtpy, kuts ja myuxy jōts ja jade'en yōñ sam o ti mōj kipy yōñ paxax paxax, jamts ja joon kyōōke'eky jōts tyik'ōyibaat pya'an ja jam mā jaty y'awaj y'axeeñ ja jam.

Ku ja Jesús tmadyakpaaty ja levaduri

²⁰ Nayinøom ja Jesús:

—Tixik øts jadu'uk n'uktami'ejxip ja Dios kyutujk midì ja tyanitanaapy yjaa'y. ²¹ Jade'en idø'on ndejint sa ja levaduri midì yiktamimøø'kxip ja ariin way jøts ja amuum tyakaagyit, jøts ja jich yaakt.

Ja mutsk tøjk'aaw

²² Xjats ja Jesús ñajxy jøts ja jam ojts ñijxy Jerusalén, yik'ixpøjkp yik'ixpøjkp idø'on ja', pøni ma jaty kajp ja tjaaty ja møj ja mutsk. ²³ Winets ja jaa'y ja tu'uk yiktøøjøø:

—Windsøn'ajtim, çjanch niwaani dø'øon ja jaa'y ñitso'ok'att?

Jøts ja Jesús ja t'adsøøy:

²⁴ —Janch jade'en jaa ku jap ka' pøn nugo ajawi ñaxti, øyimts x'ejxtit ma mdøkidit, jade'en ja n'ukpiktaajkin sam jaa'y tnanaxy mutsk tøjk'aaw; øy jap pøn yja'uktøkiwyani, ka'ats ja y'uknaxnìdit. ²⁵ Kuts ø ndanaagyukit, jade'en ø ndanaagyukit sam kudøjk tyanaagyukin jøts tyøjk'aaw ja t'atsyik'aduky. Pøni tøts meets jap wyinaty mðandi tøjkwimpy, mjadugajpxidi mjatøjkwingoxti meets jap, uk mjanømdi meets jap: “Windsøn'ajtim, yiktøjk øts.” Jade'ents mee nnøjmit sa ja kudøjk wya'añin: “Ka' mee nnijawi pø mbøn meets, pø ma mee mdsøøn.” ²⁶ Jats mee mwinambinaxwä'akt: “Tiku me ndejint øøts xka'ijxyi, jabi tøts adøm ngaamyujkin n'uukmujkin, jabi mets ojts o madsoo myik'ixpiky.” ²⁷ Yide'ents mee n'adso'ot: “Tø nwa'añ jøts ku mee ka' nnijawi pøni mbøn meets. Jiwa'akti ya, kidi øts ya xwin'ejxti, çpønøik ø x'abajxtip, kidi meedsip?” ²⁸ Japts mjøødit mya'axtit, m'amdøtskaattit mdaachtøtskaattit ku x'ejxtit ja Abraham, ja Isaac, ja Jacob jøts ku ja jap ne'egi møøt niduki'iyi ja Dios kyugajpxy y'etti, ma Dios kyutujktaajk ma yjaa'y ja tnanitani kyutujk. Ka'ats meets jap jade'en mdøkit. ²⁹ Yøømyujkøxtip naxwii'ñit jaa'dyi, o madsoo choondit, jøts ja tpaajtidit ja Dios myøjkunuu'kxin midì nipøn jypapatpynim, midì ja tya'awijpxy ja yjaa'y. ³⁰ Pøn yam yik'ejxtip ka'ejxiyimdi, pyadundipts ja ne'egi sa nwa'añ, ja'ats idø'on ne'egi nøjx yikmøjpiaktip, pønts ñadyijyi icyam møj nija'wibimdi jøts ja ka' tpadundi sa nwa'añ, ja'ats idø'on yik'ayowim jattip.

Ku ja Jesús t'ayo'ijxy ja Jerusaléngit kajp

³¹ Jøts ja fariseotøjk nay ja'abi xøøw yjajtøø ma dø'øon ja jam wyinaty jøts ja ñimaajyøø:

—Jade'en ne'egi tyimy'øy'att ku mnøjkxnit, myik'ookwajnipts ja Herodes.

³² Jøts ja t'adsøøy:

—Nøjx x'atsnøjmidì ja tsaach wyax'atøøy jøts ku yamyi jabomyi wixøjkpyi njaakajpxpidsimy ja miku', njaakyktsøøky ja jaa'y jøtsnim ø n'abaadit. ³³ Nøjxpximts øts jam Jerusalén, tuu'døjkp ø tsojk, ti ma Dios kyugajpxy abikyajp y'uk'øøky.

³⁴ 'iMets Jerusaléngit kajp, meets Jerusaléngit jaa'y, pø meetsxi myik'øø'kpy Dios kyugajpxy, meetsxi mnänkya'jtsip pøn Dios kyajpxy y'ayuujk tyikyø'øyp ku Dios ja ya mjadandiguexyidi! iTø njapeemukwa'añ njakonmukwa'añ ja m'u'nk ja m'una'jk sam tsikuna'jk tyaak ñim'uuxyi tu'ugyi, ka'ats jade'en tø xkupiky! ³⁵ Ejxtits inet ja mdsaptøjk abak tyandi; øts idø'on wamp jøts ku meets xka'uk'ejxnit tsojk jøts ku meets jaanim x'ext pøni juuni ja xøøw ja jumøjt wyinaty yja'aty ku mnøømdit: “Ejxik Dios kyunuu'kx u'nk ñadyagugexyi midì mmimejnip ja kyutujk.”

14

Ku ja Jesús tyikmøpkiky ja jaa'y pøn wyinaty kexp

¹ Xjats idø'on yide'en yjaty ku poo'kxin xøøw tpaajty, ojts ja Jesús kaabyi ñijxy jam windsøn tyøjkwindem pøn ja fariseotøjk wyindsøn'ajtip. Jamts idø'on ja'adi ja ti ma ja y'etti, jam ja tpa'ejxti tpaowdi. ² Jamts wyinaty tu'uk jaa'myi pøn ke'expa'am pøjkp. ³ Jøts ja Jesús tñimaay ja kajpxwejpitøjkti møøt ja fariseotøjkti, yide'en ja tyiktiyi:

—çKutuky jøts ja pamaa'y cho'okt poo'kxin xøøw u ka'?

⁴ Jøts ka'ap ja y'adsowdi, amøñi ja y'etti. Winets ja tñixajyiyi'ñ ja pamaa'y jøts ja tyiktsøøjk, yide'en ja tñimaay jøts ku ja ñøjxnit. ⁵ Winets ja tñimaay ja fariseotøjkti:

—çPøn yjiyujk chakaaj jaty tka'ukyikpidsømp ku ja ja'jøtpy kyunaxy øy yjapoo'kxinxøøwi?

⁶ Nika' idø'on y'adsojimbetti, nisä ja kyawa'andi.

Ja tø'øxñigaabyi tø'øxñi'ukpidi

⁷ Jamts idø'on ja Jesús t'ijxy ja migaabyidi jøts ku ja twi'ejxti ja chinaabyajti ku ja twinguwaadsidi ja kaabyajt jam, jam ja y'ixa'akti ma dø'øon ja myøjtøkidit jøts ja ojts t'ane'emy:

⁸ —Ku pøn mwawidit tø'øxñigaabyi tø'øxñi'ukpi, kidi jam jaty m'ixa'akti ma ja tsinaabyajt jam ja windsøn tø yktanibiktaagi, jaa ku ja wyinaty yja'aty yam meets jam tø m'ixajkni; ⁹ jøts ja kujøon kudøjk mnøø'mxiyidit pøn wyinaty tø mwayidi: “Tani me waani, wan

ya'at jam tsøøni." Xjats kuwani mjanchjajiw'a'aktit tsø'odyumbim jøts jam m'ixa'aktit ma o pøn y'ixa'akti. ¹⁰ Ku pøn jade'en mwawidit, ne'egi øyts ku m'ixa'aktit ma o pøn y'ixa'akti; kø'ømmimts ja kujøøn kudøjk ja mdukmadowidit ku ja jam wingon mye'ent, jøts ja mnøø'mxidit: "Ya, migu'uk, naξ mdsøøniidi ma jam yik'ayowim tø mdyimy'ixakniidi." Jade'ents meets ja xajotkujk'attit ne'egi ku jade'en kø'ømm myiktukmado'odit, yam ja jam chøøniidi pøn jaty ja kaabyajt tø twinguwaadsidi. ¹¹ Pøn kø'ømm namyøjpiktaajkip, yik'amutskpiktakpts ja nøjxx, pønts kanamyøjpiktaajkidip pøn ka'ejxiiymidi, ja'ats ne'egi møjtøkidip, ja' yikmøjpikta'aktip.

¹² Ñayi ñimaay ja jaa'y ja' pøn ja wyinaty kaabyi tø wyayi:

—Ku pøn xyikaawya'ant, kidi ja'ayi nugo xway pøn jaty møøt mnamyayiyi, ni ja mmigu'uktøjk xkawa'at, ni ja kumeeñ jaa'y xkawa'at pøn jaty jam mmigujøøn'ajtpy mmigudøjk'ajtpy. Ka'ap ja'ayi xw'a'at pøn jaty myiwimbejtxiyip pøni ti jaty mets myajkpy. ¹³ Ja ne'egi mw'a'ap ja ayooi jaa'y, ku ti xøøw xu'unt, waw ja' pøn kati'ejtxidip, pøn kyø' tyeky ma'atti, uk y'eixidi sagasa, pømbi tyeky ka'ejtp, pømbi jam winap. ¹⁴ Ne'egi nekimts jade'en mnayjawayit, pø ka'axi ja mdunwimbejtxiyi nayide'en pøni ti mets ja tø xmø'øy, jaanimts ja xwin'ext sa ja mwingaxøjkxiyit ku jadigojk jujky'ajtpi pyidsø'omdit pøn jaty tø tpadundi pøni sa jaty pyaät'aty.

Ku ja Jesús tmadyakpaajty ja møj a'ux

¹⁵ Xjats nidu'ugin ja fariseotøjk wyaañ pøn jam wyinaty tø twinguwaadsidi ja kaabyajt, jøts ja tñimaay ja Jesús:

—Nekim xøñim ja'adi pøn ka'adyip jade'en ku Dios ja kyutujk ttanitanit ja yjaa'y.

¹⁶ Ja'ats ja Jesús tñimaay:

—Tu'uk idø'øn jaa'y t'a'ejxiyii'ñ ja a'ux møj'ampy, tøts ja wyinaty ttukmadøy ja mayjaa'y pøn jaty idø'øn ja wyaawampy. ¹⁷ Kuts ja a'ux'aats tpaajty, xjats ja tkejxy tyumbi jøts ja t'atstukmadoowa'añ pøn jaty idø'øn ja wyaawampy jøts ja t'atsnøjmit: "Jamststik, jamik tuki'iyi a'ejxi abaadi y'ejtni." ¹⁸ Jøts ja tum jade'en ña'nikajpxu'udyidi jøts ku ja ka' ñøjkxiti, yide'en ja yjawyeembi wyaañ: "Naajx ø tø njuy, ja'ats ø n'ats'ejxwampy, mee mjanch'ukmaa'kxp." ¹⁹ Jøts jadu'uk yide'en wyaamaa: "Ndsakaa ø magoxk yuundi tø njuy, ja'ats ø n'ejxmatwampy pøni yuup idø'øn uk ka'; mjanch'ukmaa'kxp inet idø'øn, ka' øts inet ndsoont." ²⁰ Jøts jadu'uk wyamøø: "Tyimyjemy'amajtskipnim øts, patyts øts inet ka' nmajada'akt jøts øts inet ka' nnøjkxt." ²¹ Kuts ja tumbi wyimbijty jøts ja ttukmadøy ja wyindsøn sa jaty ja wyinaty tø yiknøjmi. Jøts ja windsøn yjantiyim'yambijky jøts ja tñimaay ja tyumbi: "Tsojk nøjxx nøø'ajy tuu'ajy wine'en yø kajppoojt, jøts xwaame'ent ja ayooi jaa'dyi møøt ja'adi pøn sagasa ejxidip, pøn kyø' tyeky ma'atti, pøn winapti." ²² Jøts ja tumbi yjatsø'ongojmi jøts ku wyimbijty jøts tñimaay ja wyindsøn: "Tø øts windsøn idø'øn jade'en nduñ sa tø mw'a'añ, jaakwindampts ja tsinaadyaajk ja poo'kxaajk." ²³ Winets ja windsøn ja tyumbi tñimaay: "Nøjxx tuu' xkuyø'øy ma jaty paduu' ma jaty ti, jøts pøn jaty mbatpy møk'ampyts ja xwaame'ent jøts ya xkuwawit, ujts øts yø ndøjkjoojt n'ejxwa'añ. ²⁴ Tyimnømp øts ixyam, kawindem xøøw øts ja xja'gyajpidi ja n'a'ux pøn jaty øts ja jawyeen tø njadaniway."

Tuki'iyi nadyamiyoxant ku Cristo nbadu'unint

²⁵ May jaa'y ja Jesús o madsøo padso'onip jøts ja pyawidityiyi; jøts ja tuk'ojk tñiwa'k'awidijty jøts ja tñimaay:

²⁶ —Pøn jaty øts ya xpawidejtip, pøni jaa pøngapøn, pøn tpa'ayoodip tyety tyaak, y'u'nk ñidø'øxy, chø' y'uch, myigu'uktøjk, uk kø'ømm paat ñabya'ayøyi, ka'ats øts ja mibaat n'babøjkpi'att. ²⁷ Kaja'ajip ø n'babøjkpi'ajtpy pøn ja ayon tkamidanaadyip pøn ø xkabadu-ujnidip ja nja', xjapawidewandipts øts, ka'ats øts yjade'embi jaa'y n'babøjkpi'aty. ²⁸ Ti ka' meets ja jawyeen xanipaaty, ku pøn pøch køjxp t'ukyikpidø'økwa'añ pøni ti jaty idø'øn tsojkip jøts ja y'abaadit pøni wine'enin ja chøkyi ja gasti, jawyeents ja yiktanipatkixy. ²⁹ Kuts nugo ja pøchkojkpy pidø'økixy jøts ja nika' y'abaadi, janch nigajpxy nimadya'akts ja yjaty ku ja jade'en pøn t'ixy, ³⁰ jøts ja wya'andi: "Tø yø jaa'y y'ukpojtsoøñ jøts yø nika' tø t'ukyik'abajtiñi." ³¹ Uk kuts o pøn windsøn tsep t'uktunwa'añ møøt jadu'uk ja myiwindsøn midi ja syoldadi ja tyikmemp ni'ee'px mil, çti kidits ja jawyeen ttanibiktaagit pøni sudso dø'øn ja ttukwa'ktsø'ot pøni ja'ayi tam ja syoldadi tmøøt'aty nimajk mil? ³² Pøni ka'ats ñay'a'ejxiyi, jøts ku jagannim ja myidsep myiñ, kyaxpts ja tu'uk ja kyugajpxy jøts ja t'amido'ot jøts ka' cheptu'undit. ³³ Nayide'ents meets pøni ka'ap jawyeen xpawinmaadyi pøni ti jaty idø'øn m'ixmatstip øts køjxp, ka'ap meets jade'en mibaat n'babøjkpi'att.

Sa kaan amuum tyik'øyigyijxy

³⁴ Kaan amuum tyik'øyigyøjxp o ti, nayide'en meets idø'øn ndejint m'ødyu'unt ku mmigu'uk xukmado'ot ja Dios yja' sudso y'anmija'win kyawindigø'ødyit. Kuts ka'ap jade'en

mdu'undit, tō wyinaty mbidsōm̄di ejxim ja kaanin midī kawā'ats midī katump. ³⁵ Nima ja jade'en kyatu'unt ok naajx ok ti tyiktū'unt, ja ti nōō'mim̄p ok idō'ōn ja nda'abu'jta'ant, pō nugoxi ja jadi'ifiñ ñiyik'ixkō'oy. Ja'gyukidi pōni mja'gyukiwyandip.

15

Ku ja Jesūs tmadyakpaajty tu'uk ja borreegi midī tigōōpy

¹ Nimejnip idō'ōn ja Jesūs jam ja yikugubajtpitōjkti, ja jaā'dyi pōn amuum tyimiyik-tejtīp pōkyumbi jaā'dyi, jōts ja jam myendi amidodujkpi, ² patyts ja fariseotōjkti mōōt ja kajpxwejpitōjkti tjanchpagajpxti ja Jesūs, jōts ja wya'andi:

—Tum ka'oy jaā'y yō kyupijky jōts yō jotkujk tmōōtkay tmōōt'uuky.

³ Ja'agōjpxts ja Jesūs tmadyakpaajty tu'uk ja ejxpajtin madya'aky midī yide'en wamp:

⁴—Ku meets wyinaty x'ukyiktigōy tu'ugin ja mborreek midī nimagō'pxy, t̄ti kidi meets ja ñimakta'pxy myaktaxujkpi borreek jam xyikta'ant jam pejyotp, jōts ja tyu'ukpi x'ats'ixa'adit kunim meets ja xpaatt? ⁵ t̄jōts kidi meets ja xaxondā'akt ku meets ja xpaatt? t̄ti kidi meets ja xkōxkapt mguejnkjōjpx? t̄Pōn kidi jade'en xyondā'aky ku ja nbaajtin jadigōjk midī tō y'uk'atstigōy? ⁶ Kuts jam mdōjkjōtp mja'atti, ti kidi meets ja mmigu'uktōjk, ti kidi meets ja mgudōjk ja xukmadōy, jōts ti kidi meets ja xnōjmi: “Xondā'akti meets, tōts ōts ja nborreek nbaaty midī tō y'atstigōy.” ⁷ Janch ōts idō'ōn nwa'añ jōts ku nayide'en yiktaxondā'aky jap tsajpjōtpy ja pojkpitumbi jaā'y ku ja tyiktigach ja chinaa'yin, jōts ja' ne'egi yiktaxondakp midī tu'uk jōts nigidi ja myakta'pxy myaktaxujkpi jaā'dyi pōn chinaa'yin tō tyiktigatsnidi, ñadyijyi ōy ñayjawiyidi.

Ku ja Jesūs tmadyakpaajty ja meeñ midī tigōōpy

⁸ t̄Uk pōn tō'oxyōjks myeeñ tka'uk'ixaapy ku ja tyiktigōy tu'ugin yam ja majk t'ukmōōt'aty? Kuwanits ja tyiktōōbyiky ja yjaj jōts ja pyoknaxy yja'axnaxy jap tyōjkjōtpy, yikxonts ja tyimy'ixaadōki jōts kunim ja tyimbyaatt. ⁹ Kuts ja tpaaty, jōts myigujōōn myigudōjk jōts myigu'uktōjk ja tukmadōy, yide'en ja tñōjmi: “Tō ōts ja nmeeñ nbaaty midī tō y'atstigōy.” ¹⁰ Janch ōts idō'ōn nwa'añ jōts ku Dios mōōt y'ankilis ttaxondā'aktit ja pojkpitumbi jaā'y pōn tyiktigajtsj ja chinaa'yin.

Ku ja Jesūs tmadyakpaajty ja jaā'y y'u'nk pōn tyik'o'jōjpx ja tyeety myeeñ

¹¹ Nayide'en ja Jesūs wyaañ:

—Tu'uk idō'ōn jaā'y, namajtsk myajnkun'k, ¹² jōts ja mutskpi ja ñimaajyōō: “Teety, mōōñik ōts ja pikta'aky midī tōts idō'ōn nmaay'atp.” Winets ja u'nkteety ja ojts tyikwa'kxy ja pyikta'aky jōts ja ttagumaay ja y'una'jk. ¹³ Ñiñamnim idō'ōn ja wyinaty jade'en jyaty ku ja myutskmajnk t'pōkmujkni t'ejxmujkni ja pyikta'aky tuki'iyi jōts ja ojts ttoō'kni, jōts ja ojts abikyajp abikñaaix tminijky jam jagam, jamts ja ojts tyik'o'jkixy ja myeeñ kyawindiy'ajtingōjpx. ¹⁴ Kuts ja wyinaty tuki'iyi tō tyikōjxni, jōts ja yuu jam winet et yjantyimdyōjkixy'ñ m̄a dō'ōn ja naajx ja kajp jam, jōts ja y'ayodōjkiñaa. ¹⁵ Winets ja t'ixaay tunk ma ja kugajp jaā'y jam, jōts ja ojts kyexyi kyamjōtpy kuch'ejxpi. ¹⁶ Janch tsojk jōō'kxkixyim ja t'ejxi ja kuch yji'kxy, kumi niti ja kyayikmō'oy. ¹⁷ Jōts jotmay ja tyatōjkixyōō, yide'en ja ojts ñawyinmaa'nxiyi: “Janch ku'uxyi ndeety tyumbi net jam kyaydi yjōō'kxiti, yikwindandip paat ja o ti, jōts ōts yā yuu njanch'oo'kni! ¹⁸ Tiku ōts ndeety nga'awimbeti m̄a ja jam chōōni, jōts ōts ja jam nnojmit: Tō teety Dios nmidundigōy; jōts mets, tō me nayide'en nmidundigōy; ¹⁹ ka'u'nk'atym̄i tō njantyimyjaty; yiktunkts ō nayide'en sam o pōn tumbi xyiktuñin.” ²⁰ Jōts idō'ōn ja yjanchtuu'dōjkixy'ñ jōts ja wyimbijty jam tyeety wyindum.

Jōts kuts tyeety ja jagamyi y'ejxpajttōō, xjats ja ojts y'am'ijxyi chaach'ijxyi. Jōts ja ñibujtō'jkōō jōts ja ojts pyatōyi, jigōxy jibi'kxy ja yja'jty. ²¹ Winets ja tnimaay ja tyeety: “Teety, tō ōts Dios nmidundigōy mōk'ampy, jōts nayide'en me tō nmidundigōy; ka'u'nk'atym̄i ō nnayjawiyi.” ²² Jōts ja u'nkteety tnimaay ja tyumbitōjk: “Tsojk nōjkx xjuutti ja ōybi wet jōts xuktatōkidit, piktaajkidi kyōjeets, tuktawa'agidi kyō'ok. ²³ Nōjkx x'atswetsti ja tsakaā midī yaa'kpidsōmpnim jōts xyik'ooktit. j̄Wan txōduu'ñindi, wan tkaa'yint t'uujkyindi! ²⁴ Tō ōts yō n'u'nk ndijy tyimy'oo'kni, ixyats jujky xwindanaa'yindi; tō jeky y'atstigōy'ity, ixyats jadigōjk tō nbaajtyindi.” Jōts ja ybaajundōjkidōō.

²⁵ Jōts ja myōjmajnk jam wyinaty wyidity kamjōtp; kuts ja wyimbijty, yja'jty wingon m̄a ja tōjk jam, jōts ja tmadōōy ja iy ja ech. ²⁶ Winets ja tu'uk tyaaixyiyi'ñ ja tumbi jōts ja t̄tibijyiky ti dō'ōn jam jade'en tuujnip. ²⁷ Jōts ja tyukmadoōjōō, yide'en ja ñimaajyōō: “Tōts ja m'uch yja'aty; tōts mdeety ja tsakaā tñankyik'ōōgyiyi midī y'ity yaa'kpety, ja'agōjpx ku mōk mōjaaw tō yja'aty ja m'uch.” ²⁸ Jōts ja myōjpi yjantyimy'ambijky, jōts ka'ap ja twa'añ jōts ja jap tyōkit, tyeetynim ja ojts kō'ōm ñibidsimyi jōts ja mōk ñimaajyōō jōts tyōkit tōjkjōtpy. ²⁹ Xjats tyeety ja tnimaay: “Mñija'wipxi teety winaak jumōjt me tō nmiduñ, jōts juuni me nga'ukmamadōy, nijade'ents me tu'ugin xkamō'oy ōyik chivi'u'nk ōyik ti, jōts ōts nmigō'uk

jeexyip nmøøtxøduñ. ³⁰ Aa kudamts yø m'u'nk tø yja'aty, mduknio'ljkip tam meets yø' mdsakaa winet midu yikxon tø yaa'kpety, ku mmeen yø tø myik'o'ljxiiyi kawine'en møøt kawindiy tø'øxyøjk." ³¹ Winets ja u'nkteety wyaañ: "Ti sa u'nk mjaty, pø yaayimpts me nmøødi, ti jaty øts ixa nmøøt'ajtpy tum mets yø' mja'." ³² Kuwanits pya'at'aty, çti ja ti nguidyimdyu'uñin? çti jadam yø nguidyimdyaxondaajkyim? Patyts icyam nxødu'uñindi ku yø m'uch tø yja'aty, pø nøø'mimpts adøm jøts ku yø tø y'oo'kni, icyats jujky xwin'ijxyim, jeky tø y'atstgø'yity, tøts inet nbaajtyim jadigojk."

16

Ku ja Jesús tmadyakpaajty ja ka'ødyumbi'ejx'ejtpi

¹ Ñayiñimaay ja Jesús ja pyabøjkpitøjk:

—Ja dø'øn wyinaty tu'uk kumeen jaa'y midu yiktump, jøts jats idø'øn ja' tyumbi tu'uk wyinaty midu t'ejx'ejtpi ja myøøtumbi, jøts ja windsøn yikniimaay jøts ku pyikta'aky ja nugo yikwindigø'øxyiyi ja tyumbi. ² Winets ja windsøn tnajtswa'wiyii'ñ ja tyumbi jøts ja tniimaay: "çjanch idø'øn ku dø'øn jade'en myiknimadya'aky ti øts jade'en nnimadøøpy? Køyajköjxni mdunk, ka' me n'ukyiktumbi'ejx'ejtnit." ³ Jøts ja tumbi'ejx'ejtpi yjanchmaañi yjanchtajni, yide'en ja kø'øm ñawya'añi: "çTits ø ndu'lump, ejx øts yide'en nwindson xka'ukyiktunwani? Ka'ats ø n'ukmajada'kni øyik øts idø'øn nyu'ut ndu'unt, tsø'ødyumipts øts ku øts inet njayiklimunsimujkmit." ⁴ Xjats ja tyabyaajty jøts ja wyaañ: "Tø ø nnijawu sudso ø ndabyaatt, sudso øts pøngapøn xkupøkt tyøjkjøtpy ku øts yø ndunk wyinaty tø yikpøjkni." ⁵ Winets ja tu'uk jaty tnajtswa'wiyii'ñ pøn jaty ja wyindsøn wyinaty miyoj'ajtip. Jøts ja yjawyeembi ja tyiktiy: "çWine'en øts nwindson xmiyoj'ajti?" ⁶ Jøts ja y'adsøøpy jøts ja wyaañ: "Magø'pxy tãmbi øts ajeata ja ndamiyoj'aty." Winets ja tumbi'ejx'ejtpi wyaañ: "çxya ja ñinøky; pe'tpy ixa'ak jøts xjaadyigatst, wixijikmyajk tãmbi ja'ayi xpikta'akt." ⁷ Jøts yjadu'ukpi ja tniimaay: "Jøts mets, çwine'en mets ja xmiyoj'aty?" Jøts ja ñimaajyøø: "Magø'pxy kyunchi ariin." Xjats ja tniimaay: "çxya ja ñinøky midu ojts xja'ay; wants tkajtswijchim jøts makta'pxy kyunchi nbiktaajkin." ⁸ Jøts idø'øn ja windsøn tjanchnija'wiyii'ñ jøts kudam ja tyumbi'ejx'ejtpi yikxon ø t' tniwinmayi ku dø'øn o ti ttuñ. Jade'eñimts yiknijawidi pøn jaty Dios yja' tkababøjkidip, yikxon ja ne'egi tyimyikuyati ja tyaa'y yam nigidi jade'en wyinmaa'nbyaatti pøn Dios ja'ajtidip.

⁹ 'Kajpxwejin øts idø'øn nyajkpy jøts kidi mbikta'aky nugo x'amnipøjkpatti xtsaaniipøjkpatti; pøni jam mbikta'aktyi, yikxon xyiktunkpaattit, øy yø' ka' kya'øyi. Ku yaayi, xabudøkidit o pøn, nugo ku xnijawidi tigøjxp idø'øn ja jade'en xundi. Øy ja yjakixy, wa'atsts meets ja xnijawu jøts ku meets m'anmija'win yikupøkt jap tsajpjøtpy.

¹⁰ Pøn øyjaa'y'ajtp, øyjaa'y'ajtpimpts ja øy ma, wan o ti tmayi tkamayi nayide'ents ja øy yikxon tyiktunkpaaty; pønts kidyim'øyjaa'y'ajtpim, jade'eñimts ja øy ma, nayide'en ja ka'ap tyik'ødyunkpaaty ja pyikta'aky øy ja wine'en myayi kyamayi. ¹¹ Pøni ka'ats yikxon xyiktunkpaatti ja mmeen ja mbikta'aktyi sa pya'at'aty, çti sudso'ts meets Dios yja' mjaakmo'ojyit midu ja yakwampy? ¹² Pøni ka' meets mmigu'uk yja' xwingudsø'jkiyi, çpønts meets ja mja' jade'en xijy tsø'øgyiyip, pøn meets ja xijy mmo'owajnip o meets ja xjakø'mja'aji?

¹³ 'Ka' pøn tumbi namajtsk wyindsøn tmiduñ; ku ja jade'en ttu'unt, tu'ukts ja pyidsø'ømt pøn ja wyinjawip jøts ja yjadu'ukpi tkawinjawit, tu'uk t'ømyidu'unt jøts jadu'uk tka'ømyidu'unt. Jade'ents ka' y'øyi ku Dios yikmiduñ, icyaptamts meen nayide'en myøjtøjkyimi. Paty ka' y'øyi adsow aduuk, tu'ugyi Dios n'ajot'ajtin.

¹⁴ Tyimyjade'ents idø'øn ja fariseotøjk yjaa'y'atti, ja meen ja yjanchmøjmigu'uk'ajttip, ixamts idø'øn ja wyinaty jade'en pyatmadowdi jøts ja jam tjanchpagajpxti ja Jesús. ¹⁵ Winets ja Jesús wyaañ jøts ja tniimaay:

—Meets idø'øn jade'en mjaa'y'ajttip, ñadyiyi mjanch'uknawya'atspikta'agyidi, ka' meets yjawi mbøkyuñ, jade'en ja mayjaa'y xwin'øøndi, wa'atsts ja Dios mnijawiyidi sa jaty mwa'andi mgajpxti m'am mjotp; yø' idø'øn Dios kyatsøjkpy, ka' Dios jade'en tkupiky jøts ku jaa'y jade'en kø'øm ñamyøjpikta'agyidi.

Ja Moisés kyutujk jøts ja' midu Dios tyanitanaapy yjaa'y

¹⁶ 'Ku ja Juan Bautista ya myiñi, jaayip ja kugajpxtyøjk ja y'aaw y'ayuujk y'adujktøø. Nay jaabaat ja Moisés kyutujk kya'pxy sa Dios ja wyinaty tø myø'øyi. Jøts nay jaty cho'onda'aky ja Dios y'øgyajpxy y'ø'y'ayuujk, yikni'gajpxy yiknimadya'aky ja kyutujk midu ja tyanitanaapy yjaa'y, xjats jade'en kuwani o pøn tjanchjadatøkiwya'añ ja'abi kutujk.

¹⁷ 'Kuwanu dø'øn jade'en yjati kyubat sa Dios kyutujk wya'añ, niujuuni ja jade'eñi kyakixy kyanaxy pø ne'egi køjxp najxp naajx tsajp jøts niwine'enin kyagudigøy ja kyutujk.

Ku ja Jesús kyajpxwijy sa amajtsk'ajtin ñaxy

¹⁸ Ku pøn tmajtstu'uty ñidø'oxy uk ja tø'oxy tmajtstu'uty ñiyaa'y, ja'ats idø'øn møj pøky; uk kuts pøn yaa'dyøjk tmøøt'amajtski ja tø'oxy midi tø yikmajtstu'uty, møj pøkyts ja nayide'en.

Ja kumeeñ jaa'y jøts ja Lázaro

¹⁹ Tu'uk idø'øn ja jaa'y janch kumeeñ, janch xøxy piky idø'øn ja', tum ja y'øbyi ja yikpejtpy jøts idø'øn ja xyumi'xøduñ jabom jabom, pijy xuugyin tpiakta'aky ja xyox. ²⁰ Jamts idø'øn jaa'y jadu'ukmi pøn txøøw'ajtp Lázaro, janch ayoop janch pøktsoop ja' jøts janch amuum pu'uts ja', ka'ap ja myøjki jøts idø'øn ja jam xyumi'ixa'aky jam kumeeñ jaa'y tyøk'agø'øm, jam ja kyu'uxnay'ity. ²¹ Tsojk kaagyixyim ja tja'ijxy ja kaaky abu'xk midi jam kumeeñ jaa'y kyaabyajt patkø'øm najtska'jip; jøts idø'øn uk ja jam yjanchnimiñiyi jøts ja twiweedyi ja pyu'uts. ²² Jøtsnim idø'øn ja ayoobi y'ø'jky, winets ja ojts yikniykxyi tsajpjøtpy ja ankilistøjk ma ja Abraham jap. Jøts ja kumeeñ jaa'y nayide'en y'oo'knimaa, ojts ja ñaxøki. ²³ Kuts idø'øn ja jap ayodaajkjøtpy tja'ejxni jøts kudam ja Abraham jam jagam møøt ja Lázaro. ²⁴ Winets ja møk'ampy wyaañ: "Teety Abraham, ayo'ejxk øts, kax yø Lázaro, wan tmiñ, wan yø kyø' tyikxøky jøts øts yø ndoojts xuktaxujxit; janch møk øts yap jønjøtpy n'ayøy." ²⁵ Jøts ja Abraham ja ñimaajyøø: "Ja' u'nk mja'myatsp, tøxi me xaxøñ ku me tø m'atsøøni m'atstani, ka' mets jade'en mjaty sà yø Lázaro xkaxt jam ndeety tyøjkwindum, wants yø taxoni jøts me m'uk'ayoomit. ²⁶ Jøts ti tits nnidyu'unim, abikyxi meets jami, abikyts øøts yami; ma pøn y'uknaxt øy yam pøn yjamenwa'añ nidu'ugin, uk øyts jam pøn yjanøjkwami, nisudso'ampyts pøn kyamajada'aky." ²⁷ Winets ja kumeeñ jaa'y wyaañ: "Tixi teety Abraham, pøni jade'en tunts may'ajt jøts yø Lázaro xkaxt jam ndeety tyøjkwindum, ²⁸ jaak jam øts nmigu'uk ja nimagoxk, jøts t'atstukmado'ot jøts kidi yà nayide'en myendi ayoobi yà ayodaajkjøjty." ²⁹ Jøts ja Abraham wyaañ, yide'en ja tñimaay: "Jøts timts ja wya'ant midi ja Moisés yjaa'y midi ja Dios kyugajpxtyøjk tø tñigajpxti. ¡Ti wan ja jam tñijawidi pøni myøjpiktaktip!" ³⁰ Jøts ja kumeeñ jaa'y y'adsøøy: "Janch ja jade'en teety Abraham ja', yjayiktigatstibik chinaa'yin ja y'ijtyi ku ja pøn jam jujky ñinøjxidit pøn tø y'oo'knidi." ³¹ Jøts ja Abraham ñimyy: "Tixi pøni ka' ja tkupøjkti midi ja Moisés yjaa'y jøts sà jaty ja Dios kyugajpxy wyandøø, çti ja'ats ja yjaakjanchjawidip øy oo'kpi ja jujky yjaniniykxyidi?"

17

Ja' midi yikpøkyajtp

¹ Yide'en ja Jesús tñimaay ja pyabøjkpitøjk:

—Juuni øy ti kya'ukypøkytuñ, kø'øm tsøkyts ja'. Pønts myigu'uk tyikwinmaa'nmya'atp jøts ja tyikpøkytuñ, ipø tinim sanim ja yjançjatt y'anmija'win! ² Ne'egi tyimyjapaat'ajtip jøts ja mejjotp yikniwibejpatp ku møj paandaak ja y'ukyiktayukxøtsit, jøts øts n'u'nk n'una'jk ja kidi mibaat xyikpøkytuujni. ³ Øyimts mnay'ejx'etidit jøts kidi nayide'en m'adø'øtsi sam o pøn y'adi'ichin.

Pøni m'ejxtip ku ja mmigu'uk mmidundigøyidi, tukmadowdits jøts kidi jade'en y'adø'øtsi, uk pøni nagyumaajyidipts, maa'kxuktits ja'. ⁴ Øy ja wixujk ojkin tjayiknipati, øy ja jade'en mjamidundigøyidi, pøni nadyagumaajyidipts ja nayide'en wixujk ojk pøni mnimaajyidip ja': "Ka' øts jade'en n'uktunit", maa'kxpts meets ja'.

Ja møj janchja'win

⁵ Xjats ja nwindson'ajtim ja kyudanaabyitøjk ñimaajyøø:

—Møøky øøts janchja'win møj.

⁶ Winets ja tñimaay:

—Kuk meets jeexyip wine'enin xmøøt'aty ja janchja'win sam tu'uk mortas pajkin, tøts meets ya'at kipy jeexyip xnimaañidi: "Piðø'øk ya jøts mejjotp mnøjkxt, jamts myo'ont", nay jatyts meets ja jeexyip tø mmimadøyi.

Ja tumbi tyunkjøøjp

⁷ Ku pøn ja tumbi t'ukyiktuñ kyamjotp, tyikyuy'uy tyiktuñ uk tyiktsakaa'ixy ja jam, kuts ja wyimbity jam wyindsøn tyøjkjotp, ku ja jam yja'aty, çti jatyi ja jam tyimyknojmi: "Yà tyimñax jøts mga'aty"? ⁸ Pø ka'axi ja jade'en yiknojmi, pø yiknimaapyxi ja jam: "Yik'øyk øts n'a'ux jøts ø xwindsø'øgit, wan øts jawyeen tkay t'uuky jøtsnim me mga'aty m'uukt." ⁹ Kuts ja tumbi ja jade'en tø tja'uktumi pøni sà dø'øn ja tø yik'ane'emy, çja ti winets ja yiktakajxa'aky? Pø ka'axi. ¹⁰ Nayide'ents meets idø'øn Dios xmidu'unt, ku ti xun'abaadidit pøni ti ja mduktuujnidip jøts meets ja xnøjmit: "Ti tumbi øøts idø'øn, ja'ayi øøts iiy tø nduñ, midi paat'ajtip øø ndu'ump."

Ku ja Jesús tyiktsøøjky nimajk ja jaa'y pøn jadi'iñi putsnidip

¹¹ Kuts idø'øn ja Jesús tyuu'døjkigyojmi jøts ja ñijxy jam Jerusalén, najx idø'øn ja Samariit etjotp jøts nayide'en jam Galilea. ¹² Jøts kuts ja yja'jty jam ma tpaajty tu'uk ja kajp, jamts ja

pyajtøø nimajk ja jaa'dyi pøn pu'uts pa'am wyinaty pøjkidip, jøts ja jagamyi wya'k'øyidøø,¹³ jamts ja møk'ampy ñimaajyøø:

—iWindsøn Jesús, ayo'ejxk øøts, ejx øøts yide'en njaty!

¹⁴ Kuts ja t'ejxpaajty jøts ja tnimaay:

—Nøjxk x'ats'ejxti ja teetyøjkti.

Xjats ja jatyi ñøjxkøø, jamnim ja wyinaty ñaxti ku ja tsø'øky ñayja'winiyidi.¹⁵ Winets nayjaty tu'uk t'ejxpaajty ja pyu'uts jøts kudam ja tø tyaaгыøjxni, jøts ja jatyi wyimbijty, møk ja Dios ja ttukmøja'wiyii'ñ ttukunuu'kxyja'wiyii'ñ, ñiyaxni niyjojkni ja wyimbijty.¹⁶ Jøts ja twinguxanay'øyiyii'ñ ja Jesús jøts ja jamyi ñamyujtstaa'jkøø, ttukmøja'wiyii'ñ ttukunuu'kxyja'wiyii'ñ ku ja wyinaty jade'en tø yiktsø'øgyi. Samariit jaa'y idø'øn jade'en tump.¹⁷ Xjats ja Jesús wyaañ:

—¿Ti kidimts meets nimajk tø mdsokixy? ¿Ma net ja yjanidaxujkpidi? ¹⁸ Jabyøø'kxyik øts ya ne'egi xnimemp nadyu'uk, yø'øjik øts ya ne'egi x'atskajxajkp.

¹⁹ Jøts ja tnimaay ja jaa'y:

—Wa'kuki jøts mnøjxniit; ja'agøjxp tø tyay yø mbu'uts ku ø tø xjanchjawii.

Sa ja Dios ja kyutujk tyikme'ent midi ja tyanitanaapy ja yjaa'y

²⁰ Xjats idi'ingøjmyi, ja fariseotøjk tyiktøødøø ja Jesús juunin idø'øn ja yja'att ja Dios kyutujk midi ja tyanitanaapy ja yjaa'y, jøts ja t'adsøøy:

—Ka'ap ja ti ejxin pøni sa Dios ja kyutujk tyikja'aty.²¹ Kidi xjøp'ijxy'atti jøts pøn wya'ant: "Ixya ja'", uk ñø'ømdit "Ixm ja'"; ka'ats, pø jaanixi meets ja ya xjamøø'ajtni.

²² Jøts ja tnimaay ja pyabøjkipitøjk:

—Ja'atp ja xøøw ja jumøjt ku mee tsojk ejxpaadyim xja'ejxwa'ant ja naqxwii'ñit jaa'y ja myøjukdanaabyi, ka'ats meets ja jatyi x'ext.²³ Mjadyimyjayiknøjmidi meets: "Ixya ja'", uk møk'nøjmidi meets "Ixm ja'". Kidits xmiðøkti.²⁴ Ku ø nme'ent, wa'ats x'ejxtit xnijawidit jade'en sam ja et wyidsukyin xem yam tyikjajta'aky, jats idø'øn wyinaty tmibaat'aty.²⁵ Jawyeents ø n'uk'ayo'ot øy øy, ka' øts ja jaa'y xkupøktit pøn jaty ja ixyam jujky'ajttip.²⁶ Nayide'en ø njatt sam ja Noé yjajtyin ku ja ya y'atsinaay, nayide'en øy pøngapøx y'ado'øts.²⁷ Kya'adyit y'uuktit sam ja y'adøstøø, y'amajtskidi ja jotkujk, ja y'u'nk ja ñøøx ja tyik'amajtskidi tyimyyaakja'abi xøøw ku ja Noé tyøjkiyii'ñ jam barkijotp, kuts ja møk tuu myiini xjats ja ojts ñi'ijtyi y'oo'køxti.²⁸ Nayide'ents yjajty ku y'atsja'ajty ja Lot: jotkujk kyaydi y'uukti, yjuydi kyajpxti, yakti tyoøkti, ñe'epti kyojti, ña'adi pyotsti, ja tyøjk tyik'øyidi jotkujk;²⁹ kuts ja Lot jam Sodoma kajjotp ja'ayi pyidsiimy, jøts ja jøønduu jatyi myiini jøkmyøøt, jøts ja niduki'iyi tyikna'x'o'jkixy ja jaa'y.³⁰ Nayide'ents idø'øn winet et yjatt ku ø x'ejxpaattit jotmøñ.

³¹ Pøni jam wyinaty øy pøn jam tøjxøjxp tø pyety, ka'ats ja t'uk'atsnidøjkinin pøni ti jaty ja jap tyøjkjøtpy myøø'ajtpy jøts ja tøkpidisømwa'ant; pøni pønts jam wyinaty widejtp kamjotp, ne'egi tø'øpts ku ja ne'egi kya'ukwimbejtnit tyøjkwindum.³² Ja'myajtsidi ja Lot ñidø'øxy sa ja yjajty.³³ Pøn kagu'øøgyim pyikta'aky t'ejxp, windigø'øpyts y'anmija'win ja'ats Dios wyingujkp; pønts tkayikmøjtøjkip øy ti, pøn ø ne'egi tu'ugyi xnadyamiyøjxip, ja'ats idø'øn y'anmija'win nøjx nitso'ok'ajtp.

³⁴ Øts idø'øn wamp jøts ku jam wyinaty o pøn namajtsk ttamaamukti tu'ugyi ja maabajt, tu'ukts ja ja'ayi yikpøkjø'økt jøts ja yjadu'ukpi wyindigø'øty.³⁵ Pøni jam tø'øxyøjk wyinaty namajtsk yjøjtsmukti, tu'ukts ja nayide'en yikpøkjø'økt ja y'anmija'win jøts ja yjadu'ukpi nayide'en wyindigø'øty.³⁶ Nayide'en ja yaa'dyøjkmidi, pøni jam ja namajtsk wyinaty jam kamjotp, tu'ukts ja yikpøkjø'økt jøts ja yjadu'ukpi ka'.

³⁷ Kuts idø'øn ja jade'en tmadoodøø jøts ja ojts tyiktøwdi:

—¿Ma windsøn'ajtim idø'øn ja jade'en yjatt?

Jøts ja y'adsøøy:

—Kidi mwa'andi ku ja kyayiknijawit, jabi niduki'iyi meets ja xnijawit ku ø nme'ent.

18

Ku ja Jesús tmadyakpaajty ja ku'økytø'øxy jøts ja kudunk tiidyumbi

¹ Xjats Jesús ja ttamadyakpaajty tu'uk ja ejxpajtin madya'aky. Ja' idø'øn ja tyukmadogukiwyampy jøts ja Dios'ajot'ajttit jøts nijuuni kya'amutsk'attit.² Jøts idø'øn ja tnimaay:

—Jam idø'øn kudunk tiidyumbi wyinaty tu'uk jam kajjotp, niwine'enints idø'øn Dios ja tkidyimwyindsø'øgi, nipøn ja tkamøj'ijxy øy yjapøni.³ Nayjamts idø'øn ku'økytø'øxy tu'uk chinaamyi, ja'ats ja kudunk tiidyumbi jam tmiyø'øy'ejtp, ejtp ja yja'øø'ngunaxy, jøts idø'øn ja tja'amidøy ja tiidyu'unin, ja myidsep tjani'øøni jøts ja yikpayø'øty.⁴ Jøky idø'øn kudunk tiidyumbi ja tkamøjpikta'aky jøts ja ka'ap tpayø'øy, xjanimts ja wyinmaay: "Øy øts idø'øn Dios ngawindsø'øgi, øy øts idø'øn nipøn ngatunk'aty,⁵ kuwanits øts idø'øn jade'en ndu'unt,

pø ejtpts øts yø xjanchmiyø'øy'ity, janch møk ø xyikjotkixy, tikuts øts yø nganitanit jøts jade'en kya'ukmenit jøts øts yø xka'ukyikjotma'tnit."

⁶ Jøts ja nwindson'ajtim yide'en yjaakwaañ:

—Ja ka'øy kudunk tiidyumbi dø'øn jade'en wamp. ⁷ Kuts idø'øn Dios, çti jaa ja tkidy-imñitanit ja yja' pøn ja xinaxy tsunaxy ja'myajts'ejttip? Çti kidi ja jatyi tpuðøjkiñit? ⁸ Øts idø'øn wamp jøts ku ja jatyi tñitanit ku ja jatyi tñikajpxu'utt. Kuts ø nme'ent, çwindem øts naxwii'ñit jaa'y n'ukpaaty tum jade'en tu'ugyi ja yjanchja'wint?

Ku ja Jesús tmdyapqajty ja fariseotøjk jøts ja yikugubajtpi

⁹ Jøts ja Jesús ttanimadyaktøjkii'ñ jadu'uk ja madya'aky, jøts ja ttukmadøy pøn namyikaxi jaa'y'ajttip, kø'ømyi ñay'ødyijiyidi ñay'øbyikta'agyidi jøts ja myigu'uk ja kawin'ijxyim tjawidi. Ja'ats idø'øn ja ñimaay:

¹⁰ —Namajtsk idø'øn ja jaa'y ñøjkxtøø Dios ajot'ajtpi jam tsaptøjkjotp: tu'uk fariseo, jøts ja yjadu'ukpi yikugubajtpi jaa'y. ¹¹ Tanaapy ja fariseo jøts ja yide'en tmigajpxy: "Dios Teety, ndukmøja'wip ndukunuu'kxyja'wip mets ku ø ka' nayide'en nduñ sam o pøn myaatsti kyawindiyjaa'y'atti, sam øy pøn axøøk pyøkyundi; ni ngajade'eni paat øts sam yø yikugubajtpi ixa tyani. ¹² Majtsk ojk me n'amaay'aty tuksamaan, ngagugayi ngagu'uugi mets, jøts ndamiyøjpxy mets nbikta'aky wan jatyi ti jaty ø nbatpy n'ijxpy." ¹³ Jøts idø'øn ja yikugubajtpi jagam ja ne'egi wya'k'øyyii'ñ, ka'ap ja jadine'en y'aaw yjoort myajada'aky jøts ja wine'enin y'exjø'økt jøts ja wine'enin chajp'ext, jøts ja ne'egi ñagyachkoxi, yide'en ja wya'añ: "Dios Teety, ayo'ejxk øts, janch pojkpitumbijaa'y øts!" ¹⁴ Xjats ja Jesús yide'en wya'añ: "Øts nømp jøts ku ja yikugubajtpi ojts ne'egi yikmee'kxy, jøts ja ojts wyimbejtni ñøjkxni tyøjkwindum, tø ja yiktamee'kxy ja pyøky. Jøts ja fariseo nigidi yikmee'kxy pøn namyikaxi jaa'y'ajtip, pøn kø'ømyi nay'ødyejidip nawya'atspiktaajkidip, ka'ats ja mibaat tminaxti ja wyinmaa'ñ jam Dios wyindum. Pønts tpojkya'widip ja pyøky, pøn yik'ayowim tminuu'kxaktip ja Dios, ja'ats idø'øn ne'egi møjtojkidip jam Dios wyingujkp."

Ku ja Jesús ojts tkunuu'kxy ja mutsk una'jk

¹⁵ Nayi yiktanimemp idø'øn ja Jesús ja mutsk una'jk jøts ja tkønixajt; jøts kuts ja pabøjkpitøjk jade'en t'ejxtøø, winets ja ojts møk twingugajpxidi pøn jatyi ja mutsk una'jk tyikmendip. ¹⁶ Winets ja Jesús ja mutsk una'jk tyaa'xmiiñ, jøts ja pyabøjkpitøjk ojts tñøjmi:

—Wan yø mutsk una'jk tmeni, kidi meets yø xkaduknimiñ; ja yjade'embijaa'y idø'øn Dios kyutujk nitanaajjidip. ¹⁷ Janch meets idø'øn nñøjmi, pøn tkagupøjkp ja Dios kyutujk midi ja tyanitanaapy yjaa'y sam ja mutsk una'jk ja tkupikyin, niwindemts ja tkapaaty tka'ixy ja Dios ñitso'ok'ajtin pøni ka'ap ja tkupøkti.

Ja kumeeñ jaa'y

¹⁸ Jøts idø'øn ja Jesús tu'uk ja kumeeñ jaa'y ñimaajyøø:

—Mets øyjaa'y yik'ixpøjkpi, çti ø ndu'ump jøts øts ja n'anmija'win tpaatt ja nitso'ok'ajtin xemikøjxp?

¹⁹ Jøts ja Jesús wya'añ yide'en:

—Çti jade'en myikwajnip jøts ku øts øy? Ka'ap ma pøn tu'ugin y'øyi sam Dios.

²⁰ Mnija'wipts ja Dios kyutujk sa ja wya'añ: "Kidi mmigu'uk ñiyaa'y ñidø'øxy xpøjkxi; kidi myikjaa'y'øøky; kidi mmeech; kidi mmigu'uk xwin'iiñ; windsø'øgi mdeety mdaak."

²¹ Jøts ja jaa'y wya'añ:

—Jaayim øts yø jade'en nbaduñ ku nmutsk'aty.

²² Kuts ja Jesús ja jade'en tmadøøy, xjats ja tñimaay:

—Jap jadu'uk midi mgabadumpñim: too'køx ti jatyi jam mmøøt'ajtpy jøts ayoobi jaa'y ja xabudøkit, jøts ja jap tsajpøtpy nøjkx mwingaxø'jxki ja jujky'ajtin; winets mdsont jøts øts xmøødit.

²³ Kuts ja jade'en tmadøøy jøts ja jatyi yjanchjotmadyøjkii'ñ kumi janch kumeeñ idø'øn ja', ka'ap ja tmatjstu'utwa'añ ja pyikta'aky. ²⁴ Kuts ja Jesús t'ijxy jøts ku ja jaa'y jade'en yjotmay'øøky, jøts ja wya'añ:

—Jwindemnim ja kumeeñ jaa'y jade'en tpaajtniyidi ja Dios kyutujk midi ja tyanitanaapy yjaa'y! ²⁵ Ne'egi tsojñ ñaxt tu'uk møj jiyujk jap xuu'ñ jutjøtpy, jøts nigidi tu'uk kumeeñ jaa'y tyøkit jade'en ma Dios kyutujk tñitanit tuki'iyi.

²⁶ Pøn jatyi ja jade'en tmadøøy, ja'ats wandøø:

—Çpømbits idø'øn nitso'ok'atp?

²⁷ Winet Jesús ja ñimaajyidøø:

—Ka'ap yø øy pøn jaa'y kø'øm ñankñitso'ogiyit, ja Dios ja'ayi myøøt'ajtpy ja møk'ajtin sudso xyiknitsoojkint, niti Dios tktatsepjawi.

²⁸ Jøts ja Pedro wya'añ:

—Windsøn'ajtim, tøts øøts nbikta'aky tuki'iyi nmajtstutkixy ti jaty øøts y'ijty nmøøt'ajtpy, icyats øøts jade'en nwidity møøt mets.

²⁹ Jøts ja t'adsøøy:

—Janch øts idø'øñ nwa'añ, pøn yjøøn tyøjk tkaba'ayoop, pøn tyeety tyaak, y'uch myigu'uk, y'u'nk ñidø'øxy tkajotmay'ajtp, ja'agøjxp ku ja ne'egi tyikmøjjiyi ja Dios kyutujk midy jyaa'y ja tyanitanaapy; ³⁰ pøni wine'enin ja ya ñaxwiñ jyaaktsøøni, pyaajtipts Dios kyunuu'kxin ja' jøts nitso'ok'atp y'anmija'win ja xemikøjxp ku ja Dios jadu'ukpi tsinaa'yin ja myo'ojjiyt.

Ku ja Jesús jadigojk tñigajpxy jøts ku ja y'oock

³¹ Xjats ja Jesús abiky tyaajxyii'ñ ja nimakmajtskpi pabøjkpitøjk, jøts ja tñimaay:

—Yamnims inet jam Jerusalén nnøjkxindit, ma jade'en yjatt sa jaty ja kugajpxtyøjk tjaadyandøø jøts ja tñigajpxti ti ø ndu'ump, ti nbaatp. ³² Yikmatsp øts jøts ø nyikøoyakt nyiktagodøkit pøn ø ngamigugajp, nyiknixe'ekt nyiktaxe'ekt øts, nyikwidsujt nyikjøtsujt, kawine'en nyikjemnøjmit nyiktenøjmit. ³³ Ku øts jawyeen n'ukyikwinwopt n'ukyikjøpwopt, jøtsnim øts ja xyik'oockti; pidsø'ømpst øts jap oo'kpi jutjøtpy kidigøøk xøøw.

³⁴ Jøts ja ka'ap tja'gyukidi nisudso'ampy, pø ti ja jade'en yiktamimadyaktip, nisudso'ampy ja tkaja'gyukidi.

Ku ja Jesús tyikwin'ejxwa'kxy ja winap jaa'y

³⁵ Kuts ja Jesús jam wyinaty Jericó yja'atwani, jøts jam tuu'pa'am tu'uk chøøni ja winap jaa'y, jam ja yiklimunsimuky. ³⁶ Kuts ja tmadøøy jøts ku ja mayjaa'y jam yjanchnaxti, jøts ja ojts tyiktii tyi dø'øñ tuujnip jajtip. ³⁷ Jøts ja yiktukmadøøy jøts ku ja Jesús jam wyinaty ñaxy pøn jam Nazaret tsoo'mp. ³⁸ Winets ja møk'ampy wyaañ:

—Jesús, mets m'aats'ajtpy mgugoj'ajtpy ja David, ayo'ejxx øts!

³⁹ Pønts jam wyinaty jawyeen yø'odyip, ja'ats ja møk'ampy nimaajyøø jøts y'amo'ont, jøts jyaaktyimiyikjinajpxy ja', ka'ap ja y'amøñ, jinaxy ja wyan'adi'ich:

—Jesús, ayo'ejxx øts!

⁴⁰ Winets ja Jesús wya'k'øyiyyi'ñ jøts ja wyaañ jøts y'atsyikwa'at ja winap jaa'y. Kuts ja wyingume'enyøø wingon, xjats ja tyiktiiy jøts ja tñimaay:

⁴¹ —¿Ti dø'øñ mdsøjkpy, ti øts idø'øñ xuktunwamp?

Jøts ja winap jaa'y y'adsøøy:

—Windsøn'ajtim, win'ejxwamp øts.

⁴² Jøts ja Jesús ja ñimaajyøø:

—iWin'ejxts inet! Ja'agøjxp yø mween tø y'øyi ku ø tø xjanchjawi.

⁴³ Jøts idø'øñ ja winap jaa'y jade'en wyin'ejxpjiky, jøts ja tpadso'jñ ja Jesús, møk ja ttukmøjawi ttukunuu'kxyjawi ja Dios. Jøts ja nayide'en wyamidi pøn jaty jam ja jade'en t'ejxtøø.

19

Ja Jesús jøts ja Zaqueo

¹ Xjats ja Jesús yja'jty jam Jericó, kyajptøjkiiyi'ñ, ² jamts kumeeñ jaa'y wyinaty tu'uk, Zaqueo ja xyøøw midy ja yikugubajtpitøjk wyindsøn'ajtip. ³ Ja'ats idø'øñ tyimyjawin'ejxwamp ja Jesús jøts ja t'ejxkapt. Janch mayjaa'yts jam wyinaty nisudso'ampy ja tka'ext, jaa ku ja kon jyaaktyimtyanaañimi. ⁴ Xjats ja ojts jawyeen putyi t'anøjki ma dø'øñ ja Jesús jam wyinaty ñaxwa'añ, jøts ja jam kipkyøjxp kyøjxpejty. ⁵ Kuts ja Jesús jam ñajxy, ixam ja Zaqueo kipkyøjxp, jøts ja Jesús pyat'ejxøø, yide'en ja ñimaajyøø:

—Zaqueo, putyi winak, jap øts icyam mets mdøjkjøtpy nja'da'akwa'añ.

⁶ Jøts ja Zaqueo jaty wyinaajky, janch ejtni xoni dø'øñ ja tyikja'jty ja Jesús jam tyøjkjotp.

⁷ Pøn jatyts ja jade'en t'ejxtøø, jøts ja pyagajpxpinaxwa'ktøø, ja' ja kyajpxtip jøts kuk ja Jesús jam wyinaty tø ñiikxy ma ja ka'øyyaa'y tyøjk jam. ⁸ Jøts ja Zaqueo wya'kukiyii'ñ jøts ja nwindson'ajtim yiknimaay:

—Windsøn'ajtim, ndamay'atp øts ayoobi jaa'y kujkwa'kxy ti jaty øts ixja nmøøt'ajtpy; pøni tøts øts o pøngapøn o tigati nbøjkxi awin'øøni'ampy, nyik'u'nkipts øts ja' jøts øts ja jawaani may nyikwimbjejxtit, maktaxk ojk tukjadine'en jaty y'u'nk'att pøni sa ja kyøjpk.

⁹ Xjats ja Jesús wyaañ jøts ja tñimaay:

—Ëyam ja nitso'ok'ajtin tø yja'aty ya tøjkjøjty, kumi nay Abraham meets m'aadsip mgugojip. ¹⁰ Pø ja'abixi ø tø nnimendi jøts øts ja ndukpaattit nduk'ejxtit ja nitso'ok'ajtin pøn ja y'anmija'win y'ijty tigøy'ejtnidip.

Ku ja Jesús tmadyakpaajty ja meeñ kyøjpk

¹¹ Ixam ja mayjaa'y ja pyatmadøyyi ku ja jade'en wya'añ, jøts ja tñanimadyaktøjkiiyi'ñ tu'uk ja ejxpajtin madya'aky, ku ja jam wyinaty kujk wyingoni jam Jerusalén. Nømpxi dø'øñ

ja jaa'y wyinmaydi, ja'ayi ja jam y'ukja'att jøts ja jatyi wyindsøndokit, jøts Dios kyutujk ja tyiktuujnit midu ja tyanitanaapy yja'a'y. ¹² Jøts idø'øn ja tnimaay:

—Jaa dø'øn jaa'y y'ijty tu'uk, jotkujk jaa'y. Ja'ats ojts abikyajp t'anøjkxi jøts ja jam y'atswindsøndokit. Ku ja wyimbett, møjwindsøn ja wyinatyni. ¹³ Jøts idø'øn tyumbi ja nimajk twaadsøoy ku ja wyinaty choonwa'añ, jøts ja nidu'uk jaty ttatgødøjkxyi'ñ tu'uk møj mukmyeeñ, jøts ja tnimaay: “Mda'aju'udyip mda'agajpxtip idø'øn yø mmeeeñ, wan tmayi kunim ø nwimbett.” ¹⁴ Mi'ajkiyipts idø'øn ja jaa'y ja' pøn jaty jam tsinaadyip, jøts ku ja chø'lñ jøts kexy yø'øbyi ja yiktabaguejxy jøts ja jam yide'en y'atswa'andit: “Ka' øts ya'at jaa'y ndsøky jøts øøts yø nwindson'att.” ¹⁵ Jøts yikpiktaajkim idø'øn ja' jøts ja wyindsøn'att, winets ja wyimbijty jam ma ñaajx kyajp. Ku ja jam yja'lty jøts ja twaadsøoy ja tyumbi pøn jaty ja wyinaty tø tkømø'oy ja meeñ, ja' ja ñijawiwiyampy wine'en jaty ja wyinaty tø tyik'u'ngidi. ¹⁶ Jøts ja yjawyeembi myiñ jøts ja tyukmadoojø: “Windsøn, majk ojk øts ja jadukjadine'en jaty tø nyik'u'nk'aty ja mmeeeñ.” ¹⁷ Xjats ja wyindsøn y'adsøoy: “Øy'ajtp, øxyi dø'øn jade'en mduñ, mjetwampxi dø'øn jade'en; ti sa metsxi yjadini'iñibi meeñ jade'en tø xyikmayi, ja'agøjxpts mets ndukwindsøn'atwa'añ majk ja kajp.” ¹⁸ Jøts jadu'uk myiñ, ja'ats waan: “Windsøn, magoxk ojk øts jadukjadine'en jaty tø nyik'u'nk'aty ja mmeeeñ.” ¹⁹ Jøts ja nayide'en yik'adsoomø: “Windsøn'atp mets ja magoxkpi kajp.” ²⁰ Winets jam jadu'uk myiñ jøts ja ywa'añ: “Windsøn, ixyaani ja mmeeeñ. Konji'iky øts yø nbaayjotpy tø nyik'ity; ²¹ kumi nnija'wip øts jøts ku mets ka' ti jadi'iñi xnajtsjawi, ja'agøjxpts øts ndsø'øgi, ja'abaat me xpayø'oy øy mets ja xjagaja'aji, myikpidø'okwambyaat mets ja pikta'aky øy me mjagani'tpy.” ²² Winets windsøn ja ñimaajyø: “Mets ka'ømyidumbi, kø'øm yø m'aaw mnadyani'øñiyi, yø' me kø'øm mdiidyuuñip. Pøni mnija'wip tam ku øts jade'en njaa'y'aty ku øts ja nbøkmuky midu ø ngabiktakpy, ku øts ja xijy nyikpidi'ikpyaat midu njaganipy, ²³ jøts, çti kuts øts ja mmeeeñ tø xka'anuu'kxyaky, jøts øts ja meengyojpk jeexyip tø nbaaty møøt ja meeñ'u'nk?” ²⁴ Jøts ja tnimaay pøn jaty jam wyinaty: “Pøjkxidi yø meeñ, jøts ja xmo'odit pøn øts ja nmeengyojpk majk ojk tø xyik'u'nk'ajtyi.” ²⁵ Jøts ja wyandø: “Pø jamimts windsøn ja' myeeñ, pø majkts meeñ muky ja jam tmøødi.” ²⁶ Jøts ja windsøn y'adsøoy: “Øtsts idø'øn wamp, jøts ku ja yjaaktyimiyikpudøkit pøn tyikmøjtakp ku ja o ti yiin waan yikmø'oy; pønts kø'øm o ti tkidyimiyikmøjtakp ku ja o ti yiin waan yjayikmø'oy, jaaktyimiyikpøjkøjxipts ja ne'egi tuki'iyi. ²⁷ Jøts ja' pøn ø xmi'ajkidip pøn ø xkatsojktip jøts ø nwindson'att, nøjkxts ja x'atswawdi jøts ya xyikme'endit jøts ya xtyimiyikpa'ooktit øts nwingujky.”

Ku ja Jesús kyajtpøjkxyi'ñ jam Jerusalén

²⁸ Kuts ja Jesús jade'en myadyak'abajtyi'ñ, jøts ja ñajxy, jamxi ja Jerusalén ñijky. ²⁹ Jawaani ja jam wyinaty kyidyimyja'atti jam Betfagé jøts jam Betania, jade'en ja kajpxøow jam, ku ja tkejxy namajtsk pyabøjkpi ku ja jam wyinaty wingondi ma ja kojpku'nk jam txøøwi Olivos, ³⁰ jamts ja tnimaay:

—Nøjkxti ixem kajpjotp, ixw wingon. Kuts inet jam mja'attit, jam inet buur tu'uk kuwiñ xpaattit midu ka'anim pøn ttatsøøni. Ja'ats m'atmigajidip jøts xyikme'endit. ³¹ Pøni pønts myiktøøjidip tigøjxp ku xmigajidi, nøjmidsits jøts ku ø ndsøky.

³² Jøts idø'øn ja pyabøjkpi namajtsk ñøjkxtøø tpattoø jade'en sa Jesús ja wyinaty tø ñi'i'mxyidi. ³³ Jam ja wyinaty tyimyigajidi ja kujiyujk ku ja jiyujk ja ñimaajyidøø jøts ja yiktøøjidøø:

—çTigøjxp ku yø jiyujk xmigajidi?

³⁴ Jøts ja t'adsoodøø:

—Kumi ja nwindson'ajtim yø ttsojpk.

³⁵ Jøts ja twejtsnøjkxtøø ma ja Jesús jam wyinaty y'awijxy, jamts wyet ja ttajiba'andøø jøts Jesús ja ttawa'atspejty. ³⁶ Kuts idø'øn ja Jesús wyingon'adøtsni, xjats wet ja nøø' tuu' yiktabatya'abi. ³⁷ Ku ja wyinaty wyingoni ja kajp, ku ja jam kyida'aky Olivos kojpkwemp, winets pyabøjkpitøjk ja ejtni xoni yjanchpaya'axyi yjanchpajøkyi, jøts ja møk'ampy ttukmøjawidi ttukunuu'kxyjawidi ja Dios ku milagr'i'ajtin ja wyinaty jade'en tø tyuk'ijxyidi. ³⁸ Yide'en ja wya'andi:

—çØy'ajtp ku Dios xuknimi'iñim kyunuu'kxy wyindsøn! jotkujk'atyim idø'øn jap tsajpjotpy! çKuuyi Dios jadu'uk yjaak'oyi!

³⁹ Winets ja fariseotøjk winaggin tnimaadyøø ja Jesús pøn jam wyinaty jaa'y agujkpti:

—Windsøn, tiku waani sa xkanøjmi yø mbabøjkpitøjk.

⁴⁰ Jøts ja y'adsojøø ja Jesús:

—Øts idø'øn wamp jøts ku øts inet yø njayik'amo'ondit, wenkpits inet kajpxkojmidip møk'ampy, niyuuni yø kya'amondi øy yø pøn yjayik'amonwa'añidi.

⁴¹ Kuts ja t'ejxpaajty ja Jerusaléngit kajp ku ja jam wyinaty jawaani kyaja'atni, jøts Jesús ja tkudsaachwinma'ayiyi'ñ jøts ja yaajxy, ⁴² yide'en ja wya'añ:

—iKuk jeexyip iiy wine'enin xja'gyuki jøts ku ja mxøøw ja mjumøjt tø mjataja'adyi, jøts jeexyip ni'ijtyi ja mjaa'y tpaatti ja Dios kyunuu'kxyin! Tøts ja tiempi ñaxyi, iti jaa ja xijy, jatyi myiktam'awa'anigyomit! ⁴³ Ja'atp ja xøøw ja jumøjt ku tiempi kya'øyt, ku mmidsep mdamukit, amuumi myikna'awidejtkøxt, nima awa'ats mgata'ant, ja xem ja yam myiknidøkit, ⁴⁴ naxjøtpy myikjaagida'akt jøts ja mjaa'y may'ampy kyudigø'ødyit. Niwine'en niti kyata'ant; ja'agøjxpx ku tø xkagupiky ja Dios ku ja kø'øm tø mjanimifi.

Ku ja Jesús tvojpsidømguixy ja too'kpitøjk jam tsaptøjk agø'øm

⁴⁵ Xjats ja Jesús chaptøjktøjkii'ñ jøts ya tuki'iyi tyikpidsømbinaxwa'jky pøn jaty jam wyinaty yajktip too'kpit, juudyip kajpxtip, ⁴⁶ yide'en ja tnimaay:

—Yide'ents Dios kyajpxy jap kyøjxa'ayi: “Ja' øts ndsaptøjk wya'añ jøts øts njaa'y jap Dios'ajot'attit”; ma meets yø ya jade'en xyiktuni sa maa'tspi chinaadyaajkindi.

⁴⁷ Jabom jabom idø'øn ja Jesús jam tsaptøjktøjk yik'ixpijky; yam idø'øn ja teetywindsøndøjkti, møøt ja kajpxwejpitøjkti møøt ja mjaa'dyøjkti midi tñigubajk'ajttip ja kajp, tñiwimayidi sudso ja yjadyimy'uk'looktnim. ⁴⁸ Jøts ja nisudso tkamidabyaatti ti sa ja ttu'undit, pø amuumts ja jaa'y ja jam pyatmadøyi, ti pøn ja jam kabatmadøjiyp.

20

Ja Jesús kyutujk

¹ Xjats idø'øn yide'en tuk'ojk yjajty ku ja Jesús jam wyinaty tsaptøjktøjk tyik'ixpiky ja mayjaa'y, ja øyajpxy ja øy'ayuujk ja jam wyinaty kyajpxwa'kxpy sudso nniitso'ok'ajtin, ku ja teetywindsøndøjkt jam yja'jttøø, møøt ja kajpxwejpitøjkti, møøt ja mjaa'dyøjkti pøn tñigugajp'ajttip ja kajp. ² Ja'ats idø'øn jam yide'en wandøø:

—Yø' mñigajpxp pøn jade'en tø mdagutujk'aty jøts jade'en m'adø'øst. ¿Pøn yø kutujk jade'en tø mmø'øyi?

³ Winets Jesús ja t'adsojimbijty jøts ja tnimaay:

—Nayide'en mee nyiktøwami, jøts m'adso'odip idø'øn: ⁴ ¿Pøn ja ñaan ojts tya'ane'emyi jøts ja yiknøbatt? ¿Dios ja ojts jade'en tyanigutujk'ajtxyi, uk ja naxwii'ñit jaa'y?

⁵ Winets ja agø'ømyi tkajpxy'ajttøø, yide'en ja ñawya'añidi:

—¿Sa nñima'ayin? Ku net yø njanima'ayin jøts ku Dios ja tyanigutujk'ajttøø, yide'ents inet yø x'adso'owin: “Jøts ¿tigøjxpx ku ja xkajanchja'widøø pøni jade'en tam?” ⁶ Jøts kuts inet yø njanima'amy'andit jøts ku ja yaay jade'en yiktanigutujk'aty, tsøjk inet yø jaa'y xjanchka'tspa'o'jkindit, kumi wa'ats yø tñijawidi jøts ku ja Juan ja Dios kyexyi.

⁷ Xjats ja t'adsoodøø jøts ku ja ka' tñijawidi pøni pøn ja Juan jade'en wyinaty tø tyanigutujk'aty jøts ja jade'en yiknøbatt. ⁸ Jøts Jesús ja ñimaajyidøø:

—Pøni jade'en tam, ni øtsts meets ja ngadukmado'ot pøni pøn øts jade'en tø xanigutujk'aty ku øts jade'en n'adi'ich.

Ku Jesús tmadyakpaajty ja ka'ødyumbidi

⁹ Winets ja Jesús tnimaabyinaxwa'jky ja mayjaa'y, yide'en ja ejxpajtin madya'aky ja tu'uk tñimadyaktøjkii'ñ:

—Ja dø'øn jaa'y y'ijty tu'uk pøn jam kyamjotp tnejp ja uvi tsa'am, jøts ja ttukmidagañ ja tyumbi winagaag in kam jeky'ampy widejtpi ñijky. ¹⁰ Kuts tpaajty ja uvi tsa'am tujk'aats, jats ja tkejxy tu'uk tyumbi jøts ja t'atstuk'amidowa'añ pøn ja kam jam wyinaty tø tmidandi jøts ja tyaktit ja nidsa'am ni'ipy, mido ja paat'ajttip jøts ja yikmo'ot. “¿Maag?” “Ka'ap.” Ja tumbi ñømdøø. Yixkon ja jam ojts yjantyimykwoøpy, jøts ja yikajxjimbijty wa'ats jadi'iñi. ¹¹ Xjats ja kugam tkejxy jadu'uk tyumbi; nayide'en ja ojts yikjennøjmi yiktenøjmi, yixkon ja jam yjanchykipwøjpy jøts ja nayi wa'ats jadi'iñi yikajxjimbijty, niti ja kyayikmøøy. ¹² Jøts idø'øn ja ka' tñimøñ, ojts tyumbi ja jadu'uk tkajkxkojmi jøts ja jam nayide'en ttundøø, tyikwindsaachidi tyikjøptsachidøø jøts ja tyikaktøø.

¹³ Jøts yide'en ja kugam wyaañ: “¿Sudsom tsøky ndu'unt? Nmajnku'ngin n'ukaxp, ja ku yø t'ejxpaattit, ¿ja kidi yø ttsø'øgidit?” ¹⁴ Ja'ayi ja tumbitøjk ja ojts y'ejxpaadyiyi jøts ja xem yam ñawajnidøø: “Ya'at yø kam tmidanwamp; wan tyikpa'o'jkyim jøts adøm yø kam nmidag'anindit.” ¹⁵ Winets ja tjidøjtpidsømdøø jam kamjotp jøts ja ojts tyik'ookit.

—¿Sats idø'øn kugam ja yjawi tyunidit? ¹⁶ Me'emp ja kø'øm jøts ja tyikugøxit ja yjade'embidi tumbidi pøn jadyimyjade'en'ajttip, jøts ja ne'egi tmo'ot ja kyam ja abiky tumbidi.

Ku ja nidaay'ajtibidi ja jade'en tmadoodøø, jøts ja wyandøø:

—iPø katsojknim ja Dios!

¹⁷ Tiy Jesús ja wyin'ijxyidi, jøts ja yiknimaadyøø:

—¿Tits idø'øn yø Dios kyajpxy ñigajpxpy ku yø jap yide'en yja'ayi? ¿Nugo yø jap jade'en wya'añ?

Ja tsaq mido ja pojtspi kya'ejxidøø,

ja'ats yam ne'egi tø y'uknøjknim jam pøch kyubajkp jøts ja t'amajtsmujkøjpxp yø pøch.

¹⁸ Ku ja y'ukyiktaṅxkidakpatt ku jam o pōn y'uknaxkida'akt, pō mā ja nay'ejxpaadit; u kuts o pōn tyanaxkidaṅkattit ja tsaq, pu'uxints ja yiktawayit.

Ku yikajpxy'aty ja kugubajt

¹⁹ Xjats ja teetywindsōndōjk mōōt ja kajpxwejpōtōjk ja tjadyimy'ukmātswandōō ja Jesūs, wā'ats ja tyimyjaja'gyukidi jōts ku ja ja'agōjxp ja madya'āky yikmadyakpaajty; yjady-imy'ukmātswandip ja' ja Jesūs, ja jaq'yts ja chō'jkidip paty ja jade'en tkatundōō. ²⁰ Winets ja tpiktaktōō myigu'uk pōn tpa'ejxtip tpaḡo'odip jōts ja ṅadyiji nugo jade'en ṅanky'ijxyidi sam ōy jaq'y, ja'ats ja chojktip jōts ja tkajpxy'ejxtit kuuyi ja y'ukajpxigō'oty, ja'ats ja jatyi tyani'ōōnidip jōts ja jam tkōyaktit mā wyindsōn ja jamdi. ²¹ Paty ja yide'en tyiktōōdōō:

—Windsōn, nnija'wip ōōts jōts ku myik'ixpiky ōy tsuj, tiy janch tuki'iyi xniḡajpxy jōts ka' me pōn xkupiky xkagupiky ti sa me mwā'añ, ne'egi yikxon mets ja ne'egi xnanḡñ'ixpōkiyi tiy janch ja Dios tyiy'ajtin sudso ja yiknījawit. ²² Tukmadōōts ōōts: ζNmo'op ōōts kugubajt ja mōj windsōn midī jam abiky'ampy nichōky tō myiñ yikutujkpi, uk ka'?

²³ Yja'wiyiñ Jesūs ja jatyi jōts ku ja kya'ōdyunwā'añi, jōts ja tnimaay:

—ζTiku ōts jade'en xkajpxy'ejxti, tigōjxp ku ōts jade'en xniwambatwā'andi?
²⁴ Uktuk'ejxtik ōts tu'uk meeñ. ζPōn ja wyeen y'aqaw yō jam myōōt'ajtip, jōts pōn ja xyōōw jam kōxja'ay?

Jōts ja wyandōō:

—Ja mōj windsōnimts yō' yja'.

²⁵ Xjats ja tnimaay:

—Ja'ats meets ja mmo'op midī ja yja'ajtpy, jōts ja Dios ja' xmo'odit midī ja paat'ajtmīyip.

²⁶ Jōts ja nisudso'ampy tkakajpxy'ejxti ōyik idō'ōn ja ttaniwambattit sa jatyi ja jam wyinaty wya'añ jam mayjaa'yjotp; jinaxy ja ṅigyumaap yjajtōō ku ja jade'en yik'adsōōdōō, jōts ja ne'egi y'aqaw amōñi t'ukyik'ejtnidi.

Ku ja jaq'y tyiktōōdi pōni janch idō'ōn ja' ku oo'kpi jadigojk yjujkpyōktit

²⁷ Jōts idō'ōn ja saduceotōjk jam wināagin yja'tmidōō jōts Jesūs ja t'ejxwā'andi. Ka'ap idō'ōn ja saduceotōjk ja tkupōkti jōts ku oo'kpi y'anmija'win jadigojk pyidsimy jujky'ajtpi xemikōjxp mōōt ṅine'kx; paty ja tnimaadyōō ja Jesūs:

²⁸ —Windsōn, yide'en ja Moisés tjaadyaāñ, pōnik ṅidō'ōxy ku'ōōky tyiktamp yam ja ka'anīm y'u'nk tpaati, pōni jamts ja' y'uch y'ajch, ja'adsik tmōōt'amajtskip ja ku'ōkytō'ōxy jōts ja ttukpaatt y'u'nk, jōts ja jade'en tkayikudigō'oty ja myigu'uk. ²⁹ Jats idō'ōn jaq'y y'ijtyi, niwixujk ja tyukyaa'dyōjk'atti jōts ja yjagyōōbi jawyēen y'amajtskiyiñ jōts ja tku'ōjky ja ṅidō'ōxy, nitu'uk y'u'nk ja ojts tkapaatti. ³⁰ Xjats ja mutskpi ja tmōōt'amajtskiyiñ ja ku'ōkytō'ōxy jōts ja nayide'en tku'ōjky, ka'ap ja tyik'u'nkpaajty. ³¹ Jōts ja midigōōkpi ja twaay ja ku'ōkytō'ōxy jōts ja nayide'en tku'ōjky. Tum jade'en yjajtkōjxti niwixujk, ni tu'ugin pōn y'u'nk tkayiktaāñ. ³² Jōts ja tō'ōxyōjk nayide'en y'ō'jknimāa. ³³ Kuts idō'ōn ja nōjx jadigojk yjujkpyōkti, ζpōmbits idō'ōn ja nōjx tnidō'ōxy'aty jadigojk, pō niwixujkxi ja tō t'atsnidō'ōxy'atti?

³⁴ Xjats ja Jesūs ja ṅimaajyidōō:

—Yāay: dō'ōn yō jade'en yjaty, yaay: naxwiiñ jade'en y'amajtskidi ja yaa'y ja tō'ōxy. ³⁵ Pōn paat'ajtidip jōts ja ṅōjktit jam mā Dios ja tō t'a'ejxi, ku ja yjujkpyōktit jadigojk ka'ap jam pōn t'ukjotmay'ajtnit ja amajtsk'ajtin, ni tka'ukyik'amajtskyinidit y'u'nk y'una'jk jam pōn, ³⁶ ka'ap pōn y'uk'oo'knit y'uktigōōñit. Tum jade'en ja jam chinaañidit sam ankilistōjkti. Tum Dios ja amuum u'nk'ajtidip una'jk'ajtidip, ja'agōjxp ku dō'ōn ja jemchinaa'yin tō tpaatti ku ja jadigojk tō yjujkpyōkti ja pō oo'kpi agujkpy ja nwindōn'ajtmōōjxp. ³⁷ Kō'ōm paatxi Moisés ja xuknija'windi jōts ku oo'kpi yjujkpyōkti jadigojk ku ja jam ojts t'ixy ja ximum ṅitōōwyidity. Pō yide'enxi ja jam tmadōōy jōts ku ja Abraham, jōts ku ja Isaac, jōts ku ja Jacob ja tdios'atti ja Dios Teety. ³⁸ Kidi oo'kpipts ja ṅidios'ajtpy, pō ja'axi ja ṅidios'ajtpy jōts ja tyikujky'att ōy pōn.

³⁹ Winets ja kajpxwejpōtōjk wināagin ṅōmdōō:

—Janch tiigyajpxy, windsōn.

⁴⁰ Jōts ja ka' y'uknāy'a'ejxinīyidi jōts ja tyiktōō'adō'ōtstī, ne'egi ja y'amondōō.

ζJanch idō'ōn ku ja David t'ap'aty ja Cristo?

⁴¹ Xjats Jesūs ja tnimaay:

—ζJōts sudso jade'en mwā'andi jōts ku David ja Cristo t'ap'aty? ⁴² Pō yide'en ja David tyikwā'añ ja nōky ku ja tjaay ja Salmos:

Yide'en ja nwindōn'ajtim ja Dios Teety ṅimaajyōō:

“Putsinaaky ōts n'aga'ñ'ampy,

⁴³ kunim ōts yō nmimajadākōxt pōn jatyi mmidsep'ajtip.”

⁴⁴ ζSudso'ampyts ja David t'ap'aty ja Cristo, pō wyindsōn'ajtpyts ja kō'ōmbaāt?

Ku ja Jesús tñigajpxi ja kajpxwejpítøjk ja kya'øwýinmaa'ndy:

⁴⁵ May jaa'y idø'øn íxam amidodujktip ku ja Jesús tñimaay ja pyabøjkpitøjk:

⁴⁶ —Øyim mnay'ejx'etidit, ejxim yø kajpxwejpítøjk mdawin'iññidi kya'øwýinmaa'ñ, jade'en yø ñachøkyidi jøts wyet yø tyeky'ok'am paat tpajidøttit, jøts ja' yø chojktip ja nawýindsø'øgi jøts yø yikajpxpoo'kxtit jam mayjaa'y agu'jkp, jøts ku yø tsaptøjkjotpy tyøkidi tum ja tsinaabyajt yø tyatsinaawyandip midip jam tsaptøjk'okp, jøts ku kyaamyidi tum jam yø ñaxti tsinaabyi ma dø'øn yø myøjtøkidit. ⁴⁷ Nayø'øxi ku'økytø'øxy ja pyikta'aky tpøjkxidip jøts ñadyijyi ñadyagubøjkyidi ja Dios'ajot'ajtin. Ja ti pøn ja', ja ti pøn ñadyijyi jeky'ampy tsapkajpxtip, nayø'øxi ja'adi pøn ka' ti tyiknigaxø'økti, ñadyijyi øy jaa'y'atti. Yø yjade'embi jaa'yts idø'øn Dios møj yik'ayo'op.

21

Ku ja ku'økytø'øxy tpiktaaqjy lyimunsi

¹ Xjats idø'øn ja Jesús ojs t'ixy paat tsaptøjkjotpy ku ja kumeeñ jaa'y jam wyinaty tkugonidi ja lyimunsi jam meef'abøjk'i'ñjotp. ² Jøts ku'økytø'øxy majtsk ja pyujxmeef'u'nk jam tkugo'onimøø; ³ winets ja Jesús ja pyabøjkpitøjk tñimaay jøts ja wyaañ:

—Janch meets idø'øn nnøjmi, jøts ku yø ku'økytø'øxy ayoobi ne'egi myinajxpy lyimunsi yø jam Dios wyingu'jkp øy idø'øn yø kyamabaadi sam o pøn yja' tpikta'akti. ⁴ Ja' yø iiy yoxtip midip yø winda'ñxxyidip yam yø ku'økytø'øxy ayoobi ne'egi tpikta'aky ja yiktuujnik ja ñidsinaajyik.

Ku ja Jesús tñigajpxy jøts ku ja tsaptøjk yjett

⁵ Jøts idø'øn niwinaagin jam wyinaty tñimadya'akti ja tsaptøjk, ku ja janch tsuj kyaxi'iky, ku tsaa ja jade'en janch tsuj tmøøt'aty, jøts ja nayide'en chujkaxi'iky midip jam wyinaty pøngapøn tø tyoxti. Xjats ja Jesús wyaañ:

⁶ —Ja'atp ja tiempi ku ya'at kyuja'wigyøxt íxa jade'en x'ejxti, ku yø tsaa ni tu'ugin kyata'ant nikibyetu.

Ku ejxa'an jawyeen yikpikta'akt ku wyinaty ja tiidyu'unin xøøw wyingøñ

⁷ Winets ja tyiktøøðøø jøts ja tñimaadyøø:

—¿Juuni windsøn idø'øn ja jade'en yjatt? ¿Ti dø'øn ja yiktanijawip jøts ku dø'øn ja wyinaty jade'en yjatwa'añ?

⁸ Jøts ja Jesús wyaañ:

—Øyim mnay'ejx'etidit, jøts kidi mee tø mniyjajtni ñiwyindaay'ajtk. Kumi may ja mye'endit pøn øts nxøøw nugo nadyanikajpxidip ku ja ñø'ømdit: “Cristo øts”; “Tø kya'pxy ja tiempi.” Kidits mets ja xpanijky jaty. ⁹ Jøts ku xnimado'attit ja tsep, uk tyiktigatsti ja kyutujk adsepjøxp, kidits me mdsø'øgi; pø jawyeenxi dø'øn ya'at jade'en ñajxkøxt, ka'anims idø'øn wyinaty kya'pxy jøts kyugøxit ja naaxwi'ñit.

¹⁰ Winets ja tjaaknimaay:

—Ja møj ja mutsk kajp nøjx ñañibidi'igyidi, jøts ja windsøndøjk cheptu'undit ja xem ja yam pøn jaty ja naajx ja kajp tñitanaadyip ya naaxwi'ñ. ¹¹ Møk'ampy u'jx ñaxt, yuu pa'am ñaxkidat'akt øy maðsoo, adsø'jkyibim ja tuki'iyi myiktuk'ejxtit ku ja Dios ejxa'an møk tpikta'akt jam tsajpwek.

¹² Jawyeents mee myikmajtsmukøwax'ant, myik'ixa'adit o maðsoo. Kuts myikpaattit jøts myikwanøjkxtit jam tsaptøjkjotp ma myiktiidyu'undit, myikti'idyit myiktsu'umdit puxøjkjotpy, ja møj windsøndøjk myiktawinguwawidit pøn jaty yikutujktip, ja'ats idø'øn ja mdupøky'atidip ku øts nja' xpabøjkidi. ¹³ Jats meets idø'øn ja nja' xngubøjkit. ¹⁴ Kidits meets ja xwandijy pøni sa mee mnagyubokit ku mee mnagyu'adsowiyit. ¹⁵ Øts meets ja wijy'ajtin nmo'op, øts meets nyik'ayukpaatp sa mee mwa'ant jøts ja mmidsep nisudso'ampy kya'adsojimbettit, jadi'iñi ja tmi'amo'ondit. ¹⁶ Mdeety paat mdaak paat mee nga'ødyuniyit. Tits ja chow ja mmigu'uktøjkti jøts ja'adi pøn mminamyaajyidip, myik'oogidip winaagin meets ja'. ¹⁷ Tum midsep meets o pøn m'ejxit ja'agøjxp ku mee xjanchjawi. ¹⁸ Ka'ats meets jadi'iñi myik'ejxigø'øty, ni tu'ugin meets mwaay kyawindigø'øty. ¹⁹ Pøni mmidanaadyip tu'ugyi amumjoojt, mbaatpts meets ja nitso'ok'ajtin jøts meets m'anmija'win yujky'att xemikjøxp.

²⁰ Ku x'ejxtit yø Jerusálengit kajp jøts ku amuum tseptumbitøjk tø ñi'awidejtniyi, jade'ents meets ja xñijawit jøts ku yø kajp wyinaty tsojk kyudigøøwya'añ. ²¹ Pøni pønts jam Judeit na'xjotp wyinaty, wants ja tkaknøjkxiti jam kojpkjøxp; pøn jaty jam Jerusálengit kajpjojt, wan ja jam tkakpidsømdi, jøts pøn jaty jam o muum awa'ats etjotp widejtitt, kidi ja winet et wyimbetti jøts ja ñøjkxtit jam kajpjojt. ²² Ja'abi xøøw idø'øn ja ayo'on mye'ent, jaa dø'øn ja jade'en yjatt kyubatt sa jaty Dios kyajpxy wya'añ. ²³ ¡Ayo'ijxyim ja tø'øxyøjk yjattit pøn jaty ja myutsk jam wyinaty tnikjøxp'ajttit, pøn jaty ja myaxu'nk jam wyinaty tø kyaxø'økti! Pø ji'iyim ya'axymxi dø'øn ya naaxwi'ñ yjatt, møk ja jaa'y ayo'on tpaattit t'ejxtit. ²⁴ Pømbi ookitp

jam tseptundaajkjotp, pømbits yikmatstip jøts ja yiktsu'umdit o magajp, øy yø Jerusaléngit kajp øy sà yiktu'unt, øy ja ja'at jaa'y yø sà tyuniyit, kunim ja y'ayo'on yø ttanajxkøxt winetnimts yø yikmajtstu'utt.

Sà mye'ent ja naxwii'ñit jaa'y myøjkudanaabyi

²⁵ Wenk yø xøøw yø po' yjatt, yø maadsa' nayide'en; jøts naajx kajp jadi'iñi tya'andit, niti tabyajtin tkapaattit, øy ja tsø'øgi yik'o'jknijidit ku tmado'odit ja mejy tvojimjø'økt øy madsøo. ²⁶ Yik'oo'kjimbetidip jaa'y tsø'øgi ku ja tnimado'odit jøts ku jade'en naxwiiñ yjatwa'añ; jøts ku ja'abaat jade'en yjatt ti jaty jam tsajpwemp ejtp. ²⁷ Jaanimts ø x'ejxtit, ja naxwii'ñit jaa'dyi myøjkudanaabyi, ku nmime'ent yootsjøtpy ja nmøk'ajtin, jajpim tsamambim ja n'aju'uk nyikaxø'økt. ²⁸ Ku dø'øn ja jade'en yjatt'ukwa'ant, møk mnabyikta'agidit jøts xjøp'ejxtit jøts ku tsojk mye'ent pøn myiknitso'ok'atidip.

²⁹ Ñayi tyamimadyakpajtiy'iñ ja' jadu'uk ejxpajtin madya'aky jøts ja wyaañ:

—Ku x'ejxti ja iigi kipy uk øy ti kipy kya'adigach ja y'aay. ³⁰ Ku kujk xyimumni, jats ja wa'ats xnijawidi jøts ku poot wyingøn ku ja nøø ja tuu myenwani. ³¹ Nayide'ents idø'øn ja' ku x'ejxtit jade'en ja ayo'on, jade'ents ja xnijawidit jøts ku wyingøn ja Dios kyutujk midit ja tyanitanaapy yjaa'y.

³² Janch øts idø'øn nwa'añ jøts ku dø'øn ja jaa yjatt namga'anim y'oo'kixy pøn jaty ja icyam juky'ajttip. ³³ Najpx y'ity ja naajx ja tsajp, øy yø juuni kyudigø'øty, jøts øts n'ayuujk niujuuni yø kyakixy kyanaxy.

³⁴ Øyim mjaa'y'attit, kidi m'aaw mjoojt xamiyoxti midit yiktundigøøpy, kidi ja nøø ja mu'uk xunk'atti, kidi meets ja ne'egi xajotigøydi ti jaty ja ejtp naxwiiñ jøts jade'en adsu'jky mgayikubaadidit ³⁵ sam naky myukyin, jade'en ja yiknime'endit pøn jaty juky'ajttip øy madsøo yà naxwiiñ. ³⁶ Jøp'ejxtits meets, ajot'at'etti ja Dios jøts mniwa'adsidit ja ayo'on midit tunip jatip, jøts ø xwinguwa'agidit amgujk jotkujk, ja naxwii'ñit jaa'y myøjkudanaabyi.

³⁷ Xinaxy idø'øn ja Jesús jam yik'ipiky tsaptøjkjotp, jøts ja koots ñijky jam kojpkjøpx midit yiktejp Olivos. ³⁸ Jøts ja mayjaa'y jam tsaptøjkjotp ejtp xyuminøjkxti jøpyi jøts ja jam pyatmadøyiyi.

22

Ku ja Jesús yikajpxy'aty jøts ja yikmatst

¹ Ja paski xøøw idø'øn wyinaty pyatpy ku ja tsapkaaky yikay jadi'iñi midit kalevaduri møøt. ² Jøts ja teetywindsøndøjkti jøts ja kajpxwejjitøjkti tjanch'ixa'adi ja taay sudsonim ja t'ukyik'oøktit ja Jesús, ja mayjaa'yts ja chø'jkidip.

³ Xjats ja Judas Iscariote ja miku' tyatøjkiyøø, ja' idø'øn ja pabøjkpitøjk møøt kya'pxti nimakmajtsk. ⁴ Jøts ja ojts tninijky ja teetywindsøndøjkti møøt ja tajk mayut, jøts ja ojts tninagyajpxyi, ojts ja tkajpxy'atti sudso ja tkøyakt ja Jesús jøts ja tmatst. ⁵ Jøts ja jade'en yotkujk'atti, ojts ttami'awanidi meeñ ja Judas, jøts ja ttamiju'udyit ku ja tkøyakt ja Jesús; ⁶ kypupøjk ja jade'en jøts ja t'ixaadyøjkijyi'iñ ja taay, jøts ja winet tkøyakt ku ja mayjaa'y jam kya'ettit.

Ku ja nwindson'ajtim yjaa'uk'a'ux'ajtni ja pyabøjkpitøjk

⁷ Xjats ja xøøw tpaajty ku ja tsapkaaky kyayikay levaduri møøt, xjats idø'øn ja borreegi maxu'nk wyinaty y'ookwa'añ, jøts ja' idø'øn yikyøxy'ajtp ku ja paski xøøw ñaxy. ⁸ Winets ja Jesús tkejxy ja Pedro møøt ja Juan, yide'en ja tnimaay:

—Nøjkxti jøts ja paski a'ux xyik'awejxtit.

⁹ Jøts ja tyiktøøðø yide'en:

—¿Mamts øøts ja xuk'a'ejxiwya'añ?

¹⁰ Jøts ja Jesús ja y'adsoøjidøø:

—Ku net jam mgajtpøkidit, jam inet tu'uk xpaattit jaa'y pøn jam wyinaty nøø twejtsp tsiijyøtpy. Ja'ats mbanøjkxtip jam tyøjkjotp, pøni ma yja'aty jamts mja'attit, ¹¹ jøts ja kudøjk xnøjmikit: “Yide'en ja windsøn wya'añ: ¿Mak idø'øn ja tøjkjoojt ma ja tmøøt'a'ux'att ja pyabøjkpitøjk, mak idø'øn ja tka'adyit ja paski a'ux?” ¹² Winets meets inet ja tøjkjoojt myiktuk'ejxtit jap nipatøjkijxy a'ejxi abaadi; japts xyik'awejxtit ja a'ux.

¹³ Xjats idø'øn ja ojts ñøjkxti jøts ja jam jade'en tjanchpattøø sà Jesús ja wyinaty tø ñii'mxyidi, jøts ja jam t'a'ejxidøø ja paski a'ux.

¹⁴ Kuts ja a'ux'ajtk tpaajty, xjats ja Jesús møøt ja kyudanaabyitøjk twinguwa'adsiyi'iñ ja kaabyajt. ¹⁵ Jøts ja tnimaay:

—ixyamnim meets inet ja paski a'ux jade'en nmøøtkaamyuky sam ø ndyimchøkyin namga'anim ø n'øøky! ¹⁶ Janch øts idø'øn nwa'añ jøts ku meets icyamyi jade'eñi njaakmøøtkay jaanim jadigojk ku mye'ent ja Dios kyutujk midit ja tyanitanaapy yjaa'y.

¹⁷ Winets ja tnixajiyi'iñ tu'uk uujk'i'iñ, jøts ja jawyeen ttukmøja'wiyi'iñ ttukunuu'kxyja'wiyi'iñ ja Dios Teety, jøtsnim ja wyaañ:

—Axajidi ya'at jøts x'ukwa'kxtit; ¹⁸ øts kø'øm wamp jøts ku ø ka'ap tsojk n'uk'uknit yø uvi tsa'am nøø'u'nk, jaanim jadigojk ku Dios ja kyutujk tyikme'ent midu ja tyanitanaapy yjaa'y.

¹⁹ Jøts ja tnixajiyi'iñ tsapkaaky, ojts nayide'en ttukmøjawi ttukunuu'kxyjawi ja Dios Teety, jøts ja t'adujkpaikxi ja kyudanaabyitøjk jøts ja tmø'øy, yide'en ja tnimaay:

—Kaydi ya'at, yø' øts idø'øn ñamyayi nne'kx'ajtpy midu meets mniitsoojkingøjxp inet mniyoxp. Mdu'undip ya'at jade'en øts nja'myajtsingøjxp.

²⁰ Nayide'en ja uujk'i'iñ ja ttuun ku ja y'a'ux'ajtkøjxtøø, jøts ja wyaañ:

—Ya'at tsapnøø'uujkin idø'øn ixym tãmp ejxpajtin ku ja Dios Teety ja wyanda'aky tyik'aduky samdam ja ttami'awa'aniyi'iñ ja naxwii'ñit jaa'y ja nitso'ok'ajtin. Ixyamts idø'øn ja cho'onda'aky ku øts ja nni'jpy inet wyidsu'unt wyidaxt.

²¹ Pønts ø xkøyãk, pøn ø xka'ødyunwamp, ixya øts ja møøt ngay, kidi majip ja'. ²² Ja' ø nbadumpy midu ø tø nyiktanipiky; ija' ayo'ijxyim jaitp pøn ø xkøyãkwamp!

²³ Jøts ja ñayiktøøaxwa'jkidøø agø'ømyi, pøn idø'øn jade'en ka'oy'adø'øtswamp.

Ku ja Jesús kyudanaabyitøjk tkajpxy'atti pøn idø'øn jawaani møj pidsø'ømp

²⁴ Xjats ja xem yãm tkajpxy'ajtpinibøjkidøø pømbi dø'øn jadyimy'ukmøjtøkip. ²⁵ Jøts Jesús ja ñimaajyidøø:

—Jade'en møj windsøn t'ana'amdi ja naajx ja kajp pøni sã ja tsojki; jøts pøn jaty tnigubajk'ajtip o ti, ja'ats yiktejtíp jøts ku ja t'ødyundi øy pøn. ²⁶ Ka'ats meets idø'øn jade'en mjaa'y'attit; pøni pøn møjtojkíp, pøni pøn ana'amp, kidi ja jawyeen namyiduni tsojki; ja' idø'øn paat'ajtip ja myigu'uk tpuðøkip. ²⁷ ¿Pømbi dø'øn møjtojkíp? ¿Ja' pøn yikwindsø'jkíp, uk ja' pøn windsø'jkíp ma ja kaadyaajk jam? ¿Kidi ja'ajip møjtojkíp pøn jam tø twinguwaadsa ja kaabyajt jøts ja yikwindsø'øgi? Ixyats meets jade'en nmøøtwiditý sam ja' pøn ja myigu'uk wyindsø'jkíp.

²⁸ Tøts meets xmøøt'ayo'ombaaý, tø nayide'en xmidanidi wine'enin øts ixym xmøøtwidetti. ²⁹ Paty meets mbaat'aty; nmo'ot ja Dios Teety kyutujk midu ja tyanitanaapy yjaa'y, nayide'en sam øts ja tø xmø'øyin, ³⁰ jøts mga'adyit m'uuktit øts ngaabyajtkøjxp ku øts ja njaa'y ja kutujk ndanitanit, jøts m'ixa'aktit ma ø nyikutukt jøts xiidyu'undit ja Israelit jaa'y niduki'iyi.

Ku ja Jesús kø'øm tnigajpxy jøts ku ja Pedro ja kyu'øøniyt

³¹ Nayide'en ja nwindsøn'ajtim wyaañ:

—Simón, Simón, tyimdyø jøts miku' yja' myøjtøkit. Tø ja t'amidøy ja Dios Teety ja tiy'ajtin jøts meets ja øy øy myik'ayo'ombaaðit, yikxon meets ja mduktani'ejxwa'añi; ³² tøts me nni'amidowi jøts kidi yiknimajada'aky ja mjanchja'win ku jade'en m'ukjatt m'ukubatt. Kuts ja m'ajot'ajtin jadigojk tu'ugyi xyik'ett, kajpxjot'amøjkits ja mmigu'uk pøn jatý ø nja'ajtpy.

³³ Jøts ja Simón wyaañ:

—Windsøn'ajtim, ku me m'ukyiktsu'umt, nayide'ents øts nyiktsu'umt, ¿ti ti ø nnida'amp? Mjadyimya'øøky mets, nmøøt'ookpts mets.

³⁴ Winets Jesús ja ñimaajyøø:

—Øts Pedro dø'øn wamp jøts ku tsapni'aaw wyinatý ka'aním y'ayajxi'ikñim, ku meets wyinatý tigøøk ojk tø xku'øø'ni jøts ku me xka'ijxy'aty.

Ku Jesús tnimaay kyudanaabyitøjk jøts ku ja tyagøda'akwa'añidi ja ayo'on

³⁵ Xjats Jesús ja yiktøøjidøø:

—Ku meets ojts nguexy jadi'iñi, ku ja pejn ngadukwejtstøø, ku ja meen abøjk'i'iñ ngadukondøø, ku ja mgø'øk paat xkakondøø, ¿sats meets ojts mdyimyjaty? ¿Ti ojts mguidyim'ijtxyidi o dø'øn ja jade'en xkakondøø?

Jøts ja yjanchwãndøø:

—Janch ka'ap øøts ojts ti xka'ejtxi.

³⁶ Winets ja ñimaajyidøø:

—Yamnims inet ja pejn swetstit pøni pøn yja' jam, nayide'en ja meen abøjk'i'iñ; pøni pøn ja chujx ka'ejtxip, wan ja ñijan ttoøky jøts ja ttaju'uty. ³⁷ Øts wamp, wan idø'øn jade'en tjaty, jabi kuwanyimxi jade'en yjatt sa Dios kyajpxy wya'añ: “Møøt ka'øy jaa'y ja yik'amachomujky.” Jade'ents øts idø'øn nyiktu'unt sã øts jap tø nyiknigajpxy. Ka'pxy idø'øn ja jade'en yjatt kyubatt.

³⁸ Jøts ja wyãndøø:

—Windsøn'ajtim, pø ixyaýs majtsk tsujx.

Jøts ja y'adsøøy:

—Amøñidi.

Ku ja Jesús t'ajot'aty ja Dios Teety jam Getsemani

³⁹ Xjats ja Jesús chø'jñ, jøts ja ñijky jam kojpkøjxp midi yiktejp Olivos ma dø'øn ja jam xyumiyø'øy'ity; jøts pyabøjkpitøjk ja pyadso'onøø. ⁴⁰ Kuts ja jam yja'jty, jøts ja ñimaajyidøø: —Ajt'atti Dios Teety, jøts kidi myikmajada'akti.

⁴¹ Jøts ja ojts yjyø'øy nadyu'uk, ñajtsyø'øyiyi'ñ njagam. Jamts ja ñagyuxendyaajkøø, jøts ja jam Dios Teety t'ajot'ajty ⁴² yide'en:

—Dios Teety, pøni mdsøjkpy, jøts ø ka' jadine'en n'ayo'ombaatt; kidi øtsipts nja' kø'øm nyiktumpy, ja' ø nbadumpy pøni sa me xamidsøky.

⁴³ Winets ankilis ja tu'uk ñimejnøø midi tsajpøtpty tso'omp, jøts ja myøjaawmøøjyøø. ⁴⁴ Tyimchaachja'wipts ja møk ku dø'øn ja jade'n yjatwa'añ, jøts ja ojts tjaaktyimyoøktuñ tjaaktyimy'ajot'ajty ja Dios Teety amumjoojt. Janch yikxon ja yja'anuu'kxiñ, jade'en y'anuu'kxi ja wyixe'kxy sam ni'jpy kom kom wyixe'kxyin.

⁴⁵ Kuts ja Dios'ajot'ajt'abajtyi'ñ, jøts ja ojts tñimiñ ja pyabøjkpitøjk ma ja jam wyinatyi. Maadip ja jam ku ja tpaajty, ja jotmay ja jadi'iñi yikjotkøjxidip. ⁴⁶ Winets ja tñimaay:

—¿Tigøjxp ku mma'adi? Pidø'økti, jøts ja Dios Teety x'ajot'attit jøts kidi mibaagt miku' yja' mmimajada'agyidi.

Ku ja Jesús yikmajch

⁴⁷ Nay ixam ja Jesús wyinaty jade'en kyajpxy ku yja'jty may jaa'y. Ja Judás ja twinyø'øpy pøn ja pabøjkpitøjk wyinaty nimakmajtsk møøt tø y'uka'pxti, jøts ja twingume'eniyi'ñ ja Jesús jøts ja ojts tsu'kxy. ⁴⁸ Winets nwindson'ajtim ja tñimaay:

—Judás, ¿jade'eñi øts idø'øn xkøyaky ku ø xtsu'kxy?

⁴⁹ Jøts pøn ja Jesús jam wyinaty møøtwidajtjip, ku ja jade'en t'ejxtøø, winets ja yiktøøjøø:

—Windsøn'ajtim, ¿nadyagubojkim yø tsujx?

⁵⁰ Jøts ja nidu'uk tyiktsaachiyi'ñ ja teetywindsøn tyumbi, ojts y'aga'ndyatsk ja tkajt-spo'jtjyi. ⁵¹ Ka'ap Jesús ñiimy, yide'en ja wyaañ:

—Majtsu'utti; wan jade'eñigøjy.

Jøts ja tkønixajøø ja soldadi tyatsk jøts ja tyiktsøøjky. ⁵² Xjats ja tñimaay ja teetywindsønøjkti, ja kajpxwejpitøjkti, ja møjaa'dyøjkti wine'enin ja jam winaty tø myendø jøts ja yiktsoonwa'añi:

—Ja tsujx, ja kipy meets yam xanimemp. ¿Ti øts yjawi tø nduni? ¿Tø øts yjawi nmaa'tsni?

⁵³ Ku meets jam y'ijty nxumiminabyaadyi jabom jabom jam tsaptøjkjotj, niwine'enints meets y'ijty sa xkatuñ xkanøjmi; jøts meets winet tø mnaaxwa'aky ku ja et tø chuu'ji kyoodsi jøts miku' yja' jade'en myajada'aky.

Ku ja Pedro tku'iñ jøts ku ja ka' t'ijxy'aty ja Jesús

⁵⁴ Winets ja tmajstøø ja Jesús, jøts ja tyiknøjkxtøø jam teetywindsøn tyøjkwindum; jøts Pedro ja ojts tpanijky ix'oojk, jagam ja tpayø'øy. ⁵⁵ Jøts jøøn ja jam tajkyujk'am tyikmøjidøø, jamts ja tñidsinay'awidajtjøø jøts ja Pedro nay jam y'ixakmøø. ⁵⁶ Winets tø'øxyøjk ja tu'uk y'ejxøø pøn jam wyinaty tump, jøts ku jøøn ja jam twindsøøni, winets ja tyim wyin'ejxøø jøts ja wyaañ:

—Yø'øts ja Jesús y'ijty tmøøtwidajtjip.

⁵⁷ Ka'ats Pedro ja tkupiky, yide'en ja wyaañ:

—Ka' ø migu'uk ja n'ijxy'aty.

⁵⁸ Jøts jawaandøki y'ijty, xjats jadu'uk y'ejxpajtøø, jøts ja wyaañ:

—Mets yø y'ijty møøtwidajtjip, ¿kidi?

Ka'ats ja Pedro ñiimy, yide'en ja wyaañ:

—Mixy, ka'ap ja y'øtsi, ka' øts ja nmøøtwidity.

⁵⁹ Tø wyinaty tukoori ñaxy ku ja jadu'uk møkta'aky wyaañ:

—Janch yø' tam yø y'ijty myøøtwidajtjip, pø nayi Galileit jaa'lyts yø'.

⁶⁰ Xjats ja Pedro wyaañ:

—Migu'uk, nguidyimñija'wip øts pø ti mets jade'en mmadya'kpy.

Jøts nay jatyi nay ixamni ja jade'en kyakajpx'abaadi ku ja tsapni'aaaw tu'uk y'ayajxy. ⁶¹ Jøts ja nwindson'ajtim t'ejxjimbijty ja Pedro, winets ja Pedro tja'myejch ku nwindson'ajtim ja wyinaty tø ñi'mxy: "Ku tsapni'aaaw inet y'aya'axt, tø mets wyinaty tigøø ojk xku'øø'ni jøts ku me ka' x'ijxy'aty, jøts ku me ka' xnijawi." ⁶² Xjats ja Pedro yø'øpydisiimy janchniyaxni.

Ku ja Jesús yiktaxi'iky yikttaguyaty

⁶³ Jøts ja jaa'dyi pøn ja Jesús wyinaty tkøø'øm'ajttip, ojts ja ttaxe'ekti ttaya'axti, jøts kawine'en twinwopti tjøpwopti. ⁶⁴ Ojts ja twindsumdi jøts ja twingoxti tjøpkoxti, yide'en ja tñøjmidi:

—¡Uknajtsjawi pøn yjawi tø mgøxyi!

⁶⁵ Kawine'enin ja tjemniimaadyøø ttenimaadyøø.

Ku ja Jesús yikwaanjikxy jam kutujktaajkjotp

⁶⁶ Xjats ku xyiinjdyajky jøts ja jamit møjaa'dyøjk ñamyujkidøø møøt ja teetywindsøndøjkti, møøt ja kajpxwejjitøjkti, jøts ja tyiknøjkxtøø ja Jesús ma ja myøjkutujktaajk ja jamdi. Jøts ja jam tyiktøødøø yide'en:

⁶⁷ —Tukmadook øøts, ¿janch mets idø'on myiktejp Cristo midi yiknitsokp?

Jøts ja y'adsoojidøø:

—Ku net njanøjmidit jøts ku ja y'øtsi, ka'ats meets inet xmibøkt. ⁶⁸ Kuts meets inet nyiktø'øtt, ka'ats meets inet x'adsojimbett, nijade'en meets inet xkamajststutt. ⁶⁹ Nay icyamyits øts inet ja Dios Teety nbu'ixaagit kyutujktaajk jøp'am, pøn ja myøk'ajtin kamaabyim.

⁷⁰ Winets ja niduki'iyi wyandøø, niduki'iyi ojts yiktyiyi:

—¿janch mets idø'on Dios U'nk?

Jøts Jesús y'adsøø, yide'en ja tnimaay:

—Øts idø'on ja', nagyø'øm meets ixa jade'en tø mw'a'añ.

⁷¹ Jøts ja wyandøø:

—¿Ti ejxpi ti nija'wibi jaaktsojkiyip? Tøxi adøm yø yam kø'øm ndyimyadø'øyin sa yø kø'øm wya'añ.

23

Ku ja Jesús twinguwaj'kiyü'ñ ja Pilato

¹ Winets ja tyanagyukigyøjxtøø, jøts tyiknøjkxtøø ja Jesús jam Pilato wyingujk. ² Jøts ja jam tni'øø'ninaaxw'a'aktø yide'en:

—Tø øøts yø jaa'y ngubaadi, yø tkajpxma'tp adøm ja nmigu'uk. Yide'en yø wya'añ jøts øøts ja yjadu'ukpi windsøn ngamigubatt mididi ya'at naajx kajp tnitanaapy. Nayide'en øøts yø xnimaamyi jøts ku yø' Cristo, tyimy ja møj windsøn mididi yiknitsokp.

³ Xjats Pilato ja tyiktiiy:

—¿janch mets idø'on israelit jaa'y mniwindsøn'ajtpy?

Winets ja Jesús y'adsøø yøts ja wya'añ:

—janch øts ja', ka' me nugo mw'a'añ.

⁴ Jøts ja Pilato tnimaay ja teetywindsøndøjkti møøt ja mayjaa'y:

—Niti pøky yø jaa'y, niti tundigø'øyin yø tkatuñ.

⁵ Tiii møkta'aky ja tyimñømdi:

—Yø', Judeit jaa'y nugo tkajpxma'tp ku kyø'øm wyinma'añ yø ttuk'ixpiky. Jam yø ojts Galilea jade'en y'adøtspinaxw'a'aky, jøts yø icyabaat jade'en tpamiñ, icyabaat jade'en tkamajststuty.

Ku ja Jesús twinguwaj'kiyü'ñ ja Herodes

⁶ Kuts Pilato ja jade'en tmadøø, xjats ja tyiktiiy pøni janch Galileit jaa'y idø'on ja'.

⁷ Kuts ja ñømdøø jøts ku jade'en, winets ja ojts ttaninijikxy ja Herodes pøn wyinaty møj kudunk'ajtp jam Galilea, tyimbyøn ja wyinatymi jam Jerusalén ja'abi xøøw. ⁸ Kuts ja Herodes twingu'ejxyi'ñ ja Jesús, jøts ja yjantyimxyondaajky; jekyip idø'on ja wyinaty tyimyjawin'ejxw'a'añ jøts ja jadine'en ka' twin'ijxñim, tø ja wyinaty yiktamimadya'aky jøts ja jade'en tnijawi, yjøp'ijxpyts ja t'ejxit øy juuni ja myilagri'ajtin. ⁹ Kawine'en ja ttiibyiky, jøts ja Jesús kyidyimy'adsoop ja'. ¹⁰ Exam idø'on ja teetywindsøndøjk wyinaty møøt ja kajpxwejjitøjkti, ja'ats jam møk'ampy jantyimy'øø'ndip. ¹¹ Xjats ja Herodes møøt ja tyumbiøjk ta'ajkin'ampy tjemdundi ttedundi ja Jesús, jøts ja tnixe'ekti ttaxe'ekti, ojts wet ja ttuktatøkidi sam møj windsøn wyetin, jøts ja Herodes ja ttaniguejxy ja Pilato jadigojk. ¹² Winets ja ñamyigu'ukpøjkidøø jadigojk ja Pilato møøt ja Herodes, namyidsep'ajtidip idø'on ja wyinaty.

Ku ja Jesús ñidujkiyü'ñ jøts ja y'ookt

¹³ Jøts ja Pilato twaamujky ja teetywindsøndøjkti, ja kudunktøjkti, møøt ja mayjaa'y, ¹⁴ jøts ja tnimaay:

—Meets yø jaa'y ya tø xanimiñ jøts mnømdi jøts ku yø tkajpxma'aty ja jaa'y; tøts xmadowdi ku tø njatiibyiky, jøts niti tundigø'øyin øts yø ngadapøky'ijxy, øy meets yø jade'en xjani'øøni. ¹⁵ Nayide'en Herodes yø niti tundigø'øyin tkapaajtxi, icyats ja tø tkajximbejtnimi jadigojk. Exats idø'on x'ejxti jøts ku ka' pyaat'aty jøts yø y'ookt. ¹⁶ Nyik'ayo'optøts øts inet yø' jøtsnim øts inet yø nyik'awa'atpidsø'ømt.

¹⁷ Xumijade'ents idø'on ja ttundi ku ja xøøw tpaaty, kuwani dø'on ja Pilato tu'uk ja pøkyjaa'y tjadyimiyik'awa'atpidsimy. ¹⁸ Jøts ja ni'ijtyi møk'ampy wyambinaaxw'a'aktøø:

—Yikijwa'ak yø', jøts yø Barrabás ne'egi xyik'awa'atpidsø'ømt!

¹⁹ Tsep'ejxp idø'øn ja Barrabás jam wyinaty jam kajpjtøp jøts ja tø yikjaa'y'øøky, ja'ats ja kyubuxøjtøjkijy'i'ñ, ja' ja wyinaty tø yikttagudsumi. ²⁰ Yik'awa'atspidsømwampy Pilato ja Jesús, jøts ja ojts tmgajpxy jadigojk ja mayjaa'y; ²¹ ¿maa?, jawaani møk'ampy ja wyandøø:

— ¡Yikruspat! ¡Yikruspat!

²² Xjats ja Pilato midigøøk ojk wyaqañ:

— ¿Tims yø tyimgyubatp? ¿Ti tundigø'øyin adøm yø tø xtyimdyu'unxim? Ka øts yø nbøky'ixy ti yø tyimgyu'ooqip. Ja'ayi øts yø nyik'ayo'ot jøts øts yø nyik'awa'atspidsø'ømt.

²³ Jøts ti dø'øn ja tjantyimdyejti, møk ja tyimdyanidi jøts ja tnøjmidi wan tyikruspety; yjanchka'uk'amonidi ja', jøts idø'øn ja teetywindsøndøjk ja jade'en tnanktyuujnidøø sam idø'øn ja wyinaty tyimyjotkida'akti. ²⁴ Winets ja Pilato ja tkupijky sa ja wyinaty tø wya'andi, ²⁵ jøts ja jade'en tyik'awa'atspidsømy ja jaa'y pøn ja wyinaty tø t'a'ejxidi. Jøts ja pyidsø'ømt ja' pøn jam wyinaty tsumy'ejtp puxøjkjotp, pøn jam wyinaty jade'en tø tkubety ja tyundigø'øyin ku ja wyinaty tø tnankchep'ijxyi ja kajpjaa'y jøts ku ja yikjaa'y'øøky. Xjats idø'øn ja Jesús yikø'yajky jøts ja yikttagødøjkijy'i'ñ ja mayjaa'y, wan ja ttundi pøni sa ja ttundi chojkingøjxp.

Ku ja nwindson'ajtim Jesús kyiruspejty

²⁶ Kuts ja wyinaty jam tyiknøjkxti ma ja tyikruspattit, winets ja tu'uk tmajtstøø ja jaa'y pøn kugajp'ajtp Cirene, Simøn'ajtp ja'. Kyamjotp ja wyinaty chøøn jøts ja ttaguwa'anidøø jøts Jesús kyirus ja tpaogøjit jøts ja ix'oojk ttabayø'øty.

²⁷ Jansch may jaa'y idø'øn ja jam wyinaty payø'øyiyip, may ja tø'øxyøjk yjanchya'axti ku ja jotmay ja tyatøkiyidi, ku ja jade'en tyimyiktuñ. ²⁸ Jøts Jesús ja ojts y'ijxyidi jøts ja ñimaajyidøø:

— Meets Jerusaléngit tø'øxyøjkti, kidi ø xkuyaa'axidi, kø'ømyi mee mnabyaya'axit jøts ja' m'ejxtip ja m'u'nk m'una'jk, ja' mbaya'axtip. ²⁹ Ja'atp ja et ja xøøw ku pøn wya'ant: “Nekim yø t'ejxti pøn ka'u'nkpatp, pøn nijuuni kayikwidse'etstip, pøn nijuuni y'u'nk tkatsimy'ejttip.” ³⁰ Jøts ja jaa'y wyambina'axwa'aktit: “Ok øts yø tun yø kojpk ne'egi xnijaanit.” ³¹ Jade'en sam øts ixyam n'ayo'ombaa'aty niti pøkyøjxp, isats ja tyimy'ayo'onbaatit ja Jerusaléngit jaa'y!

³² Namajtsk pøkyjaa'y ja pyaa'y'ø'øyi ja Jesús jøts ja t'atsmøø'lookt. ³³ Kuts ja jam yja'jttøø ma ja et jam txøøw'aty Calavera, jamts ja tyikruspajttøø ja Jesús møøt ja yjanamajtskpi pøkyjaa'y, tu'uk jaty ja adsoaw aduuk kyiruspajttøø. ³⁴ Kuts ja ixam wyinaty jade'en yikruspatti, xjats ja Jesús wyaqañ:

— Dios Teety, maa'kxuk, ka' yø tnijawidi pøni ti yø tyundip.

Jøts ja soldaditøjk ja wet tnguyajttøø midi ja Jesús y'ijty wyet'ajtpy, jøts ja jamyi agø'ømyi twejtswa'kxtøø. ³⁵ Ixam idø'øn ja mayjaa'y y'a'ejxukti jøts kudunktøjk paat ja ñixi'igyi tyaxi'igyi, yide'en ja wya'andi:

— Tøxi wyenkpi tyiktsø'øky, wants inet yø kø'øm tnankchø'øgyi, pøni janch ja Cristo tam idø'øn yø' pøn ja Dios tø y'a'ejxyi yiknitsokpi.

³⁶ Nayide'en soldaditøjk ja ñixejkmiyøø, jam ja wingon wyingunøjkxyi jøts ja ttuk'uukwa'andi ja vino ta'am, ³⁷ yide'en tnøjmidi:

— Pøni mets tam idø'øn mjanchwindsøn'ajtp yä israelit jaa'y ñaxjøøjty kyajpjøøjty, nanknitso'ogits mets jøts mga'ookt.

³⁸ Jøts letri ja jam y'agubajkp yikø'xjaay kawinaak jøøjp ja ayuujk, jade'en griego, jade'en latin, jøts hebreo, yide'en ja wya'añ: “Ya'at idø'øn tniwindsøn'ajtp israelit jaa'y.” ³⁹ Jøts ja pøkyjaa'dyi pøn jam wyinaty kudydi, ja'ats ja nidu'uk migajpxigøøyoø, yide'en ja ñimaajyøø:

— Pøni mCristo tam mets, ¿ti kuts mganankwyinakyi jøts øøts nayide'en xyikwinakt?

⁴⁰ Jøts ja yjadu'ukpi ojts twi'øjy ja myigu'uk, yide'en ja tnimaay:

— ¿Ka' mets ja Dios x'uktsø'jkini? Jabi nayide'ents jam yjawi mja'ayo'ombaatmi. ⁴¹ Jøts xpaat'ajtim adøm jade'en jøts adøm jade'en ngu'ayo'owant ja nga'ø'y'ajtm ti jaty adøm tø ndu'uñin, mats ya'at niti yø tkatuñ ti dø'øn yø jade'en kyubejtpy.

⁴² Jøts ja yjaakwaañ:

— Jesús, xja'myatpim øts ku mja'att jam mgutujktaajk jøp'am.

⁴³ Jøts Jesús ja y'adsoøøø:

— Janch øts idø'øn nwa'añ jøts ku øts inet nayamyi xmøøtnøjkxt jap tsajpjøtpy.

Ku ja nwindson'ajtim Jesús y'ø'jky

⁴⁴ Ja dø'øn ja xøøw wyinaty kyuki ku jotmøn kyoodsiyi'i'ñ, jøts ja et kugoots tyaqañ, jaanim xiiñi jadigojk tigøøk yaxp. ⁴⁵ Kuts ja xøøw wyingoodsiyi'i'ñ, jats ja tsaptøjk awejststuk kujkwa'kxy, winet tyakø'jtsiyi'i'ñ. ⁴⁶ Jøts ja Jesús møk'ampy wyaqañ:

— Dios Teety, pøjkjø'øgik øts n'anmija'win.

Ja'ayi ja jade'en yjaakwaañ jøts ja y'ø'jky.

⁴⁷ Xjats kuts ja romit soldadi mayut ja tuki'iyi jade'en ojts t'ixy sa jaty idø'on yjaty kyubejty, jøts ja tmøja'wiyii'n tkunuu'kxyja'wiyii'n ja Dios, yide'en ja wyaan:

—Janch øy jaa'y tam idø'on yø', ka'ap yø pyøkyjaa'dyi.

⁴⁸ Pøn jaty jam wyinaty, pøn jaty ja jade'en t'ejxtøø tnija'widøø, niyaxni ja jam cho'onidøø. ⁴⁹ Jøts pøn jaty ja Jesús ijxy'ajtip, jøts ja tø'øxyøjkti pøn ja jam Galilea wyinaty tø pyadsøøniyi, ja'ats idø'on jam jagam ojts t'a'ejxukti ti jaty tuujnøø jajtøø, wa'ats ja t'ejxøjxtøø.

Ku ja Jesús ñine'kxy yikpiktaajky jap oo'kpi tsaa jutjotpy

⁵⁰ Jamts wyinaty tu'uk ja jaa'y midi janch øy jaa'y'ajtp, ka'ap ja pøn tmidundigøø, José ja xyøøw'ajtpy, jam ja Arimatea kyugajpi, nayjam idø'on ja kajp tyañ Judeit etjotp. Nay jamts idø'on ja tyuñ jam kutujktaajjotp ma ja israelit jaa'y kyutujk'adsøonidi. ⁵¹ Y'awijxpyts idø'on ja José ja 'ja ja Dios kyutujk midi ja tyanitanaapy yjaa'y, jade'ents ja ka' tkupiky sa ja møøtkutujk'adsinaabyi wyinaty tø y'adø'øtsti. ⁵² Ja'ats ojts tniinjxy ja Pilato jøts ja t'ats'ijxy jøts ja t'amidoojøø ja Jesús ñine'kx. ⁵³ Kuts ja tyikruswinajky, winets ja tpoopwet'amøjch jøts ja tpiktaajky ma oo'kpi jut ja wyinaty yikxon tø tyik'øyi, tøjku'ngin ja wyinaty tø tpejxjuty ja tsaa, nipøn oo'kpits jap kyayikpikta'akñim, tymñay'amaay ja y'ity. ⁵⁴ Ja'abi xøøwts ja øy ti tjaaktyimdyngøxti jøts t'amaay'atti kyimjabom ja poo'kxin xøøw.

⁵⁵ Jøts ja tø'øxyøjk ñøjkxtøø pøn wyinaty tø tpadsoondi ja Jesús jam Galilea, jøts ja t'ats'ejxtøø ja oo'kpi jut, ojts ja t'ejxti ku ja oo'kpi jap yikpiktaajky. ⁵⁶ Kuts ja wyimbejtnidøø, ñøjkxnidi jam tyøjkjotp jøts ja ojts t'a'ejxidi ja pa'akxuu'kpi møøt ja aceite, jødsyim ja t'amaay'atti ja poo'kxin xøøw sam wya'añ ja Dios kyutujk.

24

Ku ja nwindson'ajtim Jesús yjujkyjyiki jadigojk

¹ Kuts ja yjadu'ukpi samaan tyøjkiyi'ñ, ku myidukxøøw'ajty, winets ja tø'øxyøjk wyimbejtnøø jøts ja ñøjkxtøø jøpyi jøpyi ma ja oo'kpi jut jam, jøts ja ojts tyiknøjkxti ja pa'akxuu'kpi midi ja wyinaty tø tyik'øyidi; ojts ja yjadu'ukpi tø'øxyøjk ja tmøødidi.

² Kuts ja jam yja'ittøø, jøts ja oo'kpi jut ja tpattoø jøts kudam y'agø' ja kya'uknayjamini; ³ tøjkidøø dø'on ja jam jøts ja ka'ap t'ukpaajtniyidøø ja nwindson'ajtim ñine'kx. ⁴ Jøts ja yjancho'jkidøø, nisudso'ampy ja kya'ukwinmaa'nbyatnidi pø ti dø'on tyu'undip jøts ku ja tjaaktyimy'ejxpattoø namajtsk ja jaa'y jap wingon wyindaniyidi, janch jajp tsamamp ja wyet tmigaxø'økti. ⁵ Kumi janch tsø'jkidip ja wyinaty jøts ja nugo ñaxkoodøø, yide'en ja ñimaajyidøø:

—¿Jadits ya x'ixa'adi oo'kpi agujky midi tø yjujkyøkni? ⁶ Ka'ap ja ya pøn, tø ja yjujkykyi. Ja'myatsi sa ja mñimaajyidøø jam Galilea ku ja jaak nay jam wyinaty, ⁷ ku ja wyaan jøts ku ka'øø jaa'y ja yiktagidøokit, ku ja kyiruspatt, jøts ku ja kidigøøk xøøw yjujkyøkt.

⁸ Jøts idø'on ja tjanchja'myajtstøø ja Jesús y'ayuujk sa ja wyinaty tø wya'añ, ⁹ jøts ja jam cho'ondøø ma ja oo'kpi jut jam jøts ja wyimbejtnidøø, ka'pxy ttamimadyakøjxtøø ja yjanimaktu'ukpi kudanaabyidi jøts pøn jaty jam wyinaty. ¹⁰ Ja María Magdalena, jøts ja Juana, jøts ja yjadu'ukpi María midi ja Jacobo tyaak'ajtpy, jøts jadu'uk ja tø'øxyøjkti, ja' dø'on jade'en ojts yjatti jøts ja ttamimadyakøjxtøø ja kudanaabyitøjkti. ¹¹ Jøts ja kudanaabyitøjkti ka'ap ja tmibøkti ku ja tø'øxyøjk ja jade'en tyamimadya'agyidi pø sa ja tity yjatti.

¹² Xjats ja Pedro chøø'ñ jøts ja ojts pyujtnijkxy ma ja oo'kpi jut jam. Kuts ja kyu'ejxyi'ñ jøts ja t'ejxpaajty ja poop wet jøts ku ja jagam wyøjnaa'ni. Kuts ja wyimbijty tyøjkjotp jøts ja janch ñigyumaaøp tja'wiyii'ñ ku dø'on ja wyinaty jade'en tø yjaty.

Ku ja nwindson'ajtim Jesús ñank'yijxyi jam Emaús tuu'am

¹³ Winets ja pabøjkpitøjk namajtsk nay ja'abi xøøw ñøjkxti jam ma kajp txøøw'aty Emaús, tuk'ajopyø'øyu'ngin idø'on ja tyø'ødyi ku choondi jam Jerusalén jøts ja jam ñøjkxti. ¹⁴ Ja' ja jam wyinaty ñigajpxtip ñimadyaktip sa dø'on jade'en wyinaty tø yjaty; ¹⁵ ixam idø'on ja kyajpxti myadya'akti wyinaty, ja' ja jam kyajpxy'ajttip ku Jesús ja ñimejnidøø wingon jøts ja myøøtyø'yidøø. ¹⁶ Yja'ejxtip ja wa'ats, jadi'ñits ja yikmøñidi yiktukyidi pø pøn ja jade'en. ¹⁷ Xjats Jesús ja yiktøjyidøø:

—¿Ti dø'on ja jaa mgajpxy'ajttip ku ixa jade'en mduu'yø'ødyi? ¿Ti mdajotmay'oo'ktip, sa mjatti?

¹⁸ Xjats ja nidu'ugin y'adsoodøø, ja Cleofas idø'on waan:

—Tyumnija'widip ja jaa'y ixyam ti tø tyuñi yjaty jam Jerusalén. ¿Kidi mets mjam'ajty, pø mets inet idø'on ja nadyu'uk mganija'wip?

¹⁹ Jøts ja ñimaajyidøø:

—¿Timts jam ti yjaty?

Jøts ja tñimaadyøø:

—Ja Jesús øøts idø'øn ndijpy, ja Nazaretit jaa'y, midi Dios Teety yikmøjkugajpxy'ajtip ku ja tkajpxwa'kxy ja y'ixpøjkin u ku ja ti ttuñ. ¿Ti ja kya'ukjajtpy? Myinajxpts ja jam Dios wyingujkp, jøts nayide'en ma naxwii'nñit jaa'dyi. ²⁰ Ja teetywindsøndøjk ja tøkøyakti møøt ja nwindsondøjkti jøts ja yiktaguwanit ja o'jkin jøts kyiruspatt. ²¹ Ja øøts ja jaa ndyimy'ukjøp'ijxpy jøts ja jekyip tñigubøky yø Israelit naajx yø Israelit kajp. Ixyamts ja tyigøøkkxøwip jade'en yjajtni. ²² Øy øøts ja tø'øxyøjk winaagin tø xjanøjmi adsø'jkibim, ku ja tø y'ats'otsti icyam jøpy ma ja oo'kpi jut jam, ²³ ka'abik ja tø tpaatti ja Jesús ñine'kx, jøts øøts ja tø xninijxky, tuki'iyi tø xamimadyakixy jøts ku ja tø t'ejxti namajtsk ja ankilis jødsik ja tø ñii'mxyidi jøts ku ja Jesús yjujky'aty. ²⁴ Winets øøts ja nmigu'uk winaagin jatyi tø yjanøjkxti ma ja oo'kpi jut jam, jødsik ja jam jade'en tø tjanchpaatti sa ja tø'øxyøjk tø tñigajpxti, ka'adsik ja ma tø t'ejxti ja Jesús.

²⁵ Xjanimts Jesús ja ñimaajyidøø:

—Ñiwine'enin mjanchkaja'gyukidi, meets tsaachkujuunjaa'dyi, jeky meets ja xøøw ja jumøjt ja xukminaxy jøtsnim meets ja xjanchjawit sa jatyi ja Dios kyugajpxy wyandøø! ²⁶ Jabi kuwañimxi tymbyaat'aty ja Cristo jøts ja jawyeen y'ayo'ombaatt jøtsnim ja tpaatt ja windsø'jkin winja'win o madsøo.

²⁷ Xjats ja Jesús tyukmadoobinaxwa'jkidøø sa ja Dios kyajpxy wya'añ ma jatyi ja jap yiknigajpxy tøøyip, ja' ja ñigajpxøjkii'yii'ñ sa wya'añ midi ja Moisés ja Dios tukjajyøø jøts ja tñigajpxkijxy sa jatyi ja yjadu'ukpi kugajpxy wyinaty ja Dios tø tyukjaadyañidi.

²⁸ Kuts ja jam kyajptøjkidøø ma dø'øn ja jam wyinaty yja'atwa'andi jøts ja Jesús yjaaktyimñøjkxwa'añ, tyimñaxwamp ja jam. ²⁹ Jøts kuwani tyiktandøø, yide'en ja ñimaadyøø:

—Møøt tank øøts ya, pø tøts chuul'jini, koodsiwyanipts.

Xjats ja Jesús ja jam jade'eñi myøøtaajnidøø. ³⁰ Kuts ja tmøøt'ixaktøø, tø wyinaty twinguwaadsidi ja kaabyajt, ixam ja chinaañidi ku ja tñixajiyii'ñ ja tsapkaaky, jøts ja ojts tkunuu'kxy, jøts ja t'adujkpajky, jøts ja tyagiko'oniyidøø. ³¹ Winets wyeen ja nay jatyi wyatstøø, jøts ja t'ejxkajptøø jøts kudam ja' Cristo; jøts ja nay jatyi ñanky'ejxigø'øñiyi. ³² Jøts ja ñawyaaajnidøø:

—Kidi janchjotkujk adøm yø tø xyikjajtyim ku tuu'ajy tø xamimadyaajkyim ja Dios kyajpxy.

³³ Xjats ja niwine'enin kyata'anidøø kya'amøjkidøø, jatyi ja jadigojk tyuu'døjkidøø jøts ja wyimbejtøø jam Jerusalén, jamts ja tpaattøø ja ñimaktu'ukpi kudanaabyidi, tø ja jam wyinaty ñamyukyidi møøt ja myigu'uktøjkti. ³⁴ Jøts ja ñimaajyidøø:

—Janch tøts ja nwindson'ajtim yjujkyipyky, yø Simón tø tymy'yj.

³⁵ Jøts yja' ja tñimadyaknidøø sa ja wyinaty tø yjatti kyubatti jam tuu'gm, jøts sudso ja wyinaty tø t'ejxkapti ja Jesús ku ja t'adujkpajky ja tsapkaaky.

Ku ja nwindson'ajtim Jesús ñanky'ijxyi ma ja pyabøjkitøjk jam

³⁶ Examni dø'øn ja wyinaty jade'en ñawyaaañidi ku ja Jesús jam ñanky'ejxøø jadigojk ja' y'agujk'amdi ma ja jam wyinaty, jøts ja ojts kyajpxpoo'kkxidi, yide'en ja ñimaajyidøø:

—Dios mjagyepyidi.

³⁷ Jadi'iñi ja myondi tyukti, tsø'øgi ja jadi'iñi yikmajadaktip, jade'en ja wyinmaydi pø nugo ja tijy y'ejxjooxti. ³⁸ Yide'en ja Jesús ja ñimaajyidøø:

—¿Tigøjxpx ku mdsø'øgidi, ti mdsø'jkidip? ¿Tiku xkajanchjawidi? ³⁹ Ejxidik øts ngø' ndeky. Pø østts idø'øn kø'øm. Tondik øts, ejxtik øts; pø ka'ats ejxmaj'jtin ñine'kx møødi, ni pyajk niti ja jade'en kya'ejtxi, sam meets icyam x'ijxy tuki'iyi nmøøt'aty.

⁴⁰ Kuts ja jade'en tyukmadoojidøø jøts kyø' tyeky ja tñanky'ejxøø. ⁴¹ Kumi nika'animts ja wyinaty yikxon ttajotkukidi jøts ja tjanchjawidit, jade'en ja xyonda'akti, jade'en ñigyumaap tja'wi'adø'øtsti, xjats Jesús ja ñimaajyidøø:

—¿Ka'ap ja ti jii'kxy xmøødidi?

⁴² Jøts ja tmøødyøø tukpidasi ja ajkxtsa'ayu'nk møøt ja jømbya'aku'nk, ⁴³ jøts ja t'axajiyii'ñ jøts ja ojts jamyi tjiu'kxy ja wyindumdi. ⁴⁴ Winets ja ñimaajyidøø:

—Jade'en øts idø'øn tø njaty sa meets ojts ndukmadøyin ku meets ja y'ijty njaakmøøtwidity, jøts ku øts jade'en wyinaty njatwa'añ sa øts jap nyiknigajpxy ma ja kutujk Moisés Dios tyukjajyøø, jøts nayide'en jap nøkyjøtpy midi ja yjadu'ukpi kugajpxy yjaadyandøø, jøts nayide'en sa ja nøky tñigajpxy jap Salmosjøtpy.

⁴⁵ Xjats ja Dios kyajpxy ja tyukja'gyukyidøø, ⁴⁶ yide'en ja ñimaajyidøø:

—Jade'en jap yja'ayi jøts ku ja Cristo y'ookt, kyidigøøkk xøøwts ja yjujkyøkt ku o'jkin ja tja'uk'ext; ⁴⁷ jøts ja yiknigajpxwa'kxt o manaajx o magajp, ku ja ya Jerusalén cho'onda'akt jawyeen, jøts ku ja'agøjxpx yiknøjmidi o pøn, wan ja china'yin tyiktigtatsti jøts yikpøjkpimaa'kxtit. ⁴⁸ Meets, wa'ats mdyimy'ijxpy mdyimñija'wip sa jatyi tuki'iyi tyuñi yjaty. ⁴⁹ Madowdits, ndanigaxp meets ja' midi øts ja Dios Teety tø xamiwandaagi; yaa'yits meets

m'awext ya Jerusaléngit kajpjøøjtjy kunim ja mbaadidit ja møk'ajtin mididi jap tsajpjøøtjy kidakp.

Ku nwindson'ajtim Jesús chajpejty

⁵⁰ Xjats idø'on Jesús ja jam kajpjøøtjy wyaabidsøøjmidøø, jøts ja yiknøjkxidøø jam Betania, ojts kyø' ja tyaxajjyidi jøts ja kyunuu'kxidøø. ⁵¹ Kuts ja jade'en kyunuu'kxidøø, jøts ja myajstujtidøø, jøts ja chajpejty. ⁵² Jøts ku ja wyinaty tø t'ukwindsø'ogidi t'ukwinjawidi, xjats ja ojts wyimbejtnidi ñøjkxnidi jotkujk'atyim jam Jerusalén, ⁵³ xumijam'ajttip idø'on ja' jam tsaptøjkjotjy jøts ja jam tmøjawidi tkunuu'kxyjawidi ja Dios. Jade'en ja y'ejxi tyiyi.

JA ØGYAJPXJ JA ØMYADYA'AKY MIDI JA JUAN YJAAY

Ja pøn xuk'ejximp xuknija'wimp ja Dios Teety

¹ Jaayim ja wyinatyni pøn xuknija'wimp ja Dios ku tuki'iyi cho'ondakixñim; Dios ja møøt tyimny'ity jøts navi Dios ja kø'øm. ² Tso'onda'agyip ja møøt y'ity. ³ Jøts ja' ja Dios Teety tuki'ø'yiyi ja tsajp jøts ja naajx jøts tuki'iyi; pø ka'axi ja naxwii'ñit jeexyip cho'ondaajky ku jeexyip kya'ity ja'. ⁴ Ja' tyiktso'ondaajky ja tsinaa'yin jøts ja jujky'ajtin, jøts nayide'en xuknija'windi ja tyiiby; ja yjanchpi, midi tyik'øyip midi tyikwinaa'nbyatp ja naxwii'ñit jaa'y. ⁵ Møk ja tyikmajada'aky ja myøk'ajtin ku xyikudøø'kxaajka'am ma pøn wimbeets kugoots, jøts ka'ap ja miku' yja' myajada'aky.

⁶ Jats idø'øn jaa'y tu'ukmi pøn Dios ojts kyexyi, Juan ja xyøøw, ⁷ midi testigi'ajtpi meen jøts ja tniqajpxt jøts ja tniadya'akt pøn xyikujajtaajkyip xyikudøø'kxaajkyip, jøts ja øy pøn ttiyjawit tjanchjawit pøni sa jaty ja wya'añ. ⁸ Kidi ja Juanixpi ja' pøn xyikujajtaajkyip xyikudøø'kxaajkyip; nugo testigi'ajtpi ja ja'ayi yikexy jøts ja' tniqajpxt. ⁹ Tyimy ja' idø'øn wyinaty memp ja'tp ya naxwii'ñit pøn tyik'øyip tyikpaadip, pøn tyikwinmaa'nbyatp ja naxwii'ñit jaa'y.

¹⁰ Ixa ja wyinaty tø yja'tni ya naxwii'ñit jøts ja ojts nipøn kyagupikyiyi pøn jaty jaadi, øy ja wyinaty kø'øm tø yjadukyik'øyiyi ja naxwii'ñit. ¹¹ Kyø'øm ja' ja yjanimimpy jøts kyø'ømiguluktøjk paat ja ka'ap kyupøjkiyøø. ¹² Jats winaagin pøn ja kupøjkiyøø jøts pøn ja janchja'wiyøø; ja'ats ja tyi'ajtin ja ojts tmø'øy jøts Dios Teety ja y'u'nk'atidit. ¹³ Tyi'ajtingøjx ja jade'en Dios y'u'nk'atyidi, ka'ap ja jade'en sa jaa'y y'u'nk y'una'jky tpaatti.

¹⁴ Jøts ja' pøn xuknija'wa'am ja Dios, ojts ja jaa'yin y'atstani, jøts ja ojts ñiyjyky xmøø'tijtyindi xmøøtsinaa'yindi. Tø adøm myøk'ajtin ja nja'ijxyindi midi ja kyø'ømøk'ajtin'ajtpy ja Dios U'nk. Tu'ugyi Dios Teety ja yjanchjaajkyjyepyi, janch pa'ayoop, jøts tum ja tyi'ajtin janch'ajtin yajkpy. ¹⁵ Ja'ats ja Juan ojts tniqajpxy jøts ja yide'en wyaañ:

—Yø'øxi øts idø'øn ndiipy ku ø nwa'añ: “Ja' pøn oojknim me'emp, ja' idø'øn møj jøts ka'ap øts. Jøts kumi jaayim yø' wyinatyni, kidinim øts.”

¹⁶ Kajaa adøm Dios kyunuu'lxkin xmøø'yijtyindi ni'ijtyi. Juuni ja tkayaky. ¹⁷ Tøts ja Moisés kyutujk xuknija'wa'am sa ja Dios kyutujk; ixyats ja nwindsin'ajtim Jesucristo pøn xuknija'wa'am ja Dios pya'ayo'owin jøts ja tyi'ajtin yjanch'ajtin. ¹⁸ Nijuuni pøn tka'ijxñim ja Dios; yø'øts midi jam møøt y'ity, yø Dios U'nk, yø' xuknija'wa'am sa ja Dios Teety.

Ku ja Juan Bautista tniqajpxy ku ja nwindson'ajtim Jesucristo myeenwa'añ

¹⁹ Winets ja israelit jaa'dyi midi jam kugajp'ajttip jam Jerusalén, ojts tkaxti ja teetyøjk møøt ja levijit jaa'dyi midi t'ejx'ejttip ja tsaptøjk, jøts ja t'atstibyøktit ja Juan pøn idø'øn ja'; ²⁰ jøts ja ojts wa'ats tniqajpxy, yide'en ja wyaañ:

—Ka øtsip ja' midi yiktejp Cristo.

²¹ Xjats ja tjaaktyimdyiibyøjktøø:

—¿Pønts mets idø'øni? ¿Mets idø'øn Dios kyugajpxy midi yiktejp Elías?

Jøts ja Juan wyaañ:

—Ka'ap ja y'øtsi.

Jøts ja tjaaktyimdyiibyøjkt'adø'øtsti:

—Jøts, ¿metsimts idø'øn ja' midi dø'øn menwamp midi ja Dios kyugajpxy'ajtpy?

Jøts ja y'adsøøy:

—Ka'.

²² Winets ja yiknimaay:

—¿Pønimts mets? Kuwanixi øøts ja nnijawit jøts øøts ja ndukmado'ot pøn øø tø xkexy. ¿Sa me m'ukwa'añ ku mga'uknañigajpxy?

²³ Jøts ja Juan ja t'adsøøy:

—Øts ja' midi yikmadoop y'ayuujk jam abak etjotp, ma niti kya'ity: “Yiktøwdi yiktuda'akti ja mwinmaa'ñ jøts xkupøktit ja nwindson'ajtim” —nayide'en sam ja Isaiás wyaañ, ja Dios kyugajpxy.

²⁴ Ja fariseotøjk ja wyinaty tø kyexyidi midi idø'øn ja Juan jam jade'en møøt ñagajpxy. ²⁵ Xjats idø'øn ja Juan yiktiibyijky jøts ja yiknimaay:

—Pøni ka'adam me mCristo, ni mga'Elías, jøts ni Dios me mgagajpxy'aty, ¿tits ku myiknøbety?

²⁶ Jøts ja Juan tniimaay:

—Nøø øts iiy nduktanøbejtpy; jats ya tu'uk midi ka' x'ejxkaptinim; ²⁷ oojknim ja mye'ent, ja' tu'uk møj, nugo øts jawyeen nyiktuu'awa'açh. Nijuuni øts ja møøt nganamyibaat'atityit.

²⁸ Jam idø'øn ja jade'en yjajty ma ja et jam txøøwi Betábara, midi tamp xøbidsimy jam nøø agø'øm midi txøøw'ajtp Jordán, ma ja Juan jam ojts yiknøbety.

Ja Jesucristo yiktamiyoxp ja Dios Teety adømgøjxp

²⁹ Xjats ku kyimjabom'ajty winets ja Juan ojts t'ixy ja nwindson'ajtim Jesús ku ja jam wyinaty ñimiñiyi, jøts ja Juan wyaañ:

—Ejxti, yø' idø'øn jade'en jatwamp kubatwamp sam ja borreek u'nk yikyøxyin adøm nbojkpi køjxp, jøts yø' naxwii'ñit jaa'y tyikpøkwya'tsp. ³⁰ Yø' øts idø'øn ndijpy ku ø nwa'añ: "Ja tu'uk jaa'y myiñ, ja' idø'øn møj jøts kidi øts, jøts jaayim ja'ani." ³¹ Nika'ap øts yø' y'ity nnijawi pøni pøn yø'. Tøts ø nmiñ jøts øts Israelit jaa'y nøø nduktanøbatt jøts nduknijawidit pøn ja'.

³² Nayide'en ja Juan wyaañ:

—Tø øts ja Espiritu Santo n'ixy jøts ku kyida'aky jam tsajpwemp sam tsapakin, jøts ja tø kyøkke'eky yø' kyubajkp. ³³ Ni nganijawi øts yø' pøni pøn yø'; jøts øts idø'øn ja Dios Teety ojts xnøjmi midi øts nøø xukyiktump ku nyiknøbety, yide'en øts ja xnimaay: "Ku x'ext ja Espiritu Santo kyida'akt jøts y'ixa'akt jam tu'uk jaa'y kyubajkp, ja'ats idø'øn ja wyinaty midi ja Espiritu Santo xmø'oyimp ku ja yiknøbatt." ³⁴ Tøts ø n'ixy, jøts øts testigi jøts ku yø' Dios U'ngi.

Ja jaa'y pøn ojts jawyeen tpabøkti ja Jesús yja'

³⁵ Xjats ku kyimjabom'ajty, ixam ja Juan wyinaty køjmyi møøt namajtsk pyabøjkpi. ³⁶ Jøts ku ja Juan ojts t'ixy jøts ku jam wyinaty ñaxy ja nwindson'ajtim Jesús, winets ja wyaañ:

—Ejxti, yø' idø'øn jade'en jatwamp kubatwamp sa borreek u'nk yikyøxyin adøm nbojkpi køjxp.

³⁷ Ku ja' tmadoodøø midi ja Juan pyabøjkpi'ajtpy, midi jam wyinaty namajtski ku ja Juan jade'en wyaañ, xjats ja ojts tpanøjkxti ja nwindson'ajtim Jesús. ³⁸ Winets ja nwindson'ajtim Jesús y'ejxjimbijty, jøts ojts t'ixy jøts ku jam yikpayø'øy, jøts ja ojts tnøjmi:

—¿Ti m'ixaadyip?

Jøts ja ojts t'adsowdi:

—Windsøn, ¿ma me ndsøøni?

³⁹ Jøts ja nwindson'ajtim Jesús y'adsojimbijty:

—Men x'ejxti.

Xjats ja ojts ñøjkxti jøts ja ojts t'ejxti ma chøøni, jøts ja jam ojts tmøøtkudsuu'idi. Ja dø'øn ja xøøw wyinaty jawaani kyagidakni.

⁴⁰ Ja Andrés idø'øn ja', ja Simón Pedro y'uch, midi idø'øn ja jade'en tmadoodip namajtsk ku ja Juan jade'en wyaañ. Jøts nay ja' idø'øn jade'en tpanøjkxtip ja nwindson'ajtim Jesús.

⁴¹ Jøts ja Andrés tymñayjaty ja ojts t'ats'ixa'ay ja y'ajch Simón, jøts ja ojts t'atsnøjmi:

—Tø øøts ja Mesías nbaaty midi Dios kyejxpy, midi Cristo yiktejp.

⁴² Xjats ja Andrés ojts twaajnikxy ja Simón ma ja nwindson'ajtim Jesús jam wyinaty, jøts ku ja ojts y'ijxyi jøts ja ojts ñii'mxyi:

—Mets Simón, ja wa'axi me m'u'nk'ajtip ja Jonás. Cefas inet ixyam mxøøw'atp.

Jade'en ja ñii'mxyi ja nwindson'ajtim. Cefas jade'en tyijpy Pedro sam ja t'ayuujk'atti.

Ku ja Jesús twaadsøøy ja Felipe jøts ja Natanael

⁴³ Jøts ku kyimjabom'ajty, jam ja nwindson'ajtim Jesús wyinaty ñøjkxwag'añ Galilea etjotp, ku ja tminabyaajti ja Felipe jøts ja tnamaay:

—Møødik øts.

⁴⁴ Jam Betsaida ja Felipe kyugajp'aty nay jam ma ja Andrés kyugajpi møøt ja Pedro.

⁴⁵ Winets ja Felipe ojts ñijxy jøts ja ojts t'ats'ixa'ay ja Natanael, jøts ja ojts t'atsnøjmi:

—Tø øøts ja jaa'y n'ixy midi ja Moisés ñigajpxpy jap nøkyjøtpy ku ja kutujk ja ojts tja'ay, jøts nayide'en midi ñigajpxtip ja Dios kyugajpxtyøjkti, ku ja ojts tjaadyandi. Ja Jesús ja' midi ja José y'u'nk'ajtpy, midi jam kugajp'ajtp Nazaret.

⁴⁶ Xjats ja Natanael wyaañ:

—¿Wan ndejin y'øyi jam y'ukpidsømni Nazaret?

Jøts ja Felipe y'adsøøy:

—Men xtyimy'ixy.

⁴⁷ Kuts ja nwindson'ajtim Jesús ojts t'ixy jøts ku ja Natanael jam ñimiñiyi, winets ja wyaañ:

—Ixya net myiñ tu'uk nmigu'uk israelit jaa'y midi øyjaa'y'ajtp, midi ka' tyaa'y.

⁴⁸ Winets ja Natanael ja ojts yiktiiyiyi:

—¿Sudsø'ampy me x'ijxy'aty?

Jøts nwindson'ajtim Jesús ja ojts ñii'mxyi:

—Tøyimxi me wyinaty n'ejxni ku mets yø Felipe ka'anim wyinaty m'atswayinim, ku mets ixajp iigi patki'py.

49 Winets ja Natanael wyaañ:

—Windsøn, mets idø'øn Dios U'nk, jøts mets idø'øn mniwindsøn'ajtpy israelit jaa'y.

50 Jøts nwindson'ajtim Jesús ja ojts yide'en y'adsøyi:

—¿Jaty me xtyimyjanchjawi ja'agøjxp ku me tønno'jmi jøts ku me tøn'ixy jap iigi patki'py? M'ejxpnim mets ja myøjpi y'øybi mididi ø ndu'ump mididi ka'ap yjade'eni sam ya'adin ku me tøn'ixy.

51 Jøts ja nwindson'ajtim Jesús yjaaktyimwyaañ:

—Meets yam ndyimñimaapy, jøts ku x'ejxtit ja tsajp y'awa'ats, jøts ku Dios y'ankilis pyattit wyinaktit jøts øts ja xnigida'aktit, ja' kuxi øts ja naxwi'ñit jaa'y ngudani Dios Teety wyingujkp.

2

Naxyøduujnidip ja jaa'y jam Galileit etjotp

1 Kyimdigøøk xøøw wyinaty tøn'yity ku jaa'y y'amajtskidi ma ja kajp txøøwi Caná, jam Galileit etjotp. Exam idø'øn ja nwindson'ajtim Jesús wyinaty tyaak. 2 Jøts nayide'en ja nwindson'ajtim Jesús wyinaty tøn'yikwa'ymidi migaabyi mi'ukpi møøt ja pyabøjkpitøjk jøts ja nay jam ñøjkxtit. 3 Xjats ja vino tyimgyijxy, winets ja nwindson'ajtim Jesús ja tyaak ñimaajyøø:

—Tøn tyimgyugøxidi, ka'ap vino ukteeni.

4 Jøts ja nwindson'ajtim Jesús y'adsøyi:

—¿Ti øtsimts taak yø xpatp? ¿Tiku øts yø xukmadø? Pø ka'anixmi øts nja' xpaaty mididi ø ndu'ump.

5 Jøts ja tyaak wyaañ, yide'en ja tñimaay ja jaa'y pøn jaty jam wyinaty windsø'jkidip:

—Mdu'undip idø'øn jade'en tuki'iyi pøni sa wya'añ.

6 Jamts wyinaty tudujk ja tsaadu'jts mididi ja israelit jaa'y yiktundip ku Dios ja twindsø'øgidi jøts ja pyøkwya'atsttit. Makta'pxy uk magø'pxy enteerin ja y'uch tu'uk tu'uk, jade'en nøø ja yikta'adami. 7 Xjats ja nwindson'ajtim Jesús tñimaay ja jaa'y pøn jaty jam wyinaty windsø'jkidip:

—Yik'utskøxti yø tu'jts. Adamidi nøø.

Jøts ja ojts yikxon tyimyk'utsti, 8 winets nwindson'ajtim Jesús tñimaay ja jaa'dyi:

—Aja'aptu'uttits inet waani, jøts xaninøjkxtit mididi yø xøøw tøn tñiwaamuki.

Jøts ja ojts jade'en ttundi. 9 Ojts ja tjä'gyapy mididi ja xøøw tñiwaamujkip jøts ja tsujxk nøø tøn vino yjajtni, nika'ap ja tñijawi pø ma ja chøøñ; ja'ayi ja nugo tñija'widip pøn windsø'jkidip, pø ja'axi ja nøø wyinaty tøn tjaapti. Xjats ja twaadsøø ja jemyaay' 10 jøts ja tñimaay:

—Tum jawyeen øy pøn t'uuky yø vino y'øybi, jøts ku ja mi'ukpi ja kom tøn t'uknidi winets ja yu'nkpi yikyakñim. Jøts mets, tøn mets ja møk vino ne'egi xjaakyik'awixy, jøts mets yø yammim ne'egi xyaky oojknim.

11 Yø'øbi mīlagri'ajtin idø'øn ja nwindson'ajtim Jesús tyimyjawyeen nanxy'ejxøø jam Caná, jam Galileit etjotp, mididi yiknigaxø'jk ja myøk'ajtin, winets ja pyabøjkpitøjk ja ojts yjaakjanchjawi.

12 Xjats ku ja jade'en y'ukjajty, winets ja ojts ñijxy ma ja kajp jam txøøwi Capernaum, møøt ja tyaak, møøt ja myigu'uktojk, jøts møøt ja pyabøjkpitøjk. Jøts ja jam tyaq'nidøø ñigyawinaak xøøw.

Ku ja Jesús tpawojpkijxy ja too'kpitøjkti jam tsaptøjk agø'øm

13 Ja paski xøøwts wyinaty tyimbyatnpi mididi ja israelit jaa'y tyundip, winets ja nwindson'ajtim Jesús ojts ñijxy jam Jerusalén. 14 Jøts ja jam tsaptøjk'agi'py tkubajtyi'ñ ja jaa'dyi pøn too'ktip ja tsakaa, pøn too'ktip ja borreek, pøn too'ktip ja pak, jøts nayide'en pøn ja myigu'uk myeen tyikwa'kxidip, ja' jam wyinaty tsinaadyip mayim ja jam tunk'atti. 15 Ku ja nwindson'ajtim Jesús ja ojts jade'en t'ixy, xjats ja tyik'øyiyi'ñ tu'uk pawojp, jøts ja jam tpawojpkijxy niduki'iyi ja jaa'y jam tsaptøjk agø'øm, møøt ja byorreek møøt ja chakaa. Jøts ja meen yikwa'kxpidi ojts ja myeen ja yik'ixko'odi, jøts ja myesi ja ojts yiktejimbetti. 16 Jøts ja tñimaay ja jaa'y mididi paktoo'ktip:

—Yikjiwa'akti yø ya! iKidi nDeety tyøjk maadyøjk xyikwa'andi!

17 Winets ja pyabøjkpitøjk nay jaty tja'myajtsidøø ja nøky ma ja David yide'en wyaañ: "Møk øts nba'ayøy ja mdøjk."

18 Xjats ja israelit jaa'y ttiibyøjktøø ja nwindson'ajtim, jøts ja tñimaadyøø:

—¿Ti ttiy'ajtin øøts xuk'ejxp jøts ku xjagyepy ja kutujk ku jade'en m'adi'ich?

19 Jøts nwindson'ajtim Jesús ja ojts t'adsøyi:

—Yikidawdi yø tsaptøjk, kidigøøk xøøw øts yø jadigojk nyikwa'kukit.

20 Winets ja israelit jaa'y wyandøø, jøts ja ojts ñii'mxyiyi:

—Wixixkyyudujk jumøjt yø tø yiktunk'aty yø tsaptøjk jøts yø tø y'øyi; ¿jøts me mwa'añ jøts ku mets yø kidigøøk xøøw xyikwa'k'øyt jadigojk?

²¹ Ku ja Jesús ja tsaptøjk tkajpxy, pø kyø'ømne'kx ja jade'en tyijpy. ²² Pø patyxi ku ja nwindson'ajtim Jesús ojts yjujkyjyiky jadigojk jap oo'kpi jutjøtpy, yø'øts ja pyabøjkpitøjk yja'myatsøø ku ja wyinaty jade'en tø wya'añ. Xjats ja tjantymyanchja'widøø ja Dios kyajpxy, jøts nayide'en tmbøjkidøø ja nwindson'ajtim y'ayuujk sã jaty ja wyinaty jade'en tø wya'añ.

Wa'ats ja Jesús tnijawi sã jaty jadu'uk jadu'uk wyinmay

²³ Kuts ja nwindson'ajtim Jesús jam wyinaty tyiknaxy ja paski xøøw jam Jerusalén, jøts may ja jaa'y ja jam yjanchja'wiyøø tyiyja'wiyøø ku ja t'ejxti ja myilagri'ajtim midì ja tyumpy. ²⁴ Jøts ja nwindson'ajtim Jesús ka'ap ja nugo tymñagiyakyi, kumi wa'ats ja t'ejxkapy ja niduki'iyi sã pønjabøn. ²⁵ Ka'ap ja chøkyiyi jøts ja pøn tyukmadowit sã jaty jaa'y jadu'uk jadu'uk yjaa'y'aty. Wa'ats ja kø'øm tymñijawi sã pøngapøn y'am yjotp wyinmay.

3

Ja Jesús jøts ja Nicodemo

¹ Jamts idø'on tu'uk fariseit jaa'y pøn txøow'ajtp Nicodemo, jøts ja idø'on ja israelit jaa'y wyindsøn'ajtip. ² Ja'ats ojts koots y'atstø'k'ayø'y mã ja nwindson'ajtim Jesús jam wyinaty, jøts ja ojts t'atsnøjmi:

—Windsøn, nnija'wip øøts jøts ku Dios tø mguexyi jøts øøts xyik'ixpøkt. Ka'ap me jeexyip jade'en xyiktuñ ja Dios myø'k'ajtin mlagri'ajtingøjxp sam icyam xyiktuñin, ku jeexyip møøt mga'ity ja Dios.

³ Xjats ja nwindson'ajtim Jesús ja tnimaay:

—Janch øts idø'on nwa'añ, jøts ku ka' pøn tpaatt ja Dios kyutujk midì yjaa'y ja tyanitanaapy pøni ka'ap pøn nayide'en kyaxi'iky jadigojk sam tø kye'exyin.

⁴ Winets ja Nicodemo tyiktiy jøts ja tnimaay ja nwindson'ajtim Jesús:

—¿Sudsots ja møj jaa'y nayide'en jadigojk kyaxø'økt sam ja tø kye'exyin? ¿Pø sudso'ampy jadigojk tyøkit tyaak yjotp jøts kya'axkojmit?

⁵ Jøts ja nwindson'ajtim Jesús ja yide'en t'adsøøy:

—Janch øts idø'on nwa'añ, pøni ka'ap pøn jade'en kye'exy ejxim ja jaa'y kye'exyin, jøts nika'ats ja Dios myø'k'ajtin myø'øyi, ka'ats pøn mibaat tyøkit mã Dios ja kyutujk ttanitani ja yjaa'y. ⁶ Ku ndeety ndaak xyikaxø'jkyim, nugo yø' xmo'øyim ja jaa'y'ajtin; jøts ku ja Dios x'u'nk'ajtyim, ja'ats ja myø'k'ajtin ja y'Espiritu Santo xmo'øyim. ⁷ Kidi nigyumaap xjawi jøts ku jade'en nnøjmi: “Niduki'iyi jaa'y pyaat'atyidi ja chinaa'yin tyiktigatstìt, ka'axigajstipts ja ñamyayi jade'en.” ⁸ Pojp øy madsøo pyøjy; wa'ats nmadøø'yim sã wyina'añ ja poj, ka'ats nnija'wa'añ pøni mã chøøñ jøts pøni mã ñijky. Nayide'ents idø'on ñamyayi ja'adi pøn ja Dios myø'k'ajtin yikaxø'jkiyidip.

⁹ Winets ja Nicodemo tjaaktiibyijky:

—¿Sudso yø ndejin jade'en?

¹⁰ Xjats ja y'adsoji ja nwindson'ajtim Jesús:

—¿Pø møj maestrìmts mets yã israelit kajpkijxy, jøts mets yø yjade'embì xkanimadøy?

¹¹ Janch øts idø'on nwa'añ, jøts ku øøts ja' nnigajpxy midì øø nnija'wip, jøts nay ja' øøts nidestigi'ajtpy midì øø tø n'ixy; jøts meets ja xkajanchjawi sã øø njawa'añ. ¹² Nika' xjanchjawidi ku øts ja'abaat ndyimyjanigajpxy ti jaty yã naqxwiin, ¿ti ja'ats mee mjaakjanchjawip ja tsajpjøtpyit yja' ku meets njadukmado'ot?

¹³ Ka'axi jap pøn y'ats'øch jap tsajpjøtpy, øts idø'on jap tsoo'mp kumi øts jap'ajtp jap tsajpjøtpy; jøts øts ja naxwii'ñit jaa'y ngudanaapy. ¹⁴ Jøts nayide'en ø nyiktu'unt sam ja Moisés ojts tuñin ja tsaa'ñ jam abak etjotp ku ja ojts køjxp tyiji'iky, ¹⁵ jøts ja kyawindigø'ødyit pøni pøn ø xjanchja'widip, xemikøjxp ja tpaattit ja kunuu'kxy jujky'ajtin ja kunuu'kxy chinaa'yin.

Pya'ayøøpy ja Dios ja naqxwii'ñit jaa'y

¹⁶ Janch møk ja Dios tsojkin tjagyepy, jøts tpikta'aky ja pya'ayo'owin yã naqxwiin ku ja y'U'nk tkexy midì tu'umchi, jøts ja kyawindigø'ødyit pøni pøn ja tjanchja'widip, jøts ja xemikøjxp ja kunuu'kxy chinaa'yin ja kunuu'kxy jujky'ajtin tpaattit. ¹⁷ Kidi ja'ajip ja Dios y'U'nk tyaniguejpxy ja naqxwiin jøts ayo'on ja ttukpaatt ja naqxwii'ñit jaa'y, jade'en'ampy ja tkexy jøts ja tyiknitso'ok'att ja naqxwii'ñit jaa'y.

¹⁸ Pøni pøn tjanchja'wip ja Dios U'nk, ka'ap ayo'on ja yiktaguwani; pønts tkajanchja'wip, ja' y'ayo'on kutujk xemikøjxp ja agøjxp ku tkajanchja'wiyidi ja Dios y'U'nk midì tu'ugyi. ¹⁹ Pøni pøn tyimyjade'en'ajttip, tø y'ayo'on ja kyutujknidi, ku ja myiin yã naqxwiin midì ja jaa'y øy tsuj tyikwinmaa'nbyatp, ka'ap ja yikupijky. Ne'egi ja kube'ets'ajtin kugoots'ajtin ja ne'egi chojktip, ja' agøjxp ku ja tyumjaka'øybi ttunwa'andi. ²⁰ Niduki'iyi pøn ja tyumjaka'øybi

ttundip, kawin'lijxyim ja tjawidi ja yik'øwyyinmaa'nbyatpi. Niwine'enin ja tkamijotwa'andi ja'agøjxp jøts kyanigaxø'øktit ja kya'ødyu'unindi. ²¹ Pønts ttsinaadyip ja tyiiby yjanchpi, ja'ats tmijotwandip mididi øy tsuj tyikwinmaa'nbyatp ja jaa'y, jøts ja tyiknigaxø'øktit ja Dios yja' ti jaty ja tyundip.

Ku ja Juan Bautista jadigojk tkajpxpaaty ja Jesús yja'

²² Kuts idø'øn ja jade'en y'ukajjaty, xjats ja nwindson'ajtim Jesús ojts tmøødi ja pyabøjkpitøjk jam Judeit naxjotp. Niyyeky ja jam tyaa'nidøø jøts ja jam møøt yiknøbajttøø. ²³ Jøts ja Juan nay ixam ja wyinaty yiknøbatmi ixam Enón mididi ja Salimit kajp myiwingon'ajtpy, ja'agøjxp ja jam yiknøbety ku ja nøø jam janch kom; jamts ja jaa'y myendi jøts ja jam y'atsnøbatti. ²⁴ Jawyeenip idø'øn ja jade'en yjaty, ka'anim ja Juan wyinaty yikpikta'aky puxøjkjøtpy.

²⁵ Jøts nay winet ja Juan pyabøjkpi winaaagin tnadyamigajpxyidi møøt ja myigu'uk israelit jaa'dyi, ja' ja tnadyamigajpxyidiip sa ja pøky wya'ach. ²⁶ Nay winets ja Juan y'atsyiknimaay: —Windsøn, ixam ja icyam yiknøbety pøn mets jam wyinaty møøt xøbidsimy ma ja Jordángit nøø, ja' pøn mets ojts xnigajpxy jøts niduki'iyi jaa'y ja yjanchpabikyiyi.

²⁷ Xjats ja Juan ja tnamaay:

—Ka' pøn ti tniyaty pøni ka'ap Dios myø'øyi. ²⁸ Meetsxi ojts wa'ats kø'øm xtyimyadøy ku ø nwa'añ jøts ku øts ka' nCristo, jøts ku ø nja'aji pøn jawyeen yikajxp nugo. ²⁹ Janch tsuj øts, janch xondakp øts, jade'en ejxim ja tø'øxmyiyø'øbyi tyik'amajtski myigu'uk; jade'en øts nnayjawyiyi kuts nmadøy ja Jesús y'ayuujk. ³⁰ Yø' mjøtkøpnim jøts øts kuwani n'amutskit, kuwani n'ixnøjkxt.

Ja' pøn tsoo'mp jap tsajpjøtpy

³¹ Ja' pøn tsoo'mp jap tsajpjøtpy, tum ja' tuki'iyi tnitanaapy. Jøts pøn ya naxwiiñ'ajtp, ja naxwiiñ'its ja ja'ajtip, jøts tum ja'ayi ja ñigajpxy ti jaty ja ejtp. Pønts tsoo'mp jap tsajpjøtpy, ja' tuki'iyi tnitanaagyøjxp, ³² jøts tum ja' ja ñigajpxy mididi ja tø t'ixy, mididi ja tø tmadøy; jøts ka'ap ja pøn tjanchjawi mididi ja ñigajpxy. ³³ Kuts øy pøn tjanchjawi, ja'ats wa'ats tyikniga'axp jøts ku Dios tkajpxy ja tyiiby yjanchpi; ³⁴ Dios kyajpxy Dios y'ayuujk ja kyajpxip pøn ja Dios kajxip, kumi amuum y'Espíritu Santo ja myø'øyi. ³⁵ Chøjkpy ja Dios Teety ja y'U'nk, jøts tuki'iyi tø ttagidøjkigyixy ti jaty ejtp ka'ejtp. ³⁶ Pøni pøn ja Dios U'nk tjanchja'wip, xemikøjxp ja nøjkk tpaaty ja kunuu'kxy jujky'ajtin ja kunuu'kxy tsinaa'yin; pønts tkajanchja'wip, kawindem xøøw ja nøjkk tpaaty ja yjade'embidi jujky'ajtin, ja Dios myø'k'ayo'on ja nøjkk kyupøjkip.

4

Ja Jesús jøts ja Samariit tø'øxy

¹ Xjats ja fariseotøjk tniit'widøø jøts ku ja nwindson'ajtim Jesús may pyabøjkpitøjkni, jøts may jawaani ja jaa'y tyiknøbety jøts nigidi ja Juan jade'en; ² øy idø'øn nwindson'ajtim Jesús ja kø'øm tkidyimyiknøbety, ja pyabøjkpitøjkts ja tyiknøbajttip. ³ Xjats ku ja tnamadøoy jøts ku ja fariseotøjk tø ñijawyiyi, winets ja chøø'ñ jam Judeit naxjotp, jøts ja ojts ñijky jam jadigojk Galileit etjotp.

⁴ Ja Samariit et ja tyanaxp ku dø'øn ja jam ñijky. ⁵ Xjats ja yja'jty ma ja kajp jam tu'uk Samariit etjotp mididi txøøw'ajtp Sicar, jam wingon ma ja Jacob ja y'u'nk José wyinaty tø tmøøy ja ñaa'jx. ⁶ Jamts idø'øn tu'uk ja nømu'ut mididi yiktejp Jacob nømu'ut. Jøts kumi jøtkøjxp ja nwindson'ajtim Jesús wyinaty ku ja yø'yø, xjats ja y'ixaa'jky jam nømu'ut agø'øm. Ja dø'øn wyinaty ja xøøw kujky. ⁷⁻⁸ Winets yja'jty tu'uk ja tø'øxyøjk jam nømu'ut agø'øm pøn ku'etip kugajp'ip jam Samaria, jøts ja nøø ja tjuutwa'añ, xjats nwindson'ajtim Jesús ja ojts ñii'mxyi:

—Møøky øts nøø.

Jøts ja pyabøjkpitøjk, jam ja wyinaty tø ñøjkxti jam kajpjotp, jøts ja t'atsju'udyit ja kaaky ja jii'kxy.

⁹ Xjats idø'øn ja samariit tø'øxy tnamaay ja nwindson'ajtim Jesús:

—¿Sudso mets nøø x'amidøy jøts m'israelitjaa'yits mets jøts øts samariit jaa'y?

(Kumi ka'ap ja israelit jaa'y tminamyayidi ja samariit jaa'y.) ¹⁰ Winets ja yide'en y'adsojøø ja nwindson'ajtim:

—Kuk xjanchñijawit mididi ja Dios yajkpy, uk xnijawit pøn nøø ixa m'amidojyiyip, ¿ja ti jajik me xka'amidøy jøts me nmo'ot ja øybi nøø ja wa'atspi?

¹¹ Jøts ja tø'øxyøjk ja ñimaajyøø:

—Ni mdanøja'ap paat mets kya'ity, jøts køjnk yø nømu'ut. ¿Mats idø'øn xpøkwa'añ ja nøø mididi mdijpy øy wa'ats? ¹² Ja ndeety'ap Jacob øøts yø nømu'ut xukmidaan ma jaa ja y'ijty kø'øm y'uuky, jøts y'u'nk y'una'jik, jøts yjyujk chakaayayide'en. ¿Ti mjaaktyimbyønts me ndejin?

¹³ Jøts ja nwindson'ajtim Jesús ja t'adsøøy:

—Pøn jaty ya'at nøø t'uktup, tøødsidip ja jadigojk; ¹⁴ pønts t'ukp ja øybi ja wa'ats nøø mido ø nyajkpy, ka'ap tøødsi nijuuni y'ukpaajtniyit. Kumi jade'en ja nøø pyidsø'ømt jam y'anmija'wingøjxp mido øts ja nmøøpy, sam kom nøø pyidsimyin. Ja'ats ja xemikøjxp tukpaadiyip ja jujky'ajtin jøts ja øy'ajtin.

¹⁵ Winets ja tø'øxyøjk ja nimaajyøø:

—Yø'øbi nøø øts teety xmo'op, jøts ø nga'uktøøjtsiñit nijuuni, jøts ø nga'ukmenit nøgombi ya nømu'tutjøøjty.

¹⁶ Jøts ja nwindson'ajtim Jesús tnimaay:

—Nøjx mniyaa'y x'atsway jøts ya mme'ent.

¹⁷ Xjats ja tø'øxyøjk y'adsooøø:

—Ka' øts nniyaa'y.

Jøts ja nwindson'ajtim Jesús tnimaay:

—Janch tiigajpxy idø'on mwa'añ jøts ku ka'ap mniyaa'y pøn; ¹⁸ kumi nimagoxk tø xyiknaxy ja yaa'dyøjk, jøts pøn ixyam møøt, ka'ats ja xniyaa'yi. Jøts ku jade'en tø mwa'añ, janch tiigajpxy idø'on yø'.

¹⁹ Kuts ja tø'øxyøjk jade'en tmadøøy, jøts ja wyaañ:

—Mets teety, wa' mets idø'on yjawi jøts ku ka'ap mniyaa'y pøn; ²⁰ Wine'enin øø nsamariitjaa'y'aty, ya øøts ja n'aptøjk twindsø'øgidi ja Dios ixya kojpkijxy, meetsts wine'enin mee m'israelitjaa'y'aty, jade'en mee mwa'añ jøts øøts ja jam nwindso'øgit Jerusaleen.

²¹ Jøts t'adsøøy ja nwindson'ajtim Jesús, jøts ja tø'øxyøjk yiknøjmi:

—Øy xkamibøkt, wingomp idø'on jøts meets xwindsø'øgidit øy madsoo ja Dios. Ka' pyaaj'aty: jøts kuwani mdyimye'endit ya kojpkijxy uk mnøjxktit jam Jerusaleen. ²² Meets samariit jaa'y, ka' mee xnijawo pøni ti mee mwindsø'jikip; øøts, nniija'wipøts øøts mido øø nwindso'jikip; jabi israelit jaa'yts ñikøjxp myiñ ja nitso'ok'ajtin. ²³ Ixyamts ja xøøw ja jumøjt tø yja'aty, jøts ku nayi Dios myø'ajtingøjxp nay ja' tyi'ajtingøjxp yikwindsø'øgit ja Dios Teety, pøni pøn tjantymwindsø'jikidip ja Dios. Jade'en ja tsoyky jøts ja jade'en ttu'undit pøni pøn ja windsø'jikiyip. ²⁴ Tu'ugyi tum jade'en Dios jøts myø'ajtin; jøts pøn ja windsø'jikiyip, nay ja møk'ajtints ja yiktu'undip møøt ja tyi'byi yjanchpi.

²⁵ Xjats ja tø'øxyøjk wyaañ, jøts yiknimaay ja nwindson'ajtim:

—Nniija'wip øts jøts ku mye'ent ja Mesías —mido tyijpy Cristo, mido memp yiknitsokpi—; jøts ku ja mye'ent, ja'ats tuki'iyi xukmadoogøjxim.

²⁶ Jøts nwindson'ajtim Jesús ja tnimaay:

—Øts ja', øtsxi dø'on, øjx idø'on ixya nmigajpxy.

²⁷ Winets ja nwindson'ajtim pyabøjkpitøjk yja'ttøø, jøts ja ñigumaap tja'widi ku tø'øxyøjk ja møøt myadya'aky. Ka'ats pøn ñay'a'ejxyi jøts ja tyiktø't ti chøjky uk ti ja tø'øxyøjk møøt ñadyamigajpxyi. ²⁸ Xjats ja tø'øxyøjk jamyi tñikejky ja chiij, jøts ja ojts ñijky jam kajpjotp. Jamts ja jaa'y ja ojts t'atsnøjmi:

²⁹ —Mendi jøts jaa'y tu'uk x'ats'ejxtit pøn ø tø xukmadøy tuki'iyi sa jaty ø tø n'adi'ich. ¿Kidi ja Cristip idø'on ja ndejin, mido ja Dios tkajxp?

³⁰ Winets ja jaa'y choo'ndøø jam kajpjotp, jøts ja ojts tñinøjxkti ja nwindson'ajtim Jesús ma ja jam wyinaty. ³¹ Jøts idø'on pyabøjkpitøjk ja ixam ñii'mxyiyi møk'ampy:

—Windsøn, øy iij wine'enin mga'aty.

³² Yide'ents ja ojts ñii'mxyidi:

—Ja øts ngaaky njii'kxy mido øts inet nga'apy njøø'kxp, ka' meets ja xnijawo.

³³ Xjats ja pabøjkpitøjk agø'omyi ñayiktøøbinaxwaj'kidøø, jøts ja ñawyaajnidøø:

—¿Wan ndejin pøngapøn ja kyaaky tø tyanimiñi?

³⁴ Yide'ents ja nwindson'ajtim Jesús ja tnimaay:

—Ja' øts idø'on ngaaky'ajtp njii'kxy'ajtpy ku øts ja nbaduujnit ja y'ana'amin pøn tø xkexy jøts øts tyunk ja nyik'abajtyit. ³⁵ Pø yide'enxi mee mwa'añ: “Ja maktaxk po' kya'ity jøts pikta'aky pyidø'økt”; øøts wamp jøts mee nnøjmi: Ejxti yø kam mido ni'ipy, tø pikta'aky myøjaagøjxni jøts pyidø'øknit. ³⁶ Yiknijuupy ja' pøn ttunk'ajtp ja pikta'aky jøts ja tyikpidi'iky; jøts ja pikta'aky mido yikpidi'kpy, ja' ja wya'añ jøts ja xemikøjxp tyu'unt. Jøts ja jade'en ni'amuki ttajotkujk'attit pøn neptip jøts pøn tyikpidø'ktip ja pikta'aky. ³⁷ Pø janch tamxi dø'on ja' ku ayuujk wya'añ: “Wenkpi ja pikta'aky tnepp, jøts wenkpi ja tyikpidø'økp.” ³⁸ Jamts meets idø'on nguexy jøts ja pikta'aky xyikpidø'øktit ma ka'ap tø mne'epti; jabi wenkpi tø yjatundi yjapøkti jøts meets tyunk ja xaxojniyi.

³⁹ Mays idø'on ja jamit jaa'y tjanhja'widøø ja nwindson'ajtim Jesús pøn idø'on jam kugajp'ajttip ja'abi kajp mido jam Samaria, ku ja tø'øxyøjk ja wyinaty tø tyimñii'mxyidi tiy janch, ku ja wyinaty yide'en tø wya'añ: “Tø øts ja tuki'iyi xukmadooguyx sa jaty ø tø n'adi'ich, sa jaty njaaj'y'aty.” ⁴⁰ Xjats ku dø'on ja samariit jaa'y jam myendøø, jøts ja møk tnimaadyøø ja nwindson'ajtim Jesús jøts ja jam myøøtaaj'niyidit. Winets ja nwindson'ajtim

Jesús jam tyaa'niyi'i'n majts xøøw. ⁴¹ Jøts ja jaa'y may tjaaktyimyjanchja'widøø ku ja tyimjadowdi sa jaty ja kø'øm ñii'mxyidi. ⁴² Jøts ja tnimaadyøø ja tø'oxyøjk:

—Ndyimyjanchja'wipnim øøts inet. Kidi ja'ajip øøts nugo njanchja'wip sa jaty mee tø mwa'añ ku øø tø xukmadøy. Pø tøxi øøts yø yam kø'øm njaaktyimjadøy sa yø wya'añ. Tøts øøts nnijawi jøts ku yø janch Cristo, pøn naxwii'ñit jaa'y tyiknitsokp.

Ku ja Jesús tyiktsøøjky tu'uk ja windsøn y'u'nk

⁴³ Xjats ku kyimajtskxøøw'ajty, jøts ja nwindsøn'ajtim Jesús chøø'ñ jam Samariit etjotp, jøts ja ojts yjaaktyimñijky jam Galileit etjotp. ⁴⁴ Jøts idø'øn ja jade'en yjajty sam ja nwindsøn'ajtim Jesús wyinaty kø'øm tø wya'añin, jøts ku ja Dios kyugajpxy ne'egi ka'ap yikupiky jam kyø'ømgajpkøjxp. ⁴⁵ Kuts ja nwindsøn'ajtim yja'jty jam Galileit etjotp, jøts ja jamit jaa'y, chojktip ja' ku ja jam yja'jty, kumi tø ja wyinaty y'atsxøøatnidi Jerusalén ku ja paski xøøw jam wyinaty tø ñaxy. Tøts ja wyinaty tuki'iyi t'ejxxøxti ti jaty jam wyinaty tø ttuñ ja nwindsøn'ajtim Jesús ku ja xøøw jam ñajxy.

⁴⁶ Xjats ja nwindsøn'ajtim Jesús ojts ñijky jadigojk jam Caná mididi nay jam Galileit etjotp, ma ja wyinaty ja tsujxk nøø tø t'ukyikvinojaty. Jøts jamts idø'øn tu'uk møj windsøn tyumbimi mididi nayide'en windsøn, ja'ats idø'øn y'u'nk jam wyinaty pøjkip Capernaum. ⁴⁷ Xjats ku ja tnimadøøy jøts ku ja nwindsøn'ajtim Jesús jam wyinaty tø yja'aty Galilea, jøts ku ja chøøñ Judeit etjotp, winets ja ojts t'ats'ixy jøts ja møk t'atsnøjmi jøts ja tmøødit jam tyøkwindum, jøts y'u'nk ja yiktso'ogiyit pøn wyinaty tyimy'ooki'imni. ⁴⁸ Jøts nwindsøn'ajtim Jesús tnimaay ja jaa'y:

—Ka' meets janchja'win xjagyepy. Yø'øyi meets ja'ayi m'ijxpy yø milagri'ajtin.

⁴⁹ Yide'ents ja ñimaajyøø ja jaa'y pøn ja windsøn tyumbi'ajtpy:

—Men teety tsojk, namga'anin øts n'u'nk y'øøky.

⁵⁰ Winets ja nwindsøn'ajtim tnimaay ja jaa'y:

—Wimbejtni, nøjxni jam mdøjkwindum. Jujky'ajtp inet ja m'u'nk.

Xjats ja tjanchja'wiyi'i'n ku nwindsøn'ajtim Jesús ja jade'en ñimaajyøø, jøts idø'øn yjanch-
nijky. ⁵¹ Jøts ku ja wyinaty yja'atwani jam tyøkwindum, winets ja tyumbitøjk ja ojts
pyatsøyi, jøts ja ojts ñii'mxyiyi:

—Jujky'ajtp m'u'nk.

⁵² Jøts ja tyiktiy ti hori dø'øn ja y'u'nk wyinaty kujk tø myøkpøjk'okwa'añ, jøts ja
tnimaadyøø:

—Uxø'øyip ja'ani, ja dø'øn ja xøøw wyinaty waani yjøpta'aky ku ja jøøn wyinajkiixy.

⁵³ Xjats ja u'nkteety ojts tja'myech jøts ku nay ja'abi hori ja nwindsøn'ajtim Jesús wyinaty
tø ñii'mxyi: “Jujky'ajtp ja m'u'nk”; jøts niduki'iyi wine'enin y'u'nk ñidø'øxy y'u'nk y'una'jk
ja jam møøt, jadine'en ja ojts tjanchjawidi ja nwindsøn'ajtim Jesús.

⁵⁴ Jøts idø'øn jade'en mimajtsk ja milagri'ajtin kujk ttuñ ja nwindsøn'ajtim Jesús jam
Galilea. Tø ja wyinaty chøøñ Judea.

5

Ku ja Jesús tyiktsøøjky tu'uk køxujpxi pakxujpxi

¹ Xjats ku dø'øn jade'en y'ukjajty, jamts idø'øn israelit jaa'y wyinaty ttumidi xøøw, winets
ja nwindsøn'ajtim Jesús wyimbijty, jøts ja ñijky jadigojk jam Jerusalén. ² Jam tøjka'aw tu'uk
ja'abi kajp mididi yktejpp Borreek Tyøjk'aaw, jøts nay jam wington tu'uk ja pili mididi hebreit
ayuuyk yiktejp Betesda, magoxk ja tøjka'aw ja tmøødi. ³ Jamts ja maabyamaa'y kyo'knidi;
pøn winapti, pøn pakma'atti, pøn køxujxtip pakxujxtip. Jøts ja jam t'aweixti ja nøø kunim ja
y'adø'øst. ⁴ Atskidåkpts idø'øn ja ankilis jam tu'uk pili agø'øm, jøts ja t'atsyik'adi'ich ja nøø.
Kuts pøn pamaa'y jawyeen ñidøki, najxpts idø'øn pya'am ja', øy ja ti pa'am yjadyimyjapiky.
⁵ Jøts pamaa'y jam wyinaty tu'uk pøn wyinaty ee'pxmajktuktujk jumøitip ja pa'am pyaadyi.
⁶ Xjats ku nwindsøn'ajtim Jesús ja ojts t'ejxpaaty jøts ku ja jam kyo'kni, jøts ja t'ejxkajpy jøts
ku pa'am ja wyinaty jadine'en jeky tmi'ejtni, jøts ja ojts tnøjmi:

—¿Mdsøjkpy tsoojkin?

⁷ Jøts ja pamaa'y ja ojts yide'en y'adsøyi:

—Me teety, tyimñipøn øts pøn ø xnøyiktøkip jap nøøjøtpy ku yø nøø yja'ats'adi'ich. Yam ø
njatøkiwyami jøts jaty wenkpi ñødøki.

⁸ Jøts ja nwindsøn'ajtim Jesús tnimaay:

—Pidø'øk, wejtsjø'øk yø mmaabajt jøts mnøjxniit.

⁹ Jøts nay jaty chøøjky ja jaa'y, ojts tyikpidi'iky mididi ja jam tyamaapy jøts ja ojts
yø'øcho'oni. Jøts kumi poo'kxin xøøwts wyinaty, ¹⁰ winets ja israelit jaa'y tnimaadyøø ja jaa'y
pøn wyinaty tø myøkpiky:

—Poo'kxin xøøwxi yam; jøts ka'ap pyaat'aty xtsømwidett yø mmaabajt.

¹¹ Xjats ja t'adsøøy:

—Ja' ø tø xnøjmi pøn ø tø xyiktsø'øky: “Yikpidø'øk yø mmaabajt jøts mnøjkxnit.”

¹² Jøts ja yiknimaay:

—¿Pøn idø'øon tøn nniü'mxyi: “Yikpidø'øk yø mmaabajt jøts mnøjkxnit?”

¹³ Jøts ja jaa'y pøn idø'øon wyinaty tøn chø'øky, ka'ap ja tnijawi pøni pøn idø'øon ja wyinaty tøn yiktsø'øgyi. Jøts janch may jaa'yts jam, jøts ja nwindson'ajtim Jesús tøyim ja jam wyinaty cho'oni. ¹⁴ Jøts ja nwindson'ajtim Jesús jadigojk tpaajty ja jaa'y jap tsaptøjkjøtpy midu ja wyinaty tøn tyiktsø'øky, jøts ja tnimaay:

—Øyim yikxon xmado'ot, ejx idø'øon ixa tøn mdsø'øky, kidi m'ukpøkyuni jøts kidi ti mjaty; ku jawaani ka'øy mdyimy'ukjajtnit.

¹⁵ Winets ja ñijkxy pøn tøn chø'øky, jøts ja ojts ttukmadøy ja israelit jaa'y, jøts kudam idø'øon ja yja'aji ja Jesús, pøn ja wyinaty tøn yiktsø'øgyi. ¹⁶ Ja'agøjxp idø'øon ja israelit jaa'y y'ijty tpaawidetti ja nwindson'ajtim Jesús, jøts ja ttuku'oogiwya'andi ku dø'øon ja jade'en y'adi'ich poo'kxin xøøw. ¹⁷ Yide'ents nwindson'ajtim Jesús ja ñimaajyidøø:

—Yam paat øts idø'øon ndeety tyuñ, paty øts idø'øon nayide'en nduñ.

¹⁸ Yø'øts idø'øon ja israelit jaa'y maši tyuku'oogiwya'andip ja nwindson'ajtim Jesús. Kidi nugo ja kutujkixpi ja kyamø'ijxpy ku ja poo'kxin xøøw, pø nayide'enxi ja ñabyiktä'agy sam ja Dios, ku ja wya'añ jøts ku Dios ja tyimdyeedy.

Jade'en ja Dios Teety ja kyutujk tmø'øy ja Dios U'nk

¹⁹ Winets ja nwindson'ajtim Jesús ja ñimaajyidøø:

—Janch øts idø'øon nwa'añ jøts ku Dios U'nk ka' ti ttu'unt kyø'øm kutujkøjxp. Ja tyeety ja pyaduujnip yja' pøni sa ja kø'øm tnatjstuni. Tuki'iyi pøni ti tyumpy ja Dios Teety, nay ja'ats tyumpy ja Dios U'nk. ²⁰ Pø yjantymchøjkpyxi ja Dios Teety ja y'U'nk, jøts ja tuki'iyi ttuk'ixy pøni ti jaty ja kø'øm tyumpy. Jøts yjaaktyimdyuk'ejx'adø'øtspnim ja' ja myøjpi ja y'øybi, midu meets ñigyumaap mjawidip. ²¹ Kumi nayide'en sam ja Dios Teety tyikjupkyiky ja oo'kpi jadigojk, nayide'ents ja Dios U'nk tyaky ja juky'ajtin pøni pøn ja tyamidsøjkpy. ²² Jøts ka'ap Dios Teety tpayø'øy pøn, ja Dios U'nk ja tøn ttaguwanu jøts ja' ja tøn tmø'øy ja møk'ajtin jøts ja pyayø'øty, ²³ ja'agøjxp nayide'en ja windsø'jkin yikmo'ot sam ja Dios Teedyin. Pøn tkamø'jpiaktakp ja Dios U'nk, nay ja Dios Teety ja kyamø'jpiaktakp pøn tkajxp ja Dios U'nk.

²⁴ Tyiiby yjanchpi øts idø'øon nwa'añ: Pøni pøn øts ngajpxy n'ayuujk xyikmø'jyiyip sa jaty ø nwa'añ, jøts ku ja tjanchjawi pøn ø xkajxp, pyaatp ja xemikøjxp ja kunuu'kxy'ajtin; jøts ka'ap ja yiktaguwanit jøts ja y'ayo'ot, tøn ja ttanaxy ja o'jkin jøts ja tpaaty ja kunuu'kxy juky'ajtin ja kunuu'kxy tsinaa'yin. ²⁵ Janch øts idø'øon nwa'añ, jøts ku ixyam y'horipaaty ku ja jaa'y tmadojdidit ja Dios U'nk kyajpxy pøn jaty tkajanchja'widipnim; jøts kuts tmimado'odit, pyaattips ja kunuu'kxy juky'ajtin ja'adi. ²⁶ Ja ku Dios Teety tjagyepy ja møk'ajtin jøts ja kø'øm tyaky ja'abi juky'ajtin, jøts nayi tøn møk'ajtin ja tmø'øy ja y'U'nk jøts ja tyakt nay ja'abi juky'ajtin. ²⁷ Jøts tøn ja tkutujkmø'øy jøts tiidyu'unin jøts payø'øyin ja ttu'unt, ja'agøjxp ku ja naxwii'ñit jaa'dy; tkudani. ²⁸ Kidits ya'at ñigyumaap xjawi, pø ja'atpxi dø'øon ja xøøw ja jumøjt ku ja jaa'y tmadojdidit Dios U'nk y'ayuujk pøn windigøy ejtnidip, ²⁹ jøts ja pyidsø'ømdit jap oo'kpi jutjøtpy. Pøn øy tøn y'atnaxwiiñ'aty, pidso'ømdipts ja' jøts ja tpaattit ja kunuu'kxy juky'ajtin; pønøts tøn kyanaxwiiñ'aty øy, jukpøkytipts ja nayide'en jøts ayo'on ja yiktaguwanidit.

Y'ejxi tyiyi sa Jesús kyutujk tjagyepy

³⁰ Niti nguidyimdyuñ ngø'ømwinmaa'ngyøjxp. Jade'en ø nduñ pøni sa nyik'ane'emy, jøts nima kyadigøy øts ja ndiidyu'unin, øts ja nbayø'øyin. Jøts niti nguidyimdyuñ ngø'ømdsojkingøjxp, ja' øts idø'øon ndumpy pøni sa tso'øky ja Dios Teety midu ø xkajxp. ³¹ Kuts ø kø'øm nnañitstigi'atit jøts ø kø'øm nnankmyø'jyiwya'aniyit pøni sa ø njawa'añ, ka'ap yø ti tiy'ajtin tjagyepy. ³² Jaaxi ja' pøn ø xnitstigi'ajtp, jøts øts ja xpudøki; jøts pøni sa ja wya'añ, nniija'wipts øts ja' jøts ku tiy janch ja wya'añ. ³³ Meetsxi ojts xiibyiky ja Juan, jøts tiy janch ja' sa ja wya'añ ku ja y'adsøy. ³⁴ Kidits ja'ajip ø nmøk'ajtpy øy pøn jaa'y ja tiy'ajtin tjagyky; jade'en'ampy øts idø'øon jade'en nwa'añ jøts mnitso'ok'ajtin xpaattit. ³⁵ Jade'en idø'øon ja Juan y'ijty sam jaj yjajyin, jøts meets yjaj ja waani tøn x'uktaxondakøjy. ³⁶ Njagyepyts øts tiy'ajtin jawani ka'pxy sam øts ja Juan ojts xkanigajpxyin. Tuki'iyi ti jaty ø ndumpy, nay ja' idø'øon yø' midu øts Dios Teety tøn xa'ane'emy jøts øts ja ndu'unt, yø'øts tyanigaxø'lkp jøts ku tyiyi yjanchi ku øts Dios Teety tøn xkexy. ³⁷ Nayi yajkpy ja Dios Teety tiy'ajtin nayide'en jøts ku øts ja xkexy, øy meets ja nijuuni xka'ijxñim, øy meets ja nijuuni xkamadøynim. ³⁸ Jade'ents ja y'øgyajpxy ja y'ø'y'ayuujk ka' xja'gyukidinim, ja'agøjxp ku ja ka' xjanchjawidi pøn ja Dios Teety tøn tkexy. ³⁹ Janch ni'ejxi nibaadi meets Dios kyajpxy x'ixpøjkjy, kumi jap meets ja xtyimyjapaatwa'añ ja kunuu'kxy juky'ajtin midu xemikøjxp; jøts øts Dios kyajpxy jap xnimadya'aky. ⁴⁰ Jøts meets ka' xpabøkwa'añ ku njadukpaatwa'andi yø'øbi juky'ajtin.

⁴¹ 'Ka' øts naxwii'ñit jaa'y y'agujkwindsø'jkin ngupøkiyi. ⁴² Jøts njaaktyimñiija'winip meets jøts ku meets Dios ka' xtsøky. ⁴³ Ja Dios Teety ø ngudanaapy ku ø nniñi, jøts meets

xkagupiky; kuts mye'ent jadu'uk kyø'ømdsojkingøjxp, mgupøkpts meets ja ne'egi. ⁴⁴ ¿Ma meets ja janchja'win xmøøt'ajtnit, kumi mnagyupøjkkip meets ja windsø'jkin xem yam, jøts ka'ap ja tu'ukpi Dios yja' y'ixajyidi jøts ja xyiktu'undit? ⁴⁵ Jøts kidi mw'a'andi jøts ku mee nni'øønit jam Dios Teety wyingujk; ja Moisés ja' mee kø'øm mni'øø'niyip, pøn mee møk mjøp'ijxpy. ⁴⁶ Kuk meets ja jeexyip xjanchjawi sa wya'añ ja Moisés, nayi tøts meets jeexyip nayide'en xjanchjawi, pø ja'axi ja Moisés ojts tjaja' jøts øts ja xnigajpxy. ⁴⁷ Pøni ka'ats ja xjanchjawidi mididi ja yjaay, ¿mats meets ja xjanchja'winit mididi mee ndukmadøøpy?

6

Ku ja Jesús tyikaay ja nimagoxk milbi jaa'y

¹ Xjats ku dø'øn ja wyinaty jade'en tø yjaty, winets ja nwindson'ajtim Jesús ojts ñijxxy jam Galileit mejy pya'am, jam jaduktamajñ. Nay yø'øbi mejy idø'øn yiktejp Tiberias. ² Jøts may jaa'y ja jam ojts myøødiyi, kumi tø ja wyinaty yik'ixy ja myilagri'ajtin ku ja tyiktsø'øky ja pa'amjaa'y. ³ Jøts ja nwindson'ajtim Jesús pyatøjkijy'iñ mā kojpk jam, jøts ja jam tmøøt'ixaajky ja pyabøjkpitøjk. ⁴ Pyaatwanipts wyinaty ja paski xøøw mididi ja israelit jaa'y xyø'ajttip. (Ja' xøøw yja'myajtstip sam ojts y'awa'atpidsømdi jam Egipto y'etjotp.) ⁵ Jøts ku nwindson'ajtim Jesús ojts t'ixy jøts ku may jaa'y ja pyamiñiyi, winets ja tniimaay ja pyabøjkpi Felipe:

—¿Mamts inet jadine'en njuu'yindit ja kaaky ja jii'kxy jøts yø jaa'y niduki'iyi kya'adyit?

⁶ Jade'en'ampy ja jade'en wya'añ jøts ja t'uk'ijxy sa ja Felipe yjatyimy'ukwa'ant; jøts kumi Jesús, ñija'wipts ja kø'øm pøni sa dø'øn ja ttu'unt. ⁷ Xjats ja Felipe ja y'adsoøjøø:

—Ku tsapkaaky majtsk magø'pxy denario juyin, niwine'en ja kyidyimñibaadit øyik pøn wine'enin yiin waan tjaaja'adyit.

⁸ Winets ja pyabøjkpi jadu'uk wya'añ pøn Andrés'ajtp, ja Simón Pedro y'uch:

⁹ —Xyadam tu'uk mutsk mixyu'nk, magoxk cebadi tsapkaaky tmøødi jøts ajkxu'nk majtsk. ¿Ti windem yø mayjaa'y yø ndapaajtnam?

¹⁰ Xjats ja nwindson'ajtim Jesús wya'añ:

—Nøjmididi niduki'iyi yø jaa'y jøts wan t'ixa'akti.

Janch miyjojt idø'øn jam ja et, jøts ja yaa'dyøjk nimagoxk milin y'ixaktøø. Nika'ap ja tø'øxyøjk yikmachøy møøt ja y'u'nk y'una'jk. ¹¹ Winets ja nwindson'ajtim Jesús tniyajiyi'iñ ja tsapkaaky, jøts ku ja ojts jawyeen ttukmøjawi ttukunuu'kxyjawi ja Dios Teety, jøts ja ojts tmøøñim ja pyabøjkpitøjk. Ja'ats ja ojts tyikwa'lxkti, jøts ja ojts tmo'odi niduki'iyi ja jaa'y pøn jam wyinaty tø y'ixa'akti. Nayide'en ja ojts tyikwa'lxkti ja ajkx, jøts ja ojts tmøøgyøxti wine'enin ja kø'øm ttsokti. ¹² Jøts ku y'abajtidøø kyujxidøø, jøts ja nwindson'ajtim Jesús tniimaay ja pyabøjkpitøjk:

—Pøkmukti tuki'iyi yø abu'xk mididi jaty tø wyindañ, jøts kidi nugo ti wyindigøy.

¹³ Winets ja tøkmuktøø, jøts ja makmajtsk kach ujts t'abøjkidyøø ja kaaky abu'xkunaj'k, mididi wyinaty tø wyindañ ja magoxkpit cebadi tsapkaaky. ¹⁴ Xjats ja jaa'y wyandøø ku ja t'ejxtøø jøts ku ja nwindson'ajtim Jesús jade'en wyinaty tø ttuñ ja milagri'ajtin:

—Janch yø' tam idø'øn Dios kyugajpxy'ajtpy pøn yiktejp me'emp ya naxwiiñ.

¹⁵ Jøts kumi yja'wiyi'iñts ja nwindson'ajtim Jesús, jøts ku ja jaa'y ja wyinaty aguwan i yiknøjkxwa'añi, jøts ja yiktøkiwya'añi møj windsøn, winets ja ojts nadyu'uk yjiwa'aky jøts ja ojts ñijxxy jam kojpkøjxp.

Ku ja Jesús ojts yø'øy jam mejwyingøjxp

¹⁶ Xjats ku ja et wyinaty tø kyoodsniñi, winets ja nwindson'ajtim Jesús pyabøjkpitøjk kyidaktøø jam mejy agø'øm. ¹⁷ Jamts ja ojts tøkidi barkijøtp, jøts ja ojts ttanaxwa'andi ja mejy, jam idø'øn ja nyøjkxti Capernaum. Jøts janch xaachkootsni dø'øn, jøts ka'animts wyinaty ja nwindson'ajtim Jesús wyimbejtni. ¹⁸ Winets janch møk pyojpinaxwa'knøø, janch jadi'iñi ja nøø pyidø'kni. ¹⁹ Jøts ku dø'øn ja jam wyinaty ñaxti, magoxk uk tudujk mil xajkin tø yø'øñidi, winets ja t'ejxpattøø ja nwindson'ajtim Jesús jøts ku jam wingon ja barki tniimiñ. Yø'øpy ja nøø wingøjxp, jøts ja jyantyimchø'jkidøø. ²⁰ Yide'ents ja ñimaajyidøø:

—jØts idø'øn, kidi mdsø'øgidi!

²¹ Xjats ja yjotkukidøø, jøts ja ejtni xoni tyiktøjkidøø jap barkijøtpy, jøts ja pojin ojts yja'atti mā dø'øn ja wyinaty ñøjkxti.

Ku ja Jesús ja mayjaa'y ojts y'ixa'ayi

²² Jøts ku kyimjabom'ajty, jøts ja jaa'y pøn jam wyinaty tø tyandi jam mejy'am, jøts ja ojts tnijawidi jøts kudam ja nwindson'ajtim pyabøjkpitøjk wyinaty tø cho'onidi, jøts ku ja barki ja wyinaty tø ttanøjkxti mididi jam wyinaty tu'ugyi, jøts ku nwindson'ajtim Jesús ja nika'ap tmøødiyøø. ²³ Jøtsnim ojts yja'atti wenkpi barki mididi jam tso'ondip mā ja kajp jam txøøwi Tiberias, jam wingon mā ja jaa'y jam wyinaty ja tsapkaaky tø yikmo'odi, ku ja nwindson'ajtim wyinaty jawyeen tø ttukmøjawi tø ttukunuu'kxyjawi ja Dios Teety. ²⁴ Xjats

ku ja jaa'y t'ejxtøø jøts ku ja nwindson'ajtim Jesús jam ka'ap pøn, jøts ni ja pyabøjkpitøjk jam kya'etti, winets ja ttatøjkidøø ja barki midu jam wyinaty tø yja'atti, jøts ja ojts ñøjkxti jøts ja t'ats'ixa'awa'andi jam Capernaum.

Ja Jesús amuum xyikjujky'ajtim

²⁵ Jøts ku ja ojts yja'atti jam mejy agøøom, jøts ja ojts tpaatti ja nwindson'ajtim Jesús, jøts ttiibyøjktøø:

—Windsøn, ¿windii mja'aty ya?

²⁶ Jøts nwindson'ajtim Jesús ja ñimaajyidøø:

—Janch øts idø'øn nwa'añ, jøts ku meets ja'agøjxp x'ixa'ay ku mee ku'uxyi ojts mgay, jøts nigidi meets xja'gyukidi tigøjxp øts ojts ja milagri'ajtin nduñ. ²⁷ Køjxp najxp kaaky jii'kxy y'ity, jøts kidi ja'abi xnidundi. Ja' ne'egi mnidu'undip midu xemikøjxp jajkp midu mmo'ojidip ja kunuu'kxy jujky'ajtin. Yø'øbi kaaky yø'øbi jii'kxy øts idø'øn nyajkpy, pø øtsxi ja naxwii'ñit jaa'dyi ngudanaapy.

²⁸ Winets ja jaa'y tyiktøøðøø jøts ja tnimaadyøø ja nwindson'ajtim:

—¿Tits øøts idø'øn ndu'ump jøts ja yiktu'unt pøni midu dø'øn ja Dios chøjkpy jøts øøts ja ndu'unt?

²⁹ Jøts nwindson'ajtim Jesús ja y'adsøojidøø:

—Midi mdu'undip, ja' Dios chøjkpy jøts ja xjanchjawidit pøn ja tøkxy.

³⁰ Jøts ja tjaaktyimdyiibyøjktøø, yide'en tnimaadyøø ja nwindson'ajtim Jesús:

—¿Ti ejxa'ants mbakta'akp midu øø n'ejxp jøts myikjanchjawit? ¿Ti dø'øn ndu'ump? ¿Ti dø'øn myik'øyp? ³¹ Ojtsxi adøm ja n'aptøjk tjøø'kxti ja jii'kxy jam abak etjotp sam ja Dios kyajpxy wya'añin ku ja ñimy: “Ojts Dios ja tsapkaaky ja tyukayidi midu tso'omp tsajpjøtpy.”

³² Winets ja nwindson'ajtim Jesús ja ojts yide'en y'adsøoyidi:

—Janch øts idø'øn nwa'añ ku mee nnøjmi: Jøts kidi ja Moisésip ja', kidi ja'ajip ja ojts myø'oyidi ja tsapkaaky midu tso'omp jap tsajpjøtpy, pø ja Dios Teetyxi ja' pøn tyajkp tyimya'abi tsapkaaky midu tso'omp tsajpjøtpy. ³³ Ja tsapkaaky midu Dios yajkpy, ja' idø'øn tøk yida'aky jap tsajpjøtpy. Ja'ats yajkpy ja kunuu'kxy jujky'ajtin pøn jaty ya naxwii'ñit ajttip, pøn ya yjanchja'widip.

³⁴ Winets ja tnimaadyøø ja nwindson'ajtim:

—Teety, møøy'ejtik øøts yø'øbi tsapkaaky.

³⁵ Jøts nwindson'ajtim Jesús ja ojts ñii'mxyidi:

—Øts idø'øn ja' sam ja tsapkaaky midu tmøøpy ja jaa'y ja kunuu'kxy jujky'ajtin. Pøni pøn ø xnimemp, pøn ø xpabøkp, nijuuni yuuj xøøw ja tka'ext; pøni pøn ø xjanchja'wip, nijuuni tøødsi ja tkagupøkt. ³⁶ Jade'ents sam tøn nnøjmidi, ka' mee xjanchjawi øy mee tøk xja'ixy. ³⁷ Niduki'iyi øts ja xnimendi pøn øts ja Dios Teety xagøðøjkp; jøts ja'adi pøn øts idø'øn jade'en xnimendip, ka' øts ja mibaat ngajxpdisimy. ³⁸ Kaja'ajip øts jap tsajpjøtpy tøn nidsøøn jøts øts ja ngøømwinmaa'ñi nyiktu'unt, pø ja' Dios Teetyxi øts ja yja' nduujnip pøn ø xkajxp. ³⁹ Jøts ja' idø'øn ja chøjkpy jøts ø ni tu'ugin nga'ejxigø'øty pøn jaty øts ja tøk xagøðøki, jøts øts ja nyikjujkyøktit ku wyinaty ja naxwii'ñit kyøjxnit. ⁴⁰ Jøts nay ja' ja chøjkpy jøts niduki'iyi tpaattit ja jujky'ajtin midu xemikøjxp pøni pøn t'ejxtip tnija'widip, pønts tpabøktip ja Dios Unk, jøts øts ja ñiyikjujkyøktit ku naxwii'ñit kyøxt.

⁴¹ Winets ja israelit jaa'y tyabagajpxinaxwa'akti ja nwindson'ajtim Jesús ku dø'øn ja wya'añ: “Øts idø'øn ja', ja tsapkaaky midu kidakp jap tsajpjøtpy.” ⁴² Jøts wyandøø:

—¿Kidi ja Jesúsip yø' pøn Jóse myajnk'ajtpy? Pø nnija'wimts adøm tyeety tyaak yø'. ¿Sudso yø jade'en yø'añ jøts ku yø tsajpjøtpy kyida'aky?

⁴³ Xjats ja nwindson'ajtim Jesús ja tnimaay:

—Majststuttu yø pagajpxk. ⁴⁴ Ka'ap øts pøn nugo ajawi xtyimñimiñ pøni ka'ap øts Dios Teety ja kø'øm xagøðøki pøn ø xkajxp; jøts øts ja jaa'y nyikjujkyøktit ku wyinaty ja naxwii'ñit kyixy. ⁴⁵ Yide'en ja Dios kyugajpxy ñøky wya'añin: “Dios ja niduki'iyi yik'ixpøkidip.” Jade'ents øts ja xnimendi pøn jaty ja Dios Teety y'ixpøjkin tmadojidip, pøn jaty ja tnija'widip.

⁴⁶ Ka'axi pøn t'ixy ja Dios Teety; pø ja'ayixi ja nadyu'ugyi t'ejxp pøn nay jam tso'omp ma Dios. ⁴⁷ Jøts tyiibyidi øts idø'øn nwa'añ jøts mee nnøjmi, pøni pøn ø xjanchja'wip, ja'ats idø'øn tpatp ja tsinaa'yin midu xemikøjxp. ⁴⁸ Øts idø'øn ja' sam ja tsapkaaky. Øts nyajkpy ja kunuu'kxy tsinaa'yin ja kunuu'kxy jujky'ajtin. ⁴⁹ Ojtsxi ja m'aptøjk tkaydi ja tsapkaaky jam abak etjotp, jøts ja jade'enbaat y'o'jkojxtøø niduki'iyi; ⁵⁰ ja tsapkaakys midu ø ndijpy ja tsajpjøtpy kidakp, jøts ku ja pøn tka'adyit, ka'ats ja y'anmija'win wyindigø'ødyit. ⁵¹ Øts idø'øn ja kø'øm yø'øbi tsapkaaky midu tøk yida'aky jap tsajpjøtpy; jøts ku pøn tka'aty yø'øbi tsapkaaky, xemikøjxp ja yjujky'att. Ja'abi tsapkaaky øts idø'øn ñamyayi nyakp, ku øts ja nne'lx ku øts ja nni'jpy ndagøømøoyit ja naxwii'ñit jaa'y jøts tpaattit ja nitsø'ok'ajtin.

⁵² Winets ja israelit jaa'y agøømyi tkajpxy'ajtpinibøjkidyøø, jøts ja ñawya'añidi:

—¿Sudso ñe'kx sudso ñii'jpy yø xmøøwya'añin jøts ja nga'ayin njøø'lxin tsapkaagyin?

⁵³ Winets ja nwindson'ajtim Jesús ja ojts ñii'mxyidi:

—Ots idø'on wamp, põni ka' ots nne'kx xjøø'kxidi nni'jpy x'uukti, ka'ats ja nitsoojkin xpaattit. ⁵⁴ Pøni põn nne'kx xjøø'kxip nni'jpy x'uukip, ja'ats ja kunuu'kx jujky'ajtin tpaattip; øts nyikjujkyøktip ja' ku na'xwii'ñit kyøxt. ⁵⁵ Kumi jade'en'ampy ja mok'ajtin xjagyapitit øts nne'kxkøjxyp nni'jpykøjxyp. ⁵⁶ Pøni põn øts nne'kx xjøø'kxip nni'jpy x'uukip, xemikøjxyp øts nmøøtt n'ett. ⁵⁷ Ja Dios Teety põn ø xkajxyp, ja' tmoøt'ajtp ja jujky'ajtin, ja'agøjxyp øts njujky'aty; jøts nayide'en põn øts nne'kx nni'jpy xjøø'kxip, nay øts køjxpxi y'etti. ⁵⁸ Ja'abi tsapkaaky øts idø'on nnigajpxyp midi kidakp jap tsajpjøtpy. Ka'ap yø ñayide'eni sam ja tsapkaaky midi meets ja m'aptøjk ojts tkaydi, jødsyim ja ojts niduki'iyi yjadyimyookti; põnts tkaapy yø'øbi tsapkaaky midi ø ndijpy, pyaapts ja jujky'ajtin ja' xemikøjxyp.

⁵⁹ Jam idø'on ja nwindson'ajtim Jesús yø yjade'embixpøjkin tyajky ma ja jaa'y ñamyukyidi tsapøjkjotp, jam Capernaumit kajpkøjxyp.

Ya'at ayuujk xuknija'wimp ja øchinaa'yin midi xemikøjxyp

⁶⁰ Kuts ja pyabøjkpitøjk jade'en tmadowdi ja xpojkin põn jam wyinaty tpawidejttip ja nwindson'ajtim Jesús, jøts ja wyandøø:

—Ku yø jade'en wya'añ, janch tsep yø' jøts yø yikupøkt; ¿pøn yø jade'en tijy ukmøjkpitø'akip?

⁶¹ Xjats ja nwindson'ajtim Jesús tjä'wiyi'ñ, jøts ku ja jade'en tjanch'ayoji ku ja wyinaty jade'en tø wya'añ, winets ja tyiktiiy:

—¿Yø' m'ayoojidip? ⁶² ¿Sa mdejtitt winets jøts ku ø nbatojkinit nay jap ma øts jap ijty ndsoøni? ⁶³ Ja annija'win ja' idø'on jujky'ajtp; ¿ti yø ne'kx?, ka'ap yø ti wya'añ. Jøts ti jaty ø tø ngajpxy, yø' idø'on ja Dios tyiy'ajtin'ajtpy, jøts yø' idø'on yikjujky'ajtp xemikøjxyp. ⁶⁴ Jøts ja meets ixa winaagin põn yø tkajanchja'wip.

Tø dø'on ja nwindson'ajtim Jesús ja wyinaty tnija'wiñi põn jaty ja'adi põn tka-janchja'widip, jøts ja' põn ja køyakiyip. ⁶⁵ Jøts ja yide'en yjaakwaañ:

—Ja'agøjxyp meets jade'en nnøjmi jøts ku ø ka'ap põn nugo ajawi xniimiñ, põni ka'ap Dios Teety ja kø'øm xagidøy.

⁶⁶ Winets may jaa'y myajsttuujtiniyi ja nwindson'ajtim Jesús, ka'ap ja t'ukmøøtwidejtnidi.

⁶⁷ Xjats ja nwindson'ajtim Jesús ojts tyiktiiy jøts ojts tnøjmi ja ñimakmajtskpi jaa'y põn ja pyabøjkpitø'ajtpy:

—¿Mnøjkxwamip meets nayide'en?

⁶⁸ Jøts ja Simón Pedro ja ojts yide'en y'adsøyi:

—¿Pønimts øø teety njaaktyimñinøjkxyp? Tum ja'ats me mgajpxyp midi xemikøjxyp yikjujky'ajtp. ⁶⁹ Tøts øøts yø njanchja'wiñi jøts nnija'wip øøts jøts ku me Cristo, ja Dios U'nk, midi jujky midi kunuu'kxy.

⁷⁰ Winets ja nwindson'ajtim Jesús t'adsøøy:

—¿Ti kidi mee tø nwi'ixy nimakmajtsk? Ixats mee nidu'ugin miku'aty.

⁷¹ Ku dø'on ja jade'en wya'añ ja nwindson'ajtim Jesús, ja Judas Iscariote dø'on ja jade'en tyijpy põn ja Simón myajnkpi, pø ja Judasxi ja wyinaty køyakwajnip, øy idø'on ja nimakmajtsk møøt yjaka'pxy ja pyabøjkpitøjk.

7

Ka'ap ja Jesús ja myigu'uk yjanchjawi

¹ Xjats ku dø'on ja jade'en wyinaty tø y'ukjaty, jøts ja nwindson'ajtim Jesús jam ja wyinaty wyidity Galileit etjotp. Judeit etjotp idø'on kyawidetwa'añ ku ja ja'it jaa'y jam wyinaty yik'ookwa'añiyi. ² Jøts kumi ja xøøwts wyinaty tymbyatpy midi ja israelit jaa'y tyundip ku ja tyik'øyidi ja waxnaky, nayide'en sam ojts y'etti y'apteety jam abak etjotp, ³ winets idø'on ja nwindson'ajtim Jesús ja myigu'uktøjk ñimaajjyøø:

—Ka'ap ya mda'ant; jam mnøjkxt Judea, jøts ja mbabøjkpitøjk nayide'en jam m'ejxmiyit sa jaty mduñ. ⁴ Ku põn tsoky jøts yiknijawit, ka'ap ja ti amaa'tsk ttuñ. Ejx mets yø jade'en xuñ. Tunts mets yø jade'en øy madsoo, jøts mets yø øy põn xuk'ext.

⁵ Niwine'eninxi dø'on ja myigu'ukti ja kyajanchjawi. ⁶ Xjats ja nwindson'ajtim Jesús ja tniimaay:

—Ka'anin øts ndiempi tpaaty jøts ø nnøjkxt; jøts meets, øy meets øy juuni mnøjkxt. ⁷ Ka' meets ya põn mmi'ekiyyi; øts, yikmi'ajkip øts ja'agøjxyp ku øts ja tuki'iyi nnigajpxy sa jaty kya'øyjaa'y'atti. ⁸ Nøjkxts mee m'atsxøøaaty; ka'ap ø nnøjkxt, kumi ka'anin øts njujky'ajtin pya'at'atynim.

⁹ Kuts ja jade'en wya'añ, jøts ja jamiy Galilea tyaañ.

Ku ja Jesús ojts ñijky xø'ajtpi

¹⁰ Xjats ku ja myigu'uk wyinaty tø choondi, jøts ja nwindson'ajtim Jesús nayide'en ñijky ma wyinaty jam ja xøøw, øy idø'on ja ka'ap yjadyimñanky'ijxyi jam mayjaa'yjotp. Yu'uch

idø'øn ja wyidity. ¹¹ Jøts idø'øn ja israelit jaa'y ja jyadyimy'ixa'ayi ku ja xøøw tyuñi, yide'en idø'øn ja wya'andi:

—¿Ma net ja jaa'y mido Jesús nadyejip?

¹² Jøts jam mayjaa'yjotp jam ja may pøn ja nimadyajkiyip. Pømbi jam nømp: “Øy jaa'yxi ja””; jøts jadu'uk wyamidi: “Ka'ap ja y'øyyjaa'y, nugo jaa'y ja twin'hiñ.”

¹³ Jøts ka'ap pøn nugo ajawi møk tñimadya'akti ja agøjxp ku ja israelit jaa'y wyindsøn jamdi, ja' ja chø'jkidip.

¹⁴ Kujkwa'kxnip ja xøøw wyinaty ku ja nwindson'ajtim Jesús tyøjkiyi'ñ jam tsaptøjkjotp, jøts ja jam yik'ixpøjk'okwaañ. ¹⁵ Jøts idø'øn ja israelit jaa'y ja ñgyumaap tyimyjawidi, yide'en ja wya'andi:

—¿Sudso yø jadine'en tjaty, jøts ka'ats y'ixpiky?

¹⁶ Xjats ja nwindson'ajtim Jesús t'adsøøy:

—Yø ixpøjkin ka' øts yø nja'aji, ja' yø' yja' pøn ø xkajxp. ¹⁷ Pøni jam pøngapøn, pøn jade'en ja tsojkin tjagyajp jøts tpadunwa'añ sa Dios ttsøkyin, ñijawipts ja' pøni kidi jamip øts n'ixpøjkin chøøñ ma Dios, uk kidi ngø'øm ja' øts jade'en ngajpxy. ¹⁸ Pøn kyø'øm ja' nugo tkajpxp, jade'en'ampy ja jade'en ttuñ jøts ja jaa'y ja yikmøjtøkiyit; pøni pøn ttsojpk jøts tyikmøjtøkit ja Dios Teety yja' mido ja tø tkexy, tiy janch ja wya'añ, ka'ap ja tyaayi.

¹⁹ ¿Ti kidi ja yjanchi jøts ku meets ja Moisés øjts mmø'øyi ja kutujk? Jøts ka'ats niwine'enin xpadundi ja kutujk. ¿Tigøjxp ku xyik'ookwa'andi øts?

²⁰ Jøts ja mayjaa'y ja y'adsooyi:

—Pø tø mets miku' mdatøkiyi; ¿pøn idø'øn myik'ookwajnip?

²¹ Jøts ja nwindson'ajtim Jesús ja tñimaay:

—Tyimyjia' idø'øn ku tuk'øjkyi øjts jade'en n'adi'ich yam yjapoo'kxinxøøwi, ja'ats mee mga'øjja'wip. ²² Øjts meets ja Moisés mdanigutujk'aty jøts meets mutsk una'jk ja chuujku'nk xjøptsuktujtit mido yiktejp circuncisión (ø y tyeety'aptøjk ja tjayikts'o'onda'aky, pø nigidi ja'ajipxi ja kø'øm tyiktso'ondakp), ¿tigøjxp meets ja mutsk mixyuna'jk xuujni ja circuncisión wan tjapoo'kxinxøøwi? ²³ Jabi mduujnipts meets ja mutsk mixyuna'jk ja circuncisión ø y poo'kxinxøøwi, ¿ti kuts øts ja xami'ambiky ku øts ja jaa'y amuum tø nyikts'øky ku poo'kxin xøøw? ²⁴ Kidi meets ø y sagasa' mbayø'øy pøni sa ø y tigati x'ejxti. Ku mbayø'øwya'andit, yikxon xu'undit tiy'ajtingøjxp.

Ku ja Jesús tñigajpxy pøn ja kajxip

²⁵ Xjats winaagin pøn wyinaty tø choondi jam Jerusalén, jøts ñay'amidoojiñaxwa'jkidøø:

—¿Kidi ja'ajip yø' mido yik'ixaapy, mido yik'ookwandip? ²⁶ Ixats yø kyajpxy mayjaa'y agujky, mats yø pøn sa kyanima'añiyi. ¿Wan ndejin kudunktøjk tjantyimyjanchjawidi yø'øbi jaa'y jøts ku yø Cristo? ²⁷ Jabi wa'atsxi adøm yø ñnija'wam ma yø chøøñ; kuts ja Cristo mye'ent, ka'ats ja yiknijawit pøni ma ja choont.

²⁸ Ja'ayi ja nwindson'ajtim Jesús ja jade'en øjts tmadøy, pø ixamxi ja wyinaty tsaptøjkjotp yik'ixpiky, xjats ja møk wya'añ:

—¡Aaa wa'ats tam meets x'ijxy'aty, jøts mnija'wip tam meets yø' pøni ma ø ndsøøñ! Kidits ngø'ømwinmaa'ngyøjpxipxi ø nmiñ, ja' ø xkajxp jøts øts ja ngudanit mido dø'øn tyimyjanch'ajtp, mido mee mga'ijxy'ajtpy. ²⁹ Wa'ats øts ja n'ijxy'aty kumi jam ø ndsøøñ, ja'ats ø xkajxp.

³⁰ Winets ja øjts tjadyimyjia'ukmatswa'andi jøts ja tssu'umdit; nika'apts ja øjts pøn ñixajiyi kumi ka'anim ja wyinaty xyøga'pxy. ³¹ Jamts ja maydi pøn ja janchja'wiyøø, pøn wandip:

—Ku ja mye'ent ja Cristo, ¿ti milagri'ajtin ja jawaani yjaaktiyimdyu'unt, ti ti yø jaa'y yam kyatumpy?

Ku ja fariseotøjk t'ana'amdi ja chaptøjk jøts ja Jesús yikmatst

³² Xjats ja fariseotøjk tmadowdi sa jaty ja nwindson'ajtim Jesús ja jaa'y ñimadya'agyyi; winets ja t'ana'amdøø ja tsaptajk pøn tump jap tsaptøjkjotpy, jøts tyimykmatst ja nwindson'ajtim. Ja teetywindsøn idø'øn ja jade'en møøt y'adø'øtsti. ³³ Winets ja nwindson'ajtim Jesús wya'añ:

—Tyimyjawaani meets yam njaakwindsøøni, jøts øts ja n'awimbejtyinit pøn ø tø xkexy.

³⁴ Xjadyimyjia'ixa'ap meets, ka'ats mee ma xpaatt. ¿Ja ti ja meets jap mnøjkxt mats jap n'ett?

³⁵ Xjats ja israelit jaa'y agø'ømyi ñayiktøøbinaxwa'jkidøø:

—¿Ma dø'øn yø ñøjkxwa'añ, sudso dø'øn yø wya'añ jøts ku adøm yø nga'ukpaajtña'ant nima? ¿Wan yø ndejin jam tñinøjkxwa'añ ja israelit jaa'y pøn jadi'iñi tø yø'øwya'kxnidi, møøt tø ñamyidøjknidyidi ja griegit jaa'y? ¿Ja' ndejin yik'ixpøkwampy? ³⁶ ¿Ti dø'øn yø jade'en tyijpy ku yø jade'en tø xnima'ayin ku wya'añ: “Xjadyimyjia'ixa'ap meets, ka'ats mee ma xpaatt, ja ti ja meets jap mnøjkxt mats jap n'ett”?

Ja kunuu'kxy jujky'ajtin mido ja Jesús yajkpy

³⁷ Ja yjadu'ukpi xøøw midi ja xøøw tyamigugøjxinip, ja' idø'øn ja tyimy'ukmøjnaxnip, winets ja nwindson'ajtim Jesús wya'kukiyi'ñ, jøts ja møk'ampy wyaañ:

—Pøni pøn ja kunuu'kxy jujky'ajtim ttsojpk jade'en sam ndøøtsant, wants ø xnimiñ jøts ø nmo'ot. ³⁸ Pøni pøn ø xjanchja'widip, jade'ents ja yjattit sam wya'añ ja nøky jøts ku ja jam y'anmija'winjotp jade'en myu'ut ja nøø midi yikjujky'ajtp xemikøjxp.

³⁹ Jade'en idø'øn ja nwindson'ajtim Jesús tjatijy, pøni pøn ja janchja'wiyip, ja'ats ja Espíritu Santo pyaattip; ka'aním idø'øn ja Espíritu Santo wyinaty myiñ, kumi ka'aním ja nwindson'ajtim Jesús wyinaty tmimadaqixy ja ayo'on jøts chajpatt.

Ku ja jaa'y ojts ñawyanwa'kxniyidi ja nwindson'ajtim Jesús køjxp

⁴⁰ Xjats jam mayjaa'y agujkp winaagin wyandøø, ku ja jade'en ojts tmadowdi:

—Tyimyjanchja'adam idø'øn yø jaa'y ja Dios kyugajpxy midi idø'øn yik'awejxp.

⁴¹ Jøts jadu'uk wyamidi:

—Ja Cristo yø'.

Jøts wyenkpi wyamidi:

—¿Sudso ndejin ja Cristo jam kyaxø'økt Galilea? ⁴² Yide'ents jap nøkyjxpy jaabyety wya'añ jøts ku ja rey David ja' y'apjaa'y Cristo'atp, jøts ku ja jam choont Belén, nay jam ma ja David y'ijty kyugajpi.

⁴³ Xjats idø'øn ja jaa'y jade'en ñawyanwa'kxniyidi ja nwindson'ajtim Jesús køjxp. ⁴⁴ Jam winaagin pøn ja tjadyimy'ukmatswandøø, nika'apts jade'en pøn y'adijch.

Ku ja windsøndøjk ojts tkajanchjawidi ja Jesús y'ayuyik

⁴⁵ Jøts ja tsaptajktøjk ojts wyimbejtnidi ñøjkxnidi ma ja fariseotøjk jam wyinatyi møøt ja teetywindsøndøjkti, ja'ats ja ojts ñi'mxyidi:

—¿Tigøjxp ku tø xkayikmendi?

⁴⁶ Jøts ja tsaptajktøjk y'adsowdi:

—¿Ka'aním ma pøn jade'en kyajpxy sam yø jaa'y kyajpxyin!

⁴⁷ Winets ja fariseotøjk ja ñimaajyidøø:

—¿Meebaat nayide'en tø myikwin'øø'nidi? ⁴⁸ ¿Ti tø adøm winaagin ja nwindson'tukjanchjawidi, uk tø ja yjawi tu'ugin ja fariseit'tukpabøkti? ⁴⁹ Yø mayjaa'dyi pøn tkamøja'widip ja kutujkin, yø' kawindiy'ajttip ku ja tpabøkti.

⁵⁰ Ja Nicodemo pøn ja nwindson'ajtim Jesús ojts koots ñinijxxy, nay ja fariseit ja', ja'ats ja myigu'uk ojts tnøjmi:

⁵¹ —Jade'en sam adøm ja ngutujk tyikutujkyim, ka' pyaat'aty jøts adøm jaa'y ja ayo'on ndyimdyanigajpxkojin ku ja ka'aním nmadø'øyindi jawyeen pøni ti dø'øn ja tyumpy.

⁵² Jøts ja ojts yide'en yik'adsøy:

—¿Nayi Galileit jaa'y mets? Æpøk waani ja Dios kyajpxy jøts xnijawit jøts ku ni tu'uknim ja Dios kyugajpxy jam kyayiknijawinim Galilea.

Ja ka'ødyø'øxy

⁵³ Jøts ojts ñøjkxnidi ma jaty pøn tyøjk.

8

¹ Jøts ja nwindson'ajtim Jesús jam ja ojts ñijxxy Olivos kojpkøjxp, ² xjats ku yjajtaajky kyimjabom, winets ja ojts ñijxxy jam tsaptøjkjotp. Jøts ja jam øy pøn ñimejniyøø, winets ja y'ixaajky jøts ja yik'ixpøjktøjkii'ñ. ³ Jøts ja kajpxwejpitøjkti møøt ja fariseotøjkti, ja' ojts twaamendi tu'uk ja tø'øxyøjk pøn ja myigu'uk ñiyaa'y myøøt'ajtip. Jøts idø'øn ja jam ojts yikpikta'aky mayjaa'y agujkp pøn jaty jam wyinatyi, ⁴ jøts ja tnimaadyi ja nwindson'ajtim Jesús:

—Windsøn, jap ya'at tø'øxyøjk tø tyimyikubaadi ku ja myigu'uk ñiyaa'y tmøøt'ajti. ⁵ Yikutujkpy ja Moisés kyutujk jøts adøm yø'øbi tø'øxyøjk nga'tspa'oo'kint. ¿Sä me m'ukwa'añ?

⁶ Jade'en'ampy idø'øn ja ojts jade'en wya'andi jøts ja tkajpxy'ejxwa'andi, jøts ja jade'en tigati ttukpøky'atwa'andi. Winets ja nwindson'ajtim Jesús wyindaajky, jøts ja ojts ja kyøtsa'jx ttajaabyinaxwa'jky ja naajx. ⁷ Jøts kumi yiktiyøjkdøøts ja', winets ja kyookukiyi'ñ jøts ja tnimaay:

—Pøni jam pøn kapøkmyøøt, wan ja jawyeen tkonji'iky ja tsaa jøts ttaka'atst yø tø'øxyøjk.

⁸ Jøts ja nayide'eñim ñaxkoogojmi, ja naajx ja yjay'adichpy. ⁹ Jøts ku ja ojts jade'en tmadowdi, jøts ja yjanchnabyøkyjawi'ydøø, jøts ja ojts wya'kpidsoñnidi nidu'uk jaty. Ja møjaa'dyøjk jawyeen pidsøñnidøø; xjats ku ja wyinaty tø pyidsømgøxti, jøts ja nwindson'ajtim Jesús nadyu'uk tyaañ møøt ja tø'øxyøjk. ¹⁰ Winets ja nwindson'ajtim Jesús kyookukiyi'ñ jøts ojts t'ixy ku ka' pøn, ja tø'øxyøjky jap wyinaty, jøts ja tnimaay:

—¿Ma net ja'adi pøn mni'øø'niyidip? ¿Ka' pøn sä tø mduniyi?

¹¹ Jøts ja ñimaajyøø:

—Ka' windsøn'ajtim pøn.

Jøts nwindson'ajtim Jesús ja tnimaay:

—Ni øts mets sa ngatu'unt. Nøjkxni, kidi m'ukpojkipituni.

Ja Jesús xyikujajimp xyikudøø'kximp

¹² Xjats ja nwindson'ajtim Jesús ojts jadigojk tmigajpxy ja mayjaa'y, jøts ja tnimaay:

—Øts tu'uk tu'uk ja naxwii'ñit jaa'y nyikujajtaajkip nyikudøø'kxaajkip; pøni pønts ø xjotmay'ajtp, pøni pøn øts ja nja' xpabøjkip, ja'ats idø'on yikmo'op ja wejtin ja kajin jøts ja tyukpaadit ja kunuu'kxy jujky'ajtin, niijuuni ja wimbeets kugoots kyajattit.

¹³ Winets ja fariseotøjk ja ñimaajyøø:

—Kø'øm mets jam øy mnanktyiidyøkiyi, ka'ap yø mǎ tyuñ.

¹⁴ Jøts ja nwindson'ajtim Jesús ja t'adsøøy:

—Jade'en sa ø nwa'añ, tump yø'ø yø ø kø'øm nnanktyiidyøkiyi. Øts ja nniija'wip mǎ ø ndsøøñ jøts mǎ ø nnøjkxt. Meets, ka' xnijawidi pøni mǎ ø ndsøøñ uk pøni mǎ ø nnøjkxt. ¹⁵ Jade'en meets øy ti xpayø'ø y sam ja naxwii'ñit ja kyutujkin. Ka'ap øts øy pøn ti ndabayø'øy; ¹⁶ jøts kuts nbayø'ø y øts, tiy øts ja ndiidyu'unin nbikta'akt, kumi ka' ø nadyu'uk ndiidyu'unt, nayide'en øts ja møøt ndiidyu'unt ja nDeety pøn ø xkajxp. ¹⁷ Jade'en jap kyøxja'ayi jap nøkyjøtpy midi mee mgutujk'ajtpy, ku ja testigi'ajtpi namajtsk tum jade'en wya'andi, ja'ats idø'on yja' yikjanchjawidip. ¹⁸ Jade'ents øts yam kø'øm nañidestigi'ajtip, jøts jadu'uk ja nDeety pøn ø xkajxp, ja' ø xnidestigi'ajtp.

¹⁹ Winets ja nwindson'ajtim yiktiibyijky:

—ǎMǎ dø'øn ja mDeety?

Jøts ja nwindson'ajtim Jesús t'adsøøy:

—Meets, ka' mee xnijawi, jøts ni ja nDeety mee xkanija'wiyi; ku øts jeexyip xnijawidi, mnayinija'widipts meets jeexyip ja nDeety.

²⁰ Jade'en idø'on ja nwindson'ajtim Jesús wya'añ ku ja ixam wyinaty yik'ixpiky jam tsaptøjkjøtp, mǎ ja limunsi meeñ wyinaty ja ñigajuun. Nika'apts ja ojts pøn myachi, kumi ka'anim ja wyinaty xyøga'pxy.

Nømp ja Jesús: "Ka'ap meets jap mibaat mnijky pøni mǎ ø nnijky"

²¹ Jøts idø'on ja nwindson'ajtim Jesús tnimaagyojmi ja mayjaa'y:

—Nøjkxni øts, øy mee xja'ixa'at mi'ookpts meets yø mbøky; jap mǎ ø nnijky, ka'ap meets jap mibaat mnøjkxt.

²² Winets ja israelit jaa'y wyandøø:

—ǎWan yø ndejin ñankpya'ookwa'anisi, patyts yø wya'añ ku adøm jap nganøjkxin mǎ yø ñijky?

²³ Jøts nwindson'ajtim Jesús ja ñimaajyidøø:

—Meets, ya mee mdsøøñ, ya mee mgaxi'iky; øts, jam ø køjxp ndsøøñ. Ya mee mnaxwii'ñ'aty, øts ka'. ²⁴ Paty meets idø'on nnøjmi jøts ku mbøky xmi'ooktit; ku ka' xjanchjawidi pøni pøn øts, mmi'ooktipyims idø'on ja mbøky jade'en.

²⁵ Winets ja nwindson'ajtim Jesús yiktiibyijky:

—ǎPøn mets idø'on?

Jøts nwindson'ajtim Jesús t'adsøøy:

—Jaayim øts yø nnigajpxy ity ku nyik'ixpøjkjøtkiyi'ñ. ²⁶ May øts ja winmaa'ñ njagyepy midi ø ngajpxwampy, jøts mee nbayø'ø wya'añ nayide'en. Tiy'ajtingøjxp ja kyajpxy pøn ø xkajxp, jøts pøni sa ø nnøjmi ja naxwii'ñit jaa'y, jade'en øts idø'on ja tø nmadø y jøts ku ja jade'en wya'añ.

²⁷ Ka'apts ja tjä'gyukidi jøts kudam ja ja' yiknigajpxy ja Dios Teety. ²⁸ Ja'agøjxp ja ojts ñi'mxyidi:

—Ku meets jam kruskøjxp xpikta'akt, jaanimts meets x'ejxkapt jøts ku øts idø'on ja wyinaty sa tø nwa'añ, jøts ku ka' ja ngø'ømwinmaa'ñ nyikutuñ; ja'ayi øts idø'on ngajpxy midi øts ja nDeety tø xuknijawi. ²⁹ Pøn øts xkajxp, møøt øts ja n'ity; ka' øts ja nDeety nadyu'uk xmajststu'uty, pø tum ja'axi ø ndumpy midi ja tyajotkujk'ajtpy.

³⁰ Ku ja nwindson'ajtim Jesús jade'en ojts wya'añ, winets may jaa'y ja ojts yjanchjawiyi.

Ka' nduknaxa'amp, jaa ja Dios yja' jøts ja miku'yja'

³¹ Xjats ja nwindson'ajtim Jesús tnimaay ja israelit jaa'y pøn ja wyinaty tø yjanchjawiyi:

—Pøni mnadyamiyojxidip tu'ugyi sa ixa nnøjmidi, meetspits idø'on tiy xjantyim-byabøjkpi'atp; ³² winets ja tyiibyijyanchpi xnijawidit, jøts ja myik'awa'atpidsømidip.

³³ Jøts ja ojts yide'en t'adsowdi:

—Ja Abrahamxi øøts ndeety'amøjip, jøts ka'anims øy pøn windi xyikutuñ nugo ajawi. ǎSudsøts me mnimy jøts ku øø n'awa'atpidsø'ømt?

³⁴ Jøts ja nwindson'ajtim Jesús ja tnimaay:

—Janch øts idø'øn nwa'añ ku mee nnøjmi, niduki'iyi pøni pøn pøkyundip, ja pøky ja ñamyayi yja'bojknip. Pøkyatki'py ja ñamyayi y'ejtnidi. ³⁵ Tu'uk ja tumbi pøn yikøj'ømit'ajtnip, ka'ap ja nayide'en ja kutujk tjagyepy sam ja jaa'y ja y'u'nk y'una'jk tjagyepyin. ³⁶ Jade'ents øts ja Dios Teety x'U'nk'aty jøts ku mee nyik'awa'atpidsø'ømt, xemikøjxpts ja jade'en. ³⁷ Øy meets ja Abraham xja'aads i xjakojpki, xyik'ookwamppts meets nayide'en winaagin, ja'agøjpx ku meets ø n'ayuujk xkagupøjki pøni sa njawa'añ. ³⁸ Pø ja'ats ø ngajpxy midi øts nDeety tø xukjaty; jøts ku meets, pø ja'axi mee nayide'en mbadumpy midi meets mdeety mdani'ana'amip.

³⁹ Jøts ja ojts yik'adsøy:

—Ja Abraham øø ndeety'amøjip.

Yide'ents ja nwindson'ajtim Jesús ja ojts ñii'mxyidi:

—Ku meets jeexyip ja Abraham mjanch'u'nk'atyiyi mjanch'una'jk'atyiyi, nayide'en meets jeexyip mjaa'y'aty sam ja ojts yjaa'y'atyn. ⁴⁰ Ni jade'ents, o meets ja tyiiby yjanchpi tø njadukmadøy sam øts Dios Teety ja tø xjaduknijawin, ne'egi xyik'ookwamp meets. ðNi ja Abraham ojts jade'en kya'adi'ich sam meedsin! ⁴¹ Nayide'en mee m'adi'ich sam ja mdeety y'adi'ichin.

Winets ja wyandøø, jøts ja nwindson'ajtim Jesús yiknimaay:

—Ka'ats øøts jadi'iñi ngaxi'iky; ja Dios øø tu'ugyi nDios Teety'ajtpy.

⁴² Winets ja nwindson'ajtim Jesús ja tnimaay:

—Ku jeexyip ja Dios Teety xDios Teetyjawidi, xtsojpk meets jeexyip, pø jamxi ø ndsøñ ma ja Dios jam ku øts ixyam nyaa'aty. Kidi ngø'ømwinmaa'ñipxi ø nmimimpy, pø ja Diosxi ø xkajxp. ⁴³ ¿Tiku wine'enin mguidyimyja'gyukidi sa ø njawa'añ? Ka' xtyimyadoowajniidi ja ngajpxy ja n'ayuujk. ⁴⁴ Ja miku' ja' mee mdeety'ajtpy; ja' mee mgøj'ømit'ajtip jøts ja' mdunwandip ti jaty ja ñanktyunwajnip. Tso'onda'agyip ja miku' yikjaa'y'oo'knibøjkini. Nijuuni ja tkayiktuñ ja tyiiby ja yjanchpi, jøts nijuuni tiy janch kyakajpxy. Ku ja tyaa'y'aty, jade'eñi ja kyajpxy sayim idø'øn ja myiku'atyn, ja'agøjpx ku yjantymdyaa'i, jøts ja' idø'øn tniwindson'ajtp ja taay'ajtk ja win'øø'nk. ⁴⁵ Kuts øts yam tiy janch njawa'añ, ka'ats meets ø xmibiky. ⁴⁶ ¿Pøn jam winaagin ukwa'anwamp jøts ku øts pøky nmøødi? Kuts tiy janch nwa'añ, ¿tigøjpx ku ø ka' xjanchjawidi? ⁴⁷ Pøn Dios ja'ajtip, myadoowajnip ja' ja Dios y'ayuujk; jøts kumi ka'ats meets Dios mja'aty, patyts meets ja ka' xpatmadoowajni ja y'ayuujk.

Jaayim ja Cristo ku ja Abraham yja'ajty

⁴⁸ Xjats ja israelit jaa'y ja ojts ñii'mxyiyi:

—Tyimdyiyimxi øøts idø'øn njadyimyjawa'añ ku øø nnimy jøts ku me msamariitjaa'yi, jøts ku ja miku' tø mdatøkiyi.

⁴⁹ Jøts ja nwindson'ajtim Jesús ja ojts yide'en t'adsøy:

—Niwine'enin øts miku' xkadatøki. Ja' øts ja'ayi ndumpy jøts øts Dios Teety nwindso'øgi, ja' mee xkadamoj'ejpx. ⁵⁰ Ka'øtsip ngø'ømja' n'ixaapy, øyi ja yjaa'a'aji pøn øts nja' x'ixaajyip. Ja'ats tpayø'øpy pøn ødyump ka'ødyump. ⁵¹ Jøts janch øts idø'øn nwa'añ, pøni pøn tmøjpktaqp sa ø nwa'añ, nijuuni ja kya'ookitit kyawindigø'ødyit.

⁵² Winets ja israelit jaa'y ja y'adsøoyjøø:

—Tønims øøts inet yam ndyimyjanchjawinim jøts ku ja miku' tø mjanchtatøkiyi. Sa ja Abraham tø y'øøky møøt niduki'iyi ja Dios kyugajpxtyi, jøts me mwa'añ: "Pøni pøn tmøjpktaqp sa ø nwa'añ, nijuuni ja kya'ookitit kyawindigø'ødyit." ⁵³ ¿Ti me ndejin mjaaktyimdyajinajpxy jøts ku ka' myajada'aky øøts ja ndeety'amøj Abraham? Sa ja y'ø'jky jøts sa nayide'en y'oo'ktøø ja Dios kyugajpxy, ¿pønts mets idø'øn mdsaañadijyi?

⁵⁴ Jøts ja nwindson'ajtim Jesús ja t'adsøoy:

—Ku ø kø'øm nnankmyjøtøkiwya'anit, ka' ma tyuñ øts ja ngø'ømja'. Ja Dios Teetyts ja' ø xyikmøjtøjkip midi mdejtip jøts ku ja' xDiosidi. ⁵⁵ Meets, ka' meets ja xnijawidi. Øts, wa'ats øts ja nnijawi, jøts ku ø nwa'ant jøts ku øts ja ka'ap nnijawi, janchtyimdyaa'y øts idø'øn wyinaty nayide'en sam meedsin. Njanchtyimñija'wipøts øts ja' jøts nmimadøøpy øts ja' pøni sa ja wya'añ. ⁵⁶ Jøts ja Abraham, pøn meets idø'øn m'aadsidip mgugojidip, xaxondaajk øts ja' ku tnijaw'aty kuts nmenwa'añ ya naxwiñ; x'ejx øts ja' jøts janch øy tsuj ja ñajawiyi.

⁵⁷ Winets ja israelit jaa'y tnimaadyøø ja nwindson'ajtim Jesús:

—Ni kyaja'atynim ja mjumøjt wixijxmyajk, ¿jøts mjanch'uknimy jøts ku ja Abraham tø x'ixy?

⁵⁸ Xjats ja nwindson'ajtim Jesús t'adsøoy:

—Tiy janch idø'øn nwa'añ, jøts ku øts jaayim wyinatyni ku ja Abraham kyaxi'jky.

⁵⁹ Winets ja tnixajidi ja tsaa' jøts ja ttaka'atswa'andi ja nwindson'ajtim Jesús; nayu'jtsi ja', jøts ja ojts pyidsømni jam tsaptøjktøp, jam ja mayjaa'y ja ttanajxy, jøts ja ojts jade'en cho'oni.

9

Ku ja Jesús ojts tyikwin'ejxwa'kxy ja winap jaa'y

¹ Xjats ku ja nwindson'ajtim Jesús jam wyinaty ñaxy, winets ja ojts t'ixy tu'uk ja yaa'dyøjik pøn wyinaty winap, jade'en ja tymgye'exy. ² Jøts ja nwindson'ajtim Jesús ja pyabøjkipitøjik ñimaajiyiðø:

—Windsøn, ¿suso yø jaa'y jade'en winap tø kye'exy? ¿Jade'en idø'øn n'ukwa'ganint, ja tyeety idø'øn ndejin jantymbyøkmyøøtti, uk kyø'ømbøky idø'øn yø jade'en tuujnip?

³ Winets ja nwindson'ajtim Jesús ja ñimaajyiðøø:

—Kidi kyø'ømbøkyip yø jade'en kyuwantajtip, jøts nigidi ka'ap tyeety yø tpøkyi; jade'en'ampy idø'øn yø jade'en yjaty, jøts yø' ñikøjxp yiktuk'ejxtit øy pøn midy ja Dios tyu'ump. ⁴ Wants øts ja tyunk tjaaktyimdyuujni jaaktsojknim; jotmøn ø n'ukugoodsñit kuts ja wyinaty ja tyunk ngatungøjxi pøn ø xkajxp. ⁵ Pøni wine'enin ø njaaktsøøni ya naxwiin, njaaktyimdyu'umbyimts øts jade'en sam ja jaj kyujajy kyudii'kxy. Jade'en øts ja na'xwii'ñit jaa'y ñamyayi nyikujajtaagidit nyikudøø'kxaagidit.

⁶ Kuts idø'øn ja jade'en wyan'abajtiyi'ñ ja nwindson'ajtim Jesús, jøts ja ojts chujy tyiknaxkida'aky jam na'xkøjxp, jøts ja naajx ja yii'nim ojts ttamimo'otsyø'øyi ja chujy. Mo'ontsu'nk tyik'øyi'ñ, ja'ats ja ojts yiktawinjaaxy ja winap jaa'y. ⁷ Jøts ja tnimaay:

—Nøjx m'atsnawyimbujyi jam nømu'utjotp midy yiktejp Siloe —jade'en idø'øn ja Siloe y'ayukpidsimy: ja' pøn tø yikexy.

Xjats ja winap jaa'y jam ojts ñijky jøts ja ojts ñawyimbujyi, jøts ku dø'øn ja ojts wyimbijy, win'ejxnip ja'. ⁸ Winets ja jaa'dyi pøn ja jam myigujøøni myigudøjkip, jøts ja'adi pøn jaty ja wyinaty tø y'ijxyiyi jøts ku ja wyinapi, ja'ats idø'øn wandøø:

—¿Kidi ja'ajip yø' pøn ja y'ijty xumi'ixakp, pøn ja y'ijty xumilimuns'amidoop?

⁹ Jam winaagin wyandi:

—Janch ja' yø'.

Winaagin ja wyamidi:

—Ka'ap ja yø'øji, jantymñayide'en tam tyimy'ixy.

Kø'ømts ja jaa'y yide'en wyaan pøn wyinaty tø wyan'ejxwa'kxy:

—Pø øtsimpts ja'.

¹⁰ Winets ja yiktiibyijky:

—¿Sudsomts yø mween tø yjaty, pø mwin'ejxnipts yjaw'i?

¹¹ Jøts ja t'adsøøy:

—Yø jaa'y midy Jesús txøw'ajtp, yø' mo'onts tø tyik'øyi jøts øts ja tø xawinjaaxy, yide'en ø xnimaay: “Nøjx m'atsnawyimbujyi jam nøø'agø'øm midy yiktejp Siloe.” Xjats ø tø njanchnijky jøts kuts ø tønawyimbujyi, jøts øts yø nween tø y'ejxwa'kxy.

¹² Jøts ja ojts tjaakyiktowdi:

—¿Ma net ja jaa'y?

Jøts ja tnimaay:

—Ka' nnijawi.

Ku ja fariseotøjik tyiktøwdi ja winap jaa'y sudso wyan'ejxwa'kxy

¹³ Winets ja ojts twaanojxkti ma ja fariseotøjik jamdi. ¹⁴ Tyimbyoo'kxin xøøwts idø'øn wyinaty ku ja nwindson'ajtim Jesús tyik'ø'yiyi'ñ ja mo'onts midy wyinaty tø ttuktatsø'øky ja winap jaa'y, ¹⁵ paty ja fariseotøjik jam ttiibyøjkojmidi ja jaa'y sudso'ampy idø'øn ja wyeen ja wa'ats y'ejxni. Jøts ja y'adsojimbijy ja':

—Mo'onts øts ja tø xawinjaaxy, xjats ø tø nwimbuji, paty øts ixyam wa'ats n'ejxni.

¹⁶ Winets winaagin ja fariseotøjik wyandøø:

—Ja jaa'y pøn jade'en tø y'adi'ich, ka' inet Dios ja tja'aji, kumi ka'ap ja twindsø'øgi ja poo'kxin xøøw.

Jøts winaagin wyaamidi:

—¿Sudso mlagri'ajtin ja ndejin jade'en ttu'unt, pøni janch pojkipitumbi jaa'y tam ja wyinaty?

Jøts agø'ømyi jade'en ñawyanwa'kxniyidi ku kyanagyupikyidi, ¹⁷ jøts ja jadigojk tyik-tøgojmidi ja jaa'y pøn wyinaty winap uk'ejt:

—¿Jøts mets, sa mets idø'øn mwa'añ, pøn idø'øn yjaw'i ja jaa'y midy tø myikwin'ejxwa'kxyiyi?

Jøts ja wyaan:

—Øts wamp, Dios ja' kyugajpxy.

¹⁸ Jøts ja israelit jaa'dyi ka'ap idø'øn ja tjanchjawiwy'a'andi ku dø'øn ja jaa'y y'ijty wyinapi, jøts ku ja tø wyan'ejxwa'kxni. Yiknajtswaa'wiyibaat ja tyeety ja tyaaq, ¹⁹ jøts ja ojts tnøjmidi:

—¿Meets idø'øn ya'at mmajnk? Janch winap idø'øn yø tø kyaxi'iky, pø mnømdipxi. ¿Sudso'ampyts yø wa'ats wyan'ejxni?

²⁰ Winets ja u'nkteety y'adsoodøø:

—Sudsomts øøts yø n'u'nk nganijawit, pø winapxi dø'øn yjanchke'exy. ²¹ Ni øø nganijawi sudso'ampy yø tø wyin'ejxwa'kxy, jøts nija' øø nganijawi pøni pøn yø tø yiktsojkkxyi yø wyen. Yiktowdi jade'en kø'øm; pø møjaa'ñixi yø', wan kø'øm mdukmadøydi.

²² Jade'en'ampy idø'øn ja tyeety tyaaq ojts jade'en wya'andi, tsø'jkidip ja', pø tøxi ja israelit jaa'y wyindsøndi wyinaty tkajpxy'ajtnidi, ku ja abiky yikpikta'aktit pøni pøn wamp jøts ku ja nwindson'ajtim Jesús Cristo'aty, midi ja Dios tkajxp. ²³ Paty ja møjaa'y wyandøø: “Yiktowdi kø'øm, pø møjaa'ñixi yø', wan kø'øm tnigajpxy.”

²⁴ Winets ja israelit jaa'y twaadsowdi jadigojk ja jaa'y pøn idø'øn y'ijty winap, jøts ja ojts tnøjmidi:

—Tukmadook øøts tiy janch sam Dios t'ijxyin; jade'en øøts yø nnijawit jøts ku yø pyo-jkpitumbijaa'yi pøn tø myiktsø'øgyi.

²⁵ Jøts ja t'adsøøy:

—Ka'ap øts yø nnijawit pøni pøn yø', pøni pojkipitumbi jaa'y uk kapojkipitumbi jaa'y yø'. Yø'øyi øts nniija'wip jøts ku øts y'ijty nwinapi, ixyam wa'ats ixyam nwin'ejxni.

²⁶ Jøts ja tyiktøogojmidi:

—¿Sa ja tø mduñi? ¿Sa ja tø ttuñ jøts ku ja tø myikwin'ejxwa'kxyi?

²⁷ Jøts ja yide'en t'adsøøy:

—Tø meets ja njadukmadøø jøts meets ja ka' xmøjpiakta'aky; ¿winaaq ojk nniigajpxt? ¿Uk ja' mdsøjktip jøts ja yja' xpabøkwajni?

²⁸ Winets ja y'amyiknimaay chaachyiknimaay, yide'en ja wya'andi:

—Yø jaa'y me mbabijkpy, øøts ja Moisés øøts yja' nbabøjkip. ²⁹ Nniija'wipxi øøts ja' ku ja Moisés ojts myigajpxy; ja Dios; yø jaa'y, nguidyimñija'wip øøts yø' pøni ma yø chøøñ.

³⁰ Jøts ja t'adsøøy, yide'en ja tnimaay:

—Yø' idø'øn tiy janch nima'at yikja'wip, ku meets yø xkanijawi pøni ma yø chøøñ, jøts øøts øts yø yikwin'ejxwa'kxy! ³¹ Wa'atsxi yiknijawit jøts ku Dios ka' ja' tmadøø pøn pojkipitumbijaa'y'ajtpit; ja'ayi ja myadoolip yja' pøn ja windsø'jkxyip, pøn ja padu'unxyiyip ja yja'. ³² Ka'axi yjawi ma pøn nmadøynim ku tu'uk ja winap jaa'y ja jaa'y tyikwin'ejxwa'kxy midi winap tyimgya'jx. ³³ Ku yø jeexyip Dios tkaja'aji, niti yø jeexyip tkatuñ.

³⁴ Xjats ja yiknimaay:

—Jøts mets, ku mets pojkyøtpy tø mgue'exy, ¿jøts mets idø'øn jade'en xyik'ixpøkwa'añ? Jøts ja jap ojts yik'ixkajpxidsimy.

Pøn tkanija'widip ja Dios yja'

³⁵ Jøts ja nwindson'ajtim Jesús tnmadøøø jøts ku ja winap jaa'y jap wyinaty jade'en tø yikajpxidsimy; jøts ja ojts tminabyaadyi, winets ja ojts tnøjmi:

—¿Mmøja'wip mjanchja'wip Dios U'nk?

³⁶ Jøts ja ojts ñii'mxyi:

—Windsøn'ajtim, tukmadook øts pøn ja', wan ø tømøjawi tjanchjawi.

³⁷ Jøts ja nwindson'ajtim Jesús ja t'adsøøy:

—Tø mets ja x'ejxni; pø øtsxi dø'øn ja', ixya kø'øm møøt mmadya'aky.

³⁸ Winets ja jaa'y ñaguxendyaajkøø, jøts ja twinguxanaay ja nwindson'ajtim Jesús, jøts ja tnimaay:

—Windsøn'ajtim, nmøja'wip njanchja'wip mets.

³⁹ Jøts ja nwindson'ajtim Jesús wyaañ:

—Ja' øts ya naxwiin tø nniimiñ jøts ja payø'øyin tyunit tiy'ajtingøjxp; pøni pønts wimbeets kugoots, win'ejxwa'kxtipts ja' jøts ja t'ejxtit tnijawidit; pønts tja'ejxtit tjanija'widip jøts tkamibøkti, ja'ats tandip wimbeets kugoots ejxim winap jaa'yin.

⁴⁰ Winets winaagin ja fariseotøkti pøn jaty jam wyinaty, ku ja jade'en tmadowdi, winets ja ojts tnøjmidi ja nwindson'ajtim Jesús:

—¿Uk wan øøts idø'øn nayide'en nwimbeedsi?

⁴¹ Jøts ja nwindson'ajtim Jesús t'adsøøy:

—Ku meets jeexyip nwimbeedsi kugoodsi, ka' meets jeexyip myiktapøky'ejxti ja mbøky. Kumi mnømdip jøts ku x'ejxti xnijawidi, mdaja'atidipts meets ja mbøky.

10

Jade'en ja Jesús n'ukpiktaajkint ejxim tu'uk ja øybi kurajt n'ejxint

¹ Janch øts idø'øn nwa'añ, pøn jap katøjkip ma ja borreek ja kyemy'aaw, pøn abiky'ampy tøjkip, ja maa'tspi dø'øn ja'. ² Jøts ja jiyujk'ejxpi, ja' jap najxp ma ja kemy'aaw jap. ³ Ja yiktøjk'awatspi, ja' ja yik'awajtsxyiyip ja tøjka'aw jøts ja tyøki, jøts wa'ats ja byorreek ja yukmadøøyi. Xyømøøpy ja tu'uk jaty jøts ja tyikpidsimy jap kemyjøtpy. ⁴ Kuts ja tø tyikpidsømguixy tuki'iyi ja yiyujk jøts ja jawyeen twinway, payø'øyip ja' kumi wa'ats ja

tyukmadøyi. ⁵ Ka'apts ja nugo ajawi tpanøjkxti ja wyenkpi; ne'egi yjaaktyimkyajkidip ja', kumi ka'ap ja tyukmadowdi ja wenkjaa'y.

⁶ Ja'agøjxp ja nwindson'ajtim Jesús ojts jade'en tmimadya'aky ja jaa'y, jøts ja ttuk-tamimadowiwyaañ sa ja yja' yjaa'y'atti, ka'apts ja ojts tmadoodowdi põni ti dø'øn ja jade'en yjatijpy ku ja jade'en ñii'mxyidi.

Jade'en ja Jesús n'ukpiktaajkim ejxim tu'uk øybi borreekejxpi

⁷ Winets ja nwindson'ajtim Jesús jadigojk tnimaagyojmi ja jaa'y:

—Janch øts idø'øn nwa'añ: Jøts ku øts idø'øn jade'en ñamyayi nnabyikta'agyti sam tøjk'aaawin, ma ñaxtit øts ja nja', sam ja borreeke ja tyøjk'aaaw t'ayø'øyi. ⁸ Jøts ja win'øø'mbi põn tø y'atstendi jøts wya'andi ku Dios tø kyexyi, jade'en idø'øn yjamendi ejxim ja maa'tspin; øts njaa'y, ka'ap ja ñagyiyajkidi nugo ajawi. ⁹ Øts idø'øn jade'en sam ja tøjk'aaaw; põni põnts jap tøjkidip, ja'ats idø'øn nitsø'ok'attip. Jøts øts ja ndanitanit ja nja', ejxim ja borreeke u'nk yiknitani jap kyemyjøtpy.

¹⁰ Ja'ayi ja maa'tspi ñimimpy jøts ja myeech, jøts ja yikjaa'y'øøky jøts ja yikudigø; øts, ja' ø ñimimpy jøts meets øy yikxon xpaattit ja kunuu'kxin ja jukky'ajtim. ¹¹ Jade'en øts idø'øn sam ja jaa'y põn øy borreekejxpi. Ku dø'øn ja øy t'ixy ja byorreeke, øy sa tmiwanjaty ja kø'øm, nugo ku byorreeke ja kya'øøky. ¹² Pøni põn mijuy tump, ja'ayi ku ja t'ixy jøts ku ja myiñ ja awa'añ miy'uk, jøts ja japyi tnik'e'ky ja byorreeke jøts kyakni, kumi ka'ap ja tyimya'aji mididi ja jiyujk ñi'ejxpi'ajtpy, jøts nika'ats ja tkø'ømja'aji. Xjats ja miy'uk tmajtstni ja borreeke, jøts ja jadi'ini tyik'ayø'øbyaky. ¹³ Jade'en'ampy ja'abi jaa'y kye'eky kumi mijuy ja tyuñ, patyts ja ka'ap tkwenti ja borreeke.

¹⁴⁻¹⁵ Øts idø'øn øy jiyujk'ejxpi'ajtp. Sam øts ja Dios Teety xnijawin jøts wa'ats øts ja nnijawi; nayide'ents øts idø'øn ja njaa'y wa'ats nnijawi, jøts øts ja nayide'en wa'ats xnija'wimiyidi. Øts yø nguanjatip. ¹⁶ Jøts jap øts ja borreeke abiky njaakmøødi mididi kajap'ajtp ja kemyjøøjty; nyikme'empts øts jaa ja nayide'en. Jøts xmimado'odip øts ja', jøts tu'ugyi ja ñi'ejxpi yjagyajpniyt.

¹⁷ Ja'agøjxp øts ja Dios Teety xtsøky kuts ngu'oogidit yø'ødi, jukkyøkpts øts jadigojk. ¹⁸ Nipøn ø mibaat xkayik'øøky, kø'øm øts ja nnajtsjawit jøts ø nnagyøyakit ngø'ømdsojkingøjxp. Tiy'ajtingøjxpts øts nnagyøyakiyt, jøts nay tiy'ajtingøjxpts øts njukkyøkt jadigojk. Tøxi øts ja Dios Teety jade'en x'ane'emy.

¹⁹ Xjats ku ja israelit jaa'y jade'en ojts tmadowdi ja kajpxy ja ayuujk, jøts kø'ømyi ñawyanwa'kxkojmiyidi. ²⁰ May ja jamdi põn wandip:

—¿Tiku yø xtsaamyøjipikta'akti, pø miku'ts yø tø tyatøkiyi, pø loki jajtpts yø'?

²¹ Jøts wyenkpi wyamidi:

—Ka'ap jeexyip põn jade'en kyajpxy, ku jeexyip põn ja miku' tø tyatøkiyi. ¿Ti ma ja miku' tø t'ukyikwin'ejxwa'kxy ja winap jaa'y?

Ku ja israelit jaa'y ojts twindsowdi ja Jesús

²² Yu'aats nep'aats idø'øn wyinaty pyatpy, jamts idø'øn Jerusalén ja xøøw wyinaty tyuñi, ku ja yikja'myeech yikxøduñ ja tsaptøjk. ²³ Jøts idø'øn ja nwindson'ajtim Jesús jap wyinaty wysidity tsaptøjkøtpy, ma ja tøjk'aaaw jap mididi yiktejp Salomón ja Tyøjkwinbo'kx. ²⁴ Jøts ja israelit jaa'y ja ojts ñawya'k'awidityiyi, jøts ja yiknimaay:

—¿Ejtp øøts idø'øn jade'en xyik'etwa'añ maapy tajp? Pøni mets tam idø'øn janch Cristo mididi Dios tkajxp, ixayamys øøts xtyimdyukmado'ot.

²⁵ Jøts ja nwindson'ajtim Jesús ja t'adsøøy:

—Tø mee njadukmadø, jøts meets ja ka' xmibiky. Tuki'iyi ti jaty ø ndumpy, ti jaty ø xanigutujk'ajtp ja Dios Teety, yø'øts ja wa'ats tyimyjayiknigaxø'kp; ²⁶ meets, ka' meets xjanchjawi, kumi ka' mee mnyaja'aji mididi ø nja'ajtpy, sam aamyi tø nnøjmidi. ²⁷ Jade'en øts ja nja' xyukmadø sam ja borreeke ja ñi'ejxpi tyukmadøyin, jøts wa'ats øts ja nnijawidi. Xpaduujnidipts øts nja' ja'adi. ²⁸ Øts ja nnøødyip ja kunuu'kxy jukky'ajtim mididi xemikøjxp, jøts nijuuni nøjkk yawindigøydi, jøts nipøn øts ja xkapøjkxit ku øts ja ngøj'ømit'atti. ²⁹ Ja Dios Teety øts ja xagødøjkip, ja' tu'uk møj, ka' põn jade'en, põnts ja mibaat uk kønaxip jøts ja yikpøjkxit. ³⁰ Øts møøt Dios Teety tu'ugyi øøts.

³¹ Winets ja israelit jaa'y jadigojk tkonj'øktøø ja tsaa, jøts ja ttaka'atswa'añ. ³² Xjats ja nwindson'ajtim Jesús ja tnimaay:

—Tø mee kawinaak ojk ja mwingujky nduujni ja ødyu'unin Dios Teety myø'ajtingøjxp. ¿Ja'ats meets yam xagubatwamp ku meets yam xka'atswa'añ?

³³ Winets ja israelit jaa'y y'adsoodøø, jøts ja nwindson'ajtim yiknimaay:

—Kidi ja'ajip mets yam myiktaguga'adsiwamp, ku mets ja ødyu'unin tø xjadyimy-jabikta'aky, pø ja'axi yam myiktagubatwamp ku ja Dios kajaa xtyimygajpxigø. Pø nugo jaa'lyxi mets, jøts jade'en mnabyikta'agyti sam Dios.

³⁴ Jøts ja nwindson'ajtim Jesús tnimaay:

—Jade'en meets ja mgutujk jap yja'ayi jøts ku Dios yide'en wyaañ: “mDios meets.”
³⁵ Janch yiknija'wip jøts ku Dios kyajpxy jap yide'en wya'añ, ka'ap ja pøn tkagupiky; ja' ja Dios ojts diostijy ja jaa'y pøn ja ojts tyiknaxy ja kyajpxy ja myadya'aky. ³⁶ Jøts kuts øts Dios tø xwiwich abiky, jøts øts ja ya tø xkexy naxwiin, ¿sudsots meets jade'en mwa'añ jøts ku øts ja tø nmigajpxigy, ku tø nwa'añ jøts ku ø nDios U'ngi? ³⁷ Pøni ka' øts ja' nduñ midy ja Dios Teety tyumpy, kidits mee xjanchjawi. ³⁸ Kuts øts ja nduñ, øy mee xjagajanchjawi janchja'widik øts ja ndunk, jøts jade'en xnijawidit jøts ku øts ja Dios Teety xmøøt'ity, jøts øts ja nayide'en nmøøt'ejtmi.

³⁹ Winets ja jadigojk tjadyimyatsumwandøø, kajkts ja nwindson'ajtim Jesús.

⁴⁰ Jøts ja ojts wyimbejtmi ñojkximi jam xøøbidsimy'ampy, ma ja møj nøø midy yiktejp Jordán, jøts ja jam tyaañ ma ja Juan y'ijty yiknøbety. ⁴¹ Janch namay ja jaa'y ja ojts t'ats'ejxti jam, jøts ja wya'andi:

—Tyimdyiy tyimyjanch tam idø'øn, øy idø'øn ja Juan Bautista ojts tkatuñ ja milagr'ajtin, ka'pxts ja y'ayuujk pyidsimy sa tñimadyaajky ya'atpi jaa'y.

⁴² Jøts ja'abi etjotp janch namay ja jaa'y ojts tñibøkti ja nwindson'ajtim Jesús.

11

Ku ja Lázaro y'øjky

¹ Ja dø'øn tu'uk ja jaa'y, yaa'dyøjk, midy pøjkp. Lázaro ja xyøøw, jam ja Betania kyugajpi, nay jam ma ja Maria jøts ja y'uch Marta jam kyugajpidi. ² Yø Maria dø'øn ja' pøn yø Lázaro chø'øjip, ja pamaa'y, ja'ats idø'øn ojts ja aceite pa'akxuu'kpi tpiaktaajkxiyi ja nwindson'ajtim Jesús tyeky, jøts ja wyaay ja ojts tuktati'ich jadigojk. ³ Ja'ats idø'øn møøt ja y'uch tkajpxy ñigajxidøø ja nwindson'ajtim Jesús:

—Windsøn'ajtim, janch pøjkp ja mmigu'uk.

⁴ Xjats ku ja nwindson'ajtim Jesús ja jade'en tmadøøy, winets ja wyaañ:

—Ka'ap yø pa'am myajada'akt jøts ja tyimyk'ookt; jade'en'ampy idø'øn ja jade'en yjaty jøts ja Dios myø'ajtin wyingaxø'økt, jøts yø'øbi pa'amgøjxp yiktuk'ejxtit ja jaa'y jøts ku ja Dios U'nk nayide'en tmøøt'aty ja møk'ajtin.

⁵ Øy ja nwindson'ajtim Jesús tjanchjaba'ayøy ja jaa'dyi, ja Marta, ja María, jøts ja Lázaro, ⁶ ku ja yiktukmadøøy jøts ku ja Lázaro pøjkiyi, jøts ja jam majtsk xøøw yjaaktyimdy'a'aniyi'ñ ma dø'øn ja jam wyinaty. ⁷ Winetnims ja tñimaay ja pyabøjkpitøjk:

—Wan jam tjaa'myindi jadigojk jam Judeit naxjotp.

⁸ Jøts ja pyabøjkpitøjk ja ñimaajjyiyøø:

—Windsøn, pø jamts ja israelit jaa'y jawaani mgaka'ats'o'jkøø; ¿jøts nay jam mnøjkxwa'añ jadigojk?

⁹ Jøts ja nwindson'ajtim Jesús wyaañ:

—Ka' pøn sa xu'unt ku ka' kya'pxñim. Niti tsø'øgi ngamøøt'aty sam nwidejtin xinaxy, awa'ats ja nøø' ja tuu' ja' ku tyuk'ejxpaaty ja ya'it naxwi'ñit jaj; ¹⁰ kuts ja koots'ajtin yja'aty, janchjøptsø'gi jøpjawy nwidejtint, pø ja jajxi xka'ejtxa'am.

¹¹ Jøts ja nwindson'ajtim Jesús wyaañ:

—Maanip ja nmigu'uk Lázaro; n'atsyuxpts øts inet ja'.

¹² Winets ja pyabøjkpitøjk ja ñimaajjyiyøø:

—Windsøn'ajtim, pøni tø tam idø'øn ja mya'oo'kni, pø møk'pøkwanip idø'øn ja'.

¹³ Jade'en'ampyts ja nwindson'ajtim Jesús ja tijy, jøts ku ja Lázaro wyinaty tø y'oo'kni, jøts ja pyabøjkpitøjk jade'en ja wya'andi, jade'en ja tijy wya'añ jøts ku ja nugo mya'ay. ¹⁴ Xjats ja ojts wa'ats tyukmadøoyidi ja nwindson'ajtim Jesús:

—Tø ja Lázaro y'oo'kni. ¹⁵ Ne'egi xondaqk øts jade'en jøts ku ø tø ngajam'aty, tyim'yø'y'ajtp ne'egi jade'en jøts mee xjanchjawit. Wants tjaa'myindi jøts n'ats'ejxint.

¹⁶ Winets ja Tomás, pøn yiktejp xeeñ'u'nk, ja'ats tñimaay ja myibabøjkpitøjk:

—Wan adøm nayide'en tjaa'myindi, jøts yø nmøøt'oo'kint.

Ja Jesús tyuk'awimbejtijp ja jaa'y ja jujky'ajtin jøts ja' jujky'ajtin'ajtp kø'øm

¹⁷ Jøts ku ja nwindson'ajtim Jesús jam yja'jty, jøts ja tpaajty ja Lázaro, jøts ku ja wyinaty myaktaxk xøøwip tø ñajxøjkiñi. ¹⁸ Wingon ja Betaniit kajp tyañ ma ja Jerusalén jam, majtsk kilometro jagujkpin ja yjagami. ¹⁹ Jøts namay ja israelit jaa'y jam wyinaty tø y'atstøjk'ayø'ødyi ma ja Marta jam møøt ja Maria, jøts ja tkajpxjot'amøjkidi ja'agøjxp ku ja myigu'uk ja wyinaty tø y'ookni. ²⁰ Xjats ku ja Marta tñimadøøy jøts ku ja nwindson'ajtim Jesús jam wyinaty yja'atwa'añ, winets ja chø'jñ jøts ja tjøpkubajtiyi'ñ; jøts ja María jap ja tyøjkjotpy tyaañ. ²¹ Jøts ja Marta tñimaay ja nwindson'ajtim Jesús:

—Windsøn'ajtim, kuk jeexyip tø mya'aty, ka'abik øts jeexyip ja nmigu'uk tø y'øøky.

²² Jade'ents ø nnijawi jøts ku mets ja Dios Teety mmo'ojit pøni ti mets ja m'amidøøpy.

²³ Winets ja nwindson'ajtim Jesús ja ojts ñii'mxyi:

—Jujky'atp ja mmigu'uk jadigojk.

²⁴ Xjats ja Marta wyaañ, jøts ja tnimaay:

—Janch jade'en, nniija'wip øts jøts ku ja jadigojk t'awimbetit ja jujky'ajtin, ku ja pyidsø'ømt jadigojk mā oo'kpi, jaanimts ja'abi xøøwnim ku Dios tyika'pxt.

²⁵ Winets ja nwindson'ajtim Jesús ja tnimaay:

—Øts idø'øn ja' pøn ttuk'awimbejtij ja jaa'y ja jujky'ajtin, jøts øts jujky'ajtin'ajtp kø'øm. Pøni pøn ø xjanchja'wip, øy ja yja'øøky, jujky'ajt kunaxpts ja ejtp. ²⁶ Jøts pøni pøn ja jaakjujky'ajttip jøts pøni xjanchja'widip øts, ka'ats ja y'anmija'win nøjcx wyindigøy. ¿Mjanchja'widip?

²⁷ Jøts ja tnimaay:

—Windsøn'ajtim, njanchja'wip øts. Ndyimyjanchja'wip øts ku me mCristo, ja Dios U'nk, midii'yip idø'øn y'ity ya naxwiin menwamp.

Ku ja Jesús ojts twinya'axy ja Lázaro ku tø y'øøky

²⁸ Xjats ku ja Marta jade'en y'ukwaañ, winets ja ojts t'atsyajxi ja chø' María, jøts ja ojts amaa'tsk tnøjmi:

—Ixa ja windsøn ya, jøts ixap mwaaadsøyi.

²⁹ Ja'ayi ja jade'en tmadøø, jøts ja María jatyi pyidi'jky jøts ja ojts t'ats'ixy ja nwindson'ajtim Jesús. ³⁰ Ka'anin ja nwindson'ajtim Jesús wyinaty kyajptøki; nay ixjamnim ja wyinaty mā ja Marta ja møøt tø ñabyaadyi. ³¹ Jøts ku ja t'ejxtøø ku ja María pyidi'jky ku ja wyinaty putyi tø pyidsimy, jøts ja israelit jaa'dyi midii jam wyinaty tøjkjotp tkajpxjot'amøkidip ja ku'oogi, xjats ja tpadso'ondøø, jade'en ja wyinmaydi jam ja tijy yaxpi ñijcx mā ja oo'kpi jam wyinaty tø ñaxøki.

³² Winets ja María, ku ja yja'jty mā ja nwindson'ajtim Jesús jam wyinaty, jøts ja ojts ñagyuxendya'agyi nwindson'ajtim tyekyjø'm, jøts ja tnimaay:

—Windsøn'ajtim, kuk jeexyijp tø mya'aty ka' øts jeexyijp ja nmigu'uk tø y'øøky.

³³ Xjats ku ja nwindson'ajtim Jesús ojts t'ixy jøts ku ya'axy ja María jøts ja israelit jaa'y nayide'endi midii ja María jam wyinaty tø pyadsøñiyi, winets ja nwindson'ajtim ja jotmay ojts pyaadyiyi jøts ja ojts tymchaachjawi. ³⁴ Winets ja tyiktiy:

—¿Mā tø xyknaxøkidi?

Jøts ja yiknimaay:

—Windsøn'ajtim, men x'ats'ixy.

³⁵ Xjats ja nwindson'ajtim Jesús yjanchyajxy. ³⁶ Jøts ja israelit jaa'y winet wyandøø:

—Ejxti yjantymchøjkpy tam yø tø y'ity.

³⁷ Jøts ja jade'en winaagin wyandøø:

—Pø yø'øxi ja winap jaa'y tø tyikwin'ejxwa'kxy, ¿sudso yø niwine'enin sã tø tkatuñ ja Lázaro jøts ja jeexyijp tø kya'øøky?

Ku ja Lázaro yujukpyiky jadigojk

³⁸ Jøts ja nwindson'ajtim Jesús ojts ja jotmay jadigojk tyatøkiyi, jøts ja ñijcx mā ja oo'kpi jam wyinaty tø ñaxøki. Tøjk'aawin ja tsaa jam, jøts nayi tsaa ja tø yjaaktyimyikta'agi'y. ³⁹ Jøts ja nwindson'ajtim Jesús wyaañ:

—Jigø'odi yø tsaa.

Winets ja Marta, midii ja oo'kpi y'uchip, ja'ats ja ojts ñii'mxyi:

—Windsøn'ajtim, pø janchxuu'knip inet yø', pø myaktaxk xøøwipts yø y'oo'kni.

⁴⁰ Jøts ja nwindson'ajtim Jesús ñimaajyøø:

—¿Ti kidi ø tø nnigajpxy jøts pøni ku xjanchjawi, winets x'ejxit ja Dios myøk'ajtin?

⁴¹ Winets ja tjigiidy'i ja tsaa. Jøts ja nwindson'ajtim Jesús jam tsajpwemp ojts pyat'ixy, jøts ja wyaañ:

—Dios Teety, dioskujuyip ku øts ja n'ayuujk tø xmadøjy. ⁴² Nniija'wip øts jøts ku mets ejtp ja nja' xmadøjy, jøts ja' øts jade'en xyikwamp jøts yø jaa'y ja øy'ajtin tpaattit pøn jatj isaadi, jøts tjanchjawidit jøts ku mets xkexy.

⁴³ Xjats ku ja jade'en wyan'abajtiyi'ñ, jøts ja møk wyaañ:

—¡Lázaro, pidsøm jap!

⁴⁴ Jøts ja oo'kpi pyidsiimy køpity pakpity, jøts ja wyeen y'aaw twinwets'aty ja wet. Winets ja nwindson'ajtim tnimaay ja jaa'dyi:

—Køkajti pakajti jøts xmajtstu'ttit, wan tnijcx.

Ku ja jaa'y tkajpxy'ajttø jøts yikmatst ja Jesús

⁴⁵ Ja'agøjxpts ja israelit jaa'y namay tjanchja'widøø ja nwindson'ajtim Jesús midii ja María jam wyinaty myøøt, jøts ja' ojts t'ejxti ku ja nwindson'ajtim Jesús jade'en ttuuiñ.

⁴⁶ Winaagin tninøjkxtøø jøts ja ojts t'ats'ejxti ja fariseotøjk, jøts ja ojts ttamimadya'akti sã ja

nwindsøn'ajtim Jesús wyinaty tō y'adi'ich. ⁴⁷ Winets ja fariseotōjk jōts ja teetywindsōndōjk mōōt n̄amyujkidi ja kutujk adsinaabyidi, jōts ja ojts n̄ōm̄di:

—¿Sudso ndaabyajtindit? Janch kawine'en yō jaa'y milagri'ajtin tjantyuni jōts ja ejxa'an tpiakta'aky. ⁴⁸ Ku yō jade'eñi n'ixmajtsindit, janch niduki'iyi jaa'y yō yjanchja'winiyit, jōts ja romit kudunktōjk myenidit, jōts ja tyikudigōōñidit adōm yō ndsaptōjk jōts adōm yō ngajp.

⁴⁹ Nay ja'abi jaa'y txōw'ajtp Caifás, pōn wyinaty teetywindsøn'ajtp ja'abi jumōjt, ja'ats ja ojts n̄i'myxi:

—Mguidyimñija'wip mee ti, ⁵⁰ ni xkanijawidi kudam adōm njayik'ōdyunwa'añindi ku tu'ugyi ja jaa'y tku'oogit ja ñaajx ja kyajp, jōts kidi tuki'iyi kyudigōōgyōxt wine'en ja naajx ja kajp.

⁵¹ Kidi kyō'ōmwinmaa'ñipts ja Caifás yiktumpy ku ja jade'en wya'añ: jade'en'ampy idō'ōn ja', kumi ja' wyinaty teetywindsøn'ajtp ja'abi jumōjt, xjats ja Dios ja ojts yikwa'añi jōts ku ja nwindsøn'ajtim Jesús y'ookt tkudanit ja israelit kajp ja israelit naajx; ⁵² jōts kidi tyimy ja kajp tyimy ja naajx, ja'ayip nayide'en jōts ja niduki'iyi ja Dios y'u'nk y'unaj'jk tyikyō'ōmyukwangōjxi pōn wyinaty tō yō'ōwya'kxnidi. ⁵³ Winet ets ja israelit kudunktōjk tn̄iwinmaa'yidōō jōts ja nwindsøn'ajtim Jesús tyimy'ookt.

⁵⁴ Ja'agōjxp ja nwindsøn'ajtim y'ijty ka' nugo ajawi y'ukwidejtni jam may israelit jaa'yjotp, ojts ja jam cho'oni Judeit etjotp, jōts ja ojts ñijxy ma jam wingon ja abak et midu nugo tsayjoot. Jam ja ñijxy ma ja kajp txōōwi Efrain, jamts ja ojts tmōōtsōōni ja pyabōjpkōj. ⁵⁵ Tyimdyōts jōts tpatnit ja paski xōōw midu ja israelit jaa'y tyundip, jōts idō'ōn ja mayjaa'y yjantyimñōjxiti Jerusalén, jōts ja jam ttunwa'andi tpadunwa'andi ja kostrumbri, jōts pyōky ja wya'atstik ku ka'anin ja paski xōōw tpaaty. ⁵⁶ Jōts ja nwindsøn'ajtim Jesús jam yjanchyik'ixa'ay ku ja jap tsaptōjkōtptyi, jōts ja xem yam ñawya'añidi:

—¿Sa mee m'ukwa'añ? ¿Me'emp ja yjawi xōbatpi uk ka'?

⁵⁷ Jōts ja fariseotōjk, jōts ja teetywindsōndōjk, tō ja wyinaty tn̄'ana'amdi jōts ku pōn t'ext tn̄jawit ja nwindsøn'ajtim Jesús jōts ja jatyi tñgajpxt, winets ja nwindsøn'ajtim Jesús yikmatst jōts ja yiktsu'umt.

12

Ku ja Jesús ojts yiktagujaaxy ja pa'akxuu'kpi

¹ Xjats ku wyinaty ja paski xōōw tkapaatynim jadudujk xōōw, winets ja nwindsøn'ajtim Jesús ojts ñijxy jam Betania ma kyugajpi ja Lázaro, pōn ja wyinaty tō tyikjujkyiky jadigojk. ² Jamts ja a'ux y'ōyiyi'ñ jōts ja nwindsøn'ajtim Jesús ja yiktawindsō'ōgi; ja Marta ja jam ojts wyingi'iyi, jōts ja Lázaro ja tmōōtkay mōōt pōn jaty jamdi. ³ Winets ja María tyikmiñi kujkwa'kxy lyitrin ja aceite midu pa'akxuu'kp, jōts janch tsowi ja', ja'ats ja ojts tja'jxiyi ja nwindsøn'ajtim Jesús tyeky, jōts ja ñajawyaayi ttuktatijch. Amuum ja tōjkjoot pya'akxuu'kpōjkajxy. ⁴ Jōts ja Judas Iscariote, midu ja Simón myajnkpi, midu ja nwindsøn'ajtim Jesús pyabōjki'ajtpy, jōts midu ja wyinaty kōy'akwajni, ja'ats jade'en waan:

⁵ —¿Tiku yō pa'akxuu'kpi ne'egi tō kyayiktōōky? Tigōōk magō'pxy denariin jeexyyp tsow'aty, jōts ayoobi jaa'y ja jeexyip yiktabudōki.

⁶ Kaja'agōjxpip ja Judas jade'en wya'añ ku ja tpa'ayōy ja ayoobi jaa'y, pō ja meefxi ja ne'egi pya'ayōōpy. Ja winmaa'ñ ja yikyō'ōpy ku ja myeech, jōts kumi jam ja wyinaty tkōjō'ōm'aty ja meen'abōjk'i'ñ midu'ibi ja myibabōjkitōjk myōōt'ajtpj, jōts ja amaa'tsk tyukpiky tyukōñ ja meen' midu yik'ejtpj. ⁷ Jōts ja nwindsøn'ajtim Jesús tn̄imaay:

—Majtsu'tu, ja' yō iza tō tpiakta'aky midu tump ku o n̄naxōjkiñi. ⁸ Ja'atpyim ayoobi jaa'y, o y juuni jaty xmay'attit xpudōkidi; jōts ots, ka' meets ja xumiwin'ejxkunaxt.

Ku ja Lázaro yikajpxy'aty ku tyik'ookwa'andi

⁹ Jōts ja israelit jaa'y may tn̄imadowdi ku ja nwindsøn'ajtim Jesús jam wyinaty Betania, jōts ja ojts tn̄inōjxiti, kidi ja nwindsøn'ajtim Jesús nadyu'uk yik'ejxwamp, nayide'en ja t'ejxwa'andi ja Lázaro pōn ja nwindsøn'ajtim Jesús wyinaty tō tyikjujkyiky. ¹⁰ Winets ja teetywindsōndōjk tkajpxy'ajtti jōts ja nayide'en tyimyk'ooktit ja Lázaro, ¹¹ kumi ja' ñamyayi ja pōky tjagyajp ku ja israelit jaa'y ñawya'kxyidi, jōts ja may pyuwajtsniyidi jōts ja tjanchja'wiñidi ja nwindsøn'ajtim Jesús.

Ku ja Jesús kyajtpōjkiy'i'ñ jam Jerusalén

¹² Xjats idō'ōn ja jaa'dyi may ja jam wyinaty tō yja'atti Jerusalén, jōts ja xyōbaatwa'andi ku ja paski xōōw; jōts ku kyimjabom'ajty, jats ja ojts tn̄jawidi jōts ku ja nwindsøn'ajtim Jesús jam wyinaty yja'atwa'añ ja'abi kajpkōjxp. ¹³ Winets ja tixxy ja ojts tpootti, jōts ja ojts tpatōsowdi ja nwindsøn'ajtim Jesús, yide'en ja wyandōō:

—¡Mōj Dios kyunuu'kxin! ¡Oy wa'ats yō' midu ixyam Dios Teety kyejpxy, midu israelit jaa'y wyindsōni!

¹⁴ Jøts ja nwindson'ajtim Jesús tpaajty tu'uk ja buur jøts ja ojts ttawa'atspety, tyimbyatpy idø'on jade'en sam jap jaabyety nøyijxpy:

¹⁵ Meets Sión kajpjotpit, kidi mjotmay'ookti; ejx, pø ixats myiñ ja mwindsøn, yikxon buuru'nk ttaku'xni.

¹⁶ Ka'ap ja pyabøjkpitøjk ja jaty tja'gyukidøø yø'øbi winmaa'ñ, østi jaanim ku ja nwindson'ajtim Jesús wyinaty tø chajpajtni. Jaanims yø tja'myajtstøø jøts kudam yø tnigajpxy ja nwindson'ajtim ku ja jap jade'en yja'ayi, jøts tyimyjade'ents ja wyinaty tø yjaty kyubety.

¹⁷ Jøts ja jaa'dyi midi ja nwindson'ajtim Jesús jam wyinaty møøt, ku ja tyaxpidsiimy ja Lázaro jap oo'kpi jutjøtpy, ku ja wyinaty tø tyikjujkpyiky jadigojk, ja'ats idø'on jam tnimadyaktip sa jaty ti jaty ja wyinaty tø t'ejxti. ¹⁸ Patyts idø'on ja jaa'y ojts tpaatsowdi ja nwindson'ajtim Jesús, kumi tø ja wyinaty tnijawidi ja mila'gr'ajtin midi ja nwindson'ajtim wyinaty tø ttuñ. ¹⁹ Xjats ja fariseotøjk agø'ømyi ñawyajnidøø:

—Tøxi ixa xja'ejxti sa yø yjawi ñityu'unint. Ejxti, ejx niduki'iyi jaa'y pyanijkxyiyi.

Ku ja griegit jaa'y t'ejxwa'andi ja Jesús

²⁰ Jøts ja jaa'dyi midi jam wyinaty tø ñøjkxti xøbatpi Jerusalén, jam ja winaagindi pøn griegit jaa'dyi. ²¹ Ja'ats jam tnimendi ja Felipe pøn kugajpip Betsaida jam Galileit etjotp, jøts ja ojts tnøjmidi møkt'a'aky:

—Ja Jesús øø teety n'ejxwampy.

²² Xjats ja Felipe ojts tninijkxy ja Andrés jøts ja ttukmadøøy; winets ja namajtsk tninøjkxti ja nwindson'ajtim Jesús, jøts ja ojts ttukmadowdi. ²³ Jøts ja nwindson'ajtim Jesús ja ojts ñi'mxayidi:

—Tø tpaaty ku nxøga'pxy ma øts yikxon nyikwinjawit nyikwindsø'øgit, pø Dios Teety ø xkajx jøts ja na'xwii'ñit jaa'dyi ngudanaapy. ²⁴ Tiy janch ø nwa'añ ku mee nnøjmi, jøts ku tu'uk ja ariinbajk kyaka'ay naxjøtpy jadi'iñi ja ñaxy; pøni midi'its ka'ap naxjøtpy, ne'egi may ja wyimbijty ku ja wyindigøy. ²⁵ Nayide'en idø'on meestsmi. Pøn kasajatyim nay'ejxip, pøn nabya'ayojip, ka'ap ja mibaat ja nitso'ok'ajtin tpaaty; pønts kanabya'ayojip, wan tjaty sa yjaty øts køjxp, ja'ats idø'on tpaatp ja nitso'ok'ajtin. ²⁶ Pøni pøn øts xpabøjkpi'atwamp, wan ya tmiñ jøts ø xmøøtwidettit xmøøtsøonidit. Yikajxa'akpts idø'on ja' jam Dios wyingujkp.

Ku ja Jesús tnigajpxy ja y'o'jkin

²⁷ Janch tø øts ixyam ndyimyjotmaadyøki; ¿jøts ti sa ø nwa'añt? ¿Ja ti ja ø nwa'añt: “Dios Teety, ka' øts jade'en xyikjatt xyikubatt sa øts ixyam njatwa'añ ngubatwa'añ”? Pø ka'axi øts ja' tø nnimiñ jøts øts jade'en ngajatt. ²⁸ Metsts Dios Teety tu'ugyi ja mja' majada'akp.

Winets yikmadøøy ja ayuujk jøts ku jap yjawi tsajpjøtpy wya'añ:

—Tø øts ja jade'en nduñ, jøts ndunwampy øts ja jade'en jadigojk.

²⁹ Jøts ja jaa'y midi jam wyinaty amidoodujktip, yide'en ja wya'andi jøts ku ja y'anaawi midi jade'en wyinaty tø wyina'añ, jøts pømbi wamidip:

—Ja ankilis yø tø myigajpxyi.

³⁰ Winets ja ñimajjyidi ja nwindson'ajtim Jesús:

—Ka' øts køjxp yø ayuujk jade'en tø yikmadøøy, meets køjxp yø jade'en wya'añ. ³¹ Ixyats idø'on tø tyimya'aty ja xøøw ja jumøjt ku ya'atpi naxwii'ñit jaa'y yiktiidyu'undit, jøts ku nayide'en yikpawopt ja mikku' midi yø naxwiiñ tnigubajk'ajtp ja kya'øybi. ³² Jøts ku øts jam nøjkk nyikpikta'aky jam kruskøjxp, ñijawidip ja øy pøn jøts øts xjanchjawidit.

³³ Ja'ats idø'on ja jade'en yjatijpy sudso ja wyinaty y'ookwa'añ. ³⁴ Xjats ja mayjaa'y ja yide'en y'adsooøø:

—Tø øø nnimadøø ku pøngapøn tkajpxy øøts ja ngutujk, jøts ku ja Cristo yujjky'att xemikøjxp. ¿Sudsøts me mwa'añ jøts ku mets myikpikta'akt jam kruskøjxp? ¿Pøn idø'on ja' midi tsoo'mp tsajpjøtpy, midi ja naxwii'ñit jaa'y tkudanaapy?

³⁵ Winets ja nwindson'ajtim Jesús ja tnimaa'y:

—Mjaakujajidip mjaakudøø'kxidip meets ja jaj, tyimdyøts jøts ja kya'uk'ejtnit. Jaakyiktundits ejx yjaakja'atynim, jøts kidi kube'ets kugoots mjatt; ja jaa'y pøn jade'en jajttip, ka'ap ja tnijawidi pø sa ja yjattit kyubattit. ³⁶ Janchja'widik øts nja', pø øtsxi dø'on ñamyayi jade'en sam ja jaj, jøts jaaktyimñayamnims øts x'e'ejxti xnijawidi jøts mee njaakja'bøkt.

Ja'ayi ku ja nwindson'ajtim Jesús ojts jade'en y'ukwani, jøts ja cho'onaa jøts ja jadi'iñi yø'ødyigøøñi.

Ya'at tnigajpxp tigøjxp ja israelit jaa'y ojts tkajanchjawidi ja Jesús

³⁷ Øy idø'øn ja nwindson'ajtim Jesús wyinaty kawine'en tō tjatuñ ja milagri'ajtin jam mayjaa'y wyingujkp, jōts ni jade'en ja kyayilkjanchjawi. ³⁸ Ja ti jats ja jade'en kyajatt sa wyinaty tō wya'añ ja Dios kyugajpxy Isaias, ku ja yide'en tjaadyaañ:

Dios Teety, çpøn adøm ja ngajpxy ja n'ayuujk tō x'ukupøjky'am?

Øy ja Dios Teety ja myøk'ajtin tō tñanky'ijxyi, ka'ap ja pøn tmøjpikta'aky.

³⁹ Jōts idø'øn ja jade'en ka'ap tjanchnjawi, nayide'ents ja Isaias wyinaty tjaadyaami:

⁴⁰ Dios ja jade'en tuujnidip, jōts ja jade'en wimbeets kugoots yik'ityidi, jōts ja ka' tkupøkti,

jōts ja wyeen ja tkada'ejxtit øy ja wa'ats tyimya'ejxti,

jōts ja nika' ja ja'gyukin tjagyaptit,

jōts ja nika' ñabyøkjawiyidit øy øts ja wine'en njayikpøkwy'a'atswa'andi.

⁴¹ Jade'en'ampy ja Isaias jade'en wyaañ, kumi tō ja wyinaty jekyip Dios Teety tyuk'ijxyi jōts ku jade'en ja Jesús ja y'øy'ajtin xuk'ejxint, jōts ja ojts jade'en patki'jyi tñgajpxy.

⁴² Jōts øy idø'øn ja yjajade'eni, may ja israelit jaa'y tjanchnjawi'widøø ja nwindson'ajtim Jesús, østi windsonøjk paat winaagin tjanchnjawi'widøø; ja'ayi ku ja pøn ka' tukmadowdi, ja'agøjpx ku ja ttsø'øgidi ja fariseotøjk jōts ja ka'ap tyukmajtstu'udit ja tyunk. ⁴³ Ja jaa'y yja' ja ne'egi yikmøjtøjkidip, jōts ka'ap Dios yja'.

Ja Jesús y'ayuujk payø'øyiyip ja jaa'y pyøky

⁴⁴ Jōts ja nwindson'ajtim Jesús møk wyaañ:

—Ja' pøn ø xjanchnjawi'wip, kidi øtsip ja tu'ugyi xjanchnjawi'wip, nayide'en ja ñamyayi tjanchnjawi ja Dios Teety midt ø xkajxp. ⁴⁵ Jōts pøn øts ixa x'ejxp xñija'wip, nayide'ents ja t'ixy tñijawi pøn ø xkajxp. ⁴⁶ Jōts ku øts ñamyayi jade'en sam ja jaj, ja' ø tō nñimiñ ya naxwiiñ pøni pøn ø xjanchnjawi'widip, jōts kidi øts ja wimbeets kugoots nyiktandi. ⁴⁷ Pøni pøn ø xmadojip ja n'ayuujk jōts ka' tmøjpikta'aky, kidi øtsip ja ndabayø'øpy ja pyøky; kaja'ajip ø tō nñimiñ jōts øts ja naxwii'ñit jaa'y ndabayø'øyt ja pyøky, pø ja'axi ø nñimimpy jōts øts ja nyiknitso'ok'attit. ⁴⁸ Pøni pønts øts nja' xkatsojkip jōts ka' tmøjpikta'aky sa ø nwa'añ, jats ja' pøn ja ttabayø'øyip ja pyøky, nayø'øyi ja nøjx kø'øm ni'øoniyip sa jaty ø tō nwa'añ, ku kyøxt ja naxwii'ñit. ⁴⁹ Kidi ja'ajip ø ngajpxy sa ø kø'øm nwinmay; ja' midt ø xkajxp, ja Dios Teety, ja' øts ø xanigutujk'ajtp jōts øts jade'en ngajpxt, jōts øts jade'en nyik'ixpøkt. ⁵⁰ Jōts wa'ats ø nñijawi, jōts ku ja' wya'añ ja Dios Teety y'ana'amín sudso yikpaatt ja juiky'ajtin xemikøjpx. Jade'ents idø'øn, pøni sa jaty ø tō nwa'añ, jade'en øts idø'øn ja tō ngajpxnaxy sam øts ja Dios Teety ja tō xanigutujk'aty.

13

Ku ja Jesús pakpujy ja pyabøjkpitøjk

¹ Tyimdyø jōts ja paski xøwøw tpatnit, jōts ja nwindson'ajtim Jesús wa'ats ja tñija'wiñi jōts ku tō kya'pxy ja hori jōts ku ja tñajtstu'utt ja naxwiiñ'ajtin, jōts ja Dios Teety ja tñinøjxnit. Ejtp ja tpa'ayøøy ja pyabøjkpitøjk, xjats ja jade'en tpiakta'aky møk ja ejxa'an, jōts ja tñanky'ijxyi mabaat ja pa'ayo'owin ja tjagyepy.

²⁻⁴ Jōts ja Simón myajnk, ja Judas Iscariote, tō ja miku' ja wyinaty tyatøkiyi, jōts ja tyukwinmaa'ñ'aty sudso ja tka'ødu'unt ja nwindson'ajtim Jesús. Wa'ats ja tñijawi ja nwindson'ajtim Jesús jōts ku ja nay jam ñijky mja ja Dios Teety ja tō yiktsøøñi, jōts ku ja amuum tō kyutujkmø'øyi. Xjats ku dø'øn ja jam wyinaty y'a'ux'atti, winets ja tyanaagyukiyi'ñ jam kyaadyaajk jøp'am, jōts ja twejtstaajky ja wyet, jōts poop wet ja ojts ñadyatenwøø'niyi. ⁵ Xjats ja nøø t'ada'amiyi'ñ jam købuj'i'iñjotp, jōts ja pyabøjkpitøjk ja tñapakpujpinaxwa'jky, jōts ja nay jatyi ttuktati'ich ja poop wet midt ja jam wyinaty tyenwøø'n'ajtpy.

⁶ Jōts ku ja wyinaty tñakpujwa'añ ja Simón Pedro, winets ja ojts ñi'mxyi:

—Windsøn'ajtim, çmets ne'egi ndeky xpujip?

⁷ Jōts ja nwindson'ajtim Jesús ja t'adsøøy:

—Ka' mets yø ixyam xja'gyuki, mja'gyukipnimts mets yø nøjx.

⁸ Jōts yide'en ja ñi'mxyi ja Pedro:

—Ka' me mibaat ndeky xpujit.

Winets ja nwindson'ajtim Jesús ja tñimaay:

—Pøni ka' øts yø mdeky nbujy, ka'ats me n'ukmigu'ukwanit.

⁹ Winets ja Simón Pedro wyaañ, jōts ja nwindson'ajtim Jesús yiknøjmi:

—Winets ø windsøn'ajtim amuum xpujyit ja ngø' ngubajki; jōts ka' nugo ja ndeky.

¹⁰ Jōts ja nwindson'ajtim Jesús ja tñimaay:

—Øy ku ja'ayi tyeky tpujt pøn tse'abajtipnim, kumi wa'ats ja amuum. Nayide'ents meets m'anmija'win wya'adsi øy kidyimñiduki'iyi.

¹¹ Jade'en'ampy ja wyaañ ku ja ñimy: "Øy ka' niduki'iyi mdyimwya'adsidi", ja'agøjpx ku ja wa'ats tñijawi pøn ja wyinaty køykwajnip.

¹² Xjats ku ja jade'en y'abajtiyi'iñ tpujkojxiyi ja pyabøjkpitøjk tyeky, winets ja ñadyanijajni ja wyet jadigojk, jøts nay jam y'ixaajky ma ja mesi jøts ja tnimaay ja pyabøjkpitøjk:

—¿Mnija'widip tigøjxp jade'en tø ndundi? ¹³ Meets, xmaestri'ajtp meets, xwindsøn'ajtin'ajtp meets, janch tiigvajpxy kumi janch jade'en. ¹⁴ Pøni øts tamts maestri, jøts pøni øts tamts windsøn'ajtim, tøts ja mdeky nbujidi, nayide'ents meets idø'øn xuumit xem yam. ¹⁵ Tø nduk'ejxti jawyeen, jøts nayide'en xu'undit sam ø tø ndunjøpi. ¹⁶ Jøts janch øts idø'øn nwa'añ, jøts ku ka' pøn tumbi tjinaxy ja wyindsøn; uk ja jaa'y pøn kexy yø'øpy, ka'ap ja tjinaxy pøn ja kajxip. ¹⁷ Jøts pøni mja'gyukidip yø'øbi winmaa'ñ jøts jade'en xu'undit, jotkujkts x'ejxtit.

¹⁸ Jøts kidi niduki'iyip meets jade'en ndiyy; mnija'wip øts ja' pøn jaty ø tø nwi'ixy. Kuwanits jade'en yjatt sam jap jaabyety nøkyijpxy: "Jats ja tu'uk tø x'ukmidsepøjkni pøn ø mmoøt ngay n'uuky." ¹⁹ Patki'iyi øts ya'at yam nnigajpxy jøts ku jade'en nøjxk yjaty, jøts xiyjawidit xjanchjawidit ngudsøn pøn øts. ²⁰ Janch øts idø'øn nwa'añ, jøts ku øts ja xkupiky pøni pøn ø xkupøjkp ja ngudanaabyi; jøts pøni pønts øts jade'en xkupøjkp, ñayi kyupijkypts ja nayide'en pøn ø xkajxp.

Ku ja Jesús tnigajpxy sa ja Judas kyøyakiyit

²¹ Xjats ku ja wyinaty jade'en tø wya'añ, jøts ja tymchaachjotmaadyøjkii'iñ, jøts ja ojts yikxon wa'ats tnigajpxy:

—Tiy janch mee nnøjmi, jøts ku meets ja nidu'ugin pøn ø xka'ødyunwamp.

²² Winets ja pabøjkpitøjk xem yam ñawyin'ejxjø'jkidøø, jadi'iñi tkamidaabyaatti pøni pøn idø'øn yiktejp. ²³ Winets ja tu'uk, midi ja nwindsøn'ajtim Jesús janchminamyaajyip, jam ja wyinaty pyuko'øm tmøøt'a'ux'aty. ²⁴ Ja'ats ja Simón Pedro amaa'tsk ñimaay jøts tyiktø'ot pøn idø'øn yiktejp. ²⁵ Winets ja wingon tpuwa'adsiyi'iñ ja nwindsøn'ajtim Jesús, jøts ja tnimaay:

—Windsøn'ajtim, ¿pøn idø'øn mdiipy?

²⁶ Jøts ja nwindsøn'ajtim Jesús ja ojts yide'en y'adsøyi:

—Wan øts tsapkaaky tukpidasi t'uknumuji, jøts pøni pøn øts inet ja nmøøpy, ja'ats idø'øn ja wyinaty.

Xjats ja ojts jade'en tnimuji ja tsapkaaky, jøts ja ojts tmø'øpy ja Judas Iscariote midi ja Simón myajnkíp. ²⁷ Jøts ku ja Judas ja'ayi t'axajiyi'iñ ja tsapkaaky, jøts ja miku' ja ojts tyatøkyi. Winets ja nwindsøn'ajtim Jesús ja tnimaay:

—Jatyi dø'øn xungojt midi mdunwampy.

²⁸ Jøts nipøn ja tkamadooguki tigøjxp idø'øn ja nwindsøn'ajtim Jesús jade'en tnimaay ja Judas. ²⁹ Ja Judasts idø'øn wyinaty tkøø'ømit'ajtp ja meei abøjk'i'iñ, jøts winaagin jade'en wyinmaydi pø ja'ajik idø'øn tijy ja nwindsøn'ajtim Jesús tyijpy, jøts ja Judas t'atsju'uty ti jaty tsojkp ti jaty tunwamp ku ja xøøw, uk tmo'ot tigati ja ayooobi jaa'y. ³⁰ Xjats ku ja Judas wyinaty tø tkaagyixy ja chapkaaky, jøts ja ojts chøøñ. Koodsni wyinaty.

Ja jemy ana'amin

³¹ Xjats ku ja Judas wyinaty jade'en tø chøøñ, winets ja nwindsøn'ajtim Jesús wyaañ:

—Yamnims inet tiy yik'ext yiknijawit ja nmøk'ajtin, jøts nay ja Dios Teetyts myøk'ajtin nan'ky'ejxip. ³² Jøts kumi nan'ky'ejxip øts ja Dios Teety myøk'ajtin, nayide'ents ja tnanky'ejxmiyit øts ja nmøk'ajtin, jøts tsojk ja jade'en ttu'unt. ³³ Ka' meets u'nk jeky n'ukmøøtsinaañit. Nayide'en meets yam ndukmadoowa'añ sam adøm ja nmigu'uk israelit jaa'y nnimaadyøø, jøts ku ja jap ka'ap ñøjkxtit ma ø nniykxy øy øts wine'en xja'ixa'ay. ³⁴ Ixyamts nmo'odi ja jemy ana'amin: jøts ku xem yam mnamyi'øy'atidit mnamyiyujy'atidit. Nayide'en sam mee njanchøkyin, nayide'ents idø'øn mnachokidit xem yam. ³⁵ Pøni mdundip jade'en, tyumnijawidipts jade'en øy pøn jøts ku mee ø xpaabøjkpitøjk.

Ku ja Jesús ojts tnigajpxy jøts ku Pedro kyanigajpxiyit

³⁶ Xjats ja Simón Pedro tyiktiy ja nwindsøn'ajtim Jesús:

—Windsøn'ajtim, ¿ma dø'øn mnøjkw'a'añ?

Jøts nwindsøn'ajtim Jesús ja y'adsoøjøø:

—Jap ma ø nniykxy, ka'ap ø mibaat ixyam jap xpanøjkxt; xpanøjkxp øts, ja' ku jaanim.

³⁷ Winets ja Pedro wyaañ, jøts ja nwindsøn'ajtim Jesús yiknøjmi:

—¿Tigøjxipmts windsøn'ajtim ku øts ka' ixyam ndsoont? Ixyats øts, øy me ngu'oogit.

³⁸ Jøts ja nwindsøn'ajtim Jesús t'adsøøy:

—¿Janch idø'øn mwa'añ jøts ku ø xku'oogiwy'a'añ? Øts wamp, ka'aním wyinaty tsapni'aaaw y'aya'axy ku mets wyinaty tigøøjk tø xkagupiky ku me x'ixy'aty.

¹ Kidi mmaydi mdajti, ajot'atti Dios Teety, jøts ajot'ajttik øts nayide'en. ² Ma chøøni ja Dios Teety may tsinaadyaajk ja jap tmøødi; ku jeexyip ka' yjade'eni, tø meets ja jeexyip ndukmadooni. Jøts wants ø tnijkxy jøts øts ja n'a'ejxit mā mdsøønidit. ³ Jøts kuts øts wyinaty tø nnijkxy, jøts kuts øts ja wyinaty tø n'a'ejxi ja tsinaadyaajk, winets ø nme'ent jadigojk jøts mee nmøødifit, jøts nay jap mjujky'attit mā øts idø'on jap ndsinaawya'añ. ⁴ Mnija'widipxi pøni mā ø nnijkxy, jøts mnija'widipts ja tuu'.

⁵ Winets ja Tomas tnimaay ja nwindson'ajtim:

—Ka'ap øø windsøn'ajtim ja nnijawi pøni mā me mnøjkxwa'añ; ¿sudsø'ampy øøts ja tuu' nnijawit?

⁶ Jøts ja nwindson'ajtim Jesús ja t'adsøøy:

—Tum øts amuum ja tuu', ja tyiiby yjanchpi øts nayide'en, jøts ja kunuu'kxy jujky'ajtin nyajkpy. Øts køjxp ja Dios Teety yikpaatt yik'ext. ⁷ Kuk øts jeexyip xnijawidi pøni pøn øts, nayi mnija'widipts meets jeexyip nayide'en ja Dios Teety; jøts tøts idø'on ja ixa xjanija'wiñidi, mja'ejxtipts idø'on ja'.

⁸ Winets ja nwindson'ajtim ñimaajyøø ja Felipe:

—Windsøn'ajtim, ja'ayi ku øø xtyimdyuk'ext ja Dios Teety, wan øø t'ijxy.

⁹ Jøts ja nwindson'ajtim Jesús ja yide'en t'adsøøy:

—Windi'ixyip mee Felipe nminabyaajtniyidi, ¿jøts ni jade'embaat me xka'ijxy'ajtni? Pøni pøn ø x'ejxp, ñayi y'ijxy ja nayide'en ja Dios Teety; jøts, ¿sudsø'ampyts me x'amidøy jøts mee nduk'ext ja Dios Teety? ¹⁰ ¿Ka' xmbiky ku øts Dios Teety møøt n'ity, jøts ku øts ja nayide'en xmøøt'ejtni? Tuki'iyi sa jaty nnøjmidi, kidi ngø'omwinmaa'ñjøtpyip øts yø njuuty. Ja Dios Teety midit ø xmøøt'ejtp, ja' kø'øm tyunkump. ¹¹ Jøts janchja'wik øts jøts ku øts Dios Teety møøt n'ity, jøts ku øts ja nayide'en xmøøt'ejtni; uk pøni ka'ats, øyts øts ja'ayi xajanchjawit, pø m'ijxpyxi ti jaty ø ndumpy. ¹² Jøts tiy janch mee nnøjmi, pøni pøn ø xjanchja'wip, ñayi yjatp ñayi tyu'ump ja nayide'en ti jaty ø njajtpy, ti jaty ø ndumpy, jøts ja tyikne'egidit tyikaja'adit ja'agøjxpts kuts ja Dios Teety nmøøt n'ett. ¹³ Jøts tuki'iyi pøni ti jaty mee m'amidøøpy ku ø xkajpxpaattit, øtsts ja kø'øm jade'en ndu'ump, jøts øts jade'en nyikwingaxø'jkrit ja Dios Teety myøk'ajtin y'øy'ajtin. ¹⁴ Ndu'ump øts jade'en pøni ti jaty mee m'amidøøpy jøts ku øts xakajpxtit.

Ku ja Jesús wya'añ jøts ku ja Espíritu Santo tkaxt

¹⁵ Pøni xtsojpk tam meets, paduujnidik meets ja n'ana'amin. ¹⁶⁻¹⁷ Jøts nnøjmip øts ja Dios Teety jøts ja mdanigaxidit tu'uk pøn mbudøkiyidip, pøn myikjot'amøkøkiyidip, pøn ja tyiiby yjanchpi myøøt'ajtpy. Jøts ja'ats meets møøt n'ett kunaxt. May jaa'y ja kyagupøkit ja'agøjxp ku ka' t'ejxti tnijawidi. Jøts meets, tø meets ja xnijawi, pø iza'xi ja xmøødidi, jøts ja'ats mee møøt n'ett. ¹⁸ Ka' mee nadyu'uk nyiktañ, nniwimbett meets jadigojk. ¹⁹ W'ingonip ja xøøw ku ø ka' mā n'ukyik'ejxni; jøts meets, x'ejxp meets; kumi jujky øts, mjujky'atpts meets. ²⁰ Jaanims xja'gyukidit jøts ku øts ja Dios Teety møøt n'ity, jøts meets xmøøt'ejtni, jøts mee nayide'en nmøøt'ejtni. ²¹ Pøn tø tnijawi jøts pøni xpaduujniyip øts ja n'ana'amin, jade'en ja tyikniguen'exy jøts ku øts ja xjanchøky. Jøts ja'ats ja Dios Teety chokp pøni pøn ø xtsojpk, jøts ndsokp øts ja nayide'en, jøts ja'ats ø x'ejxp, ja'ats ø xnijawip ku nnanky'ejxit øts nja'.

²² Winets ja yjadu'ukpi Judas ja ñimaajyøø (nigidi Iscariotibi wamp midit ja Jesús køyapk):

—Windsøn'ajtim, ¿tigøjxp ku øøts ja ja'ayi n'ext ku nnanky'ejxit, jøts nika'ap niduki'iyi ja na'xwii'ñit jaa'y?

²³ Jøts nwindson'ajtim Jesús y'adsøøy:

—Pøn ø xtsojpk, pyadumpy ja' sa ø nwa'añ, jøts ja'ats idø'on tsokip ja Dios Teety; jøts ja'ats ø nme'emp møøt ja Dios Teety, jøts øøts ja xemikøjxp nmøøt'ett. ²⁴ Jøts pøn ø xkatsojpk, ka'ap ja tmøjpkta'aky sa ø nwa'añ. Yø kajpxy yø ayuujk iza xmadowdi, ka'øtsip yø' nja'; ja' yø' yja' midit ø xkajxp, ja Dios Teety.

²⁵ Ndukmodoogøjxtip yam tuki'iyi, njaaktyimyøøtsinaadyipnim yam; ²⁶ ja Espíritu Santots midit ja Dios Teety mdanigaxiyidip jøts øts ja xkudanit, ja' idø'on mbudøkiyidip, ja' idø'on mgajpxjot'amøjkiyidip jøts ja mdukjajtkøxidit tuki'iyi, jøts nay ja' mdukja'myajtskøiyidip tuki'iyi sa jaty mee tøn nmøjmi.

²⁷ Jotkujk nnawya'kxa'andit. Nyajkpy øts ja øy'ajtin tsuj'ajtin. Ka'ap øts jade'en nyaky sam øy pønin nugo wya'añ. Kidits mmaydi mdajti, ka' mee mdsø'ogit. ²⁸ Tøxi xmadowdi ku ø nnimy jøts ku ø nnijkxy, jøts ku ø nme'ent jadigojk jøts mee nmøøtsøønit. Kuk meets jeexyip xjanchøky, mjanchxondakp meets jeexyip ku tøn xnijawidi jøts ku nninijkxy ja Dios Teety; kumi ja' idø'on jawaani møj jøts nigidi øts. ²⁹ Patki'iyi ya'at jade'en ndukmadowdi jøts ku wyinaty jade'en yjaty jøts xjanchjawidit.

³⁰ Ka' mee møøt jeky n'ukmøøtnagyajpxniyit; ja'agøjxp ku ja wyingøñ ja Satanás pøn yikutujk yā na'xwiñi. Øy øts nmø'ajtin ja xjagamimajadaajkiyi, ³¹ jatpts jade'en jøts

jade'en tñijawit ja naḡwii'ñit jaǵ'y jøts ku ø ndsøky ja Dios Teety, jøts ku øts ja nbaduñ sa øts ja tø x'ane'emy. Tanidits jøts wan ya tssøø'ñindi.

15

Ja uvi tsa'am kipy

¹ Jade'en øts idø'øn ñamyayi sam uvi tsa'am ñiguipy, jøts ja Dios Teety jade'en sam ja jaǵ'y midu ja uvi kipy t'ejx'ejtp. ² Jøts ja tyikwinajki ja y'awaj ja y'axeeñ midu katøømp; jøts midu tøømyip, yixxon ja tyikwa'ach twibøøty twibiky ma ja jam t'ijxy sa yjatwa'añ, jøts ja jawaani may yjaaktyimdyøømit. ³ Nayide'ents meets idø'ønmi; tø mee mwatsni, ja ixpøjkin mee tø myikwa'achi midu mee tø nmø'øy. ⁴ Kidi mee xmajstutni, kumi ka'ap mee nmajstutu. Ka'axi kipy awaj tyøømi jadi'iñi ku ja kya'ity ja ñiguipy; nayide'ents meets idø'ønmi, çti mee nadyu'uk mnityu'ump ku mee wyinaty ja nja' tø x'ixmajtsniyi?

⁵ Øts idø'øn jade'en sam ja ujts ñiguipyin, jøts meets jade'en sam ja y'awaj y'axeeñin. Pøni pønts ø xkamajstutp, jøts ku øts ja nayide'en ka' nmajstutu, ja'ats idø'øn ja yja' møj wingaxøøkp; jøts ka' mee ti nadyu'uk mayi ku ø nga'ett. ⁶ Pøni pønts ja nja' xkaminamyajyiyip, ja'ats jade'en yik'ixjibep sam ja kipy awaj midu ka'øy, jøts kuts ja tyø'øst jøts ja jønjøtpy yikpikta'akt, japts ja tyø'øty.

⁷ Pøni ka' mee xmajstutu, pøni ka' meets ja n'ixpøjkin xja'dyigøjyidi, amidowdits pøni ti mdsojktip jøts meets ja myikmo'ot. ⁸ Ku yixxon xpadundi ja Dios Teety yja' sa tssøkyin, jade'en'ampyts ja y'øy'ajtin myø'ajtin yikpa'ixy, jøts nayide'en idø'øn yiknijawit ku meets idø'øn xjanchpabøjkpi'aty. ⁹ Jade'en mee ndsøky sam øts Dios Teety xtsøkyin; tun'ejtik meets yø nja' ku meets ja tsojkin ndami'ity. ¹⁰ Pøni xpaduujnidip øts ja n'ana'amin, jade'en'ampyts mee møøt m'ettit øts ja ndsojkin, nayide'en ñamyayi sa øts ja nDeety y'ana'amin nbaduujniyi, jade'ents øts idø'øn ja chojkin nmøøt n'ity.

¹¹ Jade'en'ampy meets jade'en nnøjmi, jøts mjotkujk'attit nayide'en sam øts, jøts ejtni xoni x'ejxtit. ¹² Ya'at øts idø'øn n'ana'amin'ajtpy: øy yixxon xem yam mnamyayidit mnachokidit, nayide'en sam øts ja tsojkin nbikta'aky sa mee ndsøky. ¹³ Jade'en idø'øn ja tsojkin møj yikjagøpy pøn amuum nayøjxip, jøts ja myigu'uktøjk tkudani jøts jujky'ajtin ja tpaattit. ¹⁴ Meets idø'øn nmigu'uk'ajtpy pøni mdundip jade'en sa ixa n'ana'amdi. ¹⁵ Ka' mee ndijy jøts ku mee mdumbi, kumi ka'ap ja tumbi tñijawi pøni ti jaty tyumpy ja wyindsøn. Nmigu'uktijpyts meets yam, ja agøjxp ku tuki'iyi tø nduknija'wigyøxti sa jaty øts ja Dios Teety tø xnøjmi. ¹⁶ Kameedsipxi tø xpikta'aky; pø øtsxi mee køø'm tø nwi'ixy, jøts mee tø ndanipiky jøts nøjx ja mdunk yixxon xyikwingaxøøkti, jøts wan tmøji wan tkaja'aji. Jade'ents ja Dios Teety mmo'ojidit pøni ti jaty m'amidoodip ku ø xkajpxpaattit amumjoojt. ¹⁷ Yø' idø'øn nda'ana'amdip, jøts xem yam mnabya'ayowidit jøts ja tsojkin xjagyaptit.

Ku ja ka'øyya'a'dyi tkatsokti ja Jesús møøt ja pyabøjkpitøjk

¹⁸ Pøni mmi'ajkiyidip ja' pøn ya naḡwiñ, mnija'widipxi jøts ku øts ja jawyeen nayide'en tø xuñ. ¹⁹ Ku meets jeexyip nayide'en m'adi'ich sam pøn ya naḡwiñ wyinmaydi, nayide'ents meets ja jeexyip mdsøkyiyi sam ja tssøkyin pøn nayide'endi sam ja'ajindi. Øts meets ya tø nwi'ixy ya naḡwiñ ma nayide'en chøøni pøn jade'en winmaadyip, jøts ja agøjxp myikmi'ekyidi kumi ka'ap ja'abi winmaa'ñ x'ukykyø'øñidi sam ø pøn naḡwiñ. ²⁰ Ja'myatstis sa tø nnøjmidi, jøts ku ka'ap ja tumbi ñamyøjyit sam ja wyindsønin. Tøbaats ø nyikpawidity ku ngayikupiky, nayide'ents meets idø'øn myiktumit; jøts pøni xpaduujnidip øts ja n'ixpøjkin, nayide'ents meets ja m'ixpøjkin yikpadumit. ²¹ Øts køjxp idø'øn jade'en myiktu'undit ja agøjxp ku ka' tñijawidi pøn ø xkajxp.

²² Ka'ap ja jeexyip ti pøkyti, kuk øts jeexyip ngamiñ, kuk øts ja jeexyip ngaduknijawidi. Xyam ti ñikyajpxtip jøts ja pyoky kyayiktatubati; ²³ ja' pøn ø xmi'ajkip, ñayi myi'ajkip ja nayide'en øts ja nDeety. ²⁴ Ka'ap yø jeexyip ti pøkyti kuk øts yø jeexyip ka' ti nduk'ejxti midu tø nduñ yø' wyingujkyti, sam ka'ap pøn jade'en tø tyuk'ijxyidi; tø yø t'ejxnidi, ja ti ja'ats yø myija'widip, pø xmi'ajkidipxi øts yø', jøts ñayi myi'ajkidip yø nayide'en ja Dios Teety. ²⁵ Ja'agøjxpts ya'at jade'en yjaty kumi ka'pxy jade'en yjatt sa ya'at kajpxy ayuujk wya'añ, midu jap køxja'ay yø' kyutujkjøtpyti: "Nadøki øts yø xmi'ekyidi."

²⁶ Paty øts ja Dios Teety xuxakt ja Espiritu Santo jøts øts ja nja' xkajpxiyit, pøn pudøjkp kajpxjot'amøjkp, pøn nayide'en tmøøt'ajtp ja tyiiby yjanchpi. ²⁷ Jøts mee nayide'en ja nja' xkajpxmiyit, pø tøxi meets ja x'ixy sa jaty y'ejxi tyiyi, sa jaty tø ngajpxwa'kxtso'ondaajkyim østi ixyambaat.

16

¹ Jade'en'ampy jade'en nnøjmidi jøts kidi nugo winmayjimbetti winmay'adøjti. ² Myikwojpidsoømp myikajxpidsoømp meets jap tsaptøjkjøtpy, østi yja'at paat ja xøøw ku ja jaǵ'y wya'andit jøts ku Dios yja' ja tpaduujnidi ku meets ja myik'oogiyit. ³ Ja'agøjxp

ja jade'en y'adø'østtit ku ja nijuuni tkanijawidinim pøni pøn ja Dios Teety, jøts pøni pøn øts. ⁴Jøts ja'agøjxp ya'at jade'en ndukmadowdi ku wyinaty jade'en yjatwa'añ, jøts xja'myatsttit jøts ku yø tø ndukmadoonidi.

Ti dø'øn ja Espiritu Santo tyumpy ya naxwiiñ

'Ka' meets yø jade'en patki'lyi ndukmadøøy, kumi ja'ajt øts kø'øm.

⁵Ixyamts ø nnøjkxwani tsinaabyi ma ja jap mididi ø xkajxp; jøts øts ja nmøøtsinaamyit jøts nipøn tamts mee nidu'ugin tkayiktiy pøni ma øts idø'øn nnijky. ⁶Jotmay mee ne'egi jinaxy tø mjaaktyimdyatøkiyi, ja'agøjxp ku yø jade'en tø ndukmadowdi. ⁷Janch idø'øn nnøjmidi jøts ku ne'egi jade'en m'øy'ajtxidit jøts ku nnøjkt. Ku ø nganøjxt, nijuunits ja kyamiñ mididi mbudøkiyidip mididi mgajpxjot'amøjkiyidip. Ku nnøjxt, kø'ømts øts ja ngaxt. ⁸Jøts ku dø'øn ja nøjx myiñ, ja' ja tyu'ump jøts ja naxwii'ñit jaq'y ja ttukjawit ja pyøky jøts ku yjanchpøjkpitumbijaa'yidi, jøts ku ja tu'ugyi ja winmaa'ñ sudso tyø'ødit sudso tyuda'aktit, jøts ku Dios ja pyayø'øyidit. ⁹Ja'agøjxp pyøjkpitumbijaa'y'atti ku ø ka' xjanchjawidi; ¹⁰ñija'widipts nøjx sa y'ejxi tyiyi mididi'ibi øy mididi'ibi paat'ajtidip, kumi jam ø nnijky ma Dios Teety, jøts ka' mee x'uk'ejxnit, ¹¹jaanimts tjä'gyukidit ja Dios pyayø'øyin jøts ku tyiy'ajtingøjxp yikutuky, pø tøxi wyinaty ja tyi'ajtin tyaky, jøts ja miku' yikastigimo'ot mididi møj y'ity ya naxwiiñ.

¹²Jap øts may ja madya'aky njajagyepy mididi ndukmadoowandip, ka' inet xja'gyukidit ixyamyi. ¹³Kunim mye'ent ja Espiritu Santo, ja'ats ja tuki'iyi mduk'ixpøjkøxidip sudso tyiyi yjanchi; ka'axi kyø'øm ja' ja tyiktu'unt pøni sa jaty ja wya'añ, ja' ja kyajpx pøni sa jaty pøni ti jaty ja myadøøpy, jøts ja mdukmadowidit ti jaty tunwajnipnim. ¹⁴Jade'en'ampyts øts ja winja'win windsø'jkin nbaatt, kuts ja ngajpxy ja n'ayuujk xpadu'undit sa mduknijawiyidi ja Espiritu Santo. Øts ja ngajpxmyo'op. ¹⁵Nayide'ents ja Dios Teety kyajpxy ja y'ayuujk sam øts nja'ajin, paty øts jade'en nwa'añ jøts ku nayide'ents nmo'ot ja ngajpxy ja n'ayuujk, nayide'ents yø mduknijawiyidit.

Xondaajkin ja nøjx wyimbidsimy ku njotmay'o'jkindit

¹⁶'Ka' y'ukjajknit ku mee ka' x'uk'ejxnit, ku wyinaty waani tø ñaxy ja tiempi jaanimts ø x'ejxtit jadigojk, pø jamxi ø nnijky ma jam Dios Teety.

¹⁷Winets ja pyabøjkpitøjk winaagin nixem niyam ñawyajnidøø:

—¿Ti yø jade'en tyijpy ku yø xnimaa'yin jøts ku ka' y'ukjajknit, ku yø ka' n'uk'ejxna'ant, jøts ku waani ñaxt winetnimts ja n'ejxindit jadigojk ja'agøjxp ku ñijky jam ma ja Dios Teety?

¹⁸¿Ti dø'øn yø jade'en tyijpy jøts ku "ka' y'ukjajknit"? Ni kyayikja'gyuki niwine'en pøni ti dø'øn yø jade'en tyijpy.

¹⁹Jøts ja nwindson'ajtim Jesús ojts ja t'ixy jøts ku ja pyabøjkpitøjk yjawi tyiibøkwa'añiyi, jøts ja tñimaa'y:

—Tøxi nnøjmidi jøts ku ka' y'ukjajknit ku mee ka' x'uk'ejxnit, kuts wyinaty waani tø ñaxy ja tiempi jaanimts ø x'ejxtit jadigojk. ¿Kidi yø'øjip meets ixja mnyayktøøjiyidip? ²⁰Jøts tyi janch øts idø'øn nwa'añ ku mee nnøjmi, jøts ku nøjx ja yajxin x'ejxti, ku nøjx ja jotmay'o'jkin xpaattit yam ja naxwii'ñit jaq'y xyonda'akti. Jøts ka'ats yjade'eni, øy mee mabaat mjanty-imyjajotmay'øøky, xondaajkin ja nøjx wyimbidsimy ku jade'en mjotmay'oockti. ²¹Jade'en idø'øn ñamyayi yjaty sam ja tø'øxyøjk ku ja kya'axwa'añ, janch winmay jotmay yjaty ku tø tpaaty ja tiempi ku ja y'u'nk pyøjkø'øknii; ku tø tminawya'kxniyi ja maxu'nk nika'ap ja t'ukja'myajtsni jøts ku y'u'nk ja tø pyiky, ja'agøjxp ku ja xyonda'aky ku ja tø tyikaxi'iky tu'uk maxu'nk ya naxwiiñ. ²²Nayide'ents meets idø'øn mjaajtnimi, mjaanchjotmay'oo'ktip ixyam; wimbetp øts jøts mee nminabya'adit jadigojk, winetnimts ja xondaajkin xpaattit yikxon, jøts nipøn ja mgapøjkxiyidit.

²³Jøts ja'abi xøøw ka' ø ti x'ukyiktøønidit. Janch meets idø'øn nnøjmidi, jøts ku ja Dios Teety tuki'iyi mmo'ojidit pøni ti jaty ja m'amidoodip øts køjxp. ²⁴Østi ixyambaat ka'anim ti x'amidowdi øts køjxp; amidowdi pøktowdi, mbaattip ja' jøts jade'en mxonjattit.

Tøts ja Jesucristo tmimajada'aky mididi ja naxwii'ñit jaq'y yikwindigøøpy

²⁵'Madya'akyøjxp ya'at yam nugo tø ndukmadowdi jøts xamimadoodowidit; ja'atp ja xøøw ku ka'ap jade'en nøjx n'ukmigajpxnidi abiky madya'akyøjxp, wa'ats meets ja ndy-imdyukmadoonit nøjx pøni sa ja Dios Teety y'ejxi tyiyi. ²⁶Jøts ja'abi xøøwts øts køjxp ja Dios Teety x'amido'odit xpøktso'odit ja øy'ajtin; jøts nika'ap øts yam ndyimwya'añ jøts ku øts n'amido'ot ja Dios Teety jøts mee nni'amidowit. Ka'ap chøkyi jøts kø'øm n'amido'ot, ²⁷pø mdsøjkp meets ja Dios Teety. Jade'engøjxpts ja mdsøkyidi kumi xtsojpk meets nayide'en, jøts tøts xjanchjawidi jøts ku øts Dios Teety xkexy. ²⁸Jam ø tø ndsøøn ma Dios Teety jøts øts ya tø nmiñ ya naxwiiñ, ixyamts øts inet nmajtstu'utwangojmi ja naxwii'ñit, jøts ø n'awimbetiwyaañ jadigojk ja Dios Teety.

²⁹Xjats ja pyabøjkpitøjk wyandøø:

—Ëxyamnīm inet tiy janchwə'ats xnigajpxñīm, ka' x'ukyiktuni ja abiky myadya'aky midī kayiktamimadodə'wip. ³⁰ Ëxyamnīmts əts inet njanch'ixy njanchnijawī jəts ku tuki'iyi xnija'wigyixy, jəts ku ka' chəkyi jəts ku əy pən kuwani mdyimdyiibyəkīyit. Ja'agəjpx əs njanchjawī jəts ku jam mdsəəñ mā Dios Teety.

³¹ Jəts nwindəsə'ajtin Jesūs yide'en t'adsəəy:

—Əjəts xjanchja'wiñidip əts ixyam? ³² Ja wyingəñ jəts tə yja'əty ja xəəw ja juməjt, jəts tymñay'ixyamyi, ku meets inet m'agakpaktit pə mā pənjəbən ñəjəkt, jəts əts inet nadyu'uk xnika'aktit. Ka'ap ə nadyu'ugi, jats ja Dios Teety xməə'tity. ³³ Ndukmadoogəjxtip ya'ət yam tuki'iyi, jəts ja əy'ajtin jotkujk'ajtin xpaattit ku ə x'ajot'attit. M'ayo'ombaattip ya naxwiñ; jotməkts mnabyiktə'əgidit, təts əts inet nmimajada'aky midī ya naxwiñ yikwindigəəy.

17

Ku ja Jesūs tni'amidowī tñibəktəswī ja pyabəjkpitəjk, jəts ja ttukmadəy ja Dios Teety

¹ Xjats ku ja nwindəsə'ajtim Jesūs jade'en wyən'abəjtīyī'ñ, jəts ja ojts jam tsəjpwem pyat'ixy, winets ja wyaəñ:

—Dios Teety, tə ja hori kya'pxy. Yikməjtəjkikts əts, kunuu'kxyja'wikts əts, jəts me nayide'en nyikməjtəkit, jəts me nayide'en myikunuu'kxyjawit. ² Metsxi tə xmə'əy ja kutujk jəts əts naxwiñ'ñit jaa'y ja n'ijty; nda'ana'amdit, jəts ja tpaattit ja jujky'ajtin xemikəjpx pən jaty me tə xkəmə'əy. ³ Jəts jade'en'ampy yikpaəty ja jujky'ajtin xemikəjpx ku tu'ugyi mets Dios Teety myikjanchjawī, sam nayide'en ja Jesucristo, pən mets ya tə xkəxy naxwiñ.

⁴ Tə əts ja ndunguixy jade'en midī me tə xa'ane'emy, jade'engəjpxts myikməjəwī myikunuu'kxyjawī ya naxwiñ. ⁵ Məəkyts əts jam mwingujky nay ja'abi mək'ajtin midī əts y'ijty nməə'tajtpy məət mets ku ka'anīm wyinaty naxwiñ'ñit y'əyinim.

⁶ Jəts ja jaa'dyi midī me kə'əmə tə xwiwich ya naxwiñ midī me tə xagədəki, təts əts ja nduknija'wigyəxti pən pən mets. Jəts mets ja y'ijty mjaa'y'ajtpy, jəts mets ja tə xagədəki. Təts ja tpadundit mets ja m'əgyajpxy mets ja m'əy'ayuujk. ⁷ Nija'winidip ja ixyam wə'ats ti jaty me tə xmə'əy jəts ku mets ja xja'aji. ⁸ Təts əts ja ndukmadəwdi ja əgyajpxy ja əmyadya'aky midī me tə xukmadəy, jəts təts ja tkupəkti, təts ja tñijawidī jəts ku ja yjanchi jəts ku əts jam ndsəəñ mā mets jam. Tə ja tjanchjawidī jəts ku me tə xkəxy.

⁹ Yə'əts ə nni'amidoo'widip pən jaty me tə xmə'əy ja'agəjpx ku ja xja'aji; jəts nigidi ja'abi nni'amidoo'wip pən əts n'əkabadundi. ¹⁰ Midī jaty ə nja'ajtpy, nayi mets mja' ja', jəts nay ja'ats ə nja'ajtməp; jəts nayi əts nmək'ajtin nay əts ngunuu'kxin ja xyiktuujnidip.

¹¹ 'Əts, ka'ap əts n'ukyaə'ajtnit ya naxwiñ; yə'əts ja təndip, jəts me nninəjkxnit məətsinaabyi. Kunuu'kxy Dios Teety, agə'əduk axajtk mmək'ajtingəjpx pən jaty ə tə xagədəki jəts nī'amuki nī'aga'pxi y'əttit, kyanamyajtstu'udidit nayide'en sam adəmin. ¹² Ku məs yə ja y'ity nməə'tətti ya naxwiñ, n'əjx'əjttip əts yə', ja mək'ajtin ə nyiktumpy midī me tə xmə'əy, ja'ats əts yə nda'agə'ədujktip nda'axajtujujktip. Nī tu'ugin yə tə kyawindigəydi, ja'ayim idə'əñ jade'en tə jyaty midī'iyim y'ijty windigəy'əjtnip, jəts jade'en ka'pxy tpaəty sə ja mgajpxy sə ja m'ayuujk xyiktaəñ.

¹³ 'Ëxyamts me nninəjkxnit mā mets jam; jəts ku njaaknayaə'aty ya naxwiñ, ja'agəjpx əts jade'en nwa'əñ jəts ja mja' yjotkujk'attit sam ə njotkujk'atīy. ¹⁴ Tə əts ja ndukmadoogəxti ja m'əgyajpxy ja m'əy'ayuujk, ja'ats mmi'ajkiyidip pən ja ka'əwīnmaa'ñ tjəgyajp. Ja' yiktami'ajkidip ku ja yjade'embi winmaa'ñ tka'ukyiktunidi, nayide'ents əts ka' nyiktuñ ja yja'adi. ¹⁵ Kaja'ajipts ə n'amidəəpy jəts xwəəbidsə'əmt ya naxwiñ, ja' n'amidəəpy jəts xkuwə'ənt xkubəkt, jəts mikul' yja' kidi myajada'aky. ¹⁶ Nayide'en ja'adi sam əts, ka' nyiktuñ ja kya'əwīnmaa'ñ. ¹⁷ Pəjkə'əkts əjxə'əkts mdy'ajtingəjpx njanch'ajtingəjpx; pə tiy janchxi ja mgajpxy ja m'ayuujk. ¹⁸ Nayide'ents sam me tə xaniguxy ja naxwiñ'ñit jaa'y, nayide'ents əts ja yam ndanipəkti ndani'əjxti pən ya naxwiñ ja ka'əwīnmaa'ñ tjəgyajptipnim. ¹⁹ Amumjojt əts njaaktyimñadyamiyoxiyit yə'əgəjpxti, nayide'ents ja ñadyamiyoxiyidit ku ja mgajpxy ja m'ayuujk tu'undit midī tiy midī janch.

²⁰ 'Kidi ja'ayip ə nugo ndyīmñi'amido'owidip, nayide'en ja'amidip pən ə xjanchjawīwyandipnim ku ja myigu'uk ja tmadoojidit ja əgyajpxy ja əmyadya'aky. ²¹ Jəts ja' əts yam n'amidəəpy jəts tu'ugyi ja wyinmaa'ñ tyik'əttit; jəts tu'ugyi y'əttit məət adəmə, nayide'en Dios Teety sam mets xməə'tity jəts sam me nməə'tity. Jəts wan tu'ugyi ja wyinmaa'ñ tpiktə'akti jəts jade'en ttukjanchjawidit ku me tə xkəxy, pən ja ka'əwīnmaa'ñ tjəgyajptip. ²² Tə əts ja nmo'odi nay ja'abi mək'ajtin midī me tə xmə'əy, jəts tu'ugyi wyinma'adyit nayide'en sam adəmə nja'. Tu'ugyi nayide'en mets mja', jəts nayide'ents əts nja'ami. ²³ Əts ja məət nnamyayidit, jəts mets xməətnamyaa'ymiyit jəts ja tu'ugyi y'əttit, jəts jade'en ja naxwiñ'ñit jaa'y t'əjxtit tñijawidit jəts ku me tə xkəxy, jəts ku mets ja xjanchəky sə me xtsəkyin.

²⁴ "Dios Teety, metsxi ja tō xagōdōki, jōts ja'ats ō ndsōjkpy jōts ja yjap'attit mā ōts jap ndsinaawya'añ, jōts t'ejxtit ja mōk'ajtin ja ōy'ajtin midī me tō xmō'ōy; jaayim me xtsōky ku ka'anīm wyinaty naxwii'ñit y'ōyinim. ²⁵ Mets Dios Teety tiy'ajtin janch'ajtin mmōot, jōts ka'ats ja naxwii'ñit jaa'y mnijawiyi; jōts ōts, nnija'wip mets; jōts yō pabōjkpitōjk, ñija'winidip yō' jōts ku me tō xjanchkexy. ²⁶ Tō ōts ja ndukmadowdi mbōn mets jōts njaaktukmadowandipnim ōts. Jade'ents sa mets xpa'ayōyin, nayide'ents ttaba'ayoomidit ja myigu'uktōjk. Nmōot'etpyim ōts yō' y'agujkpti jade'en.

18

Ku ja Jesús ojts yikmach

¹ Xjats ku ja nwindson'ajtim Jesús jade'en wyinaty tō wya'añ, winets ja tmōotsōō'ñ ja pyabōjkpitōjk, jōts ja ñōjkxwa'andi jam jaduktamajñ ku ja ttanaxtit ja nōō midī yik-tej Cedrón. Jam tu'uk ja kam mā y'ity ōy ti tsa'am, jamts ja nwindson'ajtim Jesús tmōotkuyō'ōyiyi'ñ ja pyabōjkpitōjk. ² Jōts ja Judas, pōn ja wyinaty ixam ka'ōdyunwajñip, wa'ats ja t'ijxy'aty ja'abi et, pō jamxi ja nwindson'ajtim Jesús wyinaty kawinaak ojk tō ñamyukyidi mōot ja pyabōjkpitōjk. ³ Jade'en'ampyts ja Judas jam ojts tmōotja'aty tukpiky ja soldaditōjk mōot ja jaa'dyi midī t'ejx'ejttip ja tsaptōjk, ja teetywindsōndōjk ja fariseotōjk ja kajxidip, tumda'o'jk mōot ja jam yja'ttōō kunō'ōky. ⁴ Ñija'wiñip ja nwindson'ajtim Jesús ja wyinaty sa jaty ja yjatwa'añ kyubatwa'añ, winets ja twinguwa'jkii'ñ, jōts ja tyiktiy:

—¿Pōn dō'ōn m'ixaadyip?

⁵ Jōts ja ojts yide'en y'adsowdi:

—Ja Jesús ōō n'ixaapy, ja Nazaretit jaa'y.

Jōts ja nwindson'ajtim Jesús ja t'adsōy:

—Ōtsimts ja'.

Jōts ja Judas midī ka'ōy'adōtsp, ixam ja tmōōdi ja mayjaa'y. ⁶ Jōts ku ja nwindson'ajtim Jesús wya'añ: "Ōtsimts ja'", winets ja jadi'iñi y'ixnōjkxtōō jōts ja kya'tsjimbejtōō. ⁷ Winets ja nwindson'ajtim Jesús ja jadigojk tyiibōjkidōō, jōts ja ñimaajyidōō:

—¿Pōn dō'ōn m'ixaadyip?

Jōts ja wyandōō:

—Ja Jesús, ja Nazaretit jaa'y.

⁸ Jōts ja nwindson'ajtim Jesús ja tnimaay:

—Tōxi nnigajpxy jōts ku ja y'ōtsi. Pōni ōts tam x'ixaadyip, majstuttit ōts yō nbabōjkpitōjk.

⁹ Jade'en'ampy ja jade'en yjaty, jōts ja jade'en ka'pxy tyimyjaty ku ja nwindson'ajtim Jesús wyinaty yide'en kō'ōm tō wya'añ: "Pōn jaty ōts ja Dios Teety tō xagōdōki, ni tu'ugin ja tō kyawindigōydi." ¹⁰ Jōts ja Simón Pedro jam wyinaty tō tnixaji tu'uk ja tsujx, ja'ats ja ojts tuuty, jōts ja ttaxikpo'otuujty ja jaa'y midī txōōw'ajtp Malco, ojts y'aga'ndyatsk ja tyimgyajtspō'jtiiy, ja teetywindsōndōjk idō'ōn ja tyumbi jade'en jajtp. ¹¹ Yide'en ja nwindson'ajtim Jesús tnimaay ja Pedro:

—Pikta'ak yō mdsujx nay jap mā tō xjuuty. ¿Sa me mwinmay, uk ja ōts idō'ōn xiyy ngagupōkt ja ayo'on midī ōts ja Dios Teety tō xanibiktaagi?

Ku Jesús yiknajtswaq'wiyi'ñ jam mā teetywindsōn

¹² Xjats ja soldaditōjk, mōot ja' pōn tnigubajk'ajtp jōts mōot ja tsaptajk, ojts tmatsti ja nwindson'ajtim Jesús, jōts ja ojts tkōwōōndi tkōxojtsti. ¹³ Jōts ja tyiknōjkxtōō mā ja Anás jam tyōjk midī ja Caifás tyeety myō'jt'ip, midī jam wyinaty ja'abi jumōjt teetywindsōn'ajtp. ¹⁴ Nayi Caifás idō'ōn wyinaty yide'en tō tnōjmi ja israelit jaa'y, jōts ku ne'egi jade'en tyimy'ōy'att jōts tu'ugyi ja jaa'y tku'oogit ja kajp.

Ku ja Pedro tku'iñ jōts ku ja ka' t'ijxy'aty ja Jesús

¹⁵ Jōts ja Simón Pedro mōot jadu'uk ja myibabōjkpi tpanōjkxti ja nwindson'ajtim Jesús. Jōts yik'ijxy'ajtp ja' ja yjadu'ukpi, ijxy'ajtp ja teetywindsōn ja', ja'ats jap tyimyōōtōjkimyyaa ja nwindson'ajtim Jesús jap windsōn tyōjk'agui'py; ¹⁶ jōts ja Pedro jap tya'añ mā yiknidōki ja tōjk. Ja'ats ja yjadu'ukpi jap ñibidsōōm midī ijxy'ajtp ja teetywindsōn, jōts ja ojts tminagyajpxyi ja tō'ōxyōjk midī jap tōjk'adinaapy, jōts ja tyiktōjkii'ñ ja Pedro. ¹⁷ Winets ja tō'ōxyōjk midī tōjk'adinaapy, y'amidoōjōō ja Pedro:

—¿Kidi metsip yō jaa'y mbabōjkpi'ajtpy?

Jōts ja Pedro t'adsōy yide'en:

—Ka', ka'axi ja y'ōtsi.

¹⁸ Jōts kumi xujxpts wyinaty, jōts ja tumbitōjk jōts ja tsaptōjktajk jap ja wyinaty tō tyikmōjidi ja jōōn, ja'ats ja jap wyindanaadyip jōts ja jap xyamdi. Jōts ja Pedro ixam idō'ōn ja tmōōtxami.

Ku ja teetywindsøn tyiktøøbinaxw'a'ky ja Jesús

¹⁹ Xjats ja teetywindsøn tyiktøøbinaxwaa'jky ja nwindsøn'ajtim Jesús pøn jaty idø'on pyabøjkpitøjk'ajtpy, jøts ti dø'on ja ñanky'ixpøjkip. ²⁰ Jøts ja nwindsøn'ajtim Jesús ja t'adsøøy: —Tø ø ngajpxy mayjaa'y'agujky øy madsoo; ejtp ø nyik'ixpiky ma jaty tsaptøjk, jøts nayide'en ma ja møj tsaptøjkmi ma israelit jaa'y ñamyukyidi, jøts ka'ap øts øy ti n'amaa'tsk'aty ku ø ti nnigajpxy. ²¹ ¿Tigøjxp ku øts ja xyiktiy? Ja' mets ja myiktøøp pøn jaty ø tø xmadooji, jøts wan ja tñigajpxti pøni sa jaty øts idø'on ja tø nnøjmidi. Ja' ja tñija'widip pøni sa jaty øts ja tø nnøjmidi.

²² Xjats ku ja nwindsøn'ajtim Jesús jade'en wyaañ, jøts nidu'ugin ja tsaptajk ja ojts wyingugoxiyi, jøts ja ñii'mxyiyi:

—¿Jade'en yø m'aaw xa'adsøy jøts jade'en xnøjmit yø teetywindsøn?

²³ Jøts ja nwindsøn'ajtim Jesús ja yide'en t'adsøøy:

—Pøni tødam ø ngajpxigøy, nigajpxts midii'ibi dø'on mga'ømyadøøpy; jøts pøni øydam jade'en sa ø tø nwa'añ, ¿tits ku øts xkøxy?

²⁴ Winets ja Anás ja ojts kyexyi wiiñ ke'kxy, jøts ja jam ñøjkxt ma ja Caifás, midii teetywindsøn'ajtp.

Ku Pedro jadigojk wya'añ ku ja ka'ap t'ejxi ja Jesús

²⁵ Exajp idø'on ja Pedro tyani, yjoo'kxpiky jap jøn'ajpy, ku ja yiknimaay:

—¿Kidi metsip yø jaa'y mbabøjkpi'ajtpy?

Jøts ja Pedro ja ka' tkupiky, yide'en ja wyangojmi:

—Ka', ka'axi ja y'øtsi.

²⁶ Winets ja yiktøøji tu'uk ja teetywindsøn tyumbi midii ja jaa'y myigu'uk'ajtpy, midii ja Pedro wyinaty tø txiktsajstutu'uty jøts ja tyatsk tyimyikwinajkiyøø, ja'ats waañ:

—¿Kidi metsip jap tø n'ixy jøts ku mets ja jap y'ity xmøødi jap tsa'amgamjøtpy?

²⁷ Jøts ja Pedro ja jadigojk ka' tkupøjkømi, winets nay jatyi y'ayaajxy tu'uk tsapni'aaaw.

Ku Jesús twinguwa'jkiyii'ñ ja Pilato

²⁸ Jøts ja nwindsøn'ajtim Jesús ojts yikwaadsøøñ jam Caifás tyøjkjotp, jøts ja yikwaañijky ma ja møj windsøn kyutujktaajk jam. Xiiñiwyani, jøts ja israelit jaa'y nika'ap tyøjkidøø jap kutujktaajkjøtpy, jøts ja ka'ap tyiktigøøwya'andi ja kyostumbri, pøky idø'on ja' ku ja jade'en y'adø'østtit, ka'ap ja t'ukaañidit ja paski xøgaaky ja paski xø'uuky ku ja a'ux ja tyiknaxtit. ²⁹ Ja'agøjxp ja møj windsøn Pilato jam ojts pyidsimy jøts ja myigajpxwa'añidi, yide'en ja ojts ñii'mxyidi:

—¿Ti yø jaa'y mdani'øø'nidip?

³⁰ Jøts ja y'adsoodøø:

—Ku yø jeexyip kyapøkyjaa'y ka' mets yø jeexyip ya tø myikttagødøki.

³¹ Winets ja Pilato ja ñimaajyidøø:

—Møødidi, jøts xiidyu'undit jade'en pøni sa ja mgutujk wya'andi.

Jøts ja israelit jaa'y y'adsoodøø:

—Øøts, ka'ap øøts xpaat'aty jøts øøts øy pøn nyik'oookt.

³² Jade'en ja ojts ka'pxy jyaty sa ja nwindsøn'ajtim Jesús ja wyinaty tø tñigajpxy jøts ku ja jade'en y'øokt. ³³ Xjats ja Pilato jap jadigojk tyøjkii'ñ jap kyutujktaajkjøtpy, jøts ja ojts tyajxi ja nwindsøn'ajtim Jesús, jøts ja t'amidøøy:

—¿Mets idø'on israelit jaa'y mjanchwindsøn'ajtip?

³⁴ Jøts nwindsøn'ajtim Jesús ja tñimaay:

—¿Køøøm mets jade'en mwinmay jøts mets jade'en xyiktiy, uk pøn jade'en tø mdamimadya'agyi jøts ku ø nja'aji?

³⁵ Jøts ja Pilato ja y'adsoojøø:

—¿Ti israelit jaa'yimts øts? Køøømxii yø mmigugajp jøts yø teetywindsønøjky ja myikmiñiyi jøts mets ya nyikttagødøki. ¿Ti dø'on tø xuñ?

³⁶ Jøts nwindsøn'ajtim Jesús ja yide'en t'adsøøy:

—Windsøn'ajtp øts, ka' øts nja' yjade'eni sam pøn yja' ya naxwiiñ. Ku jeexyip jade'en, tø øts nbabøjkpitøjk jeexyip xnitseptunidi, jøts øts jeexyip ngayikttagødøki ja israelit jaa'y. Kayaa'ip øts ngutujk.

³⁷ Winets ja Pilato ja ojts ñii'mxyiyi:

—¿Jøts mjanchwindsøn mets idø'on?

Jøts nwindsøn'ajtim Jesús ja t'adsøøy:

—Ja' øts sa ixa mwa'añ, windsøn øts. Tø ø ngaxi'iky ku øts ya naxwiiñ tø nmiñ jøts ø nnigajpxt ti tiy'ajtin'ajtp, ti janch'ajtin'ajtp. Pøn jaty ja xmimadoodip, xmadojidipts øts nja' ja' sa jaty ø nwa'añ.

³⁸ Jøts ja Pilato ja ojts ñii'mxyi:

—¿Jøts ti dø'on tiy'ajtin'ajtp janch'ajtin'ajtp?

Ku Jesús ñidujkiyi'ñ jøts ja y'ookt

Jøts ku ja Pilato jade'en t'ukuyiktiy, jøts ja ojts pyidsimy jøts ja tminagya'jpxwa'añi ja israelit jaa'dyi, jøts ja tnimaay:

—Ka' øts yø jaa'y nbøky'ixy. ³⁹ Jade'ents mee xkostumbri'aty jøts øts nidu'ugin nyik'awa'atspidsø'ømt ja pøkyjaa'y, ku meets ja x'amidøy ku paski xøøw: ¿jøts mdsøjktip jøts wan øts yø mwindsøn tnajtsmatsi jadi'iñi?

⁴⁰ Winets ja niduki'iyi møk wyandøø:

—iKa' yø' xyik'awa'atspidsø'ømt! iYø Barrabás myik'awa'atspidsø'ømp!

Jøts møj maa'tspi dø'øn ja Barrabás.

19

¹ Xjats ja Pilato ojts tnankmyachi ja nwindsøn'ajtim Jesús, jøts ja ojts tnankwyøpyi. ² Jøts ja soldadi ja ojts ttgujandi tu'uk ja windsøn kujan, jøts tum kujp awiity, jøts tsuu'nk wet ja ojts ttaxoxti. ³ Jøts ja ojts wingon twingunøjkxidi, jøts ja ojts tnøjmid:

—iMøj mets, pøn ja israelit jaa'y wyindsøn ukmayip!

Jøts ja ojts twingoxti tjøpkoxti wyemp y'am.

⁴ Winets ja Pilato ojts jadigojk pyidsimy, jøts ja ojts ñii'mxyidi:

—Ejxti nijawidi, nyikpidsimpy øts yø ya jøts xnijawidit jøts ku øts yø niti ngadapøky'ixy.

⁵ Jøts ja nwindsøn'ajtim Jesús pyidsimy, ixam tkujan'aty ja kujp awiity jøts ja tsuu'nk wet ja twet'aty. Jøts ja Pilato ja ojts ñimaagyojmiyidi:

—ixya dø'øn ja jaa'y!

⁶ Xjats ku ja teetywindsøndøjk ja t'ejxtøø jøts ja tsaptajk, winets ja tjanchtayajxidøø møk'ampy:

—iYikruspat! iYikruspat!

Jøts ja Pilato ja tnimaay:

—Wawdi jøts mee xyikruspat, kumi ka'ap øts yø ti pøky ndapøky'ixy.

⁷ Yide'en ja israelit jaa'y ja y'adsoojyøø:

—Jap øøts tu'uk ja kutujk nmøødi, jøts jade'en ja tyikutuky jøts wan t'øøky, ja'agøjxp ku yø tø ñabyikta'agyi Dios U'ngin.

⁸ Xjats ku ja Pilato ja ojts jade'en tmadøy, jøts ja jade'en yjaaktyimyk'adsø'jkiyi'ñ. ⁹ Jøts ja jap kyutujktaajkjøtpy tyøjkiyi'ñ jadigojk, jøts ja ttiijyiky ja nwindsøn'ajtim Jesús:

—¿Mets, ma mdsøøñ?

Jøts ja nwindsøn'ajtim Jesús niwine'enin ja tkidyim'y'adsøøy.

¹⁰ Winets ja Pilato ja ojts ñii'mxyidi:

—¿jøts ø ka'ap x'adsøy? ¿Ti ka' xnijawi jøts ku øts kutujk njagyepy, jøts me nyikruspatt uk jøts me nyik'awa'atspidsø'ømt?

¹¹ Jøts nwindsøn'ajtim Jesús ja t'adsøøy:

—Ti kutujk mets jeexyip mdsaa'chjagyeypy ku Dios Teety ja jeexyip jade'en tkayikjaty; paty ja' møj pøky tyimdyaja'adyi pøn øts ya tø xkøyaky jøts me tø nyiktagøðøki, waani mets mja' mdaja'adyi.

¹² Winets ja Pilato nay jaty tja'ixaay ja taay, jøts ja t'ixmatst jadi'iñi ja nwindsøn'ajtim Jesús; xjats ja israelit jaa'y ja møkta'aky ñimaajyiyi:

—iPøni myik'awa'atspidsimpy inet, ka' xmigu'ugi wyinaty ja møj windsøn César jam Roma! iPøn jade'en namyøjpiktaajkip, myidsep'atpyts ja César!

¹³ Xjats ku ja Pilato jade'en tmadøøy, winets ja ojts tnankyikpidsimyi ja nwindsøn'ajtim Jesús jøts ja y'ixaajky jam kyutujktaajkjøp'am mididi yiktejp Gabata ku hebreit ayuujk, jade'en ja tiji ma tsaba'kxy. ¹⁴ Jaa dø'øn ja xøøw wyinaty kujky ku wyinaty tyimbyatni ja paski. Winets ja Pilato tnimaay ja yjaa'y mididi jamdi:

—ixyaadi ja mwindsøn!

¹⁵ Yide'en ja møk wyandøø:

—iWan tpa'øøky! iWan tpa'øøky! iYikruspat!

Jøts ja Pilato ja tnimaay:

—¿Øts ndejin ja mwindsøn nyikruspatp?

Ja teetywindsøndøjk ja yide'en y'adsoojyøø:

—Ka'ap øts pøn jadu'uk nwindsøn mididi øø nwindsøn'ajtpy, ja'ayi tu'ugyi ja møj windsøn César.

¹⁶ Ku ja Pilato jade'eñi yiknimaay, jøts ja ojts tkøyaky ja nwindsøn'ajtim Jesús jøts ja tyikruspattit, winets ja tyiktso'ondøø.

Ku ja Jesús kyiruspejty

¹⁷ Xjats ja nwindsøn'ajtim Jesús tyiktso'ondøø, jøts ja ttukapti ja kyirus, jøts ja jam ñijky ma ja et yiktijy Oo'kpi Kyubajk Pajk, mididi yiktejp hebreit ayuujk Gólgota. ¹⁸ Jamts ja

ojts tyikruspatti mōøt namaajtsk pøkyjaa'y, tu'uk jaty ja yikpiktaaktøø adsow aduuk, jøts ja nwindson'ajtim Jesús agujk'ajpy. ¹⁹ Jøts ja Pilato jam ojts tnanpkyikta'agyi ja letri kruskøjxp midi nōmp: "Jesús, Nazaretit jaa'y, israelit jaa'y wyindsøn." ²⁰ Jøts may jaa'y ojts t'ejxti ja letri, pø kajpwingonxi ja jam mā ja nwindson'ajtim Jesús ojts kyiruspety, jøts ja letri jade'en ja kyøxja'ayi hebreit ayuujk, jøts griegit ayuujk, jøts latín. ²¹ Paty ja israelit teetywindsønðøjk tñimaydi ja Pilato:

—Kidi jade'en xja'ay "Israelit jaa'y wyindsøn"; ne'egi jade'en xpikta'akt "Køøm ñadyijyiyi jøts ku israelit jaa'y twindsøni."

²² Yide'en ja Pilato ja ojts y'adsøyidi:

—iMidi tø nja'ay, jade'en yø tya'ant!

²³ Xjats ku ja soldaditøjk wyinaty tø tyikruspatti ja nwindson'ajtim Jesús, winets ja ojts twejtsj'øjkidi ja wyet, jøts ja ojts ñadyanipaadyidi jøts ja ñawyak'kxit maktaxkpkiky, kitu'uk ja soldadi ja t'pøktit. Jøts nayide'en tñixajidyøø ja nijan, jøts kumi ka'ats ja y'axuuumyuky, ja'ayi ja amuum tyimdyukokubety, ²⁴ xjats ja soldadi nixem niyam ñawyajnidøø:

—Ka' yø ndakøøtsa'ant; ne'egi yø nniguyajint, jøts n'ejxint pøn jadyimy'uktaja'adip yø wet.

Jøts jade'en ojts ka'pxy yjaty sam jap jaabyety nøkyijxpy: "Tø øts nwet ja xwejtswa'kxidi, tø ja tñiguyatti." Jade'ents idø'øn ja soldaditøjk y'adøtstøø.

²⁵ Jøts mā ja nwindson'ajtim kyirus jam, ixam ja tyaak ja', jøts nayi ixamts ja'ami midi ja tyaak y'uchip, jøts ja Cleofas ñidø'øxy midi Maria'ajtp, jøts nay jam ja María Magdalenimi. ²⁶ Xjats ku ja nwindson'ajtim Jesús ojts t'ixy ja tyaak, jøts ku ja pyabøjkpi nay jam tyanaamyi midi ja jantymyinaamyaajyip, winets ja tñimaay ja tyaak:

—Taaq, ixa ja m'u'nk.

²⁷ Jøts ja pyabøjkpi ja tñimaamyi:

—Ixa ja mdaaq.

Jøts nayjaty ja'abi pabøjkpi ttaakpijky midi ja nwindson'ajtim Jesús tyaagip, jøts ja jade'en yikjagyepy sam kyøømdaagin.

Ku ja Jesús y'ø'jky

²⁸ Xjats ku ja jade'en wyinaty tø y'ukjaty, jøts kumi ñija'wipst ja nwindson'ajtim Jesús ja wa'ats jøts ku wyinaty jade'en tuki'iyi tø kya'pxy, jøts idø'øn ja jade'en tyimyjatt sam jap jaabyety nøkyijxpy, winets ja wyaan:

—Jantymdyøjtsip øts.

²⁹ Jamts wyinaty tukmøjnajts'øøy ja vino midi jeky tø pyu'uch; ja'ats ojts yiktabadsiich ja tñimuu'kpi, jøts ja yikpiktaajky jam hisopo kipy awaj jøp'am, jøts ja yikta'ayøjkxyi ja nwindson'ajtim Jesús. ³⁰ Xjats ja twixi'jch ja tñimuu'kpi jøts ja vino ka'øybi jade'en t'uuky, winets ja wyaan:

—Tø tuki'iyi yikpaduñ ka'pxy.

Jøts ja kyubajk ja jadi'iñi kyuwøjtsnajxy, jøts ja jade'en y'ø'jky.

Ku ja Jesús yikuumy kyachpuki'jy

³¹ Jøts tyimbyaatwanipst ku ja paski xøøw kyujajy, jøts ja' ja israelit jaa'y kyatsojktip jøts ja oo'kpi jam y'awejxtit kruskøjxp ku poo'kxin xøøw, jøts yats idø'øn ja'abi xøøw jaaktyimyøjxøøw. Ja'agøjxpts ja tñimaydi ja Pilato, jøts wan ja tnanpkyakwojptøjkixyi pøn jaty jam wyinaty tø kyiruspatti, jøts wan ja tnanpkyikwinajkixyi jam ja oo'kpi ñine'kx.

³² Winets ja soldadi ñøjkxtøø, jøts ja ojts tjanhpakwojptøjkøxti midi ja nwindson'ajtim Jesús jam wyinaty mōøt tø kyiruspety. Ojts ja yjawyeembi tyimykpakwojptøjkøjy, jøts ja yjadu'ukpi nayide'en midi jam jaduktamajñ. ³³ Xjats ku ja twingunøjkxidøø ja nwindson'ajtim Jesús, jøts ja t'ejxpattøø jøts kudam ja tø y'oo'kni, patyts ja ka' nayide'en t'uktunidøø.

³⁴ ¿Ja ti winets ja ñajxy? Ojts ja soldadi ja nidu'ugin tyakumy ja takuu'm jøts ja tyimy'awajch ja kyachpuki'jy, jøts nay jaty ja ni'jpy pyidsiimy mōøt nøø. ³⁵ Ja'ats midi ixyam ñaadyampy, tø øts idø'øn jade'en n'ixy nnijawi midi'ibi ty janch, jøts mee nayide'en xiyjawit xjanchjawit. ³⁶ Jade'enxi dø'øn ja yjajty jøts jade'en ka'pxy tyimyjaty sam jap jaabyety nøkyijxpy: "Ni tu'ugin pyajk ja kyatøjt kyamoott." ³⁷ Jøts jap abiky wyami: "Y'ejxtip ja køøm ku tyiktsaachidit."

Ku ja Jesús ñine'kx yikpiktaajky jap møj tsaajutjøtpy

³⁸ Xjats ku dø'øn ja jade'en wyinaty tø yjaty, jøts ja José midi kugajp'ajtp jam Arimatea, pyabijpky ja' nwindson'ajtim Jesús øy idø'øn ja ka'ap øy pøn tjadyimdyuknijawi, ja'agøjxp ku ja tsoøgi ja my'israelit jaa'y. Ja'ats idø'øn t'amidoow ja Pilato ja may'ajt, jøts ja myo'ojyit ja nwindson'ajtim Jesús ñine'kx. Xjats ja Pilato yikjajt ja jade'en, winets ja José ojts ñijxy jøts ja ojts tyiktso'oniyi. ³⁹ Jøts ja Nicodemomi midi wyinaty jekyip tø

tmøøtmadya'aky ja nwindson'ajtim Jesús koots, ja'ats jam tmija'jt ee'px majk kilin jaabya'ak midu pa'akxuu'kp, majtsk jøøjp ja', ja mirra tø t'abøjkmuky møøt ja áloes. ⁴⁰ Jøts idø'on ja José jade'en møøt ja Nicodemo tñixajiyidøø ja nwindson'ajtim Jesús ñine'kx, jøts ja tta'abejtøø ja wet midu ja wyinaty tø tpiktaajkidi ja'abi pa'akxuu'kpi midu jade'en abøjkmuky. Jade'en ja ttundøø sam idø'on ja israelit jaa'y kyostumbridi ku ja y'oo'kpi ja tyiknaxøkidi. ⁴¹ Jøts ma ja nwindson'ajtim Jesús wyinaty tø kyiruspety, jam wingon tu'uk ja kam ma y'ity øy ti tsä'am. Jamts tu'uk oo'kpi jut ja'abi kamjotp midu tyimyjemy'øyipnim, ka'anim jap pøn tyimyikpikta'aky. ⁴² Japts ja tpiktaktøø ja nwindson'ajtim Jesús ñine'kx, pø wingonxi ja jam tyañ ja oo'kpi jut, jøts tyimdyøts jøts ja israelit jaa'y pyoo'kxin xøøw tyimcho'ondaknit.

20

Ku ja Jesús yjukpyijky jadigojk jap møj tsaa jutjøtpy

¹ Xjats ku midukxøøw cho'onda'akñim ja yjadu'ukpi samaan, winets ja María Magdalena ojts jøpyi ñijky jam ma ja oo'kpi jut jam wyinaty, ka'anim yixxon yjajta'aky; jøts ja ojts t'ixy jøts ku ja oo'kpi jut jam tka'uk'agø'ajtni ja tsaa midu ja wyinaty tø yikta'agi'y. ² Winets ja ojts putyi ñijky ma ja Simón Pedro jam wyinaty møøt øts midu yø nøky tjaapy, midu ja nwindson'ajtim Jesús jantyiminyamaajyip, jøts øøts xnimaay:

—Tøts ja nwindson'ajtim jap yikjidøjtpidsømni jap jutjøtpy, jøts ka'ap øø nnijawi pø ma net tø yikpikta'aky.

³ Xjats øts møøt ja Pedro nnijky ma ja oo'kpi jut jam. ⁴ Jøts øøts namaajtsk janch putyi nnijky; jøts øts jawaani møk njantyimbyujt jøts ja Pedro nnikkejky, jawyeen øts jam nja'jty ma ja oo'kpi jut. ⁵ Jøts øts jap ngu'ejxyii'ñ, ja wetyi jap n'ejxpaajt midu ja nwindson'ajtim wyinaty tø yikta'abity jøts ku ja jap wyøjni, jøts nika'ap ndøjkii'ñ. ⁶ Jøtsnim ja Simón Pedro ix'oojknim yja'jty, jøts ja tyøjkii'ñ jap oo'kpi jutjøtpy. Jøts ja nayide'en jap ojts t'ixy jøts ku ja abet jap wyøjni; ⁷ jøts ja tjaaktyim'yjxpaajty ja wet midu ja nwindson'ajtim Jesús wyinaty tø yiktagupity, jøts nigidi ja jam møøt ja wet midu ja amuum yikta'abejt, axaach ja jam abiky tø yikpikta'aky. ⁸ Winets øts ndøjkyimya ma dø'on ja oo'kpi jut jam, jøts n'ijxy jøts kudam ja wyinaty jade'en tø jyaty, xjats ja njanchja'wiyii'ñ. ⁹ Jøts ka'anims idø'on øøts wyinaty nja'gyuki midu jap nøkyijxy jaabyety wya'añ, jøts ku ja nwindson'ajtim Jesús yjukpyøkt jadigojk jap oo'kpi y'agujkp. ¹⁰ Jøts øøts jade'en namaajtsk nwimbejtñaaj jøts nnøjkxnaaj jam ndøjkwindump.

Ku ja Jesús ñanky'ejxøø jadigojk ma ja María Magdalena jam wyinaty

¹¹ Jøts ja María jamyi jut'agø'øm tyaañ, ñiyaxni ja jam kyu'ejxyii'ñ ma ja jut, ¹² winets ja ojts t'ixy namaajtsk ja ankilis, tum amuum poop ja xyøxyidi, jøts ja jam chøøniidi ma ja nwindson'ajtim Jesús wyinaty tø y'ukyikpikta'aky ja ñine'kx; tu'uk jam chøøni agubajkp, jøts jadu'uk teky'ok'am. ¹³ Jøts ja ankilis ja ñimaajyøø, ja tø'øxyøjk yiknimaapy:

—¿Ti mjaajtjip, tiku mya'axy?

Jøts ja tnimaay:

—Ja'agøjxp ø nya'axy ku øts ja nwindson'ajtim ya tø yikwejtspidsømni, jøts øts ja ka' nnijawi pø ma ja tø yikpikta'aky.

¹⁴ Ja'ayi ja jade'en wyaañ, jøts ku ja y'ejxjimbijty winets ja t'ejxpaajty jøts kudam ja nwindson'ajtim Jesús jam tyani; jøts ka'ap ja tyimwya'añ jøts ku ja yja'aji. ¹⁵ Winets ja ojts kø'øm ñii'mxyi, jøts ja tø'øxyøjk yiktiibyiky:

—¿Tiku mya'axy? ¿Pøn m'ixaapy?

Jøts ja tø'øxyøjk jade'en ja wyinmay, ja tsä'am kam ejx'ejtpik idø'on ja tijy, jøts ja tnimaay:

—Teety, pøni mets ja tø xyikpidsimy, tukmadookts øts ma tø xpikta'aky jøts øts ja n'atsyiktsoont.

¹⁶ Winets ja ñimaajyøø ja nwindson'ajtim Jesús:

—¡María!

Xjats ja y'ejxjimbijty jøts ja tnimaay hebreit ayuujk:

—¡Raboni! —midu tyijpy yik'ixpøjkpi.

¹⁷ Jøts ja nwindson'ajtim Jesús ja ñimaajyøø:

—Kidi ø xøñ, majtstutk øts, pø ka'animxi ø nnijky jam ma ja nDeety jam. Nøjkxts x'atstukmadøy pøn jaty øts nja' xpabøjkidip, jøts ku øts jap nnijky ma øts ja nDeety jap, midu mee mDios Teety'ajtpy.

¹⁸ Winets ja María Magdalena ojts ñijky, jøts ja ojts t'atstukmadoji ja nwindson'ajtim Jesús pyabøjkpitøjk jøts ku ja wyinaty tø t'ixy ja nwindson'ajtim, jøts ku ja wyinaty jade'en tø ñii'mxyiyi.

Ku ja Jesús ñanky'ejxøø jadigojk ma ja pyabøjkpitøjk jam wyinaty

¹⁹ Jøts nay ja'abi xøøw ku midukxøøw cho'onda'akñim ja yjadu'ukpi samaan, nay ja'abi ux ku ja pabøjkpitøjk jam wyinaty tø ñamyukyidi jøts ja wyinaty tø ñañi'agübyetyidi, ja

israelit jaa'y ja chø'jkidip. Winets ja nwindson'ajtim Jesús tyøjkii'ñ jøts ja jam y'agujk'am wya'k'ø'yii'ñ, jøts ja ojts yide'en kyajpxpøø'kxyidi:

—Øy'atti jotkujk'atti.

²⁰ Xjats ku ja jade'en y'ukwaañ, jøts ja ojts tyuk'ijxyidi ja kyø' jøts nayide'en ja kyach-puki'yiyt tsaaçi. Jøts ja pabøjkpitøjk yjantyimxyondaktøø ku ja t'ejxtøø ja nwindson'ajtim.

²¹ Jøts ja nwindson'ajtim Jesús ja jadigojk ñimaajydøø:

—Øy'atti jotkujk'atti. Nayide'en sam øts ja Dios Teety tø xkexyin, jøts nayide'en meets yam nguexy.

²² Xjats ja tñibixujyii'ñ ja pyabøjkpitøjk jøts ja tñimaay:

—Wan ja Dios y'Espíritu Santo mdatøkiyidi. ²³ Jøts pøni mgajpxwa'kxtip jøts ku ja yikpojkpimee'kxy pøn nabyøkyja'wiyidip, jøts øts nja' ja xpabøjkiiyidi; uk pøni ka'ats, mdukmodo'opts meets ja nayide'en jøts ku ja pyøky ja ka'ap mibaat yikmee'kxy, pøni ka'ap ja ñabyøkyjawiyidi niwine'en.

Ku Tomás ojts t'ixy ja Jesús ku tø yujkpyiky

²⁴ Jøts tu'uk ja nwindson'ajtim pyabøjkpi midì Tomás'ajtp, midì yiktejp xeeñu'nk, ja' wyinaty ka'ejtp ma ja jamdi ku ja nwindson'ajtim Jesús wyinaty tø ñanky'ijxyi. ²⁵ Xjats ja oojknim ttukmadowdi ja nwindson'ajtim Jesús pyabøjkpitøjk, jøts ja tñimaadyi:

—Tø øøts ja nwindson'ajtim n'ixy.

Ja Tomás yide'en ja ojts ñii'mxyidi:

—Ka' øts ja njanchjawit pøni ka' øts kyø' ja n'ejxi jøts ku ja klabis ja tø yiktsaachiyi; ku øts ngøtsa'jx jap kø'øm ka' ndyimgyudejit ma ja klabis ja tø yiktsaachiyi, pøni ka' øts jap nguxaji ma ja kyachpuki'yj tø chaachi, ka'ats øts ja njanchjawit.

²⁶ Xjats ku kyiduktujkxøw'ajty, winets ja pabøjkpitøjk ñamyujkidøø jadigojk jam tøjktotp, jøts ja Tomás ixjam ja wyinaty tñøødidi. Winets jadyimja'aduky ja tøjkw wyinaty yikxon ku ja nwindson'ajtim Jesús tyøjkii'ñ, jøts ja jam agujk'am tyanay'ø'yii'ñ. Jamts ja ojts kyajpxpøø'kxyidi, yide'en ja ñii'mxyidi:

—Øy'atti jotkujk'atti.

²⁷ Jøts ja Tomás nay jatyi yiknimaay:

—Kudeji yø mgøtsa'jx yap, jøts øts yø ngø' x'ejxit; jøts yak yø mgø' jøts yap mguxajit øts ngachpuki'yj. Jøts kidi nugo xkuwinmayi, janchjawi dø'øn.

²⁸ Xjats ja Tomás y'adsøoy jøts ja wyaañ:

—iMets nwindson'ajtpy ndios'ajtpy!

²⁹ Jøts nwindson'ajtim Jesús ñimaajydøø:

—Tomás, ja'agøjxp yam xjanchjawinim ku tø txyimwyemp'ijxñim. Jotkujk'atyim ja'adi pøn tñibøjktip pøn tjanchja'widip jadi'iñi, øy øts ja xjaga'ejxti.

Ya'at nigajpxp ja tiy'ajtin midì yø nøky myøø'ajtpy

³⁰ Jøts may ja nwindson'ajtim Jesús ojts tpiкта'aky ja ejxpajt, ku ja ojts ttuñ ja milagri jam pyabøjkpitøjk wyingujk midì ka' kyøxja'ayi ya'at nøkyjotpy. ³¹ Ja'agøjxp ya'at jap jade'en tø yikujayi, jøts xiyjawidit xjanchjawidit jøts ku ja' yiknitsø'øky, jøts ku ja' Cristo ja nwindson'ajtim Jesús, ja Dios U'nk. Jøts ku ja xjanchjawidit, mbaatpts meets ja jujky'ajtin xemikøjxp sam pyaat'atyidi pøn tjanchja'wiyidip.

21

Ku Jesús ñanky'ejxiyi niwixujk pyabøjkpi windump

¹ Xjats ku dø'øn ja wyinaty jade'en tø y'ukjaty, winets ja nwindson'ajtim Jesús ñanky'ejxi jadigojk jam ma ja pyabøjkpitøjk, jam mejy'am midì yiktejp Tiberias. Yide'en idø'øn ja y'ejxi tyiyi: ² Ja Simón Pedro jam wyinatyi møøt ja Tomás midì yiktejp xeeñu'nk, jøts ja Natanael midì jam kugajp'ajtp Caná midì Galileit etjotp, jøts ja Zebedeo y'una'jk, jøts møøt abiky janamajtsk nay ja nwindson'ajtim Jesús pyabøjkpi. ³ Ja'ats ja Simón Pedro ñimaay:

—Nijkxy øts t'ats'ajkxma'aky.

Jøts ja wyandøø:

—Pø tsoomp øø nayide'en.

Xjats idø'øn ja ñøjxtøø, jøts ja ojts ttatøkidi tu'uk ja barki, ni tu'ugin ja ajkx ja tkamaktøø ja'abi koots. ⁴ Jøts ku wyinaty xyijñiwyani, winets ja nwindson'ajtim Jesús jam mejy'am wya'kaxi'jky, ja pyabøjkpitøjk ka'ap ja twinmaydi jøts ku ja yja'aji. ⁵ Jøts ja ñimaajydøø:

—Mixy, çtø dø'øn ja ajkx iiy xmatsti uk tyimgya'anìm?

Jøts ja yide'en t'adsøodøø:

—Ni tu'uk.

⁶ Xjats ja nwindson'ajtim Jesús ja ojts ñii'mxyidi:

—Niwojpatti yø mda'ajkxmajk ixa barki puki'yj aga'ñ'ampy, jøts ja ajkx inet jap xpaattit.

Jøts ja ojts jade'en ttundi, jaanimts idø'on ja tiy ka'ap ja tya'ajkxmajk y'ukmaa'yinyidi jøts ja jap nøøjotpy tjuuttit, ja'agøjxp ku ja ajkx jap janch'ujts'abøki. ⁷ Winets øts midi ja nwindson'ajtim Jesús yjanchminamyaajyip tñimaay ja Pedro:

—ja nwindson'ajtimts yø'!

Ja'ayi ja Simón Pedro ja jade'en tñimyaðøø y jøts ku ja yja'aji ja nwindson'ajtim, winets ja ñikjixyt nijan ja ttatøjkii'ñi (pø tøxi ja wyinaty tjeñ) jøts ja ñidøjkii'ñi. ⁸ Jøts øøts jam mejy'am ja barki nyikja'jty, jøts ja nda'ajkxmajk ja nbajidity janch ujts abøki ja ajkx, pø jadukmagø'pxy xajkxi dø'on ja jam wyinaty yjaaka'tity jøts øøts nbaatnit ja naajx. ⁹ Xjats ku øøts jam nwinajky, jøts øøts nbaajty ja jøndsabajk yikxon tø kya'kxy, jøts ja ajkx tu'uk tø yikjingtoni, jøts tsapkaaky abiky. ¹⁰ Winets øøts xñimaay ja nwindson'ajtim Jesús:

—Yikmendi tu'uk majtsk ajkx midi ixjanim tø xjuutti.

¹¹ Jøts ja Simón Pedro pyejty jam barkijotp jøts ja tjidøjtpidsiimy ja ta'ajkxmajk, janch ujts abøki tum ja møjaty ajkx, tukmagø'pxy ja wixikxmyaktigøøk; jøts nika'ap ja xuummy yjapøjty øy idø'on ja tyimyjajadine'eni. ¹² Jøts ja nwindson'ajtim Jesús wyaañ:

—Men m'ajop'atti.

Jøts ja pabøjkpitøjk ni tu'ugin ja sã kyawa'andi pøni pøn idø'on ja', pø tøxi ja wyinaty tñijawidi jøts ku ja yja'aji ja nwindson'ajtim. ¹³ Winets ja nwindson'ajtim Jesús ja wingon ñimejnidøø, jøts ja tñixajiyi'ñi ja tsapkaaky, jøts ja ojts myø'oyidi møøt ja ajkx.

¹⁴ Ya'at idø'on møøt myidigøøk ojk jyaty ku ja nwindson'ajtim Jesús ñanky'ijxyi mã ja pyabøjkpitøjk jam, ku ja wyinaty tø yjujkpyiky jadigojk.

Ku Jesús møøt ñaagyajpxyi ja Simón Pedro

¹⁵ Xjats ku ja y'ajop'ajt'abajtidøø, winets ja nwindson'ajtim Jesús tñimaay ja Simón Pedro midi ja Jonás myajnikip:

—Simón, ¿xtsojpk øts jawaani sam øts ya'at xtsoktin?

Jøts ja Pedro ja t'adsøøy:

—Ndsøjkpy me nwindson'ajtim, wa'ats mets ja xñijawi jøts ku me ndsøky.

Winets ja nwindson'ajtim Jesús ja ñimaajyøø:

—Winets ø xnøø'møøjyt xuu'møøjyt ja nbabøjkpitøjk.

¹⁶ Jøts ja mímajtsk ojk kujk yiktiibyiky ja Jonás myajnk, yide'en ja yiknimaay:

—Simón, ¿xtsojpk øts?

Jøts ja Pedro ja t'adsøøy:

—Ndsøjkpy nwindson'ajtim, wa'ats mets ja xñijawi.

Jøts ja ojts ñii'mxyi ja nwindson'ajtim Jesús:

—Winets ø xnøø'møøjyt xuu'møøjyt ja nja'.

¹⁷ Jøts ja midigøøk ojk yiknimaay ja Jonás myajnk:

—Simón, ¿xtsojpk øts?

Winetnimts ja Pedro yjotmay'oo'kpjiky, ku ja midigøøk ojk yide'en yiktøøji ja nwindson'ajtim pøni chøjkpy ja', jøts ja tñimaay:

—Windsøn'ajtim, mets tuki'iyi mñija'wip. Mñija'wipxi wa'ats jøts ku ndsøky.

Jøts ja nwindson'ajtim Jesús wyaañ, jøts ja ñimaajyøø:

—Mets ndanipijky amuum, jøts xnøø'møøjyt xuu'møøjyt ja nbabøjkpitøjk. ¹⁸ Janch idø'on nnøjmi, jøts ku y'ijty mjaak'una'jk'atynim, yikxon y'ijty mjaaknaxyøxyi jøts mñijky pøni mã kø'm xtsøky; kuts ja møjaa'y'ajtin xpätnit, jøts mxajtøønit, wyenkpits mets ja mwet mmo'ojyiyip jøts ja myiknøjkxit mã me ka'ap mjanøjkxwa'añ.

¹⁹ Ku ja nwindson'ajtim Jesús jade'en wyaañ, ja' idø'on ja yjatijpy sã ja Pedro ja o'jkin tpaatt ku yikøyakt, jøts ja Dios jade'en yikmøjawit yikunuu'kxyjawi. Jøts ja ojts ñii'mxyi:

—¡Paduujnik øts yø nja', kidi øts xmajtstu'uty!

Ja Jesús pyabøjkpi midi janchminamyaajyip

²⁰ Xjats ku ja Pedro y'ejximbijty, jøts ja ojts t'ixy jøts ku øts nbamiñ midi ja nwindson'ajtim Jesús janchminamyaajyip. Øts ja nwindson'ajtim Jesús jam wyinaty nbutsinaapy ku øøts wyinaty xøjøjty n'a'ux'aty, jøts øts wyinaty nwindson'ajtim n'amidøøy: "Windsøn'ajtim, çpøn idø'on mga'ødyunwajnip?" ²¹ Jøts ku dø'on ja Pedro ja ojts y'ijxyi, winets ja Pedro tñimaay ja nwindson'ajtim Jesús:

—Windsøn'ajtim, jøts yø', çsats yø yjatt?

²² Jøts ja nwindson'ajtim Jesús ja ojts yide'en y'adsøøy:

—¿Ti mets yø xunk'aty, njadyimyjajyikjyky'aty øts yø' nay jaa ku ø nme'ent jadigojk? Tujnik øts yø nja' tu'ugyi.

²³ Xjats ja ayuujk yø'gyøjy, jøts ja jade'en tñimadow'atti pøn jaty ja nwindson'ajtim Jesús yja' pabøjkpi, jøts ku ja'abi pabøjkpi ka' y'oøkt. Kajade'enipts ja nwindson'ajtim Jesús wyinaty tø nnøjmi ja Pedro jøts ku ja'abi pabøjkpi ka' y'oøkt, pø yide'enxi ja wyaañ jøts ku ka' tunk'ättit pøni sã ja yjatt.

²⁴ Øts idø'øñ Juan, midi'its idø'øñ ya'at ayuujk njaadyampy, pø tiy janchxi dø'øñ yø'. N'ejx nmija'wiyii'ñ øøts ku jade'en yjajty.

²⁵ Jaanim yø may ti jaty ja nwindsøn'ajtim Jesús tyuun, ku ja jeexyip jade'en tø tyimykja'ay piy kōñ, mayts nøky jeexyip chøky: jøts yikjaagyøxt sam yjajty kyubejty. Jade'en idø'øñ ja yjajty.

SA CHINAADYI JA JESÚS KYUDANAABYI

Ku ja Dios Teety ttamiwandaaqi ja naxwii'ñit jaa'y ja Espiritu Santo

¹ Migu'uk Teófilo, ja nõky midí òts ojts nja'ay mijawyeen, ja' òts jap nguja'ayigyõx ti jaty Jesús tyuun ku ja tpadõjkiyí'ñ ja tyunk, sa jaty ja tyik'ixpijky ² kunim ja chajpajtni. Ku ja wyinaty ka'aním ñijky jap tsajpjõtpy, winets ja jawyeen twiwejtskijxy twigongijxy ja jaa'y põn idõ'õn ja wyinaty nadyagugaxwajniyip, ojts ja tkajpxwijy sa jaty idõ'õn ja y'adõ'õstít ku ja tyu'undít, Espiritu Santo ja ja'gyujkin ja mõõjyidi. ³ Xjats ku ja Jesús wyinaty tõ yja'oo'kni, ojts ja tpaaty ja kyudanaabyi jadigojk jade'eñim sayim idõ'õn ja yjaa'y'atyn, wixijkyõõw ja jam ñanky'ejiyõõ, jõts ja jade'en wa'ats ttuk'ixy ja tiy'ajtin ja kyudanaabyi ku ja ejtp yjujky'aty; jade'en idõ'õn ja jam ttukmadoogijxy ja kyudanaabyi sa jaty ja y'eji tyiyi, ja Dios kyutujk midí ja tyanitanaapy ja yjaa'y.

⁴ Ku dõ'õn ja jade'en tjaakmõõtsinaay ja kyudanaabyi jõts ja t'ane'jmy jõts ja ka'ap ñõjkxtit ma ja kajp txõõwi Jerusalén. Yide'en ja tnimaay:

—M'awejxtip idõ'õn ja' midí òts NDeety tõ mdamiwanda'agyidi, midí kawinaak ojk meets tõ ndamimadya'aky. ⁵ Janch idõ'õn ja' ku ja Juan ttuktanõbejty ja nõõ, jõts tsojk meets nõjx nduktatõkidi ja Espiritu Santo.

Ku ja Jesús chajpejty

⁶ Xjats ku ja pyabõjkitõjk jam wyinaty tõ tminabyaagyidi ja wyindsõn, winets ja tyik-tõõdõõ jõts ja tnimaadyõõ:

—Windsõn, Łyammim inet ja Israelit kajp xmo'ot jõts ja kõ'õm jadigojk ñay'ana'amiyidit, jõts ja kõ'õm ñankyutujkyidit põni ti ja kõ'õm tyunwandip?

⁷ Xjats ja Jesús y'adsõõy jõts ja wyaañ:

—Ka' meets ja mbaat'aty jõts meets ja xnijawit põni juuni ja Dios Teety jade'en y'adõ'õstít, põni ti xõõw põni ti po' ja jade'en ttunwa'ant. Ja' ja tu'ugyi tñija'wip, jõts ja tu'ugyi tmõõ'tajtp ja mõk'ajtin jõts ja jade'en ttu'unt. ⁸ Ku meets ja Espiritu Santo wyinaty tõ nmimiñi, winets meets ja nõjx jaty mmõ'õyi ja mõk'ajtin jõts òts xniga'ama'adyit jawyeen jam Jerusalén, nayide'enmi tuki'iyi wine'enin jam chõõnidi Judeit etjõtp, sam nayide'en jam Samariit etjõtp, winetnimts òts xniga'ama'adyit õmyadsõwi mbaat naxwii'ñit y'õjx y'õojk.

⁹ Tõ ja Jesús wyinaty jade'en wya'añ, wa'ats idõ'õn ja pyabõjkitõjk ja wyinaty ixjam y'ijxy ku ja chajpejty; jõts ja jadi'ñi yoõts yik'adigõ'õñiyõõ, jõts ja pyabõjkitõjk ja jade'en nima kya'uk'ejxpajtniyõõ. ¹⁰ Ixjam idõ'õn ja wyinaty õy pyat'ejxti ku ja Jesús jade'en chajpejty, winets yaa'dyõjk namajtsk adsu'jky kyaxõ'ktõõ ma ja jam wyinaty, ankilis ja'adi, jõts tumbõõ wet ja wyet'ajtp. ¹¹ Xjats ja yide'en ñimaajyidõõ:

—Meets Galile'it jaa'dyi, Łtiku yõ tsajp jade'en xpat'ejxti? Tõxi x'ejxti ku ja Jesús tõ pyatõki jap tsajpjõtpy, Łkidi? Nayide'en ja nõjx jadigojk myiñ sa ja tõ pyatõki tsajpjõtpy.

Ku ja Matias yikpiktajjy jõts ja tkudanit ja Judas oo'kpi

¹² Xjats ja jam kojpkõjxp choõ'ndõõ midí txõõw'ajtp Olivos, jõts ja ojts ñõjkxti Jerusalén, jade'enin ja ojts tñiyõ'õyidi waani sa ja yõ'õdyi ku ja poo'kxin xõõw tpaaty. ¹³ Xjats ku dõ'õn ja jam yja'ttõõ kajpõtõp, winets ja kyõxpajttõõ jap nipatõkijxy ma ja Pedro jam wyinaty tõ yja'ta'akti mõõt ja Jacobo, mõõt ja Juan, mõõt ja Andrés, mõõt ja Felipe, mõõt ja Tomás, mõõt ja Bartolomé, mõõt ja Mateo, jõts mõõt ja yjadu'ukpi Jacobo põn ja Alfeo y'u'nk'ajtpy, jõts mõõt ja Simón zelote, jõts nayide'en mõõt ja Jacobo y'uch Judas. ¹⁴ Niduki'iyi dõ'õn ja jam jade'en xyiminamyukyidi jõts ja Dios'ajõt'ajtmukti jõts ja wyinmaa'ñ ja tu'ugyi tyik'etti mõõt ja Jesús myigu'ukti, mõõt ja María midí ja tyaak'ajtpy, jõts mõõt nayide'en winaagin ja tõ'õxyõjkti, jade'en idõ'õn ja jam wyinaty xyimidios'ajõt'ajtmukti.

¹⁵ Xjats idõ'õn ja Pedro winet'et tyanaagyukyiyi'ñ jam jaa'y agujkp põn tjanchja'widip ja Jesús, jam idõ'õn ja jaa'y wyinaty nimagõ'pxy ja ee'pxindi, jõts ja Pedro jade'en kyajpxwa'kxy:

¹⁶ —Meets migu'uktõjkti, tõ dõ'õn ja jade'en yjanchjaty sa ja Dios kyajpxy wya'añ, ku ja Espiritu Santo jap jade'en kõ'õm wya'añ, midí ja David kyajpxnajx ku ja ojts tnimadya'aky ja Judas, ja' põn tuu'waaw ja jaa'y jõts yikmatst ja Jesús. ¹⁷ Oõts idõ'õn nmigu'uk ja' ja Judas põn idõ'õn jade'en adõõjts, nayi ya'atpi tunk ja y'lijty tyumpy midí õõ ndumpy. ¹⁸ Xjats ja ñõjxnaa jõts ja ojts tjuy naajx, ja meeñ ja tyagujuuy midí ja ojts yiktamijuy ku ja Jesús ja jade'en tkõyajky; jõts ja nay jam kyidaay, winets ja kõ'õm ñañajtskuwojpiyõõ, jõts yjoõjt ja kyi'jch jõts ja tyiñch pyidsõmgijxy. ¹⁹ Xjats ja jaa'y ja jade'en tñija'widõõ põn jam wyinaty tsinaadyip Jerusalén, winets ja tyikxõbjttõõ ja naajx Acéldama, midí tyijpy Ni'jpkyam, jade'en ja tjejtí

ku kyø'øm ayuujk ja tkajpxti. ²⁰ Jøts ja David yide'en jap ja nøky tyikwa'añ ma ja Salmos jap yikuja'ayi:

Wan ja tyøjk abak ttañ,

wan jap pøn tkidyimchøøni.

Wan tmatjstu'uty tyunk jøts jadu'uk ja jaa'y tyøkit tumbi.

²¹ Paty øøts ya'at jaa'y nidu'ugin nyiktunwa'añ pøn øøts jeky tø xpawidity, wine'en øøts ja nwindson'ajtim ya tø x'at-smøøtsøøni, ²² jaayip øøts yø jade'en xmøøtwidity ku nwindson'ajtim ja Juan ojts yiknøbetyi, kunim ja tø pyatøki jap tsajjipøtpy. Paty øøts ya'at jaa'y nidu'ugin ndsøky, jøts øøts yø møøt ngajpwa'kxt ku ja nwindson'ajtim tø pyidsimy jadigojk jap oo'kpi jutjøtpy.

²³ Ku ja Pedro jade'en wyaañ, xjats ja twi'ejxtøø namajtsk ja jaa'y pøn ja nidu'ugin pyikta'akwandip: ja José ojts yikwiwich pøn tigøøk ja xyøøw, Barsabás ja yiktijy jøts nayi yiktejp Justo, ja Matías ja ojts møøt yikwiwich. ²⁴ Xjats ja jaa'y yide'en t'ajot'attøø ja Dios U'nk:

—Nwindson'ajtim Jesucristo, mets mnija'wip sã jaty pøn jadu'uk jadu'uk wyinmay, yø jaa'y ixa øøts tø nwiwich namajtsk, tuknija'wik øøts pøni pøn me mdsøjkpy, ²⁵ wan ja tunk ttuñ midu'uk ja Judas tø tmatjstu'uty, ja'agøjxp ku tø pyøktuyñ jøts ja tø ñijky jap ma ja pyaat'aty.

²⁶ Winets ojts nidu'uk yikpikta'aky ja ñamajtskpi jaa'y, ja Matías ojts tyaja'adyiyi ja tunk, winets ja ojts yiktabuwetsi ja ñimaktu'ukpi jaa'dyi pøn ja nwindson'ajtim Jesucristo tkudanaadyip.

2

Ku ja Espiritu Santo myiñ

¹ Ku ja Pentecostés xøøw tpaajty, tyimwyinet'et idø'øn ja Jesús kyudanaabyi wyinaty niduki'iyi tø ñamyukyidi jap tøjktøpy ² ku adsu'jky tmadoodøø jøts ku y'amu'uy jade'en sam ku møk pyøjyin, japts tsajjipøtpy chøøñ, jøts ja tøjkm amuum ñojktaajky ma ja jam wyinaty tø ñamyukyidi. ³ Winets ja jade'en t'ejxpatti ejxim ja jøøn yowin, tu'uk tu'uk idø'øn ja jade'en tmøøt'atti kyubajkp. Ja tu'ukpi jøøn idø'øn wyinaty tø ñawya'kxyi. ⁴ Xjats ja niduki'iyi tyatøjkiydøø ja Espiritu Santo, jøts wenk ayuujk ja jaty tkajpxtøø sã jaty ja pøngapøn yik'awijyi ja Espiritu Santo.

⁵ Jamts idø'øn wyinet'et ja jaa'y wyinatyøø jam Jerusalén pøn nayi israelit jaa'dyi, ja ku abikyajp chinaañidi, ka'ap ja jam wyinaty y'ukugajp'ajtnidi. ⁶ Ku ja jade'en tmadoodøø y'amu'uy kyida'aky, winets ja t'anøjkiydøø ma ja tmadoodøø y'amu'uy, kuts jam yja'ttøø, ka'ap ja jam y'ukwinmaa'nbyatnidi, ja'agøjxp ku ja tmadoodøø ja y'ayuujk yikajpxti, pøni sã jaty ja nidu'uk nidu'uk t'ayuujk'atti. (Jade'en ja kyajpxwa'kxtøø ja jaa'y pøn tjanchja'widip ja nwindson'ajtim Jesucristo.) ⁷ Xjats ja jadi'iñi myondi y'oookti, jøts ja xem jam nawyajnidøø:

—¿Ti kidi ja Galile'itjaa'yip ya'atti ixa jade'en kyajpxti? ⁸ ¿Sudso yø jade'en tkajpxti yø ayuujk midu'uk adøm nidu'uk jaty ngajpxyindip, sã jaty pøngapøn ja y'ayuujk tø t'anijewi? ⁹ Ixa ja jaa'y ixyamdi pøn kugajp'ajttip jam Partia, jam Media, jam Elam, ma Mesopotamia, jam Judea, jam Capadocia, jam Ponto, jam Asia, ¹⁰ jam Frigia, jam Panfilia, jam Egipto, ma jaty kajp jam Africa, jambaat yø kyugajpidi jam Cirenit kajp ixkøøm. Nay jats ja romanosti pøn ya tø kya'axti, pønts ya tø yjagaka'axti tø ja israelit jaa'y ja china'ayin tpadøjkiñidi. ¹¹ Nay jaa ja jaa'y ya tø yja'atti midu'uk tsoo'ndip jam Creta, jam Arabia; niduki'iyi yø jade'en tø nmadøø'yindi ku yø tngajpxti tñimadya'akti ja Dios myøk'ajtin, jøts jade'en xmigajpxyindi sã adøm n'ayuujk nidu'uk nidu'uk.

¹² Jade'en ja nawyajnidøø, nigyumaap idø'øn tyimya'widøø, jadi'iñi ja kya'ukwinmaa'nbyatnidi xjats ja xem jam ñañimajjyidøø ti dø'øn tuujnip.

¹³ Jamts ja jaa'y jadu'ukti pøn ttaxektip, yide'en ja ñawya'amiyidi:

—Mujkidip yø jaa'y, paty yø jade'en y'amu'ugyikajpxti.

Ku ja Pedro ojts kyajpxy jam mayjaa'y agujkp

¹⁴ Ku dø'øn ja jaa'y jade'en ñawajnidøø, winets ja Pedro wya'kukidøø møøt ja ñimaktu'ukpi myigu'uk, jøts møk'ampy tmigajpxy ja mayjaa'y, jøts tnojmi:

—Meets Judeit jaa'dyi, jøts nayide'en niduki'iyi pøn jaty ya tsinaadyip Jerusalén, ukja'gyukidi yikxon midu'uk øts ixyam ñnigajpxwampy. ¹⁵ Ka'ap øøts nmu'ugyi sã meets nugo mjawinmay, nipøn jøpyi kyamu'ugyi, apeni xøøw ixa pyetynim. ¹⁶ Jajtp idø'øn ixyam jade'en sam ja Dios Teety tñimaa'y ja kyugajpxy, pøn txøøw'ajt Joel, ku ja jade'en wyaañ:

¹⁷ Ku wyinaty ja naxwii'ñit tyigatswan,

winets øts ja'abi xøøw møk'ampy ja naxwii'ñit jaa'y nduktatøkit ja n'Espiritu Santo ømyagajpi;

nyikugajpxy'atp øts ja mutskuna'jktøjkti,

jøts ndukwiyuma'ap øts ja wajtyøjkti kiixyi'idi sa wyinaty yjatwa'añ ya naxwiiñ,

jøts nayi xwinguma'adip øts ja møjaa'dyøjkti.

¹⁸ Xjats øts nay ja'abi xøøw møk'ampy nøjkk ndukatøkidi ja n'Espíritu Santo ja'abi dø'øndi, pøn øts nja' wyinaty amumjoojt xpapunwajniyidip,

ja'ats øts n'ayuujk nøjkk møk'ampy xkajpxwa'kxiyidip, øy ja yjaya'a'dyøjki øy ja yjatø'øxyøjki.

¹⁹ Nanky'ejxip øts jam tsajpemp ja nmlagri'ajtin,

jøts nayide'en ya naxwiiñ nnanky'ejxit ku ja ni'jpy yø'øty, jøts ja jøøn mye'ent, winets yjojka'atst.

²⁰ Jøts ja xøøw y'ookt, jøts ja po' ni'jpyin kyaxø'økt,

ku dø'øñ jade'en yjatt winets ø nme'ent, pø øtsxi mee xwindsøn'ajtp,

jøts nyikjatt ja xøøw sam nijuuni xka'ejxtinim.

²¹ Jøts niduki'iyi pøni pøn jaty ø xminuu'kxakp, ja'ats ø nyikniitso'ok'attip.

Jade'en ja Joel ja Dios kyajpxy y'ayuujk tyiknaxjxøø.

Xjats ja Pedro yide'en tjaaknimaay ja myigu'uk:

²² —Jaa'ukmadowdi meets Israelit jaa'y midi øts njaaknigajpxwampy: Ja Jesús Nazaretit jaa'y, tø ja Dios Teety ja myøk'ajtin myø'øyi, jøts janch tsuj janch møj ja milagri'aañ, jøts may ja ejxa'añ jade'en mmø'øyidi Dios Teety myøk'ajtingøjxp, paty xnijawidit ku ja Dios Teety møøt y'ity. ²³ Xjats ku meets øjts myikø'øyi, ti nduu'nimp, tø yjaty kyubety tuki'iyi pøni sa ja Dios Teety kø'øm tpiktaajky jekyip, jøts nay ja' meets øjts xmach jøts xtsumdøø xiidyøø, jøts ja ka'øyi jaa'y xukyik'ookti jam kruskøjxp. ²⁴ Xjats ja Dios Teety øjts jadigojk tyikjujkyiky, jøts tyik'awa'atspidsiimy jap oo'kpi jutjøtpy; ja'agøjxp ku ka' pya'at'aty: jøts ja o'jkin xemikøjxp tkupøkt. ²⁵ Yide'en ja rey David øjts ja Dios Teety yikugajpxy'aty sa ja Jesús kyajpxy y'ayuujk:

Mets Teety, ejtp me møøt njujky'aty m'aga'ngyø'ampy;

jøts ka'ap øts pøn x'adsø'øgit.

²⁶ Paty øts n'anmija'win janch jotkujk nnayjawi, jøts øts ja nxondaajkin jade'en nnigajpxy. Øy n'ookt, ka' ti jotmay njagyapt;

²⁷ Ja'agøjxp ku mets ka'ap ja n'anmija'win xyikta'ant ma oo'kpi yja' tyandi,

jøts nika'ap øts nnine'kx xyikwindigøøjyiyit, pø øtsxi me xtsøky'ajtp.

²⁸ Tø øts xuknijawi ku njujkyøkt jadigojk ku wyinaty tø n'øøky,

jøts nayide'en xyikxonjatt ku mets xemikøjxp nmøøt'ett.

Jade'en ja David tyiknaajx ja Jesús kyajpxy.

Xjats ja Pedro tjaaknimaay yide'en ja myigu'uk:

²⁹ —Migu'uktøjkti, wa'ats yiknijawi ku adøm n'apteety'amøj David øjts y'øøky jøts ñaxøkiyi'ñ, nay ja n'lijxyindi ma ja yjut ma øjts ñaxøki. ³⁰ Ja David, ja' Dios kugajpxy'ajtiyøø jøts ñija'wip sa wyinaty ja Dios møk wyanda'aky, ku wyinaty tu'uk y'ap yikpikta'aky yikniitso'kpi ya naxwiiñ, jøts nayide'en yikutukt sami David kyutujkin. ³¹ Jade'en idø'øn ja David jekyip tnijawi, jøts jade'en tnigajpxy ku ja Cristo yjujkyøkojmit jøts ni ja ñine'kx kyawindigø'øty. ³² Pøn ja David ñigajpx ñimadyaajk, ja Jesús idø'øn ja', ja' idø'øn ja Dios Teety tø yikjujkyiky, pø tøxi øøts ja wa'ats n'ixy, pø tøxi øøts ja wa'ats nnijawi. ³³ Jøts ja Dios Teety ja nayide'en yiktsajpajtøø jøts pyiktaajkøø y'aga'ngyø'ampy, jøts jade'en ja møj kutujk myø'øyi; jøts ja' tkajxp ja Espiritu Santo ya naxwiiñ midi ja Dios Teety wyinaty kø'øm tø twanda'aky, jøts ja' idø'øn ja myøk'ajtin yø' midi ixa m'ejxtip mmadoodip. ³⁴ Pø kidi ja Davidipxi kø'øm tsajpajt, ja'ayi ku David øjts yide'en wya'añ ku ja nwindson'ajtim Jesús ja Dios Teety yide'en ñimaajyiyi:

“Ixa'ak, jøts ø xputsøønit n'aga'ñ'ampy,

³⁵ jøts øts yø mmidsep nmimajada'øxt.”

³⁶ Meets Israelit jaa'y kuwani niduki'iyi ka'pxy xnijawidit, jøts ku ja Jesús pøn meets kø'øm mdukyikruspajt ja abiky jaa'y, ja' yø' pøn ja Dios ixyam tø kø'øm tpikta'aky møj windsøn jøts yikniitso'kpi.

³⁷ Ku dø'øn jade'en tmadowdi ja Pedro kyajpxy, winets ja jotmay tyatøjkiyidøø, xjats ja Pedro yiknimaay møøt ja ñimaktu'ukpi myigu'uk:

—Migu'uktøjkti, ¿sudso'ampy øø ndu'unt?

³⁸ Xjats ja Pedro t'adsojimbijty jøts tnimaay:

—Yø mbøkyu'unin mmajststuttip, jøts mnøbattit nidu'uk jaty Jesús xyøøgøjxp, jøts jade'en myikpojkipimaa'kxtit; jøts nayide'en ja Dios Teety mduktatøkiyidit ja y'Espiritu Santo. ³⁹ Meets m'øy'ajtin yø', møøt m'u'nk møøt m'una'jkti, jøts nayide'en pøn jaty jagam tsinaadyip; uk niduki'iyits ja'adi pøni pøn jaty ja Dios Teety kø'øm wyiwetswampy.

⁴⁰ Yide'en idø'øn ja Pedro øjts tkajpxwiy ja jaa'y, jøts tnimaay:

—Majststutti yø'øbi jaa'y pøn ja nwindson'ajtim Dios yja' tkajanchja'widip.

⁴¹ Xjats ku ja Pedro jade'en tnimaay, winets ja jaa'y ñøjxktøø nõbajtpi pøn jaty tñibøjktøø ja Pedro y'ayuujk; ja'abi xøøwts ja Jesús yja' ojts ñamayi nidigøøk mil. ⁴² Niduknax idø'øn ja t'ixpøkti sã ja Jesús kyudanaabyi y'awa'andi, jotkujk idø'øn ja jam tu'ugyi chøøni, jøts ku ñamyukyidi dios'ajot'ajtpi, jøts ja tsapkaaky tkaydi Jesús y'oo'kingøjxp.

Sã chinaadyi ja myijawyeembi ja Jesús janchja'wibidi

⁴³ Xjats ja jaa'y ñigyumaap idø'øn ja tja'widøø ku ja Jesús kyudanaabyi ja mamylagri tñanky'ijxyidi. ⁴⁴ Tu'ugyi ja wyinmaa'ñ ja tyik'etti pøn jaty ja Jesús yja' t'pabøjkiyip jøts ñadyagumayidi ja pyikta'aky; ⁴⁵ jøts ttookti pøni ti jaty pøn myøø'ajtpy, xjats jade'en ja nimeeñ tyikwa'kxidøø pøni sã jadu'uk jadu'uk yja' kya'ity. ⁴⁶ Jabom jabom idø'øn ja jap ñamyukyidi møj tsaptøjkjotp, jøts nayide'en awingujk tøjktøpy, jøts ja chapkaaky jap tyikwa'kxti, jøts jade'en ejtni xoni kyaydi, jøts jade'en nipøn kyanamyøjpikta'agyyi. ⁴⁷ Jøts ja Dios Teety jade'en tjanchkajxa'akti jøts ja kajp jaa'y jade'en yjanchøkyidi; jabom jabom idø'øn ja nwindson'ajtim Jesús tyikmayi ja yja' pøn jaty yikpojkipmaa'kxtip.

3

Ku ja pakma'at jaa'y choknaq

¹ Tuk'ojk idø'øn ja Pedro ojts tmøøtnijkxy ja Juan jam tsaptøjkjotp, wyinaky xøøw ja ñøjxktøø wine'enin ja jaa'y jam wyinaty xyuminamyukyidøø dios'ajot'ajtpi. ² Jamts idø'øn wyinaty tu'uk ja jaa'y pøn ja tyeky ma'at. Ejtp idø'øn ja jam xyumiyikwaanijkxy jam tsaptøjk agø'øm mã ja tsaptøjk'aaw jam midì txøøw'ajtp Hermosa. Jamts ja myigu'uk yiktaajniy, jøts ja jam yiklimunsimuky ku jam pøn tyøki tsaptøjkjotp. ³ Xjats ku ja pakma'at jaa'y ojts t'ejxpaaty ja Pedro møøt ja Juan, ku ja jam wyinaty tyøkiwya'andi tsaptøjkjotp, winets ja t'amidøøy ja limunsi. ⁴ Xjats ja Pedro møøt ja Juan twin'ejxjø'økøø ja pakma'at jaa'y, jøts ja Pedro wyaañ:

—Win'ejxk øøts.

⁵ Xjats ja jaa'y yjanch'ejxji'jky, yide'en ja wyinmaa, yikmo'op idø'øn ja tijy øy ti yiin waan. ⁶ Winets Pedro ja ñimaa'jyøø:

—Kidi meeñip øø nmi'widijtpy, ja'abi øø ndumpy midì øø xukmawidejtp ja nwindson'ajtim Jesús pøn ojts chøøni jam Nazaret, pidø'kni jøts myøøñit.

⁷ Xjats ja Pedro ja jaa'y tmajch y'aga'ngyø'køjxp jøts ja twejtsji'jky, ja'ayi ja jade'en ttuuñ winets ja tyeky ja jaty ywa'kmøkiyi'ñ, jaty tyekyo'kt ja myøøpjkxy. ⁸ Xjats ja pakma'at jaa'y jade'en kanimøj'aaw yjanchwo'oni'jky, jøts ja tyanaagyukyiyi'ñ, jaty ja ojts yø'oyji'iky. Xjats ja tmøøtjkidøø jap tsaptøjkjotpy, ñiyukwo'oni ñichajpwo'oni ja jap t'ajot'aty ja Dios. ⁹ Niduki'iyi jaa'y ja ojts t'ejxti ku ja pakma'at jaa'y jade'en yø'øy, jøts ku ja jade'en tjanch-tukmøjawi tjanchtukunuu'kxyjawi ja Dios. ¹⁰ Xjats ja ñigyumaap tyimya'widøø pø mã ja tymñayja'widøø ku dø'øn jade'en wyinaty tøjaty. Ja'widip tsø'jkidip idø'øn ja jamdi, kumi ñija'widip ja wyinaty ku ja yja'aji pøn jam wyinaty xumiyikmujkp jam tsaptøjk agø'øm, mã ja tsaptøjk'aaw jam midì txøøw'ajtp Hermosa.

Ku ja Pedro kyajpxwa'kxy jam møj tsaptøjk agø'øm midì yikejtp Salomón Tyøjkweenk

¹¹ Ja pakma'at jaa'y pøn idø'øn wyinaty tøjyøøpky, ka'ap ja t'ukmajtstutni ja Pedro jøts ja Juan, winets ja jaa'y pyujtmendøø mã dø'øn ja jam wyinaty, jadi'iñi ja myondi tyukti paty ja jam myendi tsaptøjk agø'øm midì txøøw'ajtp Salomón Tyøjkweenk. ¹² Xjats ku ja Pedro jade'en ojts t'ixy ja jaa'y, winets ja tnimaay:

—Israelit jaa'dyi, ¿tiku ñigyumaap xjawidi? ¿Tiku øø xwin'ixy, yide'en meets idø'øn yjawi mwani, øøts idø'øn yø xijy kø'øm møk'ajtin tøjnduktatsø'øky yø jaa'y ku yø tøjyø'obyiky, uk ja øøts idø'øn yø xijy tøjnduktatsø'øky ku øøts ja Dios janchtsuj n'ajot'aty? ¹³ Ka'ap yjade'eni, ja Dios Teety jade'en tøjtmø'øy møk'ajtin ja y'U'nk Jesús, ja Dios Teety pøn adøm n'apteety'amøj Abraham Dios'ajttip, møøt n'apteety'amøj Isaac, jøts nayide'en møøt ja Jacobo. Ja' y'U'nk ja myøø'ajtin jade'en tmøøt'ajtp, ja Jesús pøn ja Dios Teety y'U'nk'ajtpy, ja' pøn meets mgøøjk jam yikutujkpi wyindum. Jøts ku ja Pilato ja wyinaty tjamajtstutwa'añ, ka'ats meets ja xnankykipidsøjmi. ¹⁴ Ja' mee ne'legi myik'awa'atspidsøøm pøn wyinaty tøjyundigøy, jøts meets ja ka'ap xnankmyajtstujttøø pøn wa'ats, pøn katundigøøpy niwine'enin. ¹⁵ Jade'ents meets ja xyik'ø'jky ja yikjy'ajtpi. Jøts tøj Dios ja jadigojk yikpidi'igy jap øø'kpi jutjøtpy, tøj øøts idø'øn ja jade'en ndyimybyaaty ndyimy'ixy, øøts idø'øn ñamyayi nõjxpx testigi. ¹⁶ Ja' idø'øn yø jaa'y jade'en tøjyikmøpkiky ku yø tøj'ajot'aty, ku yø tøjtmøjpikta'aky ja Jesús. M'ijxy'ajttip mñija'widip yø pakma'at jaa'y jøts ku tøjyikmøpkiky, jøts ixa dø'øn jade'en x'ejxti møk møj'aaw.

¹⁷ Migu'uktøjkti, wa'ats øts ja nnijawi ku meets ja mwindsøn møøt mnabyudøjkiyidøø, jøts meets ja Jesús xyik'oo'ktøø, nugo ja jade'en xundøø, ni xkanijawi meets ja' pøj tøjøjxp jade'en m'adøstøø. Ka'ap meets ja xnijawi pøjtidam meets idø'øn mjatumpy. ¹⁸ Xjats ja Dios tøjanchyik'aduky ja wyanda'aky ku myagyajpxnaxpi ja tyikwa'añ: jøts ku ja yiknitsokpi

wyinaty jade'en y'ayo'ombaatwa'añ. ¹⁹ Paty mbøkyu'unin xmajtstu'uttit xyiktigatstít ja mdsinaa'yin, ja'myatsti ja Dios Teety jøts ja tyakt ja øyxøøw ja øyjumøjt, ²⁰ jøts ja tkaxt ja Jesús pøn ja wyinaty jekyip tø ttanibiktaagi jøts adøm ja xyiknitso'ok'ajntindit. ²¹ Øy idø'øn ja Jesús icyam ndejint tø yjatañ jap tsajpjøtpty, jaanim ku ja Dios Teety ja kø'øm tyik'ø'yigyøxt pøni ti dø'øn ja tyunwampy, jade'en sa ja myagyugajpxy ja kø'øm t'agajpxiyi'ñ ku ja jade'en wyandøø pøn jaty tsinaadyøø jekyip. ²² Jade'en adøm n'apteety'amøj øjts yiknimaa'yindi ku Moisés ja øjts ñii'mxyidi: "Mdanigaxidip ja Dios Teety tu'uk ja kugajpxy, meets mgø'øm migu'uk nøjx kø'øm yikpikta'aky jade'en sa ø kø'øm nyikpiktaajky. Mimado'odip idø'øn ja' pøni sa jaty ja wyinaty mñii'mxyidi, ²³ pøni pøn ja wyinaty tkamimadoop, ka'ap ja t'ukmøøtsinaañidit ja myigu'uk, kuwani ja jaty wyindigø'ødyit."

²⁴ Jade'en idø'øn ja Dios kyugajpxy wyandøø, ja' idø'øn ja ñigajpxtøø sa jaty yjatt kyubatt, ti jaty tunip ya'atpi jumøjt, jaayip ja jade'en wyangaktøø ku ja Samuel jade'en jawyeen wyaañ. ²⁵ Tum meets ja Dios kyugajpxy m'u'nk'ajttip, jøts paty ja Dios øjts tpiakta'aky tu'uk ja kutujk midit ja aptøjk øjts yikmo'odi, jøts meets kidi xyikwindigøy ja m'anmija'win jam Dios wyindum, yide'en idø'øn ja Abraham Dios øjts ñii'mxyi: "Tuki'iyi ja teety ja taak, ja u'nk ja una'jk nøjx yikunuu'kxkøxti mets m'ap mets m'una'jkøjxp." ²⁶ Ku ja Dios tyikpidsiimy jadigojk ja y'U'nk Jesús jap oo'kpi jutjøtpty, jawyeen ja øjts mdaniguexyidi jøts ja mgunuu'kxidit, jøts niduki'iyi xmajtstu'uttit ja mga'ødyu'unindi.

4

Ku ja Pedro møøt ja Juan øjts twingunøjxidi ja kudunktøjkti

¹ Nay ixam idø'øn ja Pedro ja ja'y wyinaty tmigajpxti møøt ja Juan, ku ja teetyøjk jam myendøø møøt ja tsaptøjk ejx'ejtpi windsøn, jøts møøt ja saduceotøjkti. ² Tø dø'øn ja wyinaty yikxon yjanch'ambøkti, ja'agøjxp ku ja Pedro møøt ja Juan tyik'ixpøkti ja ja'a'y, ku ja wya'andi jøts ku oo'kpi pyidsø'ømdit jadigojk jap oo'kpi jutjøtpty, kumi tø ja Jesús wyinaty kø'øm pyidsimy jadigojk jap oo'kpi jutjøtpty. ³ Xjats idø'øn ja øjts yikmajtsnidi jøts ja yiktsumnidøø, kyimjabomnim ja yiktiidyundøø kumi tsuu'nip wyinaty ku ja yiktsumdøø. ⁴ May ja'a'y idø'øn wyinaty tø tjanchjawidi ja øgyajpxy ja ømyadya'aky, pøn jaty ja wyinaty tø tpatmadowdi; jawaani kamagoxk mil ja yikmachoopidsiimy ja ya'a'dyi pøn tjanchja'widi ja nwindson'ajtim, ku ja wyinaty tø tmadowdi ja øgyajpxy ja ømyadya'aky.

⁵ Xjats ja'abi xøøw winets ja windsøndøjk ñamyujkidøø jam Jerusalén midit t'ana'amdip ja kajp, nay øjts idø'øn ja mayja'a'y jam myendøø, møøt ja kajpxwejpitøjkti midit tundip jam tsaptøjkjøtp; ⁶ nay jam idø'øn ja Anás wyinatymi pøn ja teetywindsøn'ajtip møøt ja Caifás, møøt ja Juan, jøts møøt ja Alejandro, niduki'iyi ja jam wyinatyi niwinø'øn ja pyaa'tatyidi ja teetywindsøn'ajtk. ⁷ Xjats ja Pedro yiknajtswa'widøø møøt ja Juan, jøts ja øjts yikpikta'akti jam agujk'am, winets ja yiktiibyøjktøø, yide'en ja øjts yiknøjmidi:

—¿Pøn yø jade'en tø mdanigutujk'atyidi jøts jade'en m'adø'øtstít, pøn jade'en tø m'ane'emyidi?

⁸ Xjats ja Pedro y'adsøøy, kumi tø ja Espíritu Santo ja wyinaty amuum tyatøkiyi, jøts ja tnimaay:

—Meets windsøndøjkti, meets møjaa'dyøjkti pøn jaty tsinaadyip ya Israel: ⁹ ku øøts idø'øn jade'en tø xyiktiyi sa tø chø'øky yø pamaa'y, sa yø tø yik'ødyuñ, ¹⁰ n'adsojimbetp øøts ja m'ayuujk, ñigajpxp øøts ya mayjaa'y agujky, jøts tnijawidit niduki'iyi pøn jaty tsinaadyip ya Israel, jøts yø ja'a'y ixa tyani mee mwinduujy møk møjaa'y. Ja nwindson'ajtim Jesucristo ja' yø tø yiktsø'øgyi pøn kugajp'ajtp jam Nazaret, ja' midit meets øjts xyikruspety, jøts ja' Dios Teety tø yikpidsiimy jadigojk jap oo'kpi jutjøtpty. ¹¹ Jade'en idø'øn ja Jesús ñamyayi tø ñøjxni ejxim ja tsaa midit meets jagam m'ixjibejp, midit mee mgayiktuun jam pøchkyøjxp, jøts ja' icyam ne'egi tø pyidsimy jadigojk jawaani øy, midit tmach'etkøjxp tuki'iyi ja pøch'aaw. ¹² Nipøn jadu'uk xkayiknitso'ok'ajntint sa adøm Jesús xyiknitso'ok'ajtyindi, pøn ja Dios tu'ugyi tø ttanibiktaagi ya naxwiñ.

¹³ Xjats ku ja kudunktøjk t'ejxti ja Pedro møøt ja Juan, ku ja jade'en møk'ampy wyingugajpxiyidi, winets ja t'ejxkajptøø kudam ja kya'ixpikyidi, ku ja ñugojaa'yidi, jøts ja jade'en nugo myaydi tyajti, winets ja t'ejxkajptinim jøts kudam ja yja'adi pøn ja Jesús wyinaty tø tmøøtwidetti. ¹⁴ Jøts ja ja'a'y midit wyinaty tø chø'øky, jam idø'øn ja wyinaty tmøøtanidi, paty ja kudunktøjk ka' t'ukmidsepwanidøø. ¹⁵ Xjats ja yikajpxidsømdøø ma ja mayjaa'y jam wyinaty tø ñamyukyidi, jøts ja kudunktøjk ja agø'ømyidi tkajpx'øyidøø. ¹⁶ Yide'en ja ñawyajnidøø:

—¿Sa yø ja'a'y njanchtuu'nindit? Pø tyumnija'winidipxi yø' pøn jaty ya tsinaadyip Jerusalén jøts ku yø jade'en tø tyiktuujnidi ja Dios myø'ajtin, ¿ti jats adøm ja ngagupijkyim ku dø'øn ja jade'en tø yjanchjaty? ¹⁷ Wan yø tkajpx'adsø'jka'andi, jøts ja Jesús ka'ap ja yja' y'uyikajpxyø'øñit jam mayjaa'y agujkp.

¹⁸ Xjats ja twaãdsoodoo ja Pedro mooet ja Juan, ja mook'ampy t'ana'amdoo jots ja kidi jade'en ja jaa'y t'ukyik'ixpøjkniidi, ka'ap ja jade'en t'ukajpxwa'kxinidit ja Jesús yja'. ¹⁹ Winets ja Pedro y'adsoodoo mooet ja Juan, jots ja wyandoo:

—Ukwinmaagyukidim kooom pøni tiy tam jade'en, pøni øy tam ja Dios jade'en tjawi ku mee ne'egi myikmimado'ot, jots ja kyayikmimado'ot. ²⁰ Nijuuni øøts ja ngamajststuttu'tt mididi øøts jaa'y nduk'ixpijkpy, kumi tø øøts ja jade'en kooom ndyimyadøy, jots kumi tø øøts ja jade'en kooom ndyimy'ixy.

²¹ Winets ja kudunktøjk ja ojts kyajpx'adsø'øgyidi jots nigidi'iyam ja ojts tyimyikmatsti, yikmajstuttøø ja jadi'iñi. Nigidi ja yikmiwinmaa'nbyajtidøø sudso ja tyik'ayo'ombaa'ttit, kumi tso'jkidip ja', niduki'iyi ja kajp jaa'y wyinaty tkajxakniidi ja Dios. ²² Jade'en idø'om ja pakma'at jaa'y chøøjky, jam idø'om ja jaa'y yjumøjt ja wyinaty wixijkxy myajtskin pøn ja Dios yiktsoo'kiyøø.

Ku ja Jesús yjanchja'wibi t'amidoodoo ja møk'ajtin

²³ Xjats ku ja Pedro mooet ja Juan y'awa'atspidsømdøø, winets ja myigu'uk ja tniñøjktøø ma ja jap wyinaty, jots ja ojts ttamimadya'akti sa jaty teetywindsøn sa jaty møjaa'dyøjkti ja wyinaty tø ñi'mxyidi. ²⁴ Xjats ku ja myigu'uk ja jade'en tmadoodoo, winets ja niduki'iyi ja Dios t'ajot'ajttøø:

—Kuuyi me Dios Teety jadu'uk møk'ajtin møk xmøødi. Tø xyiknajtskojgyixy tuki'iyi winø'on ja pikta'aky y'ity na'xwiñ, wan tsajpi, wan tnaajxi, wan tnoøji tmejyi. Tum mets yø mja'ajtpy amuum.

²⁵ Nayi mets ja David ja Espiritu Santo mdukyik'agajpxiyi'ñ ku ja xyikwaañ yide'en: t'igøjxp ku jaa'y kajp kajp nugo jøtkøjxpm t'ejxti pøn ya jagagugajp'ajttip, pønts ya kugajp'ajttip,

jøts yø tmidundigøøwyamidi ja nwindson'ajtim?

²⁶ Ja windsøndøjkti mididi yikutujktip ya na'xwiñ, ja' tø tmidsepøkti ja nwindson'ajtim,

jøts ja jaa'y mididi t'ana'amdip ja kajp, tø ja ñamyukyidi may'ampy,

jøts ja tniñidø'kti ja Dios Teety, nayide'en ja tmidsepøkti ja yiknitsokpi mididi ja Dios Teety kyejxpy.

²⁷ Jøts janch tø dø'on yjaty, kumi jade'en ja Herodes mooet ja Poncio Pilato tø tminamyukyidi ja wenk jaa'y jøts nayide'en yø israelit jaa'dyi ya møj kajpxøøjty, ja' idø'om jade'en tø yikmidsepiky ja m'U'nk Jesús pøn janch tsuj janch wa'ats, pøn me koo'om tø xanibiktaagi yiknitsokpi. ²⁸ Tø dø'on ja jaa'y ja jade'en yjanchtuñi sa mets ja wyinaty koo'om tø xanibiktaagi jøts ku ja jade'en yjatt, tøts idø'om ja jade'en yjaty. ²⁹ Dios Teety, ejx ixyam sa tkajpx'adsø'øgidi ja jaa'y, yikjotmøkøpø yø mdumbi jøts kyatsø'øgidit ku tkajpxtit ja mgajpxy ja m'ayuuik. ³⁰ Mo' møk'ajtin, mo' pudøjkin jøts tyiktsø'øktit ja pamaa'y jøts tyikwingaxø'øktit ja Jesús myøk'ajtin.

³¹ Xjats ku ja chapkajpx'abajtidøø, winets ja Dios tyikmiñ ja ujx ma ja jam wyinaty tø ñamyukyidi; xjats ja jade'en ja Espiritu Santo yikjotmøkøpøjkidøø, jøts tkajpxwa'kxidøø amumjøot ja Dios kyajpxy ma jaty ja wyidejttøø.

Ku ja Jesús pyadumbitøjk amuki ja pyikta'aky tja'ajtti

³² Ja mayjaa'y mididi wyinaty tø tjanchjawidi ja øgyajpxy ja ømyadya'aky, tu'ugyi ja wyinmaa'ñidi, ka' pøn wenk wyinmay, nitu'ugin nipøn ja pyikta'aky tkaja'adijy, tyumja'ajttip idø'om ja niduknax, ka'ap ja pøn tja'aty nadyu'uk. ³³ Jøts ja kudanaabyi jøtmøk'ampy ja tngajpxti tnmadya'akti ja nwindson'ajtim Jesucristo, sa ja pyidisiimy jadigojk jap oo'kpi jutjøtpy. Dios idø'om ja yikxon pudøjkin møøjyidip. ³⁴ Jøts nipøn niti kya'lijtxyi, kumi tyoo'ktip ja ñaajx ja', kumi tyoo'ktip ja tyøjk ja' pøni pøn jaty jam ja pyikta'aky tmoø'tajtp, jøts ja ñimeeñ ja tyikmeniidi, ³⁵ jøts ja ttagøðokidi ja kudanaabyitøjkti. Ja'ats ja tyikwa'aktip, jøts ja ttagumaydi pøni pøn jam tigati ka'ejtxiyip. ³⁶ Jamts idø'om wyinaty tu'uk ja israelit jaa'y pøn ja Levi y'apteety'amøjip, José dø'on ja xyøøw, jam ja wyinaty tø kye'lexy ma ja naajx jam møj mejyotp mididi txøøw'ajtp Chipre. Ja'abi jaa'y ja kudanaabyitøjk yikxødigatstøø, jøts ttejtøø Bernabé mididi tyijpy kajpxjøt'amøjkibi; ³⁷ ja'ats idø'om tto'jk ja ñaajx jøts ja tyikmiñ ja na'xtsow, jøts ja ttagøðøjkijyi'ñ ja nwindson'ajtim kyudanaabyi.

5

Ku ja Ananías jøts ja Safira tmidundigøødyøø ja Espiritu Santo

¹ Jamts idø'om wyinaty jadu'uk ja jaa'y pøn txøøw'ajtp Ananías, jøts ja ñidø'øxy Safira txøøwi, ja'ats idø'om tto'ktøø ja ñaajx tukam. ² Xjats ja kujkwa'kxy tmidanidøø na'xtsow, jøts ja ojts kujkwa'kxy ttaninijky ja kudanaabyitøjkti, jade'en ja ttanikajpxy jøts ku ja jam ka'pxy, ka'ap ja jade'en ttukmadøy, wa'ats ñidø'øxy ja mooet tnijawu ku ja jade'en y'adø'øtsti. ³ Xjats ja Pedro tniamaay ja yaa'y:

—Ananías, ¿tiku miku' tō mdatōkiyi jōts jade'en xjawin'ōōnwā'añ ja Espiritu Santo, kidi kujkwa'kxyip tō xyikmiñ? ⁴ ¿Ti kidi ja kam xkō'ōōmnaajxi? Jōts ku tō xōōky, ¿ti kidi ja meefi xkō'ōōmja'aji jōts xkōyakt pōni winō'ōōn kō'ōōm xkōyākwa'añ? Dios tō xawin'iiñ, kidi oōdsip.

⁵ Ja'ayi Ananías jade'en tmadōōy, winets ja jaty; oōky ñaxkidaajky. Ku ja jaa'y ja jade'en niduki'iyi tnmadōōdōō jōts ja yjanchō'jkidōō. ⁶ Xjats ja una'jk jaa'y myendōō, jōts ja t'abejtōō ja oō'kpi jōts ja t'atsyiknaxōjkidōō.

⁷ Tigōōk oorinin idō'ōōn ja wyinaty jade'en tō yjaty, ku tyōōjkiyiñ ja Ananías ñidō'ōōxy nay jam, ka'ap ja tñijawī pōni tidam idō'ōōn wyinaty tō tyuñi. ⁸ Xjats ja Pedro ja tyiibyōōjkōō, jōts ja ojts ñii'mxyi:

—Nigajpx, ¿jade'en idō'ōōn ja naajx tō xjanchtookti winō'ōōn tō xanitejti?

Winets ja y'adsōōy jōts ja wyaañ:

—Jade'en oōts ja tō ndōōky.

⁹ Xjats Pedro ja tñimaay:

—¿Tiku jade'en tō xkajpxy'atti ku ja Dios Teety y'Espiritu Santo jade'en xwin'ōōndi? Ixa ja jaa'y tōk'agi'y myendi midī ja mniyaa'y tō y'atsyiknaxōkiyi, jōts mets inet m'atsnaxōjkimyip.

¹⁰ Winets ja tō'ōōxy jaty; oōky ñaxkidaajky jam Pedro tyekyō'ōōm. Xjats ku ja una'jk jaa'y tyōōjkidōō, oōky ja jap tpatōō ja tō'ōōxyōōk, winets ja ojts jaty; tyikpidsōm, jōts ja ojts t'atsnidajidi nay jam ñiyaa'y pyukō'ōōm mā ja jam wyinaty tō yiknidaji. ¹¹ Winets ja Jesús yja' niduki'iyi yjanchō'jkidōō, jōts nayide'en pōn jaty ja ojts jade'en tnmadowdi.

Ja mamylagri midī ja Jesús kyudanaabyi ñanky'ejxidōō

¹² Mōk idō'ōōn ja Jesús kyudanaabyi ja milagri ttundi jam mayjaa'y agujkp; jōts niduki'iyi dō'ōōn ja Jesús yja' jam yō'ōōmyukti mōj tsaptōōk agō'ōōm midī yiktej p Salomōn Tyōōkweenk.

¹³ Janch chōky'ajtip idō'ōōn ja kajp jaa'y ja', ka'apts ja niduki'iyi ja tōmōkwinnmaa'ñ tjagyapti, jōts jap ñōjkxtit mā ja Jesús yja' jap ñamyukyidi. ¹⁴ Namay idō'ōōn ja Jesús y'ayuujk yikmibijky, jade'en ja yaa'dyōōk jōts nayide'en ja tō'ōōxyōōk. ¹⁵ Ja'agōōjpxts ja pamaa'y jap yikiidyaktōō jap mā tuu' ñaxy, nay jap ja yikpikta'akti myaabajtkixpy jōts tō'ōōkyōōjpx, jōts ja cho'oktit ku ja Pedro jap wyinaty ñaxy, oōy ja y'aga'ax ja'ayi tyapaadiyidit. ¹⁶ Jōts nayide'en ja wenk kajp midī ja Jerusalén myiwingon'ajtpy, ja'ats tyikmendōō ja pyamaa'y jōts nayide'en pōn jaty wyinaty tō mōk'ampy myachiyyi ja miku'; xjats jade'en niduki'iyi choktōō.

Ku ja Pedro mōōt ja Juan yikjemdundōō yiktedundōō

¹⁷ Winets ja teetywindsōn mōōt ja saduceit jaa'y ojts nawyinaxi tjawidi, ¹⁸ winets tmatstōō ja Jesús kyudanaabyidi, jōts jap tsumdōō mā ja kajp jaa'y pyuxōōk jap. ¹⁹ Xjats nwindson'ajtim ja puxōōk agaj ojts tyik'awa'ach jōts tyikpidsiimy, jōts ojts tñōjmi:

²⁰ —Nōjkxti jam mōj tsaptōōkjōtpy, tukmadowdi jam ja jaa'y ja oō'yayuujk midī ndaju-jky'ajtindip.

²¹ Xjats ku dō'ōōn jade'en yiknimaydi, winets jōpyi ñōjkxtōō jam mōj tsaptōōkjōtpy, jōts ja jaa'y ja jam tyik'ixpōōjkōōjkidōō.

Yam idō'ōōn ja teetywindsōn jap wyinaty udy'a'aky twaadsoodinim niduki'iyi ja mōjaa'dyōōjkti midī ja Israelit jaa'y yikutujk'adsinaadyip, jōts ja Jesús kyudanaabyi nayide'en yikwaagsowa'andi pōn wyinaty tō yiktsumdi. ²² Xjats tkejxy ja teetywindsōn ja tyumbi, jōts ku jam yjaja'ttōō jam puxōōk agō'ōōm, nitu'uk ja ojts tkapaatti pōn idō'ōōn jayiktanigaxtip; winets ja jadi'iñi wyimbejtnidōō ²³ jōts ttukmadōōdōō ja teetywindsōn, jōts yide'en tñimaadyōō:

—Ku oōts jam tō nja'aty, aduky oōts ja puxōōk jam tō nbaaty, jam idō'ōōn ja soldadi y'ej'etti puxōōk agō'ōōm; xjats ku oō tō nyik'awa'ach, nipōn oōts jap nitu'uk tō ngapaaty.

²⁴ Xjats ku dō'ōōn jade'en tmadōōdōō ja ayuujk ja mōj teetywindsōndi, jōts mōōt ja tsaptōōk adsinaabyi, winets ñawya'añidi: “¿Sudso'ampy nmidābyaajtindit, sudso'ampy yjōpkōxt yō jade'embi winmaa'ñ?” ²⁵ Jōts winet jaty; tu'uk yja'ty ja jaa'y, jōts ja wyaañ:

—¿Kidi xnijawidi? Pō ja'axi yik'ixpōōjkti jam mōj tsaptōōkjōtpy midī meets tō x'uktsūmy.

²⁶ Winets ja tsaptōōk adsinaabyi tmōōdyiñ ja tajkti, jōts ojts twaawidi ja Jesús kyudanaabyi, nisā dō'ōōn ja tkatundi, tsō'jkidip ku ja kajp jaa'y myi'ambōōkiyidit jōts ku jotmōñ chaaga'adsiyidit. ²⁷ Ku dō'ōōn tyikja'ttōō, winets ttwingugajxidōō mā ja israelit jaa'y kyutujk adsinaabyidi, winets ja teetywindsōn tñimaay ja Jesús kyudanaabyidi:

²⁸ —Tō oōts nñigajpxy jōts ku oōts ojts nyikutuky, jōts ku meets ja Jesús yja' ya niwine'enin xkananky'ixpōōkiyidit. ¿Ti dō'ōōn ixyam jade'en tō xundi? Meets ixyam jinaxy tō xuknija'wiguixy ja m'ixpōōkin ya Jerusalén, jōts oōts xukpōky'atwa'añ nayide'en ja Jesús y'o'jkin.

²⁹ Winets ja Pedro t'adsojimbettōō mōōt ja myigu'uk:

—Kuwanī oōts ja Dios yja' nbaduujniyi jōts ka'ap ja jaa'y yja'. ³⁰ Ja Dios Teety pōn adōm n'apteety'amōj Dios'ajjtōō, nay ja' kō'ōōm tō tyikujkpyiya ja Jesús, pōn meets kruskōōjpx

mmiwopajt kyøjøm tyekjøm, jøts jade'en xyik'ooktøø. ³¹ Tø ja Dios ja køøm tpikta'aky møj windsøn y'aga'ngyø'ampy jøts yikutukt, jøts nayide'en ya tyiknits'o'ok'att ja naxwii'ñit jaa'y, paty Dios jade'en t'ayo'ixy ja Israelit jaa'dyi, jøts jade'en yikpojkpimaa'kxtit ku tmajtstuttit ja pyøkyu'umin. ³² Wa'ats øøts idø'on ja nnijaw'i ku ja Dios Teety idø'on jade'en ttuun, jøts y'ijxpy nayide'en ja Espiritu Santo mid'i ja Dios Teety tyuktatøjkp ja yjaa'y, pøn jaty ja kyajpxy paduujniyip.

³³ Xjats ku dø'on ja Israelit jaa'y jade'en ja kyutujk adsinaabyi tmadoodøø, jøts ja Jesús kyudanaabyi yikm'ambøktøø jøts yik'ookwajnidøø. ³⁴ Jamts wyinaty nidu'ukti ja kutujk adsinaabyidi pøn yiktejtíp fariseit jaa'y, ja' xyøøw Gamaliel mid'i tñanky'ixpøjkijyp ja Moisés kyutujk, jøts janch tsojkiyp idø'on ja kajp jaa'y ja'. Ja'ats tñanaagyukiyi'ñ, winets tkajxpidsimgijxy ja Jesús kyudanaabyi, jøts ja jap mimøj t'atsyik'awixy abiky tsoo. ³⁵ Xjats yiknimaadyi ja kutujk adsinaabyidi:

—Meets Israelit jaa'y, kidi yø jaa'y nugo ajaw'i sã xundi. ³⁶ Ja'myatsti ku ojts tu'uk ja jaa'y ñamyøjpikta'agy'i windsøn pøn txøøw'ajtp Teudas, jøts ja kyutujk ojts ttawin'iñ ja jaa'y nimaktaxk magø'pxy. Winets ja soldadi ojts yik'øøgyi ja kya'øwynmaa'ngyøjxp, xjats ja jadi'iñi wyindingøgyøjxti pøn jaty wyinaty tø tpabøkti. ³⁷ Xjats jadigojk yjajtkoimi nayide'en ku ja gobierni tmachomujky ja yjaa'y, winets nay ja'abi tiempi tu'uk ja Galileit jaa'y ojts køøm ñamyøjwindsønbi'kta'agiyi jøts namay ja jaa'y nayide'en ttukmibijky; winets ja soldadi nayide'en yik'o'jkijyøø, xjats ja jade'en kyutigøøy ja kyutujk. ³⁸ Paty ø nwa'añ jøts xmajtstuttit yø'øbi jaa'dyi, ka'ap nugo xatøjkijyidit ja wyinmaa'ñ. Pøni kyøømwinmaa'ñ yø'ødi, kudigø'øpyts yø tsojk; ³⁹ pøni Dios yja' yø', nijuunits meets yø xkayikudigø'øty. Øyim mnay'ejx'tetiyyidit; kidim Dios møøø nugo mdseptundi.

⁴⁰ Xjats ku dø'on ja Gamaliel jade'en kyajpxy'abajtyi'ñ, jøts ja kutujk adsinaabyitøjk udy'a'aky tmibøjkøjxtøø. Winets twaadsodøø ja Jesús kyudanaabyitøjk jøts tyik'ayo'ombaa'gtøø, xjats tñimaadyi jøts ka' nugo tjaakajpxwa'kx'adø'øtstít ja Jesús y'ixpøjkin; winets jadi'iñi tmajtst'ttøø. ⁴¹ Xjats ja Jesús kyudanaabyi jap pyidsømdøø mǝ ja israelit jaa'y kyutujk adsinaabyi japti, jotkujk idø'on ja ñajyawiyidi kum'i tø ja Dios ja wyinaty tyanibiktaagiyidi, jøts ja jade'en y'ayo'odit Jesús køjxp. ⁴² Ejtp idø'on ja jabom jabom tñagjpxti tkajpxwa'kxidi ja Jesús yja', jøts ja jaa'y jade'en ttuk'ixpøkti jap møj tsaptøjkøtpy jøts nayide'en awingujky tøjkjøjtjy, nijuuni dø'on ja tkamajtst'ttøø.

6

Ku ja niwixujkpi yaa'dyøjk yikpiktaktøø ejx'ejtpi

¹ Nay ja'abi et, nay ja'abi jumøjt idø'on ja jaa'y ñamay'i adøtstøø pøn jaty ja Jesús yja' pyaduujnidip. Jøts ja' mid'i tkajpxtip ja griego ayuujk, ja' idø'on ojts y'øø'mbinaxwa'akti jøts tñ'øøndi ja myigu'uk pøn tkajpxtip ja israelit ayuujk, ja'agøjxp idø'on ja y'øøndi ku ja kyu'økytø'øxy ja kyayik'ejxti yikxon, ku ja jii'kxy jabom jabom yjawa'kxy. ² Ja' idø'on ja ñ'øøndip, winets ja nimakmajtskpi jaa'y pøn tkudanaadyip ja nwindson'ajtim Jesucristo, ja' ojts niduki'iyi tñankñamyukidi ja Dios yjaa'y, jøts ja tñimaadyøø:

—Ka'ap jade'en y'øyi ku øøts ja jii'kxy nyikwa'kxt, jøts øøts ja Dios y'øgyajpxy y'ømyadya'aky nga'atskajpxwa'kxiti, zti juuni øøts ja n'atstuñ? ³ Migu'uktøjkti, paty øøts yikxon ndyimñigajpxy, ixa'adi niwixujk jaa'y, nay jaayi dø'on køøm mnawyi'ejxidit, ja' idø'on m'ixa'adip pøn windsø'øgi'ejtíp, pøn ja'gyukidip, jøts pøn ja Espiritu Santo tmøøt'ajttip, ja'ats yø tunk mdaguwandip jøts ja jii'kxy ja jade'en tyikwa'kxtit. ⁴ Øøts dios'ajot'ajtwamp øøts, njaaktyimdyuk'ixpøjkwampy øøts jaa'y ja Dios y'øgyajpxy y'ømyadya'aky.

⁵ Xjats niduki'iyi ñagyajpxkypøjkidøø, winets ja Esteban yikpiktaagiyi yikjii'kxwya'kxpi, ja jaa'y pøn idø'on ja Dios møk tñanch'ajot'ajtp, pøn tmøøt'ajtp ja Espiritu Santo. Ja'ats idø'on jade'en yikwiwejtstøø møøt ja Felipe, møøt ja Prócoro, møøt ja Nicanor, møøt ja Timón, møøt ja Parmenas, jøts møøt ja Nicolás pøn tsoo'mp jam Antioquia, ja' mid'i wyinaty jekyip tø t'ukpabiky ja israelit jaa'y chinaa'yindi. ⁶ Xjats ja jam wyinaty tø tyikmendi mǝ ja nwindson'ajtim kyudanaabyi jamdi, jøts ja tkunuu'kxtøø jøts ja jade'en tkønixajtøø.

⁷ Xjats ja Dios kyajpxy jade'en myøjtak'adijch, mayi'adøtsp idø'on jade'en ja Dios yjaa'y jam Jerusalén, kø'ombaat ja teetyøjkti tñanchja'wiñidi, kø'ombaat ja t'ajot'ajtnidi ja nwindson'ajtim Jesucristo.

Ku ja Esteban yiktsumnaq

⁸ Jamts idø'on ja jaa'y wyinaty tu'uk mid'i txøøw'ajtp Esteban, ja' idø'on ja Dios myø'ajtin amuum myøøt'ajtpy, Dios idø'on ja kyunuu'kxin nayide'en amuum myøøt'ajtpy, jøts ja jade'en ttuun ja myilagri Dios myø'ajtingøjxp jam mayjaa'y agujkp. ⁹ Nay jamts idø'on ja jaa'y wyinatymidi winaa'gin, pøn xuminøjxtpi mǝ tsaptøjk jam yikxødijy Esclavos Libertados. Jam wyinaty ja'adi mid'i tsoo'ndip Cirenit etjopt, jøts Alejandriit etjopt, jøts

Ciliciti etjotp, mōøt Asiit etjotp. Ja'ats idø'on tñibidø'øktøø ja Esteban, jøts ja jade'en xe ya ñadyamigajpxñibø'øktidøø; ¹⁰ jøts nigidi dø'on ja tmidanaadyøø sa ja Esteban ojts wya'añ, kumi wijy'ajtin ja yiktumpy, jøts nayi Espiritu Santo ja pudø'kiyip. ¹¹ Xjats ja mayjaa'y winaagin tmijuudyøø ja myigu'uk, jøts idø'on ja wya'andit jøts ku ja Esteban wyinaty tø tka'ødyijy ja Moisés jøts ja Dios. ¹² Xjats idø'on ja jade'en jotkø'xpim tuk'ejpxinaxwa'akti ja myigu'uk, niduki'iyyi ja mōjaa'ydyø'ktit mōøt ja kajpxwejpitø'ktit; jøts ja t'adinaadyuktøø ja Esteban, xjats idø'on ja jade'en tmatjtstøø jøts ja tyiknø'jktøø jam mōj kutujktaajkjotp. ¹³ Nay ojts idø'on ja tpiktakmidi ja testigi pøn tñidaay'ajtp ja Esteban, yide'en ja wyandøø:

—Yā'at jaa'y nijuuni yø tkamajststu'uty ja kya'ø'y'ajtin, xumi jade'en yø tpaagajpxy tpaxi'iky yø tsaptø'jk, nayide'en yø ttuñ ja Moisés kyutujk. ¹⁴ Ti yø jade'en ñadyijyi, pø øøts øøts yø jade'en kø'øm ndyimyadø y ku yø jade'en wya'añ, jøts ku Jesús (ja Nazaretit jaa'y) tyikudigø'øty yø tsaptø'jk mōøt yø tsinaa'yin midi ja Moisés yiktaan.

¹⁵ Ixam ja jade'en wya'andi, winets ja mayjaa'y pøn jaty jam wyinaty tsinaadyip, ja'ats ojts t'ejxti ja Esteban jøts ku wyeen y'aaw ja jade'en kyaxi'iky sam ankilisin.

7

Ku ja Esteban kø'øm yjanagyugajpxøø

¹ Winets ja teetywindsøn ttiibyijky ja Esteban, yide'en ja tñimaay:

—¿Janch jade'en mets tø m'adi'ich?

² Xjats ja yōñ'ampy t'adsøø, jøts ja wya'añ:

—Mee migu'uktø'ktit winø'on myikteedyidi myiktaagidi, madowdi waani. Ku adøm n'apteety'amøj Abraham jap chinaay mā et txøøwi Mesopotamia, jøts ka'anin ja wyinaty ñijxy tsinaabyi jam mā et txøøw'ajtni Harán. Xjats ja Dios Teety pøn janch wa'ats janch mōj ojts ñanky'ijxyiyi, ³ jøts ja Abraham yiknimaay: “Majsttu'ut yø mdsinaadyaajk jøts nayide'en ja mmigu'uktø'ktit, jøts mnø'jkt jam mā ja tsinaadyaajk n'atstuk'ext.” ⁴ Xjats ja Abraham choo'ndøø jam chinaadyaajkjotpti mā txøøw'aty Caldea, jøts ñø'jktøø tsinaabyi jam Harán. Xjats ja tyeety jam y'oo'knaa, winets ja Dios Teety twaadsøø ja Abraham mā ixyam ndsinaa'yindi. ⁵ Jøts ku ja jade'en yja'aty niwinø'onin ja ñaajx ja kyayikmøø, nugo ja chinaay; jøts nay ja Dios Teety kø'øm tyikutujk jøts yikmo'otnim ja ñaajx mā chøonidit ja y'u'nk ja y'una'jk øy ja Abraham wyinaty yja'øøky; ka'anin ja y'u'nk te ku ja Dios jade'en wyandaajky. ⁶ Jøts nayide'en ja Dios Teety tjaaknimaay ja Abraham, jøts ku ja y'u'nk y'una'jkti, y'apti y'okti ñø'jktit tsinaabyi abikyajp, jøts jap jaa'y ja yjanchyiktunidit ejxim jiyujkin. Ku ja jap yja'attit, winets ja jaa'y kyayik'ødyunidit maktaxk magø'pxy jumøjt. ⁷ Xjats ja Dios nayide'en wya'añ: “Øts ndiidyu'ump ja jaa'y pøn mga'ødyunidip, pøn myiktunidit jiyujkin, jøts ngajpxidsø'ømdit kyø'ømnaxjotpti, jøts ø xwindsø'øgidit nay ya.” ⁸ Jøts nay yø Dios Teety mōøt ja Abraham tkajpxy'ajty sa jaty ja ejxpajt ja ejxa'an ku ja yikmo'odit ja naajx. Jøts tpiktaajkøø sa mutsk mixyu'unk yiktu'undit ku kya'axiti. Paty idø'on ku ja Abraham y'u'nk kyaxi'jky midi txøøw'ajt Isaac, winets jade'en ttundi sa tkajpxy'ajttøø jøts ja ejxa'an tpiktaajki ñe'kxkø'xp, kyiduktujk xøøw ja jade'en ttuñ. Nayide'en ja Isaac ttuñ ja y'u'nk midi txøøw'ajt Jacob, jøts nayide'en ttuñ ja Jacob ja y'u'nk y'una'jkti nimakmajtsk pøn y'apteety'ajttøø ja Israelit jaa'y.

⁹ Yā'at Jacob y'u'nk y'una'jkti midi adøm n'apteety'ajttindøø, myi'ajkidip ja y'uch José ja'adi, paty ja ojts ttoo'knidi jøts tyiknø'jktøø jam Egiptit jaa'y y'etjotp. Jøts ja José, ka'ap ja Dios myajststu'udyi nijuuni. ¹⁰ Nay yø Dios pudø'kiyip ku y'ayo'ombaaty. Jøts nay ja' ja mōø'yip ja wijy'ajtin, ja agø'jpx chojkiyøø ja Faraón midi mōj windsøn'ajtp jam Egipto. Nay ja' tpiktaajk ja José gobernador jøts ja yikutukt jap kutujktaajkjøtpy, jøts nayide'en jap Faraón tyø'kjøtpy.

¹¹ Winets ja yuu myiñ jøts janch may ayo'on pyajtidøø jam Egipto etjotp jøts nayide'en jam Canaan, paty adøm n'apteety'amøjti ka'ap tpaattøø ti yjøø'lxxtip. ¹² Xjats ku ja Jacob tñija'wøø jøts ku jap Egipto y'ity ariin, winets jap tkejxy ja y'u'nk y'una'jkti pømbi adøm n'apteety'ajtyindip. Jade'en ojts y'otsti mijawyeen. ¹³ Ku myimajtsk ojk ñø'jktøø, winets ja José kø'øm ñanky'ejxyøø, jøts jade'en ja Faraón tñija'wøø kudam ñamyigu'unk'atyidi. ¹⁴ Xjats ja José twaadsøø ja tyeety jøts niduki'iyyi ja myigu'uktø'ktit, niduguy'pxy myakmokx niduki'iyyi y'ejttøø. ¹⁵ Jade'en ja Jacob yja'jty ku yikwaadsøø tsinaabyi jap Egipto. Jap y'oo'knaa mōøt adøm n'apteety'amøjti. ¹⁶ Xjats ku jam y'oo'ktøø, winets jam tyiknø'jktøø Siquem y'etjotp mā ja Abraham jam wyinaty ja jut tø tjuy, midi ja Hamor y'u'nk tyoøktøø.

¹⁷ Xjats ku ja Israelit jaa'y myayiñidi jam Egipto ñaxjotp, winets ja Dios ja wyanda'aky y'adukwani midi wyandaajk Abraham kō'jpx. ¹⁸ Winets ja Egiptit jaa'y tpiktaktøø tu'uk ja mōj windsøn, pøn tkanija'wip pøni sa ja José wyinaty tø y'atswindsøn'aty. ¹⁹ Ja'ats idø'on twindaay'ajt adøm nmigugajpti jøts tjemduñ tteduñ adøm n'apteety'amøjti, yide'en idø'on ttuñ jøts ku aguwani'kø'jpx ttukmajststu'uty ja teety ja taakti ja myaxu'nkti jøts

y'ooktit. ²⁰ Ja'abi xøøw ja'abi jumøjt idø'øn ja maXu'nk kye'jxy midi txøøw'ajt Moisés, jøts janch tsojki ja Dios ja'. Xjats ja Moisés ja tyeety tyaak yikya'jkyiøø tigøøk po'. ²¹ Winets yikmajtstutnaa kuwani, xjats nay yø Faraón ñøøx ojts tpaaty, jøts tyikye'jky ejxim ja kyø'om'u'ngin. ²² Xjats ja Moisés jap wyijy kyejy y'ixpijky, jøts midi ja Egiptit jaa'y yjajtip, nay jap ja Moisés yikta'awaan. Ku ja jade'en y'ixpijky, kajpxwa'kx ja janch øy janch tsuj, jøts yjanchtumpy idø'øn ja kø'øm jade'en.

²³ Xjats ku ja Moisés wyinaty ja jyumøjt wixijky, winets ja t'atspaatwa'añ ja myigugajp ja israelit jaa'y. ²⁴ Winets jap ojts t'ejxpaaty ja myigu'uk ku ja jap wyinaty ja egiptit jaa'y yjemduñi tyeduñi. Winets ja Moisés ja myigu'uk t'ayo'ijxy jøts tngubøjky, paty ja tyik'ø'jky ja' egiptit jaa'y. ²⁵ Kumi jade'en ja yjawnmay jøts ku ja myigu'uktøjk tnijawidit, jøts ku ja Dios myo'owa'añidi ja awa'ats'ajtin, jøts nagyø'øm ja twindsøn'attit; jøts ja myigu'uk ka'ap ja tnija'widøø. ²⁶ Xjats kyimjabom'ajty, winets ja Moisés tpaaty ja myigu'uk namajtsk, nache'jkidip tam ja wyinaty, xjats ja Moisés wyinmaay jøts ñamyiyuj'atidit, jøts tñimaay: "¿Tiku jade'en mnayjemduñidi mnadyeduñidi, kidi mdukjaa'yip meets?" ²⁷ Xjats ja' midi ja myigu'uk wyinaty tjemdum ttedump jøts ja Moisés yiknajtstejmyaa, jøts ñimaajyøø: "¿Pøn mets tø mbikta'agyi yikutujkpi jøts øø x'ana'amt?" ²⁸ ¿Xyik'ookwamp øts nayide'en sam ja xyik'ø'jky ja' egiptit jaa'y uxøø?" ²⁹ Xjats ku ja Moisés jade'en tmadøøy ja ayuujk, winets jaty kyeejky ku yikniimaay jøts ku uxøø wyinaty ja jaa'y tø tyik'øøky, winets ñijky jap tsinaabyi ma et jap txøøwi Madián. Japts chinaay sami ja'atjaa'y, winets jap ja y'u'nk tpaajty namajtsk tum mixy.

³⁰ Tø ja wyinaty chinaañi wixijky jumøjt, winets ñijky widejtpi jam tø'øts etjotp, wingon et ma kojpk jam midi txøøw'ajtp Sinai, xjats jam t'ejxpaajty tu'uk ja ankilis jam jønjotp midi ujtsximungøjxp tøøpy. ³¹ Xjats ja Moisés ñigyumaap tja'wiyi'ñ ku ja jøøn t'ejxpaajty, jøts ku tjaakwingunøjxøø wingon, winets tmadøøy ja Dios Teety y'ayuujk ku ja wya'añ: ³² "Øts mets m'apteety'amøj xdios'ajtp nayide'en ja Abraham, ja Isaac, jøts nayide'en ja Jacob." Xjats ja Moisés chø'øgidyojkiña, jøts ka' y'uknadya'a'ejxiniyøø jøts twin'ext. ³³ Winets ja Dios Teety ñimaajyiyøø: "¿Tiku yø mgø'øk xkajeñ, kumi tø øts yø nwi'ixy ya'at et?" ³⁴ Kø'øm øts tø n'ixy ja njaa'y ku jam y'ayo'ombaatti Egipto, tø øts nayide'en nmadøøy sa yjø'ødi sa ya'axti, sa yjatti sa kyubatti, ja' tø nñimiñ jøts nyik'awa'atspidsø'ømdit. Madā'ak, jøts jam mnøjkxt Egipto."

³⁵ Øy ja Moisés wyinaty tøjyayiknøjmi jøts ku ja ka' wyindsøn'att, jøts ku ja ka' tyiidyu'unt, Diosts ja kø'øm kajxyi jøts ja tyik'awa'atspidsø'ømt, jøts nayide'en tniwindsøn'att ja myigu'uktøjk, ja'agøjxp ku ja ankilis jam tyukmadoji ujts ximungyøjxp jøøn agujk. ³⁶ Nay yø Moisés idø'øn tyikpidsøøm adøm n'apteety'amøjti jam Egipto, jøts nayide'en yjanchtuun ja milagri jøts ja Dios myø'ajtin tyiktuujnøø, jade'en ttuun jam Egipto, jøts nayide'en ma ja Tsajpts Mejy, jøts jam tø'øts etjotp, winet ku jam jade'en chinaay wixijky jumøjt. ³⁷ Nay yø Moisés idø'øn tñimaay ja israelit jaa'y: "Myiktanigaxtip ja Dios Teety ja kyugajpxy tu'uk, nayide'en idø'øn ja mye'ent sam øts ja jawyeen tø xkejxyin, jøts nam adøm idø'øn ja nmigu'uk ja'. Ja'ats idø'øn mbadu'unindip." ³⁸ Nay yø Moisés idø'øn kyudanaay ja yjaa'y jam tø'øts etjotp ma ja kojpk txøøwi Sinai, ku ja ankilis myøøjyøø ja øgyajpxy ja øy'ayuujk midi ndajujky'ajtindip; jøts adøm ja nayide'en nñija'wint.

³⁹ Xjats adøm n'apteety'amøjti ka' tpadundøø pøni midi ja Moisés yjananktyunwajnip, jam ja ne'egi jadigojk ñøjxwa'andi nay jam Egipto, jøts ja Moisés jade'en yikmajt-stu'utwa'añ. ⁴⁰ Winets tñimaadyøø ja Aaron: "Yikojik øøts nwenkdiosti jøts øøts ja' xuu'wa'at, kumi ka'ap øøts nñijawi pøni sa ja Moisés jyaty ku øøts nichøky'ampy xyikpidsiimy Egipto." ⁴¹ Xjats tyik'a'øyiñaxti ja løjch, jøts tyik'oojkt namay ja jiyujk, ja' idø'øn tyamiyoxtip tyawindsø'jkiidip ja løjch awanax, winets ja' ttaxondaktøø midi kø'øm yik'øyidøø. ⁴² Xjats ja Dios Teety myajtstuujtidøø jøts ja wyaañ, wan yø wenk dios yja' tpaduujnidi, wan tmaadsa'ji wan ttiil'ji. Yide'en idø'øn ja Dios Teety kyugajpxy jap ñøkyøtpy tjaadyandi:

Ku meets jam mduu'yø'ø y tø'øts etjotp wixijky jumøjt,
 ¿myik'ø'jkik meets ja jiyujk may'ampy øts nwindso'jkingøjxp?

⁴³ Pø ka'axi yjade'eni, pø jinaxyi meets ja wenk dios yja' ixym xpaduujnyi, ku ja dios Moloc møøt ja tyøjk xki'wyidejtyidi ja tø'øts naxjotp.

Nayide'en jadu'uk ja wenk dios Renfán myaadsa' xpaduujnidi ja yja',
 yide'en idø'øn ja kø'øm xyik'øyidøø jøts xwindsø'jkiidøø.

Ja'agøjxp meets ngajxpidso'mwaanidi jøts jam mnøjkxtit Babilonia jixkø'øm, jamts nayide'en m'ayo'ombaattit.

Ya'at idø'øn ja Dios ja kyugajpxy tyukjaay, xjats ja Esteban yjaakwaañ:

⁴⁴ Nayide'en jam tø'øts etjotp ja n'apteety'amøjti tmoø'ajttøø ja wetøjk tu'uk ma tpojkø'økti ja kyutujkti, tsagøjxp idø'øn ja yja'ayi, Dios idø'øn ojts tyuk'ijxyi ja Moisés sudso wetøjk y'øyt. ⁴⁵ Xjats ku ja tiempi ñajxy jeky jumøjt, winets ja møjaa'dyøjkti tkøyajknidøø

ja wetøjk møøt ja wyindsøn Josué. Winets ja myidsep tmimajadaktøø pøn jaty ja wyinaty tsinaadyip, kumi kò'òm ja Dios ja kyexyidi jøts ja chinaadyajk ja yikmo'odit. Nay ja wetøjk wyinaty yiktundip ku ja David yikutujky. ⁴⁶ Jøts ja Dios ja ojts y'a'ejxiyi, paty ja tu'uk tkøjwa'añ ja tsaptøjk ma ja chøønit ja Dios Teety pøn ja Jacob ojts Dios'ajtmi; ⁴⁷ jøts ni ka'abyim ja tkøjy ja tsaptøjk; winets ku ja Salomón tyøki windsøn, ja'animts tkøj ja tsaptøjk. ⁴⁸ Jøts øyim ja Dios jap kyuidymchøøni kowanì jap tsaptøjkøtpy midì ja jaa'y yik'øyidip, kumi yide'en ja Dios ja y'ayuuj ttukmiyø'ø'y ja kyugajpxy ku ja yide'en wya'añ:

⁴⁹ Tsajpøtpy ø ndsøøni, jøts nayide'en naxwiin.

¿Ti ndøjk meets idø'øn myik'øyip, jøts ti tsinaadyaajk meets idø'øn xmo'owamp?

⁵⁰ ¿Kidi øtsip jade'en tuki'iyi tø nyik'øyi?

⁵¹ Xjats ja Esteban tjaaknimaay yide'en ja myi'gu'ukti:

—Meetsxi mgamadoop mgaja'gyujkidip, jøts nijuuni meets ja Espiritu Santo xkagupøjkti. Jade'en mee nugo mjanch'ity sami n'apteety'amøjti. ⁵² Ja'axi tjemdundip ttedundip ja Dios Teety kyugajpxy, jøts tyik'oo'ktøø pømbi yjøjja'widip ku ja myenwa'añ ja yiknitsokpi, pøn janch øy janch wa'ats. Ixyamts ja yiknitsokpi yjanchmiin, pø meetsxi ja mgøyajk jøts ja jaa'y yik'oo'gyiyit. ⁵³ Pø tøxi meets ja ankilis ja Dios kyutujk mjamø'øyi jøts nika'ap ja xpadundi.

Ku ja Esteban y'ø'jky

⁵⁴ Xjats ku jade'en yiknimaadyøø ja windsøndøjkti, winets yikxon tjanchty-imyi'ambøjktøø ja Esteban. ⁵⁵ Kumi ja Espiritu Santo ja Esteban yjanchmøøt'ajtpy, winets ja chap'ijxy jøts t'ejxpaajty ja tsuj'ajtin ja øy'ajtin ma ja Dios Teety, jøts nayide'en t'ijxy ku ja Jesús jam tyani Dios Teety aga'ngyøj'øm. ⁵⁶ Xjats tmimaay pøn yik'ookwajniyidip:

—¡Uk'ejxti! Awa'ats øts yø tsajp ø n'ixy, jøts nayide'en n'ejxpaaty ja Cristo tyani Dios Teety aga'ngyø'ampy.

⁵⁷ Xjats ja jaa'dyì ka'ap ja tmadowdi, y'amætstip ja tyatsk ja', niyaxni niyjokni dø'øn tnibidøktøø jøts tmatstøø. ⁵⁸ Jøts tyikpidsømdøø aguwanikøjxp jap kajpøtpy; winets ja ni'øø'nibidi jawyeeen ja chabixy tjandøø jøts ja ttuk'ejx'etti ja mixy Saulo, xjats idø'øn jatyi twika'tsnibøjkidøø ja Esteban. ⁵⁹ Yika'tsp wyinaty ja Esteban, jøts ja chapkajpxy jøts ja wya'añ:

—Nwindsøn'ajtim Jesús, mets ndagødøjkp ø n'anmija'win.

⁶⁰ Xjats ku jade'en wya'añ winets ñagyuxendyaajkiyøø jøts møk wya'añ:

—Kidi xukpøky'aty nmigu'uktøjkti yø n'o'jkin.

Kuts wya'anguijxy jade'en, winets y'oo'knaa.

8

Ku ja Saulo tjemduuñ tteduuñ ja Jesús yjanchja'wibidi

¹ Jøts ja mixy Saulo yjotkujk'ajty ku ja tyik'oo'ktøø ja Esteban. Xjats nay ja'abi xøøw, winets ja tsep cho'ondaajky møøt ja' pøn ja Jesús yjanchja'widip jam Jerusalén. Paty yide'en niduki'iyi cho'onjønknidøø pøn ja tsep tkawandip, jøts jam ñøjxkti nay Judeit kajp wingon, jøts nayide'en Samaria y'etjotpti. May idø'øn choo'nidøø, ja'ayì dø'øn tandøø ja Jesús kyudanaabyi pøn nimakmajtskjaa'y'ajttip. ² Xjats winaagin jaa'y pøn ja Dios kyajpxy tpadundip, ja' tyiknajxøjkidøø ja Esteban jøts nayide'en tjanchpaya'axti. ³ Xjats ja Saulo txumika'ødyuñ ja myi'gu'uk pøn ja Jesús yjanchja'widip, jøts t'ixaañibøjkøø tøjk tøjk. Kuts ja tpaajty, jøts ja t'ixidøjt'pidsimy tyøjkøtpy wan tjayaa'yì wan tjanø'øxyi, jøts ja tyikpuxøjktøki.

Ku ja øgyajpxy ja ømyadya'aky ojts yikajpxwa'kxy jam Samariit etjotp

⁴ Xjats niduki'iyi midì tsoo'nidøø Jerusalén jøts ja ñøjktøø omagajp, ja'ats ja Dios kyajpxy tkajpxwa'kxidøø midì anmija'win tyiknitsø'ok'ajtp. ⁵ Xjats ja nidu'ukti, pøn txøøw'ajit Felipe, ja'ats nøjx abikyajp jam Samariit y'etjotp, winets ja jam tkajpxwa'kxy sa yjajty sa kyubejty ja Jesús. ⁶ Winets ja jaa'y yjanchñaamyujkidøø namay, jøts ja tjanchpatmadowdi sa wya'añ sa kyajpxy ja Felipe, jøts ku nayide'en milagri ttuuñ. ⁷ Winets tyikpidsimy ja mamyku' midì ja jaa'y wyinaty tø tyatøkiyidi, jøts møk idø'øn ja tjanchmiyaaxti ku pyidsømdøø ja miku'; nay ja' tyiktsoojk may ja køxujpxi pakxujxpidi, jøts nayide'en tyiktsoøjky ja pakma'at jaa'dyì. ⁸ Paty idø'øn yjanchjotkujk'ajttøø ja jamit jaa'y.

⁹ Jøts nay jamts idø'øn ja yaa'dyøjk tu'uk y'ijty pøn txøøw'ajtp Simón, ja'ats jam yik'adujkp jøts nayide'en xyimay, ja'agøjxp idø'øn ja tjanchmøjawidi ku ja jade'en ñamyøjpikta'agyì ja Simón. ¹⁰ Xjats ja niduki'iyi ja møj ja mutskti tpatmadowdi pøni sa jaty ja Simón wya'añ. Winets wyandøø jøts ku tjanchmyøødi ja Dios myøk'ajtin.

¹¹ Jøts tpaduujnidøø ja yja' ku ja xyimay jøts ku ja yik'aduky, may jumøjt idø'øn ja wyin'øø'nidøø. ¹² Xjats ku ja Felipe tngajpxkijxy ja øgyajpxy ja ømyadya'aky pøni sa yjajty kyubejty ja Jesús, jøts ku ja tngajpxy ja Dios kyutujk midì ja yjaa'y ja tyanitanaapy, winets ja yikpabøjknaa, xjats ja yaa'y ja tø'øxy ñøbajttøø. ¹³ Nayide'en ja Simón t'pabøjknimaaj, jøts

ja ñobajtmaa, jøts ja tjamyøøt'ajty ja Felipe, winets ja ñigyumaap tjanchja'wøø ku ja Felipe tjanchpikta'aky ja milagri, jøts ja Dios myøk'ajtin tyikwingaxi'iky.

¹⁴ Xjats ku ja Jesús kyudanaabyi pøn jam jaaktaandøø Jerusalem tñija'widøø, ku ja Samariit jaa'y winaagin tø wyinaty tkupøjkti ja Dios kyajpxy y'ayuujk jøts ku ja tpadu'undit, winets ja yjaakyikajxtøø ja Pedro møøt ja Juan. ¹⁵ Jøts ku jam yja'ttøø, winets tku'amidowdi ja Samariit jaa'y midu tpadundip ja Jesús yja' jøts tyatøkiyidi ja Espiritu Santo. ¹⁶ Ka'anim wyinaty ja Espiritu Santo tyatøkiyidi ja Samariit jaa'dyi; ja'ayi wyinaty tø ñøbattøø Jesús xyøøgøjxp. ¹⁷ Xjats ku ja tkønixajtøø ja jamit jaa'dyi, winets ja tyatøkiyidøø ja Espiritu Santo.

¹⁸ Ku ja Simón tjanch'ijxy ku ja Jesús kyudanaabyi ja Espiritu Santo ttuktatøki ja jaa'dyi, winets ja juy t'amidøø, ¹⁹ jøts tñimaay:

—Tiku meets xkadamidøøky yø Dios myøk'ajtin midu mee mmiwidijtpy, jøts ø nayide'en øy pøn ngønixajt, jøts nayide'en nduktatøkit ja Espiritu Santo.

²⁰ Xjats ja Pedro tñimaay:

—Pøni jap ja meen xmoødi, wan ja møøt mgudigøy, jade'enxi mets yjawi mwinmay jøts yø yiktøøky midu ja Dios yajkpy. ²¹ Ka'ats mets yø mbaat'atyi: ya'at midu øø nmiwidijtpy, ka' mets mwinmaa'ñ y'øyi pyaadi Dios wyingujky. ²² Majtstu'tut yø mga'øwwinmaa'ñ, minuu'kxa'ak ja Dios pøni maa'kxujkiyip midu tø xwinmay m'am mjotp. ²³ N'ijxpy øts yjawi ku ka'øwwinmaa'ñ xmoødi, yø'øts myikjem'adøøjtsip myikte'adøøjtsip.

²⁴ Xjats ja Simón y'adsøøy:

—Ku'ajot'ajtik meets, jøts øts ja nbøky ngagu'ayo'ombaaadi.

²⁵ Xjats ku ja Juan møøt ja Pedro tñigajpxkøxtøø ja Dios kyajpxy y'ayuujk, jøts nay ja' tkajpxwa'kxtip jam magyajjotp nay ja Samariit y'etjotp, yide'en ja wyandøø sudso'ampy yø anmija'win ñitsø'ok'aty, winets wyimbejtnidøø nay jam Jerusalem.

Ku ja Felipe møøt nabaajtyøø ja Etiopiit jaa'y

²⁶ Xjats ku ja jade'en wyimbejtnidøø, jøts ja nwindson'ajtim y'ankilis øjts ja Felipe myigajpxyiyi, jøts ñimaajtyyøø:

—Pidø'øk mets jøts mnøjkt abatkø'm'ampy, ja tuu' midu naxp Jerusalem jøts nayide'en Gaza.

Jade'en idø'øn ja ankilis ñimaajtyøø ja Felipe. Ja'abi tuu' idø'øn naxp tø'øts etjotp ma ka'apøn chøøni. ²⁷ Xjats ja pyidi'jky jøts ja chøø'ñ; winets tpaajty jam tuu'am tu'uk ja Etiopiit jaa'y, pøn ja Dios Teety jap t'atswindsø'jkip Jerusalem. Ja jaa'y isaabiky ja', jøts møj yikutu-jkpi ja', jøts nayide'en t'ejx'ejtmøyøø ja myeen ja tø'øxy pøn jam møj windsøn'ajtp Etiopia, Candace ja xyøøw ja tø'øxy. ²⁸ Kyajpkøjxp idø'øn ja wyinaty wyimbejtni kyarretijøtpy, jøts jade'en tuktuu' tkajpx'adi'ich ja Isaias ñøky pøn ja Dios kyugajpxy'ajit. ²⁹ Winets ja Espiritu Santo myigajpxiyøø ja Felipe, jøts ja ñimaajtyøø:

—Wingonjawi puwa'agi yø karreti.

³⁰ Xjats ku ja wingon tpuwa'jki, jøts tmadøy ku ja ñøkyajpxy, jøts ja tyiktiy ja Felipe:

—¿Mnimadøøpy idø'øn midu ixja mgajpxpy?

³¹ Xjats ja wyaan ja nøkyajpxpi:

—¿Sudso øts yø' nwinmado'ot, pø ka'ats ø pøn, pøn øts xukwinmado'op?

Winets ja Felipe yikway jøts tyøkit jap karretijøtpy jøts tmøøtsøønit. ³² Midu ja Etiopiit jaa'y wyinaty kyajpxpy, ya'at idø'øn ja':

Ku jaa'y yik'o'jkøø kyupiky'ajit ja', jade'en ja y'ijty kidim ja borreegi maxu'nk y'øøky; ka'ap ja sa wya'añ, uum ja' jade'en ejxim borreegi ku yikeepy.

³³ Jade'en idø'øn ja jaa'y yik'ayooyiyøø, jøts nika' kø'øm ñanky'ayowiyit; ku ja jade'en yiktuñ, ¿pøn ja kugajpxiyip?

Tø dø'øn jabaat kyixy ja chinaa'yin ya naxwiin.

Yide'en idø'øn jap yja'ayi midu ja Etiopiit jaa'y kyajpxpy.

³⁴ Xjats ja jaa'y yiktøøjøø ja Felipe:

—Tun ja may'ajit, nigajpx waani, ¿pøn idø'øn yø jade'en ñimadyakpy, kø'ømyi yø jade'en ñañimadya'agi, uk wenkpi dø'øn yø ñimadyakpy?

³⁵ Xjats ja Felipe ttuk'ixpøjknibøjkøø sa yjajty sa kyubejty ja Jesús. ³⁶ Xjats ku ja jade'en yø'ødyi, winets ja møj nøø tpaattøø, jøts ja Etiopiit jaa'y wyaan:

—Ixats ja nøø yjawi, ¿ti kidi ndejint y'øyt ku nnøbatt?

³⁷ Xjats ja Felipe t'adsøøy:

—Pøni mjanchja'wip ja Jesús tu'uk amumjoojt, o me nyiknøbatt.

Winets ja t'adsojimbijty:

—Njanchja'wip øts ku ja Jesucristo yjanch'u'nk'aty ja Dios Teety.

³⁸ Xjats ku ja jade'en wyaan jøts ja karreti tyikwa'k'øydøø; winets ñøjktøø jam møj nøøjotp, jamts ñøbejty ja Etiopiit jaa'y. ³⁹ Kuts jam pyidsømdøø møj nøøjotp, jøts ja Espiritu Santo yiknøjkkøø abiky et ja Felipe, jøts ja Etiopiit jaa'y nika'ap ja t'uk'ejxnaa; jøts ja tyuu'

tnøjxknāā jotkujk. ⁴⁰ Jøts ja Felipe jap yja'aty mā kajp jap txøøwi Azoto. Kajp kajp idø'øn ja tkajpxwa'kxwidity sa dø'øn ja anmija'win ñitso'ok'att. Xjats ojts jap yja'tni mā kajp jap txøøwi Cesarea.

9

Ku ja Saulo tyiktigajch ja chinaa'yin

¹ Xjats ku ja jade'en, jødsyim ja Saulo tkidyimija'dyigøy ja o'jkin, kuwani tyimdyanekwa'añ ja' pøn yjanchja'widip ja Jesús yja'. Paty ojts tninijxxy ja teetywindsøn, ² jøts t'ats'amido'ot ja nøky ja tiy'ajtin. Ja'ats ja myinøjkxp jøts ja ttuk'ext ja teetyi pøn jam ttundip tsaptøjkjotp mā txøøwi Damasco, winets ja t'ixa'at pøni pøn ja Jesús yja' pyaduujnidip, jøts jam ja tyiknøjkxt kø'tsumy Jerusaleñ, wan tjayaa'yi wan tjatø'øxyi. ³ Kuts jam yja'atwaañi Damasco, winets ojts jotmønñ ja jaj ñawidityi midì kidakp tsajpjøtpty, janch tsamamp ja jaj. ⁴ Winets ja Saulo kyidaay, jøts tmadøøy ja ayuujk ku ja yide'en wya'añ:

—Saulo, Saulo, ¿tiku ø xjemduñ xeduñ?

⁵ Xjats ja Saulo tyiktiiy:

—¿Mbønims me teety idø'øn?

Jøts ja y'adsoojøø:

—Øts idø'øn Jesús, nay yø' midì mjemdumpy mdedumpy. Kø'øm me mnay'ayo'ondunñyi jade'en kidi tsakaā ku ja ti tnepy, jøts ja kø'øm kujp ñadyukyø'odyiyi.

⁶ Xjats ja Saulo yjanchmibejpxøjknaā ku jade'en yiknøjmi, jøts wya'añ:

—¿Tims me teety xamidsokp, ti ø ndu'ump?

Winets ja nwindson'ajtim ñimaajyøø:

—Pido'øk jøts jam mnøjkxt kajpjotp, jamts myiktukmado'ot pøni ti mdu'ump.

⁷ Xjats ja Saulo yjamyøøt nayide'en yjanchø'lkidøø ku ja Saulo y'ayuujk ja jade'en tmadøjidi, jøts ka'ap ja t'ejxtøø pøni pøn ja myigajpxxy. ⁸ Winets jaty ja Saulo pyidi'jky, jøts ku ja yjawn'ejxwa'kxy, ka'ap ja ti t'ejxpaaty. Winets ja myigu'uk y'ukwejtsnyidøø, jøts ja yiknøjki Damasco. ⁹ Jamts chinaay tigøøk xøøw jøts niti tka'ijxy, ni kyakay ni kya'uuky, niti tkatuñ.

¹⁰ Jamts idø'øn tu'uk chinaamyi yaa'dyøjk pøn tjanchja'wip ja Jesús, Ananías, idø'øn ja xyøøw, winets ja nwindson'ajtim ojts tninijxxy ja Ananías, jøts ja tnimaay:

—iMets Ananías!

Xjats ja Ananías t'adsøøy:

—¿Ti, teety?

¹¹ Xjats nay jaty ñimaajyøø:

—Pido'øk jøts mnøjkxt mā ja tuu' yiktijy Tiidyuu', jøts ku jam mja'att Judas tyøjkwindum, jamts xyiknidøøwit ja Tarsit jaa'y midì txøøw'ajt Saulo. Dios'ajot'ajtp inet ja jam, ¹² jøts tø ja nayide'en tnijawi agumaa'gyøjxp, ku me mnøjkxt jøts ja wyin'ejxwa'kxkojmit wa'ats ku xkønixajt.

¹³ Kuts ja jade'en tmadøøy ja Ananías, jøts ja wya'añ:

—Janch namay, teety, idø'øn ja jaa'y tø xukmadowdi ku yø Saulo tjanchjemduñ tjanchteduñ ja' pøn mets mjanchja'wiyip jam Jerusaleñ. ¹⁴ Ixyamts ja tø tnija'aty nay ya ja tiy'ajtin, midì ja teetywindsøn ja ojts t'amidøy jøts ja tyiktsoont midì me mbaduujniyip.

¹⁵ Winets ja nwindson'ajtim wya'añ:

—Nøjx x'ats'ixy ja Saulo, tø øts ja nwi'ixy, nyiktunwampy øts ja', abikyajp øts ja ngaxwa'añ. Japts øts x'atsnigajpxt x'atsnimadya'akt, jøts ja ttukmado'ot ja jamit jaa'dyi møøt ja' wyindsøndøjkti jøts nayide'en ja ya'at israelit jaa'dyi. ¹⁶ Nduk'exp øts ndukmado'op øts sudso jawyeen tyu'unt, jøts kuwani nayide'en tmi'ayo'ot øts ngajpxy øts n'ayuujk ku ja jaa'y yjemdunit tyedunit.

¹⁷ Xjats ja Ananías ojts tninijxxy ja Saulo. Kuts ja yja'jty, jøts ja ja'ayi ojts tkønixajy jøts yide'en tnimaay:

—Migu'uk Saulo, øts tø xkexy ja nwindson'ajtim Jesús, nay ja' midì ojts x'ixy jam tuu'am, ja'ats øts tø xkexy jøts me nyikwin'ejxwa'kxt jadigojk, jøts ja Espiritu Santo nayide'en mdatøjkiniyit.

¹⁸ Xjats jotmønñ kya'ay wyeengøjxp jade'en jajtp ja t'ixy ejximi ajkx jimeeñin, winets wyin'ejxpiky jadigojk. Xjats ja Saulo pyidøknaā, jøts ojts ñøbety. ¹⁹ Jøts ja jadigojk kyaabyjky, winetnims ja myøjaaw tpijky, jøts jap yjaaktsinaay ja majtsk xøøw ja tigøøk xøøw møøt ja' pøn tjanchja'widip ja Jesús jam Damasco.

Ku kyajpxwa'kxy ja Saulo jam Damasco

²⁰ Xjats ja Saulo tkajpxwa'kxnbøjkøø jam tsaptøjkjotp, yide'en ja wya'añ ku ja Jesús y'U'nk'aty ja Dios Teety. ²¹ Xjats ja ñigyumaap tjanchja'widøø pøn jaty ja jam patmadojyøø, jøts ja xem yam ñagyajpxidøø, jøts yide'en ñawya'añidøø:

—¿Kidi nay ja jaa'yip yø' midi jam Jerusalén y'ijty tkamaa'kxp ja myigu'uk ku ja tpabøkti ja Jesús? ¿Kidi ja'ajip yø tø t'uknimiñ jøts tmaajtsmukøxt ja Jesús yjanchja'wibidi, jøts ttawinguwaawit ja møj ttiidyumbidi?

²² Xjats ja Saulo jinary yjaaktyimkyajpxwa'kxy, jøts ja yikxon tyimñigajpxy jøts ku ja Jesús ya tø yjanchyikexy yiknitsokpi, jøts ja israelit jaa'y jadi'iñi myondi y'ookti pøn jaty jam wyinaty tsinaadyip Damasco, niti kajpxy niti ayuujk ja'adi.

Ku ja Saulo ayu'uch kyeejky

²³ Xjats kyimjekñim ja israelit jaa'y tkajpxy'ajtnidøø jøts ja tyik'ooktit ja Saulo; ²⁴ jaty Saulo ja tnija'wiyii'ñ. Winxøow windsuu ja myidsep y'awejx'lityi ma pidsømdaajk jam, jamts ja tyimyik'oogiyit. ²⁵ Winets ja Saulo ja myigu'uktøjkti pyiktaajkiyøø kachjotpy jøts ttanikiñaxti ja pøch midi nawidity tukajpaa', jøts nika'ap jam ja pyidsimy ma ja myidsep y'awijxyi, paty idø'øn ja kya'ø'jky.

Ku ja Saulo jam yja'jty Jerusalén

²⁶ Xjats ku ja Saulo jam yja'jty Jerusalén, jøts ja tminamyukwa'añi pøn ja Jesús tjanchja'widip. Janchtsø'jkidipts ja', kumi ka'ap ja tjanchjawiidi jøts kudam ja Saulo nayide'en tjanchjawi ja Jesús. ²⁷ Paty idø'øn ja Bernabé wyajiyøø, jøts ttukwinguwa'jkøø ja Jesús kyudanaabyidi. Jøts nay ja' ttukmadoow sudso wyinaty tø t'ixy ja Jesús jam tuu'am, jøts nayide'en sa ja myigajpxiyøø, jøts nayide'en ja ttukmadøø sa ja ojts jam jøtmøk tkajpxwa'kxy ja y'ayuujk Jesús køjpx. ²⁸ Xjats ja Saulo jam jade'en tyaañ Jerusalén, jøts ja møøt wyidejtni pøn jaty ja Jesús yja' pyadundip. ²⁹ Jøts ja ka' ti tkumayjawi, jøtkujk ja tkajpxwa'kxi ja nwindson'ajtim yja', jøts ja ttamimadya'aky ja israelit jaa'dyi pøn ja griegit ayuujk tkajpxtip; yikxon ja ñadyawingugajpxiyidi ku ja ja xe ja ya tum jade'en kyanagyupijkyiyidi ja wyinmaa'ñ, ja'ats ja israelit jaa'y ñuwinma'ayidip jøts ja tyik'ooktit. ³⁰ Xjats ku ja myigu'uk jade'en tnija'widøø, winets ja yikwaanaa jøts yiknøjkiyøø jam Cesareit kajjotp, jøts yikejxñim jøts ja ñøjkt kyajpkijpxy midi txøøwip Tarso.

³¹ Xjats ja janchja'wibidi pøn jaty tsinaadyip jam etjotp midi yiktejp Judea, Galilea, jøts Samaria, nekim ja jam chinaañidi, jøts ñija'wi'adøjtsidip ja Jesús yja' ja'adi. Jøts juuni ja tka'ukwindsø'øgidi, ejtp ja twindsø'øgidi jøts namay'adøtstip ja nayide'en, ja Espiritu Santo ja amuum pudøjkiyidip.

Ku ja Eneas chøøjky

³² Xjats ku ja Pedro wyinaty t'ayø'øy ma jaty ja janchja'wibi chøønidi, nayide'en ojts t'ixy ja janchja'wibi pøn jam tsinaadyip ma ja kajp txøøwi Lida. ³³ Jamts tu'uk tpaajty ja yaa'dyøjk midi txøøw'ajt Eneas, tyuktujk jumøjtip ja pa'am ja wyinaty tø pyajtniyi, kyidyimpyidi'iky jøts køxuxyi pakxuxyi pa'am idø'øn ja myøøt. ³⁴ Xjats ja Pedro ja tnimaay:

—Eneas, Jesús myiktsojkip. Pidø'øk, wejtsjø'øk yø mmaabajt.

Xjats ja Eneas pyidi'iky jaty, ³⁵ xjats niduki'iyi ja jaa'dyi pøn jaty kugajp'ajttip jam Lida jøts jam Sarón kuuyi ja tnija'widøø, winets ja tyikutigøødyi ja møjaa'chinaa'yin midi ja wyinaty chinaadyip, jøts ja nwindson'ajtim yja' tpabøjknidyidøø.

Ku ja Dorcas yjujkyjky jadigojk

³⁶ Nay ja'abi xøøw nay ja'abi jumøjt idø'øn chinaay tu'uk ja tø'øxyøjk jam Jopit kajjotp, Tabita dø'øn ja xyøow, yide'en yiktij griegit ayuujk, Dorcas. Jøts nayi Jesús idø'øn ja yjanchja'wimiyip paty ja tjanchpudøki pøn ayoop pøn winmaapy. ³⁷ Winetsik idø'øn ja pa'am pyaajtniyaa jøts ja tyimyik'ø'jkijyøø; jøts ku yikpujnaa, jøts ojts yikpikta'aky myidukniapatøjkixpy. ³⁸ Xjats kumi wingonts ja kajp midi txøøw'ajtp Lida, ma jap wyinaty ja Pedro t'ayø'øy ja myigu'uktøjkti, jøts kumi tø ja wyinaty ja Dorcas myigu'uk tnijawidi ku ja jam wyidity, winets ja ñagyaxidøø namajtsk jøts ja t'atstukmado'odit ja Pedro jøts mye'ent putyi.

³⁹ Xjats ja Pedro jaty tmøødi ja kugajpxtyi. Ku jam yja'ttøø, jøts jap tyimwyaanøjkiyøø ma ja oo'kpi jap, winets ja Pedro ja ku'økytø'øxyti ñawa'kwidewjtyøø, jøts ja tyuk'ijxyi ja wet midi wyinaty ja Dorcas tø tyik'øyi. ⁴⁰ Winets ja Pedro tkajpxpidsømguixy ja jaa'dyi, jøts ja ñagyuxendyaajkøø, jøts kuts ja twindsapkaajpxkijxy ja oo'kpi, xjats ja tnimaay:

—Tabita, pidø'øk.

Winets ja oo'kpi wyin'ejxwa'kxy jøts ja Pedro yikwin'ixy, winets chinaagyukøø. ⁴¹ Jøts ja kyø' ja tmaajtsøø jøts ja jade'en pyidi'jky; winetnømts ja twaadsoøy ja Pedro ja myigu'ukti midi ja kyajpxpidsøøm jøts nayide'en ja ku'økytø'øxyti, xjats ja twin'ejxtøø, tødäm yjujkyjky ja oo'kpi wyinaty. ⁴² Ñija'wigyøxtøø niduki'iyi ja Jopit kajp jaa'y, xjats namay tjanchja'widøø ja Jesús. ⁴³ Nay jam idø'øn ja Pedro tyaa'ni kawinaak xøøw jam po'ogoo'tspi tyøjkwindump, ja' idø'øn ja xyøow Simón.

10

Ku ja Pedro tmigajpxy ja soldadi windsøn pøn yiktejp Cornelio

¹ Jam idø'øn tu'uk y'lijty ja yaa'dyøjk mā kajp jam txøøwi Cesarea, Cornelio dø'øn ja xyøøw, ja'ats idø'øn ja soldadidi tukpiky tniwindsøn'ajtp pøn yikxøømøødyøø Italiāni.

² Xjats ja Cornelio møøt ja y'u'nk møøt ja ñidø'øxy, yjanchja'myatstip idø'øn ja Dios Teety ja', jøts nayide'en twindsø'øgidi. Ajot'ajttip idø'øn ja Dios jabom jabom, jøts nayide'en tjanchtabudø'jikidø ja myeeñ ja ayooobi jaa'y. ³ Tu'uk idø'øn ja xøøw sa yajty sa kyubejty ja Cornelio, ku ojts wa'ats t'ixy awinmaa'ngyøjxp ja Dios Teety y'ankilis, tigøøk yaxpin idø'øn wyinaty ku ojts ñidø'kiyi mā ja jap wyinaty, winets ja xøøw ja tyamigajpxiyøø:

—jMets Cornelio!

⁴ Winets ja Cornelio tsø'øgijawi twin'ixy, jøts t'adsøøy:

—¿Ti, teety?

Xjats ja ankilis ojts ñii'mxyiyi:

—Tø ja Dios Teety ja m'ajot'ajtin mgupøjkxiyi, jøts ku tø xpudøki nayide'en ja ayooobi jaa'dyi. ⁵ Kax mgugajpxy jøts jam ñøjkxtit Jope, wan ja Simón t'atsawawdi pøn nayide'en yiktejp Pedro. ⁶ Jam ja myidsøøni po'ogoo'tspi wyindump pøn yiktwimip nayi Simón, pøn jam tsinaapy mejy wingon. Ja'ats mdukmadoowiyip pøni ti mdu'ump.

⁷ Xjats ku ja ankilis ñøjkxnaa, winets ja Cornelio twaadsøøy ja tyumbi namajtsk. Wyaadsoow nayide'en ja soldadi tu'uk pøn ja møøt ñamyayi, jøts pøn nayide'en twindsø'jkip ja Dios Teety. ⁸ Xjats ja ttukmadoogijxy ja kyugajpxtyi sa jaty ja ankilis ja wyinaty tø ñii'mxyiyi, winetnimts tkejxy.

⁹ Xjats ku kyimjabom'ajty, jawaani jam kyaja'tnidi kajpjtøp mā ja yikaxtøø kuga-jpxy'ajtpi, winets ja Pedro pyejty jam tøkøjxp dios'ajot'ajtpi, kujk xøøw et idø'øn wyinaty. ¹⁰ Janch yu'oo'knip idø'øn ja wyinaty jøts ja kyaawa'afñ; japnimts ja kaaky wyinaty y'øyi, ku jotmøñ t'ejxpaajty jade'en kidi jaa'y kyumaa'y, ¹¹ ku ja tsajp y'awa'ach jøts t'ixy ñaxkida'aky, jade'en ja t'ixy kidim ja møj manti, jøts tum wendi maktaxk iskiin. ¹² Jøts jam mantikøjxp mayjøøjp ja jiyujk t'ixy, jam ja tsaa'ñ, jam ja joon, jøts jam nayide'en ja maktaxkpi tekpyi jiyujk. ¹³ Winets tmadøøy ja ayuujk mididi tsoo'mp tsajpjtøpy, jøts ja yide'en ñii'mxyi:

—Pidø'øk Pedro, yik'ook inet yø jiyujk tu'uk jøts xtsu'utst.

¹⁴ Xjats ja Pedro t'adsøøy:

—Ka' teety jade'en; niwindii øts jade'en ngatsu'uch ja kya'øyi kyawa'atspi, mididi kapaat'ajtiyip yiktsu'utst sam ja Moisés kyutujk.

¹⁵ Xjats jadigojk tmadøøy ja kajpxy ja ayuujk, jøts wya'afñ:

—Kidi jade'en xka'ødyiy, tum mbaat'ajtip yø jiyujk tsu'uch mididi Dios Teety tø ttanibiktaagi.

¹⁶ Tigøøk ojk idø'øn ja manti wyimbijty y'adijy, jøts pyatøjkiñaa nay jap tsajpjtøpy. ¹⁷ Ixjam ja Pedro jade'en wyinaty myay tyajy, ti dø'øn ja tyijpy jade'en mididi wyinaty tø t'ixy ku ja Cornelio kyugajpxy yja'ttøø, tø ja wyinaty tyiknidøøwidi ja Simón tyøjk. ¹⁸ Kuts ja jam yja'ttøø tøk'agi'py, winets møk tkugajpxidøø pøni jap ja Simón mididi nayide'en yiktejp Pedro. ¹⁹ Kumi ja' wyinaty ja Pedro myimaapy myidajpñim mididi wyinaty tø t'ixy, winets ja Espiritu Santo ñimaajyøø:

—Nidigøøk icyam ja jaa'y m'ixa'ayiyi. ²⁰ Pidø'øk, winak jøts xmøødit yø jaa'y, kidi ti xpawinmay, nay øts yø'ñ ngugajpxy.

²¹ Xjats ja Pedro tniwinajky mā wyinaty ja Cornelio kyugajpxy y'awejxti, jøts ja tñimaayy:

—Øts meets idø'øn x'ixaapy. ¿Ti dø'øn mñimendip?

²² Xjats ja kugajpxy t'adsoodøø:

—Ja Cornelio øø xyikugajpxy'ajtp, janch øy jaa'y ja' jøts nayi wyindsø'jkip ja Dios ja', xjats nayide'en janch tsojkip ja' ja israelit jaa'dyi. Nay ja Dios Teety idø'øn y'ankilis ja tñimaajyøø jøts me myikwa'at, jøts jam njaa'mint mā ja chøøni ja Cornelio, jamts mets x'atstukmado'ot pøni ti jaty me mñija'wip, jøts ti jaty mmadya'akwampy.

²³ Xjats ja Pedro tkuwaa'wiñaa tyøjkjtøpy, jøts jamyi myaadøø. Xjats ja kyimjabomnim choo'ndøø, winets ja Pedro twaay ja myijanchja'wibi winaagin mididi jam Jope tsinaadyip.

²⁴ Jøtsnim kyimjabom yja'ttøø jam Cesarea, mā ja Cornelio y'awijxyiyi niduki'iyi møøt ja myigu'uktøjkti, mididi wyinaty tø twaadsowdi jøts ja tpatmado'odit ja Pedro kyajpxy y'ayuujk. ²⁵ Kuts ja jam tyimyja'ttøø ja Pedro, xjats ja Cornelio y'adsoojyøø jøts ja pyidsimy tyøjkjtøpy, xjats ja jaty ñagyuxendyaajki ja Pedro wyingujky, jøts ja jade'en yikwindsø'øgi ejxim ja diosin. ²⁶ Winets ja Pedro jaty twejtsji'iky, yide'en ja wyaafñ:

—¿Tiku ø xwinguxaani? Pidø'øk, pø nay jaa'yts øts nayide'en sa mets.

²⁷ Jøts nay madyaktipnim idø'øn ja wyinaty, ku jap tyøjkidøø tøkjtøpy mā wyinaty ja jaa'y jap yjanch'awejxti namay. ²⁸ Xjats ja Pedro tñimaay yide'en:

—Meets migu'uktøkjt, mnija'wip meets jøts ku øøts wenk n'israelitjaa'y'aty, ka'ap øøts n'øyjawi jøts øøts nmigu'uk tmøøtnabyaattit ja wenk jaa'dyi uk tøkidit ja' tøkjtøpti, ka'ap øøts ja n'ødyijy, ka'ap øøts ja nwa'atstijy. Tøts øts Dios xuknijawi, jøts ku ka'ap jade'en y'øyi jøts øts jade'en nwinma'aty. ²⁹ Ja'agøjxp ø nmiñ jatyi ku mee xwaadsøø. Jøts nnijawiwyp øts ixyam ti meets idø'on xamigajpxwamp ku meets xwaadsøø.

³⁰ Xjats ja Cornelio t'adsøøy, yide'en ja tnimaay:

—Ixym myimaktaxk xøøwiñi ku øts yide'en njajty, ya øts wyinaty ndøkjøøjt n'ayuu'aty, jøts ja Dios wyinaty n'ajot'aty winakxyøøw, ku øts jotmøn n'ejxpaajty tu'uk ja yaa'dyøjk, jøts janch tsamamp ja wyet amuum kyaxi'iky. ³¹ Winets øts yide'en xnimaay: “Mets Cornelio, tø ja Dios Teety ja mdios'ajot'ajtin mgupijkyiyi, jøts ku tø xpudøki nayide'en ja ayooði jaa'dyi. ³² Kax mgugajpxy jøts jam ñøjkxt Joep, wan ja Simøn t'atsway pøn nayide'en yiktejp Pedro. Jam ja myidsøøni ja po'ogoo'tspi wyindump midi jam tsinaapy mejy wingon. Ja'ats mdukmadowiyip pøni ti mdu'ump.” Jade'en øts idø'on ja anklis xnimaay. ³³ Paty øts ngugajpxy jatyi nguejxy jøts me m'atsyikwa'at, pø janch øy ku tø xpaduñ ku tø mmiñ ya. Wa'gats ja Dios Teety x'ijxyim xnija'wa'am ku adøm ixyaadi, ku øø nbatmadoowa'ñ ja nwindson'ajtim kyajpxy y'ayuujk midi ja tø mdamigaxiyi, jøts mets ja ya jade'en xnigajpxt.

Ku ja Pedro kyajpxwa'kxy jam Cornelio tøkwindump

³⁴ Winets ja Pedro kyajpxnibøkøø, jøts ja yide'en wyaañ:

—Ixym njanch'ixy njanchnijawi ku ja Dios Teety chøjkpy ja' øpyønjaa'yi, ka'ap ja' tka'øyjawi, ³⁵ kyupijky ja' pøni pøn windsø'jkiiy, jøts y'øyjaa'y'attit nayide'en. ³⁶ Dios Teety idø'on jade'en øjts ttukmadøy ja Israelit jaa'y, ku xmi'øy'atwa'añindi jadigojk ja Jesucristo køjxp pøn nwindson'ajtyindip niduki'iyi.

³⁷ Pø mnija'wipxi meets niduki'iyi sa yjajty sa kyubejty jam israelit jaa'y y'etjotpti, jam idø'on cho'ondaajky ma ø tæøøwi Galilea, tø wyinaty ja Juan Bautista jawyeen kyajpxwa'kxy, xjats ja jaa'y ja nayde'en namay tyknøbejty. ³⁸ Ja pø mnija'wipxi meets nayide'en ku ja Dios Teety ja Jesús ttukatøkøø ja Espiritu Santo møøt ja myøk'ajtin, jøts nayide'en sa jatyi ja wyidity ku ja t'ødyuñ ja jaa'y, jøts ku ja tyiktsø'øky pøni pøn ja mikul' møøt y'itynim. Ja'agøjxp ja jade'en ttuñ ku ja Dios Teety ja ejtp tmøø'tity. ³⁹ Øøts idø'on tø n'ixy, øøts idø'on tø nnijawi, sa jatyi ja Jesús ttuñ jam Israelit kyamwemp kyamjotpti, jøts nayide'en jam Jerusaléngit jaa'y myøkajpjotpti. Jøts nay tø øøts ja n'ixy sa jatyi ja yjajty ku yik'ø'jkiiyøø ja jaa'y, jøts sa yikmitsumbejty jam kruskøjxp. ⁴⁰ Winets ja Dios Teety øjts kyidigøøk xøøw tyikpidsiimy jap oo'kpi jutjøtpy ma ñajxøkøø ja Jesús, xjats øøts ja xukyikwingaxi'jky, kumi tø øøts ja wyinaty jawyeen xwi'ixy, jøts øøts ja n'ext, jøts øøts ja nnijawit. Xjats ku ja jade'en jadigojk yjujkyijky, jøts øøts ja ngaay jøts øøts ja n'uuky møøt. ⁴² Xjats øøts ja xani'ane'emy ja kajpxwa'kxk, jøts øøts ja jaa'y ndukmado'ot nduknijawit ku ja Dios Teety ja kø'øm tpiktaajky ja Jesús, jøts ja jujkpyi ja øøkpøy ttidyu'unt. ⁴³ Nayide'en idø'on wyinaty jekyiyip ja Dios Teety kyugajpxy tø tkajpxti tø tmadya'akti ja Jesús, jøts pøni pøn tjanchja'wip ja Jesús, winets yikmaa'kxuktit ja pyøky. Jade'en ja Pedro ja tnimaay ja jaa'y.

Ku ja Espiritu Santo ttatøkøø pøn ka'israelit jaa'yidi

⁴⁴ Ñagyajpx'adøtsp wyinaty ja Pedro, ku ja Espiritu Santo tyatøjkiiyidøø niduki'iyi ja jaa'y pøn jatyi jam wyinaty patmadojiyiyip ja Pedro. ⁴⁵ Xjats ja israelit jaa'y pøn ja Pedro tpadsoo'niyidøø ku øjts ja kugajpxy jam wyayidi, winets ja ñygyumaap tjanchja'widøø ku ja Dios tyukatøkiiyidøø ja Espiritu Santo øpyønjaa'yi, pøn ka'ap israelitjaa'yidi. ⁴⁶ Ja'agøjxp idø'on ja øjts yiknijawi ku ja adsu'jky øjts tjanchkajpxti tum ja wenk ayuujk, jøts ku ja nayide'en tjanch'øyja'widøø ja Dios. ⁴⁷ Xjats ja Pedro tnimaay ja myigu'uk midi myøøtwidijty:

—¿Ti pøn mibaat xkadukyiknøbajtim yø jaa'y, pø tæxi Espiritu Santo tyatøkiyidi jade'en sam adøm?

⁴⁸ Xjats ja Pedro tni'ane'jmy jøts ja ñøbattit ja nwindson'ajtim Jesucristo myøk'ajtingøjxp. Jøts ja Pedro møkta'aky yiknimaay, jøts ja jam yjaakta'anit ja winaak xøøwin.

11

Ku ja Pedro ttamimadyaajky ya'atpi ayuujk pøn tjanchja'widip ja Jesús jam Jerusalén

¹ Xjats ja tnija'widøø ja Jesús kyudanaabyidi pøn jam tandi Judeit y'etjotp, jøts ku ja wenk jaa'y wyinaty tø tkupiky ja Dios kyajpxy y'ayuujk pøn ka'ap y'israelitjaa'yidi. ² Xjats ku ja Pedro jadigojk wyimbjity jam Jerusalén, winets ja twindsø'ødyøø ja Pedro:

³ —¿Tiku ja tø x'ats'ixy ja wenk jaa'y pøn ka' y'israelitjaa'yidi, tiku møøt tø m'atskay m'atsjiiikxy?

⁴ Xjats ja Pedro tñimadyajktøjkøø sà ja yjajty sà ja kyubejty ku ja ojts yikway yikwich, jøts ja wyaañ:

⁵ —Jam ø wyinaty Jopit jaa'y kyajpjotp, jøts Dios'ajot'ajtpi wyinaty, jøts jade'en nja'wøø kidi ja jaa'y kyuma'ay, jade'en n'ejxpaaity ejxim ja møj manti, ku n'ijxy kyida'aky tsajpwemp tum wendi maktaxk iskiini, jøts wyingøøn mǎ øts jap wyinaty. ⁶ Xjats nwin'ijxy yikxon ti dø'øn jap mantijøtpy, winets jap n'ejxpaaity janch mayjøøjp ja jiyujk, jap wyinaty tsaa'ñ, jap wyinaty joon, jøts nayide'en ja jiyujk midi maktaxk ja tyeky, jøts nayide'en midi janch'awa'andi. ⁷ Winets nmadøøy ja ayuujk ku ø xnimaay: "Pidø'øk, Pedro; yik'look inet yø jiyujk tu'uk jøts xtsu'utst." ⁸ Jøts ø n'adsøøy: "Ka' teety jade'en. Niwindii øts jade'en ngatsu'uch ja kya'øybi kyawa'atspi, midi kapaat'ajtiyip yiktsu'utst sam ja Moisés kyutujkin." ⁹ Winets øts jadigojk xmigajpxy jøts øts xnimaay: "Midi ja Dios tø tyikwa'ach kidi xka'ødyijy." ¹⁰ Tigøøk ojk idø'øn ja manti wyimbijty y'adisy, jøts pyatøjkiñaa nay jap tsajpjøtpy. ¹¹ Xjats ku øts jade'en njajty, winets nay jatyi yja'ttøø nidigøøk ja yaa'dyøjkøø mǎ øts ja wyinaty, Cesarea dø'øn ja choondi jøts jam ñøjkxti mǎ øts ja xpaattøø. ¹² Winets øts ja Espiritu Santo xnimaay jødsik øts ja kugajpxy nmøødidit, jøts ku nayide'en ka'ap ti nbawinma'aty. Winets ø xpadsø'ondi nidudujk ja Jopit jaa'dyi pøn tjanchja'widip ja Jesús. Xjats ku øøts jam njaj'ty Cesarea, winets øø niduki'yiyi ndøjkøø Cornelio tyøjkjotp pøn ø xnigajxøø. ¹³ Winets øøts ja xukmadøøy sà ja yjajty sà ja kyubejty jam tyøjkjotp, ku ja ankilis tu'uk t'ejxpaaity, jøts ku ja ñimaajyøø: "Kax mgugajpxy jøts jam ñøjkxt Jope, wan ja Simón t'atsway midi nayide'en yiktejp Pedro. ¹⁴ Ja'ats mdukmadowiyidip sudso m'anmija'win y'awa'atspidsø'ømdit møøt mmigu'uktøjkti." Jade'en ojts ñii'mxyi. ¹⁵ Xjats ku ojts nmigajpxnibøki niduki'yiyi, winets ja Espiritu Santo tyatøjkiyidøø, nayide'en sam adøm xatøjka'andøø ku ojts myiduk'ojk tyimyñ. ¹⁶ Xjats ku øts jade'en n'ijxy, winets øts jatyi nja'myejch ja nwindson'ajtim y'ayuujk sà ja wyaañ ku ja Juan Bautista mayjaa'y nøø ttuktanøbejty, jøts ku ja wyaañ: "Wenk mee njatt, jade'en ku Espiritu Santo mdatøkiyidit." ¹⁷ Pøni tyuktatøkiwyampy ja Dios Teety ja y'Espiritu Santo ja wenk jaa'dyi jade'en sam adøm xuktatøjka'andøø, kumi adøm njanchja'windip ja Jesús, çti øts ja jade'en ngaduktunip? Tsaachtyi øts idø'øn, pø kø'ømxi ja jade'en ttunwa'añ.

¹⁸ Ku ja jade'en tmadoodøø ja Pedro y'ayuujk, winets y'amongøjxtøø jøts yjotkujk'ajttøø, jøts ja Dios Teety tmøjpiktaajktøø, jøts yide'en wyaandøø:

—Jø ja Dios Teety ttanibiktaagi jøts nayide'en yikunuu'kxitt øpyønjaa'yiyi ku ja tmajt-stu'uttit ja kya'ødyunk, winets ja tsinaa'yin xemikøjxp tpaattit!

Ku ja jaa'y ja Jesús tjanchja'wi'okwa'añ jam Antioquia

¹⁹ Ku ja Esteban t'ukyik'oo'ktøø, winets t'ixaañibøjkidøø pøn ja Jesús tjanchja'widip, xjats ja winaagin kyaknøjkxtøø Fenicia, Chipre, jøts nayide'en Antioquia. Japts ja tkajpxwa'kxtøø ja øgyajpxy ja ømyadya'aky. Ka'ap ja nugo ajawi tñidyukmadowdi o pøn, agø'ømyi ja tñadyamimadya'agyidi tuk'israelit jaa'dyi. ²⁰ Xjats winaagin ja'adi midi jam tsoo'ndip Chipre jøts nayide'en Cirene, ku ja nay jam yja'ttøø Antioquia winets ja nayide'en tkajpxwa'kxtøø ja øgyajpxy ja ømyadya'aky, midi anmija'win tyiknitsø'ok'ajtp, ja'ayi tyukmadoodip pøn ka'israelit jaa'dyi. ²¹ Janchkunuu'kxidi ja Dios ja' ku ja kyajpxwa'kxti, winets ja japit jaa'y tjanchyiktigatstøø chinaa'yindi, jøts ja nwindson'ajtim yja' tpaabøjkiñidøø.

²² Xjats ku ja jade'en tñija'widøø ja Jesús yjanchja'wibidi pøn jam tsinaadyip Jerusalén, winets ja tkaxti nay ja' myigu'ukti pøn txøw'ajt Bernabé, jøts jam ja ñijky Antioquia. ²³ Xjats ku jam yja'jty, jøts ja t'ijxy jøts ja tñija'wøø sà ja Dios Teety wyinaty tø tkunuu'kxy ja Antioquiiit jaa'y ku ja chinaa'yin wyinaty tø tyiktigatsti, winets ja janch yjotkujk'ajty yjanchxondaajky. Xjats ja tkajpxjot'amøkøø jøts amumjoojt ja nwindson'ajtim yja' tpadu-ujnidit, jøts nijuuni tkamajststuttit. ²⁴ Janch yuyj idø'øn ja Bernabé, yjanchmøøt'ajtpy ja Espiritu Santo, jøts nayide'en ja Dios t'ajot'ajty. Xjats jade'en ja namay jaa'y tpaabøjkidøø ja nwindson'ajtim yja'.

²⁵ Xjats ku ja jade'en yjajty kyubejty ja Bernabé, winets ja ñøjkxkojmaa mǎ txøøwi Tarso jøts ja t'ats'ixa'at ja Saulo. Kuts ja jam tpaajty, winets ja twaanijky mǎ ja wyinaty tø tñidsøøn jam Antioquia. ²⁶ Japts chinaadyøø tu'uk jumøjt ka'pxy møøt ja janchja'wibidi jøts ja tyik'ixpøktøø. Nay jam idø'øn Antioquia mǎ ojts ja Jesús yjanchja'wibi yiktejti mijawyeeen cristianos.

²⁷ Nay ja'abi xøøw nay ja'abi jumøjt ku ja Dios Teety kyugajpxy ojts ñijky nay jam Antioquia, pøn jam tsoo'ndip Jerusalén. ²⁸ Xjats ku yja'ttøø, jøts tu'uk txøøwi Agabo, ja' idø'øn jam ojts tyanaa'yøyi mayjaa'y agujkp, jamts ja kyajpxwa'kxy Espiritu Santo myøk'ajtingøjxp, jøts wyaañ jøts ku ja yuu møk'ampy myeenwa'añ ya naxwiiñ. Janch tiy yide'en, janch jajt idø'øn ja jade'en winet ku Claudio wyinaty myøjwindson'aty. ²⁹ Xjats ku ja jade'en ja janchja'wibi tmadoodøø ku ja yuu myenwa'añ, winets ja tkajpxy'ajttøø jøts pudøjkin ttanigaxtiti ja myigu'uk pøn jam tsinaadyip Judea, jade'en pøni sà kø'øm

tmo'owa'andi nidu'uk nidu'uk. ³⁰ Jade'en ja tundoo, jots ja ttamigajxidoo ja Bernabé moot ja Saulo, jots jam tkomo'odit ja jamit moga'dyoykti.

12

Ku ja Herodes tnankyik'o'jkoo ja Jacobo jots ja Pedro ja'ayi yiktsuumy

¹ Xjats nay ja'abi xooow nay ja'abi jumojt ja moy windsøn Herodes tjemdunibøjki ttedunibøjki winaagin ja Jesús yjanchja'wibidi. ² Jots ja ttukta'ø'jky ja yønchujx ja Jacobo, ja Juan y'ajch, ³ jots ja t'ijxy ku ja israelit jaa'y ja yjawi jade'en ttaxonda'akti ku ja jade'en y'adi'ich. Xjats ja Pedro yjaaktyimyikmajch paski xoojoojty, winet ku ja tsapkaaky jadi'iñi yikay midi kalevadurimoot. ⁴ Xjats ku jade'en ja Pedro yikmajch, winets ja windsøn Herodes ja pyiktaajkiyoo puxøjkjotpy, japs soldadi ja y'ejx'ityiyi maktaxk piky jots maktaxk soldadi tukpiky jaty. Jade'en ja Herodes yjawnmaay jots ja tyikpidsømt ja Pedro paski xooquixy, jots ja mayjaa'y ttuk'ejxwa'añ ttuknijawiwya'añ. ⁵ Jap wyinaty ja Pedro tsumy, jots nayide'en ejtp idø'on ja y'ejx'ityiyi ja soldadi, winets ja Jesús yjanchja'wibi tni'amidowidi tniobktsowidi ja Pedro amumjoojt, jots ja ttukmadoodoo ja Dios.

Ku ja Dios Teety y'ankilis ojts tyik'awa'atspidsimy ja Pedro jap puxøjkjotpy

⁶ Nay ja'abi tsuu ku wyinaty tyimbyaatwaañi ja kajpx'aats ku ja yikpidsømyit jots ja kajp jaa'y y'ejxt ñijawiyit, jots jaakmaap jap wyinaty ja Pedro. Jap wyinaty adsow aduuk ja soldadi ñama'ayiyi, puxkadeen koxøch wyinaty ja Pedro, jots nayide'en ja soldadi t'ejx'etti ja tøk'aaw. ⁷ Winets jaty ñimejniyoo ja nwindson'ajtim y'ankilis, jots jap puxøjkjotpy yjapøjkjxy. Xjats ja Pedro yikjixy jots ku tyikniwijy, winets tñimaay yide'en:

—Pidø'ok puty.

Kuts ja pyidi'iky jots ja kadeen jade'eñi kø'øm kyajnaa, ⁸ xjats ja ankilis ñimaajiyiyo yide'en:

—Nachumjoni yikxon, jots tawa'agi yø mgø'ok.

Xjats ku ja Pedro jade'en tpaduñ, jots ja ankilis yjaaknimaajyoo:

—Tatøki yø mxox jots øts ix'oojk xpayø'ty.

⁹ Xjats ja Pedro ix'oojk tpadso'ñ ja ankilis, ni tkanijawi pø janch kajanch ku ja yik'awa'atspidsømwa'añiyi. Jade'en jajtp ja tjawi ja Pedro kidi jaa'y kyuma'ay. ¹⁰ Xjats ku ja jade'en yiktsø'niyoo ja ankilis, jots jam ñaxti ma myidukpiky ja ejx'ejtpidi, jots nayide'en twinaxti ma ja myimajtsk pikpyi ejx'ejtpidi, jots jam yja'ttøo ma pux'agaj jam tuu' pa'am, winets ja pux'agaj kø'øm y'awaajch jots pyidsømdoo. Xjats ja jade'en y'awa'atspidsømdoo, jots yjaagyø'odyi jadu'ukpi tuu', japnimts ja Pedro ojts yikmajtst'uty nadyu'uk. ¹¹ Xjats ja tjanchja'wøo ku y'awa'atspidsimy, jots yide'en wyaañ:

—Pø janch jade'endamxi dø'on ku ja nwindson'ajtim tø tjanchkexy ja y'ankilis jots øts ja xyik'awa'atspidsømt jap puxøjkjotpy, jots ja israelit jaa'y moot ja wyindsøn Herodes jade'en tø xkamimajada'akti pøni sa øts ja' xtyimya'uktunwa'andi.

¹² Jade'en ja Pedro wyinmay, xjats ja ñijxy jam Maria tyøkwindum midi ja Juan tyaagip, ja Juan midi nayi yikxøomooopy Marcos. Ja' idø'on ja tyaak tyøkwindum ñijxy ja Pedro ma ja mayjaa'y jam wyinaty tø ñamyukyidi, jots idø'on ja jam Dios'ajot'atti. ¹³ Kuts ja Pedro twingøjxy ja tøk'agi'pyit agaj, winets ja kiixy Rode pyidsiimy tyøjkjotpy, jots ja ojts tpatmadøy pøni pøn ja'. ¹⁴ Xjats ku ja ojts tyukmadøy kudam ja Pedro kyajpxy, nika'ap ja tøk tyik'awaajch, janch jotkujk ja wyimbijty yukwøñ chapwøñ, jots ja myigu'uk ja t'atstukmado'tot ku ja Pedro jap kyajpxy. ¹⁵ Xjats ja myigu'uk ñimaajiyiyo:

—iPø mguma'aymadyakp mets!

Jots ja kiixy ja tyimyanimaay ku ja tyimdyiy tyimyjanchi. Xjats ja ka'ap tyimybøkti tyimwyandip ja':

—iKa'ap inet yø yja'aji; pø ja y'ankilis yø' midi nitanaajiyiip!

¹⁶ Ixap ja Pedro jøp'ijxy tyøkwingøxy. Jots ku ja tyik'awatstøo ja tøk'aaw, jots pø ma ja tyimya'ajttøo ku ja twing'ejidoo jots kudam ja yjanchja'aji. ¹⁷ Ja'ayi ja Pedro ja kyø' tnanky'ejxøo jots ja tukween y'ettit amøñi, winets ja tñimadyajknibøjkoo sa ja yjajty sa ja kyubejty ku ja nwindson'ajtim ojts yjuudyi jap puxøjkjotpy; xjats ja nayide'en t'uknimaanaa jots ja ttukmado'odit ja Jacobo, nayide'en ja Jesús yjanchja'wibidi, jots ja tñijawidit.

Xjats ku jade'en t'uknigajpxkøxnaa, winets ja choo'naa jots ja ñijxy abikyajp.

¹⁸ Xjats ku kymjabom'ajty ku xyiññoo, winets ja soldadi ñigumaap ñayja'wiyidoo ku ka'ap ja Pedro jap ukpøni. ¹⁹ Xjats ja Herodes møk pyagajxiyidoo jots ja t'ats'ixa'adit, ka'ats ja ma t'ukpaatnidoo. Xjats ja Herodes wyaadsøjiyidoo niduki'iyi jots ja tyuknigajpxwa'añidi sudso'ampy ja Pedro pyidsiimy, winets ja Herodes ja yik'oo'kiñidoo. Xjats ku ja jade'en y'adijch, winets jam choo'naa Judeit y'etjotp, jots ñøjkxnaa tsinaabyi jam Cesarea.

Ku ja Herodes y'ø'jky

²⁰ Xjats ja møj windsøn Herodes janch mi'ajkip ja jaa'y ja' pøn jam tsinaadyip Tiro jøts nayide'en Sidón. Xjats ja Tiro jaa'y møøt ja Sidóngit jaa'y tkajpxy'ajtnidøø sudso ttu'undit sudso tyaabyaattit. Winets ja kyugajpxy tkajxtøø jøts ojts tpaatti ja Herodes kyudsinaabyi pøn txøow'ajt Blasto, ja'ats ojts tnøjmidit jøts tnøjmit ja wyindsøn Herodes, jøts ka'ap cheptu'undit jøts jotkujk chøønidit, ja'agøjxp ja jade'en tnimaadyøø ku ja yjiik'xxy jam tjyudi tkajpxti mā Herodes yikutuky. ²¹ Xjats ja Herodes twaadsøø ja namayjaa'y, jøts jap mye'endit mā kya'amaadyaajk, xjats ku ja jade'en myengøjxtøø ja jaa'y, winets ja ttatøjki ja xyox midit amuum tsamamp, winets kyajpxwā'kx nibøjkøø jam mayjaa'y wyingujkp. ²² Xjats ja mayjaa'y jade'en ñigyumaap tjanchja'widi ku ja jade'en kyajpxwa'kxy, jøts ja xem yam møk yjanchnøømdi:

—Yø' ixja kyajpxwa'kxy ka'ap yø yjaa'y, dios yø'.

²³ Xjats ku jap wyinaty kyajpxwa'kxy, winets jøts jaty; ja nwindson'ajtim y'ankilis yikpa'ambaadyiyi, ja'agøjxp jade'en jyaty ku kø'øm ñamyøjpikta'agyyi, jøts ku ja Dios ne'egi tkamøjpikta'aky. Ku ja jade'en pyiky, tinø'øk idø'on jam y'am yjotp tøjkiña, ja'ats jadi'ñi tsu'tskøjxniyøø.

²⁴ Winets ja nwindson'ajtim y'ayuujk myøjtak'adøtsnaa, yikajpxwa'kx ja omagajp.

²⁵ Xjats ku ja jade'en tyungøjxtøø ja Bernabé møøt ja Saulo, ku ja tminaxti tmidøkidi ja pudøjkin, winets ja jap choo'nidøø jøts ñøjknidøø Jerusalén møøt ja Juan midit nayide'en yiktejp Marcos.

13

Ku ja Bernabé møøt ja Saulo myiduk'ojk choo'ndøø kajpxwā'kxpi

¹ Jam Antioquia wyinaty namay ja Jesús yjanchja'wibidi, jam ja kyugajpxy'ajtpi jøts nay jam ja yik'ixpøjkpidi. Ya'at idø'on jade'en yiktejtjip Bernabé, jøts ja Simón (midit nayide'en yiktejp Negro), nayide'en ja Lucio ja Cirenit jaa'y, jam ja Manaén (midit yaakti tuknax møøt ja Herodes midit windsøn'ajt jam Galilea) jøts jam nayide'en ja Saulo. ² Tu'ukpi xøow idø'on ya'at jaa'y jade'en ñamyujkidøø jøts ja nwindson'ajtim twindsø'jkidøø, ayuu'ajttip idø'on wyinaty ku ja Espiritu Santo wyaañ:

—Jigaxti yø Bernabé møøt yø Saulo, jøts ttu'undit midit øts yø tø ndaniwaadsowidi.

³ Xjats ku jade'en Dios'ajot'ajt'abajtidøø ayuu, xjats ja myigu'uk t'ukønixajkøjxniidøø, winets ja yikajxtsoo'nidøø.

Ku ja Jesús kyudanaabyi kyajpxwā'kxtøø jam Chipre

⁴ Xjats ku jade'en ja Saulo møøt ja Bernabé yiktsoo'niñidøø ja Espiritu Santo, winets ñøjktøø mā jam txøowi Seleucia. Jamts ja barki ttatøjkidøø jøts ñøjktøø jam Chipre. ⁵ Xjats ku jam yja'ttøø mā ja barki wya'k'øyøø mā jam txøowi Salamina, winets ja tkajpxwā'kx nibøjkidøø ja Dios kyajpxy jam tsaptøjotp. Jøts nay jap ja Juan tmøødidi, ja'ats ja pudøjkiyidøø. ⁶ Xjats ja jade'en ja Chiprit naajx ttayø'ñaxtøø, jøts jam yja'ttøø mejy wingon mā txøowi Pafos. Jamts tpaattøø tu'uk ja israelit jaa'y pøn txøow'ajt Barjesús, yik'adujkp ja' jøts nayide'en xyimay. Dios idø'on kyugajpxy ja ñadyiyi jøts ja jaa'y tjanchwin'ñi. ⁷ Jam idø'on ja tyuñ møj windsøn wyindump pøn txøow'ajt Sergio Paulo, janch wijy janch kejy idø'on ja windsøn. Winets ja tñigajxøø ja Bernabé møøt ja Saulo, yjanchmadoowampy idø'on ja' ja Dios kyajpxy y'ayuujk jøts ja tyukmadowiyit. ⁸ Xjats ja yik'adujkpi midit nayide'en yiktejp Elimas t'agajpxøø ja møj windsøn, ku ka'ap tkupøkt pøni sa wya'andi ja Bernabé møøt ja Saulo. ⁹ Xjats ja Saulo pøn nayide'en yiktejp Pablo, yjanchmøøt'ajtpy ja Espiritu Santo ja', paty ja tjanchwin'ijxy tiyim ja yik'adujkpi, ¹⁰ jøts ja yide'en tnimaay:

—iMets windaayibi jaa'y, kawindiy jaa'y mets, mi'ajkip mets ja' pøn øy tsinaadyip! 7Tiku xyikutigøøwya'ñ ja nwindson'ajtim kyajpxy y'ayuujk? ¹¹ Ixym idø'on ja nwindson'ajtim myik'ayo'ombaa'diyit; kunim me mda'ant winjoox jøts may xøow idø'on jade'en xkawin'ext ja xøow.

Xjats tyimyjaty tyaañ jade'en kugoots, winets t'ixaa'y pøni pøn tuu'wetsiyip. ¹² Xjats ku ja jade'en t'ijxy ja møj windsøn sa ja yjajty sa ja kyubejty ja yik'adujkpi, winets ja jaty; tjanchja'wøø pøni sa jaty ja tyukmadooyjyøø ja Saulo møøt ja Bernabé. Janch tyimñigumaap idø'on ja tja'wiyi'ñ ku ja yik'adujkpi jade'en yjajtnaa ja nwindson'ajtim Jesús myøk'ajtingøjxp.

Sa yjajttøø sa kyubajttøø ja Pablo møøt ja Bernabé jam Antioquia midit tamp Pisidiit y'etjotp

¹³ Xjats ja Pablo møøt ja yjamyøøt jam tyøjkidøø Pafos barkijotp, jøts jam ja ñøjktxi mā txøowi Perge, nay jam Panfilia y'etjotpti; jøts ja Juan jamyi ja tminawya'kxidøø Pafos jøts ja ñøjknaa Jerusalén. ¹⁴ Xjats ku jam ja jade'en yja'ttøø Perge, winet jam choo'ngoymidøø jøts yja'ttøø Antioquia, nay Pisidia y'etjotpti. Xjats poo'kxin xøow winets tyøjkidøø jam

tsaptøjkjotp, japts y'ixaktøø. ¹⁵ Xjats ku ja jade'en yikajpxkijxy ja nøky midi ja Dios kyutujk myøøt, jøts nayide'en sa wyandøø ja Dios kyugajpxtyi, winets ja tsaptøjk windsøn ojts ñimaajyidi ja Pablo møøt ja yjamyøøt:

—Meets migu'uktøjkti, kidi wan meets jap xmimiñ xmija'aty ja kajpxwejin, kidi wan meets xukmadowandip yø jaa'y, tukmadowdits.

¹⁶ Winets ja Pablo tyanaagyukøø jøts ja kyø' ja'ayi tñanky'ijxyi, ja' tyijpy jøts ja jaa'y y'amo'ondit jøts tpatmado'odit, xjats ja yide'en wyaañ:

—Ukpatmadowdi meets Israelit jaa'y pøni pøn jaty ja Dios twindsø'jkidip: ¹⁷ Meets Israelit jaa'y niduki'iyi pøn adøm ndios'ajtyindip, ja' ojts twi'ixy adøm n'apteety'amøjti jøts ja tpiktakti adøm n'isinaadyaajkti janch møj, winet ja yjajty ku wyinaty nay jam chøøni Egiptit jaa'y y'etjotpti jade'en ejxim ja ja'at jaa'y; xjats ja møk'ampy jadigojk kø'øm ja Dios tyimiykpidssøjmijidøø nay jam, ¹⁸ jøts ja tyiknaxtit jam tø'øts etjotp wixijky jumøjt, kuwañim ja Dios ja yikjuyk'ajtiidi øy ja tpadundi tkabadundi ja Dios y'ayuujk. ¹⁹ Jøts ja nayide'en tyikudigøøy wixujk ja møj kajp midi jam wyinaty ejtjip ma tæøwi Canaan, jøts ja n'apteety'amøj yikmo'odit ja ñaajx. ²⁰ Xjats jade'en maktaxk magø'pxy jagujkp jumøjts ñitanaajyidøø kunim ja kugajpxy kyaxi'iky midi tæøw'ajt Samuel. ²¹ Xjats ja kø'øm t'amidoonidøø tu'uk ja windsøn pøn ja nitaniyidip, winets ja Dios tu'uk myøøjyidøø pøn tæøw'ajt Saúl, ja Cis y'u'nk, nay ja Benjamín y'ap, ja'ats wixijky jumøjt tuuñ. ²² Winets ja Dios jadigojk pyøjkijyøø ja windsøn'ajtk, jøts ja nagyø'øm tpiktaajk ja David, xjats ja Dios wyaañ: “Tø øts nbaaty ja David, midi ja Isai y'u'nk'ajtpy, yø' janch yuyj janch tuda'aky, xpaduujnip øts yø' nja' pøni sa ø ndsøky.” ²³ Xjats ja Dios nayide'en tñajtskajxøø ja Jesús midi adøm n'Israelit jaa'y tyiknitsø'ok'atp, yø' idø'øn ja David myigu'uk'ajtpy, kuts ja Jesús myiñ pø kø'ømxi wyinaty ja Dios tø wyanda'aky. ²⁴ Xjats ja Jesús namga'aním wyinaty tyundøki, winets ja Juan Bautista jawyeen tkajpxwa'kxy jøts ja Israelit jaa'y ttukmadøøy, jøts pyøktyu'unin tmajtstu'uttit jøts ñøbatkøxtit. ²⁵ Xjats ku ja Juan Bautista y'oo'knaa, tø ja wyinaty tñøjmi ja Israelit jaa'y, jøts ku ja ka'ap yja'aji pøni sa ja wyinaty tñawidi ku ja yiknitsokpi myiñ, jøts ja tñimaay: “Ix'oojknim ja mye'ent pøn øts nijuuni møøt nganamyibaat'atiyit.”

²⁶ Xjats ja Pablo yjaakajpxwa'kxy, yide'en ja wyaañ:

—Meets migu'uktøjkti, pøni pøn jaty ja Abraham myigu'uk'ajtpy, jøts nayide'en pøni pøn ja Dios twindsø'jkidip, yø kajpxy yø ayuujk yø' adøm ndanitsø'ok'ajtindip midi øts ixyam nngajpxwampy. ²⁷ Ukmadooda'am, ja' pøn jaty jam tsinaadyøø Jerusalén nayide'en pøn ja windsøn'ajttøø, ka'ap ja tñija'widøø ku ja Jesús wyinaty tø kyexy ja Dios Teety, jøts kyidyimwyinmadoodøø dø'øn ja kajpxy ja ayuujk midi ja Dios kyugajpxy wyinaty tø tjaadya, ja' idø'øn xyumikajpxtjip etjip ku ja poo'kxin xøøw jam kyø'øm tsaptøjkjotpti; winets idø'øn ja kø'øm ttami'ambøjktøø ja Jesús, jøts ja jade'en ttuundøø sa ja Dios kyugajpxy tyiktaañ ja ayuujk. ²⁸ Xjats ku ja kø'øm tkamiwinmaa'nbyaattøø ti ja tyukpøky'ajttip jøts tyik'ooktit, winets ja tñimaadyøø ja Pilato jøts ja Jesús tñankyik'oojyit. ²⁹ Xjats ku ja jade'en ttundi tuki'iyi sa ja Dios kyugajpxy tjaadya, jap nøkyjotpy, winets tyikwinajktøø jam kruskøjxp jøts tyiknaxøjkidøø. ³⁰ Ja Dios Teetyts ojts kø'øm tyikjuykpyiky jadigojk jap oo'kpi jutjotpy. ³¹ Xjats ku pyidsimy, winets ojts jeky ñanky'ijxyiyi jam jaa'y wyindump midi myøøtwidejt ku choo'ndøø Galilea jøts ñøjktøø Jerusalén. Ja' idø'øn ixyamdi pøn tkajpxtjip tmadyaktip ja Jesús jøts ttukmado'odit ja jaa'y.

³² Jøts øøts nayide'en ixyam nngajpxy nniimadya'aky, jøts meets ndukmado'ot ja øy ayuujk sa ja Dios Teety tpiktaajky ja wyandaajkin adøm n'apteety'amøjkjxpti. ³³ Ja' agøjxp ku adøm ja n'apteety'amøj'ajtyindi, paty ja tø tpaduñ ja Dios Teety ja wyanda'ajky jøts ku ja tø tyikpidsimy jadigojk ja Jesús jap oo'kpi jutjotpy, jade'en sam jap wya'añ myimajtsk salmojotpy ku yide'en wyaañ: “Øts me n'u'nk'ajtpy, jøts tø mets mjuyk'ajtin ixyam nmo'øy.” ³⁴ Xjats ja Dios jade'en wyinaty tø tñanibiktaagi jøts ku ja tyikpidsø'ømt ja Jesús jap oo'kpi jutjotpy, jøts nayide'en ku ka'ap ja ñine'kx wyindigø'øty, jade'en idø'øn jap wya'añ ja Dios kyajpxy jap nøkyjotpy: “Nayide'en meets ngunu'u'kxt sa øts ja David tø nnøjmi.” ³⁵ Paty nayide'en jadu'ukpi salmo wya'añ: “Ka'ats me Dios Teety ja xyikjatt jade'en jøts øts nñine'kx wyindigø'øty, pø xtsøky'ajtpxi mets.” ³⁶ Janch tøy idø'øn ja' ku ja David ja yjaa'y ojts tpaduñ sa ja Dios ja wyinmaa'ñ myøøjyøø, xjats y'oo'knaa jøts nay jam ñajxøjkiy'i'ñ ma ja y'apteety'amøj wyinaty tø ñajxøkidi, jøts ja ñine'kx nayide'en wyindigøøy. ³⁷ Pønts ja Dios Teety kø'øm tø tyikjuykpyiky jadigojk, ka'ap ja ñajxñine'kx ja jade'en tø wyindigøy. ³⁸ Meets migu'uktøjkti, kuwani xñijawidit ku ja Jesús ja' tu'ugyi xpojkpimaa'kxindip pøn meets ixyam myiktukmadoop. ³⁹ Ja'ayi dø'øn tu'umchi niduki'iyi tpojkpimaa'kxp pøni pøn ja janchja'wiyip ja y'ayuujk, jøts ni ja Moisés kyutujk jade'en kyapojkpimee'kxy pøni pøn ja tpadump. ⁴⁰ Øyim mnay'ejx'etidit jøts ka'ap jade'en mjattit sa ja Dios kyugajpxy tjaadyandøø, ku ja yide'en wyandøø:

⁴¹ Meets nixekpi taxekpidi, pø nigyumaap mee xjawit sa n'adø'øst;

pø ka' xjanchjåwídit øy ja pøn kugajpxy mjadukmadøøydi,
pø jade'en ne'egi jøts mdyimgyudigø'ødyit.

⁴² Xjats ja Pablo jade'en ttukmadoogijxy ja israelit jaa'y sa ja Dios kyajpxy wya'añ, winets ja myigu'uk jap tmøøtpidsømnaa jam tsaptøjkjotp. Xjats ku jap pyidsømddø, winets ja Pablo ñimaajyøø pøn ka'israelit jaa'dyi, jøts nayide'en tñigajpxt nay ja'abi ayuujk jadu'ukpi poo'kxin xøøw. ⁴³ Xjats idø'øn jade'en ñawya'kxidøø jam tsaptøjkjotp, jamts wyinat namay ja israelit jaa'y, jøts namay ja abikpyi jaa'y midí nayide'en tpadundip ja israelit chinaa'yin, ja'ats niduki'iyi tpanøjkxtøø ja Pablo ja Bernabé, winets ja ojts yikajpxwejtí jøts yiknimaadyøø: "Ejtp idø'øn ja Dios kø'øm xtsøky'ajtyim paty ja Dios amumjoojt ja y'øgyajpxy xpaduujnyidit, jøts nijuuni xkamajtstu'tuttit."

⁴⁴ Xjats ku ja tpaatkojmaa jadu'ukpi poo'kxin xøøw, ku ja tjanchpatmadowa'andi ja Dios kyajpxy, winets jawaani kyameengijxy niduki'iyi ja kajp. ⁴⁵ Xjats ku dø'øn ja israelit jaa'y jade'en t'ejxtøø, winets ja Pablo yiktami'ama'at'ajttøø ja namay jaa'y jøts yikmi'ambøktøø, xjats yiknimaadyøø ku ja jaa'y nugo twindaay'atti. ⁴⁶ Xjats ja Pablo ja Bernabé møk'ampy ojts tñigajpxti, jøts tñimaadyøø:

—Meets israelit jaa'y, jade'en mjapaat'atyidi jøts meets jawyeen myiktukmado'ot ja Dios kyajpxy; ka'ats meets ja xkupøkwa'andi, jade'en nugo mwå'andi jøts ka' pyaat'atyí jøts ja Dios y'ø'y'ajtin xkupøjkijyit, jam øøts ne'egi nøjkk ngajpxwa'kxy ma jaty ja jaa'y kya'israelitjaa'yidi. ⁴⁷ Kumi jade'en øøts ja nwindson'ajtim tø x'ane'emy ku yide'en wyaañ: Tø me nbiktå'aky jøts øts n'øgyajpxy n'ø'y'ayuujk xukmado'ojit tuki'iyi ja naæwii'ñit jaa'y, jøts xñijawídit sudso'ampy ñitso'ok'attit.

⁴⁸ Xjats ku dø'øn jade'en tmdaðøø pøn ka'israelit jaa'dyi, winets ja yjanchxondaktøø jøts ñawya'añidi kudam ja Dios kyajpxy janch'ø;y; jøts niduki'iyi ja t'mibøjkøxtøø pøn wyinaty ja Dios kø'øm tø tpiktå'aky, jøts nijuuni xøøw ja y'anmija'win kyawindigø'ødyit. ⁴⁹ Jade'en idø'øn jam ojts yikajpxwa'kxy ja Dios kyajpxy ma jaty ja kajp jam. ⁵⁰ Xjats ja israelit jaa'dyi ojts møøt tkajpx'øydi winaaagin ja yaa'dyøjk midí ja kajp tñitanaadyip, jøts møøt nayide'en ja tø'øxyøjkti midí ja kajp jaa'y windsø'jikyidip jøts midí ja israelit jaa'y tpaduujnidip ja yja', ja'ats ja kajp jaa'y yik'ambøjktøø, xjats ja Pablo ja Bernabé ojts yikjemdundi yiktedundi kunim ja tyikpidsømddø ja'abi etjotp. ⁵¹ Winets ja Pablo møøt ja Bernabé twinaptøø ja pu'ux jam tyekyøjxp, jøts jade'en ttuk'ejxtit ku jade'embí jaa'y ja tka'øvjawídi, winets jam ñøjknidí ma ja kajp txøøwi Iconio. ⁵² Xjats ja Jesús yjanchja'wídi pøn jap Antioquia tyandøø, janch ejtni xoni ja ñajjåwiyidi ku wyinaty tø tyatøkiyidi ja Espíritu Santo.

14

Så yjajttøø så kyubajttøø ja Pablo ja Bernabé jam Iconio

¹ Ku ja Pablo ja Bernabé jap yja'ttøø Iconio jøts jam tyøjkidøø tsaptøjkjotp, winets ojts kyajpxwå'kxti møk'ampy jøts may tpbøjktøø, nayide'en ja israelit jaa'y jøts may pøn jaty jam wyinaty midí ka' y'israelitjaa'yidi. ² Xjats ja israelit jaa'y pøn tkababøjktip ja Dios kyajpxy, ja'ats t'agajxidøø pøn ka'israelit jaa'dyi jøts ja tyikwinmaamy'a'ñi ja jaa'y pøn ja Jesús tjanchja'wídi. ³ Paty ja ojts tyaa'nidí jeky'ampy ja Pablo møøt ja Bernabé, jøts ku ojts møk tkajpxwå'kxti sa ja Dios Teety ttamidsøjky ja naæwii'ñit jaa'y, winets nay ja' myø'ajtin møøjyidip jøts milagri'ajtin ttu'undit jøts nayide'en ja ejxpajt tpiktå'aktit, paty ja'agøjxp ojts yiknija'wi kudam ja yjanchi midí ja kyajpxwå'kxtip, jøts kudam ja Dios Teety xjanchøjkyindi. ⁴ Jøts ja kajp jaa'y ka'ap ja wyinaty tu'ugyi ja wyinmaa'ndyi, jam wyinaty ja israelit jaa'y yja' jøts ja Jesús yja'ami. Majtsk jøøjp jap wyinaty ja wyinmaa'ndyi. ⁵ Jøts ja israelit jaa'y kajpxy tundøø møøt pøn ka'ap y'israelitjaa'yidi jøts ñøjktøø ma ja kudunktøø, jamts tkajpx'øydøø møøt ja kudunk jøts tmi'ambøjktøø tpaaga'atswidetwå'andøø ja Pablo møøt ja Bernabé. ⁶ Kuts ja Pablo ja jade'en tñija'widøø møøt ja Bernabé, xjats ja kyaknøjktøø jam Lистра jam Derbe, jade'en ja kajp xøøw midí jam Licaonia etjotp tandip, jøts wine'enin ja abikyajp jam ni'awídit midí jam abiky etjopti, ⁷ jamts ja tkajpxwå'kxti ja Dios y'øgyajpxy y'ø'y'ayuujk midí yxiknitso'ok'ajtindip.

Ku ja Pablo jam Lистра yika'jch

⁸ Nay jam ma ja kajp txøøwi Lистра, jamts wyinaty chøøni tu'uk ja yaa'dyøjk pakma'at midí wyinaty niwine'enin kyidyimyo'øpy, tyimyjade'en idø'øn ja kye'jxy. ⁹ Jøts ja pakma'at jaa'y myaðøøpy ja tuki'iyi pøni sa ja Pablo tyikwa'añ, winets ja Pablo twin'ijxy ku yjawi t'ajot'aty ja pakma'at jaa'y ja Dios ku cho'okwa'añ. ¹⁰ Winets ojts møk tjanchmigajpxy jøts tñimaay:

—Tatani yø mdeky tiiy.

Jøts ja yaa'dyøjk wya'kukøø tukwo'onji'igyi xjats jade'eñi yø'øbyijky. ¹¹ Jøts ja mayjaa'y t'ejxtøø ku ja Pablo jade'en tyiktsøjky, winets ja jaa'y yjanchwangaktøø jøts wyandøø:

—Tø namajtsk ja Dios xjanchnigidaajkyindi nayide'en ejxim adøø njaa'y'ajtyim!

Tum ja Licaonit ayuujk kyajpxtip.

¹² Xjats wyandaktøø ku Bernabé ja' Dios Júpiter, jøts ja Pablo Dios Mercurio, ja'agøjxp ku ja kya'amay. ¹³ Xjats ja teety midí jam tump Júpiter chaptøjkjotp kajp'am, ja'ats ojts tyiknijkxy ja tsakaá namajtsk janch xøxy janch pijyi má ja Pablo møøt ja Bernabé jam wyinaty; yjanchtawindsø'ogíwyandip ja tsakaá, tyamiyoxwandip ja tsakaá kitu'uk. ¹⁴ Ku tñija'widøø ja Jesús kyudanaabyi ja Bernabé ja Pablo jøts yjotmay'oo'kpøknidøø, jøts ja wyet tkøø'tstøø waani ja'agøjxp ku jade'en yikwindsø'ogídi ejxim ja Diosin, winets tyøjkidøø mayjaa'y aguikp jøts møk yide'en wyandøø:

¹⁵ —¡Migu'uktøjkti! ¿Tiku jade'en m'adø'øtsti? Pø nay jaa'yts øøts ejxim meedsin, yø' øø nmimipy jøts mee ndukmado'ot jøts xmajtstu'uttit yø'øbi tunk, ka' yø tyuñ. Pabøjkídi Dios yja' pøn juky'ajtp, pøn tuki'yíi tyik'øyiyi'ñ ja tsajp jits ja naajx jøts ja mejy, tuki'yíi midí ja naaxwiñ ejtp. ¹⁶ Kuwani Dios Teety yujy'aty ku ja naaxwiñ'ñit jaa'y ojts y'oy'adø'øtsti kya'oy'adø'øtsti. ¹⁷ Ejtp idø'øn ja Dios Teety ja ejxpajt tjayaky, jøts jade'en yiknijawit pøni pøn idø'øn ja' ku ja janch'øy. Ja'agøjxp idø'øn ja tuu tkejxy, jøts pyðisimy ja moojk ja xøjk midí adøm ndajuky'ajtyim, jøts ejtni xoni nnaajja'wandit.

¹⁸ Øy idø'øn ja mayjaa'y møk yjayikniimaadyi, ka' pøn tmadøø, kuwani tyimyk'ookwá'andi ja tsakaá jøts ja Pablo møøt ja Bernabé jade'en yiktawindsø'ogíwyá'andi ejxim ja Diosin.

¹⁹ Winets ja israelit jaa'y winaagín jam choo'ndøø Antioquia jøts Iconio, jøts jap yja'ttøø Lистра má ja Pablo møøt ja Bernabé wyinaty. Ja'ats idø'øn ja kajp jaa'y t'agajpxidøø, winets ja kajp jaa'y y'ambøjktøø, jøts ja Pablo yikxon tsaaagatstøø. Tyimwyandip idø'øn ja jaa'y jøts ku dø'øn ja wyinaty tø tyimyk'ookti, winets ja t'ukpawejtsnidøø, jøts ja kajp pa'am tyiknøjktøø. ²⁰ Winets ja jam ñamyujkidøø Pablo wyindump pøn tjanchja'widip ja Jesús, xjats ja Pablo pyidi'jky jøts wyimbijty jadigojk nay jam kajpjotp; winets kyimjabom choo'ndøø møøt ja Bernabé, jøts ñøjktøø má kajp txøøwi Derbe.

²¹ Winets jam ojts tkajpxwá'kxti sudso'ampy ja Jesús xyiknitso'ok'ajtindit, má ojts ñamayidi pøn ja Jesús yja' tmiðøjktip, jøts ja Pablo ja Bernabé wyimbejtøø má kajp txøøwi Lистра, Iconio jøts nayide'en Antioquia. ²² Ku ja Pablo møøt ja Bernabé jam yja'jty tu'uk tu'uk ja'abi kajp, winets tkajpxjot'amøjkidøø pøn jaty ja Jesús yjanchja'widip, jøts ku Jesús yja' tu'ugyi tpaduujnidit, nayide'en yikniimaadyøø kuwani ja ayo'on yikpaaty ku jap ndøkiwya'anit má Dios kyutujk, midí ja naaxwiñ'ñit jaa'y ja tyanitanaapy. ²³ Jøts ja Pablo møøt ja Bernabé nayide'en tpiktaktøø ja møjaa'dyøjk má jaty ja tsaptøjk wyinaty, jøts ku ja wyinaty tø Dios'ajot'atti tø y'ayuu'atti, winets ja Dios ja ttagøðøjkidøø jøts kyunuu'kxidit, pø tøxi ja wyinaty tjanchjawidi.

Ku ja Pablo møøt ja Bernabé yja'jty jadigojk Antioquia jam Siria etjotp

²⁴ Xjats ku ja ñajxtøø jam Pisidia etjotp, jøts ja yja'jttøø jam Panfilia etjotp. ²⁵ Ojts ja tkajpxwá'kxti ja Dios kyaajpxy jam Perge kajpkøjxp, jødsnám ja ñøjktøø jam Atalia. ²⁶ Jamts ja ttatøjkidøø barki jøts ja ñøjktøø Antioquia, jam kajpkøjxp má ja wyinaty tø yikugajpxaagídi tø yikunuu'kxaagídi, jøts Dios ja kyunuu'kxidit ku ja wyinaty jade'en ja tyunk tyiktso'onda'akti midí ixyam wyinaty tø tyik'abajtiñidi. ²⁷ Jøts kuts ja jam Antioquia kajpkøjxp yja'jttøø, winets ja jam tñankñamyujkidøø pøn jaty ja Jesús tjanchja'widip jøts ja ttamimadyakøjxtøø sá jaty Dios ja wyinaty tø yikjatyidi yikubetyidi ku ja kyunuu'kxyidi, jøts ja nayide'en ttamimadyaktøø sá Dios wyinaty tø yik'awajtsxyiyidi nøø' tuu' pøn ka'israelit jaa'dyi, jøts ja nayide'en ñitso'ok'attit ku ja tjanchjawidit ja nwindson'ajtim. ²⁸ Xjats ja Pablo jøts ja Bernabé jam jeky tyaa'nidøø, jeky tmøøtaa'nidøø ja jamit jaa'dyi pøn tjanchja'widip ja Jesús.

15

Ku Jerusalén ñamyujkidøø ja møjaa'dyøjk

¹ Nay ja'abi tiempí winaagín ja jaa'y choo'ndøø jam Judeit naxjotp jøts ñøjktøø má ja kajp txøøwi Antioquia, jam tta'awanibøjkidøø ja jaa'y pøn wyinaty ja Jesús tjanchja'widip, jøts tñimaadyi ku ja yaa'dyøjk kuwani yikmo'odit ja ejxpajt ñe'kxkøjxp sami Moisés jekyip tyikyø'øy ja y'ana'amín, winets ja jade'en yiknitso'ok'atidit ja Dios. ² Winets ja Pablo møøt ja Bernabé møk'ampy ojts møk' ñagvajpxyidi ja jaa'y, jøts ku ka' jade'en y'øyi yø'øbi winmaa'ñ. Winets ja Pablo ja Bernabé yikpiktaktøø møøt winaagín ja jaa'y jøts jam ñøjktit Jerusalén, jamts tjaak'atskajpx'øyidit ja'abi winmaa'ñ møøt ja'adi pøn jaty ja Jesús kyudanaabyi'ajtpy, jøts møøt ja møjaa'dyøjkti pøn jaty jam møjaa'y'ajtip tsaptøjkjotp.

³ Xjats kyajtssoo'nyidøø ja janchja'wibidi jam Antioquia, xjats choo'ndøø jøts jam ñaxti má ja et txøøwi Fenicia jøts Samaria. Jamts tñigajpxtøø tñimadyaktøø, jøts ku namay ja jaa'y wyinaty tø tmajtstutnidi ja møjaa'chinaa'yin pøn jaty ka'israelit jaa'dyi, jøts ttabøjktøø tu'ugyi ja Dios yja'. Xjats ja yjanchxondaktøø ja myigu'uktøjk ku ja jade'en tñija'widøø ja'abi ayuujk.

⁴ Kuts yja'ttøø ja Pablo møøt ja Bernabé jam Jerusalén, winets ojts kyajpxpøø'kxyidi ja mayjaa'y jøts ja Jesús kyudanaabyi møøt ja møjaa'dyøjkti. Xjats ja tñigajpxti tñimadyakti sa ojts ja Dios møk tyukpudøkyyidi pøn ka'israelit jaa'dyi. ⁵ Xjats winaaagin ja fariseit jaa'y pøn wyinaty ja Jesús yja' tpaduujnidip, wya'kukidøø jøts wyandøø:

—Kuwañi yø tpaduujnidit Moisés kyutujk pøn ka'israelit jaa'dyi øy yø Jesús yja' yjayik-paduñ, jøts kuwañi ejxpajt yikmo'odit ñe'kxkøjxp.

⁶ Winets jadigojk ñamyujkidøø ja Jesús kyudanaabyi jøts ja møjaa'dyøjkti sudso'ampy yikajpxwimbett yik'adsojimbett. ⁷ Tø wyinaty jeky tkajpx'øyi, jøts ja Pedro tyanaagyukyiyi'ñ jøts tñimaay:

—Meets migu'uktøjkti, mee mñija'wip jøts ku øts ja Dios jekyip xwiwích, jøts øts nduk-mado'tot ja jaa'y pøn ka'israelit jaa'dyi, sudso'ampy ja nwindson'ajtim xpojpkimaa'kxindit jøts ja tñibøktit. ⁸ Wa'ats ja Dios t'ixy sa jadu'uk jadu'uk nwinmaa'yindi, jøts yide'en'ampy yikñijawi ku Dios ja tø kyupikyidi ja'abi jaa'y, ku tø tyuktatøkiyidi ja y'Espíritu Santo nayide'en'ejxim adøm ojts xmo'øyim ja kunuu'kxin. ⁹ Ka'ap ja Dios pøn tšøky tksøky, tyunkupijky ja' wan tñoni, ka'ap ja t'ixy wan pøn t'israelitjaa'yí uk wan pøn tka'israelitjaa'yí, patyts ja nayide'en tø yikpojpkimaa'kxti pøn ka'israelit jaa'dyi ku ja tø tjanchjawi. ¹⁰ Migu'uktøjkti, ¿tiku xmimaydi xmidajti pøni sa ja Dios tø tpiakta'aky, jøts ja' xapaatti pøn ja Jesús tjanchja'widip? ¿Tiku kawinaak winmaa'ñ xaguwaanidi? Nika'ats adøm ja ka'pxy n'ukpaduu'na'andi, ni ja n'apteety'amøg adøm ja ka'pxy tø tka'ukpaduunidi. ¹¹ Pø ka'axi jade'en y'øyi, njanchja'wa'amp adøm ja' ku ja Jesús xyiknitso'ok'ajtyindi kyø'ømsøky, nayide'en sam ja' pøn ka' y'israelitjaa'yí.

¹² Xjats niduki'yí y'amongøxtøø, jøts tpatmadoodøø ku ja Pablo jøts ja Bernabé tñimadya'akti sa ja Dios møk pyudøjkiyidøø, ku ja myilagritundi jøts ja Dios y'ejxpajt tpadu-ujnidøø ja' y'etjotpti pøn ka'israelit jaa'dyi. ¹³ Ku ja Pablo jøts ja Bernabé kyajpx'abaajttøø, jøts ja myigu'uk midí Jacobo txøw'ajtmip, ja'ats waan:

—Meets migu'ukti, ukmadowdi waani: ¹⁴ Tø ja Simón Pedro tjanigajpxy sudso'ampy ja Dios tø tmø'øy ja may'ajt mynduk'ojk pøn ka' y'israelitjaa'yí, jøts ku ja Dios ja nayide'en t'u'nk'aty t'una'jk'aty ja'abi jaa'dyi. ¹⁵ Kuwañi ixyam jade'en yjaty kumi jade'en ja Dios kyugajpxy ojts tjaadyañ, ku ja Dios yide'en wyaañ:

¹⁶ Wimbejtkojmip øts jadigojk, jøts nbikta'akt nayide'en sam y'ijty ja David tjagyepy ja kutujk;

jøts øts nja' niduki'yí xpaduujnidit pøn ka'israelit jaa'dyi,

¹⁷ jøts niduki'yí ja naxwii'ñit jaa'dyi pøn jaty ø nja'ajtpy.

¹⁸ Jade'en id'øøn wyaañ ja nwindson'ajtim Dios, pøn tyukñija'wiyi'ñ yø'øbi winmaa'ñ jekyip.

¹⁹ Xjats ja Jacobo tjaaknøjmi ja jaa'y jøts wyaañ:

—Ka' nugo xmigajpxtit pøn ka'ap y'israelitjaa'yí, pøn ja Jesús yja' tu'ugyi tpadunwajnidip, pøn tø tñajstutnidi ja myøjaa'chinaa'yin. ²⁰ Øy'ajtp ja nøky ngajxindit, jøts ja'ayi ndukmadoo'indit jøts kidi ja tsu'utsti midí ja tsamaxan yiktawindsø'jkíp, jøts nayide'en ka'ap ja ñiyaal'y ñidø'øxy ñabyøjxidit, jøts nayide'en ka'ap ja jiyujk tsu'uch tsu'utstit midí ka' tyaxy, jøts midí yuktsumy'oo'kp, jøts nayide'en ka'ap ja ni'jpy tjøø'kxtit. ²¹ Wan yø'øyi, pø jaayimts ja Moisés kyutujk xyumiyikajpxwa'kxy, ti magajp ja kya'ukyiknigajpxy ma jaty ja tsaptøjk jam, ejtpts ja yiknigajpx'tiyi wimboo'kxin xøøw.

²² Winets ja Jesús kyudanaabyi møøt ja møjaa'dyøjkti jøts niduki'yí pøn jaty tjanchja'widip ja Jesús, jats ñawyiwetsidi namajtsk ja jaa'y pøn tmøødidøø ja Pablo jøts ja Bernabé jam Antioquia. Ja'abi jaa'y midí yikwindsø'jkiy'ejtpti, tu'uk txøøwi Judas Barsabas jøts jadu'uk txøøwi Silas, ²³ ja'ats tminøjktøø ja nøky jøts yide'en ja nøky wya'añ:

“Øøts id'øøn ja' pøn jaty ja Jesús kyudanaabyi'ajtpy, møøt ja møjaa'dyøjkti jøts niduki'yí ja nmøøtjanchja'wibidi, øøts id'øøn ja kajpxpoo'kxin nguejpxy, ngajpxpøø'kxpy øøts niduki'yí ja nmøøtjanchja'wibidi pøn ka' y'israelitjaa'yí, pøn jam tsinaadyip Antioquia, jøts jam Siria, jøts nayide'en Cilicia. ²⁴ Tø øøts mñijawi ku winaaagin ya'it jaa'y ojts ñøjxti ma meets jam, jøts ojts nugo myikwinmaamyal'adyidi, ku jade'en mñi'xxyidi jøts ku kuwañi ja mixyuna'jk yikmo'odit ja ejxa'an ñe'kxkøjxp, jøts ku kuwañi ja Moisés kyutujk xpaduujnidit. Migu'uktøjk, kidi øødsipts ja jade'en ngajpxmyøøpy. ²⁵ Paty øøts yikxon ngajpx'øyi, jøts øø nbikta'aky namajtsk ja kugajpxy midí mee m'ats'ejxyip, ja'ats myøødidip ja Pablo jøts ja Bernabé pøn øøts ndsøky'ajtpy, ²⁶ jøts pøn tø tyimñadyamiyoxiyi amumjoojt ja nwindson'ajtim Jesús. ²⁷ Ya'at øø nguejpxy midí txøøw'ajttip Judas jøts Silas, jøts møøt m'ukmadya'aktit jøts mdukmadowiyidit ya'at tuki'yí. ²⁸ Tø ja Espiritu Santo t'øyjawi, nayide'ents øøts, jøts ka'ap meets mayjøøjp ja winmaa'ñ nmø'øy, øy ku ya'at xpadu'undit:

²⁹ ka' xtsu'utstit midí ja tsamaxan tø yiktawindsø'øgi; jøts nayide'en ka'ap ja ni'jpy xjøø'kxtit, ka' xtsu'utstit nayide'en o ti jiyujk midí yiktsumy'oo'kp, nayide'en ka'ap ja

mniyaay' y mniðø'oxy mnabyøjkkxidit. Pøni mbadundip yø'øbi winmaa'ñ, tsuj mduu'baattit meets jade'en. Yø'øbi ana'amin øø nguejxpy, Dios mgunuu'kxidip."

³⁰ Xjats choo'ndøø ja kunøky jøts ñøjxktøø jam Antioquia. Winets ñamyujkidøø ja jaa'y pøn ja nøky yktanigaxtip jøts yikmøødyøø. ³¹ Ku ja tpa'ejxtøø, jøts yjanchxondaktøø ku jade'en ja winmaa'ñ yikmo'odi. ³² Kumi yjajttip wyinaty nayide'en ja Judas ja Silas sudso tkajpxwa'kxidit ja Dios kyajpxy. Xjats ttukja'gyukidøø, jøts ja janchja'wibidi yjanchxondaktøø ku ja jade'en kyajpxjot'amøjkiyidi. ³³ Ku jap waani y'uktaa'niðøø, winets ojts tja'ukminawya'kxyidi ja myigu'uk, ojts ja y'ukmø'øniyidi ja kajpxpoo'kxin jøts ja Dios kyunuu'kxidit, jøts nay jam wyimbejti ma jam choo'ndøø. ³⁴ Xjats ja Silas wyinmaay, winets ja jam tyaañ. ³⁵ Nayide'en ja Pablo jøts ja Bernabé jap tyaandøø Antioquia, namay ja myigu'uktøø møøt, yik'ixpøjktøø tkajpxwa'kxtøø ja Dios kyajpxy.

Ku ja Pablo myimajtsk ojk chøø'ñ kajpxwa'kxpi

³⁶ Tø wyinaty ja tiempi waani ñaxkojmi ku ja Pablo tnimaay ja Bernabé, jøts wyaañ:

—Wan tjaa'myim jadigojk jam magyajp ma jaty ja Dios kyajpxy tø nniwidijtyim, jamts nmigu'uktøjk n'ats'ejxint sa jam yjatti kyubatti.

³⁷ Xjats ja Bernabé twaawa'añ tu'uk ja jaa'y pøn txøow'ajt Juan Marcos; ³⁸ ka'ats ja Pablo ja twinjawi jøts ja' t møødit, kumi tø ja jam wyinaty t'ukyiktañ ma et txøøwi Panfilia, ka'ap ja wyinaty tyikyø'øy ja Jesús kyajpxy. ³⁹ Xjats ñagyajpxidi jeky ja Pablo møøt ja Bernabé, ka' ja wyinmaa'ñ y'uknabyajtniyidi jøts jade'eñi ñawya'kxinidyøø; winets ja Bernabé t møødiyi'ñ ja Marcos, jøts tyøjikidøø barkijøtpy jøts ñøjxkti ma et txøøwi Chipre, ⁴⁰ xjats ja Pablo ojts twaaji'iky ja Silas. Jøts ja janchja'wibidi ñimaajiyiøø: "Nøjx møøt ja Dios, Dios mgunuu'kxidip." ⁴¹ Xjats ja choo'ndøø, jøts ñajxtøø ma et txøøwi Siria jøts Cilicia. Jamts tkajpxjot'amøjkidøø ma jaty ja tsaptøjk jam wyinaty.

16

Ku ja Timoteo tjamyøøt'ajty ja Pablo møøt ja Silas

¹ Xjats jam yja'ttøø ma kajp txøøwi Derbe jøts Listra. Jamts tpaattøø tu'uk ja janchja'wibi, Timoteo ja xyøow. Ja tyaak, israelit jaa'y ja' jøts yjanchja'wip ja Jesús ja'; jøts ja tyeety, griegit jaa'y ja'. ² Ja mixy Timoteo janchtsøjkp ja janchja'wibidi pøn jap wyinaty tsinaadyip Listra jøts Iconio. ³ Xjats ja Pablo t møødiwya'añ ja Timoteo jøts pyudøkyit, jøts ja Pablo wyinmaay jøts ku kuwani jawyeeen yikmo'ot ja ejxpajt ñe'kxkøjpx, jøts kidi y'ejxma'adyidi ja israelit jaa'y ku jam yja'ttiti ja y'etjotpti, wa'ats ja wyinaty tnijawidi ku ja Timoteo tyeety ka' y'israelitjaa'y. ⁴ Xjats choo'ndøø ñajxtøø ma jaty wyinaty ja kajp jam. Jamts tnigajpxti tnimadya'akti ja janchja'wibidi, jøts t'uktukmadoodøø ti jaty wyinaty tø tkajpx'øyiidi ja Jesús kyudanaabyi møøt ja møjaa'dyøjkti jam Jerusalén, jøts sudso'ampy ja jaa'y øy tsuj yjaa'y'attit pøn ka' y'israelitjaa'yidi. ⁵ Xjats tu'ugyi ja wyinmaa'ñ tpiktaknidøø amumjoojt ja janchja'wibidi, mayi'adøstip ja jabom jabom.

Ku ja Pablo ojts t'ixy agumaa'yjøtpy tu'uk ja Macedoniit jaa'y

⁶ Xjats ja Pablo møøt ja Silas jøts ja Timoteo choo'ngøjmidøø, jøts kumi ka'ap ja Espiritu Santo ojts tyikutuky jøts jam ñøjxkti kajpxwa'kxpi ma et jam txøøwi Asia, winets jam ñajxtøø ma et txøøwi Frigia jøts Galacia, ⁷ jøts jam yja'ttøø tsawa'an'am ma et jadu'uk txøøwi Misia, jam wyinaty yjatøkiwya'andi ma et jadu'uk txøøwi Bitinia, nika' ja Espiritu wyaañ jøts jam tyøkidit. ⁸ Winets ttayø'øñaxti yøñ'ampy ja Misia y'et ñajax, jøts jam kyidaktøø jam mejy'am ma tu'uk ja kajp txøøwi Troas. ⁹ Jamts ja Pablo koots twingumaay tu'uk ja Macedoniit jaa'y, windanaajyp tam ja jaa'y jøts yjanchminuu'kxa'agiyi, jøts ñi'mxiyi: "Tun ja may'ajt, naç jam ma ja Macedonia et, pudøjkik øøts." ¹⁰ Xjats ku ja Pablo jade'en kyumaay, winets øø nnay'a'ejxiyøø jøts øø ndsøø'ñ. Øts idø'øn Lucas pøn ja'at nøky tjaapy, øts idø'øn ja nayide'en nmøøtsøø'n, jøts øøts ojts nniykxy jam Macedoniit etjotp. Nja'gyujkip øøts wyinaty ku øøts ja Dios xwaadøø, jøts øøts jam nøjx ngajpxwa'kxy ja øgyajpxy ja ømyadya'aky mididi xyiknitso'ok'ajtindip.

Sa yjajttøø sa kyubajttøø ja Pablo møøt ja Silas jam Filipos

¹¹ Winets øø ndøjkiyi'ñ barkijøtpy, jøts øø tiy nniykxy jam mejy agujkp ma ja naajx lii'nim txøøwi Samotracia, jøts kyimjabomnim øøts ja mejy ndanajxy jøts øøts jam nja'jty Neápolis. ¹² Jam øø ndsøø'ñ tekyjøøm, jøts øø nniykxy ma kajp txøøwi jadu'uk Filipos, ja' mididi ja romanit jaa'y kø'øm pyiktaktøø. Møj kajp idø'øn ja', nima ja kajp jam jade'en wingon kyamøji. Jam øøts kawinaak xøøw n'uktaa'niyi'ñ. ¹³ Jamts øø ngajpidsømnaa poo'kxin xøøw et, jøts øøts jam nniykxy møj nøø windump ma ja jaa'y kuwani ejtp ñøjxkti Dios'ajot'ajtpi. Jamts øø n'ixaajky, xjats øø ndukmadøøy ja Jesús kyajpxy ja tø'øxyøjkti pøn jam wyinaty tø ñamyukyidi. ¹⁴ Jamts ja tø'øxyøjk pøn txøøw'ajtp Lidia, pøn tsoo'mp jam Tiatura kajpøtp; wetoø'kk ja tyunk'ajtpy, tum ja øybi tsuu'nk wet idø'øn ja tyøø'kpy. Ja'ats idø'øn ja Dios

tjanch'ajot'ajtp, jøts nwindson'ajtim ja yikwinmaa'nbyaaajtiyøø jøts tjanchjawit sa jaty ja Pablo wyaañ. ¹⁵ Xjats ojts ñobety møøt ja myigu'uk, winets øø xminuu'kxaaajky jøts wyaañ: —Tundi may'ajt jaa'mindip øts ndøjkjøtpy, jap m'atsja'ada'aktit pøni mjanchwamp meets jøts ku øts nwindson'ajtim kyajpxy tø njanchpaduujniyi.

Xjats øø kuwani xyiktaañ.

¹⁶ Winets yide'en yjajty ku øø wyinaty nniikxy ma jaa'y jam Dios'ajot'atti, xjats øø nminabyajtiyi tu'uk ja kiixy midy wyinaty ximaapy, ja miku' wyinaty myøøt'ijtpy, ane'emy idø'on ja y'ity. Ku ja jade'en myiximay janchnimeenbyøjkijip ja wyindsøn ja' pøn ja y'ijty ana'amiyip. ¹⁷ Ja'abi kiixy øø xpawidejtøjkifaa, xjats ojts møk yjanchwa'añ jam mayjaa'y agujkp:

—Ya'atpi jaa'y møk tjanchmidundip ja Dios midy jap tsajpjøtpy, yø' tkajpxwa'kxtip ja Dios kyajpxy sa ja xyiknitso'ok'ajtindit.

¹⁸ Ku jade'en pyawidejtiyidøø kawinaak xøøw, xjats ja Pablo møk y'adsipyiyi jøts t'eiximbijty, jøts tnimaay ja miku' midy ja kiixy wyinaty myøøt'ajtpy:

—Jesús myøk'ajtingøjpx mets miku' majtstu'ut yø kiixy. ¡Pidsøm!

Xjats ja miku' tmajtstuujty nay jaty.

¹⁹ Ku ja kiixy ja wyindsøn tja'ejxnidi ku tø ja wyinmaa'n tyigatsni, ku ka'ap ja kiixy y'ukmeenbyøjkni, winets ja Pablo jøts ja Silas yikmatstøø, jøts yiknøjkxidøø kudunk wyindump jam møj maajyotp. ²⁰ Ku jam yikja'jtidøø tiidyumbi wyindump jøts ja tnimaadyøø:

—Ya'at jaa'dyi, israelit jaa'y yø'odi, møk øøts xjanch'adsipy ya kajpjøøjty, ²¹ ku ja kyø'ømdsinaa'yin øøts kuwani xukpadunwa'añ midy øø ka' njanchjagupøkwa'añ, jøts ja'abi tsinaa'yin ka'ap øøts ja nnijawi. Abiky øøts, romanit jaa'y øøts.

²² Xjats ja mayjaa'y yjanchpidø'køjxtøø, jøts ja tiidyumbidøjk t'ana'amdi ja jaa'y jøts wan tyiknijandi tyik'ixjandi, jøts wan ja nawyopi t'ukupøkti namajtsk ja Pablo møøt ja Silas.

²³ Xjats ku yikwoj'abaajtidøø, winets ja tyiknøjkxtøø puxøjkjøtp, jøts ja t'ana'amdi ja puxøjk adsinaabyi jøts tnimaadyi jøts waani tyimjaty'ejx'etit. ²⁴ Ku ja puxøjk adsinaabyi jade'en ojts yik'ane'emy, winets tyik'øjkijiyi'ñ jøts kawinaak puxøjk'aaw ojts tyiknaxy, jødsnim ojts yikni'agiibyatti jam okp. Ku jade'en jam yikpiktaktøø, winets ojts ja kipy yiktanaxkø'odi ja tekyu kadeni møøt.

²⁵ Xjats ja Dios'ajot'ajttøø jøts t'øødøø ja Dios kyajpxy jap puxøjkjøtpy, møk ja Dios ja tja'myajtstøø. Tsuu'miwyamp wyinaty ku ja Dios jade'en t'ajot'ajttøø, jøts ku ja myibuxøjk jaa'y ja nugo pyatmadøyidi. ²⁶ Xjats ku chuu'miyii'ñ, winets ja uyx møk yjanchmiin, winets ja puxøjk møk yjantyimy'adiijch. Jøts ja puxøjk'aaw tuki'iyi y'axetutkøjxnaa, jøts ja puxøjk jaa'y pyaktsum nayide'en wyinakøjxtøø. ²⁷ Xjats ja puxøjk adsinaabyi ojts ñiwijy, jøts ja t'eixpaajty ja pyuxøjk'aaw jøts kudam ja wyinaty tø y'awatskøxni, xjats ja jade'en wyinmay tø ja puxøjk jaa'y tijy pyidsømgøxnidi, winets ja yønchujx ja tju'jty jøts ja kø'øm ñanky'ookwa'añiyi. ²⁸ Xjats ja Pablo ojts t'eixpaaty ja puxøjk ejx'ejtpi ku ja wyinaty jade'en ñadyunwa'añiyi, xjats tnimaay:

—Kidi jade'en mnaadyuñiyi, ka'ap øø ngue'eky, tum ixyp øøts niduki'iyi.

²⁹ Xjats ja puxøjk ejx'ejtpi t'amidøøy ja jaj jøts ja ojts pujt tyøki jap puxøjkjøtpy. Xjats ja yjanchmibejpn jøts ja ojts ñagyuxendya'agyí jam Pablo tyekyø'øm jøts ja Silas. ³⁰ Xjats ja tyikpidsiimy jøts tyiktiiy, yide'en ja tnimaay:

—Migu'ukti, çti ø ndu'lump, sudso'ampy ø nnitso'ok'att?

³¹ Xjats ja Pablo møøt ja Silas ojts t'adsojimbetti, xjats tnimaadyøø:

—Møjawi amumjoojt ja nwindson'ajtim Jesucristo, jøts myiknitso'ok'atijidit niduki'iyi møøt ja m'u'nk møøt ja mnidø'øxy.

³² Xjats ja Pablo jøts ja Silas ttukmadoodøø ja Dios kyajpxy ja puxøjk adsinaabyi møøt niduki'iyi pøn jaty ja jam wyinaty tyøjkjøtp myøøtsinaapy. ³³ Nay jatyits ja puxøjk adsinaabyi tyikwajtsøø ja Pablo jøts ja Silas chaachi, winets ñøjkxtøø nøbajtpi niduki'iyi møøt ja y'u'nk jøts ja ñidø'øxy. ³⁴ Winets ja puxøjk adsinaabyi twaay kaabyi jap tyøjkjøtpy, janch øy janch tsuj wyinaty ñayja'wiñidi niduki'iyi møøt ja y'u'nk ja ñidø'øxy, kumi tø ja wyinaty ja Dios tjanchjawidi.

³⁵ Xjats kymjabom'ajty, winets ja tiidyumbidi ttaniguejxy ja kyugajpxy ja puxøjk adsinaabyi, jøts ku ja' tyikutuky jøts tyik'awa'atpidsømmit ja Pablo jøts ja Silas. ³⁶ Xjats ja puxøjk ejx'ejtpi tnimaay ja Pablo:

—Tø n'atsyik'ane'emy, ja tiidyumbidøjk kø'øm ja kyajpxy tkajxtip jødsik meets jadi'iñi nyikpidsømmit; nøjkxnidits jotkujk, tø mee m'awa'atpidsømni.

³⁷ Xjats ja Pablo ka' tkupiky, winets tnimaay ja kugajpxy:

—Nayi romanit jaa'y øøts, tiku øøts jade'en nyiktuñ jøts ku øøts jade'en mayjaa'y agujkp nyikwøpy, nika'ap øø nyiktiidyuñ jøts jaty: øø nugo nyikpikta'aky puxøjkjøtpy; çsudso'ampy

øøts ndejint ayu'uch jadi'iñi nyikmajtstu'utwani? ¡Ka' y'øyi! Wan ja køøm tmendi ja tiidyumbidi jøts øøts xykipidsøømt.

³⁸ Jøts ja kugajpxy wyimbejtñidøø, jøts ttukmadoodøø ja tiidyumbi sa ja Pablo ja kajpxy t'adsojimbijty, winets ja tiidyumbi yjanchnø'økiñidi ku tnija'widøø jøts kudam ja Pablo jøts ja Silas nayide'en romanit jaa'yidi. ³⁹ Winets ja kudunktøjk tninøjkxtøø t'atsmínuukxaktøø ja Pablo møøt ja Silas. Xjats tykipidsømdøø jap puxøjkjøøjtty, jøts møk tnimaadyøø:

—Tun may'ajtpidsømdi ya waani kajpjøøjtty.

⁴⁰ Xjats ja pyidsømdøø puxøjkjøøjtty, jøts ñøjkxti ma ja Lidia tyøjk, jamts ja tminabyajtidøø ja myøøtjanchja'wibidi, kuts ja tkajpxjot'amøjkidøø, winets ja choo'nidøø.

17

Ku ja Tesalonikit jaa'y yjanchn'ambøjktøø

¹ Xjats ku jam choo'ndøø, jøts ñaxtøø ma kajp txøøwi Anfipolis jøts nayide'en Apolonia, majtsk ja kajp ttanaxtøø jøts jam yja'ttøø møj kajpjotp midt txøøw'ajtp Tesalónica, jam wyinaty ja tsaptøjk. ² Winets ja Pablo tyøjkidøø kajpxwa'lxpi jam tsaptøjkjotp, sayim ja ttuñ øy madsoo ma jaty ja wyidity, tigøøk samani jam tyik'ixpijky ja jaa'y wimboø'lxin xøøw. ³ Yide'en ja ojts ttuk'ixpiky pøni sa ja Dios Teety kyajpxy ojts yikjaadyañ, jøts kuwani mye'ent ja yiknitsokpi, jøts kuwani y'ayo'ombaatt jøts y'oo'kimbaatt, jøts kuwani yjujkyøkt jadigojk. Yide'en idøøn ja wya'añ:

—Jade'en ja Jesús yjajty midt mee ndukmadøøpy, nay ja' ja Dios Teety kyejpxy yiknitsokpi.

⁴ Ku ja Pablo ja ixpøjkin jam jade'en t'ukyiktandøø, winets ja israelit jaa'y winaagin tmibøjktøø, jøts ja møøt ñabyøjkniyidøø ja Pablo jøts ja Silas, jøts nayide'en namay ja griegit jaa'y pøn ja Dios Teety twindsø'jkidip. Nayide'en namay ja griegit tø'øxyøjk tmibøjkti pøn jam windsø'øgi'ejttip. ⁵ Winets ja israelit jaa'y niduki'iyi y'ambøjktøø pøn jaty ja Pablo kyajpxy y'ayuujk tkagupøjkxidip, ja'ats twaamuktøø ja ka'øbyi jaa'y pøn jap nugo widejttip kajpjøøjtty. Xjats nugo wyidejtnibøjkidøø jøts ja jaa'y tu'uk tu'uk tyik'ambøjktøø. Winets yja'ttøø tu'uk ja jaa'y tyøjkjøøjtty pøn txøøw'ajtp Jasón, xjats awa'an'ampy tyøjkidøø tøjkyotpy tajpi kaa'pi. Ja Pablo jøts ja Silas ja' idøøn jade'en yik'ixaadyip jøts tyikpidsømw'a'andi jøts ja tyiknøjkxtit mayjaa'y agujkp. ⁶ Kumi ka'ap ja tpaatti jap tøjkyotpy, winets ja tmatstøø ja kudøjk møøt ja myøøtjanchja'wibidi, xjats tpawetstøø tpakoo'tstøø, kudunk wyindump tyiknøjkxtøø, xjats ja Pablo jøts ja Silas yikxiguyaxtøø, jøts jade'en wyandøø:

—Ja'abi jaa'y pøn widejttip jøts tuki'iyi ja naqxwii'ñit jaa'y tyikwinmaa'nmyatkøxti, tønim ja ya nayide'en yja'tmidi, ⁷ jøts ya'at Jasón ja tø tyikja'ada'aky tyøjkjøøjtty. Yø'øbyi jaa'y tuki'iyi y'ixwetswangøxtip ja møj windsøn César kyutuujk midt adøm ngajp xnitanaajyamp. Jade'enxi wya'añdi ku ja ja møj windsøn jadu'uk pøn txøøw'ajtp Jesús.

⁸ Ku ja tmadoodøø ja jaa'y møøt ja kudunktøjk, winets niduki'iyi yjanchn'ambøjktøø. ⁹ Xjats ja Jasón kuwani tmøøy ja meeñ ja kudunk jøts ja yikmajtstu'uttit; jøts yiknimaadyøø ku kuwani tymbyidsø'ømdit ja Pablo møøt ja Silas jam kajpjotp jawyeen, jaanimts ja myeeñ ja jadigojk wyimbett. Winets jade'en yikmajtstuttøø møøt ja myigu'uk.

Sa yjajttøø sa kyubajttøø ja Pablo møøt ja Silas jam Berea

¹⁰ Xjats nay jaty; koots ja Pablo møøt ja Silas ja myøøtjanchja'wibi kyajxtsoo'nidøø jøts jam ñøjkxti ma kajp txøøwi Berea. Ku jam yja'ttøø winets nay jaty; ñøjkxti jam tsaptøjkjotp.

¹¹ Yujyts ja ne'egi yjaa'y'atti ja'abi israelit jaa'dyi, ka'ap ja tymyjadene'idi sam ja'adi pøn jam tsinaadyip Tesalónica. Chøjkjtp ja øy wine'en tmado'odit ja Jesús y'øgyajpxy y'ømyadya'aky, jøts ja ejtp winjabom txumi'ejxti ja nøky ma ja Dios kyajpxy jap yja'ayi, pøni tiy janch idøøn ja' sa ja Pablo ja ñi'mxyidi. ¹² Xjats ja namay tjaa'gyukidøø jøts tmibøjktøø, jøts nayide'en namay ja griegit jaa'y tpaabøjktøø pøn ana'amdip, ja yaa'y ja tø'øxy. ¹³ Xjats ku ja israelit jaa'y pøn jam tsinaadyip Tesalónica tnija'widøø ku wyinaty ja Pablo tkajpxwa'lxky nayide'en ja Dios kyajpxy jam Berea, winets ñøjkxti ja israelit jaa'y jam Berea, jøts jamts jaa'y nugo tyikjot'ambøjktøø. ¹⁴ Jøts ja Pablo ja janchja'wibidi jaty; kyajxtsoo'niyøø jøts ja ñijky jam mejy'am, xjats ja myigu'uk japy; t'ukyiktaanaa midt txøøw'ajttip Silas jøts Timoteo. ¹⁵ Xjats ja Pablo yikjamyøø'ajty jøts tmøødidøø jagambaatt ma kajp txøøwi Atenas. Xjats ja Pablo tkajxjimbity ja ayuujk jøts ñøjkxtit ja Silas møøt ja Timoteo pojy;iky, jøts ja jam tminabyaaidit ma ja wyinaty.

Sa yjajty sa kyubejty ja Pablo jam Atenas

¹⁶ Exam idøøn ja Pablo wyinaty t'awixy ja Timoteo jøts ja Silas, jøts ja ka'ap yjanchnjotkuki ku jap kajpjøøjtty t'ixy janchmay ja awanax ja tsamaxan midt'ibi ja dios'ajttip. ¹⁷ Kumi ka' yjotkuki, winets jam ñijky tsaptøjkjotp, jamts møøt kyajpxy myadyaajky ja israelit jaa'y, jøts ja' møøt pøn jaty Dios Teety t'ajot'ajttip, jøts nayide'en jabom jabom ja ñijky maajyøtpty, japts nayide'en møøt kyajpxy myadyaajky pøni pøn jaty jap pyajtpy. ¹⁸ Jamts wyinaty ja ixpiky jaa'dyi winaagin midt y'ixpøjktip ja epicureo y'ixpøjkin, jøts jam nayide'en jadu'uk

midi y'ixpøjkmidip ja estoico y'ixpøjkin, ja'ats ojts tpatmadowdi ja Pablo ku ja tkajpxwa'kxy pøni pøn idø'øn ja Jesús'ajtp, jøts ku kuwani ja naxwii'ñit jaa'y wyimbettit jadigojk pøn jaty tø y'øøky. Winets ja ixpiky jaa'y winaagin yide'en nawyajnidøø jøts wyandøø:

—¿Ti dø'øn yø chaachnigajpxy yø yaa'dyøjk, yikmibøjpk idø'øn yø tijy ku jadino'øn yjanchkajpxy?

Jøts jadu'uk t'adsojmbity:

—Wa' yø yjawi kyajpxyø'øpy ja wenkpi dios y'ayuujk.

¹⁹ Xjats ja Pablo yikwetsøø'ñ, jøts jam yiknøjxøø ma ja tjagyapti junti tundaajk. Ja' ja et xyøøw Areópago, jamts tyiktøødøø jøts tñimaadyøø:

—Ja' øøts nñijawiyampy yø wenk ixpøjkin midi mmimimpy. ²⁰ Wenkts yjawi xkajpxy, nñijawiyampy øøts ti jade'en teijjy ku jade'en mwa'añ.

²¹ Paty ja Pablo yik'amidøø jade'en, kumi jade'en tuki'iyi ja Atenas jaa'y yjujky'atti, jøts nayide'en pøn jaty jam ja'atjaa'y'ajttip, ja' nugo ejtp chøky'ajttip jøts ñanktyuknigajpxidit sa ja kø'øm wyinmaydi, winets ja jemy ixpøjkin tpaatti jade'en.

²² Winets ja Pablo wya'kukiyi'ñ jam mayjaa'y agujk ma jam yjuntitundi, jøts ja wya'añ: —Meets Atenas jaa'y ukmadowdi, wa'ats øts n'ixy ku meets xjanchwindsø'øgi ja mdiosti midi mdiost'ajttip. ²³ Kuts øts jam wyinaty n'et'ixy ma meets mdiost'windsø'øgi, jamts ø ndayø'øbyejty tu'uk ja altajr midi jap wyinaty ja letri tmøøt'ajtp midi yide'en wamp: “Ja Dios ya'at y'altajr midi kayikni'wip.” Øy'ajtp, ja'abi dios midi mee mwindsø'jkip jøts ka' xñijawidi pøni pøn ja', ja'ats meets idø'øn yam ndukmadøøpy pøni pøn ja'.

²⁴ Ja'abi Dios tø tyik'øyi tuki'iyi tuktsajp'agida'aky, jøts nay ja' tuki'iyi tñiwindsøn'ajtkøjpx wa'n tšajp' wa'n tñajxi. Jøts ka'ap ja Dios kuwani tu'ugyi chøøni tsaptøjkjøtpy midi jaa'y yik'ø'yip, ²⁵ jøts ka' Dios ti tyigø'y'ajtxi midi'ibi ja naxwii'ñit jaa'y ja mo'owajniyip, pø ja'axi tuki'iyi xmøø'yindip ja nmøk'ajtin, jøts pøni ti jaty ndajujky'ajtyindip.

²⁶ Tu'uk ja Dios Teety tpiktaajky adøm n'apteety'amøj midi niduki'iyi ja naxwii'ñit jaa'y y'apteety'amøj'ajttip. Tø ja ttanibiktaagi nayide'en juuni ja kya'axtit, nayide'en ja chinaadyaajk tmø'ot ma jaty ja chøønidit. ²⁷ Ja'agøjpx ja Dios tuuñ jøts ja adøm nwinmaa'nmyee'nindit pøni pøn ja'. Øy udy'a'aky nbaajtindit, ka' yjagami Dios, wingon ja møøt n'ijtyindi. ²⁸ Pø Diosxi xyikujky'ajtindip ku nñajxindi ndøjkindi; pø nayide'enxi meets mmigu'uk wya'añ winaagin pøn wijtyi, ku yide'en wya'andi ku ja Dios x'u'nk'ajtyindi.

²⁹ Pøni janch jade'ents jaa ku ja Dios Teety ttanibiktaagi ti xøøw ti et ja nøjx ttiiduyuñ ja naxwii'ñit jaa'y; jøts tø ja tpikta'aky ja ejxa'an ku ja ojts tyikujkpyiky jadigojk ja nwindson'ajtim Jesús, jøts ja naxwii'ñit jaa'y jade'en ttuknijawi jøts ku dø'øn ja yja'aji pøn idø'øn me'emp.

³² Xjats ku ja Pablo jade'en ja ayuujk tyiknajxy ku jaa'y yjujkyiky jadigojk oo'kpi jutjøtpy, winets ja Atenas jaa'y winaagin yjanchtaxeknibøjkidøø, jøts jadu'uk winaagin ñømdøø:

—Wan jade'eñi, ja wyinaty jadu'ukpi xøøw xjaaknigajpxy.

³³ Xjats ja Pablo jade'eñi tñajsttuujty. ³⁴ Jamts ja jaa'y wyinaty winaagin pøn tja'gyukidøø ja ayuujk, jøts ojts tpaduujnidi ja Jesús yja'. Ja'abi jaa'y nidu'ugin txøøw'ajt Dionisio pøn jam windsøn'ajtp ma ja junti tundaajk txøøw'aty Areópago. Jøts jam nayide'en tu'uk txøøw'aty ja tø'øxyøjk Dámaris, jøts jam ja niwinaagin ja myigu'uk.

18

Sa yjajty sa kyubejty ja Pablo jam Corinto

¹ Xjats ja Pablo chøø'ñ jam Atenas jøts ñijky ma kajp txøøwi Corinto. ² Jamts tu'uk tminabyajtøø ja israelit jaa'y pøn txøøw'ajtp Aquila midi jam kugajp'ajtp ma et txøøwi Ponto. Ja'ats wyinaty namdso'ondipnim jam Italia møøt ja ñidø'øxy pøn txøøw'ajtp Priscila, jøts ñamja'atinim Corinto. Claudio dø'øn ja wyinaty jade'en tø tyuñidi pøn ja italit jaa'y wyindsøn'ajttip, ja'ats tyikutuky jøts yikajxpidøømgøjxnidøø niduki'iyi ja israelit jaa'y pøn jaty jam wyinaty tsinaadyip Roma. Xjats ja Pablo ojts t'atsmigajpxy ja Aquila jøts ja Priscila, ³ jøts ja jam tmøøtaañ tmøøtsinaay, ojts tmøøtuñ kumi nay ja'abi tunk ja tyunk'ajtpy ja wetøjkxuuky. ⁴ Jøts ja Pablo wimboø'kxin xøøw ñijky tsaptøjkjøtp ma ja jam tñigajpxy tñimadya'aky ja Jesús yja', jøts jade'en ttukmibiky øy pøn jaa'y, wan ja t'israelitjaa'yidi tka'israelitjaa'yidi.

⁵ Xjats ku ja Silas jøts ja Timoteo ñamdsøndøø jap Macedonia, jøts ñamja'tti Corinto ma Pablo jam wyinaty, winets ja Pablo tu'ugyi tpadøjkijyi'ñ ja kajpxwa'kxin, jøts ka'pxy ttukmadøø ja israelit jaa'y jøts ku ja Jesús yiknitsokpi'aty pøn ja yjajøp'ejx'ejttip. ⁶ Ku ja Pablo jade'en wya'añ, winets yikmi'ambiky jøts ja ojts yikmidsepiky, ojts yiktsepajpxy.

Winets ja Pablo ja wyet twixijty, ja ejxa'an jade'en tmø'øy jøts ku jade'en jaayibaat tmatjstu'utt, winets wyaañ:

—Mgø'ombøky meets wyinaty ku m'anmija'win wyindigø'odyit; øts ka' mee n'uktunk'ajtni. Ejxti sa x'ejxti, ixyam øts jam ne'egi nnøjkxt kajpxwa'kxpi ma pøn kya'israelitjaa'yidi. Tø net jaabaat nmatjstu'utti.

⁷ Winets jam chøø'n tsaptøjkjotp, jøts ñijky kajpxwa'kxpi ma tu'uk ja jaa'y chøøni pøn txøøw'ajtp Justo, pøn jam tsinaapy tsaptøjk pa'am. Yjanch'ajot'ajtp ja Dios ja nayide'en. ⁸ Jøts ja Pablo jade'en kyajpxwa'kxy Justo tyøjkjotp, winets ja jaa'y tu'uk tmibøjktøø ja Dios kyajpxy møøt ja y'u'nk ja ñidø'oxy, pøn ja tsaptøjk niwindsøn'ajtp, ja' xyøøw Crispo. Xjats nayide'en namay ja Corintit jaa'y tmibøjktøø ja Dios kyajpxy, winets ñøbajtkøxti. ⁹ Xjats ja Pablo tu'ukpi koots ja nwindsøn'ajtm ñimaajyøø, jøts ja jade'en tja'wiyi'ñ kidi jaa'y kyuma'ay ku ja ñi'mxyi:

—Kidi mdsø'øgi; jaakajpxwa'kx, kidi m'amøñ. ¹⁰ Ka'ap pøn sa mduñi, ixya me møø n'ity. Ja øts ja jaa'y ya may kajpjøøjty njagyepy pøn øts n'ayuujk xmibøjkwajniyp.

¹¹ Winets ja Pablo jam tyaañ Corinto tukjumøjt jagujkp, jøts ja jaa'y tuk'ixpiky ja Dios kyajpxy.

¹² Xjats tu'ukpi xøøw yjajty ku ja Galiön wyinaty myøjwindsøn'aty jam Acaya, winets ja israelit jaa'y tmi'ambøjkti ja Pablo, jøts tyiknøjkxti ma ja kutujktaajk jam, ¹³ jøts ttukmadoo-døø ja møj windsøn yide'en:

—Ya'at jaa'y ttukmibøjkp ja jaa'y jøts ku ja jade'en t'ajot'attit ja Dios sam ka' ty-imy'ukpaat'ajtniyi. Ka'ats adøm ngutujk jade'en t'ukupøjki.

¹⁴ Xjats ku ja Pablo wyinaty tyimgyajpxwa'añ, winets ja Galiön tñimaay ja israelit jaa'y:

—Ku jeexyyp ja kajaa winmaa'iñ, uk ja møk ayo'on jee tø tyuñi, øts ja jeexyyp nyikwingukip meets israelit jaa'y; ¹⁵ kumi ka'ats yjade'eni, jabi nugo ayuujkxi yø' jøts mgø'ømgutujk meets yø', ka'ap øts yø x'ukpaat'ajtni, yikwingukidi yø pøni sa xyikwingukidi. Ka'ap øts yø'øbi ndiidyunwa'añ.

¹⁶ Xjats ja israelit jaa'y yikajxpidsømgøjxtøø ja' kutujktaajkjtøpy. ¹⁷ Winets ja griegit jaa'y tmatjstøø ja Söstenes, pøn windsøn'ajtp jam tsaptøjkjotp, jøts jamyi tñaxmiwojpidøø jam yikutujkpi tøj'agø'øm, jøts ja møj windsøn Galiön ka' tyimdyunk'aty niwinø'ønin.

Ku ja Pablo jadigojk yja'jty jam Antioquia, winets ja myidigøøk ojk chøø'n kajpxwa'kxpi

¹⁸ Xjats ja Pablo yjaaktaa'niyi'ñ jeky. Winets ja myigu'uk tjaak'ukajpxpoo'kxkøjxnaa niduki'iyi ku ñjøkxwa'andi barkijotp jam Siria, møøt ja myigu'uk Aquila jøts ja Priscila. Xjats yja'ttøø tekyjø'øm jam mejy'am ma txøøwi Cencrea, winets ja Pablo kø'øm ñabyiktaajkxiyi ja ejxa'an, jøts ja wyaay tke'jpy ku wyinaty tø tuki'iyi tpaduñ midy wyanda'aky'ajtpy. Winets barkijøtpy tyøkinidøø. ¹⁹ Jøts yja'ttøø ma kajp jam txøøwi Efeso, jamts ja Pablo ja myigu'uk t'ukyiktaañ jøts jam ñijky tsaptøjkjotp ma ja ojts tminagyajpxyi ja israelit jaa'y pøn jam namyujkidip. ²⁰ Winets ja Pablo øy yjayikminuu'kxaajky jøts jap waani tyaañit, ka'ats ja tkupijky. ²¹ Xjats ja møøt y'uknagyajpxpoo'kxiniyøø, xjats tñimaay:

—Ja'agø'jpx øts yam ñnijky ku øts jam Jerusalén nyiknaxwa'añ ja xøøw midy wingomp; kuwani øts jadigojk nme'ent jøts mee n'ats'ext ku Dios wya'ant.

Xjats jadigojk tyøjkiiyi'ñ barkijøtpy, jøts chøø'n jam Efeso. ²² Xjats ku ja yja'jty ma kajp txøøwi Cesarea, winets jam choo'ngojmæg tekyjø'øm jøts ja ñijky Jerusalén, jam ja t'atskajpxpøø'kxy ja myøøtjanchja'wibi, winets yjøptaajky ma kajp txøøwi Antioquia. ²³ Jamts ojts kawinaak xøøwin tyaañni Antioquia, winets chøø'n jadigojk jøts t'ayø'øgyixy jadigojk ma wyinaty tø wyidity ma et txøøwi Galacia jøts Frigia, jøts ja myøøtjanchja'wibi tkajpxjot'amøki.

Ku ja Apolos ojts kyajpxwa'kxy jam Efeso

²⁴ Winet'lets ojts nay ja'abi tiempi yja'aty jam Efeso tu'uk ja israelit jaa'y pøn txøøw'ajtp Apolos, jøts pøn kugajp'ajtp Alejandría. Ja'abi jaa'y janch tsuj janch øy ja kyajpxwa'kxy, janch ñija'wip idø'øn wa'ats ja Dios kyajpxy. ²⁵ Tø ja wyinaty t'ixpiky ja Dios kyajpxy ma wya'añ jøts ku ja nwindsøn'ajtm tsøj myeenwa'añ ya ñaxwiñ. Ja'ayi ixpøjkin ja ñigajpxpy sa Juan Bautista ojts yik'ixpiky, jøts tigø'jpx ku jaa'y ja tyiknøbejty. ²⁶ Xjats ja Apolos møk kyajpxøjkiiyi'ñ jam tsaptøjkjotp; kuts ja Priscila jøts ja Aquila ja jade'en tmadowdi, winets ja abiky tjiwaagwøø, jøts ojts ka'pxy ttukmadowdi ku ja Jesus tø wyinaty y'atsmeni, jøts ti jaty ja ojts ttuñ. ²⁷ Xjats ku ja Apolos jam wyinaty ñaxwa'añ ma et txøøwi Acaya, winets ja janchja'wibi pøn jam Efeso ja nøky tyik'øydøø, jøts ja janchja'wibi tkajpxñigajxidøø pøn jam Acaya, jøts øy tsuj jam tyikja'attit ja Apolos. Kuts ja jam yja'jty Acaya, winets møk tjaakpudøjkiiyi'ñ pøn jaty ja Dios tø wyinaty y'ayo'ejxngøjpx tyuk-janchjawi ja nwindsøn'ajtm Jesús, ²⁸ jøts ja jam kyajpxwa'kxy mayjaa'y agujkp, jøts wa'ats ttukmadoogjxy midy ka' mibaat pøn tkajpxy'ont. Tyukmadoow tuki'iyi ku ja israelit jaa'y

kyatiwyyinmaydi, jøts pøni sa ja Dios kyajpxy jap yjaadyaŋi ku ja Jesús yiknitsokpi'aty, pøn ja israelit jaa'y yjajøp'ejx'ejttip.

19

Sa yjajty sa kyubejty ja Pablo jam Efeso

¹ Ku ja Apolos jap wyinaty Corinto jøts ja Pablo jam ŋajxy kojpkjotp, jøts yja'jty jam Efeso ma tpaajty namay ja myigu'uk pøn jaty ja Dios tja'myajtstip. ² Winets ja Pablo jam tyktiäy jøts tnimaay:

—¿Tø meets ja Espíritu Santo mdatøkiyi ku ojts xjanchjawiidi ja Jesús?

Jøts ja t'adsojimbettøø:

—Omik øøts idø'on ja nnijawit jøts kudam ja Espíritu Santo jaa.

³ Winets ja Pablo jadigojk tyktiäy:

—¿Sudso'ampyts ojts mnøbatti?

Xjats ja t'adsojimbettøø:

—Jade'en øø nnøbejty sami Juan Bautista ja jaa'y tyiknøbejty.

⁴ Xjats ja Pablo wyaaŋ:

—Nugo ejxa'an idø'on ja Juan Bautista myøø ja jaa'y ku ja yiknøbety, jade'en'ampy ja jade'en tttuŋ jøts ja jaa'y jade'en yiknijawidit jøts ku ja tjanchyiktigatsti ja chinaa'yin. Nayide'en ja tnimaay jøts ja amumjoojt t'ajot'attit pøn wyinaty menwampnim, ja Jesús idø'on yiktejp wyinaty menwamp yiknitsokpi.

⁵ Xjats ku jade'en tmadooðøø ku ja Pablo jade'en tnigajpxy, winets ojts ŋøbatti ja nwindson'ajtim Jesús køjxp; ⁶ ku ja Pablo jade'en kyønixajidøø, jøts ja Espíritu Santo ŋimejnidi, winets ja abikpyi ayuujk ojts tkajpxti, jøts tkajpxwa'kxti ja Dios y'ayuujk pøni sa ja Dios wyinmaa'nmyø'øyiidi. ⁷ Nimakmajtsk ja wyinaty yjaa'y'atti.

⁸ Tigøøk po' ja Pablo jap yø'øy'ijty jam tsaptøjkjotp ma jam møk'ampy kyajpxwa'kxy, jøts ttukmibiky jade'en ja jaa'y sudso'ampy ja Dios ja nitanaa'yin tpikta'aky. ⁹ Jamts winaagin pøn tkamibøjktip, ja'ats møk ja wyinmaa'ŋi tpiktaktøø jøts jam mayjaa'y agujkp tjanchtaxe'ekti ja Dios kyajpxy. Xjats ja Pablo ja møøt ŋamyatstuujtniyøø pøn ja ka'øy ayuujk tjagyaptip, winets ja tmøødiŋaa ja myøøtjanchja'wibi jøts tmøødiyii'ŋi ma jaa'y tu'uk txøøwi Tiranno pøn ja ixpøjkaajk wyinaty tjagyepy, jamts ja Pablo jabom jabom ja myigu'uk ttuk'ixpiky ja Dios kyajpxy. ¹⁰ Jade'en idø'on ja jam tyuun' majtsk jumøjt, ja'agøjxp idø'on ja jaa'y ojts tnija'wigyøxti jagambaat ja Jesús kyajpxy, jade'en ja israelit jaa'y jøts nayide'en pøn ka'israelit jaa'lydi, pøn tsinaadyip Asia etjotp. ¹¹ Jøts ja Dios møk tmø'øy ja myøk'ajtin ja Pablo jøts ja milagri ja tttuŋ, ¹² jøts ja Pablo yjanchyiktapaaty ja paay jøts ja wet, jøts ja tminøjkxti ma pamaa'y jaa'y jap, winets ja pamaa'y jaa'y ja'ayi ttatsøktøø, jøts ja miku' jade'eñi myajtstuujtidøø.

¹³ Jam wyinaty niwinaagin ja israelit jaa'y pøn nugo widejttip kajp kajp. Ja' ja tyunk'ajttip ja miximaaky ja mimuu'kk, jøts jade'en ja miku' ttukmajtsu'utti ja jaa'y, nay ja Jesús myøk'ajtin yiktunwajjip, jøts tnøjimi ja miku':

—Øts wamp, majtsu'tut yø jaa'y Jesús myøk'ajtingøjxp mididi kyajpxyø'øpy ja Pablo.

¹⁴ Tu'uk ja israelit jaa'y pøn txøøw'ajtp Esceva, pøn ja teety tniwindsøn'ajtp, ja'ats idø'on ja y'una'jk jade'en adøstip, niwixujk wyinaty yjaa'y'atti. ¹⁵ Xjats ku ja jade'en ttundi, winets ja miku' y'adsojimbeytiyidøø, jøts yiknimaadyøø:

—Ja' ø n'ejxkapy pøn txøøw'ajtp Jesús, jøts nayide'en ja' pøn txøøw'ajtp Pablo; jøts meets ka' mee n'ejxkapy pøn ja mbøn meets.

¹⁶ Winets ja jaa'y pøn wyinaty ja miku' tmøøt'ajtp, jøts møøt ŋamyajtsiyøø ja niwixujkpi jaa'y, jøts ja jade'en myimajada'agyidi ja miku', jøts niduki'iyi yikakøjxidøø janchwindsaachi jøtsaachi, niwa'ats ixwa'ats idø'on ja yjanchpidsømniðøø jap tøjkjøtpy. ¹⁷ Ku dø'on ja jade'en yjajty jam Efeso, winets niduki'iyi tnija'widøø ja kajp jaa'y pøn jaty israelit jaa'y, jøts nayide'en pøn ka' y'israelitjaa'yidi. Ku tnija'widøø jade'en ja ayuujk, winets niduki'iyi ja jotmay yjanchpaajtidøø, jøts tu'ugyi ja nwindson'ajtim yja'j ttnøjpiktajktøø.

¹⁸ Xjats nayide'en namay pøn jaty tmbøjktøø ja Jesús yja' winets ja pyøky tuki'iyi tkajpxnaxkøjxtøø, sa y'ijty kya'øy'adø'øtsti. ¹⁹ Jøts nayide'en may pøn jaty y'ijty tyundip ja miku' tunk winets ja kya'øñøky tuki'iyi tntiøøgyøxnidøø jam mayjaa'y y'agujkp. Xjats ku tpayø'ødyøø ja nøky ja chow, wixijxmyajk mil idø'on tpayø'ødyi tum ja plati meen. ²⁰ Jade'en idø'on ja nwindson'ajtim Jesús ja myøk'ajtin møj tnanky'ijxyiyi.

²¹ Xjats ku dø'on jade'en yjajty, winets ja Pablo jade'en wyinmay jøts jam t'ats'ejxwa'aŋ ja myøøtjanchja'wibi jam Macedonia y'etjotp, jøts nayide'en Acaya y'etjotp, winets jam yja'atwa'aŋ jadigojk Jerusalén. Jøts nayide'en wya'aŋ, ku jam y'uknaxt Jerusalén jøts nayide'en ŋøjkxt Roma. ²² Xjats ku jade'en wyinmaa'y ja Pablo, winets ja pyudøjkibi tkejxy

namajtsk jam Macedonia. Timoteo ja xyøøw ja pyudøjkibi jøts jadu'uk Erasto, jøts ja Pablo jam jawaani yjaaktaq'niyi'i'n Asia.

Ku ja Efesit jaa'y yjanch'ambøjktøø

²³ Winet'et ja Efesit jaa'y tyiktseptakwa'andi ja Jesús yja'. ²⁴ Tu'ugy: dø'on ja' pøn jade'en tyiktso'ondaajk ja ayuujk, Demetrio ja xyøøw. Ja'abi tunk idø'on ja yjagyepy, tum ja plati dø'on yiksandi'oyip, jøts nayide'en ja mutsk tsaptøjkuna'jk tyik'a'øyiñaxy nayide'en sami dios Diana chaptøjk t'ixy. Janch nimeenbyøjktip idø'on ja tyunk ja' pøn jaty jap møøt tyuñ. ²⁵ Xjats ja Demetrio twaadsøoy niduki'i'yi pøn jaty nay yø'øbi tunk tmøøt'ajttip, xjats ja tnimaay:

—Migu'uktøjkti, mnija'widipxi ku yø'øbi tunk nduktanajxindi janch øy janch tsuj ku ya njanchmeembyijkyindi; ²⁶ kumi m'ijxpy meets, mmadøøpy meets ku ja Pablo jade'en tkajpxy'øy jøts wya'añ ku ka' yø' Diosi midi jaa'y yik'ø'yip sa adømin; jade'en ja Pablo ja jaa'y namay tø ttukmibiky, kidi yayip nugo yjaty, niduki'i'yi dø'on ja Asiit jaa'y ja tnija'winidi. ²⁷ Ka' yjanch'øyi, janch tsø'øgi møøt yø', tsojk adøm ndunk jade'en wyindigø'øyindit, jøts nayide'en yø dios Diana chaptøjk tsojk yø nayide'en kya'ukyikmøjpiktaknit pøn yø twindsø'øgidi pøn jaty ya Asia tsinaadyip, jøts pøn jaty tsoo'ndip o manaajx o magajp.

²⁸ Ku ja mayjaa'y jade'en tmadoodøø ja Demetrio y'ayuujk, winets ja yjanch'ambøjktøø jøts niduki'i'yi wyandøø:

—Janch møj adøm ndios Diana jøts ka' kyudigø'øty!

²⁹ Xjats ja kajp jaa'y xem yam yjanch'adøtsnibøkidøø, jøts ja Macedoniit jaa'y namajtsk yikmajtstøø pøn txøøw'ajttip Gayo jøts Aristarco midi ja Pablo myøøtwidijtpy. Xjats yikpawejtstøø yikpakoo'tstøø, xjats yiknøjxkidoø jap møj tøjktøpy ma ja kajp ja yjunti tundaajk jap tjagyapti. ³⁰ Jamts ja Pablo nayide'en tyøkiwya'añ jøts ja myigu'uk t'atskugajpxwa'añ pøn wyinaty tø yikmatsti, xjats ja nay ja myøøtjanchja'wibi pøn møøt wyidity ka'ap ja myajtstuujtidøø. ³¹ Winets ja Pablo myiwin'ijxy nayide'en tkajxtøø ja y'ayuujk pøn jam windsøn'ajttip Asia, jøts ku ka' jam tpadøkit ja myigu'uk. ³² Xjats ja jaa'y jam junti tundaajkjøtpy nugo yjanchkajpxjø'økti, øy sa tu'uk jadu'uk yjanchwa'andi kumi tø ja jaa'y wyinaty namay yjanchyø'ømyukti, jøts ni tkanijawidi namay pøni tigøjxp idø'on yø'ømyukti. ³³ Xjats tu'uk ja israelit jaa'y ja myigu'uk tyukmadooøø pøni ti ayuujk idø'on jap ñiyø'ømyuktip, ja' xyøøw Alejandro, ja'ats ja myigu'uk ojts kuwani ñajtswetsiyi jøts jam kyajpxt mayjaa'y agø'øm. Winets ja Alejandro xyaji'jky, ja' tyijpy ku chajpxajy jøts ja niduki'i'yi y'amo'ondit, ja' kyugajpxwampy ja myigu'uk midi tø yikmatsti namajtsk. ³⁴ Ku ja Alejandro yik'ejxkajpy kudam ja y'israelitjaa'yi, winets ojts jinaxy yjanchjaa'kajpxjø'økti. Kajpxti ja majtsk hora'an, xjats wya'andi:

—Janch møj adøm ndios Diana jøts ka' kyudigø'øty!

³⁵ Xjats ja eskribaan ojts kø'øm tyik'amøn ja mayjaa'y, jøts tnimaay:

—Meets Efesit jaa'y, ukmadowdi. Ñija'widip niduki'i'yi ja naxwii'ñit jaa'y ku yø Efesit jaa'y t'ejx'etti adøm nmøjdios Diana chaptøjk, jøts nayide'en yiknijawi ku n'ejx'ijtyim ja y'awanax midi kidaajk tsajpjøtpy. ³⁶ Kumi janch idø'on ja yjajty, kidits nugo mdsø'øgidi, ka' pøn ti ttuñ, tukween meets et, tsuj mjaay'attit ³⁷ kumi ya'at jaa'y midi meets ya tø xyikniñ ka' yø ti ttundi, jøts nika'ap yø tjemdejti ttedejti adøm ndios Diana. ³⁸ Jøts Demetrio møøt ja tyumbi, pøni jaa ja'adi pøn møøt ña'ñi'øøniwya'andi, mibaat yikpayø'ødyit jam kudunk wyindump, jøts tnigajpxtif kija' ja pyøky sudso'ampy ña'ñi'øøniyidi. ³⁹ Pøni wenk winmaa'ñ yø' midi meets icyam m'amidøøpy, mibaat myø'ømyuktit jøts yikxon ngajpx'øyi'indit møøt ja kudunktøjk; ⁴⁰ tø ja wyinaty kya'øyi ku jotmøn jam nyikni'øø'na'andit jam møj windsøn wyindump, jøts ku ja jotmøn wya'ant ku adøm ja møøt ñachep'ijxya'am. Niti winmaa'ñits adøm sudso'ampy n'adsojimbejtindit, ku jotmøn t'amido'ot tigøjxp ya jade'en n'adijchindi ngajotjukindi.

⁴¹ Xjats ku ja eskribaan jade'en kyajpx'abajtiyi'i'n jøts yø'øwya'kxnidøø niduki'i'yi ja jaa'y.

20

Ku ja Pablo wyidijty Macedoniit etjotp jøts nayide'en Greciit etjotp

¹ Xjats ku ja mayjaa'y jade'en ñiyjotkukidøø, winets ja Pablo ja myigu'uk twaadsøogijxy jøts ja ojts tjaak'ukajpxwejni, ojts ttukmadøy midi ja wyinmaa'ñ'ajtpy; winet møøt y'uknagajpxpoo'kxiniyi jøts jam ñijxxy ma et txøøwi Macedonia. ² Winets jam ojts tkajpxpoo'kxixy tjot'amø'kajpxkixy niduki'i'yi ja myigu'uk ma jaty jawyeen wyinaty tø ñaxy, winets jam choo'ngojmaa jøts jam yja'lyty ma ja Grecia et. ³ Jamts y'uktaq'niyi'i'n tigøøk po', xjats ku jam choonwani barkijøtpy jøts ñøjxwa'añ Siria, winets nay jamyi tnija'wiyi'i'n kudam ja israelit jaa'y ñiwinmayiyi jøts yikmatst jap barkijøtpy. Winets wyinmaay jøts ne'egi ñøjxkx tekyjø'øm, paty jadigojk nay jam wyimbijty Macedoniit etjotp. ⁴ Ja' ja wyinaty jyamyøøt'ajtpy niwixujk ja myigu'uk pøn txøøw'ajttip Sópater pøn kugajp'ajtp Berea, jøts ja

Aristarco, jøts jadu'uk Segundo pøn kugajpidip Tesalónica, jøts ja Gayo pøn kugajpidip Derbe, jøts jadu'uk txøøwidi Timoteo, jøts ja Tiqico, jøts jadu'uk Trófimo pøn jam kugajpidip Asia. ⁵ Ku jam yja'tti Filipos, jamts øts wyinaty n'awixy, øts Lucas nxøøw midu ya'at nøyk tjaapy. Xjats ja niwixujkpi jaa'y cho'onjawyeenidøø, jøts øøts jam ndaañ møøt ja Pablo, jøts øøts jamni x'awixy jadigojk ma kajp txøøwi Troas. ⁶ Nay jamiy øøts ja xøøw njaaktyim'yukyknajxy jam Filipos, ja'abi xøøw ku tsapkaaky yikay midu kalevaduri møøt. Xjats øøts jam ndsøø'n xøguixy jøts øøts ja barki jam ndatøjkinaa, jødsnim øøts kyimagoxk xøøw nja'jty jam Troas ma øøts ja nmigu'uk nnaitspajtyii'n, jamts øøts ojts ndaa'ni wixujk xøøw.

Ku ja Pablo ja myigu'uk ojts tmigajpxy jam Troas

⁷ Ku dyomingixøøw'ajty jøts ja Jesús yja' yø'ømyukti, jøts ja tsapkaaky tyikwa'kxwa'andi sa ja nwindson'ajtim ojts tnajtstuni jøts tnankeyi, xjats ja Pablo jap nayide'en kyajpxwa'añ. Kumi kyimjabom ja wyinaty choonwani paty idø'øn ojts jeky'ampy kyajpxy kunim myøjtsuu'miyii'n. ⁸ Jap ojts ñamyukyidi tigøøk nipatøjkixpy ma jap wyinaty lampiri may yjajy; ⁹ jøts tu'uk ja mixy jam wyinaty chøøni wentani'am pøn txøøw'ajtp Eutico. Kumi jeky ja Pablo kya'amaay, winets ja mixy jamiy mya'uu'yjøknaa jøts tu'ugyi ojts tyimyaanijky, winets jam ojts kyunaxy jam nipatøjkøjxp jøts ñaxkidaajky najxkøjxp, jam øøky yikwejtji'jky. ¹⁰ Jøts ja Pablo tniwinajky jøts jam ñagyøxmuujtsøø oo'kpi ñikøjxp jøts tkøbatxajiyii'n, jøts tniamaay ja myigu'uk:

—Kidi mdsø'øgidi; jujky yø'.

¹¹ Winets ja Pablo jadigojk pyatøjkigyojmi jap nipatøjkixpy; japts ja tsapkaaky ttukwa'kxy, jøts kyaadyøø; winets yjaaka'amaay kunim xijñiyii'n, jøts ñøjkxnaa. ¹² Xjats ja jaa'y tjanchtaxondaktøø ku ja mixy ja øy tsø'øky tyiknøjknidi.

Ku ja Pablo chøø'n jam Troas jøts ñijky Mileto

¹³ Winets øø ndsoonjawyeenyii'n barkijøtpy, jøts øøts jap n'aweixwa'añ ja Pablo ma kajp txøøwi Asón, tekyljo'øm ja yø'øwya'añ ku ja jam ñøjkxwa'añ. ¹⁴ Ku øøts ja nminabyajtyiøø jam Asón, winets øøts ja møøt barkijøtpy ndøjkii'n, jøts øø nmøøtnijky mejñinaxy ma kajp txøøwi Mitilene. ¹⁵ Jøts øøts jam ndsøø'n jadigojk, jøts øøts kyimjabom jam nnaixy ja' y'awemp ma et jam txøøwi Quío, winets øøts nja'jty jadu'ukpi xøøw ma kajp txøøwi Samos. Jøts øøts nniixy poo'kxpi ma kajp txøøwi Trogilio, jøts nay kyimjabomgøjmyi øø njatkojmi ma kajp jam txøøwi Mileto. ¹⁶ Jade'en idø'øn yjajty kumi ka'ap ja Pablo jeky tyiknaixwa'añ ja xøøw jam Asia etjotp, paty kyanijky Efeso; kumi ja' ku tsojk yja'atwa'añ Jerusalén jøts jam tyiknaixwa'añ ja Pentecostés xøøw.

Ku ja Pablo ttukmadøøy ja Efesit mōjaa'dyøjk ya'atpi ayuujk

¹⁷ Ku øø njam'ajty Mileto, winets ja Pablo twaadsøøy pøn jaty jam mōjaa'dyøjk'ajttip ma tsapøjk jam Efeso, ¹⁸ xjats ku ja yja'ttøø jøts tniamaay:

—Meets mnija'wip sa øts ya Asiat etjøøjty n'øyyaa'y'ajty ku øts ya miduk'ojk ojts nmiñ, jøts ixymbaat jade'eñim njaa'y'aty. ¹⁹ Mnija'widip sa øts ejtp nbaduuh ja nwindson'ajtim Jesús y'ayuujk jøts ka'ap øts nnamixyxyi, njanchkuyaajxp øts ku ja jaa'y tkatsokti ja Jesús yja'. Jøts nayi mnija'wip meets sa øts ya ojts n'ayo'ombatxy ku øts ja nmigu'uk israelit jaa'y xjemdundi xedundi. ²⁰ Ka'ats meets ndamajtstu'uty ja øgyajpxy midu meets køøm myiktu'ump, ku ø nniigajpxy nayide'en mayjaa'y agujkp jøts adøjkøøjty nayide'en. ²¹ Niduki'iyi øts ndukmadoogixy jade'en ja israelit jaa'y jøts nayide'en pøn ka'israelit jaa'dyi, jøts ku tnajtstu'uttit ja kya'ødyunk amumjojit møøt ja Dios, jøts tmøjawidit tjanchjawidit ja nwindson'ajtim Jesucristo. ²² Ixym øts kuwani nniixy Jerusalén ja'agøjxp ku ja Espiritu Santo møk xwaadsøy, ka'ap nniijawi pøni sa øts jam nøyk njaty. ²³ Jade'eñi nniijawi pøni magajp nniixy nja'aty, jade'en øts ja Espiritu Santo xukniijawi jøts ku kuwani nyiktsu'umt jøts jam møk n'ayo'ombaat. ²⁴ Ka'ats øts yø nmøjpkta'aky; wan ø t'øøky, ka'ap ø nnabya'ayøyi ja'agøjxp jøts øts øy jotkujk kuwani nyikyø'øwya'añ yø ndunk, kunim yjøpkøxt midu øts nwindson'ajtim Jesús tø xmø'øy, jøts øts ja jaa'y øy tsuj ndukmado'ot ku ja Dios køøm tpa'ayøy ja ñaxwii'ñit jaa'y.

²⁵ Tø øts ya ngajpxwa'kxy ja Dios myø'ajtin sa ttanitani ja yjaa'y, ixyam inet najtsja'wip øts jøts ku meets ka' n'ukniwimbejtnit. ²⁶ Paty meets ixyam ndukmadowa'añ jøts ku nipøn nganadyapøkyajwyit pøni jaa winaagin tyuu'tigøødyi. ²⁷ Kumi tø øts nniigajpxy tuki'iyi pøni sa ja Dios ja wyinmaa'n tpiktaajky, ka'ap øts midu n'ayu'uch'aty. ²⁸ Jøts nayide'en meets køøm mnay'eix'etidit, jøts niduki'iyi nayide'en ja migu'uktøjk x'eix'ettit, kumi tø meets ja Espiritu Santo mbikta'agiyi jøts mdaandi eix'eitpi pøni pøn jaty ja Jesús yja' tpaduujnidip, pøn ja nwindson'ajtim Jesús køøm kyu'o'jkimbaajtip. ²⁹ Nija'wipts øts ku øts ya ndsoont jøts mye'endit wenkpi jaa'y, jøts myikwinmaa'nmya'atwa'andit, jøts tyikutigøøwya'ant ja Jesús yja'. Jade'en idø'øn y'adø'øtswa'andit kakeey miy'uk tyikutit jaty ja borreegi'u'nk. ³⁰ Jøts

nayide'en meets winaagin nõjxk xwin'õõndi ja mmõõtjanchja'wibi, jõts ja xukmibõkkiti midi ka' tyiyi yjanchi. ³¹ Paty õyim mnay'ejx'etidit; ja'myatsta'am ku meets tigõõk jumõjt xinaxy tsunaxy ngadamajststu'uty ja kajpxwejin ayo'ejxingõjxp.

³² Meets migu'uktõjkti, Dios mõk mbudõkiyidip, jõts nayide'en myiktiwinyinmayiyidit y'õy'ayuujkõjxp midi xamidsojkindip sa ja x'ayo'ijxyindi, jõts nayide'en myikmo'odit ja õy'ajtin ja tsuj'ajtin mõõt ja'adi niduki'iyi põn jaty ja Dios wynyat tõ tyikpõkwy'a'ach. ³³ Ka' meets ya ti n'amidõõy, ni meefi, ni wet, niti. ³⁴ Wa'ats xnijawidi ku õts kõ'õm ojts nnay'amiduniyi, jõts õts kõ'õm nbaajty põni ti jaty õts xka'ejtxõõ, ndukpaajt õts nayide'en ja nmigu'ukti ja yja' põn jaty õ mõõt nwidijty. ³⁵ Ejtp õts ja nnigajpxy jõts ku jade'en mnamyidunidit, jõts xpudõkidit ja mmigu'uk põn ja yja' ka'ejtxip, ja'myatsti ja nwindson'ajtim Jesús y'ayuujk sa ja wya'añ yide'en: "Ne'egi mõj ja xondaajkin ja wyimbidsõ'mxiyi põn windsõ'jkip, jõts ka'ap ja' põn yikwindsõ'jkip."

³⁶ Xjats ku ja Pablo jade'en kyajpx'abajtiy'ii'n, winets mõõt ñagyuxendyaajkõõ ja myigu'uktõjk jõts ja Dios t'ajot'ajttõõ. ³⁷ Winets niduki'iyi ja myigu'uk wynymaa'ñ yjanchmendõõ jõts yjanchyaxtõõ, xjats ja Pablo yikyukxajnax jõts yiktsu'kxy. ³⁸ Janchjotmay'oo'knidip idõ'on ja wynyaty ku ja Pablo jade'en wya'añ jõts ku ka' nijuuni xõõw y'ukyikniwimbejtnidit. Winets tmõõtnõjktõõ mã wynyaty ja barki jam.

21

Ku ja Pablo ñijkxy jam Jerusalén

¹ Xjats ku õõ nmaajstuuity ja nmigu'uk jam, winets õõts barkijõtpy ndõjkiña, jõts õõ tiy ndyimñijkxy mã ja et txõõwi Cos jam mejkyujk'am, jõts õõ kyimjabom nja'aty mã txõõwi Rodas, jams õõts jadigojk ndsõõ'ñ jõts õõ nja'aty mejy'am mã txõõwi Pátara. ² Jams õõ nbaajty jadu'ukpi barki midi wynyaty nõjxk mã et txõõwi Fenicia, winets õõts jap ndõjkiy'ii'n. ³ Jõts õõts jam nyõ'õy mejyõtp, winets õõts n'ixy anajy'ampy tu'uk ja et midi jam mejkyujk'am, ja' xyõõw Chipre, jõts õõ nja'jty Siria ñaxjõtp. Ja ku ja barki wynyaty tyiktanwa'añ ja tsimy mã kajp txõõwi Tiro, xjats õõts jam n'uk'awidijty. ⁴ Nay jam õõ nminabyaajtiyõõ ja nmõõtjanchja'wibidi, xjats õõts jam nmõõtaañ wixujk xõõw; winets ja nmigu'uktõjkti tnimaadyi ja Pablo jõts ku ka' ñõjkt jam Jerusalén, kumi tõ ja wynyaty ja Espiritu Santo tyuknijawiyidi ku jam sa yjatt. ⁵ Ku õõts wixujk xõõw n'uktsinaay winets õõ ndsoonwani. Xjats õõ niduki'iyi ja nmigu'uktõjk mõõt ja ñidõ'õxyi jõts mõõt ja y'unajlkti õõ xpadsõõ'ñ, xjats õõts ojts xnajtskaxi jam mejy'am, winets õõts ja mõõt n'ukuxanaañ, jõts õõts mõõt ndios'ajot'ajty. ⁶ Winets õõts jam ja mõõt n'uknagajpxpoo'kxiniyõõ, xjats õõ ndõjkiy'ii'n barkijõtpy, jõts ja wyimbejtnidõõ tyõjkwindump.

⁷ Xjats õõ ndsõõ'ñ jam Tiro, jõts õõ nja'jty mã kajp txõõwi Tolemaida, jamnim õõts nminawya'kxiyõõ ja barki jõts õõts ja nmigu'uk n'ukmigajpxy, xjats õõts ja mõõt n'uktaa'niyi'ii'n tukxõõw. ⁸ Winets õõ kyimjabom ndso'ongojmaa mõõt ja Pablo põn jaty õõ mõõ nwidity, jõts õõ nja'jty jam mã kajp txõõwi Cesarea. Winets õõts nnijkxy jam tu'uk jaal'y tyõjktõp põn txõõw'ajtp Felipe, jõts põn ja õy'ayuujk tmiwdejtp, jõts nayide'en y'ijty tunk'aty tyikwa'kxy ja jii'kxy, ja'ats õõts jam mõõt ndaañ. ⁹ Ja Felipe jam ja wynyaty ja nimaktaxk ja ñõõx põn ka'aním y'amatskidi, ja'ats tkajpxnaxtip ja Dios y'õgyajpxy põn ti jaty ja ttukajpxnaxwajniyidip. ¹⁰ Tõ õõts jam wynyaty ndaa'ni jeky ku tu'uk ja Dios kyugajpxy yja'jty põn txõõw'ajtp Agabo, jõts põn tsoo'imp jam mã et txõõwi Judea. ¹¹ Ja'ats õõts ojts xmigajpxy, jõts ojts ja Pablo chum yiknixaji winets ñadyabaktsujmiyõõ jõts nayide'en ñadyakõtsujmiyõõ, jõts jade'en ja ejxa'añ ja Pablo yikmõõy, jõts yiknõjmi:

—Ja Espiritu Santo dõ'on wamp jõts ku ja israelit jaal'y jam jade'en nõjxk mduñiyi Jerusalén, jõts myikõyakt mã ja yikmõjktujkpi põn ka'israelit jaal'dyi.

¹² Xjats ku õõts jade'en nnimadõõy mõõt nmigu'uk põn kugajp'ajttip Cesarea, winets õõts ja Pablo mõk njanchjanimaay jõts ka' ñõjkt jam Jerusalén. ¹³ Xjats ja Pablo y'adsojimbijty:

—¿Tiku mya'axti jõts õts nugo xyikjotmay'ookti? Wan twanjaty, ngupõkp õts wan õts tyikõsumy tyikpaktsumy. Jõts põni xyik'ookwandip õts jam Jerusalén, ngupõkp õts ja nayide'en nwindson'ajtim Jesús wynymaa'ngyõjxp.

¹⁴ Xjats kumi ka'ap õõts ja Pablo xkajpxkyupiky, winets õõts jade'eñi n'amõõñ, xjats õõ nwaañ:

—Wan tjaty põni sa Dios kõ'õm tyamidsõkyi.

¹⁵ Ku dõ'on jade'en y'uknajxy ja kajpxy, winets õõts ndsimy nyik'õyiy'ii'n, jõts õõts jam nnõjxkwa'añ Jerusalén. ¹⁶ Winets õõts ja nmigu'uk winaagin xjamyõõt'ajty midi tsinaadyip Cesarea, jõts tu'uk midi kugajp'ajtp Chipre, ja' xyõõw Mnasón midi wynyaty jekyip ja Dios kyajpxy tõ ptabõjkiyi, ja'ats õõts xyikja'ada'akwamp jam Jerusalén mã wynyaty ja tyõjk tjagyepy.

Ku ja Pablo ojts tmigajpxy ja Jacobo

¹⁷ Xjats ku øøts jam nja'jty Jerusalén, jøts ja nmøøtjanchja'wibidi janch ejtni xoni øø xyikja'jty. ¹⁸ Winets øøts kyimjabom nmøøtnijkxy ja Pablo jam Jacobo tyøjkwindump ma wyinaty ja mōjaa'dyøjkti niduki'iyi. ¹⁹ Xjats ja Pablo tkajpxpøø'kxy niduki'iyi pøn jaty jam wyinaty, jøts jaty: ttamimadyaknibøjkøø tuki'iyi sa jaty yjajty ku ja Dios ja myøk'ajtin jade'en tnanky'ixyiyi jam ma jaty ja jamdi pøn ka'israelit jaa'dyi. ²⁰ Xjats ku dø'øn jade'en tmdoojidøø ja Pablo kyajpxy, winets yjanchxonjajtøø ja myigu'uk jøts tmøjpicktøø ja nwindson'ajtim Dios, xjats tnimaadyøø:

—Øy'ajtp migu'uk, tø xnijawi ku ja israelit jaa'y mil'ampy tø tmbøkti ja Jesús yja', jøts nay ja' niduki'iyi wandip jøts ku kuwani ja Moisés kyutujk yikpadu'unt. ²¹ Jøts wandip ja' ku mets ja israelit jaa'y jade'en xukmadøy midu jagamgajp tsinaadyip, jøts ku ka' ttnuk'attit midu Moisés kyutujk'ajit jøts ku ka' ja mutsk mixy'una'jk ja ejxa'añ yikmo'ot ñe'kxkøjxp, ni ngatu'unindit ja ngø'ømdsinaa'yin. ²² ¿Sudso'ampy yø ndu'unindit? Janchnamyukidip inet ja nmigu'uktøjkti ku tnijawidit ku ya tø mja'aty. ²³ Øy'ajtp ne'egi jade'en xpadu'unt: Ja ya nimaktaxk nmigu'ukti pøn ja wyanda'aky jap tjagyaptit tsaptøjkjøtpy. ²⁴ Møødi jøts ja wa'ats'ajtin xpaattit, jøts xkujuuyit ja wyanda'aktyi jøts nayide'en jap xnankyaabiyyit, jøts yiknijawit ku ja wyanda'aky tø tyik'adukti, jøts tnijawidit pøni ka'adam meets ja Moisés kyutujk xjanchpaduujniyi. ²⁵ Jap øøts ayuujk jadu'uk njaakjagyepy, kumi tø øøts ja nøky jade'en nguexy ma jaty ja Jesús yja' pøn ka' y'israelitjaa'y, jøts øø ndukmadøy jøts ka'ap nugo tmijotmay'ooktit ja israelit jaa'y chinaa'yin. Ja'ayi øø ndukmadøy jøts ku ka'ap ja tsu'uch tssu'utstit midu ja tsamaxan yiktawindsø'jkip. Nayide'en ka'ap ja ni'jpy tjøø'kxkit, jøts nayide'en ka'ap ja jiyujk tsu'uch tssu'utstit midu ka'oy'oo'kp, jøts nayide'en kidi ja ñiyaa'y ja ñidø'øxy ñabyøjkyidit.

Ku ja Pablo yikmajch mōj tsaptøjkjøtpy

²⁶ Xjats ja Pablo tmøødiyini ja nimaktaxkpi jaa'y, jøts kyimjabom ojts tyiktso'onda'akti sudso tpaattit ja wa'ats'ajtin. Xjats møøt tyøjkijini jap mōj tsaptøjkjøtpy jøts ttukmadoowa'andi ja teety juuni yjøpkøxt ja'abi jotmay. Yø' tyijpy ku dø'øn ja yjøpkøxtit winets nidu'uk nidu'uk tyikme'endit ja yojxin.

²⁷ Xjats ku wyinaty wixujk xøøw tyika'pxwanidi ja yjotmay sudso tpaattit ja wa'ats'ajtin, winets ja Pablo ja israelit jaa'y jap y'ejxpaajtiyøø jap tsaptøjkjøtpy pøn tso'ondip Asia. Ku ja Pablo jade'en yiknija'wiyini, winets ja jaa'y ñanky'ambøjkøxidøø ja xem ja yam, winets tmajtswa'andi ja Pablo, ²⁸ jøts tjanchtaya'axti tjanchtajkti jøts wya'andi:

—¡Meets Israelit jaa'y, pudøjik øøts! Wan tmajchindi ya'atpi yaa'dyøjk pøn kajp kajp widejtp, jøts ja jaa'y jade'en tuk'ixpiky jøts ku ka'ap adøm ndsinaa'yin y'oyindi, jøts ja Moisés kyutujk nayide'en t'abaaxi jøts nayide'en adøm ndsaptøjk; jøts jinaxy ixyam tyimyaak'adi'ich ku ja griegit jaa'y ya tjaa'kyimgyuwa'a'wi, jøts jade'en tyikma'aty adøm ngunu'ukxchaptøjk.

²⁹ Jade'en ja israelit jaa'y wya'andi ku ja Pablo jade'en tø yik'a'ejxnaxy jap kajpjøtpy, ku jap tmøøtwidity tu'uk ja griegit jaa'y pøn kugajp'ajtp Efeso, ja' xyøøw Trófilo. Jøts jawandipyim idø'øn ja jade'en tø net ja Pablo tmøøtnijkxy ja griegit jaa'y jap tsaptøjkjøtpy.

³⁰ Xjats ja kajp jaa'y yjanch'ambøjknibøjkidøø, winets ja Pablo yikjidøjtpidsiimy jap tsaptøjkjøtpy, jøts ja tsaptøjk jaty tyik'adujktøø. ³¹ Tyimyk'ookwandip ja wyinaty, ku ja soldadi ñiwindsøn tnija'wiyini ku ja kajp wyinaty nugo yjanch'adøtsnidi. ³² Winets ja myiwindsøn ja ttuknija'wigyixy jøts ja puipj yjanchja'ttøø jap ma ja mayjaa'y jap wyinaty. Kuts ja yik'ejxpaattøø møøt ja masyoldadi, winets ja Pablo jade'eñi yikmajtsuujty jøts ka' y'ukyikwojpnā. ³³ Xjats ja windsøn twinguyø'yiyini ja Pablo, winets ja Pablo yikmajch, xjats ja windsøn tyikutujky winets ja Pablo adsow aduuk yiktagøtsuummy ja puxkadeen, xjats ja windsøn tyiktiyi pøn jaa'y ja', ti tundigø'oyin ja wyinaty tø tjuñ. ³⁴ Xjats ja jaa'y ja xem ja yam nugo yjanchkajpxjø'ktøø, ni sudso'ampy ja windsøn tjanchkamadooguki, winets tyikutujky jøts jap tnankyiknijkxyi ma ja soldadi kyutujktaajk japti. ³⁵ Ku jap wingon tyikja'tti ma eskaleri jap, winets ja jaa'y tjanchjaakwojpw'a'andi ja Pablo ambøjkingøjxp, paty ja soldadi ojts kōjxp tsapkø'odi ja Pablo; ³⁶ janch mayjaa'y idø'øn ja wyinaty pameejnip, jøts tjanchtaya'axti tjanchtajkti:

—¡Wan tpa'øøky!

Ku ja Pablo yjanagyugajpxøø mayjaa'y wyingujkpy

³⁷ Ku wyinaty ja Pablo jap tyøkiwyani soldadi kyutujktaajk jøtpy, winets ja Pablo tjanøjmi ja windsøn:

—¿Kidi y'øy'att ku nmigajpxt?

Xjats ja windsøn t'adsojimbijty yide'en:

—Øy'ajtp pøni mja'itpy griegit ayuujk. ³⁸ ¿Kidi ja egiptijaa'yip mets, pøn ja tsep namnim jawaani tkayiktso'ondakp, pøn ja yikjaa'y'oo'kpi jam ojts tmøøtsøøni nimaktaxk mil jam tø'øts'etjotp?

³⁹ Xjats ja Pablo t'adsøoy jøts tñimaay:

—Israelit jaa'y øts. Jam ø ngue'jxy Tarso midi jam møj kajp'ajtp Ciliciit etjotp; tun ja may'ajt jøts øts yø jaa'y nmigajpxt.

⁴⁰ Xjats ja windsøn tyikutujky jøts jaa'y tmigajpxt, winets ja Pablo jap eskalerikijxpy wya'k'øyyi'i'n, jøts ja'ay'i xaji'iky jøts ja jaa'y y'amo'ondit. Xjats ku ja jaa'y y'amongøxtøø, winets ja hebreit ayuujk ja tkajpxøjkijyi'i'n.

22

¹ —Meets migu'uktøjkti jøts møjaa'dyøjkti, ukmadoooidik øts n'ayuujk midi ngajpxwampy.

² Xjats ku ja jaa'y tmadowdi jøts ku ja Pablo tkajpxy ja hebreit ayuujk, winets niduki'i'yi y'amondøø, jøts ja Pablo tñimaay:

³ —Israelit jaa'y øts, jam ø ngue'jxy Ciliciit etjotp ma kajp txøøwi Tarso, jøts øts yā tø nyeeky Jerusalén, jøts øts ja' xyik'ixpijky midi txøøw'ajtp Gamaliel, wa'ats øts ja xuknijawi adøm ndsinaa'yin pøni sa ja møjaa'chinaa'yin. Ojts øts idø'øn ja Dios yja' ka'pxy nbaduñ amumjoojt jade'en sa meets ixyam xuñin. ⁴ Øts y'ijty nmøjmidsep'ajtpy pøn jaty ja Jesús yja' tpaduujnidip, nyik'ooktibaat øts ja y'ijty, jøts nyiknijky ja yaa'y ja tø'øxy jap puxøjkjøtpy. ⁵ Wa'ats ja teetywindsøn tñijawidi møøt ja møjaa'dyøjk, kumi kø'øm øts ja xmo'odi ja kutujk jøts øts ja jam nminijky Damasco ma wyinaty adøm nmi'israelit jaa'dyi. Jøts øts ja jam n'ixa'ay pøn jaty wyinaty tpaduujnidip ja Jesús yja', jøts øts yā nyikmeenwa'añ aguwanikøjxp jøts nyik'ayo'ombaatawa'añ.

Ku ja Pablo tñimadyaajky ja chinaa'yin ku ja tyiktigajch

⁶ Xjats ku øts ojts nminijky ja'abi winmaa'n, jam wyinaty wingon nja'atwani Damasco kujkxøøw et, winets øts ojts jøtmøñ ja jaj xnawidity midi janch møk tsamamp, jøts n'ijxy ku kyidaajk tsajpjøtpy. ⁷ Winets øts jamy nnaækkidaajky, jøts øts nmadøøy ja ayuujk ku øts yide'en xnimaay: "Saulo, Saulo, ¿tiku ø xjemdunwa'añ xedunwa'añ?" ⁸ Xjats øts nyiktiy jøts nnimaay: "¿Windsøn, pøn mets?" Jøts ø x'adsøoy: "Øts Jesús Nazaretit jaa'y, ja' pøn nmjumpy mdedumpy." ⁹ Xjats øts njamyøøt yjancho'jkidøø ku ja jaj t'ejxpaattøø, ja' ka'ap ja tmadoodøø ku øts nyikmigajpxy. ¹⁰ Xjats ku øts idø'øn jade'en nyikmigajpxy, winets ø nnimaay: "¿Ti windsøn ndu'ump, sudso'ampy ndaabyaatt?" Winets nwindsøn'ajtim xnimaay: "Pidø'øk jøts mnøjkt jam Damasco, jams tuki'i'yi nyiktukmado'ot pøni ti jaty mdu'ump." ¹¹ Kumi tø øts wyinaty ja jaj xyikwinøxy xyikwinapy, winets ja nmigu'uk jam x'ukwejtsnidøø, jøts øts xyikja'ttøø jam Damasco.

¹² Jam wyinaty tu'uk ja jaa'y pøn txøøw'ajtp Ananías, ja' idø'øn tiy tjanchpadump ka'pxy ja Moisés kyutuy. Xjats niduki'i'yi ja israelit jaa'y pøn jaty jam tsinaadyip Damasco, yjanchojktj idø'øn ja' ja Ananías. ¹³ Xjats øts ja Ananías ojts x'ixy, jøts øts xnimaay: "Migu'uk Saulo, tawin'ejx yikxon yø mween jadigojk." Jøts øts jaty: ojts nwin'ejxpiky, xjats nmigu'uk n'ejxpaajty. ¹⁴ Jøts ø xnimaay ja Ananías: "Ja Dios Teety pøn adøm n'apteety'amøj pyadundip jekyip, ja' kø'øm tø mdsøkyi jøts me mduknijawiyit ja y'øwynmaa'n, jøts ñanky'ijxyiyi ja nwindsøn'ajtim Jesús pøn tum tsuj ja winmaa'n tmøøt'ajtp, ja'ats kø'øm ja y'ayuujk mdukmadoojyip. ¹⁵ Ja'agøjxp ja Dios jade'en ttuun, jøts mets nøjkk xkajpxwa'kxy ja kyajpxy y'ayuujk, jøts xuknijawit tuki'i'yi ja naxwii'ñit jaa'y sa tø x'ixy jøts sa tø xmadøy. ¹⁶ Jøts ixyam, ¿tiku nugo mgo'kni? Pidø'øk jøts mnøbatt, janchjawi amumjoojt ja nwindsøn'ajtim Dios yja' jøts myikpøkwy'a'adsiyit."

Ku ja Pablo tñimadyaajky sudso'ampy ojts yikexy jam ma jaa'y ka'y'israelitjaa'yidi

¹⁷⁻¹⁸ Ku øts idø'øn jade'en njaty, winets øts jadigojk nwimbijty yā Jerusalén, jøts øts jap nniijky tsaptøjkøtpy Dios'ajot'ajtpi. Japts øts ja nwindsøn'ajtim xnigajpxy, jade'en øts ja n'ixy kidim ja jaa'y kyuma'ay, jøts ø xnimaay: "Putyi yā tsoon Jerusalén, ka'ap inet ja tmøjpkta'aktit sa øts inet n'ayuujk xjakajpxiyit." ¹⁹ Xjats ø nnimaay: "Mets teety, ñija'widip ja' ku øts jam y'ijty nniijky ma jaty ja tsaptøjk, jøts øts jam nmach pøn jaty tpadundip mets mja', jøts øts ja ndagubety, yikxon njanchwiwøpy jøts nyiknijky puxøjkjøtpy. ²⁰ Ñija'widip ja nayide'en ku øts jam wyinaty ku ja Esteban jam y'øjky midi mets m'ayuujk ojts tkajpxwa'kxy, jam øts wyinaty nayide'en ndani, jøts øts nwaajit nayide'en jøts tyik'ookit. N'ejx'ejtidøø øts ja yik'oo'kpi ja wyet." ²¹ Xjats øts ja nwindsøn'ajtim xnimaay: "Putyi, jagam me ngajxwa'añ kajpxwa'kxpi ma jaty pøn ka'y'israelitjaa'yidi."

Ku ja Pablo ja soldadi windsøn yikpuxøjktøjkiyøø

²² Xjats ku ja Pablo jade'en yjakajpxy, winets ja mayjaa'y møk'ampy yjanckajpxjø'ktøø, xjats wyandøø:

—¡Wan tpa'øøky yø'øbi jaa'y! ¡Ka'ap y'ukpaat'ajtiñi jøts yjaaktsøønit!

²³ Xjats ja mayjaa'y tjanchtayax'adø'tsti jøts ja wyet tjanchajpwøjti, jøts ja pu'ux nayide'en tjanchwijø'økti, ²⁴ paty ja windsøn nayide'en tyikutujky jøts ja Pablo jap

yikpøkjøøkt jap windsøn kyutujktaajkjøtpty. Xjats ja windsøn tyikutujky jadigojk jøts yikwopt, jøts kuwani ttuknigajpxwa'añ tigøjxp ku ja mayjaa'y jade'en myidsep'atyiyi. ²⁵ Xjats ku ja Pablo tø wyinaty yikøtsumni yikpaktsumni jøts yikwopwa'añ, winets ja Pablo tnimaay ja soldadi pøn jap wyinaty:

—¿Mbaat'ajttip meets jøts meets ja romanit jaa'y xwopt midi ka'aním yiktiidyuñ?

²⁶ Ku jade'en tmadøøp pøn ja soldadi t'ana'amp, winets ja jatyí tninijky ja wyindsøn, jøts tnimaay:

—Ejxim ku jade'en m'adøøtst, ¿kidi xnijawi ku yø' romanitjaa'yí?

²⁷ Winets ja windsøn twingunøjkxyí'ñ ja Pablo jøts tyiktiiy:

—¿Mjanchromanit jaa'y mets?

Xjats ja Pablo t'adsojimbijty jøts tnimaay:

—Paty ja' øts.

²⁸ Xjats ja windsøn tnimaay ja Pablo:

—Janch kajaa øts nmeen tø nyiktuñ ku øts ya nromanitjaa'y'atwa'añ.

Xjats ja Pablo tnimaay:

—Ka'ap øts ya ti jade'en tø ngujuy, ja' ku øts ya tø ndyimgye'exy.

²⁹ Xjats ku dø'on jade'en yjajty, winets ja soldadi jadi'iñi yjiyøøgyøxnidøø pøn ja Pablo t'ukwopwandip. Xjats ja windsøn ojts nayide'en chøøgi kudam ja' ryomanitjaa'yí pøn wyinaty tø tkwøøndi t'pakwøøndi.

Ku ja Pablo yiktanay'øyyiøø ja israelit jaa'y myøjkutujk adsinaabyi wyingujky

³⁰ Xjats ja windsøn kuwani tnijawíwya'añ tigøjxp ku ja Pablo ja israelit jaa'y ñi'øøniyi. Xjats kyimjabom tnankwyinajkiyøø ja puxkadeen, jøts tnankwyaamujkiyøø ja teetywindsøn jøts nayide'en ja israelit jaa'y kyutujk adsinaabyidi, winets ja Pablo jap yikwaanijky jøts tyikajpxwa'añ jap windsøn y'agui'ptyi.

23

¹ Xjats ja Pablo twinguwa'jkiyi'ñ pøn jaty jap wyinaty møj windsøn'ajttip, jøts tnimaay:

—Migu'uktøjkti, wa'ats Dios t'ixy ku øts ka'ap ja Dios nmidundigø, ejtp øts jotkujk nnayjawi.

² Winets ja møjteetywindsøn tyikutujky midi txøøw'ajtp Ananías, jøts tnimaay pøn ja Pablo jap wyinaty wingon møøt tyani, jøts ja Pablo yik'akøjxjøøkt. ³ Xjats ja Pablo t'adsøøp ja møjteetywindsøn:

—¿Ti windsøn mets idø'on jade'en, nayide'en ja Dios mduniyit! Pøni mgutujk'adsinaapy tam mets, ¿sudsøts øts jade'en xnankyoxtwa'añiyi pøni jap tam ja kutujk xmøødi?

⁴ Xjats ja y'adsoødøø pøn jaty ja Pablo jap wyinaty møøt wingon y'ity, jøts ja Pablo yiknimaay:

—¿Jade'endam idø'on xmigajpxigøp ja møjteetywindsøn?

⁵ Xjats ja Pablo y'adsøøp:

—Migu'ukti, ka' øts yø nnijawi kudam yø myøjteetywindsøni; janch jade'en ja Dios kyajpxy wya'añ ku wya'añ: “Kidi xmigajpxigøp pøn jam yikutujktip mgajpxjxp.”

⁶ Winets ja Pablo jam t'ejxkajpy ku majtsk piky ja windsøndøjk jamdi. Jam wyinaty pøn ja t'padundip ja saduceit ixpøjkin, jøts nay jam ja'amidi pøn t'padundip ja fariseit ixpøjkin, paty ja Pablo møk ojts kyajpxwa'kxy, jøts wya'añ:

—Meets migu'uktøjkti, fariseit jaa'y øts jøts fariseit jaa'y øts ndeety. Ja' meets ixyam xatiidyump ku øts n'awijxy'aty jøts ku ja oo'kpi jadigojk yjujkyiky jap oo'kpi jutjøtpty.

⁷ Xjats ku ja Pablo jade'en wya'añ, winets ja' pøn ja fariseit ixpøjkin tjagyaptip jøts nayide'en pøn ja saduceit ixpøjkin tmøøt'ajttip, ja'ats ojts møk ñadyamigajpxyidi kunim majtsk piky ja wyinmaa'ñ yjajttø. ⁸ Ja saduceit jaa'y wamp jøts ku ka'ap ja oo'kpi yjujkyiky jadigojk jap oo'kpi jutjøtpty, jøts ku nayide'en ka'ap ja ankilis ma, jøts ni anmija'win jøts ni miku' niti kya'ity. Jade'en idø'on ja saduceit y'ixpøjkin; xjats ja fariseit y'ixpøjkin tuki'iyi ja tjanchjawi. ⁹ Xjats niduki'iyi kyajpxjø'ktøø; winets winaagin ja kajpxweipi wya'kukiyi'ñ pøn tnija'widip ja Moisés kyutujk, jøts pøn tsojktip ja fariseit y'ixpøjkin, ja'ats ojts wya'andi:

—Ya'at jaa'y ka' ti tundigøøyin tjagyepy, jotmøn ku yø tø myigajpxyi tu'uk ja ankilis uk øy ti, ka' y'øyi ku ja Dios yja' nugo ndatøjka'andit.

¹⁰ Xjats kumi janch møk idø'on ja jeky ñagyajpxidøø, winets ja soldadi windsøn tjøpjawí ku ja Pablo jotmøn ja mayjaa'y y'uknujkwakxniyit. Winets ja soldadi ja twaadsøøp, jøts ja Pablo jam yikwejtspidsimy mayjaa'y agujkp, jøts jap jadigojk tyiknijky soldadi kyutujktaajk agui'py.

¹¹ Xjats ku kyoots'ajty, winets ja Pablo t'ixy kuma'ayjøtpty ja nwindsøn'ajtim Jesús, jøts ñi'i'mxyiyi:

—Pablo, jotmøk nabyikta'agi, nayide'en jam nøjkk mgajpxwa'kxy ma ja møj kutujktaajk jam Roma, nayide'en sam øts n'ayuujk tø xkajpxwa'kxyi ya Jerusale'n.

Ku ja Pablo yiktanibiktaajkøø jøts ja y'amaa'tsk'oockt

¹² Xjats ku jade'en ja Pablo kyumaay, winets ja israelit jaa'y winaagin tkajpxy'ajttøø ja Pablo jøts tyik'oockit, møk'ampy idø'øn tymñawyajnidøø, ka'ap ja tkugayidit tku'uugidit kunim ja Pablo tyimyik'ejxnaxt, kunim ja tyimyik'oocktit. ¹³ Wixijkxy ñaxy idø'øn ja jaa'dyi pøn idø'øn ja Pablo jade'en tkajpxy'ajttøø. ¹⁴ Winets ja ñiwixijkxyi jaa'y jap ñjøjktøø ma ja teetywindsøn jap wyin'atyi møøt ja møjaa'dyøjkti, jøts tñimaadyøø:

—Tø øøts idø'øn ndyimñagyajpxyi, ka'ap øøts ngugaayiwya'añ ngu'uugiwyaa'añ, kunim øøts ja Pablo ndyim'ejxtnim øøky. ¹⁵ Meets niduki'iyi pøn jaty ya kutujk adsinaadyip, amidowdi ja soldadi windsøn jøts jabom ya ja Pablo tyikme'ent mee mwinduuj, jade'en xwindaayidit ja windsøn jøts ku ka'pxy yikpayø'øwya'añ ja øøky, jamts øøts wyinaty tuu'am n'awejax'ity, jøts jam yø y'oockt.

¹⁶ Xjats ja Pablo pyøøpy tñija'wiyii'ñ ja ayuujk ku ja yjamy ja jaa'y yik'ookwa'añi, winets ja yjamy ja ojts ttukmadøø ma ja soldadi kyutujktaajk jap. ¹⁷ Xjats ja Pablo twaadsøøø tu'uk ja soldadi, jøts tñimaay:

—Møøt nøjkk ya'at mixy jap windsøn wyindujpy, jap ayuujk yø tu'uk tkajpxwa'añ.

¹⁸ Winets ja soldadi tmøødiyii'ñ ja mixy jøts ttukmadøøø ja wyindsøn, jøts tñimaay:

—Tø øts ja Pablo xyaajxi midi jap tsumy, jøts øts tø xnøjmi jøts øts ya'at mixy nyikme'ent, jap ayuujk tu'uk tkajpxwa'añ.

¹⁹ Winets ja mixy kyøjø'øm ja windsøn y'ukwejtsøø, yikniykxyi abiky jøts yiktøøji:

—¿Ti øts idø'øn xamigajpxwamp?

²⁰ Xjats ja mixy t'adsøøø:

—Jade'en ja israelit jaa'y ayuujk tø tpiakta'akti jøts tø tkajpxy'atti, jøts mets myik'amido'ot ja Pablo jøts jabom xyiknøjkt jap yikutujkpidi y'aguui'py, ja agøjxp tijy ku ka'pxy tpayø'øwya'andi ja pyøky. ²¹ Taayidip ja', kidi xmibiky, jap ja jaa'y yu'uch y'awejaxwa'andi ñiwixijkxy ñaxy jap tuu'agui'py. Tø dø'øn ja møk tymñawyaa'añidi jøts ka' tkugaayiwya'andi tku'uugiwyaa'andi kunim ja Pablo tyimyik'oocktit; jam inet idø'øn ja y'awejaxti, ja'ayi mets ja nugo x'uk'adsojimbett.

²² Winets ja mixy ja windsøn y'ana'amiyøø jøts ku ka'ap pøn ttukmado'ot, xjats jade'eñi møøt ñawyakxøø.

Ku ja Pablo yiktanikejxy ja møj windsøn Félix

²³ Xjats ja møj soldadi windsøn tyaa'jxyii'ñ nimajtsk ja syoldadi jøts t'ane'emy, jøts ja syoldadi nimajtsk magø'pxy ñayjøp'ejxidit pøn tekyjø'øm yø'ødyip, jøts ja nidugui'pxy myajk ja kawaagyøjxpidi, jøts nayide'en nimajtsk magø'pxy ja takuu'møøtpidi. Ja'ats jam nøjxktip Cesarea jøts choondit koots taxujt yaxp. ²⁴ Xjats ja windsøn nayide'en t'ane'emy jøts ja Pablo kyawaayay nayide'en yikmo'ot, jøts nayide'en t'ane'emy jøts ja Pablo yik'ejx'ett, jøts møk møjaa'w yikøyakt ma ja møj yikutujkpi Félix jam. ²⁵ Xjats ja windsøn ja nøky tyik'øiyii'ñ jøts ja soldadi ja yiktamigajxyii'ñ, yide'en ja nøky wya'añ:

²⁶ “Øts nxøøw Claudio Lisias midi møj soldadi windsøn, øts mets ja kajpxpoo'kxin ndaniguejxy mets møj yikutujkpi Félix. Tu'uk øts ja ayuujk nguexy. ²⁷ Jade'en ja israelit jaa'y tø y'adø'øtsti, tu'uk ya'at jaa'y tsumdøøø midi mets ixyam ndagøøjkip. Yø' wyinaty yik'ookwandip, xjats ku øts ojts nnijawi kudam yø' ryomanitjaa'yi, winets ø nninijkxy møøt ja soldadi, ja'agøjxp ja jaa'y kyayik'o'jkøø. ²⁸ Xjats kumi nnijawiwyyampy øts tiku yikni'øøni, jøts yikniykxy jam ma ja israelit jaa'y myøjukutujk'adsinaabyidi, ²⁹ ja'agøjxp yjawi øjts yikni'øøni ku ja ojts tkamimadøø ja israelit jaa'y kyø'øngutujkti, ka'ats pyaat'atyi jøts ku tyik'oocktit, jøts ni kyapaat'atyi jøts puxøjktot y'ett. ³⁰ Tø nyiktuknijawi ku ja israelit jaa'y ñuwinmayiyi jøts yik'oogiyit, paty øts ixya nnaajtskajxi, paty øts nayide'en tø ndukmadøø pøn tni'øø'nidip yø Pablo, wan jam tyikwingukidi jam mets mwindump. Yø'øyi kajpxy me ndaniguejxy. Dioskujyip.”

³¹ Ku dø'øn jade'en ja soldadi ja kutujk yikmøødyøø, winets koots tmøøtso'ondøø ja Pablo jøts jam tmøøtja'ttøø ma kajp txøøwi Antipatris. ³² Winets ja soldadi jam kyimjabom wysimbejtnidøø midi tekyjø'øm yø'ødyip, jøts ja kawaachinaabyidi tjaakmøøtjøjktøø ja Pablo ³³ jam Cesarea, jøts jam tkøoyaktøø ja nøky ma ja møj yikutujkpi jam jøts nayide'en ja Pablo yikøyajky. ³⁴ Xjats ja møj yikutujkpi tpa'ijxy ja nøky, winets tyiknidøøøø øøniidit jaa'y ja Pablo, xjats t'adsøøøøø ku ja Cylicitjaa'yi, ³⁵ xjats ja Pablo yiknimaaay:

—Jaanim øts nmado'ot ja mgajpxy ja m'ayuujk kunim ja mye'endit pøn mni'øø'niyip.

Winets tyikutujky jøts ja Pablo yikpøkjø'økt ma Herodes ja møj kyutujktaajk jam, jøts jam tñanky'ejx'ityiyi.

24

Ku ja Pablo yjanagyugajpxiyøø møj windsøn Félix wyingujkp

¹ Xjats kyimagoxkxøøw'ajty, winets ja møj teetywindsøn Ananías yja'ttøø jam Cesarea møøt ja møjaa'dyøjk, jøts tu'uk ja kajpx'øyibi pøn txøøw'ajtp Tértulo. Jade'en ja møj yikutujkpi jam twingua'w'ajkidøø, jøts ja Pablo tni'øøniwya'andi. ² Xjats ja Pablo jap nayide'en tyikmendøø, winets ja Tértulo ttami'hiñ ja møj yikutujkpi Félix sa Pablo kya'øy'adi'ich, jøts wya'añ:

—Mets møj yikutujkpi, dioskujuyip. Tsuj jotkujk xjagyepy ja mgajp, ka' mā ti tsep tyuñi mets mwijy'ajtingøjxp. ³ Ejtp øøts jotkujk xmø'øy jøts øøts jotkujk nnaxy ndøki ømyadsowi, janchkunuu'kxy øø njawī mets møj yikutujkpi. ⁴ Mets m'ukmaa'kxp, jøts ka'ap øts mdiempi nugo nyikwindigø'oty. Jøts njanchminuu'kxakpy jøts ja tsojkin xjagyapt, jøts øøts n'ayuujk waani xmadoojit. ⁵ Tø øøts wa'ats nnijawi ku ya'atpi jaa'y tu'uk nugo y'ayo'onduñ, jøts tñankñawya'kxyi ja israelit jaa'y wyinmaa'ñ mā jaty yø wyidity, jøts yø' tñigubajk'ajtp pøn tpadundip tu'uk ja nazaretit jaa'y y'ixpøjkin. ⁶ Nayide'en ya'at jaa'y tkuwaawi ja griegit jaa'y jøts øøts ndsaptøjk jade'en nugo xyikma'jtiiy; paty øøts idø'on yø tø nmach jøts øø njatiidyunwa'añ sa øøts ngutujk wya'añ; ⁷ ja soldadi windsøn Lisias øøts jade'en nugo xump jøts ttatøki øøts nwinmaa'ñ, jøts aguwānikøjxp yikpiky yø Pablo, ⁸ jøts øøts xnøjmi pøni pøn nañi'øø'niyip wan ya tmeni me mwindujy, jøts me xpayø'oty jøts xnijawit tuki'iyi sa øøts ja øø'nin nbiktā'aky.

⁹ Xjats ku ja Tértulo jade'en kyajpxkijxy, xjats ja møjigu'uk israelit jaa'dyi pøn jaty jap wyinaty nayide'en tø wya'andi jøts ku ja janch wya'añ ja Tértulo, ka'ap ja tyaa'i. ¹⁰ Winets ja gobernador Félix ja Pablo tyikajpxy, xjats ja Pablo yide'en wya'añ:

—Mets møj yikutujkpi, nay ø ndsøjkpy øts jøts nwindanit ja nbøky mets mwindujy, kumi nnijawip øts ku mets ya jeky yjumøjtjyip tø myikutujktsøoni. ¹¹ Mets kø'øm m'ukyiktiidyøjkp øts n'ayuujk pøni ka' xjanchjawi, ku øts jam wyinaty myakmajtsk xøøwipnim tø njā'aty jam Jerusalén Dios'ajot'ajtpi. ¹² Ka'ap øts jam wyinaty pøn møøt nnachepkajpxyi, nisa øts ja jaa'y ngayik'adi'ich jam møj tsaptøjkjotp, ni jam mā jaty ja chaptøjk ja'adi, ni jam møj kajpjotp. ¹³ Ya'atpi jaa'dyi niti tkananky'eixidit midt yø xani'øø'nidip. ¹⁴ Yø'øyi øts wa'ats nnigajpxpy jøts ku nbaduñ ja Dios midt øøts ejtp nbadumpy. Ka'ats øts yø nmigu'uk israelit jaa'dyi t'øyjawi sa nbaduñ. ¹⁵ Njanchjā'wip øts ja Dios nayide'en sam yø tñanchjawidi ku øø njøp'ixy ku ja Dios ja oo'kpi jadigojk tyikujkpyiky, øy ja oo'kpi y'øyi kya'øyi pøni sa ja y'atsøonidi. ¹⁶ Ja' ndsøjkpy jøts øts ja Dios ejtp nmi'øy'ajtnit jøts nayide'en ja naxwii'ñit jaa'dyi.

¹⁷ Tø øts mawyeen n'atswidity kawinaak jumøjt, jøts øts jadigojk tø nwimbity Jerusalén, jøts øts nmigu'uk nmay'atwa'añ n'ayo'ejxwa'añ, jøts ja Dios nayide'en nwindso'øgiwya'añ. ¹⁸ Ja'ats øts jap wyinaty ndumpy tsaptøjkjotpy sudso ø nbaat nwa'ats'ajtni, ku øts ja israelit jaa'y jap xpaajtøø midt tsoo'ndip Asia, ka'ap øts ja mayjaa'y wyinaty nmøødi, ka'ap pøn ti tuuñ. ¹⁹ Ja'abi dø'on ya mibaat me'endip pøn øts jap ojts xpaatti jøts øts ya xni'øønidit, pøni ñija'widip ja' ku øts jap ndundigøy tsaptøjkjotpy. ²⁰ Uk ku ka' mye'endit sa øts idø'on nwa'añ, wan ya'at tñigajpxt pøn jaty ixyaadi, pøni ojts øts ja nbøky nyiktapaaty ku øts ojts nyiktiidyuñ ja kutujk adsinaabyi wyindujpy. ²¹ Uk jotmøñts øts jade'en xukpøky'atti ku øts ojts møk nmigajpxjø'økti, jøts øts yide'en nnimaay: "Meets ixyam xiidyump ja'agøjxp ku øts njøp'ixy jøts ku ja oo'kpi jadigojk yjujkpyiky jap oo'kpi jutjøtpy." Jade'en øts nnimaay.

²² Xjats ku ja møj yikutujkpi Félix ja Pablo y'ayuujk tmaadoji, winets jaayi tkajpxuky ja payø'øyin ja'agøjxp ku nayide'en tñijawi sa ja Jesús yjanchjā'wibi yjaa'y'atti, paty jade'en tñimaay:

—Wan t'uk'awijxñim jade'en kunim ja mye'ent ja møj soldadi windsøn Lisias, ja'ats øts xjaaktukmado'opnim ka'pxy yø'øbi winmaa'ñ.

²³ Winets ja møj yikutujkpi t'ane'emy ja soldadi jøts ja Pablo chumy'ettnim, jøts tñøjmi nayide'en jøts ja Pablo ja myigu'uk kuwani y'atmigajpxit, pøni pøn jaty mendip kidi ja tkayiknajxnidi.

²⁴ Xjats ja Pablo jap tyaañ winaak xøøwin, winets ja møj yikutujkpi tñøøtja'aty jadigojk ja ñidø'øxy Drusila, pøn nayide'en israelit jaa'y, winets ja Pablo yikyaxtsøøy jøts tñigajpxt sudso'ampy ja Jesús yja' yikjanchjawi. ²⁵ Xjats ja Pablo yikxon jade'en tñigajpxy sudso n'øyjaa'y'ajtindit sam ja Dios tsøkyin, jøts kø'øm nayide'en nnay'ejx'ejti'indit, jøts ku Dios ja naxwii'ñit jaa'y nøjkx ttiidyuñ. Winets ja møj yikutujkpi ojts ja' tkudsø'øgi jøts ja Pablo yiknimaay:

—Nøjkxni ixyam, kunim ø n'awātsit jøts jadigojk nwaadsø't.

²⁶ Xjats ja møj yikutujkpi may ojk ja Pablo twaadsøøy, jade'en ja yjawnmay jøts ja myeen-myø'ojit ayu'uch, winetnims ja tñajtsu'utt. ²⁷ Majtsk jumøjt idø'on jade'en ñajxy, nugo tñaximiwaadsow'ity ja Pablo. Winets ja møj yikutujkpi tyigajtsnaa, jøts jadu'uk tyøjkii'ñ

pøn txøw'ajtp Porcio Festo. Jøts kumi ka'ap ja møj yikutujkpi Félix tmidsep'atwa'añ ja israelit jaa'y, ja'agøjxp idø'on ja Pablo jap tyaañ tsumy.

25

Ku ja Pablo twingunøjkxøø ja møj yikutujkpi Festo

¹ Xjats ja Festo tyøjkijii'n møj yikutujkpi jam Cesarea, jøts kyidigøøk xøøw chøø'n jøts jam pyatøjkijii'n Jerusalén. ² Jamts ja teetywindsøndi møøt ja israelit møjaa'dyøjkti twinguwa'jkidøø ja møj yikutujkpi Festo jøts ja Pablo yikni'øøni. ³ Xjats ja møj yikutujkpi yik'amidøøy ja may'ajt, jøts ja Pablo tnigaxit jøts jam tyikme'ent Jerusalén. Jade'en ja israelit jaa'y wyinaty tø tjaniwinmayidi jøts ja Pablo y'ookt tuu'ajy. ⁴ Xjats ja møj yikutujkpi Festo t'adsojimbijty jøts ku ja kø'øm tsojk wyimbetwa'añ jadigojk jam Cesarea, kumi ixjam ja Pablo tsumy y'ity. ⁵ Winets tnøjmi ja israelit jaa'y møøt ja teetywindsøndi:

—Wa'n tjaa'myindi ne'egi niduknax pøn jaty ku'aa'w'attip, jamts xni'øønidit pøni tødäm ja'abi jaa'y tyundigøy.

⁶ Xjats ja Festo waani tyaa'niyii'n Jerusalén tuktujk xøøwin uk majk xøøwin, winets wyimbijty jadigojk. Xjats kyimjabom ttawa'jtsiyii'n ja kyutujktaajk, winets tnankñajtswaa'wiyøø ja Pablo. ⁷ Xjats ku ja Pablo twinguwa'jkijii'n ja møj yikutujkpi, winets ja israelit jaa'y nayide'en twinguwa'jkidøø pøn jam wyinaty tø choondi Jerusalén. Xjats ja Pablo mayjøøjp møk yjanchyiktani'øøni ja tyundigø'øyin, niti tiy'ajint tkananky'ijxyidi. ⁸ Xjats ja Pablo kø'øm ñagyajpxyiyi jøts tnimaay ja møj yikutujkpi:

—Nipøn niti ngadamidundigøy, ni ja israelit jaa'y kyutujk jøts ni ja chaptøjk, jøts ni ja romanit jaa'y myøjyikutujkpi ngamidundigøy.

⁹ Xjats ja Festo, kumi tyunwajnip ja may'ajt ja israelit jaa'y jøts y'øjgawiyidit, xjats ja Pablo tyiktiy jøts yiknimaay:

—¿Mnøjkxwamp jam Jerusalén? Jamnim øts nbayø'øty ja mbøky.

¹⁰ Winets ja Pablo t'adsojimbijty jøts tnimaay:

—Paat'ajtp øts yaa'y nyiktiidyu'unt, kumi ja møj windsøn César ya kø'øm tø tpikta'aky yø kutujktaajk. Wa'atsxi me xnijawu ku øts ka' yø israelit jaa'y ti ndamidundigøy pøn jap wamp jøts øts ja nbøky ngu'oogit, ¹¹ ka'ap ø nwa'añ jøts øts ngagupøkt ja o'jkin; jøts pøni ka'adam yjanchi mididi øts yø' xani'øø'ndip, nipøn kyapaat'atyiyi jøts øts xkø'yaktit ma israelit jaa'y. Wamp øts jøts ja møj windsøn César øts kø'øm xiidyu'unt.

¹² Xjats ku ja Pablo jade'en kyajpxkixy, winets ja møj yikutujkpi møøt tkajpx'øyiyii'n ja pyutanaabyi, winets yiknimaay ja Pablo:

—Tø kø'øm mwa'añ ku ja møj windsøn César mdidyuniyit. Ja'ats idø'on mninøjkxp.

Ku ja Pablo twingunøjkxøø ja rey Agripa

¹³ Xjats ku ja Pablo jade'en yiknimaay kuts tu'uk majtskin ja xøøw ñajxy, winets ja rey Agripa ojts ñinijxyiyi møøt ja Berenice, ja'ats t'atskajpxpoo'kxtip ja Festo. ¹⁴ Winets jam ojts kawinaak xøøw tyaa'nidi, xjats ja Festo ttamimadyaajky ja rey sa ja Pablo pyøky jap, jøts tnimaay:

—Ja ya tu'uk ja jaa'y mididi ja møj yikutujkpi pasadi puxøjkjotpy yiktaañ. ¹⁵ Ja'ats møk pyayø'odyip ja teetywindsøndi møøt ja israelit møjaa'dyøjkti. Xjats ku øts ojts n'øch Jerusalén, winets øts jam ojts xwinguwa'agidi, jøts øts møk'ampy xnimaadyi jøts øts nnankyik'oogit yø Pablo. ¹⁶ Xjats øts nnøjmi jøts ku ka'ap jade'en ja romanit kyutujk wya'añ, ka'ap pøn ayu'uch nugo ñanky'oogidit, kuwani ja payø'øyin tyunit jøts kø'øm ñawyindaniyidit pøni ti pønjabøn ñi'ii'mpy. ¹⁷ Ku ya yja'ttøø ja israelit jaa'y, ka'ap øts tiempi nugo nyikwindigøøy, jaty kyimjabom ja ngutujktaajk ndawa'jtsiyii'n jøts ja Pablo nnankyikmejni. ¹⁸ Ku ja myendøø pøn jaty øø'ndip, ni tu'uk ja tka'uktapaatnidi ja pyøky mididi'ibi øts idø'on n'ukjøp'ijxpy. ¹⁹ Ja'ay nugo yiktani'øø'ni ja chinaa'yin, jøts nayide'en pøn txøw'ajtp Jesús, pøn ojts y'øky jøts ja Pablo wya'añ ku ja yvjuky'aty. ²⁰ Jøts øts ka' nmidaabyaaty sudso'øy øts kø'øm nyikjøpkøxt yø'øbi winmaa'n, paty øts yø Pablo n'amidøøy pøni nøjkxwamp Jerusalén jøts jam yiktiidyu'unt. ²¹ Kumi yø' kø'øm waan jøts jam yiktiidyu'unt ma ja møj windsøn César Augusto, paty øts jap nyiktsummy'ity kunim øts jam ngaxt møj windsøn windump.

²² Xjats ja rey tnimaay ja Festo jøts ku ja nayide'en tpatmadoowa'añ ja Pablo kyajpxy. Xjats ja møj yikutujkpi t'adsojimbijty, jøts tnimaay:

—Jabom ja x'ukmado'ot.

²³ Xjats kyimjabom'ajty, winets ja rey Agripa yja'ttøø møøt ja ñidø'øxy Berenice, xjats ojts yjanchyikmøjpikta'akti jøts jap tyøjkidøø møj øjkjøtpy møøt ja soldadi windsøndi, jøts nayide'en ja møjaa'dyøjkti pøn jaty jam kugajp'ajttip. Winets ja Festo twaadsøøy ja Pablo, ²⁴ jøts ttukmadøøy niduki'iyi ja windsøndøjkti, jøts tnimaay:

—Mets rey Agripa, jøts tuki'iyi pøn jaty ya tø myendi, ixya dø'øn ja jaa'y mididi ixyam mbatmadoowajnidip y'ayuujk. Tø øts idø'on ja israelit jaa'y namay øy xmi'øøndi ya'at

køjx jade'en ya jøts nayide'en jam Jerusalén, ejtp ø xnøjmidi jøts mibaat ku yø tyimyo'ookt. ²⁵ Ka'ats yjawi ti møj tundigøø'yin tjagyepy jøts ja' tku'ooigt; kø'øm yø t'amidøø yøts jam nøjx yiktii'dyufi ma ja møj windsøn Augusto jam, paty øts nayide'en jam ndyimgyajxwa'afñ. ²⁶ Meets migu'ukti, ka'ap øts nmidaabyaaty ti pøky øts ndapaatp ya'atpi jaa'y, sudso'ampy øts nøky nyik'øyt jøts tnijawit ja nmøjwindsøn, jøts paty øts ixyam nyikmiñ mee mwindujy, jøts me rey Agripa x'ukpatmado'ot jøts øts xuknijawit midii'ibi ayuujk øts idø'øn ngaxp. ²⁷ Janchnigyumaap ø njaty ku øts ja pøkyjaa'y nugo njanch'ukaxt, jøts ni ngatukmado'ot øts nmøjwindsøn pøni ti pøky yiktani'øø'nip.

26

Ku ja Pablo tnigajpxy ja chinaq'yin jam rey Agripa wyindump

¹ Winets ja rey Agripa tnimaay ja Pablo:

—Mbaat'ajtip jøts me kø'øm mgajpxt.

Xjats ja Pablo ja kyø' tyikpidi'ijky, jøts yide'en kyajpxøjkiyifñ:

² —Njanchtaxondakpy øts ku øts xyikajpxwa'afñ ya mets mwindujy, jøts øts kø'øm nwindanit tuki'iyi pøni sa jaty øts ja israelit jaa'y xka'ødyejti. ³ Øy'ajtp nayide'en kumi mets mnija'wip tuki'iyi øøts ndsinaq'yin sa øø n'israelitjaa'y'aty, jøts ti jaty øøts ejtp nnadyamigajpxiyip. Paty mets n'amidøø jøts waani x'ukmado'ot øts ngajpxy.

Sa ja Pablo chinaqy myijawyeen ku ka'anin tyiktigach ja chinaq'yin

⁴ 'Nija'widip nmigu'uk israelit jaa'y niduki'iyi sa øts njaa'y'aty jam Jerusalén ixymbaadyim. ⁵ Pøni nīgajpxwandip wan tnigajpxti, kumi nija'widip yø' nayide'en ku øts mutskyi ja fariseit ixpøjkin nbadojkiyifñ midii'ibi ka'pxy tpadundip ja Moisés kyutujk. ⁶ Ja'agøjpx øts nyikni'øøni ku øts njø'ixy ku ja Dios Teety ja oo'kpi jadigojk tyikjujkyiy jap oo'kpi jutjøtpy, kumi jade'en ja Dios Teety kø'øm ja wyandaajkin tmø'øø øts n'apteety'amøj jøts jade'en ttu'unt. ⁷ Jøts niduki'iyi makmajtsk kajp ja israelit jaa'y tjøp'ejxtit jøts ku ja Dios ja wyandaajkin tyikjøpkøxt, paty ejtp t'ajot'attit ja Dios jøts tjä'myatsti jøpy ux. Mets rey Agripa, nay yø'øbi winmaa'ñ øts idø'øn yø nmigu'uk israelit jaa'y xkada'øyja'widip, jøts øts xani'øøni. ⁸ ;Ka' mee nayide'en xjanchjawi jøts ku ja Dios ja oo'kpi tyikjujkyiy jadigojk?

Sa ja Pablo jawyeen tjemduuñ tteduufi ja Jesús yjanchja'wibidi

⁹ Øts kø'øm ojts nwinmaa'mbyaaty jøts øts ja Jesús Nazaretit yjanchja'wibidi ojts o sa nduujnyi, jøts ø møk nyik'ayo'ombaa'øø. ¹⁰ Jade'ents øts idø'øn jam n'adijch Jerusalén ku øts ja teetywindsøn xmo'odi ja tiy'ajtin jøts øts ja Jesús yjaa'y namay ndsujmyit; jøts nayi waan øts idø'øn jøts y'ooktit. ¹¹ Kawinaak ojk øts idø'øn kø'øm ja møk nyik'ayo'ombaa'øø, jøts kuwani ndukmajtsu'utti ja yjanchja'win. Jade'en øts idø'øn n'adijch ma jaty ja chaptøjk, janch awa'an'ampy øts idø'øn nbawidijty jagamgajp paat.

Ku ja Pablo jadigojk tnimadyaajky sa ja chinaq'yin tyiktigach

¹² 'Nay yø'øbi winmaa'ñ øts wyinaty nminijxpy jam Damasco sa øts ja teetywindsøn wyinaty ja kutujk tø xmo'øø. ¹³ Winets ø kujkøøw et jam tuu'am ojts n'ejxpaaty tu'uk ja jaj midii tsajpjøtpy kyidaajky, janch møk idø'øn ja yjajy nika'ap ja xøøw jade'en yjajy, jøts øøts ja jaj ojts tuki'iyi xnawidity pøn jaty øts jam wyinaty nmøøt. ¹⁴ Winets øøts niduki'iyi nnaxkidaajky, jøts øts nmadoøø tu'uk ja hebreit ayuujk øt ø xnimaay: "Saulo, Saulo, ;tiku ø xjemdunwa'afñ xedunwa'afñ? Kø'øm mnay'ayo'onduniyi jade'en kidi tsakaq ku ja ti tnepy jøts ja kø'øm kujp nadyukyø'ødyiyi." ¹⁵ Winets nnimaay: "¿Windsøn, pøn mets?" Winets øts jatyi nwindøn'ajtim xnimaay: "Øts Jesús Nazaretit jaa'y, nay ja' pøn nmjಂದುmpy mdedumpy. ¹⁶ Pidø'øk wa'kuki, ja'agøjpx øts ixyam kø'øm nnanky'ijxyi jøts øts xmidu'unt, jøts mgugajpxy'att pøni ti jaty ixyam nduk'ijxpy, jøts pøni ti jaty me njaaktuk'exp. ¹⁷ Øts mets nnøø'mo'op nduu'mo'op jam israelit jaa'y etjotp, jøts nayide'en ma ja jaa'y kya'israelitjaa'yidi ma mets ixyam ngajxwa'afñ. ¹⁸ Yide'en idø'øn jam nøjx mduñ, jøts ja jaa'y xkajpxwejt jøts ja ka'øø winmaa'ñ tmajtstu'uttit, jøts ja tsuj winmaa'ñ tpaøktit. Kidi ja mik'u' y'ana'amin t'ukupøjkiyidi, ja Dios yja' tu'ugyi pyaduujnidip; jade'en xukmado'ot jøts ku øts nja' xjanchja'widit, jade'en'ampy yikpojkpimaa'kxtit, jøts nayide'en yikmo'odit ja øy'ajtin ja tsuj'ajtin møøt ja'adi niduki'iyi pøn jaty ja Dios tø wyinaty tyikpøkywa'ach."

Ku ja Pablo tpaduufi ja ayuujk midii tsoo'mp tsajpjøtpy

¹⁹ 'Mets rey Agripa, nbaduujni øts idø'øn tuki'iyi sa jaty øts ja Jesús xnimaay ku øts ja y'ayuujk nmadoo'øø midii jap tsoo'mp tsajpjøtpy. ²⁰ Winets øts jam n'uktukmadowdi jawyeen pøn jaty jam wyinaty Damasco jøts nayide'en Jerusalén, jøts jam nayide'en tuki'iyi pøn jaty Judea etjotp, winets øts n'uktukmadowdi pøn ka'israelit jaa'y, jade'en øts jam n'uktukmadoøø jøts ja pyøkyu'unin tmajtstu'uttit jøts ja Dios yja' tu'ugyi tpaduujnyidit,

nayide'en tsuj yjaa'y'attit jøts jade'en tnan'ky'eixidit ku ja chinaa'yin tø tyiktigtatsti. ²¹ Ku øts ja jaa'y jade'en ngajpxwejtji ja'agøjpx øts ja israelit jaa'y jap xmajtstøø tsaptøjkjøtpy jøts øts ja' xuku'oogiwya'andi. ²² Møj øts ja Dios ja pudøjkin xmoø'y ku øts ixymbaæt ja kyajpxy y'ayuujk ngajpxwā'kxiyi, jøts ø ndukmadø y niduki'iyi pøn jaty ixpiky pøn jaty ka'ixpiky. Nijuuni øts ja jaa'y ja wenkpi ayuujk ngadukmadø y, yø'øyi ngajpxy nayide'en sã ja Dios kyugajpxy jøts sã ja Moisés ojts wya'andi, ²³ ku ja yiknitsokpi kuwani y'ayo'ombaatt jøts ku ja wyinaty tø y'øøky, ja'ats myjawayeen tunjøpip ku ja yjujkyøkt jadigojk jap oo'kpi jutjøtpy, jøts jade'en øøts nja'a'y ttuknijawit ja wa'ats'ajtin møøt tuki'iyi ja naqxwii'ñit jaa'y.

Ku ja Pablo tjadukmibøkwaqñ ja rey Agripa jøts tpadu'unt ja Jesús yja'

²⁴ Xjats ku dø'øn ja Pablo jade'en ñagyugajpxiyi, winets ja møj yikutujkpi Festo møk'ampy yjanchkajpxy, jøts ja Pablo yiknimaay:

—iMjanchmo'tp me Pablo! Yø m'ixpiky'ajtin me nugo myikmo'tjtip.

²⁵ Xjats ja Pablo t'adsojimbijty jøts tñimaay:

—Mets øy møj yikutujkpi, ka'ap øts nmø'øty; tiy øts idø'øn nwa'añ midt øts ngajpxpy.

²⁶ Ixyã dø'øn ja rey Agripa pøn yø'øbi winmaa'ñ wa'ats tñija'wip, paty øts yã jotmøk ngajpxy yø' wyindujy; wamp øts idø'øn ku yø' tñijawi tuki'iyi, kumi ka'ap ja jam ayu'uch yajty midt øts idø'øn nnigajpxpy. ²⁷ ¿Mjanchja'wip mets rey idø'øn sã ja Dios kyugajpxy wya'andi? N'ijxpy øts ku yjawi xjanchjawit.

²⁸ Xjats ja rey wyaqñ:

—Kuk øts jeexyip jawaa'ni xjaaktukmadø y, tøk øts yø jeexyip ngupiky.

²⁹ Xjats ja Pablo y'adsøøy:

—Øyi ja waani uk øyts ja yjamayi ya'atpi ayuujk, ka'ayi mets ja'ayi nadyu'uk xjanchjawit, wa'ambim ja Dios niduki'iyi tjanchjawidit pøn jaty øts n'ayuujk yã tø xmadooji.

³⁰ Ku dø'øn ja Pablo jade'en kyajpxkijxy, winets ja rey niduki'iyi wya'kukidøø møøt ja møj yikutujkpi, jøts møøt ja ñidø'øxy jøts pøn jaty jap wyinatyi, ³¹ winets abiky ñjøkxti jøts jap tkajpx'øyidi ja Pablo pyøky, jøts yide'en ñawyajnidøø:

—Ka'ap yø'øbi jaa'y yjawi ti tuñ jøts yø' tku'oogit, jøts ni nayide'en kyapaat'aty jøts jap puxøjkjøtpy y'ett.

³² Winets ja rey Agripa tñimaay ja møj yikutujkpi Festo:

—Tø yø jeexy yikmajtstu'tuty ku yø jeexy kø'øm tka'amidø y jøts ku ja møj windsøn César tyidyuniyit.

27

Ku ja Pablo yikejxy Roma mā ja møj kutujktaqjk

¹ Xjats ja møj yikutujkpi twinmaadyøø, winets ja Pablo yikajxwa'andi jam Italia møøt ja myibuxøjk jaa'y pøn jaty jap wyinaty tsumdyi, jøts nayide'en øts nmøødi pøn yã'at nøky tjaapy. Winets ja soldadi pyøkø'jkidøø midt txøøw'ajtp Julio jøts midt tñigubajk'ajtp tukpiky ja soldadi, ja' xyøøw ja soldadi tukpiky Augusto. ² Jam wyinaty nayide'en tu'uk ja Macedoniit jaa'y midt kugajp'ajtp Tesalónica, ja' xyøøw Aristarco. Winets øø tuknax ndøjkiyi'ñ møøt ja Pablo jap barkijøtpy, jam ja barki wyinaty tø chøøñ Adramitio, jøts ñjøkxwa'añ mā jaty ja kajp jam Asiit etjotp. ³ Xjats øøts jam ndsøø'ñ Cesarea, jøts øø kyimjabom nja'aty mā kajp txøøwi Sidón, jamts ja soldadi Julio t'ayo'ixy ja Pablo, jøts ja myigu'uktøjk t'atstukmigajpxy jøts ja myigu'uktøjk yikpoo'kxiyi. ⁴ Xjats øøts jadigojk ndsøø'ñ Sidón, winets øøts ja poj møk'ampy xjøpkuyø'øyiyi'ñ, paty øø kuwani nnayø'ø y aga'ñ'ampy ja et midt txøøw'ajtp Chipre, mā ja poj tuda'aky yø'ø y. ⁵ Xjats øøts ja mejy ndanajxy jam Cilicia y'et'amidiy jøts nayide'en Panfilia y'et'amidiy, winets øøts nja'jty mā kajp txøøwi Mira jam Licia y'etjotp.

⁶ Jamts ja soldadi tu'uk t'ixaay ja barki, jøts ojts t'ejxpaaty tu'uk midt tø wyinaty chøøñ Alejandria jøts jam ñijxy Italia, jøts øøts jadigojk xyiktøjkiyi'ñ xjats øø ndsøø'ñ. ⁷ Kawinaak xøøw øøts idø'øn jade'en udy'a'agy i n'awidijty, jøts øøts awisa jam njanchja'jty jam Gnido kajp y'amidiy, kumi ka'anim wyinaty ja møk poj y'amøki winets øøts jade'en'ampy jadigojk n'awidity Salmón kajp y'amidiy. Xjats øø nnayø'ø y mā ja mutsk naajx jam mejy kujk'am midt txøøw'ajtp Creta. ⁸ Xjats øøts jade'en awisa njanchjanayø'ø y ja naajx mejyotp, xjats øøts awisa nja'jty mā kajp txøøwi Buenos Puertos jam Laseit kajp wingon.

⁹ Tø øøts wyinaty jeky ndaa'niñi mejyotp, janch tsø'øgi møøt wyinatyni, jade'en'ampy ku wyinaty ja xuxpyo j myenwani paty ja Pablo tjanimaay ja yikbarkiyø'øbyi, ¹⁰ jøts wyaqñ:

—Meets migu'uktøjkti, ka' yjawi y'øytit ku ndso'ongojm'i'ndit, nnajtja'wip øts ku yjawi mayjøøjp n'ayo'ombaajtndit, windigø'øpy yø barki møøt ja pyikta'aky, nayi kø'ømbaæt yjawi adø m nwindigø'øyindit.

¹¹ Ka'ats ja soldadi ja Pablo y'ayuujk tmibøjkøø, ja' ne'egi pyabøjk ja barki wyindsøn jøts ja yikyø'øbyi. ¹² Janch møk idø'øn xyuxy jøts yjanchpøjy jam Buenos Puertos, paty namay

yjanchwandøø jøts øy'ajtp øøts jam ne'egi ndsoont, jøts pøni majadaqk øøts jøts nja'att Fenice midni nay jam tamp Creta y'etjotp, jamts øø nyiknaxt ja xuxtyuu ja'agøjxp ku ja poj ka'ap jam jadine'en tyøki.

Ku ja poj yik'adøtsni bøjkiñaa ja mejy

¹³ Xjats ku ojts waani y'amøki ja poj, winets pyojkeejky jaduktamajñ jøts ja jaa'y wyandøø øy'ajtp jøts yjaakyø'odyit. Xjats øø ndsøø'n, jøts øø nyø'øy mejpya'am et, jøts øø nnajxy Creta wingon. ¹⁴ Kuts waani y'ijty, winets ja poj møk'ampy yjanchmiiñ midy yiktejp Nordeste. ¹⁵ Ja'ats ja barki møk tjøpkuwojpoø jøts nugo wyejtsma'tiyøø, jøts ni sudso'ampy ja kya'ukyikmajadaajkniyi ja poj, xjats øøts ja ndyimy'ukmajtstutni, wan tyiknijky pøni ma tyiknijky. ¹⁶ Xjats øøts jam nnajxy ja' yjøkø'øm ma ja naajx lii'nim mejkyuk'am midy txøøw'ajtp Clauda, ma jam ka'ap jadine'en møk pyøjy. Jamts ja mutsk barki midy yikpajidøjtp, ja'ats øøts awisa njanchyiktøjkiyi'n jap møj barkijøtpy. ¹⁷ Kuts øøts jade'en nyikpatkijxy ja mutsk barki, winets ja møj barki ja møj tejpky yikta'awøø'nmuiky. Xjats kumi tsø'øgidip ja jaa'y ku ja barki jam tyøkit pu'jotp midy txøøw'ajtp Sirte, winets ja majpky møj wet twestjødøø midy ja poj møøt tminamyajtsip, ¹⁸ jøts øøts ja tsimy jamyi tuki'iyi nguwojnaxkijxy mejjyotp; ¹⁹ jøts kyimdigøøk xøøw ixanims øøts ndyimy'ukuwojnaxkøjxni tuki'iyi ti jaty ja barki jap wyinaty myøøt'ajtpy. ²⁰ Kawinaak xøøw øøts jade'en nugo agubajky njanchyø'øy, niti øø nga'ijxy ni xøøwi ni maadsa', ja'agøjxp ku møk yjanchtuuyøøch. Ka'ap øø n'ukjøp'ejxni jøts øøts jam jujky nbidsø'ømt mejjyotp.

²¹ Xjats øøts jade'en kawinaak xøøw n'ayuu'ijty, winets ja Pablo ojts wya'kuki jam jaa'y agujkp jøts wyaañ:

—Migu'uktøjkti, øy'ajtpik jeexy kuk øts n'ayuujk xmadøjidøø, winetsik ngatso'oñindøø jam Creta jøts y'a'atpi ayo'on jeexy jane'en ngapaajtyindi. ²² Kidi mjotmay'oøkti, øy yø barki wyinaty yjawindigøy, nipønts kya'oøkt. ²³ Mnija'wip meets ku øts ja Dios Teety nmøøt n'ity, jøts ku øts ja y'ayuujk nbaduujniyi, ixyamgoots øts nwindson'ajtim tu'uk tø xaniguexy ankilis ²⁴ midy øts tø x'atsnøjmi: "Ni mgatsø'øgit Pablo, kuwani jam Roma xwinguwa'agit ja møj windsøn César, ja'agøjxp ja Dios myiknitsø'ok'atidit niduku'iyi, jøts nipøn tu'ugin kya'oøkt ja barkijøjty." ²⁵ Paty migu'uk ixyam nniagjpxy, møkpiakta'akti mwinmaa'n, njanchja'wip øts ja Dios jøts nnijawy ku kuwani jade'en tyikjatt sa øts ja ankilis tø xnøjmi. ²⁶ Ja' ku kuwani ja møk poj jam nøjkk xnajtsjibejpi'indi ma ja naajx jam mejjyotp.

Jade'en idø'øn ja Pablo tnimaay ja myigu'uk.

²⁷ Majtsk samani øøts idø'øn wyinaty tø nwidity barkijøtpy, winets øøts jam ojts koots nja'aty ma møj mejy txøøwi Adria, møk idø'øn ja poj ja barki jam tjanchyik'adi'ich. Xjats ku chuu'm'ajty, winets ja yikbarkiyø'øbyi tñajtsja'widøø ku ja barki ja naajx yjawi tpaatwani. ²⁸ Winets tkejpxti ja nøø kyøjnk'ajtin, xjats t'ejxti ku ja ee'pxmaktujt metri kyøjnki; xjats jawaani yjaakyø'ødyøø jøts jadigøjk tkejpxkøjmidi, xjats t'ejxti ku ja ee'pxtaxukj metri kyøjnki. ²⁹ Winets chø'jkidøø ja yikbarkiyø'øbyi ku jotmøn ja barki jam wyinguwopit møj tsaagøjxp, winets ja yikbarkiyø'øbyi ja møj pux'ajo'jk twendidøø maktaxk, xjats ja tñiwøjidøø kunim ja jap nøøbatki'py muum y'ajø'øky, xjats ja barki jade'en wya'k'amøkiyi'n. Janch tsø'øgiyawy dø'øn ja jam tyiknaxti ku poj in yjanchkaxijñi. ³⁰ Jøts wyinmaydi ja yikbarkiyø'øbyi jøts kya'akwa'andi jam møj barkijotp, winets jam ñøjkxti barkijøp'am, jade'en ñadyjy ttunwa'andi jøts ja pux'ajo'jk tjaakpikta'akwa'andi jap mejy'ok'ajpy, ja'agøjxp ojts tyikpidsømwa'andi ja mutsk barki jøts jade'en kya'akwa'andi. ³¹ Xjats ja Pablo t'ejxpaajty, jøts jade'en ttukmadøøy ja soldadi jøts nayide'en ja mysoldadi, jøts tnimaay:

—Ku yø yikbarkiyø'øbyi ya kyata'andit, ni sudso'ampy adøm ya ngapidsøø'mindit.

³² Winets ja soldadi tmdsjukidøø ja mutsk barki jøts nøøjotp tyiknaxkidaktøø, ja'agøjxp jøts nipøn kyaka'akt.

³³ Xjats ku xiijndyaaajky, winets ja Pablo tnimaay ja myigu'uk jøts o winø'øn in kya'adyit, jøts tnimaay:

—Tø yjawi myajtsk syamaniñi ku jade'en mgama'adi jøts ni mgakaydi. ³⁴ Øts wamp jøts winø'øn in mga'adyit jøts ja møjaaaw xpøktit, pø ixyam inet nipøn inet tu'ugin kyawindigø'øty.

³⁵ Xjats ku ja Pablo jade'en tkajpxwijy ja myigu'uk, winets tñixajiyi'n tu'uk tsapkaaky jøts ja Dios ttamøja'wiyi'n jam myigu'uk wyingujkp, jøts ja kø'øm kyaay. ³⁶ Xjats ku ja myigu'uk t'ejxtøø, winets ja yjotkujkidøø jøts kyaadyøø nayide'en. ³⁷ Majtsk magø'pxy ja tugui'pxmaktujt øøts jap wyinaty njaa'y'aty barkijøtpy. ³⁸ Xjats ku kyaagyøxtøø, jøts ja ariimbajk kunchi'am tuki'iyi jamyi t'ukniwibejpatkøxnidøø mejjyotp, jøts jade'en ja barki tyiktøø'tskyidøø.

Ku ja barki myajty jam mejy'am

³⁹ Xjats ku dø'øn xiijndyaaajky, winets ja yikbarkiyø'øbyi ni tka'ejxkapti ja naxwii'ñit pø ma dø'øn jam wyinaty tø tyaandi, ja'ayy ku t'ejxpaatti ja mejpyaa' ma ja nøø ja poj jam møk kayik'adi'ichiyi, winets wyinmaydi jøts ja barki nugo tyikyø'øpyidsømwa'andi ma ja

nøø jam t'ejxti ja pyaa'. ⁴⁰ Xjats tmidsujkidøø ja pux'ajo'lj'k midi ja barki tmäch'ejtp, jøts ja japyi tyiktaandøø mejy'ok'ajpy. Winets ja jøpmiweenguipy tkajo'ongøxtøø midi ja barki twejtsyø'øpy, jøts ja majpxwyet nayide'en jam tkud'idyøø barki jøp'am. Xjats ku ja poj ja tmajch, winets ja barki jam udy'a'aky y'ukyø'øpyidsømwa'añ jam mejpya'am. ⁴¹ Xjats jam ojts adsu'jky t'øki ma ja nøø jam ñawyinaxyiyi, winets ja barki yjøøjp jam ojts møk'ampy kyutopi pu'jotp, ma ja nøø jam wyinaty yø'øy'awidity. Jamts niwin'ø'ønin kya'ukyuu'lkxni, xjats ja mejy møk'ampy ojts pyetyiyi jam y'ix'am'ampy, jøts ja barki'ø'jx jade'eñi ja nøø tyakø'jtsiygyjxyiøø. ⁴² Xjats ja soldadi wyinmaydi jøts tyik'ookwa'andi ja pøkyjaa'y, ja'agøjxp ku jotmøn kya'aktit jam mejjyotp. ⁴³ Ka'ats ja soldadi wyindsøn ja Pablo tnankyik'ookwa'añ paty ka' tyikajjty, ja'ayi t'ane'emy pøni pøn tjajtp ja nøøyumk wan ja jawyeen tnøðkidi jøts myejpyidsø'ømdit. ⁴⁴ Jøts nayide'en t'ane'emy pøn jaty tkajajtp ja nøøyumk, wan ja pu'gyøjxp tyø'ødyi, uk øy'ajtp nayide'en barki pidasikøjxp. Xjats idø'øn jade'en niduki'iyi jujky myejpyidsø'ømdøø.

28

Sa yjajty sa kyubejty ja Pablo jam ma naajx txøøwi Malta jam mejjyotp

¹ Ku øøts idø'øn jade'en tum jujky jam nbidsiimy mejjyotp, xjats øø nnija'wiyii'ñ kudam ja et jam txøøwi Malta midi jam mejkyuk'am. ² Winets øøts ja Malta jaa'y jam janch tsuj xwindøø'jkiyi'ñ, jøts ja jøøn tyikmøjidøø janch møj, ja'agøjxp ku yjanchxuxy ja et jøts ja tuu nayide'en. Winets øøts nyikyaajxyiyi'ñ niduki'iyi, jøts øø nnay'ajo'kxyiyi. ³ Winets ja Pablo nayide'en t'atskajpmuky ja tø'øts ja'axy, ja'ats wyinaty yjøn'o'lj'xip winets ja awa'andsaa'ñ jam tu'uk pyidsiimy ja'ax agujkp ku ja jøøn y'ikyiyi. Xjats ja Pablo yiktsu'lj'ch kyøø'øm. ⁴ Xjats ku ja kugajp t'ejxpaahti ku ja juyjuk jam tyiñi Pablo kyøø'øm, winets ñawyajnidøø:

—Yikjaa'y'oo'kpi ya'at yjawi, øy jap mejjyøtpy yjabidsimy jujky, ixyamts kø'øm ja Dios ja tiädu'unin tø myø'øyi jøts y'oookt.

⁵ Xjats ja Pablo tjønwejtsiyii'ñ ja tsaa'ñ jøts jade'en myatstuujtyøø, nisä dø'øn ja Pablo kyø' kyajajty. ⁶ Tum jade'en idø'øn ja jaa'y ja jøp'ejxti juuni ja kyø' kyexpøkt, uk juunets yik'oogiyi. Ku dø'øn ja jade'en tjajøp'ejxtøø, xjats t'ejxti ku ja Pablo niti kyajatyiyi, winets ja wyinmaa'ñ jatyi tyiktigatstøø jøts ñawyajnidøø ku ja Pablo Dios ja'.

⁷ Xjats ku dø'øn jam jade'en yjajty, jamts wyinaty tu'uk wingon chøøni ja jaa'y pøn ja kajp jaa'y tniwindsøn'ajtp, ja' xyøøw Publio, ja'ats øøts jam xwaaw tyøjkjotp, jøts øøts jam tigøøk xøøw janch tsuj xyikja'adaajky. ⁸ Jamdam wyinaty Publio tyeety pyiky jøømba'am, jøts nayide'en ja ni'lj'pya'am tmøødi, winets ja Pablo ojts tniinjky jøts t'atsmigajpxy. Ja'ats ojts tkudsapajpxy jøts ja pamaa'y jaa'y myøkpjky ku ja ojts tkønixajy. ⁹ Winets ja Pablo niduki'iyi ja pamaa'y jaa'y ñimejnyøø pøn jaty jap wyinaty kugajp'ajtp jøts jade'en choktøø. ¹⁰ Winets øøts may ja may'ajt jadi'iñi nyikmøø'y, xjats ku øøts jap barkijøtpy ndsoonwaañi, xjats øøts tuki'iyi xmøøy pøni ti jaty øøts xka'ejtxip.

Ku ja Pablo yjajty jam Roma

¹¹ Tø øøts jam wyinaty tigøøk po' ndsinaa'ni jam Malta, jøts øøts ja tu'uk ndatøjkxyii'ñ ja barki midi jam nayide'en tyiknæj ja xuxpyoj. Jamts ja'abi barki majtsk ja dios awanax txox'aty midi tyejtip dios Castor jøts ja dios Pølux; ja'abi barki dø'øn ja wyindsøn kugajp'ajtp Alejandria. ¹² Xjats øøts jade'en ndsøø'ñ, winets øø nja'jty ma kajp Siracusa, ma øøts ndaañ tigøøk xøøw. ¹³ Jamts øøts ndsøø'ñ jadigojk jøts øø nnijkxy Regio. Jøts øø kyimjabom ndsøø'ñ, winets ja wimbatpoj myiñi, ja'ats øø møk xpadej jøts øøts jam nja'jty kyimajtsk xøøw ma kajp txøøwi Puteoli. ¹⁴ Jamts øø nbaajty winaagin nmigu'uktøjk pøn ja Jesús yja' tpadu-ujnidip, ja'ats wandøø jøts øøts ja jam nmøøtaa'nit tu'uk samani, winets øøts jam tekyjø'øm ndsoo'naa jøts øøts nnijkxy Roma. ¹⁵ Tø øøts ja wyinaty xnijawi ja nmøøtjanchja'wibidi, ja'ats jam tsoo'ndøø Roma jøts øøts x'atspatsøy tuu'am ma kajp txøøwi Foro de Apio, jøts nayide'en øøts jam ojts ja winaagin xpatsøy ma ja'taa'jk txøøwi Tres Tabernas. Xjats ku ja Pablo ja myigu'uk twin'ljxy, winets ja ttamøja'wiyii'ñ ja Dios jøts jotkujk ja ñayja'wiyøø. ¹⁶ Xjats ku øøts jam nja'jty Roma, jøts ja soldadi windsøn tkøyajky ja pøkyjaa'y jam ma ja puxøjk adsinaabyi windsøn. Winets ja Pablo yiknimaay jøts ja tyøjk abiky t'ixa'at, ja'ayi ku nugo tu'uk ja soldadi y'ejx'ityiyi.

Ku ja Pablo kyajpxwa'kxy jam Roma

¹⁷ Xjats ku dø'øn jam jade'en ja Pablo chinaay tigøøk xøøw jam tyøjkjotp, winets twaa'dsøøy ja israelit jaa'y ja myøjaa'dyøjkti, xjats ja ñamyujkidøø, jøts ja Pablo tniimaay:

—Migu'uktøjkti, niti øts ngadamidundigøy ja nmigu'uk israelit jaa'dyi, jøts nika'ap øts nayide'en nmidundigøy ja møjaa'chinaa'yin, kuwanits adøm nmigu'uk israelit jaa'y xmajch jam Jerusaleñ, jøts øts ojts xkøoyky puxøjkjotp ma romanit jaa'y kyutujk jam. ¹⁸ Ku øts nyikti'dyuuñ, winets øts jadi'iñi xmajsttu'utwandi ja'agøjxp ku øts nbøky ni tu'uk xkapaajtidi midi'ibi øts xuku'oogiywandip. ¹⁹ Ka'ats ja israelit jaa'y tyikjatwa'andi jøts

jadi'iñi nyikmajtstu'utt, ja'agøjxp øts kuwani n'amidøø yjøs øts ya xiidyu'unt ja romanit mõj windsøn. Ka'ap øts ja' ya nnimiñ jøs øts nmigu'uk israelit jaa'y ja' ndani'øønit. ²⁰ Yø' meets icyam ndaniwaadsøøpy, jøs meets ka'pxy ndukmado'ot tigøjxp ku øts jade'en puxkadeen køwiiñ n'ity; ja'agøjxp ku adøm niduki'iyi israelit jaa'y njøp'ijxyindi ku ja Dios ja oo'kpi jadigojk tyikjujkyiky jap oo'kpi jutjøtpy.

²¹ Xjats ja mõjaa'dyøjk t'adsojimbettøø, jøs wyandøø:

—Ni tu'uk øøts ja israelit jaa'y ñøky ya xkapaaty mets køjxp, jøs ni tu'uk adøm nmigu'uk israelit jaa'y nisa kyawa'añ. Ka'ap pøn mga'ødyijyiyi pøn jam tsoo'imp jøs ya tø yja'aty.

²² Nija'wip øøts ku yø' o maðsoo yikpagajpxy pøn yø jemy ixpøjkin tjanchja'widip, paty øøts ndsøky'aty jøs øø xukmado'ot.

²³ Winets tkajpxy'ajttøø ti xøøw jadigojk ñamyukidit, xjats ku tpaajty ja tiempi winets ja jaa'y may ñamyukidøø ma Pablo jap wyinaty tø yja'ada'aky. Winets ja Pablo jøpyi kyajpxøjkii'ñ kunim chuu'iyii'ñ ja xøøw. Jøs jade'en ttukmadøøpy sa nwindson'ajtim Dios ja ñaxwii'ñit jaa'y ttanitani ja kyutujk. Ja'ats tyukmadøøpy sa ja Moisés kyutujk, jøs nayide'en sa ja Dios kyugajpxy ojts ttukjaadya, jade'en idø'on ja udy'a'aky tjadukja'gyujkiwyaañ ku ja Jesús ja yiknitsokpi pøn ja israelit jaa'y yjøm'ejxtip. ²⁴ Xjats winaaagin tja'gyukidøø, jøs niwinaagin ka' tmibøjktøø sa ja Pablo tjanigajpxy; ²⁵ xjats kumi ka'ap ja nidukna x tmibøjktøø, winets ja choonwanidøø, jøs ja Pablo jadigojk tnimaagyojmi:

—Janch tiydam idø'on ja Espíritu Santo wyaañ midi ja Dios kyugajpxy Isaías tyukmadoow ja n'apteety'amøjti, ku ja yide'en wyaañ:

²⁶ Nøjkk x'atsnøjmi yø'øbi jaa'y:

Wa'ats meets xjamado'ot, jøs ka' xmøjpkita'aktit, nayide'ents wa'ats xja'ejxtit, jøs ka' x'ejxkaptit;

²⁷ jabi yø'øbi jaa'y kawine'enxi kyujuunidi,

janch wenk myadowdi,

jøs wimbeets ñabyikta'agyidi;

paty ka'ti tmøjpkita'akti,

jøs ni tkadamadowdi ja tyatsk,

niwinø'onin ja kyubajk kyaja'gyukidi,

jøs ni tkadyimyikwimbetti yø wyinmaa'ñ ok nbojpkimaa'kxt.

²⁸ Nijawi meets ku ja Dios ja yiknitso'ok'ajtin øøts icyam ngajpxwa'kxtsoo'ni ma jaa'y kya'israelitjaa'yidi, ja'ats ne'egi tja'gyukidip.

²⁹ Xjats ku ja Pablo jade'en wyaañ, winets ja israelit jaa'y choo'nidøø, ja'ats møk'ampy ja xem ja yam nugo nadyakajpxidøø ja'abi ayuujk.

³⁰ Majtsk jumøjt ja Pablo jam ka'pxy tyaa'niyii'ñ ma ja tyøjk jam t'ajuudyuky, tyajotkujk'ajtpy ja Pablo pøn jaty jam atsmigajpxiyip. ³¹ Jotkujk idø'on ja tkajpxwa'kxy ka' ti jotmay, tyuk'ixpijkpy ja jaa'y sa ja Dios Teety ja kyutujk ttanitani ja yjaay, jøs nayide'en ttukmadøø sa yjajty kyubejty ja nwindson'ajtim Jesús, xjats jade'en nipøn kya'adsejpiyøø.

JA NØKY MIDI JA PABLO TYANĠAJX JA ROMĪT JAA'Y

Ku ja Pablo tnijayi pøn tjanchja'widip ja Jesucristo jam Roma

¹ Pablo'ajtp øts, jøts øts ja nwindson'ajtim Jesucristo nmidumpy. Øts ja Dios tø xwi'ixy jøts øts yide'en ngudanaabyi'att. Yide'en idø'øn wa'ats kajpxy nbiktaajkin, ja' øts idø'øn tø xanibiktaagi jøts øts ja ngajpxwa'kxit ja kyajpxy ja y'ayuujk midi nitso'ok'ajtin xukpaajtimp.

² Pø ma windi'ixyip Dios Teety yø tñigajpxni, jøts ja kyugajpxy ttuyiknaxy yø'øbi winmaa'n yø'øbi ixpøjkin jap ma y'ity ja kyajpxy ja y'ayuujk, ³ jøts tñigajpxy ja Dios U'nk pøn nwindson'ajtim Jesucristo'ajtp. Ku ja tñigajpxi ja yjaa'y'ajtin ja ñaxwiiñ'ajtin, ja rey David idø'øn ja y'apteety'ajtpy; ⁴ kuts ja dios'ajtin, jats ja tyiknigaxi'jky ku xemikøjxp jadigojk yjujkyjky jøts kyutujky møk'ampy, jøts ku dø'øn ja Dios U'ngi. ⁵ Ja nwindson'ajtim Jesucristo køjxp øøts ja Dios Teety tø xmø'øy ja kunuu'kxin jøts øøts ja ngudanit, jøts ya ñaxwiiñ yja'attit pøn tjanchjawidip pøn tpaduujnidip ja Dios yja' o ma'et o magajp. ⁶ Jøts meets idø'øn nayide'en mjaa'y'ajtimi, nayi tøxi ja Dios mwii'ixyidi jøts meets ja Jesucristo mja'atidit.

⁷ Meets idø'øn nnija'ayidip niwine'enin jam mdsøonidi mdanidi Romit kajpkøjxp, niwine'enin ja Dios mdaba'ayøyidi ja chojkin, jøts ja mdamidsøkyidi jøts ja amuum nnyadyamiyoxidit. Mbattipts ja kunuu'kxin jøts ja øy'ajtin midi ja Dios Teety yajkpy møøt ja nwindson'ajtim Jesucristo.

Ku ja Pablo Roma y'ats'otswa'añ

⁸ Jawyeen øts ja Dios Teety ndukmøjawi ndukunuu'kxyjawi ja nwindson'ajtim Jesucristo køjxp, ku mee ni'ijtyi myiknigajpxti myiknimadya'akti øy maðsoo sa ja janchja'win xjagyapti. ⁹ Diosts testig'ajtp pøn øts ja y'U'nk ja kyajpxy ja y'ayuujk ngajpxwa'kxip amumjojt, ku meets ejtp nja'myech ku øts ja Dios nmidsapkaajpxy. ¹⁰ Ejtp øts ja Dios n'amidøy nbøktsøy jøts tyik'amøjatt jøts mee n'ats'ext, ja' kø'øm kyunuu'kxingøjxp. ¹¹ Ja ku nbaatwa'andi n'ejxwa'andi jøts nmo'owa'andi yiin waan ja pudøjkin sa Dios ttsøky, jøts yjaakmøjit yjaakmayit ja m'ajot'ajtindi. ¹² Jade'en'ampy øts idø'øn ndijy jøts nixem niyam nnyagyajpxot'amøjka'andit nyiknigaxø'jkindit, jade'engøjxp sa jadu'uk jadu'uk njagyeyjyindi ja janchja'win.

¹³ Uknimadowdi migu'uktøjkti, kawinaak øjk øts jam tø njanchjanøjkwawa'añ jøts mee n'ats'ext, ni ixymba'atnim ø nganiikxy. Jade'en'ampy øts jam njanøjkwawa'añ jøts meets ndukmadowa'añ ja Dios yja', jøts ø n'ext sa wyingaxi'iky øts ja ndunkjøjpp, sam ø tø n'ixy abikyajp ma jaty ø tø nwidity. ¹⁴ Xpaat'ajtpxi øts niduki'iyi pøn ka'israelit jaa'dyi, wan ja t'ixpikyidi tka'ixpikyidi; ¹⁵ jøp'ijxy ø nranky'ityi jøts mee nayide'en ndukmado'tot ja Dios y'øgyajpxy ja Dios y'ømyadya'aky, pøn jaty jam Roma tsinaadyip.

Sa ja møk'ajtin tjagyepy ja Dios y'øgyajpxy ja Dios y'ømyadya'aky

¹⁶ Ka' øts ja Dios y'øgyajpxy y'ømyadya'aky ndatsø'dyuujiyi, pø ja'axi ja' myøk'ajtin ja'axi ja yiktumpy, jøts ja ñitso'ok'atti pøn tjanchja'widip ja nwindson'ajtim, ja israelit jaa'y tyimyjapaajtidip, nayide'ents pøn ka'israelitjaa'ymidi. ¹⁷ Yø'øbi øgyajpxy ømyadya'aky tñigajpxp jøts ku janchja'wingøjxp ja Dios xkupijkyindi, janchja'wingøjxp ja'ayi sam ja Dios kyajpxy y'ayuujk tyiktaañ ku wya'añ yide'en: "Pøn kupøjkip ja Dios, ja yjanchja'win ja ttukpaatip ja xemikøjxpit tsinaa'yin."

Ja ñaxwii'ñit jaa'y pyøky

¹⁸ Jap tsajpøtpy ja Dios tyiktsøøn ja møj ayo'on, jøts ja ttuktagida'aky ja kawindiyjaa'dyi ja ka'øyjaa'dyi, pøn kya'øy'ajtingøjxp kyanankñijawiwyajnidip ja Dios yja'. ¹⁹ Yjanija'widip wa'ats jøts tigøjxp pyaat'aty ku ja Dios yiknijawit, pø tøxi ja kø'øm tyuk'ixyidi ²⁰ sa ja myøk'ajtin y'ejxi tyiyi øy ja yjagagaxi'iky. Jade'en'ampyts ja yik'ixy yiknijawi ku yik'ixy sa ja tø tyik'øyi ja ñaxwii'ñit, jøts ku ja' tu'ugyi Dios'aty ku ja myøk'ajtin xemikøjxp myajada'aky; paty ja ka'ap pyaat'atyidi ja'abi jaa'y jøts ja yiktamaa'kxiti jøts ku dø'øn ja Dios ja tkanijawidi. ²¹ Øy ja tjanijawidi ja Dios jade'en, ka'a'aps ja twindsø'øgidi, ka'ap ja tmøjawidi tkunuu'kxyjawi sam ja Dios pyaat'atyin. Ne'egi wimbet'ampy ja ne'egi wyinmaydi, ja' tyajotkøjxip midit niti kawamp jøts ja wyinmaa'n kya'øyidi, wimbeets kyoøts y'ejtnidi. ²² Øy ja yjawa'andi jøts ku ja wyijyaa'yidi, jade'ents ja yjatti pøn niti tkajajtip; ²³ tøts ja t'ixwejtidi ja Dios kyunuu'kxin, midit nijuuni kawindigøøpy, jøts ja tyikmøjtøkidi ja jaa'y yja' ja awanax midit windigøøpy ejtp, joon paat y'awanax, tsaa'n paat y'awanax, uk nayide'en øy midit jiyujk midit maktaaxk ja tyeky.

²⁴ Yø'øgøjxpts idø'øn Dios ja tø myajtstu'udyidi, jøts ja tø tpanøjkxti ja kyø'øm tsojkin ja kya'øwynimaa'ñ (midi'yim ja y'ljty y'ukjagyajptip), jøts jade'en tsø'ødyumbim y'adø'øtsti nixem niyam; ²⁵ ja ku ka'ap tjanchja'widi ja Dios tyiy'ajtin. Ja' ne'egi myibøjktip ja tum ja taay, jøts ja ja' tø twindsø'øgidi ja pikta'aky midi ja Dios tø t'ødyuñ, jøts ni ja Dios ne'egi kø'øm kyayikwindsø'øgi, pøn paat'ajtip amuum ja windsø'jkin. Jade'en idø'øn ja y'ejxi tyiyi.

²⁶ Patys idø'øn Dios ja tø y'ixmachidi jøts ja jade'en y'am'adø'øtsti chaach'adø'øtsti; ja tø'oxyøjk paat ja tyiktigajtsnidi ja tyø'oxyøjk'ajtin, tum wimbet ttundi sam ka'ap pyaat'aty jøts ja jade'en y'adø'øtstit. ²⁷ Jøts yaa'dyøjk nayide'enmidi; ka' t'uknitanaañidi ja yaa'dyøjk'ajtin ku ja tø'oxyøjk møøt, kø'ømyi ja tukyaa'dyøjk ñay'ejxkiyidi nixem niyam. Tukyaa'dyøjk ja axøøk y'adø'øtsti, ja ayo'onts idø'øn ttagidajkidip jøts jade'en tyuktuñidi ku tkamøjpikta'akti ja Dios.

²⁸ Kumi ka'ap ja Dios tnijawiwya'andi, patys ja tø myajtstu'udyidi jøts ja y'axøøkwimaa'ñ tyikmajada'akti, jøts jade'en y'adø'øtstit sam ka'ap pyaat'aty. ²⁹ Tum ja ka'øyi winmaa'ñ yjagyajptip, ja kawindiy'ajtin ja axøøk'ajtin, y'amal'at'ajtkøjxtip o ti, ja ka'øy'ajtin y'amidip yjotpidip, windii'ñjaa'y'ajttip, yikjaa'y'o'ktip, kudsep yjaa'y'ajttip, win'ø'ndip jøts tum wenk øy pøn tmimadyaagidi.

³⁰ Ja pagajpxk ja' tyunk'ajttip, ka'ap ja Dios ttsokti, yjemjaa'yidi tyejaa'yidi, namyikaxi yjaa'y'atti. Tum ja ka'øyi wyinmaa'ñ'ajttip, ka'ap tyeety tyaak tmimadowdi, ³¹ ka'ap yja'gyukidi, ka'ap y'ayuuk tpadundi, ka'ap yujy'ajtin tjagyapti, ka'ap tjatti jøts myaa'kxuktit jøts ka'ap pøn t'ayo'ejxti. ³² Yjanija'widip wa'ats sa Dios tyikutuky; wa'ats tjanijawidi pøn jade'en adøstip jøts ku ja kyudigø'ødyit xemikøjxp. Jøts nijade'en tkadamajtsu'utti, tyun'adøstip jade'en jinaxy. Tyaxondaktip ku t'ejxti nayide'en y'adøtsmidi jadu'uk jadu'uk.

2

Tiy'ajtingøjxp ja Dios tyiidyuñ

¹ Ja'agøjxp ka' mbaat'aty jøts ja myiktamaa'kxt øy sa mjawa'añ, metsxi mbayø'øpy jadu'uk øy pøn, mdyimyjapøni mets. Ku jade'en m'adi'ich kø'øm mnadyanipiky ja ayo'on, mbayø'øpy jadu'uk jøts m'adøtspts jade'en kø'øm. ² Nnija'windipts adøm jøts ku Dios tiy'ajtingøjxp tyiidyuñ ku ja ttukniduki ja ayo'on pøn jade'en adøstip. ³ Jade'en mets yjawi mwani mduknawa'adsip mets ja Dios xijy ja ayo'on, metsxi mdanipijky ja mmigu'uk ja ayo'on pøn jade'en adøstip, mja'adøstip meets jade'en kø'øm. ⁴ Uk ka' idø'øn xtsojki ja Dios y'øy'ajtin ja Dios tyuda'aky'ajtin, ni xkamøjpikta'aky jøts ku ja'abi øy'ajtin tyuñ jøts xmijotjimbett ja Dios jøts tyigatst ja mdsinaa'yin. ⁵ Møk ja mwinmaa'ñ xjagyepy jøts ka'anim xmijotjimbity ja Dios jøts xyiktigatst ja mdsinaa'yin. Kø'ømyi ja m'ayo'on xyikniweni xyikajaji, midi nøjx yikpatp yik'ejxp ku ja Dios ja tyiidyunin tiy'ajtingøjxp tyikme'ent, ⁶ ku ja ttagubatt tu'uk tu'uk sa jaty pønjabøn tø y'adi'ich. ⁷ Pøn tpaatwandip ja kunuu'kxin ja øy'ajtin xondaajkin midi xemikøjxp, jade'en'ampy ku ejtp øy yikxon yjaa'y'atti, ja'ats idø'øn Dios mo'ojidip ja jujky'ajtin midi xemikøjxp; ⁸ pønts nay'ama'at'ajtiyip jøts ka' tpadundi ja tyiiby yjanchpi, tum ja ka'øyi tyundip, ja'ats ambøjkin'ampy Dios tiidyunidip. ⁹ Møk y'ayo'odit niduki'yiyi, y'amjattit chaachjattit pøn ka'øy'adøstip, ja israelit jaa'dyi jøts nayide'en pøn ka'israelit jaa'dyi. ¹⁰ Pønts øyjaa'y'ajttip wan t'israelitjaa'yidi uk tka'israelitjaa'yidi, ja'ats ja Dios mo'ojidip ja kunuu'kxin ja øy'ajtin jøts ja windsø'jk'ajtin.

¹¹ Kumi ka' Dios pøn t'øy'ixy tka'øy'ixy wan ja tønø; ¹² pøni pøn tkanija'widip ja kutujk midi ja Moisés ja Dios Teety møøjyi piri pøkyundip, nayide'en ja nøjx wyindigøydi, ni ja kutujk kyatsokit; pønts tjanija'widip ja Moisés kyutujk jøts pyøkyun'adø'øtsti, nay ja'abi kutujk ja jaayi nøjx yiktatiidyundip. ¹³ Ka'ap ja Dios tkupiky pøn nugo tmadoodip ja kutujk jøts ka' tpadundi. ¹⁴ Ku abiky jaa'dyi, pøn ja Moisés kyutujk tkanija'widip, tyundipts ja øybi midi ja Moisés kyutujk y'ane'emy øy ja ja'abi kutujk tjagajagyapti, kyø'ømgutujk ñamyayi yiktundip, ¹⁵ jabi yikwingaxø'ktipxi ja' sa jaty ja yjaa'y'atti jøts ku ja kutujk tjagyapti. Ja kyø'ømwinmaa'ñ ni'øøniyidip sa y'øy'adø'øtsti kya'øy'adø'øtsti. ¹⁶ Ja'abi xøøw yiknijawit ku ja Dios Teety tpikta'akt ja Jesucristo jøts ttiidyu'unt niduki'yiyi ja jaa'y ti jaty pønjabøn tø tuñ ayu'uch, sam ø tøn nniagjpxi ja yiknitsokpi ayuujk.

Sa ja israelit jaa'y ja Moisés kyutujk ñadyamøjyidi

¹⁷ Mets wamp jøts ku me israelitjaa'y, jøts ku xpaduujni ja Moisés kyutujk jøts mnadyamikajxip ja mDios. ¹⁸ Wa'ats xnijawi sa Dios tsoøky, jøts wa'ats mduknijawiyi ja kutujk midi'ibi øy midi'ibi tsuj. ¹⁹ Mnay'aja'wiyip jøts ku xjaty xnøø'mo'ot xuu'mo'ot ja jaa'y pøn wimbeets kugoots ejttip. ²⁰ Mnay'aja'wiyip jøts ku xjaty sa xyik'ixpøkt pøn tkanija'widip pøn tkaja'gyukidip, pø japxi kutujkjøtpy xkajts'ixy ja wejin kajin, ja tyiiby yjanchpi. ²¹ Myik'ixpijky ja mmigu'uk, çti kuts kø'øm xkatunjøpi sa ja m'ixpøjkin

xyikyö'öy? Ku mgajpxwa'lxxy, jade'en mwa'añ ku ka'ap y'öyi ja maa'tsk, maa'tspts mets k'ö'm, çtigöjpx ku k'ö'm mmeech? ²² Mets mwamp jöts ku ka'ap pyaat'aty ja'ly ñiyaa'y ñidö'öxy ñabyöjkyiyidit, jöts çti'ajtp ku jawyeen jade'en k'ö'm m'adi'ich? Ni mets k'ö'mbaat xkatsöky ja awanax, mwimaa'tsidipts ja çaptöjk ti jaty ja yjagyepy. ²³ Mnadyamikajxip mets ja kutujk, mmidundigöpypts ja Dios ku ka'ap jade'en xuñ sa ja kutujk wya'añ. ²⁴ Paty idö'ön ja Dios kyajpxy wya'añ: "Pøn ka'israelit jaa'dyi, ja' tka'ödyejitp ja Dios ku meets tum jiwimbet xunguixy."

²⁵ Pø wan wine'enin xjanchyiktuñ ja Dios y'ejxpajt mne'kxköjpx ku xpaduñ ja Moisés ja kyutujk, kuts ja ka'ap xpaduñ, jade'en ja tpaaty ejxim ja ejxpajt jeexyip xkamöot'aty. ²⁶ Pønts ja ejxpajt kyamöot jöts pyadumpy sa ja kutujk wya'añ, jade'en ja tpaaty jöts ku ja ejxpajt ja jeexyip tmöodi, öy ja windii ja ejxpajt yjagayiktu'unxinim. ²⁷ Pønts ja ejxpajt ka'ejtxip jöts pyadumpy ja kutujk öy ja k'ö'm tka'ixpiky, mdabayö'öyip mets ja' ku xkabaduñ ja kutujk, öy mets ja jap xja'ixy jöts ku ja ja kyöxja'ayi jöts öy mets ja ejxpajt xjamöot'aty. ²⁸ Ka'apts ja jade'en tijy jöts ku ja y'israelitjaa'y pøn jade'en nugo nikijxy nanky'ejxip, jöts ni ja' ka' yik'ejxpajtijy midit nikijxy ja'ayi yiktump. ²⁹ Ja' idö'ön israelit jaa'y pøn amuum tpadump, jöts ja' ejxpajtin'ajtp midit yikwinmaapy am jotp, jam anmija'wingöjpx, midit ka'ap ma kyöxja'ayi, midit ka'ap ma kyaxi'iky. Pøn jade'en tpadump, kupiky ja y'ity jam Dios wyingujkp, kidi jaa'y wyingujkyip.

3

¹ ÇTiku yikajpxy ja israelit jaa'y? ÇTi wya'añ ja ne'kxköjpxpit ejxpajt? ² Janch møk yjapaat'atyidi ja'agöjpx ku ja' ja Dios kyajpxy y'ayuujk tyami'ajot'ajtidit jöts ja tpadu'undit. ³ ÇTits idö'ön ja'adi? Öy ja tkabadundi jade'en, çwinets ja Dios tmatjstut'utt ja y'öy'ajtin? ⁴ ;Niwindem! Jinaxy ja Dios tyiktuñ ja tyiiby yjançhpi, öy ja jaa'y niduki'iyyi yjataayidi; jabi yide'enxi ja Dios Teety kyugajpxy tnamadyaajky ja Dios Teety. Ja mgö'öm'ayuujk me Dios Teety myika'pxytiidyumbipidsöömip, ku wyinaty nugo mwinmaa'ñ'ijxyidi ja'adi pøn mgamöjpktaajkyip.

⁵ Sam winaagin wya'andi yide'en: ku adömbökyöjpx tijy ja Dios ja y'öy'ajtin tyiknigaxi'iky, çsats adöm idö'ön ja'abi ayuujk nja'gyukandit? ÇKa' idö'ön ja Dios y'öyi ku ja nyikjotmajtyindi, jöts ja ayo'on xjaniguejxyindi? ⁶ ;Nijjuuni ka' yjade'eni! Ku Dios jeexyip kya'öyi, çsudsots ja jeexyip ttiidyuñ ja naxwii'ñit jaa'y?

⁷ Jöts kuts öts nböky jeexyip yjançhtuñ jöts ja Dios tyi'y'ajtin tyikwingaxö'ökt, çsudsots ö nyikpöky'ixy jöts ku öts nböjkpitumbijaa'y? ⁸ ÇWinets ja tum öy wyimbejtixit ku pøn ttuñ tum ja ka'öybi? Jade'en ja jaa'y winaagin kya'öwinyimaydit jöts wya'andi, jöts ku ja'abi ööts jade'en ndukni'ixpöki. Yö'öbi jaa'y paat'ajtidip ja ayo'on.

Niduki'iyyi ja pöky xaja'jtyindi

⁹ ÇTits adöm idö'ön? ÇKu adöm n'israelitjaa'yindi, paty adöm jawaani njaaktyimy'öyindi, jöts nika' pøn jade'endi? ;Ka'ap yjade'eni! Pø tæxi nnigajpxy jöts ku tum ja pöky yik'adsööni, wan t'israelitjaa'yidi uk wan tka'israelitjaa'yidi. ¹⁰ Ja'agöjpxxi jap nökyijpxy yide'en wya'añ: Ka' pøn y'öyi, nitu'ugin kya'ity pøn öy;

¹¹ nipøn kyaja'gyuki,

nipøn tkanjawiwya'añ ja Dios.

¹² Tum ja wenk tuu' tø tpöjknidi, windigöy ni'ijty yjatti.

Ka' pøn tjtömay'aty ja öwinyimaa'ñ, ok idö'ön tu'ugin ja'abi twinmaa'ñ'att.

¹³ Tum ja axöök kajpxy pidsömp y'aawjötpty yukjötpty;

ja win'öönk ja'ayi majjip.

Wingajpxnajxipim kyajpxy;

¹⁴ tum ja ka'öybi kyajpxpidsömdip, kixy kyubety wya'andi.

¹⁵ Jöts ja'ayi majyidip ku tnibutti tniga'akti ja yikjaa'y'oo'k;

¹⁶ ja' tyunk'ajttip ku yikudigö'ödyit ku y'ayo'ondu'undit,

¹⁷ jöts ka' tñijawidi ja öy'ajtin ja tudä'aky'ajtin.

¹⁸ Niwine'enin tkawinmaydit jöts twindsö'ögidit ja Dios.

¹⁹ Jöts yiknija'wip sa jaty ja Moisés kyutujk wya'añ, ja'ats ja yikta'ana'amdip ja israelit jaa'dyi pøn ja tø yiktanibiktaagidi, ja'agöjpxpts ne'egi amöñi tyimy'ettit, jöts jade'en niduki'iyyi ja naxwii'ñit jaa'y tpaattit ja Dios tyiidyu'unin; ²⁰ nipøn ja Dios tka'öy'ext öy ja tø tjabaduñ midit ja kutujk ñi'axne'emp, jöts ja'ayi ja ñigajpxy ku adöm nböjkpitumbijaa'yindi.

Janchja'wingöjpx ja nitso'ok'ajtin yikpaaty

²¹ Jats jadu'uk ja winmaa'ñ sa Dios xkupöjkin. Yjadyimyjanigajpxy ja Moisés ja kyutujk ja k'ö'm, jöts nayi tø ja Dios kyugajpxy ja nayide'en tñigajpxti. ²² Ja' idö'ön ja Dios Teety kyupijky pøn tjanchja'widip, pøn t'ajot'ajttip ja nwindö'n'ajtim Jesucristo; kyupijky ja öy pøn, ka'ap ja pøn jadu'uk jadu'uk twenk'ixy, ²³ niduki'iyyi jaa'y pyökyundi,

jøts ka'ap pøn tmānaxy ja pyøky jam Dios wyingujkp. Jagam jixkø'øm ndsinaa'yindi, ni sudsø'ampy ja ñitsø'ok'ajtin ja ngapaajta'am. ²⁴ Ejxim ja Dios Teety y'øyi ku ja jaa'y tyiknitso'ok'aty nwindson'ajtim Jesucristo køjxp, jøts jade'en tmay'aty ku tkupiky. ²⁵ Ja Cristo ja Dios Teety pyiktaajk jøts ja tkudanaajyt ja naxwii'ñit jaa'y pyøky ku ja tku'oogit. Winets wyingaxi'ikñim adøm ja nitso'ok'ajtin ku ja njanchja'win, jøts ja Dios Teety jade'en xuknija'win ja y'øy'ajtin ja tyuda'aky'ajtin, jøts ku ja tkadagubety ja pøky midt tø yiktuñ jawyeen ku ja nwindson'ajtim tkagu'ooginim ja pøky. ²⁶ Ja'agøjxp jade'en yjaty jøts nnija'win jøts ku Dios Teety y'øy'ajtin tyiy'ajtin tyik'awa'añ, jøts ejtp jade'en øy juuni tkupiky pøn tjanchja'widip ja nwindson'ajtim Jesús.

²⁷ ¿Mats ja namyikaxi tyuñ? Pø ka'axi ja tyuñ ku ja janchja'win njagyajpin, ku njanchja'wyin ja nwindson'ajtim. Ja' ja tyiktundip pøn tta'ødyøkiwyandip ja tunk ma Dios, ku ja kutujk nadyijyi tpadundi pøn ja janchja'win tkajagyajtp. ²⁸ Jade'ents yik'ixy yiknijawi jøts ku janchja'wingøjxp ja jaa'y yikupiky jam Dios wyingujkp. Ka'ap ja yikpay'øy pøni sa ja tø tpaduñ tkabaduñ ja kutujk sa ja y'ane'emy.

²⁹ ¿Ti ja israelit jaa'y nugo ja Dios Teety y'ejx'ijtpy, jøts ja ka'ap t'ejx'ity pøn ka'israelit jaa'dyi? Ka'ap yjade'eni, pø tum ja'axi amuum tja'ajtp. ³⁰ Tu'ugyi Dios, ka'ap ja Dios kyawinaaggi; jøts pøni pøn tmøøt'ajtp ja janchja'win, ja'ats ja Dios kyupijppy, wan tmøøt'aty uk tkamøøt'aty ja ejxpajt ñe'kxkøjxp sam ja israelit jaa'dyi. ³¹ ¿Ja'agøjxp adøm ja kutujk nga'ukpadu'unindit ku ja janchja'win nmøøt'ajtyindi? Ka'ap yjade'eni, jabi jade'eni ne'egi ka'pxy ja kutujk yikpaduñ ku ja Cristo njanchja'wint.

4

Sq ttunjøpi ja Abraham

¹ ¿Ti adøm n'apteety'amøj Abraham tyuun jøts Dios ja ojts kyupiky? ² Ku jeexyip ja Abraham ja'agøjxp ja Dios kyupiky ku ja wyinaty tø ttuñ tigati, nadyamøjiyipts ja jeexyip. ³ Yide'ents jap nøkyijxpy wya'añ: "Ojts ja Abraham tjanchjawi ja Dios, ja'ats ja Dios y'øyja'wiyii'ñ jøts ja ojts tkupiky." ⁴ Ku pøn øy ti tunk ttuñ jøts ku ja yiknijuy, ja tyunkts ja yiknijaju'yuyip, ka'ap ja niñamyay'ati tpaaty, ja' ja kyudøjkip ku ja tø tyuñ. ⁵ Pønts ja tunk tkada'ødyøjkip ma Dios, øy ja ti jagatuñ, jøts ku ja ja'ayi tjanchjawi ja Dios ku ja pojkipitumbi jaa'y ja tpojkpimee'kxy, ja'ayi ja Dios tyajotkujk'ajtpy ku ja tjagyepy ja janchja'win, jøts ja tmay'aty jade'en ku ja tkupiky. ⁶ Nayide'en ja David ojts wya'añ ku ja ojts tngajpxy sa ja jaa'y xyonda'aky pøn ja Dios kyupijppy, jøts ja ka' tmøjpkta'aky pøni sa ja jaa'y tø y'adi'ich. ⁷ Yide'en ja wya'añ:

Nekim ja jaa'dyi pøn ja Dios ttamaa'kxidip ja tyundigø'øyin, jøts ja ka'ap myøjpktaajkxiyidi ja pyøky.

⁸ Nekim ja' pøn ja nwindson'ajtim pyojkpimee'kxy.

⁹ ¿Ja'ayi dø'øn nugo jade'en nekim t'ejxtip pøn ttundip ja ejxpajt ñe'kxkøjxp, uk nayide'en idø'øn ja'amidi pøn tkatundip ja ejxpajt? Nnija'windipts jøts ku ja Abraham ja'agøjxp ja Dios ojts kyupiky ku ja ja'ayi tjanchja'wi. ¹⁰ ¿Juunits idø'øn ja jade'en yikupijky? ¿Tø wyinaty ja Abraham jawyeen ja ejxpajt yikpktaajki, uk ka'anim? Ka'anims ja wyinaty ttuñ ja ejxpajt. ¹¹ Oojknim ja Abraham ojts yikpktaajki ja ejxpajt ku ja ojts yiktsuky ja ñe'kx, ejxa'an ja wya'añ jøts ja yiknijawi ku Dios ja tø kyupiky yjanchja'wingøjxp. Jade'ents ja Abraham ttunjøpiyi'ñ, jøts ja nayide'en niduki'iyi janchja'wingøjxp yikupøkti øy ja tmøøt'atti tkamøøt'atti ja ejxpajt ñe'kxkøjxp. ¹² Janch jade'en ku ja Abraham idø'øn kyudanaaby'ajtp pøn ja ejxpajt tmøøt'ajtip, kidi ja'agøjxpij ja ja'ayi ku ja tø yiktu'unxidi ja ejxpajt. Jade'en'ampy ja tijy jøts ku ja tpa'ejxti, jøts ja nayide'en tjagyapti ja janchja'win sa ja Abraham, ku ja wyinaty ka'anim ja ejxpajt yiktu'unxi.

Jaa ja Dios y'aduky ja kyajpxy ku ja yikjanchjawi

¹³ Jade'en ja Dios wyanda'aky, jøts ja Abraham møøt niduki'iyi wine'enin ñajtska'axidi yikmo'odit amuum ja naajx kajp wine'en y'ity naxwii'ñ; kaja'agøjxpipts ja wanda'aky ojts yikpkta'aky jade'en ku ja kutujk ja wyinaty ka'pxy tø tpaduñ ja Abraham, pø jade'en'ampyxi ja jade'en ku Dios ja tjanchja'wi, jøts ja ja'ayi wyinaty tø tyagupiky. ¹⁴ Jøts ku jeexyip ja'ayi yikupøkti pøn tpadundip ja Moisés kyutujk, jøts ja'ayi jeexyip yikmo'odi ja Dios y'øy'ajtin, ka'ats jeexyip tyuñ ja janchja'win, jøts ni ja Dios jeexyip ja wyanda'aky niti kyawa'añ. ¹⁵ Pø tiidyumpxi ja kutujk; mats ja kutujk kya'ity, ka'ap jam ti yikmidundigøy, jabi niti ana'amixi jam.

¹⁶ Jade'en'ampyts idø'øn Dios ja twandaajky ja'agøjxp ku ja janchja'win ojts t'ixy, jøts ja tmay'att niduki'iyi pøn nayide'en ja janchja'win tjagyajp sa ja Abraham. Kidi ja'ap ja Dios tyamiwandaajki ja y'øy'ajtin pøn tpadundip tkabadundip ja kutujk, pø ja'axi tyamiwandaajki pøn tjanchja'widip ja Dios sam ja Abraham ttunjøpiyi'ñ. Jade'ents idø'øn ja tpaaty, ja' ñamyayi tñigubajk'ajtp ku ja jade'en ojts tjanchja'wi ja Dios, jøts ja' adøm ñamyayi

ndeety'ajtyindip ¹⁷ jam Dios wyingujkp, pø nayi Diosxi ja yjanchja'wiyii'ñi ku wya'añ ja Dios kyajpxy: "Tø me nbikta'aky møjaa'y'ajtpi o ma'et o magajp." Janch møj ja Dios, øy ja tyikjujkyøkt pøn tø y'oo'kni tyigøøñi, jøts nayide'en tnan'ky'ijxyi o ti pikta'aky midi ka'ejtpnim.

¹⁸ Øy ka'ap ti jøp'ejxin, ka'ap ti winmaa'ñi, ojtsts ja Abraham ja tjanchjawi jøts yjöp'ijxy ja', xjats idø'n ja jade'en may jaa'y ñamyayi tñigubajk'aty sa u'nkteety y'u'nk y'una'jk tñideety'aty, jade'en sa dø'n Dios ja wyinaty tø ñii'mxyi ku ja wya'añ: "Janch may ja m'u'nk m'una'jk xpaatt." ¹⁹ Magø'pxy ja Abraham wyinaty ja yjumøjt jøts ka'ap ja sa tijy, amuum ja t'ajot'aty øy ja ñidø'øxy Sara ja møøt tø yjamøjaa'yinidi, ka'ap ja y'u'nk y'una'jk t'ukpatnidi. ²⁰ Ka'ap ja sa tijy, ka'ap ja tka'øyja'wiyi ja Dios wyanda'aky, ne'egi ja amumjoojt t'piktaajky ja yjanchja'win jøts ja tmøjawi tkunuu'kxyjawi ja Dios, ²¹ jøts ja tu'ugyi tjøp'ijxy jade'en jøts ku Dios tjagyepy møk'ajtin, jøts ja ttu'unt jade'en sa ja wya'añ. ²² Jade'en'ampy ja Dios ja ojts kyupiky ku y'ijxyi jøts ku myajada'aky ja yjanchja'win.

²³ Jøts ku dø'n Dios ja jade'en tkupijky ja yjanchja'win, kidi ja Abrahamip ja ja'ayi kyupøjkip jøts ja jade'en yikjaadya'ñ; ²⁴ pø nayide'enxi adøm ja xkupijkyim ku adøm ja Dios Teety njanchja'want. Pø ja'axi tø tyikjujkyiky jadigojk xemikøjxp ja nwindson'ajtim Jesucristo, ²⁵ pøn ojts yikøyaky jøts y'ookt adøm nbøkyøjxp, jøts jade'engøjxp ojts xemikøjxp yujkyiky jadigojk jøts adøm nyikupøjkint jam Dios wyingujkp.

5

Øwymibdsimy ku xkupøjkint ja Dios

¹ Kuts ja Dios Teety xkupøjka'an ja njanchja'win, jøts jade'en ja nmiduda'aky'ajtim ja nwindson'ajtim Jesucristo køjxp. ² Ja'agøjxp adøm ja Dios Teety møøt n'ijtyindi ku ja nwindson'ajtim njanchja'windi, paty adøm ja xkunuu'kxyindi. Ja' adøm xyik'ejtindip tu'ugyi ja nwinmaa'ñi jøts ja xondaajkin xmø'øyindi, jøp'ijxy nyik'ijtyindi jøts ku ja nbaajta'andit amuum ja y'øy'ajtin. ³ Jøts nayide'en adøm ja ka'ap nwindijyindi ja ayo'on, øy adøm ja ngu'ayo'owa'andi jotkujk; pø nnija'wandipxi adøm ku n'ayo'owan winets ja tuda'aky'ajtin nbaajtindit, ⁴ jøts ja tuda'aky'ajtin ja' øy xyikwingaxø'jkindip, ja' xukjøp'ijxy'ajtindip mididi ja Dios tø xanibiktaajkandi. ⁵ Jøts ka'ap majtsk'aaw majtskjojt n'ejtindit, pø tøxi ja Dios amuum xmø'øyim ja y'øy'ajtin ja pya'ayo'owin ku ja tø xukatøjka'am ja y'Espiritu Santo.

⁶ Ku adøm wimbøets kugoots nmijajtyim ja nbøky, niti nitso'ok'ajtin kø'øm ngapaajtyim, xjats ja Cristo tø myiñ winet, jøts ja tø tkudani ja ka'øyjaa'y pyøky ku ja tø y'øky. ⁷ Ka'ap pøn nugo tnygu'oo'gi jadu'uk, ni jade'enbaat øy pøn mabaat yjadyimya'øyjaa'y; pø wants winaagin pøn ñay'a'ejxyit jøts ja tku'oogit. ⁸ Xjanchojkimpts adøm ja Dios ku adømøjxp y'øky ja nwindson'ajtim Jesucristo, øy adøm njapøjkpitumbijja'yandi. ⁹ Jøts tøts ja Dios xkupijkyim ja nwindson'ajtim Jesucristo pya'ayo'owingøjxp ku ja tø xku'o'jka'andi, jøts ne'egi jinaxy ja nøjxx xuknitso'ok'ajtyindi ja møk ayo'on, jøts ja ka'ap xuku'o'jka'andit ja nbøky, ja'ayi nwindson'ajtim Jesucristo køjxp. ¹⁰ Njagami'øy'ajtyindip adøm ja Dios, jøts adøm ja jade'en xjaaktuu'mø'øyindi sudso ja jadigojk nmijotjimbejtindit, ja'agøjxp y'ø'jky ja y'U'nk adøm nbojkkpikøjxp. Mats ku ja ixyam yjujky'aty xemikøjxp, jøts ku adøm ja tø nmijotjimbijtyindi ja Dios, zti jats adøm ndejnt ja winet xka'ukyiknitso'ok'ajtna'ant? ¹¹ Xon'ejtmandip adøm ixyam ja'agøjxp ku ja nwindson'ajtim Jesucristo tø xukmigu'ukwa'añim jadigojk ja Dios Teety.

Ja Adán jøts ja Cristo

¹² Jøts tu'ugyi ja jaa'y pøn pøkyun'okwaan ya naxwiiñ, jøts ja o'jkin tigøø'yin jade'en'ampy ñaxkidaajky, niduki'iyi øy pøn pyaadyi ja'agøjxp ku ni'ijtyi nayide'en tø pyøjkpitunidi. ¹³ Ku ja kutujk wyinaty kya'itynim, jaayim ja pøky wyinatyni ya naxwiiñ; jaa ku ja Dios ka' tpayø'ønim, pø ka'animxi ja kutujk wyinaty te. ¹⁴ Ku ja et ja xøøw ñajxy mididi tso'ondaajk Adán ñikøjxp jøts yjöpkyxy Moisés ñikøjxp, jøts wine'en pøn pyøkyundøø, ja' idø'n ja o'jkin tigøø'yin mimajadaajkidøø, øy ja tjagajgyapti ja'abi pøky mididi ja Adán tyuun ku ja tkamimadøø ja Dios; sa ja Adán tyiktso'ondaajky ja pøky, nayide'ents ja tu'ugyi myenwami wyinaty pøn ja øy'ajtin nitso'ok'ajtin xukpaajtmandip, xjats tø myiñ ja nwindson'ajtim Jesucristo.

¹⁵ Windemts ja møøt n'uk'ejkijpxyyn ja Adán tyundigøø'yin møøt ja Dios y'øy'ajtin mididi ja xmø'øyindip. Tu'ugyits ja jaa'y pøn ja pyøky tø xukno'jka'andi niduki'iyi jøts windigøø n'ejtna'andi; jøts tu'ugyi ja nayide'en ja nwindson'ajtim Jesucristo pøn ja Dios xuknitso'ok'ajtindip ja nbøky, jøts ka'ap ja pøn tmi'abaaty, namay adøm nyiktamay'ajtyindi ja nitso'ok'ajtin jøts adøm ja xmø'øyindi. ¹⁶ Ti'in ja ndami'a'ejxin ja tu'ukpi jaa'y pyøky møøt ja Dios ñitso'ok'ajtin. Tu'ugyi ja tundigøø'yin ja'ats yikpayø'øpy jøts tø nbøkyajtkijxyindi; kuts ja Dios xmø'øyindi ja nitso'ok'ajtin, tyamay'ajtpy ja jaa'y ja ñamyayi jøts ja xkupijkyin,

øy wine'en tō njapojkpitu'uñindi. ¹⁷ Ku ja tu'ukpi jaa'y tō pyojkpituñ, ja'agøjxpts ja o'jkin myajada'aky jøts ja yikudigøy, møjts ja Dios jøts ja ttuñ ja may'ajtin, jøts ja tyaky ja myøk'ajtin midì yikjujky'ajtp xemikøjxp ku tu'ugyi njanchja'want ja nwindson'ajtim Jesucristo.

¹⁸ Jade'en sam ja Adán pyøkyøjxp ja jaa'y ttukpaatkijxy ja kudigø'øyin, nayide'en ja nwindson'ajtim Jesucristo y'ødyu'uninigøjxp ttukpaajty niduki'iyi ja naxwii'ñit jaa'y ja nitso'ok'ajtin, jøts ka'ap ja møk'tiidyu'unin tpaattit pøn jaty tjanchja'widip. ¹⁹ Tu'uktas ja jaa'y pøn kamadoow, jøts ja'agøjxp ja pøky xaja'atkijxyindi; nayide'ents ja tu'ukmi pøn tuki'iyi tmimadoow ja Dios Teety, jøts ja'agøjxp adøm nyikupijkyindi jam Dios wyingujkp.

²⁰ Jøts ku ja kutujk yikpiktaajky, ja' ja yiktanibiktaajkyi'ñi jøts ja pøky wa'ats yik'ejxkapt; jøts ja pøky møjtak'adøtsp ja', jinaxys ja Dios y'ø'y'ajtin myøk'ajtin tyikmøji'adi'ich nayide'en. ²¹ Sam ja pøky myajada'aky ku ja tyiknaxkida'aky ja o'jkin tigø'øyin, xjats ja Dios ja y'ø'y'ajtin nayide'en tyikmajada'aky sudso ja xkupøjkin, jøts ja nwindson'ajtim Jesucristo køjxp xmø'øyindi ja jujky'ajtin xemikøjxp.

6

Ka'ap ja pøky myajada'aky ku ja Cristo yujky'ajtin nmøø't'ajtyindi

¹ ¿Tits njaaktu'unindip? ¿Jaaktyimbyøkyun'adøjtsindip adøm idø'øn ja'agøjxp ku tō nnija'windi jøts ku ja Dios xu'unxim ja may'ajt ku ja xpojkpimee'kxyindi? ² ¿Ka'ap jade'en pyaadyi! Pø tøxi adøm nmajststuu'jtyindi ja pøkytu'unin; ¿jøts sudso adøm jade'en nbøkyun'adøjtsin? ³ ¿Ti ka'ap xnijawidi ja nnøbajtin, ti ja tyijpy? Pø ja'agøjxpxi adøm tō nnøbeytyindi jøts nmøø't'ejtindit ja nwindson'ajtim Jesucristo, jøts yiknijawit jøts ku adøm ja nbøky ja tō xmi'o'jka'andi. ⁴ Møøt adøm ja Cristo ñamyayi nnaøjka'andi jøts ja møøt n'øøky'ijtyindi, jøts ku ja yujkpyijky xemikøjxp jøts adøm nayide'en nbajtma'an ja jemchinaa'yin midì ixyam jøts midì xemikøjxp, sam ja Dios Teety ja tyukmimadaajkøø ja o'jkin, jøts ja myøk'ajtin myø'øyi, jøts ja yujkpyijky xemikøjxp. Nay ja'ats idø'øn yiktump ku ja nbajtin yikpaaty.

⁵ Pøni tødams adøm ja Cristo nmøø't'ø'jkyim nayide'en sam ja o'jkin ja tō tpaaty, nmøø't'ijtyindipts adøm ja', jøts ku ja yujkpyiky xemikøjxp jøts nayide'ents adøm ja nmøø't'jujky'ajtkma'andi. ⁶ Nnija'windipts adøm sà jaty tō njaa'y'ajtyindi, jøts ja' ja Cristo myi'o'jk jam kruskøjxp, jøts adøm ja nbøky xniwaajchim jade'engøjxp ku ja y'ø'jky, jøts ja ka'ap x'ukmimadaajkna'am, jøts ja ka'ap jade'en n'ukmidu'una'ant sà jaa'y ja wyindsøn tmiduñ, jade'en ja pøky ñamyayi yikmiduñ. ⁷ Pønts tō y'øøky, tøts ja pøky ja ñiwaajtsniyi. ⁸ Pøni nmøø't'ijtyindip ja Cristo øy ja møøt nja'ø'jkyim, njøp'ijxy'ajtyindipts ja' jøts ku ja møøt njujky'ajtindit xemikøjxp. ⁹ Pø nnija'windipxi jøts ku ja Cristo tō yujkpyiky xemikøjxp, nijuuni kya'uk'oo'knit, nijuuni kya'ukmimadaajkniiyt ja o'jkin. ¹⁰ Tuk'o'jkyi ja ja'ayi ttuku'o'jkyi'ñi amuum ja pøky; jøts ja ixyam xemikøjxp yujky'aty amuum ja Dios Teety tmøø't'ity. ¹¹ Jøts nayide'ents meets idø'ønmidì, øøky tigøy ndejint mnabyikta'agiyidit jøts ja pøky jade'en xkayikmøj'attit, wijy kejy meets ne'egi mnabyikta'agiyidit ku ja Dios yja' xpaduujnidit, ja'agøjxp ku ja nwindson'ajtim Jesucristo xmøø't'atti.

¹² Paty ka'ap mbaat'atyidi jøts nugo xyikmajada'aktit ja mbøky ja mga'øwyinmaa'ñ, øy sà mduktunwa'añidi pøni sà ja ttsøky. ¹³ Kidi mnagyøyakyidi mǎ pøky, jøts ja kidi mduktuñidi ja ka'ø'y'ajtin. Ne'egi amuum mnayoxidit mǎ Dios, jøts ja mduktunidit tum ja ø'y'ajtin. Ka'ap meets ja pøky xukmijuky'ajtnit, jabi tøxi meets ndejint tō m'ats'øøky, jøts tō mjukpyøkti jadigojk, jøts ja jujky'ajtin tō xpaatti midì xemikøjxp. ¹⁴ Jøts ja pøky ka'ap meets ja m'ukmimajadaajkniiyt, pø kidi ja Moisés kyutujukpxi meets mnitanajaajiyip, ja Diosxi meets ja kyunuu'kxin mdanitanaajiyiyip.

Ja ejxpajt madya'aky ku ja jaa'y ja wyindsøn aguwanì tmiduñ

¹⁵ ¿Sudsøts adøm? ¿Jaaktyimbyøkyun'adøjtsindip adøm ja'agøjxp ku ja Dios xanitanaa'yindi ja y'ø'y'ajtin, ku adøm ja kutujk ka'ap xiidyu'uñindi? ¹⁶ Jøts nnija'widipst wa'ats ku tu'uk ja windsøn x'ukmidundøkidit, tu'ugyits ja xwindsøn'attit jøts ja' kuwanì mmimado'odip, pø ja'axi wyinaty mdumbi'ajtidip. Nayide'ents idø'øn tpaaty ndejint ku ja pøky xmimado'odit, ja' meets idø'øn ndejint windson'øjknip øy ja yjayik'øøky yjatyiktigøy, uk nayide'ents ku tu'ugyi ja Dios xmimado'odit jøts jade'en xu'undit sà ja ttsøky. ¹⁷ Janch møj ja Dios ku ja y'ixpøjkin xpaduujnidi midì tō myiktagiðkidi, jøts ja pøkyunk tō xmajststuttì midì y'ijty niwa'añ myik'ejtniyidip. ¹⁸ Tøts ja pøky mniwa'achidi ku ja ka'ap m'ukmimajadaajkniiydi, jøts tō xpatwa'jkidi ja ø'y'ajtin midì ja Dios yja'ajtpy. ¹⁹ Jade'en ndukmadowdi sà ø najtsjawi xmadodø'odit, jøts nayide'en xnadyamiyoxidit ja Dios. Sam y'ijty mnagyøyakyidi amuum jøts xundi ja ka'ø'y'ajtin ja axøøk'ajtin, nayide'ents idø'øn amuum ja Dios xnadyamiyoxidit, jøts xuujnidit ja y'ø'y'ajtin jøts amuum xmøø't'ettit ja Dios, tu'ugyi xagøðkidi ja mdsinaa'yin.

²⁰ Ku meets ja pøky y'ijty mganīwa'achinim, ka' meets y'ijty xuujni ja Dios yja', ja tiy'ajtin øy'ajtin; ²¹ jøts žti jade'en tō xpøkti? Mdatšø'odyundip ja icyam jadigojk, pø ja'ayixi ja yajkpy ja o'jkin tigø'øyin. ²² Kuts tō mniwa'achidi ja pøky jøts ja Dios y'øy'ajtin tyiy'ajtin tō xpadojkiyidi, yø' tiy myiktu'undip, yø' mmo'o'jidip sudso xmøø't'ettit sudso xmidu'undit amuun ja Dios, jøts xpaattit x'ejxtit ja juiky'ajtin xemikøjxp. ²³ Ja o'jkin tigø'øyin, ja' ja pøky ja'ayi yajkpy. Kuts ja Dios møøt, ja juiky'ajtin ja Dios xamay'ajtimp midī xemikøjxp yikpatp, ku møøt n'ejtin ja nwindson'ajtim Jesucristo.

7

Amajtsk'ajtingøjxp tu'uk ja ejxpajt madya'aky pyidsimy

¹ Mee migu'uktøjkti, meets mnija'wip sa ja kutujk wya'añ, jøts mnija'wip jøts ku ja ya ja kutujk tmøøt'aty ja møk'ajtin ku jaa'y jaagya yjujky'attinim. ² Ku n'ukpiktaajkint, ku tu'uk ja tø'øxyøjk y'amajtsk'aty, kutujkøjxpts ja tmøøt'amajtsk'aty ja ñiyaa'y pøni jaakjujky'ajtpnim ja'; kuts ja y'øøky ja ñiyaa'y jøts ja nayide'en ja kutujk ñiwa'achi, ku y'øøky pøn ja y'ity møøt y'amajtsk'aty. ³ Kuts ja tø'øxy jadu'uk yaa'dyøjk t'adsøy jam ja ñiyaa'y yjajuiky'atynim, pøkyts ja tyumpy; kuts ja kyu'øøgyi, niwaajtsip ja kutujk ja', øy ja møøt jadu'uk ja yaa'dyøjk y'amajtskit, jøts ka'ap ja pyøkyi.

⁴ Jade'ents mee migu'uktøjk idø'ønmidī pøni niwine'en ja Cristo mja'atyidi, myikniwa'ats'ajtniyip meets ja Moisés kyutujk, tøxi mee ñamyayi ku'øøky mdañ ku ja pøky tō wyindigøy jøts ja wenkpi xpadokidi. Ja Cristo meets icyam mja'ajtniyidip pøn jujkpyøjk xemikøjxp, ja'agøjxp ja yjajty jøts jade'en'ampy nmidu'unindit ja Dios. ⁵ Ku adøm y'ijty pøky y'agujkp ndsinaa'yimnimdi, jøts ja kutujk ja' ja wya'añ jøts ja tyikjinaxy adøm ja nga'øwynmaa'ñ, ku ja ngabadu'uñindi jøts ja niti nitsø'ok'ajtin xkadukjøp'ijxyindi. ⁶ Ixyamts tō xniwaa'jchim ja 'abi kutujk, tō ja ñamyayi ngu'o'jkyim jøts ja tō xuk'ixmajchim ja myøk'ajtin; jøts adøm tō n'awa'atspidsø'ømyindi, tu'ugyits nmidu'unint ja Dios jøts ja y'Espiritu Santo ja jemy juiky'ajtin xukmi'ejtint midī xemikøjxp, jøts ka'ap ja'abi møjaa'gyutujkin x'uk'ana'amnandit midī y'ijty nbadu'uñindip.

Ja pøky midī xmi'ejtp

⁷ ŽWa'anīm jøts ku ja kutujk pyøkyi? iKa'ap! Ku jeexyip ja kutujk kya'ity, ka' øts jeexyip nnijawi ti pøky'ajtp, ku ja jeexyip tkanigajpxy kudam ja pyøkyi ku ja nmigu'uk pyikta'aky njanchpøkwa'anxant. ⁸ Ja'agøjxpts ja pøky tō myøjtøki jøts ja myøj'aty. Pøni sa ja kutujk yja'ane'emy jade'ents øts ja nnijawi midī'ibi ka'øy, jøts øts ja jinxay nduñ sam øts y'ijty nga'adi'ich ku øts ja kutujk nganijawinim. Ku ja kutujk kya'ity, ka'ats ø nnijawi midī pøky. ⁹ Tø øts jade'en njaty ku ja kutujk ka' nnijawinim, tøøp ø njawi n'adi'ich, ka' njawi ja pøky. Kuts ø tō nnijawi sa kutujk y'ane'emy, jøts øts ja nbøky njawi yjaaktyimyjada'adi'ich, jøts øts ja kawindem paadyim xuk'ijxy ja øy'ajtin ja kunuu'kxin. ¹⁰ Wimbet øts ja nduñ sa ja yja'ane'emy, midī'ibik øts idø'øn xukpaatp ja øy'ajtin, tō øts ja ne'egi xyikpøkyety. ¹¹ Ja pøky ne'egi nankmyøjtøjkiyip pøni sa ja kutujk y'ane'emy jøts øts ja win'øø'nin tō xmø'øy. Nay ja kutujk øts jadigojk xanikajpxp ja o'jkin tigø'øyin.

¹² Ja kutujk, øy ja', jøts øy wa'ats yikutuky nayide'en, øy'ajtingøjxp tiy'ajtingøjxp yikutuky. ¹³ Jøts pøni øy tam ja kutujk, žsudsøts øts ja xpayø'øy, jøts øts ja ñamyayi xuk'ejxin ja o'jkin tigø'øyin? Jøts øy ja kutujk, ja pøky øts jade'en xyik'ejtnip øøky tigøy, ka' ti jøp'ejxin, jøts øts ja jade'en xuknijawi jøts ku ja' pyøkyi; tamibøki midī øy, jøts øts ja kutujk jade'en xuknijawi jøts ku ja pøky ni sudso'ampy kya'øyi.

¹⁴ Jøts nnija'windip adøm jøts ku ja kutujk Dios tja'aji. Jøts pojkpitumbijaa'y'ajtp øts, jade'en'ampy øts ja pøky xmimajada'aky. ¹⁵ Ka' øts nja'gyuki pø ti ø xjajtp, tum jiwimbejts ø nduñ, kuts ja njatunwa'añ midī øy, ja kya'øybi øts ne'egi xmimajadaq midī njagatunwampy. ¹⁶ Kuts øts ja nduñ ja ka'øybi midī njagawampy, jade'en'agøjxp nnijawi ku ja kutujk y'øyi, ja'abi kutujk ka'axi tyikututy jøts ja'abi ndu'unint. ¹⁷ Kidi øtsip ja kø'øm ñamyayi jade'en ndymyjatumpy, ja pøky jade'en adøtsp midī ø nnikøjxp'ajtpy. ¹⁸ Nnija'wip øts sa jaa'y'ajtin yikjagyepy, niwine'en ja ka'øy'ajtin kyayikmøødi; njatsøky'ajtpy øts jøts ja øybi ndu'unt, ni ka'apts øts ja nduñ. ¹⁹ Ka' øts ja øybi tsujpi nduñ midī njatsøjky, tum ja ka'øybi ø ndun'adichpy midī njagatunwampy. ²⁰ Kuts øts idø'øn ja nduñ jade'en midī ø ngatsøjkpy, ka'ap øts ja kø'øm ndsøkyøjxp nduñ, pø ja pøkxyi øts ja jade'en xuktump midī ø nnikøjxp'ajtpy.

²¹ Jade'en njaty ngubety, ku øts ja njatunwa'añ midī øy midī tsuj jøts tum ja ka'øybi ø ndumpy. ²² Wamp øts n'am njotp jøts ku øts ndsojki ja Dios kyutujk; ²³ kuts ø kø'øm nnay'ijxyi, jøts ø njawi jøts ku ja jaa'y'ajtin ka'ap jade'en tšøky sam ø njawinmay, ja pøkyts idø'øn xuktump midī ø nnikøjxp'ajtpy, jøts ja' ø xkamajstutp jøts ja øybi ndu'unt.

²⁴⁻²⁵ Ja Dios øts ndagøðøjkip ja nwinmaa'yin jøts øts nbaduujnit ja kyutujk, jøts øts ja njaa'y'ajtin ja' ja y'adsinaapy ja pøkytu'unin, ja' ja mimajadaajkip. iTi ø njanch'ayøøy!

¿Pøñ øts ja pøky kuknitso'ok'atp midì øts jam nìkøjxp'ajtpy, midì øts xyik'ookwamp xyiktigøøwyamp? Kuuyi Dios amuum, nwindson'ajtim Jesucristo køjxp yikpaaty ja nitso'ok'ajtin ja'ayi. jJanch møj ja Dios!

8

Ja juky'ajtin midì Dios xmøø'yimp

¹ Pøn tmøøt'ejtipp ja Jesucristo ka'ap Dios Teety ja mibaat tyaguwaniiyidit jøts ja y'ayo'odit, kumi ka'ap ja t'ukyikmøj t'ukyikmøjtøjkifidì ja pøky. ² Ja Espiritu Santo midì tyajkp ja juky'ajtin xemikøjxp ku nmøøt'ejtint ja nwindson'ajtim Jesucristo, ja' øts ja pøky tø xukniwa'ach midì øts øøky tigøy tø y'ity xyik'ejtnip. ³ Jade'en'ampy ja kutujk y'iity kyamajada'aky ku adøm n'ambojkpitu'uñim nadsaachpøjkpitu'uñim. Tøts ja Dios Teety tkeya ja y'U'nk, jøts ja nayide'en tnanky'ijxyi sam ja jaa'yin, jøts ja tku'o'jki ja pøky. Xjats ja tø tmimajada'aky jade'en'ampy ja pøky, jøts adøm ja ka'ap x'ukmimajadaajkna'am. ⁴ Ja'agøjxp ja jade'en tø ttuñ jøts adøm ja kyutuujk ja wa'ats nbaduujna'am, pø ja'ayixi adøm ja Espiritu Santo yja' nbawinmaa'jyam, jøts kidi kø'øm winmaa'ñip adøm nyikmajadaajkyim.

⁵ Pøn kaniwaajtsipnim ja pøky, ja' yjotmay'ajttip sa kø'øm wyinmaydi; pønsts tpaduujnidip ja Espiritu Santo yja', nay Diosts chøky'ajtin ja ja'ayi pyaduujnidip. ⁶ Jøts ku jade'en njotmay'ajtin sa kø'øm nwinmaa'yin, yø yjade'embì dø'øn yikwindigøøpy; kuts njotmay'ajtin ja Dios yja', ja'ats xukpaajttimp ja juky'ajtin xemikøjxp, jøts ja øy'ajtin midì Dios yajkp. ⁷ Pøn ja kø'øm winmaa'ñi tyuktundip sa kø'øm wyinmaydi, ja Dios ja jade'en myidsepøjktip kumi ka'ap Dios kyutuujk ja tsojkidi, jøts nika'ats tjaajtmidi sa tpadu'undit. ⁸ Paty idø'øn pøn ja'ayi ttundip ja kyø'ømwinmaa'ñi midì pøkmyøøt, ka'ap Dios ja mibaat jade'en twindsø'ogidit.

⁹ Jøts meets, kumi ka'ap meets x'ukyiktuni ja mgø'ømwinmaa'ñi, ja Diosts meets ja y'Espiritu Santo mjagyajip, ja' mee myikjuky'ajtniyidi, pø ixamxi ja xnikøjxp'ajtnidi. Pønsts tkayiktuu'jnip ja Espiritu Santo, ka'ap Cristo ja yja'ayi nayide'en. ¹⁰ Pønsts mmøøt'ejtidi meets ja Cristo, øøky windigøyts ja pøky ñamyayi ñøjkxni møøt ja mnine'kxiti, jøts ja anmija'win ne'egi yjuky'aty ja'agøjxp ku ja Dios tø mgupikyidi. ¹¹ Pøni mjanch-møøt'ajtidipts ja Dios Espiritu Santo, midì ja nwindson'ajtim Jesucristo ojts jadigojk xemikøjxp yikjuky'ayiyi, nay ja Diosts meets ja mnine'kx kø'øm yikjuky'ayiyi, jøts jadigojk xemikøjxp mjuky'attit.

¹² Jøts xpaat'ajtindip adøm, migu'uktøjk, jøts ka'ap njuky'ajtindit pøky agujkpy midì ttuktump ja kø'øm winmaa'ñi. ¹³ Pøni mdunwandipts jade'en sa ja pøkyu'unin, øøky mee m'ejtni, kundigøy mee m'ejtni; pøni m'ajot'ajttipts ja Dios Espiritu Santo jøts ja xukmimajada'akti ja mbøky, mjuky'atpsts meets jade'en xemikøjxp.

¹⁴ Ja' ja Dios Teety y'u'nk'ajtpy pøn ja Espiritu Santo ja tyukpudøjkip jøts ja wyinmaa'ñi ja tyiktøøji tyiktudaajki. ¹⁵ Ku myikmo'odi ja Espiritu Santo, kidi ja'ajip ja myik-tanimøø'yidip jøts meets tsø'øgi jawi myik'etidit, pø ja Espiritu Santoxi meets ja Dios mmøøjyidip jøts m'u'nk'atidit ja Dios, jøts ja' idø'øn xyikwa'anindip amgujk jotkujk ku adøm ja ndeety'ajtyim. ¹⁶ Ja'abi Espiritu Santo majadakp, jøts adøm ja tu'uk amumjoojt xukjanchja'want jøts ku adøm ja Dios x'u'nk'ajtyindi. ¹⁷ Ja' adøm xja'ajtindip, paty adøm nayide'en ja Dios xmøø'yindit ja juky'ajtin midì ja tø twanda'aky, midì ja xmøøpwy'a'anindip. Midì ja Cristo yikmøøpy, nay ja'ats adøm yikmøø'yindip. Pøni ngupøjkyindip adøm ja ayo'on sa ja tø y'ayøy, winets adøm ja nay ja'abi øy'ajtin xukpaajttint midì ja yikmøøy.

¹⁸ Kidi nayide'enip ja' sa adøm ixyam ja ayo'on nbaajtyindi, ka'ap ja jade'en tmi'abaaty midì dø'øn Dios kyunuu'kxin'ajtpy, midì dø'øn jaanim nbaajtindip n'ejxindip. ¹⁹ Tuki'iyi midì ja Dios tø tyikøjy, yjanchja'awe'xnip ja nayide'en juuninim yja'att ja et ja xøøw ku ja Dios tyiknigaxø'økt pøn jaty ja y'u'ngip, pøn jaty ja yja'ajtpy. ²⁰ Nayide'en amuum ja naxwii'ñit tø y'ayo'ombaaty Adán pyøkyøjxp, kidi kyø'ømsojkingøjxpip ja naxwii'ñit ja jade'en yjaty, ja Dios ja jade'en tø tyani'ibikta'agiyi; yikmøøpyts ja jøp'ijxy'ajtin jøts ja øy juuni ja øy'ajtin jadigojk tpaatt, ²¹ jøts ja Dios ja yiktigajtsmyiyit amuum, nay ja'abi øy'ajtin tpaatt midì ja jaa'y yikmo'odip pøn jaty ja Dios u'nk'ajtidip, jøts ja ñiwa'adsit nayide'en ku ja tø pyøkpøyety, ku ja tø wyindigøy. ²² Jade'en ixyam yjaty ja naxwii'ñit midì ja Dios tø tyik'øyi, sam tu'uk ja tø øxyøjk y'amnipikyì chaachnipikyì ja y'u'nk ku kye'exy, amuum tmigii'pxy tmbø'øty. ²³ Jøts kidi ja naxwii'ñip jade'en ja'ayi tyimyjajtp, nayide'en adøm njajtma'an ku adøm tø ayo'on nbaajtyim, øy adøm ja Dios ja y'Espiritu Santo tø xmøø'yim exjpaaj'ajtin, ja'agøjxp ku xjaaktukpaatwa'añimnimidi midì paat'ajtyidip pøn jaty ja Dios u'nk'ajtidip. Njantyimyjøp'ijxy'ajtyindip adøm, jøts ku øy juuni yja'att ja xøøw ku adøm ja Dios amuum xja'ajtindit ejxim tu'uk ja u'nkteedyin, jøts ja xyiktigajtsa'ant ja nne'kx. ²⁴ Janchja'wingøjxp ja'abi nitsoojkin yikpaaty; kuts ja janchja'win yikmøøt'aty, ja' idø'øn tyijpy ku adøm n'awijxyindinim midì ngapaajtyindipnim. Jaa ku ja jeejyip

yikmøø'tajnti, ¿tits idø'øn jaakyik'awexp? ²⁵ Kuts adøm idø'øn jade'en njøp'ijxyindi mididi kayikmøø'yindipnim, yiktudakpy ja tsinaa'yin jøts ja winmaa'n ja'.

²⁶ Jøts nay ja Dios Espíritu Santo adøm xpudøjkamp mā nayja'wiyam nduu'dujkyim, ku niti winmaa'n, niti aaw, niti ayuujk ngajagyejpyindi, jøts ka' ja winmaa'n nbaajtyindi sudso nmøøtmadyaajkint ja Diosu'nk. Nay Espíritu Santots kø'øm ja Dios Teety t'amidoop ja pudøjkin sa nduu'baajint nduu'eixint, ja'agøjxp ku tjaty sudso øy ja Dios Teety tminuu'kxa'akt. ²⁷ Jøts wa'ats ja Dios Teety xnija'wa'am sa jaty pønjabøn wyyinmay, jøts ja ñimadøyi Espíritu Santo sa jaty ja wya'añ ku ja xku'amido'owam sam ja Dios Teety kø'øm ttamidsøky pøn jaty ja yja'ajtpy.

Cristo køjxp nmajadaajkyindi

²⁸ Nnija'windipts ku ndsojkindit ja Dios, yajkpts ja pudøjkin ja' pøni mā jaty sagasa njajtyindi, jøts jade'en tyik'øpyidsimy pøn jaty ja tø twi'ixy, sa ja jawyeen tø ttanibiktaagi kø'øm. ²⁹ Tø ja Dios Teety twi'ixy patki'jyi ja yjaa'y jøts ja tø twiwich. Tøøyip ttanibiktaagi jøts yjaa'y'attit nayide'en sa ja Dios U'nk yjaa'y'aty, pøn tngubajk'ajtp ja jaa'y pøn jaty ja Dios Teety ja'ajtidip, tum uch tum migu'uk ja tjawi niduki'yiyi. ³⁰ Pøn ja Dios tø ttanibiktaagi jade'en patki'jyi, jøts ja tø twaadsøy; kuts ja tø ñimiñiyi, jøts ja tø tkupiky, winets ja nayide'en tø ttamini'adsøwi ja øy'ajtin amuum.

³¹ ¿Sats adøm ja nwa'anin ndejint? Pø amuumxi adøm ja Dios møøt n'ijtyindi, ¿pønts adøm xnimymajadaajkimp jade'en? ³² Ka'ap ja Dios t'ama'at'ajty ja y'U'nk, kyøyajk ja' jøts ja y'oock adøm nbøkyøjxp; ¿sudso dø'øn ja ndejint adøm xkamøøgyøjxint tuki'yiyi mididi myøøt'ajtpy, pøni tødām ja kyø'øm U'nk jawyeen tø xaniguejxyim? ¿Tiku dø'øn ja ndejint tkayakt? ³³ Øy pøn tjani'øøniwya'añ ja jaa'y pøn ja Dios tø wyi'ijxyidi, pø Diosxi ja kø'øm tø kyupikyidi, ³⁴ ¿pønts ja mibaat nidyaniyutujk'atidip jøts ja tpaattit ja ayo'on? Pø ja Cristoxi ja tø kyu'oogiyidi, jøts nay ja'ats tø yjujkyiky xemikøjxp, Dios Teetyts ja amuum møøt y'ity, jøts ja' adøm jam xni'amido'owamp pøni sa ndymyijajtyindi ndymyguubejtyindi. ³⁵ Ku xpa'ayo'øyim ja Cristo, ¿pøn adøm ja xnidyukmajtstuujtimp ja pya'ayo'owin? Nipøn adøm ja xkadukmajtstuujtint, wan tjati'ayo'oni, øy njajotmay'øjkyim, øy njayikjemd'u'ufiindi njayiktedu'ufiindi, wan yuu tja'ity, uk ku wet naamy xka'ejtxindi, uk ku tsep, uk ø'jkin tigø'øyin yjayikpaaty. ³⁶ Pø yide'enxi jap nøkyijxpy wya'añ:

Ejtp øøts ja jaa'y xyik'ookwa'añ ja'agøjxp ku øø nbaduujni ja mja'; jade'en øøts nyiktuñ sa jiyujk sa borreek y'ookwa'añ.

³⁷ Øy adøm jade'en njajajtyindi, ne'egits adøm ja jnaxy ndymymajadaajkyindi ja' myø'ajtingøjxp pøn ja pya'ayo'owin tø xmø'øyiindi. ³⁸ Jade'ents ø nwa'añ jøts ku niti nipøn xkadukmajtstuujtint mibaat ja Dios pya'ayo'owin, nja'ø'jkyindi njadigø'øyiindi, uk njadyimyjajujky'ajtyindi. Ni ja ankilis ja xkadukmajtstuujtintidit uk yjayikutujkpitøjkidi, jyadyimyjaja'ajidi pøn jap tsajpjøtjy uk yjamajidi. Ni ja xøøw ni ja jumøjt mididi ixyam yø'øpy, uk mididi memp kidakpnim, njia' adøm ja xkadukmajtstuujtintidit. ³⁹ Wan ti tkøjxi, uk wan ti tkøjki, wine'en Dios tø tyikøjy niti kyamayi yjade'embi jøts adøm nmajtstuujtintidit ja Dios pya'ayo'owin, mididi ja tø tyiknigaxi'iky nwindson'ajtim Jesucristo køjxp.

9

Dios ja Israelit jaa'y tø wyi'ijxyidi

¹ Tiy janch ø ngajpxy, pø ja Cristoxi øts njanchja'wip, ka'ap ø ndaabyaaty; ja Dios øts y'Espíritu Santo wa'ats xuknija'wip jøts ku øts tiy'ajtingøjxp ngajpxy. ² Janch jotmay'oo'kp øts, ndymychaachkyuwinma'ayip øts kajaa, ³ jøts wamp øts, øy meets ayo'on patki'py ndymygu'ettit jøts ja Cristo ngamøøt'etnit pøni tsojkip jade'en, nugo ku øts nmigu'uktøjk n'ødyyuñ jøts xpaattit ja Dios, wine'en ndukoajk'ajtyindi. ⁴ Ja Israelxi ja tyeety'apidip, jøts ja' Dios tø y'a'eixiyidi jøts yjagyeypidi. Jøts ojts ja kø'øm ja Dios kyunuu'kxin t'eixiyidi tñija'wiyidi, jøts ja' ja møøjyidøø ja tiy'ajtin sudso ja jadigojk ñitaniiyidit ja Dios. Jøts nay ja' ja ttagødøjkiyidøø ja Moisés kyutuujk, jøts ja windsø'jkin mididi ja tyu'undip jam mā ja chaptøjkti. Jøts nay ja' ja Dios ttukmidajnidøø ja wyanda'aky jøts ku ja y'ødyunidit. ⁵ Tu'ugyi aats kugoj ja'adi pøn jaty israelit jaa'dyi; jøts nay ja' ja tyeety'apidip pøn adøm ndeety'ap'ajtyindip, nayide'ents ja Cristo, pø adømxi ja' ñamyayi njaa'y, jøts køjy ja'ani ku ja amuum tritanit ti jaty ejtp naxwiñ, pø Diosxi ja', windsø'øgi winjawi ja y'lity xemikøjxp. Jade'en idø'øn ja y'ejxi. ⁶⁻⁷ Kidits nwa'añim jøts ku ja Dios tkayik'adukñim ja wyanda'aky mididi ja møjaa'y Israel yiktaniwandaajkøø wine'en y'ap y'ok ja tø ñajtska'axidi. Ka'ap ja Dios ja'ayi tø twi'ixy ja'ayi pøn ja Abraham y'apteety'ajtip; pø yide'enxi Dios ja wyinaty tø ñi'mxyi: "Nayi mets mnigojpk'ajtpy ja Isaac y'u'nk y'una'jkti pøni wine'en ja ñajtska'axidi." ⁸ Jade'ents adøm nnija'wa'am jøts ku Dios ka'ap t'u'nk'aty pøni mā pøn jadu'uk jadu'uk kyugajpi, wan t'israelit jaa'yidi wan tka'israelit jaa'yidi. Ja' dø'øn Dios y'u'nk'ajtpy pøn tjøp'ejxtip ja

wyandaajkin. ⁹ Pø yide'enxi ja Abraham ja Dios ñimaajyøø ku ja Dios wyandaajky: "Tiempï køjxp ø nme'ent, u'nkpaatp yø mniðø'oxy Sara."

¹⁰ Jøts kidi ja 'ayipts nadyu'ugyï yiktamiwandaajki ku ja y'u'nk ja tpaatt. Jabï nayide'enxi ja Rebeca ja y'una'jk tpaatmaa pøn ja Isaac tyeety'ajti, adøm ja ndeety'amøj. ¹¹⁻¹³ Jøts ka'anim ja wyinaty yjaja'atinim, kidyimkya'axtipnim ja wyinaty, ka'anim ja wyinaty yikniyawï sã ja y'adø'østtit øy ka'øy, jøts ja Rebeca ja Dios ojts ñi'mxyiyi: "Ja myøjpi tmidu'ump ja myutskpi." Nayide'ents ja møøt tuknax tijy ku wya'añ ja Dios kyajpxy: "Nwinja'wip øts ja Jacob, jøts Esaü ka'." Xjats ja Dios jade'en xuknija'wa'am jøts ku ja kø'øm twi'ixy kyø'ømðsojkingøjxp pøni pøn ja y'a'ejxip. Ka' tmøjpiktaajkyï ja y'ødyu'unin kya'ødyu'unin.

¹⁴ ¿Tits adøm ñikyajpximp? ¿Ti ja adøm nwa'anint jøts ku Dios ka' tyi'y'adi'ich? jPø ka'axi! ¹⁵ Pø yide'enxi ja Moisés yikniimaay: "N'ayo'ejxp øts ja' pøni pøn ø kø'øm n'ayo'ejxwampy, pøni pøn ø kø'øm nba'ayoowampy." ¹⁶ Jade'en'ampyts ka' çøkøyi jøts adøm ngø'ømwinmaa'ñ ndamajadaajkint, pø ja Diosxi kø'øm x'ayo'ejxindipnim. ¹⁷ Pø patyxi ja Dios kyajpxy wya'añ ku Dios tnøjmi ja jaa'y pøn windsøn'ajtp jam Egipto: "Ja'agøjxp møj windsøn tø nyikjaty jøts øts ja nmøk'ajtin nyikwingaxi'iky ku mets nmimajada'aky, jøts øts nxøøw o maðsoo yikniyawit." ¹⁸ Xjats idø'øn jade'en ja Dios t'ayo'ixy pøni pøn ja y'ayo'ejxwampy, jøts ja twinmaa'mbyiky pøni pøn ja kyayikmadogukiwyampy.

¹⁹ Winets meets idø'øn x'adsojimbett: "Pøni janch ku jyade'eni, ¿tigøjxp Dios tøkøy'ixy ja jaa'y? Jøts çpønts mibaat t'ukwindsø'op ja Dios?" ²⁰ Jøts jaa'yts adøm, jøts çjaaktyimbyøn meets ku meets Dios yja' xkagupøjkit? ¿Ti ja ja tu'jts tnimaañti ja ñijaa'y pøn ja tø yik'øyyi: "¿Tiku øts jade'en tø xyik'øyi?" ²¹ Pø ja tu'jtsna'abixi kø'øm pajtip pøni sã ja kø'øm tyik'øyi wya'añ ja y'øy'ajtin. ²² Tø ja Dios kø'øm xwi'ijxyindi, ku ja winaaгин twi'ijxy ja israelit jaa'y, jøts nayide'en winaaгин pøn ka'israelit jaa'dyi. ²³ Sam ja Dios ja kyajpxy ttamigaxiyi'ñ ja kyugajpxy Oseas, ku ja wya'añ yide'en: Pøn øts y'ity ngaja'ajtpy, ja' øts nja'bøkp, pøn øts y'ity ngatsojktip, ja'ats ø ndsoktip.

²⁴ Nay jam et ja xemijukpyi Dios ja kø'øm yja'bøkidit ma ja yikniimaadyøø: "Meets, ka' mee nja'aty."

²⁵ Kuts ja israelit jaa'dyi, pø yide'enxi ja kugajpxy Isaías wya'añ: "Øy ja Israel mabaat ja y'u'nk y'una'jk yjamøjidi yjamayidi sam nøø'abu' myayin, niwinaagints ja'adi pøn nitso'ok'attip, ²⁶ jabï ka'pxy ja Dios ja y'ayuuik tpadu'unt sã ja tø wya'añ, ku ja tyiknaxkida'akt adsu'jky ja tiidyu'unin ya naxwiin." ²⁷ Sam ja Isaías wyinaty jekyip tø wya'añ: Ku ja Dios jeexyip tø tkayiknitso'ok'aty winaaгин ja aats ja kugøj midï yikojpk'ajtp, tø adøm jeexyip jade'en najatna'am sã Sodomit kajp sã Gomorrit kajp ku ja tø kyudigøøgyøjxti.

Sã israelit jaa'y tka'øyjawidi ja øgyajpxy ja ømyadya'aky

³⁰ ¿Tits adøm ngajpxindip? Yjanchja'wingøjxpxi Dios ja tø kyupikyidi pøn ka'israelit jaa'dyi, yam ja y'ity tkajotmay'atti sã Dios ja kyupøkidit jøts ja ne'egi tø kyupikyidi. ³¹ Jøts ja israelit jaa'y, pøn ja kutujk tpadundip jøts ja jeexyip ja' ja Dios tyagupikyidi, ka'ap ja ne'egi yikupøkti ja'agøjxp ku ja kutujk ka'pxy tkabadundi. ³² Ka'ap ja twinmaydi jøts ku Dios ja tyagupøkidit ja janchja'win, ja' Dios ja tijy tagupøkidit ti jaty ja tyundip. Ja'ayi ja tyamøjti, ja'agøjxpts winguwopi jøpkuwopi tmijatti ku ja nwindson'ajtim tø myiñ. ³³ Jade'en yjatti sam yikniyawit ma jap nøkyijpxy wya'añ yide'en: Nyikaxø'økp øts jam Jerusalén tu'uk midï ja jaa'y nay'adsepi yjawip jøts ka'ap ja pøn myayit; pøni pøn ja tjanchja'wip, ka'ap ja windigøy yjatt.

10

¹ Møk øts, miçu'uktøjky, ja tsojkin njagyepy jøts øts ja Dios n'ajot'aty, jøts ø n'amidøy nbøktøøy jøts ja israelit jaa'y nitso'ok'attit. ² Jade'en ø nwa'añ jøts ku ja tjatsojkti ja Dios, jade'en'ampy ku ka'ap tjatti. ³ Ka' tñijawidi sudso Dios tkupiky jaa'y; kyø'ømgutujk ja' yiktundip, ja' ja tijy tagupøkidip ja Dios, ni tkamøjpikta'akti ja' midï Dios ja tagupøkidip.

4 Pø ja'agøjpxi ja Moisés kyutuujk kya'uktuni, pø ixaanixi ja Cristo jøts tum ja'aats ja Dios kyupijjky pøn ja tjanchja'wip.

5 Jøts ku Dios ja kutujk xagupøjkint, pø yide'enxi ja Moisés ja tjaay: "Pøni pøn tpadunwamp ja kutujk, ka'pxy tpadu'unt winets yikjujky'attit ma Dios." 6 Jøts ku Dios xkupøjkin janchja'wingøjpx, yide'enxi ja wya'añ: "Kidi mw'a'andi: ¿Pøndam nøjxpx tsajpøtjy? —jøts ja Cristo mye'en—; 7 jøts ni mgawa'andit: ¿Pøn jap nøjxpx ma ja o'jkin?" —jøts yjujkyøkt ja Cristo xemikøjpx. 8 Pø ka'axi yjade'eni, pø yide'enxi ja wya'añ: "Ka'ap yjagami ja nitso'ok'ajtin, ixa ja xmøødidi wingon", ku xjanchjawidit sa ja øgyajpxy ømyadya'aky mduknijawiyidi mididi øø ngajpxwa'kxpy. 9 Ku mw'a'andit jøts ku ja Jesus ja' nwindson'ajtin'ajtyindip, jøts xjanchjawidit amumjoojt jøts ku Dios Teety ja tø yikjujkykyi xemikøjpx jadigojk jap oo'kpi y'agujkpy, winets xpaattit ja nitso'ok'ajtin. 10 Ja' ja Dios xagupøjkimp ku ja amuum njanchja'want, jøts ku n'am njotp pyidsø'omint ja ayuujk, jøts nwa'anint jøts ku ja Jesucristo ja' nwindson'ajtim'ajtyindip, ja' xyiknitso'ok'ajtin. 11 Pø yide'enxi jap nøkyijxpy wya'añ: "Pøni pøn ja tjanchja'wip, ka'ap ja windigøy yjatt." 12 Tu'ugyi nwindson'ajtim ja tnitani, wan t'israelitjaa'yidi uk wan ja tka'israelitjaa'yidi; ka'ap ja pøn t'ejxma'aty, myøøpy kyejxpy ja kyunuu'kxin pøni pøn ja t'ajot'ajtp, may'ampy ja tmøøy. 13 Jabi yide'enxi wya'añ ja kyajpxy y'ayuujk: "Pøni pøn amumjoojt ja nitso'ok'ajtin t'amidojnit nwindson'ajtingøjpx, ja'ats nitso'ok'attip." 14 Kuts ja pøn tkajanchjawidinim, ¿sudsots ja t'amidojnit ja kyunuu'kxin? ¿Sudso ja tniyanchjawidit ku ja jeexyip kyayiktukmad-owdinim pøni pøn ja', ku jeexyip kya'ity pøn ja nidyukmadowidip ja øgyajpxy ja ømyadya'aky? 15 Pønts tkajpxwa'kxpx ja øgyajpxy ja ømyadya'aky, ¿sudso ja jeexyip tnikyajpxwa'kxxti ja øgyajpxy ja ømyadya'aky ku Dios ja jeexyip kyakexyidi? Pø patyxi jap nøkyijxpy wya'añ: "iNdaxondaajjkimp ja jaa'y pøn tkajpxwa'kxpx ja Dios y'øgyajpxy y'ømyadya'aky mididi xukmado'owimp ja øy'ajtin ja tuda'aky'ajtin!"

16 Ka'apts jaa'y niduki'yiyi tmøjpkta'akti ja øgyajpxy ja ømyadya'aky. Jade'en ja ttundi sa ja kugajpxy Isaías tniagajpxy ku ja wya'añ: "Dios Teety, ¿pøn ja m'øgyajpxy ja m'ømyadya'aky yjawi tø t'ukjanchjawi?" 17 Winet ja janchja'win yikjagyepy ku ja tøn nmado'øyim jawyeen ja øgyajpxy ja ømyadya'aky mididi ja Cristo nigajpxip.

18 Ti kuts ø nyiktø'øt, jøts ø nwa'ant: ¿Wan ndejint tø xkamadowdi ja øgyajpxy ja ømyadya'aky? iPø tøxi xjamadowdi! Jabi ja'agøjpxi jap nøkyijxpy yide'en wya'añ:

Tø ja øy madsøo yikmadowdi pøn ja tø tkajpxwa'kxxti, tø ja øgyajpxy ja ømyadya'aky øy madsøo yja'aty ya naxwiiñ.

19 Uk nwa'ants øts inet: ¿Wan Israelit kajp ndejint ti tkanijawidi? Jøts tøts ja Moisés ja Dios tyuknigajpxy ku ja wya'añ:

Mdami'ama'at'atp meets ja wenk jaa'y ja nitso'ok'ajtin pøn kanayide'endi sa meets, pøn tkanija'widip, ja'agøjpx meets ja xami'ambøkt.

20 Jøts ja Isaías ja Dios yjaaktyimyikwa'animyiyide'en:

Pøn øts y'ijty xka'ixaadyip, tøts øts ja ne'egi ixyam xpaatti;

tø øts ne'egi nnanky'ijxyi pøn øts y'ijty xkanija'widip.

21 Jøts ja Isaías ja Dios yjaaktyikwa'añi ku ja tniagajpxy ja israelit jaa'y: "Tø øts kawine'en njawaadsøy ja jaa'dyiyi pøn kawindiy'oo'ktip, pøn niwine'enin kamadoodip."

11

Ja Israelit jaa'y pøn winaagin tpaattip ja nitso'ok'ajtin

1 Jøts ø nyiktidyøki: ¿Tø ja Dios tyimayjststu'uty ja Israelit kajp, ka'ap ja t'ukupøjkin? iPø ka'axi! Israelit jaa'yxi øts kø'øm, tu'ugyi ja Abraham yik'aadsy yikojkpi, ja Benjamín ø ndeety'apip. 2 Jekyip ja Dios yø tja'biiky yø israelit jaa'y; jøts ixymbaat tkamajststu'uty. ¿Ti ka'ap meets ja Dios kyajpxy y'ayuujk xnija'wiyi, ku yiknimadya'aky ja Elías, pøn ja Dios kyugajpxyip, ku ja ojts Dios t'ajot'aty jøts Dios ja ojts tukmadøy sa Israelit jaa'y y'adø'øtsti? Ku ja wya'añ yide'en: 3 "Dios Teety, tø mgugajpxy yik'oo'kixyidi, tø yikjajtixy ma jaty myikwindso'øgi, nadyu'uk øts njaaktañ, jøts xyik'ookwandip øts nayide'en." 4 Jøts Dios ja ojts yide'en y'adsøyi: "Tø øts abiky niwixujk mil ja jaa'y nwi'ejxti, pøn tkawinguxanaadyipnim ja awanax mididi Baal yiktejp." 5 Nayide'ents idø'øn ixyam yjajtkojmi, ja winaagin pøn ja Dios tø wyi'ijxyidi, pøn ja kø'øm tø ttanibiktaagi y'øy'ajtingøjpx. 6 Ti tundaajk ja jaa'y øy ti pøn tjatuñ jøts tpaattit ja nitso'ok'ajtin, pø ja Diosxi tanibiktaajkip kø'øm jøts ja tyik'awa'añ ja myøk'ajtin y'øy'ajtin. Ku jeexyip jade'en kø'øm ja' yiktama-jada'aky, jade'ents ja jeexyip tpaaty jøts ka'ap ja Dios y'øy'ajtin ti niwya'añ.

7 Xjats ja israelit jaa'y jade'en winaagin tkapaatti sa y'ity yjawnmaydi, tømst ja tpaatti ja øy'ajtin pøn ja Dios kø'øm tø wyi'ijxyidi, jøts jaayi jadu'uk wimbeets kugoots tmijatti, ni tkaja'gyukiyidi ja Dios yja'. 8 Jøts idø'øn ja jade'en yjaty sa jap nøkyijxpy wya'añ: "Dios ja kø'øm tuujnidip jøts ja kyadukjawiidi sa y'adø'øtsti; ja win'ejxtip jøts ka' t'ejxpaatti,

jamadoodip jøts ka' yja'gyukidi jøts jade'en ixymbaāt yjatti." ⁹ Jøts nayide'en ja David ja Dios yikwa'anmiyi:

Wan ja'ayi ttajotkøxti ja xødu'unin ja miga'ayin mi'uujkin, jøts nay ja'ayi tyapøkpyattip jadigojk jøts ja yiktagubattit.

¹⁰ Wan t'etti wimbeets kugoots jøts kyaja'gyukidit, jøts ja xemikøjxp yiktagubattip.

Sa nitso'ok'ajtin tpaatti pøn ka'israelit jaa'dyi

¹¹ ¿Ku dø'øn ja israelit jaa'y jade'en ja Dios tø tyuñidi, tø ja tyimwyindigøøgyøxti? ¡Pø ka'axi! Øy idø'øn ja tø kyamadowdi, tøts ja yjadu'ukpi tpaatti ja nitso'ok'ajtin pøn ka'israelit jaa'dyi, jøts ja tpa'ejxtit, jøts ja nayide'en ja janchja'win tjagyaptit sa pøn ka'israelit jaa'dyi.

¹² Ku ja israelit jaa'y jawyeen kø'øm tø tkagupøkti ja Dios y'øy'ajtin ja'agøjxpts ja tø yikmo'odi pøn ka'israelit jaa'dyi, jøts ja jade'en'ampy pyaat'atyidi ja Dios yja'. Kuts ja israelit jaa'y jadigojk tmi'otjimbejtøxtit ja Dios, ¿ja ti ka'ats ja naxwii'ñit jaa'y ja kunuu'kxin nayide'en jawaani mõj tpaattit?

¹³ Nyiknaxwampy øts nayide'en aaw ayuujk, jøts ø ndukmadoowa'andi meetsti pøn ka'israelit jaa'dyi. Pø meetssi tø nyiktaniguexy ku øts ja Dios tø xkexy, jøts xnijawidit jøts ku øts ja ngajpxwa'kxin ka' ñiñugoji. ¹⁴ Kidi wanik jade'en winaagin nitso'ok'atti ja nmi'israelit jaa'dyi ku mba'ejxidit nayide'en sa mee xpaaty ja nitso'ok'ajtin. ¹⁵ Jabi jade'enxi ja naxwii'ñit jaa'y tø tpaatti ja nøø' ja tuu' sudso ja Dios myaa'kxujkin tpaajtidit, ku ja Dios tø t'ats'ejxma'aty ja israelit jaa'y. ¿Tits idø'øn tyimykpatp ku ja israelit jaa'y ja Dios jadigojk t'awimbetidit? Ja nitsojkin idø'øn ja jadigojk pyatp pøn windy'ejtmidip. ¹⁶ Ku ti t'ukja'biky ja Dios, amuumts ja tja'ajtkixy. Pøni myi'ijtpy ja ujts'aats ja ujtskojpk ja', nayide'ents inet ja tmi'ett amuum tuki'iyi mõøt y'awaj y'axeeñ.

¹⁷ Jade'ents idø'øn ngajpxin ja israelit jaa'dyi sa ja kipy awaj midy ja olivo kipy y'awaj'ajtpy, jøts meets jade'en pøn ka'israelit jaa'dyi sa jadu'uk pa'olivo kipy y'awaj midy ñiñugo øy ma ujtsjøøty ejtp. Kuts ja yikajtspøøty midy ja israelit jaa'y kipy'ajttip ndejint, jøts meets ja mja' ne'egi jam yikøx'øøch ma dø'øn jam ja jadu'ukpi awaj tø wyinaky. Jøts meets ja jade'en xpaat'aty ja jukjy'ajtin midy xemikøjxp, tu'ugyi ja m'aats mgøjpk ñamyayi y'etti.

¹⁸ Ka'ats mnadyamikaxidit, kidi xuktamøjidi xuktamutskidi ja israelit jaa'y pøn ñamyayi ixwejtsidip ja Dios. Pøni m'adø'øtswandip jade'en, jawidi jøts ku nayi israelit jaa'y ñikøjxp idø'øn ja nitso'ok'ajtin tø mnimiñidi, kidi mgø'ømnikøjxpipti.

¹⁹ Mjawa'añ meets: "Janch jade'enimts, tøts ja yjiwa'akti jøts øøts ja ixyam ngu-danaañip." ²⁰ Jade'en'ampyts ja yik'ixwetsti ku tkajanchjawidi ja Dios, jøts meets myikupiky jade'engøjxp ku ja xjanchjawidi. Kidits mnamyikexyidi, øyim yikxonim tudā'aky mnabyikta'agit. ²¹ Pø m'ejxtipxi mnija'widipxi ku jade'en ja israelit jaa'y ja tkadamee'kxy, jøts nayide'ents meets ja mgadamaa'kxmi'yit ku jade'en m'adø'østst. ²² Jøts m'ejxtip mnija'widip jøts ku Dios janch øy, jøts tum ja tmi'ajtin yiktumpy. Møk ja ttiidyuñ pøn ja midundigøjyip. Mmi'øy'ajtipts meets ja', jøts tu'ugyi xpayø'yidit ja y'øy'ajtin; pøni ka'ap jade'en xpadundi, nayide'ents nøjx mjatti sa ja israelit jaa'dyi. ²³ Kuts ja israelit jaa'y jadigojk tmi'otjimbettit ja Dios jøts tjanchjawidit amumjoojt, kupøkidip ja jadigojk jøts ja jukjy'ajtin myo'ojidit midy xemikøjxp; tyu'ump ja Dios jade'en, ti ja ka'ukmajyiy. ²⁴ Sa meets ja tø mgupiky, jøts ka'ats meets mja'israelitjaa'y, jøts tøts meets ja mmø'øyi ja nitso'ok'ajtin, iti kuts ja israelit jaa'y kyayikupøktit, pø ja'axi ja y'ity tyimyjapaat'ajtidip!

Ku Israelit jaa'y ñitso'ok'attit xemikøjxp

²⁵ Meets migu'uktøjkti, ndukmadoowandip ixyam jøts xnijawidit sa Dios ja wyinmaa'ñ tmøøt'aty, jøts ka' nugo mnay'agajpxidit jøts ku meets wijy'ajtin amuum xmoøt'ajtkixy: tø Israelit jaa'y ñamyayi y'amutski. Ejtptnim ja jade'en kunin ja yikupøktit namay pøn ka'Israelit jaa'dyi. ²⁶ Ku nøjx jade'en tø y'ukjaty, winetnimts ja Israelit jaa'y ni'ijtyi ñitso'ok'attit, pø patyxi jap nøkyjxpy yide'en wya'añ:

Kaxø'økp tu'uk ja Israelit jaa'y, ja yiknitsokpi,

jøts ja' ttukniwa'ats'atp ja jaa'y ja ka'øybi pøn jaty ja Jacob t'aadsidip tkøjpkidip.

²⁷ Jøts ngajpxy n'ayuujk øts wyinaty jade'en nyik'adujkpy,

ku øts ja nyikpøkwyat'atst. ²⁸ Pøn israelit jaa'dyi, pøn tkagupøktip ja øgyajpxy ja ømyadya'aky sudso ja nitso'ok'ajtin yikpaaty, ejxma'jtniyidip ja Dios ja ñamyayi jøts meets ja mgunuu'kxyi; ka'apts ja Dios ja tyimiy'ixmachidi, tsojkidip ja' ja'agøjxp ku ja Dios kø'øm tø twi'ixy ja mõjaa'dyøjk. ²⁹ Pø ka'axi Dios ja jadigojk tpiky pøni ti ja yajkpy; pøni tø ja twi'ixy ja jaa'y, ¿sudsøts ja nugoyi t'ixmatst jadigojk? ³⁰ Meetsxi ja Dios y'ijty mga'uknimadøøpy, kuts ja israelit jaa'y ja tø tkamimadowdi, xjats meets ja Dios tø m'ayo'ijxy. ³¹ Jøts ja nayide'en yjatti sa meets y'ijty xkamimadøyin ja Dios, ja'agøjxp ja jade'en tuuñ jøts ja jadigojk t'ayo'ext nayide'en sa mee tø

myik'ayo'ijxyin. ³² Ja Dios jade'en kə'əm tə ttanibiktaagi jəts ja niduknax kyayikmimado'ot, ja'agəjxp ja jade'en ttuuh jəts o pəngapən tuknax ja ttuk'ext ja pya'ayo'ajtin.

³³ iKa'ap jade'en ti tmi'abaaty sa ja Dios ja əy'ajtin tjagyepy, sa ja wijy'ajtin, sa ja ja'gyukin tməodi! Ka'ap pən tmiwinmaa'nbyaaty pəni sa wyinmay, pəni midī tyunwampy, ma ņjəkwə'añ yja'atwa'añ. ³⁴ "ZPən tniñija'wip sa ja Dios wyinmaa'ñ? ZUk pən ja tyukjaty jəts ja jade'en ttu'unt? ³⁵ ZUk pən ja Dios jawyeen ti tə tmə'əy, jəts ja ja' ttaguyaki midī ja xmə'əyimp?" ³⁶ Tum ja Dios amuum tja'ajtkəjxp jəts ja tyik'əygyəjxp, jəts ja tyiktunwa'añ pəni ti jaty ja tə tyik'əyi. iKunuu'kxy etpyim ja Dios xemikəjxp! Jade'en idə'ən y'ejxi tyiyi.

12

Midi chəjky ja Dios ku ja nnadyagədjəkant

¹ Kə'əm mee migu'uktəjk ja Dios amuum mnadyamiyoxit. Əy'ajtp jəts jade'en xu'undit midī ja y'əyja'wip kyunuu'kxyja'wip, ja' ņamyayi mdawindsə'əgidip ja Dios. Ku ja x'ayo'ijxyindi, jade'en mee nminuu'kxə'əky jəts jade'en xu'undit. ² Kidi jade'en mdsinay'adə'əxti sa xuktu'uñin ja kə'əmgutujk, ja kə'əmwinnmaa'ñ. Mijotjimbetti ja Dios jəts ja mwinmaa'ñ nayide'en tyigatstī, winets ja juky'ajtin xpəttit midī amuum myiktigatsidip jəts jade'en xnijawidit midī ja Dios chəjky, ja əybi ja tsujpi midī ja Dios mda'əyja'wiyidip, midī əy wa'ats pidsəmp.

³ Yide'en əts ja Dios xanigutujk'aty y'əy'ajtingəjxp, jəts ja' mee ndukmadəəpy, kidi nugo mnadyaməjpihta'əgyidi pəni ti jam jadu'uk jadu'uk yjajtpy. Pəni mabaat ja Dios kə'əm tə mduktatyidi, ja' mja'gyukidip. ⁴ Ka' nduknax'ajtyindi, nayide'en sam ja nine'kx yikjagyepy may jəəjp yikməodi, jəts ka' tum ja' wya'añ pəni ti tu'uk wya'añ, ⁵ nayide'ents adəm idə'ənmidi, əy adəm mabaat njamaya'am, tu'ugyits adəm ja Cristo xja'ajtyindi, jəts nixem niyam ni'amuki n'ijtyindi sa kə' teky tkamajstutu'uty ja nine'kx.

⁶ Kija' ja Dios xyikwinmaa'nbyaajtyindi pəni sa ja kə'əm ttamidsəky nidu'uk jaty. Wants tyiktunkpaajtyindi əy yikxon. Pəni tə Dios xmə'əyim ja wejin kajin jəts ngəjpxnaxja'ant ja y'ayuyk midī ja tə xmə'əyim, ndu'unindipts ja jade'en pəni mabaat ja janchna'win xukjagyepyindi; ⁷ jəts pəni təts ja xmə'əyim ja wejin kajin jəts ja nmigu'uk nduunaxja'ant ja y'əybi, mbadu'unindipts idə'ən ja jade'en. Jəts pəni pən ja Dios tə myə'əyi jəts yik'ixpəkt, ja'ats idə'ən ja tyu'ump; ⁸ jəts pəni jamts pən tə yikmə'əy jəts tkajpxjot'aməjkī ja myigu'uk, ja'ats idə'ən ja tyu'ump. Pəni jamts pən əy ti tyajkwə'añ, ka'ap kyə'əmwinnmaa'ñ tyikyə'əty jəts ja ja' ttaguyakī əy ti. Pəni jamts pən yikməəpy jəts ja tməə'mo'ot ttuu'mo'ot ja myigu'uk, yikxonimts t'ext tudə'əky'ampy; jəts pəni pən tpudəjkidip ja ayooobi jaa'y pən ti ka'ejtxidip, ejtni xoni də'ən tpudəkīdit.

Sa pyaqt'aty ttu'undit pən ja Cristo yjanchna'widip

⁹ Nabya'ayowidi nixem niyam. Yikjwa'əkti ja ka'əybi, jəts tundi ja' midī əy midī tsuj, midī ja Dios kyupiky'ajtpy. ¹⁰ Yik'awa'andi ja amigu'uk'ajtin jəts nixem niyam mnamyayidit wine'en Dios mja'atyidi, nawyindsə'əgyidi nixem niyam, kidi pən xkaməj'ejxti.

¹¹ Jotmay'atti ja Dios, kidi mnuuxidi, amumjoojt xmidu'undit ja Dios.

¹² Taxonda'əkti jəts ku ja myikmə'ədit midī mjəp'ejxtip; jəts kidi nugo x'ayojidi wine'en mjəmjatti mdejatti, jəts kidi x'ixmatsti ja Dios'ajot'ajtin nijuuni.

¹³ Pəni jam ti kya'ijtyxidi pən ja Dios yjanchna'widip, pudəkīdits; əyim yikxon xyikja'attit xyiktsoondit pəni pən mbaajtidip m'ejxidip mjənjotp mdəjkjotp.

¹⁴ Pəni pən mga'ədyuujnidip, tagədəkīdi ja Dios. Jəts amidowdi wan tyikunuu'kxti jəts kidi meets ja jawyeen xka'ədyijy.

¹⁵ Xonda'əkti nayide'en pəni xondəktip ja mmigu'uk, tsaachjawidits nayide'en pəni jiidyip yaxtip.

¹⁶ Namyayidi nixem niyam, yikxon mdsəənīdit mdanīdit. Kidi mnamyikexyidi, məə'tetti pən ayooobi jaa'y'ajttip. Kidi mwa'andi jəts ku meets nadyu'uk tuki'yī xjaty.

¹⁷ Pəni tə pən mga'ədyuñidi, kīdits meets ja nayide'en xunwimbəjtmidī. Ejtp xu'undit ja y'əybi əy madsoo. ¹⁸ Yik'amijatti mabaat mmajada'akti, jəts yikxon xməətsəənīdit xməətanīdit ja mmigu'uktəjk, amuum ja tudə'əky'ajtin xyiktu'undit. ¹⁹ Kidi mee migu'uk kə'əm xagubety ja mmidsep pəni sa ja mduñidi, ja Diosxi kə'əm yik'ayo'ombaađiditnim; jabi yide'enxi jap nəkijxpy wya'añ: "Əts xpəat'ajtp jəts əts ja ndiidyu'undit; əts ja ndagubattip, nəmpxi Dios." ²⁰ Jəts nayide'en ja wya'añ, jəts ku tijy x'ədyu'undit pən mmijotma'jtidip, wan ja tka'uknagymayidi. ²¹ Kidi ja ka'əybi mmimajada'əgyi, jaa ja xmiəjada'akt ku tum ja əybi xu'unt.

13

¹ Mīmadowdi ja windsəndəjk. Pə Diosxi kə'əm tə tyikutuky jəts ja kudunktəjk yja'attit. ² Pəni pənts ja tkamimadoəwampy, ja' idə'ən ja wyinaty kyamīnadəəpy pən ja tə

tyikutuky jøts ku ja yja'attit. Pønts jade'en adø'øtswamp, pøky ja taja'adidip jøts ja nøjx yiktiidyundi. ³ Jøts kidi ja'ajip ja kudunktøjk ñija'ajttip jøts ja t'adsø'øgidit pøn øyjaa'y'ajttip, pø ja'axi ja ñija'ajttip jøts ja tiidyu'undit pøn tundigøødyip. Pøni ka'ats tsø'øgi jawi mnachøkyi jøts jade'en xwingunøjkxat ja kudunktøjk, jaa'y'ats yikxon jøts ja kudunktøjk niti mgadamatsit, ⁴ pø ja'axi Dios ja tø tyanibiktaagiyidi jøts ja øybi xu'unt. Kuts kø'øm mga'øvjaa'y'att, pøkyjaws mets ja mbøky; pø kidi nugoøjpxi ja kudunktøjk ja møk'ajtin tjagyapti ku ja tyiidyundi, pø ja'axi Dios ja tø tyanibiktaagiyidi ku ja tø tyikutuky, jøts ja ttiidyu'undit tiy'ajtingøjxp pøn tundigøødyip. ⁵ Ja'agøjxp pyaat'aty xmimado'odit ja kudunktøjk pø mwinnmaadyipxi, kidi ja'agøjxp ja nugo xundi jøts ja mgatiidyundi. ⁶ Nay ja'axi ja Dios tyikutujkp jøts ja kuguju'uyin xmo'odit ja kudunktøjk; pø nay ja Diosxi ja tø tyanibiktaagiyidi jøts ja jade'en ja tyajujky'ajtin tpaattit, jøts jade'en mjaaknigudunk'atyyidi.

⁷ Migubajtkøxtits pøni pøn jaty jam mmijoy'ajttip. Pøni jam pøn kyayakñim kyagubetynim, wants ja tyakti; uk jams pøn ti tkagujyynim tkagubetynim, wants ja tkugujy tkugubety; pøni pøn jam ja windsø'jkin tyktigøøpy, wan ja windsø'jkin tjagyepy; jøts pøni pøn jam ja amigu'uk'ajtin tyktigøøpy, wan t'amigu'uk'aty ja myigu'uk. ⁸ Ka' ti pøn xamiyoy'attit, ja tsojkin ja pa'ayo'owin ja' idø'øn tiy xem yam mjagyaptip; ku jade'en xu'undit, ja kutujks meets idø'øn wyinaty jade'en tø xximado. ⁹ Pø nømpxi ja Dios y'ana'amin: "Kidi mnidø'øxy kidi mniyaa'y mnabyøjxixiyidi, kidi myikjaa'y'øøky, kidi mmeech, kidi mdaay'aty, kidi xam'amā'at'aty ja mmigu'uk pyikta'aky"; jøts tuki'iyi ja Dios y'ana'amin tu'ugyi ja yide'en y'ayuujkpidsimy: "Mba'ayo'op ja mmigu'uk nayide'en ejximdam kø'øm mnabya'ayøyin." ¹⁰ Pøn ja tsojkin, pøn ja pa'ayo'owin tjagyajp, ka'ap ja tmidundigøy ja myigu'uk; jade'en'ampy ja Dios tkupik'atkixy ku ja tsojkin nyiktu'unint, jøts jade'en niwine'en ja kutuj kyayikmidundigøy.

¹¹ Jøts tø tymbyaaty ja et ja xøøw, tajotigøyidi ja Dios yja'. Tyimwyingomp ja ayo'on winets xpaattit amuum ja nitsø'ok'ajtin. Nax'adøtsp ja et ja xøøw, ka'ap y'ity jaakjade'en ku njanchja'wiy'okwā'añindi miduk'ojk ja Dios y'øgyajpxy ja y'ømyadya'aky. ¹² Ka'pxnrip ja et ja xøøw, tyimdyukmibaat'ajtpy ja Dios; wants tmajtstuujtyindi ja ka'ødyu'unin ja pøkyu'unin, jøts jøp'iixy nnanky'eitna'andit, tum ja øybi wa'atspi nyiktu'unindip midikapøkmøøt. ¹³ Wan tuda'aky tjaa'y'ajtna'andi sam pyaat'aty pøn tnija'widip ja Dios. Jøts kidi ja' ndunk'ajtyindi ja nøø ja mu'uk, uk ja pøjp ja tsa'pxp, nmiga'ayin nmi'uujkin, uk nnamyøøt'atwā'añindi øy pøn møøt, uk ja tsep ja' njotmay'ajtyimp, uk ndam'amā'at'ajtyindip ja nmigu'uk øy ti. ¹⁴ Kidi jade'en m'adø'øtsti, tu'ugyi nwindson'ajtim Jesucristo xpadu'undit sa ja ya chinaay, jøts kyamøjtøkidit ja mbøkyu'unindi.

14

Kidi mmigu'uk xpagajpxy

¹ Pøni jam pøn myajada'aky kyamajada'aky yjanchja'wningøjxp, kupøktits, kidi sa xejti, øy ja wyinmaa'ñ yjanganayide'endi sam meets ja mja'ajin. ² Ja may pøn tjøø'kxtip øy ñityi, jøts nayide'en pøn amaay'ejttip, pøn nugo u'nkjii'kxy tsujxkjii'kxy ttojxktip, jøts wya'andi jøts ku ja' chøkyi Dios wyingujkp. ³ Pønts tjøø'kxp øy ti, ka'ap ja tka'øvjawit pøn amaay pøn wi'iixy øy ti tjøø'kxp; jøts nayide'en ja'ami, ka'ap ja pyagajpxmit, ka'ap ja sa ttejmit pøn øy ti tjøø'kxp, pø tøxi Dios ja kø'øm kyupikyiyi, ⁴ jøts ja'ats midundip. ζMjaaktyimbyønts meets ku meets ja xpagajpxt, yamts ja Dios ja tmiduñ? Wan ja t'øyi uk tka'øyi, ja wyindsønts ja paajtip pøni sa ja kø'øm tyuñi. Jøts yik'øyip ja', ζti Dios ka'ukmajyip ku ja tka'ukyik'øyit myøk'ajtingøjxp?

⁵ Jøts jaa jadu'ukmidi pøn wandip tu'ugin ja xøøw yik'amaay'att, jøts jadu'uk wyamidi ku ka' pyaat'aty ni midikapøkmøøt kyayik'amaay'att, tum jade'en ja xøøw tu'ugyi. Kija'ats tñitanidit ja wyinmaa'ñ tigøjxp ku jade'en wyinmaydi. ⁶ Pøn t'amaay'ajtp tu'uk ja xøøw, ja Diosts ja tyawindsø'jkip; jøts pøn tka'amaay'ajtp, nay ja Diosts ja jade'en wyindsø'jkinmo'op. Jøts pøn tjøø'kxp øy ti, nay ja Diosts ja tyukmøja'wip tyukunuu'kxyja'wip; jøts pøn amaay'ajtmidip, ka' ti tñiyii'kxy, nay ja Diosts ja tyawindsø'jkip ku ja jade'en ttuñ, jøts ja ttukmøjawi ttukunuu'kxyjawi amuum.

⁷ Ka'ap pøn nugo ñiyujky'aty, ka'ap pøn nugo ñiy'øøky. ⁸ Ku njujky'ajtyindi, Dios xyikujky'ajtindip, jøts pøni o'jkindipts, nay ja'ats xkwent'ajtindip. Jøts jade'en yiknijawi jøts ku ja amuum xja'ajtyindi øy adøm njajujky'ajtyim, uk nja'ø'jkyim njadigø'øyim adøm. ⁹ Pø ja'agøjpxxi ja Cristo yujujky'ajtyim xemikøjxp ku ja tmimajadaajky ja o'jkin, jøts ja tu'ugyi ixyam tñitanaagyixy øy mid'iibi.

¹⁰ ζTigøjxpts ku mee kø'øm ja mmigu'uk xabayø'øy sa y'adø'øtsti? Jøts ni xkatsokti paat meets ja'. ζPønts xijy ta'amp, pøn kanaxp jam Cristo wyingujkp? Pø ja'axi xabayø'øyindip ja nbøky, ja' xiidyu'unindip. ¹¹ Pø yide'enxi jap nøkyijpxy wya'añ:

Øyi madsoo n'ity, jøts øts nwingujky niduki'iyi jaa'y kuwani ñagyuyendyaxøxidit.

Jøts wya'andit ku øts ja'ayi tu'ugyi ndios'aty.

¹² Jade'ents idø'on, kija' idø'on ngøyajkint jam Dios wyingujkp pøni sà nidu'uk jadu'uk tø njaa'y'ajtyindi ya naxwiin.

Ka'ap ja nmigu'uk nyikwinmaamya'jtindit

¹³ Paty ka'ap nnabyagajpxandit nixem niyam. Ne'egi ja' njotmay'ajtindip sudso ja nmigu'uk ngayikpøkpyajtindit. ¹⁴ Tumwa'ats nwindson'ajtim Jesús tø ttanibiktaagi, ka' ti nugo kø'øm tyimiykøkpyety; kyø'ømwinmaa'n ja' pøn nømdip jøts ku øy ti kya'øyi kyawa'adsi. ¹⁵ Jøts ku ja jii'kxy midì kayik'ødyejp kayikwa'atstejp nnadyabagajpxandit nugo, ¿ti pya'ayo'owints jade'en njagyeyjyindip? Paty ka'ap pyaat'aty jøts ja nyikmøjindit pøni ti ja nmigu'uk yjii'kxyindip, jøts jade'en ngaduk'ayoojindit ja nmigu'uk, jøts ka'ap ja yjanchja'win kyudigø'øty. ¹⁶ Kidi ja' xuñ midì yjawi ja mdsinaa'yin ja mjanchja'win yiktabagajpxp. ¹⁷ Kidi ja kaagyip jii'kxyip xagupøjkindip ja Dios mǝ ja kyutuik amuum ttanitani ja yja', pø ja øchinaa'yinxì ja chøjkpy ja tuda'aky'ajtin ja xondaajkin midì ja Espiritu Santo xmø'øyindip. ¹⁸ Pøn jade'en tmidump ja Cristo, ja' Dios chøjkpy jøts øyja'wiyip ja jaa'y ja'.

¹⁹ Wants tjaaknija'wa'andi sudso nbaajtindit ja tuda'aky'ajtin midì nyiktu'unindip jøts ja nnadyabudøjkandit nixem niyam, jøts jade'en myøktajkindit ja njanchja'win. ²⁰ Kidi ja ngø'øm ja' adøm nugo nyikmajadaajkindip, jøts adøm ja Dios yja' ngayikmøjtøjka'andit. Øy ni midì jii'kxy yjagayikpøkpyety, jade'en ne'egi pyaat'aty jøts ja' xkajøø'kxtit midì ja nmigu'uk kya'øyja'wip jøts ja jade'en xkayikpøkyat. ²¹ Ne'egi øy'atpts ku ja tsu'uch ka' xtsu'utsttit, uk xka'uuktit ja vino, uk xkatu'undit o ti, nugo ku ja nmigu'uk xkayikwinmaa'nmya'atti, nugo ku kyapøkpyatti jade'en'ampy jøts kyatuu'tigø'ødyit. ²² Dios ja ja'ayi mduknija'wip pøni sà mets ja mwinmaa'n xyikyø'øy. jøtkujk ja jaa'y pøn kyabadumpy midì ja pyøkyja'wip! ²³ Pønts tjøø'kxp øy ti majtsk aaw majtsk joojt, kø'ømts ja ñankpyøkpyetyi ku ja tjii'kxy, kumi ka'ap jøtkujk tjii'kxy; jøts ti jaty kayiktump jøtkujk'atyim, pøky ja'.

15

Ja' mdu'ump midì ja nmigu'uk tya'ødyøkip

¹ Pøn jaty møk tjagyajtpip ja janchja'win, xpaat'ajtindip adøm jøts nbudøjka'andit pøn ja yjanchja'win tu'ugyi tkamøøt'ajtipnim, jøts kidi adømyi kø'øm nnabya'ayø'øyindi. ² Nidu'uk jaty adøm xpaat'ajtyindi jøts ja ndabudøjka'am midì ja ødyunidip jøts ja yjanchja'win myøjta'aktit. ³ Pø ni ja Cristoxi ojts kø'øm kyanabya'ayøyi, ne'egi ja yjaaktyimyjaty jade'en sà jap nøkyjxpy yide'en wya'añ: "Tum øts ja tø xaja'atkixy sà jaty ti jaty mgayikta'ødyundip mgayikta'øñimaadyip." ⁴ Pø ja'agøjpxni ja Dios ja kyajpxp tnankyjajyøø jøts adøm ja nnija'wa'an ti jaty ja ñigajpxpy ja y'ixpøjkin, ja'ats adøm ja xmø'øyim ja kajpxjot'amøki jøts tuda'aky ngupøjkindit o ti ayo'on, jøts tu'ugyi ja awejx'ajtin yikmøø'tatt ku yikpaatt ja xemikøjxpit jukjy'ajtin. ⁵ Ja Dios Teetyts adøm xyikmajadaajkimp o ti ayo'on jøts ja xkajpxjot'amøjka'an. Wants ja mbudøkiyidi jøts mdsøønidit mdanidit yikxon nixem niyam, sàm nwindson'ajtim Jesucristo tnajtstu'uni, ⁶ jøts tu'ugyi ni'amuki xja'byaattit xkajpxpaattit ja Dios Teety pøn ja nwindson'ajtim Jesucristo tyeety'ajtpy.

Ku ja Dios y'øgyajpxy y'ømyadya'aky yikajpxwa'kxy mǝ jaa'y kya'israelit jaa'yidi

⁷ Nagyupøkidits nixem niyam, kidi sà mnadyijyidi mnawya'añidi, nagyupøkidi nayide'en sàm adøm nwindson'ajtim Jesucristo tø xkupijkyindi Dios Teety wyindsøjkin wyinja'wingøjxp. ⁸ Pø israelit jaa'yxi ja Cristo ñimimpy jøts ja tpuðøkit, jøts jade'en ja Dios Teety ja wyandaajkin tyik'adujkit midì ja møjaa'dyøjk wyinaty tø yiktamiwanda'agidi. ⁹ Jøts nayi ñimeen ja' pøn ka'israelit jaa'dyi, jøts ja tja'byaattit tkajpxpaattit ja Dios ku ja pya'ayøyidi jadine'en, pø yide'enxi jap Salmos nøkyjøtpy wya'añ: Nja'byaattp mets ngajpxpaattp mets øy mǝ naajx øy magajp, mǝ jaty ja jaa'y chøøni pøn ka'israelit jaa'dyi,

jøts n'øø't jøts nxu'uxt mets windsøjkingøjxp.

¹⁰ Jøts nayide'en wyami ja Dios kyugajpxy:

Mxonda'aktit tuknǝx pøn ka'israelit jaa'dyi møøt ja israelit jaa'y pøn ja Dios ja'ajtyidip.

¹¹ Jøts jap abiky mǝ jap wyami:

Møjja'wimiyidi kunuu'kxyja'wimiyidi ja Dios ni'ijtyi pøn ka'israelit jaa'dyi,

kajpxwa'kximiyidi ja myø'ajtin o magajp.

¹² Jøts yide'en Isaías tyukjadya'anmüyøø ja Dios:

Ja Isai ñikøjpx pyidsøømt pøn ñiwindsøn'ajtmip pøn ka'israelit jaa'dyi;

ja' ja tu'ugyi tyamiguy'ejxtip ja ñitso'ok'ajtin.

¹³ Wan ja Dios mmø'øyidi ja xondaajkin ja tudå'aky'ajtin, midì kukjøp'ijxy'ajtindip ja kyunuu'kxin ku ja njanchja'wint, jøts jade'en ja ajot'ajtin tu'ugyi mdukm'i'etidit Espiritu Santo myø'k'ajtingøjxp.

¹⁴ Migu'uktøjkti, jade'en ø nwa'añ jøts ku meets amuum xjagyepy ja nadyamiyoxi'ajtin jøts ja nijaw'i'ajtin. Wa'ats ja xnijawidi, jøts n'a'ejxip øts jøts ku xjatti jøts nixem niyam mnagyajpxwejidit. ¹⁵ Ja'agøjxp mee ndanijayi ya'at nøky, jøts ndukja'myatstìt tu'uk ma-jtsk ja møj winmaa'ñ midì paat'ajtiyidip ja yikxon ja'gyukin. Tø øts ja Dios xanipiky y'øy'ajtingøjxp jøts øts jade'en ngajpxwejt. ¹⁶ Ja' øts ndamidumpy ja nwindson'ajtim Jesucristo ku øts ngajpxwa'kxi ja y'øgyajpxy ja y'ømyadya'aky ma ja jaa'y kya'israelitjaa'yidi jøts ja tpaattit ja nits'o'ok'ajtin. Ja'ats øts ndagøðøjkip ja Dios, wan ttajotkujk'atyidi jøts kypøkidit ku yikpøkwy'a'adsidit ja Espiritu Santo.

¹⁷ Ku øts jade'en nmiduñ ja Dios Teety, xondaqø øts jøts øts ja møk ndukmøjawi ndukunuu'kxyjawi, ku øts njanchjawi ja nwindson'ajtim Jesucristo. ¹⁸ Ka'ap øts ti nugo ñikyajpxy midì øts ja Cristo kø'øm xkaduktump xkaduktupat jam jaa'y agujkp pøn ka'israelit jaa'dyi, jøts tmimado'odit ja Dios. Tø dø'øn jade'en tyimyjaty, tø dø'øn jade'en tyimyikmadøy sà ø nngajpxy, ¹⁹ ku tñank'ijxyi ja myø'k'ajtin, tyikaxi'iky ja ejxa'an, tyikaxi'iky ja miagr'i'ajtin, jøts jade'en yik'ixy yiknijawi ja Espiritu Santo myø'k'ajtin. Jade'ents øts nngajpxkixy øy madsøo ku ø ngajpxwa'kxi ja Cristo y'øgyajpxy y'ømyadya'aky midì nitso'ok'ajtin xukpaajtin, nwidity ø Jerusalem uk nja'aty øts jambaa't Ilirico etjotp. ²⁰ Ja' øts ndajotigøøpy jøts øts jade'en ja øgyajpxy ja ømyadya'aky tø ngajpxwa'kxy, midì tngajpxp ja nitso'ok'ajtin, ma niwindii kyayiknimadøynim ja Cristo xyøøw, jøts ka'ap øts nay ja'abi kajp tø n'anøjki ma jadu'uk ja jaa'y jawyeen tø tyikts'o'onda'aky ja Cristo y'ixpøjkin. ²¹ Jade'en øts tø nduñ sà ja Dios kyajpxy y'ayuujk wya'añ:

Ja' ja ne'egi ejxyip nijawiyip pøn ja niwindii kamadobajtipnim, jøts yja'gyukidip ja ne'egi pøn ja niwindii kanimadøojidipnim.

Ku ja Pablo ttanibiktaaqi jøts ñøjkxt Roma

²² Ku øts ja ngajpxwa'kxk ngayiktsojk'abaadi, ja'agøjxp meets tø nga'ajts'ixy, tø øts kawinaak ojk nja'ukniwinmayi jøts ø nnojkt ma meets jam. ²³ Tøts øts ja ndunk y'abaadi yam ya'at etjotp ma øts yam, jøts jekyip øts njaniwinma'ayini jøts mee nnojkt.

²⁴ Yamnims øts inet jam n'uknaxt ku ø nnojkt jam España jøts mee n'uk'ext, jadya'ts øts jam wyinaty xpudøkidi, jøts øts jam nja'att ma øts idø'øn nnojkwaa'añ. ²⁵ Jerusalem øts ixyam nniykxy, pudøjkin øts nyikniykxy jøts øts ja ngømo'owa'andi pøn jaty jam Dios ja'ajtidip, adøm ja nmøøtjanchja'wibidi. ²⁶ Ja' tø tyikmukti meef pøn tsinaadyip jam Macedonia jam Acaya, jøts ja ttanigaxti ja ayooobi jaa'y pøn tsinaadyip jam Jerusalem, adøm ja nmigu'uktøjkti pøn ja Dios ja'ajtidip. ²⁷ Tø twinmaydi jøts ku jade'en y'øyi jøts ja jade'en ttu'undit, pø tøxi ja israelit jaa'y ja ñamyayi y'ayo'ijxyidi ku ja tyukpaat'atyidi ja Dios; xjats ja nayide'en pyaat'ajtmiyidi, jøts ja ttatudøkidit ja israelit jaa'y ti jaty ja iiy yjagyajtpip. ²⁸ Kuts øts yø n'uktun'abaadit ku øts ja wyinaty tø ndagøðøkidi ja pudøjkin, winets ø ndsoont jøts ø nnojkt jam España, uk naxpts øts jam ma meets jam. ²⁹ Jøts wa'ats ø nnijawi jøts ku øts ja Dios amuum ja kyunuu'kxin xabudøki, jøts øts ja Cristo ngajpxwa'kxiti ja y'øgyajpxy ja y'ømyadya'aky ku øts jam nøjx nja'aty.

³⁰ Tundits migu'uktøjk ja may'ajt nwindson'ajtim Jesucristo køjxp jøts Espiritu Santo pøn xukja'wimp ja tsojkin ja pa'ayo'owin, jøts meets nayide'en mnadyamiyoxidit øts ndunkjøøjp, ku meets ja Dios x'amido'ot ja may'ajt jøts ø xpudøkit. ³¹ Amidowdi ja Dios wan øts x'agø'duky x'axajtuky, jøts kidi myajada'akti ja jaa'y pøn tkagupøjkti ja nwindson'ajtim yja' jam Judea, jøts nayide'en x'amido'odit jøts ejtmi xoni tkupøktit ja pudøjkin pøn tsinaadyip jam Jerusalem, pøn ja Dios ja'ajtidip, midì øts yam ndaninøjkwandip. ³² Jøts pøni yik'ajtpy Dios jøts øts øy jotkujk nja'att ma meets jam, jøts øts jam n'ukpoo'lxxt. ³³ Diosts mjagyapidip pøn amuum ja øy'ajtin xondaajkin tyajkp. Jade'en idø'øn ja yjatt.

16

Ku ja Pablo tkajpxpøø'kxy ja myigu'uk pøn jam Roma

¹ Mjaty'ejxtip ja Febe, adøm ja nmøøtjanchja'wibi pøn tump jam tsapøjktotp jam Cencreat kajpjtøp. ² Kupøkti ja' yikxon, tundi may'ajt Dios køjxpit sam pyaat'aty, pø tu'ugyixi ja Dios yikjanchjawi. Pudøkidits jøts xmo'odit ti jaty jam ka'ejtxip, tø ja may'ampy xjanchpudøjkandi, øts paat ja kø'øm tø xpudøki.

³ Kajpxpoo'lxxti nayide'en ja Priscila møøt ja Aquila, pøn tø nmøøtundi jøts øøts ja Jesucristo yja' nyikyø'øyi. ⁴ Ja'agøjxpti øts ixyam njujky'aty ku ja kyø'ømjujky'ajtin ja o'jkin jøp'am tpiktaktøø, nugo ku øts ja'ayi jade'en xyiknits'o'okti; xemikøjxp øts ja Dios ja ndamøjawit, jøts nayide'en ja ttamøja'wimyidi niduki'iyi ja nmigu'uktøjk, pøn tjanchja'widip ja Jesús ma jaa'y kya'israelit jaa'yidi. ⁵ Kajpxpoo'lxxti nayide'en ja migu'uktøjkti pøn

namyujkidip jam Priscila jam Aquila tjojkjotpti. Kajjxpoo'kxidik osts ja nmigu'uk Epeneto, pøn midu'uk tjanchja'wiy'okwaan ja nwindson'ajtim Jesucristo jam Acaya etjotp. ⁶ Kajjxpoo'kxti ja María mididi jadine'en tmidump ja Dios ma meets jam. ⁷ Kajjxpoo'kxidik osts ja nmigugajp ja Andrónico jots ja Junias, pøn osts mōot tō nbuxōjksōōnidi; janch'ōyjawī ja y'etti sam nayide'en ja Cristo kyudanaabyitōjkti, jōts jawyēen ja ne'egi tjanchja'widi ja Cristo, oojknim osts.

⁸ Nayi mgajjxpoo'kxtip ja Amplias, pøn osts oyi mōot namyayi Cristo kōjxp. ⁹ Jōts nayi kajjxpoo'kxti ja Urbano, pøn osts ojs nmōotuiñ ku osts ja nwindson'ajtim yja' nduujni, jōts kajjxpoo'kxti nayide'en osts ja nmigu'uk Estaquis, ¹⁰ jōts nayide'en ja Apeles pøn kawinaak ojk tō ttamajada'aky ja yjanchja'win Cristo kōjxp, oyi ja wine'en ja ayo'on yjayiktanipky. Jōts kajjxpoo'kxti nayide'en ja Aristobulo mōot ja y'u'nk ñidō'oxy. ¹¹ Kajjxpoo'kxidik osts ja nmigugajp pøn txōw'ajtp Herodiōn, jōts nayide'en ja Narciso, jōts pøn jaty jam tsinaadyip ja' tjojkjotp, pøn ja nwindson'ajtim tō tjanchjawidi. ¹² Jōts nayide'en xkajjxpoo'kxtit ja Trifena mōot ja Trifosa, pøn amuum tmidundip ja nwindson'ajtim, jōts nayide'en ja Pērsida, adōm ja nmigu'uk pøn kawine'en kujk tmiduñ ja Dios. ¹³ Jōts nayide'en xkajjxpoo'kxtit ja Rufo, pøn amumjoojt tjantyimyanchja'wip ja nwindson'ajtim, jōts kajjxpoo'kxidi ja tyaak nayide'en, jade'en osts ja njawi sam osts ngō'ōmdaagin. ¹⁴ Kajjxpoo'kxti ja Asincrito, ja Flegonte, ja Hermes, ja Patrobas, ja Hermes, jōts mōot niduki'iyi ja migu'uktōjkti pøn ja Dios yjanchja'widip, pøn jaty ja jam mōotti. ¹⁵ Nayi kajjxpoo'kxti ja Filólogo mōot ja Julia, jōts ja Nereo mōot ja myiga'axkiixy, jōts ja Olimpās nayide'en xkajjxpoo'kxtit mōot niduki'iyi pøn jaty ja jam mōot, pøn ja Dios yjanchja'widip.

¹⁶ Nadyuknijawiyidi ja kajjxpoo'kxin nixem niyam sa Dios tsoyky. Mdanigajxidip ja kajjxpoo'kxin pøn jaty ja nwindson'ajtim Jesucristo yjanchja'widip oyi madsoo.

¹⁷ Migu'uktōjkti, mjayimy'eixtibim pøn yiktseptōjkidip pøn yiktundigōōdyip. Ja tsep ja nugo yiknaxkida'akwandip jōts mee mnawya'kxit, pō ja'axi ja yikma'atwandip mididi meets tō myiktukmadōy, pō ka'axi ja yjade'eni mididi mee tō xjaty mididi tō xnijawi, jade'en ne'egi tymbyaat'aty ku xpuwa'atstit. ¹⁸ Ka' yō'ōbi jaa'y tmidundip ja nwindson'ajtim Jesucristo, kō'ōm yō ñajyotmay'atyidi ti yō ejtxidip ka'ejtxidip, jōts twin'ōōndi ja jaa'y pøn tkanija'widipnim, oyi ja Dios yja' nadyijyi amyuyj tsaachuyj tmgajjpxti. ¹⁹ Jōts ñija'wip oyi pøn sa meets xpaduujni ja Dios yja'; ja'agōjxp mee ndajotkujk'aty. Ja' osts ja'ayi ndsōjky jōts xwinmaa'ñ'attit sa xu'undit ja tum ja oyi, jōts kidi ja ne'egi mjaakmayidi ja ka'ōybi. ²⁰ Jōts ja Dios pøn ja oyi'ajtim xondaajkin amuum tjagyajp, tsojk ja nōjx ja miku' myōk'ajtim tyikwindigōjyi, jōts ja niti majadaajkin tka'ukpatnit meets mwingujky. Paatti ja nwindson'ajtim Jesucristo ja kyunuu'kxin.

²¹ Nayi mdanigajxidipts ja Timoteo ja kajjxpoo'kxin pøn osts mōot nduñ, jōts nayide'en Lucio, mōot ja Jasōn, mōot ja Sosipater, osts nmigugajp nmigunaajxti.

²² Nayi mgajjxpoo'kxmīdip ja Tercio nwindson'ajtimgōjxp, pøn osts ya'at nōky ndukjaapy.

²³ Jōts nayide'en mgajjxpoo'kxyidi ja Gayo. Ja' tjojkjotp osts yam ndsōōni, jōts nay ja' t'anuu'kxyajkp ja tjojk mā ñamyuyidi pøn jaty ja Dios yjanchja'widip. Jōts nayide'en mdanigajxidip ja kajjxpoo'kxin ja Cuarto jōts ja Erasto, pøn ja ya'at kajjpmēēi myachomujky.

²⁴ Mo'ojidip ja nwindson'ajtim Jesucristo ja kyunuu'kxin mee niduki'iyi. Jade'ents osts idō'ōn ndsōky'aty.

Ku ja Dios y'ukyik'ajot'ajtni

²⁵ Tmōja'windits tkunuu'kxyja'windits ja Dios, wan mbudōkiyidi jōts ja mjanchja'win tu'ugyi amumjoojt xyik'ettit sam mduknijawiyidi ja ogyajpxy ja omyadya'aky, sa ja nitsō'ok'ajtim yikpaaty mididi osts ngajjpxwa'kxpy, ja Jesucristo y'ixpōjkin. Jōts ja' yō' mididi ja Dios jekñim tō tngajpxy, mididi ja jeky tō xkaduknija'wa'am jōts ku ja jayimni jōdsnim ja naxwii'ñit cho'onda'aky. ²⁶ Ixyamt ja tō yiknijawinim ku ja kyajpxy y'ayuujk tō ttukjaadyañ ja kyugajpxtyōjk, sa kō'ōm tyikutuky ja Dios Teety xemikōjxpit. Jōts ja tuki'iyi yituknijawidi ja kajp ja naajx jōts tjanchjawidit jōts tpaduujnidit ja yja'.

²⁷ Tu'ugyi Dios Teety mōj jōts ja' tu'ugyi tñija'widyaapy, wants xemikōjxp ja tkupiky'aty tmadōy'aty adōm ja nwindson'ajkin ku ja nja'byajitindi ngajjpxpaajitindi amuum nwindson'ajtim Jesucristo kōjxp! Jade'ents idō'ōn ja y'eixi tyiwi.

JA MYÏDU'UKPI NØKY MIDI JA PABLO TYANĪGAJX JA CORINTĪ JAA'Y

Ku ja Pablo tnijayi ja janchja'wibi jaa'dyi pøn jam Corinti tsinaadyip

¹ Ots idø'øn Pablo'ajtp. Tø øts ja Dios Teety xamidsøky jøts øts tø xwaadsøy jøts øts ja Jesucristo ngudanaabyi'att. Møøt ja Sóstenes, pøn nayide'en tjanchja'wip ja Jesucristo, ² ixyam ø nnijayi ja Corinti jaa'y pøn jaty ja Dios Teety tø tnijawidi jøts tø tkupøkti ja chojkin ja pya'ayo'owin møøt ja y'ana'amin Cristo Jesús køjxp. Pø ja Dios Teetyxi meets tø mwi'ijxyidi jøts ja amuum xamiyoxtit ja mdsinaa'yindi møøt nayide'en pøn jaty ja tjanchja'wyimidip, pøn jaty tkajjxpatmidip ja nwindson'ajtim Jesucristo, pø tum ja'axi amuki nwindson'ajtyindip nixem niyam. ³ Pajtidi kupøjkidi ja Dios Teety y'øy'ajtin kyunuu'kxin møøt nayide'en ja nwindson'ajtim Jesucristo yja'.

Sa ja kunuu'kxin yikpaaty Cristo køjxp

⁴ Ejtp øts ja Dios Teety ndamøjawi ndakunuu'kxyjawi ku meets ja kunuu'kx'ajtin tø xpaaty Cristo Jesús køjxp. ⁵ Paty meets ja Dios Teety ja møj øy'ajtin janch kajaa tø mmø'øyi jøts øy tsuj xjajtidi uk xnimadyajkidi ja y'øy'ajtin ja kyunuu'kxin ja'agøjxp ku ja Cristo yja' tø xpabøjkidi. ⁶ Tø meets idø'øn ja xjanchyikwindiy sa jaty ja Cristo tø yiknimadya'aky. ⁷ Ku meets jade'en mdsøønnt mmo'o'jidipts ja Dios pøni ti dø'øn ja ttmamidøjkp, ixa mee x'awijxy ja xøøw ja jumøjt ku ja nwindson'ajtim Jesucristo ñanky'e'jxpaadiyt jadigojk. ⁸ Ja Diosts ja møk'ajtin mmo'o'jidip jøts tu'ugyi mdsinaa'yin xyik'ettit, jøts wyinaty niti mgayiktaniwanbatti ku ja nwindson'ajtim Jesucristo jya'att. ⁹ Pyadumpy ja Dios ejtp ja y'ayuujk. Ja'ats tø mwaadsøyidi jøts ja y'U'nk xmøøtsinaajyidit, ja nwindson'ajtim Jesucristo.

Ja' ñi'ane'empy jøts tu'ugyi chøønidit

¹⁰ Migu'uktøjkti, nwindson'ajtim Jesucristo køjxp meets idø'øn n'amidøy jøts ka'pxy xu'undit jøts tu'ugyi mdsinaa'yin xpikta'aktit xyik'ettit. Kidi ki'abiky mdsøønidi, tu'ugyi winmaa'ñi xmøøt'attit jøts tu'ugyi xmøøt'attit midi mdajotigø'ødyip. ¹¹ ¿Ti ø migu'uktøjk idø'øn jade'en xyikwamp? Ja'agøjxp øts idø'øn jade'en nwa'añ kuts ja Cloé myigu'uk yø xukmadowdi ku meets jam mnamyijotma'adyidi. ¹² Yide'en øts idø'øn tø nyitukmadøy ku mee tumdigach ja m'ayuujk; nõmbik mum wya'andi: "Øts ja Pablo møøt"; jødsik ñømidi: "Øts ja Apolos møøt"; uk nõmidiptsik: "Øts ja Pedro møøt"; jødsik jam ñømidi: "Øts ja Cristo møøt." ¹³ ¿Sudsots idø'øn, uk tø dø'øn ja Cristo may ñawya'kxyi? ¿Ti tø meets ja Pablo mgu'oogiyi kruskøjxp? ¿Uk Pablo køjxp meets idø'øn tø mnøbety? ¹⁴ Ngajxajkpy øts ja Dios kuts ja'ayi tø nyiknøbety ja Crispo jøts ja Gayo, meets ja mjaa'y; ¹⁵ jøts jade'en mgawa'andit ku mee tø mnøbety øts køjxp. ¹⁶ Ixa njaakja'myech jadu'uk jøøn jadu'uk tøj kuts ja Estefanas nayide'en tø nyiknøbety, jøts jade'eñi nipønxi øts jyawi tø njaga'ukyiknøbajtni. ¹⁷ Ja'agøjxp øts idø'øn jade'en tø n'adi'ich ku øts ja Cristo tø xkakexy yiknøbati, ja'axi øts ja xaniguexy jøts øts ja jaa'y ndukmadø'ot ja nitsoojkin ayuujk, ka'ats øts ja janchkajajtni nnigajpxy sam ja ixpiky jaa'y myadya'akti, jøts ja Cristo ja y'o'jkin jam kruskøjxp ejtp yikmøjpikta'akt.

Cristo, Dios Teety myøk'ajtin wyijy'ajtin ja'

¹⁸ Ku jyayiknimadya'aky ja Cristo y'o'jkin jam kruskøjxp, løki o'jkin ja jaa'y ja ttejti pøn tø yiktanibiktaagidi jøts ja øy'ajtin tkapaattit; pønts ja Dios tø tkupøjkidi ja ñitsoojkin ja pya'ayo'owin ka'ap ja jade'en wya'andi, nõmp ja wya'andi jøts ku Dios myøk'ajtin jade'en tyiknigaxi'iky. ¹⁹ Pø yide'enxi ja nõky wya'añ midi jap jaabyety ejtp:

Ka' øts ja y'ixpiky'ajtin ja wijy jaa'y nmøjpiktaajkit,

jits ka'ap ø ngupøjkit ja ñimado'owin ku øts ja ñimadoobi jaa'y xjamigajpxmit.

²⁰ ¿Mats idø'øn ja ixpiky jaa'y tyundi, jøts ja yik'ixpøjkpidi, jøts ja jaa'y pøn tnigajpxtip tñimadya'aktip ti jaty ya tuujnip naxwiin? Kawejin kakajinxi ja Dios ja tø tyikwimbijty midi ya naxkixy yiktejp wejin kajin. ²¹ Wa'ats Dios tnijawi jøts ku ka'ap pøn myi'abaadyiyi ja wyijy'ajtin sam ja wijy jaa'y yjawnimaadya'an pøn tkagupøjkit ja'abi winmaa'ñi. Ja' ja ne'egi tyukpaatp tyuk'ejxp ja nitsoojkin pøn ja kupøjkiyiy ja kyajpxy ja y'ayuujk tu'ugyi amumjoojt, øy ja yjadu'ukpi wine'en tja'abaxti ja'abi kajpxy ja'abi madya'aky.

²² Tum ja ixyymbi ka'ijxyimbi ja israelit jaa'y chojktip, jøts ja griegit jaa'y t'amidomidi ja wejin ja kajin; ²³ ja Cristots øø nnigajpxy ku ja kruskøjxp tø y'øky. Nachø'ødyu'uni ja israelit jaa'y ja ttejti, jøts ja griegit jaa'y ñømidi ku ja kyawe'ajtin kyakaj'ajtin. ²⁴ Ots ja jade'en yjawa'andi, tøts ja Dios twi'ixy ja israelit jaa'y jøts ja griegit jaa'y pøn ja amuum tyamay'ajtpy ja møk'ajtin ja wijy'ajtin Cristo køjxp. ²⁵ Midi ja jaa'y yjanch'uktejtipp Dios ja kyawejin kyakajin, ja' idø'øn ne'egi kamaabyim pidsømp; midits tyejtipp kajotmø'ajtin

ja'ats kidi mibaat pøn myayiyi, yjaaktyimyjinajxpy ja jawaani øy wine'en ixpikyjaa'y jyanamyukyidi. ²⁶ Migu'uktøjkti, ejxti nijawidi ku Dios tømwi'ijxyidi, o meets jam waani pøn janch'ixpiktyi sam idø'on ya naxwiiñ yiktsøky, jøts nayide'en niwaani pøn yikmøjpiktaktip, uk jam tigati yikta'ejxkapti yjønøtp tyøjkjøtp. ²⁷ Tigach ja Dios wyinmaa'n, tum ja' ja tømwi'ixy pøn kajotmøjkti jits ja tsøødyumbim jyattit pøn jotmøk nayja'widip ya. ²⁸ Ja' ja Dios tømwi'ixy pøn ya naxwiiñ niti kayiktamøjpiktaktip jøts jade'en tyikugøxit pøn jaty møjpiaktaajkidip ja jaa'y ya naxwiiñ, ²⁹ jøts niti nipøn kyanadyamikaxiyit Dios Teety wyingujkp. ³⁰ Ja Dios Teety idø'on kø'øm tøm ja Jesucristo mdukpaaqyidi jøts mulki møøt m'ettit; jits nay ja' tøm tuñ jøts adøm ja Cristo ndawejint ndakajint, jøts nay Cristo køjxpts ja Dios Teety xkupijkyindi jøts ja amumjoojt xukmøøt'ijtyindi, jøts ja nitsoojkin xømø'oyint. ³¹ Jabi yide'enxi ja Dios kyajpxy wya'añ: "Pøni pøn nay'agajpxwajnip wan ja nwindson'ajtim tnadya'agajpxyiyi."

2

Ja Cristo kyajpxy y'ayuujk pøn tøm y'øøky kruskøjxp

¹ Migu'uktøjkti, ku mee nninijxky jøts ja Dios kyajpxy ndukmadoojidi, ka'ap øts ja'abi ayuujk nyiktuuñ mididi kanimadooni. ² Tu'ugyi øts ojts ja ixpøjkin nbikta'aky ku øts ja Jesucristo ja'ayi nnijawi, jøts jade'en øts ja nnigajpxy ku ja kruskøjxp tøm y'øøky. ³ Janch yik'ayo'owim ngaxi'iky jøts tsøøgi øts yjawi xjanchyik'oo'knip ku meets jam nninijxky; ⁴ kuts mee tøm ndamimadya'aky jøts tøm nduknijawidi ja Dios kyajpxy y'ayuujk, ka'ap øts wi'ijxpy ayuujk uk kanimadooni ayuujk nyiktuñ sa ja møj nija'wibidi. ⁵ Ja Dios Espiritu Santo meets ja tøm mduknimadya'idi jøts ja Dios tøm mbudøkyidi, jøts meets idø'on xmbøkt kidi ja wijy jaa'y y'ayuujkøjxpip, pøm ja Diosxi myøk'ajtingøjxp.

Dios Espiritu Santo køjxp idø'on ja Dios Teety ñankñijawiyi

⁶ Tiy idø'on, janch møj nija'wibim øø ngajpxy ku øøts ja jaa'y nmigajpxy pøn jaty jawaani tøm tnija'wiñ ja nwindson'ajtim y'ana'amin. Kidi meets jade'en xja'gyuki ku øøts ja ya'at kajin nyiktuñ sam møj yikutujkpi ya naxwiiñ ttundi, mididi tsojk kudigøøñidip. Jabi Diosxi øøts idø'on kø'øm jade'en xyikajpxp. ⁷ Ja Dios wyejin ja kyajin øøts n'ayuujk'ajtpy mididi yu'uch yik'ijtpñim, jøts ja' øøts idø'on nnigajpxy ja nitsoojkin mididi xemikøjxp ejtp, mididi ja Dios yu'uch tøm tyik'tiy ku wyinaty niti tkayikøjñim. ⁸ Ni tu'ugin ja møj yikutujkpi yøm tøm tkanimadø; ka'ap ja nwindson'ajtim Jesucristo ja jeexyiy tøm tyikruspatti kuk ja tja'gyukidyøø. ⁹ Jade'ents idø'on ja tøm yjatti sa jap nøyijxpy jaabyetyi: Nipønim ja tka'ixy, nipønim ja tkamadø, jøts nipønim ja tkawinmay pøni ti ja Dios tøm ttanibiktaagi jøts ja tømøt pøn jaty ja chøjky.

¹⁰ Adømts idø'on ja tøm xuknija'wa'am pøni ti dø'on ja tyijpy ku ja Dios Espiritu Santo tøm xuknija'wa'am, jaa kuxi ja tnija'wiguixy tuki'iyi, jøts nija'wiyip ja Dios Teety ja wyinmaa'n nayide'en pøni sa jaty ja wyinmay.

¹¹ ¿Pøn idø'on ja t'uknija'wip pøni ti jam y'am yjotp tu'uk jadu'uk ja jaa'y myøøt'ajtpy? Jabi wyinmaa'ñxi ja kø'øm ejxijtp mididi ja ñikøjxp'ajtpy. Ja Dios Espiritu Santo nayide'en nadyu'uk tnija'wimiyip pøni ti jaty ja Dios Teety wyinmaa'n'ajtpy. ¹² Kidi ja naxwii'ñit winmaa'yints adøm tøm nyikmø'øyim pøm ja Diosxi adøm ja y'Espiritu Santo tøm nyikmø'øyim jøts ja xukja'gyuka'am ja Dios myøjmay'ajtin ja Dios myøjkunuu'kxin. ¹³ Ja Dios Espiritu Santos øø tøm xukykyujy pøni ti jaty øø nnimadyajkpy, ka'ap øøts ja ngø'øm ixpiky'ajtin nyiktuñ, paty øøts ja Dios tyiy'ajtin ndukmadø ja jaa'y pøn ja'abi ayuujk ja'abi winmaa'ñ tnimadoojip.

¹⁴ Pøni pøn ja Dios tyiy'ajtin tkanimadoojip, ka'ap ja tkupøkti pøni ti ja Dios Espiritu Santo yjanigajpxy, nugo ja tijy kawej'ajtin. Ka'ap tnimadø, kumi ka'ap ja tnijawi sudso ja tja'gyukit, ja' kuxi ja Dios y'Espiritu Santo tkamøøt'ajtidi. ¹⁵ Pønts ja Dios Espiritu Santo myøøt'ajtpy øy ja tigati tja'gyukit jøts nipøn ja sa kyanø'ømxit. ¹⁶ Pøm nømpxi ja kajpxy jap nøyijxpy: "¿Pøn idø'on tøm t'uknimadø ja Dios wyinmaa'ñ? Nipøn kyamayi jøts ja Dios tkajpxwejt." Øy ja yjade'en'aty, ja Cristo adøm ja wyinmaa'ñ nmøøt'ajtyimp.

3

Tu'ugyi øøts ja ndunk ku øøts ja Dios nmiduñ

¹ Kuts mee migu'uk ja Cristo y'ayuujk tøm ndukmadowdi, ka' meets jade'en nmigajpxy sam idi'in yikmigajpxti pøn ja Dios Espiritu Santo yja' tøm ñadyamiyoxkøjxnyidi, jade'en mee tøm nmigajpxy sam ja jaa'y pøn tkajanchja'widipnim, jøts sam yiktukmadowdi ja mutsk unaj'k, ja Cristo yja'. ² Tum ja' mee tøm ndukykyujy mididi jajtini, jade'en mee tøm nduñ sami maxu'nk ja'ayi tsejtsk nøø yikmø'øy jøts ka'ap kaaky tojks; ja'agøjxp ku mee mgamayinim mididi tsep sam ja maxu'nk tkagupøkti ja tømøts kaaky ja tømøts jii'kxy; nayide'ents meets ixyam ook tigøy

m'ity, ka'anim mee mmayi ja tseppi, ³ ja'agøjxp ku nayide'en x'ejxtinim sam ja jaa'y pøn ja Dios y'ayuujk tkanija'widipnim, ku mee mnadyami'ekyi tigati; ku mnamyijotma'adyidi jøts mga'uknamyigajpxwa'aniyidi jøts nayide'en mga'uknawyin'ejxwa'aniyidi, nayide'en mee xuni sami nugo jaa'y pøn ja nwindson'ajtim Jesucristo tkanija'widipnim. ⁴ Pø kuxi mee mnimy: "Øtsi Pablo møøt", jøts jadu'uk nømi: "Øtsi Apolos møøt", nayide'en mee m'adi'ich sam idø'øn ja jaa'y pøn ni tu'uk ja Dios kyajpxy tkanija'wip.

⁵ ¿Tymbyøn ja Pablo? jits ¿Tymbyøn ja Apolos? Pø ja Diosxi øøts ja'ayi xumbi'ajtp, nay ja'ats øø tø xyiktunkpaaty jøts meets yja' ja tø xmbøjki. Ja ndunk øø tø nduñ midi øøts ja Dios tø xaguwani. ⁶ Jade'en ja tpaaty, øts idø'øn ndejint tø nni'ipy ja tømt, jøts ja Apolos ja tø tnøguway jøts tø t'ejx'ity. Jøts ja Dios, ja'ayits tø tyikmxy tø tyikyøn ja tømt. ⁷ Ja Dios idø'øn tu'ugyi møj, jøts ja idø'øn tuki'iyi tungøjxp, pø ja'axi ja tømt tø tyiktsø'øky jøts niti ja'adi pøn ja tø tjan'i'ipy uk pøn ja tø tjanøguway. ⁸ Nipønts kyamøji kyamutski øy ja tø yjani'ipy uk øyts ja tø yjanøway, pø ja Diosxi kø'øm ttanipatp ja mijuu'ñ pøni sa ja tyunk ja ya tyikyø'øy naxwiñ. ⁹ Tum tumbi jaa'y øøts idø'øn namajtsk. Ja Dios øøts idø'øn xumbi'ajtp, jøts meets idø'øn mgam'ajtp midi ja Dios yja'ajtpy.

Uk nayide'ents n'ukpiktaajkint, meets idø'øn mdøjk'ajtp midi ja Dios kyøjpy. ¹⁰ Øts idø'øn ja Dios tø xpikta'aky pojtspi ana'ambi, jøts øts idø'øn ja tøj tø nbots'okwa'añ, jøts ja wenkpi pojtspi tjaakyikyø'øy ja tunk. Tum a'ejxits ja tsøky sa pønjabøn pyøch. ¹¹ Nipønxi kyapaat'atyiyi jøts ja pøch ja abiky tyiktso'onda'akt, pø tøxi ja tu'ugyi tyañ midi ja Jesucristo pyøchkojpk'ajtpy. ¹² Kuts ja tøj jyaakjayikpøch, øts ja oori yjaakpat, uk ja platits, uk tum tsujtsaa, uk øyts nayide'en ja pu'uy, uk ja miyts, uk øyts ja waxkipy, ¹³ ku wyinaty ja tiidyu'unin tyaaty jammimts ñigaxø'økt pøni sa pøngapøn tø tyañ; pø tum jøønxi jam wyinaty tump, ja'ats tyiknigaxø'økp pøni ti ja tøj tø yiktakøjy. ¹⁴ Pøni pøn wyinaty tø tyiktuñ midi ja jøøn kamayip, yikmo'opts ja' myijuu'ñ; ¹⁵ kuts ja wyinaty tyø, windigø'øpyts ja tuki'iyi midi ja wyinaty tø tjaapøch øy wyinaty awisø yjanch'awa'atspidsimy pøn idø'øn jade'en tø pyøch.

¹⁶ ¿Ka' mee xniyaw ja meets ja Dios Teety mdsaptøjk'atyidi jøts ku ja Dios Espiritu Santo jam chøøni? ¹⁷ Pøni pønts tjejtjip ja Dios ja chaptøjk, yikudigøyip ja Dios ja', ja'agøjxp ku kyunuu'kxyi Dios chaptøjk, meets ja Dios mdsaptøjk'ajttip.

¹⁸ Kidi kø'øm mnadyuñidi. Pøni jam tu'ugin ixpiky jaa'y ñayjawi, wan nayide'en nabyikta'agiyi ejxim ja jaa'y midi niti tkajajtp, jøts jade'en tpaat ja wejin ja kajin midi kanaxp. ¹⁹ Pø janch jawaani kajaaxi ja Dios wyejin jøts nika' jade'en ja jaa'y y'ixpiky'ajtin. Yide'enxi ja Dios kyajpxy wya'añ: "Ja kyø'øm ixpiky'ajtin ja jaa'y tabakjo'opidip ja Dios, jøts ja kø'øm tyukttagidawiyidi." ²⁰ Nayide'ents wyami: "Ñija'wip ja Dios ja' ku nima kyatuñ ja ixpiky jaa'y wyinmaa'ñ." ²¹ Paty meets mganadya'agajpxiyidi nipøn; pø meetsxi mja'ajtpy jøts øy xyiktunkpaatti tuki'iyi: ²² iza Pablo, Apolos, Pedro, et naxwi'ñit, jujky'ajtin, ø'jkin, ixyam'ajtin, jøts midi memp midi ja'tp; ²³ ja Cristots mee mja'ajtidip, jøts ja Dios Teety ja Cristo tja'atmi.

4

Ja nwindson'ajtim kyudanaabyi tyunkjøjpy

¹ Paty meets jade'en xja'gyukit jøts ku øøts ja'ayi ja Cristo nbudøki, ja'ats øø ndunk'ajtpy jøts øø nnigajpxt ja Dios y'ayu'uch winmaa'ñ. ² Pøni pøn ti tø yiktaguwani, yiknigaxø'økp idø'øn ja' ku ja tpadu'unt. ³ Ka' øts ja nmøjpikta'aky pøni sa meets xnigajpxy xnimadya'aky, uk pøni sats øts ja xejti xwa'andi pøn jaty ya naxwiñ ja jaa'y tiidyundip. Ni øts paat nganadyunk'aty kø'øm pøni sa ø njaa'y'aty. ⁴ Niitits nganadyapøkyjawi, nnija'wip øts wa'ats ku øts ka' axøøk njaa'y'aty, ka'ats ja njøp'ejxin ku øts ja nbøky kya'ity, ja nwindson'ajtimts ø kø'øm xiidyu'ump. ⁵ Paty kidi x'øjyawidi xka'øjyawidi ixyam tigati; awejxtinim wan ja nwindson'ajtim tyiknigaxø'kixy pøni ti jaty kayik'ejxpatp, jøts nay ja Dios tyiknigaxø'økp pøni sa t'ixy tu'uk tu'uk ja anmija'win, jats ja Dios ja t'øjyawit uk tka'øjyawit.

⁶ Migu'uktøjkti, meets m'øy'ajtingøjxp øts jade'en nwa'añ jøts xni'ejxu'uttit ja Apolos uk xni'ejxu'uttit øts. Paty øts idø'øn jade'en nwa'añ jøts nayide'en mjaa'y'attit sam øøts. Ka' nugo xu'undit agubajkpy yam ja Dios kyajpxy jade'en kyawa'añ jøts kidi nugo pøn xnadyamikexyidi uk xmi'ambøjkmidi pøn. ⁷ ¿Uk jaa dø'øn tu'uk jaa'y pøn jawaani myikwejidip? ¿Ti kø'øm tø xpaatti midi ja Dios tø mga'ukmø'øyidi? Pøni tum ja Diosts tø mmø'øyi, jadits ku mnadyamikexyidi pøni ti jaty mmøøt'ajtpy, jade'enxi me mwani ku meets ja kø'øm tø xpaaty pøni ti jam mmøøt'ajtpy.

⁸ Kumeen jaa'y'in meets yjawi mnayjawi pøn niti tka'ukta'ayoonidip. Windsønin yjawi mnayjawiidi, jøts øø xka'ukja'myatsni. jOgidø'øn tymjyanch mjanchwindsøn'atti jeexyip, jøts øø nayide'en ja ngutujk xmo'ot! ⁹ Jade'enxi øts yjawi nja'gyuki, pø tø øøts idø'øn ja Dios tyimy'ixoojk xyiktañ; jøts øøts idø'øn yjawi tø nyiktanibiktaagi jøts øø n'ooft; jøts

oøts jade'en ja tsajp ja naajx x'ext xjawit, nayide'en ja Dios y'ankilis møøt ja naaxwii'ñit jaa'y. ¹⁰ Maap mo'tp øø nyiktijy ku øøts ja Cristo yja' nbaduujni yam mee mnadyijiyi møj nija'wibi pøn ntimadoogøxidip ja Cristo yja'. Ka'ap øø njotmøjki yam meets yikxon myikwindsø'øgi. ¹¹ Ixyambaat øøts yuu ndani'ixy møøt tøødsi, jøts ka'ap øøts nwet nnaamy te; øy øøts jaa'y sagasa xuiñ, ka'ap øøts ndøjk te ma øø nboo'kxt, ¹² jøts nmijotkijxpy øøts ndunk nbøjk. Xjamigajpxigøpy øøts jaa'y, ja øy tsuj ayuujk øøts ja nda'adsojimbijtpy. Ngupijxpy øøts pøni xpawojp øøts jaa'y. ¹³ Xjanchjabagajxpx øøts jaa'y, tuda'akts øøts ja n'ane'emy. Pista'agin øø nyiktuñ uk jade'ents øø nyikjawi ejxim jaa'dyi'ñi jaa'dya'ach.

¹⁴ Ka' mee nnijayi jøts xatsø'dyuu'ndit ku jade'en mdsøønidi, n'ana'amwapy meets idø'øn ja'agøjxp ku mee n'u'nk n'una'jkin njawi pøn ø ndsojktip. ¹⁵ O meets jeexyip xjamøøt'aty namay ja yik'ixpøjkpi, ka' meets jadine'en ñamayi mdeety jabi øtsyixi meets ja'ayi tu'umpchi ceety'atp ja'agøjxp ku ja Cristo ñitsoojkin tø ndukmadowdi jøts ja janchja'win tø xpaatti. ¹⁶ Ixyamts mee n'amidøy jøts ø xpa'ejxti.

¹⁷ Paty meets ixyam ndaniguexy ja Timoteo pøn ø n'u'nkja'wip nwindson'ajtingøjxp, jøts pøn ø nayide'en xkamajstutp. Yø' mdukjja'myatsidip sudso ø ndsøøni kuts ja Cristo nmibøjki ja yja' sa o magama ndukyikyuti pøn jaty ja Cristo tjanchja'widip. ¹⁸ Jam meets ja mmigu'uk pøn janchnamyikajxniiyidip, nømp ja wya'andi kuk mee nga'ats'ext ja'agøjxp ku øts ja' ndsø'øgidi. ¹⁹ Pøni yikutujkpyts ja Dios, nninøjkxtipts pojin. Jamnimits ø n'uk'ext pøni janchtundip idø'øn pøn namyikajxidip uk nugo dø'øn kyajpxti. ²⁰ Ka'axi dø'øn nugo nmadyajkint ku ja Dios yja' nbaduujñandi, pø jatyixi dø'øn ja yikpadungojt. ²¹ ¿Sudsots uk mdsojktip jøts øts awa'an nnøjkt jøts n'atskastigimo'odit, uk ja yuyj'ajtin jøts ja tsojkin ø nninøjkxp ku wyinaty n'ats'ejxti?

5

Ja'y yiknigajxpx ku ja kya'øyi ku pøngapøn ñamyøøt'atyidi nugo

¹ Jade'en ja kajxpy yø'øy, jamik ja mmigu'uk tu'uk ja kyudaak tmøøt'aty. Janch møj ka'øy jaa'y'ajtin idø'øn jade'embi tsinaa'yin, ni jambaat yø kyayikupiky ma ja jaa'y ja Dios tkanjawidi. ² Jøts niti meets idø'øn xkidyimbyøkyjawi ku ja mmigu'uk jade'en y'adi'ich? ¡Meetspik idø'øn jeexyip mjotmay'oo'ktøjkpi ku mmigu'uk jade'en y'adi'ich! Pøn yaa'dyøjk idø'øn jade'en tø y'adi'ich ka'ap ja y'ukpaat'ajtniyyi jøts ja jam xmøøtsøønidit, pawøpy ja pyaat'aty. ³ O meets idø'øn njagamøøtsøøni jamts øts ja nwinmaa'ñ nyik'ity; tøts ja ndiidyuni winmaa'ñjotp pøn jade'en tø y'adi'ich ejximdam øts jam jeexyip ndyimchøøni. ⁴ Namyukidi nwindson'ajtingøjxp, jam ø wyinaty ja nwinmaa'ñ meets møøt, jøts ja nwindson'ajtim Jesucristo myøk'ajtin mbudøkiyidit. ⁵ Jøts xyikjiwa'aktit ja jaa'y, wan ya ja miku' yik'ayo'ombaadyiyi kunim ja nwindson'ajtim Jesucristo wyinaty myiñ tiidyumbi, janimts ja nøjxk yiknitso'ok'ajtxiyi ja y'anmija'win.

⁶ Paty kidi mnadyamixeyiyi pøni ti jaty jam mdundip. ¿Ja ka' mee xnijawi ku ja ka'odyumbi ja yja' nugo tyikniweni? ⁷ Paty kidi xmaa'kxti ja ka'odyumbi midi tø wyindgøøni, midi jam nugo myikma'jtidip. Jøts øy wa'ats m'ettit. Pø tøxi køøm ja Cristo xku'u'ka'am kruskøjxp, jøts ja tø wyindsø'jkin'aty adømgøjxp Dios Teety wyingujkp. ⁸ Ja tiy'ajtin ja øy'ajtin adøm idø'øn ja Dios ndawindsø'jkij'ejtimp, jøts ka'ap nijuuni nyikmøj'ajttint ja y'axøøkpi midi ja anmija'win nugo tyikwindigøøpy.

⁹ Nnimaay meets ku ja nøky ojts tu'uk ndanigaxti, jøts xkamøøtsøønidit pøn jaty ja y'axøøkpi yigaappi pyawinmaadyip jøts tum ja' tyunk'ajttip. ¹⁰ Ka'ap meets idø'øn ja yide'en xja'gyukit jøts ku meets abiky mdyimñabyiktaajkmiiyidit, jøts ja ka'øy jaa'y, jøts ja meengyax jaa'y, jøts ja maa'tspi jaa'y, uk jøts ja tsamaxan windsø'jkij jaa'y xkadyim'y'ukwin'ejxnidit; jabi kuwañimxi ja ya x'ejxtit ja'abi jaa'y o madsoo. ¹¹ Yide'en øts idø'øn ja ndiyy jøts ku meets mganamyukit møøt ja' pøn nañikajpxiyip Cristo padumbi, yam ja kya'øyjaa'yi, uk myeengyaxi, uk tsamaxan windsø'jkibi, uk yja'aji pøn tuki'iyi tkajpxyø'ogyojp, uk pøn ja nøø ja mu'uk ttunk'ajtp, uk myeech. Ja jade'embi jaa'dyi ni xkamøøtka'aty meets idø'øn ja'. ¹²⁻¹³ Ka'ap ø xpaat'aty jøts ø ndiidyu'unt ja wenk jaa'y midi abiktyi, ja Dios ja paat'ajtiyyip. Meets ts idø'øn mbaat'ajtidip jøts xiidyu'undit ja mmigu'uk. Paty xyikjiwa'aktit ja pøkyumbi midi jam møøt tsinaadyip.

6

Ku ja kajanchja'wibi juez ja janchja'wibi jaa'y tmi'øøndi

¹ Ku meets mmigu'uk xni'øøniwya'añ, ¿tigøjxp meets idø'øn ja xaninijxxy ja juez pøn tkajanchja'wip ja nwindson'ajtim Jesucristo, jøts nika' ja xaninøjkxti pøn ja janchja'win nayide'en tmøøt'ajttip? ² ¿Uk ka' meets idø'øn xnijawi ku ja' ttiidyu'undit ja naaxwii'ñit jaa'y pøn ja Dios yja' tpaduujnidip? Pøni meetsts mdiidyumpy wyinaty ja naaxwii'ñit jaa'y, ¿ka'ats meets idø'øn xjaty sudso xu'undit jøts xiidyu'undit pøni ti jam tuujniip jajtjp? ³ ¿Ka' xnijawidi

ku ja ankilis paat ndiidyu'unindit? jPøni jade'ents ja wyinaty, nija'wa'ampts adøm idø'on sudso ya ndiidyu'unindit naqxwiin! ⁴ ¿Sudso dø'on ja xaninøjkxti ja wenk jaa'y pøni ti dø'on ya naqxwiin mdsep'ajttip m'ayo'on'ajttip? Ja' meets ja mdaninijxpxy pøn kajanchja'widip. ⁵ Ya'atpi dø'on ti mjanchtatsø'dyu'undip. ¿Ni tu'ugin meets ja jam xkamøø'aty pøn tja'jtp ja tiidyu'unin? ⁶ ¿Tsaach'øy idø'on ja' jøts namajtsk ja janchja'wibi ña'ñi'øøniyidi ma ja jaa'y jam kyajanchjawidi?

⁷ Tsø'dyumbimxi mee mjagaxø'kni ku meets jam tukjanchja'wibi jaa'y mnamyidsep'atyidi. Ku ne'egi amø'ni xkamidanidi pøni sà myiktundi. Nisà ne'egi mgawa'andit øy mjayikwimaa'tsti. ⁸ Janch tum wimbet'ampy mee ne'egi xuñ, øy meets ja mgø'øm mmigu'uk sà xuñ midì jagati pøky, uk wime'chpts meets ja' ne'egi.

⁹⁻¹⁰ ¿Uk ka' idø'on xnijawidi ku ja Dios ja kyutujk wyinaty tkadanitani pøn jaty ja tiy'ajtin tkatundip? Nay'e'jx'etidi, ejxim myikwin'øøndi, ka'axi wyinaty ja Dios ttanitani ja kyutujk pøn jaty namyøø'tajttidip øy ja jyaga'amajtskidinim, ni ja' pøn jaty ja maxandsaa windsø'jkidip, ni ja' pøn jaty ja wenk tø'øxyøjk uk wenk yaa'dyøjk tmøø'tajttip, ni ja yaa'dyøjk pøn ja myiyaa'dyøjk tmøø'tajttip, ni ja' pøn jaty maa'tstip, ni ja meengyaxti, ni ja' pøn tuki'iyi tjanchkajpxyø'gyøxtip jaty, uk pøn jaty ja win'øø'nk ttunk'ajttip. ¹¹ Jam mee muumà pøn jade'en y'ijty tsinaadyip; ka'ats ja ixyam jade'en y'uksinaa'ñidi pø tøxi ja nwindson'ajtim Jesucristo køjxp pyøkyatsnidi, jøts ja Dios Teety tø yiktagidøkidi, jøts y'Espiritu Santo køjxp ja tø xkupijkyindi.

Sudso ja nne'kx ndawindsø'jka'ant ja Dios

¹² Jade'en ja ayuujk yø'øy ku o tigati nduu'nint, nipøn ja xkadabayø'oyint. Øy idø'on ja jade'en yjawa'añ ka'ats tuki'iyi y'ødyuñ pøni ti yiktump; jabi ka'axi pyaat'atyiyi jøts ja tu'ugyi nugo ndyimijkmajadaajkin. ¹³ Janch idø'on ku ja kaaky ja tojxk ya tø yikpikta'aky jøts ja maatsjotp ñøjkxt, ka'ats ja ne'kx ja' wya'añ jøts ja nugo yiktapøkyu'unt sam ja winaa'gin ja'ayi ttunk'atti. Kudigøøpy y'lity ja kaaky ja tojxk jøts ja maats nayide'en, ne'egi tampts xemikøjxp ku adøm nne'kx ja Dios Teety ndawinja'wa'ant ndawindsø'jka'ant jøts ja nayide'en amuum xmøø'tejtint. ¹⁴ Nayi myø'k'ajtin ja yik'awa'amp jøts ja xyikujkpyøjkin jadigøjk sam ja nwindson'ajtim Jesucristo ja ojts tyikjujkyiky.

¹⁵ ¿Ka' mee xnijawidi ku meets yø' nne'kx Cristo tne'kx'aty nayide'en? ¿Øy idø'on jøts ja Cristo ñe'kx nnixajyit jøts øts ja nmo'ot ja ka'ødyø'øxyøjk midì ttunk'ajttip ja yaa'dyøjk? jNima yø jade'en kyati! ¹⁶ ¿Uk ka'anin idø'on xnijawidi ku ja ka'ødyø'øxyøjk yikmøø'taty jøts tu'ugyi ja ne'kx namyayi wyimbejtne? Pø nømpxi ja nøky wya'añ: "Tu'ugyi ja nøjxk wyimbetti." ¹⁷ Kuts tu'uk ja jaa'y ja nwindson'ajtim Jesucristo tminamyayi, tu'ugyits ja nayide'en wyimbejtnidi.

¹⁸ Paty kidi nugo mnamyøø'tatyidi, wingaktu'utti yø'øbi pøky. Øy idø'on pøky yjaji, yiktump øy midì'ibi jadu'uk pøky, ka'ats ja jade'en tymbyaaty sam ja jade'embi pøky, pø ja kø'øm ne'kxi pøkyumbajit tymwyamp kø'ømts ñamyayi ja namysidundigøyi. ¹⁹ ¿Ka' xnijawidi ku meets ja Dios Espiritu Santo mdsaptøjk'atyidi? ¿Jøts ku ja Dios Espiritu Santo jam chøøni mne'kxkøjxp? Pø ni yø mne'kxi mee xkaja'aty, ²⁰ pø janch tsowixi ja Dios tø mjuyidi ku ja y'u'nk tø xku'ayo'ombaja'ta'am. Paty meets idø'on ja Dios ja mne'kx jøts ja m'anmija'win amuum xawindsø'øgit, jabi tum Diosxi yø' yja'.

7

Sudso ja amajtsk jaa'y'ajtin ñaxt

¹ Ixym øts ja nøky n'adsojimbijty midì mee tø xaniguexy. Ja øy ja' ku jaa'y kya'amajtskidit; ² jade'ents ne'egi pyaat'atyiyi jøts ja yaa'dyøjk kija' tmøø'tattit ja ñidø'øxy, jøts ja tø'øxyøjk kija' nayide'en tmøø'tattit ja ñiyaa'y, ja'agøjxp ku ja pyøkyi ku jaa'y nugo ñamyøø'tatyidi. ³ Myimad'op idø'on ja yaa'dyøjk ja ñidø'øxy nayide'en sam ja tø'øxyøjk timamadømit ja ñiyaa'y, jøts jade'en nixem niyam ñadyajotkujk'atyyidit. ⁴ Ka'ap ja tø'øxyøjk nadyu'uk tja'aty ja ñe'kx, ja ñiyaa'y ja paat'ajtyip; jøts nayide'enmi ja yaa'dyøjk, ka'ap ja nadyu'uk tja'aty ja ñe'kx, ja ñidø'øxy ja paat'ajtmiiyip. ⁵ Nagyupøkidip idø'on ja namajtsk jøts ñamyøø'tattidit; pøni tyundipts ja kajpxy jøts ñay'amaay'atidit ku ja Dios wyinaty t'ajot'atwa'andi, ots ja jade'en ttu'undit. Kuts ja jotmay tyikugøxidit, nayide'ents ja chinaa'yin tyikyø'gyojmidit, ja' ka'uk'øyni ku kya'uknagypøjkniyidi jøts ja miku' winøø'mbi tyuktunidit ja pøky abiky.

⁶ Ka' mee ndaguwani jøts mga'amajtskidit, amajtski meets pøni jade'en xtsojkti. ⁷ Jade'en ø njatsøjky jøts mee mga'amajtskit sam øts; ka'ats adøm ja Dios ja winmaa'ñ jøts ja kunuu'kxin tum jade'en tø xmø'øyim, tigach ja tø tyikwa'kxy.

⁸ Pøn jaty ka'amajtskidipnim, uk pøn tø kyu'o'kiñidi, ja' øts idø'on n'ana'amdip ku yjawi yja'øyi jøts kya'amajtskidit sam øts. ⁹ Pøni ka'ats tmimajada'akti jade'embi tsinaa'yin, wan ne'egi t'amajtskidi pø ka'axi y'uk'øyiñi ku ja wyinaty o pøngapøn t'ukmøø'tajtni.

¹⁰ Põn jaty amajtsk jaa'y, ja'ats ø n'ana'amdip jøts ja tø'øxyøjk niujuuni xøøw tkamajtsu'utt ja ñiyaa'y. Kidi øtsip idø'øn jade'en wamp, ja nwindson'ajtim idø'øn jade'en kø'øm ana'amp. ¹¹ Põni myajtsutpyts ja tø'øxyøjk ja ñiyaa'y, ka'ap ja y'amajtskit, uk myøøtnagvajpxipts ja ñiyaa'y jøts jadigojk y'amatskjaa'y'attit. Nayide'ents idø'øn ja yaa'dyøjk pyaat'atyi'y: ttu'unt.

¹² Yide'ents ø nwami, øy ja nwindson'ajtim jade'en yjagawa'añ, põni põn yaa'dyøjk tø tmøøt'amatski tu'uk ja tø'øxyøjk põn ja janchja'win tkamøøt'ajtp yam ja yaa'y ne'egi ja janchja'win tmøøt'aty, põni tøts ja kajpxy ja ttundi jøts ja y'amajtsk'ettit, ka'ats ja yaa'dyøjk ja tmajtsu'utt. ¹³ Põni jamts ja tø'øxyøjk tniyaa'y'aty tu'uk ja yaa'dyøjk põn ja janchja'win tkamøøt'ajtp yam ja tø'øxy ne'egi ja janchja'win tmøøt'aty, põni tøts ja kajpxy ja ttundi jøts ja y'amajtsk'ettit, ka'ats ja tø'øxyøjk ja tmajtsu'utt. ¹⁴ Pø tøxi ja yaa'dyøjk kunuu'kxy tyañ øy ja janchja'win ja tjagamøøt'aty ku ja tø tpiky tu'uk ja tø'øxyøjk põn ja janchja'win tmøøt'ajtp. Jøts nayide'en kunuu'kxy tø tyañ ja tø'øxyøjk øy ja janchja'win ja tjagamøøt'aty, ku ja tø tpiky tu'uk ja yaa'dyøjk põn ja janchja'win tmøøt'ajtp. Ku ja kyajade'enit, tum kajanchja'wip u'nkts meets ja m'u'nk m'una'ljik wyimbidsømni; ka'ats, pø tøxi Dios ja y'øyjaa'y'lijxyidi Jesucristo køjxp. ¹⁵ Põni y'amidøøpyts nidu'ugin ja yaa'dyøjk uk ja tø'øxyøjk põn dø'øn ja janchja'win tkamøøt'ajttip jøts ñawya'kxidit, wants tnawya'kxyidi. Niti ayuu-jkts tka'ukmidanidit ja yaa'dyøjk uk ja tø'øxyøjk põn dø'øn ja Dios tjanchja'widip, pø ja'axi ja Dios xamidsojkimp jøts ka' ja tsep uk ja ayo'on nmidsinaa'y'indit. ¹⁶ ¿Ja ti me tø'øxyøjk mdanija'wip põni myiknitso'okp mets ja mniyaa'y ku ja janchja'win ja tkamøøt'aty? uk ¿ti me yaa'dyøjk mdanija'wip põni myiknitso'okp mets ja mnidø'øxy ku ja janchja'win ja tkamøøt'aty?

¹⁷ Ots jyasa'ji, tum jade'en idø'øn ndsinaa'y'int sã ja nwindson'ajtim ttsøky, jøts põni sã adøm ja jujky'ajtin ja tø xmo'øyim nay jade'en sam wyinaty njujky'ajtyim ku ja Dios øjts xwaaðsø'øyindi. Jade'en øts idø'øn n'ane'empy ma jaty ja janchja'wibitøjkti. ¹⁸ Põni wyaadsøpy ja Dios ja jaa'y põn ja ejxpajt ñe'kxkijxpy myøøt'ajttip sam ja israelit kostumbri, ka'ap ja ttaatsø'dy'u'unt, wan ja jade'en ttañ; põni wyaadsøpyts põn ja ejxpajt ñe'kxkijxpy tkamøøt'ajtp, ka'ap ja kuwanikøjxp yikpiktaajkit ja ejxpajt ñe'kxkijxpy. ¹⁹ Wan ja tmøøt'aty uk tkamøøt'aty ja ejxpajt jap ñe'kxkijxpy nugo ku ja Dios ja tpaduujni ja kyutujk. ²⁰ Jade'en idø'øn jaa'y tya'ant sam ja y'ijty t'ixy ku ja Dios y'ejxkajpiyi. ²¹ Põni nugots øy põn windsøn mdyimykтуñiyi sam jaa'y jiyujk tsakaa tjagyepy winet ku ja Dios øjts mwaaðsøyi, ka'ats mets ja xkumayjawit ku wine'enin xpaatt ja awa'ats'ajtin. Jatyits idø'øn ja xkupøt, ka'ap ja jeky xpawinma'aty. ²² Põn idø'øn wyinaty juy ja jaa'y yik'ejttip ku ja yiktamidsøky jøts ja nwindson'ajtim ja tjanchjawit, ja nwindson'ajtimts ja ixyam myidunip kø'ømdsøky, ka' juy, jøts ja jaa'y põn jaty jade'en tkayiknajttip nayide'en ja ixyam ja nwindson'ajtim kø'ømdsøky tmidunidi, ja Cristo ja' ti tymbidi. ²³ Janch tsowi meets ja Dios Teety ja y'U'nk mdagujuyi, paty kidi nugo mnay'ixmachidi jøts ja ka'øchinaa'y'in xpadøjkiñidit. ²⁴ Jade'ents migu'uktøjkti, jøts jade'eña'am xyikyø'dyit ja mjujky'ajtin sam ja Dios tø mbaaðyidi ku tø mwaadsøyidi.

²⁵ Tits ø nda'ana'amdip põn ka'amajtsk jaa'dyi, ka' ja nwindson'ajtim ja sã tnigajpxy; øts idø'øn ixyam ngajpxnaxwampy tu'uk ja nwinmaa'ñ sudso dø'øn yjawi tyuu'baatt tyuu'wetst ja tsinaa'y'in. ²⁶ Jade'en ø njawa'añ jøts ja yaa'dyøjk jadi'iñi tya'ant ja'agøjxp ku ixyam ja tsinaa'y'in janch tsep janch aduky. ²⁷ Põni m'amajtskjaa'yits, kidits x'ixa'ay sudso ja mnidø'øxy møøt mnayajtsu'udit; põni ka'ats m'amajtskjaa'yi, kidits ja amajtsk'ajtin xpawinmay. ²⁸ Põni m'amajtskipts ka' me mbøkyuñ; põni amajtskipts tu'uk kiixe' ka'ats ja nayide'en pyøkyumi. Põni amajtskidip tsep ja chinaa'y'in ja tpaattit; ja'ats øts idø'øn njatsøjkpy ku øts idø'øn jade'en njawa'añ, jøts ja ayo'on xkapaattit.

²⁹ Meets migu'uktøjkti, ja'agøjxp øts idø'øn jade'en nwa'añ ku ja nwindson'ajtim wyingoni. Paty ixyam mdsinaa'ñidit yide'en: Põn jaty ja ñidø'øxy jam, ja Dios idø'øn ja yja' ja ne'egi tya-jotmay'o'jkp jøts ja yjujky'ajtin tyiknaxt ejximdam ja jeexyip nadyu'uk'aty. ³⁰ Pønts yaxtip jiidyip, jade'en ja chøønidit sam ja' põn kayaxtip kajiidyip; põn jotkujk'ajttip xondaktip, jade'en ja chøønidit sam ja' põn kajotkujk'ajttip kaxondaktip; põnts juudyip kajpxtip, jade'en ja jyuy kyajpxy ja tjawidit ejximdam ja jeexyip tkamøøt'atti. ³¹ Põn jaty ttaxondip yø naxwii'ñit tsinaa'y'in, jade'en ja ñajyawiyidit sam ja' põn jaty ja tkadaxondip; jabi kugøxi jøp'amxi yø naxwii'ñit tsinaa'y'in y'ity.

³² Ja' meets idø'øn njadamidsøjkpy jøts ka' øy ti nugo xtyimdyajotigø'dyit ya naxwiiñ. Ku dø'øn ja yaa'dyøjk kya'amajtskjaa'yi, ja nwindson'ajtim ja ja'ayi pyawinmaapy sudso ja tyikjotkujk'att; ³³ kuts ja y'amajtskjaa'yi, ja'ats ja pyawinmaapy sudso ja yjujky'ajtin tpaatt jøts ja ñidø'øxy tyikjotkujk'att. ³⁴ Tigach ja tø'øxyøjk tsinaa'y'in tyiknaxy midi ka'amajtsk jøts nayide'en ja' midi amajtsk. Midi ka' y'amajtski ja nwindson'ajtim yja' ja tyajotigøjyip jøts ja amuum ttamiyøxy ja ñe'kx møøt y'anmija'win; põnts jam ja ñiyaa'y, ja' myijotigøøpy jøts sudso ja ñiyaa'y tyikjotkujk'att.

³⁵ Ka'ap øts ya'at nnigajpxy jøts mee niti xkadyimy'uktunk'atnit, paty øts idø'on yø nnigajpxy jøts yilxon mdsø'ønidit sam idø'on yjapaat'atyiyi jøts ja nwindson'ajtim yja' xmi'otigø'dyit.

³⁶ Pøni jamts ja u'nkteety pøn t'ø'ya'wip jøts ku yjawi y'øyi jøts ja ñøøx ne'egi y'amajtskit ja'agø'jxp ku ja yjawi ja yjumøjt ñaxni jøts ja wyinmaa'ñ tyigatsni, wants jade'en ttuñ pøni øy tjawi, pø ka'axi ja pyøkyi. ³⁷ Pøni jamts jadu'uk ja u'nkteety pøn idø'on yilxon t'pawinmaapy øy tsuj jøts ja ñøøx ne'egi kya'amajtskit, øyts idø'on ja y'adi'ich jade'en. ³⁸ Paty idø'on jade'en pøn ja ñøøx tyik'amajtskip, øy adø'tsp idø'on ja wyinaty; pønts ja ñøøx tkayik'amajtskip, jaaktyimwyindøøpts idø'on ja wyinaty jawaani ku ja jade'en wyinmay.

³⁹ Kutujkøjxp ja tø'øxyøjk tmøøtsøøni ja ñiyaa'y pøni jujky'ajtp ja'; pøni ø'k'p kudigøøpyts ja', øyts ja pøn tmøøt'amatskiñit, nugo ku nayide'en ja yaa'dyøjk ja janchja'win tmøøt'aty. ⁴⁰ Ne'egi jotkujk ja chøønit pøni ka' y'uk'amajtskiñi. Jade'en øts idø'on ja ngø'ømgajpxwejin nyaky, jøts nmøøt'ajtp øts idø'on ndijy ja Dios Espiritu Santo.

8

Sudso ttu'undit ku ja windsø'jk'ii'ñ yiktaniwa'adit midu yiktawindsø'jk'ip ja maxandsaa uk øy ti jadu'uk awanax

¹ Ixyamts ø nnigajpxwa'añ sudso xu'undit ja kaaky tojx midu tø yiktawindsø'øgi ja maxandsaa. Wa'ats ja njanija'wa'andi sa ja ndu'unindit; ja'ayi ja nugo nnadyamiguejxyindi ku adøm øm nija'wibim, ka'ap ja nmø'piktaajkyin ku ja tsojkin ja pa'ayo'owin tyikmøji tyikmayi ja winmaa'ñ. ² Pøni jam ja jaa'y pøn nadya'agajpxip ku ja ti yiin wan tñijawi ja'agø'jxp ja jade'en wya'añ ku ja kyawijyi kyakejyi. ³ Jabi y'ejxkajpyts ja Dios ja' pøn ja tsojkip.

⁴ Sudsots idø'on xu'undit, ¿mga'adyip mjøø'kxtip idø'on ja' midu ja maxandsaa tø yiktawindsø'øgi? Nnija'wa'amp ndøm ku ja maxandsaa kyaDiosi, pø tu'ugyixi ja Dios. ⁵ Jaa dø'on ja jaa'y pøn wandip ku dios ja janch namaydi ya naxwiñ jøts jam tsajpjotp, ja'agø'jxp idø'on may ja dios ja jaa'y twindsø'øgidi ku jade'en tja'gyukidi, ⁶ tu'ugyits adøm ja nDios, ja Dios Teety. Ja Dios Teety idø'on tuki'iyi tø tyik'øyi, jøts ja' adøm idø'on nniju'ky'ajtyindip jøts ja ndamiyojxin ja ndsinaa'yin. Jats tu'ugy'i nayide'en ja windsøn, ja nwindson'ajtim Jesucristo, ja'agø'jxp idø'on tuki'iyi tø y'øyi, jøts ja'agø'jxp adøm idø'on nayide'en tø xyikøjyim ja Dios.

⁷ Jats may ja janchja'wibi jaa'y pøn tkaja'gyukidip ja yjade'embu tsinaa'yin. Pøn jaty y'ijty ttawindsø'jk'idip ja kyaaky ja tyo'jx ja maxandsaa ku ja ixyam ja'abi tkaydi tto'jxxti jade'enamti ja wyinmaydi ku ja nay ja'abi dios yja' jadigojk ttawindsø'øgidi; kuts ja t'pawinmaadyø'kidi jøts ja t'pøkyjwawidi ja'agø'jxp ku ja tkaja'gyukidinim. ⁸ Kidi ja' adøm inet jawaani øy nwibejtint pøni kaa'yimp jøø'kximp, nayi ka'ats adøm inet jawaani ka'ø'w nwibejtint pøni ka' adøm ngaa'yin. ⁹ A'ejxits mee m'adø'øtst, o meets ja xka'aty xojkxt jøts ka'ap ja mmigu'uk ja xukpøkyjawidit, pøni pyøkyjawidipnim ja tuki'iyi ja'agø'jxp ku ja yjanchja'win ja ka' yilxon tyuu'dø'kidinim. ¹⁰ Ku n'ukpiktaajkint, yam mets ja mjanchja'win tø myø'ji myayyi jøts m'a'ejxnaxit tu'uk ja mmigu'uk pøn okwa'añ ja yjanchja'win tyiktso'ondakpnim, ku mets jam mdsø'øni agujk jotkujk jøts xji'kxy ja kaaky ja tojx midu tø yiktawindsø'øgi ja maxandsaa uk øy ti jadu'uk awanax, ¿ka'ats idø'on ndejin mbaduu'miyit nayide'en ja mmigu'uk pøn m'a'ejxnaxiyip? ¹¹ Jøts jade'en xyiktuu'tigø'øty ja mmigu'uk ja'agø'jxp ku kyatiynim kyaduda'akñim ja yjanchja'win, yam ja Cristo ja tø yjagu'oogiyi. ¹² Jade'ents idø'on, ku ja pøky jade'en xu'undit jøts ja mmigu'uk yjanchja'win xyik'amutskiyidit, ja Cristo meets idø'on kø'ø'm jade'en nmidundigøøpy. ¹³ Pøni ndukpaajtyimpts tam adøm jade'en ja mmigu'uk ja tyuu'tigøø'yin ku yikji'kxy ja maxan wyindsø'jk'ii'ñ, paat'ajtyiyps ne'egi jøts ja ka'ap jade'en n'uktu'una'ant jøts ja mmigu'uk jade'en ja pøky ngadani'ejxa'ant.

9

Ti dø'on paat'ajtyiyip ja nwindson'ajtim kyudanaabyi

¹ Tø øts idø'on ja Dios xaguwani jøts øts ja ngudanit jøts ja kyajpxy y'ayuujk ja nnigajpxiyit, nipøn jaa'yts ø xkapaat'aty jøts øts ja ndukmado'ot pøni ti jaty ø ndumpy; pø tøxi øts ja nwindson'atim Jesucristo n'ixy, meests idø'on ndunkjø'ø'ajtp ku øts ja nwindson'ajtim tyunk'nbadø'kijyi. ² Jaa abiky ja jaa'y pøn ø xka'ejxkaptip jøts ku øts ja Dios xkudanaabyi'aty; meetspits mbaat'ajtp jøts øts jade'en x'ejxkaptip, pø tøtsxi meets ja nwindson'ajtim tø ndukmibiky, kuts meets jade'en tø ndukmadøy ja janchja'win jade'ents idø'on wyingaxi'iky jøts ku øts ja Dios njanchkudani.

³ Yide'en øts idø'on n'adsøy pøn jaty ø xpagajpxtip: ⁴ Xpaat'ajtp ø nyikmo'ot ja kaaky ja uujkin, ⁵ jøts xpaat'ajtp ø nayide'en jøts ja nnidø'øxy midu tjanchja'wip ja Dios nbawaamit

sam ja jadu'ukpi kudanaabyitõjk ttundi, mõõet ja nwindson'ajtim y'ajch y'uch jõts nayide'en sam kõ'õm ttuñ ja Pedro. ⁶ ¿Ja ti õts yõ mõõet ja Bernabé xpaat'aty jõts õõts ja ngaaky ndojkx nnidu'unt? ⁷ ¿Ma dõ'õn ja soldadi kõ'õm y'uknay'ijxyiyi? ¿Ma dõ'õn ja jaa'y tka'ukjii'kxy põni ti tõ tni'ipy jõts põni ti tõ tyikpidi'iky? ¿Põn idõ'õn nugo ukuborreegi'ajtp jõts niti kyagida'anxyiyi? ⁸ Kidiis mwinmaydi ku õts jade'en kõ'õm n'awijy, nayide'enxi ja Moisés kyutujk wya'añ. ⁹ Põ yide'enxi jap jaabyety y'ity nõky kyutujkijxy: "Kidi ja mdsakaa ajeñ xyik'okti ku ja xyiktunwa'andit." Kidi ja agõjxp ja Dios jade'en wya'añ ku ja tsakaa ja ja'ayi tjomay'aty, ¹⁰ põ adõmgõjpxi dõ'õn ja expajtin ja jade'en pikta'aky. Paty ja kutujk jade'en yikjaay ku adõm ja y'õy'ajtin ja pya'ayo'owin ja xuktanitsoojkim; põ nayide'enxi ja jii'kxy ja pyaat'atyi põn yuup tump sam ja' põn yikpidi'jkpy ja pikta'aky. ¹¹ Tõts õõts ja Dios kyajpxy y'ayuujk namyayi nni'ipy ma meets jam, ¿ka'ats idõ'õn y'õyi jõts mee n'amido'ot ja pudõjkin? ¿Ti õõ ndajujky'atp ya? ¹² Põni m'amidoojip mee tigati ja wenk jaa'y jõts meets ja xmõ'õy, jawaani kajats õõ xpaat'aty.

Õyts õõts ja jade'en xjapaat'aty, ka'ats õõts ja nbayõ'õy kuwani; nmidanaapy õõts ja' põni ti õõts xjajtp põni ti õõts xka'ejtxip jõts õõts jade'en ngayiktuu'duky ja Cristo y'ixpõjkin ja Cristo y'ana'amin. ¹³ Mnija'wip meets ku ja jaa'y põn tsapõjktõp ttundip, tum ja' ja tyajujky'ajttip põni ti jam tõjkip. Põn ja altajr jam t'eix'ejttip ma ja jiyujk jam y'õõky midi windõ'jkin'ajtp, ja'abi tsu'uchts ja yikmõõdyip. ¹⁴ Nayide'en ja nwindson'ajtim Jesucristo tõ yjanimy jõts ja tyunk ja ttajujky'attip põn ja nitsoojkin ayuujk tngajpxtõp. ¹⁵ Nijuuini ja'abi winmaa'ñ nugo ngadamajada'aky, ni ja'agõjxp mee nganijayi jõts mee xmo'ot o tigati. ¡Wan õts jade'en ne'egi t'õõky, põ ndajotkujk'ajtpyxi õts ku õts jade'en ndsõõni!

¹⁶ Kuts idõ'õn ja Dios y'õy'ayuujk y'õwynmaa'ñ njanigajpxy, ka'ats õts ja nnadyamõjpkta'agyiyi, põ kõ'õmxi õts ja tõ ngupiky ku õts ja tõ nyiktaguwani. ¡N'ayõõy õts ku õts nganigajpxt! ¹⁷ Põni kõ'õm tsojkingõjxpts õts nduñ, n'awijxpyts õts ja n'õy'ajtin. Ka'ap õts jade'en ja ndunk, jabi kõ'õmxi ja Dios xwi'ixy ku õts ja õybi tunkjõõjpx xmo'õy jõts jaty ngupõjõjy. ¹⁸ Ja' õts idõ'õn ndajotkujk'ajtpy ku õts ja nitsoojkin ayuujk nnigajpxy jõts õ niti mijuu'ñ nga'amidõy, õy ja jade'en xjapaat'aty jõts õts ja' ndajujky'att.

¹⁹ Ots õ nipõn njagamiduñ, tõts õ kõ'õm nadyamidsõkyi jõts mee nmidu'unt, jõts ja Cristo jade'en ndukpaattit. ²⁰ Kuts ja israelit jaa'y nmõõtsõõnidi nayide'ents õ ndsõõni sam ja chõõnidi jõts õts ja Cristo jade'en ndukpaattit; ja Moisésxi õts idõ'õn ja kyutujk n'atskupõjkip õy õts ja'abi kutujk xjagapaat'aty. ²¹ Kuts õts abiky nnõjxmi ma ja Moisés kyutujk tkayiktuujnidi, nayide'ents õ ndsõõni sam ja chõõnidi, õy õts idõ'õn ja Dios kyutujk ja'ayi nyikmõjõjkiyi, põ ja Cristoxi õts ja y'ana'amin nbaduujnip. ²² Kuts õ nmõõtsinaamyidi põn ja yjanchja'win tyiktuu'dõjkyidipnim, ka'ap õts ja nugo nyik'amutskidi, ni ja namyikaxi'ajtin ngayiktuñ, nayide'en õ tõ nnabyikta'agyi sam ja'adi jõts õts ja jade'en nyikjotkujk'atti. Tõts idõ'õn tu'uk tu'uk nja'gyuki põni sa ja chõõnidi, jõts õts ja jade'en ndukpaattit ja Cristo. ²³ Ja'agõjxp õts jade'en nduñ ku õts ja nitsoojkin ayuujk nnigajpxwa'añ, jõts õ wyinaty nayide'en nbaaty ja kunuu'kxin ja õy'ajtin mõõet ja'adi põn jaty tjanchja'widip ya'atpi ayuujk.

²⁴ Mnija'wip meets ku jaa'y pyujtkejpõxti, namay ja yjaputti tu'ugyits ja pujtkejpxpi myajada'aky jõts ja tpiky ja ñibuty. Paty idõ'õn nayide'en mbuttit jõts ja õy'ajtin xpaattit. ²⁵ Põn jaty tuki'iyi t'a'ejxigõjxp ku kyuyatwa'añ jõts kyuyajta'aky yikxon, ka'ats ja sa yjaty ku tyimguyajtni. Ja'agõjxpts ja jade'en kyuyata'akti jõts ja tpoõktit ñiguyaty mididõ'õn ja kuyajtpi pyõjktip ku ja myajada'akti, jõts ka'ap ja xemikõjxp y'ity; ja xemikõjxp pikta'aky adõm ya naxwiñ nbatnajxyim midid wyinaty yikmõõ'yimp xemikõjxp. ²⁶ Mnija'wip õts wa'ats mididõ'õn yõõn nni'ipy ka' õts nugo nbuty wimbeets kugoots; nbaatõ õts idõ'õn ja' mididõ'õn nbaagwampy, ka' õts nugo n'adi'ich. Ka' õts jade'en nugo ngojxwidity jõts õts nika' ti ndukpety. ²⁷ Jawyeen õts yikxon nnay'a'ejxyi jõts õts nne'kx ndukmibiky põni sa õts idõ'õn ja ndsõky põni ti õts idõ'õn ndunwampy, jõts õts kidi nõjx jawyeen tsõ'õdyumbim njaty Dios wyingujk yam õts ja jaa'y tõ ndukmadowdi sudsõ'ampy ja nitsoojkin ja pa'ayo'owin ja tpaattit, jaa ku õts ne'egi nga'ukpõjknit ja niduñ.

10

Ja'yikni'ana'amp jõts ja maxandsaq uk õy ti jadu'uk awanax kyayikdiosjawit

¹ Mnijawidip migu'ukõj idõ'õn ku ja mõjaa'dyõjk niduki'iyi ja Dios ja yoots tyaduu'wajidõõ, jõts nayide'en niduki'iyi ja Dios õy tyuktanajxidõõ ja Tsajpts Mejy. ² Jade'en idõ'õn ja ndejnt niduki'iyi tpatõõ ja nõbajtin jõts ja tmõõ'tetti Moisés. ³ Niduki'iyits nayide'en tjõõ'kxtõõ ja tsajpjõtpit jii'kxy, ⁴ jõts nayide'en niduki'iyi t'uktõõ ja tsajpjõtpit nõõ. Põ ja'abi nõõjxi ja y'uktip mididõ'õn jam mu'tp tsagõjxp mididõ'õn payõ'õyidip. Ja Cristõs idõ'õn ja myõk'ajtin ñanky'ejxip jam tsagõjxp. ⁵ Namayts ja'adi põn ja Dios Teety tkamimadoodõõ jõts ja jamyi abak etjõtp y'oo'knidõõ.

⁶ Ejxpajtin adom idø'øn ya xmø'øyndip paty idø'øn ja jade'en yjatti jøts adom ja ka'øybi tsinaa'yin ngatsojkint sam ja ttundi. ⁷ Paty kidi meets ja maxandsaa xwindsø'jkyinidi sam ja ttundøø niwinaagin, jøts sam idø'øn ja yiknigajpxy nõkyjøtpy: "Winets ja jaa'y kaabyi ukpi y'ixakti jøts twinxødundi ja maxandsaa." ⁸ Ka'ap adom idø'øn xem yam nugo nnamyøø'tajta'ant kija' uk tu'ugyi ja amajtsk jaa'y tyik'ettit ja ñiyaa'y uk ja ñidø'øxy, sam ja jaa'y tkamøjpicktøktøø winaagin ja y'amajtsk'ajntidi, jøts ja'ayi tukxøøwyi tku'oo'kyidi ja pyøky ni'ee'pxigøøø mil. ⁹ Ka' mibaat ja Dios tyuda'aky'ajtin ndana'ejxin uk nugo nwinmaa'ñ'ejxwa'anin sam ja jaa'y winaagin y'adøstøø mididi ja tsaa'ñ ojts yikxon chu'tstigøyidi. ¹⁰ Jøts nisa xkatejtiti ja Dios pøni sa ja mduñidi. Ka'ap jade'en m'adø'østtit sam winaagin y'adøstøø ku ja tka'ødyejti ja Dios, ja' mididi ojts tyagida'agyidi ja ayo'on ku Dios ja tyumbi tkejxy mididi ja o'jkin ojts tyukpaadyidi.

¹¹ Adømgøjpx idø'øn jade'en ja mōjaa'dyøjk yjajttøø kyubattøø, jøts nay adømgøjpx ojts jaabyety jade'en tyañ jøts yø n'ejxpaj'tajntit jøts jade'en ngadsinaa'yint sam ja chinaadyøø ixa ja nwindson'ajtim Jesucristo wyingoni ja tyi'dyuu'uinin xøøw. ¹² Pøn jaty yjawi nisa kajattip, pøn dø'øn yjawi øy tsinaadyip, wants ja tnay'ejx'ityidi jøts ja kyawinmaa'hmya'attit. ¹³ Nay ja ayo'on mididi ixyam mdanajxtip ku yik'ejxmatsti ja mjanchja'windi pøni mjanchpadundip idø'øn uk ka'; nayja'abi ayo'on idø'øn øy pøn tø tpaaty tø t'ixy. Øyts meets ja Dios x'ajot'att jøts ja m'agø'dukidit m'axajtukidit jøts niyyjøxk xanaxtit ja ayo'on mididi kamidanaañi. Kuts wyinaty ja ayo'on tyimjyawani møk mbaadyidi, ja Dios mmo'ojidip ja wyinmaa'ñ sudso ja xmimada'aktit.

¹⁴ Paty migu'uktjøjk idø'øn ja maxandsaa uk jadu'uk øy ti awanax xka'ukwindsø'jkiñidit, ixmatsti yø yjade'embi tsinaa'yindi. ¹⁵ Wa'atsxi xnimadowyit sa mee nnøjmi wijy keji ti sa m'ejxidi. Kø'ømts yikxon x'ukpayø'ødyit pøni janch kidi yjade'eni sa ø nwa'añ. ¹⁶ Ku adom ja tsapnøø kunuu'kxy n'uujkyindi ja Dios adom idø'øn jade'en nwindson'øjka'am, ja Cristo dø'øn ja ñij'py namyayi n'uujkyindip; kuts adom ja tsapkaaky nyikwa'kxyindi ja Cristos adom ja ñe'kx namyayi nji'kxyindip mididi ja y'øy'ajtin xukpaajtim ku ja ojts xku'o'jka'am jam kruskøjpx. ¹⁷ Øy adom njanamaya'am tu'ugyits adom ja tsapkaaky ndamujkyindi, patyts adom jade'en amuum tu'ugyi n'ijtyindi Dios wyingujk pøn jaty tjanchja'widip ja Cristo.

¹⁸ Ejxtits ja Israelit kajp ma ja jaa'y tkaydi tjøø'kxti ja windsø'jki'ñi; ja'ats idø'øn ja ñamyayi tu'ugyi yik'ejtidi, tu'ugyi ja tumjade'en wyinmaydi nixem niyam. ¹⁹ Ka'ap øts idø'øn nnimy ku ja maxandsaa uk jadu'uk øy ti awanax yjujkyidi, jøts ka'ap ø nnømi ku ja tsu'uch jawaani øy mididi ja yiktawindsø'jkidip. ²⁰ Yide'enxi øts idø'øn ja njatijy, pøn jaty ja Dios tkanija'widip jøts ja windsø'jkin ja tipkta'akti tsamaxan uk øy ti jadu'uk awanax wyindum y'agø'øm, ja miku' dø'øn ja wyindsø'jkidip jøts ka'ap ja Dios; ja'ats meets idø'øn ngadamidsøjky jøts ja miku' yja' xkupøjkidit. ²¹ Ka'ap ja mbaat'atyidi jøts mee majtsk jøøjpx mdsønnyit yam meets ja nwindson'ajtim ñij'py xja'uujkyi, jøts nayide'en x'uujkmiyidi ja miku' ñøø; yamts meets ja nwindson'ajtim ñe'kx xjøø'kxiyi jøts ja miku' yji'kxy xjøø'kxmiyidi. ²² Ja ti adom tø ndøjkiñam? ²³ Nugo taguyajtpi jøts jade'en ja nwindson'ajtim nugo nyik'ambøjkint? Ja tyimyabaat adom nnøj'ajtin jøts adom ja ne'egi nyik'amutska'ant?

Ka'ap ja ngø'øm ja n'ixa'ayint, ja tsojkin ja pa'ayo'owin ne'egi ndamiyojxin ja nmigu'uk

²³ Janch ja jade'en idø'øn sam ja ayuujk wya'añ ku o tigati nduu'nint, nipøn ja xkad-abayø'øyint; øy dø'øn ja jade'en yjawa'añ, ka'ats tuki'iyi y'ødyuñ pøni ti yiktump; jabi ka'axi ja Dios yjanchja'win jade'en tuki'iyi xatøjka'ant. ²⁴ Ja nmigu'uk adom idø'øn ja y'øy'ajtin n'ixaajya'amp jøts ka'ap ja ngø'øm ja' nugo ndunk'ajntin ja'ayi.

²⁵ O mee tigati xjøø'kxt pøni ti jaty mjuudyip maayjotp, ka' xyiknidøwidit ma ja tyikt-soondi, ku nugo mnadyagumayidit; ²⁶ jabi nwindson'ajtimxi ñaxwii'ñit yø' jøts tuki'iyi pøni ti jaty ya ejtp naxkijxy.

²⁷ Pøni mwaajidipts ja jaa'y kaabyi pøn ja janchja'win tkamøø'ajtp, kupøti panøjkxti jøts kaydi jøø'kxti pøni ti nyikmøødyip jøts ka'ap ja xyiktøødit pøni ti pøni pøn yiktawindsø'øgi, jøts niti xkagumayjawidit. ²⁸ Kuts jam tu'ugin ja jaa'y jotmøñ wya'añt ku ja'abi tsu'uch ja maxandsaa tø yiktawindsø'øgi, ka'ats meets ja xjøø'kxt, jøts ja nmigu'uk xkanankñagyumayiyidit ku ja nugo ñabyøkyjawiwyidit ja'agøjpx ku ja janchja'win ja okwa'añ tyiktøwdinin tyiktuda'aktinim. ²⁹ Ja nmigu'uk øts idø'øn ja wyinmaa'ñ nnigajjpxip, ka' mees mja'.

Jamts pøngapøn tyiktøødit jøts wya'andit: "ZSudsots ja wenk jaa'y nyikmøjtøjkiyit ne'egi ja wyinmaa'ñ jøts øts nja' nika'?" ³⁰ Jabi n'ajot'ajtpyxi øts ja Dios ku ngay nji'kxy, ztits øts idø'øn xabagajpxtip kuts ja'abi kaaky ngupøkt?" ³¹ Ots ja yjade'eni, pøni mgaadyip m'uktup uk pøni ti jatyts mdundip, tum ja Dios køjpx ja xu'undit jøts ja jade'en xyikmøjtøkidit. ³² Kidi mee xufi mididi ja nmigu'uk tyadigø'ødyip: ni ja israelit jaa'y jade'en xkatu'undit, ni ja' pøn ka'israelit jaa'y'ajttip, ni ja' pøn ja Dios Teety tø myø'øyidi ja janchja'win jøts ja nwindson'ajtim tmibøjkit. ³³ Kuts øts, ja' ø n'ixaapy sudso øts ja nmigu'uk nyikjotjuk'att;

ka' osts ng'oem oy'ajtin n'ixa'ay, jøts øts nmigu'uk yikxon chøonidit jøts wyinaty ja nitsoojkin yikmo'odi.

11

1 Tundi nayide'en pøni sa ø nnajtstuni, pø nay ja Cristoxi ø nni'ejuuujtip ja chinaa'yin.

Sa yjaa'y'attit ja tø'oxyøjk ma ñamyukyidi ja janchja'wibidi

2 Migu'uktøjkti njanchtakajxakpy meets ku ø xja'myatsti, jøts ku nayide'en xpadundi ti jaty tøndukmadowdi. 3 Ja'ats ndsøjkpy jøts xja'gyukidit ku tu'uk tu'uk ja yaa'dyøjk ja Cristo ñigubajk'aty, jøts ku ja yaa'dyøjk ja ñidø'oxy tñigubajk'ajtmni jade'en sam ja Dios Teety tñigubajk'aty ja Cristo. 4 Pøni ka' ja yaa'dyøjk ñagyujuptu'udyi ku Dios t'ajot'aty uk kuts ja Dios yja' tjanigajpxi, kyamøjpiktakpy idø'on ja Cristo ja' pøn nigubajk'ajtiyip. 5 Pøni ka'ats ja tø'oxyøjk ñagyujuxy ku ja Dios t'ajot'ajtpi tyøki, uk kuts ja Dios yja' tjanigajpxi, kyamøjpiktakpyts idø'on ja ñiyaa'y ja', nayide'enxi ja tpatni kidi ja jeexyip tø ñagyukaa'ptu'udyi. 6 Pøni ka'ap ja tø'oxyøjk ñagyujuxy, wants ne'egi tñagyuka'aptutkixyi. Pøni tyatsø'ødyumpts jade'en ja kyubajk keepy, wants ne'egi tpiakta'aky ja kyujuux. 7 Nagyujuptu'udip idø'on ja yaa'dyøjk pø ja Diosxi ja myøj'ajtin ja chuj'ajtin ja yiknigaxø'jkip ku ja nayide'en tø yik'ø'yiyi sam ja Dios t'ixy. Jøts ja tø'oxyøjk ja ñiyaa'y myø'ajtin ja yiknigaxø'jkidip. 8 Kuxi ja Dios tyik'ø'yiyi'ñ pø ja yaa'dyøjki ñikøjxp ja Dios tju'tjy ja tø'oxyøjk. 9 Yaa'dyøjkøjpxi ja tø'oxyøjk y'ø'yiyi'ñ, jøts ka' tø'oxyøjkøjpx ja yaa'dyøjk y'ø'yiyi'ñ. 10 Patyts idø'on ja tø'oxyøjk ñagyujuxit jøts ja jade'en tyiknigaxø'økt ku ja yaa'dyøjk ja y'ane'emyi, jøts ja Dios y'ankilis nayide'en yjotkujk'attit. 11 Nnija'wa'ampts adøom, ku ja janchja'win nmøøt'ajtyindi, ku ja yaa'dyøjk jøts ja tø'oxyøjk kuwani tu'ugyi y'etti. 12 Janch tixya dø'on ja' ku dø'on ja' ku dø'on ja' ku dø'on ja' yaa'dyøjks ja Dios yiktuun, nayide'en yjanchi ku tø'oxyøjk ñikøjxp kye'exy yaa'dyøjk yä naxwiin; ja Diosts jade'en wamp.

13 Kø'øom mee x'uknigajpxt pøni øyide'en ku ja tø'oxyøjk ja Dios t'ajot'att kuwa'ats, jabi ka'axi ja y'øyi. 14 Tsø'ødyumbim ja yaa'dyøjk pyidsimy ku ja wyaay ja tyikyon'anaxy, ka'ap adøom jade'en ngostumbri yø'øyindi. 15 Yiktakajxakpts ja tø'oxyøjk ku ja wyaay ja yøñ, pø tøxi ja yiktanibiktaagi jøts ja wyaay ja kyubajk ttanipett. 16 Pøni pønts tkaja'gyukwyamp sa øts idø'on tønjawā'añ, ñijawip idø'on ja' ku øøts ka'ap ja wenkpi winmaa'ñ nyiktuñ jøts ni ja' jade'en kyawinmaamyidi pøn jaty ja Dios tø wyaamukyidi wyejtsmukyidi øy madsoo, ja agøjxp ku ja tø tjanichjawidi ja Dios.

Ku kya'ukyikmøjpiktakni ja nwindson'ajtim kyaajyk y'uujkik midu ja ñajstunip ku ja y'a'ux'ajty

17 Ku meets yam nnijayi kidi ngajxa'akwampyip meets, ku yjawi mjanamyukyidi niwine'en ja mga'øpyidsø'ømxiyidi jøts ni mga'ødyuñidi ja yjawi. 18 Jade'en øts ja jaa'y xumdamimadya'akti kuk mee mjanamyukyi mnawya'kxibik meets jam jøts mganamyee'kxyidi; nmibijkpy øts idø'on, pø jade'en idø'on jam yjanchjaty. 19 Kuwanidsik idø'on mnawya'kxidit jøts idø'on ñigaxø'øktit pøn idø'on Cristo yja' yjanhpaduujnidip, jøts pøn idø'on nugo nadyejidip jøts ku Cristo ja tpadundi. 20 Kuts meets idø'on jade'en mganamyee'kxyi, nika'ats meets ja nwindson'ajtim Jesucristo y'a'ux x'ukja'gyukiniyi, ni xkanijawidi pøni sudso yiktuñ. 21 Anaxukpimxi meets jam kø'øom a'ux xninijky ku ja ka'ayin tpaaty, jamts muum kyaku'uxyidi jøts muum nugo tyimy'ukmuktigøøñidi. 22 ¿Ti ka' meets mdøjk te ma nga'adyit? Mgamøj'ejxtipxi dø'on ja janchja'wip jaa'dyi ku jade'en m'adø'østi, jøts namyikaxi mwinbidsømdi ku ja mmigu'uk pøn ayoodip jam xwingayidi, jøts ja nugo xuk'ayooidi. ¿Sats meets idø'on nnojmmit? ¿Ndsaaçkajxa'akp meets idø'on ku jade'en m'adø'østi? ¡Nijuuni xøøw meets ya'atpi ngadakajxa'akt!

Ku ja nwindson'ajtim yjaak'uk'a'ux'ajtmni møøt ja pyabøjkitøjk

23 Pø ja nwindson'ajtimxi ø kø'øom tø xmø'øy midu mee tøndukyuyuy. Ku dø'on ja nwindson'ajtim Jesús wyinaty yikøyakwani ux, nay ja'abi uxts idø'on ja tñixajiyi'ñ tu'uk ja tsapkaaky, 24 kuts ja Dios Teety t'ajot'ajty jøts tkajxajky, winets ja t'adujkajky ja tsapkaaky jøts wyaañ yide'en: "Kaydi, øts idø'on ya'at nne'kx midu meets mnitsoojkingøjx inet yikøyakp. Mdu'undip idø'on ya'at jade'en jøts øts xja'myajtspajt'attit." 25 Kuts idø'on ja wyinaty tø y'a'ux'atti ixjats ja uujk'i'ñ tu'uk tñixajiyi'ñ jøts yide'en wyaañ: "Ya'at tsapnøø'uujkin idø'on ixyam tãmp ejxpajt ku ja Dios Teety ja wyanda'aky tyik'aduky sam ja ttami'awa'anisyi'ñ ja naxwiin'ñit jaa'y ja nitso'ok'ajtin. Ixyamts idø'on ja cho'onda'aky ku øts nni'jpy inet wyidusu'unt wyidaxt. Kuts ya'at tsapnøø'uujkin xumitu'undit, øts nja'myajtsingøjxp yø x'adunidit." 26 Jade'ents migu'uktøjk idø'on, ja nwindson'ajtim mee mja'myejchp ku meets ja tø mgu'ooogyi ku jade'en ja tsapkaaky xka'adyit midu namyayi ñe'kx'ajtpy, jøts ku ja tsapnøø jade'en x'ukunaxit midu ja namyayi ñi'jpy'ajtpy kunim ja mye'ent jadigøjk.

Sudso ja nwindson'ajtim kyaajyiky'uujkikykupøkt midi ja ñajststunip ku ja y'a'ux'ajty

²⁷ Ja nwindson'ajtim Jesucristo yjamidundigøøpy pøn idø'øn yikxon tkajøø'kxp tka'uukp ja nwindson'ajtim ñe'kx jøts ja ñi'jpy. ²⁸ Patyts idø'øn yikxon jawyeen xpawinma'adyit sa ja mdsinaa'yin xyikyø'odyi, namga'anim wyinajty xni'awidi ja nwindson'ajtim ñe'kx jøts ja ñi'jpy. ²⁹ Ja kyø'øm ayo'onxi ja y'ixaapy pøn nugo tni'a'wip ja nwindson'ajtim chapnøø'uujkin. ³⁰ Ja'agøjpxi dø'øn may ja mmigu'uk pa'amøøtti jøts kajotmøjkti, jøts muum tø y'ookti. ³¹ Kuts adøm kø'øm a'ejxi ndu'unint, ka'ats ja nwindson'ajtim jade'en xiidyu'unint. ³² Kuts adøm ja nwindson'ajtim xiidyu'uñim ja'agøjpx ja ttuñ jøts ja xukja'gyukant jøts ngamøøtkudigø'oyindit ja pojkpitumbi jaa'dyi midi tkajanchja'widip ja Dios.

³³ Paty migu'uktøjk idø'øn, ku mnamyukidit jøts ja nwindson'ajtim ja chapnøø'uujkin x'atsja'myatsidit, nay'awexidi jøts tu'ugyi mdsapnøø'uuktit. ³⁴ Pøni jam pøn yu'øøky, wan jamyi ne'egi kyø'øm tøkjotp t'ukay, jøts ja Dios wyinaty kyadukuwanjaty ku ja tsapnøø'uujkin ja nugo tyikwa'ant nanntyamu'ugi nanntyaku'uxi. Midi'ibi jaty myiktøødip jaanim øts ja wyinaty nnigajpxy ku mee n'ats'ext.

12

Ja wijy'ajtin midi ja Dios Espiritu Santo yajkpy

¹ Migu'uktøjkti, jaa ja ayuujk midi ø ndsøjkpy jøts meets ja xnijawit ku Dios Espiritu Santo tyaky ja winmaa'n ja wijy'atin jøts ja tmø'øy ja jaa'y kija'.

² Mnija'wip mee ne'egi wa'ats ku mee wyinaty xkamibikñim ja nwindson'ajtim Jesucristo, ja maxandsaajimts meets tu'uk tu'uk y'ijty ja'ayi mwindsø'jkidip. ³ Paty meets yam ndukmadøy jøts xnijawidit ku pøn wya'ant: "iMiku' yø Jesús!" kidi ja Diosip y'Espiritu Santo ja wyinaty jade'en yikwaajniyip. Uk jadu'uk pøn nugo wyamit: "Ja Jesús idø'øn møj windsøn!" tiyts ja wyinaty yjanchwa'añ pøni Dios y'Espiritu Santo ja wyinaty jade'en yikwaajniyip pøni ka'ats myigajpxigøøpy Dios ja wyinaty.

⁴ Mayjøøjp idø'øn ja jaa sa pøn øy tigati tjaty, jøts kija' ja yikmøøt'aty pøni sa pønjabøn ja wijy'ajtin tø yikmø'øy, tum Espiritu Santo wyingujkpts ja chøøn. ⁵ May tunkjøøjp yikmøøt'aty, tu'ugyits ja nwindson'ajtim Jesucristo yiktamiduñ. ⁶ Kawinaak jøøjp ja ødyunk nmøøt'ajtyindi, tu'ugyits ja Dios ja xmø'øyindi. ⁷ Ja Dios idø'øn ja ejxpajtin tu'uk tu'uk tmøøpy ja jaa'y, jøts idø'øn ja tyiknigaxø'økt ku ja Dios Espiritu Santo ja tmøøt'aty, jøts ja niduki'iyi yikta'øy'att. ⁸ Dios Espiritu Santo køjpx idø'øn ja Dios Teety ja jaa'y tmø'øy ja wijy'ajtin jøts ja tiy kyajpxwejt'it, jøts nayide'en ja jaa'y tmøømyi ja ixpiky'ajtin jøts ja øy yik'ixpøjktit. ⁹ Jamts ja jaa'y pøn ja Dios Espiritu Santo janch møj jøts janch møk ja janchja'win myø'oyidi, jamts pøn yikmøødyip ja øybi møk'ajtin jøts ja pamaa'y tyiktso'oktit. ¹⁰ Jam pøngapøn tmø'øy jøts ijxyimbi ka'ijxyimbi ja ttu'unt, jøts jam pøn myøøpy jøts ja Dios kyajpxy Dios y'ayuujk ja tnigajpxidit; jamts ja' pøn ja Dios tø tyamidsøjkyidi jøts ja t'ejxkaptit pøn jaty ja ka'øybi winmaa'n tyiktundip jøts pøn ja øybi winmaa'n tmøøt'ajtip; jamts nayide'en pøn tø yiktamidsøkti jøts kawinaak ja ayuujk tkajpxit midi ja myigu'uk kyakajpxit; jamts ja'adi pøn tnmadoodip wa'ats ja ja'abi ayuujk jøts ja tnigajpxti ti dø'øn ja tyijpy. ¹¹ Tu'ugyits idø'øn jade'en y'adi'ich ja Dios Espiritu Santo, jøts idø'øn ja tyikwa'kxy ja wijy'ajtin pøni ti dø'øn ja pønjabøn tyukjatwampy kø'øm ja tø ttanibiktaagyi.

Ja nwindson'ajtim tnigubajk'ajtp niduki'iyi ja jaa'y pøn tjanchja'widip ja Dios

¹² Jade'en idø'øn ja Cristo n'ukupiktaajkint sam tu'uk jaa'y ñe'kx midi janch may tanibiktaagyi tum tigach; øts idø'øn ja kø' ja teky kija' ja tunk tø yiktanibiktaagyi, tu'ugyi ja ñe'kx ja y'ity. ¹³ Nayide'ents adøm idø'øn øy yjapøni, yja'israelit jaa'yi uk yjaga'israelit jaa'yi, yjagrecit jaa'yi, yjamidumbi jaa'yi uk yjanitøøky jaa'yi, ku adøm idø'øn tø nnøbejtyim tu'ugyi adøm idø'øn ja ne'kx namyayi nyik'øya'am Dios Espiritu Santo køjpx; jøts adøm jade'en ja tu'uk tu'uk tø xatøjka'am.

¹⁴ Ka'ap ja ne'kx tukjøøjpyi tmøøt'aty midi jaty ja yiktumpy, pø may jøøjpxi ja tmøøt'aty. Jade'ents ja y'amuum'aty ku ja ka'pxy tmøøt'aty ijxyim ka'ijxyim. ¹⁵ Øy yø teky yjawa'añ: "Ka'ap ø nduñ nayide'en sam ja kø' paty ø nipøn xkatunk'att", kidi ja'agøjpxts ja kya'ukpaat'ajtniyit ja ne'kx. ¹⁶ Uk y'ukwamit inet ja tatsk: "Ka'ap øts ja ween tyunk ndujni paty ø nipøn xkatunk'att", nigidi ja'agøjpxipts ja ne'kx ja myajtstuujtneyit. ¹⁷ Ku jeexyip tum ween nne'kx'ajtyim, ¿sudsots jeexyip nmadø'øyim? Uk kuts jeexyip tum tatsk nne'kx'ajtyim, ¿sudsots jeexyip nxuu'ka'am? ¹⁸ Tø dø'øn ja Dios ttanibiktaajkigyijxy ti jaty jadu'uk jadu'uk ja ne'kx tyu'undip sam ja kø'øm tø ttsky. ¹⁹ Ku jeexyip tukjøøjpyi y'amuum'aty, ¿mats jeexyip ja maybi tyøkidi midi tyika'pxtip tuk'amuum ja ne'kx? ²⁰ Jabi nnija'wimpts adøm ku mayjøøjp chøkyi winets njaa'gyaxø'jkidit, pø tu'ugyixi ja ne'kx.

²¹ Ka'axi dø'øn ja ween tnøjmit ja kø': "Ka' me nyiktunwa'añ"; ni ja kubajk tkanimaamyit ja teky: "Ka' me n'ajot'aty." ²² Jøts midi idø'øn yjawi ka'a'ejxin kaxø'kp ja' idø'øn ne'egi

yikxon yik'ajot'ajtp, ja idø'øn xyikjujky'ajtindip. ²³Jøts midits yjaw i kayiktsojpk ja 'ats ne'egi n'ejx'ijtyindip jøts ja nnixø'xyim nniipjkyim; midits adøm ngananky'ejxwa'añimp ja'ats adøm janch'amaay ndø'øñim nyu'uchimp. ²⁴Jade'en idø'øn ja Dios tø xanibiktaajka'am jøts adøm ja ne'egi nmijotigø'oyint midi yik'ejxp ka' tyuñ, ²⁵jøts kidi ki'abikyip nugo øy pøn tyuñ øy sa, pø nabyudø'kjiyidixi dø'øn ja'adi nixem niyam wan ja sa t'ijxyidi, jøts ja amuun tyikjujky'ettit tuki'iyi ja ne'kx. ²⁶Pøni tsaachip o magama tukween ja ne'kx, amuunts ja pøjkpi ambi yikja'wigyixy øy maðsoo; kuts øy maðsoo tukween yikxon yik'ejxy'ejtmi kunim ja yikxon chø'øky, tyimñejkpts nayide'en tuki'iyi øy maðsoo ja ne'kx.

²⁷Meetsts idø'øn ñamyayi ja Cristo mne'kx'ajttip jøts jade'en meets ja mbikta'agyi sam ja kø' teky, ween aaw tyuñ, uk jadu'uk øy ti midi møøt kya'pxy ja ne'kx. ²⁸Tøts idø'øn ja Dios Teety ttanibiktaagi ti tyu'undip nidu'uk jaty ja jaa'y pøn ja Dios tmibøjktip: midu'uk, ja nwindson'ajtim kyudanaabyitøjkti; mimajtsk, pøn tnigajpxidip ja Dios kyajpxy ja Dios y'ayuujk; midigøøk, pøn yik'ixpøjktip pøn kajpxwejtjip; jøts nayide'en pøn ijxyimbi ka'ijxyimbi ttundip, møøt nayide'en pøn ja pamaa'y tyiktsojktip tyikmøkpøjktip, møøt ja pudø'øjtøjkti, jøts nayide'en ja ana'ambitøjkti, møøt ja'adi pøn tkajpxtip ja wenk aaw ja wenk ayuujk pøni sa Dios ja kø'øm yikajpxwa'añidi. ²⁹¿Pønts idø'øn janchja'wibi'ajttip? ¿Niduki'iyi ja nwindson'ajtim tkudaniði? ¿Tum ja' tnigajpxidip ja Dios kyajpxy y'ayuujk? ¿Tum ja' yik'ixpøjktip? ¿Uk tyumdundip idø'øn ja ijxyimbi ka'ijxyimbi? Ka' yjade'eni. ³⁰¿Tyumøøt'ajttip idø'øn ja møk'ajtin jøts ja pamaa'y tyiktso'oktit? ¿Uk kyajpxtip idø'øn niduki'iyi kawinaak ja kanimadooni ayuujk? ¿Uk ñimadoogøxtip idø'øn pøni sa dø'øn ja wenk ayuujk wya'añ? Pø ka'axi. ³¹Tajotigøyts sudso xpaattit yø'øbi øy'ajtin sudso ja Dios mgunuu'kxidit jøts myikwejidit myikajidit. Ixyamts mee nduknijawiwya'añ ja jawaani øybi tuu' sa øy tsuj njaa'y'ajttindit.

13

Ja tsojkin ja pa'ayo'owin

¹Ku njakajpxt kawinaak ja wenk aaw kawinaak ja wenk ayuujk øy yjatsajjotpit ayuujki uk øyts yjanaxwii'ñit ayuujki, pøni ka'ats øts ja tsojkin pøni ka'ats øts ja pa'ayo'owin nmøøt'aty, nayide'ents ja tpatni sam tu'uk ja tambur tawa'ats midi nugo jagojpk, uk sam ja platiij midi nugo na'amp. ²Øy øts jeexyip ja Dios kyajpxy ja Dios y'ayuujk tuki'iyi njanigajpxi, uk njanija'wigyixyts øts tuki'iyi ti jaty memp ti jaty kidiakp midi ka' pøn t'ijxñim midi ka' pøn tnijawinim, uk njamøøt'atyts øts tuki'iyi ja ixpiky'ajtin ja wijy'ajtin, uk nja'ajot'atyts øts ja Dios kawine'en ku øts ja ijxyimbi ka'ijxyimbi njatuñ jøts øts ja kojpk ngiidyigach, pøni ka'ats øts ja tsojkin pøni ka'ats øts ja pa'ayo'owin nmøøt'aty nitits øts mibaat ngawa'añ, tyimñugo øts iiy. ³Uk njadagumaagyijpxpsts øts ja ayooði jaa'y tuki'iyi ja nbikta'aky, uk njanagyøyakyits øts jøts øts ja jaa'y xyikniðø'oty Dios køjxp, niwine'enin øts ja ngadamajada'akt, pøni ka'ap øts ja tsojkin, pøni ka'ap øts ja pa'ayo'owin nmøøt'aty.

⁴Pøn tsojpk pøn pa'ayoop, tuda'aky ja yjaa'y'aty; jøts øy jaa'y ja', ka'ap myigu'uk ja øy ti tami'ekyi uk niti tkamo'owa'añ; jøts ka'ap ja ñamyikexyi, ni kyanadya'agajpxxi ja' pøni ti ja tyumpy. ⁵Ka'ap ja ka'ø'y'ayuujk ja ka'øwyinmaa'ñ uk ja ka'øchinaa'y'in ja ttunk'aty; jøts nika' ñadyamidsojkiixy tuki'iyi yam ja myigu'uk y'ayøw wyinmay; ka'ap ja tuki'iyi tta'ambiky jøts nika'ap ja ejtp y'ekyi. ⁶Ja y'øchinaa'y'in ja myigu'uk ja tyadaxondakpy, kidi kya'øchinaa'y'in ja ojts ttadaxonda'aky. ⁷Pøn tmidanaapy tuki'iyi pøni sa yiktuñ jøts pøni sa yiknøjmi, jøts jyøp'ijxpy ja' ku kuwani ja tsojkin ja pa'ayo'owin myøjtøki, jøts ka'ap ja tigati tta'amutski, ejtp ja tyuda'aky'ajtin ja ttamajada'aky.

⁸Nijuuni ja tsojkin ja pa'ayo'owin kyagudigøw. Ja'tp ja et ja xøøw ku wyinaty ja kajpxy ja ayuujk kya'ukyiknigajpxnit midi ja Dios yajkpy, jøts wyinaty nayide'en kawinaak ja wenk aaw ja wenk ayuujk kya'ukyikajpxni, jøts wyinaty ja ixpiky'ajtin kya'uktuni. ⁹Ka'ap adøm tuki'iyi ka'pxy nnija'wa'am, jøts nika' ka'pxy yiknigajpxy ja Dios chojkin ja Dios pya'ayo'owin midi adøm ja xjadukmado'owimp. ¹⁰Kudigø'øpyts ya'atpi ni ja'win ku wyinaty tuki'iyi n'ijxyim nnija'wa'am pøni sa dø'øn tyiyi kya'pxy tuki'iyi.

¹¹Kuts y'ijty nwinmatsk'aty, mutsku'ngin øts y'ijty ngajpxy nmadya'aky, mutsku'ngin øts y'ijty nwinmay, jøts mutsku'ngin øts y'ijty nayide'en nja'gyuki. Kuts ø nyaa'knaa n'ixmatskøjxni øts ja mutsk'ajtin. ¹²Nayide'ents adøm ka' ka'pxy ja Dios yja' nnija'wa'am, winjo'ximp adøm yjawi ku ja nja'ejxpaatwa'añim; jaanin idø'øn ja wyinaty øy wa'ats n'ijxyim. Ka'ap øts ixyam tuki'iyi nnijawi, jaanin øts ja nøjxk wa'ats yikxon nnijawinim tuki'iyi sam øts ja Dios ixyam wa'ats x'ixy wa'ats xnijawa'an. ¹³Jade'ents idø'øn ku n'ajot'ajtin ja Dios, ku njøp'ejxin ja nitsø'ok'ajtin, uk ku nmøøt'ajtin ja tsojkin ja pa'ayo'owin, nimidi mibaat kyagudigøw, ettip yø xemikøjxp; tigajtstipts idø'øn nidu'ukjaty, yø tsojkin yø pa'ayo'owin yø ne'egi tyimnyawaani møj, nigidi yø yjadu'ukpi jade'en myajada'akti.

14

Ja kawinaaq ayuujk kanimadooni

¹ Kajaats idø'øn xmøø'tattit ja tsojkin ja pa'ayo'owin, amidowdi pøktsowdi jøts ja Dios myikwejidit myikajidit, ja'ats jawaani m'amido'odip sudso ja Dios kyajpxy y'ayuujk xngajpxidit. ² Pø ja Diosxi ja ja'ayi myigajpxy pøn ja wenk aaw wenk ayuujk tkajpxp, ka'axi ja myigu'uk ja ñimadøyi. Ja Dios Espiritu Santo ja jayik'awejmijip, ka'a'pts ja yiknimadøyi ti ja kyajpxy, jøts ti ja jade'en tyijpy. ³ Abikyts ja'amidi pøn ja Dios kyajpxy pøn ja Dios y'ayuujk tu'ugyi tyimdyunk'ajtmijidip jøts ja ttukmadowdi ja jaa'y pøn tpabøjktip ja Dios jøts ja yjanchja'win ja myøkta'aktit ku ja yikajpxot'amøjkidi. ⁴ Nadyu'uk ja yjanchja'win ja tyikmøji tyikaja'aji pøn ja myigu'uk kanimadoojip ku ja tjakajpxy ja wenk aaw wenk ayuujk; pønts tñigajpxidip ja Dios kyajpxy ja Dios y'ayuujk jøts ja ttukmadowdi ja jaa'y pøn tpabøjktip ja Dios jøts ja jade'en tyikmøjiyidi tyikajaajiyidi ja yjanchja'windi.

⁵ Njadamidsøjkpy meets jøts kawinaaq ja wenk aaw wenk ayuujk xkajpxtit; jawaani kajaats mee ndamidsøky jøts ja Dios kyajpxy y'ayuujk xngajpxtit, ja'axi ne'egi jawaani møj tump; ja tump jeexyip nayide'en pøni yiknimadoop jeexyip pøni ti dø'øn yikajpxp yiknimadyakp wenk aaw wenk ayuujk, jøts ku jeexyip yikxon yiknimajpxy tu'uk tu'uk ti jade'en tyijpy, winetimts ja tyi myøjiyidit mya'ayxiyidit ja yjanchja'win pøn jaty tpabøjktip ja Dios. ⁶ Pøni n'ats'ijpxy meets jøts meets ja wenk aaw wenk ayuujk ndamigajpxt, ka' meets ti pudøjkin jade'en nmo'ot. Kuts øts ja nngajpxt midit ja Dios xuknija'wa'amp, uk ja' midit tyi midit øy, uk ja Dios kyajpxy y'ayuujk mee ndukmadøpy jøts nda'awa'andit, ja'ats idø'øn ti mjanchpudøkiyidip.

⁷ Wan ja ejxpajt t'ukpiktaajkyim. M'ijxy'ajttipxi xuujx sam ja kapxyuujx uk ja kow; pøni ka'ap nyiksuunipaajtyim, sudsots jaa'y ja tjaj'gyukit pøni ti yikoop, pøni ti yikxuxp. ⁸ Kuts ja jaa'y cheptumidi ku ja puxuujx wa'ats kyawinaaq'ñ, ka'ats ja tsep pøn t'a'ejxi. ⁹ Nayide'ents meets idø'øn mjaty; pøni ka' meets ja ayuujk xkajpxy midit yiknimadoop, ¿sudso dø'øn yiknijawit pøni ti dø'øn mgajpxtit? Jja poj mee nugo mmigajpxy! ¹⁰ Janch jaa dø'øn may ya naxwiiñ ja ayuujk tigach, jøts tyunnimadoodip ja' pøn ja'abi ayuujk tkajpxtit. ¹¹ Pøni ka'ats ø nnimadøyi ja jaa'y pøn ja wenk ayuujk tkajpxp, wenk kugajp jaa'lyts øts ja xejt, jøts nayide'en øts ja ndejmit. ¹² Pøni mjanchtajotigøødyip idø'øn jøts ja kunuu'kxwyejin jøts ja kunuu'kxkyajin xpaattit x'ejxtit, ja' dø'øn mmijotigø'odyip midit mdabudøkidip ja mmigu'uk jøts ja yjanchja'win ja myøjidit kyajaajidit.

¹³ Paty idø'øn ja jaa'y t'amido'ot ja Dios jøts yikwejit yikajit sudso ttuknimado'ot ja jaa'y pøni ti dø'øn ja kanimadooni ayuujk tyijpy. ¹⁴ Kuts ja wenk ayuujk njadakajpxa'akt, ka'ap øts ja nnimadøyi pøni ti ngajpxy øy øts ja ngajpxaajkin yjatyiyi. ¹⁵ ¿Tits øts idø'øn njaaktu'ump? Njayiktuñ øts ja wenk aaw ja wenk ayuujk ku ø n'ajot'att uk ku øts nwin'øø't ja Dios, ja' ja'ayi tsojkip jøts ku øts nmøø'tatt ja ja'gyukin ja madogukin. ¹⁶ Sudso meets ja mmigu'uk nnimadowisyt pøn ja wenk ayuujk tkajajttip pøni wenk ayuujk tam meets ja Dios mda'ajot'ajtpy. Kuts ja ka'ap tñimadowdi sa jaty mee mwa'añ øy meets ja amuki møøt xja'ajot'aty ja Dios, ka'ats ja tjaj'gyukidi sa meets ja Dios xnøjmi. ¹⁷ Øy meets ja mdsapkaajpxy mabaat yja'øyi, kuts ja ka' yiknimadøyi jade'ents ja tpaaty ku meets ka' ti pudøjkin xmø'øyi ja mmigu'uk pøn tkanimadoodip ja'abi ayuujk, jøts ja jade'eñi y'etti, ka'ap ja yjanchja'win myøwenidi kyajaajidi. ¹⁸ Ngajxajky øts ja Dios ku øts ja kawinaaq xukajpxy ja wenk aaw wenk ayuujk midit mee ka' xkajpxy. ¹⁹ Kuts ø ngajpxy jøts ø n'awa'añ ja jaa'y pøn jaty Dios tjaj'myajtstip, magoxk aaw øts ja'ayi ne'egi ngajpxy ja ayuujk midit yiknimadoop jøts ka' kawinaaq mil ja ayuujk midit kyayiknimadoop.

²⁰ Migu'uktøjkti, ku ja ka'øyi ku ja pøky xpaattit, jade'en mnabyikta'agidit kidi mut-skuna'jk ti kyamayidinim. Kuts mwinma'adyit, jade'en mwinma'adyit sam møjaa'dyøjk yikxon wyinmaadya'an. ²¹ Yide'en jap wya'añ nøky ja kutujk: "Wenk aaw wenk ayuujk øts nyiktunkpaatp ku øts ja naxwii'ñit jaa'y øy magdsoo nmigajpxt, uk ndanigaxtit øts ja' ja wenk jaa'y midit wenk pujx wenk kajp tso'ondip jøts øts ngajpxy jøts øts n'ayuujk ja xyiknajxidit, nijade'ents øts ja naxwii'ñit jaa'y nøjx xkamibøkti, jade'en wya'añ ja nwindson'ajtim." ²² Ejxpajtxi dø'øn jayikmøødyip pøn jaty tkamibøjktip ja Dios ku dø'øn ja wenk aaw wenk ayuujk xkajpxit jøts ja Dios ja tmibøjktit, kidi ja'ajip ja jade'en kyujajttip pøn tø tmibøjknidi ja Dios. Abiky yja' ja'amidi ku Dios nayide'en myø'øyi ja ejxpajt ku ja yikxon tyukjatyidi sudso ja tñigajpxidit ja kyajpxy ja y'ayuujk, kidi ja'ajipts ja jade'en tyanibiktaajkip pøn tkamibøjktip ja Dios. ²³ Kuts mee niduki'iyi mnamyukit jøts mjamadya'aktit jøts tum tigach ja m'aaw m'ayuujkti, jøts nipøn kyanañimadowidit, kuts ja jaa'y pøn ja Dios tkanija'widipnim jam tyøkidit ma mee mnamyukyidi jøts ja niti nayide'en tkanimadoodidit, ¿ka' meets idø'øn ja mo'tpi jaa'y mdejit? ²⁴ Pøni mgubajtyipts meets ja jaa'y jøts ja tmadøyi ku meets ja Dios kyajpxy y'ayuujk xnimadyaajki, pyawinmagyøjxpts ja chinaa'yin ja' jøts pyøky ja tjawit ku ja tmado'ot jøts kudam ja yikpøky'ixy. ²⁵ Jade'ents ja

Dios ja tjanchjawit jøts ja tyiknigaxo'køxt pøni sa jaty ja tø chøøni, jøts ja Dios tmøjpikta'akt kuxani, jøts meets ja mnø'ømxit jøts ku meets ja Dios jam xmøøtsøøni.

Tundi tuk't'iyi tsuj, jøts tum tanibiktqaagi sam pyaat'aty

²⁶ Yide'en me migu'uktøjk idø'øn yjawi xun ku mnamyukyidi. Jam niwinaagin pøn ttunk'ajttip ja øøk, jøts niwinaagin y'awa'andi, uk ja'ats ja ñigajpxtip pøni sa ja Dios kyajpxy y'ayuujk wy'a'añ; jamts niwinaagin kya'amaamyidi, wenk aaw wenk ayuujk ja yiktundip, jamts pøn tkajpxnaxtip ja wenk aaw ja wenk ayuujk. Øy'ajtp ku jade'en xundi, nugo ku xja'myatsti jøts ku nayide'en ja mjanchja'win xyikmøjidit. ²⁷ Ku ja wenk aaw wenk ayuujk xkajpxtit midi kanimadooni, namajtsk nidigøøk ja'ayi mgajpxtit jøts nidu'ukjaty; jøts kuwani tu'uk tkajpxnaxt ja ayuujk. ²⁸ Pøni ka'ats jam pøn, pøn ja ayuujk tkajpxnaxp, ka'ats ne'egi ja wenk aaw wenk ayuujk xkajpxtit, kinadyu'uk ne'egi ja Dios xmøøtmadya'aktit. ²⁹ Nayide'ents xu'undit pøni mnigajpxwandip ja Dios kyajpxy ja Dios y'ayuujk, nayide'ents namajtsk nidigøøk ja'ayi mgajpxkøjt, jøts nayide'en nidu'ukjaty, pønts kakajpxtip wants ja ja'ayi tpatmadowdi jøts t'ejxti pøni tøøp uk ka' tyiy. ³⁰ Pøni wyinmaa'nmøøpyts ja Dios tu'uk ja jaa'y midi jam patmadoop, wants ja tkajpxmi jøts ja y'amo'ont pøn ukajpxp. ³¹ Jade'ents mee mgajpxt niduki'yiyi pøni winmaa'nmøøjyidi ja Dios, jøts jade'en xem yam mnanky'ixpøkidit jøts mnagyajpxjot'amøkiyidit. ³² Tuda'aky idø'øn, tsuj idø'øn ja kyajpxtit pøn ja Dios kyajpxy y'ayuujk tñigajpxidip, ³³ jabi ja øy'ajtinxi ja jotkujk'ajtinxi ja Dios chøjkpy, ka'ap ja tsep, ka'ap ja nugo o pøngapøn ttatøkit ja madyaajkin.

Nayide'en meets idø'øn xu'unt sam niduki'yiyi ma jaty ñamyukyidi ja janchja'wibi jaa'dyi midi adøm nmigu'uk'ajtyindip. ³⁴ Ka'ap idø'øn ja tø'øxyøjk xyikajpxtit ku mnamyukidit, pø ka'axi jade'en kyutuky. Mbadu'undip idø'øn ja kuwani sa ja Dios kyutujk wy'a'añ. ³⁵ Pøni yiktøwøwandip tigati, jam tyøjkjot tyiktø'ødit ja ñiyaa'y; ka'axi y'øgyaxi'iky ku tø'øxyøjk kyajpxy ma mnamyukyidi ku Dios x'ajot'atti.

³⁶ Ja'myatsti migu'uktøjk ku meets jawyeen ka' y'ijty xñijawi ja Dios kyajpxy, jøts ku mee ka' nadyu'ugyi xñijawi ya'atpi ayuujk. ³⁷ Pøni jam tu'ugin tjawi ku tñijawi sudso ja Dios kyajpxy y'ayuujk tñigajpxit, uk tø tjawi ku ja Dios Espiritu Santo tø wyinmaa'nmø'øyi, paat'ajtip jøts tja'gyukit ya'atpi ayuujk midi meets ixyam ndanigøjpxy jøts ku nwindson'ajtim øy tkutujki. ³⁸ Pøni ka'ats ja tkutujkjaw, ka'ats ja nayide'en ja ejxkajpin pyaat'aty. ³⁹ Jade'en migu'uktøjkti, jotmay'atti sudso ja Dios kyajpxy y'ayuujk xñigajpxidit, jøts kidi xpayø'odyi pøni kyajpxtip ja jaa'y ja kanimadooni ayuujk; ⁴⁰ tum øy tsujts idø'øn ja xu'undit, ka'ap anaxukpim.

15

Ku ja Cristo yjujkpyijky jadigojk

¹ Ja' migu'uktøjk ixyam ndukja'myatswandip midi tø njanigajpxmi, ja Dios ñitsoojkin ayuujk. Ya'at kajpxy ya'at ayuujk meets idø'øn tø xkupiky, jøts nay øy' meets idø'øn ixyam mdsinaa'yin'ajtpy. ² Ja'agøjpx meets idø'øn nayide'en ja Dios myiknitsø'øgyidi, pøni mbadundip idø'øn midi tø ndukmadowdi, jøts pøni tu'ugyi dø'øn ja mjanchja'win xyikyø'odyi.

³ Ja' meets idø'øn tø ndukmadøy midi ø nayide'en tø nyiktukmadøy. Tø mee nda'awa'añ ku adøm ja Cristo tø xku'o'jka'am, ku adøm nbojkpitumbijaa'y'ajtyindi sam jap nøkyijpxy yjaabyetyi jøts jade'en ja wy'a'añ; ⁴ jøts nayide'en tø ndukmadowdi ku tyikjutøjkidi, jøts ku ja kyimidigøøk xøwø yjujkpyijky sam nayide'en ja nøky tñigajpxmi; ⁵ jøts ku ja ojts jadigojk ñanky'ijxyiyi yam ja tø yja'oo'kni jam Pedro wyindum, ja' ja ojts t'ixy jøts jadigojkøjmyi ma ja kyudanaabyitøjk jam wyinatyi. ⁶ Jøts nimagoxk magø'pxñaxy ojts y'ejxmiyi ja janchja'wibi jaa'y tuktoñi, may nay jaa yjujky'attinim winaagin tø y'ooknidi. ⁷ Jøts ojts y'ejxmiyi ja Jacobo midi Santiago yiktejp, jøtsnim niduki'yiyi ja kyudanaabyi ojts y'ejxkøjxmiyi.

⁸ Jøtsnim ø tyimy'ix'oojk nayide'en tø n'ejxmi, øy øts idø'øn øy tsuj tø njagatso'onda'aky n'uktejnt sam ja'adi. ⁹ Ja'agøjpx øts idø'øn øy ngamøji ngakøjpxi, pø øtsxi dø'øn ñamyayi jawaani mutsk wimbidsømp, ka'ap øts nayide'en sam ja nwindson'ajtim kyudanaabyidi, jøts ni xjagapaat'aty øts jøts ø nwindson'ajtim kyudanaabyi nyiktejt, jabi ka'axi øts y'ijty nmaa'kxti pøn jaty tjanchja'widip ja nwindson'ajtim. ¹⁰ Tøts øts ja Dios xjanchmi'ø'y'aty, ja'agøjpxts øts ixyam jade'en njaa'y'aty pøni sa øts ja tø xamidsøky, tøts ja chøjkin ja ngupøjki, ka'ap øts ja nugo tø xanaxy. Tø ne'egi jawaani kajaa nduñ sam ja tø tkatundi ja nmigudanaabyitøjkti; kidi øtsipts kø'øm tø ndyimyajada'aky, ja Dios øts idø'øn ja myø'ajtin jade'en tø xukuñ y'ø'y'ajtingøjpx. ¹¹ Ka'ats ja ndunk'ajtin pøni øts jawaani tø nduñ, uk tøts ja yjadu'ukpi nwindson'ajtim kyudanaabyi jawaani tyundi; nugo ku øøts tum ja' tø nñigajpxy ja Dios y'øgyajpxy ja Dios y'ø'y'ayuujk midi mee tø xjanchjaw.

Ku ja oo'kpi jadigojk yjujkpyøktit

¹² Pø njanigajpxpyts øøts ku ja Cristo tø yjujkpyiky jadigojk, ¿sudso døøon jam muum wya'andi ku ja oo'kpi kyajujkpyiky? ¹³ Pøni ka'ats ja oo'kpi jadigojk yjujkpyøkti, ka'ats ja Cristo nayide'en tø yjujkpyiky jadigojk; ¹⁴ pøni ka'ats ja Cristo jadigojk tø yjujkpyiky, ka'ats øøts ja ngajpxy tyuñ midì øø ndijpy Dios kyajpxy Dios y'ayuujk, øøts ni kyatumi meets ja mjanchja'win midì mjadsinaadyip. ¹⁵ Kuts idøøon ja wyinaty janch jade'en, Dios tyeystigi ataaytsøø nwimbidsøønni, pø tøxi øø nnimy ku ja Dios Teety jadigojk tyikjujkpyiky ja Cristo; pøni tiyts ku ja oo'kpi jadigojk kyajujkpyøkti, ka'ats ja yjanchi ku ja Dios Teety ja Cristo tø jadigojk tyikjujkpyiky. ¹⁶ Pøni ka'ap ja oo'kpi jadigojk yjujkpyøkti, ni ja Cristots køømbaagat jadigojk tø kyajujkpyiky. ¹⁷ Pøni ka'ats ja Cristo jadigojk tø yjujkpyiky, nitits meets ja mjanchja'win kyawa'añ; nayi mbøkyjotp m'ayo'onjotp mee mdsøøni. ¹⁸ Pøni jade'ents ja', tøts inet idøøon tyimy'oo'kti pøn jaty ja Cristo tø tjanchjawidi ku tø yjujky'atti. ¹⁹ Pøni yayi adøm njøp'ijxy'ajtyim ja Cristo nitsoojkin øøts ja nayi yayi ndajujky'ajntim naxwiin, ti adøm n'ayøøy, adøm ne'egi yikxon ayo'ijxyim jajtüm, nigidi pøn jade'en ku adøm jade'en n'adøjtsin.

²⁰ Ka'ats ja yjade'eni, tø døøon ja Cristo tyimyjanch jadigojk yjujkpyiky; ja' idøøon køøm midu'uk tø ttunjøpi, øøts idøøon wyinaty nayide'en yjujkpyøkti ja abiky oo'kpidi. ²¹ Pø tu'ukxi ojts ja jaa'y ja o'jkin tyiktso'onda'aky ya naxwiin, nayi tu'ukts ja' pøn ojts tyiktso'ondakmi øøts ja oo'kpi jadigojk yjujkpyøkt. ²² Jade'en sam niduki'iyi ja o'jkin yikpaaty Adån pyøkyøjpx, nayide'ents wyinaty niduki'iyi ja jujky'ajntim xemikøjpx yikmo'odi pøn ja Cristo tjanchja'widip. ²³ Tanibiktaagits idøøon ja wyinaty ja xemikøjpxit tsinaa'yin nyikmøøyindi. Ja Cristo jawyeen pø ja'axi jawyeen tø yjujkpyiky; kuts ja Cristo mye'entnim jaanims wyinaty yikmo'odi ja tsinaa'yin xemikøjpx pøn jaty ja tøy janchjawi. ²⁴ Jats idøøon wyinaty tuki'iyi kyixy, ku ja Cristo wyinaty tyikudigøøgyixy niduki'iyi pøn jaty jaa windsøn'ajttip naxwiin, øøts pøn wyinaty yikutujktip, ana'amdip, pøn tmidsep'ajttip ja Dios; øøts idøøon ja Cristo wyinaty ja Dios Teety ttagidøøjkyixy tuki'iyi wine'enin ja tja'aty. ²⁵ Pø jaanims idøøon ja Cristo wyinaty kuwani yikutuky kunim ja myidsep tteky'aa'anjtkøxt, ku ja Dios Teety ja jade'en wyinaty tøyamidsøkyi øøts ja myidsep ja tmimajada'akt, ²⁶ øøts ix'oojknim ja o'jkin ja Cristo t'ukmimajada'knit ku ja jujkyøjkin tyiknaxkida'akt. ²⁷ Pø tøxi ja Dios Teety tsoky øøts ja Cristo tuki'iyi tyikutukt. Kuts idøøon ja nøky jade'en yjawa'añ, ka'ap idøøon ja Dios Teety tyagida'agiya øøts ja Cristo ja yikutukiyit, pø ja'axi tøy tsoky øøts ja Cristo tuki'iyi tyikutukt. ²⁸ Kuts idøøon ja Cristo wyinaty tuki'iyi tøy tmimajada'akixy, winets ja wyinaty ja Dios Teety kyutujk tkupøjkti, pø ja kuxi ja Dios U'ngi. Jøts idøøon jade'en ja Dios Teety myøjkutujk o maðsoo wyingaxøøkt pøn ja Dios U'nk tøy tmimidsøky øøts ja myidsep ja niduki'iyi tmimajada'akt.

²⁹ Jam yjawi pøngapøn ja oo'kpi tkunøbatti. ¿Tigøjxpts ku jade'en m'adøøtsti? Pø nømdipxi ku ja oo'kpi kyajujkpyøktit jadigojk, ¿sudso ja xkunøbatidi?

³⁰ ¿Ti øøts jeexyip ndamidanaapy ja ayo'on ku øøts njemjaty ndejaty, pøni ka'adam ja yjanchi ku jadigojk njujkpyøktit? ³¹ Janch ø migu'uktøjk idøøon nwa'añ, wingon øøts ja o'jkin jabom jabom n'ixy; ka'ats øøts ja nwandijy, ja'ay øøts nugo ndyimydyajotkuj'ajtpy ku meets ja nwindøn'ajntim Jesucristo tøy xjanchjawidi. ³² Pøni kajpxwamp øøts, nøømp øøts inet ku øøts ja jaa'y jawaani xkayikpa'ookti jam Efeso. Tøts øøts ja nmimajada'akti, ¿tits øøts idøøon jade'en nbijky? Pøni janch tiy idøøon ku ja oo'kpi jadigojk kyajujkpyøkti, jade'ents ne'egi ndu'unindit sam wya'andi: "Wants yikxon tjaaktyimkyaa'yindi tjaaktyimy'uuykyindi ixyam jabi o'jkindipts jabom."

³³ Nay'ejx'etidim øøts mgayikwin'øøndit. Sam ja kajpxy wya'añ: "Ja køøm ka'ømyigu'uk idøøon kayu'kxtip pøn tyikma'ttip ja myigu'uk chinaa'yindi." ³⁴ Yiktso'onda'akti jadigojk tiy tsuj ja mdsinaa'yindi, kidi pøky x'uktunk'ajntidi, pø ka'axi xumnijawidi ja Dios. Paty øøts yjade'en nwa'añ øøts xtsøødyunjawidit ja mga'øwynimaa'añ.

Sa døøon ja oo'kpi jadigojk yjujkpyøktit

³⁵ Jamts inet muum ma tyiktøødit: "¿Sudso døøon jadigojk ja oo'kpi yjujkpyøktit? ¿Sa døøon ja ne'kx wyinaty t'ixy?" ³⁶ ¡Xøjknat! ¿Ku me tigati x'ukni'ipy, nay ja tøm t idøøon pidsømp ku ja myuxy? Kuwanixi ja kyudigøy øøts ja ujts myuxy. ³⁷ Ka'axi ja tøm pajk tyimñayide'en t'ixy sam ja ujts midì muxp, øy yja'ariindømt pajki, uk yjamidi tømdi. ³⁸ Ja Diosts tanibiktaajkip øøts ja tøm pajk myuxt pøni sa ja tsoøky, øøts pøni sa døøon pyaata'aty ja tøm midì yiknejp. ³⁹ Tumdigachxi tuki'iyi t'ixy tigati; wenk ja jaa'y ñe'kx t'ixy øøts wenkts ja jiyujk ñe'kx t'ixy, wenk nayide'en midì ja kyajnk jamdi, øøts wenk ja ajkx ñe'kx. ⁴⁰ Jats ja ne'kx midì tsajpjøtpyit'ajttip øøts nayjaa ja'amidi midì naxwiin'ajttip; midits idøøon tsajpjøtpyit'ajttip, wenk idøøon ja chujidi, ka'ap ja nayide'en kyaxøøkti sam ja'adi midì ya tsuj naxwiin'ajttip. ⁴¹ Wenk yø xøøw tyii'kxy, wenkts yø po' chamami; øøts nayi wenk yø maadsa' tyøø'kxmidi, øøts tigajttip yø maadsa', wenk yø tyøø'kxti tu'uk tu'uk. ⁴² Nayide'ents idøøon yjaty ku oo'kpi jadigojk yjujkpyøkti. Putsnip ja' midì ñe'kx yiknitajp, øøts midì ñe'kx jadigojk jujkpyøkp niuunits idøøon ja kya'uk'oo'knit. ⁴³ Ja' yiknitajp midì

yiktats'odyump, jøts yjujkyiky midi janchtaxonda'akyim xemikøjxp. Ja' yiknitajp midi' kamøk, midi kamajadakp, jøts yjujkyøkt jadigojk midi janch møk møjaaaw. ⁴⁴ Ja ñe'kx yiknitajp midi yikwin'ejxp jøts midi yiktomp yikmajtsp; jøts ja ne'kx yjujkyøkt jadigojk midi kayik'ejxp, kayiktomp, kayikmajtsp. Pøni jats ja ne'kx midi yik'ejxp jøts y'øøky tyigøy, nay jats ja ne'kx midi kayik'ejxp midi ka'oo'kp kadigøøpy.

⁴⁵ Jabi yide'enxi ja Dios kyajpxy wya'añ: "Ja'ukyikmøøxyi ja mijawyeen jaa'y ja jujky'ajtin, pøn idø'øn Adán'ajt"; ka'ats ja nwindson'ajtim Jesucristo yjade'eni sam ja Adán y'lijty, tyimiyikjujky'ajtpi ja ja'ayi myiñ. ⁴⁶ Jawyeents adøm ja ne'kx tø nyikmø'øymidi midi ya nmøøt'ajtyindip naxwiin; jøtsnim wyinaty ja ne'kx nyikmøø'yindi sam ja nwindson'ajtim ñe'kx t'ijxy ku ja yjujkyiky jadigojk. ⁴⁷ Naxne'eyxi ja Adán ñe'kx'ajt naxwii'ñit jaa'yin; tsajpjotpts ja myiñ ja nwindson'ajtim Jesucristo ñe'kx paty ja jawaani øy. ⁴⁸ Tum jade'ents adøm nne'kx ya naxwiin t'ijxyim sam ja jawyeen jaa'y ñe'kx t'ijxy, midits idø'øn wyinaty yikmø'øymidi jade'ents ja t'ext sam ja nwindson'ajtim ñe'kx. ⁴⁹ Nayide'en sam adøm ya naxwiin t' n'agojnaxym ja midu'ukpi jaa'y, kuts jam tsajpjotp nayide'ents adøm nøjkk nwimbijtyim sam ja nwindson'ajtim t'ixy.

⁵⁰ Yide'en ø migu'uk idø'øn njatijy ku yø ne'kx midi nmøøt'ajtyindip midi xixmyøøt midi ni'jpmjøøt, midi yø'øjip wyinaty twinguwa'jkip ja Dios ma ja amuum ja kyutujk ttanitanit ja jaa'y; midi kataa'ñip, midi oo'kp tigøøpy, ka'ap ja pyaät'aty jøts ja xemikøjxpit jujky'ajtin yikmo'ot. ⁵¹ Ja'ats meets ndukmadoowampy jøts yikxon xnijawidit midi yu'uch, midi amaa'tsk ejtp, midi ka' pøn nugo ajawi tñijawi: Ka'ap adøm niduki'iyi ja o'jkin nbaajtindit; ja'ayi ku tyumdigatst ja ne'kx ku nøjkk ja nwindson'ajtim xnimi'ñim, ⁵² widsukin idø'øn ja tyunit, ku ja puxuux jadigojkyi yjaak'ukyikmadoonit. Winets idø'øn ja oo'kpi yjujkyøktit jadigojk møøt ja ñe'kx midi xemikøjxp myijujky'attip; pønts wyinaty jujky'ajttipnim ja'ats ja ñe'kx tigatstip. ⁵³ Kuwanixi dø'øn tyigatst yø ne'kx midi adøm ya naxwiin nmøøt'ajtyindip, midi amøjip, midi køjxp, midi anuu'kxip; jøts ja nyikmø'øymidi xemikøjxp etp ja agøjxp ku ja kyakixy ni kya'amøji. Jøts adøm wyinaty nmajtstuuptyim ja ne'kx midi oo'kp midi tigøøpy, jøts ja nyikmø'øymidi midi nijuuni ka'oo'kp midi xemikøjxp ejtp. ⁵⁴ Kuts adøm idø'øn wyinaty tø nmajtstuuptyim ja ne'kx midi kajajkp, jøts wyinaty ja ne'kx tø nyikmø'øña'am midi jajkp, jøts ku dø'øn wyinaty ja ne'kx tø nmajtstuuptyim midi oo'kp jøts wyinaty tø nyikmø'øymidi xemikøjxp jujky'atp, jaanims idø'øn ja Dios kyajpxy tyø'øt midi jap jaabyety nøkyijxpy ejtp: "Tø ja o'jkin yikmimajada'aky. ⁵⁵ O'jkin, ¿ma dø'øn ja mdukt'a'ojk? ¿Ma dø'øn ja møk'ajtin tø xyikwingaxi'iky?" ⁵⁶ Ja pøky idø'øn ja o'jkin xukta'oo'kimp, jøts ja møjaa'gyutujk idø'øn ja tyamøj'ajtpy midi ka'uktunip. ⁵⁷ Ndamøja'wampys ja Dios Teety ku ja tø xyikmajada'ajkyindi nwindson'ajtim Jesucristo pyudøjkingøjxp.

⁵⁸ Jade'ents migu'uktøjk idø'øn, møk jøts tu'ugyi ja mwinmaa'ñ jxaakpiktakøjtit jøts ja nwindson'ajtim tyunk xjaakkykyø'øgyojtit; pø mnija'widipxi ku ka' nugo wyindigøydi ja mdunk midi ja nwindson'ajtim mduktuujnidip.

16

Sa ja pudøjkin myukt

¹ Ku xyikmuktit ja pikta'aky midi mdabudøkidip ja abiky kugajp ja migu'uk midi tjanchja'widip ja Dios, yide'en xu'undit sam ø nayide'en tø ndukmadowdi pøn jaty jam Galacia etjotp namyujkidip. ² Kija' idø'øn windominge xpukondu'uttit ja mijuu'ñ pøni wine'en tø mmajada'akti, jøts ja xpøkjø'øktit a'ejxi, jøts wyinaty abaadi xyik'awejnxdit ku ø nnøjkxt. ³ Kuts øts jam wyinaty nnijkyx winets ø wyinaty nguexy ja jaa'y jam Jerusalén pøni pøn mee mwi'ijxpy, jøts øts ja nøky ja nmo'odit jøts ja møøt tyiknøjkxtit ja pudøjkin. ⁴ Pøni paat'ajtiyip jøts ø nnøjkxt, øyts øts ja wyinaty xmøøtnøjkxti.

Ku Pablo tñigajpxy ma jaty ja wyidetwa'añ

⁵ Kuts jam wyinaty nnijkyx ma meets jam, jawyeen ø naxwa'añ jam Macedonia etjotp, jøtsnim øts jam Corinto wyinaty nja'aty. ⁶ Ni kyajaa øts jam yjawi ndaa'ñit ma meets jam, jotmøñ øts jam nyiknaxy ja xuxpyøt jøts mee nayide'en wyinaty x'atskexy ma ø wyinaty nnijkyx. ⁷ Ka' meets idø'øn nugo pojn n'uknaxwa'añ, nmøøtaa'niwyampy meets idø'øn niyjeky pøni yikutujkpy ja Dios. ⁸ Yam øts Efeso kajpkøjxp njaaktaa'niwya'añ kunim Espíritu Santo xøow tpaatt. ⁹ Øy øts idø'øn may ja jaa'y xjami'ekyidi ya Efeso kajpkijxy, jats ja jaa'y nayide'en pøn ø xmadowandip jøts øts ja ndukmado'odit ndukyikyujtit ja nwindson'ajtim Jesucristo yja'.

¹⁰ Pøni ja'tp ja Timoteo jam, m'ejxtibim jøts jotkujk jam ñayjawiyit jøts niti tkadajot-may'oøkt, pø nayi nwindson'ajtimxi yja' ja tyunk'ajtip sam øts. ¹¹ Paty idø'øn ja tum jade'en xkupøktit, jøts jade'en xpudøkidit jøts øts øy tsuj yam xpaatt, pø n'awijxpyxi øts ja yam møøt ja myigu'uk pøn møøt wyidity.

¹² Tøts øts Apolos njanchjaminuu'kxa'aky adøm ja nmigu'uk jøts ja jeexyip tmøøtnijkxy ja migu'ukti pøn jaty meets m'ats'ejxwajniþ, ka'ats ja ixyam inet myajada'akt; jaanim ja ñøjxt ku y'awaþsit.

Ku ja Pablo t'ukyajkni ja kajxpoo'kxin

¹³ Wijyim mnabyikta'agidit jøts ejtp møk ja mjanchja'win xyik'ettit. Yaa'dyøjkin tuki'iyi xmidanidit jøts jotmøk mnabyikta'agidit. ¹⁴ Pøni ti jaty mdundip, tsojkingøjxp pa'ayo'owingøjxp ja xu'undit.

¹⁵ Mnija'widip migu'uktøk ku dø'øn ja Estéfanas møøt ja myigudøjk jawyeen tjanchja'widyi ja Dios kyajpxy y'ayuujk jam Acaya etjotp. Tøts ja ñadyamiyøxyidi jøts ja tpuðøkidit ja jaa'y pøn ja janchja'win tmøøt'ajttip nayide'en. ¹⁶ Pøni jade'ents ja tyundi, nayide'ents mee mbaat'aty mdu'unt, jade'ents ø ndsøky jøts meets ja xmimado'ot jøts ja nayide'en xpudøkidit, nayide'en xu'undit ja jaa'y pøn jaty tundip pøn jaty pudøjkidip. ¹⁷ Tøts idø'øn njanchtajotkujk'atti ja Estéfanas, ja Fortunato jøts ja Acaico ku ja ya tø y'atsmendi jøts ø tø x'atspaatti, ja'ats øts øjts ja pudøjkin xmo'odi jøts meets jade'en myikudanaay. ¹⁸ Tøts idø'øn ja xjanchyikjot'amøkpøkti sam ja jam nayide'en myikjot'amøkpøjkidø. Ngajxajkimp idø'øn ja yjade'embj jaa'dyi.

¹⁹ Mdanigaxidip ja kajxpoo'kxin ja janchja'wibi jaa'dyi pøn kugajp'ajttip Asia etjotp. Mjanchkajxpoo'kxidip ja Aquila jøts ja Priscila, jøts nayide'en niduki'iyi ja jaa'dyi midi xuminamyujkidip ja' tyøjkjotpti, pøn nayide'en tø tjanchjawidi ja Dios sam meets. ²⁰ Nayide'ents mgajxpøø'kxyidi pøn jaty yam tø tjanchjawidi ja Dios. Nagyajxpoo'kxidi niduki'iyi xem yam sam ja Dios ttsøky'aty.

²¹ Pøn idø'øn Pablo'ajtp, øts idø'øn kø'øm njaapy ya'at nøky jøts ndanigaxidi ya'atpi kajxpoo'kxin.

²² Pøni ka' pøn tkupiky jøts tkatsøky ja nwindson'ajtim Jesucristo, wan wyinaty kø'øm ttani'ixy. iWingonip ja nwindson'ajtim!

²³ Mmo'ojidip ja nwindson'ajtim ja kyunuu'kxin. ²⁴ Meets niduki'iyi ndanigajxtip ja tsojkin ja pa'ayo'owin Cristo Jesús køjxp. Jade'en idø'øn ja yjatt.

JA MYĪMAJTSKPI NØKY MIDI JA PABLO TYANĪGAJX JA CORINTI JAA'Y

Ku ja Pablo tnijayi ja janchja'wibi pøn jam Corinto

¹ Øts idø'on Pablo'ajtp. Tø øts ja Dios Teety xamidsøky jøts ø ngudanit ja Jesucristo. Jøts nayide'en ja Timoteo midi øts møøt ya'at nøky nja'ay jøts øøts ndanigaxi pøn jaty ja Dios Teety ja'ajtidip jam Corinti, jøts nayide'en pøn jaty jam Acaya etjotp tsinaadyip. ² Paatti kupøjkti ja Dios Teety jøts ja nwindson'ajtim Jesucristo kyunuu'kxin jøts ja yjotkujk'ajtin.

Sq Pablo y'ayo'ombaajty

³ Tkajxajkyindi ja Dios midi tyeety'ajtpy ja nwindson'ajtim Jesucristo, jabi jade'enxi dø'on ja tyeety'ajtin tyiknigaxi'iky ku adøm x'ayo'ijxyindi, nijuuni xka'ixmajchindi, ejtp xkajpxjot'amøjkandi Dios'ajtingøjxp. ⁴ Ja'agøjxp ja Dios xkajpxjot'amøjkandi pøni sa jaty nidu'uk nidu'uk n'ayo'ombaajtyindi jøts jade'en nnija'wandit sudso dø'on ja nmigu'uk nayide'en ngajpxjot'amøjkimyandit sam ja Dios tø xpudøjkandi. ⁵ Nayide'en sam adøm kajaa ngu'ayo'ombaajta'andi ja Cristo yja', kajats ja nayide'en ja jot'amøkpøjkin xmø'øyim. ⁶ Ixyamts øøts nyikjemduñ ja'agøjxp ku meets ndukmadøy ja nitsoojkin ayuujk jøts ku meets nayide'en ngajpxjot'amøjkidi. Ku øøts yø'øbi ayo'on ndanaxy, ja Dios øts tø xkajpxjot'amøjki. Nayi meets m'øy'ajtingøjxp øøts idø'on jade'en tø njaty jøts meets nduknijawit sam nayide'en ja Dios mbudøkiyidit ku nay yø'øbi ayo'on wyinaty xpaatti. ⁷ Njantyimyjøp'ijxy'ajtpy øøts idø'on jøts meets nayide'en ja Dios myikjotkujk'atyyidit sam øøts, øy idø'on nayide'en mja'ayo'ombaatti.

⁸ Meets migu'uktøjkti, jade'en øøts ndsøky jøts meets waani x'ext xnijawit sa øøts idø'on jam ja ayo'on nyiknaxxy Asia. Yikxon øøts møk ja ayo'on jam n'ijxy, niti awejxin niti jøp'eixin øø wyinaty nga'ukmøøt'ajtni, niti majadaajkints øøts, ja o'jkin yjøp'am øøts wyinatyni. ⁹ Jade'ents øøts idø'on ojts jam nnayjawiyi sam ja jaa'dyi pøn ja xyøøw tø yiktanimacho'owiñi jøts ja o'jkin tpaattit. Øyts idø'on ja ne'egi ku jade'en yjajty, jabi jaanimxi øts ja Dios idø'on tuki'iyi nmibøkøjxi jøts ku oo'kpibaat ja tyikjujkyiky. Jøts øøts jade'en nja'gyujkiyi'ñ ku adøm niti kø'øm xkama'ayim. ¹⁰ Ja' øøts idø'on x'axajtuik x'agø'ødujk jøts øøts jade'en ja o'jkin xkadukpaajty, jøts nayide'en xyiknits'o'ok'ejtint ku ja o'jkin wyinaty xmimajada'akwa'añim. ¹¹ Nayide'en meets idø'on ja mdsapkaaky tyumi ja'agøjxpts adøm idø'on ni'amuki ngajxajkindit ja Dios jøts øøts ja pudøjkin xmøy'ett.

Tigøjxp idø'on ja Pablo ojts kyanijky Corinto

¹² Ja'agøjxp øøts n'aaw njooit yjotkujk'aty ku øøts nnijawi ku øøts o madsøø øy tsuj tø nyiknaxy ja ndsinaa'yin, niti taay. Tu'ugyi øøts ja Dios ja y'øy'ajtin tø xabudøki, ka'ap øøts ja ngø'øm wijy'ajtin tø myajada'aky. Meets windumxi dø'on øøts ja ndsinaa'yin øy tø nyiknaxy. ¹³ Jøts nayide'en ja nøky midi meets tø ndanigaxi, niti taay ja tkamøøt'aty, mibøkøxti ja'. ¹⁴ N'awijxy'ajtpy øøts ku meets ja njaa'y'ajtin xkupøjkit tuki'iyi sam ixja waani tø xkupø'okwa'andi, jøts jade'en nnadyajotkujk'ajtandit nixem niyam ku wyinaty myeni jadigojk ja nwindson'ajtim Jesucristo.

¹⁵ Ja'ayi ndamøj'ajtpy ku meets idø'on tø xkupøjkni, jøts ø nwa'añ ku meets majtsk ojk n'ats'ejxwa'añ jøts jade'en n'atsyikjotkujk'attit. ¹⁶ Ja'agøjxpts ndanibiktaajkiyi'ñ jøts ku øts ya nmiñ Macedonia, myijawyeen meets n'uk'ext jøts jadigojk ku nwimbejtnit. Wanik meets xpudøkit jøts øøts njä'tt jam Judea. ¹⁷ ¿Ka'ap øts idø'on ja ndejint yikxon ndy-imdyanibiktaajkiyi'ñ ku øts øjts jam nga'uknøjkxni? ¿Sa tø mwa'andi, jade'en øts idø'on xijy sam muum ja jaa'y ja yja' nugo tyikmajada'aky ku ja nugo t'ukupiky jøts ja ka' t'ukpaduni? ¹⁸ Pø ka'axi. Wa'ats ja Dios tnijawi ku ka'ap øts jade'en nugo ndaay'aty. ¹⁹ Jabi ka'axi ja Dios U'nk Jesucristo tyaay'aty midi øøts ja yja' ngajpxwa'kxøø møøt Silvano jøts Timoteo, ma meets jam. Pyadungijxy ja y'ayuujk ja', ²⁰ jøts ja tuki'iyi tmdanaagyøjxp pøni ti jaty ja Dios Teety ñi'adso'owip. Ja'agøjxpxi ja xyøøw ja yikajpxpaaty ku adøm Dios Teety nmøja'wa'am ngunuu'kxyja'wa'am ja myøj'ajtin jøts nwa'añim janch tiigyajpxy idø'on yø', nwindson'ajtim Jesucristo køjxp. ²¹ Nayi Dios Teetyxi adøm idø'on xukmøøt'ejtindip ja Cristo jøts øøts ja tø xjibiky jøts øøts ja jade'en ngajpxwa'kxat ja yja'. ²² Tø nayide'en ja Espiritu Santo xmø'øyim midi ejxpajt'ajtp ku adøm ja xja'ajtyim, jøts jade'en nnija'windit ku xmøy'ukwa'añindi ja jujky'ajtin midi xemikøjxp'etp.

²³ Ñija'widyaapy ja Dios ku meets nga'uknøjkxni jade'engøjxp ku meets ka' nyikjot-may'ooktøkiwya'añ ku møk nwindso'ødyit. Pøni ka'ats yjanchjade'eni, pø jats øts idø'on ja Dios kø'øm xiidyu'unt. ²⁴ Ku meets wyinaty nninijky, ja xondaajkin ja øy'ajtin meets

ndaninøjkwampy. Ka'ap meets nda'aguwanıwya'añ ja janchja'win pø møkxi meets ja xmøøt'ajtıni.

2

¹Jabi ja'agøjpxpi meets idø'øn tø nga'ukninøjkxni ku meets nugo n'atsyikjotmay'oøktøkit. ²Ja ku meets n'atsyikjotmadyøkit, ¿pønts øts idø'øn ndajotkujk'atp? ¿Kidi meedsip? Yamts meets wyinaty kø'øm tø nyikjotmadyøki. ³Patyxi meets tø nnıjayı jawyeen jøts jam tuki'ıyi xyik'øydıt xyikpaadıt ku øts jam wyinaty nja'aty jøts meets xaxonda'akt. Jabi jade'enxi nwa'añ ku mee mxondaqmit ku meets x'ext jøts ku øts jotkujk. ⁴Ku meets ja'abi nøky ndanija'yıyıñ, janchjotmay'oo'kp øts wyinaty, ja ya'axıı ja jı'yıı øts idø'øn wyinaty xımıjadakp ku meets yjawı ja jaa'y myıkwınmaa'nmya'atwa'añıdı jøts ø xkagupøktıt. Ka' meets nayıde'en nyikjotmay'oøkwa'añ, ja'axı øts idø'øn nanky'ejxwajınp mabaat meets idø'øn ndsøky nba'ayøı, patyxi meets idø'øn ngajpxwııy.

Jade'en pyaqt'atıı jøts yıkmaa'kxukt pøn tø tyundıgøı

⁵Ja jaa'yu'nk pøn øts idø'øn tø x'ukyikjotmadyøki ka'ap øts ja nadyu'uk tø xyık'ayøı jabi nıxem nıyaxmi meets idø'øn ndejınt wınaagın tø mbaagtıııyıdı nayja'abi jotmay. Ka'ap ø nwa'añ ku nıjum. ⁶Ka'ap øts ja møk n'ukwındsø'øwıanı pøn idø'øn tø tyundıgøı. Jabi tøxi meets ja nıjum ne'egi kø'øm xkastıgımøøñı. ⁷Jade'en idø'øn ne'egi pyaqt'atıı jøts meets ja xmaa'kxukıt, kajpxjot'amøkıdı, ja kuts ja jotmay myııjadaknıyıt jøts jade'en ja chınaa'yın tyıkwındıgøøñıt. ⁸Paty meets ıxyam ja may'ajt n'amıdøı jøts jadıgøjk ja tsojkın ja pa'ayo'owın xmo'odıt. ⁹Tø meets ya'atpı kajpxı ya'atpı ayuujk jawyeen ndanııjayı ja'agøjxp jøts ø n'ext nnıjawıt pøni xjanch'ukpaduujııdı øts idø'øn ja ngutujk. ¹⁰Paty xnıjawıdı, pøni pøn meets mmee'kxpy, nayıde'ents øts ja maa'kxin ja nmøømyı. Pøni tø øts idø'øn tıgıtı nmee'kxy, ja'agøjxpts øts jade'en tø nduñ ku mee n'ayo'ıxy, y'ıjpxı nııja'wııp ja Cristo. ¹¹Jøts jade'en o tıgıtı tkadamøj'att ja mıku'wındsøn Satanás, jabi nnıjı'a'wampxı adøm wa'ats ku ja o tıgıtı tamıbøki tamı'ejxi.

Ku ja Pablo ttajotmay'øøky ja Tito jam Troas

¹²Ku nja'ıty jam Troas jam kajpjotp, nugo øts ndunk jam tımyı'ıty øı madsoo jøts øts ja Cristo yja' ngajpxwa'kxıt. ¹³Yamts øts wyınaty tø nja'uktındsøo'mı, kumi ka'ats øts øı njotkujk'aty ja'agøjxp ku øts ja Tito jam ngapaajty, adøm ja nmıgu'uk, patyts øts jam øjts ndso'ongøjmi jøts øts ojts nnøjxni jam Macedonia.

Ku ja Cristo møøt nmajadaq'ııtyııdı

¹⁴Nmøja'wımp ngunuu'kxyja'wımp ja Dios Teety ku ja ejtp xyıkmajadaajkyı tu'ugyı møøt ja Cristo, jøts ja kyajpxy jøts ja y'ayuujk ja xukajpxwa'kxyıı øı magama. ¹⁵Y'øıja'wııp chuja'wııp ja Dios Teety pøn ja Cristo møøt y'ıty jøts ja yja' tkajpxwa'kxi. ¹⁶Øı ja magama ja y'ıxpøjkın wyıdıty jam muum tkamıbøkti, o'jkın tıgø'øıyın ja yıktatııdyu'undııp. Jøts muum tjanchjawıdı, ja'ats ja tyajujky'attııp xemıkøjxp. ¿Pønts idø'øn yø'øbi tunk nugo nııyøjkk tyımy'uknııjajtp? ¹⁷Jabi ka'axı øøts ja nugo ndameembıyıkı tø øts ja Dios kyajpxy ngajpxwa'kxi sam muum y'adø'øtstı, uk ka'baat ka'pxy tııgajpxtı tum wımbet ja tıııadya'aktı. Ka'ats øøts jade'en n'adı'ıch, tıı janch øøts ja nnıgajpxy pø tøxi øøts Dios kø'øm xkexy jøts øøts kyajpxy ja ngajpxwa'kxıt Cristo pyudøjkingøjxp øı madsoo jam Dios wyııgujkp.

3

Ku ja Dios ja chojkın ja pya'ayo'owın jadıgøjk tyıktso'ondaajkyı Jesucristo køjxp

¹¿Sa meets idø'øn yø xja'gyıki ku øøts jade'en nwa'añ? ¿Kø'øm øøts idø'øn xııy nnagya-xwa'akwa'añı sam ja muum ma ttııdı pøn ja ıxpøjkın wenk tyajktııp? ¿Ja ejxpajın øts idø'øn kwanı ndıımyøøt'atp jøts meets yø n'ıxpøjkın xııbøktıt? ²Ka' yjadıni, jabi meedsıı myıknıgaxı'ıkyı pøni sa øts idø'øn ja ndunkjøøjı y'øıı. Jade'en ja nıgaxı'ıkyı ku meets ja Dios yja' tø xııbøjki jøts øı ja pøn t'ext tıııjawıt sa dø'øn ja mdsınag'yın tø tyıgatstı. ³Kø'ømxi ja Cristo jade'en tø mdanıbıktaagııyıdı jøts m'ejxpajt'attıt jøts øts ja ndunk jade'en wyııgaxı'ıkyı. Jabi Dıosxı dø'øm kø'øm ja y'Espırıtu Santo tø tyakı jøts ja y'ejxpajt'att ja'agøjxpts ja' kyakudıgøı. Jawaanı møj ja', mıdı anmıja'wıınjotp ja Dios pyıktakpy jøts ka'ap ne'egi ja jawyeembı kutujk mıdı Moısés kyøxaay tsaagøjxp.

⁴Sa jaty øø nwa'añ tıı yø' janch yø', wa'ats øøts nnııjawı jøts ku øøts ja Dios Teety pyudøjkın amuum xııøıy Cristo køjxp. ⁵Ka'ap øøts kø'øm nnankmyajada'agıııyı, ja Dios wyııgujkpı dø'øn chøøñ ja møk'ajın jøts øøts ja øıııı ndu'unt. ⁶Jaa ku øøts ja jeexyıp tø xkamø'øı ja møk'ajın sudsoıts øøts idø'øn jeexyıp nnıgajpxy sa ja Dios chojkın ja pya'ayo'owın jadıgøjk tıııkyı'ıxyı sa ja naxwıı'ñıt jaa'y nııso'øk'attıt. Ka'ap ja tıınaa'yın yıkpaaty ku nbadıngøjxınt tuki'ıyı ja Moısés kyutujk, ja Espırıtu Santøıı dø'øn tıııkyı'ejxııp ja øııııyııp ja

omyadya'aky sudso yikpaaty ja jujky'ajtin xemikøjxp. Ja o'jkin tigø'øyin pyatpy ja anmija'win ku ja Moisés kyutujk ngabadungøjxint yam ja Espiritu Santo yja' tyuomyikjujky'aty.

⁷ Jade'en idø'øn ja Moisés kyutujk ja myø'ajtin kyaxi'iky mididi tsaagøjxp yikjaay ku jaaju'uk agujkp yikmøø, janch tøø'kxp tsamamp idø'øn ja wyeen y'aaw. Jøts janch win'oo'ktip idø'øn ja myigugajp israelit jaa'y ku ja yjayik'ejxwa'añ. Waani dø'øn ja y'aju'uk møj y'atskaxi'iky, pojin ja ñaxkojmi. Sats idø'øn ja janchtyimyoj y'atsmiin ja'abi kutujk mididi anmija'win ja o'jkin tyukunpiky'ajtpy. ⁸ Kuts ja øgyajpxy ja ømyadya'aky ka'ap ja tmi'abaaty, pø ka'axi ja winmaa'ñ myajada'aky mabaat ja yja'aty ja myø'ajtin ja y'ø'ajtin mididi ja Espiritu Santo xuk'ejximp xuknija'wimp. ⁹ Sats idø'øn ja kutujk janch møj, yam ja tjayikudigøj ja anmija'win, jdsdøts idø'øn ja Dios y'øgyajpxy y'ømyadya'aky jawaani kyidyim'y'ukmøjiti mididi adøm ja xagupøjkimp! ¹⁰ Jabi ka'axi ja Moisés kyutujk møøt ñabyaadyi ja Dios y'øgyajpxy. ¹¹ Øyi dø'øn ja kutujk møj tø yjamiñ ka'ap ja Dios y'øgyajpxy ja twinajxi mididi ejtp xemikøjxp.

¹² Ja'agøjxp øøts ja njøp'ijxy'aty, paty øøts agujk jotkujk ja Dios yja' nnigajpxyi, ¹³ jøts ka'ap y'ukpaat'ajtniyi jøts øøts ndu'unt nayide'en sam ja Moisés ttuun ku ja y'ijty ñawynjuuxyiyi jøts jade'en ja myigugajp tka'ejxtit ku ja y'aju'uk tuda'aky tyigøøñi. ¹⁴ Ja israelit jaa'y ka'ap ja tja'gyukidi tigøjxp idø'øn ja Dios ttanibiktaagi ja kutujk mididi ja Moisés yikmøø. Ni ixymbaat ja tkaja'gyukidinim ku ja Dios ñøky tkajpxidi. Jaanim ja ja'gyukin ja tpaattit ku ja Cristo yja' tkupøjkidit. ¹⁵ Yjaakjakajpxidibimts ja Moisés kyutujk ja'adi, jade'en ja tjøp'ejxti jøts ja ñitsø'ok'attit ku ja tpadungøxtit. ¹⁶ Kuuyidsik øy pøngapøn tkupøktit ja nwindsøn'ajtim Jesucristo jatyits ja pyøky ja ñiwa'adsidit jøts ja wa'ats tuki'iyi tja'gyukigyøxtit. ¹⁷ Ja nwindsøn'ajtimxi tmøøt'ajtp ja jujky'ajtin jøts ja ja'gyukin, pønts ja nwindsøn'ajtim tjanchja'widip ka'ap ja Moisés kyutujk ja y'ukmimajadaknyidit, ni kya'tukjujky'ajtnidit ja pøky agujkpy. ¹⁸ Paty adøm ja ja'gyukin nmøøt'ajtna'andi ku ja nwindsøn'ajtim yikmibiky. Kuts ja ejtp njotmay'ajtnidit ja y'ø'ajtin ja myø'ajtin, nay ja'ats ñanky'ejxamp xjats adøm jade'en njajtnant sam ja nwindsøn'ajtim. Yjujky'ajtingøjxp idø'øn ja jade'en xpuðøjka'am.

4

¹ Paty øøts idø'øn nijuuni ngadawindsuun ja ndunkjøøjp mididi øøts ja Dios y'ø'ajtingøjxp tø xanibiktaagi. ² Jagam jixkø'øm øøts idø'øn nbikta'aky mididi amaa'tsk mididi tsø'odyuim yiktump. Ka'ap øøts n'ijxy ngøy jøts o pøngapøn nwindaa'y'att. Ni ja Dios øøts ja y'ayuujk ngakajpxma'jti. Ja tyiiby ja yjanchpi øøts idø'øn ja'ayi nnigajpxxy, jøts jade'en nipøn jaa'y kyawa'ant jam Dios wyingujkp ku øøts n'ayuujk kyatiyi. ³ Ku jaa winaagindi pøn tkaja'gyukidip ja nitsoojkin ayuujk mididi øø ngajpxwa'kxpy, ja kyudigø'øyin idø'øn ja kø'øm y'ixaawyandip. ⁴ Ku ja wyinaty kø'øm tkajanchjawidi, ja miku'windsønts idø'øn ja tø yikwinajpniyidi pøn ja'ayi ya naxwiin ne'egi diosja'widip, jøts jade'en tkapaattit ja kudøø'kxaagi ja kujajtaagi mididi yajkpy ja øgyajpxy ja ømyadya'aky ku ja Cristo y'ø'ajtin myø'ajtin yiknimadya'aky. Ja Cristos tnanky'ejxip ja Dios Teety pøn y'agojmax'ajtpy. ⁵ Ku øøts ngajpxwa'kxy ka'ap øøts ngø'øm ja' nnigajpxy, ja Jesucristoxi øøts ja wyindsøn'ajtin ngajpxwa'kxip, jøts øøts jade'en nyikwimbejtnit ja y'ø'ajtin mididi tø tyaky, ku meets nbudøki ja' chojkingøjxp. ⁶ Jabi nay ja'abi Dios Teetyxi dø'øn mididi ja jaj ja tøø'kx tyiktsø'ondaajk, nay ja' adøm tø xmoø'øyindi ja kujajtaagi ja kudøø'kxaagi jøts n'ejxindit nnija'windit sa dø'øn ja y'ø'ajtin myøji mididi ja Jesucristo ñanky'ejxip.

Janchja'wingøjxp ja tsinaa'y'in nyiknaxjyim

⁷ Dios wyingujkp ja chøøñ ja'abi kujaj'ajtin kudøø'kx'ajtin mididi niwindem xøøw tkamøøt'ajtp ja kudigø'øyin, ja' øøts nmøøt'ajtpy njujky'ajtingøjxp. Ka'ap øøts ngø'øm møk'ajtin nyiktuñ, ja Diosxi myøk'ajtin idø'øn jade'en tyiknigaxø'jlp. ⁸ Øy øøts tsep agujkp aki agujkp ja njujky'ajtin yjanaxy, niwindem xøøw øøts ja nnøø' ja nduu' kya'aduky; øy øø njamay njatay sudso øø nyiknaxt, nbatpy øøts ja winmaa'ñ sudso tyuu'baat tyuu'wetst. ⁹ Øy øø njayikjemduñ njayikteduñ, ka'ap øøts ja Dios x'ixmach; øy øøts ja nmidsep xjatekpya'an'atwa'añ, ka'ap øøts ja tu'ugyi xmimajada'aky. ¹⁰ Winjaa windsojk øøts ja jaa'y ja o'jkin xjadukpaatwa'añ sam ja Jesús yjajty. Nay ja'ayi øø kø'øm xpuðøjkip jøts jade'en tyiknigaxi'iky ku ja ya xemikøjxp yjujky'aty. ¹¹ Pøn jaty øøts møøt nbaduñ ja Jesús yja', nay ja'agøjxp øøts ja o'jkin jabom jabom x'ijxy xkøy, ja'agøjxp øøts ja xka'ixmach jøts jade'en tyiknigaxø'økt ja yjujky'ajtin øøts nnikøjxp. ¹² Øy øøts ja o'jkin xumijapaatwan'ity xumijamajada'akwan'ity, ja xemikøjxpit jujky'ajtin meets ne'egi mbaajtp m'ejxip.

¹³ Njanchja'wip øøts nayide'en ku yide'en wya'añ ja Salmos nøky: "Paty øø nnigajpxy ku njanchjawi." ¹⁴ Nnija'wip øøts ku ja Dios Teety tyikjujky'ijky ja Jesús, nayide'ents adøm ja møøt xyikjujky'øjkit, jøts jam nnøjxint niduki'iyi ja' wyingujkp. ¹⁵ Mididi øø tø ngu'ayowi ja'agøjxp øøts idø'øn ja ngupiky jøts meets ja øy'ajtin xpaatt, mayts ja jaa'y Cristo køjxp

tpaattit ja Dios kyunuu'kxin ja Dios y'oy'ajtin jøts may nayide'en pøn ttukmøjawidip pøn ttukunuu'kxyjawidip ja Dios ja'agøjxp ku ja tkaxa'akti.

¹⁶ Ja'agøjxp øøts idø'øn ngadawindsuun. Øy øøts ja nne'kx yjaga'ukmajadakni, mowenip kajaajip øøts ja njanchja'win jabom jabom. ¹⁷ Yø ya'it ayo'on waani yø ñaxkøjy, ka'ap yø jeky tya'a'ni; jøts yø' oy'ajtin xemikøjxp ne'egi xukpaajtimp ma ja Dios. ¹⁸ Jabi ka'axi yik'ixa'ay midu ya naxwiin yik'ejxp, ja Dios y'oy'ajtin ne'egi yik'ixaapy midu kagaxø'kp. Ja pikta'aky midu kaxø'kp myøøt'ajtpy ja' ja kudigø'øyin. Ja y'ajtin midu kayik'ejxp ka'ap ja y'aats ja kyojpk ja kyudigøy.

5

¹ Nnija'windip adøm ku ja nne'kx kyudigø'øyim midu kajajpk sam tu'uk ja tøjk kyudigøy naxwiin, jap adøm ja Dios tø xadanibiktaajkindi tu'uk ja tsinaadyaajk tsajpøtpy. Etp ja xemikøjxp, jabi kidi naxwiin'it jaa'yipxi ja tø tyik'øyi. ² Janch jade'en idø'øn yjaty ku adøm nne'kx ja yjujky'ajtin tyiknaxy ya, ka'ap adøm n'øyja'wam, winjaa windsojpk adøm nnojkwa'añim ma ja tsinaadyaajk ja Dios tø xadanibiktaajka'am, ³ ma adøm n'anmija'win yiknitanaa'yim. ⁴ Yø ne'kx midu nmijujky'ajtyindip ya naxwiin ka'ap yø øy ti xuk'øjja'wam, jøts yiktsojpk ja tsinaadyaajk midu ja Dios tø xanibiktaajkindi, yjagayikwa'añ ja o'jkin. Yø naxwiin'it tsinaa'yin adøm idø'øn njadayiktigatswa'añimp ja jemchinaa'yin. ⁵ Ja Dios idø'øn køøm tø xanibiktaajkindi jøts tø xuktatøjkindi ja Espiritu Santo midu ejxpajt'ajtp ku adøm ja nyikmø'øyindit midu ja yik'awijxpy.

⁶ Jade'ents adøm idø'øn ndajotkujky'ajtant, jøts nnija'windip ku ya yø nne'kx nmijujky'ajtyindinim ka'ap adøm ja tsinaadyaajk nbaajtyindinim. Ka'anim adøm idø'øn ndyimyja'atyim ma dø'øn ja nwindson'ajtim jam. ⁷ Janchja'wingøjxp adøm idø'øn nmøøt'ajtant ja jøp'ejxin øy ja njaga'ijxyindi. ⁸ Ka'ap ja o'jkin tigø'øyin ndsø'jkandit. Jotkujk idø'øn adøm njøp'ejxindit ja o'jkin ku wyinat xpaat'ajtyindi jøts nnojkxindit jap ma ja nwindson'ajtim møøt n'ejtint. ⁹ Paty adøm idø'øn øy madsoo nwindson'ajka'ant ja nwindson'ajtim wan ne'kxkøjxp wan anmija'wingøjxp. ¹⁰ Jabi kuwganixi ja Cristo tyi'idyu'lunt jøts jade'en nyikmø'øyindit midu xpaat'ajtyindip nidu'uk nidu'uk pøni sa wyinaty ja njujky'ajtin ya tø nyiknaxjyindi.

Ja kajpxy ja madya'aky midu ñigajpxpy sa jadigojpk møøt nnamyajyint ja Dios

¹¹ Ja'agøjxp ku øø nnijawi sa ja nwindson'ajtim yikmøjawit yikunuu'kxyjawit y'oy'ajtingøjxp paty øøts ja jaa'y ndukja'gyukiwyanguixy ku øøts tyy janch ja kyajpxy ja y'ayuujk nnigajpxy. Nija'wip ja Dios sa øøts ja njaa'y'aty, njøp'ijxpy øøts jøts meets nayide'en xja'gyukit. ¹² Ka'ap øø køøm nnay'agajpxyiyi, ja ja'gyukinxi meets idø'øn ndukmøøt'atwampy jøts jotkuk mnayjawi'idit ku meets ngawindaayi. Jøts jade'en agujk jotkujk x'adsojimbettit ja jaa'y pøn y'anmija'win yjamøøt'ajtpy. ¹³ Pøni nugo øøts ndyimyajpxy pøni nugo øøts ndyimy'adi'ich, Dios ja tu'ugyi tnja'wip; pøni øyts, pøni tyts, pøni ka'px øø nnigajpxy ja yja', meets ja mda'oy'atp. ¹⁴ Ja Cristo chojkingøjxp pya'ayo'owingøjxp øøts idø'øn ja ndunk ngamajtsu'uty jaa ku øøts ndyimyjanchjawi ku niduki'iyi tø xku'o'jkindi jøts ka' n'uknijujky'ajtna'ant ja pøky. ¹⁵ Paty ja Cristo tø xku'o'jkindi jøts pøn jujky'ajttip ka'ap ja køøm t'ukøjø'omit'ajtni ja chinaa'yin, ja Cristo ja ñijujky'ajtnidip pøn ja ojts kyujujkpyøkiyidi jadigojpk. ¹⁶ Paty øøts jade'en nga'uk'abaxni pøni sa nidu'uk nidu'uk ja chinaa'yin tyiknaxy; Cristo paat øøts y'ijty n'abexy midu øø nga'øyja'wip ja yja', ixyam ka'ap øøts ja'abi winmaa'n n'ukyiktuni. ¹⁷ Jade'ents idø'øn, pøn ja Cristo møøt y'ity, jemyjaa'y ja'; ja tigøy winmaa'n midu y'ijty nmøøt'ajtyindip ka'ap ja y'uktuni, tum ja yjembyi dø'øn tø nbabøjknandi. ¹⁸ Kyø'ømdunkjøøjpp ja Dios Teety jade'en tyumpy Cristo køjxp jøts ja møøt nnamyajya'ant. Jøts øøts ja ndunk tø xmø'øy ku niduki'iyi ja jaa'y ja Dios møøt ñamya'a'ñiyit. ¹⁹ Yide'en idø'øn nbiktaajkint, ja Cristo køjxp idø'øn ja Dios Teety niduki'iyi ja naxwiin'it jaa'y møøt ñamyaawya'aniyi. Ka'ap ja pøky tmøjpkta'aky. Jøts øøts xanipijky ya'atpi øy'ajtin. ²⁰ Paty meets xnijawit ku øøts ja Cristo xyikugajpxy'aty, sam idø'øn ja Dios Teety køøm jeexyip meets mminuu'kxa'agyiyi. Paty øøts idø'øn yide'en n'ane'emy ku meets idø'øn ja Dios ja mdsojkin xmøøgyøxt. ²¹ Niti pøky idø'øn ja Cristo tkamøøt'ajty xjats ja Dios Teety tyimñayide'en ja ttuuñ sam ja møj pøkyjaa'y yiktuñim, jøts nyikupøjkindit sam ja Dios Teety ttsøky ku ja Cristo møøt n'ejtint.

6

¹ Jade'ents migu'uktøjk idø'øndi, niduki'iyi niwine'en adøm ndunk'ajtyindi ja Dios yja', n'amidøøpy meets jøts kidi nugo ja Dios y'oy'ajtin xyikwindigøjyidi midu ja tø mduk'ijxyidi midu ja tø mduknija'wiyidi. ² Jabi jade'enxi ja køøm wya'añ ñøkyijxpy: Ku ja xøøw ja jumø't tpaajty nmadoow øts ja mji'iyin ja myajxin; jøts ku ja yiknitso'ok'ajtin tpaajty winets me nbudøjkiyi'ñ.

ixyam idø'øn ja mxøøw ja mjumøjt tø yja'tni jøts ja myiknitso'ok'ajtin tø tpatni.

³ Øy øøts idø'øn ja ndsinaa'yin nyiknaxy jøts øøts jade'en ja ndunkjøøjp nipøn xkada'abaxt. ⁴ Jade'enxi øøts idø'øn ne'egi nyiknigaxø'økwa'añ ku øøts ja Dios nmiduñ, tuda'aky øøts ngupiky'aty tuki'iyi ja ayo'on; ⁵ tø øø nyiktsumy nyikwøpy; tø øøts ja jaa'y namay xamuky, møk øøts ja ndunk nyiknaxy kunim øøts ngø' ndeky kya'ukmajadakni; kawinaak tsuu øøts tø ngamaa'y tø nga'ity, ayuu øøts kawinaak xøøw tø nyiknaxy. ⁶ Njujky'ajtingøjxp øøts nyiknigaxi'iky ku øøts ja Dios nmiduñ. Jøts jade'en kyaxi'iky ku øøts ja Dios y'ixpøjkin ka'pxy nnija'wiyi jøts øøts nduda'akya'y'aty. Tø øøts n'øyjaa'y'aty jøts tø øøts ja Espiritu Santo yja' nyiknigaxø'kmi jøts nayide'en øøts ja tsojkin ja pa'ayo'owin øy pøngapøn tø nmø'øy. ⁷ Ja tiy'ajtin ja janch'ajtin øøts tø nmøøt'aty, jøts ejtp øøts ja Dios ja myøk'ajtin xa'agø'duky xa'axajtuky. Ja ødyu'unin ja tiidyu'unin øøts tø nyiktuñ ku øøts ja Dios yja' tø nyikyø'øyi jøts ku øøts ja y'ayuujk nmitanaa'miyi. ⁸ Juunjaty øø nyikajxa'aky jøts nay jaayi øøts nyikpagajpxy. Øy øøts jaayi n'ukyiknimadya'aky jøts nay jaayi øøts wenk n'ukyiknimadyaknimi. Ja øøts juunjaty nyiknøjmi ku øøts nugo ndaayi jøts nay jaayi wyangojmidi kuk øøts ja y'øybi tyiiby' nnigajpxy. ⁹ Juunjaty øøts ngayik'ejxkapy jøts nay jaayi øøts nyik'ejxkampi; ja øøts ja jaa'y juunjaty ja o'jkin xukpaatwa'añ, jajujky'ajtp øøts idø'øn jade'en. Yikastigimøøpy øøts, ka'ap øø n'øøky. ¹⁰ Øy øøts njamay njatajy, xondakp øø nnayjawiyi; ayooði jaa'y øøts, ja øy'ajtints øøts nyajkpy; øy øøts niti njagamøødi, jade'en øø nnayjawiyi ejximdam øøts jeexyip tuki'iyi ndyimyøøt'ajtkøjxni.

¹¹ Meets migu'uktøjkti, tiy'ajtingøjxp meets tø ndamigajpxy; tuki'iyi meets ja ndsojkin ja nba'ayo'owin tø ndamay'aty. ¹² Øyimik idø'øn wine'enin ngondukt nbøktukt øts ja ndsojkin øts ja nba'ayo'owin. Meets idø'øn jade'en yjawi ne'egi mdumpy. ¹³ Sam ja u'nkteety ja myajnk tmgajpxy nayide'en meets nmigajpxwami ku ja mdsojkin ku ja mba'ayo'owin niwine'en xka'ama'at'attit. Tundi nayide'en waani sam øts tø nnajstuni.

Adøm nikøjxp ja Dios yjujky'ajtyim

¹⁴ Kidi mjujky'ajtin xyiknaxti møøt pøn tkajanchja'widip ja Dios, jabi nijuunixi kyanamyayidit ja tiidyu'unin møøt ja tundigø'øyin, sam ja kudøø'kx'ajtin møøt ja kugøøts'ajtin. ¹⁵ ¿Sudso dø'øn ja Cristo yja' møøt ñamyayidit ja miku' yja'? ¿Uk sudso ja janchja'wibi jaa'y møøt ñamyigu'ukwa'aniyit pøn midsepwajniyiy? ¹⁶ Ka'ap ja yjujky'ajtin tyiknaxti tu'ugyi ja Dios Teety møøt ja dios midi kø'øm yiktsajstip. Ka'ap adøm njade'enidi jabi kø'ømx i Dios wyinaa'ñ yide'en:

Pøni ma ja chøønidi jam øts ja nmøøtjujky'attit,
jøts pøni mid i ñøjkxtip ejtp øts ja njamyøøt'attit;
øts ja xdios'attip,

jøts øts njaa'y ja'adi.

¹⁷ Paty ja yide'en yjaakwaa'ñ:

Nanky'abikyidi,
kidi ja kya'øybi xyiktundi;
jøts jade'en ngupøktit,

¹⁸ øts meets xteety'atp, jøts øts meets n'u'nk'atp,
jade'en idø'øn wya'añ ja Dios Teety.

7

¹ Jade'ents meets migu'uktøjk idø'øn xnijawidit ku ya'at øy'ajtin ja Dios tø tyiktañ. Ja'agøjxp adøm idø'øn øy tsuj njujky'ajtin, ka'ap ja nne'kx ka'ap ja n'anmija'win nyik'ejntin pøky agujk. Dios chø'jkingøjxp adøm idø'øn ja Dios ndamiyojxint ja njujky'ajtin.

Sa ja Corinti jaa'y tyiktigatsti ja wyinmaa'ñ

² Jja'gyukidik øts ndsojkin nba'ayo'owin! Jabi ka'axi meets niti windigø'øyin tø xkapaatti øøts køjxp. Nipøn øø ngawindaay'aty, nipøn øø ngana'ixy. ³ Kidi meets ya'at xja'gyuki ku meets nugo nbøknipiky, jabi jade'enxi tø nwa'añ jawyeen ku meets ja ndsojkin ja nba'ayo'owin tø ndamiyøxy, jade'en ja tpatni møøt mee ñamyayi njujky'aty jøts møøt mee ñamyayi n'ookt. ⁴ Njøp'ixy'ajtpy meets jøts amøot mee ndajotkujk'aty. Øy øøts idø'øn n'ayo'ombaaty janch jotkujk ø nnayjawiyi.

⁵ Ja'ayip øø nja'ity ya Macedonia, ka'ap øøts ja poo'kxin nmøøt'aty, øy øøts magama jaa'y xmidsepwa'añ jøts øøts ja tsø'øgi nyikmajada'akwa'añ. ⁶ Yikjotjimbijtpy ja Dios ja yjaa'y, tøts øøts ja xyikjotjimbity ku ja Tiro tø yja'aty. ⁷ Kidi ja'ayip øø nugo ndyimdya-jotkujk'ajtpy ku ja yam tø yja'aty, jabi ja'axi øø nayide'en ndajotkujk'ajtpy ku meets ja nekim mmimadya'akyiyi mjantayaxondajkip meets ja'. Jade'en øøts ja xamimadya'aky ku meets xjapaatwa'añ xja'ejxwa'añ jøts nayide'en tnigajpxmi ku meets xajotmay'øøky. Jotkujk øts idø'øn nnayjawiyi ku meets xja'myech.

⁸ Øy ja nøyky tō mja'atsyikjotmaadyōkiyidi midī meets øjts ndaniguexy, ka' øts ja ixyam sa n'ukja'wiñi. Njanch'ayojiiñimts øts idø'on ja jawyeen, ku øts n'ijxy ku øts nnijawi ku meets ja nøyky yikxon ja jotmay tō mduktatōkiyidi tōts idø'on ja jade'en y'ukjajtkōy sa n'ukjatka'am. ⁹ Jotkujk øts ixyam nnayjāwiyi jōts kidi ja'ajip øts ndajotkujk'ajtpy ku meets ja jotmay mōk'ampy tō m'atspaadyiyi, jabi ja'axi ø ndajotkujk'ajtpy ku meets ja mdsinaa'yin tō xyiktigach sam idø'on pyaāt'aty. Tōxi dø'on xmidanidi ja jotmay'øøgyi sa ja Dios tšōky'aty, Dios tkupiky. Jōts ku øøts ja nøyky jade'en tō nguexy kidi ka'øy adøtšpīp øøts, kidi ayo'onip meets ja mdukpaatwajniyip. ¹⁰ Ja ayo'on midī tuda'aky yikupōjkp sam ja Dios tšōky'aty, yiktigachp ja tsinaa'yin ja' jōts jade'en yikpaaty ja yiknitso'ok'ajtin. Pōn tkajanchja'widip ja Dios wenk ja tjawidi ja ayo'on jōts ja y'anmija'win tyikudigōydi. ¹¹ Øy meets ja ngajpxy tō m'atsyikjotmaadyōkiyidi, tuda'aky meets ja tō xkupiky sam ja Dios tšōky'aty. jEjxtiis inet ku ja mdsinaa'yin ne'egi tō tyigatsti! Tō meets ja ngajpxy ne'egi myikwinmaa'mbyaadyiyi jōts jatyi tō xnigajpxti ti dø'on tō xundi; tō m'atsyikjotma'adyidi, tōts nayide'en xtsaachjawidi. Winets meets jatyi xjadyimiyigajpxwa'añ jōts nayide'en xidyunwamidi pōni pōn idø'on tō mmidundigōyidi. Ja' meets idø'on myiknigaxi'kpy ku meets tō mgatundigōy. ¹² Ja'agōjxp meets jade'en tō nnijayi ku meets ejtp nja'myech jōts kidi ja'agōjxip øts ja nøyky tō nguexy ku øts ja'ayi ngajpxwewja'añ pōn tō tyundigōy uk pōn tō yikmidundigōy. Pō ja'agōjxpxi mee nnijayi jōts ja Dios xuknijawidit mābaat ja mba'ayo'owin myajada'akti ku øø xpa'ayōy. ¹³ Paty øøts jotkujk nnayjāwiyi.

Jawaani jotkujk øø nnayjā'wiyi ku ja Tito ya tō yja'aty jōts ku meets ja tō xpudōki jōts ja jotkujk tyiknaxt. ¹⁴ Ka'ap ø nugo tō nwindāyiyi ja Tito ku meets øy tō mjaa'y'aty samdam øts ja jawyeen ndamimadyaajky. Ka'ap øts ja n'ayuujk nugo tō xyiktšø'dyūñ, tyi ja tō pyidsimy. ¹⁵ Jabi mdsōjkpxi meets ja ne'egi ixyam jawaani mōj ku meets ja tuki'iyi tō xpadunguixy pōni ti jam mda'ana'amiyidip, jōts ku meets ja øy tuda'aky tō xwindsø'øgi. ¹⁶ Ka' xnijawidi mābaat øts nxondaajkin yja'aty ku mee nnijawi ku adōm øy tsuj nnayjā'gyukiyindi.

8

Ku ja Pablo pudōjkin t'amidōy jōts yiktābudōkidit ja ayoobi jaa'dyi

¹ Ixyam meets migu'uktōjk nduknijawiwya'andi mābaat idø'on ja Dios y'øy'ajtin tō pyudōkiyidi ja Macedoniit janchja'wibidi. ² Øy ja sagasa tjamōjatti øyi myeeñ øyi pyikta'aky yjaga'etti may, jotkujk ja tō tyākojti ja pudōjkin jade'en samdam ja mōj kumeēñ jaa'dyi. ³ Tō ndyimy'ixy tō ndyimñijawi mābaat idø'on tō tyakti ja pudōjkin øy ja niti yjaga'uktaa'nxiniiyidi. ⁴ Mōk øøts ja tō x'amidōy, tyimdyanuu'kxaktip idø'on jōts pyudōjkin ja yikupōktit midī yiktābudōkiwyandip ja jaa'y midī nayide'en tjanchja'widip ja Dios. ⁵ Jinaxy idø'on ja ne'egi tō ttundi yam øts ja jade'en ngajōp'ijxy'aty, jabi jawyeenxi ja Dios ñadyamiyōjxiyidi jōtsnm øøts ja xpaduñ samdam idø'on ja Dios ttanibiktaagi. ⁶ Ja'agōjxp øøts idø'on ja Tito ndaguwani jōts pudōjkin ja jam tjaakyikmuktō midī mee kō'ōm mdsōjkingōjxp myākwampy midī ja jam tō t'ukyikmuktšōñ. ⁷ Agajpxy mee mbidsimy øy yjadyimysudso'ambyi: mōk meets ja ajot'ajtin xmōōdi mōøt ja winmaa'ñ sudso yikxon xyaktit ja Dios y'ixpōjkin, jōts mwijy meets, wa'ats xjatti wa'ats xnijawidi, jōts mōk mee xtsōky mōk mee xpa'ayōy niwine'en øø nyam'aty. Patyxi øø nwa'añ ku meets agajpxy mbidsōmit nayide'en ku ja pudōjkin xyaktit.

⁸ Ka' meets ya'at ndyimdyaguwani, ja' øøts idø'on nānky'ejxwajnip sa dø'on ja Macedoniit jaa'y ja chojkindi pya'ayo'owindi jōts yiknijawit nayide'en jōts ku meets ja mdsōjkin ja mba'ayo'owin tyiyi yjanchi. ⁹ Mnija'widipxi jōts ku ja nwindson'ajtim Jesucristo ja y'øy'ajtin jadine'en tyikmajada'aky, jōts mōk ja tsojkin mōk ja pa'ayo'owin tmōøt'aty ku ja mguwanjatiyidi ja'agōjxp ku ja mdsōkyidi mba'ayōyidi, jabi jotkujkxi ja y'ijty tyiknaxy mōøt ja Dios Teety. Adōmgōjxp ñānky'ayodōjkiyi jōts ja øy'ajtin jade'en nbaajtint Cristo kōjxp.

¹⁰ Meets m'øy'ajtingōjxp øts idø'on yide'en nwa'añ ku meets junkti'jyip ja pudōjkin xyikmuk'okwa'añ janch pe'tpy janch yijy. ¹¹ Nayide'ents idø'on ixyam øu'undit sam tō xyiktso'onda'akti. Tuki'iyi ja m'aaw ja mjoojt xpikta'aktit kunim ja xyik'abaadidit, pōni mābaat nidu'uk nidu'uk myajada'akti. ¹² Jabi ka'axi ja Dios tuki'iyi t'amidooguixy, ja'axi ja y'ijxpy mābaat idø'on nidu'uk nidu'uk chojkingōjxp tyaky.

¹³ Ka'ap jade'en xja'gyukidit ku meets ja mmigu'uk nduku'ayowidyōkiwya'andi; ¹⁴ jabi nixem niyamxi dø'on tuknax nmōøt'ajtindit ja pikta'aky. Ixam meets xmōøt'aty midī yø ka'ejtxidip, ja'atp ja xōøw ja jumōjt jōts ku meets yø wyinaty mga'ejtximiyidi winets yø mmōømyiyidit. Jōts jade'en ñi'awich'att, ¹⁵ sam ja Dios kyajpxy wya'añ: "Pōn tyumōøt'ajtkijxpy ka'ap ja tō wyinda'anxiiy; jōts pōnts waani tmōøt'ajtp, tuki'iyi ja tō ttpatkixy."

Tito jōts ja myigu'uktōjkti

¹⁶ Ja' ɔts Dios ndamɔja'wip ku meets ja Tito nayide'en mba'ayɔyi sam ɔts. ¹⁷ Tɔ ja janch'ɔyjawu ku meets ja ndanigaxwa'añ, tɔyim ja jeexyip ttuñ kɔ'ɔmdsojkingɔjɔp jabi mjanchejxwajnipxi meets ja'.

¹⁸ Ixyamts ja Tito mɔɔt nguexy tu'uk adɔm nmigu'ukti midu ɔy yiknimadyakp ma jaty ja janchja'wibi jaa'y ñamyukyidi, jade'en ja yiknijawu ku ja ɔy ty tɔnigajpxy ja nitsoojkin ayuujk pɔni ma jaty ja tɔ wyadity. ¹⁹ Kɔ'ɔmyi ja Macedoniit jaa'y tɔ twi'ejxti jɔts ɔɔts yɔ mɔɔt ndu'unt jɔts ɔɔts yɔ mɔɔt njaakyikmukojt ja pudɔjkin. Ja'agɔjɔp ɔɔts yɔ'ɔbi tunk nduñ jɔts ja nwindson'ajtim jade'en yiktawindsɔ'ɔgit jɔts jade'en meets xyiknigaxɔ'ɔkt ja mdsojkin ja mba'ayo'owin. ²⁰ Ja nabyagajpxi dɔ'ɔn kayiktsojɔp ku ɔɔts ya'at pudɔjkin nyikmuky. ²¹ Paty ɔɔts niti taay ngayiktuñ yɔ ɔɔts yɔ nminaxt Dios wyingujɔp jɔts jaa'y wyindump.

²² Nayide'en ɔɔts ixyam ndamigaxi jadu'uk adɔm nmigu'uk midu ja Dios yja' ɔy tsuj pyaduujnip jɔts ku meets ja nayide'en mdajotkujk'ajtimiyi. ²³ Ku pɔn jam tyiknidɔɔwit ti dɔ'ɔn ja Tito tyumpy, jade'en x'adsojimbettit jɔts ku ɔts yɔ nmigu'ugi, ɔts nmɔɔtumbi yɔ, ɔɔts idɔ'ɔn ndumpy ja pudɔjkin pɔni pɔn tsojɔp ja Dios. Jɔts pɔni yiknidɔɔ'jimyidip ti yɔ tyundip yɔ jadu'ukpi migu'ukti, jade'en x'adsojimbettit ku janchja'wibitɔjɔk yɔ tɔ kyexyidi jɔts ku ja Cristo yɔ jade'en twindsɔ'ɔgidi. ²⁴ Paty ɔ nwa'añ ku jam mbaadiyidit yixxon xuk'ejxtit xuknijawidit sɔ meets ja tsojkin sɔ meets ja pa'ayo'owin xmɔɔ'taty jɔts ñigaxɔ'ɔkt jade'en jadits meets ndajotkujk'aty.

9

Ku ja Pablo tɔnigajpxy sudso ja pudɔjkin yjaakmukt

¹ Ka' pyaat'atyiyi ku meets ya'atpi winmaa'ñ jeexyip ndanijayi, ² jabi nnija'wiñipxi ɔts ku meets ja pudɔjkin jatyi xyakɔjy. Jotkujk ɔts idɔ'ɔn ja Macedoniit jaa'y nnimay'etti ku meets junkti'yip ja pudɔjkin xyakwani jɔts jade'en namay ttunwamidi sa me tɔ xunjɔpi. ³ Ja'agɔjɔp ɔts ya'at migu'uktɔjɔk ngaxti jɔts mdukja'myatsidit ku ja pudɔjkin xyik'awejxtit. Jɔts ɔts jade'en ja n'ayuujk tyɔ'ɔt sam ɔts yɔ tɔ ndamimadya'akti jawyeen. ⁴ Ja kuts jotmɔñ ja Macedoniit jaa'y nmɔɔtɔjɔkxt jɔts ja jam m'atspaadidit yam meets jam wyinaty niti xka'awixy. Tsɔ'odyuñimts ja ty'añt ku wyinatj jade'en yjaty yam meets ɔy tɔ n'uknimadya'aky. ¿Jaa kidi meets ja tsɔ'odyu'unin jawaani mɔj mbaadiyit? ⁵ Yide'ents ɔts yjawu ne'legi ndanibiktaagi jawyeen ya'at jaa'y m'ats'ejxidit jɔts jade'en mjaakpudɔjkiɔjyoyiyidit jɔts kya'pxt ja pudɔjkin midu meets tɔ xni'adsowi. Jɔts jade'en wyinaty jam mgɔ'ɔmdsojkin xyiknigaxɔ'ɔkti jɔts ka' mwa'andit ku ɔɔts nugo ndyimyajada'aky.

⁶ Ejtp ya'at xja'myats'ettit: Pɔn waani nepp, nayi waani ja tpiɔy ja pyikta'aky; jɔts pɔn may nepp, nayi may ja pyikta'aky ja wyimbijty. ⁷ Kɔ'ɔmdsɔky'ampy idɔ'ɔn ja pudɔjkin xyaktit. Kidi adsep'amip ja xu'undit jabi tsojkipxi Dios ja' pɔn xondaajkingɔjɔp tyajɔp ja pyudɔjkin. ⁸ Maajty ja Dios jɔts txakt kɔx kida'ak ja kunuu'kxin jɔts jade'en xmɔɔ'at'ettit pɔni ti tsojkip, jɔts nayide'en ja nmigu'uk xjaaktanipaattit tuki'iyi ja pudɔjkin. ⁹ Pɔ yide'enxi ja Dios kyajpxy wya'añ:

Pɔn ttabajaa'ñaxp ja ayo'on,

pyudɔjkip ja ayooɔi jaa'y ja', jɔts ja y'ɔyjaa'y'ajtk niwindem ja kyagugɔxi.

¹⁰ Abaadi ja Dios tyaky ja jujky'ajtin jɔts adɔm jade'en tuki'iyi nmɔɔt'ajtkɔjɔkint jɔts ja nmigu'uk nayide'en ja pudɔjkin ndanipaajtint. ¹¹ Jɔts meets nayide'en kɔx kida'ak xmɔɔ'tattit ja ɔy'ajtin jɔts ɔy pɔngapɔn xmo'odit. Ja pudɔjkin midu meets xanigaxip, ja Dios ja tyamɔjawiɔp tyagunuu'kxjawidip ku ja wyinaty yiktanipaattit. ¹² Kidi ja'ayip adɔm ja nugo ndabudɔkiwya'añindip midu ja ka'ejtxidip, jabi ja'axi nayide'en yiktump jɔts ja Dios ja tkajxak'ettit. ¹³ Ja'agɔjɔp ja Dios ja ttamɔjawidit ku meets tyi ka'pxy xmiamadowti ja Cristo y'ɔgyajpxy y'ɔmyadya'aky sam nayide'en ttamɔjawidit ttagunuu'kxjawidit pɔn jaty wyinaty paajtmiyidip ja pudɔjkin. ¹⁴ Jɔts meets ja nay jaayi mgugajpxajkmiyidit jabi tɔxi meets ja Dios ja myɔj'ɔy'ajtin wyinaty xyiknigaxɔ'ɔkti. ¹⁵ ¡Janch mɔj ja Dios ku ja mɔj kunuu'kxin tɔ xmɔ'ɔyim! ¡ka'ap aaw ayuujk yikpaaty sudso ja nnimadyajkin!

10

Saja Pablo yikutuky ku ja nwindson'ajtim tkudani

¹ Tyimgyɔ'ɔm ɔts idɔ'ɔn nnuu'kxa'aky nayide'en sam ja Cristo jeexyip kɔ'ɔm ttuñ. Jade'en ja kajpxy yɔ'ɔy kuk meets nnijayi, tyim'yap meets ja nɔky ndanigaxi, jɔts ka'ap ɔts nayide'en njaa'y'aty ku ɔts ja jaa'y mɔɔt nnabyaadyi, ja tsɔ'ɔgik ɔts nyikmajadakpy. ² Paty nwa'añ, ku mee wyinaty n'ats'ixy jɔts ɔ xkayik'ambɔktit ku ɔts ja jamyi n'uknibidɔ'kniit pɔn ja y'aaw ttakajpxtip ku ɔts ngɔ'ɔmwinmaa'ñ nyiktuñ sam ɔy pɔn jaa'yin. Ka'ap ɔ pɔn ndsɔ'ɔgi pɔni jade'en ja tsokti. ³ Janch tyi idɔ'ɔn ku ɔts nbojɔkpitumbijaa'y, ka'apts ɔts mibaat ja pɔky x'ana'amt. Ja Diosxi ɔts ja yja' xuu'mɔy'ejtp. ⁴ Ja nmɔk'ajtin ɔɔts, ka'ap ja pɔky agujkpy pyidsimy, Dios wyingujk ja chɔɔñ midu tyikudigɔɔpy pɔn ja Jesucristo mɔɔt kyanamyayi.

⁵ Jade'ents idø'øn, nyikudigøøpy øøts ja katii'byi kajpxy midi nugo nankmyøjtøjkii'py ku ja Dios ja yja' tkananky'ejxwajniyi. Jawyeen øøts ja Cristo nduknijawi sa pønjabøn wyinmay jøts ja tu'ugyi ja yja' tpaduujnidit pøni yikutujkpy ja jade'en. ⁶ Ndiidyu'ump øøts pøn ka'pxy tkabadu'undip ya'atpi ana'amin ku meets wyinaty tø xpadunguixy jawyeen.

⁷ Ku mee x'ijxy ku ndsø'øgi ka' xnijawidi sam ndyimyjaa'y'aty. Pønjabøn wya'andi ku ja Cristo yja'atyi, nayide'en idø'øn tnijawidit ku øøts ja Cristo xja'ajtmi. ⁸ Wan meets jam winaagin mwa'añ ku øts ja nwindson'ajtim kyutujk nugo ndyimdamajada'aky, niti ngapøkyjawi jabi kø'ømxi ja nwindson'ajtim tyajky ja kyutujk jøts meets jade'en ja mjanchja'win myøjit, jøts ka'ap meets ja mgudigø'øyin n'ixajyi jade'engøjxp. ⁹ Kidi xja'gyukidi ku meets yø nøky nugo nda'adsø'øgiwya'añ. ¹⁰ Jade'en ja kajpxy yø'øy ku tyimy'ap ja n'ayuujk nguexy jøts ja jaayi kø'øm nga'uknitanaa'ni, ka'abik øts øy tsuj ja madyajkin nmøødi. ¹¹ Pøn idø'øn yide'en ja ayuujk tyikyø'øpy nayide'en idø'øn ja tnijawidit ku øøts nayide'en ndyimyjaa'y'att meets windump sam øøts n'ayuujk nguexy jagam.

¹² Ka'ap øø nnay'a'eixiyi jøts øø kø'øm nnay'agajpxiyit sam jam muum winaagin ttundi. Ja kaja'gyukin ja yikmajadajktip ku ja nixem niyam kø'øm yjanch'uknay'agajpxiyidi. ¹³ Nijuuni øøts ja kutujk ngayiktuñ midi øø ngamøøt'ajtpy. Ja Dios øøts idø'øn xuknija'wip mabaat idø'øn ja tunkjøøp yja'aty, jøts nay ja' øøts tø xuu'mø'øy kø'øm ku meets jam tø n'atsnija'aty Corinto. ¹⁴ Ku øø nwa'añ ku øøts ja kutujk nmøøt'aty jøts meets n'ana'amt, ka'ap øøts ngø'øm ja' nyiktuñ, pø jade'en ja jeexyyp yjaty kuk øøts jam jawyeen jeexyyp tø nga'ats'øch. Jabi meetsxi jawyeen ndanija'jt ja øgyajpxy ja ømyadya'aky sa ja Cristo y'øy'ajtin xukpaajtint. ¹⁵ Ka'ap øø ndsøky jøts øøts nugo nnadya'agajpxit ja wenkjaa'y tyunk ja kajpxwejin midi tø myikmø'odi. N'awixy'ajtpy øøts ku meets ja mjanchja'win winjaa windsojk myøjit myayit mabaat idø'øn pyaat'aty jøts mabaat øøts nayide'en nmajada'aky ku øøts jam ndu'unt mǎ meets jam. ¹⁶ Xjats øøts jade'en ngajpxwa'kxt ja nitsoojkin ayuujk abiky'et abikyajp meets mjixkø'øm, jøts nijuuni øøts nganadya'agajpxit ja wenk jaa'y y'ixpøjkin.

¹⁷ Pøni jaa pøn ñay'agajpxwa'añi kø'øm, ka'ap jade'en pyaat'atyiyi, ja Dios idø'øn ja y'øy'ajtin ja ne'egi ja'ayi y'agajpxip. ¹⁸ Ka'ap y'øbyidsimy ja jaa'y pøn kø'øm nay'agajpxiyip, ja'ats ne'egi øbyidsomp pøn ja nwindson'ajtim t'øyja'wip jøts ja t'agajpxy.

11

Pablo jøts pøn ñadyijyi nañikajpxidip Jesús kyudanaabyi

¹ Meets migu'uktøjkti, wan meets mwa'ant ku nugo mo'tpin nmadya'aky, ja'gyuki meets waani wan øts ngajpxy t'ukyiknaxy midi n'amo njotp nmøøt'ajtpy. ² Øy mee n'ama'at'aty ja Dios øts idø'øn jade'en kø'øm xyik'adøts; jabi tøxi ja Cristo yja' tu'ugyi ndukpabøjkidi jøts ku meets ja ndawinguwawiywa'añ. Wa'ats meets jam nyiknøjxwa'añ, sam pøn ja pøky tkidyimy'ijxy'ajtipnim. ³ Jade'en sam ja Eva ja tsa'añ wyindaayiyøø, wan meets yjawi nayide'en myikwindaa'y'atwa'añ jøts mwinmaa'ñ tyigatstit jøts jade'en nga'uknadyamiyojxniyidit ja Cristo. ⁴ Jam pøn ja Cristo y'ixpøjkin wenk tnigajpxip, ka'ap nayide'en sam øøts nnigajpxy; jøts meets ja Espiritu Santo yja' nayide'en wenk xnija'wiyi, tigach meets ja yiknitsokpi ayuujk xnijawidi, ka'ap nayide'en sam øø nnigajpxy. ⁵ Pøn jade'en myikwinmaa'nmya'jtidiip ka'ap øts ja mabaat xyik'amutskidi øy ja nugo ñadyijyi yjanañikajpxiyidi ja Jesús myøjkudanaabyi. ⁶ Øy øts n'aaw n'ayuujk øy tsuj ngamøøt'aty, ka'ap øts nwinmaa'ñ ñayide'eni. Tø øøts yø nyiknigaxø'kni ku meets t'igati tø ndabudøki.

⁷ ¿Tø øts idø'øn ndundigøy ndejint ku meets jadi'iñi tø ndukmadøy ja nitsoojkin ayuujk ku ni tu'uk centabi tø nganibiky, jøts øts jade'en ayo'ijxyim njaty nugo ku mee xpiky ja øy'ajtin? ⁸ Wenkpi janchja'wibitøjk øts ja myeeñ tø ngupøjkidi ku meets janch nduknijawiywa'añ ja øy'ajtin. ⁹ Jøts ku øts jam n'uknaxxy mǎ meets jam, ka'ap øts jam ojts pøn nyik'ayøy pøni ti jaty ø xka'ejtxip; jabi ja nmigu'ukxi øts ojts xujnidi ja may'ajt pøn tso'ondip jam Macedonia. Jade'ents mee ka' nyikjotkixy, jøts ka'ayim meets nugo nyikjotkøxwa'añ, jade'eñim ø nyiknaxt sayim ø nyiknaxy. ¹⁰ Nayide'en sam øts ja Cristo tyiy'ajtin njanchja'wiyi nayide'en ø njawi ku meets nnøjmi, ku jam Acayi y'etjotp ni tu'uk ja jaa'y jam, pøn ø xuk'ixmatsp ja'abi xondaajkin ku øts Dios yja' nnigajpxiyi. ¹¹ ¿Jadits øts n'ayuujk jade'en nyikwa'añ? ¿Ja'agøjxp idø'øn ndejint ku meets nga'uktsojknii? Wa'ats ja Dios tnijawi mabaat øts ndsojkin yja'aty meets køjxp.

¹² Jade'eñim øts yø ndunk nyikyø'øy'ett jøts ja kyamøj'attit pøn ñadyijyi nañikajpxidip ku ja nayide'en tyumidi sam øøts. ¹³ Yø'øbi jaa'dyi nugo yø tyaay'atti ku ja Cristo tkudanidi. ¹⁴ Ka'ap yø kumaap nja'wa'ant, jabi kø'ømabaatxi ja miku'windson Satanás ñanky'ijxyiyi ejximdam ja Dios y'ankilis kunuu'kxy. ¹⁵ Paty nayide'en yø tyumbi ñanky'ejxmyi samdam ja øybi tumbi jaa'y. Ja chinaa'y'in ja yiktatidyu'undip jade'en sam ja pyaat'atyidi.

Sǎ ja Pablo y'ayo'ombaqtu ku ja Jesús tkudani

¹⁶ Ixyam mee nnimaagyojmi jøts kidi nugo mwinmaydi jøts ku nmø'øty. Pøni jade'ents xja'gyukidi, wants øts jade'en tmdya'a'ky jøts øts nadyijyi namyikajxibim nnayjawiyyit. ¹⁷ Kidi mee mw'a'añ ku øts ja nwindson'ajtim jade'en xyikmadya'a'ky, jabi nugo mo'tpixi øts idø'øn, ku njanch'uknay'agajpxiyi. ¹⁸ Jaaxi jaa'y pøn nadyamikajxidip ja ñaxwii'ñit tsinaa'yin, wants ø nayide'en nduknamyikajxmiyi. ¹⁹ Jabi møj ja'gyukipxi meets mjaa'y'aty, patyts meets sa xkatijy pøn mo'tpa'an madyakp. ²⁰ Ja' mee ne'egi m'øyja'wip pøn jiyujkin myiktuujnidip, pøn mwindaay'ajtidip, pøn mnijuu'yniyidip, pøn mdekpya'an'ajtidip. Mgupiky'ajttip ja' øy sagasa myiktunidit. ²¹ jØy øts ixyam nnabyøkyjawi ku øts jade'en tø ngajaa'y'aty kudam meets yø' ne'egi jade'en x'øyjawi!

Pøni jaa pøn ap tyimñayjawi, xmaapy øts ja', øy øts nayide'en njaa'y'att. ²² Ja hebreo ayuujk nadya'agajpxidip? Nnija'wip øts ja nayide'en. ¿Israelit jaa'y ja'adi? Nayide'en øts. ¿'Aptteety'amøj'ajttip ja Abraham ja'? Nayide'en øts ja n'aptteety'amøj'ajtimi. ²³ Jade'en ja wya'andi ku Cristo tmidundi? Jawaani øy øts ja ne'egi nmidud, øy øts jade'en ja tsojkin njagamøt'aty jøts ø nnay'agajpxit kø'øm. Jawaani møk øts ndunk ne'egi tø nyiknigaxi'iky yam yja' ja ka' ne'egi ñigaxø'økti. Tø øts ngu'ayo'ombaa'di ja ndunkjøøjp, ne'egi ka'ap ja'adi. Ne'egi jawaani may ojk øts idø'øn ja tø nyiktagudsumi, jøts kawinaak ojk øts ja o'jkin tø n'ixy jaay' wingon xwindani. ²⁴ Magoxk ojk øts ja ayo'on tø ngupiky midit øts nmigugajp israelit jaa'y tø xmø'yø sam ja kyutujk wya'andi ku eelpxmajk taxujk ojk nyikwøpy. ²⁵ Tigøøk ojk ø tø nyikpwyøpy, jøts tu'uk ojk tø nyiktsaaga'ach. Tigøøk ojk øts ja nbarki tø myeji'okida'aky. Tu'uk ja xøøw tu'uk ja koots nyiknajxy jam mejkyujk'am, ja kipy pyidasì, ja puu' pyidasì øts iiy xjaakyknøøwinganamp. ²⁶ Jagambaat øts kawinaak ojk tø nwidity jøts jam muum ja møj nøgom xyikjø'øtwa'añ, jøts ja jaa'y muum xwimaatswami. Ngø'øm migugajp paat øts xni'adani xuu'adani sam nayide'en y'adøtsmidit ja wenkajp jaa'dyi. Nbatpy ø nayide'en ja ayo'on møj kajjotp samdam abak etjotp uk jam mejjotp. Nayide'en øts ja xka'ødyumidi pøn ñadyijyi Jesucristo janchja'wibidi nañikajpxidip. ²⁷ Tø nduñ mabaat øts ja ngø' ja ndeky myajada'aky, øy øts ayo'on ja xadukpaaty; kawinaak ojk ø ngamaa'y nga'ity; ayuu adøøtsi tø nyiknaxy kawinaak ojk; tø ndanaxy ja tep ja xux, ni ja nwet ni ja nnaamy tka'ukpatni.

²⁸ Øy øts idø'øn jade'en ya'atpi ayo'on njapaaty uk midit jatyts njayiknaxpy, møjip mayip øts ja njotmay ku øts ja njotmay'ati jabom jabom pøn jaty tjanchja'widip ja nwindson'ajtim. ²⁹ Pøni jaa pøn ja yjanchna'win kamøj, janch pamaa'yin ø nnayjawi. Pøni jaa pøn wenkpi winmaa'ñ tpanøjknidip, møk øts ja n'ayooji, møk øts ja ngudsø'ødyuni øts øts ja nugo njantya'ambiky. ³⁰ Pøni janchpaat'ajtipts idø'øn ja nay'agajpxi ja ngamøk'ajtipts ø ne'egi nadya'agajpxip. ³¹ Ja Dios Teety midit ja nwindson'ajtim Jesucristo tyeety'ajtip midit paat'ajtiyip xemikøjxpx yikmøjawi yikunuu'kxyjawi, wa'ats ja tnijawi ku øts ejtp ja tyiiby ja yjanchni nnigajpxy. ³² Jøts ku øts nnajxy jam Damasco kajjotp, jam dø'øn tu'uk ja windsøn midit tmidump ja yjadu'ukpi møj windsøn Aretas, ja Damaskit windsønts idø'øn ojts t'ane'emy ja tyumbitøjk jøts ja tyimyk'adujkøxtit ja tuu' ma jaty ja kajp yiknidøki jøts øts ja xmatstet jøts ø ndyimyiktsu'umt. ³³ Ti mats ja Dios xuk'ixmajtsint, jabi jamxì nguejky, ma ja møj pøch jam, midit ja kajp nawidejtip. Øts nmigu'uk xkatstidyoø mutsk ventani agø'øm kachjotpy. Jade'en øts idø'øn ja xkapøktøø.

12

Sa ja nwindson'ajtim tñanky'ijxyiyi ja yja' Pablo kyumaa'yjotpy

¹ Nnija'wip øts ku niwine'en kyajami ku nnay'agajpxa'ant kø'øm. Meets ukja'gyuki, kuwani øts idø'øn nnigajpxt sudso nwindson'ajtim ja yja' tø tñanky'ijxyiyi ku ø kø'øm nnay'ijxyiyi kumaa'yjotpy. ²⁻³ Ndyimy'ijxy'ajtpy tam øts tu'uk ja jaa'y midit tjanchja'wip ja nwindson'ajtim Jesucristo midit myakmajkts jumøjtjip ojts yikwaanijky jap tsajjotpy. Pø sudso idø'øn ja yikwaanijky, pø møøt ñe'kx uk nugo y'anmija'wints idø'øn ja nøjxpx Dios tu'ugyi tyim'y'uknija'wip. Ja'ayi ø nnija'wip ⁴ ku ojts yikwaanijky jap tsajjotpy ma ojts tmadøy ja kajpxy ja madya'a'ky midit ka' pøn nugo ñiyiktukmadøy. ⁵ Ti kanadyamiguexyim idø'øn ja yjawi ku øts jade'en sam ja jaa'y, ka'ats øts nnamyikexyiyi pø wanimts øts ja ngamøk'ajtin nnadyamikexyiyi. ⁶ Øyimts øts kø'øm njanchjanañigajpxwa'añiyi, pø ka'axi ja ñugo kajpxyi, pø tij'ajtinxi øts wyinaty nnigajpxpy; ka'ats øts jade'en nduñ jøts kidi pøn nugo wyinmay jøts ku øts ngamaabyi jøts ku øts ka' njade'eni sam pøn yamts øts idø'øn ja jade'en ngatuñ sam ja wyinmaydi.

⁷ Kawinmaa'ñixi dø'øn ja chuji midit øts ja nwindson'ajtim xuk'eix ngumaa'yjotpy; jøts øts ja nganadyamikaxiyit, winets nja'wigyejky adsu'jky nikøjpx yjajkejky samdam ja kujp xkuu'mint. Ja mikuwindsøn Satanás ja tyunkjøøjp jade'en ñanky'eixip. ⁸ Tigøøk ojk øts ja nwindson'ajtim ojts njanch'amidøy jøts tyiknaxt ja jajin ja tøø'yin; ⁹ jøts øts ja nwindson'ajtim yide'en ja'ayi x'adsøy: "Ja ndsojkin ja nba'ayo'owin mets ja'ayi mbudøkiyip; jabi jade'enxi øts nmøk'ajtin ne'egi ñigaxi'iky ku nbudøki pøn ja kyø'øm møk'ajtin ka'eixip."

Jade'en ja wya'añ. Patyxi øts ja ngamøk'ajtin ndajotkujk'aty, jøts jade'en ja Cristo yja' kyaxø'økt. ¹⁰ N'øyja'wip øts ja kamajadajkin, n'øyja'wip øts ku nyikjemnøjmi nyiktenøjmi uk ku tigati xka'ejtxi, uk ku øts Cristo køjxp nyikmi'ambiky ngu'ayo'ombaadi. Ku nnayjawiyi nmøk'ajtin kya'ity jats idø'on nwindson'ajtim ja myøk'ajtin tyik'awa'añ jøts øts ja xuk'ajot'aty.

Ku ja Pablo tpamay tpadajy ja Corintiit janchja'wibidi

¹¹ Janch mo'tpin ø tō nmadya'aky ku kø'øm tō nnay'agajpxyiyi, kø'øm meets tō xyik-jaty jabi meetsxik idø'on jeexyip øy tō xnimadya'aky jøts øts jade'en jeexyip kø'øm tō nganay'agajpxyiyi. ¿Tyimyabaat ja ndejint yja'atti ja wyejin ja kyajin pøn ñadyiyi myøjkudanaabyi'ajtpy ja nwindson'ajtim? Øy øts idø'on mabaat nguidyimyjaty ka'ap øts ja mibaat xwinaxiti. ¹² Ku øts ja ndunk tō nyikyø'øy ma meets jam ejtp øts nnanyi'ijxyiyi ku øts idø'on ndyimgyudanaabyi'aty ja nwindson'ajtim. Ejxpajtingøjxp milagrikøjxp øts idø'on ja n'ødyunk tō x'ejxidi tō xnija'wiyidi. ¹³ Pøni mwandipts ku meets ka' tuknax myik'ødyuñ sã øts ja jadu'ukpi n'ødyundi ma jaty ø nwidity ma jaty ø nbaatti n'ejxti ja jadu'ukpi janchja'wibidi, janch idø'on mw'a'andi. Xmøøymidsik meets jam ja kaaky ja maadaajk kuk øts jam n'ats'øjch. ¡Maa'lxiti, kidi xka'øyjawi ku øts yide'en nwa'añ!

¹⁴ Ixyam nnay'a'ejxyiyi nnay'abaadiyi ja' ku meets myidigøøk ojk n'ats'ejxwa'añ. Ka'ap meets jam nugo n'atsyik'adujktiwy'a'añ. Jabi ka'axi meets ja mbikta'aky n'ixaajyi, meetsxi dø'on ja m'øy'ajtin ja'ayi n'ixaajyip. Yiknija'wipxi ku ja u'nkteety t'ixa'adi ja meeñ ja jingaap midi ja y'u'nk ñidsina'adyip jøts ka'ap ja y'u'nk ne'egi ja teety ja yjujky'ajtin tjoimay'attit. ¹⁵ Xondaajkin ø nbaatp ku mee ndamiyoxkøxt ja n'aaw ja njoopt mjanchja'wingøjxp; øy meets yjawi xjagatsøky samdam meets ndsøky.

¹⁶ Øy winaagin tjaja'gyukidi ku meets jam nugo ngayik'adujkti, jade'en ja wya'andi ku mee nugo tō nwin'iñ. ¹⁷ ¿Tø meets ndejint ndawindaay'aty ja nmigu'uk pøn jaty meets jam tō ndaniguexy? ¹⁸ Kø'øm øts ja Tito n'ane'emy jøts m'ats'ejxidit jøts øts ndamigajxyi'iñ jadu'uk adøm nmigu'uk. ¿Tits, mwindaay'ajtdi ja Tito? ¿Ti ka' x'ejxti ku øøts tu'ugyi nwinmaa'ñ nyikyø'øy jøts tum jade'en øøts n'øyjaa'y'aty?

¹⁹ Wan meets jade'en mwinmay ku øø nugo nnagyubøkiyi. Ka'ap yjade'eni. Wa'ats ja Dios tnijawi ku øøts Cristo køjxp ja ndunk tō nyikyø'øy, jøts meets jade'en ja mjanchja'win myøjit. ²⁰ Ku øts jam wyinaty n'ats'øch jade'en ø njøpjawi ku meets yjawi øy ngapaatt samdam øts ja ndsojkin njadyimyjamøø'taty. Jøts mee nayide'en xka'øyja'wyimut ja njaa'y'ajtin samdam meets xjadyimyjatsøky'aty, ku meets xka'øyjawiit ja kajpxwejin midi wyinaty nya-jkpy. Jabi jade'enxi nnajtsjawi ku meets wyinaty mga'uknamyaa'niyiidi nixem niyam, jøts xyikmøjtøjkiñidi ja windii'ñ'ajtk, ja aki, ja tam'ama'at'ajtk, ja nabyagajpxi, sam nayide'en ja namyikajxan jøts nixem niyam mga'uknamyimado'oniyiidi. ²¹ Wan øts ja Dios yjawi nmidsø'ødyu'unt ku meets jade'en mjaa'y'ajtni. Wan meets ngujyit nguyaaxit ku meets wyinaty ne'egi tō xpadojkiñi ja mga'øchinaa'y'in midi ixymbaat mgamajtstu'utwandip. Tum ja axøø'kpi: tum ja yigaappi m'amp mjotp mmimajadajkidip.

13

Xjats ja nøky y'abaadi jøts ja kajpxwejin ja kajpxpoo'kxin y'ukyikyajkini

¹ Ixyam mee myidigøøk ojk n'ats'ejxwa'añ, jøts ku øts ja tundigø'øyin jam nyiktiidyøkit pøni pøn jam nugo tyimdyunk'ajtnidip ja pøkytunk, tsokip ja a'ejxnajpxi namajtsk uk nidigøøk pøn ja wa'ats tñimadyakøxtip sã y'ejxi tyiyi. ² Ku myimajtsk ojk n'ats'øjch n'ana'amdi øts ja' pøn jam yjawi wyinaty pøky agujkpy tyimchinaa'ndip. Xyams nwa'añ ku nnøjkt jadigojk ku nayide'en nbatkojmidit nay ja' pøn ø tō n'ana'amdi, niwine'en øts ja ayo'ejxin ngamøø'tatt. Pøni jamidits pøn ja chinaa'y'in tyik'eitmidip pøky agujkpy nayide'en ja pyaat'atyidi jøts tiidyu'unin tyagida'agidit. ³ Jade'ents meets idø'on xajotkujk'att ku øts ja Cristo xyikmadya'aky jøts meets jade'en mgawa'ant ku ja' kyajotmøjki; jabi ñanky'ejxipts ja myøk'ajtin ma meets jam. ⁴ Ja kyamøk'ajtin kyu'o'jki kruskøjxp, xemikøjxpts ixyam yjujky'aty Dios Teety myøk'ajtingøjxp. Nayide'en adøm idø'on ja kajotmøk'ajtin njagyeyyim sam ja yjajty. Ku ja xemikøjxp nmøøtjujky'ajtin ja nwindson'ajtim jade'ents ja Dios Teety tyaky ja møk'ajtin midit meets ndabudøjkp.

⁵ Yikxon meets kø'øm nabyawinmayi, ¿mjanchpadundip idø'on ja mjanchja'windi? ¿Ja ka' xja'myatsti ku ja Cristo xmøø'tatti? Uk nugo meets idø'on mñañkajpxyiyi Cristo janchja'wibi. ⁶ Jade'ents øø nwa'añ jøts meets xnijawit ku mee ka' nugo nwindaa'yi ku øøts ja Cristo yja' nbaduujni. ⁷ N'amidøøpy øøts ja Dios jøts meets øy mjaa'y'att. Kidi ja'agøjxpip jøts øøts jade'en ja n'ana'amin myøjtøkit. Ja m'øy'ajtinxi øøts ja'ayi n'ixaapy. Padun meets ja', øy øøts agajpxy njagabidsimy. ⁸ Ka'ap øøts ja møk'ajtin nmøø'taty jøts øøts nwindson'ajtim ja tyiy'ajtin ngajpxwe'jtat, ja' øøts ndunkjøjpx'ajtpy jøts ja yiknigajpxt tiy ka'pxy. ⁹ Ndxonda'akp øøts ku meets ja møk'ajtin xmøø'tatt øy øts ja ngutuik njagayiktuñ.

Ejtp øøts ja Dios n'amidoo'ett jøts meets ja mjanchja'win jøts meets ja mjujky'ajtin yikxon y'øyt yikxon tyuda'akt. ¹⁰ Namga'anim ø ndsøøñ ku meets ya'at nøky ndanigaxi jøts ku meets wyinaty n'ats'ixy ka'ap xjawidit møk ja tiidyu'unin mididi ø tø xaguwanì ja nwindson'ajtim. Ja'agøjxp øts ja kutujk tø xmø'øy jøts meets ja mjanchja'win myøjit jøts kidi ja'agøjxpip øts ja nmøødi jøts meets ja kudigø'øyin xpaatti.

¹¹ Meets migu'uktøjkti, øy meets. Yikxon meets ndamidsøky xyiknaxtit ja mdsinaa'yin, ixā'adi ja øy'ajtin ja tuda'aky'ajtin, nanjyotkujk'atidi nixem niyam, yikxon mnamyigu'ukwa'anidit yikxon mnamyayidit, jøts jotkujk x'ejxtit. Winets meets ja Dios xemikøjxp mmøøt'etidit mididi tyajkp ja jotkujk'ajtin mididi tyajkp ja tsojkin ja pa'ayo'owin. ¹² Nagyajxpoo'kxidi nixem niyam sadam ja Dios ttsøk'aty. ¹³ Niduki'iyi ja janchja'wibidi mididi øøts ixyam møøt, nayide'en ja tkaxmididi ja kyajxpoo'kxin.

¹⁴ Paatti kupøkti ja nwindson'ajtim Jesucristo kyunuu'kxin, nayide'en ja Dios Teety chojkin ja pya'ayo'owin jøts nayide'en ja Espiritu Santo nima mgamajsttu'udidit. Tiigyajpxy idø'øn, jade'en idø'øn yjatt.

JA NØKY MIDI JA PABLO TYANĠGAJX JA GALACIHT JAA'Y

Ku ja Pablo tnjayi pøn tjanchja'widip ja nwindson'ajtim Jesucristo yja' jam Galacia

¹ Øts idø'øn Pablo'ajtp, nwindson'ajtim ngudanaapy, nipøn jaa'y ø tø xkakexy, ja Jesucristoxi ø kø'øm tø xpikta'aky møøt ja Dios Teety pøn ja nwindson'ajtim kø'øm tø yikjujkyiyiyi jap oo'kpi y'agujkpy. ² Fxyamts øts møøt niduki'iyi ja nmigu'uk janchja'wibitøjkti, meets ndanijayi ya'at nøky ma jaty xpadumidi ja nwindson'ajtim yja' jam Galacia etjotp. ³ Paat meets ja øy'ajtin ja kunuu'lxin midi ja Dios Teety yajkpy møøt ja nwindson'ajtim Jesucristo, ⁴ pøn nagyiyajkiyøø jøts adøm nbøky ja xku'o'jkandi jøts kidi ja axøøkpi tsinaa'yin mibaat xmimadaajkyindi midi yikpatp ya naxwiin, tøxi ja Dios Teety jade'en kø'øm ttanibiktaagi. ⁵ iTu'ugyi ja Dios myøj'ajtin ndamiguy'ejxint xemikøjxp! Jade'ents idø'øn ja yjatt.

Ka'ap ja jadu'uk abiky midi tnigajpx ja yiknitsoojkin

⁶ Tyimñigyumaap ø nnayjawiyyi ku meets pojn xmajtstutkojmi ja Dios, pøn meets kø'øm tø mwaamñidi tø mwaadsøyidi ku ja Cristo xpa'ayonajxyindi, jøts meets ja janchpi nitsoojkin xijy xpabiky, ja wenkpidam ja'. ⁷ Ka'ap idø'øn ja wenkpi nitsoojkin ja jadu'uk y'ity. Yide'en idø'øn yjaty, jaa dø'øn jaa'y pøn meets nugo mjanchjaa'midip, ja Cristoxi dø'øn ja ñitsoojkin yjayiktigatswandip. ⁸ Tøxi meets tu'ugyi ndukmadøyy ja janchja'win, kuts wyinaty pøn nidu'ugin tyiktigatswa'añ midi øøts jawyeen tø n'uknigajpxy, møkts idø'øn ja Dios tya'ambøkit, jøts møy ayo'on tyukpaadit wan tjapøni ku ttu'undit jade'en, ø njadyimya'øtsi uk yjadymdioskugajpxy'ajtpi, ku wyinaty ja wenkpi janchja'win tpiakta'akwamidi sam muum ixyam yjawi ttunwa'andi. ⁹ Fxyam meets ndukja'myatskojmidi: Pøni jaa pøn ja wenkpi ixpøjkin mdawindaayiwajnidip, paat'ajtiyiyi ja' ñigida'agiyiyi ja Dios myøj'ayo'on.

¹⁰ Ti øts idø'øn jade'en xijy xyikwamp ku øts idø'øn jade'en nwa'añ. ¿Ja' øts idø'øn xijy ndsøjky jøts øts ja jaa'y kuwani xtyimgyupøkt jøts øts ja kuwani xtyimdyakajxa'aktit uk kuwani øy nayide'en xtyimgyupøkt ja Dios? Pø ka'axi, ku øts ja jeexyiyi ja'ayi nugo nda'ødyøki ya naxwiin'it jaa'y wyingujky, ka'ats øts ja Cristo jeexyiyi x'uktumbi'ajtni pø ja'axi ø tu'ugyi tø nnadyamiyøxyiyi.

Sudso ja Pablo tøyøkiyi'ñ kudanaabyi jøts ja tkudanit ja nwindson'ajtim

¹¹ Nijawi meets ya'at, migu'uktøjkti, ku yø nitso'ok'ajtin midi ø nnigajpxy, ka'ap jaa'y yø twinmaa'ñi. ¹² Kø'øm øts idø'øn ja Jesucristo yø tø xuknijawi. Kidi mee mwa'añ ku øts yø øy pøngapøn jaa'y tø xuk'ixpiky.

¹³ Tø meets idø'øn ja kajpxy ja madya'aky xnijawidi sa øts y'ijty njaa'y'aty ku øts ja chinaa'yin nbaduujnidi ja israelitøjkti. Mnija'wip meetsmi sa øts idø'øn y'ijty awa'an'ampy njemduñ ndeduñ pøn ja Dios tjanchja'widip jøts ø nyikudigøøwya'andi. ¹⁴ Øts idø'øn y'ijty ja israelit jaa'y chinaa'yin jawaani ka'pxy nbadumpy nika'ap øts ja nmiyaaktøjk ni tu'uk pøn jade'en kyamajada'aky sam øts. Jabi ja'ats øts idø'øn y'ijty n'amip njootpip ja mōjaa'dyøjk chinaa'yin. ¹⁵ Tigajts øts ndsinaa'yin. Ka'anin øts wyinaty ya naxwiin ngaxi'iky ku øts ja Dios wyinajty tø xwi'ejxni xwigoni, pya'ayo'owingøjxp øts idø'øn tø xwaadsøyy. Ku ja xøøw ja jumøjt paajty sam ttanibiktaajkiyi'ñ, ¹⁶ xjats øts idø'øn xuk'ijxy xuknijawiyiyi'ñ ja y'U'nk, jøts ngajpxy'øyyit ja nitsoojkin madya'aky ma pøn kya'israelitjaa'yidi, pøn tkanija'widipnim ja nwindson'ajtim Jesucristo. Kuts idø'øn ya'at jade'en yjajty, nipøn øts idø'øn nga'ats'ixy nga'ats'amidøyy, ¹⁷ ni nganijky øts jam Jerusalén ma jam pøn ja kudanaa'yin jawyeen tpadøjkidyøø. Tiy øts idø'øn ne'egi ndyimñøjkxkøyy jam Arabia etjotp, jamts ø nwimbijty jøts ø nja'jty jam Damasco.

¹⁸ Kyidigøøk jumøjtnim ø nnijky jam Jerusalén; winets øts ja Pedro ojts nminabaadyiyi jade'en'ampyts øts ja n'ijxy'aty, makmojkk xøøw øts ja jam nmøøtsinaay. ¹⁹ Ni tu'uk øts ja nga'ejxtøø jadu'ukpi kudanaabyidi, ja Jacobo øts ja'ayi nbaajt, ja nwindson'ajtim y'uch myigu'uk. ²⁰ Y'ijxy ñija'wip ja Dios ku ya'at tyiyi yjanchi midi meets ndanija'ayiyi. Ka'ap ø nugo ndaabyaaty.

²¹ Kuts idø'øm jade'en y'uknaxjy, jamts ø ndsøø'ñ jøts ø nnijky jam Siria etjotp jøts jam Cilicia nayide'en. ²² Ka'ap øts y'ijty x'ijxyidi adøm nmigu'uktøjkti midi tjanchja'wimiyidip ja Cristo jam Judeit etjotp. ²³ Ja'ayi dø'øn ja y'ijty tmadowdi ja kajpxy, ku ñømidi: "Ja' pøn y'ijty tkamaa'kxp ja janchja'wibitøjkti ja Cristo yjaa'y, ja' ixyam kø'øm tnigajpxnipy øy tsuj ja Dios kyajpxy ja Dios madya'aky yam ja y'ijty t'ukyikudigøøwya'añ." ²⁴ Tyamigunuu'kxyja'widip idø'øn ja Dios ja' ku øts ja ndsinaa'yin tø nyiktigach.

2

Ku ja Jesús kyudanaabyi tkupøkti ja Pablo jøts ja nayide'en tyu'unt

¹ Kyimakmajkts jumøjt øts jadigojk nniikxy jam Jerusalén møøt ja Bernabé, jøts ø nayide'en nbawaøt ja Tito. ² Paty øts jam nniikxy ku øts ja Dios xuk'ijxy jøts øts jam nnøjkxy. Jøts øts jam møøt amaa'tsk ngajpxy nmadya'aky pøn idø'øn jam tnigubajk'ajttip ja kudanaabyitøjkti Jerusalén. Jøts nduk'ejxtøø nduknija'widyøø sà øts idø'øn ja nwindson'ajtim y'ixpøjkin nnanky'ijxy pøn tkanija'widip pøn ka'israelit jaa'dyi. Njøpja'wip øts ja' ku øts ja jotmøn xkagupøktit paty øts ja jade'en nnigajpxy jøts øts ja ndunk nugo kyanaxt midt øts jam wyinaty ndumpy. ³ Xpudøjkidits øts ja'. Niti nisa ja Tito kyayiktuuñ, ka'ap ja ejxpajt ñe'kxkøjxp yikpiktaajky sam ja israelit jaa'y ttsøøni. ⁴ Ka'ap øts ya'at jeexyip ngajpxpaaty sà ja Tito yjajty kuk idø'øn kyanøjkxti ja ejxpi ja kowbi jøts tmadya'akwidettit mabaat adøm idø'øn nga'ukpadu'unindi ja møjaa'byi kutujk midt ja Jesucristo tø xukni'waajchim ku møøt n'ijtyim. Ja' idø'øn ja chojktip jøts adøm nbaduujna'andit ja myajaa'byi kyutujk sam ja israelit jaa'dyi. ⁵ Nijuuni øøts ja ngayikmøjtøki jøts ka' meets xwinma'aty ku ja'ayi ejxpajtingøjxp yikpiky ja yiknitsoojkin. Jaa ku øø ndsøky jøts meets tiy xmøøt'ajttittim ja winmaa'ñ sà ja yiknitsoojkin nbaajtyim.

⁶ Niti nisa øts ja xkanimaadyi pøn jam tnigubajk'ajttip ja kudanaabyitøjkti pøni sà øts ndunkjøjrp nyikyø'øy; øy ja yjamøjwindsønidi tuknax øts ja møøt nnayja'wiyidi, jabi tum jade'enxi adømdi Dios wyingujkp. ⁷ Ka'ap øts ja wenk ana'amin ja x'ukmøøñidi, jabi yja'gyukidixi ja' ku øts ja Dios kø'øm tø xanipiky jøts øts ja nitsoojkin ayuujk ngajpxyø'ty ma pøn kya'israelitjaa'yidi, sam ja Pedro yiktanipøjkmi nayide'en jøts nay ja'abi ayuujk tkajpxyø'ty jam israelit jaa'yjotp. ⁸ Nayide'en øts ja Dios myøk'ajtin kudanaabyi tø xpiktajkmi jøts øts ngajpxwä'kxjt ja y'ayuujk pøn ka'israelit jaa'dyi sam ja Pedro tø yikpiktajkmi kudanaabyi jam israelit jaa'yjotp.

⁹ Patyxi dø'øn ja Jacobo, ja Pedro jøts ja Juan pøn tnigubajk'ajttip ja kudanaabyitøjkti tja'gyukidi ku øts ja Dios tø xmø'øy ja øy'ajtin jøts ja yja' tñanky'ejxit. Ojts øøts n'ukyikøpatni møøt ja Bernabé, jade'en'ampy ja jade'en ttundi jøts ku øøts ja xmigukwä'añ jøts ku ja t'øyjawidi jøts øøts ndunk øy nyiknaxt jam ka'israelit jaa'yjotp, yam ja nayide'en ja tyunk tyikyø'ømyidi jam israelit jaa'yjotp. ¹⁰ Ja'ayi øøts idø'øn x'amidowdi ku øøts nximija'myajts'ett ja israelit ayoobitøjkti. Yä'ats øts idø'øn ne'legi nbadun'ijtpy, ka'ap øts yø'øbi winmaa'ñ n'ixmach.

Ku ja Pablo twindsø'øy ja Pedro jam Antioquia

¹¹ Ku øts jam møøt nnabyaajti ja Pedro jam Antioquiit kajpjotp, jam øts ojts ndawindsø'øy midt jam wyinaty tyumpy, ku ja ka'ap y'øgyaxi'iky. ¹² Ku ja møøt øy tyimy'ukaøjøy pøn ka'israelit jaa'y jøts ja jaayi tmatjstutkojmi, ja'ayi ku winaa'in ja israelitøjk yja'atti pøn wyinaty tø tkexy ja ja'abi jaa'y midt tpadundipnim ja møjaa'byi kutujk ja møjaa'byi tsinaa'yin sam ja y'ijty nayide'en tpadumi. ¹³ Nayide'en ttumidi sam ja Pedro pøn jaty jam wyinaty ka'israelit jaa'dyi, nayide'en idø'øn ja Bernabé paat ttumi. ¹⁴ Kuts øts idø'øn ja n'ijxy jade'en ku tkabadundi sam ja øgyajpxy ømyadya'aky ttanibiktaagi, yide'en øts idø'øn ja Pedro nnimaay jøts niduki'y'i tmaadomidøø ja janchja'wibitøjkti: "¿Tigøjxp mets ya'at jaa'y xukpadunwä'añ ja israelit jaa'y chinaa'yin? Pø tøts mets ja kø'øm x'ixmatsni jekyip o mets jam mjadyimyjagujpi."

Janchja'wingøjxp ñitso'okti ja israelit jaa'y sam o pøn jaa'dyi

¹⁵ Israelit jaa'y adømdi ja' ku jade'en tø ngue'exyindi, ka'ap adøm ja pøky nayide'en ndyimyikmajadaajkyindi sam ja' pøn ka'israelit jaa'dyi. ¹⁶ Tøts nnija'windi ku ka'ap adøm ja Dios xkupøjkindit ja' wyingujkp ku ja'ayi nbadu'undit ja Moisés kyutujk. Ja Jesucristoxi dø'øn ja yja' njanchja'wimp patyxi dø'øn adøm ja Dios Teety tø xkupijkyindi, kidi ja agøjxp ku ja Moisés kyutujk nbaduujñindi. Jabi nipønxi kyayikupøkt Dios wyingujkp ku ja Moisés kyutujk ja'ayi tpaduujnit.

¹⁷ Ku dø'øn ja Dios tø x'ukupijkyindi Cristo køjxp, jøts adøm ja Moisés kyutujk tø n'awimbejtigoyjmandi, ¿ja Cristo adøm idø'øn kø'øm xyiktuu'tigøø'yimp? ¡Ka' yjade'eni! ¹⁸ Ku øts ndungojmit midt tø n'uk'ixmach, ngø'ømbøky øts ja'. ¹⁹ Ka'ap øts ja Moisés kyutujk n'ukyiktuni ja'agøjxp ku øts ja Dios y'øy'ajtin jade'en'ampy ngapaaty; tø nja'gyuki jøts ku ja Dios yja' yikpaaty ku njanchja'want ja Cristo. ²⁰ Ka'ap øts nugo n'uktsinaa'ñ, tø øts ja Cristo xku'oogi kruskøjxp; ja' øts idø'øn ndu'ump midt ja Cristo y'øyja'wip jaa ku øts ja chinaa'yin ndajuky'ajti. Janchja'wingøjxp øts ya'at jujky'ajtin nyiknaxy ya naxwiñ ku ja Dios U'nk tø xjanchøky xjanchpa'ayø jøts nayide'en tø xku'oogi. ²¹ Ka'ap øts ja Cristo y'o'jkin nugo nyiknaxwä'añ; kuts Dios ja jeexyip xagupijkyindi ku ja Moisés kyutujk nbadu'unint, niti jeexyip kyawa'añ ja Cristo y'o'jkin, ka'ap ja jeexyip mæ tyuñ.

3

Midi nyikmajadaaqjimp: ja Moisés kyutujk uk ja nwindson'ajtim yjanchja'win

¹ ¡Meets gálatas jaa'dyi! ¿Tiku tømwinmaa'nmya'atti? ¿Jadits ku xka'ukpadunidi ja y'öybi ja tyiibi, pøn tømwinmaa'ndiyigöyidi? Jabi tøxi meets ka'pxy ndukmadooquixy jøts tøm xja'gyukidi ku ja Jesucristo tøm xku'oljkindi kruskøjxp. ² Uk'adsojimbetti meets idø'øn ya'at: ¿Sudso'ampy meets idø'øn ja Dios Teety ja y'Espíritu Santo tøm mmo'öyidi, ku ja Moisés kyutujk xpaduujnidi, uk ku ja tøm xmbøjkti ja yiknitsokpi ayuujk midi øøts tøm nngajpxy? ³ ¿Tiku xkaja'gyukidi? ¿Sa tømwa'andi, jade'en idø'øn xijy jawaani mjanchja'win myøjdit ku xpadunwa'andi ja Moisés kyutujk? ⁴ ¿Ti nugo meets jadi'iñi xyiknaxwa'añ ja m'ayo'ondi ku myikjemdundi myiktetundi ku ja mjanchja'win x'ukyiktso'ondajktøø? ¡Ka'ap jade'en pyaaf'aty, myiktunkpatpy meets ja ndijy ku kawine'en tøm'ayowdi! ⁵ Kuts ja Dios Teety ja y'Espíritu Santo tøm mmo'öyidi jøts ja x'ejxyidi ja myøk'ajtin ku ja tñank'ijxyiyi ja ijxyimbi ka'ijxyimbi, ¿tigøjxpts ja jade'en ttuñ? ¿Ja'agøjxp ja ttuñ ku meets ja Moisés kyutujk xujni? Pø ka'axi, pø ja'agøjpxxi ja ttuñ ku tøm xjanchjawidi sa øøts tøm nngajpxy.

⁶ Ejxpajtingøjxp idø'øn ja n'apteety'amøj Abraham ku ja tjanchja'wiyii'ñ ja Dios, ja'ayits Dios ja tagupøjkiyøø. Ka'ap ja ja'agøjxp yikupijky pøni ti ødyunk ja tyuun. ⁷ Paty meets idø'øn xja'gyukidit jøts ku ja Abraham ñamyayi ja t'apø t'oki pøn ja janchja'win nayid'en tmøøt'ajttip sam ja ojts tmbiky ja Dios. ⁸ Windi'ixyip idø'øn ja Dios ttukmadowni ja Abraham sa yikjaadyaañ jap nøyijxy jøts ku yide'en wyaañ: "Tuki'iyi ja naajx ja kajp ja kunuu'kxy'ajtin tpaattit pøn øts xjanchjawidit sa mets tøm xunjøpi." Paty ja Dios jade'en wya'añ ku ja janchja'wingøjxp tkupøkt pøn ka'israelit jaa'dyi. ⁹ Jade'ents idø'øn pøn ja Cristo tjanchja'widip, nayid'en ja kunuu'kxin ja tpaatti sam ja Abraham ja kunuu'kxin yikmøø ku ja Dios ja tjanchja'wiyii'ñ.

¹⁰ Pøn tyimyjabadunwändip ja Moisés kyutujk jøts ja jade'en ñitso'oktit, tøm Dios ja ttanibiktaajkiñi jøts ja yik'ayo'onmo'odit. Jabi yide'enxi dø'øn ja Dios kyutujk wya'añ jap nøyjøtpy: "Pøni pøn tuki'iyi tkabadungøjxp ya'at kutujk midi yap tøm yikjaadyaañ, paajtidip ja møj ayo'on ja' midi øts tøm ndanibiktaagi." ¹¹ Ja'gyukits idø'øn tyañ ku ja Dios ka'ap tkupiky pøn wyinaty ja'ayi tøm tpaduñ ja Moisés kyutujk, jabi yide'enxi ja Dios ñøky wya'añ: "Pønts ja Dios wyinaty kyupijky janchja'wingøjxp, jujky'ajttipts ja' xemikøjxp." ¹² Ka'ap ja Moisés kyutujk yiknitsøøky janchja'wingøjxp, yide'enxi ja wya'añ: "Pøni pøn tuki'iyi tpadungøjxp ya'at kutujk, ja'ayi nitso'ok'ajtp."

¹³ Tøts ja Cristo xukniwajchim ja ayo'on sam ja Moisés kyutujk ttanibiktaagi pøn ka'pxy tkabadundip. Yide'en'ampy tsoo ku ja Cristo møj pøkyumbi yiktijy jøts jade'en køømdsøky tpatwa'jkiyii'ñ ja møj ayo'on midi adøm xjapaat'ajttindip, jabi yide'enxi ja Dios ñøky wya'añ: "Pøn jam yikudiiy pkipyøjxp, møj pøkyumbi ja'." ¹⁴ Paty idø'øn ja Jesucristo y'ø'jky kruskøjxp jøts ja kunuu'kxin tpaattit pøn ka'israelit jaa'dyi nayid'en sam ja Abraham ja Dios ojts ñii'mxyiyi; jøts jade'en adøm niduknax nbaajttindit janchja'wingøjxp ja Espíritu Santo midi ja Dios Teety tøm tni'adsowi.

Ka'ap ja Moisés kyutujk tyik'amutski ja may'ajtin midi ja Dios ñi'adso'owi

¹⁵ Meets migu'uktøjk, ku dø'øn n'ukpiktaajkint ku tigati n'ukajpx'ø'yint n'ukajpxpaajttint, kuts ja yikjaadyaañ, kuwani dø'øn ja yikpadu'unt, sa tøm wyinguki ka'ap ja pøn tyiktigtatst. ¹⁶ Kuts ja Dios Teety ja may'ajtin tmøøwya'añ ja Abraham, nayid'en ja tmøøwymi jadu'uk ja jaa'y midi ja y'apip y'okip pøni wine'en ja tøm ñajtska'axyini. Sam ja Dios ñøky wya'añ: "Tu'ukpi jaa'y ja', ka'ap ja ñamayidi." Ja'ats idø'øn Cristo'ajtp. ¹⁷ Yide'en øts idø'øn ja ja'gyukin nyakwa'añ: Ja may'ajtin midi ja Dios ja Abraham ojts tyami'awaniyi, ka'ap ja mibaat niwine'enin tyiktigajch ja Moisés kyutujk midi meen ø'oojk maktaxk magø'pxy ja ee'pxmajk jumøjtñim. ¹⁸ Kuts ja Dios ja myay'ajtin jeexyip kuwani xukpadunwa'añin ja Moisés kyutujk, ¿ti may'ajtin idø'øn ja jade'en? Yide'en'ampyts idø'øn ja y'öyi ku ja Dios ja jadi'iñi ttamay'atwa'añ ja Abraham.

¹⁹ ¿Tigøjxpts idø'øn ja Moisés kyutujk nyikmøøyim? Paty idø'øn ja ix'oojknim yikpiktaajky tøm wyinaty tni'adso'owiñi ja may'ajit jøts ja jaa'y niduki'iyi tñijawidit midi idø'øn pøky'ajtp. Jaayi tyuñ kunim yja'aty ja Abraham y'apu'nk pøn nayid'en ja may'ajtin yiktami'awa'anii'ñ. Ku ja Dios ja kyutujk tyajky, ja ankilistøjk ja tyamigaxiyii'ñ jøts ja Moisés ja ttagidøkidit, jøts ja ttuk'ext ttuknijawit ja jaa'y. ²⁰ Ku ja Dios ja may'ajtin tmøøwya'añ ja Abraham, ka'ap ja ankilistøjk ni ja kugajpxtyøjk ja tkayiktuñ, køømyi ja nadyu'ugyi ttami'awa'anii'ñ.

Tigøjxp ja Moisés kyutujk yikpiktaajky

²¹ ¿Sats idø'øn ya'at nja'gyukant? ¿Ka'ap idø'øn ja Moisés kyutujk møøt ñamyayi ja Dios myay'ajtin? Ka'ap idø'øn yjade'eni, jaa ku ja Dios ja kutujk jeexyip tøm tyaky nitsoojkin møøt, ja'ayits ja jaa'y jeexyip yiktagupøjktip, ja'ayi jeexyip yikpadump pøni sa ja tyikutuky. ²² Jabi

jade'enxi ja Dios ñoky wya'añ ku adom nijum pøkñiwa'añ n'ejtandi. Kuts ja Jesucristo njanchja'wint, jade'en idø'on ja'ayi ja nitso'ok'ajtin nbaajtant midi ja Dios tø tni'adsowi.

²³ Tum ja Moisés adom ja kyutujk wyinaty tø xniwa'anandi ku kyamiñim ja Cristo, pø ka'animxi ja Dios Teety wyinaty xukja'gyukam ja Cristo yjanchja'win. ²⁴ Ja'abi kutujk adom y'ijty xuu'wa'anindip xuu'wejtsnindip kunim ja Cristo myiñ, kuts ja njanchja'wa'ant jade'ents ja Dios Teety xkupøjkindit. ²⁵ Kuts ja Cristo myiñ, ka'ap adom ja kutujk x'uk'ana'amnindi.

²⁶ Jabi ixyamxi adom ja Dios x'u'nk'ajtnindi ku ja Jesucristo njanchja'windi. ²⁷ Ku Cristo køjxp nnøbejtyindi nayide'en adom ja ndsinaa'yin nyiknajxyindi sam ja tø tjøptuni. ²⁸ Ka'ap y'ukpaat'ajtniyi adom nnayjiwejtsandit nnayjigajxandit o pøn y'israelitjaa'yidi kya'israelitjaa'yidi, tumbidi yikmidumbidi, sam ja tø'øxyøjkmidi yaa'dyøjkmidi; tu'ukpi jaa'y adomniidi ku ja Jesucristo nmøøt'ajtnandi. ²⁹ Kuts adom ja jade'en nmøøt'ajtnant, xjats idø'on tymbyaat'atyiyi ndeety'ap'ajtnant ja Abraham jøts xpaat'ajtnindip adom ja Dios myay'ajtin midi ja ñi'adso'wiyi'ñ.

4

¹ Ukja'gyuki meets ya'at: Ku tu'uk ja u'nkteety y'øøky jøts ttanipaaty tuki'iyi ja pyikta'aky ja myutsku'nk, kuts ja tymy'ukmutskiniim ka'anim ja pyaat'aty tpoekt ja maay øy ja tuki'iyi tjaja'ajtkixy. ² Jabi kuwanixi dø'on tjamimado'ot ja y'ejx'etpidi kunim ja yjumøjt tpaatt jøts t'axajit ja tyeety ja myaay. ³ Nayide'en adom idø'on y'ijty njajtyindi ku ja Cristo kyamiñim. Tum ja mōjaa'ychinaa'yin y'ijty nyikmajadaajkyindip øy ja nitso'ok'ajtin tjagamøødi. ⁴ Kuts ja xøow ja jumøjt yja'jty, kyajx ja Dios Teety ja y'U'nk tø'øxyøjk ñikøjxp jøts jade'en kye'jxy israelit jaa'yin, pyadungøjx nayide'en tuki'iyi ja'abi jaa'dyi ja chinaa'yin møøt ja kyutujk. ⁵ Paty ja jade'en myiñ jøts ja wa'ats'ajtin xmøøtyindit pøn y'ijty tpadundip ja Moisés kyutujk, jøts jade'en Dios Teety x'u'nk'ajtnindit.

⁶ Yide'en idø'on ja tñanky'ijxy ku adom ja x'u'nk'ajtna'am ku ja tkexy ja Espiritu Santo adom n'anmija'wingøjxp; jøts møk ja winmaa'ñ nmøøt'ajtnindit ku janch ja Dios Teety ndeety'ajtyindi. ⁷ Ja Dios Teety adom idø'on xtyimy'u'nk'ajtnindip, ka'ap adom nugo midumbidi. Paty adom idø'on xtyimbyaat'ajtyindi ja maay midi ja Dios Teety tø tni'adsowi, jøts midi ja Cristo xmøøtyindip.

Ku ja Pablo tpamay tpadajy ja janchja'wibitøjkti

⁸ Ka'ap meets y'ijtyip ja Dios Teety x'ijxyi, tum ja awanax agojnax meets y'ijty windsø'jkidip winja'widip, midi ka'ap ja Dios'ajtin tmøøt'atti. ⁹ Tø meets ja Dios Teety xpātni, uk yide'en'ampytis idø'on ne'egi ngajpxint, tø meets idø'on ja Dios Teety mbaajtniyi, ¿sudso meets idø'on xkupøjkojmi ja wenk tsinaa'yin midi niti møk'ajtin niti nitsoojkin kyaya-jkpy, nayide'en sam ja mgøøm ja'adi midi tø xuk'ixmatsti? ¹⁰ Jøts ixyam xjanch'ukjø'ejxti ku ja Dios m'øyjawiyyidit ku x'amaay'attinim ja xøow ja po', ja xøow ja jumøjt. ¹¹ A'ø'y'ampy øts yjawi njøptsø'øgi ku øts ndunkjøøjp meets køjxp tø wyindigøy.

¹² Migu'uktøjkti, tun ja may'ajt jøts xu'undit sam øts idø'on tø njøptuni ku øts ja israelit jaa'y chinaa'yin tø n'ixmajtsni. Kupøjki øts n'ayuujk, ka'axi meets nijuumi xmidsepwa'añ. ¹³ Øy meets xkupijky mijawyeen ku øts ja yiknitsokpi madya'aky nngajpxy øy øts wyinaty njabama'ayø. ¹⁴ Wan øts nba'am meets mja'axiyyidi, ka'ap meets xpawøjpy. Jade'en meets ne'egi xkupijky sam tu'uk ja Dios y'ankilis tñajtskaxi, uk sam ja Cristo yjawi køøm tymyja'aty ma meets jam. ¹⁵ ¿Tiku mga'ukjøtkujk'ajtnidi? Tymyøj meets ja mba'ayo'owin xnanky'ejxøø ku nbamaa'ychinaaay. Patyts ø nwa'añ, wanik meets yjawi mgøømween xtyimyju'jty jødsik øts ja xamay'ajttøø, jøts øts jade'en ndso'okt. ¹⁶ ¿Xmidsepwandip meets ixyam ku øts ja'ayi tø nngajpxy ja tyiibi yjanchpi?

¹⁷ Ja winaa'in ja israelit jaa'y pøn taagyøjxp yik'ixpøjktip. Ja'ayi dø'on ja yjanch'awejxtip jøts meets ja xmibøkt jøts x'ixmatstip ja m'øwynmaa'ñ midi meets tø ndukmadøy, jøts jade'en ja abiktyuu' xpadøjkiñidit. ¹⁸ Ka'ap ja sa y'ejxi ku meets ja møøt mnamyayiyidit, ja'ayi dø'on tsøjkip jøts yixxon ja y'øwynmaa'ñ y'ø'y'ixpøjkin tñgajpxtit, ejtp jade'en ttu'undit, ka'ap ja'ayi nugu ku meets jam møøt. ¹⁹ Meets u'nk meets unaj'k, møk meets jadigojk xjanchyikmay xjanchyiktajy. Jaayim øts yø jade'en njawit kunim ka'pxy ja Cristo xpadungøxtit samdam ja tsoky'aty. ²⁰ Jøk meets jam møøt jeexyip ixyam, jøts øts øy tsuj ne'egi ndukmado'ot ya'at winmaa'ñ; jabi ka'axi øts ja ayuujk n'ukpatni pø sudso meets njanchñijayit!

Ja Agar jøts ja Sara ñikøjxp ja ejxpajtin yikajpxidsimy

²¹ Meetsti, pøn ja Moisés kyutujk tpadunwajnidip, niğajpx meets sa dø'on wya'añ ja'abi kutujk. ²² Pø nømpxi ja wya'añ ku ja Abraham namajtsk ja y'u'nk tpaajty: tu'uk ja tumbi tyik'u'nkpaajty midi nitøøky'ejtnip, jøts jadu'uk ja kyøøm nidøøxy yja'. ²³ Ku ja nitøøky tøøxy y'u'nkpaajty nayide'eñim ja tpaajty sam o pøn tø'øxyøjk, jøts ku ja ñidøøxy ja y'u'nk

tpaajty kidi nugojip ja jade'en jyaty pø ja Diosxi y'ayuujk jade'en ka'pxp sam ja wyinajty tø tni'adsowi ku ja tø'oxy y'u'nkpaatt møjaa'gyijxñim. ²⁴ Ejxpajtin øts idø'øn ya'at nbikta'aky. Ja namajtskpi tø'oxy wa' idø'øn ja kyudanaadyip majtskpiky ja pudøjkin sa ja Dios tø ttanibiktaagi. Midukpiky, ja Agar idø'øn jade'en sa ja Moisés kyutujk, ja' midy yikmøøy jam Sina'i kojpkøjxp. Pøn ya'atpi kutujk ja'ayi tpadundip ka'ap ja ñitso'oktit. ²⁵ Kyudanaapy ja Agar nayide'en ja Jerusalén kajp midy ixyam ñajx'ajttip ja israelit jaa'dy'i ma dø'øn wya'andi ku ja nitso'ok'ajtin yikpaaty ku nbadu'unin ka'pxy ja Moisés kyutujk. Pøn jade'en tpadundip jade'en ñamyayi pyidsimy sam ja tø'oxy midy nitøøky'ejtndip. Yikmajadaktip idø'øn ja' ja'abi kutujk. ²⁶ Ma ja tsajpjotpit Jerusalén jam ka'ap ja Moisés kyutujk jam tyuñ, jamts adøm idø'øn xpaat'ajtyindi. ²⁷ Jabi ja'axi dø'øn ja Dios kyajpxy tyijpy ku yide'en jap nøkyijxpy wya'añ:

Mets tø'oxyøjk nøy,

mbaat'ajtyip mxonda'akt ja'agøjxp ku xpaatwa'añ ja m'u'nk.

Jotkujk mnayjawiit o mets nijuuni xjagapaaty xjaga'ijxñim m'u'nk.

Øy ja mniyaa'y tø waani mja'atmajst'u'dy'i, wimbetp ja jadigojk jøts ja m'u'nk may xpaatt, yam ja jadu'ukpi tø'oxyøjk nika'ap jade'endi.

²⁸ Migu'uktøjkti, ni'adsowigøjxp adøm ja Dios x'u'nk'ajtyindi nayide'en sam ja Dios ja Isaac tni'adsowiyi'ñ midy ja Sara y'u'nk'ajtpy. ²⁹ Jade'en sam Ismael, ja nitøøky tø'oxy y'u'nk, tmidsepwan'ijty ja Isaac, midy ja Sara myajnk'ajtpy, nayide'eñim ixyam ku adøm xmidsep'atwan'ijtyindi ja jaa'y pøn ja Dios yja' tkajanchja'widip, yam adøm ja Espiritu Santo ja myø'ajtin xyikjujky'ajtyim. ³⁰ Yide'en idø'øn ja Dios ñøky wya'añ: "Jigax ja nitøøky tø'oxy møøt ja y'u'nk, jabi ka'axi pyaat'aty'i nay ja'abi maay midy ja Sara myajnk'ajtyip." ³¹ Jade'ents migu'uktøjk idø'øndi, ka'ap adøm idø'øn ñamyayi x'u'nk'ajtyindi ja nitøøky tø'oxy, ja Abraham idø'øn ndejint ja ñidø'oxy ndaak'ajtyindip, ja'agøjxp ku ja Dios tu'ugyi yikjanchjawi.

5

Mimøk'atti pøn mnitso'ok'ajtin mduk'ixmatswajniyidip

¹ Tø adøm ja Cristo xukmajstuuajtyindi ja Moisés kyutujk, ka'ap adøm ja xukja'ajtnandi. Ejx'eitts ja nitsoojkin midy ja Cristo tø xamidsøjkyin.

² Madowdi yikxon. Pøni mdamøk'atwandip ja m'ejxpajt midy ne'kxkøjxp, ja Cristo meets idø'øn ja ñitso'ok'ajtin mgayikmøjtøjkijyidip. ³ Ixyam meets ndukja'myech jadigojk ku ja'abi jaa'y pøn ja ejxpajt tkupøjk ñe'kxkøjxp, kuwani dø'øn ja Moisés kyutujk tyimbyadungøjxit. Kuts jade'en tkatu'unt, ja kudigø'øyin idø'øn ja pyaatp. ⁴ Jam meets winaaggin winmay ku ja Dios ja xagupøjkint ku yikpadu'unt ja Moisés kyutujk, ja Cristo meets idø'øn ñamyayi abiky mbiktaknip jøts ja Dios Teety chojkin ja pya'ayo'owin x'ixmajtsidi. ⁵ Jabi adømxi nmøøt'ajtyindip ja jøp'eixin ku ja Dios Teety xkupøjkint jade'engøjxp ku ja Espiritu Santo xpuðøjkint jøts ku njanchja'wändit ja nwindson'ajtim Jesucristo. ⁶ Kuts ja nwindson'ajtim tu'ugyi nmøøt'ejtndit, wan ja ejxpajt tyikmøøt'aty tkayikmøøt'aty ne'kxkøjxp, niti ja kya'ukwani. Kuxi ja Cristo njanchja'want ja'axi tump, jøts ja'agøjpxi adøm nmigu'uk tum ja øybi ndamidsøjkyim.

⁷ Øy meets tø m'uktso'onda'aky jawyeen. ¿Pønts idø'øn tø myikwinmaa'nmya'adyidi ku xka'ukpadunidi ja tyiiby ja yjanchpi midy ja Cristo yja'ajtpy? ⁸ Jabi ka'axi ja Dios Teety jade'en mduñidi midy tø mmø'yidi ja nitso'ok'ajtin Cristo køjxp. ⁹ Pø yiknija'wipxi ku tu'ukpi jaa'y ne'egi namay tyikwinmaa'ndyigøy ja myigu'uk. ¹⁰ Dios køjxp øts ja jøp'eixin nmøøt'aty ku meets jadigojk x'awimbettit midy jawyeen tø nduk'ixpøkti; pøn meets idø'øn myikwinmaa'ndyigøøwajniyidip, ja' idø'øn ne'egi møk ayo'onbaatp øy yjadyimjapøni.

¹¹ Kuts meets jeexyip ndaguwani ku ja ejxpajt ne'kxkøjxp ja'ayi tu'ugyi tyuñ ka'ap øts ja israelit jaa'y jeexyip xmidsepwa'andi xmi'ekyidi. Niti nisa jeexyip kyawa'andi ku øts ja jeexyip n'agajpxmukixy ku ja Cristo tø xku'o'jkandi kruskøjxp, jøts ku nayide'en tyumidi ja israelit jaa'y'y'ixpøjkindi. Tu'ugyi øts ja'ayi nnigajpxy ja Cristo yja'. ¹² Pønts meets ya'at tsinaa'yin kuwani mdukupøkwajniyidip, paat'ajtyip jøts ja ne'egi kø'øm ñankyudigø'yididit.

¹³ Migu'uktøjkti, tø Dios mwi'ijxyiyidi jøts ka' kuwani x'ukpadunidi ja Moisés kyutujk jøts jade'en ja awa'ats'ajtin xpaattit. Ka'ap yø'øbi awa'ats'ajtin xyikwa'andit ku adøm o tigati ndyimdyu'unandit; ja' ne'egi xyikwa'andit jøts nixem niyam mnachokiyidit sam nayide'en mnabyudøkiyidit. ¹⁴ Ku ya'atpi tu'uk kutujk nbadu'unint, tuki'y'i dø'øn ja ndejint ja Dios kyutujk yikpadunguixy, midy yide'en wamp: "Tsok ja mmigu'uk samdam meets kø'øm mnachøkyi." ¹⁵ Kuts meets mnachepwa'añidi mnachep'ijxyidi, jnay'ejx'etidim, kidi meets kø'øm mnankwiyinmaa'ndyigøyidi jøts mjanchja'win jade'en xkayikwindigø'odyit!

Ja ka'ødyu'unin midy ja naqxwiñ yiktanaxp jøts ja øchinaa'yin midy ja Espiritu Santo yajkpy

¹⁶ Ya'at meets idø'øn ndukmadøøpy: jøts ja mdsinaa'yin xyiknaxtit sam ja Espiritu Santo mdamidsoykiidi, jøts jade'en ka' xyikmøj'attit ja ka'øybi mididi ya'it tsinaa'yin y'amidøøpy. ¹⁷ Ya'atpi ka'øybi mididi ngø'ømdsojkingøjxp nbadunwa'añindip, ka'ap ja Espiritu Santo møøt ñamyayiyi. Tum majada'akwandip ja' jøts ka' xuktunwa'añim pøni mididi adøm kø'øm njatsøky'ajtyimp. ¹⁸ Pøni janch ja Espiritu Santo meets mduu'møøjyidip, ka'ap meets ja Moisés kyutujk m'ukpaat'ajtniyidi.

¹⁹ Nigaxi'iky ja chinaa'yin ja'adi pøn ja ka'ødyu'unin pyadundip mididi ja ne'kx ja kopk y'amidøøpy. Ya'atpi pøky y'agujkpy yide'en ja yjujky'ajtin tyiknaxti: øy ja pøn yaa'dyøjk tø'øxyøjk møøt ñamyøø'tatyidi wan tja'amajtskidi tka'amajtskidi, tum ja axøø'kpi yigaappi y'amidip yjotpidip, ²⁰ ja awanax ja agojnax wyindsø'jkidip wyinja'widip, ja miku' tyunk ja kyamimaadip kyami'ejtipp. O pøngapøn myi'ekyidi, ja'ayi tyajotkujk'ajttip ku ja myigu'uk tyikjø'ødi tyikyaa'axti, øy ja myigu'uk ttami'ekyidi ja ñidsinaa'yin. Øy ja tigati ttatsep'ixa'adi, kyø'øm jøtkujk'ajtin ja ja'ayi y'ixaadyip, ja'ayi ja chøky'ajttip jøts ja wenk winmaa'yinygøjxp abiky ñabyikta'agiyidit. ²¹ Tyami'ama'at'ajttip o tigati ja myigu'uk, yikjaa'y'oo'k yikjaa'gyudigøøky tyunk'ajttip, ja amu'uky'ajtin kawindiy'ajtin yikmajadaktip. Tum yø'øbi axøø'kpijotpy yigaappijotpy idø'øn ja chinaa'yin tyiknaxti. Ixam meets ndukja'myech jadigojk, pøni pøn ya'atpi tsinaa'yin ne'legi tpadump niwindem xøøw ja tkapaattit ja Dios kyutujk ma ja yjaa'y tñitananit.

²² Ku ja Espiritu Santo ndsinaa'yin xuu'mø'øiyint, winets idø'øn wyingaxi'iky ja tsojkin ja pa'ayo'owin nixem niyam, ndaxondaajkindip ja Dios, jøts ja øy'ajtin nmøøt'ajtant, nja'gyujkandit nduda'aky'ajtant, n'amigu'ukjaa'y'ajtant, n'øyyaa'y'ajttindit, jøts ja windaay'ajtk ngayiktu'unindit, ²³ nmiyujy'ajttindip ja nmigu'uktøjkti jøts ka'ap ja ngø'øm ja' nyikmajadaajkindit. Niņa niwindem, niti kutujk adøm xkadatiidyyu'unint yø'øbi øyyaa'y'ajtk. ²⁴ Pøn ja Cristo ja'ajtyidip, tø dø'øn ja ñamyayi tkrustsumgøjxnidi tuki'iyi ja ka'øyyaa'y'ajtin mididi yikmøøt'ajtp. ²⁵ Pø tødam adøm ja Espiritu Santo ja jemchinaa'yin xjanchmø'øyidi, çits ku adøm idø'øn ja ngamibøjkindit pøni ma ja xuu'waa'wa'añindi?

²⁶ Ka'ap adøm idø'øn niti nnadyamikajxint, niti nganadyami'ajkiyindit. Jagam jixkø'øm n'ixwejsint ja tami'ama'at'ajtk.

6

Nixem niyam nabyudøkiyidi

¹ Meets migu'uktøjkti, pøn ja Espiritu Santo yja' tmøøt'ajtkøxyidip, ku xnijawidit ku nidu'uk ja mmigu'uk ja pøky tø myimajada'agiyiyi, pa'ayo'owingøjxp meets idø'øn ja xpudøkidit jatyi, jøts jade'en t'awimbetidit ja øybi tsinaa'yin jadigojk. Mdabajaa'ñaxtip ku meets nayide'en jotmøñ wyinaty ja pøky mmimajadaakniyidi. ² Nabyudøkiyidi nixem niyam jøts ni'amuki jade'en xmiimajada'aktit ja ka'øybi, jabi jade'enxi dø'øn wyinaty xpadundi sam ja Cristo ja kyutujk tniagjpxy.

³ Pøni jaaxi pøn jaa'y mididi tyimñamyøja'wiyip, nugo ja kø'øm ñawyindaay'aty. ⁴ Nidu'uk nidu'uk adøm idø'øn kø'øm nnija'wandit ku ja ndsinaa'yin nyiknajxyindi øy; kuts øy ñayjawiyyit kø'øm idø'øn ja chinaa'yin ja ñadya'ajawiyit, ka'ap ja myigu'uk yja' ttatøjkiyit. ⁵ Kija' adøm idø'øn ndsinaa'yin ngajpx niwaaajtsin Dios wyingujkpx.

⁶ Tabudøkidi ja mbikta'aky pøn ja øygajpxy ømyadya'aky ñanky'ejxyip.

⁷ Kidi kø'øm mnawyindaay'atyidi, jabi ka'axi ja Dios jadi'ini yiktañ pøn ja nugo taguyatwajnip. Ku tigati n'ukneeppint, nay ja'ayi dø'øn n'ejxmukoajmamp nbøkmukoajmamp ku ja xøøw ja jumøjt wyinaty tpatni. ⁸ Nayide'ents idø'øn ja tsinaa'yin: ku pøngapøn ja'abi tsinaa'yin nugo tpaduñ mididi ja ñe'kx ja kyøjpk ja'ayi y'amidøøpy, ja o'jkin tigø'øyin idø'øn ja wyinaty pyøkmujknip kyonmujknip ku ja tiidyyu'unin mye'ent kyida'akt. Pønts jade'en tpadump sam ja Espiritu Santo ñadyamidsøkyiyi, nay ja'ayi dø'øn kø'øm mo'øjyidip ja jujky'ajtin xemikøjxp. ⁹ Ka'ap adøm idø'øn ja xwindsejppindit ku ja øybi tsinaa'yin nnanky'ejxindit, ku jade'en ndu'unindit xjats idø'øn nyikmø'øyindit ja kawinmaabyi kunuu'kxin. ¹⁰ Paty meets idø'øn xun'ett, jøts pøngapøn xpudøkidit winjaa windsojk pøni juuni pyaat'aty. Ja'abi jaa'y idø'øn ne'legi mguidyimyya'dyigø'ødyip mididi adøm nmigu'uk'ajtyindip tu'ukpi janchja'wingøjxp.

Ku ja Pablo kyajpx'abajtiñi xjats y'ukajpxwejni y'ukajpxpoo'kxni

¹¹ Kø'øm meets ixyam yikxon ndyimñijayi sam idø'øn pyaat'aty jøts yikxon xja'gyukidit. Ejxti mabaat øts yø nja'ay myøji. ¹² Yø'øbi jaa'y pøn meets mdaguwa'anidyidip ja ejxpajtin ne'kxkøjxp, ja'agøjxp ja ttundi jøts ja øy yik'ejxtit yiknimadya'aktit jøts ka'ap jade'en pøn chep'ejxyidit chepjawiyidit ku jeexyip ja Cristo yja' ja'ayi tñanky'ixpøjkiyidi ku tø xku'o'jkandi kruskøjxp. ¹³ Øy ja ejxpajtin ne'kxkøjxp tjamøødidi, ka'ats idø'øn ka'pxy kø'øm tpadundi mididi ja Moisés kyutujk ñigajpxxy. Kuwani meets ja mdukupøkwa'añiyi ja ejxpajtin ne'kxkøjxp, jøts ja jade'en ja'ayi ñadya'agajpxxyidit ñadya'øyyawiyidit ku meets ja yja' tø

xpadøjkiniyidi. ¹⁴Jøts øts ka'ap ø niti nnadyamikexyiyi, ja'ayi øts tu'ugyi nmøk'ajtin'ajtpy ku ja nwindson'ajtim Jesucristo tø xku'oogi kruskøjxp. Paty øts ja yigaappi naæwii'niit tsinaa'yin nga'ukmøkpiktakni, nika'ap øts ja nayide'en xukmimajadakni. ¹⁵Jaa kuxi adøm ja Cristo Jesús møøt nnamyaajyindi, niti kyawa'añ pøni jam ja nmøøt'ajtyindi ngamøøt'ajtyindi ja ejxpajtin ne'kxkøjxp; ja' idø'on ne'egi tump pøni tø ja axøøkpi n'ixmajchindi jøts ja ndsinaa'yin tø nyiktigajchindi. ¹⁶Wan ja tpaatti tkupøkti ja øy'ajtin kunuu'kx'ajtin pøn ya'at winmaa'ñ tpadundip, jøts møøt ja israelit jaa'dyi pøn idø'on ja Dios tyimyja'ajtiyidip.

¹⁷Ixyam ø nnigajpxy jøts ka'ap øts pøn xyiktuu'dukt ku nnigajpxt ja Cristo y'ixpøjkin; jabi yamxi øts nmøøt'aty ja ejxpajt ku tø nyikwøpy nyiktsiiky ku øts ja Cristo ngudani.

¹⁸Meets migu'uktøjkti, jade'en ø nwa'añ jøts xpaattit xemikøjxp ja Dios kyunuu'kxin. Tiigyajpxy idø'on, jade'en idø'on ja yjatt.

JA NØKY MIDI JA PABLO TYANĜAJX JA EFESIHT JAA'Y

Ku ja Pablo tnjayi pøn tjanchja'widip ja nwindson'ajtim Jesucristo yja' jam Efeso

¹ Øts Pablo'ajtpi, Dios ø kø'øm chojkingøjxp tø xpikta'aky Jesucristo kyudanaabyi jøts ø jade'en xyikugajpxy'aty. Ya'at nøky ja' øts yø ndanija'ayidip ja Efesiht jaa'y pøn jaty ja Dios yja'ajtpy jøts tjanchjawidi nayide'en ja nwindson'ajtim Jesucristo. ² Paat meets ja kunuu'kxin ja øy'ajtin midi ja Dios Teety møøt ja nwindson'ajtim Jesucristo yajkpy.

Ja møj øy'ajtin midi nbaqtimp ku Cristo nmøø'ejtin

³ Ngajxajkindip ja Dios midi tyeety'ajtpy ja nwindson'ajtim Jesucristo, jabi tøts ja kunuu'kxin xmø'øyim ku ja Cristo nmøø'tijtyim. Ja' y'ø'y'ajtin tø xanigajxa'andi ma ja chøøni. ⁴ Namga'anim naxwiil'niit cho'onda'aky jøts ja Dios Teety kø'øm xwi'iijxyindi xwigø'øñindi Cristo køjxp ku ja xku'ayo'ombaajta'andi, jøts jade'en adøm wa'ats nwingunøjksa'ant ja' wyingujkp niti pøky niti kadyeey. ⁵ Windi'ixyip idø'øn kø'øm ja Dios Teety ttanibiktaajkiñi jøts ja x'u'nkupøjkit Jesucristo køjxp. ⁶ Paty ejtp ngajxajkindit ja Dios sa tø tnanky'ijxyi ja myøj kunuu'kxin, ku ja y'U'nk tø tnajtskaxi midi kawinmaañi chøjky. ⁷ Ku xtsojknajxyim adøm ja Dios, paty adøm tø xyiknitsøjkyim ku ja y'U'nk Jesús wyidsuun wyidajxy, jøts y'o'jkingøjxp xpojkpimee'kxyim. ⁸ Kajaa Dios tø tnanky'ijxyi ja chojkin ku tø xmø'øyim ja wejin ja ja'gyukin, ⁹ jøts jade'en tø tnanky'ijxyi ja yu'uchwinmaa'ñi midi adøm ja kø'øm tø xanibiktaajkim sa dø'øn ja ttunwa'añ. ¹⁰ Jatp idø'øn jade'en sa dø'øn ja wyinmaa'ñi tø ttanibiktaagi, kuts ja xøøw kuts ja jumøjt tpaatt, winets ja Dios Teety tuki'iyi ttigidøjkyøxt ja nwindson'ajtim Jesucristo ti jaty ejtp øy madsoo, yjanaxwiñi uk jyatsajpjøtpyi, jøts ja amuum kø'øm tnigubajk'att.

¹¹ Kuts adøm idø'øn ja Cristo nmøø'tajtyim, windi'ixyip adøm ja xwi'eixna'andi xwigø'onandi ja Dios Teety jøts jade'en xmø'øyindit midi xamidsojkimp. Tuki'iyi dø'øn ja ttuñ sa ja chojkin tø ttanibiktaagi. ¹² Tø dø'øn ja ttuñ jade'en jøts øøts idø'øn ja Dios ndakajxa'akt ja y'ø'y'ajtin ja myøj'ajtin, jabi øøtsts idø'øn jawyeen tø njanchjawi ja Cristo. ¹³ Meets nayide'en, ku xmadowdi ja Dios tyiy'ajtin midi tnigajpxp ja yiknitsoojkin, jøts ku xjanchja'widøø ja Cristo, jade'en idø'øn ja Dios Teety mdamiguy'ejxidøø ja y'Espiritu Santo, jøts ja myiktami'ejxkapidit jøts ku meets ja Dios mja'atyidi. Jade'ents idø'øn ja y'ayuujk tyikniwaajch sam ja jawyeen tø tnigajpxy. ¹⁴ Nay ja Espiritu Santo midi meets m'ejxpajtin'ajtpy, ja' myikta'ejxkaptip ku ja Dios ja myaay tyikwa'kxt. Jade'en ja Dios ttu'unt ku wyinaty tø tyiknitsoojkøjxni midi tø tniwanguixy. Jade'ents ja Dios yikwindsø'øgit yjtingawjat myøj'ajtingøjxp y'ø'y'ajtingøjxp.

Ku ja Pablo t'amidøøy tpøktsøøy ja Dios jøts ja wejin ja ja'gyukin yikmo'odit pøn ja Dios tpadundip

¹⁵ Tø nnijawi ku meets møk ja nwindson'ajtim Jesús x'ajot'aty, ku mee nayide'en øy tsuj ja tsojkin xmø'øy pøn jaty ja Dios ja'ajtyidip. ¹⁶ Ejtp øts ja Dios ndamøjawi ndagunuu'kxyjawi ku ja mgunuu'kxyidi, ka' mee nja'dyigøy, ejtp meets nni'amidowdi nnibøktsowi ku ø ndsapkajpxy. ¹⁷ N'amidøøpy øts ja kunuu'kxyi Dios Teety midi tyeety'ajtpy ja nwindson'ajtim Jesucristo jøts ja mmo'o'jyidit ja wejin ja kajin midi yikxon mdukja'gyukiyidip sa ja y'ejxi tyiyi. ¹⁸ N'amidøøpy øts nayide'en ja Dios jøts mgujajyidit mgudøø'kxyidit, jøts jade'en xnijawidit ti dø'øn m'awejxtip midi tø myiktaniwaadsowidi, ku janch kawinmaañi ja Dios tyagumaawyampy pøn ja yja'ajtpy, ¹⁹ jøts nayide'en ø n'amidøøy ja Dios jøts xnijawidit ku niti kya'adaniiyi kya'adsø'øgiyi ku kawinmaañi ja Dios myøk'ajtin midi adøm ja xabudøjka'amp ku adøm ja njanchja'wa'andit, ²⁰ nay ja'abi møk'ajtin idø'øn midi ñanky'ejxi ku Cristo jap oo'kpi agujkpy wyimbijty jujky jadigojk, jøts ku ja nayide'en chajpajtnaa jøts ja Dios Teety y'aga'ngyøø'øm ja kutujktaajk myøøjyi. ²¹ Jawani møj idø'øn ja Cristo yikpiktaajky, nipøn windsøn nipøn yikutujkpi tkami'aguujpxy'aty ya naxwiñi jøts tsajpjotp, ixyam jøts xemikøjxp nipøn ja tkamibaat'att. ²² Tuki'iyi dø'øn midi ja Dios tø tyikøjy, ja Cristo dø'øn tñitanaagyøjxp, ja' idø'øn tnigubajk'ajtp niduki'iyi pøn jaty ja Dios tjanchja'widip. ²³ Jade'en sa tu'uk ja jaa'y ñine'kx kyaka'pxyi pøni ka'ap ja kyubajk ja te, nayide'en idø'øn ja janchja'widitøjk ndejint kyaka'pxyidi pøni ka'ap ja Cristo ja ñigubajk'atyidi, jøts ja ka'ap ja myøk'ajtin myø'øyidi pø ja'axi tuki'iyi tyik'ejtp tyiknajxp ja naajx ja tsajp.

2

Tø ja Dios xyiknitsøjkyim chojkingøjxp

¹ Tø meets m'anmija'win y'ats'oorkti ku mdsøøniði øky'agujkpy, jøts tø yjujkyøjkti ja m'anmija'win jadigojk Cristo køjxp. ² Ku meets y'ijty xpadundi ja ka'øwynmaa'ñi midi tpadundip pøn ja Dios tka'ijxyidip, ku ja miku'windsøn yja' xpabøjkidi midi tkajxp ja tyumbitøjk jøts ja t'atskajpxjot'amøjkidit pøn ja Dios tkabadundip. ³ Nayide'en øø tø njaa'y'aty samdam meets. Tum ja' øøts y'ijty ndumpy ja axøøk ja kya'øybi midi ja ne'kx y'amidøøpy, jøts tum ja' midi yigaap pidsømp winmaa'ñjøtpty. Paty øøts idø'øn xjapaat'aty jøts øøts ja møj ayo'on nyikmo'ot nayide'en sam o pøn pojkpitumbi. ⁴ Janch møj ja Dios pya'ayo'owin ⁵ ku tø tyikjujkyiky adøm ja n'anmija'win Cristo køjxp, øy adøm ja axøøki ja yigaappi tø yjayik'o'jkniyi ja n'anmija'win. Jade'ents idø'øn niduki'iyi adøm tø nniitsoojknandi ku ja Dios y'øy'ajtin myøji. ⁶ Ku ja Dios tø tyikjujkyiky ja Jesucristo, nayide'en adøm idø'øn ja ñamyayi møøt njujukpyikyim. Nayide'en idø'øn ja tpaaty ndejint ku ja tsajpjøtpty pyatøjkiñi møøt adøm ja nnijkxyim jøts ja jap møøt n'ejint. ⁷ Paty øø Dios Teety jade'en ttuñ jøts t'ejxtit tñajawidit pøni ti pøni pøn wyinat memp kidakp, jøts jade'en tnanky'ejxtit mabaat ja chojkin mabaat ja y'øy'ajtin tø xmø'øyim Cristo køjxp. ⁸ Jabi ja Dios chojkingøjpxxi meets tø mniitsoøky ku xyiktundi ja mjanchja'win. Ka' meets kø'øm xmøøt'aty ja ñankñits'o'ok'ajti, ja Dios ja tyajkp. ⁹ Ka'ap ja n'øchinaa'yin xyiknitso'ok'ajtint midi adøm kø'øm njatu'uñidip, paty ja nganadyamikajxandit. ¹⁰ Tø ja Dios Teety xanibiktajkim Jesucristo køjxp jøts ja øchinaa'yin ndu'unint sayim ja wyinmaa'ñi ja tmøøt'aty.

Ja øy'ajtin midi ja Dios Teety tø xmø'øyim Cristo køjxp

¹¹ Ja'myatsti sà meets y'ijty mjatti mgubatti ku meets ja israelit jaa'y xkamigu'uk'attinim, kø'ømyixi ja y'ijty ñadyamøjajwyidi ja Dios y'ejxpajtin midi pyiktaktip ñe'kxkøjxp. Paty meets wenk myiknimadya'aky wenk myikniwinmayi ja'agøjxp ku xkamøøt'atti ja'abi ejxpajtin. ¹² Agoostujpy adukytujpy meets øjts mdsøøni, ni xkanijawidi pøni pøn pøni ti ja tø nniimi midi tyejtij Cristo. Aduky meets ja mduu', tsi'kxy meets ja mduu' mǎ y'ukyiknijawit ja øyajpxy ja ømyadya'aky pøni sadam ja Dios t'ødyunwa'añ ja naxwi'ñit jaa'y. Ja Israelit jaa'y ja ja'ayi y'ijty tmøøt'ajttip, ka'ap y'ijty tu'ugyi ja Dios Teety x'ajot'atti, niti awejxin niti jøp'ejxin xkajagyapti ya naxwiñ. ¹³ Ixyamts meets ja Jesucristo mja'ajtniyidi y'o'jkingøjxp, o meets jagam jixkø'øm ja mdsinaa'yin tø xyiknaxy. ¹⁴ Tøts adøm ja xmø'øyim ja øy'ajtin ja jotkujk'ajtin. Jabi ja'ats idø'øn tø t'awaamuky t'agonmuky ja israelit jaa'dyi møøt pøn ka'israelit jaa'dyi. Jade'en ja tsep tø tyikudigøy. ¹⁵⁻¹⁶ Kuts ja y'o'jky jam kruskøjxp, jade'ents idø'øn tyikudigøy ja Moisés kyutuujk midi kuwani yikpadump y'ijty, midi tyamøk'ajttip ja israelit jaa'yiyi. Jøts jade'en ja jadu'uk tsinaa'yin tyiktso'ondaajky, jøts jade'en tyiknamyujki ja israelit jaa'y møøt pøn ka'israelitjaa'y'ajttip. Tu'ugyits jade'en yjaa'y'attit jotkujk Cristo køjxp jøts jade'en ja Dios Teety tkamidsep'attit.

¹⁷ Jade'en'ampy ja Cristo myiñ jøts ja øyajpxy ømyadya'aky tñigajpxy sǎ dø'øn ja øy'ajtin nbaajtint midi meets y'ijty mganija'wipnim, jøts midi øøts tø ngaja'gyuki, øy øøts ja tø nja'ixy, øy øøts ja tø njamøøt'aty. ¹⁸ Jabi Cristits adøm xuu'mø'øyindip sudso ja Dios Teety nbaajtintidi ni'amuki wan t'israelitjaa'yidi wan tka'israelitjaa'yidi, jøts tu'ugyi adøm idø'øn ja Espiritu Santo myøk'ajtin nyiktu'uhimp. ¹⁹ Migugajp ja'winiyidip meets ixyam niduki'iyi ja Dios janchja'wibidi, ka'ap ukjade'eni sam y'ijty. Ja Dios meets idø'øn mja'ajtniyidip møøt ja'adi pøn jaty ja y'u'nkja'wip. ²⁰ Jade'en idø'øn tpaaty ja Dios kyajp sam tu'uk ja møj tøjk midi mði tsaǎ tø yiktapojtsøøñ; jøts jade'en ja Cristo sam ja møj tsaǎ midi yiktapojtsø'omp, jøts ja kyudanaabyitøjk møøt ja kyu'aaw jade'endi sam ja mutsk tsaǎ una'jkindi. ²¹ Adøm idø'øn tsaptøjk'ajtindip ndejint pøn tjanchja'widip ja Dios. Kuts ja jaa'y pøn tka'ijxyidip ja Dios jøts ja tjanchja'wiñidi, jade'ents adøm ja ndsaptøjk myøjandi midi ndejint tø yikpojtsøøñ Cristo køjxp. ²² Nayide'en meets idø'øn ja Dios mja'ajtmiyidi jøts tø mduktatøjkmiyidi ja y'Espiritu Santo.

3

Ku ja Pablo tñigugajpxy'aty ja øyajpxy ja øy'ayuujk jøts ttukmadøy pøn ka'israelit jaa'dyi

¹ Ixyam øø puxøjkjøtpty ndsøøni ja'agøjxp ku meets tø ndukmadøy ja Jesucristo ja yja' ku meets nayide'en mbaat'atyi xpaatt ja' y'øy'ajtin. ² Pøn nniija'wiñip meets ku øts ja Dios y'øy'ajtingøjxp tø xpikta'aky jøts øts ja yja' nniigajpxit jøts meets ja øchinaa'yin xyiknaxjnit. ³ Sam meets jap nøkyjøtpty jawyeen tø nduk'ixy tø nduknijawi ku øts ja Dios tø xukmadøy ja yu'uch winmaa'ñ, ku meets nayide'en xpaatt ja' y'øy'ajtin sam israelit jaa'y ja tø tpaatti. ⁴ Ku ja nøky xkajpxtit, jap meets idø'øn x'ext xñijawit ku øts ja Dios yu'uch winmaa'ñ nniija'wiyi midi ja Cristo yja' tñigajpxip. ⁵ Nijuuni ja'abi winmaa'ñ tø yiknigajpxy tø yiknijawi, ixyamnim idø'øn ja Dios jade'en tø ttuk'ixy ja kyudanaabyitøjkti ja kyugajpxtyøjkti ku ja Espiritu Santo tø y'agajpxiniyidi. Ja'abi jaa'y ja'adi, pøn ja Dios tø ñadyamiyøjxniyidi. ⁶ Yaj'at idø'øn yu'uch wyinmaa'ñ'ajtp midi ja Dios myøøt'ajtpy: ku dø'øn jade'en tjanchjawidit ja

øgyajpxy ja ømyadya'aky midi xyiknitso'ok'ajtindip, winets jade'en ni'amuki tpaattit ja Dios myaay ja israelit jaa'dyi sam nayide'en pøn ka'israelit jaa'dyi. Jøts jade'en ñamayaidit jøts tpoøktit ja' midi Dios tøn tni'adsowi Jesucristo køjxp.

⁷ Ka'ap øts xjapaat'aty ku øts ja øy'ajtin tøn nyikmø'øy jøts øts ja øgyajpxy ja ømyadya'aky tu'ugyi ndu'unt, jabi jade'ents idø'øn ja Dios ja myøk'ajtin tøn xamidsøky. ⁸ Meets niduki'iyyi pøn ja Dios ja'ajtidip, øts idø'øn nayja'wiyip tyimyutsk, jøts øts jade'en ja Dios tøn xanipiky jøts ndukmado'odit pøn ka'israelit jaa'dyi sa ja myøji ja Cristo y'øy'ajtin. ⁹ Tø øts ja Dios jade'en xanipiky jøts øts ja naxwii'ñit jaa'y nduk'ext nduknijawit sa dø'øn ja yu'uch winmaa'ñ windi'ixyip tøn ttanibiktaajkiñi, jaayip ku ja naxwii'ñit tyiktso'ondaajky. ¹⁰ Paty idø'øn ja jade'en yjajty, jøts ja yiktuk'ext yiktuknijawidit ja ankilistøjkti jøts nayide'en pøn jaty møj'ajttip jap tsajpjøtpty mabaat idø'øn ja Dios ñijawi'ajtin yja'aty. Jade'en ja tñanky'ijxyi ku ja tpoøkmuky tkonmuky ja øybi ka'øybi jaa'y, tu'ugyi tñankñamyuky janchja'wingøjxp. ¹¹ Jade'en ja tøn ttuñ sa ja windi'ixyip tøn ttanibiktaajkiñi ku ja nwindson'ajtim Jesucristo jade'en ja chinaa'yin tñanky'ijxyi tñankñijawiyi. ¹² Ku adøm ja nwindson'ajtim Jesucristo njanchja'wim, agujk jotkujk adøm nwingunøjkxiñant ja Dios Teety, niti tsø'øgi niti jøpjawi ja', ja'ayi nmøk'ajtim ja njanchja'win. ¹³ Paty meets nnøjmi jøts ka'ap mjotmay'ooktit ku øts yap puxøjkjøtpty n'ayøy meets køjxp. Jotkujk meets idø'øn ne'egi mnayjawiyidit, jabi jade'ents idø'øn ja Dios yja' yikmijaty.

Ja Cristo chojkin

¹⁴ Ku nja'myatskixy midi ja Dios tøn ttuñ, jats øts jade'en ja Dios Teety y'øy'ajtin ngunuu'kxyja'wiyi pøn tyety'ajtpy ja nwindson'ajtim Jesucristo, ¹⁵ jøts pøn tyajkp ja wyinmaa'ñ ja yjujky'ajtin jap tsajpjøtpty sam naxwiñ. ¹⁶ N'amidøøpy øts ja Dios Teety ja myøk'ajtin midi myøøt'ajtpy kawinmaa'ni jøts ttamigaxit ja Espiritu Santo, jøts jade'en myikjotmøk'atyyidit. ¹⁷ N'amidøøpy øts jøts jam m'anmija'wingøjxp y'ettit xemikøjxp ja Cristo jade'en ku janchja'win xmøøt'atti, jøts jade'en ja tsojkin møk xmøøt'attit midi ja Dios mdamiyoxitp, ¹⁸ jøts jade'en xja'gyukidit møøt pøn tpaøjktip ja nwindson'ajtim Jesucristo mabaat idø'øn myøji ja chojkin midi kawinmaa'ni. ¹⁹ Ni'amido'ojip meets jits x'ejxat xnijawidit ja'abi tsojkin jøts jade'en tuki'iyyi mdatøjkigyøjxyidit ja Dios, øy ja ka' tyimykñijawigyixy mabaat idø'øn ja myøji.

²⁰ Ixyamts idø'øn pyaat'aty jøts adøm ja Dios ndagunuu'kxyja'wa'ant ndamøja'wa'ant ja'agøjxp ku møj ja myøk'ajtin midi tøn xjamø'øyim. Ka'ap adøm ja nwinmaa'ñ myajadaajkyim, ni ka'baat ja yikja'gyuki mabaat idø'øn ja myøk'ajtin myajada'aky midi adøm xyiktu'unimp. ²¹ Wan twindsø'jka'andi twinja'wa'andi ja Dios Teety xemikøjxp ni'amuki pøn jaty ja janchja'wiyip Cristo køjxp! Jade'en idø'øn ja yjatt.

4

Tu'ugyi adøm nayja'wiyindi Espiritu Santo køjxp

¹ Ja nwindson'ajtimøjxp øts tøn nyiktsumy, paty meets n'amidøy nbøktøy jøts øy yikxon mjaa'y'attit sam idø'øn pyaat'aty ttu'undit pøn ja Dios tøn wyi'ijxyidi wyigøñidi, ma meets idø'øn nayide'en tøn myikpiktakmidi. ² Tuda'aky'atti, møøt'atti ja maa'kxujkin; nachokidi nixem niygam, kidi xa'ambøkti ku ti ku sa mjatti. ³ Tu'ugyi m'ettit, ja Espiritu Santo mbudøkyyidip jøts jade'en xemikøjxp y'ett ja jotkujk'ajtin. ⁴ Tu'ukpi jaa'y adøm pøn tpadundip ja Dios, tu'ugyi ja Espiritu Santo jøts tu'ugyi nayide'en ja awejxin nmøøt'ajtyim midi ja Dios tøn tni'adsowi. ⁵ Tu'ugyi adøm ja nwindson'ajtim, jøts tu'ugyi ja njanchja'win, jøts ja nnøbjatin, ⁶ tu'uk ja Dios midi tñideety'ajtp niduki'iyyi tuknax. Ja' tñigubajk'ajtp niduki'iyyi, adømgøjxp ja tñanky'ijxyi midi ja tyunwampy, jøts møøt ja y'ity pøn jaty ja yja'ajtpy.

⁷ Kija' adøm idø'øn tøn nyiktanibiktaajkindi ja ndunkjøøp, sam ja Cristo kø'øm tta'ejxi, jade'en ja tøn tyaky. ⁸ Paty ja Dios jade'en ja kyajpxy wyaa'ñ ku ja nwindson'ajtim wyimbijty jadigojk tsajpjøtpty ku tyik'awa'atpsidøømgijxy pøn ja miku' wyinajty tøn myimajadaajkiñiyidi jøts tmo'ot ja myøk'ajtin ja naxwii'ñit jaa'y.

⁹ ¿Tits idø'øn jade'en tyijpy ku dø'øn ñiimy ku wyimbijty jadigojk jap tsajpjøtpty? Ja' idø'øn ku ya myiñi naxwiñ jøts jade'en ja amutsk'ajtin tpaajty. ¹⁰ Nay ja' idø'øn patøjkiñi tsajpjøtpty midi ja atsneen naxwiñ, jøts jade'en yikpiktaajkiñi møjwindsøn jøts o ma jade'en tyiknigaxø'økt ja myøk'ajtin. ¹¹ Jøts jade'en nidu'uk nidu'uk tmøøy kija' ja jaa'y tyunkjøøp, jam pøn kudanaabyitøjkti, jam pøn kugajpxtyøjkimidi, pøn ja øgyajpxy ømyadya'aky tyikyø'ømyidip tyuknaxmidip, jøts jam pøn kajpxwejmidip yik'ixpøjkimidi. ¹² Jade'en ja yjaa'y ja ojs tuu'mø'øy sudso ja tyunkjøøp ja padu'undit, jøts jade'en myiwenit ja yjanchja'win pøn jaty Cristo yja'ajtpy, ¹³ jøts kunim adøm ja yikxon ni'amuki ni'aga'pxi nnija'wa'andit ja Dios Unk janchja'wingøjxp. Winetnims ja nwinmaa'ñ myøktaajkindit jøtsnim idø'øn iyy nayide'en ndu'unint sam ja Cristo. ¹⁴ Ka'ap adøm ja mutsk winmaa'ñ n'ukmøøt'ajtna'ant sam o pøn tigati tpadungøjy ja'ayi ku tsuj tmadøy, øy ja

yjanchi kyajanchi myøjpiktakpy ja'. ¹⁵ Ku adøm idø'øn ja Cristo n'aduunaxkøjxint, jaanims idø'øn nmøøt'ajntin ja tsojkin jøts jade'en nduk'ejxna'ant nduknija'wa'ant ja nmigu'uk ja tiy'ajntin, jabi Cristits adøm xnigubajntimp. ¹⁶ Ku ja tnigubajk'aty, sa dø'øn øy ñijky ñaxy. Pøni sats adøm nidu'uk nidu'uk tø nyikmø'øyim ja ndunkjøøjp, jade'en adøm ja xpudøjka'amp jøts øy møk y'ettit ja yjanchja'win, jøts myøjidit mayayidit ja wyinmaa'ndyi, tyatøjkinnyidit ja tsojkin.

Ja jemchinaa'yin midi ja Cristo tø xmo'øyim

¹⁷ Ya'ats øts idø'øn nnigajpxy nwindson'ajntimjøxp: jøts ka'ap jade'en m'uktsinaañidit sam ja chøøni pøn tka'ejx'ajntip ja Dios, midi tmøjpiktaajktip ja katumbi winmaa'ñ, ¹⁸ jøts agoostujpy abe'etstujpy ja yja'gyuki tmøøt'atti. Ka'ap ja tmøøt'atti ja jujky'ajntin midi ja Dios yajkpy, ku ja kø'øm ka' tsojki ku ja kø'øm ka' tnijawiwya'andi. ¹⁹ Tø ja chø'ødyu'un'ajntin ja tyiktigøøni jøts jam tø ñagyiyajknyidit ma jam ja y'axøøki yigaappi yiktuñ. ²⁰ Ka' meets jade'en ja Cristo yja' tø mduk'ijxyiyidi tø mduknijawiyidi, ²¹ pøni todam meets idø'øn ja xjanchpatmadoji ja yja' ku dø'øn ja jade'en ka' wyaa'ñ, ku dø'øn tø myiktumadowdi ja tyiy'ajntin. ²² Majtstutni tuki'iyi pøni sa y'ijty ja mdsinaa'yin xyiknaxti, ku xpadundi ja y'øybi kya'øybi midi pidsømp winmaa'ñjøtpy, midi mnadyawindaay'ajntidip kø'øm. ²³ Myikjemyñidip meets idø'øn ja m'aaw ja mjoojt sam ja mwinmaa'yindi nayide'en, ²⁴ jøts jade'en xpøjknidit ja jemchinaa'yin sam ja Dios kø'øm tø mdamidsokyidi. Jade'ents ja øchinaa'yin ñigaxi'iky ku øy ku tsuj ja mdsinaa'yin xyiknaxtit, niti pøky niti kadyeey.

²⁵ Paty meets ka' m'uktaay'ajntit; ku mmigu'uk xmagajpxt tyi janch idø'øn ja møøt mmadya'akt, jabi tu'ugyits adøm idø'øn ja janchja'win nbaduunim.

²⁶ Pøni m'ambøjktip, kidi mnankpyøpyetyidi; ka'ap ja m'aki xyikta'anidit. ²⁷ Kidi ja miku' xyikmøj'atti.

²⁸ Pøn y'ijty maa'tsp, wan ja tmajtstutni jøts ne'egi tyundøjkiñit, jøts jade'en ja ødyunk ttu'unt jøts jade'en tpuðøkit pøn ayoop.

²⁹ Ka'ap axøøki kajpxy axøøki madya'aky xyiktu'undit, ja øybi madya'aky ne'egi xyiktu'undit jøts jade'en ja mmigu'uk xmo'odit ja tigajtsin jøts ja kunuu'kxy'ajntin. ³⁰ Kidi meets xyikjotmay'øøky ja Dios ja y'Espiritu Santo, ja'ats meets idø'øn m'ejxpajntin'ajntip jøts jade'en ja Dios m'ejxkapidit ku meets ja mja'aty, ixyam sam wyinaty ku mmøøgyøjnyidit tuki'iyi ja nitso'ok'ajntin.

³¹ Majtstutni tuki'iyi ja m'aki, kidi mjotma'atti, ja pøjpi tsa'pxpi madya'aky jagam ja yiktanidi sam tuki'iyi ja' midi ka'øy nayide'en. ³² Yikxon meets idø'øn ne'egi m'øy'att, mnabya'ayowidip meets, jøts nayide'en mnamyaa'kxukiyidit jade'en sam meets ja Dios Teety tø mmee'kxyiyidi Cristo køjpx.

5

Sa dø'øn ja chinaa'yin ja tyiknaxtit pøn ja Dios un'k'ajtyidip

¹ Kawinmaa'ni meets idø'øn ja Dios Teety mdsøkyidi paty meets idø'øn ja xpadu'unt sam ja mutsk una'jk tpadundi ja tyeety. ² Nanky'ejxidi ja mdsøjkin nayide'en sam ja Cristo xtsøjkyindi jøts ku ja xku'ayo'owim adøm nbøkyjøxp. Jade'ents ja Dios t'øyja'wiyi'ñ kø'øm ku ja jade'en ttuun.

³ Ixmatskøjxti tuki'iyi ja kya'øybi. Kidi ø pøngapøn møøt mnamyøøt'atyidi, kidi xniwangøjxwa'andi tuki'iyi ja jujky'ajntin midi ya naxwiñ najxp, jabi ja Diosxi meets ja a'ayi mja'ajntiyidip. ⁴ Kidi ja axøøki ja yiktsø'ødyumbi madya'aky xmoøt'atti, jabi ka'axi jade'embi pyaat'atyiyi. Ja Dios meets idø'øn ne'egi ja y'øy'ajntin nnimadyajkidip. ⁵ Tøts meets xnijawu ku ø pøn yaa'dyøjk ø pøn tø'øxyøjk ñamyøøt'ajtkøjyidi, ok pønts ja axøøki yigaappi tyumpy, ok pønts ne'egi tsojkip midi ja naxwii'ñit yajkpy, ka'a'ps ja mibaat pyaat'aty; tpaatt ja Dios kyutujk ma ja Cristo ttanitanit ja yjaa'y. Jabi wenki diosxi dø'øn ndejint y'ajot'ajntip pøn ja naxwii'ñit øy'ajntin tajojtmay'oo'kp. ⁶ Kidi xyikmajada'akti ja win'øø'mbidi pøn wandip ku yø'øbi winmaa'ñ y'øyi jøts xpadu'undit, pø møkts ja Dios ja tyikastigipaatt pøn ja kabaduujnip. ⁷ Ixmatskøjxti tuki'iyi yø'øbi jaa'y.

⁸⁻⁹ Jabi jaj agujkpyts meets mdsinaa'ni kuts ja nwindson'ajntim møøt m'etti. Ka'ap jade'en ja mdsinaa'yin x'ukyiknaxnti sam y'ijtyin. Ku ja nwindson'ajntim jade'en ja kuno'jkin xmo'øyim, jade'ents idø'øn nnanky'ejxint nnankñija'wa'ant ja øybi tsinaa'yin, sam idø'øn ndejint ja øy'ajntin ja tiy'ajntin jøts midi paat'ajntip ndu'unim. Yikyø'ødyi dø'øn jade'en ja mdunk. ¹⁰ Tun meets ja may'ajnt jøts x'ejxtit xnijawidit midi'ibi dø'øn ja Dios chøjky. ¹¹ Kidi xundi ja' midi katump, ja y'ø ttundip pøn agoostujpy tsinaadyip; ne'egi pudøki meets idø'øn ja' jøts xukpaattit ja kuxiiñdya'aky'ajntin. ¹² Janch tsø'ødyu'unin idø'øn ja ñaxy ku adøm nnimadyajkindit sa dø'øn ja chinaa'yin amaa'tsk tyiknaxti. ¹³ Øy idø'øn ja nayide'en tpaaty ku adøm ndukja'gyukandit mabaat idø'øn ja chinaa'yin ja kya'øyidi, wan wyinaty jade'en ja Dios ø pøn tpaabøjki. ¹⁴ Paty idø'øn ja wijkyajpxy wya'a'ñ:

Wejnidi kajnidi meets;

kidi agoostujpy abe'etstujpy m'uktsinaañidi,
ja Cristits ja kuno'jkin kudøø'kxin tyakp.

¹⁵ Patyts meets idø'øn øy x'ejxtit sa dø'øn ja mdsinaa'yin xyiknaxtit. Kidi jade'en mdsøonidi sam pøn kube'ets kumon, wijy kejy xyiknaxtit. ¹⁶ Wijy kejy mnabyikta'agiyidit jøts tum ja øybi ttundi, jabi ja ka'øybixi yjawi ixyam nankmjøjtøkiwyajniyip. ¹⁷ Kidi mgawinmaa'mbyaatti, ixa'adi nijawidi pøni ti dø'øn ja nwindson'ajtim tø mdamidsoyki. ¹⁸ Kidi mnadyamiøxyidi ja nøø ja pa'ak ja amu'ukyjaa'y'ajtin midi ja windigø'oyin tyajkp, yikmøj'atti yikmajada'akti, nadyamiøyxidi ne'egi ja Espiritu Santo. ¹⁹ Ja nwindson'ajtim idø'øn ne'egi mnimadya'aktip, ku ja Salmos xkajpaxtit jøts ja y'øøjik xawin'ødit. Tu'ugyi ja m'aaw ja mjoøjt xpikta'aktit. ²⁰ Nwindson'ajtim Jesucristo køjxp xamøja'wikyunaxtit ja Dios Teety ku ja kunuu'kxin tyaky køx kida'ak.

Sa dø'øn chøømidit ja teety ja taak ja u'nk ja unajk pøn ja Cristo tpadundip

²¹ Jade'ents ja Dios xawindsø'øgidit ku nixem niyam mnagyupøkidit.

²² Ja tø'øxyøjkti pøn amajtskti ja ñiyaa'y pyadu'undip, nayide'en idø'øn sam ja nwindson'ajtim tpadu'undit. ²³ Ja yaa'dyøjk tngubajk'ajtp ja ñidø'øxy, nayide'en sam ja Cristo tngubajk'aty ja yjaa'y, pøn nayide'en yiknitsøjkpy. ²⁴ Jade'en sam ja Cristo kyupiky'atyiyi ja yjaa'y, nayide'ents idø'øn ja amajtsk tø'øxyøjkti ja ñiyaa'y tkupiky'ajtmidit tuki'iyi.

²⁵ Ja amajtsk yaa'dyøjkti, choktip ja ñidø'øxy ja nayide'en sam ja Cristo tø ttsøky ja yjaa'y ku ttamiøxy ja yjujky'ajtin. ²⁶ Paty ja jade'en ttuuñ jøts tjibijky tjigøøñ ja yjaa'y niti pøky niti kadyeey, tyikwatsni jade'en nobajtingøjpx ku ja øgyajpxy ømyadya'aky yikpaduñ yikjanchjawi, ²⁷ jøts jade'en møøt y'ett jøts jade'en tnanke'ejxit tsuj wa'ats, ni tu'uk kya'øybi tyikwingaxø'økt. ²⁸ Jade'ents idø'øn ja yaa'dyøjk tsooktit ja ñidø'øxy sam t'ejx'etti ja kyø'ømne'kx ja kyø'ømgøjpx. Pøn idø'øn ja ñidø'øxy tsojpx kø'øm idø'øn ja ñadyamidsoyki. ²⁹ Pø ka'axi pøn ja ñe'kx tmidsep'aty, y'ejx'ijtpy ja' jøts yjujky'ett chuxk'ett; tymñayide'en idø'øn ja Cristo ttunni møøt ja yjaa'y, ³⁰ jabi ñe'kx'ajtpyxi dø'øn ja ndejint ja yjaa'y ma adøm nayide'en tø nyikpiktaajkyindi ma dø'øn ndejint adøm nbajk'ajtyindi nxixy'ajtyindi. ³¹ Sam jap nøyijxpy wya'añ: "Myajtstu'tup ja yaa'dyøjk ja tyeety ja tyaak jøts jade'en ja ñidø'øxy møøt y'ett ejximdam tu'ukpi jaa'y." ³² Nnija'wip øts ku ya'atpi madya'aky janchtyimchep, ja' idø'øn yø wya'añ jøts yikja'gyukit waani sa dø'øn adøm ja Cristo møøt tu'ugyi njaa'y'ajtyim. ³³ Nayide'ents idø'øn tngajpaxmi ku nidu'uk nidu'uk ja yaa'dyøjk tsooktit ja ñidø'øxy sam kø'øm ñabya'ayøyidi, jøts nayide'en ja tø'øxyøjk tkajpkyupøktit ja ñiyaa'y.

6

¹ U'nk unaj'jkti, ja' meets idø'øn mdunkjøøjp'ajtpy ku ja mdeety xpadu'undit. Jade'en xyiknigaxø'øktit ku meets ja Dios xjanchjawi, jade'en idø'øn pyaat'aty. ² Ja myidu'ukpi ka'amal'ayin midi myøøt'ajtpy ja awejxin, ya'at idø'øn ja': "Windsø'øgi ja mdeety jøts ja mdaak, ³ jøts jade'en øy jotkujk xyiknaxt jøts yo'ont ja mdsinaa'yin ja naxwiiñ."

⁴ Meets u'nkteetyi, kidi o tigati m'u'nk xa'oiti, ots ja jade'en mmidsepwa'anidit jøts ka'ap m'ukyikajpkyupøjknidit. Ja'gyuki køjxp meets idø'øn ja ne'egi møøt mgajpaxt mmadya'akt jøts jade'en xuk'ejxit xuknijawidit ja nwindson'ajtim ja tyi'ajtin.

⁵ Tumbitøjkti, mimadowdi ja mwindsøndi ya naxwiiñ. Windsø'øgidi, padundi tuki'iyi midi ñi'ane'empy sam idø'øn pyaat'aty nmidu'unint ja Cristo.

⁶ Tungøjkti ejtp midi y'ane'empy, ka'ap jaayi yijy mnabyikta'agidit ku ja m'ijxyidi jøts jade'en ñadyijyi myikajxa'aktit. Jade'ents idø'øn ne'egi xu'undit sam ndejint ja Cristo yikmiduñ, jøts tuki'iyi ja m'aaw ja mjoøjt xpikta'aktit, jøts jade'en ja Dios yja' xpaduujnidit midi kø'øm tø ttanibiktaagi. ⁷ Kidi mdunk xuñ a'aka jot'aka, ja nwindson'ajtim idø'øn ne'egi mdawindsø'øgip jøts ka' x'ixa'at ja jaa'y kyajxajkin. ⁸ Pø tøts xnijawidi ku adøm nidu'uk nidu'uk xkumaa'yin ja nwindson'ajtim pøni sa adøm ya øy tø ndu'uñim, wan pøn awa'atstum ka'awa'atstum tø tyiknaxy.

⁹ Meets yiktumbitøjkti, yikxon meets ja mdumbi ana'am, kidi xwinwopti xjøjwopti. Ja'myats meets ku meets ja nwindson'ajtim nayide'en xmিদunmi midi tsajjpøtpy tsinaapy, jøts ka'ap ja' twi'ixy twigøñ, tuknax adømdi ja' wyingujkp, wan tumbi tkatumbi.

Ja nigubojkin midi myøøt'ajttip pøn ja Cristo tjanchja'widip

¹⁰ Ixyam migu'uktøjkti, yikmøkidi ja møk'ajtin midi tø mdatøkiyidi ku ja nwindson'ajtim xmøøt'atti. ¹¹ A'e'xidi abaadidi ja mnigubojkin midi ja Dios yajkpy, jøts jade'en møk xwindanidit ja miku' jøts ka' xyikmajada'aktit ja tyaa'y'ajtin. ¹² Ka'axi adøm nmøøtseptuñim ja jaa'y, ja'ats adøm møøt ja tsep nyiknajxyim pøn kayik'ejpx kayiktomp, midi yiktseptump, ku ja tngubajk'aty tuki'iyi ja kya'øybi ya naxwiiñ pøn ja Dios yja' tkatsojkip. ¹³ Paty meets

x'ejxmukt xkonmukt tuki'i yi ja nigubojkin midi ja Dios yajkpy, jøts jade'en xmmajada'aktit wyinaty ku ja miku' ja kya'øy'ajtin møk tyikmiñ. Kuts ja jade'en xu'undit, møk mda'andit. ¹⁴ Møk mnabyikta'agidit, ja' møk'atti ja tiy'ajtin nayide'en ndejint sam ku nnachujma'ant, møk ndu'unint. Ja øchinaa'yin ja tiichinaa'yin midi mee mdumpy, ja' mnadyagubokiyidip sam ja tseptumbi yiknitsø'øgyi ja pujx midi kyachwiiñ. ¹⁵ Nay'a'ejxiyidi nay'abaadiyidi jøts xkajpxyø'ødyit ja øgyajpxy ja ømyadya'aky midi ja øy'ajtin yajkpy, tyimñayide'en ndejint xu'undit sam ja soldadi ja kyø'øk ttawa'agi jøts jade'en t'a'ejxi ja tsep. ¹⁶ Yø janchja'wints idø'on ne'egi mmøø'tattip jøts ka' sã mjattit o ti o sã mjatuñidi ja miku'. Jade'en idø'on ndejint mnigubokiyidit sam tu'uk ja møj pujx tkayiknaxy ja tsujxjøøjp ja tsujxpaã' ku ja soldadi ja pujx ñadyagubøkyi. ¹⁷ Janchjawidi ja yiknitsø'ok'ajtin jøts jade'en ja m'anmija'win niti nisa kyajattit, jade'en n'ukpiktaajkint sam tu'uk ja soldadi pyujxkujup y'adaniyi. Tamøk'attit ja øgyajpxy ja ømyadya'aky midi ja Espiritu Santo mmøøjidip jøts jade'en xniguboktit ja tiy'ajtin ja øy'ajtin sam ndejint ja soldadi ja y'espadi ja chinaa'yin yiknitsø'øgyi. ¹⁸ Dios'ajot'ajtingøjxp meets ya'at xungøxt, jøts ja Dios x'amido'odit xpøktso'odit tum ja y'øbyi midi ja Espiritu Santo kyupijky. Ku ya'at xu'undit jøp'ejxti jøpjawidi, kidi meets jatyi xaka'akwa'añ, ni'amidowidi nibøktsowidi pøn jatyi ja Dios yja'ajtpy. ¹⁹ Ni'amido'owidik øts nibøktso'owidik øts nayide'en jøts ja Dios xmo'ot ja winmaa'ñ jøts øts agujk jotkujk nnigajpxt ja ñitsø'ok'ajtin midi y'ijty ja Dios kyananky'ejxipnim. ²⁰ Tø øts ja Dios xnajtskaxi kugajpxy'ajtpi, ja'agøjxp ø tø nyiktsumy. Amidowdi ja Dios jøts øts tuki'i yi nyiktungøxt ja møk'ajtin sã dø'on pyaat'aty ku øts yø'øbi winmaa'ñ nnanky'ejxiyit nnankñijawiyit.

Ja kajpxpoo'kxin midi tyagugøjxiñip

²¹ Yø Tiquico, yø' idø'on mduknija'wigyøxiyidip pøni ti pøni sã øts idø'on yam nduñ. Adøm nmigu'uk yø' pøn øts yam møk ja pudøjkin xmøøpy jøts jade'en ja nwindson'ajtim Jesucristo yja' nyikmøjit nyikaja'it. ²² Paty meets ndanigaxi, jøts mdukmadowiyidit sã øøts idø'on yam jøts øøts jade'en xajotkujk'att.

²³ Paat meets migu'uktøjkti ja tuda'aky'ajtin, ja tsojkin møøt ja janchja'win midi ja Dios Teety ñajtskajxip ñajts'ejxip møøt ja nwindson'ajtim Jesucristo. ²⁴ Jøts Dios Teety ja kunuu'kxidip pøn ja chojkin tø ttamiyoxti ja nwindson'ajtim Jesucristo xemikøjxp. Tiigyajpxy idø'on, jade'en idø'on yjatt.

JA NØKY MIDI JA PABLO TYANĠGAJX JA FILIPENSIT JAA'Y

Ku ja Pablo jap puxøjkøtpy tnijayi pøn tjanchja'widip ja nwindson'ajtim Jesucristo yja' jam Filipos kajpxkøjxp

¹ Pablo jøts ja Timoteo, øøts nwindson'ajtim Jesucristo nwindson'ajtpy. Ixyamts meets ja nøky tu'uk ndanijayi niwine'en ja Dios Teety mja'atyidi jam Filipos kajppjotp, møøt ja windsøndøjkti jøts ja møjaa'dyøjkti, niduki'iyyi wine'en møøt m'etti ja Jesucristo. ² Paatti kupøkti ja Dios Teety jøts ja nwindson'ajtim Jesucristo kyunuu'kxin jøts ja yjotkujk'ajtin.

Ku ja Pablo tni'amidowi tniøbøksowi ja janchja'wibitøjkti

³ Ejtp øts ja Dios Teety ndukmøjawi øy mee winaak ojk nja'myech. ⁴ Ku øts Dios n'ajot'aty amumjoojt øts ja Dios n'amidøw nbøøksøw jøts ja mbudøkiyidit; ⁵ pø tu'ugyixi adøm ja winmaa'n ixyambaat nyikyø'øyindi midi ja Dios yja'ajip, nayide'en sã ja xpadojkyi'okwandøø. ⁶ Øts wamp jøts ku ja Dios Teety tyikmiweni tyikaja'i y'adø'tst ja myøk'ajtin midi ja tømdukpado'sonda'agyidi, kunim mye'ent jadigojk ja nwindson'ajtim Jesucristo. ⁷ Øwiyinmaa'p ku njanchokti jøts ku nay ja Dios kyunuu'kxin x'adsinaajyidi. Nitaniþyim øts ja yja' jøts wa'ambyim øts jøts ku ja tyiyyi yjanchi, øy øts ja tømndyimyjagupuxøjkøktøki uk øy øts wyinaty ja kudunkøjk ja windsøndøjk ndyimy-jawinguwa'agidi. ⁸ Pø Diosxi tnija'wip wine'en mee njanchøky nayide'en sã nwindson'ajtim Jesús xtsøjkyim. ⁹ Jade'en øts idø'øn n'amidøw nbøøksøw ja Dios jøts ku øy tsuj nmamyayidit ku ja tyiþy xwinma'adyit, jøts ku ja ja'gyukin xjagyaptit øy juuni. ¹⁰ Ku jade'en xnijawidit jøts xpadu'undit midi øy midi tsuj, jade'ents xjagyaptit m'anmija'win øy wa'ats jøts niti pøky mgapaadyyidit ku mye'ent ja Cristo. ¹¹ Øy wa'ats wyimbidsø'ømdit ja mdunk midi ja nwindson'ajtim mdamidundip, jøts ja yjade'embidø'øn ja Dios wyindsø'jkinja'wip ja yjade'embidø'øn ja myøja'wip.

Ja Cristo øts xjagyajp amuum jøts ja' øts amuum xyikjujky'ajtp øy yjuuni'att

¹² Migu'uktøjk, nimadowdi meets, øy øts idø'øn yjawi njemjaty ndejaty, ne'egi nabyudøki ja yjawi tøm'ukpatni, jinaxy ø ne'egi ngajpxwa'kxi ja Dios kyajpxy ja y'ayuujk. ¹³ Tyumnija'widip ja tøk'adinaabyi ja'adi, jøts nayide'en øy pøn, ku øts ja' nyiktatgudsumi ku øts ja nwindson'ajtim yja' nyikø'øyi. ¹⁴ Jøts ku jade'en tøm'ejxti tnijawidi adøm ja nmigu'uk pøn ya'ajttip jøts ku øts yajp tsumy n'ity, ne'egi jinaxy ja tømjotmøktã'akti jøts ja jade'en tkajpxwa'kxidi ja Dios kyajpxy ja y'ayuujk.

¹⁵ Jats ya pøn øy'ajtin tsuj'ajtingøjxp tkajpxwa'kxtip ja Cristo yja', jats nayide'en pøn winaagin nugo tsepøjxp ja'ajkingøjxp ttundip, ¹⁶ jøts ja kyø'øm ja' tyikmøjtøkidi, jøts ja ja'ayi nugo xjaaktsepnipøkwa'andi ku øts yap puxøjkøtpy; ¹⁷ pønts ttundip y'øwiyinmaa'ngyøjxp, ja'agøjxp ja jade'en ttundi ku øts ja xpa'ayowdi, pø'nija'widipxi jøts ku ønyam'aty, ku øts møk ja Dios yja' nyikyø'øyi. ¹⁸ Jøts tiku øts nugo ndyimy'aty ndyimdajyt? Wan pøn tyikyø'øy y'øwiyinmaa'ngyøjxp uk kya'øwiyinmaa'ngyøjxp, pø nugo tum ja Cristo yja' tkajpxwa'jxkidi; yø' ø ndajotkujk'ajtpy.

Jøts jaaktyimxyonda'akp øts yikxon, ¹⁹ pø nnija'wipxi øts ku øts ya'at ayo'on tuki'iyyi nmimadaøkøst, ja'agøjxp ku meets ja Dios x'ajot'aty jøts meets xni'amidowi xniøbøksowi jøts ku øts nayide'en xpudøki ja Espiritu Santo. ²⁰ Ja'ats ø njø'ijxpy jøts øts ja ka' ndatsø'dyuu'unt, tu'uk amumjoojt øts ja ngajpxit ja yja'. Ixyam idø'øn pyaat'aty yjaaktyimniðaxø'økt yikxon ja Cristo myøk'ajtin midi ø nyiktumpy, njajuky'aty øts uk nja'øøky njadigøw øts, ka' øts ja nwandijy. ²¹ Pø ja Cristoxi øts amuum xjagyajp, ja'ats ø nmøk'ajtpy. Nja'øøky øts, jinaxy øts ja øy xwimbidsø'ømxit. ²² Pøni jaakjujky'ajtpøts øts ya, nay'øy'ajtpøts ja nayide'en, jøts øts ja Dios yja' njaakkyikyø'øyt, jade'ents ø ka'ap nnijawi pø midi'ibi. ²³ Tum jade'en tum øy, midi'ibi øts ngupøkp ngagupøkp: ne'egi jadyimya'ats'ookwamp øts, jøts øts ja Cristo xemikøjxp nmøøt'ejtnit, ne'egi jadyimya'øy'ajtp ja jade'en; ²⁴ jadu'ukts ja winmaa'nmyi, ne'egi jinaxy yjawi chøkyi jøts meets ka'ap jade'eni nmajtstø'unt, jaakjujky'ajtp øts. ²⁵ Patyts ø nwa'añ jøts ku mee njaakmøøtja'ajt jøts njaakpudøkidit jøts xajotkujk'attit ku tu'ugy'i janchja'wingøjxp xyikmiwenidit xyikajajidit ja Dios yja'. ²⁶ Jade'ents meets njaakminabyaadit ja nwindson'ajtim Jesucristo kyunuu'kxingøjxp amuum.

²⁷ Yø' mjadyimy'ejxtip yø mdsinaa'yin, jade'en xu'undit sa ja nwindson'ajtim yja' wya'añ. Øy meets jam nja'ats'ixy kø'øm, uk øy øts jadyimyjama jagam, ja' ø ndsøjkpy jøts øts ejtp nnijawit jøts ku meets ni'amuki mnabyudøkiyidi, tu'ugy'i ja mwinmaa'n xyik'etti, xem yam ni'ijtyi xniwinmayidi janchja'wingøjxp sa y'øyt sa tyudã'akt ja Dios y'øyajpxy ja y'øy'ayuujk. ²⁸ Ni xkatsø'øgidit pøn ja mdamidsep'ajtidip. Wa'ats yikniyawidi jøts ku ja windigøw

yjattit; jøts meets, ja nitso'ok'ajtin mee mbaatp midu ja Dios yajkpy. ²⁹ N'øya'windip ku nwindson'ajtim njanchja'windi, jøts nayide'en ku ngu'ayo'ombaajitindi. ³⁰ Nay ja' ayo'on mbaatip midu ø tø nbaaty. Tu'ugyi yø tum jade'en n'adsinaa'yindi jøts mnija'widipts sa øts ixyam n'ayo'ombaat'adi'ich.

2

Ku Cristo yik'ayowim jyaty jøts ku tyik'awa'añ ja myøk'ajtin sam ka'ap pøn

¹ Jøts pøni myikjotmøktajkidip ja Cristo, pøni mdajotkujk'ajtidip ja y'ayo'eixin, pøni jap ja Espiritu Santo xmøødiyidi, pøni mnija'widip sa ja chojkin sa ja pya'ayo'owin, ² yixkondaktik øts ku yikxon mdsønidi mdanidi, tu'ugyi tum jade'en mnamyayidi ni'amuki jøts tu'ugyi mwinmaydi. ³ Kidi ti xundi mgø'omwinmaa'ngyøjxp uk xyiktundi ja namyikaxi; yø' øy, ku tuda'aky jøts møj'ejxti ja mmigu'uk. ⁴ Kidi ja ngø'ømja'ajip nugo ndyimyikmøjtøjka'am, pø ja'axi tsojkip sudso ja nmigu'uk nbudøjka'am.

⁵ Yikyø'ødyi ja winmaa'ñi nayide'en sa ja nwindson'ajtim Jesucristo. ⁶ Øy ja wyinaty amuum ja Dios'ajtin tjajagyepy, ka'ap ja wya'añ jøts ja kuwani tyimñayide'en tmi'abaaty ja Dios Teety. ⁷ Ojts ja kø'øm tjiybiky midu ja wyinaty amuum yja'ajtpy jøts ja jade'en ñabyikta'agyi sa øy pøn tumbi ku ja ya ñaxwiin'ajty. ⁸ Jøts ku ja jade'en jaa'yin myiif, ojts ja tkupiky'aty ku ja yjemjaty tyejaty. Ejtp øy tpaduñ jabaat ku ja y'ø'jky, øy tsaach'ijxyim ja ø'jkin yjayikmøøy jam kruskøjxp. ⁹ Ja'agøjxp ja Dios Teety ja ojts myøjawiwi jøts ja yikmøjtøjkiyøø, ka'ap pøn myi'abaadyi øy yjapøni, ¹⁰ ku pøn myadobaadit ja nwindson'ajtim øy madsoo, nagyuxendyakøxidip ja ni'ijtyi, ¹¹ jøts ja niduki'iyi t'ejxkaptit jøts ja wya'andit jøts ku ja' wyindsøni ja Jesucristo, tum Dios y'øy'ajtingøjxp.

Sam ja jaj sam ja tøø'kxpi jade'en ja jaa'dyi pøn ja Dios ja'ajtidip

¹² Migu'uktøjkti, nayide'en ndsøky jinaxy xmimado'odit øy øts yam jagam, sam ø xmimadowdi ejtp ku meets jam y'ijty møøt ndsøøni. Windsø'øgi ja Dios, tuda'aky mnabyikta'agidit, jotmay'atti sudso ja nitsoojkin xpaattit. ¹³ Ku ja tsojkin xjagyapti jøts mdunwa'andi, ja Dios jade'en myikwinmaa'ajtyidip, jøts nay ja' mbudøkiyidip ku ja xundi jade'en sa ja Dios mdamidsoykiyidi øy tsuj.

¹⁴ Ejtni xoni tuki'iyi xu'undit, kidi amikajpxy xpøkti, ¹⁵ jøts ka'ap pøn mbøky'eixxidit, ja' myik'awa'andip jøts ku Dios m'u'nk'atyidi, øy wa'ats mjaa'y'attit ma ja ka'øy jaa'dyi ma ja kawindiy jaa'dyi. Jade'en meets jam mgaxø'økt sam ja xøøw tkujajy tkudii'kxy ma koots, ¹⁶ jade'en'ampy ku ja Dios ja kyajpxy ja y'ayuujk xyikyø'øydit. Jøts ku ja Cristo mye'ent jadigojk, møk mee ndaxonda'akt ku ø nnijawit ku ø ka'ni nugo tø ñiyikyø'øyi ja Dios yja', ka' ø nugo ja ndunk ñiwindigøy. ¹⁷ Øy øts yø pøn xjaduku'oogi, ja' ñamyayi ka'pxp ja windsø'jkin midu ja Dios y'ity mmøodyip ku ja xjanchjawidi. Xondaqk øts jade'en, niduki'iyi nxondaajkindit. ¹⁸ Jotkujk'at mee nayide'en, ja'agøjxp ku øts nayide'en njotkujk'aty.

Yikajxtip ja Timoteo møøt ja Epafrodito

¹⁹ Pøni wamp ja nwindson'ajtim Jesús, ngaxp øts tsojk ja Timoteo jøts ja m'ats'eixxidit jøts ø njotkujk'att ku ja tmime'ent ja kajpxy ja ayuujk sa meets jam. ²⁰ Pø ka'axi jadu'uk pøn nayide'en wyinmay sam ø nwinmayin, sam mee njotmay'atyin jøts ja øy'ajtin xpaattit; ²¹ tum kø'øm winmaa'ñxi pøngapøn yiktundip jøts ka'ap ja nwindson'ajtim Jesucristo yja' t'uktunk'ajtniyidi. ²² Tøts xnijawidi sa Timoteo øy tyuñ, sa øts ja møøt ja Dios kyajpxy ja y'ayuujk ngajpxwa'kxiyi, jade'en øts ja xpuðøki sam ja jaa'y ja y'u'nk pyudøkiyi. ²³ Jade'ents ø nwinmay pøni sa øts yø nja' y'ukwin'øyi ngaxpts øts ja' jøts m'ats'eixxidit; ²⁴ n'ajot'ajtpy øts Dios jøts meets kø'øm tsojk n'ats'ext.

²⁵ Paat'ajtipts yjawi nayide'en ndanigaxit ja Epafrodito, ja nmigu'uk, pøn øts amuum møøt nduñ, pøn meets øjts xaniguexy jøts øts ja xpuðøki ku ti jaty y'ity kya'ity. ²⁶ Mjanch'ejxwajnidip ja' niwine'en mjam'atti, jøts mjanchjotmay'atyidi ja'agøjxp ku tø xnijawidi jøts ku y'ity pyikyiyi. ²⁷ Tøts ja yjanch'atspikyiyi, jawaani ja tø kya'øøky; tøts ja Dios y'ayo'ijxyi jøts øts ja tø xpuðøki jøts ø nayide'en kyajinaxt ja njotmay, ti øts yam ndaxømpy. ²⁸ Ja'agøjxp meets ja ndymdyanigaxwa'añ jøts xaxonda'akti ku jadigojk xpaattit x'ejxtit jøts øts jade'en ka' nugo ndyimyjotmay'oock. ²⁹ Taxonda'akti ku ja jam yja'att. Jade'en pyaat'aty tu'ugyi ja Dios xjagyepxindi pøn jaty nayide'en tpadundip sam ja Epafrodito, minamyayidi yikxon; ³⁰ jawaani tø kya'øøky ku tmiduñ ja Cristo. Tø tmiwanjaty yik'ayowim ku øts ja puðøkin xmø'øy, jøts meets ja ñamyayi mgudaniyi øy mee mgaya'aty.

3

Ja tsinaa'yin midu tiy janch

¹ Migu'uktøjk, tajotkujk'ajtidi ja Dios kyunuu'kxin. Ka' øts n'adsepjawi øy øts yam jadigojk nja'at nay yø', tø ø nnijawi jøts ku meets yø xyiktu'unt. ² Øyim mnay'eix'etidit, jam ja jaa'y

pøn ja wenk winmaa'ñ tyikyø'odyip, pøn ttundip ja ka'øbyi, ja' pøn tta'ødyøkiwyandip ja Dios ku ja ttsuki ñe'kx jøts ja ejxpajjt jade'en ñabyiktaajkxyidi. ³ Jade'en ne'egi tpaaty, adøm idø'on nmøø'tajtyindip ja ejxpajjt ja'agøjxp ku adøm ja yja' tu'ugyi nyikmøjtøjka'andi, jøts ku ja Cristo Jesuñ ndaxondaajkyindi, jøts ka'ap nmi'agijxyindi nmijotkijxyindi ja'ayi midikaxø'kp iip ja'ayi nikijxy. ⁴ Wa'ambimts øts inet jøts ku ja nayide'en y'øyi ku jade'en ja nachuki ñaxy kostumbri køjxp. Jawaani ka'pxy øts ja ne'egi ndyimñijawi ja'abi tsinaa'yin; ⁵ ku ngue'jxy kyiduktujk xøøw øts ojts ja ejxpajjt nyiktu'unxi, israelit jaa'yxi øts; ja Benjamin øts ndeety'amøjip, jøts hebreit etjot ø ngue'exy, jøts nay jam øts ndeety ndaak choondi. Fariseotøjk øts y'ijty møøt nnamyayi, nay ja Moisés øts y'ijty nbaduujn ja kyutujk; ⁶ møk øts ja nnitani, jantymdyøøp øts ja njawi, jøts øts ja jaa'y nbawidetti ndagumatsiwy'a'andi pøn jaty ja Cristo tjanchja'widip. Ka' øts y'ijty pøn ja kutujk xawindsø'øy sa ja tyikutuky, nadyijyi tñigajpxy mid'i'ibi øy mid'i'ibi tøøp. ⁷ Mid'i'its øts y'ijty jade'en nmøja'wip, jade'en øts yø ixyam nja'wiñi jøts ku ka' ma' tyuñ, ja'agøjxp ku øts ja nwindson'ajtim Jesucristo tønija'wiyi ja pya'ayo'owin. ⁸ Jøts pøni ti øts ja njaak'øjja'wip, tum kudigøøpy øts njawi, ma' t'ukmi'abaat ku ja nwindson'ajtim Jesucristo nnija'want. Ja'agøjxp øts tuki'iyi tøn'ixmajtskixy, aayin pista'agin ja tuki'iyi ñøjkkøjxni, ja'ayi øts tu'ugyi njøp'ijxpy ja Cristo ⁹ jøts øts ja møøt n'ett, kaja'agøjxpip ku øts ja kutujk ka'pxy nbaduñ, jade'en'ampy ku øts ja nwindson'ajtim Jesucristo tyiy'ajtin njanchja'wiyi jøts øts ja Dios Teety jade'en tøn'ixkupiky. Ja'ats ja Dios kyupijky pøn ja janchja'wiyip. ¹⁰ Ja' ø ndsøjkpy jøts øts yixxon ndyimñijawit sa ja nwindson'ajtim tyiy'ajtin jøts øts ja myøk'ajtin ja xmo'ot midikaxø'kp ku ja ojts tmimajada'aky ja o'jkin ku yjujkyjky xemikøjxp, nja'ayø ø nayide'en, uk njadyimya'øøky ø nayide'en sa ja y'ø'jky, ¹¹ jøts øts jade'en njøp'ext ja jujkyøjkin nayide'en sam ja yjujkyjky.

Ja' n jotmay'ajtim sudso nbaajtint ja ø'ajtin

¹² Ka' nwa'añ jøts ku øts jade'en tuki'iyi ngøjø'omit'ajtni, uk ka' nwa'añ jøts ku øts tyimwya'atsni tyimy'øni; tu'ugyits øts ja nbanøjka'adi'ich, jøts njøp'ijxpy øts ja nbaat midikaxø'kp ku ja nwindson'ajtim Jesucristo tøn'ixmajtskixy patki'jyi. ¹³ Ka' øts migu'uk nwa'añ, jøts ku jade'en tøn'ixmajtskixy tuki'iyi; nja'dyigøøgyijxpy øts ixyam sa jaty ø tøn'ixmajtskixy tuki'iyi. ¹⁴ Jøts nja'ajtin ma' paaat'aty ma' jypkixy jøts ja Dios ja y'ø'ajtin xukpaaajtint jap tsajpjøtpy midikaxø'kp ku ja xaniwaadsow'a'amp, jøts adøm ja nyikmø'oyint ja'agøjxp ku ja Cristo møøt n'ijtyindi.

¹⁵ Wine'en ja Dios møk njanchja'wa'andi, paaat'ajtip jøts jade'en tu'ugyi nwinmaa'yindi. Pøni sats pøn wyinmay, jam pøn ja wenk winmaa'ñ tpaaty, nay ja Diost ja tuknija'wiyip midikaxø'kp ku ja tøn'ixmajtskixy tuki'iyi. ¹⁶ Tu'ugyits yø winmaa'ñ nbøjkindit, jøts yø' idø'on nyiktu'unindip amuum sam adøm yø tøn'ixmajtskixy tuki'iyi.

¹⁷ Pa'ejxtik øts, migu'uktøjk, jøts ejxti nayide'en pøn nay yø'øbi tyiktundip midikaxø'kp ku ja tøn'ixmajtskixy tuki'iyi. ¹⁸ Jaa may pøn ja nwindson'ajtim Jesucristo yja' tkamøjajwidip jøts ja wyinmaa'ñ ja' yiktundip jøts jade'en chøøni. Tø meets yø kawinaak ojk ndukmadø, ixyats øts jadigøjk yik'ayowim nñigajpxkojmi. ¹⁹ Ka'ap ja wyindø'ødit, windigø ja nøjkkx yjatti. Ja kyø'ømwinnmaa'ñ sa kø'øm tsokti, ja' yikmøjtøjkidip, ja' namyayi dios'ajttip. Ne'egi jinaxy ja ñadyamixxyidi mid'i'ibik idø'on ja yjawi tyatsø'odyu'undip, ja' nugo yjotmay'ajttip sa jaty ti jaty ya naxwiñ. ²⁰ Ja' adøm amuum xkøjø'omit'ajtin jap tsajpjøtpy, jøts ja' adøm njøp'ijxyindip jøts ku ja jap choont ja nwindson'ajtim Jesucristo pøn ja pøky ttuknitso'ok'ajtp. ²¹ Ja' adøm xyikwimbejtindip xyiktigajtsindip jøts nayide'en njajntint sam ja kø'øm amuum ja kunuu'kxy'ajtin tmøødi, jøts nay ja myøk'ajtin ja jade'en yik'awampy ku jade'en xu'unin, pø ja'axi tuki'iyi tñitanaagyøjxp øy ti.

4

Xondaqunaxti ku Dios xjagyeyjyindi

¹ Njantymyja'ats'ejxw'andip mee migu'uktøjk, mee ndajotkujk'ajtpy, meets jam Dios wyingujk ndamajada'akp, jøts tu'ugyi jaaktyim'yajot'atti ja Dios.

² Ngajpxñigajxidip øts ja Evodia jøts ja Sintique jøts ø møk nnøjmi, wan tñayja'gyukyidi tkajpx'øyidi ti ka'ø'xyidip jøts tu'ugyi ja Dios yja' tyikyø'oyidit, pø tum ja'axi køjø'omit'ajtidip. ³ Mets migu'uk, pudøki yø Evodia møøt ja Sintique, ja' øts ojts ngajpxw'a'kxi ja Dios kyajpxy ja y'ayujk møøt ja Clemente jøts møøt jadu'ukti pøn jaty øts ojts xmøøtundi. Wa'ats ja Dios ja ñijawiyidi pøn jaty ti jaty ja xyøøwidi.

⁴ Ejtp ja Dios yja' xaxondaajkidit. ñjaaktyim'ñigajpxpy øts yixxon jøts mxonda'aktit! ⁵ Wan øy pøn mnijawiyidi jøts ku mee tuda'aky mjaa'y'aty. Ja'myats'etti ku tsojk ja nwindson'ajtim myenit.

⁶ Kidi ti x'ayo'onjawidi, tukmadowdi ne'egi ja Dios ku ja x'ajot'attit; ja' m'amido'odip mbøkts'odip ti mga'ejtxidip, jøts tukmøjajwidi tukunuu'kxyjajwidi ku wyinaty myikmø'odi

midi m'amidoodip. ⁷Jøts ja mmo'ojidit ja y'øy'ajtin ja tuda'aky'ajtin midi ka'ap ti tmi'abaaty sa adøm njan'winmaa'yam; ja'ats tyikjotkujk'atp ja mwinmaa'ndyi: jøts ja m'anmija'windi jøts ku ja nwindson'ajtim Jesucristo møøt m'etti.

Ja' mwinma'adyip midi øy

⁸Yø', migu'uktøjk, mjotmay'attip midi tiy midi janch, midi xpaat'ajtindip, midi øy pidsømp, midi wa'ats, midi tsøkyim, midi øy agajpxy pidsømp o madsoo. Tum ja y'øbyi mwinma'adyip midi øñigajpxni øñimadyakni.

⁹Yiktundi midi tø nduk'ixpøkti, sa jaty tø n'ana'amdi, jade'en xu'undit sa øts ojts nwa'añ jøts sa øts ojts kø'øm x'ejxti ku øts ja ojts nduñ: tundits jade'en, winets ja Dios nijuuni mga'ixmatsidit, ejtp ja yjotkujk'ajtin ja mmøøgyunaxiyidit.

Ku ja filipensit jaa'y tmay'atti ja Pablo

¹⁰Xyikxondakp øts ja Dios jøts ku meets jadigojk xja'myech. Kidi jade'enip ø ndijj jøts ku meets tø xtyimyja'dyigøøñi, ja ku ka' ñibidsømi juuni mee xpudøkit. ¹¹Ni ka'ap ø nwa'añ jøts ku øts yam sa ndyimyjaty. Tø øts yø n'ejxandigøøñi. Yø'øyi ø ndajotkujk'ajtpy midi nmøøt'ajtpy. ¹²Wa'ats ø nnijawi sa yik'ayowim nyiknajxint, jøts nayide'en sa ngumeeñ'ajtint. Tø øts yø nyikyuyj jøts øts øy midi ngawingudsø'øgit, øy ø ngay øy ø ngakay, uk øy ti y'ity kya'ity. ¹³Øy ø midi nwinguwa'agi, ja nwindson'ajtim Jesucristo nmøøt'ajtpy, ja' ø xkuwamp. ¹⁴Øy'ajtpst ku meets ja n'ayo'on nayide'en mnadyapaadyidi jøts øts jade'en xpudøkidi.

¹⁵Mnayinija'widipts wine'en jam Filipo kajpxkøjx mgugajp'atti, ku øts ja Dios kyajpxy ja y'ayuujk ojts ngajpxwa'kx'okwajni, ku øts ojts nnijky jam Macedonia kajpkøjxp, pø meeçixi ojts xaniguexy ja pudøjkin midi ja Dios mdamiyojxtip ja'agøjxp ku ja wyinaty ja myøk'ajtin tø xpaajtyidi. ¹⁶Jøts ku øts jam wyinaty Tesalónica kajpkøjxp, nayi meestsxi ojts xaniguexy ja meeñ majtsk ojk, jøts øts ja nyiktu'unt ti jaty ø ka'ejtxip. ¹⁷Kay'øjip ø nugo njotmay'ajtpy jøts øts ja nugo n'axajit øy ti; ja' ø ndsøjkpy jøts meets yjaaknipatt ja mja' jam Dios wyingujkp. ¹⁸Tits ø kayikmøøpy, ne'egi o ti tø nyikmø'øy. Tyimchaachjam yø kajaa midi yø Epafrodito tø xamigaxidi. Jøts jade'en ja Dios yø tjawi kunuu'kxy, sa ja poom pya'akxuuky, ja windsø'jkin yø ñamyayi yikmøøpy. ¹⁹Ja Dios pøn xjagyajpindip, ja' mmo'ojidip, ja' tyikwimbetp tyiktigatsp pøni ti mga'ejtxidip. Ja nwindson'ajtim Jesucristo møøt ja Dios Teety, ja' tjagyajtpip ja kunuu'kxin ja jotkujk'ajtin midi nijuuni niwindem kagudigøøpy. ²⁰ixemikøjx Dios Teety møj janch ja kunuu'kxin tjagyepy! Jade'en idø'øn ja yjatt.

Ku kyajpx'abaqadiwya'añ jøts ja kajpxpoo'kxin t'ukyajkni

²¹Nguejpxy øts ja kajpxpoo'kxin nwindson'ajtim Jesucristo køjxp jøts xukmado'odit niduki'iyi pøn jaty ja Dios jagyajpidip. Ñayi kyajxmidi ja kajpxpoo'kxin ja'adi pøn jaty øts yam nmøøtti. ²²Niduki'iyi pøn ja Dios ja'ajtidip ya, jøts ja'adi pøn namyajtyidip ma ja romanit windsøn ja tyøjk, nayi mdanigajxidip ja kajpxpoo'kxin ja'adi.

²³Ja nwindson'ajtim Jesucristo mgunuu'kxidip niduki'iyi. Tügajpxy idø'øn, jade'en idø'øn ja yjatt.

JA NØKY MIDI JA PABLO TYANĠAJX JA COLOSĠT JAA'Y

Ku ja Pablo tnjayi pøn tjanchja'widip ja nwindson'ajtim Jesucristo yja' jam Colosas kajpkøjxp

¹ Pablo øts, øts ja Dios tø xamidsøky jøts øts ja tø xpikta'aky nwindson'ajtim Jesucristo kyudanaabyi. Jade'en'ampyts øts møøt ja Timoteo ² ya'at nøky nja'ay jøts øø ndanijayi pøn jam Colosas kajppjotp ja'ajtidip ja Dios, pøn jaty jam tjanchja'widip ja Cristo, ja yiknitsokpi. Wants ja Dios Teety ttuñ ja may'ajit jøts ja myo'ojidit ja kunuu'kxin jøts ja myo'ojidit ja tuda'aky'ajtin.

Saja Pablo tni'amidowi tñbøktowski pøn jaty ja Dios tjanchja'widip jøts ja ttukmadø y ja Dios

³ Ejtp øøts ja Dios ndukmøjawi ndukunuu'kxyjawi midi nwindson'ajtim Jesucristo tyedyip ku øøts ja n'ajot'aty meets køjxp. ⁴ Tøts øø nñimadø y jøts ku meets ja nwindson'ajtim Jesús møk xjanchjawi pøn yiktejp Cristo, jøts ku nayide'en xtsokti xpa'ayowdi ja mmigu'uk pøn jaty ja Dios ja'ajtidip, ⁵ ja'agøjxp ku tu'ugyi xjøp'ejxti midi myikmo'owandip midi jap pøkji'iky ejtp jap tsajpjøtpy. Tøts xñijawidi tigøjxp xjagyapti ja jøp'ejxin, ja'agøjxp ku tø xmadowdi ja Dios kyajpxy ja Dios y'ayuujk, ja Dios tyiy'ajtin midi yiknitsokp. ⁶ Nay yø'øbi kajpxy nay yø'øbi madya'aky midi ojts myiktukmadowdi, janch møjtak'adøtsp yø icyam, jøts tum øy wyimbidsimy øy madsoo wine'en ja naxwii'ñit, nayide'en jyaty sam tø mjatti kuyip xmadoo'okwandøø ja Dios chojkin ja pya'ayo'owin, jøts tø xñijawidi jøts ku yø tyiyi jøts ku yø yjançi. ⁷ Yø'øxi øøts ja nñigu'uk øjts mduk'ixpikyidi pøn øøts amuum nmoøtumpy jøts yjanchpaduujnip ja nwindson'ajtim yja' ja', jøts ja' meets idø'on jam tø mbudøkyi. ⁸ Nay ja' øø tø xukmadø y sa meets ja tsojkin xjagyepy midi ja Espiritu Santo mmøøjyidip.

⁹ Patyts ku øøts ja jade'en ja'ayi nñimadøø y, winetyipts øøts ja Dios nijuuni ngamimøñ meets køjxp, ejtp øøts ja n'amidø y jøts ja Dios yikxon mduknijawiyidit ja winmaa'ñ sa ja tsøky, jøts ja mmo'ojidit wine'en ja wiy'ajtin kejy'ajtin, jøts nayide'en sa xñimadojyidit ja Dios yja'. ¹⁰ Jade'ents øøts ja n'amidø y nbøktø y jøts yikxon mjaa'y'attit sam idø'on pyaat'aty ttu'undit pøn ja Dios ja'ajtidip, jøts tum ja' mdu'undip midi ja Dios tyajotkujk'ajtpy, midi øy midi tsuj wimbidsømp m'ødyu'uningøjxpti, jøts yikxon xñijawidit ja Dios. ¹¹ N'amidøøpy øøts ja' jøts ja mmo'ojidit ja kyunuu'kxin ja myø'ajtin, jøts xmidanidit øy midi ayo'on, jøts xyik-tuda'aktit ja mwinnmaa'ndyi midi ne'egi mdajotkukidip, ¹² jøts ja Dios Teety xukmøjawidit xukunuu'kxyjawidit jøts ku ja tø xanibiktaajka'am ku adøm xpaat'ajtyim jøts adøm ja xmo'øyim ma ja kyunuu'kxin, midi ja yikmøødyip pøn jaty ja Dios ja'ajtidip. ¹³ Pø ja'axi tø xukniwaajcham ma amuum myajada'aky ja wimbeets'ajtin ja kugoots'ajtin yja', jøts ja tø xyiktøjka'am ma ja Dios U'nk ja kutujk ttanitani ja yjaa'y, ¹⁴ pøn øjts tyaky ja nitso'ok'ajtin jade'en'ampy ku tø xku'o'jkandi jøts adøm ja xpojkpimee'kxyindi.

Ku ja Cristo øjts xku'o'jkandi adøm nbøky, jade'en'ampyts ja Dios Teety jadigojk xmijøtjimbijtyindi

¹⁵ Ka'ap ja Dios Teety yik'ixy yiknijawi, jade'en'ampyts øjts ñanky'ijxyi ku ja y'U'nk tyikmiñ, pøn tu'uk møj, ka' pøn jade'en. ¹⁶ Ja' Dios Teety tyukyik'øiyiyi'ñ tuki'iyi ti jaty ejtp tsajpjøtpy, ti jaty ejtp naxwiiñ, midi kaxø'jpk midi kagaxø'jpk. Jøts ja tyik'øyi sa ja ankilistøjk ñagytujkmø'øyidi, ja'ats ja tyik'øiyiyi'ñ jøts ja' ja tja'ajtp. ¹⁷ Jaayim ja yiknitsokpi wyinatyni, ja Cristo, jøtsnim øy ti kyaxi'ikñim, jøts ja' tuki'iyi tkøjø'ømit'ajtp ti jaty ja'ajtp. ¹⁸ Ja' tñigubajk'ajtp ja jaa'y pøn ja Dios yja'ajtpy, jøts ja' tjagyajp amuum yø'øbi jaa'dyi. Ja' tyikjujky'ajtp jøts ja' midu'uk tmimajadaajk ja o'jkin ku ja yjujpyijky, jødsyim ja jøp'am ejtp tyim'yity. ¹⁹ Ja Dios Teetyts ja køm'øm tyikjajt jøts ja tyikdiosajty ja nwindson'ajtim Jesucristo amuum, ²⁰ jøts nay ja' nayide'en tyikjajt nwindson'ajtim Jesucristo køjxp jøts ñamyi'øy'atidit tuki'iyi midi ejtp tuktsajp'agida'aky, jøts yjotkujk'attit wan tjaponidi midi ja'ajttip naxwiiñ, jøts midi jap nayide'en tsajpjøtpy. Jade'en'ampyts ja yjotkujk'ajtin ja ñamyayi tpaatti ku ja nwindson'ajtim Jesucristo y'ø'jky kruskøjxp.

²¹ Ja mga'øwynmaa'ñ ja mga'ødyunk ja' meets y'ijty myik'ejt看ip jagam ixkø'øm, jøts m'am mjotp xmijøtma'atti ja Dios; ja Diosts tø myikjotkukiyidi jøts ja tø xmijøtjimbetti, ²² ja'agøjxp ku ja nwindson'ajtim y'ø'jky jøts ja wemp ijxy tyimy'ats'ayo'ombaa'jty ñikøjxp kyubajkp. Jade'en'ampyts ja jade'en'ampyts ja jade'en ttuun jøts meets ja Dios Teety xwingunøjkit ku tø mbøkwyatsnidi, niwine'en mga'ukyikpøky'ejxnidit. ²³ Jade'engøjxpts chøkyi jøts tu'ugyi amumjoojt xyikyø'ødyit ja mjanchja'win ty'ajtingøjxp. Kidi meets ja xkajøp'ejxni sa tø xñijawidi midi yiknitsokp. Yø'øbi kajpxy yø'øbi ayuujk yikajpxwa'kxp øy sudso ya naxwiiñ. Pablo øts jøts øts yam tø nyiktanipiky jøts øts ja jade'en ngajpxwa'kxi ja yja'.

Ku ja Pablo yiktanipiky jøts tpuðøkit pøn jaty ja Dios tjanchja'widip

²⁴ Jotkujk øts nnayjawiyi øy mee njagu'ayowi. Nay jade'en ø ñamyayi ja ayo'on nbaaty sa ja nwindson'ajtim Jesucristo ku ja tku'ayo'owiyi'ñ pøn jaty ja janchja'wiyip. ²⁵ Øts tø xaja'aty jøts øts ja nbudøkidit pøn ja Dios tjanchja'widip. Ja' øts ja Dios tø xanipiky jøts meets nmo'ot ka'pxy ja Dios kyajpxy ja Dios y'ayuujk, ²⁶ jøts mee ndukmado'ot mididi pøn tkanija'wipnim mididi y'ity yu'uch'ejtp, ma windi'ixyip ja jade'en pøn tkanijawi. Ixyamts ja Dios ttuknijawiywa'añ ja jaa'y pøn jaty ja paduujniyip ja yja'. ²⁷ Ja'ats ja Dios ja tuknijawiywajnidip ti øy'ajtin idø'on ja yjade'embidi yjagyepy jøts ja yikmo'odit pøn ka'israelit jaa'dyi. Jøts ja' idø'on y'ity kayiknija'wip jøts ku ja Cristo ja' mee mjagyajp, jøts ja' tyajkp ja jøp'ijxy'ajtin jøts ku nøjkk xpaajtidi ja Dios y'ø'y'ajtin ja Dios chuj'ajtin.

²⁸ Ja Cristo øøts ja yja' nnigajpxip, jøts øøts niduki'iyi øy pøn ngajpxwiy jøts øø nyik'ixpiky øy pøn, jøts yikxon tnmado'odit, jøts jade'en nidu'uk nidu'uk tñajawidit yikxon ku tmøø'tetti ja Cristo. ²⁹ Yø'øts ø nduñ'ajtpy jøts øts jade'en amumjoojt nnadyamiyøxyi, øy ø nwanjaty, ja'ats nyiktumpy ja Cristo myøk'ajtin mididi øts ja xmøøpy.

2

¹ Ja' ø ndsøjkpy jøts meets xnijawit sa mee ngamijotkuki ku øts ja Dios n'amidøy ja pudøjkin meets køjpx jøts nayide'en pøn jaty tsinaadyip jam Laodicea, nmijotigøøpy øts nayide'en ja nmigu'uk pøn ø xka'ijxy'ajttipnim. ² Ja'ats ø ndsøjkpy jøts xjagyaptit ja tsojkin amumjoojt ni xem niyam mididi ja Dios yja'ajip mididi øy mididi tsuj pidsømp, ku ja awejx'ajtin xjagyaptit jøts xja'gyukidit sa xnijawidit ja Cristo pøn ja Dios nugo ajawi ka' pøn ttuknijawi; ³ ja'ats idø'on tmøø'tajtp ja øy'ajtin ja tsuj'ajtin, ja wejin ja kajin. ⁴ Jade'engøjpx meets ya'at ndukmadøy jøts kidi pøn mwindaay'atyidi pøn tum jaayi tkajpxtip. ⁵ Øy ø kø'øm nguidiyimjam'aty, jamts øts ja nwinmaa'ñ nyik'lity, jøts ndaxondakpy øts ku ø nnijawi ku øy yikxon xundi jøts nayide'en ku tu'ugyi xjanchjawidi ja Cristo.

⁶ Paty ja'ayi xu'undit mididi tsojkip, sa myiktani'ejxidi myiktaguwanidi ku xjanchja'wiy'okwandøø ja nwindson'ajtim Jesucristo, ja'ats idø'on tu'ugyi mdu'undip jøts ja jade'en møøt m'ettit. ⁷ Ja' amuum mnadyagidøkiyidip jøts ja' idø'on mmøk'ajtin'attip. Ja'axi mjanchjawidip sa ojts myiktani'ejxidi myiktaguwanidi jøts jade'en ejtp ja Dios xukmøjawidit xukunuu'kxyjawidit sam ja tø xnijawidit ku ja ixpøjkin myikmøødyi.

Ja øchinaa'yin mididi yikpatp Cristo køjpx

⁸ Øyim mnay'ejx'etidit; kidim ja xmiðøkti ja jaa'y pøn mdawin'øøn wajnidip ja ixpøjkin, mididi wenk winmaa'ñ tyikyø'ødyip uk mididi tyiktundip ja tum ja taay; ja' ja yiktundip sa ja jaa'y chinaa'yindi sa jaa'y wyinmaa'ndyi, ka'axi ja tyikmøjtøjkiyidi ja Cristo yja'.

⁹ Pø ja Cristoxi kø'øm amuum tmøø'tajtkøjpx ja Dios'ajtin, ¹⁰ jøts kumi mmøø'tijtpy meets ja', tits mee mjaaka'ejtxip. Ja' tuki'iyi tjagyajp jøts ka'ap ja pøn myi'abaadyiyi, wan ja ma tyimyatsoondi, wan tjamikuku'pyi uk wan tjanayjapi tsajpjøtpy. ¹¹ Ku meets ja jade'en xmøø'tity ja Cristo, tø meets ja ñamyayi mbiktaajkxyi ja ejxa'anin kyunuu'kxingøjpx, ka'apts ja nayide'en tø mbiktaajkxyidi sam ja israelit jaa'y ñadyuñidi. Ja' mee m'ejxa'anin'ajtpy ku xpaatti ja nitso'ok'ajtin jøts ja mbøky mniwa'achidi mididi yiktump ku ja naxwiñ njaa'y'ajtyindi. ¹² Ku ja nøbajtin xpaatti, jade'en meets idø'on ñamyayi ja Cristo møøt m'ø'jky, jøts nayide'en ñamyayi mjujukpyøjkti, ja'agøjpx ku tø xjanchjawidi ja Dios, pø ja'axi ja myøk'ajtin majadaajk ku ja Cristo yujukpyijky. ¹³ Jade'en ja ngajpxin, øøky meets y'ijty myik'ejtniyidi ja mbøky ku ka'anin ja ejxa'an xpaatti, mididi yikpatp nwindson'ajtim Jesucristo køjpx; xjats ixyam ja Dios tø mmø'øyidi ja juky'ajtin jøts mee ñamyayi møøt mjuky'aty ja nwindson'ajtim Jesucristo, ja' mee mmaa'kxip tuki'iyi ja mbøky. ¹⁴ Tøts ja Dios tjibiky ja kutujk jøts ka' y'uktunit mididi y'ijty myiktanigutujk'ajtip, mididi y'ijty xjanch'adsejppindip jøts ja xuktaja'ytyindi ja nbøky jøts adøm ja yiktagubejtyindi. Jade'en'ampy ja Dios ja tyikudigøøy ku ja nwindson'ajtim kyiruspejty. ¹⁵ Ja'ats ja tyamimajadaajk ja mikuku' jøts ja tø tyik'amutskiyi ja myøk'ajtin jøts ja jade'en ttuk'ixy ttuknijawi ja naxwi'ñit jaa'y.

Jotmay'atti ja Dios yja'

¹⁶ Jade'en'ampyts ka' pøn xmøjpkita'aktit ku pøn mdabayø'øwya'andit ja mгааjyik ja m'uujkikti, uk ku ja xøøw xkabadundi mididi winsamaan jøts mididi wimbo' yiktump. ¹⁷ Ja' yø y'ity wya'añ jøts yø tñigajpxy mididi menwamp, ya'at tsinaa'yin y'ijty tunkpatp ku ja Cristo kyamiñim ku ja jaa'y ja tjøp'ejxti. Kuts ja tø myiñ, ja' idø'on tu'ugyi yikjanchja'wiñip. ¹⁸ Kidits ja jaa'y mdukmajtstu'udyidi ja nwindson'ajtim pøn ñadyijyi janch tuda'aky nabyiktaajkidip, jøts wya'andi ku ja ankilis ne'egi yikwindsø'ogit. Ja' ñigajpxtip ñimadyaktip mididi nijuuni kya'ejxtipnim kyamadoodipnim, jøts jade'en øy ñadyamøjpkita'agyidi ja kyø'ømwinmaa'ñ. ¹⁹ Ka'ap ja tmøø'tetti ja Cristo, pøn møj pøn jøp'am, pøn yikmøja'wip, jøts pøn amuum yikjanchja'wip ku ja yja' ja yiknijawi jøts jade'en tyika'pxy'ity ja jaa'y pøn nayide'en myøøpy ja møk'ajtin, sam ja Dios kø'øm tø ttanibiktaagi.

²⁰ Põni janch idõõn ku ja Cristo namyayi mөөт тō mjantyimy'ookti, çtigõjxpts ku jade'en mdsinay'adõõstsi sam ja'ajindi, põn ja Dios yja' tkabaduujnidip? Ja' yikmajadaktip jõts ñadyanigutujk'atyidi ja kyõ'õm'ana'amin, ²¹ ku yide'en ñay'ane'emyidi: "Kidi yõ' xjii'kxy, uk kidi yõ yjade'embì xjii'kxy, kidi yõ xõñ." ²² Yõ yjade'embì ana'amin, tum ja' yõ ñi'ane'empy midì waani ejtp jõts ja ñajxni jade'en sam o ti pikta'aky midì tō tyuñ jõts ja ka' ti y'ukwani, jade'ents ja jaã'y ja kyutujk jade'en ja y'ixpõjkin. ²³ Oy idõõn ja yjawi njantyiyja'wa'ant, jabi õyxi ja yik'ayowim yikpadu'unt tsõ'õgi kõjxp. Nitits ja kyawa'añ, kaja'ajipxi xpudõjka'am jõts nbõky xniwaajtsint.

3

¹ Jõts kumi tō mee ñamyayi mjujkyiky nayide'en ku ja nwindson'ajtim Jesucristo yjujkyjyky, ja'agõjxp xjotmay'ajtidit ja nwindson'ajtim yja', põ ja'axi ja Dios Teety amuum tō myõ'õyi ja mõk'ajtin. ² Ja' ejtp mwinmaa'ñ'attip midì ja Dios yja'ajip jõts ka'ap ja xyikmõjtõkidit midì yã naxwiin. ³ Jade'ents ngajpxin ku ja Cristo y'õjky jõts mee ñamyayi nayide'en tō m'õõky, ka' x'uktatõjkiñidit ja ka'õybi midì yã naxwiin. Ja nwindson'ajtim mee mgõjõ'mit'ajtniyidip jõts mee mjujky'aty xemikõjxp mã ja Dios, ⁴ jõts ku ja Cristo kyaxõ'õkt nayide'ents meets ja wyinaty mөөт mgaxi'iky jõts meets nayide'en ja y'õy'ajtin ja xyondaajkin xpaajtyidit.

Ja õchinaa'yin jõts ja ka'õchinaa'yin

⁵ Paty x'ixmatstì tuki'iyi ja ka'õybi: ka' põn amajtskjaa'y tມөөတ'att ja wenk yaa'dyõjk uk ja wenk tõ'õxyõjk, ka'ap ja axõõk winmaa'ñ xyiktu'undit, jõts nayide'en ka' ti x'amã'at'attit. Jade'en yõ tuki'iyi tpaaty ku yõ xu'undit ejxindam jeexyip xwindsõ'õgidi ja awanax ja agojnax. ⁶ Yõ'õgõjxp ja Dios tkexy ja ayõ'on jõts ja ttuktagidã'aky ja yjade'embì jaã'y põn ja kamimadojyip; ⁷ jõts ku y'yity ka'anim xjanchja'wiyidi ja Dios yja', tuki'iyi meets yõ y'ity nayide'en xuñ. ⁸ Ixyamts, ixmãtõjõkxiidi yõ ka'õybi, yõ ambõjkin, yõ axõõk winmaa'ñ, yõ ka'õdyu'unin, yõ nawyingajpxnaxi jõts yõ ka'õy'ayuujk. ⁹ Kidi mnawyingaay'atyidi, põ tõi x'ixmatstì sã y'ijty mjaã'y'atti, ti jaty y'ijty mdundip. ¹⁰ Tõts ja Dios myiktigachidi jõts ja yjembyi tō xpadõkidi, põni sã meets ja yja' xjanchja'wiyi, nayide'ents meets ja myiktigachi kunim yikxon xtyimñijawidit sã ja Dios. ¹¹ Jõts ka' chõkyi wan põn tgrigõtjãa'yì uk t'israelitjãa'yì, wan ja t'ejxa'aninmõõdidi uk tka'ejxa'anmõõdidi, wan ja abiky mã tsoondi uk wan ja tja'ajidi põn ja Dios tkanija'widipnim. Yjaja'ajidi ja' põn tmidundip ja windsõn, uk põn najtspõki ejtpt, tum ja nwindson'ajtim Jesucristo ja' yja', jõts myõõt'ijty ja õy põn.

¹² Mdsojkip meets ja Dios, ja'agõjxp meets ja tō mwi'ijxyi jõts ja tō mja'bikyidi. Tsõõnidits yikxon. Yiktundi ja õy'ajtin amuum, ja ayõ'ejxin, ja jotwa'ãñ'ajtin, ja windsõ'jkin, ja wijy'ajtin jõts ja tudã'aky'ajtin. ¹³ Namyidudã'aky'atidi xem yam jõts namyaa'kxukidi ku põn ti ttuñ jõts ja myigu'uk tpo'ky'ixy. Nayide'en xu'undit sam ja nwindson'ajtim Jesucristo mbojkipimee'kxyidi. ¹⁴ Ka'apts ti jade'en sam ja tsojkin sam ja pa'ayõ'owin, ja'ats idõõn myiktu'undip, põ ja'axi amuum tsojkip, ja'axi õy ti tyik'õgyaxõ'kp jõts niti jadu'uk jade'en abiky kyatsõkyi. ¹⁵ Ja Diosts ja yjotkujk'ajtin, ja Diosts ja xyondaajkin mwinmaa'nmyo'ojidip, põ ja'agõjpxi ja Dios tō mdukupabikyidi ja yja' jõts ja'abi jotkujk'ajtin xyiktu'undit ni'amuki niwine'en ja Dios xja'ajtyindi. Tukmõjãwidits tukunuu'kxyjãwidits ja Dios.

¹⁶ Jõts ja'ygyukiyidi yikxon ja nwindson'ajtim Jesucristo kyajpxy ja y'ayuujk jõts ja xwinmaa'ñ'attit. Nadyuk'ixpõkidi jõts nagyajpxjot'amõjkiyidi nixem niyam, ja wejin ja kajin myiktu'undip. Oõjidi ja Salmos, jõts õõjidi ja kunuu'kxkypajpxy jõts jade'en xukmõjãwidit xukunuu'kxyjãwidit ja Dios. ¹⁷ Ku ti xunwa'andi uk xkajpxwa'andi, ja nwindson'ajtim Jesús myõk'ajtin myik'awajnidip, jõts jade'en'ampy ja xukmõjãwidit xukunuu'kxyjãwidit ja Dios Teety, ja' myõk'ajtingõjxp.

Sã yjaã'y'attit põn tjanchja'widip ja Cristo o madsõo

¹⁸ Jõts ja tõ'õxyõjk põn amajtskti, mimadowdi ja mniyaa'y, jade'en pyaat'atyidi põn tjanchja'widip ja nwindson'ajtim. ¹⁹ Jõts nayide'en ja yaa'dyõjkmidi põn amajtskti, yikxon xjagyapit ja mndõ'õxy. Kidi mөөт atsep a'aki mdsõõnidi. ²⁰ Jõts u'nk una'jkmidi, mimadowdi ejtp ja mdeety ja mdaak, jade'en ja Dios ttsõky. ²¹ Jõts u'nkteety u'nktaak nayide'enmidi, ka' nugo xyik'ambõkkit ja m'una'jk jõts kidi t'ayõjidi. ²² Jõts põn midundip, mimadowdi ja jaã'y põn mwindson'ajtip, jõts kidi jaayì nugo nadyijyi myujy'atti ku ja m'ijxyidi jõts ja jade'en nugo m'õyjawiyidit. Mdu'undipxi dõ'õn sam pyaat'atyì Dios wyindsõ'jkingõjxp. ²³ Yikxon xu'undit ku ti xunwa'andi, ja Dios meets ja mdamidumpy jõts kidi ja jaã'yip õy ja' mjayiktuñidi. ²⁴ Tõts xnijawidi jõts ku ja nwindson'ajtim mmo'ojidit ja õy'ajtin jõts meets ja mdukupãdit ja kyunuu'kxin. Kumi Cristo meets ja yja' mdu'unxip, nay ja' meets ja kõ'õm mmo'õjip. ²⁵ Põnts ja kya'õybi ttump, nayide'ents ja ka'õy'ajtin ja

tikmo'odit. Ka'ap ja Dios ja t'ixy wan ja tjaþøniði, tuknaþ ja tum jade'en ttu'unt pøni sa tø yjaa'y'atti.

4

¹ Jøts meets windsøn pøn ja tunk tmøøt'ajttip, øy yikxon mjaa'y'attit jøts jade'en xyiktu'undit ja mdumbi sam pyaat'atyi. Ja'myatsti jøts ku ja nwindson'ajtm jap tsajpøtpy midi mee mwindsøn'ajtmip.

² Kidi mjotmonði, ejtp ja Dios x'ajot'attit, ejtp ja øy ti xukmøjawidit xukunuu'kxyjawidit.

³ Amidowdi pøktowdi jøts øøts ja nwindson'ajtm ja nnøø' ja nduu' xyik'awajtsit, jøts øøts ja ngajpxwa'kxit ja y'øgyajpxy ja y'ømyadya'aky, jøts nayide'en yiknigajpxt wa'ats ja Dios Teety wyinmaa'ñ, sudso ja nitso'ok'ajtm yikpaaty Jesucristo køjpx, ja'axi øts yam mgudsumchinaa'yip, pø ja'axi ngajpxwa'kxpy. ⁴ Ajot'attits Dios jøts øts ja kyajpxy ja y'ayuuþk øy pøn ndukniþa'wiyit sam idø'øn pyaat'atyi ndu'unt.

⁵ Øy yikxon mjaa'y'attit, migu'ukwa'andi pøn ja Dios yja' tkanija'wip jøts ttukmadowdi, kidi ja xøøw ja jumøjt nugo xyikwindigøydi. ⁶ Øy tsuj ja mmadya'aky xyikpidsø'ømdit, jøts mjattip nayide'en ja adsojimbeþtk sa nidu'uk nidu'uk øy pøn x'adso'odit.

Ku kyajpx'abaadiwya'añ jøts ja kajpxpoo'kxin t'ukyajkni

⁷ Ja nmigu'uk Tíquico meets jam mdukmadowip sa øts yam. Janch øy yø pyudøki, janch tsuj tmiduñ ja Dios. Tø øts yø nmøøtwidity. ⁸ Paty meets ja yam ndaniguexy jøts ja mgajpxjot'amøjkiyidit, jøts ja nayide'en mdukmadowidit sa øøts yam. ⁹ Ja Onésimo ja jam møøt ñijkxy, adøm ja nmigu'uk pøn amumjoojt tpaduujnip ja Dios yja'. Meets yø' mjaa'y. Yøøts meets ja mdamimadya'agip ti yam tuujnip jajtip.

¹⁰ Jøts øts ja nmigu'uk Aristarco pøn øts yam nmøøtsumchinaaþy, ja' yam nayide'en mdanigajxidip ja kajpxpoo'kxin, jøts ja Marcos nayide'en ja yja' tkajxmi, ja Bernabé ja myigu'uk. Tøts ja myiktukmadowdi ja Marcos; pøni mbaajtidip jam, øy yikxon xkupøktit. ¹¹ Nayi mgajpxpoo'kxidip ja Jesús pøn nayide'en yikteþ Justo. Yø'øyi dø'øn israelit jaa'y'ajttip pøn tmidundip ja Dios, pøn ø tø nmøøtundi, jøts yø' øts yam njanchta-jotkujk'ajttip. ¹² Nayi mdanigajxidip ja kajpxpoo'kxin ja Epafra pøn ja nwindson'ajtm tmidump, nay meets ja mjaa'y. Ejtp ja mni'amidowiyidi mniþøktowiyidi ku Dios ja t'ajot'aty jøts tu'ugyi øy yikxon xpanøjktit ja Dios, uk amuum mnadyamiyoxidit jøts ja xu'undit sa ja ttsøky. ¹³ Kumi wa'ats ø n'ixy nnijawi sa ja Epafra mdajotigøydi, jøts nayi tyajotigøþpy ja nayide'en pøn tsinaadyip jam Laodicea kajpkøjpx jøts jam Hierápolis kajpkøjpx. ¹⁴ Nayi mgajpxpoo'kxidip ja Lucas, pøn tsøyip jøts nayide'en ja Demas.

¹⁵ Kajpxpoo'kxtits adøm ja nmigu'uktøþkti pøn ja Dios ja'ajtidip midi tsinaadyip jam Laodicea, jøts nayide'en xkajpxpoo'kxtit ja Ninfas møøt ja'adi pøn ja Dios tjanchja'widip, pøn jam namyujkidip ja' tyøþjotþ. ¹⁶ Ku yø nøky x'uk'ejxkøxtit winets ja xanigaxtit jøts wan t'ejxti pøn ja Dios tjanchja'widip jam Laodicea, jøts meets ja nøky nayide'en x'ejxmit midi jam tso'omip. ¹⁷ Jøts nøþmidi ja Arquipo jøts ku ka'pxy tpadu'unt sa ja nwindson'ajtm tø tyunkmø'øyi.

¹⁸ Øts njaapy ya'at kajpxpoo'kxin jøts meets ja ndaniguexy. Jøts xja'myatstibim øts ku Dios x'ajot'attit jøts ku øts yam ndsumy'ity. Dios mgunuu'kxidip. Jade'en idø'øn ja jþatt.

JA MYĪDU'UKPĪ NØKY MIDI JA PABLO TYANĪGAJX JA TESALÓNĪKT JAA'Y

Ku ja Pablo tnijayi pøn ja nwindson'ajtim tjanchja'widip

¹ Pablo ø nxøøw, jøts øø yam nguejpxy ja nøky møøt ja Silvano jøts møøt ja Timoteo, jøts øøts ja ndaniguexy pøn jaty tjanchja'widip ja Jesucristo yja' jam Tesalónica kajpkøjxp, pøn møøt amumjoojt t'etti ja Dios Teety jøts møøt ja nwindson'ajtim Jesucristo. Nay ja'ats amuum mgunuu'kxidip jøts ja jotkujk'ajtim mmo'o'jidadit møøt ja nwindson'ajtim Jesucristo.

Ku ja Tesalónikī jaa'y tyiktaañ ja ejxpajt sa ja Dios yikjanchjawi

² Ejtp øøts ja Dios ndukmøjawi ndukunuu'kxyjawi ku meets ja xjanchjawi, jøts ku øøts ja Dios n'ajot'aty ejtp mee njā'myech. ³ Ku mee ngajpxpaaty ku øøts ja Dios n'ajot'aty ka'ap øøts ja njā'dyigøy ja m'ø'yajinti, sa ja tsojkin ja pa'ayo'owin xmøøt'atti, jøts sa ja ajot'ajtim møk'ampy xjagyapti jøts xjøp'ejxti ku mye'ent jadigojk ja nwindson'ajtim Jesucristo. ⁴ Meets migu'uktøjkti, pøn jaty ja Dios janchja'widip, Dios mee mdsojkip jøts nay ja' tø mw'i'jxyidi jøts mee mniitso'ok'att. ⁵ Jade'en'ampy øøts nnijawī ku øøts jam ojts ja Dios y'øgyajpxy ja y'ømyadya'aky ngajpxwa'kxiyi mā meets jam, kidi øødsip ja ojts jade'en nugo ngajpxy, pø jamxi ja Espiritu Santo ja myøk'ajtim ja tmøødiyī jøts ja jade'en wa'ats yiknijawit jøts ku ja'abi kajpxy jøts ku ja'abi ayuujk tyiyyi yjanchi. Wa'atsxi xnijawidi jøts ku øøts ja nduūñ, kidi øødsip ja kø'øm nadyamiduuñip pø ja'agøjpxxi øøts ja nduūñ jøts meets ja xyiktu'unt.

⁶ Ja Espiritu Santots mee mmøøjyip ja xyondaajkin jøts meets ejtni xoni xkupøkti ja Dios y'øgyajpxy ja Dios y'ømyadya'aky øy meets ja kawine'en tø xkuwanjati. Xjats meets nayide'en xuñ sa tø xpa'ejxti ku øøts ja ayo'on nmidani midi ja nwindson'ajtim tø ttunjøpi. ⁷ Xjats jade'en tø mbidsømdi jøts ejxpajt mwa'andi jøts ja mni'ejxu'udyidi niduki'iyi pøn jaty ja Dios tjanchja'widip, pøn jam tsinaadyip Macedoniit jøts jam Acayit etjotp. ⁸ Jade'ents idø'øn ja Dios y'øgyajpxy ja y'ømyadya'aky tø xyikwa'kxiyidi, jøts kidi jatyip meets ja jade'en nugo tø xuñ Macedonia uk jam Acaya, yiknija'wip yø o madsoo jøts ku meets ja Dios amuum xjanchjawi. Ti sa øø njaakwa'ant, ti øø njaaknikyajpxp. ⁹ Ja'axi ja kø'øm tmadyaktip jøts ku øøts jam ojts n'och mā meets jam jøts y'øyja'widip ja' sa meets jam ojts xkupiky, jøts øy ja yikxon tnmadya'akti sa mee xmajtstuupty ja'abi winmaa'n midi ja Dios kyaja'ajip, jøts ku ja Dios tu'ugyi tø xpabøjkpinaxwa'akti pøn xemikøjxp ejtp, pøn tu'ugyi Dios'ajtp. ¹⁰ Jøts ñayifimadyaktip ja nayide'en sa meets nwindson'ajtim Jesús xjøp'ixy jøts ku ja jadigojk wyimbett jap tsajpjøtpy ja Dios U'nk, pøn ja Dios Teety tyikniwaaajts ja o'jkin jøts ja tyikjujkyjiky. Ja'ats adøm idø'øn xuknitso'ok'ajtindip ja' ayo'on midi meemp midi wingomp.

2

Saja Pablo kyajpxwa'kxy jam Tesalónica

¹ Mnija'widipts migu'uk ja'adi, jøts ku øøts jam n'ats'øjch mā meets jam, ka'ap øøts ja nxøøw nugo wyindupøø. ² Øy øøts jam wyinaty Filipit kajpkøjxp tø nyikjemduñ, mnija'widipts ja wa'ats jøts ku øøts ja Dios tø xjanchpudøki jøts øøts ja kyajpxy jøts øøts ja y'ayuujk ja tø nyiknajxyi amumjoojt midi xyiknitso'ok'ajtindip, jøts meets ja tø myiktukmadøy yam idø'øn ja tsep yjanchjatuñi. ³ Jøts ka'ap øøts ngajpxigøy ti jaty øøts ojts ngajpxwa'kxy, jøts kidi wenk winmaa'ñip øø njagyeypy ku øøts jam jade'en ojts ngajpxy jøts nika' myikwin'øøndi. ⁴ Pø tyi'ajtinxi yø', tøxi ja Dios kø'øm tyikutuky jøts øøts ja tø xanipiky ja kyajpxy ja y'ayuujk midi yiknitsokp, jøts jade'ents øøts ja tø ngajpxnaxy. Jøts ni ka'ap øøts ja n'ixa'ay jøts øøts ja kuwani ndyimyikta'øy'ext uk ndyimyiktakajxa'akt, pø ja Diosxi yikmidump jøts ja'ats tu'uk tu'uk t'ejxp sa jaty pøngapøn yjaa'y'aty. ⁵ Jøts mnija'widipts ku øø ka' nugo ngajpxy sa jaty ojts myiknøjmidi jøts nigidi taayip øø n'ixaapy sudso øøts ja meef nbøkt. Ja Dios yø tnija'wip jøts ja' yø t'ejxp. ⁶ Niwindii øø ngawa'añ jøts øøts ja jaa'y xwindsø'øgit, wan meedi uk øy tyimyjapøni. Xpaat'ajtpimts øøts, øy øøts ja jeexyip jade'en tø nduñ jøts meets jeexyip ja nwindson'ajtim Jesús kyutujk myøk'ampy tø ndanipiky, pø ja'axi øø nbadumpy. ⁷ Ka'ap øøts jade'en tø n'adi'ich; øy yikxon mee tø nmiyujy'aty sam ja u'nktaak tyikyeeke tyiktsø'øky uk t'ejx'ity ja y'u'nk ja y'una'jk. ⁸ Njanchøjkpy meets mjanchpa'ayøøpy meets, jade'en pyaat'aty jøts øøts jeexyip ka'ap ja Dios kyajpxy ja'ayi nugo tø nyajkiyi, ngu'oljkippaat meets jeexyip ja'agøjxp ku ndsokti ja'agøjxp ku nba'ayowdi. ⁹ Mee migu'uktøjk, wa'ats inet xja'myatsti sa øøts y'ijty nduñ nbiky, sa øøts nnamiwinmaa'mbyaadyi jøts øø nbaaty ja nidsinaajyik. Ku øø nduñ xinaxy tsunaxy, ngamaa'y nga'ity øøts, jøts jade'en ka'ap myik'adsepti ku myikmo'odi jade'en ja Dios y'øgyajpxy ja Dios y'ø'yayuujk.

¹⁰ Mee nagyø'øm mnija'wip jøts møøt ja Dios, jøts ku ka' ti tundigø'øyin myiktu'unxidi. Yikxon øø njaa'y'aty jøts øøts jade'en ka' ti pøky xaja'aty øy øø pøn xjapøky'ejxwa'añ. ¹¹ Jøts mnay' mnija'widip nayide'en sã nidu'uk jaty tø myik'ayo'ejxti ku myikajpxjot'amøjkidi, jade'en sam ja jaa'y ja tyeety yjagyepyyi. ¹² Tøxi myiktukmadowdi jøts ku øy yikxon mjaa'y'attit sam pyaat'aty pøn ja Dios ja'ajtidip, pø ja'axi kø'øm wamp jøts meets ja mdaniwaadsowiyi ja kyutujktaajk ma ja amuum xyiktuujnidit ja myøk'ajtin, ja y'ø'y'ajtin jøts ja xyondaajkin.

¹³ Ja'agøjxpts øøts idø'øn ja Dios ja ndukmøjawi ndukunuu'kxyjawi ku meets ja kyajpxy ku meets ja y'ayuuujk ja ojts xmadøjyi midit mee ndukmadoo. Ojts ja xjanchkupøkti jade'en jøts ku ja Dios ja tja'aji, kidi nugo jaa'y'ixpi ja' yja'. Jøts janch tiy janchts idø'øn ja', jøts ku ja Dios ja tkajpxyi jøts ku ja Dios ja t'ayuuujk, jøts ja mbudøkiyidi pøn jaty ja tjanchja'widip. ¹⁴ Mee migu'ukti, ku tø xku'ayo'ombaadidi ja Dios, kawine'en ja mmigugajp tø mdagubetyidi, nayide'en tø mjatti sam ja jaa'dyi pøn ja Dios tjanchja'widip pøn ja nwindson'ajtim Jesucristo tjanchja'widip pøn tsinaadyip jam Judea, pø nayide'enxi ja tø yjatti, nayide'en ja myl'israelit jaa'y ja kyamee'kxyidi. ¹⁵ Yø'øbi israelit jaa'yts idø'øn tyik'oo'ktøø ja nwindson'ajtim Jesús. Nayide'en ttungojmidit sam ja tø tyik'oo'kti ja kyø'øm migu'uk pøn jaty ja Dios kyugajpx'ajtpy, jøts øøts ja tø xpawøpy. Niwine'en ja Dios ja tkayikjotkujk'atti jade'en, jøts yjanchtumwenk'ejxtip ja jaa'y øy pøn, ¹⁶ jøts ku øøts ja Dios yja' njadukmadoo'wammiy pøn ka'israelit jaa'dyi jøts ja nitso'oktit, ka'ats øøts ja jade'en xuktunwami. Xjats jade'en ja pyøky nugo tyikmiweni'adø'øtsti. Ixyamnimts inet ja Dios ja møk ayø'on tø tyuktagida'agidi.

Ku ja Pablo øy tjapaatwa'añ jadigojk ja Tesalónikit jaa'y

¹⁷ Mee migu'uktøjk, ku ojts nnawya'kxyindi jøts waani ñajxy ja et ja xøøw, nja'myajt'ijtpyim meets øy mee njaga'ijxy jøts øøts njanchja'atsnøjkxwa'añ kawinaak ojk jøts mee n'ats'ext. ¹⁸ Ojts øøts njadyimya'uktsøøñ; øts meets jam kø'øm kawinaak ojk tø njadyimya'ats'ejxwa'añ, jøti jatyts øøts ja miku' xyiktuu'duky jøts øøts jam nganjikxy. ¹⁹ Jøts tigøjxp øø nxonda'aky, ti øøts idø'øn ndaxondakpy, ti øøts idø'øn njøp'ijxpy, ti øøts idø'øn ndajotkujk'ajtpy, pø meetsxi dø'øn ndajotkujk'ajtpy ku mye'ent ja nwindson'ajtim Jesucristo. ²⁰ Meetsxi dø'øn ndajotkujk'ajtpy ku øø nxonda'aky.

3

¹ Jade'en'ampy øø tø nwinmay jøts øø nda'ant yam Atenas kajpkøjxp ku øø ka' n'ukmajadakni, kumi ka' øø n'ukmidanaañi jadine'en ja jotmay, ² paty øø tø nguexy tu'uk ja nmigu'uk pøn jam tø m'ats'ijxyidi. Timoteo øøts nguexy, ja'axi ja Dios tmidump jøts ejtp øøts ja tø nmøøtuñ ku øøts ja nwindson'ajtim Jesucristo y'øgyajpxy ja y'ø'y'ayuuujk tø ngajpxwa'kxyi midit ja nitso'ok'ajtin tyajkp, ja'ats mdukmadowidip jøts ja mgajpxjot'amøjkiyidit jøts ja m'ajot'ajtin tu'ugyi xyik'ettit, ³ jøts jade'en ka' pøn t'ixmatst øy idø'øn ja tsep jade'en y'ity. Wa'atsxi kø'øm xnijawidi jøts ku jade'en ja ayø'on nbaajtindit. ⁴ Jøts ku øø nay jam wyinaty møøt meets, ojtsxi øø nnigajpxy jøts mee ndukmadøy jøts ku n'amjajtindit ndsaachjajtindit; tøts xnijawidi jøts ku jade'en tø yjanchjaty. ⁵ Paty øts, kumi ka' øts jadine'en n'ukjotkujk'ajtni, ja'agøjxp mee tø ndaniguexy ja jaa'y jøts ja tyiktø'øt sã ja njanchja'win xyik'etti, ja'ats ø ndsø'jkp uk wan meets ja miku' tø mduktuñi ja yja' jøts jeexyip ja Dios kyajpxy jade'en nugo ñiwyindigøy sã meets ja ojts njadukmadøy.

⁶ Tøts ja Timoteo wyimbity jam Tesalónica jøts ja yam tø tmija'aty ja kajpxy ja ayuuujk midit yikjotkujk'atym jøts ku meets ja janchja'win møj xjagyepy jøts xyiktuujnidit xem yam ja Dios chojkin. Yide'ents ja yam wya'añ jøts ku meets ejtp xja'myech, jøts ku nayide'en ja tsojkin xjagyajpti jøts øø xjapaatwa'añ nayide'en sam mee nja'ejxwami. ⁷ Ñiyjot'amøkpøjpk øø migu'uk yjawi, ku øø nnimadøy jøts ku tu'ugyi ja Dios xjanchjawidi, yam øøts idø'øn yjawi yide'en tsep'agujkpy njaty. ⁸ Ku øøts jade'en nnimadøy jøts ku ja Dios tu'ugyi amumjoojt møøt m'etti, jade'en øø nnayjawi'iyi tyimxyajimbejtp øøts yjawi. ⁹ Ku meets jade'en xuñ, øy øøts ja Dios møj njanchtamøjawi ku meets jade'en xpadundi ku jade'en xwindso'øgidi ja Dios. ¹⁰ Xjats øøts yide'en xinaxy tsunaxy ja Dios n'amidøy jøts mee ndyimy'ats'ext, kø'øm ndyimy'atspaattit, jøts ka'pxy myiktukmado'odit ti jaty mjaaka'ejtxidip jøts ja mjanchja'win tu'ugyi t'ettit.

¹¹ Ja' øø ndsøjkpy jøts øøts ja Dios Teety, jøts øøts ja nwindson'ajtim Jesucristo xpuðøkit jøts øøts jam nnøjkxt jøts jam m'atsyik'ejxtit. ¹² Nay ja Diosts myikmøjta'agiyidip ja mwinmaa'ñi jøts ja tsojkin møj xjagyajptit nixem niyam, jøts xminamyayidit øy pøn møøt nayide'en sam mee myiktsoktin sam meets ja tsojkin ndamijagyapi. ¹³ Nay ja Dios Teety mmo'ojidip ja myøk'ajtin jøts xmidanidit ku sã mjattit, jade'ents ja mja'bikyidi jøts mgapøky'ijxyidi ku ja nwindson'ajtim Jesús jadigojk mye'ent møøt niduki'iyi pøn jaty ja Dios ja'ajtidip.

4

Sa ja Dios xajotkujk'ajntint

¹ Ixyamts øø migu'uk nnigajpxy jøts mee myiktukmadowdi ja nwindson'ajntim Jesús y'ana'amingøjxp: jøts ku jade'en xun'ettit sa øøts ojts nyik'ixpiky jøts ku mdsøonidit mdanidit jade'en sa ja Dios ttajotkujk'aty. Tun'ettits meets ja jade'en.

² Mnija'widipxi ja ana'amin mididi myikmøødyi, mididi øø tø nnigajpxy ku jade'en tyikutuky ja nwindson'ajntim Jesús. ³ Ja' Dios chøjkpy jøts ja tu'ugyi xnadyamiyoxidit; jøts kidi nugo mnamyøøt'atyidi pøni ka'adam ja xniyaa'yidi pøni ka'adam ja xnidø'oxyidi, ⁴ ku pøn y'amajtskiwya'añ, ka'ap ja patki'iyi nipøn tø'øxyøjk tkamøøt'att. Ja' øy wa'ats pidsømp jøts ja jade'en kø'øm ñawyindsø'øgyi. ⁵ Jøts kidi nugo mbøkti ku mnachuj'ixyidi ja'ayi sam ja jaa'y y'adi'ichin pøn ja Dios tkanija'wip. ⁶ Kidi pøn ja myigu'uk ñidø'øxy twin'øø'nidi, møk nwindson'ajntim mdagubatidit, pø tøxi øø nnigajpxy. ⁷ Ja'ats adøm ja Dios tø xanibiktaajka'am jøts adøm øy tsuj njaa'y'ajntindit. Ka'ap ja jade'en wya'añ ja Dios jøts ja kya'øbyi ndu'unint. ⁸ Jade'ents idø'øn, pøni pøn yø'øbi ixpøjkin tkamøjpiktakp kidi myigu'ugip ja jade'en wyinaty tyumpy, ja Dios idø'øn ja wyinaty jade'en kyamimadøøpy, pøn adøm ja y'Espiritu Santo tømø'øyim.

⁹ Wine'en ja tsøjkin wine'en ja namya'ayin xem yam, ka' øts ja ngajpxwa'añ. Ti ja øts ja nugo njaañit, pø tøxi Dios kø'øm mdukjatyidi jøts xem yam mnamyayidit mnachokidit. ¹⁰ Ejtp meets ja mmigu'uk jade'en xminamyayi pøn ja Dios tjançhja'widip jam Macedonia. Ja'ayi ø nugo nnigajpxy jøts ja n'øyjaa'y'ajntim møk xjaakyyik'awa'andit, jøts myøjtit ja m'amigu'uk'ajntindi. ¹¹ Øy jotkujk idø'øn mdsøonidit mdanidit, ja mdunk ja mbøjk ja' idø'øn mjotmay'attip pø jade'enxi øø nxumiwa'añ, ¹² jøts ja abikpyi jaa'y mwindsø'øgyidit jøts kidi ti mga'ijtxyidi.

Sa ja nwindson'ajntim jadigojk mye'ent

¹³ Mee migu'utøjk, ka'ap øø ndsøky jøts jadi'iñi mda'andit, ni xkanijawidinim sa yjatt añmi'oo'kpi, jøts kidi jade'en mjotmay'ookti sam jadu'uk yjotmay'ooktin pøn ka' ti awejx'ajntin tjagyapti, pøn tkanija'widip ja Dios. ¹⁴ Pøni nmibijkyimts adøm ja Jesús ku ja tø y'øøky jøts ku ja tø yjujkpyiky jadigojk, sudsøts adøm ja ngamibøjkim jøts ku ja Jesús jadigojk wyimbett ku ja Dios Teety ja møøt tyikjuykpyøkt ja añmi'oo'kpi pøn jaty ja wyinaty tø y'atsjançhjawiyidi.

¹⁵ Paty idø'øn myiktukmadowdi nwindson'ajntim y'ixpøjkingøjxp, jøts ku adøm, pøn jaty wyinaty jujky'ajntipnim ku ja nwindson'ajntim mye'ent, kidi adømip tyimyjawyenyoyjindip jøts nika'anin ja' pøn tø y'ookti. ¹⁶ Pø kø'ømnmixi ja nwindson'ajntim kyida'akt jam tsajpjotp jøts ja kyajpxt kyutujkingøjxp, jøts ja kyajpxt sam ja møj ankilis, jøts ja pu-xuujx ja tyiktu'unt mididi ja Dios yja'ajtpy. Winetnimts ja yjujkpyøktit jawyeen pøn tø t'atsjançhjawidi ja Cristo, pøn tø y'ookti tyigøydi; ¹⁷ jøtsnim adøm pøn jujky tandipnim jaanimts adøm ja møøt nnøjxindit yootsjøtpy ma ja nwindson'ajntim nminabyaajntindit jam tsajpwemp. Jøts ja nwindson'ajntim jade'en xemikøjxp nmøøtjujky'ajntindit. ¹⁸ Paty mjadyimñagyajpxot'amøjkiyidit xem yam, yø'øbi kajpxy yø'øbi ayuujk myiktu'undip.

5

¹ Migu'uktøjk, ka' chøkyi jøts ø nja'at ti xøøw ti jumøjt mye'ent ja nwindson'ajntim. ² Wa'atsxi meets ja xnijawi jøts ku ja nwindson'ajntim yja'att jotmøn tu'ukpi xøøw, yam ja wyinaty ka'ap pøn tjø'ixy. Jotmøn ja mye'ent sam ja maa'tspi koots y'atsmiñ. ³ Ku jaa'y wya'andit: "Jotkujk ixyam, ka' ti tyuñi, ka' ti kumay", winets ja jotmøn tyaja'atpatidi jøts ja ayo'on myo'ojidit møk, jade'en tyaja'adidit sam ja tø'øxyøjk y'u'nkpiykin pøn ja y'u'nk tnikøjxp'ajtp jøts niwine'en ja chookin ja tkapaattit. ⁴ Jøts meets migu'uktøjk, ka' meets wimbeeds mgugøösi. Me'emp ja juuni xøøw ja nwindson'ajntim jøts ka' nugo jotkumoni mbaaädyidit ejxim ja jaa'y adsu'jky yikwimeech. ⁵ Pø Diosxi mjagyajpidip jøts adøm wimbeets kugoots nga'ijtyindi. ⁶ Paty ka'ap jade'en nugo njotmo'onindit sam jadu'ukpi y'adø'tsta'an, njøp'ejxindip idø'øn ja' wijy kejy. ⁷ Pøn nugo najtspøki ejtp, ja wimbeets'ajntin ja kugoots'ajntin ja yikmajadaky; jøts pøn mukjip kujxip, nay ja' ja yikmajadaky. ⁸ Jøts kujaji kudøø'kxi adøm, patyts adøm ejtp wijy kejy n'ejtindit. Kuwani njançhja'windit amumjoojt ja Dios yja' jøts nnachojka'andit nnamyajya'andit. Jade'en idø'øn nnadyagubojka'andit ja Dios yja' ejxim ja soldadi ñadyagubøkyan ja pyujx jøts ja nisa kyajaty. Jøts njøp'ejxindip adøm ja nitso'ok'ajntin, jade'en idø'øn ja ñamyayi tpaaty sam ja soldadi pyujxkujup mididi ja kyubajk ja adanaajyiyip. ⁹ Pø kidi ja'ajipxi adøm ja Dios tø xanibiktaajka'am jøts adøm n'ayo'ombaaajntindit, pø ja'axi ja chøjkpy jøts adøm ja øy'ajntin nitso'ok'ajntin nbaajntindit nwindson'ajntim Jesucristo køjxp. ¹⁰ Adømxi ja nwindson'ajntim Jesucristo tø xku'ø'jkindi jøts adøm ja møøt njujky'ajntindit. Nbaajntimpxi ja' xemikøjxp

øy njadyimyjajuky'ajtyindinim uk øy wyinaty tø njadyimya'o'jknandi. ¹¹ Paty jotmøk mnabyikta'agidit jøts xem yam mnabyudøkiyidit sam ixa mmendi mbatti.

Ku ja Pablo ja jaa'y tkajpxwiyj pøn tø tjanchjawiidi ja Dios

¹² Migu'uktøjkti, ndukmadoodip icyam jøts waani xwindsø'øgidit pøn ttundip ma meets jam, pøn jam nduu'møøjyidip, pøn jam mda'ana'amidip ja nwindson'ajtim yja'. ¹³ Øy tsuj xaxonda'aktit ku jade'en tyundi, yiktundi ja tuda'aky'ajtin, yikxon namyiyuyj'atidi nixem niyam.

¹⁴ Jøts nayide'en migu'uktøjk ndani'ana'amdi, jøts xukja'gyukidit pøn katunwandip, kajpxjot'amøjkidi pøn yø'øbi tkadajotkukidi ku ja yikjemdundi yiktedundi, pudøkidi pøn waani jot'amutsk'ajtpnim jøts tuda'aky mjaa'y'attit øy pøn møøt.

¹⁵ Øyim mnay'ejxidit jøts kidi pøn nayide'en ttuñ ja myigu'uk sam ja tø kyayik'ødyuñin. Tum ja y'øbyi ne'egi ejtp mdu'undip. Øy xwindsø'øgidit ja mmigu'uk nixem niyam jøts nayide'en øy pøn møøt.

¹⁶ Øy jotkujk m'ettit. ¹⁷ Ajot'at'etti ja Dios Teety. ¹⁸ Pøni ti jaty tuujnip, tukmøjawiidi tukunuu'kxyjawiidi ja Dios, yø' ja Dios chøjkpy jøts meets jade'en xu'unt pøn jaty tjanchjawiidi ja nwindson'ajtim Jesucristo.

¹⁹ Kidi ja Espiritu Santo xyiktuu'dujkidi ja myøk'ajtin midi meets ja mdunwa'anxyiyip mjuky'ajtingøjxp. ²⁰ Jøts kidi xkagupøkti ja mmigu'uk pøn amuum kunuu'kxip ja Dios jøts ja tkajpxi ja Dios y'øgyajpxy ja Dios y'ømyadya'aky. ²¹ Yikxon tuki'iyi x'uk'ejxtit, jøts midi øy, ja'ats mbaajtidip. ²² Exmajtskøxti ja kya'øbyi.

²³ Jøts nay ja Dios, pøn ja jotkujk'ajtin tyajkp, nay ja' wa'ats myik'ejtxiyidip ja mjaa'y'ajtindi kunim ja nwindson'ajtim Jesucristo wyinaty myiñ. ²⁴ Pø tøxi ja Dios mwi'ijxyidi, jøts tiy janch ja wya'añ jøts tuki'iyi ja jade'en ttungøxt sa ja tø wya'añ.

Ku ja Pablo t'ukajpxpoo'kxin ja myigu'uk

²⁵ Migu'uktøjkti, ni'amido'owik øøts, nibøktso'owik øøts.

²⁶ Yiknajxidid øøts ngajpxpoo'kxin jøts ja mmigu'uktøjk xkajpxpoo'kxiti sam ja Dios tsøkyin.

²⁷ Jøts nayide'en ndanipøkti Dios y'ana'amingøjxp, jøts ya'at nøky xukmado'odit niduki'iyi ja mmigu'uk pøn ja Dios tjanchjawiidi.

²⁸ Mgunuu'kxidip ja nwindson'ajtim Jesucristo. Jade'en idø'øn ja yjatt.

JA MYĪMAJTSKPI NØKY MIDI JA PABLO TYANĪGAJX JA TESALÓNIKĪT JAA'Y

Ku ja Pablo tnijayi pøn ja nwindson'ajtim tjanchja'widip

¹ Pablo ø nxøow, jadu'uk txøow'aty Silvano jøts jadu'uk Timoteo. Ja' øts ya'at nøky ndanija'ayidip pøn jaty ja Jesucristo tjanchja'widip jam Tesalónica kajpkøjpx, pøn ja Dios Teety møøt y'letti jøts møøt ja nwindson'ajtim Jesucristo. ² Paatti kupøkti ja Dios Teety y'ø'y'ajtin ja Dios Teety kyunuu'kxin midi ja yajkpy møøt ja nwindson'ajtim Jesucristo.

Tyidyu'ump ja Dios Teety pøn tø kya'øyjaa'y'aty ku ja nwindson'ajtim mye'ent

³ Migu'uktøjkti, pøn jaty ja Dios tjanchja'widip, ejtp øøts ja Dios ndukmøjawi ndukunuu'kxyjawi meets køjpx sam idø'on pyaat'aty jøts øøts jade'en ndu'unt. Møjyi y'adøjtsidipxi ja mjanchja'windi jøts nayide'en ja tsojkin midi ja Dios mmøjyidip jøts ja mmigu'uk xtsøktit xpa'ayo'odit. ⁴ Xondakp øøts, xjats øøts jade'en nnimadya'aky ma jaty ja Dios tjagyepy ja yjaa'y, jøts meets jade'en myiknimadya'akti ku tuda'aky mjaa'y'atti jøts ku ja mjanchja'win xyikmajada'akti øy m'amjatti mdsachjatti uk ja ayo'on xpaatti. ⁵ Jade'ents yø yikja'gyuki jøts ku ja Dios ka' nugo tya'oo'kpety ku tyidyuñ, m'ejxip meets ja' jøts ku mee mbaat'aty jøts meets ja myiktøkyidit ma ja kyutujk ja ttanitani ja yjaa'y, pø ja'axi dø'on ixja mgu'ayo'owidip.

⁶ Paat'ajtidipts ja' ku ja Dios yik'ayøyidi pøn mga'ødyuujnidip, ⁷ jøts ja myikpoo'kxidit tuknað møøt øøts, ja'abi xøow ku ja nwindson'ajtim Jesús wyinaty myiñ, ku tsajpøtpy tmigida'akt ja myø'ajtin møøt y'ankilistøjk. ⁸ Ja' ja ñime'emp jøts ja ttiidyu'unt pøn ja Dios tkamøja'widip ni tkabaduujnidi ja y'øgyajpxy ja y'ømyadya'aky. ⁹ Xemikøjpx ja nøjcx tyimgyudigøydi, jade'en ja yiktidyu'undit jøts ja jagam yikpikta'aktit ma nwindson'ajtim ja kya'ejxidit, ma ja tkapaajitidit ja y'ø'y'ajtin ja myøk'ajtin ja mye'ent. ¹⁰ Ku dø'on ja nwindson'ajtim mye'ent ja'abi xøow jøts ja wyindsø'øgyit pøn jaty ja yja'ajtpy jøts ja kyajxa'agiyit niduki'iyi pøn jaty ja janchja'wiyip, tøts meets ja xjanchjawi midi øø tø mmigajpxy ku ja tø myiktukmadowdi.

¹¹ Ja'agøjxpts meets idø'on ejtp nni'amidow nni'bøktsowi, jøts øø n'amidøy jøts øø nbøktsøy ja Dios jøts ja m'ø'y'ejxidit, pø tøxi ja kø'øm m'a'ejxiyidi; jøts nayi n'amidøøpy øøts jøts nayi nbøktsøøpy øøts jøts ja Dios ja myøk'ajtin tyiktu'unt jøts ja jade'en tyik'amøjatt sa meets ja tsojkin xjagyepy ku xunwa'andi midi tum øy jøts midi ja Dios mdamidundip. ¹² Ku jade'en xyiknaxti ku jade'en mjujky'atti, jade'en idø'on ñamyayi ja nwindson'ajtim Jesucristo xwindsø'øgidi, amuums ja Dios Teety, amuums ja nwindson'ajtim Jesucristo ja y'ø'y'ajtin mdakajxa'agidit.

2

Ja' pøn møj pøkytump

¹ Mee migu'uktøjk, ku dø'on ja nwindson'ajtim Jesucristo myenwa'ant ku ja nminabyaajta'andit, ja'ats øts yam nnigajpxwampy, ² jøts kidi nugo mwinmaamy'a'atti, ni xkatsø'øgidit paat ja' ku ja wenk kajpxy wenk ayuujk myiktukmadowdi jøts ku ja Dios ja tyaky, uk xmadowdi ja ka'amaa'ayin, uk myiktanigaxti ja nøky, ñadyijyi jade'en tpikta'akti jøts ku øøts ja nguexy, ñadyijyi wya'andi jøts ku tø yja'aty ja et ja xøow ku ja nwindson'ajtim myiñ. ³ Niwine'ents ja yjade'embii taay xkamibøktit. Kuts idø'on ja et ja xøow wyinaty kya'pxwani, jawyeen ja yide'en yjatt, tum midsep ja Dios yik'ejxnit, ka'ap ja y'ukyiktsojknit. Ja dø'on kyaxø'økt ja yikpøkyumbi pøn ja xemikøxpit kudigø'øyin tø yiktanibiktaajkiñi. ⁴ Ja' idø'on ja Dios tmidsep'ajtp, ja' ja tka'øyja'wip tuki'iyi midi jaty ja Dios yja'ajtpy, uk midi jaty paat'ajtip jøts ja yikwindsø'øgit. Ja'atp paat ja jap tsaptøjkjøtpy midi ja Dios yja'ajip jøts ja jap y'ixa'akt sami Diosin. Ja' kø'øm nadyejip jøts ku ja Diosin.

⁵ Ku njam'ajty ma meets jam, zkidi ja xja'myatsti ku øts yø øjts nnigajpxy? ⁶ Jøts wa'ats meets ja xnijawi tigøjpx ja yjaakta'ani, jøts ja ka' tsojki kyaxi'iky ku ja et ja xøow ka'anim tpaat'aty. ⁷ Jaanits ja' midi ja ka'ødyumbi yja'ajtpy kuuyi ja ja'ayi yjiwa'akt midi ja tyik'amøjkip. ⁸ Jøts ja jaty kyaxø'økt, ja nwindson'ajtim Jesús ja tyik'ookp, ja'ayi ja tpxujt. Jøts ku ja mye'ent amuum kudøø'kx møøt, ja'ayits ja tyukttagudigø'øpy. ⁹ Ja' midi idø'on ja'atp, ja mikul ja' yja' jøts ja' tmija'atp ja møk'ajtin, jøts ja yikxon tmija'att ja taay jøts ja nadyijyi tnankyja'ejxit ja y'ijxyimbi kya'ijxyimbi. ¹⁰ Jøts ja tum ja ka'øybi ja tyiktu'unt jøts ja jade'en twindaay'att pøn nøjcx windigøødyip, tøxi tkawa'andi ja tyiibi ja yjanchni midi yiknitsokp. ¹¹ Xjats ja Dios ja nayide'en tyikjaty, wan jade'en tyikwindaay'atti ja'agøjpx ku tø tyundigøydi jøts ja tjanchjawidi jade'en ku yikwindaayyidi, ¹² jøts jade'en niduki'iyi

yiktabayøðdyit ja pyøky, tøxi tkatijjawidi tkajanchjawidi mididi tiy mididi janch. Ja' ne'egi chojktip tyumjaka'øbyi.

Tø ja Dios ttanibiktaaqi jøts ñitso'ok'attit ja Tesalónikitt jaq'y

¹³ Meets køjxp øøts ja Dios ejtp ndukmøjawi ndukunuu'kxyjawi, mee migu'uktøjkti wine'en ja nwindson'ajtim mdsøky'atyidi. Patki'iypixi ja Dios tø mdanibiktaaqiyidi jøts mnitso'ok'attit, ja'agøjxp ja Espiritu Santo wa'ats myik'ijtyidi jøts ku nayide'en tø xjanchjawidi ja tyiiby'i ja yjanchpi. ¹⁴ Jade'en'ampy ja Dios tø mjetøkiyidi ku øø tø nngajpxy ja øgyajpxy ja ømyadya'aky mididi yiknitsokp, jøts jade'en' xpaattit ja kunuu'kxin mididi yja'ajtpy ja nwindson'ajtim Jesucristo.

¹⁵ Jade'ents migu'uktøjk idø'øn, ndukmadowdi jøts tu'ugyi xyik'ettit ja mjanchja'win, jøts kidi xja'dyigøydi ja ana'amin mididi øø tø nyaky ku øøts jam kø'øm n'ats'øjch, jøts nayide'en mididi nøkyøjxp tø myiktanigaxti. ¹⁶ Ja nwindson'ajtim møøt ja Dios Teety, ja' y'øy'ajtingøjxp tø xtsøjkyindi. Tø ja nayide'en xmø'øyindi ja kajpxjot'amøki mididi xemikøjxp, jøts ja yikxon njøp'ejxin. ¹⁷ Wants ja nayide'en tyikmøjki ja m'aaw ja mjoøjti jøts tu'ugyi xwindanidit jøts jade'en xnigajpxtit uk xu'undit tum ja y'øbyi.

3

Amidowdi pøktsowdi ja Dios jøts øøts ja kyajpxy nyikyø'øyyit

¹ Migu'uktøjkti, ja' øts yam njaaknigajpxwampy jøts øø xni'amidowit xnibøktsowit wan ja jaa'y tsojk tñimadowdi ja nwindson'ajtim y'øgyajpxy ja y'ømyadya'aky pøn jaty tsinaadyip øy madsoo, jøts tsojkingøjxp tkupøktit nayide'en sam meets ja tø xkupøkti. ² Jøts nayide'en x'amido'odit ku Dios x'ajot'attit jøts øø x'ixmatst ja ka'øyjaa'dyi ja kawindiy'ajtpidi, jabi ka'axi niduki'iyi ja jaa'y ja janchja'win tmøødidi sam adøm. ³ Øyts ja nwindson'ajtim, ja' mee tu'ugyi mdukmi'ettip ja winmaa'ñ jøts ja m'ejx'etidit jøts ja miku' mgamimajada'agidit. ⁴ N'ajot'ajtpy øøts ja nwindson'ajtim jøts ku xundi jade'en jøts xun'adø'øtstid sã jaty mee n'ane'emy. ⁵ Wan ja nwindson'ajtim nagyø'øm mbudøkiyidi jøts xjaaknigawidit sã ja Dios xtsøjkyindi jøts nayide'en xjagyaptit ja jotmøk'ajtin ja tuda'aky'ajtin sam ja Cristo.

Paat'ajtyip tu'ugyi madyamiyojxa'ant ja ndunkjøjpp

⁶ Mee migu'uktøjkti, ja nwindson'ajtim Jesucristo køjxp øøts yam n'ane'emy jøts xmajt-stu'uttit ja mmigu'uk pøn katunwandip uk pøn tkabadunwandip chinaa'yingsøjxp ja ixpøjkin mididi tø myiktukmadowdi, mididi øø tø nngajpxy. ⁷ Mnija'widipxi sã mjujky'attit sã mdsøønidi mdanidit jøts xpadu'undit nayide'en sã øø nduñ; ka'axi øø juuni ngatuñ ku øøts jam ndsøøni mã meets jam. ⁸ Uk ngagujuy øøts ja ndsapkaaky, jadi'iñi øøts ja nugo ngay, ka'ats yjade'eni, tump øøts, jotigøøpy øøts xinaxy tsunaxy jøts jade'en nidu'ugin mgayik'adsepti. ⁹ Øy øøts idø'øn ja xpaat'aty jøts meets xyakt ja pudøjkin, jøts øøts ja n'amido'ot, ka'apts øøts jade'en nduñ, tump øøts, pøjpk øøts, jøts jade'en myiktuk'ejxti sã xu'undit. ¹⁰ Ku øøts jam ndsinaay ku myikmøøtsinaadyi, yide'enxi øø nyajky ja tiy'ajtin: Pøni pøn katunwamp ka'ats kya'aty. ¹¹ Jade'en øø tø nyiktamimadya'aky jøts ku meets jam winaagin pøn jadi'iñi nugo tyiknajxtip, niti tkatundi. Ja'ayi tyuñ'ajttip sudso niti tkatu'undit, ne'egi ja myigu'uk tyikwinmaamy'a'atti. ¹² Yø'øbi jaa'yts øøts idø'øn nni'ane'empy ja nwindson'ajtim Jesucristo kyutujkøjxpit jøts wan ttajotkujk'atti ja tyunk jøts jade'en tpaattit mididi tyajjuky'attip.

¹³ Migu'ukti, kidi juuni x'ixmatsti ja ødyu'unin. ¹⁴ Ku jam pøn tkamøjpkta'akwa'ant mididi øø nngajpxy ya'at nøkyjøtpy, øyim x'ejxtit pøn jade'en adøtsp jøts kidi xunk'atti, wan iij wine'enin tsø'ødyunjawidi. ¹⁵ Kidi xmidsepøkti, jade'en x'ana'amditi sam pyaat'aty'i jaa'y ja myigu'uk t'ane'emy.

Ku ja Pablo y'ukajpxpoo'kxni

¹⁶ Jøts ja nwindson'ajtim tyakp ja øy'ajtin, ja' ejtp mgunuu'kxidip øy madsoo, øy tigati yjatuñi, ja nwindson'ajtim ni'ijty'i mjagyapidip.

¹⁷ Øts ngøjø'øm meets ya'at kajpxpoo'kxin ixyam ndanijayi. Jøts øts nxøøw nayide'en nbikta'aky sã øts ejtp nduñ ku øts ja nøky nguexy. Pablo. ¹⁸ Ja nwindson'ajtim Jesucristo niduki'iyi mmo'ojidip ja kunuu'kxin. Jade'en idø'øn ja yjatt.

JA MYËDU'UKPÏ NØKY MIDI JA PABLO TYANIGAJX JA TIMOTEIO

Ku ja Pablo ojts tnijayi ja Timoteio

¹ Øts idø'øn Pablo'ajtp. Øts ja Jesucristo ngudanaapy sam øts tø xpikta'aky ja Dios Teety midi xyiknitsoojkimp jøts nayide'en ja nwindson'ajtim Jesucristo pøn njøp'ijxyindip jøts ja nitso'ok'ajtin xmø'øyindit. ² Mets Timoteio ya'at nøky ndanija'ayip. Mjagyajpnipxi mets ja janchja'win, jade'en'ampyts myik'u'nktijy myik'u'nkjawi. Ja Dios Teety mgunuu'kxip møøt ja nwindson'ajtim Jesucristo. Ja' mmo'ojip ja pya'ayo'owin, ja' mmo'ojip ja yjotkujk'ajtin.

Ku yikni'ane'emy jøts kyayikupøkt ja ka'øy'ixpøjkin midi ka' tyiyi yjanchi

³ Tan meets jam Efeso kajjotp sam tøn da'ane'emy ku øts jam wyinaty nnøjkxwæ'añ jam Macedonia. Ana'am ja jaa'y midi jam winaagindi jøts kidi ja tnanky'ixpikyidi ja winmaa'ñ midi ka' tyiyi yjanchi ⁴ jøts nayide'en kidi nugo tyikmøjtøkidi ja kwenti ja madya'aky midi nisudso'ampy katüdyøjkip. Nugo amyøñ tsaachyøñ tmadaya'aky ja aptøjkti. Nugo adøm njakajpxy'ajtyindi sudso tpaaty, nisudso'ampyts kyatiidyøki. Niwine'en adøm ja xkabudøjka'andi jøts adøm nbaduujnin ja Dios yja' midi adøm ja tøn xanipijkyim midi tøn nyikmø'øyindi janchja'wingøjxp.

⁵ Jøts ja'agøjxp ya'at myikta'ane'emy jøts nixem niyam ja tsojkin xjagyaptit midi ja Dios yja'ajip, midi yiktump øy'ajtingøjxp øwiyinmaa'ngyøjxp ku ja nadyamiyoxi ñaxy amuum janchja'wingøjxp. ⁶ Tøts yø winaagin tmajtstutnidi jøts nugo ñanktyuu'tigøyidi ku tpaøkkti ja winmaa'ñ midi nisudso katüdyøjkip, nugo nadøki tnkyajpxy'atti. ⁷ Ja' chojktip jøts kyajpxwepi'attit sa ja Moisés kyutujk wya'añ, ni tkaja'gyukidits ja wyinmaa'ñ kø'øm sa jaty wya'andi, ni ja y'ixpøjkinbaat tkanijawidi midi nadyijyi ñigajpxtip amimøjnija'wibim tiy janch.

⁸ Nnija'windip adøm jøts ku ja'abi kutujk y'øyi ku jade'en tyunkpaaty sam tøn yik-tanibiktaagi. ⁹ Jøts yiknijawit nayide'en jøts ku nima ja kutujk kyayiktanibiktaagi ja øyjaa'y midi katundigøodyip; pø ja'axi ja kutujk wya'añ ku ja tøn kyøjy jøts ja tyu'unt ma ja jaa'y pøn tum nay'adsep tja'widip, pøn kamadoodip. Jaa ja tyuñ ma ja ka'øyjaa'dyi, ma ja møjpxøkyjaa'dyi; pøn tkawindsø'jkidip ja Dios, pøn tkawindsø'jkidip ja tsinaa'yin; pøn ja yikjaa'y'oo'k tyunk'ajtpy, øy ja tyeety ja tyaak ja tyik'oøktit tyiktigø'odyit. Jats idø'øn ja kutujk tyunkpaaty jøts ja tpayø'y ¹⁰ pøn namyøøt'ajtidip nugo, yam ja ka'ap y'amajtsk'atti; uk tmøøt'atti myiyaa'dyøjk myidø'øxyøjk; pøn jaa'myaa'tstip, pøn myigu'uk twin'øøndip, pøn ja Dios nugo tniwambajttip jøts ja myigu'uk twin'øøndi. Nayide'ents ja kutujk tpayø'øy pøn ja øy'ixpøjkin tkatsojpk, ¹¹ ja øy'ixpøjkin midi tniagjpxp ja øgyajpxy ja ømyadya'aky, ja Dios yja' midi yiknitsojk, midi øts yam tøn nyiktanipiky.

Tyamøja'wip ja Pablo ja Dios ku ja pya'ayoyiyi

¹² Ndukmøja'wipts ndukunuu'kxyja'wipts øts ja nwindson'ajtim Jesucristo pøn ø tøn xyikjotmøktæ'aky jøts øts ya'at ndunkjøøjp ndu'unt. Tøxi øts ja x'ixy jøts ku øts ja nmi'øy'aty, xjats øts ja tøn xpikta'aky jøts øts ja jade'en nmidu'unt. ¹³ Ja' øts idø'øn jade'en kø'øm xump, øy øts idø'øn ja y'ijty nja'axøøkmigajpxy, øy øts idø'øn ja y'ijty njabawidity jøts øts ja nmatswæ'añ ngawindiy'ajtingøjxp jøts øts ja y'ijty nyik'amjaty nyiktsaachjaty. Møj ja Dios ku øts ja xpa'ayøøy, ka'ap øts ja wyinajty njanchjawinim, ni nganijawi øts pøni ti øts jade'en ndumpy. ¹⁴ Paty øts ja nwindson'ajtim møj ndukmøjawi ku øts ja xukjanchja'wiyi ja yja', jøts jade'en ja nmigu'uk ndsojkindit nminamyajyindit ku møøt n'ejtindit ja Cristo Jesús.

¹⁵ Tiy'ajtin yø' jøts niduki'iyi njanchja'wa'ant: ku ja nwindson'ajtim myiñi ya naxwiñ jøts ja tyiknitso'ok'ajty ja øjpkpitumbi jaa'y. Møj tundigøøbyi øts y'ijty, nika' pøn jade'en. ¹⁶ Jade'engøjxp øts ja Dios xpa'ayøøy jøts yik'ext yiknijawit sa ja Jesús møj ja tyuda'aky'ajtin tjagyepy ku øts ja xpojkpimee'kxy. Jade'en ø ndunjøpi sudso yikpaatt ja jujky'ajtin midi xemikøjxp ku ja yikpabiky yikjanchjawi. ¹⁷ Paty nayide'en nwindson'jka'ant, nmøja'wa'ant n'øyja'wa'ant ja Dios Teety midi nwindson'ajtyindip xemikøjxp, ni kya'øøky ni kyadigøy ja', ka'ap ja yik'ixy. Ja'ayi dø'øn tu'ugyi ejtp, pøn tnija'widyaapy. Jade'en idø'øn ja y'ejxi tyiyi.

¹⁸ Mets u'nk Timoteio, mets ya'at ndanipijky jøts yikxon xpadu'undit ja Dios yja' samdam mmimadyajkidi ja Dios kyugajpxtyi. Mjanchjawip ja nwindson'ajtim amumjøot jøts øy ja mwinmaa'ñ xyik'ett. ¹⁹ Jaa winaagin jade'en yjajttøø ku ka' tmøjpktaaktøø sam tjanijawidi, jade'ents ja yjanchja'win tøn tyuu'tigøydi ²⁰ sam yjajttøø ja Himeneo jøts ja Alejandro. Tøxi øts ja kutujk nmø'øy ja Satanás jøts ø sagasa ja y'ayo'on ja tpaajtidit jøts jade'en tja'gyukidit jøts ku ja Dios kyayikwindsøy.

2

Ku Pablo ttukmadøøy ja Timoteo sudso tkugajpxa'akt o pøngapøn jaa'y

¹ Ixya meets jaween ndukmadøøy jøts ndanipøkti jøts møk kukunuu'kxyjawidit ja Dios jøts x'amido'odit xpøktso'odit jøts tpuðøkit ja naqxwii'ñit jaa'y. ² Kuwandaagidi ja windsøndøjk ja kudunktøjk jøts øy tsuj nyiknaxindit agujk jotkujk, jøts ja Dios jade'en ni'amuki xkunu'kxindit ku amumjoojt nwindso'jka'ant nwinja'wa'ant. ³ Ku jade'en nbadu'unint jade'ents t'øyjawi' t'øyjawi ja Dios midu xyiknitso'ok'ajtim, ⁴ Jabi jade'enxi ja tsoøky jøts niduki'iyi nniitso'ok'ajtim jøts nniija'wa'andit ja tyiiby ja yjanchpi. ⁵ Tu'ugyi jaa ja Dios Teety, jøts nayi tu'ugyi ja' midu xyiknitso'ok'ajtim jam Dios wyindum: ja nwindso'ajtim Jesucristo, ja' pøn jaa'y'ajtim nayide'en myøøt'ajtpy. ⁶ Ojts ja nwindso'ajtim Jesucristo ñagyøyaki jøts ja ojts xku'oo'ka'am adøm nbøkyøjxp jøts adøm nitso'ok'ajtim jade'en ñabajtyindi, xjats ja jade'en enkyi tøy yiknijawinim ku ja xøøw ja jumøjt t'paaatynim sa ja yjajty kyubejty. ⁷ Ja'agøjxp øts tøy nyikpikta'aky kugajpxy'ajtpi ku'aaw'ajtpi jøts øts ja janchja'win jøts øts ja tyi'ajtim nduk'ixpøktit pøn ka'israelit jaa'dyi. Tiy janch øts idø'on nwa'añ, ka' nugo ndabyaaty, pø ja Cristoxi øts amuum njanchja'wip.

⁸ Paty ø nwa'añ, jøts o ma pøn tja'myatstet ja Dios, ka'ap ja tsep, ka'ap ja aka y'øyi. Tu'ugyi amuum nbiktaajkin ja njanchja'win. ⁹ Jøts ja tøyøxyøjk, tuda'aky'ajtim øyjaa'y'ajtim yiktundip. Ka'ap ja ja'abi wet t'pikta'aktit midu namyikaxi kaxø'kp midu ja myigu'uk nugo tyukta'amutskidip. Kidi namyikajxingøjxp ja wyaay tyik'øyidi tyikpaadidi. ¹⁰ Jade'en ne'egi tpuðøkitid ja myigu'Adøjk ku ja øy'ajtim tyiktu'undit sam ja'adi pøn ja Dios tøy ñadyamiyøxyidi. ¹¹ Ku ja Dios yja' yikajpxwa'kxy, amøñi ja tøyøxyøjk t'paaatmado'odit, tuki'iyi ja yuy'ajtim t'pikta'aktit. ¹² Ka'ap mibaat ja tøyøxyøjk tkajpxwa'kxit ja Dios yja'. Ka'ap ja yaa'dyøjk tyik'amutskit, ja' tsojkip jøts amøñi y'ettit. ¹³ Jabi jaweenxi ja Dios tyikaxi'jky ja Adan jøtsnim ja Eva. ¹⁴ Jøts ja Adan ka'ap ja yikwin'i'i'ñ. Ja tøyøxyøjk ja ne'egi yikwin'øø'n, jøts ku yikwin'i'i'ñ jade'ents ja pøky t'paaatjty. ¹⁵ Jade'en'ampy ja tøyøxyøjk ja nitso'ok'ajtim t'paaati ku ja u'nktaak'ajtim tyik'awa'andi, ku ja janchja'win t'paaatu'undit, ku tjagyaptit ja tsojkin jøts ja wa'ats'ajtim, jøts møøt ñadyabudøkiyidit ja ja'gyukin.

3

Sa yjaa'y'attit pøn ana'amp tsaptøjkjotp

¹ Janch tyi'ajtim yø', janch øy yø'øbi tunk pøn tniwindsøn'ajtwamp ja Dios yja'. ² Paty nayide'en øy tsuj yjaa'y'attit jøts ka' nugo o sa yiknøjmidit. Pøni jam ñidø'øxy, tu'ugyi ja tmøøt'att, ka'ap ja kawinaak. Tuda'aky yjaa'y'att, sam ja tyunk tmøøt'aty ja'ats pyadu'ump. Jøts twindsø'øgit twinjawit pøn nimejnip nija'jtijp jam tyøjkjotp; jøts øy tsuj nayide'en yik'ixpøkt; ³ ka'ap y'øyi jøts y'amuu'kyjaa'y'att jøts ka'ap tsep t'ixa'at. Ka'ap ja myigu'uk nugo twin'øønt jøts ja meen jade'en t'paaat. Ja' tsojkip jøts ja pa'ayo'owin ttu'unt jøts ka'ap ja meen nugo pøkpaat t'jawit. ⁴ Øy tsuj y'u'nkteety'att sam pyaat'aty jøts tuki'iyi t'ext yjønjojp, jøts ja y'u'nk øy tsuj wyindsø'øgyit; ⁵ ku jade'en pøn tkatu'unt yjønjojp tyøjkjotp sam u'nkteety'ajtim, ¿sudsots ja t'ana'amt pøn ja Dios tjanchja'widip? ⁶ Ka' pyaat'aty ana'ambi tyøkt pøn tjembyabøjk ja Dios yja', ku ja nugo ñamyøjpikta'agit, jøts ku nayide'en yjatt sam ja miku' tøy t'ajja'adyi ja ayo'on. ⁷ Nayide'en chøky jøts ttunjøpit ja øy'ajtim ja tuda'aky'ajtim jøts jade'en wyindsø'øgyit pøn ja Dios yja' tkabaduujnipnim, jøts ka'ap ja jade'en pøky tyaja'adiyit jøts nayide'en ka'ap ja miku' nugo wyin'øøniyit.

Sa yjaa'y'attit ja møjaa'dyøjk pøn tundip tsaptøjkjotp pøn tpuðøjkp ja ayoobi jaa'y

⁸ Nayide'en ja møjaa'dyøjk pøn tkumaadyip ja ayoobi jaa'y jøts tyuda'aky'att y'øyjaa'y'att jøts kø'øm ñawyindsø'øgyit. Ka' ti ttu'undit, ka' ti tkajpxtit. Ka' myuktigø'ødyit jaween ja'adi, jøts ka'ap ja meen nugo pøkpaat t'jawidit. ⁹ Øy tsoøky wa'ats t'ñjawidit sa ja Dios yikjanchjawi midu y'ijty kayiknija'wip, jøts ja wyinmaa'ñ øy tsuj wa'ats tmøøt'attit. ¹⁰ Ja' tsojkip jøts yik'ext yiknijawit pøni ka' ti tundigø'øyin tmøøt'atti, møjaa'y'attipts ja' jøts tkuma'adyit ja ayoobitøjk. ¹¹ Nayide'en ja ñidø'øxy tyuda'aky'ajtimidit y'øyjaa'y'ajtimidit. Ka' nugo yjemajpxtit pyagajpxtit. Ja' tyu'undip midu tyi'ajtim. ¹² Ja møjaa'dyøjk tu'ugyi ja ñidø'øxy ja tmøøt'att, jøts øy t'ext ja y'u'nk y'una'jk jam yjønjojp tyøjkjotp. ¹³ Ja møjaa'dyøjk pøn øy tsuj tundip sa ja tøy yiktanipøkti, jinaxy ja myøjtøkiidit jinaxy ja yikwindsø'øgidi jøts ja nayide'en ka' tsep t'ukja'wiñidi t'ñagajpxtit sudso yikjanchjawi ja nwindso'ajtim Jesucristo.

Sa Dios ja wyinmaa'ñ tnanxy'ijxyi midu y'ijty kayiknija'wipnim

¹⁴ Tsojkip ø nnøjkxt jøts me n'ats'ext; ixyamts mets ya'at nøky ndanijayi. ¹⁵ Ku øts jotmøn nda'anigyoyt, jøts xnijawit sa njaa'y'ajtimidit møøt ja nmigu'uk pøn tøy t'janchja'wiñidi ja Dios, pøn amuum ja'ajtniyidip ja Dios, ja yikjujky'ajtpi, pøn t'ñgubojktip ja tyiiby ja yjanchpi. ¹⁶ Janch tyi'ajtim yø', ku janch møj ja Dios wyinmaa'ñ midu y'ijty kayiknija'wip. Ixyamts yik'ixy yiknijawi jabu jade'enxi jap jaabyety y'ity ku:

Jaa'yin ja nwindson'ajtim Jesús ñanky'eixiyi ya naxwiiñ; jòts ja Espíritu Santo tnigajpxy ku ja' tiy'ajtin tmøø'taty jòts nayide'en ja ankilistòjk y'eixøø ñija'wiyøø. Tø yikajpxwa'kxy ja Jesús y'ixpøjkin o magajp, jòts jade'en tpadundi ja naxwii'ñit jaa'y jòts ja chajpajtnaa ma ja Dios Teety jap. Jade'en ja nøky wya'añ.

4

Sa winaagin tmajtstu'uttit ja Dios'ajot'ajtk

¹ Tiy'ajtin ja Espíritu Santo wya'añ ku winaagin tmajtstu'uttit ja Dios'ajot'ajtk ku wyinaty wyingøñ jòts kyøxt ja naxwii'ñit. Jòts ja tpadu'undit ja ixpøjkin midì ka' tyiyi yjanchi, midì ja miku' yja'ajtpy. ² Ja'abi jaa'y ja tmado'odip pøn taay'ajtip pøn ja pyøky tkaja'widip øy ja tjanijawidi ku møj tø tyundigøydi. ³ Jade'en wya'andit jòts ku ka' n'amajtska'ant jòts ka'ap o ti njøø'kxint øy ja Dios ja køø'm tø tjabikta'aky; pø tøxi ja Dios ja ttanibiktaagi jòts ja nyiktunkpaajtindit tuki'iyi ja pikta'aky, pøn jaty ja Dios tjanchja'widip pøn jaty tnija'widip ja tyiiby yjanchpi yjøø'kxtipts ja', wan Dios ja ttamøjawidi ttangunuu'kxyjawidi. ⁴ Midì ja Dios tø tyik'øyi, tum øy ja', ka'ap adøm ja ngagupøjkint. Ndamøja'wimp ja Dios ja' ku nyiktunkpaajtint, ⁵ ku ja jade'en ndu'unint kunuu'kxyts ja wyimbejtnei ja pikta'aky sam ja kyajpxy wya'añ.

Sa ja Jesucristo øy tsuj yikmiduñ

⁶ Ku ya'at øy xuk'ixpøkt ja migu'uktøjk, øy idøø'n ja Jesucristo wyinaty xmiduñ, jòts m'ajot'atp ja', myiktunkpaatp ja' ja ixpøjkin sudso n'ajot'ajtim ja Dios midì ixymbaagt mgamajstutpy. ⁷ Ka' xmøjpickta'akt ja kajpxy ja ayuujk midì ka' tyuñ. Amumjoojt ja Dios yja' xpaduujnit; ⁸ øy nugo njanay'eix'ejtint jòts møk møjaaw nyiknajxint, ja Dios yja' ne'egi møj ku nbaduujna'ant. Ja'ats xpudøjka'amp jòts øy tsuj ndsinaa'yint jòts nayide'en ja øy'ajtin xukpaajtint xemikøjxp. ⁹ Janch yø' tiy yø', paat'ajtip jòts yø niduki'iyi nbadu'unint. ¹⁰ Ja'agøjxp møk ndu'unint øy njagu'ayo'ombaaajtindit øy njayikjemdu'uñindit nyiktedu'uñindi. Ka' ti nnumaa'yindit, jabi tøxi ja Dios xmøø'yindi ja jøp'eixin jòts niduki'iyi tyiknits'okt pøn jaty pabøjk'iyip.

¹¹ Yøø'bi winmaa'ñ idøø'n mni'ana'amp jòts nayide'en xnanky'ixpøkit. ¹² Øy tsuj jawyeen xunjøpit sam pyaat'atyin tpadu'undit pøn ja Dios tjanchja'widip jòts jade'en myikupøkt øy mja'unag'jkinim; jòts ja m'ayuujk øy tsuj xyikpidsøø'mt møøt ja m'øjjaa'y'ajtin, møøt ja mba'ayo'owin, møøt ja mjanchja'win. ¹³ Ku øts jam udyaa'gyi nja'att, kajpx ja nøky jam ma mnamyukyidi sa ja Dios kyajpxy wya'añ. Yikxon xukwinjawit ja migu'uktøjk jòts ja yjotmøkt'a'aktit, yikxon waani xyik'ixpøkt. ¹⁴ Yiktuñ ja møk'ajtin ja wijy'ajtin midì ja Dios tø mmøø'yi, Dios waan ku ja møjaa'dyøjk ojts mgøni'ajjy.

¹⁵ Tu'ugyi xu'unt yøø'bi winmaa'ñ jòts jade'en t'ejxtit tnijawidit sa tø xyikmiweni xyikaja'aji ja mja'gyukin jòts ja mjanchja'win. ¹⁶ Øyim mnay'eix'ettit køø'm midì mwinnmaa'ñ'ajtpy, midì mduk'ixpikpy, midì mdukni'wip ja migu'uktøjk, tu'ugyi xyik'ett midì mdumpy. Ku jade'en xu'unt mbaatpsts ja øy'ajtin jade'en, nayide'en ja'adi pøn tmadoodip ja ixpøjkin.

5

Saja Timoteo møøt y'ett pøn ja Dios tjanchja'widip

¹ Ka' xwindso't, ka'ap o sa xnøjmit ja møjaa'dyøjk; ne'egi tuda'aky xkajpxwejt sam ja mdeedyin; nayide'en ja una'jktøjk øy tsuj xjawit sam ja mgøø'migu'ugin. ² Nayide'en ja møjaa'dyøøxy xwinjawit xwindsoøgit sam ja mdaagin, jòts nayide'en ja kiixyuna'jkti sam ja mgøø'm'uchin, jade'en ja mduda'ajj'ajtin xyiktu'unt.

³ Pudøki ja ku'økytøøxy pøn ti kadyimy'ejtixp. ⁴ Pøni jamts ja ku'økytøøxy møøt y'u'nk y'una'jk møøt y'ap y'ok, jade'en ja una'jk pyaat'atyidi jòts ja tpuðøkidit ja tyeety tyaak jòts ja tyikwimbejtneyidit ku ja tø y'ijxyidi, yø' Dios y'øjja'wip, jade'en Dios ttsyøky. ⁵ Ja ku'økytøøxy pøn nadyu'uk tø tyañ, pøn ni'pøn ka'ejt, ejtpts ja Dios ja t'ajot'aty jòts ja pyudøkiyt, ka'ap ja Dios ja tja'dyigøy jøpy ux. ⁶ Jamts nayide'en ja ku'økytøøxy pøn ja Dios tka'ajot'ajtp. Tyumpy ja' pøni ti ja tyunwampy, øøky ja ñabyiktaajkniyi. ⁷ Tukmadow yikxon, wan tnijawi jòts ka' pøn øy sa ñøø'mxiyit. ⁸ Jamts winaagin tkajotmay'aty ja myigu'uktøjk, abiky tpikta'aky ja yjøø'n ja tyøjk jòts ja t'ixmajtsni ja Dios'ajot'ajtk. Tyimwyenkts ja ne'egi pyidsimy, ka'ap jade'en pøn ja janchja'win tkajagyajptinim.

⁹ Yø ku'økytøøxy yiklisti'atp midì tugi'pxy jumøjt pøni tøts ja tu'ugyi ñiyaa'y tø t'atmøøt'aty, paat'ajtiyip ja mibaat yikpuðøkit. ¹⁰ Mibaat ja yikpuðøkit ja'agøjxp ku tø y'øjjaa'y'aty, pøni tø y'u'nk y'una'jk yikxon tyikyeeky tyiktsøøky, pøni tø øy tsuj t'adsøy ja

jaa'y pøn tøj'ayø'odyip, pøni tøjxon twinjawi twindsø'ogi ja myigu'uk pøn tøjkupøjkni di Dios, pøni tøj tpuðøki pøn amjajtip tsaachajtip, uk pøni tøj tuñ jadu'uk øy ti may'ajt øy ti pudøjkin.

¹¹ Ka' mibaat yikjaabyatt ja ku'økytø'øxy pøn una'jknim; ja'agøjpx ku jotmøn y'amajtskit, jade'en'ampyts ja Cristo yja' ka'pxy tka'ukpadu'uniyit, ¹² jøts yikpøky'ixy ku tøj tmajtstutni ja' midit tøj t'ukpadøki. ¹³ Jats ja' pøn nugo ttunk'ajtp ja tøj'ayø'øky, ja nuux'ajtin ja pagajpxk nugo jade'en myiwidijtpy, jøts nugo ttatøki midit jagapaat'ajtiyip. ¹⁴ Paty y'øyi jøts y'amajtskit pøn ku'økytø'øxy una'jknim, jøts ja y'u'nk t'ext tjagyapt sam pyaat'aty jønøtpy tøjkjøtpy n'ejxint njagyajpint, jøts ka' nugo ja jaa'y pyagajpxiyit. ¹⁵ Jamts winaagin pøn ja Dios yja' tøj tmajtstutni, ja miku' yja' tøj tpanøjkxyi. ¹⁶ Pøni pøn ja Dios yja' tøj tkupøjkidi jøts pøni jam ja myigu'uk ku'økytø'øxy, mibaat ja kø'øm tpuðøkidit pøni ti ja ka'ejtzip, jøts ja ka' pyuðøkiyidit ja møjaa'dyøjk midit tundip jap tsaptøjkjøtpy. Jade'en'ampyts nayide'en yikpuðøkit ja ku'økytø'øxy pøn ja myigu'uktøj kadyim'yajttip.

¹⁷ Ja møjaa'dyøjk midit tngutujk'ajttip ja janchja'wibidi jøts nwindsø'jka'ant nwinja'wa'ant. Jamts ja' midit xuk'ejximp xuk'ixpøjkimp ja Dios kyajpxy, ne'egits ja møj nwindsø'jka'ant jøts ja nbuðøjka'ant. ¹⁸ Jabi jade'enxi jap jaabyety y'ity: "Kidi ja mdsakaa ajeñ xyik'økti ku ja xyiktunwa'andit." Jøts nayide'en: "Ku jaa'y nyiktu'unint kuwani myijuu'ñ ja tøkøky." Jade'en ja nøky wya'ñ midit ixa tøj xnijawidi.

¹⁹ Ka' xmøjpkita'akt ku yikni'øønit ja møjaa'dyøjk pøni ka'ap ja a'ejxnaxpi te majtskin uk tigøøgin. ²⁰ Pøni tundigø'y adøstip ja møjaa'dyøjk, mibaats ja jam yiktamigajpxt ma ñamyukyidi ja janchja'wibidi jøts jade'en tøjøtsø'ogidit tøjpjawidit ku tyundigøydi. ²¹ Ku ya'at jade'en ndanipiky wa'ats Dios Teety tmadøy, wa'ats ja nwindsøn'ajtim Jesucristo tmadøy møøt ja ankilistøjkt, jøts øy yikxon idø'on xpadu'unt yø ana'amin, ka' pøn nugo xukta'oo'kpatt. Pøni pøn tundigø'odyip tuknax ja xpayø'øty. ²² Ka' nugo ajawi xpikta'aktit ja møjaa'dyøjk midit tngutujk'atp ja janchja'wibidi, jawyeen yik'ext yiknijawit pøni sa yjaa'y'aty, kuts kya'øyjaa'y'aty jøts ja pyøky ttpaatt ja janchja'wibidi, øyim mnay'ejx'etit jøts ja pøky mgapaadit.

²³ Kidi nugo tsuxknøø xumi'uuky, pø pøj'ejtpxi xijy mjojt, vino m'uulqp waani. ²⁴ Pøn tundigø'odyip midit yiknija'wip wa'ats, ja'ats yikpayø'øpy, midit'its kayiknija'wip jaanims ja yiknijawit ku ja payø'øyin xøøw y'lett. ²⁵ Nayide'en ku ja øybi ndu'unint; øy ja jatyi yjagyayiknijawi, kuwani yiknijawi udy'a'agy. Ka'ap ja jadi'iñi tyaañ.

6

¹ Yø tumbitøj øy tuda'aky yjaa'y'attit jøts twindsø'ogidit yikxon ja wyindsøndi, jøts ka' nugo ja Dios yikpagajpxt, jøts nayide'en ka' nugo nyiktatbagajpxint ja n'ixpøjkin. ² Nayide'ents ja tumbitøj pøni jam ja wyindsøn midit nayide'en tpadump ja Dios yja', ne'egi møjts ja twindsø'ogidit, pø pyadumpxi nayide'en. Jade'ents ja ne'egi tpuðøkidit sam ja tsojkin tjagyapti. Me Timoteo, tukmadow kajpxwa'kx yø'øbi ana'amin midit nnigajpxpy.

Sa ja Dios yja' nbaduujna'ant jøts agujk jotkujk n'ejtint

³ Pøni jam pøn tkajpxwa'kxy ja wenk ixpøjkin midit ka' tminabyaadyi ja nwindsøn'ajtim Jesucristo yja', midit tkawindsø'jkip ja Dios, ⁴ nugo ja ñamyikexyi, ka'ap ja tnijawi pøni ti kyajpxpy. Nugo tyikjø'øpy ja winmaa'ñ ja ixpøjkin; jøts jade'en nugo ja tsep tyiknaxkida'aky ku nixem niyam ja ñank'yamutskiwyaa'añidi. ⁵ Nugo ja y'awa'an'ajtk tyiktundit ku tka'uknija'wiñidi ja tyiiby. Nugo win'øø'ningøjpx nadyijyi ja Dios yja' ttuujnidi. Jade'en ja wyinmaydi jøts jade'en tijy ja kumeeñ'ajtin yikpaatt. Mets Timoteo, majtstu'ut yø' pøni pøn jade'en jaa'y'ajttip, kidi xminameyi. ⁶ Jade'en'ampy adøm ja jotkujk'ajtim nmøøt'ajtyim ku ja Dios yja' nbaduujna'am øy meeñ o ti ngamøøt'ajtyim. ⁷ Ka' ti pøn tminiñ ku ngaxi'jkyimp ya naxwiñ, nayide'ents ku nwindsø'ø'na'ant, ka'ats ti n'uk'ejxna'ant; ⁸ pøni nbaajtyimp ja ngaajyik ja n'uujkik jøts ja nwet ja nnaamy, ndajotkujk'ajtimpts idø'on ja'. ⁹ Jamts pøn ja kumeeñ'ajtin tsojpk. Tyumpy, o ti ttu'unt, jøts ja jade'en o sa nugo tpaatt ja meeñ, kø'ømts ja jade'en ñanktyuu'tigøyidi, ka' tja'gyukidi pøni ti tyundip. Kø'øm ayo'on ja jade'en ñanktyukpaadyidi, jade'ents ja nugo ñankwyindigøyidi. ¹⁰ Ne'egi nugo xyiktundigø'yint xyikajpxigø'yint ku ja kumeeñ'ajtin ndsojkin; jamts pøn winaagin nugo tsojk'anaxy jøts ja pabøjkin ja janchja'win tka'ukpaduni, jøts ja jade'en ja ayo'on ñadyukpaadyit.

Sa ja Timoteo yikxon tngubajk'att ja janchja'win

¹¹ Mets Timoteo, kidi me nayide'en m'adøtsmi, pø Diosxi mets ja yja' mbaduujni. Yikyø'øy mets ja mdsinaa'yin øy tsuj, ja m'ajot'ajtin jøts ja mjanchja'win. Jøts xminamayait øy pøn ja mmigu'uktøj, jøts ja tuda'aky'ajtin yuyj'ajtin xyiktu'unt. ¹² Nitani møk yø janchja'win; kidi xmajtstu'uty midit ja Dios tøj mdamidsøkyiyi midit xemikøjpx ejtp, jabi øy tsujxi tøj xukmadøy ja mayjaa'y sa ja janchja'win xjagyepy. ¹³ Ja Dios Teety midit xyikujky'ajtindip, ñija'wipts ja', sam xygam n'ane'emy, nayide'ents ja nwindsøn'ajtim

Jesucristo ttukmadøø ja tiy'ajtin ja Poncio Pilato. ¹⁴ Paty yikxon xpadu'unt jade'en, midi tø myiktanipiky, ka' xyiktigatst, jøts ka' pøn mbøky'ejxyit. Jade'en xu'unt kunim ja nwindson'ajtim Jesucristo mye'ent. ¹⁵ Ku tpaatt ja xøøw ja jumøjt, jøts ja Dios Teety ja tkaxt ja nwindson'ajtim ya naxwiiñ. Tu'ugyi Dios Teety myøji midi ja øy'ajtin ja xondaajkin tmøøt'ajtp. Møk ja kutujk tjagyepy, ka' pøn windsøndøjk jade'en. ¹⁶ Yø' tu'uk møj, ka' y'øøky, xemikøjxp ja y'ity. Jaj agujkpy chøøni ma ka' pøn mibaat pyaadyi y'ijxyi. jYikwindsø'jkip yikwinja'wip ku ja myøk'ajtin tmøøt'aty xemikøjxp! Jade'en idø'øn ja y'ejxi.

¹⁷ Ana'am pøn kumeeñ'ajtp ya naxwiiñ jøts ka'ap nugo ñadyamikaxiyit. Ka'ap yø kumeeñ'ajtin nugo ñadya'agajpxiyit, ka'ap yø y'ity. Ne'egi øy ku Dios t'ajot'attit amumjoojt, pø ja'axi ejtp xemikøjxp jøts tuki'iyi xmø'øyim ja øy'ajtin ja jotkujk'ajtin. ¹⁸ Nøjmi ja kumeeñ jaa'y jøts yikxon yjaa'y'attit, jøts tpa'ayo'odit ja myigu'uktøjk pøn ti ka'ejtxip. ¹⁹ Ku jade'en tpadu'undit jøts ja øy'ajtin jade'en tpaattit, jøts tmøøt'ettit ja Dios xemikøjxp.

Midi ja Timoteo jaakyiktanipøjkp

²⁰ Mets Timoteo, møjpiқта'ak midi tø myiktanipiky. Kidi xmøjpiқта'aky ja ka'ø y ayuujk midi ja Dios yja' tkaminabyaajtíp, midi ñadyijyi yiktejp ku ja tyiy'ajtin. ²¹ Tø winaagin tyuu'tigøydi pøn yø jade'embí winmaa'ñ tpadump. Jade'en ja yjanchja'win tka'ukpadunidi. Dios mgunuu'kxip, mets Timoteo. Jatp idø'øn jade'en.

JA MYĪMAJTSKPI NØKY MIDI JA PABLO TYANĪGAJX JA TIMOTEO

Ku ja Pablo ojts tnjajy ja Timoteo

¹ Pablo øts, jøts øts ja nwindson'ajtim Jesucristo ngudanaapy, øts xkajxp ja Dios Teety sam øts ja tø xamidsøky jøts øts ja yja' ndukmado'ot ja naɣwii'ñit jaa'y sa nbaajntin ja øy'ajtin xemikøjxp ku ja Jesucristo møøt n'ejtint. ² Mets Timoteo ya'at nøky ndanija'ayip. Mjagyajnpixi mets ja janchja'win, jade'en'ampyts myik'u'nktijy myik'u'nkjawī. Ja Dios Teety mgunu'u'kxiþ møøt ja nwindson'ajtim Jesucristo. Ja' mmo'o'jip ja pya'ayo'owin, ja' mmo'o'jip ja yjotkujk'ajtin.

Sa ja Timoteo tyiknigaxø'økt ja Cristo ja yja'

³ Ndamøja'wip øts ja Dios ku me nni'amidoo'wi y'ity jøpy ux. Ja' øts idø'on ja yja' nbadumpy samdam ja t'øyjawi sam nayide'en ja møjaa'dyøjk y'ijty ttundi. ⁴ Nja'myejchp øts sa myaajxy ku nnawya'kxyim. Wamp øts o me ma njanch'ejxpaatt jøts njotkujk'att. ⁵ Nja'myejchp øts nayide'en sam ja Dios Teety xjanchjawi. Jabi jawyeenxi ja mdigamøj jøts ja mdaak nayide'en tyiktundøø ja yjanchja'win.

⁶ Paty mets ixyam ndukja'myech jøts øy tsuj xyikmāwenit ja mdunkjøøþ midi ja Dios tø mdanipiky ku mets ojts ngønixajy. ⁷ Ka'ap ja Dios Espiritu Santo tø tpiakta'aky jøts øy ti ngudsø'jka'ant. Nayi Espiritu Santo ja myø'ajtin xmo'øyimp jøts amumjoojt ndu'unint jøts ja tsojkin jøts ja øyja'gyukin nmøøt'ajnt. ⁸ Ka' ti xtsø'ødyunjawit sam ja Dios yja' xkajpxwa'kxi, jøts ni øts xkatsø'ødyunjawit ku øts nay ja' nyiktagudsumi. Kupø o myikjemduñ myikteduñ myikjemnøjmi myiktenøjmi ku tka'øyjawi ja Dios kyajpxy midi xyiknitso'ok'ajtim. Jade'en xmidanit sam ja Dios ja myø'ajtin tyaky. ⁹ Jade'en ja Dios tsoky jøts ja xyiknitso'ok'ajnt jøts nayide'en amumjoojt nnyadamyiojxint. Kidi ja'agøjxpip adøm ja xtsøjkyim ku adøm n'øyjaa'y'ajtyim nga'øyjaa'y'ajtyim. Ma windiixyip adøm ja Dios jade'en xamidsøjkyim, ka'anin wyinaty ja naɣwii'ñit cho'onda'aky. Ja nwindson'ajtim Jesús køjxp adøm ja nitso'ok'ajtin nbaajntin ku møøt n'ejtint. ¹⁰ Tø ja Dios Teety tnankyja'ijxyi sa ja pa'ayo'owin tjagyepy adømøjxp ku ja nwindson'ajtim Jesucristo xaniguejxyim. Sa ja y'ø'jky jøts yjujkyjyky, nayide'ents adøm nbaajntin sam ja tø tnajtstuni. Jade'ents Cristo køjxp ja ø'jkin xka'uknimajadaajkna'ant jøts xemikøjxp ja jujky'ajtin nbaajntin ku ja y'ayuujk tñitanaay sam ja wyinaty tø ttanibiktaagi.

¹¹ Dios ø tø xpikta'aky jøts øts ya'at ja kyajpxy ja y'ayuujk ngajpxwa'kxit jøts øts yø ngudanit, jøts ø nduk'ixpøkt pøn ka'israelit jaa'dyi. ¹² Paty øts ixyam øy ti ngu'ayo'ombaadi. Ka'ap ø ti ndsø'ødyunjawī, pø Diosxi øts ja yja' nbaduujnip. Wamp øts jøts øts ja Dios xpøkjø'knit kunim ja tiidyu'unin xøøw mye'ent.

¹³ Mets Timoteo, sam ø tø nnajtstuni, tu'ugyi ja øy ixpøjkin jade'en xyikyø'øty, ja Dios yja'. Jade'ents ja Dios xjanchjawit jøts ja mmigu'uktøjk xpa'ayo'ot xminamyayit nayide'en sam ja nwindson'ajtim Jesucristo xamidsøjkyim ku møøt n'ijtyim. ¹⁴ Ja Espiritu Santo midi adøm nmøøt'ajtyindip, ja' pyudøjkingøjxp xpadun'ett ja Dios yja' midi tø mdanipikyiyi.

¹⁵ Tøxi me xnijawi sam øts ja Asit jaa'y xmajtstutøø, ja Figelo møøt ja Hermógenes paat. ¹⁶ Diosts ja kunuu'kxiyip ja Onesiforo møøt ja myigu'uktøjkti ku øts ja kawinaak ojk xnimñi jøts ø xpudøki. Ka'ap ja tsø'ødyu'unin tjagyepy øy ø njatsumy'ity. ¹⁷ Ne'egi øts ja x'ixaay ya Roma ku øts ja ma xka'ijxy kunim øts ja xpaajty. ¹⁸ Wan ja Dios ja pya'ayo'ajtin tmø'øy ku ja tiidyu'unin xøøw tpaatt. Wa'atsxi me xnijawi sa ojts xpudøjka'am jam Efeso kajjotp.

2

Sa Timoteo møk tmidanit ja ayo'on Jesucristo køjxp

¹ Mets u'nk Timoteo, jotmøkøk, yiktun ja møk'ajtin midi ja nwindson'ajtim Jesús yajkpy. ² Ja ixpøjkin midi m'ijxpy midi mnija'wip sam øts ja mayjaa'y nyik'ixpxy, ja'ats nayide'en mdanipøk pøn øy tsuj jaa'y'ajtp, midi øy tsuj yik'ixpøjxp nayide'en.

³ Møk xmidanit ja ayo'on midi mbatpy ku ja nwindson'ajtim Jesucristo yja' xpaduujni. Møk nabyikta'agi jade'en sam pøn yikexy tseptumbi. ⁴ Ka'axi mibaat ja tseptumbi pyaat'aty jøts nugo ajawi o ti ttatøki. Tu'ugyi ja yja' tyikyø'ødyit sa ja wyindsøn ja y'ane'emyidi.

⁵ Nayide'en ja kuyajtpi, tu'ugyi ja yja' ja ttu'undit sa ja ya'iy'ana'amdi, winets ja tpoøktit ja ñiguyaty. ⁶ Nayide'ents ja kamdumbi nayja' paat'ajtyip kø'øm tpoøktøkt ja pyikta'aky. ⁷ Pawinmaajyik øts yø n'ayuujk, nayi nwindson'ajtimts mbudøkyip jøts xja'gyukit.

⁸ Ja'myats ja nwindson'ajtim Jesucristo sa ojts yjujkyjyky jap oo'kpi jutjøtpy midi ja rey David y'ap'ajtpy. Yø' øts ja yja' ngajpxwa'kxiyip sa ja øy'ajtin xukpaajntin. ⁹ Yø'

kajpxwá'kxíngøjxp øts øy nyikm'e'kyi, møkts øts yø nwindani, jade'ents ø nyik'ixy ejxim tu'uk ja møj tundigøøbya'an; øy øts njayiktsumy ka'ap ja Dios kyajpxy jaayi tyañ. ¹⁰Ja'agøjxp øts yø ayo'on møk nwindani jøts ñitso'ok'attit pøn ja Dios tø wy'i'jxy; jøts tpaattit ja øy'ajtin mididi xemikøjxp xmø'øyimp ja nwindson'ajtim Jesús.

¹¹Janch tiy'ajtin yø':

Ku ja Cristo møøt nayide'en n'ø'jkyim, nayide'ents ja møøt njuky'ajtin;

¹²pøni ngu'ayo'ombaa'ajta'am ja yja', xmø'øyimpts ja' ja y'ø'ajtin ma ttanitani ja yjaa'y.

Pøni ka' ja ngupijkyim, nayide'ents ja xkagupøjkint.

¹³Pøni ngamøk'ajtingøjxp adøm ja njanchja'win kyamajadaajkyim, jade'eñim ja Dios tyikyø'øy ja yuy'ajtin jøts ja pudøjkin ja xmø'øyim,

ka'ap ja Dios mibaat ñay'ixmajtsiyit kø'øm, paty ja xkaja'dyigø'øyim.

Yikyø'øpy jade'en ja Timoteo sa tøyiktanipiky

¹⁴Mets Timoteo, tukja'myats pøn jaty ja Dios yja' tjanchja'widip jøts kidi nugo kyajpxjimbetti kyajpx'adøjt, kidi nugo tkajpxyøndi mididi ka' tyañ; ñanktyuu'tigøjyidip yø jade'en. ¹⁵Amumjoit nabyiktá'agi sa ja Dios yja' xpaduujnit jøts øy tsuj yø mdunk pyidsø'ømt Dios wyingujk. Ka' ti nugo xtsø'ødyunjawit ku ja tiy janch xkajpxwá'kxi ja Dios tyiy'ajtin. ¹⁶Kidi xpabiky yø'øbi ayuujk pøn jam nugo o sa kajpxtip. Pøn jade'en ttundip, ja kya'øyjaa'y'ajtin idø'øn ja yikmiwenidip. ¹⁷Pøn jade'en nugo kajpxtip, jade'ents ja kya'øy'ixpøjkin ja myø'jidi myayidi jøts ja windigø'øyin nugo tyikna'xkida'akti. Jade'en y'adø'øtsti ja Himeneo jøts ja Fileto, ¹⁸ku kø'øm tø ñanktyuu'tigøjyidi jøts ja wya'andi ku ka' y'uk'ejtnit ja jujkpyøjkin ku ja o'jkin nbaajtin ya naxwiñ. Jade'ents ja myigu'uk winaa'gin tø tukmajtsu'utti ja yjanchja'win. ¹⁹Ka'ap mibaat pøn tyiktigatst ja Dios wyinmaa'ñ, jabi yide'enxi jaabyety y'ity: "Wa'ats ja Dios Teety ja t'ixy tñijawt pøn padu'unxip ja yja'"; jøts nayide'en wya'añ: "Wan tñajstutnidi ja ka'øbyi, pøn ja Cristo yja'ajtpy."

²⁰Jade'en n'ukpiktaajkint ku jaa'y xnime'enint xnija'jtin njønjøtp ndøjkjøtp, jøts nduk-tajø'kxa'ant ja' mididi øy mididi tsøw mididi tsobatp; jøts ja' mididi ka' chobaaty, ja'ats o pøn tyiktu'ump. ²¹Nayide'ents idø'øn adøm, ku øy tsuj nnay'ej'ejtindit jøts nja' nayide'en chobaajtin Dios wyingujk; jade'en'ampyts idø'øn ja xyiktu'unint jøts nmigu'uktøjk nbudøjka'ant.

²²Majtsu'ut yø uná'jk winmaa'ñ mididi ka' tyañ. Tu'ugyi xyikyø'øty ja tiy'ajtin jøts ja mjanchja'win, jøts xminamyayit ja mmigu'uktøjk øy tsuj pøn tu'ugyi t'ajot'ajtp ja Dios. ²³Nnimaapyts mets jøts ka' xpadøkit yø'øbi ayuujk mididi katump. Mnija'wip ku jade'en ja tsep nugo yikpaaty. ²⁴Pøn tpaduujnit ja Dios yja' ka'ap ja nugo ajawi o ti tñatøkit ma ja tsep, ma jaa'y o ti ttundi. Ja' ja tyu'ump øy'ajtin tuda'aky'ajtin øy pøn møøt. Ja'y'ixpøjkin ja tyuk'exp tyuknijawp sam ja tuda'aky'ajtin nayide'en tñmøø'att. ²⁵Jade'ents ja øy tsuj tkajpxuda'akt pøn ja wenk winmaa'ñ tñmøø'ajttip mididi ka' tyi'i, wan ja Dios pyudøkiyi jøts tyigatst ja wyinmaa'ñ jøts tpadu'undit ja tyi'byi yjanchpi. ²⁶Wan tñajtsu'utti ja mikul' yja' ku ja nugo tø wyin'iifidi jøts ja nugo tø tyuktu'ni pøni sa ja tñsøky.

3

Sa jaa'y wyinatyi ku ja tiidyu'unin xøøw tpaatwani

¹Me Timoteo, nayide'en xnijawit ku wyingoni ja xøøw ja jumøjt jøts nwindson'ajtim mye'ent, janch tsep ja xøøw ja jumøjt ñaxt. ²Øy sa pøn y'adø'øtstit. Kyø'øm winmaa'ñ ja nugo yikmøjtøkiwya'andip, meen' ja nugo may choktip, namyikaxi winmaa'ñ ja nugo yiktu'undip. Tpatit tñaxtit ja Dios, ka'ap ja tyeety ja tyaak twindsø'øgidit, niti ja tkamø'ejxtit tkamøjwidit jøts ni tkawindsø'øgidit ja Dios yja'. ³Ka'ap ja ti tsojkin, ka'ap ja ti øy'ajtin tñmøø'attit. Pagajpxk ja' yø tyunk'attip, ka'ap ja maa'kxujkin tjagyaptit, tyunwandip o ti ttunwa'andit, nugo øy pøn tñidsep'atwa'andi øy wyinatyi pøn tuda'akyjaa'y'aty. ⁴Kyøyákp ja kyø'øm migu'uk, adø'øtsp o sa y'adø'øtst. Kyø'øm ja' y'ixa'ap, ka'ap ja Dios yja' ne'egi t'ixaajyt. ⁵Ejxingøjxp nadyijyi ja Dios yja' tpaduujnidit pø sa ja y'am yjotp, ka'ap ja tñøjpiktaajkit ja ñitso'ok'ajtin.

Me Timoteo, ka'ap yø jade'embí jaa'y xunk'att. ⁶Adøtstip o sa y'adø'øtsti, tøj tøjkidip jøts ja tø'øxyøjk twin'øøndit pøn ñadyu'uk'ejxtip pøn y'amutsk'ejxtip. Nayide'ents ja tø'øxyøjk, jaa'y'ajtp ja' o sa yjaa'y'aty. Kyupijky ja nugo, ⁷ixpøjkin ja jade'en tijy yikmøøpy, nisudso'ampyts ja jade'en tkaja'gyuki ja Dios tyiy'ajtin. ⁸Nayide'en sam ja Moisés y'lijty kyaayikpaduñ ja yja' sa ja yjawa'añ ku ja kyamibøjkøø ja tñmaabyi Janes møøt ja Jambres, nayide'ents yø jade'embí jaa'y tkamibøjkmidi ja Dios yja'. Tum wenk ja wyinmaa'ñ yikyø'ødyi, ka'ap ja Dios jade'en kyupikyidi. ⁹Ka' nugo ajawi myajada'aktit ja yja', kuwani yiknijawi ku ja myo'tpi winmaa'ñ nugo tyikmøjtøkiwya'andi. Nayide'ents yjajtmidøø ja namajtski mididi twindsoww ja mñjaa'y Moisés.

Midi ja Pablo yjaak'uktanipøknip ja Timoteo

¹⁰ Mets Timoteo, øy tsuj mets ja n'ixpøjkin xyikyø'øyi. Nayide'en mjaa'y'aty sam ø njaa'y'atyin, tu'ugyi ja mwinmaa'ñ xyikyø'øyi, ja øy'ajtin tuda'aky'ajtin jøts ja janchja'win. Nayide'en mjaaty ¹¹ sam njajty sam ngubejtyin. Mnija'wip pøni sa njajty jam kajpjotp midy yiktejp Antioquia jøts nayide'en jam Iconio møøt ja Lистра ku øts ja Dios yja' ngajpxwa'kxi. Jamts øts ja jaa'y xjemduñ xeduñ, jøts øts nwindson'ajtim nja'møjeich xjats ø møj ngudøjkii'ñ. ¹² Janch tiy'ajtin yø', yikjemdu'undip yiktedu'undip pøn ja Cristo yja' nadyamiyoxwajniyip; ¹³ jøts ja' pøn ja myigu'uk nugo twin'øø'ndip kø'øm ja ñanktyu'u'tigøyidi, nisudsø'ampy ja kya'øyidi ja yja'adi ku nugo jade'en ñawyn'i'ñidi ja xem ja yam.

¹⁴ Mets Timoteo, tu'ugyi mets yø mja' jade'en xyikyø'øty sam tø x'ixpiky sa tø xnijawi. Mnija'wipxi pøn mduk'ejxi pøn mduk'ixpøjki, ¹⁵ ku yø mutskyi xnija'wiyi'ñ yø Dios kyajpxy, midy xyiku'ajtaajkim, midy xyiknitsø'ok'ajtim ku njanchja'wa'ant ja nwindson'ajtim Jesucristo. ¹⁶ Tu'ugyi ja Dios kyajpxy ja y'ayuujk jade'en y'ity, sa ja tø yikwinmaa'nmyø'øyi pøn tø tjaadya'ñ. Nay yø' xuknijawamp ja tyiiby ja yjanchni. Ku ndundigø'øytin ngajpxigø'øytin nay yø'øts xuknija'wimp ku yø pyøkyi. Xmø'øyimpts yø' ja ixpøjkin sa ja øy'ajtin ja tuda'aky'ajtin njagyajpint, ¹⁷ jade'en'ampyts ja Dios yja' ka'pxy nnija'wa'ant jøts jade'en ndu'unint tum ja øybi tum ja tsujpi.

4

¹ Mets ixyam ndanipijky Dios Teety wyingujk jøts nayide'en nwindson'ajtim Jesucristo wyingujk midy nanky'ejxiyip ja møj windson'ajtin pøn tiidyu'ump ja juikpyi jøts ja øøkyi, ² jøts xkajpxwa'kxiyit ja yja'; tu'ugyi jade'en pojyi'iky xpadu'unt wan pøn mgupiky mgagupiky. Ana'am pøn tundigøøpy pøn kajpxigøøpy jøts xukja'gyukit. Jade'ents tuda'aky xuk'ext xuknijawit ja ixpøjkin. ³ Pyaattp ja xøøw ja jumøjt ku ja jaa'y tkawa'andit yø'øbi ixpøjkin; pyikta'aktip ja' kyø'øm yik'ixpøjkpidi pøni sa ja tsoktit pøni sa ja tmadowa'andit. ⁴ Yø tyiiby yjanchni ka'ap yø tsoktit, ja' yø ne'egi chokhtp ja kwenti ja madya'aky midy kayikja'gyukip. ⁵ Me Timoteo, tu'ugyi møk xyik'ett yø mwinmaa'ñ, møk nabyikta'agi øy ja ayo'on yja'ity, nadyamiyoxi amumjoojt ja kajpxwa'kxin sa ja nitsø'ok'ajtin nbaajtant, tu'ugyi jade'en xyikyø'øty yø mdunk.

⁶ Jøts øts, tøts øts jade'en nadyamiyøxyi ja Dios yja', jøts øts yjawi tsojk ja o'jkin nbaatt. ⁷ Møk ø tø nwindani ja Dios yja' jøts øts jade'en nyikjøpkøjxni ja ndunk ja nwinmaa'ñ. Tø øts ja njanchja'win jade'en nmi'ity. ⁸ Ja øy'ajtin øts xjøp'ejxp jøts øts ja nbaatt, ja'agøjxp ku øts ja Dios tø xkupiky. Jaanimts øts ja nyikmo'ot ku ja tiidyu'unin ka'pxy xukpaajtant. Ni kidi øtsip ja ndyu'uk yikmo'op, niduki'iyi ja tpaattit pøn tjøp'ejx'ajttip jøts ja nwindson'ajtim mye'ent.

Ku ja Pablo ttukmadøy ja Timoteo sa tyu'unt

⁹ Tun wan ja may'ajt jøts tsojk mme'ent jøts ø x'ext; ¹⁰ pø tøxi øts ja Demas xmajtsu'uty, kyø'øm winmaa'ñ ja yiktunwampy, jøts tø ñijkxy jam Tesalónikit kajpjotp. Jam øts ja Cresente tø nguexy Galacit y'etjotp, jøts ja Tito tø ñijkxy jam Kalmacia y'etjotp. ¹¹ Ja Lucas øts ixyam møøt njaak'ity. Ixa' jam ja Marcos jøts møøt mme'ent, jøts øts ja xpudøkit. ¹² Nayide'ents ja Tiquico tø nguexy jam Efeso kajpjotp. ¹³ Ku mme'ent, xyikmejnip øts ja nnixox midy jam nyiktaan Carpo tyøjkjotp jam Troas; xja'myajtsip øts ja nlibri jøts øts ja nnøky xjadyimykmejnint midy nyiktumpy.

¹⁴ Tø øts xmidundigøy møj ja Alejandro midy ka'tsp; Dios wyingujkpts ja tkubatt pøni ti tø ttuñ. ¹⁵ Øyim mnay'ejx'etit møøt ja', jot'ambøjpk ja' ku ja Dios ja yja' yikajpxwa'kxi.

¹⁶ Ku øts myijaweyen nwinguwa'jkiyi'ñ ja windsøndøjk ja kuduntøjk, nipøn ø xk-abudøjkii'ñ; xmajtsutjøjxniði øts ja' niduki'iyi. Øts wamp jøts ja Dios ja kyadabayø'øyidit. ¹⁷ Ja nwindson'ajtim øts xpudøjkii'ñ jøts øts ja møk'ajtin xmøøy, jøts øts nyikyø'øyi ja kajpxwa'kxin sa ja nitsø'ok'ajtin nbaajtant, jøts øts ndukmadøøy niduki'iyi pøn ka'israelit jaa'dyi. Jade'ents øts ojts ja nwindson'ajtim xuu'møøy ma jaty øts n'ayo'ombaaty. ¹⁸ Xyiknitsø'ok'ajtip øts ja nayide'en ja n'anmija'win jøts øts ngapaatt ja ka'øybi jøts ø xpøkjø'økt jap tsajpjøtpy ma ja y'ity. ¡Kunuu'kxy'ejtpim ja Dios xemikjøxp! Jade'en idø'on ja y'ejxi tyi'yi.

Ku ja Pablo kyajpxpø'kxy jøts ja kunuu'kxin t'ukyajkni

¹⁹ Kajpxpoo'kx jam ja Prisca møøt ja Aquila, jøts nayide'en ja Onesíforo ja myigu'uktøjk. ²⁰ Tø øts ja Erasto nyiktañ jam Corinto, tø ja Tróximo pya'ambety jam Mileto kajpjotp, paty øts jam tø nyiktañ. ²¹ Tsojk mme'ent ka'anim ja xuxpyoj tpaaty. Møj ja kajpxpoo'kxin mdaniguexyi ja Eubulo møøt ja Pudente. Nayide'ents ja kajpxpoo'kxin mdaniguexyi ja Lino, jøts ja Claudia, møøt niduki'iyi adøm nmigu'uk janchja'wibidi.

²² Møøt ja nwindson'ajtim Jesucristo m'ett, jøts niduki'iyi ja Dios mgunuu'kxidit. Jade'en idø'on ja yjatt.

JA NØKY MIDI JA PABLO TYANĠAJX JA TITO

Yide'en yiknijayi ja Tito

¹ Pablo'ajtp øts, Dios Teety ø nmidumpy, jøts øts nwindson'ajtim Jesucristo ngudanaapy, ku øts ja xamigaxi jøts øts ja yja' ja ndukjanchja'wiyit pøn ja Dios Teety tø twi'ixy, jøts nayide'en tnijawidit ja tyiy'ajtin sa ja Dios øy tsuj yikpaduñ, ² jøts jade'en t'awejxtit ja jujky'ajtin midit xemikøjpx etp. Ya'atpi tsinaa'yin ja Dios kø'øm tø tni'adsowi namga'anin wynaty ja naaxwii'ñit cho'onda'aky. Niwindem xøøw ja Dios Teety kyawindaay'aty, midit tø ttanibiktaagi, pyadumpy ja'. ³ Ku ja xøøw ja jumøjt tø tpatni sam ja kø'øm tø ttanibiktaagi xjats ja kyajpxy tnanky'ejxit jøts øts idø'øn ngajpxwa'kxt midit øts ja Dios Teety yiknitsokpi tø xanipiky. ⁴ Ixyamts me Tito nnijayi. Ndyimy'u'nkja'wip mets, ja'agøjpx ku tu'ugyi janchja'win ndamujkim, jade'en øts ja tsojkin nmøøt'aty jøts xpaatt ja kunuu'kxy'ajtin ja pudøjkin jøts ja øy'ajtin midit ja Dios Teety yajkpy møøt ja nwindson'ajtim Jesucristo pøn adøm nyiknitsokpi'ajtyindip.

Ja tunkjøøjp midit ja Tito pyatwa'jkjy'i'ñ jam Creta

⁵ Ku mets jam nyiktaañ Creta, ja'agøjpx øts ja jade'en nduun jøts mets xyika'pxt xyik'abaadit ja tunkjøøjp midit øts jam wynaty tø nyiktso'onda'aky. Jade'en ø nwa'añ ku mets tu'uk tu'uk xpikta'akt pøn tnimøjaa'y'atp ma jaty ñamyukyidi kajp kajp ja jaa'y pøn ja nwindson'ajtim tjanchja'widip. ⁶ Ja'abi møjaa'y'ajtpi mbikta'akp pøn øy tsuj tsinaapy, pøn niti windsø'yin, pøn tu'ugyi tmøøt'ajtp ja ñidø'øxy, jøts ja y'una'jk nay ja'abi janchja'win pyadundip, jøts øy tsuj ja chinaa'yin tyiknaxmidi. Myimadoodip ja tyeety, niti windsø'yin ja jade'en tkapaattit. ⁷ Pøn idø'øn jade'en tnigubajk'ajttip, pø ja Diosja yja' ja y'ejx'ejtidip, paty idø'øn pyaat'aty kuwani øy ja chinaa'yin tyiknaxtit. Ka'ap idø'øn ja kyujuun'ajtin ja tyikmajada'aktit. Ka'ap winjaa windsojk'y'akidit; ni ja amu'uky'ajtin ni ja tsep'ixaaky ja tkatunk'attit, jøts ka'ap ja meen nugo tjaa'xmukwa'andit. ⁸ Jabi yide'enxi dø'øn ne'egi ja chinaa'yin tyiknaxtit, yikja'ada'aktip tø pøn jaa'y jam tyøjkjotp øy tsuj, tum ja øy'ajtin ja myigu'uk ja tyamidsoktip, ja'gyukin idø'øn ja myøøt'attip jøts tum ja' tyu'undip midit øy paat'ajtyip. Pyadungøxtip idø'øn ja', midit ja Dios y'øjja'wip jøts ka'ap ja kyø'øm ja' tyikmajada'aktit. ⁹ Ja'ayi dø'øn ja tu'ugyi tyimyjanchjawidip ja tyi'ajtin midit tø nduk'ixpøkti, jøts jade'en ja myigu'uk ttakajpxjot'amøkidit ja'abi tiiby i xpøjkin, nayide'en ttukja'gyukidit pøn wynaty t'agajpxukp ja'abi i xpøjkin.

¹⁰ Jabi mayxi ja jaa'y jaadi pøn tkamimadoodip ja Dios yja', sam winaagin ja israelit jaa'dyi pøn nugo jemgajpxtip tegajpxtip jøts ja myigu'uk twin'øndi. ¹¹ Ja'abi jaa'dyi, amøñi pyaat'aty nyikta'anin, jøts ka'ap ja ka'øymi i xpøjkin ttuktawinmaa'ndyigø'ødyit tu'ukpi jøøøn tu'ukpi tøj, ja meeñts ja nugo y'ixaadyip ku ja y'ixpøjkin tyakti.

¹² Nay yø kø'øm yide'en ojts ja myigugajp ñimadya'agyidi pøn wa'ats najtsja'wigyøjpx ti jaty tunip jatip, ja' yide'en waan: "Yide'en ja Creta jaa'y yjujky'atti: o tyimdyaa'yidi, janch awa'andi, nuux'ajtin ja yikmajada'aktip jøts ja yjii'kxy nugo ja tta'agawiywa'andi." ¹³ Janch idø'øn ja wyaañ; paty meets idø'øn møk xamigajpxtit ja chinaa'yin jøts jade'en tyikmøkidit ja yjanchja'win pøn ja nwindson'ajtim yja' tø tpadøjkiñidi. ¹⁴ Jøts ka'ap jade'en nugo tmibøktit ja madya'aky midit yik'ø'yidip yikpaajtidip ja israelit jaa'dyi, ni tkamøjppiktaajkidit ja y'ana'amindi pøn jagam jixkø'øm tyiktandip ja Dios tyiy'ajtin.

¹⁵ Pønsts ja Dios yja' ja'ayi tpaduujnip, tyum'øy'ejxtip ja' midit ja Dios kø'øm tø tyik'øyi, jamts ja'amidi pøn wamidip ku ja yikpøkyety; paty ja jade'en ttejt ku ja pøky ja ja'ayi twinmaa'ñ'atti jøts tum yikpøkyajtpi t'ejxti; jabi agoostujpxyi ja wynmaa'ñ ja y'etti jøts jade'en tka'ejxkapti midit øy uk midit's ka'øy. ¹⁶ Jade'en idø'øn ja chaachwa'andi kuk idø'øn ja Dios ja t'ijxyidi, pø sudso dø'øn ja Dios ja t'ijxyidi; jabi wenkts ja chinaa'yin ja tyiknaxti, ja kyawindiy'ajtin ja yikmajadaktip, ka'ap ja madoogukin ja wine'enin tmøødidi, nisudso'ampy ja ødyu'unin ja tkayikwingaxø'økti.

2

Ja tiiby i xpøjkin

¹ Pøni midit mets Tito mnigajpxxy, ja tiiby i xpøjkin idø'øn ja møøt ñabyaadit. ² Tuknijawi ja møjaa'dyøjkti jøts ejxkujk yjaa'y'attit, tuda'aky yikxon ñabyikta'agidit, jøts ja'gyukidip idø'øn yiktu'undip idø'øn ja wyijy'ajtin; møk tyik'ettit ja Dios'ajot'ajtin møøt ja tsojkin, møøt ja pa'ayo'owin jøts møøt ja tuda'aky'ajtin. ³ Jøts ja møjaa'dyø'øxy nayide'eni yjaa'y'ajtmidit sam pyaat'aty pøn ja Dios tpadundip. Ka'ap ja jigajpxk pagajpxk ja ttunk'attit, ni ja mu'ugyi ja ku'uxyi tkayikmajada'aktit. Øybi tsinaa'yin idø'øn ja ne'egi ñanky'ejxidip, ⁴ jøts jade'en ttuk'ejxtit ttuknijawidit ja tø'øxyøjk pøn nam amaajtskidipnim sa ja ñiyaa'y sa ja

y'u'nk y'una'jk ja mōōt ōy yikxon chōōnidit tyanidit. ⁵ Myōōt'attip idō'ōn ja ja'gyukin ja'adi. Tum ja wa'atspi tum ja ōybi tsinaa'yin idō'ōn ja pyadu'undip. Ja yjōōn ja tyōjk idō'ōn ja' kyamijotkukidip, pōn jam tso'ondip ja'ttip myiduda'aky'attip idō'ōn ja'. Pōni ti y'ane'empy ja űiyaa'dyi, pyadu'undip idō'ōn ja'. Jade'en idō'ōn ya'at tpadungōxtit jōts ja Dios y'ōgyajpxy ja y'ōmyadya'aky kyayikgajpxt kyayikpagajpxt.

⁶ Taguwanī mets Tito ku ja wajtyōjkti ja ja'gyukin tmōōt'attit, ⁷ jōts idō'ōn ja kō'ōm jawyēen mjōōtunip pōni sã dō'ōn ja ōchinaa'yin tpadu'undit. Ku dō'ōn ja wyinaty xkajpxwejwa'añ, yikxon idō'ōn ja xnigajpxt, niti nixi'iky niti taxi'iky xkajawit. ⁸ Tiy ka'pxy idō'ōn ja ixpōjkin xnanky'ejxit jōts ka' nīpōn jade'en m'agajpxkuyit. Jōts kō'ōm ttatsō'ōdyu'unt ja jaa'y pōn wyinaty nugo mjigajpxiyip mbagajpxiyip jabi ja'gyukidipxi ja kō'ōm ku meets ja tiy'ajtin xnigajpxy.

⁹ Kajpxwej ja tumbitōjkti jōts tpadungōxtit ja wyindsōndi; yikxon idō'ōn ja yjaa'y'attit jōts ka' twindsō'odit ja wyindsōn. ¹⁰ Ka'ap idō'ōn ja tma'jtsit ja pyikta'aky pōn ja yiktuujnip. Yiknigaxō'ōkp idō'ōn ja y'ōyja'y'ajtin jōts o pōn jaa'y jade'en ttsujawit ja tsinaa'yin midī ja Dios yiknitsokpi yajkpy.

¹¹ Jabi tōxi ja Dios ja ōy'ajtin tnanky'ijxy midī tyiknitso'okwamp tuki'iyi ja naxwii'ñit jaa'y; ¹² ja'agōjxpts ja Dios ja y'ōy'ajtin tnanky'ijxy jōts xuknija'wint jōts n'ixmajtsint midī ja Dios tkaminamyajyip sam nayide'en midī n'am njotp xmimajada'akwa'andip, jōts ja tsinaa'yin ya nyiknajxint ja'gyuki kōjxp, samdam nayide'en ōy tiy ja Dios tso'ky'aty jōts ja tu'ugyi nwindso'jkant nwinja'want. ¹³ Nayide'en idō'ōn ja xuknija'wim sã dō'ōn n'awejaxint jotkujk ja ōy'ajtin, midī ja Dios kō'ōm tō tni'adsowi, ku ja mye'ent kyida'akt aju'ukjotp, ja Jesucristo yiknitsokpi pōn ndios'ajtyindip. ¹⁴ Nagyōyajkiyi ja', jōts adōmgōjxp ja xku'o'jkindi jōts jade'en axō'ōkpi yigaappi agujkyp nga'ejtindit, jōts jade'en nbaajtint tu'ugyi ja wa'ats'ajtin jōts ja'ayi nnadyamiyojxandit, jōts tum ja ōybi n'amindip njotpindip.

¹⁵ Ya'at mets Tito idō'ōn mnanky'ixpōkiyip, mgajpxjot'amōkip idō'ōn, jōts nayide'en mōk ja mgutujk xamigajpxt pōn tkamimadowandip ja'abi ixpōjkin. Kidi mets ja jaa'y kō'ōm myik'amutskinīyi.

3

Sã dō'ōn ja chinaa'yin tyiknaxtit pōn ja nwindso'n'ajtim tjanchja'widip

¹ Tukja'myatsti ku tkajpxkypōktit ja windsōndōjkti samdam nayide'en ja kudunktōjk tmimado'odit, jōts tpadu'undit tuki'iyi ja ōdyunk midī wyinaty tō yiktaguwanīdi. ² Nīpōn idō'ōn ja wenk tkanimadya'aktit, nika' idō'ōn ja tsep ja t'ixa'adit. Ja ōy'ajtin idō'ōn ja ja'ayi yikmajada'aktip, ja tudã'aky'ajtin idō'ōn nixem niyam ja myigu'uk tyamay'attip.

³ Jabi nayide'enxi adōm y'ijty ngakajpxkypijkiym jōts ja Dios yja' ngamimadōoja'am jōts jade'en nwidijtyim kube'ets kugoots. Tum ja axō'ōkpi yigaappi y'ijty nyikmajadaajkyindip midī n'amindip njotpa'andip; jap adōm y'ijty ja nxōōw ja njumōjt nyiknajxyindi mã wyindsōn'aty ja ka'ōy'ajtk mōōt ja windi'ñ'ajtk, ōy y'ijty pōngapōn mōōt ndyimñamyi'ambijkyindi, sam adōm idō'ōn kō'ōm y'ijty ndyimyjotkidaajkyim. ⁴ Kuts adōm ja Dios ja yiknitsokpi tnanky'ejxōō ja y'ōy'ajtin, sã tso'ky'aty ja naxwii'ñit jaa'y, ⁵ jade'en adōm idō'ōn ja xyiknitsōjkyim, kaja'agōjxpip ja ttuūñ ku adōm ja ōchinaa'yin wyinaty tō nmōōt'ajtyim, jabi pa'ayo'oningōjpxxi dō'ōn ja ojts xyiknitsōjkyim, xukyikniwaajchim ja nbōky jade'en jōts ja jemchinaa'yin ja Espiritu Santo xukpaajtyim. ⁶ Ja yiknitsokpi kōjxp ja nwindso'n'ajtim Jesucristo kōjxp ja Dios Teety tō xmō'ōyim kawine'en ja Espiritu Santo jōts ja xpudōjka'am, ⁷ jōts ja Dios Teety y'ōy'ajtingōjxp xkupōjkindit jōts nyikmō'ōyindit ja jujky'ajtin midī xemikōjxp etp midī adōm n'aweja'ajtyindip.

⁸ Tyimdyiy idō'ōn ya'at, paty ōts idō'ōn ndso'k'aty jōts mets winjaa windsojk xkajpxt ya'atpi ixpōjkin jōts jade'en pōn ja Dios tjanchja'widip tunkōōj'attit tum ja y'ōybi tyiūbyi. Tyum'ōdyunguixpy ya'atpi ixpōjkin, ōy yō pōngapōn t'ōdyuñ. ⁹ Kidi xyikmōjtōki nugo ja kugoots madya'aky midī niti kyawa'añ, jōts ka'ap ja apmadya'aky ja mōjaa'y ayuujk nugo xunk'att, ni xkadatōkit pōn ja Moisés kyutujk nugo ttamadya'akpyattip. Nīmã ja tiy'ajtin ja' tkamōōt'atti.

¹⁰ Pōni jam pōn tnankñawya'kxwã'añidi ja Jesucristo yjanchja'wibitōjkti, tawindsō'ōy tuk'ojkin uk majts'ojkin, kuts wyinaty mgamimadōyi, jagam ja x'ixwejtsnit; ¹¹ jabi jade'enxi mets xnijawit ku ja'abi jaa'y tō ja chinaa'yin ja ka'ōybi myimajadaajkniyi jōts kō'ōm ja pyōky ja ñ'ōōniyi.

Ku ja Pablo ttanipiky ja kyō'ōm jotmay ja Tito

¹² Ku me wyinaty ndanigaxi ja Artemas uk ja Tíquico, tun ja may'ajtin jōts ōts waani wyinaty x'ats'ixy jam Nicópolis, jabi jamxi ōts tō ndanibiktaagi nyiknaxwa'añ ja et ja xōōw kunim ja mōk xux ñaxt. ¹³ Tabudōki ōy tigati ja nitanaabyi midī yiktejp Zenas jōts nayide'en ja Apolos, mo' ja pudōjkin jōts yjaakwidettit kunim ja tyunk tyik'abaadidit nugo ku ti

kya'ijtxyidi. ¹⁴ Nøjmi ja nmigu'uktøjkti pøn jamdi mets møøt jøts mbudøkiyidit, jøts jade'en tñijawidit sã ja øchinãã'yin wyingaxø'økt ku tpudøkidit ja myigu'uk pøn ti ka'ejtxip.

Ku ja Pablo kyajxpøø'kxy jøts ja kunuu'kxin t'ukyajkni

¹⁵ Pøn jaty øts ixyam møøt, mdanigajxidip ja kajpxpoo'kxin ja'. Tukja'myats niduki'iyyi ja nmigu'uktøjkti pøn jaty tu'ugyi ja janchja'win tmøøt'ajtmidip ku øøts ixyam ja kajpxpoo'kxin nguexy. Paat meets ja Dios kyunuu'kxin niduki'iyyi. Jade'en idø'øn ja yjatt.

JA NØKY MIDI JA PABLO TYANĪGAJX JA FILEMÓN

Yide'en ja Pablo tnijayi ja Filemón

¹⁻² Øts idø'øn Pablo'ajtp. Øts yam tsumy ku nwindson'ajtim yja' nbaduujni. Ixyam mee nnijayi møøt yø Timoteo pøn jaty namyukidip jam mdøjkjotp, jøts nayide'en øø nja'myech ja ndsø' Apia jøts Arquipo midi nayide'en tump sam øts nduñ. ³ Paatti meets niduki'iyi ja Dios Teety jøts ja nwindson'ajtim Jesucristo kyunuu'kxin møøt ja y'øy'ajtin.

Sa ja Filemón tjagyepy ja tsojkin ja pa'ayo'owin møøt ja Dios'ajot'ajtin

⁴ Ku øts ja Dios n'ajot'aty nxumikajxajkpy øts ja Dios ku me nja'myech, ⁵ ja'agøjxp ku tø nnijawi ku mets nayide'en xtsojki ja nwindson'ajtim Jesús yja', jøts pøn jaty ja janchja'wiyip. ⁶ N'amidøøpy øts ja Dios jøts tjagyukyidit yikxon ja y'øy'ajtin midi nbaajtyindip ku njanchja'wa'andi ja nwindson'ajtim. Wa'nts tum jade'en ttundi, pøni sa tø xukmadø y pøn jaty tø tpabøkti. ⁷ Janch jotkujk øts ixyam ku nmadø y ku xpa'ayø y mmigu'uk jøts xkajpxjot'amøki, jøts jade'en xyikjotkujk'aty.

Ku Pablo t'amidø y ja may'ajtin jøts yikupøkt jadigojk ja Onésimo

⁸ Øy øts ja Cristo kyutujk nayide'en njamøøt'aty jøts me n'ana'amt pøni ti jaty mdu'ump, ka'ats mets ixyam n'ana'amwa'añ ⁹ ja'agøjxp øts ixyam migu'uk'ajtingøjxp tu'uk ja may'ajt n'amidoowa'añ. Møjaa'ñip øts ixyam jøts tsumyim n'ity nwindson'ajtingøjxp, ¹⁰ paty mets n'amidø y ja may'ajtin jøts xkupøkt jadigojk ja Onésimo midi øts yam tøndukja'gyuki ja Dios yja'.

¹¹ Ku ojts jawyeen nmøøtsinaay yø Onésimo, ka'ap øy y'ijty ti t'ødyuñ. N'ajot'ajtna'amp ixyam ¹² paty ndaniguexy jadigojk jøts xkupøkt, ¿kidits øts jeexyip xkupiky? ¹³ Jade'en ø njatsøky'aty jøts ja yam jeexyip tyañ, jøts øts ja jeexyip xpudøki sam mets jeexyip køøm xpudøki. ¹⁴ Ixyamts mets ja ndaniguexy ja'agøjxp ku ka'ap mibaat ja mgutujk njinajxit, jabi yide'enxi njawa'añ pøni xunwajnip meets ja may'ajtin, ka'ap ja xu'unt ana'amingøjxp, mgø'ømdsojkingøjxp idø'øn ja xu'unt. ¹⁵ Pø ja'agøjxp idø'øn ja ojts chøøn jøts ja mniwimbetyit jadigojk xemikøjxp, ¹⁶ jits ka'ap jade'en x'ukyiktunit ejxim jiyujkin, jade'en xjawit ejxim n'uchin ejxim nmigu'ukin. Njanchpa'ayøøpy øts yø', jawaani møk mets yø xpa'ayo'ot, ka' nugo jaaj'y x'ext, jade'en x'ext sam adømin, tøxi tpabiky ja nwindson'ajtim yja'.

¹⁷ Paty ø nwa'añ, pøni xmigu'ukja'wip øts, kupøk ejxim øts jeexyip xkupiky. ¹⁸ Pøni tø mmidundigøyi, uk japts mmiyojyiyi, øts ja ngubajtkøjxp. ¹⁹ Køøm øts ixyam nwa'añ jøts ngubajtkøxt ja voj, paty ø køøm ndyimyja'ay; ka' yjawi njadukja'myajtswa'añ ku me tø mnañito'jkniiyi. Kidim xjanchja'wiñi, taxi'ily yø'. ²⁰ Sam ø nwa'añ, tun waani ja may'ajt jøts ø xyikjotkujk'att ja'agøjxp ku tu'ugyi njanchja'windi ja nwindson'ajtim.

²¹ Nnajtsja'wip øts ku xpadungøxt sa jaty øts ixyam nwa'añ. ²² Jøts nayide'en x'awejxtip øts; jotmøñ mee nninijky sa jam ja Dios x'amidowdi.

Ku ja Pablo t'ukyajkni ja kajpxpoo'kxin jøts ja kunuu'kxin

²³ Nayide'en mdaniguexyidi ja kajpxpoo'kxin ja Epafras, pøn øts ixyam møøt ndsumchøøni nwindson'ajtingøjxp. ²⁴ Nayi kyajxtip ja kajpxpoo'kxin ja Marcos, møøt ja Aristarco, møøt ja Demas jøts ja Lucas, midi øts xpudøjkidip.

²⁵ Mbaajtidip ja nwindson'ajtim Jesucristo kyunuu'kxin ja y'øy'ajtin. Jade'en idø'øn ja yjatt.

J A N Ø K Y M I D I Y I K T A N I J A ' A Y I D Ø Ø J A H E B R E O S J A A ' D Y I

Dios U'nk køjxp adøm ja Dios Teety xmigajpxyim

¹ Janch tigach idø'øn ja Dios Teety y'ijty ñanky'ijxyiyi, ku dø'øn ja kyugajpxy ttuknijawiwya'añ pøni ti jaty idø'øn ja tyukmadowampy ja møjjaa'dyøjkti. ² Exyamnim idø'øn ja kyø'øm U'nk kugajpxy tø tkexy. Y'U'nk køjxp idø'øn ja Dios Teety ojts tuki'iyi tyik'øyi ja naajx jøts ja tsajp, jøts nay ja y'U'nk tø ttagidøjkiguixy køx kida'ak midi ja wyinaty tø tyik'øyi. ³ Ja Dios U'nk idø'øn tnanky'eixip ja Dios Teety ja myøj'ajtin, jøts nayi ja' ja tnanky'eixip sa dø'øn ja Dios Teety t'ixy; nay ja'ats ja myøkwinnmaa'ñ ja myøk'ayuujk tpatanaagyøjxp tuktsajp'agida'aky ja pikta'aky midi ja Dios Teety tø tyikøjy. Ja Dios Teety ja møøt yikutuky y'aga'ngyøjøm jam tsajpjotp, ku adøm ja ya jawyeen tø x'ukyikpojkipiwaajchim.

Jawaani møj ja Dios U'nk, ka'ap ja ankilis jade'endi

⁴ Tø ja Dios U'nk jawaani møj wyimbidsimy jøts ja Dios Teety y'ankilis ne'egi ka', ja agøjxp ku ja Dios U'nk tø tmdaif jawaani møj ja kutujk. ⁵ Jabi nijuunixi ja Dios Teety tkanimaay tu'uk ja y'ankilis yide'en:

Mets idø'øn n'U'nk'ajtpy;

øts mets ja jujky'ajtin ti nmø'øy,

ni ja Dios Teety tkanimaamyi tu'uk ja y'ankilis:

Øts me n'u'nk'atp,

jøts øts me xeety'atp.

⁶ Yide'ents tø wyami ku ja myøjtu'umts U'nk tø xaniguejxyim ya naxwiiñ:

Wan niduki'iyi øts ja n'ankilis mwindsø'øgiyi.

⁷ Ku ja y'ankilis tñimadyajkmi, yide'en ja Dios Teety wya'añ:

Øy øts ja n'ankilis o sa nñanky'eixiyit,

nayide'en sam ja pojnin, uk sam ja jøøn yowin.

⁸ Kuts ja y'U'nk tñimadya'aky yide'ents ja tñimaamyi:

Xemikøjxp me Dios U'nk mgutujk y'ity;

tij mets mgutujk ja mdiidyu'nin y'ity.

⁹ Mdsøky'ajtpy mets ja tyiiby: jøts ka' x'eixwə'añ ja ka'øybi;

paty ja mDios Teety jawaani øy ja jotkujk'ajtin tø mmø'øyi,

jøts ni ka'ap jade'en o pøn tø yiktuñ.

¹⁰ jøts nayide'en wyami:

Mets Dios U'nk, tø xanibiktaajkiguixy tuki'iyi ku yø naxwii'ñit tø xyikøjy,

jøts mgø'jotp ja tsajp tø pyidsimy.

¹¹ Køxtip naxtip yø', jøts mets xemikøjxp me mdañ.

Nayide'en yø yjattit sam wet pyachi;

¹² jøts mets ja xpøkjø'økt ane'eky ade'kxy, jøts jadigojk xyikjemyit xyik'øyt.

Mets idø'øn xemikøjxp jade'eñim m'ejtp, nijuuni xøøw mets mdsinqa'yin kyakixy.

¹³ Jøts nijuuni ja Dios Teety tu'uk ja y'ankilis tkanimaay:

Ya yikutuk n'aga'ngyøji'y,

kunimts mets mmidsep nduktekpya'an'att.

¹⁴ Dios Teety idø'øn myidundip niduki'iyi ja ankilis, nayi Dios Teetyts kajxidip jøts tpuðøkidit pøn jaty ja nitso'ok'ajtin tkupøkwandip.

2

Ka'ap ja nitso'ok'ajtin ngamøjpktaajkin

¹ Ja agøjxp idø'øn nyikmøja'am nyikøjxpa'am pøni sa tø nmado'øyim jøts kidi ja nwinmaa'ñ nyiktigajchim, tu'ugyi ja nyikyø'øyim. ² Tø dø'øn ja ayuujk yjanchwindiy midi ja ankilis ja israelit jaa'y tyukmadowdi, pøn jatyts ja tkabadundøø, yiktiidyundi ja', jøts ja ayo'on yikmøødyøø sam idø'øn pyaat'atyiyi. ³ Pøni jade'endam ja yjattøø, ¿sudsots adøm idø'øn ndejynt xa'ayo'ombaajtindit pøni ka'ap adøm ja møj nitso'ok'ajtin nmøjpktaajkyim? Jabi jawyeenxi ja nwindson'ajtim kø'øm tø tñigajpxy, pønts ja tpatmadoojidøø, tøts ja ayuujk ja jawyeen tiibyøkti jøts ja tø tssøøni, jitsnim øøts ja tø xukmadøy. ⁴ Tøts ja Dios Teety nayide'en kø'øm tyaky ja ejxpajt ku dø'øn ja y'ayuujk ja wyindiy, ku ijxyimbi ka'ijxyimbi tyiknaxkida'aky, nayide'en ja Dios Espiritu Santo tø xmø'øyim ja møk'ajtin sam ja kija' tø xamidøjkyim.

Nayide'en ja Jesucristo yjaa'yjajty sam ja myigu'uk naxwii'ñit jaa'y

⁵Ja tsinaa'yin ja juky'ajtin midimemp ja'tp Cristo koxp, midimots icyam nnigajpxy, ka'ap ja ankilistok ja mibaat tniwindsøn'attit. ⁶Jabi yide'enxi ja David ja Dios Teety t'ajot'aty jots ja t'jaadyaän:

¿Tymbyøn idø'on yø jaa'y'ajtp ku yø niwine'en xkaja'dyigø?

¿Ti tymbyøn idø'on yø naxwii'ñit jaa'y midimoo'kp tigøøpy ku yø xmiotigø?

⁷Tø yø waani x'atsyik'amutski jots tø x'atmøjpikta'aky ja m'ankilis,

ixyamts ne'egi jawaani mõj tø xmoø'y ja mõj'ajtin jots ja øy'ajtin,

⁸jots tuktsajp'agida'aky tyikutujkøxt.

Ku dø'on ja Dios tuki'iyi tø ttagidøjkiguixy ja jaa'y, niti dø'on ja tø tkayiktañ midim ja jaa'y kya'ana'amp. Ots ja yjade'eni, ka'anims adøm n'ijxyim ku tuki'iyi myimadooguixyi.

⁹N'ijxyindipts adøm ja Jesús pøn ja Dios Teety waani tø t'atsyik'amutski, ni ja ankilis tø tka'atmibaat'aty. Tøts icyam tmøøgyoimi ja mõj'ajtin jots ja windsø'jkin jawaani mõj, ja'agøjpx ku ja o'jkin ja tø tkupiky, ku ja Dios Teety ja jade'en tø tyamidsøkyiyi jots adøm ja xku'o'jka'ant.

¹⁰Dios Teety koxp tuki'iyi y'ijty, jots tum ja idø'on paat'ajtiyip; ja'ats ja Dios Teety chøjkpy jots nayide'en ja y'u'nk ja myaay tpaattit ja øy'ajtin. Paty idø'on ja Dios Teety tø ttamidsøky ja nwindson'ajtim Jesucristo jots ja y'ayo'owin jots ja y'o'jkin jade'en tuktabaja'ñaxy, sa dø'on ja naxwii'ñit jaa'y y'eixidi tyiyidi, jits jade'en jawaani øy xukja'gyukant sudso ja nitsoojkin nbaajint. ¹¹Jabi nay ja'axi ja tyeety'ajtip pøn jaty tø pyojkpiwa'atsti, jots nay ja'ats ja tyeety'ajtmip pøn yikpojkiwatp. Paty ja Dios U'nk tkadatsø'dyuiñ ku adøm ja xmiga'axa'am, ¹²sam jap wya'añ nõkyjøtpy:

Mets Dios Teety idø'on nniadya'akp ku øts ja nmiga'ax nmigajpxt,

jots tu'ugyi øø wyinaty n'iy mets koxp.

¹³Jøts nayide'en jap jaabyety wyami:

N'aweix'etp øts ja Dios Teety.

Jøts abiky ñomgoimi:

Ixyam ø møt n'u'nk n'unaj'k, midimots ja Dios Teety tø xmoø'y.

¹⁴Jade'en sam ja naxwii'ñit jaa'y ja juky'ajtin tmøø'ajttø, ja'agøjpx idø'on ja nwindson'ajtim Jesucristo yjaa'yajty jots jade'en ja o'jkin tkupøkt, jots jade'en tmimajada'aky ja miku' midim ja o'jkin tniwindsøn'ajtp. ¹⁵Jade'en ja nitso'ok'ajtin xuktajotkujk'ajtin jots jade'eñ dø'on ja o'jkin nga'uktsø'jkiñant. ¹⁶Wa'ats yikja'gyuki ku ja nwindson'ajtim ja' tkanimiñ jots ja ankilis tpudøkit, jabi tum naxwii'ñit jaa'lyxi ja ja'ayi ñimimpy, pøn teety'amøjokp'ajtip ja Abraham. ¹⁷Ja'agøjpxts ja nayide'en yjaa'yajty sam ja myigu'uk naxwii'ñit jaa'y, jots jade'en t'ayo'ext sam nayide'en ja Dios Teety tpadun'ett, ku ja kyø'øm o'jkin ja tyaikpojkiwa'ach ja naxwii'ñit jaa'y. Ja'agøjpx idø'on ja amuum ndeety'ajtyindi. ¹⁸Tø dø'on ja jawyeen ttanaxy ja ayo'on, ja winmaa'ñ, jots nayide'en yikxon tø yikwinmaa'ñ'ixy, paty idø'on myayi ja pudøjkin pøn jaty nayide'en yajtip kubajtip.

3

Jawaani mõj ja Jesús, ka'ap ja Moisés

¹Kunuu'kxy mee migu'uktøjkti, meetspi dø'on mbaat'ajtiyip jots yikxon x'ejxtit ja Cristo Jesús, pøn tø nyiktaniguexyindi jots pøn ndeety'ajtyindip, ja'agøjpx ku meets idø'on ja Dios Teety tø mwi'ijxyidi jots ja mja'atyyidit. ²Ejtp ja Jesús tyy ja Dios Teety tmimadøy pøni ti ja tø tyaguwaniiyi, sam ja Moisés nayide'en tu'ugyi tmiduun ja Dios Teety ma ja janchja'wibi jamdi. ³Jawaani mõjts ja Jesús ja wyindsø'jkin pyaadyi jots nika' jade'en ja Moisés, nayide'en idø'on ja tpaaty, sa jawaani mõj yikwindsø'øgi ja tøjkoji jots nika'ap ja tøj jade'en. ⁴Ots idø'on ja jaa'y may yjadøkoiti, tum ja Dios Teety tuki'iyi tø ttanibikaagi wine'en ijty tuktsajp'agida'aky. ⁵Janch øy idø'on ja Moisés yjatuun, ku ja janchja'wibitøjk tukmadøøy ja Dios kyajpxy y'ayuujk, pøni ti dø'on ja wyinaty tyunwampy ja Dios. ⁶Tu'ugyits adim ja Cristo xpawinmaa'ym wine'en adøm njanchja'wa'am, ja'agøjpx ku ja tkøjø'ømit'ajtkixy, pø Diosxi ja' ja y'u'nk. Ja' tsojkip jots møk ja winmaa'ñ nbiktaajkit, jits jotkujk n'aweixint ja øy'ajtin midimemp midim ja'tp.

Ja janchja'wibi pyoo'kxinxøwidi Dios wyingujk

⁷Paty yide'en ja Dios Espiritu Santo wya'añ, sam jap jaabyety y'ity nõkyijpxy:

Pøni mmadøøpy meets ja Dios Teety kyajpxy icyam,

⁸kidi jade'en mgujuun'atti sam ja jaa'y ttundi jam abak etjotp, ku tkagupøjkti ja Dios, jots ja yuy'ajtin nugo ttaguyajtdi.

⁹Jam øts idø'on ja m'apteety m'aptaak xwinmaa'nmyøk'ejxti,

øyi ja tja'ejxti tjanija'widi ja ijxyimbi ka'ijxyimbi wixijkxy jumøjt midim jaty øts jam njatun-gunajpxy.

¹⁰ Paty øts idø'øn n'atsmi'ambøjkti, winets ø nwaañ: "Ejtp mee mjadigø y m'anmija'wingøjxp, jøts ka' xtsøjkti jøts øts ja nduu' xpaduujnidit."

¹¹ Ja' øts idø'øn ja ndami'ambøjkti, jøts ø nwardaajky ku kyatøkidit ma øts ja n'uktamidsojkti.

¹² Migu'uktøjkti, nay'ejx'etidim tu'uk jadu'uk, jøts xkamajstuttit ja Dios ja yikjujky'ajtpi, jøts ja' ejtp xjanchjawidit. ¹³ Nay jaajkmnim ja xøw ja jumøjt, nagyajpxjot'amøjkyidi xem yam jabom jabom, jøts ja pøky mgawin'øonidit, jøts ja Dios ejtp xmimado'odit. ¹⁴ Pøni tu'ugyi nyikyø'yim ja janchja'win pøni sa ja tø nyiktso'ondaajkyim, kuwani ja Cristo møøt nbaajtin ja øy'ajtin.

¹⁵ Paty xja'myatstit ku ja ayuujk wya'añ: Pøni mmadøpy meets ja Dios Teety kyajpxy icyam, ka'ap nayide'en mgujuun'attit sam ja ttundøø pøn ja Dios Teety tkamimadoodøø.

¹⁶ ¿Pønts idø'øn ja Dios kyajpxy tjamadoodøø jøts ja tka'ukpadunidøø? Ja' dø'øn jade'en adøtsti pøn ja Moisés yik'awa'atpidsøøm jam Egipto etjotp. ¹⁷ ¿Pønts idø'øn ja Dios myijotma'jt wixijky jumøjt? Ja'ats idø'øn jade'en jajttøø pøn jaty pøkyundi, jøts ja jamyi abak etjotp y'oo'ktøø. ¹⁸ ¿Pønts idø'øn ja Dios tyamiwandaajki ku ja kyatøkidit ma dø'øn ja Dios wyinaty tøy'uktamidsokyidi? Ja' dø'øn ja'adi pøn tkamimadowdi ja Dios. ¹⁹ Exyats adøm n'ijxyim, ja'agøjxp ja øy'ajtin ja tkapaattøø ku ja Dios ja tkamibøjktøø.

4

¹ Ka'anim ja tpaaty jøts adøm ja Dios Teety nmøøtnøjxna'ant poo'kxpi, paty idø'øn tsø'øgi jawi ndsinaa'yinditnim ja ku wyinaty pøn nidu'ugin kyanaxy. ² Nayide'en adøm tø nyiktukmadø'yim ja nitsoojkin ayuujk, sam ja møjaa'dyøjk yjayiktukmadowdi; ka'apts ja ti øy'ajtin tpaatti ja kuxi ja tkamibøjktøø øy ja tjamadoodøø. ³ Adømts idø'øn ja Dios Teety møøt nbaajtin ja poo'kxin ku adøm ja tø nmibijkyim, jabi yide'enxi ja Dios kø'øm tøy wya'añ: Ja'agøjxp øts idø'øn ja nmi'ambøjkti ku øts ja xkamibøjktøø, jøts øts ndymniimy ku nijuuni xøw xkamøøtpoo'kxtit.

Jade'en idø'øn ja Dios wya'añ, øy ja wyinaty ja tyunk tøy tjayik'abajtyini ku ja wyinaty tuki'iyi tøy tyikojkixy, jøts t'agajpxujky jøts ja tpaattit ja poo'kxin pøn mimadoojip; ⁴ pø japxi nayide'en jaabyety y'ity ti dø'øn ja Dios Teety tyuun kyiwixujk xøw:

Poo'kx ja Dios kyiwixujk xøw ku ja tyunk tyik'abajtyii'n.

⁵ Jøts nayide'en jap jaabyetyi:

Ka'ap øts ja xmøøtpoo'kxtit pøn xkamibøjktip.

⁶ Ka'anim ja jaa'y niga'pxidi jøts tpaattit ja poo'kxaajk, øy ja tøy tjamadowdi ja nitsoojkin ayuujk, ka'ap ja poo'kxaajk ja tøy tpaatti ku ja tøy kyamadowdi; ⁷ paty ja Dios Teety jadu'uk ja xøw ja et tøjgajpxy mido'øm ixyam n'ijxyindip ndsinaa'yindip, jabi Davidxi dø'øn ja Dios kyajpxy yiktumpy ku ja wya'añ sa jap jaabyety y'ity nøyjixpy:

Pøni mmadøpy meets ja Dios kyajpxy ja y'ayuujk,

kidi xkamibøkti.

⁸ Ku ja Josué jeexyip ja israelit jaa'y ja poo'kxin ti tmøøni, ka'ap ja Dios Teety jeexyip jadu'uk ja xøw ja et tøjgajpxy ma ja poo'kxin yikyakt. ⁹ Patyts idø'øn y'awejx'ityiyi ja kunuu'kxy poo'kxin, niduki'iyi pøn ja Dios tjanchja'widip. ¹⁰ Pøn ja Dios Teety møøt pyøø'kxy, nayi tøy ja wyinaty ya naxwiin tyikixy ja y'ødy'unin. Jotkujk idø'øn ja pyoo'kxnit sam ja Dios pyøø'kxy ku tyik'abajtyii'n ja tyunk tuktsajp'agida'aky. ¹¹ Kuwanits nmijotigø'yindit jøts ja'abi poo'kxin nijum nbaajtinidit, jøts nipøn tkabadu'unt ja jaa'y pøn tkamibøjkti ja Dios.

¹² Jabi xemikøjpxi ja Dios Teety y'ayuujk y'ity, jøts jawaani wenk yiktsaachi myø'ajtingøjxp, niti tsujx adsow jøpi jade'en kyayiktsaachi, ja kuxi tyimya'aty anmija'winjotp jøts jade'en tnanxy'ijxyiyi pøni ti yiktunwamp uk yikwinmaa'n'ajtp. ¹³ Niti dø'øn ja Dios tkayu'uchjawi, tyumnija'wigyijxy ja' tuki'iyi jøts ja' idø'øn wyinaty nwinguwa'jka'amp jøts ndsinaa'yin ndagidøjkant.

Ja Jesucristo idø'øn tu'uk møjteetywindson

¹⁴ Ja Jesús mido'øm Dios U'nk'ajtip, ja' adøm idø'øn njawanimøjteety'ajtyindip, ja'ats idø'øn ja Dios Teety tøy twinguwa'agi, paty adøm idø'øn ja nDiosja'myajtsin møk nyik'ejtin. ¹⁵ Xja'gyuka'amp adøm ja Jesús mido'øm møjteety'ajtp, ja'agøjxp ku ja tnijawi sa adøm ndsinaa'yim ya. Pø tøyi ja nayide'en ja ka'øwynmaa'n'ijxyim jøts ja tøy tkagupiky, jøts jade'en ja pøky tøy tkatuñ. ¹⁶ Tja'myejchims ja Dios, jøts wan tninijkyim jotkujk jøts n'amido'owint pya'ayo'owingøjxp ja pudøjkin ma ngamajadaajkyim.

5

¹ Wi'ijxy idø'on jam israel kajpkøjxp, tu'uk jadu'uk ja teety, jøts tø yikpikta'aky jaa'gyudanaaby, jøts ja jiyujk'øøky ja Dios ttawindsø'øgidit ttawinjawidit jøts idø'on ja jaa'y pyøky ñiwa'adsiyit jøts ja Dios tmaa'kxt. ² Kumi nayide'en yø teetyti pyojkpitumbijaa'yidi, paty yø tja'gyukidi pøn jaty tsuj kadsinaadyip jøts pøn jaty tundigøødyip; ³ ja'agøjxpts idø'on ja wyindsø'jkin tpiakta'akti ku ja nayide'en pyojkpitumbijaa'y'ajtti, jøts ku ja jaa'y tkudaniidi.

⁴ Nipøn ja kø'øm kyananktyeetyidsimy; ja Dios Teety idø'on ja møøjyip, jøts nay ja idø'on tkunuu'kxp tkuwamp sam yiktuñ ja Aarón pøn myidu'ukpi møjteety'ajti ja israelit jaa'y. ⁵ Nayide'en yjajty ja Cristo; ka'ap ja kø'øm ñankmyøjteetyidsøjmi, ja Dios Teety ja møøjyi ku dø'on ja ñimaajyi:

Mets idø'on n'U'nk'ajtpy;

øts mets ja jujky'ajtin ya tøm nmø'øy.

⁶ Jøts ku nayide'en ja Dios Teety wyaamaa:

Mets idø'on xemikøjxp møjteety'atp,

jøts jade'en mdu'unt sam ja Melquisedec ttuñ.

⁷ Møk ja Cristo ja Dios Teety twingajpxajky tminuu'kxajky ku ya chinaay naæwiiñ, jøts twinjiy twinyaajxy ja Dios Teety, midit tmøøt'ajtp ja kutujk jøts ja o'jkin tkapaatt tka'ext, jøts ja Dios Teety myadooji ku ja tu'ugyi yikxon t'ajot'aty. ⁸ Kuwani dø'on ja Cristo ja ayo'on tkupøjki sam adøm, øy ja yjaDios U'ngi, kuwani ja tøm tnanky'ijxyi ja mado'owin; ⁹ kuts ja jade'en tja'gyukiyi'ñ ja naæwii'ñit ayo'on, jade'ents tmibaat'ajty sudso ja yiknitsoojkin ka'pxy tmo'ot pøn jaty ja mimadojyip, ¹⁰ ja'agøjxp ku møjteetywindsøn ja Dios Teety wyinaty tøm tyiktaajkniyi sam ja Melquisedec y'ijty tyety'aty.

Yik'ejxtip ja janchja'win ku ja jotmøñ yikmajstutnit

¹¹ Kajaanim ja kyayiknigajpxy ya'atpi ayuujk ja'agøjxp ku meets yjawi xkaja'gyukiwya'añ, jade'en'ampyts inet idø'on ja yjawi ngajatt sudso ndukmado'odit.

¹² Meetspiik idø'on jeexyip mdukyikyuuñidip ja mmigu'uktøjkti, kawinaak xøøw ja m'ixpøjkin xjayikyø'øñidi jøts ni jade'enbaat xkaja'gyukidinim ja ixpøjkin midit ka' mabaat chepi. Ne'egi jade'en meets yjawi mwimbejtni sam ja mutsku'nk ja'ayi ja che'tsknøø tkupiky, jøts ka'ap ja kaaky ja tojx ja ttsøky. ¹³ Maxu'ngin idø'on ndejint wyinmay pøn tkaja'gyukipnim sudso n'øchinaa'yint, kuts ja nduk'ixpøkwa'anin midit niwyaani tsep ka'ap ja tkupiky, nayide'en idø'on ja' sam ja maxu'nk ja'ayi tkupiky ja che'tsknøø jøts ka'ap ja wenkpi jii'kxy. ¹⁴ Pønts tjañtip t'ixa'at ja øybi uk ja kya'øybi, ja'ats ja Dios y'ixpøjkin tnijawiwyangøjxp øy ja wine'en yjatsepi jøts yikja'gyukit.

6

¹ Jade'en nyiktaa'nint pøni ti jaty jawyeen tøm nyiktukmado'øyim, ku ja Cristo tøm njanchja'wa'am, jøts ja Dios yja' njaaknija'wigyojint jøts ja ja'gyukin nmøøt'ajtint. Ka'ap ja nugo ngajpxjimbejtnit ngajpx'adøjint sudso nmajtstuujint ja ka'øy chinaa'yin, midit ja o'jkin tukpatp, jøts sudso ja Dios njanchja'windit, ² jøts pøni ti dø'on nøbajtin'ajtp, pøni sudso jaa'y tkunuu'kxy ja myigu'uk, jøts sudso ja jaa'y yjujkyøktit jadigojk, jøts sudso ja tiidyu'unin y'ett. ³ Paty adøm nja'uknijawigyojint pøni ti jaty yiktukmado'owimp, pøni jade'en ja Dios xamidsøjyim.

⁴ Ku pøn jaa'y tuk'ojkyi tøm ttajotkujktøki ja Dios y'ixpøjkin, ku ja Espiritu Santo tøm yikwijyidi yikejyidi ⁵ jøts ja Dios kyajpxy nekim tøm t'ukupøkti, jøts nayide'en tøm tyatøkiyidi ja Dios chojkin ja myøk'ajtin midit ixyam jøts midit xemikøjxp ejtp. ⁶ Pøni tøm ja tja'dyigøydi ja Dios jøts ja kyø'øm ka'øchinaa'yin ja tøm t'awimbetidi jadigojk, nisudso ja kya'ukjotimbejtnidit ku ja Dios U'nk ja kyiruspajtin jade'en nugo ttaguayajidi, jits ja nugo o magama' ttaxe'ekti.

⁷ Jade'ents ja yjatti sam ja naajx ku tyu'uy, y'uktichp nøø, kuts ja pikta'aky jam yikxon y'ity jøts ja tyikjotkujk'aty pøn jaty tøm ñe'lepti. Dios idø'on ja kunuu'kxip ja naajx. ⁸ Kuts ja pikta'aky ja tkayik'ity, ku nugo ujts jøts kujp tyik'ity, tits ja wya'ant, ka'ap ja y'øyi. Mi'ambøjkpts ja Dios ja' jøtsnim ja yiknitsa'att.

Jade'en idø'on ndejint ja naæwii'ñit jaa'dyi.

Ja awejx'ajtin midit jotkujk xyik'ejtimp

⁹ Ots ø migu'uktøjk jade'en njakajpxy, njanchja'wipts øts, ku meets ja Dios tøm mgunuu'kxyiyi, ku tøm myikmo'odi ja nitso'ok'ajtin. ¹⁰ Pø janch tyixi ja Dios jits ka'ap ja mdajaa'dyigøyidit pøni ti jaty meets ja tøm xuujni, jøts ku ja tøm xuk'ejxti wine'enin ja xtsojkti, ku ja mmigu'uk midit nayide'en tjanchja'widip ja Jesús tøm xpudøkiidi, midit meets ixyam mjaaktun'adichpñim. ¹¹ Ja'ats øø ndsøjkpy, jøts meets jade'en mdsinaa'yin xyikyø'ødyit jotkujk jøts tsuj, kunim ja øy'ajtin xpaattit midit m'awejxtip. ¹² Ka'ap øø ndsøky jøts mee mnuux'ookt, ja' øø ndsøjkpy jøts ja jaa'y xpa'ejxtit pøn jaty ja øy'ajtin tpaattip y'awejx'ajtingøjxp ku ja Dios tjanchjawidi.

¹³ Jade'en ja mōjaa'y Abraham yajty ku ja Dios tyamini'adso'owiyi ja øy'ajtin. Kyø'om jujky'ajtin ja Dios tyakajpx, ja'agøjpx ku wyinaty nipøn jawaani mōj kya'ity; ¹⁴ xjats yide'en ja Abraham yiknimaay: "Ngunuu'kxp mets, jøts ja m'u'nk m'ap nyiknamayit." ¹⁵ Tuda'aky ja Abraham ja t'awejx'ijty mididi idø'on ja Dios ñigajpx, jøts ja Dios ja myøøjyi mididi wyinaty tō tyamidsøkyi. ¹⁶ Ku jaa'y tigati ttamøjtøkiwya'andi ttajanchtøkiwya'andi, ja' ja y'agajpxtip pøn jawaani mōj, jøts ja nisa kya'ukyiknimaañidit. ¹⁷ Paty idø'on ja Dios ojts ja kyajpxy tyimyktañ, jøts ja yikjanchjawit ja y'ayuujk, jøts ku ja tuki'yiyi tpadu'unt pøni ti jaty ja wyinaty tō ttamidsøkyi ja jaa'y. ¹⁸ Majtsk idø'on ja winmaa'ñ mididi ja Dios myøøt'ajtpy jøts ka'ap ja taay'ajtingøjpx tpuñ; tu'uk ja wyandaajkin mididi adøm idø'on xamidsojkimp, jøts tu'uk ja kyajpxy y'ayuujk mididi ja awejx'ajtin xmo'øyimp ku ja wyandaajkin ja tpadu'unt. Jade'ents adøm ja Dios xyikjotkujk'ajtyim, jøts n'awijxyimpts adøm pøni ti dø'on xmo'øyimp. ¹⁹ Ya'at awejxin adøm idø'on ja n'amija'win tu'ugyi xyik'ejtindip, sam ja kudiabyajti tu'ugyi tyik'ity ja pikta'aky, mididi'its adøm idø'on nadyagumajtsa'amp jøts adøm ja Dios nbaajtint. ²⁰ Jam idø'on ja mōk'yity tsajpjotp ma ja Cristo jawyeen tō tyøki jøts ja tuu' tyik'awa'atst, jøts idø'on ja jade'en xemikøjpx tō tyañ mōjteetywindsøn sam ja Melquisedec.

7

Nayide'en ja Jesús teety'aty sam ja Melquisedec

¹ Salemit windsøn idø'on y'ijty ja Melquisedec jøts ja tsajpjotp Dios tñideety'ajtmi. Kuts idø'on ja Abraham wyinaty ja myidsep tō tmimajada'aky ixats idø'on ja Melquisedec ojts y'atspaatsøyi jøts kyunuu'kxi. ² Jøts ja Abraham tmøøy tukpiky ja majkpkipyi pikta'aky pøni ti jaty idø'on ja wyinaty tō t'atspiky. "Ka'pxy tñidyumbi windsøn" idø'on ja Melquisedec y'ayuujkpidimsy; kuts ja tñiwindsøn'aty ja Salem kajp mididi tyijpy "jotkujk'ajtin", icyats ja Melquisedec wyimbidsømni "ja windsøn pøn kyajp ttamidojpk ja øy'ajtin jøts ja jotkujk'ajtin." ³ Ka'ats idø'on ja teety tyaaak ja pøn, ni myigu'uk; ku dø'on ja ñanky'ejpxaajti, ni kyayiknigajpxmi ja kya'axin jøts ja y'o'jkin; paty idø'on ja Dios U'ngin t'ixy, ja teety mididi xemikøjpx teety'ajtp.

⁴ Janch mōjts idø'on ja Melquisedec wyimbidsimy, ku dø'on ja Abraham, mididi adøm ndeety'amøjkojpk'ajtyindip, ja tmøøy tukpiky ja myajkpkipyi pikta'aky mididi ja wyinaty tō t'atspøjkxi ja myidsep. ⁵ Jade'en ja Moisés kyutujk yjawa'añ jøts ja teety pøn yikts'o'ndaajkidi ja Leví jøts t'amido'odit ja jaa'y tukpiky ja myajkpkipyi pikta'aky, øy ja tjamigu'ugidi, uk tu'ugyi tjakojk'atti ja Abraham. ⁶ Øts ja Melquisedec jade'en yjaga-teety'aty sam ja'adi pøn yikts'o'ndaajkidi ja Leví, y'amidoow ja nayide'en tukpiky ja myajkpkipyi pikta'aky ja Abraham pøn wyinaty ja Dios tō tyamiwanda'agiyi ja øy'ajtin. Jøts ja Melquisedec tkunuu'kxy ja Abraham; ⁷ nipønts sa kyawa'añ, ku ja yjawanimøji pøn kunuu'kxp, jøts ka'ap ja' pøn yikunuu'kxp. ⁸ Tum oo'ktipts ja jaa'y pøn ya naxwiññ tukpiky ja myajkpkipyi pikta'aky yikmøødyip, ka'apts ja Dios kyajpxy jade'en tñigajpxy ku ja Melquisedec tō y'oo'kni, nømp ja wya'añ ku ja yjuky'atynim. ⁹ Nayide'en idø'on n'ukwa'anint, øy idø'on ja teetytøjk pøn ja Leví ñigubajk'ajtpy icyam tjayikmukti tukpiky ja myajkpkipyi pikta'aky, kuwani dø'on ndejint kø'om tjagubajtmidi ja yjade'embi nay winet ku ja Abraham tmøøy ja yja' ja Melquisedec. ¹⁰ Ja'agøjpx idø'on ja ndejint ja ttuñ ku ja tmøjnigojpk'aty ja Leví pøn wyinaty kaka'xpnim naxwiññ, ku ja Abraham ja Melquisedec pyaatsøji.

¹¹ Ja Levíit teety idø'on mididi ja Aarón yikts'o'ndaajkidi, ja' idø'on tmøødyi ja kutujk ja Israel kajp. Kudsik idø'on jeexyip ya'atpi teety ttukpaattøø ja Dios pøn jaty ja kyutujk paduujnidip, ka'ats jeexyip chøjkyi jøts ja teety jadu'uk kyaxø'økt mididi tkawindsøn'ajttip ja Aarón, jøts nayide'en teety'attit sam ja Melquisedec. ¹² Kuwani dø'on tyigach ja kutujk ku ja teety tyigatsti; ¹³ ni tu'uknims ja teety kyabidsimy abikyajpkøjpx, sami ja nwindson'ajtim Jesucristo mididi dø'on jade'en yiknigajpxp jap nøkyijpxy. ¹⁴ Yiknija'wipxi ja' ku ja nwindson'ajtim Jesucristo tatskojpk'aty ja Judá, jøts ka'ap ja Moisés tyikutujky ku teety jam Judá etjotp pyidsø'ømdit.

¹⁵ Jawaani øyts ja ne'egi wyingaxi'iky, ku yiknija'wi jøts ku ja Jesús ja jemdyeety'ajtin ñanky'ejxiyi, nayide'en sam ja Melquisedec. ¹⁶ Kyø'om mōk'ajtingøjpx ja Jesucristo tpaajty ja teety'ajtin, ja ku tmøøt'aty ja jujky'ajtin xemikøjpx; jøts ka'ap ja pyidsimy jam jaa'y agujk, pøn jaty idø'on paat'ajtyiyp ja teety'ajtin, sam ja kutujk ja'ayi ttanibiktaagi. ¹⁷ Pø yide'enxi ja Dios Teety ja ñigajpxyi:

Mets idø'on xemikøjpx nideety'atp,
jøts jade'en mdu'unt sam ja Melquisedec tpuñ.

¹⁸ Paty ja Moisés yjawyeen'ana'amin tō kyudigøy, ku ja mōk'ajtin tkayaky sudso yikpadu'unt; ¹⁹ jøts niwine'enin ja ka'øchinaa'yin tō tyiktigach. Ixyamts nmøøt'ajtyindi tu'uk ja jøp'ijxy'ajtin mididi øy mididi mōj jøts mididi ja Dios xukpaajtimp.

²⁰ Diosis idø'øn kø'øm ja y'aaw y'ayuujk tø tyaky jøts idø'øn ja nwindson'ajtim Jesucristo xemikøjxp teety'att. ²¹ Ja abikpyi teety, ka'ap ja jade'en tø yiktamidsokti sam idø'øn ja nwindson'ajtim Jesucristo tø yiktamidsøky, sam jap jaabyety nøkyijxpy wya'añ:

Pøni tø ja Dios wya'añ ka'ap ja y'aaw y'ayuujk ja tyiktigatst, ku ñiimy:

“Mets idø'øn xemikøjxp mdeety'ajtp, jøts jade'en mdu'unt sam ja Melquisedec ttuñ.”

²² Paty idø'øn ja Jesús jawaani tø myøjtøki, ku ja jawaani øy ja tyeety'ajtin midu tyajkp ja nitsoojkin. ²³ Yam janch namay ja jadu'ukpi teety, jøts tum jøpwetsti y'etti ku y'oookti, wenkpits ja tyunk tmidandip; ²⁴ ka'ats ja Jesús jade'en, nijuuni xøøw ja kya'øøky, paty ja tyeety'ajtin ja nipøn tkadukmidañ. ²⁵ Ja'agøjxpts idø'øn ja jade'en xemikøjxp tyik'awa'atspidsimy pøn jaty ja Dios t'ixaadyip, ku ja xemikøjxp yujky'aty jøts ku adøm ejtp xni'amido'owa'am.

²⁶ Ya'atpi teety'ajtpi adøm idø'øn jeky tø n'awijxyim; ja nwindson'ajtim Jesucristo ja' idø'øn øyjaa'y pøn tkamøøt'ajtp ja ka'øwynamaa'ñ, ni ja pøky, pøn ja pojkpitumbi jaa'y tø kyadapaadyi ja ka'øchinaa'yin øy ja tø tjamøøtsøøni, jøts pøn ja Dios Teety møøt yikutuky.

²⁷ Tø dø'øn ja tu'ugyi ja Dios wyindsø'øk'ajtin tyika'pxi, ku ja ayo'on kø'øm tø tkupiky. Ka'ap ja jade'en tø ttuñ sam ja jadu'ukpi teetyti, pøn jabom ja Dios twindsø'øjkidip jøts ja kyø'ombøky yikmaa'kxtit, jøtsnim ix'oojk ja jaa'y nayide'en tkugajpxti jøts ja pyøky ja wya'atstit. ²⁸ Tum naxwii'ñit jaa'y ja Moisés y'ana'amin yikteety'ajtpy, pøn nayide'en ja pøky øy myimajada'agiyidit; tøts yø'øbi ana'amin kyugøxi jøts ja Dios Teety ja y'aaw y'ayuujk tø tyaky jøts ja y'U'nk, ja nwindson'ajtim Jesucristo, tø tpikta'aky øy tyeety'ajtpi pøn xemikøjxp ja wya'ats'ajtin møøt y'ity.

8

Ja Jesús xkugajpxindip Dios Teety wyingujkp

¹ ¿Midi'ibits idø'øn tsojkp yixxon ja'gyuki? Ja' idø'øn ku adøm ja møjteetywindsøn nmøøt'ajtyim jøts ja jam tø y'ixa'aky Dios Teety y'aga'ngyøjø'øm yikutujkpi, ² jøts ja jam teety'aty tsaptøjkjotp midu ja Dios Teety kø'øm tø tkøjy, ka'ap ja jaa'y ja tø ttukyikøjy.

³ Windsø'øk'ajtin, tamay'ajtin, ja' idø'øn ja teety tyundip, paty idø'øn nayide'en ja nwindson'ajtim Jesucristo kuwani pyaat'aty jøts ja windsø'øk'ajtin tmo'ot ja Dios Teety.

⁴ Ku ja nay ya jeexyip chøøni naxwii'ñ, ka'ap ja yjeexyip teety'aty, pø jaaxi teety ja pøn jade'en ttundip sãmi ja Moisés wya'añ. ⁵ Nugo agojnaxts ja abikpyi teetyti myidundip, tum ja' y'agojnax midu jam tsajpjotp. Ja'agøjxp ja jade'en yiknijawu ku Moisés ja Dios ñimaa'jyi, ku dø'øn ja wyinaty tu'uk ja tsaptøjk tyik'øyi wya'añ, ku yide'en yikniimaa'y: “Yikxonim x'ext, jøts nayide'en pyidsø'omt sam tø nduk'ixy kojpkøjxp.” ⁶ Ja øy'ajtin, ja tiy'ajtints adøm ja nmøjteetywindsøn myidumpy, ja'agøjxp ku ja tkugajpxy tkudani ja øy'ajtin, midu adøm ja Dios Teety kø'øm tø xamidsøjkyim.

⁷ Kuk idø'øn jeexyip nisã kya'ejxi ja jawyeen kutujk midu ja Moisés ja Dios tukajpxnaxxøø, ka'ats jeexyip jadu'uk chøkyi sam ja Cristo yja' tø nñankyijxyi. ⁸ Ja kuxi ja Dios tkaka'pxyjawi ja jawyeen kutujk sam ja kø'øm wya'añ jap nøkyijxpy:

Yide'en ja Dios Teety wya'añ: Me'emp ja xøøw ja jumøjt

ku øts ja Israelit jaa'y jøts ja Judajit jaa'y nmo'odit jadu'uk ja kutujk pøni kyupøjktip.

⁹ Ka'ap ja jade'en t'ext sam ja' midu tø njatumi møøt ja myigugajp, midu jekyip tsinaadyøø, ku øts ja nwaapidsømdi Egipto y'etjotp;

kumi ka'ap ja tpadundi, paty øts ja nmajtstuttøø.

¹⁰ Yide'en yjaakwa'añ ja Dios Teety, yide'ents idø'øn ja y'ett, midu øts idø'øn ndunwajnip ja Israelit kajp:

Ndukja'gyukip øts ja øgyutujk ja'adi,

jøts øts ja y'anmija'wingøjxp nbiktaajkidit.

Ja'ats øts idø'øn niDios'attip,

jøts øts ja ngajp'attit.

¹¹ Ka' dø'øn pøn wyinaty ja myigu'uk niti tkadukyikyujti pøni ti dø'øn ja tyu'ump;

ja'agøjxp ku øts ja wyinaty ja møj ja mutsk tø nduknijawidi jøts øts ja niduki'yiyi x'ejxkaptit.

¹² Nmaa'kxidip øts ja' ja kya'øchinaa'yin, jøts nijuuni øts ja pyøky ja nga'ukja'myajtstniyidit.

¹³ Ku dø'øn ja Dios Teety ja jemy ayuujk ja jemy winmaa'ñ tñigajpxy, mijaa'yinip idø'øn ja myijawyeembi kutujk; kuts ja tø myijaa'yini, pojin ja kyudigøøñit.

9

Ja naxwii'ñit tsaptøjk jøts ja tsajpjotpit tsaptøjk

¹ Jamts idø'øn y'ijty tmøøt'aty ja jawyeen kutujk sudso yikwindsø'øgit ja Dios jam tsaptøjkjotp midy ja naxwiiñ. ² Yide'en idø'øn y'øiyi'iñ ja tsaptøjk ya naxwiiñ, midy dø'øn jawyeen yikpatp ku ndøjka'ant, ja' idø'øn xyøøw'ajtpy Kunuu'kxy Et, japts idø'øn y'etti ja seri adøø'yin, jøts ja pøjkpajt mā ja kunuu'kxy chapkaaky y'etti. ³ Japts myimajtsk adiidyuky jixki'py tyañ, ja amaagyunuu'kxy et; ⁴ mā jap tu'uk ja altajr midy tum amuum oori mā kyøøøy ja poom, jøts tu'uk ja mutskaaxi midy oori nimøch mā ja kutujk jap y'ity. Japts mutskaaxijøtpy tu'uk ja tu'jtsu'nk midy tmøøt'ajtp ja maná midy dø'øn yjøø'kxtøø ja israelit jaa'y jam abak etjotp. Nayi jap idø'øn kaaxijøtpy y'ijty ja Aarón ja tyajk midy ojts jadigojk xyimuly, jøts ja tsaa mā jap kyøxja'ayø ja kutujk ja ñi'ayuujk. ⁵ Jamts kaaxi ñikøjxp y'etti ja ankilistøjk ja y'agojnax, midy tyiknigaxø'ktip jøts ku ja Dios jam, jøts ja kyajnk ja ttanimu'uxty mā ja pøky y'ijty yikmee'kxy. Wants ya'at ja'ayi t'uknija'wam.

⁶ Kuts idø'øn ja jade'en tø ttanibiktaagidi, winets idø'øn y'ijty ja teety tyøkidi jap mijawyeen tøjkjøtpy midy Kunuu'kxy Et yiktejp, jøts idø'øn ja windsø'jkin ja yikjujky'ajtpi t'atsmo'odi pøni juuni ja kø'øm tsøjkin'ajttøø. ⁷ Jøts idø'øn jap myimajtsk tøjkjøtpy midy yiktejp Amaagyunuu'kxy Et, tuk'ojkyits ja winjumøjt ja møtteetywindsøn jap tyøtki; ja jiyujk ni'jpy idø'øn ja myidøjkip midy y'atswa'xpy mā ja pyøky jawyeen yikmaa'kxt jøtsnim ja jaa'y yja' nayide'en. ⁸ Yide'ents idø'øn ja Dios Espiritu Santo xukja'gyukam ku dø'øn jap nipøn nugo kyatøki myimajtsk tøjkjøtpy mā txøøw'aty Amaagyunuu'kxy Et. Japyi ja midu'uk tøjkjøtpy ja'ayi xyumitøkidi. ⁹ Yø' adøm idø'øn n'ejxpajtin'ajttimp wine'enin naxwii'ñit jaa'y'ajtyindi, jøts nnija'wa'ant ku ja winmaa'ñ kyawa'ach øy ja wine'en ja wyindsø'jkin tjayika'pxtøø. ¹⁰ Ja' idø'øn ja wyindsø'jkin'ajttip sudso kya'adyit sudso y'uuktit, jøts sudso ñanky'øiyiyidit ñankchuijyidit, sam ja møjaa'y chinaa'yin tyikutuky. Niwine'enin ja anmija'win ja tkayikwa'ats'aty. Ja'ats ja jade'en tyungunajxtip kunim ja Dios kø'øm tø tyiktigach.

¹¹ Tøts idø'øn ja nwindson'ajtim Jesucristo myiñ, ja'ats idø'øn icyam tñimøteetywindsøn'ajtp ja jemchinaa'yin midy ya tø tyañ. Jawaani øy idø'øn jøts jawaani tsuj idø'øn ja tsaptøjk mā dø'øn ja tyuñ, ka'ap ja jaa'y ja tkøjy, paty idø'øn ja kyanaxwii'ñit tsaptøjki. ¹² Tø dø'øn ja nwindson'ajtim Jesucristo ñaxy jap myimajtsk tøjkjøtpy midy xyøøw Amaagyunuu'kxy Et, ka'ats ja t'ukmidøjkiñi ja mutsk chiibi ni'jpy jøts ja løjch ñi'jpy; kyø'øm ni'jpy ja myidøjkip tuk'ojkøjxp ja'ayi, midy adøm idø'øn xemikøjxp tø xuktanitsøøjkyim. ¹³ Yikwachtsik idø'øn y'ijty ja pøky ja tsigiduuri ni'jpy, jøts ja tsapaxuna'jik ni'jpy, jøts nayide'en ja tsigivaki jaam midy yiknitøødyip jam altajrkøjxp, ku dø'øn ja y'ijty ñadyaniuuuyidi nikijxy jøts ja pøky jade'en tyikwa'atswa'andi xjats ja kunuu'kxin ja jade'en tpatøø. ¹⁴ Pøni jade'ents ja', jawaani kajaats idø'øn ja nwindson'ajtim Jesucristo ja ñi'jpy yikpøkwy'a'ach jøts kyunuu'kxy, pø patyxi ja Dios Espiritu Santo køjxp ñagyøyajkiyi pakwya'ach, midy ja Dios Teety kyupijky, jøts idø'øn ja ñi'jpy ja tyikwa'atst ja ka'øchinaa'yin midy ja kudigø'øyin xukpaajttimp, jøts ja Dios jøts ja yikjujky'ajtpi jade'en nñimado'owin.

¹⁵ Paty idø'øn ja Jesucristo møj yik'ajot'aty ku yjemgyutujk tø tyiktso'onda'aky, pø ja'axi ja kyu'ojkip jøts yikpøkmyaa'kxtit pøn jaty tø pyøkyundi ku ja møjaa'gyutujk y'ijty tyuñim, jøts ja jaa'y tpaattit ja xemikøjxpit øy'ajtin, midy ja Dios Teety ttamidøjkijyidip windi'ixip. ¹⁶ Jabi jade'enxi yiktuñ ku ja maay wya'kxy, jaanim ja wya'kxy ku ja jaa'y y'øøkñim. ¹⁷ Jøts ka'ap ja ayuujk mibaat nugo myøjtøkit pøni nay jujky'ajtpnim ja kumaay. ¹⁸ Kuwanixi ja ni'jpy ojts chuñ xye'kxy ku ja møjaa'gyutujk cho'ondaajky. ¹⁹ Ku dø'øn ja Moisés wyinaty ja kajp tø ttukmadøy ja Dios kyutujk y'ana'amin, winets tñixajiyi'ñ tukmutsk øøxy ja ujts aay møøt ja tsajpts wet, jøts ttuktaxø'øky ja tsigini'jpy ja chiibi ni'jpy, midy nøø wyinaty møøt tø yik'adaamuky, xjats ttanixejtwidity ja kutujk nøky jøts niduki'i'yi ja jaa'y nayide'en. ²⁰ Winets wyaañ: "Ya'at ni'jpy idø'øn tyikmøjtøjkip ja Dios kyutujk midy mee tø myiktamidøky." ²¹ Tyaniwa'jx idø'øn ja Moisés ja ni'jpy nayide'en ja tsaptøjk, jøts tuki'i'yi pøni ti jaty yiktundip, ku dø'øn ja Dios ja t'atswindsø'øgidi. ²² Jade'en idø'øn kyutuky jøts ku ja ni'jpy tuki'i'yi tyikwa'atst, kuts ja ni'jpy kya'lett ka'ats ja pøky yikmee'kxy.

Cristo y'ayo'ongøjxp ja pøky wya'ach

²³ Paty idø'øn chojki ja ni'jpy jøts wya'atst it ja pikta'aky jap tsaptøjkjotpy, midy y'agojnax'ajttip ja tsajpjøtpytit tsinaa'yin. Jawaani øy pyaat'atyiyi ja tsajpjøtpit'ajtin ja windsø'øgi, midy ja Cristo kø'øm tø ttuñ. ²⁴ Jøts ka'ap ja Cristo jam tyeety'ajty tsaptøjkjotp midy ja naxwiiñ ja jaa'y tø tkøjti, jøts tsajpjøtpit tsaptøjk ja' nugo y'awanax. Jamxi dø'øn ja tyimchajpjotp tø tyøki, mā adøm ja icyam x'agø'dujkyim x'axajtykyim Dios Teety wyingujkp. ²⁵ Tuk'ojkyi dø'øn ja Jesucristo ja o'jkin tø tkupiky, ka'ap ja jade'en tø ttuñ sam ja jadu'ukpi teetywindsøndi midy dø'øn y'ijty winjumøjt ja'ayi tñidøjkip ja ni'jpy jam tsaptøjkjotp jøts ni tkakø'ømni'jpyi ja'adi. ²⁶ Ka'ats idø'øn ja Jesucristo jeexyip nayide'en ttumi, tøts idø'øn ja jeexyip may'ojk y'oo'kni kuyip cho'ondaajky ja naxwii'ñit, ka'ats ja

jade'en tō ttuñ. Ixja tō kya'pxy, ixja tō tyiy ja et ja naxwiiñit, tuk'ojk ja o'jkin ja ja'ayi tō tkupiky jōts ja pōky tuki'iyi xemikōjxp tyikwa'atst. ²⁷ Nayide'en sami jaa'y niduki'iyi tuk'ojk y'oo'kti, jōts yikti'dyū'unditnim, ²⁸ nayide'ents ja Cristo tuk'ojkyi tō y'ōōky, jōts may ja jaa'y tyikwaajtsit ja pyōky. Kuts idō'on wyinaty jadigojk ñanky'ejxpaadyiyi, ka'ap ja yikpōkwyatspi wyinaty y'ukmeni, ja' ja wyinaty ñimimpy pōn jaty ja awejx'ajtiyip.

10

¹ Ja jemgyutujk idō'on ja' y'aga'ax ja nugo kutujk midī ja Moisés yiktaan, paty idō'on ja kyamajada'aky nijuuni. Ōy ja jiyujk ja namay tjayik'ookti winjumōjt, ka'ats ja pōky ja tyikwa'ach. ² Ku dō'on ja jeexyip ja pōky tyikwa'ach, jōts ja ochinaa'yin jeexyip tyaky, tuk'ojkyits idō'on ja jeexyip jade'en yjaty. Ka'axi ja jeexyip y'uknabyōkyja'winiyidi. ³ Kumi ka'ats ja yjade'eni pō ximija'myatstipxi ja pyōky ja'adi ku ja winjumōjt tjatundi ja windsō'jkin, ⁴ ja'agōjxpts ja jade'en yjatti ku ja pōky ni ja tsigini'jpy ni ja chiibi ni'jpy tkayikwa'ach nijuuni.

⁵ Paty idō'on ja Jesucristo ja Dios Teety tñimaay ku ya myiñ naxwiiñ:
Ka'ats xtsōky'aty jōts myiktawindsō'ogit ja jiyujk,

patyxi ōts tō xyikjaa'yjaty jōt ōts ja ne'lx jōts ōts ja ni'jpy tō xmō'ōy.

⁶ Ka' myikjotkujk'atyī ku ja jiyujk yjanitōy, ni ja windsō'jkin midī jayiktump jōts ja pōky xmaa'kxt.

⁷ Winets ō nwaañ: "Ixyam ō Dios Teety, jōts ō nbadu'unt pōni ti me nmi'ana'amwampy sa jap jaabyety nōkyixpy y'ity."

⁸ Ku dō'on ja jawyeen tō tñigajpxy ku ja Dios Teety tkadajotkujk'aty ja windsō'jkin ku dō'on ja jaa'y ja jiyujk tjayik'ookti, jōts ku tigati tjayiktōomyidi jōts ja pyōky wya'atstīt sam idō'on ja yjagutujkyi. ⁹ Winets ja nwindson'ajtim Jesucristo wyaañ: "Ixyam ō Dios Teety, jōts ō nbadu'unt pōni ti mdsōjky." Yikudigōopyts idō'on ja nwindson'ajtim Jesucristo ja jawyeengutujk jōts ka kyō'om windsō'jkin ttawinguwīch. ¹⁰ Tōts adōm idō'on ja Dios xkunu'lxym, pō tōxi ja nwindson'ajtim Jesucristo xemikōjxp tuk'ojkyi ja ñine'lx tōyaky midī idō'on ja Dios Teety tō tmō'ōy adōmgōjxp.

¹¹ Tum jade'ents ja israelit teety tundinim, nay ja jiyujk ja tyawindsō'jkidip ja Dios, ōy ja pōky ja nijuuni tjagayikwa'ach. ¹² Tuk'ojkyits ja Jesucristo ja'ayi tō y'ōōky jōts adōm ja nbōkwyajtsindit, jōts ja jam tō y'ixa'aky yikutujkpi, Dios Teety y'aga'ngyō'ōm. ¹³ Jamts ja y'awixy kunim ja myidsep yikpikta'akt tyekyji'py jōts ja ttekyja'an'att, ¹⁴ pō tōxi ja tu'ugyi ja wyindsō'ok'ajtin ttamajada'aky ku ja kō'om tō ñadyagidōkyi ja Dios Teety, jōts jade'en xemikōjxp tō tyik'awa'atstipsimy pōn jaty ja kunuu'lxxin tō tmō'ōy. ¹⁵ Jōts ja Dios Espiritu Santots ja kajpxy nayide'en tyiktuu'yō'ōpy tyiktuu'wejtsp ku wya'añ yide'en:

¹⁶ Midī ōts idō'on yō jaa'y ndamidsojkīp, ku dō'on ja xōōw ja jumōjt tpaatt, yide'en ōts idō'on ja wyinaty nduñ.

Ndukja'gyukip ōts ja ngutujk jōts ōts ja nbiktaajkit y'anmija'wingōjxp.

¹⁷ Jōts yjaakwa'añ:

Ka'ap ōts ja pyōky ja wyinaty n'ukja'myajtsniyi, ni ja kya'ōy'ajtin.

¹⁸ Paty idō'on nja'gyuka'ant yikxon pōni tō ja pōky xemikōjxp yikmee'kxy, ka'ats y'uktsojknīy jōts ja Dios Teety njaaktawindsō'jka'ant o ti jōts ja xpojkpimaa'kxint.

Mok ja Dios janchja'win nbiktaajkit

¹⁹ Paty migu'uktōjk idō'on ka' tso'ogijawī nwingunōjxindit ja Dios Teety jap tsajpjōtpy, pō tōxi ja nwindson'ajtim Jesucristo xkudsu'una'am xkudajxa'am. ²⁰ Ja'ayi tsojkip jōts adōm ja nwindson'ajtim Jesucristo ja yjemdyuu' nguyō'ōyint midī ttukpatp ja xemikōjxpit jujky'ajtin, jōts midī ja nwindson'ajtim Jesucristo tō awa'ats tyiktañ kyō'om y'o'jkingōjxp.

²¹ Ja nwindson'ajtim Jesucristots adōm idō'on nmōjteetywindsō'najtyimp jam tsajpjōtp; ²² paty idō'on tu'ugyi ja n'anmija'win nbiktaajkit ku ja Dios Teety n'ajot'ajtin, jōts tu'ugyi dō'on ja janchja'win amumjōjt nmōt'ajtin; pō tōxi ja xyikpōkwyajchīm jōts adōm nga'uknabyōkyja'wiña'ant, tōts nayide'en ja nōbajtin nōō xyikwaajchindi. ²³ Yikxonimts idō'on ja n'aweixint midī ja Dios t'agajpxuky ku adōm ja kyutujk ja tō ngupijkyim. Pyadu'ump ja' ja y'ayujk. ²⁴ Ja' adōm idō'on n'ixa'ayimp sudso xem yam nnabyudōjka'ant jōts nnachojka'ant. ²⁵ Ka'ap adōm ja jaa'y chinaa'yin nyikmōjtōjka'ant pōn jaty kamendip ku nnamyukyandi Dios ajot'ajtpi, nagyajpxjot'amōjkamp adōm idō'on ne'egi, ixa ja nwindson'ajtim Jesucristo wyingoni.

²⁶ Ku adōm kō'omdsōjkingōjxp ja Dios yja' n'ixmajtsint, ka'ats ja maa'kxujin yikpaatt, jabi ka'axi ja abiky yiknitsokpi y'ukmenit. ²⁷ Ja'ayits adōm njōp'eixindip pōni jade'en adōm ndsinaa'yin, jōts ja Dios Teety ja myōkti'dyū'unin nbaajtin, jōts xemikōjxp ja tō'ōyin xmō'ōyindit midī dō'on pyaattip pōn ja Dios tmidsep'ajtip. ²⁸ Pō nayide'enxi y'ijty yiktundi pōn tkamimadoodip ja Moisés y'ana'amin, ku namajtsk uk nidigōōk ja

a'ejxnaxpi kyajpxti, kuwanits ja y'ijty y'øøky, niwine'en ja kyayik'ayo'ejxti. ²⁹ Jawaani kajaats ja pyaat'atyidi ja ayo'on pøn jaty ja Dios U'nk nugo t'uktaa'nwdejtnidip, jøts ja y'o'jkin tka'ukmøjpiktaajkniiyidi mididi tø yikpojkpiwa'achidi, jøts nayide'en ja Dios Espiritu Santo tø t'ukmigajpxigøøñidi yam ja yjaba'ayøyidi. Pø ja y'o'jkinxi ja Cristo y'ejxa'anin'ajtpy ku dø'on ja Dios Teety chojkin tø t'nigajpxy, mididi tø yjayikpøkwy'a'achidi pøn ja ka'ukmøjpiktaajkniiyidip. ³⁰ Pø nnija'wampxi ku ja Dios Teety tø wya'añ: "Øts xpaat'ajtp jøts øts ndagubattit ja pyøky; øts yø nmo'odip kija' ja y'ayo'on pøni wine'en yø pyaat'atyidi." Jøts nayide'en wyami: "Ndidiyu'ump øts ja ngajp." ³¹ Janch kawinmaañi dø'on ja y'ayo'on'ixy pøn ja Dios, pøn ja yikjujky'ajtpi tyukpatpy myøk'ajtingøjx ja y'aki!

³² Kidi mee xja'dyigøy ku ja nwindson'ajtim yja' x'ejxidi jøts ja chinaa'yin xpadøjkidyøø, winets o sagasa xkujajtidøø ja mjanchja'win. ³³ Jam mee niwinaaagin pøn ja mayjaa'y m'ejxidi ku myikta'o'jti jøts myiktatsee'kti ja mdsinaa'yin, jøts nayide'en xajotmay'ookti ja mmigu'ukti pøn o sagasa yiktundip. ³⁴ M'ayo'ejx meets ja tsumyjaa'y, jøts mimadaajk meets ja jøtkujk ku ja mbikta'aky tuki'iyi myikpøjkigyøxtøø, pø nnija'wipxi meets ku jam tsajjotp jawaani y'øyi xpaattit mididi xemikøjx etp. ³⁵ Wan ttuñi pøni ti tuujnip, awejx'et meets ja ejtp pøni ti ja nwindson'ajtim tø t'agajpxuky, myikmo'op meets ja kajaa. ³⁶ Tuda'aky ja Dios Teety y'ana'amin paduñi ttsøky, jøts ja tyakt pøni ti ja tø t'agajpxuky. ³⁷ Pø yide'enxi ja nøky wya'añ:

Jawaani jaak'awejx'etti,

tsojk ja mye'ent ja nwindson'ajtim pøn ja øy'ajtin xmø'øyimp.

³⁸ Mididi'its øts idø'on ngupijky, janchja'wingøjx idø'on t'awixy'aty ja øy'ajtin, pøni windsi'kyjts ja', ka'ats øts ja ndajotkujk'att.

³⁹ Ka'ats adøm nwindson'ajtim yandi mididi pojin yikmimajadaktip, tum ja abixi adøm pøn ja janchja'win ttajujky'ajttip, jøts jade'en ja n'anmija'win xemikøjx nyiknitsoojkindit.

11

Ti dø'on janchja'win'ajtp

¹ Ja' dø'on janchja'win'ajtp ku amumjoojt tu'ugyi n'awejxint pøni ti dø'on yikmø'øyimp jøts ku amumjoojt nmibøjkint mididi nga'ijxyindip. ² Ja yjanchja'win idø'on ja ndeety'amøjtøjk yiktakajxajkti.

³ Ja janchja'win adøm xukmibøjkimp ku ja Dios ja tsajp ja naajx jøts tuki'iyi tø tyik'øyi y'ayuujkøjx ja'ayi, jøts ja' mididi ixyam n'ijxyindip ka'ap ja y'ity te.

⁴ Janchja'wingøjx ja Abel øy ja Dios twindsø'jkøø, yam ja Cain kajade'en, paty ja Dios ja Abel tkupijky jøts ja'agøjx ja wyindsø'jkin tkupøjki. Ots ja Abel tø yja'oo'kni, tø ja ejxpajtin ja xemikøjx tyiktañ ku ja janchja'win ja tmøøt'ajty.

⁵ Janchja'wingøjx ja Enoc yiktaniwawi ja xemikøjxpit tsinaa'yin øy ja o'jkin ja tjagapaajty, jøts ja tka'ukpatnidi ku tja'ixaadyøø pø tøxi ja Dios ja wyinaty pyawa'aniyi. Yide'ents jap nøkyijxy wya'añ ku ja Dios ya naxwiiñ tyikjotkujk'ajty. ⁶ Janch tsepts jøts ja Dios nyikjotkujk'ajttint, pøni ka'ap ja janchja'win yikmøøt'aty, ja kuxi ja Dios yikpaatwa'añ, jawyeen idø'on ja njanchja'want ku dø'on ja jaa, jøts ku ja nayide'en tkunuu'kxy pøn jaty ja ixaajyiyip.

⁷ Janchja'wingøjx idø'on ja Noé ja Dios tmibijky, jøts tmimadøøy ku ja tyukmadooji pøni ti jaty idø'on tunwajnip wyinaty, o dø'on niti kyagaxi'ikñim, jøts ja barki tyik'ø'yiyi'ñ mididi yiknitso'ogip wine'enin jam tyøjkjotp yjaa'y'atti. Ja yjanchja'win ja tyamøj'ajtp jøts ja ttuk'ijxy pøn jaty ja pøky ttunk'ajttip, jøts nay ja'agøjx ja Dios tyaxonda'agy.

⁸ Yjanchja'win ja Abraham yikmadooji, ku ja Dios ojts myigajpxy jøts ja kyajp tmajtstuu-jty, jøts tmidsø'øñ ja naajx ja et mididi ja Dios ttamidsojki, øy ja tjaganijawi pøni ma dø'on ñijky.

⁹ Ja'agøjx idø'on ja Abraham chinaay jam etjotp mididi dø'on ja Dios ttaniwaadsojy'i ku janchja'win ja tmøøt'aty, jøts jabyøø'kxyin ja jam chinaay. O magama ja tyøjk tkojwidettøø sam ja tuu'yø'øbyidi. Jøts nayide'en ja y'u'nk Isaac møøt ja Jacob ttundøø, jabi nayide'enxi ja Dios ja tyamiguy'ejxidøø ja naajx ja et. ¹⁰ Ja'agøjx ja jade'en ttuñ ja Abraham, ku tjøp'ijxy'aty ku tyukpaattit ja kajp mididi ja Dios kø'øm yik'øyip yikpaadip, ja tsajjotpit kajp mididi tu'ugyi etp.

¹¹ Nay ja janchja'win ojts ja Sara tyukmibiky'i ku ja tu'uk ja y'u'nk tpaatt øy ja wyinaty tø yja'amøji kyidakni. Pyaajt idø'on ja y'u'nk ja ja'agøjx ku tjanchjaa'wiyi'ñ jade'en sa ja Dios ñimaajyøø. ¹² Ots idø'on ja ñiyaa'y Abraham yjadyimyøjaa'yini, ojts idø'on t'nigøjpkteety'aty janch namay ja naxwii'ñit jaa'y, ejxim maadsa', uk ejxim pu' meji'agø'øm kyamachooni.

¹³ Tum oo'køjxtits yø jaa'y, ixa jade'en tø yikja'myatsti, jøts nika' ja ya naxwiiñ yik-møøgyijxy pøni ti jaty ja Dios wyinaty tø tni'adsowi; ttuk'ejxidits ja jagamyi ja yjanchja'win mididi ja Dios yakwanguijxy jøts jade'en ttaxondaktøø, jøts ja jade'en ttankñija'widøø ku ja ya naxwiiñ nugo ñaxti. ¹⁴ Pønts jade'en ttundip, y'ixaadyipnim idø'on ja' tu'uk ja kajp

ma tu'ugyi chinaañidit. ¹⁵ Kuk ja ttajotmay'oo'knidi ja kyajp midi yiktandi, wimbejtitsik ja jadigojk nay jam. ¹⁶ Kumi ogyajpts ja jawaani ja chojktip midi dø'øn jam tsajpjotp, paty ja Dios jam a'ejxi abaadi tyik'tity tu'uk ja kajp jøts ka'ap ja tyatsø'dyduñidi, kajpja'wiyidip ja'.

¹⁷ Nay ja janchja'win ja Abraham ja Dios ttuknimadooji ku myøkwinnmaa'ñ'ejxiyi jøts ja tyu'umts majnk y'amidoojiyi jøts ja Dios ja ttuktawin'oogit. Tø ja Abraham wyinaty tkupiy jøts ja tyu'umts majnk twindsø'jkin'att, o dø'øn ja Dios kø'øm wyinaty tø ñi'mxyi: ¹⁸ "Yø Isaac mets idø'øn myikmayiyip." ¹⁹ Ja'agøjxp idø'øn ja Abraham jade'en ttuun ku ja twinnmay ku ja Dios myø'ajtin myøji jøts tyikjujkyøkt ja oo'kpi jaa'y. Oo'kpi agujkpy idø'øn ja Abraham ndejint ja y'u'nk wyimbijty jadigojk øy idø'øn ja yjaga'øøky.

²⁰ Janchja'wingøjxp ja Isaac t'agajpxuujky ja kunuu'kxin midi ja y'u'nk Jacob jøts ja Esaü paadidip. ²¹ Jøts ku ja Jacob wyinaty y'ookwani, janchja'wingøjxp idø'øn ja ttami'awa'anii'ñ' jøts ja José y'u'nk y'una'jk tpaattit ja kunuu'kxin. Xjats ojts winda'aky t'ajot'aty ja Dios jøts ja tyajk ojts ñadyagudijiyi. ²² Janchja'win ja José yikwajni, kuk ja israelit jaa'y pyidsø'ømdit Egipto y'etjotp, jøts tni'ana'ami sudso ja pyajk yiktu'unt.

²³ Janchja'wingøjxpts ja Moisés ja tyeety tyaaq yu'uch yik'ejttø tigøøk po'; ja'agøjxp ku t'ejxti ku ja janch tsuj jøts ka'ap tsø'jkidyøø ja windsøn kyutujk pøn wyinaty tø ñimy jøts ku tuki'iyi ja mutskuna'jk y'ooktit. ²⁴ Jøts nay ja janchja'win ja Moisés kaduktsojki jøts ja Egipto windsøn ñøøx ja taak tejt ku wyinaty tø yaa'dyøjkjatni. ²⁵ Nugo ku ja nayide'en tkupijky pøni sa jaty ja myigu'uk israelit jaa'y yiktundi, jøts ka'ap ne'egi nugo ttaxøøñ ja naxwiin'ajtin midi naxp midi tigøøpy. ²⁶ Jade'en ja wyinnmaa'y ku ne'egi jawaani øy jøts ja Cristo o sagasa tmiñatt, midi dø'øn yiknigajpx me'emp, ka'ap ja tmøjpiktaajky pøni wine'enin jam ja meeñ jøts ja pikta'aky Egipto; ja' y'awijxpy midi ja Dios mo'ojp. ²⁷ Ja janchja'win ja Moisés yiktso'øø jam Egipto etjotp, ka'ap tso'jkii'ñ' ja windsøn y'aki, nugo ku ja tpadunguixy ja y'øwyinnmaa'ñ' ejximdam ja Dios ja jeexyip tyimy'ixy.

²⁸ Janchja'wingøjxp ja Moisés tyiktso'onda'aky ja paski xøøw ku tyikutujky jøts ja israelit jaa'y ja ni'jpy ttawinja'adit ja tyøjk'agaj, jøts ja yjagyøobi majnk ka'ap ja Dios Teety y'anilis yik'oogidit sam ja Egipto jaa'y yjajttø. ²⁹ Janchja'wingøjxpts ja israelit jaa'y ttanaxti ja Tsajpts Mejy ejxim jaa'y yø'øy tø'øts naxkøjxp; kuts ja egiptit jaa'y nayide'en tjatunwandøø winets ja ñøjøø'kxti niduki'iyi.

³⁰ Janchja'wingøjxpts ojts ja Jericó kajp ja ñawaap kyidaagijxy, ku ja israelit jaa'y wixujk xøøw ja kajp tni'awidejttø. ³¹ Jøts nayi janchja'wingøjxp ja Rahab, ja ka'ødyø'øxyøjk, ojts møøt kya'øøky pøn tkamimadoodip ja myigugajp, ku ja wyinaty øy tsuj tø twindsø'øgi ja israelit jaa'y pøn kajptøjkidi ejxpi koobi.

³² ¿Ti jaty ø njaakmadya'akp? Ka'ap ja et ja xøøw ñibaadi ku ø nnimadyaktøkit ja Gedeón, ja Barac, ja Sansón, ja Jefe, ja David, ja Samuel jøts ja jaa'dyi midi y'ijty ja Dios y'aaaw y'ayuujk'ajtpy ku ti tniagajpxwa'añ. ³³ Janchja'wingøjxp idø'øn yø tø tmimajada'akti ja wenk kajp, jøts tyy øy tø kyudunk'atti jøts ja Dios ja pyudøjkin tø tpaatti sa ja wyinaty tø tni'adsowi. Ja møj kaa'jadi'ñi tø t'apanmujkidi ja y'apajk, ³⁴ jøts ja møj jøøn nayide'en tø tmimajada'akti, jøts tsujx kumy tø kya'ookti. Jøts tø yjotmøkpøkti pøn kajotmøkti, jøts ja y'awa'ambi midsep tø tmimajada'akti. ³⁵ Jam idø'øn ja tø'øxyøjk pøn janchja'wingøjxp ja ñiyaa'y tø t'ejxpaatti jadigojk jujky.

Mayts y'oo'kmidi ayo'on agujkpy, jade'en idø'øn ja ne'egi ttsoktøø jøts ka'ap ja Dios yja' t'ixmajtsidøø ja'agøjxp ku ja t'aweix'atti ja jujky'ajtin xemikøjxp. ³⁶ Jøts may nayide'en yikxon tø yiktaxe'ekti jøts tø yikwopti, jøts ja pujkkuwøøñ tø yikpitaajkidi jøts tø yiktsumdi. ³⁷ Jøts nayide'en tø tsagaa'ach y'oo'kmidi, uk tapoodits, jøts tø yikmøjwinmaa'ñ'ejxti, jøts tsujkøjxp tø y'oo'kmidi; jøts ja borreegi'ak jøts ja chiibi'ak yik'ayowim tmiwidejttø, o sagasa ja ayo'on tpaattøø. ³⁸ Ja'abi jaa'y idø'øn tø wyidetti abak etjotp, kojpkøjxp, jøts tsaa' ankjøtpy, tsaa' jutjøtpy. Niwine'en ja naxwii'ñit jaa'y ja'abi jaa'y kyapaat'atyi. ³⁹ Ots idø'øn yø øy tsuj tø yik'ejxti yikpaatti ku janch møj ja yjanchja'win, ka'ap yø ti tø yikmo'odi pøni ti dø'øn ja Dios tø t'uknigajpxy; ⁴⁰ pø tøxi ja ttanibiktaagi kø'øm jawaani øy jøts ja y'øbyidsø'ømdit adøm møøt.

12

Ja Jesús adøm n'ejxpaj'tajtimp

¹ Janch mayts adøm ja jaa'y ñnija'wa'andi pøn jaty ja janchja'win tø møøt'atti jøts ja tø tnanñigaxi'igyidi. Wants adøm tmajtstuujtna'am tuki'iyi pøni ti jaty xyikjotkøjximp, jøts ja pøky nayide'en nmajtstuujtint midi yjawi xyikpak'amujkna'amp, jøts yikxon njaakpadungojindit tuda'aky ja øchinaa'yin. ² Ja Jesús adøm n'ejxpaj'tajtimp pøn ja janchja'win tyajk jøts pøn nayide'en tjaakyik'øyip jøts tjaakyiktsujip. Tø ja Jesús jam kruskøjxp y'øøky, ots ja yjatsø'dyduñ, ja'abi ø'jkin ka'ap ja tø tmøjpikta'aky, pø ñija'wipxi

ja' ku ja ayo'on ja tnanaxt jøts ja tpaatt ja jotkujk'ajtin ja xondaajkin; jøts ja tø y'ixa'aky yikutujkpi møøt ja Dios Teety jam y'aga'ngyøjøm.

³ Paty mee kidi mjothkixy ni mga'amutskidit, ja Jesús meets ja'myats jøts ja xni'ejxu'tuttit ku pojkkpitumbi kyøjøm kawinø'on tø y'ayo'ombaaty. ⁴ Ka'anin meets ja pøky xmøøtsseptuñ jøts xkudaxit. ⁵ Łuk tø meets idø'on ja xja'dyigøøñi sa adøm Dios Teety y'u'ngin xja'ane'emyindi? Pø yide'enxi jap jaabyety nøkyixpy:

U'nk, kupøk ja ayo'on midin danigiejpxy jøts mdsinaa'yin xyiktigatst, jøts kidi x'ayooji ku me n'ojt.

⁶ Pø tum ja'axi øts ja chinaa'yin tigach ndamidsøjkpy pøn jaty ø ndsøjkpy, jøts ja ayo'on nmøøy pøn jaty n'u'nk'ajtpy.

⁷ Midani meets idø'on ja ayo'on, pø ja agøjpxi meets ja Dios ja mmøøyi ku y'u'nk'y'una'jkin mdsøkyidi. Łuk jaa dø'on ja jaa'y pøn ni juuni ja tyeety tø kyakajpxwiji? ⁸ Pøni ka'ats meets ja Dios mgajpxwiji; sami dø'on ja y'unk'y'una'jk ja ttamidøjky, mga'u'nktejpts meets idø'on ja', wenk u'nk meets ja mdijyiyi. ⁹ Nayide'enxi mutskyi ja ndeety ndaak tø xkajpxwijiindi, jøts adøm ja y'ijty øy tsuj nmigajpxyindi, yayits ja y'ana'amin ja yjatundi naaxwiñ. ŁSudsots adøm idø'on ja Dios Teety midin jam tsajpjotp ngagupøjkint ja kyajpxwejin? Pø ja jujky'ajtinxi adøm ja xukpaatwa'animp. ¹⁰ Ja'ayi adøm ja ndeety ndaak xakajpxwejin dip pøni sudso dø'on ja tja'gyukidi ku ja tsinaa'yin tyiyi ya naaxwiñ; kuts ja Dios x'ane'emyindi, tyts ja y'ane'emy, jøts ja' ja xani'ana'amin dip sudso ja wa'ats'ajtin nbaajtint nayide'en sam ja'.

¹¹ Nipøn ja ayo'on tjanchjagatsøky ku ja yikpaaty, janch møk ja yikjawi; pønts ja ayo'on pønts ja kastigi tpaattip, ku wyejti kyajti, ja'ats idø'on ja chinaa'yin tyi tsuj tyikyøødyip, ka' ti, ka' sa, ka'ap ja tsep.

Ja ayo'on ku ja Dios kyajpxy kyayikmimadø

¹² Yikmøpkøti mgø' mdeky pøni tø ja y'anuu'kxyinidi. ¹³ Ixa'adi ja ty'ajtinidi jøts ja mmigu'uk pøn ja yjanchja'win kamøktinim mba'ejxyidit jøts ja kyatuu'tigøødyit, jøts ja jade'en ne'egi yjotmøpkøtit.

¹⁴ Øy tsujim ja mdsinaa'yin xyikyøødyit, tuda'aky ja jaa'y niduki'iyi møøt mdsøønidit; ku wynaty jade'en mgajaa'y'atti sudsots ja Dios x'ejtit, pø ka'axi jadi'iñi nugo ñiyik'ixy ñiyikpaaty. ¹⁵ Yikxonim wanidi, ejxim xka'ukpatnidi ja kyunuu'kxin midin ja Dios pya'ayo'ajtingøjpx mmo'owajnidip, øy ja jade'en tø yja'ukwa'añ ku ja mbudøkyidit; kidim ta'am ujtsin mnabyikta'agyidi midin pa'amdump jøts ni xkayiktsokmi ja mmigu'uk. ¹⁶ Kidi nugo mnamyøøt'atyidi pøni ka'adam ja xniyaa'yidi xnidøøxyidi, tum ja Dios yja' ne'egi mjothm'attip; kidi Esaújin xundi pøn nugo y'u'nk ttaguyajt ja yjagyoobi, tuktesy ja tokx ja'ayi ttagugøøy. ¹⁷ Mnijawidipxi ja nayide'en ku ja Esaú ja tyeety kya'ukmøø'ñiyi ja kunuu'kxin ku ja tja'uk'amidoona; øy ja wynmaa'ñ ja tja'uktayaaxnaa ni sudso ja kya'ukyikmøøña ja kunuu'kxin.

¹⁸ Ka'anin meets idø'on ja Dios myøk'ajtin nayide'en xpaajti sam adøm ndeety'amøj t'ejxti ku ja kojpk Sinai ñitøowyidity. Ni ja xaachkoots meets xka'ijxñim ma ja anaaw ja widsuk adsø'jkibim wyidity, ¹⁹ jøts nayide'en ka' xmadowdwinim ja pujxujx midin yjawi xyiknajtimp ku ja nmado'owint, jøts nika' ja ayuujk tø xmadowdwinim janch møk midin dø'on kyamidanaadyi ja jaa'y jøts yjanuu'kxaknidi, jøts jade'en jya'ukyikmigajpxxidi. ²⁰ Ja agøjpx idø'on ja jade'en ku ja adsø'jkibim ja kutujk yikmøødyi midin wamp: "Pøni pøn yø kojpk tyømpy pyatpy yika'tspa'ookp inet ja', uk yikumba'ookp øyi yjajiyujki." ²¹ Janch adsø'jkibim idø'on ja t'ejxti tuki'iyi, ja sa Moisés paat køø'm wyaañ: "Xjanchyikmibejpnip øts ya'at et."

²² Ka'ats meets, ja Dios kyunuu'kxy'et jade'en tø xpaajti, jabi jotkujki meets ja Dios ja yikjujky'ajtpi y'ø'y'ajtin tø x'ejxi møøt ja y'ankilis kamachooni ²³ pøn ja Dios twin'øøgunajxtip. Tøts nayide'en xpaajti pøn ja Cristo tø tjanchja'wimiyidi pøn ja ñitso'ok'ajtin abaadi awejxnidip. Ja Dios meets idø'on tø xwingunøjxkidi midin dø'on niduki'iyi ttiidyungøxp, jøts ja øyjaa'y'oo'kpi y'anmija'win midin ja Dios jam møøt chinaañidi, nayide'en meets ja møøt ja winmaa'ñ xyikyøøñidi. ²⁴ Jøts ja Jesús tø xpatmidin pøn jam Dios Teety wyingujkpx xkugajpxindip pøn ja ñi'jpy xnitanaa'yindip. Ka' xukpøky'ajtyim ja y'o'jkin, ja maa'kxujkin ja ne'egi yajkpy jøts ka'ap ja Abel y'o'jkin jade'en.

²⁵ Paty idø'on yikxon x'ejxtit jøts ja kyajpxy y'ayuujk xku'oojkidit, pø kuwanixi ja y'ayo'ombaatit pøn jaty ja Dios kyugajpxy tkamimadoodøø. Jawaani kajaats adøm xpaat'ajtant ja ayo'on, pøni ka'ap adøm ja Dios kyajpxy nmadooja'am ku adøm ja tsajpjotp køø'm xjamigajpxyim. ²⁶ Ojts idø'on ja møk ujj ñajxy ku ja Dios kyajpxy jam Sinai kojpkøjpx. Yide'en ixyam ja y'ayuujk wya'añ jadigojk: "Ku øts wynaty jadigojk ja ujj nyikmiñ ka'ap ja naajx ja'ayi y'adøøtst, nayide'enxi ja tsajp y'adøøtsmit." ²⁷ Ku dø'on ja Dios wya'añ ku tyik'adøøtst ja'ayi jadigojk tuki'iyi, ja' idø'on ja tyijpy ku ja tuki'iyi tyikudigøøty midin jaty jawyeen tø tyik'øyi. Ka'ats ja sa yjatttit midin xemikøjpx ja chinaa'yin tø yiktanibiktaagi. ²⁸ Ja'abi øy'ajtints adøm idø'on ja Dios tø xamidsøjkyim, ka'ats idø'on ja ni juuni sa yjatt,

xemikøjxp idø'øn ja y'ett. Paty adøm ja Dios ngajxajkint, jøts øy tsuj nwindso'jka'ant pøni sa dø'øn ja pyaät'aty; jøts pøni sa dø'øn ja tsoky; ²⁹ pø ja' kuxi adøm ja nDios jade'en yikwindigøy sami jøøn.

13

Sudso tsinaa'yingøjxp ja Dios nwindso'jka'ant

¹ Kidim xja'dyigøydi, ejtpim mnachokidit xem yam Cristo køjxp. ² Kidim xja'dyigøydi, jøts ejtp xtøkmo'odit pøn jaty mdøjkjotp ja'ttip, pø mayxi jade'en tø yjatti ku ja jabyøø'kxy ja tyikpoo'kxti, ja Diostam idø'øn ja y'ankilis ja yikpoo'kxtip øy ja tjaganijawidi.

³ Nayide'en ja tsumyjaa'y xja'myatstet ejximdam meets jeexyup mdsummyi. Ja'myatsti pøn jaty ja chinaa'yin tø tkuanjatidi jabi mnija'widixi pøni sa dø'øn ja'abi ayo'on.

⁴ Yikxonim x'ejx'ettit m'amajstk'ajtin jøts øy tsuj mnamyøø't'atidit, tyiidyumpy ja Dios ja wyinaty pøn jaty namyøø't'atidip jadi'ini yam ja tkaniyaa'y'uk tkanidø'øxyi.

⁵ Kidi ja meen ni ja pikta'aky nugo mganadyapikmyo'ojidit; tajotkujk'atti pøni ti jam mmøø't'ajttip pø tøxi ja Dios wya'añ: "Nijuuni me ngaja'dyigø'øty, ni nga'ixmatst." ⁶ Paty adøm nwa'änint jotkujk:

"Ja ndeety'ajtim øts idø'øn xpudøjkp,

ka'ap øts ja ndso'øgit pøni sa xunwa'añ tu'uk ja jaa'y."

⁷ Kidi xja'dyigøydi pøn jaty tø mgajpxwijyidi jøts ja Dios y'ayuujk tø mdukmadøyidi; pawinmaydi sa ja chinaa'yin tø tyikøxti tyikubatti, jøts tundi jade'en sa ja yjanchja'win ja'adi.

⁸ Tu'ugyi dø'øn ja Jesucristo y'ity, nay ja' jekyip, nay ja'ats ixyam, nay ja'ats wyinaty xemikøjxp ejtp. ⁹ Paty idø'øn xkamibøktit pøni ti jaty abiky jøts tigach mjayiktukmadoodip. Dios y'ø'y'ajtingøjpxxi ja anmija'win y'ø'y'aty jøts ka'ap ja ja'agøjxp ku yikpaduñ sudso kya'pxy ja ka'ayin ja uujkin, jabi nijuunixi ya'atpi tsinaa'yin ja øy'ajtin tø tyukpaadyidi pøn jaty ja øy tjanchjabadunip.

¹⁰ Jawaani øy adøm nwindso'jkin jøts ka' mibaat twindsø'jkin'attit ja møjteetywindsøndi pøn ja møjaa'gyutujk tyiktundipnim. ¹¹ Ku ja møjteetywindsøn tyoxti ja jiyujk ni'jpy Amaagyunuu'kxy Tøjkjotp jøts ja pøky wya'atst, kajp pa'am ja jiyujk nine'kx ja tyiknøjkxti jøts ja jam tyiknitøødyi. ¹² Nayide'ents idø'øn ja Cristo kø'øm y'ø'jky kajp pa'am jøts ja naxwiifit jaa'y ttangunuu'kxy ja kyø'øm ni'jpy. ¹³ Wants t'ixmajtsnandi ja møjaa'gyutujk jøts ja Cristo n'anøjxandit, øy ja sa njaguwanjajtandi sam ja yjajty. ¹⁴ Pø ka'axi adøm ya naxwiifit ja tsinaa'yin xemikøjxp nmøø't'ajtyindi, n'ixa'ayindipnimxi adøm ja' midi dø'øn me'empnim ja'atpnim. ¹⁵ Ja Jesucristo adøm ja y'o'jkin xpudøjka'amp jøts ja Dios Teety ejtp nyikjotkujk'ajttint ku ja kyø'øm U'nk ja ndawindsø'jka'ant; jøts nayide'en ja Dios ja n'agaw ja n'ayuujk ndadaxondaajkint. ¹⁶ Jøts kidi xja'dyigøydi ku ja Dios nayide'en twindsø'jkinjawi ku ja mbikta'aky xem yam mnadyabudøkiyidi.

¹⁷ Mimadowdi pøn jaty mgajpxwejidip; pø ja'axi dø'øn m'anmija'win t'ejx'ejttip jøts ñija'widip ja' ku ja Dios ja wyinaty nay ja' tyamachidi. Pudøkidi jøts jotkujk mmøø'tunidit, kidi ayowim xundi, pø ni meetsxi wyinaty jotkujk mgatsøøni.

¹⁸ Ni'amido'ojik øøts, nibøktso'owik øøts, nitixi ngapøkyjawi jøts jade'en øøts ja ndsojkin wya'añ ku ja n'anmija'win wä'ats jade'eñim y'ett. ¹⁹ Tundi may'ajt jøts øts jawaani møk xni'amidoowidit jøts wyinaty nnabyaätkojma'andi tsojk.

Yikyajkp ja kunuu'kxin jøts ja kajpxpoo'kxin

²⁰⁻²¹ Ja Dios Teety, pøn ja øy'ajtin tyajkp, ja' mgunuu'kxidip mguwa'anidip, jøts nwindso'ajtim ja y'o'jkin mdabudøkiyidit jøts øy tsuj mdsøonidit mdanidit jøts ndungøjxindit pøni ti tø xamidsøjkyim. Mutsk borreegi u'ngin adøm idø'øn ja nwindso'ajtim Jesucristo x'ejx'ijtyindi pøn ja ñij'it tyaky jøts ja Dios Teety kyajpxy tø tyik'adujki, pøn adøm idø'øn xkøjø'ømit'ajtimp, øy ja ti xmø'øyint pøni ti jaty ja xamidsojkimp. Øy'ajtin agujkp ja Cristo xemikøjxp y'ett. Jade'en idø'øn ja y'ejxi.

²² Migu'uktøjkti, tuda'aky waani ya'at nøky xpa'ejxtit jøts xja'gyukidit ti dø'øn nda'ana'amdiip. Winmadowdi waani ya'at ayuujk, øy idø'øn yø wine'en kyidyimgyajaa. ²³ Nijawidi ku adøm nmigu'uk Timoteo tø pyuxøjktøjkpidsimy; pøni nabyaajtip øø pojin, nmøøtnøjkxp øts ja wyinaty.

²⁴ Kajpxpoo'kxti pøn jaty m'ana'amidip jøts niduki'yiyi ja janchja'wibitøjkti. Nayide'en mguejxyidi ja kajpxpoo'kxin ja Italiit jaa'y.

²⁵ Mbaattip ja Dios kyunuu'kxin niwine'enin jam mdsøonidi. Jade'en idø'øn ja yjatt.

JA NØKY MIDI JA SANTIAGO YJAAY

Ku ja Santiago tnijayi ja israelit jaa'y pøn tø ñawya'kxniyidi

¹ Santiago'ajtp øts. Øts ja Dios Teety, øts ja nwindson'ajtim Jesucristo nmidumpy. Ixyam mee nnijayi jøts øts ngajpxpøø'kxy niduki'iyi ja israelit jaa'y pøn jaty tø choondi ya jøts tø ñøkxti tsinaabyi abiky tsoo.

Ja wijy'ajtin ja nija'win midi ja Dios yajkpy

² Meets migu'uktøjk, mbaat'ajtip meets ka' ti xkumayjawidit øy yjadyimiyiñ o midi ayo'on. ³ Nnija'windipts ku ja ayo'on ja myiñ, jade'ents ja Dios x'ejxint xnija'wint ku tu'ugyi ja nwinmaa'ñ nyik'ijtyindi, kuts ja Dios amumjoojt njanchja'windit jøts jade'en'ampy ja øy'ajtin ja tuda'aky'ajtin njagyajpindit. ⁴ Øy ka'pxy yikxon mwinma'adyit, winets nayide'en yikxon mwimbidsø'ømxyidit ja m'øwynmaa'ñ jøts xjagyaptit ja ja'gyukin, kidi mwa'andi jøts ku ti mga'ijtxyidi.

⁵ Jøts pøni jats meets winaagin pøn ka'ejtxidip ja wijy'ajtin, ja ja'gyukin, amidowdits ja Dios jøts ja mmo'ojidit, pø ja'axi tuki'iyi tyajkøjxp, ka'ap ja ti t'ama'at'aty jøts ka'ap ja ti tyamigajpxy. ⁶ Ja'ats idø'on tsojkip jøts tu'uk amumjoojt n'amido'owint, ka' nwinmaa'yint majtsk aaw majtsk joojt. ⁷ Pøni pøn jade'en winmaapy, ka'ap ja Dios ja ti y'ukmø'øñiyit, ⁸ ja'agøjxp ku ixyam ti t'uktsøky jøts jabom ja wyinmaa'ñ tyiktigatskojmi, ka' tu'ugyi ja wyinmaa'ñ tyik'ity.

⁹ Jøts pøni pønts ayoop winmaapy, pøn tpaduujnidip ja Dios yja', jotkujk idø'on t'ejxnidit, tyaxonda'aktip idø'on ku Dios nøjx wyaadso'oniyidi jøts ja yiknitso'ok'atidit. ¹⁰ Jøts nayide'en pøni jam pøn kumeeñ'ajtp jøts pøni pyaduujnidip ja Dios yja', jotkujk idø'on ja ñayjawiyidit øy myeeñ ja ygayiktamø'ejxti. Jabi yiknitso'ogidipts ja Dios ja' ku wyinaty twingunøjxkiñidi. ¹¹ Tigøøpy ja kumeeñ jaa'y ja myeeñ ku ayo'on myiñ. Nayide'en ñamyayi yjaty sam ja ujts pijy u'ngin yjaty ku ja xøøw cha'ayiyi jøts ja tyøtskøjxni ja pyijy.

Ku ja ka'øbyi x'amutsk'ejxwa'añindi

¹² Jandaj'akti, winets ja mmø'øyidi ja Dios ja jujky'ajtin midi xemikøjxp, midi ja Dios mdamidsojkiyidip, jade'en'ampy ku ja Dios xtsojkti. ¹³ Ku pøn ñayjawiyi ka'øbyi ttunwa'añ, kyø'øm winmaa'ñ ja yiktump, ka'ap ja Dios yø'øbi winmaa'ñ tyaky; ka'axi ja Dios twinmaa'ñ'aty jøts ja axøøkpi yiktu'unt, jøts nipøn ja jade'en tkawinmaa'nmyø'øy jøts ja jade'en ttu'unt. ¹⁴ Ku pøn jade'en ttunwa'añ ja ka'øbyi, kyø'øm winmaa'ñ, kyø'øm tsojkin ja jade'en pyadundip. ¹⁵ Yø'øbi ka'øwynmaa'ñ, pøky yø'; jøts ku ja pøky yikmøø'aty, ja ø'jkin tigø'øyin ja yajkpy.

¹⁶ Migu'uktøjk, kidi mnawyin'iiñidi; ¹⁷ tuki'iyi ja øyi tsujpi midi nmøøt'ajtyindip, Dios yø tyajkp, tøxi ja tpikta'aky ja jaj ja tøø'kx jam tsajpwemp. Tu'ugyi ja', ka'ap ja tyigach. ¹⁸ Tø ja Dios xmø'øyim ja øy'ajtin midi xemikøjxp ku njanchja'wa'am ja kyajpxy ja y'ayuujk, ja tiiby ja janchpi, ja'agøjxp ja jade'en ttuñ jøts adøm nyiktso'ondak'okwa'anint pøn ja pyabøjkpi'ajttip, sam ja ttamidsøkyin.

Sa yikpaduñ ja Dios yjanchja'win

¹⁹ Paty, migu'uktøjk, njaaknigajpxy jøts tuda'aky mjaa'y'attit. Yikxon xmadow'ettit ja mmigu'uk sa wya'añ, kidi mnay'øøjyidi, jøts kidi mmigu'uk xmi'ambøkti. ²⁰ Nisudso'ampy idø'on ja Dios xkadajotkujk'ajtyindi ku ja mmigu'uk nmijot'ambijkyindi. ²¹ Paty mastu'tutti tuki'iyi midi ka'øy, ja ka'øwynmaa'ñ jøts ja ka'ødyunk. Møj pikta'akti yikxon ja Dios kyajpxy midi tø myiktukmadøwdi; pø yø'øxi tyanitso'ok'attip ja n'anmija'windi.

²² Padundi dø'on pøni sa jaty ja Dios kyajpxy wya'añ, kidi ja'ayi nugo xmadøwdi. Nawyin'øø'ndip nugo ku ka' nbadu'unint. ²³ Pøni pøn jade'en adøøsp, jade'en ja ñamyayi n'ukpiktaajkint ejxim ja jaa'y pøn tku'ejxip ja wyeen ja y'aaw jap ejxjøtpy ²⁴ jøts ku ka' wya'adsi. Ku ñijky, ka' tja'myech jøts wyimbujt. ²⁵ Jotkujk idø'on ja ñayjawiyidit pøn ja Dios kyutujk tpaduujnidip midi xyik'awa'atspidsø'ømimip, ka'ap ja ja'ayi nugo tpatmadøy.

²⁶ Pøni mwandip jøts ja Dios yja' xpaduujnidit, jade'ents nugo mnawyin'iiñidi jøts ka' x'ukpadunidi jade'en. ²⁷ Ja' ja Dios Teety kyupijky ku nbudøjka'ant ja ku'øky'u'nk jøts ja ku'øky'øxy pøn ayoodip, jøts nayide'en ka' nugo nbøkyu'unint ya naqxwiñ.

2

Ka'ap pøn ñay'øy'ejxidit kyanay'øy'ejxidit wan tja'pøni

¹ Meets migu'uktøjkti, pøn jaty tjanchja'widip ja nwindson'ajtim Jesucristo ku ja wa'adsi ku ja myøji, kidi meets pøn x'ø'y'ejxti xka'ø'y'ejxti wan tjapøni. ² N'ukpiktaajkimp tu'uk ja madya'aky, pøni tøjkidip ja jaa'y jap mā meets mnamyukyidi, tu'uk kumeeñ jaa'y janch xyøxy janch wyeti janch ñaamyi, jøts jadu'uk ayoobi jaa'y nipach xipach. ³ Jøts ku ja'ayi øy tsuj xkajpxpoo'kxti, ja' pøn janch kumeeñ pøn janch xyøxy, jøts ja øybi tsinaabyajt xmo'odi, jøts ja ayoobi xkamøjpikta'akti jade'en xnojmidi jøts wan ttani uk najkxijxy chøønit, ⁴ pø yide'en'ampxyi yik'ixy yiknijawi ku tu'uk x'ø'yjawi jøts jadu'uk xka'ø'yjawi. Ka'ap jade'en y'øyi, mbøktuyndip jade'en.

⁵ Ukmadøwdi, migu'uktøjkt, jøts ja'gyukidi ya'at: Ja ayoobi jaa'y pøn ejttip ya naxwiñ, ja' idø'øn ja Dios Teety tø wyi'ijxyidi jøts ja tjanchjawidit ja Dios yja' jøts yikmo'odit ja y'ø'y'ajtin mididi ja Dios ja yjaa'y tyanitanaap, pø tøxi ja ttamidsoyky jøts ja tmo'ot pøn tsojkiyip. ⁶ Jøts meets, jade'en meets ja ayoobi jaa'y nugo xtsø'ødyundi ku xkamø'y'ejxti. Nayide'en meets ja kumeeñ jaa'y mjadu'umiyidi ku myikni'øø'nidi jam kudunk wyindump. ⁷ Yø' nayide'en tka'ødyejtip tka'ønimadyaktin ja nwindson'ajtim Jesus pøn adøm xyikni'tso'ok'ajtinip.

⁸ M'ø'y'adøtsp meets wyinaty pøni mbadundip ja Dios Teety y'ana'amin mididi yide'en wamp: "Tsok ja mmigu'uktøjkt, windsø'øgi ja mmigu'uktøjkt, jade'en xtsokt jøts jade'en xwindso'øgit sã kø'øm mnachøkyi jøts sã kø'øm mnawyindsø'øgyi." ⁹ Pøni jamts meets ja mmigu'uktøjkt x'ø'y'ejxti xka'ø'y'ejxti wan tjapøni, mbøktuyndipts idø'øn jade'en, ka'ap ja Dios y'ana'amin jade'en xpaduujnidi. ¹⁰ Øy ja Dios kyutujk ka'pxy njabadunwa'ãñindi jøts jam tu'uk y'ana'amin kyayikpaduñ, pøkytu'unindipts adøm idø'øn ku ka' ka'pxy yikpaduñ. ¹¹ Nay ja' mididi tyikutujk, jøts yide'en ñiimy: "Kidi mmigu'uk ñiyaa'y ñidø'øxy xpøjki", nay ya'at tyikutujkmaa jøts: "Kidi myikjaa'y'øøky." Øy pøn ja myigu'uk ñidø'øxy ja tjagarøjki jøts ja ne'egi yikjaa'y'øøky, pøkytumpts ja jade'en ku ja Dios yja' ka'pxy tø tkabaduujni. ¹² Øy yikxon ngajpxint ndu'unint sam ja Dios tsoyky, jabi nay ja'abi kutujkxi xiidyu'unimp mididi ja nitso'ok'ajtin nayide'en tyajkp. ¹³ Pøni pønts ja myigu'uk tø tka'ayo'ixy, nayide'ents ja Dios ja nøjkk ka'ayo'ijxyim tyiidyuñiyi; pønts ja myigu'uk t'ayo'ejxp, pyaãtpts ja' ja øy'ajtin ku ja tiidyu'unin ñaxt.

Ja janchja'win jøts ja ødyu'unin

¹⁴ Migu'uktøjkti, çti ja ñiwyala'ant ku ja'ayi nwa'ãñim ku ja Dios njanchja'wa'am jøts nika'ap ja øybi n'ukpadu'una'am? Ka'ap jade'en ja nitso'ok'ajtin nbaajint. ¹⁵ Ku n'ukpiktaajkint ku tu'uk nmigu'uk ti kya'ijtxyi ejxim ja kyaaky ja wyet, ¹⁶ jøts nmimaa'yint: "Mbaãtp ja mwet ja mnaamy ja mji'ikxy", jøts ka' ti nmø'øyint pøni ti yjatsøjky. çTi ja ñiwyala'ant jade'en? ¹⁷ Ku ja Dios njanchja'wa'am jøts nika'ap ja nmigu'uk n'ukpudøjkiña'am, ka'ap ja janchja'win jade'en tyuñ.

¹⁸ Jamts pøn jawamp: "Mets ja Dios mjanchja'wip, jøts ka'ap ja mmigu'uk xpudøki; jøts øts, øy øts ja Dios ngajanchjawi, nbudøjkt øts ja nmigu'uk." Jade'en'ampyts idø'øn ja janchja'win yik'ixy yiknijawi ku nbudøjka'am ja nmigu'uk, kuts ja nmigu'uk ngabudøjka'ant nisudso'ampyts ja Dios jade'en ngajanchja'wa'andi. ¹⁹ Mjanchja'widip meets ku jaa tu'uk ja Dios, øyi jade'en; nayide'enxi ja miku' tjanchjawi ku jaa ja Dios, kyudsøjkipts ja'. ²⁰ Kidi nugo mgujuun'aty, çka' xnijawi ku ja njanchja'win jade'en wyingaxi'iky ku ja nmigu'uk nbudøjka'ant? ²¹ Jade'en'ampy ja n'aptee'y'amøj Abraham ja Dios kyupøjki ku ja tpaduñ sam ja Dios tsoykyin jøts ja y'u'nk Isaac ttamiyoxt. ²² Ja'gyukidi meets jade'en jøts ku ja Abraham jade'en tnanky'ijxyi ja yjanchja'win ku jade'en tpaduñ, jøts jade'en ttuk'abaaty ka'pxy ja yjanchja'win. ²³ Y'abaajt idø'øn jade'en ja Dios kyajpxy ku wya'ãñ: "Ojts ja Abraham tjanchjawi ja Dios, ja'ats ja Dios y'øyja'wiyi'ñ jøts ja ojts tkupiky." Paty ja Dios myigu'ukjawi ja Abraham.

²⁴ M'ejxtip mnija'widip ixja sa ja Dios tkupiky ja jaa'y ku ja tpaduñ, jøts ni kidi ja'ayip tu'ugyi sam ja yjanchjawi. ²⁵ Nayide'en ja ka'ødyø'øxy Rahab ja Dios kyupøjkoø jade'engøjxp ku ja t'ødyuñ ja Dios kyugajpxy; ku tjønmoøy ttojkmøøy jøts abiky tyuu' ttajøpkaxiyi'ñ ku ja myidsep wyinaty pyayo'øyi. ²⁶ Ka'ap jade'en tyuñ ku ja Dios njanchja'wint ku ngabadu'unint sam ja tsoykyin. Jade'en ja tpaaty sam ja jaa'y'øøgyin, ka'ap ja ñine'kx tyuñ ku y'anmija'win kya'uk'ejtni.

3

Sam nugo yø toojts yiktakajpxy

¹ Meets migu'uktøjkt, ka' pyaãt'aty; jøts mee niduki'iyi myik'ixpøkt. Pøn t'ejxtip pøn tnija'widip, ja' ka'pxy tpadundip. Nay jade'ents ja møk yiktabayø'ødyit ku ja ka'pxy tkabadu'undit. ² Tum jade'en ja tundigø'yin yikjagyepy; winaagin ja' pøn katundigøødyip kakajpxigøødyip, ja' idø'øn janch'øy jaa'y ku ja tpaduñ ku ja ñay'ejx'ityiyi. ³ Jade'en'ampyts ja kawaay kyajpxy kyupiky ku ja axots tmøø'taty y'aawjøtpy mididi yikwa'l'øyip, øy mididi'ampy nduknøjxint. ⁴ Ku n'ukwinmã'ayint nayide'en sam tu'uk ja barki yø'øy; øy

janch jamøŋ ja' jøts ja poj ja wyetsmiñi wyetsxøpyi, mutskts ja pujxu'nk midi ja jaa'y yikyø'øpy, jøts ja tyikyø'øpy pøni ma ja ttsøky. ⁵ Nayide'en yø toojts; win'li'nxyip ja' midi xyikajpxigø'øyimp. Jade'en yø' kidim ja jøøn tyøøbyikyin jøts ja tyøømyøji, jøts ja et tyøøyi. ⁶ Jade'en yø toojts ejxim ja jøøn tyøøyin. Yø' amuum xyikma'jtimp ku xyikajpxigø'øyint xyiktundigø'øyint. Miku' yø jade'en xuktu'unimp. ⁷ Yikyujpy ja jaa'y o midi jiyujk, wan tjøoni wan tsa'a'ñi jøts ja' midi tsinaadyip mejyotp. ⁸ Ka' pøn mibaat jade'en ja toojts tmimada'aky, tundigøøpy yø nugo. ⁹ Nayi toojts xyikajpximp ku ja Dios nja'myejchim n'ajot'ajtyim, nayø'øts ja nmigu'uktøjk xukmigajpxigø'øyimp, Diosts jade'en ñamyayi nmigajpxigø'øyimp ja y'agojnajxy midi kø'øm tø tpikta'aky. ¹⁰ Nayi aawjøtpy pyidsimy ja øgyajpxy tsujkajpxy, jøts nay jaayi pyidsimy ja axøøkajpxy. Migu'uktøjk, ka'ats idø'øn jade'en yjapaat'aty. ¹¹ Ku n'uk'ejxint ma ja wa'ats nøø pyidsimy, tu'ugyixi ja wya'atsnøø'aty, ka'ap jam ja tya'mtspi, ka'ap jam ja pya'akpi. ¹² Migu'uktøjk, çm'uk'a'ejxip meets tyøømit jam iigi kipkyøjxp ja wenk tsa'am? Ka'axi mibaat nayide'en ja nøø pyidsimy jam nøømu'tjotp ja tya'mtspi ja pya'akpi.

Ja ja'gyukin midi ja Dios yajkpy

¹³ Pøni jap pøn tnmadøy tñijawi, wan tñanky'ijxyi sa ja y'øy'ajtin ja y'øyjaa'y'ajtin, wan jade'en ja ja'gyukin tyiktuñ jøts ka' ñamyikaxit. ¹⁴ Pøni ja meets ti mnadyami'ama'at'atyidi ku nugo kø'øm jade'en xwinmaa'ñ'atti, ka' ja ja'gyukin jade'en xnanky'ijxyidi, taay yø jade'en pyidsimy. ¹⁵ Ka'ap ja Dios jade'en xuknija'wim jøts jade'en n'adøøjtsint, ja' jade'en adøøstip pøn ka'øyjaa'dyi ku ja miku' jade'en tyuktuñidi. ¹⁶ Ma y'ity ja windi'ñ'ajtin jøts ja nadyami'ama'at'ati, nu jam y'ity ja tsep jøts o ti axøøk'ajtin. ¹⁷ Pøn ja ja'gyukin ja Dios møøjyip, ja'ats øyjaa'y'ajtip, wa'ats chinaa'yin ja tyiknaxti; ka'ap cheptundi chepkajpxti, myøøt'ajtip ja tuda'aky'ajtin jøts ja ja'gyukin. Tsaach'ejtip jøts ja øy'ajtin ttundi; ja myøkwinnmaa'ñ pyadundip, ka' twindaay'atti ja wyinnmaa'ñ. ¹⁸ Pøn tja'gyukip tkajpxkukip, ja'ats ja øy'ajtin ttukpatp ja myigu'uk.

4

Ka' nminamyaa'yint ja ka'øy'ajtin midi yq naxwiin

¹ çMa chøøñ ja tsep ja aka midi mdundip? Kø'ømyi xyiktso'onda'akti ku ti mnadyami'ama'at'atyidi. ² M'animpmy m'adsøjkpy pøni ti mmigu'uk myøøt'ajtpy, kuts ja xkapaati winets ja tsep xyiktøkidi, jøts jade'ents ja mmigu'uk xyik'ookti. Ka'ap agujk jotkujk m'etti ja'agøjxp ku ja Dios xka'amidowdi xkabøktsowdi midi mdsojktip. ³ Pøni m'amidoodip mbøktsoodip jøts ka' myikmo'odi, jade'engøjxp ku øy ka'øy x'amidowdi jøts xyiktunwa'andi nugo ma ka' pyaat'aty. ⁴ çMeets mga'øwynmaadyip! çTi kidi meets xnijawi ku øy møøt nnayja'win ja' midi ja Dios kyatsøjkpy, jade'en ampyts idø'øn adøm ja Dios nmidsepøjkna'am jøts nga'ukja'myajtsna'am? ⁵ Yide'en jap nøkyijxy wya'añ: "Øy xtsojkanajxyim ja Espiritu Santo midi ja Dios xukmi'ejtimp jøts ka' t'øyjawi ku wenkpi nbadu'unint." ⁶ Dios ne'egi xmay'ajtimp xpudøjkimp sam ja kyajpxy ja y'ayuujk yide'en wya'an: "Myi'ambijky ja Dios pøn namyøjpiaktaajkiyip; pønts tuda'aky'ajtp øy'ajtp, pudøjkijyipts ja Dios ja'." ⁷ Amumjoojt mnadyamiyoxidit ja Dios. Møk windanidi ja miku' jøts mniwag'adsiyidit. ⁸ Wingunøjxidi ja Dios jøts ja ne'egi mnimeniyidit. Yikwa'atsti ja mbøky, meets, ku nugo ja Dios majtsk'aaw majtskjoojt xtsokti, ku xpadundi nayide'en ja ka'øybi. ⁹ Jotmay'ookti, taya'axti ja mbøky. Kidi jotkujk mnayjawiidi ku tø mbøktynidi. Yikmendi ja mwinmaa'ñ jøts xjagyaptit ja jotmay. ¹⁰ Nabyikta'agidi yik'ayowim nwindson'ajtim wyingujkp, jade'ents ja ñitso'ok'ajtin ja møj mmo'ojidit.

Ka' nugo nbayø'øyint ja nmøøtjanchja'wibi

¹¹ Meets migu'uktøjk, kidim mnabyagajpxyidi nidu'uk ja nidu'uk. Pønts jade'en pagajpxp, pønts ja myigu'uk jade'en tpøky'ejxp, ja Dios ja kyutuujk ja jade'en wyindsojip ma wya'añ jøts ku ja nmigu'uk ndsojkit, ttiydumbits ja ne'egi nugo ñabyikta'agy jøts ni tkabaduñ kø'øm ja kutujk. ¹² Tu'ugyi ja' pøn ja kutujk tmøøt'ajtp, nay ja'ats xpayø'øyimp, ja'ats nayide'en xyiknitso'ok'ajtimp, nay ja' xyikwindigø'øyimp. çMbøen mets ku xpøkpyayø'øwya'añ ja mmigu'uk?

Ka' yiknijawi pøni ti memp jabom wixøjkp

¹³ Ukmadowdi meets sa x'ukwinmaydi: "Jabom wixøjkp njaa'mint abikyajp jøts jam tukjumøjt n'ejtint. Najxint ndøjka'ant, jamts ja meen jade'en nbaajtint", ¹⁴ nipøn tkanijawi pøni ti memp kidakp jabom wixøjkp. Jade'en adøm n'ijtyindi ejxim ja yoots n'ejxint, jøts nay jaayi n'ejxint, tø tyigøøgyojmi. ¹⁵ Yide'en ne'egi mwa'andit: "Pøni xpudøjkimp ja Dios, winets jade'en ndu'unint pøni ti jaty ndunwa'añimp." ¹⁶ Meets ja mgø'øm winmaa'ñ mee myiktunwampy jøts ja namyikaxi; ka'øyts idø'øn yø jade'en pyidsimy. ¹⁷ Pøn wa'ats tjanija'wip jøts ja ka'pxy tkabaduñ, pøktyndipts ja jade'en ne'egi.

5

Sa ja kumeeñ jaa'y yikajpxwejt

¹ jMadowdi meets kumeeñ jaa'y! Mdaya'axtip ja mwinmaa'ñ ku ja ayo'on xpaattit x'ejxtit. ² Tuki'iyi ja mjujky'ajtin jadi'iñi pyutskøjxnit jøts ja m'øybi wet ja m'øybi naamy ja kipkyaa'tspi jadi'iñi tyikwindigø'øty. ³ Towigyøjxp ja oori ja plati midimøøt'ajttip, jade'ents idø'øñ m'ukyik'ejxtit m'ukyiknija'widit ku møøt mwindigø'ødyit ja mbikta'aky. Tøxi ja mgumeeñ'ajtin øy xpaatti, wingompxi ku ja tiidyu'unin mye'ent. ⁴ Ja kamdumbi pøn tø xkamijuudyi, ja' myiktabayø'ødyip. Wa'ats ja nwindson'ajtim ja t'ixy tnijawi ku ja mdumbi jade'en xkamijuudyi. ⁵ O meets ya naxwiin jotkujk xyiknaxti, o ti kø'øm tø mnadyamay'atyidi, wingompts ja xøøw ku ja tiidyu'unin mye'ent. ⁶ Tø ja xmidundigøydi pøn ti tkatump pøn ti tkanija'wip, jade'en idø'øñ ku nugo tø xpayø'ødyi jøts xyik'ookti ku ka'ap ja møk'ajtin tjagyapti.

Ja tuda'aky'ajtin jøts ja dios'ajot'ajtin

⁷ Meets migu'uktøjk awejxti tuda'aky, kunim ø nwindson'ajtim mye'ent, nayide'en sam ja kamdumbi tuda'aky t'awixy ja tuu jøts ja pyikta'aky tøkmukt. ⁸ Nayide'ents meets x'awejxti tuda'aky, kidi nugo mjetigøydi, wingomp jøts mye'ent ja nwindson'ajtim Jesucristo. ⁹ Meets migu'uktøjkti, kidi nugo mnagyajpxyidi mnay'øjyidi jøts ka' myikpayø'ødyit; wingompxi ja Dios pøn ja naxwiin'ñit jaa'y tiidyunidip. ¹⁰ Migu'uktøjkti, windanidi ja m'ayo'on nayide'en sam ja Dios Teety kyugajpxy twindanaay ja yja'. ¹¹ Jotkujk ja'adi pøn tø tyiknaxti amumjoojt ja y'ayo'on. Pø tøxi xnijawidi sam ja Dios kyugajpxy Job ja ayo'on t'ijxy, jade'ents ja øy'ajtin ja Dios myøøjyi; x'ayo'ejximpts xpudøjkimpts ja Dios jade'en.

¹² Meets migu'uktøjk, yø' mdu'undip ku ti xkajpxtit ku ti xu'undit, tiy'ajtin mgajpxtip. Kidi nugo xuk'ejxti ja Dios ku nwa'anint "Tiy ja'", tiy'ajtints ja'; kuts nwa'anint "Ka'ap ja tyiy'ajtin", tyimwya'animpts jade'en ku ka'ap tyiy'ajtin, ka'ats ja Dios jade'en xpayø'øyint.

¹³ Pøni jam pøn y'ayøy wyinmay, wan ja Dios t'ajot'aty. Pøni pønts agujk jotkujk tyiknajxp, wants ja t'øwdi ja kunuu'kxy ayuujk. ¹⁴ Pøni pøn pøjkip, wants ja twaadsøy ja møjaa'dyøjk pøn tundip tsaptøjkjot, jøts ja kyugajpxidit jøts aceite tpiakta'aktit nwindson'ajtim køjxp. ¹⁵ Ku amumdu'uk t'ajot'attit ja nwindson'ajtim, tso'okpts ja pamaa'y. Pøni tø tyundigøy, yikpojkipimaa'kxpts ja'. ¹⁶ Paty nayide'en mnadyamimayatsidit ja mbojkipi nidu'uk ja nidu'uk, jøts ajot'atti ja Dios pøni pøn pøjkip jøts cho'okt. Pøn øyjaa'y'ajtp jøts amumjoojt ja Dios t'amido'ot tøktsø'ot, jade'ents ja Dios myøk'ajtin myajada'akt. ¹⁷ Ja Dios kyugajpxy pøn txøøw'ajt Elias nayide'en ja y'ijty sam adømin; ku ja Dios ja t'amidøøy jøts kyatu'ut, winets ja tuu kya'ukmenaa tigøøk jumøjt jagujkp. ¹⁸ Jøts ku jadigojk t'ajot'ajty ja Dios jøts tyu'ut, xjats myiin ja tuu jadigojk xjats ja pikta'aky y'øiyii'ñ.

¹⁹ Migu'uktøjkti, pøni jaa pøn tka'ukpaduni sam jawyeen tø t'ukpaduñ, jats ja' pøn ja nayide'en tukpaduniyip, ²⁰ mnijawidipts nayide'en ku tø tyiknitso'ok'aty ja mmigu'uk y'anmija'win jøts yikmaa'kxtit ja pyøky.

JA MYÏDU'UKPI NØKY MIDI JA PEDRO YJAAY

Ku ja Pedro tnijayi ja janchja'wibitøjk pøn tø ñawya'kxniyidi

¹ Øts idø'øn Pedro nxøw'ajtpy, øts ja Jesucristo ngudanaapy. Ja' ø tø xkexy xjats øts ya'at nøky yam nja'ay, jøts meets ndanijayi wine'enin jam muum abikyajpkøjxp mdsinaañidi, ku jam tø mgakwa'kxniidi mgajpkøjxp jøts jam tø mnøjkxti jam Ponto, jam Galacia, jam Capadocia, jam Asia jøts Bitinia. ² Tøyip meets ja Dios Teety mwi'ejxniyi jøts ku meets ja m'u'nk'atyyit sayim ja tniwinma'ayiyii'ñ. Yø Espiritu Santo meets ja mdabudøjkiyip, jade'en'ampyts meets ja Jesucristo yja' xpaduunniyi ja'agøjxp ku ja tø myikwaajtsiyidi ja mbøky, pø adømxn nbøky ja xkubajta'am ku ja chuun tyajxy. Dios mjanchkunuu'kxidip jøts øy tsuj xyiknaxtit.

Ja tsinaq'yin midi awejxngøjxp nyiknajxyimp

³ Tkajxajkyim ja Dios Teety pøn ja nwindson'ajtim Jesucristo tyety'ajtpy, ku ja xjanchpa'ayø'yindi jøts ja jadigojk xukpaajtyin ja jujky'ajtin xemikøjxp. Xjats ja jade'en tø xja'bijkyyindi jøts ja xukjøp'ixyindi amumjoojt ja'abi jujky'ajtin, kumi tø ja Jesucristo ttunjøpi ku ja y'ø'jky ku ja jadigojk pyidsimy jujky'ajtpi xemikøjxp. ⁴ Paty tu'ugyi njøp'ejxin jøts ku ja Dios ja myaay xmø'øyim, pø tøxi ja t'a'ejxi jap tsajpjøtpy pøni ti ja xmø'øwya'animp midi tum øy, midi nisä kajajtp. ⁵ Jøts kumi m'ajot'ajtpy meets Dios amumjoojt, jade'ents meets ja myø'ajtin ja mdabudøkiyi kunim meets ja jujky'ajtin xtyimbyaatt midi xemikøjxp, jøts jaanim ja tnanky'ejxit wiingybety ti jaty ja jap tø t'a'ejxi.

⁶ Paty meets idø'øn ejtni xoni m'ett øy idø'øn ixyam xjanchjagu'ayo'ombaadi yø'øbi winmaa'ñ. ⁷ Nayide'enxi dø'øn ndamija'gyukin ja m'ajot'ajtindi sam ja oori: kuwanimxi net ja jaween y'atswidø'ty winets ja yik'yixnim pøni janchtyimy'øbyujx idø'øn ja'. Nayide'ents ku ja janchja'win møk nmøøt'ajtin ku ja tmimajadakixy ja ayo'on pøni sa ndyimy-jagujajta'am ja øwynmaa'ñ, ja'ats idø'øn jawaani tyimy'øy pø ka'axi ja jade'en wyindigøø sam oori. Jade'en meets ja mjanchja'win yikmøk'ixy ku xmidanaagyøxtit ja ayo'on, ja'ats mee myiktagupøkp, nay ja'ats mee myiktawindsø'øgip myiktamøja'wip jam nwindson'ajtim wyingujp ku ja jadigojk ñankñigaxø'øgyit.

⁸ Mwampy mdsøjkpy meets ja nwindson'ajtim Jesucristo, m'ajot'ajtpxi meets ja' øy meets ja xjaga'ixxim, patyts meets xmøøt'aty ja kunuu'kxin, ⁹ jøts ku xnijawidi ku ñitso'ok'atti ja m'anmija'widi xemikøjxp; jats idø'øn m'ajot'ajtin tyundi, jade'en idø'øn ja wyingaxi'iky.

¹⁰ Tøyip Dios Teety kyugajpxy tpamaydi tpadajti yø'øbi nitsoojkin ayuujk, jøts tniqajpxti jøts ku meets Dios y'ø'yajtingøjxp mmo'owa'añiyim yø yjade'emi. ¹¹ Ja Espiritu Santo midi ja Cristo tkajxp, ja' ja kugajpxy ttukmadoojidøø sa jaty ja Cristo yiknitsokpi wyinaty yjatwa'añ ku ja y'ayo'ombaatt, jøts sa nayide'en yikwindsø'øgit yikwinjawit. Ja'ats ja nugo pyamaadyip pyadajtip ja tyimy'okpøn idø'øn ja' jøts juunim idø'øn ja yjatyimy'ukme'ent ku ja Espiritu Santo ja jade'en tyukmadøyidi. ¹² Ku ja Espiritu Santo ja jade'en tyukmadøyidi jøts ku ja ka' tpaattit t'ejxtit midi wyinaty ttunwajnip, adømmimts inet ja ixyam nbaajtyim n'ijxyim jøts ja myiktukmadowdi ja nitsoojkin ayuujk nayide'en sa jaty ja Espiritu Santo ja tø tyuknijawiyidi pøn jaty kajpxwa'kxtip jøts ku dø'øn ja jade'en tø yjaty. Ankilis paat ja tjantyimy'ejxwa'andi tjantyimñijawiywa'andi sudso'ampy adøm nnitso'ok'ajtyindi.

Xwaaadso'ojimp ja Dios jøts ja ndsinaq'yin wa'ats tsuj nyiknajxint

¹³ Paty øy jawyeen xwinma'adyit ku ti xunwa'andit, kidi møj kamøj o ti xjawidi, jade'ents mdsinaq'yin øy xyikyø'ødyit. Amumjoojt meets ja Dios y'ø'yajtin ja kyunuu'kxin xjøp'ejxidit midi ja yakwampy ku nwindson'ajtim Jesucristo mye'ent jadigojk. ¹⁴ Madowdi, jade'en mmado'odit sam jaa'y y'u'nk myimadøyin. Kidi jade'en m'uktsinaañidi sa y'ijty mga'øchøøniidi ku Dios wyinaty ka'anim xpabøjkidi ja yja'. ¹⁵ Øy tsuj mjaa'y'attit jøts jade'en x'aduunaxtit ja Dios Teety wya'ats'ajtin y'ø'yajtin, pøn idø'øn tø mwi'ijxyidi; ¹⁶ pø yide'enxi jap nøkyjxy wya'añ: "Øy tsuj mjaa'y'attit sam øtsin, kumi ka' ø nbøkmøødi."

¹⁷ Pøni mdeetyja'wip meets ja Dios Teety, windsø'øgip meets idø'øn ja ejtp, pø ja'axi ka'pxy tiidyyu'ump sa pønjabøn ja chinaq'yin tyikyø'øy, ka' pøn ja tiidyyu'unin tkapaatt. ¹⁸ Jabi ja Dios Teetyxi meets tø mduknitso'ok'atyidi ja ka'øchinaq'yin midi adøm ja n'apteety'amøj tø tpa-mendi tpaabatti; mnija'widipts wa'ats jøts kidi oorip tlatip ja yiktaguayajkip, windigø'y'ejtpxi yø'. ¹⁹ Ja' ja yiktaguayakiyii'ñ ku ja nwindson'ajtim jade'en wyidsuun wyidajxy, øy ja niti pøky tjagamøødi sam ja borreeg'u'nk y'ijty yiktamiyøxy ja Dios Teety. ²⁰ Windi'ixyip ja tanibiktaagi y'ejtni, namga'anin ja naxwii'ñit cho'onnda'aky, xjats ja yannim tø myiñ ku kyøjxwa'añ ja naxwii'ñit jøts ja xa'ødyøkidit ma ja Dios Teety. ²¹ Ja nwindson'ajtimgøjxp meets ja Dios Teety xpabiky midi tø tyikjujkyiky jadigojk xemikøjxp; jade'en'ampy ja tø

tmø'øy ja myøk'ajtin, ja kyutujk, jøts ja njanchja'win amumjoojt, jøts tu'ugyi njøp'ejx'ejtin ja Dios.

²² Jade'ents ja m'anmija'win wa'ats y'etti ku ja Dios tyiy'ajtin xmimadojidi mididi ja Espiritu Santo xuknija'windip. Jade'en'ampyts mnabya'ayowidit, tsokti, wa'andi ja mmigu'uk sa Dios ttsøkyin. ²³ Jade'en idø'on tpaaty, tø meets jadigojk mga'axigach, ka' meets ja ñamyayi x'ukteety'ajtni ja jaa'y mididi ook'tip tigøødyip, ja Dios meets ja kyajpxy tø myikjujky'atigachidi mididi nijuuni sa kajajtp. ²⁴ Kumi nømp ja':

Jade'en idø'on naxwii'ñit jaa'dyi sam o ti ujtšin,

jøts ja tyunk jade'en sam ujtšpijy mididi ja tyiknigaxø'kp.

Paty tuki'iyi wyindingøy, ti tuktamp ku ujtš tyi'ich, pø nayide'enxi ja pyijy wyindingøy;

²⁵ jøts kuts ja Dios ja kyajpxy, ejtp ja xemikøjxp, ka'ap ja kyudigøy.

Yø øgyajpxy yø ømyadya'aky mee myiktukmadoop.

2

¹ Paty x'ixmatsttit tuki'iyi ja mga'ødyu'unindi, ja mga'øwyinma'andyi, wine'en mwìn'øø'ndi, wine'en o ti mnadyawindaay'atyidi, wine'en x'ama'at'atti, xka'ødyejti, xka'øbyikta'akti pøngapøn. ² Nayide'en sam tu'uk ja ma'xu'nk ñamgaxi'iky jøts ja chetsk tsojk mabaadyim tpaatwa'añ, jade'ents meets idø'on xtsoktit ja Dios kyajpxy y'ayuujk, mididi øy mididi wa'ats, jøts jade'en ja mjanchja'win myiweni'adø'øtsttit, jøts ja nitso'ok'ajtin xpaattit, ³ pøni tødäm idø'on xjanchnijawidi ku ja nwindsøn'ajtim yja' y'øyi.

Ja Cristo dø'on ja xemikøjxpit jujky'ajtin tyajkp

⁴ Mbaattip m'ejxtip ja nwindsøn'ajtim Jesús, yø' xyikjujky'ajtimp xemikøjxp, jade'en ja myøk'ajtin tjagyepy ejxim tu'uk ja jønts tsaajin. Jats may pøn tkatsojkip pøn tkaja'gyukip, tøts ja Dios Teety yø twi'ixy jade'en ejxim ja pojtsi ja øybi tsaä twi'ixy mididi yiktunwampy. ⁵ Nayide'en meets sam ja pojtsi ja øybi tsaä twi'ixy mididi yiktumpy ku tsaptøjk tyik'øyi. Jade'ents meets ja Dios Teety myiktunwa'añiyi jøts xpaduujnidit ja yja' ku ja amuum mnadyamiyoxidit jøts ku nayide'en ja mbikta'aky xamiyoxtit, ja' idø'on ja jade'en mdawindsø'øgidip, jøts ja Dios Teety xkupøjkidit ku jade'en ndu'unindit Jesucristo køjxp.

⁶ Paty ja Dios kyajpxy wya'añ:

Nbiktakpy øts jam Sion jade'en tu'uk ja ejxpajt ejxim ja tsaä ma pøch cho'onda'aky, tu'ugyits ja yikpa'ext jade'en;

pøn ja tpadump jade'en, ka'ap ja wyinguwopi yjøpkuwopi, pyaätp ja øy'ajtin ja'.

⁷ Pøn yø tmøja'wip tjanchja'wip, møj yø', yø' xyiknitso'ok'ajtimp; pønts tkamøjpiktakp, pøn tkajanchja'wip jatyi, jatpts idø'on ja yide'en sam ja Dios kyajpxy wya'añ:

Ja tsaä mididi ja pojtsi kya'a'ejxip tyiktunwa'añ,

ja'ats ne'egi ja Dios tø t'a'ejxi jøts ja ne'egi yikxon tyiktuñ.

⁸ Xjats nayide'en ja Dios kyajpxy wya'añ:

Jade'en yø', ejxim tu'uk ja tsaä mididi ja jaa'y tyagidaapy.

Jade'en yø yjatti wyinguwopidi yjøpkuwopidi ku tkabadundi ja øy ayuujk mididi ñigajpxy ja nwindsøn'ajtim yja'; jade'en ja Dios tø ttanibiktaagi jøts jade'en yjattit.

Pøn ja Dios ja'ajtyidip

⁹ Tum ja' meets pøn ja Dios tø wyi'ijxyidi, meets mmidumpy ja nwindsøn'ajtim Jesucristo yja', jade'ents meets wa'ats mjaa'y'atti jøts tu'ugyi ja Dios mja'atyidi pøn ñiwindsøn'ajtpy ja tsajpjøtpit jøts naxwii'ñit, ja'agøjxp jade'en tø myikwi'ejxti jøts xkajpxwa'kxiti xkajpxyø'ødyit sa ja Dios janch øy janch møj. Nay ja'ats ojtš øy tsuj myikujajtaajkidi myikudø'kxaajkidi ku y'ijty m'etti agootstujp. ¹⁰ Ka'ap meets ja Dios y'ijty m'u'nk'atyidi, ixyamts meets ja mja'ajtniyidi. Ka'ap y'ijty pøn mba'ayøyi, mba'ayojidipts ja Dios ixyam.

Yikxon xpadu'undit ja Dios

¹¹ Meets migu'uktøjk, tøg'ayø'øbyi adøm n'ijtyindi ya, tsajpjøtpy adøm ngugajp'ajtyindi xemikøjxp paty mee mwøk nminuu'kxa'aky, kidi xyikmajada'akti ja ka'øyjaa'y'ajtin mididi tmimada'akwamp winjaa windsojk ja anmija'win. ¹² Jagyapti ja tuda'aky'ajtin ja øyjaa'y'ajtin ma pøn ja Dios tkanijawinim. O meets ja wine'en mjabagajpxyidi jøts mee myiktijy ka'øyjaa'dyi, kuts t'ejxti ku tnijawidi ku tsuj mjaa'y'atti winets ja Dios ja twindsø'øgidi twinjawidi jøts jade'en ja nitso'ok'ajtin tpaattit ku wynaty ja tiidyu'unin xøøw yja'aty.

¹³ Ja nwindsøn'ajtim Jesús køjxp xkupøktit xmimado'odit ja kudunktøjk jøts ja møj windsøn, ¹⁴ jøts ja tyumbi nayide'en mididi tpayø'øpy ja tundigøøbyidi ja kajpxigøøbyidi, mididi'its øyjaa'y'ajttip tuda'akyjaa'y'ajttip, ja'ats y'øyja'wip. ¹⁵ Jade'ents ttsøky ja Dios jøts øy tsuj mjaa'y'attit jøts jade'en xyik'amo'ondit pøn nugo agubojidip, pøn tkanija'widip.

¹⁶ Tø meets ja øy'ajtin myikmøøñidi, jøts ka' ti nugo ajawi mmimajada'agidit. Ka' mwa'andit jøts øy sagasa m'adøøtsnidit ku ja øy'ajtin tø xpaatti. Ja' tu'ugyi mbadu'undip midit ja Dios ñi'ane'empy. ¹⁷ Windsø'øgidi winjawidi niduki'iyi sam pya'at'atyin. Tsokti ja mmigu'uktøjkti pøn nay ja'abi janchja'win pyadundip midit meets, windsø'øgidi winjawidi ja Dios, jøts nayide'en ja windsøndøjk kudunktøjk.

Ja eixpajt midit ja Cristo tø xmo'øyim ku y'ayo'ombaaty

¹⁸ Tumbitøjkti, kajpxkyupøjkøjkti niti jot'aka ja mwindsøndi, wan tja'awa'anidi tka'awa'anidi, wan ja tja'gyukidi tkaja'gyukidi. ¹⁹ Jabi øyxi ja' ku ja Dios tuki'iyi xamijawidit ja m'ayo'on ku myikjemdundi myiktedundi niti pøkyøjxp, paty ja amgujk jotkujk xmidanidit. ²⁰ Ku meets xku'ayo'ombaattit o ti o ma øy tsuj tø xkayik'øyidi, çti øy'ajtin meets idø'on mdsaa'chpaatp? Kuts meets øy tø mjatun jøts kuwanim myik'ayo'ombaadyidi pøn m'ana'amidip, ya'at idø'on ja Dios y'øyja'wip ku meets tuda'agyi xkupiky'aty ja ayo'on. ²¹ Paty meets ja Dios tø mwaa'dsøyidi, jabi tøxi Cristo y'eixpajt tyiktañ ku y'ayo'ombaaty niti akikøjxp jøts meets ja xpadu'undit jade'en. ²² Niti pøky ja tkatuñ, niwindem xøøw ja jaa'y ja tkawindaay'ajty; ²³ ku ja y'ijty yikm'akikajpxy, ka'ap ja nayide'en y'adsøy; ku ja y'ijty tyik'ayo'ombaatti, ka'ap ja tmidsepiky pøn jade'en tuujnidip. Dios Teety ja ne'egi tyani'ijky ja ka'pxy tiidyunk. ²⁴ Kø'øm idø'on ja Cristo adøm ja nbøky tuki'iyi tku'o'jkigyixy jam kruskøjxp, jøts ka'ap adøm nyikmø'ajtant ja nbøky jøts jade'en øy ty ja ndsinaa'yin nyiknaxjint. Pyaajt ja tsaa'chi'ajtin ja', jøts adøm jade'en nniitsoojkindit. ²⁵ Jabi jade'enxi y'ijty sam ja borreegi tyigøyin, tøts meets jadigojk xniwimbity ja nwindson'ajtim Jesucristo pøn m'eix'ejtidip jøts pøn ttunk'ajtp ja m'anmija'windi.

3

Sa dø'on pya'at'aty chøønidit ja amajtsk jaa'y

¹⁻² Jade'en meets tø'øxyøjkti, kajpxkyupøkti ja mgø'ømniyaa'dyi jøts xuk'ejxtit xuknijawidit ja ty'ajtin ku meets ja mjaa'y'ajtin tuda'aky xyiknaxy. Jats idø'on winaagin ja yaa'dyøjkti pøn tkagupøjktipnim ja øyajpxy ja ømyadya'aky, ja'ayi meets ja jade'en xukupøktit mjaa'y'ajtingøjxp, niti kajpxy niti madya'aky. ³ Jøts ka'ap meets ja mdsuj'ajtin xmijatt xmi'ookt midit ja'ayi nikixxy kaxø'kp ku tum ja oori, tum ja wimbatjaaxxy wimbatwøøky, jøts tum ja tsowibi wet xjotmay'attit. ⁴ Jabi wa' tsuj'ajtinxi meets idø'on ne'egi myiktu'ump midit m'am mjoøjtp yik'øyjaa'y'ajtp, ja'abi midit kawindigøøpy. Janch øy ñaxy idø'on ja jam Dios wyingujkp. ⁵ Jade'ents idø'on y'ijtyip ñajxmi ja tø'øxyøjkti pøn ja Dios yja' tpadundip ku ja nayide'en tmøøt'ajtti ja tuda'aky chinaa'yin. Yjanchja'widip idø'on ja Dios ja y'ijty jøts ja ñiyaa'y tuki'iyi tkajpxkyupøjkidi nayide'en. ⁶ Jade'ents idø'on ja Sara yjaa'y'ajty, tuki'iyi tkajpxkyupøjkixxy ja ñiyaa'y Abraham, jade'en ja tpi'kta'aky sam tu'uk møj øy windsøn. Pøni øy meets mjaa'y'aty, nayide'ents meets idø'on xu'unt sam ja Sara tø tjøøptuni jøts jade'en ja mniyaa'y xkatsø'øgidit.

⁷ Nayide'en meets yaa'dyøjkmi, ja'gyukidi ja mnidø'øxyti, windsø'øgidi sam ja pya'at'atyidi. Kidi meets ja xamø'jaty ku ja nayide'en kyamøkidi sa meets, jabi nay ja'abi øchinaa'yinxi dø'on ja Dios tø myø'øyidi midit meets tø xpaaty y'øy'ajtingøjxp. Tundi jade'en, jøts ka'ap ja Dios mgamo'ojidit midit jaty m'amidoodip mbøktsoodip.

Ku ja øy'ajtin yiku'ayo'ombaaty

⁸ Jade'ents idø'on xyiknaxtit ja mdsinaa'yin: øy tsuj mnachokidit sam tu'uk jaa'yin, nabya'ayowidi nixem niyam jøts xyiknigaxø'øktit jade'en ja mduda'aky'ajtin. ⁹ Kidi meets ja kya'øybi nayide'en nyikwimbity jøts ja mmigu'uk xuk'ayojiwya'andt ja ka'øgyajpxy ja ka'øy'ayuujk. Ni'amidowip meets idø'on ja ne'egi ja kyunuu'kxin, pø ja'axi adøm tø nyiktaniwaadsø'øyim jøts ja Dios kyunuu'kxin nbaajtindit. ¹⁰ Jabi yide'enxi dø'on ja Salmos wya'añ:

Pøni pøn idø'on øy tsuj ja xøøw ja tsinaa'yin yiknaxwampy, y'eix'etp idø'on ja tyoojts ja', jøts ja yigaappi y'axøøkpi ja tkakajpxt jøts ja y'aaw tkadataay'att.

¹¹ Paat'ajtp idø'on ja t'ixmatst ja yigaappi jøts ja y'øybi chujpi tpadu'unt ne'egi, y'ixa'ap idø'on ja øy'ajtin jøts tuki'iyi tpanøjkt.

¹² Jabi Dios Teetxyi idø'on t'eix'etp pøn øy jaa'y'ajttip jøts nay ja' tmadø'op ja tsapakajpxy,

ka'ats idø'on ja møøt ñamyayi pøn ja y'axøøkpi yigaappi yikmajadaktip.

¹³ Pønts meets idø'on ndejint mdamidsepwa'aniyidip ku ja y'øybi chujpi xunwan'ettit?

¹⁴ Pøni jats pøn wyinaty mjanchtuku'ayo'ombaadyidi ku ja y'øybi xjatu'undit, øyjawidi kunuu'kxyjawidi meets idø'on ja ne'egi, jabi møjxi ja Dios y'øy'ajtin tyikwimbeyntit. Patxyi meets idø'on niti nipøn xkatsø'øgidit, ¹⁵ nadyamiyøxyidi ja Cristo pøn adøm nwindson'ajtyimp. Awejx'et meets idø'on ja', ku pøn tyiknidøøwit tiku xpaduñ ja

mjanchja'win jade'en, ku x'adsojimbettit, tsuj tudə'aky meets idə'əŋ ja xu'unt. ¹⁶ Yikxon meets idə'əŋ m'əy'att jəts xmoə't'attit jade'en ja m'aaw ja mjooit jotkujk, jəts ku wyinaty pəŋ mdamigajpxyidi ja Cristo yjanchja'win, kə'əŋm ja kyajpxy ja myadya'aky ja ttatsə'ədyu'undit ku meets ja jade'en nugo mnitaayibyetyyidi. ¹⁷ Əyts ja ne'egi ku ja əy'ajtin ngu'ayo'ombaaajta'ant pəni jade'endam ja Dios kə'əŋm ttsəky jəts idə'əŋ jade'en ne'egi ngatu'unint ja axəəkpı ja yigaappı.

¹⁸ Jabı nayide'enxi Cristo kə'əŋm tə'y'ayo'ombaaatmi adəŋm nbəkyəjəp, tuk'oıkyı ja tətənanxy ja ayo'on. Əy ja y'ijty yja'əyjaə'yı, ayo'ombaaajı ja' adəŋmgəjəp wine'en nga'əyjaə'y'ajtyindi, jəts jade'en ja Dios Teety kukwingunəjkxa'andi. O də'əŋ ja ɲine'kx wyindigəəy, juıky'ajtpəts ja ıxyam jadigojk. ¹⁹ Ja Espıritu Santo myə'əjtin ja yiknəjkxəə mə də'əŋ jap namay anmıja'win t'aweıxtı ja y'ayo'ondi, jəts ttukmadəəy ja nitso'ok'ajtin. ²⁰ Ya'atpı jaa'dyı ku yjuıky'ajttəə ka' idə'əŋ ja tməjpkıtaıktəə ja Dios sja ja Noə tjanıgajpxy yam ja Dios ja yjanchja'awıjxyıdi. İxyam idə'əŋ wyinaty ja Noə tyık'əyı tyık'abaədi ja məj barkı mə də'əŋ niwaani ɲıtsoktı, niduktuk idə'əŋ ja'adı ka'pxy pəŋ jap barkıjətpıtyı yikanaanwıdeıtdı ja məj nəə, jəts jade'en sja kyajajttəə. ²¹ Yə'əbı nəəjts ndamıguy'ejxa'amp ja nəə midı tump ku nnəbjatınt midı tə kukpaajtyım ja nitso'ok'ajtin. Ka'ap ja nəbjatın ja' wyə'añ jəts ja ne'kx ja'ayı wyə'ats'ejtındı. Ku də'əŋ nnəbjatınt, ja Dios idə'əŋ n'amıdowıwım jəts ja nbəky yıxkwaajtsa'ant. Jade'en'ampıts idə'əŋ ja nəbjatın tyuñ jəts ja nıwındsəŋ'ajtin xuknıwaajtsım ja ka'əybi pə ja'axı ja kyujuıkyəjəkyı'ıñ jadigojk xemıkəjəp. ²² Jəts ja ojts çajpety, ojts tpu'ıxaəgi ja Dios Teety y'aga'ngyəjə'əŋ, ja' tniwındsəŋ'ajtp ja ɲnkılistəjk jəts wine'en y'ettı nidukı'yı ja yıkutujkpıətəjktı, tum ja' amuum paajtp.

4

Jade'en nbadu'undit sım ja Dios ja ndunkjəəjəp tə xmo'əyındı

¹ Təxi ja Cristo y'ayəy, nayide'en meets idə'əŋ xkupıky'att ja ayo'on. Ku jade'en xu'undit tə wyınaty ja pəky xkayıkməj'attı, ² jəts jade'en mjaaktsəənidit yə naxwıñ sım ja Dios kə'əŋm ttsəky'aty, jəts ka'ap ja mgə'əŋm ja' xu'undit, ja kya'əybi. ³ Tə meets yıkyotkidakəjəy jekyıp ku xpaduıdı y'ıjtyıp pəŋ ja Dios tka'ejxidıp. Ja' y'agujkyı meets y'ıjtyı mdsəəni mə ja axəəkpı yıgaappı, mə ja awanax agojnax nayide'en xwındsə'əgıdı xwıŋjawıdı, midı idə'əŋ kapaat'ajtyıp nbadu'unint. ⁴ Ja'abı jaa'dyı, kumaap ja tjawıdı ku meets ja xka'ukpadu'unxınyıdı ja y'axəəkpı yıgaappı tsınaə'yın, paty meets myıkjıgajpxy myıkpagaıjpxy. ⁵ Ka'ap meets ja xmojpkıta'akt, kyəyaktıp ja kə'əŋm ja tyı'ajtin jəts ja yıktıdyu'undit, ja' ja nəjkx tııdyuunıdıp pəŋ tııdyump ja o'kpi jəts ja juıkpyı. ⁶ Ja' pəŋ tə'y'oo'kni, tə yıktuk'ıxy yıktuknıjawi sudso də'əŋ ja y'anmıja'win xemıkəjəp ndejınt y'uktsoənt məəst ja Dios. Jaayıp idə'əŋ ja ɲımyayı tpadso'ondaknı ja xemıkəjəpıt juıky'ajtin ku ja Dios yja' tkupəjkıyıdı, əy ja kawıne'en yıyayıktııdyuıdı yə naxwıñ, tjapaatı tja'ejxtı ja kajkın ja o'jkın ja'adı.

⁷ Wıngonıpxı jıts kyudıgəəgyəjəxınt tuki'yı ja pıktə'aky, paty meets ja y'əybi wımmaə'ıñ xyıktu'undit jəts xamıja'myatsıdı ja Dios. ⁸ Ja tsojkın meets idə'əŋ ne'egi mmoə't'ajtp, jabı yajkpxyı ja maa'kxukıın ja', jəts ka'ap ja tsep nı ja akı ja tkayıkmajada'aky. ⁹ Nagyupəkıdı mjoŋjətpı mdəjəjətp, pəni pəŋ jam memp ja'tp, kıdı tı x'amə'at'attı. ¹⁰ Kıja' meets idə'əŋ xu'unt ja mdunkjəəjəp sım ja Dios tə mmo'əyıdı jəts jade'en mnaıyabudəkyıdıdı nıxem nıyam pəni sja Dios ja kunuu'kxın kəx kıda'ak tə mmo'əyıdı. ¹¹ Pəni jaa pəŋ tıgajpxwa'añ ja Dios yja', ja Dios idə'əŋ ja y'ayıuıjk ja wyınmaa'ıñ ja yıktuıjnıp. Pəni jaa pəŋ myıgu'uk tıpdəkyıwa'añ tuki'yı də'əŋ ja tyıktıngəxtı ja mək'ajtin midı ja Dios yajkpy. Jəts jade'en ja Dios Teety ndaməja'wa'ant ndagunuu'kxyja'wa'ant ja ndunkjəəjəp nıwındsəŋ'ajtin Jesu-cristo kəjəp, pəŋ tu'ugyı ja əy'ajtin ja mək'ajtin tməə't'ajtp xemıkəjəp. Jade'en idə'əŋ yjatt.

Ku ja Cristo nbadu'unint, ayo'ombaaajtımp

¹² Meets mıgu'uktəjk, kıdı kuma'ayın xjawıdı ku mək m'ayo'ombaaatı, kıdı mnoəndı ku jade'en kyapaat'atyı. ¹³ M'əyjawıp meets idə'əŋ ne'egi ku meets idə'əŋ Cristo məəst m'ayo'ombaaaty, jəts nayide'en wyınaty xaxondaknıdı ku tıŋky'ejxıt ja myə'ajtin ja y'əy'ajtin ku wyınaty myeni jadigojk. ¹⁴ Jotkujk meets idə'əŋ mnayjawıyıdıdı ku myıkwıngajpxıtıt myıkpagaıjpxıtıt Cristo kəjəp; jabı ja Dıosxı meets ja y'Espıritu Santo mmoə't'ajtp. Axəək yıgaap ja nıwındsəŋ'ajtım ja tımadya'aktı, ka'ap meets nayide'en, ja'axı meets mwındsə'jkip mwıŋja'wıp. ¹⁵ Mək tso'ədyu'unın mək payə'əyın ne'egi ɲaxy ku nyıkjaə'y'o'jktınt ku nma'ıtsınt, ku tıgatı ndatəjka'ant ndakajpxa'ant midı'ıbı adəŋ xkapaat'ajtımp. ¹⁶ Ka'ats ja ne'egi çə'ədyu'unı ku ja Cristo yja' ngu'ayo'ombaaajta'ant. Ndaməja'wa'amp ndagunuu'kxyja'wa'amp adəŋm idə'əŋ Dios ja ne'egi.

¹⁷ İxyam adəŋm idə'əŋ ndııdyunk tyuu'na'amp pəŋ jatı ja Dios ja'ajtıdıp. Məkts adəŋm ja ndııdyunk ɲajxındıt, çsats idə'əŋ ja yja' mye'endıt kyıda'aktıt pəŋ ja Dios tkabadundıp? ¹⁸ Jabı ja əyjaə'yts ja ɲıtsəojkın ɲıyəjəjx tkapattıp, çsats idə'əŋ ndejınt tyımyjattıt pəŋ ja Dios tkamımadoodıp, pəŋ ja çınəə'yın tyıknajtıtp pəky'agujkpy? ¹⁹ Patyts pəŋ ja Dios yja'

tmi'ayo'ombaajtidip sam ja kə'əm tə tyamidsəkyidi, ka'ap ja mibaat t'ixmatstī ja y'əybi, tyun'etibym ja'adi, amuum ja y'anmija'win ttamioxtit ja Dios pən yikojidip yiktsoojkidip, niyuuni ja kyamajsttu'udyidi.

5

Ku ja Cristo yjanchja'wibi yikajpxwejtī

¹ Ixym ngajpxwejwa'añ pən jam mnigubajk'ajtiyidip, ja mōjaa'dyōjkti, jabi nayja'abi tunkxi nmōōt'ajtpy, ja ku ōts idō'ōn kō'omyi ndyimy'ijxy sɑ dō'ōn ja Cristo y'ayo'ombaajty. Nbaatp ōts nayide'en ja ōy'ajtin sam nayide'en ja mōjaa'dyōjkti, ku wyinaty ja nwindson'ajtim tō ttukmibaat'aty. ² Paty ōts ixym mee mōjaa'dyōjki nnōjmidi jōts yikxon x'ejx'ettit pən ja Dios yja' tpaduujnidip midī meets tō myiktāgidojki; kō'ōm dō'ōn meets ja xu'unt sam idō'ōn ja Dios kō'əm ttsōky'aty, ka'ap akikōjxp jōts ni meengyōjxp ja xkatu'undit. ³ Kidi meets ja mgutuik nugo xamajada'aky, tuda'aky idō'ōn ja xuu'mo'odit jōts ja m'ōchinaa'yin xuk'ejxpajtin'attit. ⁴ Kuts jade'en wyinaty myeni ja mōj ejx'etpi jōts meets xpōkt ja mōj ōy'ajtin midī niwindem xōōw ja kyudigō'ōyin kaja'tp.

⁵ Ixym meets unajktōjkti ngajpxwejwamidī, mīmadoow meets idō'ōn tuki'iyyi ja kyutujk ja mōjaa'dyōjkti, sam meets niduknax nixem niyam mnagyupōkidit. Jabi jade'ents ja wijkyajpxy wya'añ ku ja Dios ka' ttsōky pən kō'əm namyōjpiktajkidip, jōts ja' tpuōki y'ōy'ajtingōjxp pən tmōōt'ajtp ja tuda'aky'ajtin. ⁶ Ku xmiduda'aky'attit ja Dios myōk'ajtin, nay ja'ayī dō'ōn kō'əm mgunuu'kxiyidip ku ja xōōw jumōjt wyinaty tpaaty. ⁷ Tagidōkidī ja Dios tuki'iyyi midī mbamaadyip mbadajtip jabi ja'axi ja tyunk'ajtpy jōts adōm ja xtsojkint.

⁸ Nay'ejx'etidim, wijy kejy nabyikta'agidi; jabi oxī mā y'ixy kyōy ja miku', ja mmidsep pən mduk'ixmatswajniyidip ja mjanchja'win. ⁹ Mīmōk'atti, tamōk'atti ja mjanchja'win, ja'myatsti ku nayide'en ja mmigu'uktōjk y'ayo'ombatmidī o madsōo sam meets. ¹⁰ Ku adōm wyinaty tō n'uk'ayo'ombaajtyindi waani, xjats adōm idō'ōn ja Dios xyik'ōōyandit jōts xmōōgyōjxindit ja mōk'ajtin jōts jade'en nisɑ ngɑ'ukjajtinidit. Xpa'ayo'ondip idō'ōn ja Dios ku kawinmaañi xkunu'kxindi, jōts ku kō'əm tō xwɑɑdsōō'yim jōts adōm n'ejxindit nbaajtindit ja y'ōy'ajtin ja myōj'ajtin xemikōjxp mōōt ja Jesucristo. ¹¹ Tu'ugyī dō'ōn ja Dios Teety myōk'ajtin mōj midī niwindem xōōw ja kyugōjx'ajtin kamemp. Jade'ents idō'ōn ja yjatt.

Ja kajpxpoo'kxin midī tyagugōjxiñip

¹² Yjanchpadumpy tuda'aky'ampy ja janchja'win yō Silvano adōm nmigu'uk. Ixymts ōts ja ndamigaxi tu'uk ja nōky midī tō nja'ay jōts meets ngajpxwejwa'añ jōts ku Dios kyunuu'kxin tō mmō'ōyidi jōts jade'en'ampy tnanky'ijxyi pōni ti jaty tō xpaatti x'ejxti. Mdsojkidip meets ja Dios jōts kidi mibaat x'ixmatsti, tu'ugyī yikxon xpanōjkxtit.

¹³ Mdanigajxidip ōts ja kajpxpoo'kxin ja Babilonia janchja'wibidi pən ja Dios tō t'awaawmujkmi nayide'en sam meets. Nayide'en ja mgajpxpoo'kxmiyidi ja mixy Marcos midī n'u'nkja'wip pən ōts xpudōjkip. ¹⁴ Nagyajpxpoo'kxidi nixem niyam sam tu'ugyī ja jaa'y ñamyayidi Cristo chojkingōjxp.

Jade'en ō nwa'añ jōts ja ōy'ajtin xmōōt'attit pən ja nwindson'ajtim Jesucristo yja'ajtpy. Jade'ents idō'ōn yjatt.

JA MYĪMAJTSKPI NØKY MIDI JA PEDRO YJAAY

Ku ja Pedro tnijayi pøn tjanchja'widip ja nwindson'ajtim Jesucristo

¹ Øts idø'øn Simón Pedro nxøw'ajtpy. Øts ja nwindson'ajtim Jesucristo nmidump jøts øts ja nayide'en gudanaapy. Ixym meets ja nøky ndanigaxi pøn nayide'en tø xpaahti ja janchja'win sam øøts ja nja', ja'agøjxp ku ja nwindson'ajtim Jesucristo tyiyi kya'pxyi. ² Jade'en sam x'ejxtit xnijawidit ja Dios Teety jøts ja nwindson'ajtim Jesús, nayide'en idø'øn mdaja'adiyidit ja y'ø'y'ajtin kyunuu'kx'ajtin.

Ja midi yiknigajxø'øgøiyip pøn tjanchja'widip ja Cristo

³ Myøk'ajtingøjxp adøm ja Dios Teety xmø'øyim køx kida'ak midi xka'ejtxa'amp jøts jade'en øy tsuj ja ndsinaa'yin nyiknaxjint, sam ja ajot'ajtin nayide'en yikmo'ot, jabi tøxi Cristo xuk'ijxyim pøn tø xwi'ijxyim xwigø'øñim y'ø'y'ajtingøjxp myøk'ajtingøjxp. ⁴ Nay yø'øbi køjxp adøm nayide'en tø xmø'øyim ja y'øybi, ja awejx'ajtin sam idø'øn ku tijy xyiknitso'okwa'añim ya naxwiiñ, ma ja tigø'øyin kadye'eyin y'ity, jøts jade'en ja kyunuu'kxy y'ø'y'ajtin xukpaajint. ⁵ Pøni nbaatwa'añimp idø'øn ya'at, ja janchja'win idø'øn nmøøt'ajtim; ku ja wyinaty nmøøt'ajtyimp, winets ja tiichinaa'yin ja øchinaa'yin n'ixa'ayint; ku ja wyinaty tø nbaajtyim xjats idø'øn nbadøjka'ant sudso ja Dios yja' nniija'wa'ant midi tø ttanibiktaagi; ⁶ kuts ja wyinaty nmøøt'ajtna'am, jøts ja yja' jade'en nbaduujna'ant jøts adøm ja ngø'øm ja' n'ixwejtsint; kuts ja wyinaty jade'en tø ndu'uñim xjats idø'øn ja maa'kxujkin nbadøjka'ant jøts nyiktu'unint nixem niyam, jøts ja Dios yja' køx kida'ak jade'en nnadyamiyøjxa'ant; ⁷ kuts idø'øn nmøøt'ajtna'ant xjats idø'øn ja nmigu'uk adøm nixem niyam møøt nnamyaajya'ant; jøts jade'en ja tsojkin nmøøt'ajtnit midi kamastu'udyim yikja'wip.

⁸ Kuts ya'at xyikmøjidit xyikyajkidit midi mmøøt'ajttip, zja ti nugo meets ndejint tø x'ejxni xnija'wifni ja nwindson'ajtim Jesucristo? Jabi ka'axi ja mdsinaa'yin nugo xyiknaxtit ya. ⁹ Pønts ya'atpi winmaa'ñ tkaba'ayoodip, jade'en idø'øn tyimyjaty sam tu'uk ja jaa'y kube'ets kugoots y'etwa'añ kø'ømndsojkingøjxp; ka'ap ja t'ukja'myajtsni ku ja nwindson'ajtim Jesucristo ja pyøjki tø tku'oogi jøts ku yam yjapaat'ajtniyi jøts ja chinaa'yin tyiktigajtsnit. ¹⁰ Jade'ents mee migu'uktøjkti, nanky'ejxidi dø'øn ku meets ja Dios tø mwi'ijxyidi tø mwigø'ñidi, jøts jade'en niti nima ja mjanchja'win kyawinguwopidit. ¹¹ Jøts jade'en wyinaty agujk jotkujk mdøjkiñidi ma ja nwindson'ajtim Jesucristo ja kyutujk ja yjaa'y ttanitani, ma ja yiknitsokpi xemikøjxp xyik'ejnt.

¹² Paty meets ya'at ejtp ndukja'myats'ett, øy yø xanija'wifni øy yø xjadamøk'ajtnidi Dios tyiy'ajtin midi mmøøt'ajttip. ¹³ Øy øts idø'øn ja njawi ku meets njaakajpxwejt, ku njaakjuyky'att, ¹⁴ jabi tøxi øts ja nwindson'ajtim Jesucristo xuknijawi ku øts tsojk ya'at naxwii'ñit nmajtstutnit. ¹⁵ Tuki'iyi øts yø n'aaw njoojt nbikta'akt, jøts xja'dyangøxtit yø' kajpxwejin, jøts jade'en ku wyinaty tø nja'oo'kni njadigøøñi, ejtp yø xja'myats'ettit.

Pøn t'ejxtø wyemp y'amp sa Cristo tnanky'ejxøø ja myø'ajtin

¹⁶ Øy meets mwa'ant ku myikwindaa'y'atti ku meets tø ndukmadø ja ixpøjkin midi ñigajpxpy ja nwindson'ajtim Jesucristo myøk'ajtin jøts ku ja mye'ent jadigojk. Ka'ap øøts yø kø'øm tø nyik'øyi yø' madya'aky, jabi tøxi øøts idø'øn kø'øm ndyimy'ixy ja nwindson'ajtim y'ø'y'ajtin ja myø'ajtin. ¹⁷ N'ejx øøts ku ja Dios Teety tyikjajty jøts ja Cristo ja windsø'jkin winja'win tpaatt, ku ja ñine'kx tyigajch jøts ku amuum chamaambijkyaju'uk agujkp. Nmadoow øøts nayide'en ja Dios Teety y'aaw y'ayuyjk ku yide'en wyaañ: "Øts ya'at n'U'nk midi kawinnmaa'ñi ndsojknajpy, midi øts ixyam øy yikxon ndajotkujk'ajtpy." ¹⁸ Kø'ømxi øøts idø'øn ndyimyadøø ja Dios Teety y'ayuyjk midi tsajppjøty kidaajk, jabi jamxi øøts wyinaty kojpkøjxp midi kunuu'kxy, møøt øøts ja nwindson'ajtim jam wyinaty.

¹⁹ Kidi yø'øypxi dø'øn ja'ayi nugo ejxpajt'ajtp, pø tøxi ja Dios Teety ja kyajpy tpaduñ midi ja kyugajpxy windi'ixyip yjaadyandøø. Øy'ajtp idø'øn jade'en ku jade'en xu'unt ku xunk'attit yø'øbi kajpxy, yø'øbi ayuyjk, midi ja wejin ja kajin xmø'øyimp jøts ja kugoots'ajtin jade'en xmajtstuujnt. Jade'ents Cristo ja yja' xagujajamp xagudøø'kxamp kunim ja mye'ent jadigojk jøts kø'øm ñanky'ejxyitnim. ²⁰ Ja ku dø'øn jaweyen kuwani xnijawidit jøts ku ja Dios kyajpxy ka' nugo øy pøngapøn nugo ajawi tja'gyuki, ²¹ jabi ka'axi ja Dios kyugajpxy kyø'øm winmaa'ñ ttakajpxtøø. Dios Teety miyøxy ja'adi, jøts tnigajpxidi ja yja' sa jaty ja Espiritu Santo wyinmaa'ñmyøøjyidøø.

2

Pøn ñanky'ixpøjkidip ja taay'ajtin

¹ Nayide'en idø'øn Israelit jaa'y y'ejtmidi pøn ñadyijyi nañikajpxidip ja Dios kyuga-jpxy; nayide'en meets idø'øn winaa'in xni'taayibyajtmidi ja Dios yja', pøn idø'øn kø'øm t'ejxma'tnidip ja nwindson'ajtim mido tø yiknitsø'ogyidi; kø'øm idø'øn ja myø'layo'on wyinaty tsojk t'ixa'adi. ² Namay idø'øn jaa'y ja tpabøktit ja y'axøøkp t'sinaa'yin, jøts ja'agø'xpti wenk yiknimadya'akt ja Dios kyajpxy mido yiknitsøojkp. ³ Kuts ja meef ja t'amidit tjotpidit, jade'en meets idø'øn mwigaadsidit mwibøoidit, ku o tigati kajpxy mdawindaay'atidit meengyø'jpx; ja'atp idø'øn ja myø'layo'on ja'adi, niti nitsøojkin, jabi jekyixi dø'øn tø yiktanibiktajkiñidi ku jade'en yjattit.

⁴ Ka'ap ja Dios tmaa'kxuujky ja y'ankilistøjkti pøn kamimadooljyidi, jagam idø'øn ja tnaitswojpyi'ñi ma ayodaajk jap, jøts jap kube'ets kugoots tsumy t'awe'xti ja tiidyu'unin. ⁵ Nika'ap nayide'en ja Dios tmaakxuujkmi ja jaa'y pøn jekyip t'sinaamyidøø ku ja Noé yjujky'ajty. Ja kom tuuji dø'øn tyanigajx, jøts jade'en tuki'iyi ja na'xwii'ñit ñijaa'xni ñigomni, jøts jade'en y'o'lj'kø'jxtøø ja ka'ø'yjaa'dyi. Ja'ayi tyiknitsøøjky ja ni'wixujkpi jaa'y jøts ja Noé pøn ja tiichinaa'yin tngajpx. ⁶ Nayide'en tyikutujkmaaø jøts kyudig'ødyit ja kajp mido t'xøøw'ajtøø Sodoma jøts Gomorra, jade'en tyikudig'øøø, nugo jaam tyiktaañ, jøts jade'en t'ejxpajt'attit ja ka'ø'y jaa'y pøn wyinaty ja chinaa'yin tyikna'xwandipnim. ⁷ Yiknitsøojk ne'egi ja Lot, pøn y'ijty øyjaa'y'ajtp jøts pøn nayide'en tjancho'ødyunja'widip ja y'axøøk t'sinaa'yindi. ⁸ Jabom jabom idø'øn ja y'ijty yjotmay'øøky ku t'ixy tñijawi sa ja'abi jaa'y yjanch'adø'østøø. ⁹ Jade'ents idø'øn, maajyip idø'øn ja nwindson'ajtim jøts ja xpudøjka'ant ma ja yigaappi y'axøøkp ximamajada'akwa'añim wine'en adøm tø nadyamiyo'jna'andi ja nwindson'ajtim yja', jøts nayide'en myaa'miyi tyik'ayo'ombaatt øy pøn tundig'øøbyidi ku wyinaty ja tiidyu'unin myiñ kyida'aky.

¹⁰ Yik'ayo'ombaatt ja Dios ja'adi dø'øn pøn kø'øm ja y'axøøk tsojkin tpadundip jøts pøn tteky'a'an'ajttip ja nwindson'ajtim kyutujk. Namyikajxidip ja', ap tyimñayjawiidi; ka' ñadyijyi tyimcho'øgidi jøts tka'ømyigajpxti tka'ødyeti ja kutujk'ajtin mido jap tsajpøtpy, ¹¹ yam ja ankilistøjkti niti nisa kyawa'andi jam nwindson'ajtim wyingujk, jawaani møkts ja ne'egidi ja kyutujk.

¹² Nayide'en idø'øn ja'adi sam ja jiyujkindi, niti ja'gyukin tkamøøt'atti, nugo ja yjujky'ajtin yikjujky'atyidi, ja'ayi t'awe'xti'atti sa ja myigu'uk tmatsttit uk yikmatsttit kø'øm, sa ja o'jkin tigø'øyin tpaattit. Tum wimbet ja tmadoojidi ja Dios yja'. Ka'ap ja tjagyapi ja madoogukin; tyimñayide'en idø'øn ja y'oøktit sam ja jiyujkti nugo ñaxti, ¹³ kyu'ayo'ombaadidip sam ja myigu'uk tø tyik'ayo'ombaatti. Jotkujk idø'øn ja tjancho'ukjawidi ja y'øbyi yjøkchpi mido pojn najpx; nugo dø'øn ja cho'ødyundi ku meets ja mxøduñ møøt, jøts ñadyijyi yjanch'uknankyotkujk'atyidi jøts meets ja jade'en xpabøkt.

¹⁴ Ka' idø'øn ja tø'øxyjok ja nugo t'ejxtit, ja' idø'øn ja wyinmaa'ñ'attip jøts tmøøt'attit; ka' idø'øn ja pøkyu'unin yjotnaxyidi. Ja win'øø'nik ja'ayi tyunk'ajttip jam ma pøn ja yjanchja'win kyamøjkinim; tuki'iyi tniwa'anwa'angø'jxti ti jaty ja myigu'uk yja'ajttip; ja dø'øn møk ayo'on ja Dios ttukpaadidip. ¹⁵ Abiktyuu' idø'øn tø tpabøknidi ku ja tiidyuu' tø t'ixmatsti. Wa' idø'øn ja y'ejxpajtin pyaduujnidip ja Beor myajnk mido Balaam xyøøw, pøn ñadyijyi kyajpxnajx ja Dios yja'. Ya'at jaa'y, o dø'øn ja tigati ttunwaañ, jøts jade'en ja meefjingaap taagyø'jpx tpaaty, ¹⁶ kunim idø'øn ja Dios tu'uk ja jachu' tyikajpxt jøts ja pyøky yiktawindsø'øty jøts jade'en ja kyujuun'ajtin tka'ukyikmajadanknit.

¹⁷ Jade'en idø'øn ya'at jaa'dyi sam tu'uk ja tø'øts nøømu't ni tukxa'kx ja ñøø. Nayide'en ja'adi, sam ja poop yoots mido katuup, nugo pyojwidity; jap idø'øn ja kyastigi agoostujpy tø yiktanibiktaajkiñidi. ¹⁸ Jabi tum wenkxi ja myadya'aky ja'adi, tum ja katumbi kyajpxy'ajttip, jøts ja jaa'y t'windaa'y'atti ku ja y'axøøk winmaa'ñ ttukpadundi yam ja wyinaty namnin tø tja'uk'ixmajtsmido ja'abi t'sinaa'yin. ¹⁹ Ja t'sinaa'yin ja tyaguwa'anidip ma øy sa y'adøtsnidit. Tø ja kø'øm tni'myiwanjajtnidi jiyujkin ja axøøkp t'sinaa'yin. Ku pøn nugo tyimykmaajada'aky yø yjade'embii, janch amøñi dø'øn ja tpaduñ øy yjawi sa tñijajtni. ²⁰ Jawaani møk idø'øn ja ayo'on tpaattit pøn ja nitsø'ok'ajtin tø t'ukpaaty nwindson'ajtim Jesucristo kø'jpx, jøts jadigojk ja kya'ø'y'ajtin tpadundøjkigyomidi. ²¹ Ne'egi jøexyip tpaaty ku jøexyip tkanijawidi ja tiichinaa'yin, jøts jade'en jøexyip tka'uk'ixwejt'sni ja Dios kyutujk mido øy mido wa'ats, mido wyinaty tø y'ukyikmo'odi. ²² Jabi tøxi dø'øn ja' ayuujk tyiy ku jaa'y y'ukwa'añ ku ja uk ja y'iich jadigojk tniwimbity, jøts ku ja kuch mido namdseepnim jits ja jadigojk nay jaayi ja mo'onts tseemujkojmi. Jade'en idø'øn yø ndejant yø'øbi jaa'dyi.

3

Ku ja nwindson'ajtim mye'ent jadigojk

¹ Meets migu'uktøjkti, ya'at idø'øn myimajtsk nøky mido mee ndanija'ayip. Nayide'ents meets ixyam ndanijayi sam jawyeen, jøts ku meets x'ejxkapt ja ti'wyinmaa'ñ mido ngajpxpatpy. ² Jade'en ø nwa'añ ku meets xja'myatst ja Dios kyugajpxy sa ja y'ayuujk

tyikwaañ pøn ja Dios tø ñadyamiyøxyidi, jøts nayide'en xja'myajtsmidit ja nwindson'ajtim kyutuujk pøn yiknitsoojpk, sam øøts tø nnigajpxy pøn ja kyudanaabyi'ajttip.

³ Jawyeen idø'on tyimbyaat'aty meets xnijawit ya'at: ku wyinaty myeni kyidakni ja tiidyu'unin, winets idø'on ja jaa'y kyaxø'øktit midit tyaxe'ektip tuki'iyi ja Dios yja', jøts nugo tñidsøønidit midit axøøk wyinmaa'njyøtpy myøøt'ajttip, ⁴ jøts yide'en wya'andit: "¿Samts idø'on ja Cristo y'ayuujk tø yjajtni kuts idø'on ja tijy wyimbett jadigojk? ¿Windemnimts idø'on ja yjatt? Jabi nitits kyamiñ kyaja'aty, jade'eñim y'ity sayim ja n'apteety tyiknaxtøø."

⁵ Kyaja'myajtstip idø'on yø' ku naxwii'ñit kawinaak ojk tø yjadigach, jabi windi'ixyixi ja tsajp ejtni jøts ja naajx pyidsiimñim nøøjtøpy, Dios Teety y'ana'amingøjxp. ⁶ Kyaja'myajtstip idø'on nayide'en ku ja Dios kawinaak xøøw anadu'u tkejxy, jøts ja naxwii'ñit jaa'y jade'en kyudigøøgyøxtøø. ⁷ Y'awixy'ajttip idø'on yø', jawaani møj ja ayo'on midit wyinaty memp sam ja kø'øm tø ttanibiktajkiñi ku tñajtskaxit ja jønyow. Ja'abi jøøn idø'on yiktøøydip ja ka'øyjaa'dyi ku wyinaty ja tiidyu'unin ñaxy.

⁸ Mnija'wip meets nayide'en ku ka'ap ja nwindson'ajtim ja xøøw ja jumøjt tmøjpikta'aky, jade'en ja t'ixy ja tu'ukpi xøøw sam ja tukmilbi jumøjt. ⁹ Kidi meets mwinmay sam winaagin wya'andi ku ja nugo tyaa'ni ku kyamiñ jadigojk sam ja kyajpxy tø tpikta'aky, møk idø'on tyuda'aky'ajtin ja tyikmajada'aky jøts ja jadine'en xmaa'kxujukym. Ja' chøjkpy jøts ka'ap pøn nugo wyindigø'øty jøts ja ndsinaa'yin nyiktigajtsint.

¹⁰ Jade'en idø'on ja nwindson'ajtim jotkumoni ja tyiidyu'unin tmøøtja'att, jade'en sam maa'tspa'an adsu'jkyi koots myiñ yam niti kyayikjøp'ixy. Kuts ja nwindson'ajtim yja'att jade'en, winets idø'on tsajp pyømemga'akt ku ja kyudigø'øyin tø myeni. Winets tyøøbyøjkxñidit tuk'ojkyi ja tøø'kxpi tsamambi midit jam tsajpwemp, jøts yø naxwii'ñit tuki'iyi tyigøøñit jønyow agujukpy.

¹¹ Jabi jade'enxi dø'on ja ayo'on ñaxkida'akt ya naxwiiñ, tjadits adøm idø'on nganadyamiyøjxa'ant ja Dios! ¹² Yikyijyidi ja mxøøw ja mjumøjt jøts ja yja' xyikmayidit, jøts jade'en chojkit ja xøøw ja jumøjt ku wyinaty kyudigøøgyixy jønyow agujuk tuki'iyi midit jam tsajpwemp jøts ya naxwiiñ; ¹³ ja'ats idø'on adøm n'awejaxindip ja jembyi tsajp ja jembyi naajx midit ja Dios tø tni'adsowi kø'øm, ma dø'on niduki'iyi ja jaa'y ja y'øbyi ja tyiibyitu'ndit.

¹⁴ Paty meets migu'uktøjkti, ku ya'at xjøp'ijxy'attit, tum ja' meets mdu'ump midit ja Dios chøjkpy, tsokti ja tuda'aky'ajtin, nixem niyam mnamyayidi jøts jade'en ja Dios mbaadiyidit niti øøky niti kadyeey. ¹⁵ Ja'gyukidi ku ja nwindson'ajtim tsojk kyamiñ, paty idø'on ja tñuñ jøts nyikmøja'ant nyikmaya'ant ja nitso'ok'ajtin, ja tyuda'aky'ajtin idø'on ja jade'en yiknigaxi'kpy. Nayide'en meets idø'on tø mdanija'ayimidi yø'øbi winmaa'yin ja Pablo, adøm nmigu'uk, ku tyiktuñ ja ja'gyukin midit ja Dios tø myø'øyi. ¹⁶ Tum ya'atpi ixpøjkin idø'on kyajpx'ijtpy ma ja nøky ja jaa'y ttanijayi, øy idø'on ja muum tsep ku nja'gyukiwya'anint, jaa dø'on ja kaja'gyukibidi, jøts pøn ja yjanchja'win kamøktaktipnim tum wenk idø'on ja ixpøjkin ja tjuutti, ka'ap jade'en ja Pablo yjawa'añ ñøkyjøtpy. Nayide'en idø'on ja ttumidi tuki'iyi ja Dios kyajpxy kyø'ømgudigø'øyingøjxpti.

¹⁷ Paty mee migu'uktøjkti, jabi mnija'wiñidixi meets ya'at tuki'iyi. Nay'ejx'etidi jøts ka' xpabøktit sa yø' jaa'y wya'andi, ku taagyøjxp myikpøjkiwya'andi ja mjanchja'win. ¹⁸ Ne'egi ja' pawinmaydi sa ja nwindson'ajtim Jesucristo ja tyiy'ajtin xnija'wiyidi. Yikmøjidi ja tsojkin ja pa'ayo'owin midit ja yiknitsokpi tø xmø'øyim, pøn ja y'ø'ajtin myø'ajtin xemikøjxp ejtp. Jade'ents idø'on yjatt.

JA MYĪDU'UKPI NØKY MIDI JA JUAN YJAAY

Ja' midi xyikjuky'ajtindip

¹ Ya'atpi nØky øø nguejpxy, jØts mee ndukmadøy ja Jesucristo, ku ja jaayim wyinaty ku cho'ondakjixy tuktsajp'agida'aky. Nay ja' øø tØ n'ixy tØ nmadøy jØts nayide'en øø tØ ndukpaaty ja ngØ' ndeky; yØ' y'ayuujk yØ' wyinmaa'yin adøm ndajujky'ajtyindip. ² TØ ja ñankñigaxi'igiyi, øØts tØ n'ixy øØts tØ nnijawi, paty mee ndukmadøy ixyam ku ja ejtp mØØt chØØni ja Dios Teety, tØts idØ'on ixyam xnimi'iñindi. ³ Tyiiby: øØts ndyimñigajpxy midi øØts idØ'on tØ ndyimy'ixy ndyinyadøy; paty mee ndukmadøy jØts meets m'ett amuki mØØt øØts, kumi tyimdyiy tyimjanch ku øø mØØt n'ity ja Dios Teety jØts nayide'en mØØt ja y'U'nk Jesucristo. ⁴ YØ'Øbi ayuujk yØ'Øbi winmaa'yin meets ixyam ndanija'ayip jØts yikxon ejtni xoni mwinmaa'ñ y'ettit.

Janch wa'ats ja Dios ejxim ja jajin

⁵ YØ' øØts nnigajpxwampy yØ øy'ayuujk yØ ømyadya'aky midi øØts ja tØ xukmadøy: jØts ku ja Dios Teety janch øy janch wa'ats ejxim ja jajin, jØts niwine'enin ja ka'øy'ajtin tkamØØdi. ⁶ Kuts nwaq'ñindi ku ja Dios Teety nmØØt n'ijtyindi jØts nika' n'ukpaduu'na'andi ja n'ayuujk, nugo adøm ja nmidundigøy adijchindi. YØ' idØ'on mØj taa'y ku jade'en nugo nwaq'ñindi. ⁷ Kuts ndsinaa'yindit øy wa'ats ejxim ja Dios Teety chØØni, winets nixem niyam tu'ugyi ja winmaa'ñ nmØØt'ajtindit, jade'en idØ'on ja y'U'nk Jesús xyikpøkwyaaajchindi midi jaty ndu'uñindip ku ja wyidsuun wyidajxy. ⁸ Xjats ku nugo nichØky nwaq'ñindi jØts ku ka' ndundigøø'yindi, nugo kØ'øm nnawyindaay'ajtya'andi jØts tiy ngakajpxyindi. ⁹ Kuts ndamimadyakØxindit ja Dios Teety nbØky, njØp'ejxindip ja' ku ja ttu'unt midi paat'ajtip, jØts nay ja xpojkmama'kxindip jØts nay ja' jaty: xyikwaaajtsindip midi jaty adøm ndundigøø'yin'ajtyindip. ¹⁰ Kuts nugo nwaq'ñint ku ka'ap nbØky nmØØt'ajtyindi, jade'en idØ'on ja nbiktaajkyindi jØts ku ja tyaayi ja Dios Teety, niwine'enints jade'en ngamimadool'ant ja kyajpxy ja y'ayuujk.

2

Jesucristo amuum xnikajpxuujtimp

¹ Meets u'nkti una'jkti, ya'at meets ndukmadøøpy tuki'yiyi ku ka'ap mbØktyu'undit, jØts pØni pØn wyinaty sØ tyimyjajtp paty xnijawidit ku jaa nmØØt'ajtyindi tu'uk ja nikajpxutpi jam Dios Teety wyingujkp, ja Jesucristo dØ'on ja' pØn janch, pØn tiy. ² TØ ja Jesucristo tku'ayo'ombaaði adøm ja nbØky, jØts nigidi adømyipti, niduki'yiyi dØ'on nayide'en ja naxwi'iñit jaa'y.

³ PØni nbadu'uñindip ja Dios ja kyutujk sØ ja tØ xuk'ijxyindi xuknija'wa'andi, jade'en'ampts adøm ja x'u'nkja'wa'ant. ⁴ JØts pØni pØn wamp ku ja y'u'nk'atyiyi ja Dios jØts nika'ap ja tpaduujniyi ja kyutujk, ja' nugo kajpxigøøpy, nugo ja tyaayi. ⁵ JØts pØni pØn amumjoojt nadyamidsØky'ajtip ja Dios, ja'ats tpaduujnip ja Dios kyutujk; jade'ents ja yikniyawu ku nwindson'ajtim ja mØØt y'ity. ⁶ PØni pØn tyimwyamp ku mØØt tyim'yity ja Dios, wants nayide'en tyiknaxy sami Jesús tyiknajxy.

Nbadu'unimp ya'at jembyi ana'amin

⁷ Migu'ukti, ka'ap meets ja jemgyutujk ixyam ndanijayi; nay ja' yØ' midi mee tØ xmadowdi xnijawidi ku ja mdsinaa'yin xyiktsø'ondaktøø jadigojk. ⁸ YØ' meets ixyam njaaktukmadøøpy, yØ kutujk, midi janch øy janch tump, øgyajemgyutujk, ja ku ja xem ja yam nnachojkindit jade'en sØ ja Cristo tuun, jØts mbaat'ajtyip meets nayide'en xu'unt. YØ'Øbi winmaa'ñ tyikudigøøpy ja ka'Ødyunk, jade'ents ja tsinaa'yin y'Øyi pyaadi.

⁹ JØts pØni pØn nugo wamp ku ja tpaduñ ja jemchinaa'yin, yam ja myigu'uk ja tmi'ambikñim tmijotna'atynim, ja ka'Ødyunk ja wyinaty pyadun'adichpnim. ¹⁰ PØni pØn twamp tsojpk ja myigu'uktøjkti øpyØni, ja' idØ'on tpadump ja øchinaa'yin jØts niwine'enin ja pyØky kyanadyukpaadyi jade'en. ¹¹ JØts pØni pØn ja myigu'uktøjk tmi'ajkidip, ja' nugo tsinaapy ka'Ødyunk agujkpy, ka' tñijawi pØni ti tyumpy kyajpxy, jade'en ja wyimbejtni ejxim ja kugoots jaa'y.

¹² Meets u'nkti meets una'jkti, ixyam mee nnijayi jØts ndukmadowdi ja'agøjpx ku ja Dios Teety tØ mbojkmimee'kxyidi Jesucristo kØjxp. ¹³ Teety: taakti, nayide'en meets ixyam ndukmadøy ya'at ayuujk kumi tØ mee xpabiky ja Jesús yja' midi jaayim wyinaty ku cho'ondakjixy tuktsajp'agida'aky. Meets wajtyøjkti meets kiixye'edi, ixyam mee ndukmadøy ya'at ayuujk kumi tØ xnimajada'akti ja miku' yja'.

Nayide'en meets u'nkti meets una'jkti ndanijayi ya'at ayuujk, kumi tō m'u'nk'atyidi ja Dios Teety. ¹⁴ Meets teetyi taakti, jade'en meets ixyam ndanijayi ya'at ayuujk kumi tō xjanchjapabōjkti ja Jesús yja' midī jaayim wyinaty ku cho'ondakijxy tuktsajp'agida'aky. Nayide'en meets wajtyōjkti kiixye'edi ixyam ndanijayi ya'at ayuujk ku ejtp mjanchnmōkwinnmaydi jōts ku ja Dios Teety kyajpxy y'ayuujk tō xpabōjkidi amumjoojt, jōts nayide'en ku tō xminajada'akti ja miku' yja'.

¹⁵ Kidi nugo xtsojkti ja pōktyunk ni ja pikta'aky midī ya ejtp naxwiin. Jōts pōni pōn t'anōmp t'adsōjpk ja pōktyunk jōts nika' ja Dios Teety ne'egi tsoky'aty jade'en. ¹⁶ Yide'en idō'ōn ja naxwiin'it jaa'y tjanchojkti ja pōktyunk midī winmaa'ñjōtpy mee'nxidip, jōts midī tyimchuj'ejxtip tyimchujaw'idip. Ja'ats nugo ja pikta'aky nadyamōja'wiyidip, ja' ja nugo pyawinmay'ejttip midī jaty jaa kayik'ōdyump ya naxwiin, yamts ja Dios Teety ja jade'en tō tkadanibiktaagi. ¹⁷ Windigōōpy y'lity midī yikpōktyump ya naxwiin, midī nugo yiktsojk anaxp; jōts pōni pōn tpadump sa jaty ja Dios tsoky, ja'ats y'anmija'win xemikōjxp jujky'atp.

Pōn mibōjkip ja Cristo, jōts pōn ja kamibōjkip

¹⁸ Meets u'nkti una'jkti, tō jabaat tpaaty ja et ja xōōw ku myenwa'añ tu'uk ja jaa'y pōn ja Cristo mōk myidsep'atwampy, pōn meets nayide'en tō xnijawi xnimadōy; ixyamts nayide'en tō kyaxō'knidi namay pōn tmidsep'ajttip ja Cristo, paty jade'en yiknijawi ku tō jabaat ja et ja xōōw tpaaty. ¹⁹ Nay adōm nmigu'uk jade'en winaagin adōtstip pōn adōm tō xmajtstuujtyindi paty ja tmidsep'atwa'andi ja Cristo; nigidiits ja' pōn adōm nwinmaa'ñ mōōt tuknaxti, ku jeexyip ja'adi, tō ja jeexyip mōōt ndaa'ñindi. Jade'en idō'ōn yjaty ku winaagin xpuwaajchindi, paty wa'ats yiknijawi ku ka' yikxon tmōōt'atti ja winmaa'ñ sa adōm nja'.

²⁰ Adōmts ja Cristo tō xuktatōjka'andi ja Espiritu Santo, ja'agōjxp ixyam nnija'wa'andi ja tyiibi y ja yjanchni. ²¹ Paty meets ixyam nnijayi ku xnijawidi midī tiy midī janch, ka'ap o nwa'añ ku ka' xnijawidi; wa'ats mee xnijawi ku ja tyiibi y ja yjanchni ka' nayide'en sa ja taay.

²² Pōnts idō'ōn taay'ajtp? Ja'ats idō'ōn pōn wamp ku ja Jesús ka' yiknitso'ok'aty. Pō ja'axi tkawamp tkatsojpk ja Dios Teety mōōt ja y'U'nk Jesús. ²³ Pōni pōn tkawandip tkatsoktip ja Dios Teety y'U'nk, ja Dios Teety idō'ōn wyinaty jade'en kayiktsojpk; jōts pōni pōn twandip tsojktip ja y'U'nk Jesús, ja Dios Teety idō'ōn wyinaty jade'en yiktsojpk.

²⁴ Paty oōts idō'ōn nngajpxy jōts xwinmaa'ñ'attit ja ogyajpxy ja o'y'ayuujk midī tō xpabōkti jōts midī yajkpy ja ochinaa'yin; pōni mwinmaa'ñ'ajttip yō', jade'en ja Dios Teety jōts ja y'U'nk Jesús mōōt n'ijtyindi. ²⁵ Kumi Jesús kō'ōm ni'adsō'owi ku ja xmō'oyint ja ochinaa'yin midī xemikōjxp yikmōōt'atp.

²⁶ Ja'agōjxp mee nnijayi ku nugo myikwindaa'yidit. ²⁷ Pō tōxi ja Jesucristo mmō'oyindi ja Espiritu Santo, paty ka' pyaat'aty jōts pōn jadu'uk mgajpxwejiyidit, pō ja Espiritu Santoxi mee kō'ōm myikwejiyip myikajiyip midī tiy midī janch jōts ka' tyaa'y. Meets migu'uktōjkti, jade'en idō'ōn y'ejxi tyiibi jōts yikxon mdsōōnidit mdanidit amuki mōōt ja Cristo, jade'en sa kō'ōm mdukjatyidi ja Espiritu Santo.

²⁸ Jōts jade'en winguk jōtkuj njōp'ejx'ejtindit ku ja mye'ent ja Jesús, jōts jade'en ka' nmitso'ōdyu'umindit. ²⁹ Pō tōxi meets xnijawi ku ja Jesucristo y'ōyi tyiibi, jōts kuwani xnijawidit nayide'en jōts ku pōn o'y tyiibi y'aty, ja'ats ja Dios u'nk'ajtiyip.

3

Sa ja Dios x'u'nk'ajtyindi

¹ Ejx ja Dios Teety xjanchojkyindi, jōts ja wya'añ ku ja x'u'nk'ajtyindi x'una'jk'ajtyindi, pō janch jade'enxi adōm. Pō patyimxi adōm ja ka'ōdyumbi xka'ejxkajpyindi xkanija'windi kumi ka'ap ja t'ejxti tnijawidi pōni pōn ja Dios Teety. ² Migu'uktōjkti, tō dō'ōn ja Dios x'u'nkpijkyindi xmaagbyijkyindi; ka'anims xuknija'wa'andi pōni sudso njaa'y'ajttindit wingyubety. Ja'ayi nugo nnija'wa'andi jōts ku ja Jesús ñanknigaxōōkwa'aniyi jadigojpk, jōts jade'en njaa'y'ajttindit njujky'ajttindit nayide'en sam ja', pō yik'ejpxxi ja' sam idō'ōn ja chōōni tyani. ³ Pōni pōn tōp'ejxp jade'en, ja'ats nay'ejx'ejtip jōts ja pōky kyapaadit, jōts ja jade'en chōōnit sami Jesús wya'ats'atyin.

⁴ Jōts pōni pōn tundigōy'ejtp, ja' Dios kyutujk kyamōjpktaajkidip, pō yō'ōxi tundigōy'in'ajtp ku ja Dios kyutujk kyayikmimadōy. ⁵ Pō tōxi mee xnijawi ku ja Jesucristo ya tō myiñ naxwiin jōts adōm xyikpōkwyajtsindit, jōts nayide'en xnijawidi ku ja janch wa'ats, ni tu'uk ja pōky tkamōōdi. ⁶ Jade'en idō'ōn, pōni pōn mōōt y'ity ja Jesús, ka'ap ja jade'en y'ukpōktyun'adōtsnidi sam ja jaa'y pōn tkidymñija'widip ja Jesús. ⁷ Meets u'nkti una'jkti, kidi nugo myikwindaa'yidi; pōn y'ōybi tyiibi y tpadump, yō' idō'ōn o'y jaa'y'ajttip nayide'en sam ja Cristo y'ōy'ajtin wya'ats'atyin. ⁸ Pōnts ejtp tyimdyundigōōpy, ja miku' yja' pyaduujnidip, pō ja'axi jade'en tyiktso'ondaajk ja pōktyu'unin ja win'ōō'nin. Paty idō'ōn ja Jesús ojs myiñ jōts ja tyikudigō'ōty ja miku' pyōktyu'unin, ja wyin'ōō'nin, sa jaty ja y'adi'ich.

⁹ Ka'ap y'ukpøkyunidi pøn ja Dios u'nk'ajtniyidip, pø ja'axi kø'øm møøjyidip ja myø'ajtin; paty ka' nugo y'ukpøkyun'adøtsnidi, pø Diosxi u'nk'ajtniyidip. ¹⁰ Yide'en'ampy idø'øn yiknijawi pøn ja Dios u'nk'ajtidip jøts pøn ja miku' u'nk'ajtidip, kumi ka'ap ja Dios ja tja'aji pøn ja myigu'uk tkatsojktip, jøts pøn tundigøy'ejttip.

Nachojkindip ja xem ja yam

¹¹ Yø'øbi kajpxy yø'øbi ayuujk midì mee tø xnijawi ku ja m'øchinaa'yin xyiktso'ondaktøø, yø' idø'øn tyijpy ku nnachojka'andit nixem niyam. ¹² Jøts ku ka'ap jade'en njaa'y'ajtindit sam ja Cain ku ja y'uch ja tyik'øøjky, ja' pyadumpy ja miku' yja'. ¿Ti ja tyuku'o'jkøø? Ja'agøjxp ku ja tkabaduñ ja miku'.

¹³ Meets migu'uktøjkti, kidi sà xjawidi ku mmi'ambøjkidit yø ka'ødyumbidi. ¹⁴ Tø adøm nmajstuujujyindi yø ka'ødyunk jøts ja øchinaa'yin tø nbabijkyindi, jade'en idø'øn yiknijawi ku nixem niyam nnachøjkya'andi. Pøni pøn tkawømp tkatsojpk ja myigu'uk, ja' pyadun'adichp ja ka'ødyunk. ¹⁵ Jøts nayide'en pøn tmi'ambøjpk tmijøtmatp ja myigu'uk jade'en ja pyidsømni sà yikjaa'y'ookpi, pø mnija'wipxi meets ku ka'ap ja yikjaa'y'ookpi y'anmija'win y'ity xemikøjxp, windigøøpy ja'. ¹⁶ Nnija'windip sà Jesucristo tsojkyindi amumjoojt, paty adøm ja xku'o'jkandi; jøts nayide'en adøm ja xpaat'ajtyindi ndsojkindit ja nmigu'uktøjkti sam adøm tø nyiktsojkyindi sam adøm tø nyiku'o'jkandi. ¹⁷ Pøni pønts jotkujk tyiknaxp, yja'ijxpy ku ja myigu'uk y'ayøwinnmay, niwine'enin tkidyimdy'a'ayo'ixy ja pyikta'aky midì ja myøøt, ¿sudsots ja nugo wya'añ jøts ku Dios ja twa'añ tsojky? ¹⁸ Meets u'nkti una'jkti, ka'ap y'øyi ku nugo nwa'anindit jøts ku nmigu'uktøjpk ndsojkyindi; yø' ne'egi øy ku ndyimbyadu'unindit tyy janch. Yø'øts jade'en wingaxø'kp ku ja nachoki amumjoojt yikmøøt'aty.

Sudso jotkujk nnayja'wa'ant Dios wyingujkp

¹⁹ Jade'en idø'øn yiknijawi jøts ku nbadu'uñindi ja tyiibi ja yjanchpi, jøts jade'en idø'øn niti ngagumaa'yindit Dios wyingujkp; ²⁰ kuts kø'øm nnañi'øø'na'andit, ku nmaa'yindit ndajindit ku ja Dios tø x'u'nkpijkyindi, pø kø'ømxi ja jade'en tø tsojkyindi jøts møj ja', ja' tuki'iyi tnija'wip sà adøm njawinnmaa'yindi. ²¹ Jøts ku ngamaa'yindit ngatajindit winets ngatsø'jka'andit jam Dios wyingujkp. ²² Ja' adøm tuki'iyi xmø'øyindip ti jaty adøm n'amidowa'añindip nbøktsowa'añindip ja'agøjxp ku nbadu'uñindi sà ja x'ane'emyindi pøni sà ja tsojky. ²³ Yide'en idø'øn ja y'ana'amin ku njanchja'windi ja y'U'nk Jesucristo, jøts nayide'en nachojki'indit nixem niyam sam ja Jesús kø'øm xa'ane'emyindi. ²⁴ Pønts jade'en tjanchpadundip ja y'ana'amin, ja'ats ja Dios tmøøt'ejttip jøts ja nayide'en myøøt'ityidi. Jade'en'ampy nnija'windi kudam ja tø xuktatøjka'andi ja y'Espíritu Santo jøts ja jade'en kø'øm xmøøt'ijtyindi.

4

Ja Espiritu Santo jøts ja' midì tkaminamyajjyp ja Cristo

¹ Mee migu'uktøjkti, kidi nugo xmibøjkti ja jaa'y pøn wandip jøts ku ja tniqajpxidi ja Dios y'øgyajpxy ja y'ø'yayuujk, ejxti yikxon pøni janchpi tyiibi dø'øn ja kyajpxtip, pø may adøtstipxi ja jaa'y ya naxwiñ pøn windaa'y'ajttip. ² Yide'ents meets ja xnijawidit: ja' idø'øn ja wyinatyi pøn tjanchja'widip jøts ku Jesucristo ya y'atsnanky'ejxøø tyimyjaa'yin, ja'ats idø'øn ja Dios Teety møøt y'ity. ³ Pønts jade'en tkamibøjpk ja Jesús, ja'ats idø'øn ja Dios Teety kamøøt'ejttyip; ja ka'øwinnmaa'ñ ja ne'egi yiktumpy midì tkaminamyajjyp ja Cristo. Tøxi xnimadowdi jøts ku ja mye'ent ja ka'ødyumbi øy juuni; tøts idø'øn ja yjanchmiñ, pø jaanixi ja wyinnmaa'ñ ja ya naxwiñ.

⁴ U'nkti una'jkti, Dios mee mja'ajttip, tøxi xnimajada'akti pøn mwindaay'atwajnidip; pø tyimyøki ja' pøn mee mmøøt'ejttyip jøts nika'ap ja jade'en myøki ja ka'ødyumbi yja'. ⁵ Ja' ja nugo tyunk'ajttip ja ka'ødyunk ja ka'øwinnmaa'ñ paty ja tum jap ttuk'ixpøkti ja jaa'y jøts ja jade'en yikmøjawidit. ⁶ Dios adøm xja'ajtindip jøts ja xmibijkyindi pøn jaty ja Dios møøt'ejttdip. Ja'ats xkamibøjkindip pøn kamøøt'ejttdip ja Dios; jade'en'ampyts nnija'wa'an pøn tpadundip ja y'øybi ja tyiibi jøts pøn tpadundip ja taay'ajtin.

Dios amuum ja tsojk'ajtin myøøt'ajtpy

⁷ Mee migu'ukti, xpaat'ajtindip ejtp nixem niyam nnachojkandit, jabi Dios wyingujkpxi chøøñ ja øchojkin. Pøn ja myigu'uk tsojkp, pøn ja myigu'uk tpa'ayooop, ja'ats idø'øn ja Dios tjanchja'wip jøts ja jade'en y'u'nk'atyiyi. ⁸ Pøn tkatsojpk tkaba'ayooop ja myigu'uk, ja'ats tkidyimyjanchja'wip ja Dios, kumi ejtp ja Dios tsojky ja jaa'y, ejtp ja tpa'ayøy. ⁹ Jøts adøm ja ojts xani'ejxa'andi sà ja xjanchøjkyindi xpa'ayø'yindi ku ja tyu'umtspsi U'nk ja ojts xaniguejxyindi, jøts ja øchinaa'yin xmø'øyindi y'oo'kingøjxp. ¹⁰ Yide'en'ampy idø'øn ja Dios chojkin ja pya'ayo'owin y'ejxi tyiyi: pø nigidi adømxi ja tø ndsojkyindi nba'ayø'yindi

jawyeen, pø ja'axi adøm kò'øm tø xtyimchøjkyindi jøts ja y'U'nk ja xaniguejxyindi jøts ja xku'ayo'owandit ja nbøky.

¹¹ Migu'uktøjkti, pøni tødäm ja Dios xtsøjkyindi, ti kuts adøm nganachøjkyindi nayide'en ja xem ja yam. ¹² Pøn ja Dios tø t'uk'ixy, nipøn ja tka'ixy; pøni nachojka'andipts nabya'ayo'owa'andipts nixem niyam jade'en ja xmøøt'ijtyindi jøts ja jade'en njaaktyimchøjkint. ¹³ Nnija'windip ku ja Dios møøt'nijtyindi jøts xnamyøøt'ejtindip ja nayide'en, ja'agøjxp ku ja tø xuktatøjka'andi ja y'Espiritu Santo. ¹⁴ Tø øøts n'ixy, tø øøts nnijawi wemp'am, paty øø nwa'añ jøts ku ja Dios Teety tø tjanchkexy ja y'U'nk yiknitsokpi ya naxwiin. ¹⁵ Pønsts tjanchja'wip jøts wya'añ ku ja Jesús Dios U'ngi, ja'ats ja Dios tmøøt'ejtp jøts nayi møøt'ejtp ja nayide'en.

¹⁶ Jade'en'ampy adøm ja tø nnija'wa'andi jøts ku xjanchøjkyindi xpa'ayø'øyindi ja Dios. Pø ja'axi ejtp tsojpk, pø ja'axi ejtp pa'ayoop; pønsts ja tsojkin yikwingaxi'kpy, ja' ja Dios møøt'ejtp. ¹⁷ Ku jade'en nbadu'unint, jade'en ja nyikmøjtajaakint ja øwyingmaa'ñ, jøts ja jade'en ngawingudsø'jkant ku ja mye'ent tiidyumbi; ja'agøjxp ku ja nayide'en xukwinmaa'yimp ja tsojkin ja pa'ayo'owin sam ja xtsøjkyindi sam ja xpa'ayø'øyindi. ¹⁸ Niwine'enin ja Dios chojkin ja Dios pya'ayo'owin xkayiktsø'jkandit. Yjaaktyimiyiktigøøgyijxy ja tsø'øgi ja ne'egi, jøts pø yiku'ayo'owipxi ja tsø'øgi ku pøn chø'øgi, ja'ats idø'øn tkayikmøjtøjkipnim ja Dios chojkin ja Dios pya'ayo'owin.

¹⁹ Ja'agøjxp adøm ja Dios ndsøjkyindi kumi jawyeen ja jade'en tø xtsøjkyindi. ²⁰ Pøn nugo wamp: "Ndsøjky øts ja Dios", jøts ni ka'animdims ja myigu'uk ja twa'añ tšøky, ja'ats idø'øn taayip. Sudso'ampyts ja Dios tjaaktyimchokt, pø ka'axi ja kyaxi'ky, ti ja' net ja yjaaktsokp pø ja myigu'ukxi ja kyatsøjky pøn yja'ijxy wiin'ajy. ²¹ Jøts ja Dios yide'en xmø'øyindi ja y'ana'amin: pøni pøn ja Dios tsojpk, nayide'en ja myigu'uk ja twa'ant tšokt.

5

Sudso'ampy ja ka'ødyumbi yja' xkamimajadaakint

¹ Pøn jaty tjanchja'widip ku ja Jesús yikejxy ya naxwiin yiknitsokpi, ja'ats ja Dios Teety u'nk'ajtyidip; pøni chojktip tam ja Dios Teety jade'en, nayide'ents idø'øn ja tsojkitit tpa'ayo'odit pøn jaty ja Dios Teety y'u'nk'ajtpy. ² Kuts ja Dios ndsojkindit jøts ja jade'en ndyimbyadu'unindit sa ja y'ana'amin ja wya'añ, jade'ents ja nnija'wa'ant ku ja nayide'en ndyimchøjkyindi pøn ja yja'ajtpy. ³ Kuts jade'en ndsojkindit ja Dios, ja' idø'øn ja tyijpy ku dø'øn ja y'ana'amin nbadu'uñindi, jøts ka'ap ja mabaat chepi. ⁴ Jøts pøn jaty ja Dios møøt'yity, ka'ats ja tmibøjkidi ja ka'ødyumbi yja'. Pø paty ja Dios janchja'win xuktama-jadaaktyindi jøts ja xkadukmibijkyindi ja ka'ødyumbi yja'. ⁵ Pønsts tkamibøjkti ja ka'ødyumbi yja', ja'ats idø'øn tjanchja'widip ja Jesús jøts ku ja Dios U'ngi.

Ku ja Jesús yiknigajpxy ku ja Dios U'ngi

⁶⁻⁷ Nnija'windip adøm ku ja Jesús Dios U'ngi, jabi kò'ømxi ja Dios Teety ja tymñigajpxxy ku ja Jesús ñøbejty jøts ku nayide'en wyinaty y'ookwaganimi; jøts ja Espiritu Santo ejtp nayide'en tñigajpxmi, jabi myøøt'ajtpy ja tiy'ajtin ja'. ⁸ Tigøøks adøm idø'øn ja ejxpajtin nmøøt'ajtyindi midit tñigajpxtip ku ja Jesús Dios'u'nk'aty. Ja myidu'ukpi, ja Espiritu Santo kyajpxy y'ayuujk ja' midit xuknija'wandip ja tyiibi ja yjanchpi. Ja myimajtskpi, ja Dios Teety y'ayuujk ja' midit yikmadoow ku ja Jesús ñøbejty; jøts ja myidigøøkpi, nay ja Dios Teety y'ayuujk ja' midit yikmadoow tsajpøtpy kyida'aky ku ja Jesús wyinaty y'ookwani. ⁹ Sa ja jaa'y tyiy'ajtin ngupijkyindi, tti Dios idø'øn ja tyiy'ajtin njaakidyimgyupøjkin? Pø ja'axi jawaani tyimdyiy tyimyjanch ku ja tñigajpxy sa ja y'U'nk ja yjajty kyubejty. ¹⁰ Pøn tjanchja'wip ja Dios U'nk, kò'ømts ja tja'gyuki ja tyi'ajtin; jøts pøn tkajanchja'wip ja Dios ku ja tñigajpxy sa y'U'nk yjajty kyubejty, ja'ats taadyejp ja Dios. ¹¹ Ya'at tyi'ajtin xuknija'windip jøts ku Dios tø xmø'øyindi sa n'anmija'win xemikøjxp yjujky'ajtindit, ja y'U'nkts ja'abi jujky'ajtin tmøøt'ajtp. ¹² Pønsts møøt'yity ja Dios U'nk, yikmøøpyts ja'abi jujky'ajtin ja'; jøts pøni ka'ap jade'en yikmøøt'yity, niwindem jade'en ngapaajtindit ja'abi jujky'ajtin.

Ku ja kajpxwejn jøts ja kajpxpoo'kxin y'ukyikyajkni

¹³ Ya'at mee ndanija'ayip wine'enin jam xjanchjawidi ja Dios U'nk, jøts xnijawidit ku ja jam xmøøt'ajtnidi ja jujky'ajtin midit xemikøjxp.

¹⁴ Jade'ents ngawingudsø'jkindi ja Dios ku n'amido'owin nbøktsø'owin pøni ti ja kò'øm xamidsojkindip, ja' ja myadøøpy. ¹⁵ Tøts inet nnija'windi ja Dios kudam ja tmadøy ja amido'owin ja pøktsø'owin, jøts nay jaty x'adsowimbijtyindi pøni ti dø'øn tø n'amido'øyindi.

¹⁶ Pøni n'lijxyindip nnija'windip ja nmigu'uk ku ja ttundi ja pøky midit ttukja'dyigøøpy ja Dios, jatyits ngu'amidoo'wandit jøts ja Dios ja myaa'kxukiyt. Jabi jaaxi ja kajabøky midit ja anmija'win tyikwindigøøpy jøts ja Dios tyukja'dyigøy, kidi ja'apts ndijpy. ¹⁷ Tumbøky yø tundigø'øyin kajpxigø'øyin; jamts ja winaagin midit tkayikwindigøøpy annija'win.

¹⁸ Nnija'windipts ja' pøn ja Dios Teety møøt y'ity, ka'apts ja pøky'agujkpy chøøni; pø Dios U'nkxi axajtukiyip jøts ja miku' ja sa kyatuniyit.

¹⁹ Pø nnija'windipxi adøm ja' ku adøm ja Dios xja'ajtyindi, jøts may ja'amidi pøn ja miku' tø ñiwangøjxniyidi.

²⁰ Jøts nay yiknija'wip ja' ku ja Dios U'nk tø xnimii'ñiindi, jøts ja tø xuknija'wandi mididi tu'ugyi ndios'ajtyindip. Ja' tu'ugyi møøt n'ijtyindi ja y'U'nk Jesucristo. Ja'ats idøøn tu'ugyi ndios'ajtyindip, ja'ats tyajkp jøts ja n'anmija'win xemikøjxp yjujky'ajtindit. ²¹ U'nk una'jkti, nay'ejx'etiyidi yikxon, kidi nugo o ti xdiospikta'akti, kidi jade'en o ti xwindsø'øgidi. Jade'en idøøn ja yjatt.

JA MYĪMAJTSKPI NØKY MIDI JA JUAN YJAAY

Ja tÿ'ajtin, ja tsojkin jøts ja pa'ayo'owin

¹ Mets u'nk Ciria, møjaa'y'ajtp øts, ixyamts meets ya'at nøky ndanijayi møøt m'u'nk m'unaj'jkti wine'enin ja Dios tø m'a'ejxiyidi jøts ja jade'en mja'atyidi. Jade'ents mee ndsøky, jade'ents mee nba'ayøy, jøts kidi øtsip tu'ugyi, pø nayide'enxi meets ja mdsøkyidi mba'ayøyidi pøn jaty ja y'øybi tyiiby tpadundip. ² Ja' øts jade'en xyik'adøtsp ja ku nmøøt'ajtyindi ja y'øybi tyiiby jøts niyuuni adøm ja xkamajsttuujtyindi. ³ Dios Teety jøts ja Dios U'nk, ja'ats mee mgunu'u'kxidip mba'ayoojidip jøts mmø'øyidi ja øy'ajtin ja jotkujk'ajtin tiy janch sa ja ttsøjkyin.

⁴ Jade'en øts ja m'u'nk ja m'unaj'jk winaagin njanchtaxonda'aky ku øts ja nbaaty ku øts ja n'ixy tpadundi ja y'øybi tyiiby jade'en sam ja Dios Teety ja tø xa'ane'emyindi. ⁵ Mee migu'uktøjkti, mdyimdyu'undip ja may'ajt jøts ja xem ja yam nmigu'uk ndsojkindit nba'ayo'owindit. Kidi ixyammim yø jade'en yikmadøy, jaayip yø yikmadoods'ondakni ku ja ndsinaa'yin nyiktigajchindi. ⁶ Yø' idø'øn tsojkin'ajtp, yø' idø'øn pa'ayo'owin'ajtp ku ja Dios kyutujk nbadu'unin; jøts yø' idø'øn kyutujkin'ajtpy midit tø xmadowdi ku mdsinaa'yin tø xyiktigatsti, jøts xem yam mnachokidit mnabya'ayowidit.

Pømbi win'øø'ndip

⁷ Jats may ixyam ja win'øø'mbidi pøn tkajanchjawidip ja Jesucristo ku ja y'atsnanky'ejxøø jaa'yin. Pønts jade'en win'øø'mp, ja'ats idø'øn tkawamp tkatsojpk ja Cristo. ⁸ Øyim mnay'ejx'etidit, kidi xkamøjpikta'akti ja ixpøjkin midit mee tø nduk'ixpiky. Jade'en Dios øy ti mmo'ojidit pøni ti ja mdamidsojkidip.

⁹ Pønts nugo tyimwyinmay'anajxp nika'ap ja t'uktajotkujk'ajtniyi ja Cristo y'ixpøjkin, ja'ats kamøøt'ejtíp ja Dios; pønts jade'en tjantyimbyadump sa ja y'ixpøjkin wya'añ, ja'ats idø'øn møøt'ejtíyip ja Dios Teety jøts ja Dios U'nk. ¹⁰ Kuts pøn mninøjkxidit mjønjojp mdøjkjojp, yamts meets ja xanijawi jøts ku wenk ixpøjkin ja tmøødi, kidi meets ja xyiktøki jam mdøjkjojp, jøts kidi meets ja xmo'odi ja kajxpoo'kxin; ¹¹ pønts ja tkajxpoo'kxp, ja'ats idø'øn tpadump ja ka'øy ixpøjkin.

Sa ya'at ayuujk yjøpkixy

¹² Maynim øts ja winmaa'ñ nmøødi midit mee ndukmadoowampy, jøts ka' meets ja nugo ndanijayiwya'añ; ndyimñinøjkxwampy mee kø'øm jøts ixy windani ndukmado'odit, jøts jade'en ndyimdyajotkujk'ajtindit.

¹³ Ja m'uch pøn ja Dios tø y'a'ejxiyi, ja'ats ja y'u'nk ja y'unaj'jk yam mdanigajxiyip ja kajxpoo'kxin. Jade'eñi øts ja ayuujk nguexy, jade'en idø'øn yjatt.

JA MYĪDIGŌŌKPI NŌKY MIDI JA JUAN YJAAY

Ōy tsuj ja Gayo yiknigajpxy

¹ Mōjaa'y'ajtp ōts, ixyamts ōts ya'at nōky ndanijayi mets migu'uk Gayo, ja'agōjxp ku nijuuni ngaja'dyigōy.

² Migu'uk, wamp ōts jōts ōy yikxon xyiknaxt mōk mōjaaaw, nayide'en sam ja Dios ōy tsuj myik'ityi. ³ Njanch'ōyja'wipts ōts, njanchuja'wipts ōts, jōts ku ōts ja jaa'y winaagin xnimendōō pōn nmigu'uk'ajtyindip, jōts ōts ja xamimadya'akti jōts ku mets ōy tsuj mjaa'y'aty sam ja Dios kyajpxy wya'añin. ⁴ Midi'ibi ōts idō'ōn njaaktyimy'ōyja'wip njaaktyimchuja'wip pō nmadōōpxyi ōts jōts ku ōts nmigu'uk ja mōj ja mutsk tpaduujnidi ja Dios kyajpxy.

⁵ Migu'uk, ōy'ajtp ku ōy tsuj mjaa'y'aty ku jade'en nmigu'uk xpudōki pōn jaty tminaxtip tmidōkidip ja Dios kyajpxy ōy ja xjaga'ijxy'aty. ⁶ Tōts ōōts ja winaagin xukmadowdi sa mets ja xtsōky sa mets ja xpa'ayōy. Jaaktyimdyun ja may'ajt jōts ja xjaakpudōkit sam ja Dios tkupikyin, ku ja jam jade'en yja'attit choondit. ⁷ Pō ja'axi ja tō tmidsoondi jōts ja jade'en tmiwidejtidit ja Dios kyajpxy, jade'ents ja ka'ap tkupōkti ja pudōjkin midi ja jaa'y ja mōōyjidip pōn jaty tkanija'widipnīm ja Dios. ⁸ Patyts adōm xpaat'ajtyindi jōts ja ndyimbyudōjkandit ku ja jade'en tmiyō'ōdyi tminaxti ja y'ōybi ja tyiiby.

Ka'ap y'ōyjaay'aty ja mixy Diótrefes

⁹ Tō meets ja nōky ndanijayi jōts mee ndukmadōy yō'ōbi winmaa'ñ, ja' ku ja mixy Diótrefes tkamōjpikta'aky ja n'ayuujk ja n'ana'amin, ja'ats ne'egi kō'ōm nabyiktaajkip windsōn jōts niwine'enin ōts ja xkamimadōy. ¹⁰ Paty ku ōts wyinaty nnijkxy, mōk ōts ja ndawingugajpxit ku adōm ja xwingajpxyindi xpagajpxyindi ku ja xnidaay'ajtyindi. Nayide'ents ja tkada-jotkujk'aty, yjaaktyimy'ane'empy ja myigu'uk ja', jōts ja ka'ap tkupōktit pōn jaty tmija'ttip tmidso'ondip ja Dios kyajpxy, pōnts ja jade'en tjababadunwamp, jatyits ja tpawōpy jōts ja ka' t'uktuktatōjkiñi mā ja Dios kyajpxy yikpatmadōy.

¹¹ Migu'uk Gayo, nijuuni jade'en xkatu'unt sam ja ka'ōdyumbi ttuñ, tum ja ōybi mdu'ump. Pōn jade'en ōy jaa'y'ajtp, ja'ats ja Dios ja'ajtyip, pōnts ka'ōy'ajtp, ja'ats idō'ōn tka'ejxp tkanija'wip ja Dios.

Janch ōyjaay'ajtp ja Demetrio

¹² Ōy tsuj yiknimadya'aky ja Demetrio. Ñanky'ejxip ku ja tpaduñ ja y'ōybi ja tyiiby. Nayide'ents ōō nwaami, nyiktiidyōjkip ōōts ja nayide'en, pō mnija'widipxi ku ōō ka' ndaayi.

Ja kajpxpoo'kxin midi ya'at nōky tyagugōjxip

¹³ Maynim ōts ja winmaa'ñ nmōōdi midi me ndukmadoowampy, jōts ka' mets ja nugo ndanijayi wya'añ; ¹⁴ ndyimñinōjkwampy me kō'ōm jōts ixy windani nnagyajpxindit.

¹⁵ Ōy yikxon xyiknaxt. Ixyam nmigu'uk mdaniguexyiyi ja kajpxpoo'kxin pōn jaty yam tsinaadyip. Tunts ja may'ajt jōts nayide'en xkajpxpoo'kxt pōn jaty jam nmigu'uk'ajtyindip.

JA NØKY MIDI JA JUDAS YJAAY

Ku ja Judas tnijayi pøn jaty ja Dios tø twi'ixy

¹ Judas'ajtp øts. Øts ja Jacob nmiga'ax'ajtpy. Nmidumpy øts ja nwindson'ajtim Jesucristo jøts meets ya'at nøky ndanijayi pøn jaty ja Dios tø tyamidsøkyiyi jøts ja yja'atiyit, ku ja tø y'agø'dukiyi y'axajtukiyi ja nwindson'ajtim Jesucristo, ku ja møøt y'etti. ² Mbaqtipp yikxon ja Dios kyunuu'kxin jøts øy tsuj mba'ayowiyidit jøts ja øy'ajtin myikmo'odit.

Pøn nugo jawindaqy'atwamp

³ Meets migu'uktøjk, o meets ja nøky kawinaak ojk tø njadanijayiwyaa'añ sa dø'øn y'ejxi tyiyi ja nitso'ok'ajtin midi njagyeyjpyindip, ixyamts mee nnijayi jøts tu'ugyi xyik'ettit ja mjanchja'win midi ja Dios tu'ugyi tø xmø'øyim, ku ja xja'ajtyindi. ⁴ Jabi tøxi ja jaa'y jam tmidøki ja win'øø'nin jøts meets ja mdukpapunwa'añidi midi ja tiy'ajtin kyamøøt. Pø wampxi ja Dios kyajpxy jøts ja tyik'ayo'ombaqt sam pyaat'atyiyyi ku ja kya'øyjaa'y'atti, wandipts ja' øy ja ti ttu'undit maa'kxukidip ja Dios ja'. Ka'ap ja Dios Teety yja' ttsojkidi pøn xja'ajtindip møøt ja nwindson'ajtim Jesucristo.

⁵ O meets ja xjanijawi, nduknijawiywampy meets ja jadigojk jøts ku ja Dios Teety ojts tyik'awa'atspidsimy ja Israelit jaa'y jam Egipto, xjats tyikwindigø y ja' pøn ja kamibøjkiiyi kabaduujniyi. ⁶ Jøts nayide'en ja ankilistøjk winaagin ja yja' ka' t'ukpadunidi sam pyaat'atyi, Diosts ja tø myachi jøts ja tø pyikta'agy'i agootstujpy, jam ja y'awejxti ku ja tiidyu'unin mye'ent. ⁷ Nayide'ents ja yjajtmidi ja Sodoma kajp jøts Gomorra kajp, jøts midi jaty jam kajp wingon ejttøø. Øy sa y'adøtstøø, yaa'dyøjk namyøøt'ajtidip tukyaa'dyøjk, tø'oxyøjk namyøøt'ajtidip tuktø'oxyøjk. Jade'ents ja ka'øybi ttundøø. Jøts ja Dios xemikøjxp tø yik'ayo'ombaadyidi ma xemikøjxp tyø. Jade'ents yø xuk'ijxyimp xuknija'wimp jøts ka'ap jade'en n'adøøtsint.

⁸ Øyi tjanijawidi pøn meets ixyam nugo mwin'øø'nip, kyø'øm winmaa'ñjotpy ja jade'en ttundi ku ja kya'øyjaa'y'atti jøts ka' tmøjpkita'akti ja Dios kyutujk. Nugo twindsø y ja ankilistøjk midi ja Dios myøøtsinaapy. ⁹ Janch wenk idø'øn ja Dios yø'øbi jaa'y twindsowdi, nika'ap ja møj ankilis Miguel twindsøø y ja miku' jades'en ne'egi, ku ja Moises ñine'kx tyiktsejajtidi sudso dø'øn ja yiktu'unt. Ne'egi yide'eñi ja'ayi tnimaay, "Dios paat'ajtiyip pøni sa ja mduwaa'añi." ¹⁰ Yø jaa'y midi mwin'øø'nidip ku yø ti kø'øm tkaja'gyukidi, ja'ats yø kyajpxtip ka'øy; ja'ayi nugo ñija'ywidip jøts yø jade'en y'adø'østtit ejxim jiyujkin, kø'ømts yø nugo jade'en ñankwyindigøydidi.

¹¹ Ayo'ombaqtipp ja'adi ku nay ja' tpadundi sam ja Cain yjaa'y'ajty ku ja myigu'uk ja tyik'øjky. Tundip nayide'en sam ja Balaam jøts ja meefi patp tjawidi. Jade'en nøjx wyindigøydi sam ja Coré ku y'ookøxti ku ja Dios tmidsepsøjktøø. ¹² Nugo mdsø'odyuñidi meets ma mee mgaadyi m'uukti tukpabøjkpitøjk, ku meets yø ka'ap mñimiñidi amumjojt, jøts ku yø nugo ku'uxyi kyaydi y'uukti jøts yø jade'en nugo mdaxi'ikyidi, niti windsø'jkin tkabikta'akti, kø'øm ja ne'egi ñay'ejx'ityidi, ka'ap ja t'ixy pøni ti ja tø yiktaguwanidi. Jade'en ja'adi ejxim ja yoots n'ejxint midi ka' tyu'uy, jøts nayide'en ejxim tu'uk ja tsa'amguipy midi katøømp, øy ja tyøøm'ajtin ja tjapaaty, windigø y'ejtnidipts ja jadi'iñi. ¹³ Tum ja ka'øybi tyundip jøts ne'egi o sa tyimy'adø'øtswa'andi tsø'ødyumbim. Jade'ents tø tyuu'tigøødyi jøts xemikøjxp jap y'ettit agootstujpy.

¹⁴ Ja møjaa'y Enoc pøn myi'wixujk najtskaxi, ku ja Adan jawyeen, ja' ja Dios kyugajpxy'ajjt jøts yide'en tnigajpxy ja ka'øy jaa'y, jøts wyaan: "Jøts ø n'ixy ja nwindson'ajtim ku ja mill'ampy tmøøtmiñ ja pyabøjkpitøjk, ¹⁵ jøts pøky pyayø'øwya'añ pøn ka'øyjaa'y'ajttip, pøn tø tyundigøydi kyajpxigøydi jøts ku tø twindsowdi ja nwindson'ajtim." ¹⁶ Yø'øbi jaa'y nugo ña'amdi nugo pyagajpxti, ja yø'øy'ajtin yø nugo yjayiktunwandip jøts ja jaa'y øy tsuj nadyijyi tmigajpxti ja'agøjxp ku nugo tkajpxwyetswa'andi.

Ku ja pabøjkpitøjk yiktukmadø y sa yjaa'y'attit

¹⁷ Meets migu'uktøjk, ja'myatsti sa ja nwindson'ajtim Jesucristo kyudanaabyi mduk-madoooidøø ¹⁸ ku wyandøø yide'en: "Ku wyingøñ jøts ja nwindson'ajtim mye'ent jats kyaxø'øktit ja jaa'y pøn tka'ødyejtip tka'øgyajpxtip ja Dios yja'. Ka'øyjaa'y'ajttip ja' jade'en sa ja kø'øm ñadyamidsøkyidi." ¹⁹ Yø' nugo tyikwinmaa'ñmya'atwamp ja jaa'y; ja'ayi chojktip ja kya'øybi jøts ka'ap Espiritu Santo ja tmøøt'atti.

²⁰ Meets migu'uktøjk, tu'ugyi mnabyikta'agidit jøts tu'ugyi xyik'ettit ja mjanchja'win midi ja Dios yajkpy. Ku ja Dios x'ajot'attit, ja Espiritu Santo mbudøkyidip. ²¹ Xtsøjkindip ja Dios, xpa'ayo'owindip ja Dios, paty øyim mnay'ejx'etidit sam ja ttsøkyin. Njøp'ejx'ejtindip ku ja nwindson'ajtim Jesucristo xmø'øyint ja øy'ajtin midi xemikøjxp.

²² Yikjotkujk'atti ja' pøn pyamaapy pyadajpy pøni midi'ibi pyabøkp. ²³ Tuu'mo'odi kajpxwejtì ku tyundigøydi jøts ka'ap ja ayo'on tpaattit; jøts xpa'ayo'ot nayide'en pøn ka'øyjaa'dyi, øyim mnay'ejx'etidit kø'øm, jøts ka'ap jade'en xu'undit sam ja'adi.

Ku ja Judas tkajxa'aky ja Dios jøts tyikjøpkijxy ja ñøky

²⁴⁻²⁵ Tu'uk ja Dios møj, pøn tnija'wip, pøn xyiknitso'ok'ajtimp, ja'ats ja myøk'ajtin xa'ejx'ejtimp jøts ka' ndundigø'øyint, jade'en'ampyts agujk jotkujk xukwinguwa'jka'ant ja' wyindump, ku niti pøky ngamøøt'ajtint. Ja'ats tmøøt'ajtp ja øy'ajtin ja møk'ajtin nwindøn'ajtim Jesucristo køjxp, jaayip ku ja tyiktso'ondakijxy tuki'iyyi, jøts kunim ja nayide'en tyikjøpkøxt. Jade'en idø'on ja y'ejxi tyiyi.

YA'AT AYUUIK JA JESUCRISTO TYUKNIJA'WI KUMAA'YJØTPY JA JUAN

Ku ja Jesucristo ttuk'ijxy ja Juan sa ja naxwii'ñit yjatt

¹ Ya'at idø'øn tiy'ajtin midi ja Dios Teety tyukmadoow ja Jesucristo, jøts ja pyadumbi pyabøjkpi ttuk'ext ttuknijawit sa nøjck yjatt kyubatt tsojk ya naxwiiñ. Nay øts ja tiy'ajtin tuki'iyi tø xuk'ixy tø xuknijawi sa tu'uk y'ankilis tø xukmønjapxy. ² Xjats øts njaadyangijxy tuki'iyi pøni ti jaty ja Dios Teety møøt ja nwindson'ajtim Jesucristo tø xuk'ixy xukmadø.

³ Tya'ø'y'ajtidip ja Dios kyunuu'kxin pøn ya'at nøky t'ejxp jøts tpadu'unt, nayide'ents ja' pøn tmadoop, pø wingompxi dø'øn jøts jade'en yjatt sam yø nøky wya'añ.

Ku ja Juan tñija'ayiyi'ñ pøn jaty ja Dios tjanchja'widip ja niwixujkpi kajp

⁴ Øts Juan, øts meets ya'at nøky ndanija'ayip pøn ja Dios tjanchja'widip, ja niwixujkpi kajp midi jam Asia y'etjotp. Paat meets ja kunuu'kxin øy'ajtin midi ja Dios yajkpy, ja' midi xemikøjxp jujky'ajtp, nayide'ents mgunuu'kxidit ja niwixujkpi ja'win midi møøt y'ity ja Dios Teety. ⁵ Wan mgunuu'kxyidi nayide'en ja nwindson'ajtim Jesucristo pøn tnanky'ejxip ja tiy'ajtin, jøts pøn myijawyeen tø yjujkyøjkojmi jap oo'kpi jutjøtpy. Ja'ats nayide'en tñigutujk'ajtp niduki'iyi ja møj windsøndøjkti ya naxwiiñ. Nayide'en ja Cristo xpa'ayø'yimp sa tø xyikpøkwyaaajchim ku tø wyidsuñ wyidaxy adøm nbøkyøjxp. ⁶ Tøts ja xpiktaajkyim jade'en øyjaa'y møjaa'y, jøts nbadu'unindit ja Dios Teety yja' midi tyeety'ajtp nwindson'ajtim. j'Wan tja'myejchim xemikøjxp ja Dios y'ø'y'ajtin myøk'ajtin! Jade'en idø'øn ja yjatt.

⁷ j'Meets, uk'ejxti ukmadowdi, jade'en idø'øn ja Cristo mye'ent yootsjøtpy! Jøts niduki'iyi n'ejxint, nayide'en ja'adi pøn ja nwindson'ajtim yik'ayo'ombaaajt kruskøjxp; janch ya'axtip janch j'i'diyip ja naxwii'ñit jaa'y ku jade'en t'ejxtit. Jade'en idø'øn ja yjatt.

⁸ Yide'en ja Dios Teety wya'añ pøn ja myøk'ajtin møj, jøts pøn xemikøjxp jujky'ajtp: "Øts idø'øn ja tso'ondaajkin jøts øts nayide'en ja jøpkøjxin'ajtin nyajkpy."

Ku ja Juan t'ijxy ja Cristo

⁹ Øts Juan, meets nmigu'uk'ajtpy ku ixyam nayide'en ngu'ayo'ombaaajtindi ja nwindson'ajtimgøjxpit, paty adøm xmø'øyim ja øy'ajtin ja tuda'aky'ajtin jøts ja xyik'ejtint ma ja kyutujk xanatanaa'yimp. Jam øts wyinaty ndsumchøøni ma txøøw'aty Patmos jam mejy kyujk'am, ja'agøjxp ku øts ja Dios kyajpxy ngajpxwa'kxi jøts ja Jesucristo yja' nngajpxi.

¹⁰ Domingi xøøw wyinaty ku øts ja Espiritu Santo adsu'jky xatøki, jøts kumaa'yjøtpy møk øts xjiguyaa'xi ejxim tu'uk ja puxujx, ¹¹ yide'en ja wya'añ:

—Øts idø'øn nyiktso'ondaajk tuki'iyi jøts nay øts nyikjøpkøxp. Midi jaty m'ejxp mnijawip, tanijayi pøn ja Dios ja'ajtp ma niwixujkpi kajp jam Asia y'etjotp. Ja' xyøøw ja kajp: Efeso, Esmirna, Pèrgamo, Tiatura, Sardis, Filadelfia jøts Laodicea.

¹² Xjats n'ejximbijty pøn øts xmigajpxp, jøts n'ejxpaaty wixujk ja kandleeri midi tum oori. ¹³ Jam wixujkpi kandleeri kujk'am n'ijxy tu'uk ja jaa'y jade'en sam adømmin, jade'en ja wyet tyek'ok'am paat kyida'aky. Tum oori ja chum kyaxi'iky midi ja'tp kyachwiiñ. ¹⁴ Ja kyubajk, janch amuum poop ja wyaay kyaxi'iky ejxim ja poop pixyin, ejxim tsap'øøpkyin, jøts ja wyeen jade'en kyaxi'iky ejxim jønyowin. ¹⁵ Ja tyeky, jade'en kyaxi'iky janch amuum tsamamp ejxim ja pujx n'uk'ejxint midi janch tøø'kxp, midi øyip ornijøtpy; ku ja kyajpxy, møk idø'øn nmadoo'wint, jade'en ejxim ja møj nøø y'iichin. ¹⁶ Jam y'aga'ngyøjømøtmach'ity wixujk ja maadsa', jøts y'aawjøtpy pyidsimy tu'uk ja yønchujx midi janch jøpxuu'ñi jøts adsow jøøp. Jade'en kyaxi'iky ja wyeen ja y'aaw ejxim ja xøøw møk y'añin.

¹⁷ Ku øts n'ijxy jade'en, winets øts ojts øøky nayjawiyi nnaaxkida'aky ja' tyekyø'øm, jøts øts ojts y'aga'ngyø' xanixajy jøts ø xnimaa'y:

—Kidi mdsø'øgi; øts idø'øn, tø nyiktso'onda'aky tuki'iyi nayide'en sa nyikjøpkøxt. ¹⁸ Jujky'ajtp øts idø'øn øy tø nja'øøky, xemikøjxp njujky'aty jøts øts ja møk'ajtin njagejpy, jøts øts nyikjujkyøøkt pøni pøn tø y'ookti tyigøydi. ¹⁹ Jaadyangøx tuki'iyi midi ixyam m'ijxpy, midi ixyam mnija'wip, jøts midi jatwamp. ²⁰ Jade'en idø'øn ja twandijy midi tø x'ixy, ja wixujkpi maadsa' n'aga'ngyøjøm jøts ja wixujkpi kandleeri nayide'en: ja wixujkpi maadsa', yø' twandejp pøn ø ngugajpxy'ajtpy ma øts ja njanchja'wibitøjk jamdi ma wixujkpi kajp jam, jøts ja kandleeri ja janchja'wibitøjk ja'adi, pøn jam'ajtpit.

2

Ya'at ayuujk ja nwindson'ajtim tyaniguejxy ja yjaa'y ma ja wixujkpi kajp: Yide'en jawyeen yiktanija'ayiyi'ñ ja Efesit jaa'y

¹ Nijayi øts ngugajpxy midi jam Efeso sa øts ixyam nngajpxy: “Yide'en ja wya'añ pøn jam y'aga'ngyoj'øm tmach'ejtp ja wixujkpi maadsa' jøts pøn jam tanaapy wixujkpi kandeleeeri kuj'am: ² Wa'ats ø nnijawi tuki'iyi pøni ti mdumpy; nnija'wip ø tuki'iyi sa møk mduñ øts køjxp, jøts sa mduda'aky'aty, nayide'en ø nnijawi ku xkagupiky pøn ka'øyja'y'ajttip. Tøxi x'ixy tu'uk jaty pøn nugo nadyejidip øts ngudanaabytøjkti, ka'ap ja tyiy'ajtin wyingaxi'iky, nugo ja wyindaayidi. ³ Øy møk ja maa'kxujkin tøjagyepy ku tøjpaduujni øts nja', jøts ku tøjxku'ayo'ombaadi øts køjxp, jøts ka'ap ja jøtkøjxin tøjxmøt'aty. ⁴ Tu'uk øts nga'øyjawi mets ja mjaa'y'ajtin: ku mets ka' nayide'en x'uktsojkn sam xyiktso'ondaajky. ⁵ Paty ø nwa'añ, ja'myats pøni ma tøj mduu'digø, jøts xyiktigatst ja mwinnmaa'ñ, jøts nayide'en xu'unt sam jawyeen tøj xuñin. Pøni ka' xuñ jade'en, nbøjknip øts yøj kandeleeeri midimøt'ajtpy. ⁶ Ots idø'øn yjade'eni, mjagyepy nayide'en ja øy'ajtin ku nayide'en xkatsøky ja nicolaifas y'ixpøjkin sam ø ngatsøkyin. ⁷ Madowdi yikxon sam ja Espiritu Santo tmigajpxy pøn ja Dios ja'ajtip, yide'en ja wya'añ: Pøni pøn tmimajadaq ja miku' yja', ja'ats nmo'op ja øy'ajtin xemikøjxp ma Dios y'ity.”

Yide'en ja Esmirnit jaa'y yiktanija'ayiyi'ñ ja ayuujk

⁸ Nijayi nayide'en øts ngugajpxy pøn jam ejtp ma øts njanchja'wibitøjk jam Esmirna kajpjtøp: “Yide'en ja wya'añ pøn tuki'iyi tøj tyiktso'onda'aky jøts pøn nayide'en tyikøxp, ja' pøn o'jk jøts yjukpyøjkojmi oo'kpi y'agujkpy: ⁹ Nnija'wip ø tuki'iyi pøni ti mdumpy; pøni sa m'ayøj mwinnmay, øy yøj meeñ kyidyimy'ity, tøj ja Dios mdsu'ijxyi mdsujawiyi ja' wyinguljk. Nnija'wip øts ku mjemigajpxy mdemigajpxy winaagin pøn nugo nadyejip israelit jaa'y, yøj yide'en nugo tjayikmajada'akwajnidip ja miku' yja', pøj ka'axi Dios ja tja'aji. ¹⁰ Kidi mdsø'øgidi pøni sa mjattit mgubattit; yøj miku' mnankchumwajniyidip jøts nidu'uk nidu'uk myikjot'ejxtit, jøts xmatjstu'uttit ja Dios yja'; øy yøj mjayik'etidit majk xøøw puxøjkjøtpy, tu'ugyi ja mwinnmaa'ñ xyik'ettit o mjadyimy'oøkti, øts mee nmo'op ja jujuk'ajtin midimøt'ajtpy. ¹¹ Madowdi yikxon sa yøj Espiritu Santo tmigajpxy pøn ja Dios ja'ajtip, yide'en ja wya'añ: Pøni pøn tmimajadaq ja miku' yja', ka'ap ja tpaqt t'ext ja ayodaajk. Ka'ap ja y'anmija'win sa yjatt.”

Yide'en ja Pérgamit jaa'y yiktanija'ayiyi'ñ ja ayuujk

¹² Nijayi nayide'en øts ngugajpxy pøn jam ejtp ma øts njanchja'wibitøjk jam Pérgamo kajpjtøp: “Yide'en ja wya'añ pøn tmøt'ajtp ja yøñchujx yjøpxuu'ñ adsow jøøjp: ¹³ Nnija'wip ø tuki'iyi pøni ti mdumpy jøts ku jam ja miku' møk y'ane'emy ma mdsøøni, ka' xja'dyigø ja njanchja'win øy øts njanchja'wibitøjk yjadyimy'ø'jky pøn tøjxøw'ajt Antipas, pøn øy tsuj xpaduujni n'ayuujk. ¹⁴ Ya'at øts n'øy'ijxy nga'øy'ijxy pøni ti mdumpy: jam meets winaagin jam Pérgamo, pøn tkamajstu'utwamp sam ja Balaam ja y'ixpøjkin jekyjin tyik'ity, ja'ats øjts t'agajpxi ja Balac jøts ttukmado'ot ja israelit jaa'y sa tyundigø'odyit. Øjts ttukmadøy jøts tøjø'kxtit midit tøj wyinaty yiktamiyøxy ja maxandsaa, jøts nayide'en o sa pøn ñamyøt'atiyidit. ¹⁵ Nayide'en meets jam winaagin pøn tkamajstu'utwamp ja nicolaifas y'ixpøjkin midit øts ngatsøjkpy. ¹⁶ Paty ø nwa'añ, jøts tyiktigatst ja wyinnmaa'ñ; pøni ka'ats, tsojks ø nnøjxkt jøts ndatseptu'unt ja nyøñchujx midit pidsoemp n'aa'wjøtpy. ¹⁷ Madowdi yikxon sa yøj Espiritu Santo tmigajpxy pøn ja Dios ja'ajtip: Pøni pøn tmimajadaq ja miku' yja', ja'ats nmo'op ja ji'lkxy midit yiktejp maná midit yu'uch ejtp; nayide'ents ø nmo'ot ja matska'gaa'u'nk midit poop, japts tu'uk ja xøøw kyøjja'ayi midit jemy jøts midit ka' yik'ixy yiknijawi, ja'ayi tu'uk tnija'wip pøn ja yikmøøpy.”

Yide'en ja Tiatirit jaa'y yiktanija'ayiyi'ñ ja ayuujk

¹⁸ Nijayi nayide'en øts ngugajpxy midi jam ejtp ma øts njanchja'wibitøjk jam Tiatira kajpjtøp: “Yide'en ja Dios U'nk wya'añ pøn ja wyeeen jade'en kaxø'kp ejxim ja jøn'ayowin, jøts ja tyeky ejxim tu'uk ja puix midit janch tøjø'kxp tsamamp: ¹⁹ Nnija'wip øts tuki'iyi pøni ti mdumpy, sa mmigu'uk xpa'ayø, sa ja Dios kyajpxy xpaduujni, sa xpuðøki pøn ti ka'ejttip jade'en sa mduda'akyjaa'y'aty. Tøj øts nja' xyikmiweni xyikaja'aji jawaani øy yam, ka'ap jade'en sam jawyeen tøj xyiktso'onda'aky. ²⁰ Ya'at ø n'ijxy nga'øyja'wip mets køjxp: ku xkupiky ja ka'ødyø'øxy Jezabel, pøn ñadyijyi ja Dios kyajpxy tkajpxip, nugots ja y'ixpøjkin ja ttawin'iiñ øts ja njanchja'wibitøjk kuk idø'øn øy o sa pøn ñamyøt'atiyit jøts ku tøjø'kxtit midit tøj yiktamiyøxy ja maxandsaa. ²¹ Tøts øts nayide'en njanøjmi jøts tyiktigatst ja wyinnmaa'ñ sam pyaat'aty, ka'ats ja tpadunwa'añ: ka' tmatjstu'utwa'añ ja kya'øy'ajtin. ²² Øts ja nwandu'ump sa ja yuu ja pa'am pyaadiyit, nayide'en niduki'iyi pyaatkøxyit ja ayø'on pøn jaty møøt tøj tyundigø. ²³ Nwandu'umpts øts nayide'en ja y'u'nk ja y'una'jk pøn ka'ødyø'øxy'ajttip. Jade'en idø'øn t'ejxtit tnijawidit niduki'iyi øts njanchja'wibitøjk sam øts wa'ats n'ejxkapy sam pøn tu'uk jadu'uk wyinnmaa'ñ tøjagyepy y'am yjotp. Nidu'uk nidu'uk meets ndiødu'undit pøni sa jaty pøn tøj y'adø'øtsti. ²⁴ Ka'ap øts sa nwa'andijy ku ja ka'ødyø'øxy yja' tøj xkabaduujni ku ja miku' kyootswinnmaa'ñ tøj xkayikmajadaajkidi.

²⁵ Padun'etti xemikøjxp ja winmaa'ñ midi myiktundip kunim ø nme'ent. ²⁶ Pøni pøn tmimajadakp ja miku' yja' jøts nayide'en ttu'unt sam ø ndsøkyin, ja'ats nmo'op ja møk'ajtin jøts tniwindsøn'att niduki'yiyi ja naxwii'ñit jaa'y. ²⁷ Yø'øbi møk'ajtin midi øts ja Dios Teety tømø'øy, nay yø'øts mdaba'ejxtip mdabayø'ødyip ja naxwii'ñit jaa'y. ²⁸ Nayide'ents meets nmo'ot ja øy'ajtin jøts meets møøt n'ett xemikøjxp. ²⁹ Madowdi yixxon pøni sa jaty ja Espiritu Santo tnøjmi ja janchja'wibitøjk pøn ejtip jam ma niwixujkpi kajp."

3

Yide'en ja Sardisit jaa'y yiktanija'ayiyi'ñ ja ayuujk

¹ 'Nijayi nayide'en øts ngugajpxy pøn jam ejtp ma øts njanchja'wibitøjk jam Sardis kajpjo: "Yide'en ja wya'añ ja' pøn tkajxp ja niwixujkpi kugajpxy jøts midi tpøjkø'kp ja wixujkpi maadsa': Wa'ats' nniwaji pøni ti mdumpy. Øts myiktijiyi myikwa'añ ku øy tsuj mduñ, nnija'wip øts ku ka' mduñ. ² Jawidi, nay'ej'etidi, jøts ka' jadi'iñi mwindingø'odyit; n'ijxy nnija'wip øts midi mdumpy ku ka'ap tyiy'aty Dios wyindump. ³ Ja'myatsti ja øy'ayuujk ja øy'ajpxy midi tømadowdi tømukpøkti; nay yø' mbaðu'undip jøts ja mwinmaa'ñ xyiktigatst. Ku xkatu'unt sam nwa'añ, winets ø nme'ent adsu'jky sam ja maa'tspi myiñ, nika'ap ja xniyawit pøni juuni nme'ent ejpxi payø'øbyi. ⁴ O meets yø'øbi winmaa'ñ tømjababiky, jamts winaagin pøn øy wa'ats jaa'y'ajttip, ja'ats ø møøt n'ity xemikøjxp sam pyaat'aty. ⁵ Pøni pøn tmimajadakp ja miku' yja', ja'ats ja wa'ats'ajtin tsuj'ajtin tpaatp, ka'ats øts ja xyøøw nyiktigøjyi midi tømikja'ay jap nøkyøtpe ma jap y'ity ja jaa'y xyøøw pøn jujky'ajttip xemikøjxp. Ngajpxkaxø'kjixpy øts ja jam Dios Teety wyindump jøts jam y'ankilis wyindump. ⁶ Madowdi yixxon pøni sa jaty ja Espiritu Santo tnøjmi ja janchja'wibitøjk pøn ejtip jam ma niwixujkpi kajp."

Yide'en ja Filadelfit jaa'y yiktanija'ayiyi'ñ ja ayuujk

⁷ 'Nijayi nayide'en øts ngugajpxy pøn ejtp jam ma øts njanchja'wibitøjk jam Filadelfia kajpjo: "Yide'en ja wya'añ ja' pøn øy'ajtp wa'ats'ajtp, ja janchpi ja tiiby, nayide'en ja møk'ajtin tjagyepi jade'en ejxim ja rey David y'ijty yikutuky: Ku ja tuu' nyik'awa'ach ka' pøn mibaat tyik'awa'atst. ⁸ Nniwaji'wip øts tuki'yiyi pøni ti mdumpy. Tøts ja mduu' nyik'awa'ach midi ka' mibaat pøn tyik'adukt; øy ja møk'ajtin waani tømjagyepi tøts ja n'ayuujk xmøjpktaajki, ka'ap ø tømkgapiky. ⁹ Jamts winaagin pøn nugo nadyejip israelit jaa'y jøts øts nja' ñadyijyi xyiktuujni. Ka' tyiy'ajtin, taay ja pyiktakpy ku ja miku' yja' tyiktuujni, nay øts ndukupøkp jøts mwindsø'øgyiyit, m'ejxkapiyit ku mee ndsøky. ¹⁰ Tøm øts n'ayuujk xpaduujni ku øy tuda'aky mjaa'y'atti sa dømøn nda'ane'emy, nayide'ents nbøkjikpy n'ejxji'kpyts meets møy'ajtin. Jats yik'ext ku ja møk ayo'on ku ja tiidyu'unin ñaxkida'akt jøts ja payø'øyin tyuñit pøn jaty tøm y'ø'y'atti ya naxwiñ. ¹¹ Me'emp øts tsojk. Yik'etim yøm mwinmaa'ñ jade'en sa tøm xpaduñ, ka' pøn mibaat ja Dios yja' mbøjkyiyit. ¹² Pøni pøn tmimajadakp ja miku' yja', ja'ats møjtojkp ma ja Dios, nijuuni ja tkamajststuttit; nayide'ents meets ja Dios xyøøw ndawinja'att jøts ja kyajp midi yiktejp jemy Jerusalen, yø' tsoomp jam Dios wyingukp; ndawinja'apts meets njemxyøøw nayide'en. ¹³ Madowdi yixxon sa yøm Espiritu Santo tnøjmi pøn ja Dios ja'ajtip ma niwixujkpi kajp."

Yide'en ja Laodiceit jaa'y yiktanija'ayiyi'ñ ja ayuujk

¹⁴ 'Nijayi nayide'en øts ngugajpxy pøn ejtp jam ma øts njanchja'wibitøjk jam Laodicea kajpjo: "Yide'en ja wya'añ ja' pøn tyakp ja ty'ajtin, pøn tyiktso'ondakøjk tuki'yiyi: ¹⁵ Nniwaji'wip øts tuki'yiyi pøni ti mdumpy, ku nugo ejxingøjxp øts nja' xpaduujni, ka'ap amunjojt. iØy'ajtp ku tu'ugyi xpadu'undit, pøni ka'ats, majstst'utkts øts! ¹⁶ Kumi ka' xniyawidi pøni midi ndunwandip, nugo mee møk xyikjotkixy, ndyimyajststutwampy mee ne'egi. ¹⁷ Nømp mee mwa'añ jøts ku meets jotkujk xyiknaxy, ku niti mgadigø'øxyi; ka'ats mnayjawi ku niti mgaljtxyi, ku nugo wimbeets kugoots xyiknaxy. ¹⁸ Yide'ents idø'øn ja kajpxwejin nmøø'y, jøts ø x'amido'ot xpøktso'ot midi øts nmøø'ajtpy, jade'ents xpaatt ja øy'ajtin, ja wa'ats'ajtin jøts ja ja'gyujkin. ¹⁹ Jade'engøjxp meets ixyam møk n'ane'emy ku mee nba'ayøp. Møk xwindanidit jade'en sam øts xmijotimbettit. ²⁰ Ejx ku meets ya ngugajpxi y'ity ya mdøk'agi'y; pøni pøn øts n'ayuujk xmadøjip jøts øts nja' xkupøjkit, ejtpts øts ja møøt n'ett. ²¹ Pøni pøn tmimajadakp ja miku' yja', møøts øts ja n'ett, jøts øts ja kutujk nmo'ot nayide'en sam øts ja Dios Teety tømø'øy ku øts ja miku' yja' nmimajadaajki, møøts øts ja Dios Teety n'ity. ²² Madowdi yixxon sa ja Espiritu Santo tnøjmi ja janchja'wibitøjk ma jam ja niwixujkpi kajp."

4

Sa ja Dios Teety yikajxa'aky jap tsajpøtpe

¹ Ku tɔ jade'en y'ukjaty jɔts n'ejxpaaty ja tsajp y'awa'adsɪ ejxim ja tɔjk'aawin; jɔts ja ayuujk nmadɔɔy mɔk sam ja trompeta'an midɪ ɔts jawyeen xmigajpx, jɔts ɔts xnimaay:

—Pat yam, jɔts nnanky'ejxit tuki'iyi sɔ yjatwa'añ kyubatwa'añ.

² Tɔ ɔts wyinaty ja Espiritu Santo xatɔki, kumaa'yjɔtɔpy n'ixy jade'en tu'uk ja tsinaabyajt jap tsajpɔtɔpy ejxim ja mɔj windsɔn yja'ajin, jamts chɔɔni tu'uk ja jaa'y ³ midɪ jade'en kaxɔ'kp ejxim ja tsaa midɪ janch tɔɔ'kxp tsamamp, sɔ ja jaspe tsaa, uk ja cornalina tsaa; jamts i'jch tɔ ñawididity, jade'en tyi'lkxy sam ja esmeralda tsaa. ⁴ Mɔ ja mɔj tsinaabyajt jam, jamts ɔ n'ixy ee'pxmaktaxk ja tsinaabyajt nawidity, jamts ja mɔjaa'dyɔjk ni'ee'pxmaktaxk chɔɔnidi, amuum poop ja wyetti jɔts tkujup'atti ja koroni janch amuum oori. ⁵ Mɔk ja anaaw ja widsujk pyidi'iky mɔ mɔj tsinaabyajt jam; nay jam wyingujkp wixujk ja jɔɔn tyɔɔbyiky, ja niwixujkpi ja'win idɔ'ɔn ja' midɪ ja Dios Teety mɔɔt y'ity. ⁶ Nay jam mɔj tsinaabyajt wyindump kyaxi'iky tu'uk ja mejy, janch wa'ats janch tɔɔ'kxp ejxim keega'an.

Jɔts jam nayide'en ja mɔj tsinaabyajt ñawidity; namaktaxk ja jiyujk midɪ may ja wyeeen tmɔɔt'ajtip, kaxɔ'kp yjɔkxi'py kaxɔ'kp wyindujy. ⁷ Ja myidu'ukpi jiyujk, jade'en ja kyaxi'iky ejxim tu'uk ja kaajin; ja myimajtskpi jiyujk, jade'en ja kyaxi'iky ejxim ja tsakaajin; ja myidigɔɔkpi jiyujk, jade'en ja wyeeen ja y'aaw kyaxi'iky ejxim ja jaa'yin; jɔts ja myimaktaxkpi jiyujk kyaxi'iky ejxim ja weejts kyakwidityin. ⁸ Tu'uk jaty ja jiyujk tudujk ja kyank tmɔɔt'aty, may ja wyeeen nayide'en kyaxi'iky yjɔkxi'py jɔts wyindujy; xinaxy tsunaxy ja Dios tja'myatsti jɔts ñɔm'etti:

Janch ɔy janch wa'ats me Dios Teety,

Mets tu'ugyi ja mɔk'ajtin mjagejpy,

jɔts xemikɔjxp mjujuk'yaty.

⁹ Xjats ku ja jade'en ja nimaktaxkpi jiyujk ttundi, ku ja jade'en tja'myatsti ja' midɪ xemikɔjxp ejtp, midɪ tsinaapy mɔj tsinaabyajt kɔjxp, ¹⁰ xjats ja ni'ee'pxmaktaxkpi mɔjaa'dyɔjk jatyi ñagyuxendya'agyidi, jɔts ja kyoroni tkiidyakti jam mɔj tsinaabyajt wyingujkp jɔts wya'andi:

¹¹ Mets Dios Teety, mets amuum mɔj sam pyaat'aty; myikwindsɔ'ɔgit myikwinjawit.

Pɔ tɔxi xykto'sondakjxy tuki'iyi mdsɔjkingɔjxp jɔts jade'en y'ett.

5

Ja nɔky jɔts ja Borreek U'nk

¹ Xjats n'ijxy ja' pɔn jam tsinaapy mɔj tsinaadyajkɔjxp ku jam tmach'ity y'aga'ngyɔjɔ'ɔm tu'uk ja nɔky abidity midɪ ja'ay jɔtɔpy jɔts ñikɔjxp, wixujk weents ja cha'ayi, jɔts ja jade'en y'aduky. ² Winets ɔ n'ijxy tu'uk ja mɔj ankilis jɔts ja mɔk t'amidɔy:

—¿Pɔn paat'ajtip tyik'awa'atst yɔ nɔky, jɔts t'agɔ'ɔtstu'utt yɔ seeyi?

³ Nipɔn ja tkanadyaja'ejxiyi tyik'awa'atst, ni tsajpɔtɔpy ni naxwiin ni naxpatkipy, nipɔn ja tkawin'ejxwa'añ. ⁴ Xjats ɔts nyaaxni njiin, nipɔn kyayikpaaty pɔn tyik'awa'atst ja nɔky jɔts yik'ext yiknijawit, nipɔn ja tka'ukwin'ejxwani. ⁵ Xjats ɔts xnimaay ja mɔjaa'y tu'uk:

—Kidi mjanchya'axy, jaa tu'uk pɔn tngubajk'ajtp ja Judajit jaa'y, jɔts pɔn ja rey David y'apip, yɔ'ɔts tɔ myajada'aky jɔts t'agɔ'ɔtstu'utt ja wixujkpi seeyi jɔts tyik'awa'atst ja nɔky.

⁶ Xjats ɔ n'ijxy tu'uk ja Borreek U'nk tyani mɔ mɔj tsinaabyajt jam, ja' kyujk'am mɔ ja mɔjaa'dyɔjkti, jɔts mɔ ja nimaktaxkpi jiyujk jam. Jamts ja yik'ijxy kyaxi'iky sam ti yjaty kyubety y'ayo'ombaaty. Wixujk ja wyaj tmɔɔt'aty jɔts wixujk ja wyeeen; jade'en yɔ tijy yɔ wixujkpi ween sam ja niwixujkpi ja'win midɪ ja Dios tɔ tkexy ya naxwiin. ⁷ Xjats ja Borreek U'nk tninijxy pɔn wyinaty tsinaapy mɔj tsinaabyajtkɔjxp jɔts tɔjki ja nɔky midɪ wyinaty myɔɔt'ajtp y'aga'ngyɔjɔ'ɔm. ⁸ Ku ja tpijky ja nɔky, winets ja nimaktaxkpi jiyujk jɔts ja ni'ee'pxmaktaxkpi mɔjaa'dyɔjk ñagyuxendyajkidi jam Borreek U'nk wyingujkp. Nidu'uk ja mɔjaa'dyɔjk tmɔɔt'atti ja kow midɪ yiktejp arpi, jɔts nayide'en tkondi ja poom tɔɔy'hiñ, tum oori ja', jade'en yɔ poom tijy sam ja Dios'ajot'ajtin midɪ kyajpxtip pɔn jaty ja Dios Teety ja'ajtip. ⁹ Jamts yide'en ja jemy iy tyikwandɔɔ:

Mets idɔ'ɔn mbaat'ajtip yɔ nɔky jɔts yɔ seeyi xkɔɔtst;

ja pɔ tɔts xniwanguixy niduki'iyi ja jaa'y, o midɪ kajp o midɪ ayuujk,

jade'engɔjxp ku tɔ m'ayo'ombaaty mɔ tɔ mdsuñ tɔ mdaxy.

¹⁰ Tɔ ɔts xyikmɔjtɔki jɔts ɔɔ nbadu'unt sam ja Dios tsɔkyin, jɔts ɔɔ nwindɔn'att ja naxwiin'it.

¹¹ Winets ɔ n'ixy ja ankilis namay tni'awidetti mɔ ja mɔj tsinaadyajk jam, nay jamts wyinaty ja nimaktaxkpi jiyujk jɔts ja mɔjaa'dyɔjkti, ¹² mɔk y'ɔɔwdi tum jade'en jɔts wya'andi: Janch ɔy ja Borreek U'nk midɪ tɔ y'ayo'ombaaty, paat'ajtip jɔts tpaatt ja mɔk'ajtin ja ɔy'ajtin, ja wejin ja kajin. Paat'ajtip yikwinjawit yikwindsɔ'ɔgit.

¹³ Xjats nmadøøy nayide'en ku y'øøwdi niduki'iyi ja naẓwii'ñit jaa'y jade'en tsajpjøtpy naẓkijxy, jøts jade'en øy ja ma jøts wya'andi:
Janch øy janch møj ja Borreek U'nk,
paat'ajtíp yikwinjawit yikwindsø'øgit xemikøjxp.

¹⁴ Xjats nayide'en ja nimaktaxkpi jiyujk wyandøø:

—iOts jade'en!

Xjats ja ñi'ee'pxmaktaxkpi møjaa'dyøjk niduki'iyi ñagyuxendyajkøxidi jøts twindsø'øgidi ja Dios.

6

Ja wixujkpi seeyi

¹ Jøts ø n'ijxy ja Borreek U'nk ku ja myidu'ukpi seeyi t'ago'otstu'uty ja wixujkpi seeyi, jøts nmadøøy tu'uk ja ñimaktaxkpi jiyujk ku møk yjanchwina'añ jade'en sam ja anaawin, jøts yide'en wya'añ:

—iMen x'uk'ixy!

² Jøts ø n'ijxy tu'uk ja poop kawaay, pønts ja tyatsinaajyip, arki ja tu'uk pyagajpy. Tu'uk ja koroni yikmøøy ku tø myajada'aky ma tsep, tyun'adø'øtswampy jøts cho'ongojmi.

³ Xjats ja Borreek U'nk ja myimajtskpi seeyi t'agø'øtstu'uty, jøts ja myimajtskpi jiyujk wya'añ:

—iMen x'uk'ixy!

⁴ Jøts jadu'uk ja kawaay kyaxi'iky, tsajpts ja 'ñine'kx. Pøn ja ttatsinaapy ja'ats yikmøøy tu'uk ja amøjtsujxyøñ jøts yiktanipijky jøts ja cheptu'unt, jøts niduki'iyi ja naẓwii'ñit jaa'y ñañibidøkøxiyt, xem ja yam ñanky'oogiyidit, ka'ap ja jotkujk'ajtin ma.

⁵ Xjats ja Borreek U'nk ja myidigøøkpi seeyi t'agø'øtstu'uty, jøts ja myidigøøkpi jiyujk wya'añ:

—iMen x'uk'ixy!

Winets ø n'ixy tu'uk ja yøk kawaay, pøn ja ttatsinaapy, tati'yin ja wyejts'ijtpy kyøjø'øøm.

⁶ Jats ja ayuujk nmadøøy jam ñimaktaxkpi jiyujk kyujk'am, ku wya'añ yide'en:

—Wimbatp nøjxk ja trigo jøts nayide'en ja cebada midi amuum tump; aceite jøts ja vino ka' wyimbatt.

⁷ Xjats ja Borreek U'nk ja myimaktaxkpi seeyi t'agø'øtstu'uty, jøts ja myimaktaxkpi jiyujk wya'añ:

—iMen x'uk'ixy!

⁸ Winets ø n'ixy tu'uk ja pu'ts kawaay, pøn ja ttatsinaapy ja'ats yiktanipøjk jøts ja yikjaa'y'ookt. Ix'oojk ja pyamiñi pøn tkudanaapy ja ayodaajk. Xjats ja yiktaguwa'anøø jøts tyik'ayo'ombaañt jawaani kagujkwa'kxy ja naẓwii'ñit jaa'y, jade'en'ampyts ja tyik'ookt ku tkaxt ja tsep, ja yuu, ja pa'am jøts ja awa'an jiyujk.

⁹ Jats ja Borreek U'nk ja myimagoxkpi seeyi t'agø'øtstuujty, jøts n'ijxy altajr patki'py may ja anmija'windi pøn tø tku'oogidi ja Dios yja'. ¹⁰ Ja'ats kauptip møk, jøts ja Dios yiknimaay:

—Janch øy janch wa'ats me Dios Teety, jøts xui ja tiy'ajtin. Juuninim xpayø'øty xiidyu'unt ja jaa'y pøn øøts tø xyik'øøky ya naẓwiiñ.

¹¹ Jøts yikmøøy ja poop wet jøts yiknimaadyi jøts pyoo'kxtit y'awejxtitnim øy winø'nin. Wan t'uknamyukyidi ja migu'uktøjk pøn tku'ookwajñipnim ja Cristo yja'.

¹² Xjats ku ja Borreek U'nk t'agø'øtstuujty ja myidudujkpi seeyi, xjats ja tsaachmøk uẓx ñajxy. Jøts ja xøøw amuum yøk yjajty ejxim tu'uk ja yøk wetin, jøts ja po' tsajpts kyaxi'iky ejxim ja wa'ats tsajpts ni'jpyin, ¹³ jøts ja maadsa' kya'y naẓkijxy, jade'en ejxim ja tsaachmøk poj tyikajtskøøy ja uẓts tøøm. ¹⁴ Jøts ja tsajp jadi'iñi ñawa'kxkøjxniyi, jade'en ja yjajtni ejxim ja nøky jadi'iñi y'abidejtmuky, jøts ja kojpk jøts ja naajx midi mejy kyujk'am tuki'iyi tyigatskøjxni ma ja y'uk'ijty. ¹⁵ Xjats ja jaa'y kyakwidejtnidi, t'ixaabyi naẓwa'knidi ja nayu'utstaajk, tyøjkiñøø tsaag jutjøtpy tsaag ankjøtpy øy ma. Jajttip ja windsøndøjk ja kumeendyøjk, ja møj ja mutsk. Jajttip ja soldadi wyindsøndøjkti, nayide'ents ja jaa'y pøn mijuy kamijuy tundip. ¹⁶ Jøts wyanidi ku ayo'on jade'en t'ejxti:

—iWan ja kojpk wan ja tsaag ne'egi xyik'ø'jknindi jøts jade'en xka'ukwin'ejxna'ant ja' pøn jam tsinaapy møj tsinaabyajt køjxp, jøts nayide'en ja Borreek U'nk ka' x'ukmøø'ña'ant ja møj ayo'on!

¹⁷ Tøxi ja xøøw jade'en kya'pxy ku ja møj ayo'on jade'en yik'ijxy, niþøn ja jade'en tkamimajada'aky.

7

Ku ja Israelit jaa'y yikmøøy ja ejxa'an pøn jaty ja Dios tyami'ejxip tyamidsojkip

¹ Ku ja jade'en yjajty jøts ø n'ijxy nimaktaxk ja ankilis ku ja wyinaty tyani naxwii'ñit es-kiini køjxp, jamts ja poj ja t'axajtuky jøts ja møk poj niwine'en kyanaxkida'akt naxwiingyijxy mejkyijxy, jøts ja aay jøts ja kipy kyapojwidett. ² Jamts ø n'ijxy jadu'uk ja ankilis xøbidsimbyi myiñ, jap ja Dios syeeyi tmøøt'ajtti pøn xemikøjxp jujky'ajtp. Nay ja'ats møk tnamaay ja nimaktaxkpi ankilis midi wyinaty tø yiktanipiky jøts tuki'iyi tyikwindigøøgyøxt tuktsajp'agida'aky, jøts wya'añ:

³ —Uk'awejxti. Kidi xkaxti ja ayo'on kunim øøts ja ejxa'an nbikta'akt jaa'y wyimbojxkjxp nidu'uk nidu'uk, pøn jaty ja Dios yja' tpaduujnidip. Jaanims xyikwindigøøty ja naajx, ja mejy jøts ja aay ja kipy.

⁴ Jade'en ø nnimadøy ku tukmagø'pxy ja wixijxy myaktaxk mil tø yik'ejxandi ja israelit jaa'y pøn ja ñimakmajtskpi y'apteety'ajttø. ⁵ Nimakmajtsk mil idø'on yik'ejxandi pøn tyatsk'apip ja møjaa'y Judá. Nimakmajtsk mil yik'ejxandi pøn tyatsk'apip ja møjaa'y Rubén jøts nimakmajtsk mil nayide'en pøn tyatsk'apip ja møjaa'y Gad, ⁶ nimakmajtsk mil yik'ejxandi pøn tyatsk'apip ja møjaa'y Aser, nimakmajtsk mil yik'ejxandi pøn tyatsk'apip ja møjaa'y Neftalí, nimakmajtsk mil yik'ejxandi pøn tyatsk'apip ja møjaa'y Manasés, ⁷ nimakmajtsk mil yik'ejxandi pøn tyatsk'apip ja møjaa'y Simeón, nimakmajtsk mil yik'ejxandi pøn tyatsk'apip ja møjaa'y Leví, nimakmajtsk mil yik'ejxandi pøn tyatsk'apip ja møjaa'y Isacar, ⁸ nimakmajtsk mil yik'ejxandi pøn tyatsk'apip ja møjaa'y Zabulón, nimakmajtsk mil yik'ejxandi pøn tyatsk'apip ja møjaa'y José, jøts nimakmajtsk mil yik'ejxandi nayide'en pøn tyatsk'apip ja møjaa'y Benjamín.

Ja mayjaa'y pøn ja poop wet wyet'ajttip

⁹ Ku jade'en nnimadøoy jøts ø n'ijxy janch may jaa'y nikyamachooni. Choondi o magajp, o ti ayuujk tkajpxti pøni sa jadu'uk ja nidu'uk ja kajp ja y'ayuujk tjagyepy; jam twindanidi ma møj tsinaabyajt jøts nay jam ma Borreek U'nk, poop wet wyet'ajttip jøts tixxy'aa'y tkøñidi.

¹⁰ Niduki'iyi dø'øn tja'myatsti ja Dios jøts møk wya'andi:

Yø Dios Teety xyiknitso'ok'ajtim, pøn jam tsinaapy møj tsinaabyajtøjxp, nayide'ents ja Borreek U'nk.

¹¹ Jamts ja ankilistøjk nawidity tnananidi ma møj tsinaabyajt jam, ma ja møjaa'dyøjk jøts ma ja nimaktaxkpi jiyujk, jøts ñagyuxendyaajkidi ja' wyingujkp ma ja møj tsinaabyajt jam; møj tjanchja'myajtsti ja Dios, ¹² jøts wyandøø:

Nmøja'wip øøts, njanchja'wip øøts Dios Teety.

Mets ja møk'ajtin, ja ja'gyukin jøts ja øy'ajtin mmøøt'ajtpy xemikøjxp. Jade'en idø'on xemikøjxp y'ejxi.

¹³ Jøts nidu'uk ja møjaa'dyøjk wya'añ jøts x'amidøoy:

—¿Pøn idø'on yø'ødi ixja poop wetxøødi, ma dø'on yø choondi?

¹⁴ Jøts ø nnimaay:

—Mets møjaa'y, mnija'wip mets yø'.

Jøts ø xnimaay:

—Yø' dø'on jap tø ñaxti ma ja møj ayo'on jam, ja Borreek U'nk ñi'jpy tø yikpøkwy'a'achidi.

¹⁵ Paty idø'on jam y'etti møj tsinaabyajt wyingujkp ma ja Dios chøøni, jamts ja tpaduujnidi ja Dios yja' xinaxy tsunaxy; jøts ja pyøkjø'øgidit xemikøjxp ja' wyingujkp. ¹⁶ Ka'ap ja ayo'on t'uk'ejxnidit, kya'ukyu'ooknidit kya'uktøøtsiñidit, ni an niti kya'ukpaajtniyidit, ¹⁷ jade'engøjxp ku ja Borreek U'nk t'ejx'ity jøts ttukpaatwa'añ ttuk'ejxwa'añ ja wa'ats nøø midi xyikjujky'ajtim xemikøjxp; nayide'ents ja Dios tyiktigøøty ja yjotmay'o'jkindi.

8

Ja myiwixujkpi seeyi jøts ja poomdø'øy'ii'ñi midi tum oori

¹ Ku ja Borreek U'nk ja myiwixujkpi seeyi t'agø'øtstujty, jøts kujkp hora'an y'amongøjxti niduki'iyi jam tsajpøtp. ² Nay jaty n'ijxy ja niwixujkpi ankilis midi jam tanaadyip Dios wyingujkp ku ja yikmøødyi nidu'uk nidu'uk ja puxujx. ³ Jøts jadu'ukpi ankilis myiñ jøts jam tyanaay'øyiyi'ñi altajr wyingujkp midi tum oori, poomdø'øy'ii'ñi ja myimeen, jamts yikmøøy altajr wyingujkp may ja poom, jade'ents ja altajrkøjxp ttawinjøjky; jøts jamts ja nayide'en y'ity y'amido'owin pyøktso'owin ja'adi pøn jaty ja Dios ja'ajtp. ⁴ Jøts ja poom jok jam yja'aty Dios wyindump møøt ja y'amido'owindi ja pyøktso'owindi pøn ja Dios tmøja'widip tjanchja'widip. ⁵ Xjats ja ankilis tnixajiyi'ñi ja poomdø'øy'ii'ñi jøts tpiktaajky ujts ja jøndsabajk midi wyinaty altajrkøjxp, jøts tko'widijty jam naxkøjxp; winets ja møk anaaw jøts ja widsuk y'adi'ich, jøts ja tsachmøk uyx.

Ja ñiwixujkpi puxujx

⁶ Xjats ja niwixujkpi ankilistøjk tjøp'ejxti ttaxu'uxwa'a'andi ja puxujx.

⁷ Ku ja myidu'ukpi ankilis xyuuixy, jøts ja møk tuu myiifn jøts ja tøtst jøts ja jøøn møøt ja ni'jpy ñaxkidaajky. Jade'en tyøøy ja naaxwii'ñit jawaani kyagujkwa'kxy, møøt ja kipy møøt ja ujts kyudigøøy.

⁸ Ku ja myimajtskpi ankilis xyuuixy, winets yjawi tigati ñaxkidaajky jam mejyjoth ejxim ja møj kojpkjn, ja'ats jam tøøbyøjk; jøts ja mejy wyimbijty jawaani kagujkwa'kxy wa'ats ni'jpyin. ⁹ Jawaani kagujkwa'kxy ja jiyujk kya'ookøxti midu jam wyinaty tsinaadyip, jøts ja barki nayide'en wyindigøøy.

¹⁰ Ku myidigøøkpi ankilis xyuuixy, winets tu'uk ja maadsa' tsajpwemp kyatska'ay, tyøøy jade'en ejxim ja møj jøønin. Naaxkidaajky ma may ja møj nøø yø'ødyi jøts ma ja kom nøø pyidsimy. ¹¹ Ja'abi maadsa' txøøw'ajtp Ajenjo, jøts ja nøø ja tyikma'tnaa. May ja y'ooktøø pøn jaty ja t'uktøø, janch ta'am ja wyimbejtnaa ja nøø.

¹² Ku ja myimaktaxkpi ankilis xyuuixy, xjats ojts waani wyindigøøy ja xøøw, ja po' jøts ja maadsa'. Nayide'en ojts xyaachkugoodsigyijxy sam yø xøøw yø po' wyindigøøyin.

¹³ Winets n'ejxpaaty tu'uk ja ankilis ñaxy tsajp kujk'am, jøts ja møk wya'añ:

—jMeets naaxwii'ñit jaa'y, mjanch'ayo'odip meets ku xmado'odit ja puxujx ku ttaxu'uxtit ja nidigøøkpi ankilis!

9

¹ Ku ja myimagoxkpi ankilis xyuuixy, jøts n'ijxy tu'uk ja maadsa', tø wyinaty ñaxkida'aky naaxwingijxy. Xjats yikmøøy ja ñi'awaajts ma ja møj jut jam midu nøjxkp ayodaajk. ² Xjats ja møj jut tyik'awaajch xjats ja jok yixxon jap pyidsimy sam møj orni jøtpyin; jøts ja xøøw tyikwingoodsinaa, ni poj niti tka'ukyikyø'ñi. ³ Japts jokjøtpy may pyidsømdi ja møj mu' jøts tuki'iyi ja naaxwii'ñit twinguyø'yigyøjxnaa; jade'en ja yikejxy sam ja kajpyin jøts ja naaxwii'ñit jaa'y tyik'ayo'ombaatt. ⁴ Ka'ap ja jade'en tø yikexy jøts ja aay ja ujts ja tyikwindigøøty ya naaxwii'ñi. Ja' ja pyayø'øpy pøn jaty ja Dios y'ejxa'anin tø kyabikta'agyi midu yikpiktaktip wyimbojkwemp. ⁵ Ka'ap ja jaa'y tjadyimiyik'øøky, ayo'on ja myøøpy jøts ja jajyi ja tøøyi tukmiba'am tsøøni magoxk po'jin; jade'en ja pya'am ja tjawidi ejxim ja kajpy xøjppint. ⁶ Møk ja tjawidi, jadyimwyandip ja' jøts tyimy'ooktit; o k'øøm ñanky'ooogidit, ka'anims ja y'o'jkin kya'pxti.

⁷ Jade'en ja møj mu' kyaxø'økti ejxim ja møj kawaayin midu nay'a'ejxiyip tseptumbi nøjxktip; tum jade'en ja kyubajk kyaxø'økti koroni kujupy midu amuum oori, jøts ja wyeen ja y'aaw jade'en kyaxi'iky ejxim ja jaa'yin. ⁸ Jade'en ja wyaay tmøøt'atti ejxim ja tø'øxyøjkin, jøts ja tyøøjts jade'en t'ixy ejxim ja kaajin. ⁹ Tum pujx ja amuum y'ak'ajttip, jøts ku kyajkwidetti jade'en møk yikmadøy ejxim ja maakyareti midu kawaay myinøjxktip tseptumbi. ¹⁰ Jade'en ja tyu'tst tmøøt'atti ejxim ja kajpyin. Ja'ats ja tyukta'ayo'ombatpy ja jaa'y jøts tukmiba'am tsøøni magoxk po'. ¹¹ Jamts tu'uk ja ankilis midu tso'omp jap ayodaajkjøtpy, ja'ats tniwindsøn'ajtp ja møj mu'; ja'ats txøøw'ajtp Abadón ja hebreit ayuujk, jøts ja griegit ayuujk Apolión midu tyijpy pøn yikwindigøøpy.

¹² Jade'en idø'øn ja myidu'ukpi ayo'on ñajxy; naaxkida'akpts ja mimajtskpi ayo'on.

¹³ Xjats ja myidudujkpi ankilis ttaxuuixy ja puxujx, winets pyidsimy ja ayuujk jam nimaktaxkpi tsakaaj waj agujk jam altajrkøjx jam Dios wyingujk. ¹⁴ Xjats ja myidudujkpi ankilis yiknimaay midu ja puxujx tmøøt'ajtp:

—Migaji ja ñimaktaxkpi ankilis midu jamdi ma ja møj nøø midu yiktejp Eufrates.

¹⁵ Xjats ja jade'en yikmigajidøø jøts tyik'ookti jawaani kagujkwa'kxy ja naaxwii'ñit jaa'y. Jabi a'ejxixi y'ejtni jøts ja jade'en yjattit ja'abi xøøw ja'abi jumøjt. ¹⁶ Namajtsk magø'pxy mil-lones idø'øn ja ankilis cheptumbi midu idø'øn jade'en yikjaa'y'ooktip, midu kawaagyø'xpti.

¹⁷ Yide'en ø n'ijxy kumaaj'jøtpy ja kawaay, jøts ja' pøn ttatsinaadyip, pujx ja myøøt'ajttip kyachwii'ñ, tsajpys, tsujxk jøts pu'ts jade'en ja kyaxi'iky. Ja kawaay kyubajk jade'en ja kyaxø'økti ejxim ja kaajin jøts ja y'aawjøtpy pyidsimy ja møj jønyow møøt ja jok jøts jøky. ¹⁸ Jøts jade'en'ampyts ja mayjaa'y y'ookøxti, jawaani kagujkwa'kxy idø'øn kyawindigøøgyøxtøø. ¹⁹ Ja'ats idø'øn ja kawaay tya'awa'an'ajtpy ja y'aaw jøts ja tyu'tst; jade'en ja tyu'tst ja t'ixy tsaa'ngyubajkin, jade'ents ja jaa'y ja tyik'ayo'ombaaty.

²⁰ Pønts jaaktandi ka'abyim ja tmajststuttu ja ka'ødyunk ja ka'øwyinmaa'ñ. Wyindsø'jkij'ejttip ja miku'tjøjkt jøts øy ti awanax agojnax. Nayide'en twindsø'øgidi ja nugo dios agojnax midu oori øyip, midu plati øyip, midu bronce øyip jøts nayide'en midu kipy øyip, ka'ap ja y'ixy, ka'ap ja y'øøy, jøts ka'ap ja myadøy. ²¹ Ni jade'en ja tkamøjpktaajky ku ayo'on tø yjinaxy, yik'ook'adichpim ja myigu'uk ja', jøts ja miku' tunk ttun'adø'østi, ñamyøøt'atyidi øy pøn møøt myigu'uktjøjkt, jøts myaats'adø'østi.

10

Ja ankilis midu tkon'ejtp tu'uk ja mutsk libri'u'nk

¹ Kuts jade'en yjajty jøts ø n'ejxpaaty tu'uk ja møj ankilis. Yoots'agujkp kyida'aky jam tsajpwemp jøts ja i'jch jam kyaxi'iky y'agubajkp. Jade'en ja wyeen ja y'aaw t'ixy ejxim ja xøøw y'añin, jøts ja tyeky jade'en ejxim ja jønyowin. ² Jam tu'uk ja libri'u'nk tmøøt'aty jøts ja t'agiibyajky kyøø'øm, jøts ja y'aga'ndyeky ttawinwa'aky ja mejy jøts ja y'anajtyeky naxwingijxy. ³ Jøts ja chap'aay møk ejxim ja møj kaa myu'uyin jøts nay jatyi wixujk ojk ja anaaw pyijy. ⁴ Ixyam øts wyinaty njaadyanwa'añ sa ja anaaw wya'añ jøts ø nmadøøy ja ayuujk midi kidakp tsajpwemp jøts ø xnimaay:

—Amaa'tsk'at yø sam tø wya'añ yø anaaw, kidi xjaadyañ.

⁵ Jøts ja ankilis midi tuktamajndyeky tawa'kpajt ja mejy jøts jaduktamajndyeky ja naxwii'ñit, ja'ats y'aga'ngyø jam tkonj'jk, ⁶ jøts ja tkajpxwa'kxy ja Dios tyiy'ajtin pøn tø tyiktso'ondakixy tuki'iyi tuktsajp'agida'aky, jøts yide'en wya'añ:

—Ka' y'ukyø'øñit ja xøøw ja jumøjt; ⁷ kuts xyu'uxt ja myiwixujkpi ankilis, tø wyinaty kya'pxy ja Dios wyinmaa'ñ midi ja'ayi tyuknija'wiyii'ñ ja kyugajpxtyøjkti. Ka'ap ja o pøn nugo ajawi ttuknijaw.

⁸ Xjats ja ayuujk nayide'en nmadoojmi midi tsajpjøtpty tsoo'mp, jøts ja jadigojk xmigajpxkojmi jøts wya'añ:

—Nøjx atspøjkit ja libri'u'nk midi jam agiibyaky kyii'yijtpy ja ankilis, ja' midi tanaapy mejkyøjpx jøts naxkijxy.

⁹ Jøts ja ankilis nninijkxy xjats ja libri'u'nk n'amidøøy jøts ø xmo'ot, jøts ø xnimaay:

—Ixya ja libri, mats jøts x'ixpøkt. Øy tsuj mnayjawiyit ku x'ixpøjk'okwa'ant, ku x'ixpøjkøxnit jøts ja jotmay'øøgyi xpatnit.

¹⁰ Xjats ja libri n'axajiyii'ñ jøts ja n'ixpijky, janch øy janch tsuj øts nja'wiyii'ñ, kuts ja nyikøjxnaa ja libri, jøts ja jotmay'øøgyi xpatnaa. ¹¹ Jøts ø xnimaagyojmi:

—Kuwani jadigojk xkajpxwa'kxt ja Dios yja' sa chøønidit sa tyanidit niduki'iyi ja naxwii'ñit jaa'y, wan tmøji wan tmutski.

11

Namajtsk ja jaa'y pøn testig'ajttip

¹ Jøts tu'uk ja kapy nyikmøøy midi yiktakejpxp, jøts ø xnimaay:

—Tani jøts xkejpxit ja Dios chaptøjk møøt ja altajr, jøts nayide'en xmacho'ot pøn jaty jap twindsø'jkp ja Dios. ² Ka'ap yø xkepxt yø tsaptøjk aaw, tsaptøjk øjx jøts ja tsaptøjk paa' ja'agøjpx ku wenk jaa'y myenwa'andi jøts jap wyidettit, jade'ents ja tyikma'ajttit ma' jaty ja wyidettit jap Dios kyajpjøtpty, wixijjky myajtsk po' y'ettit jade'en. ³ Ngaxp øts namajtsk ja ngugajpxy midi tum yok wet twer'ajttip, ja'ats xkajpxip ja nja' tigøøk jumøjt jagujkp.

⁴ Ja namajtskpi kugajpxy, jade'eñi n'ukpiktaajkin ejxim ja olivi kipyin, jøts nayide'en ejxim ja majtskpi kandeeleri midi jam ejtp nwindson'ajtim wyingujkp. ⁵ Pøni pøn midundigøøwyajnip, yikpidsømdip ja jøøn ja y'aawjøtpty, jade'eñits ja myidseptøjk tyik'ookøxtit tyikwindigøøgyøxtit. ⁶ Yø namajtskpi kugajpxy yjagyajpti ja møk'ajtin jøts ka'ukyiktunit winø'ønin ja Dios yja' tkajpxwa'kxidit. Nayide'en ja nøø tyikjajtnidit wa'ats ni'jpyin, jøts tkaxtit kawinaak jøøjp ja pa'am sa ja køøm t'a'ejxidit. ⁷ Kuts ja jade'en tkajpxwa'kxkøxtit ja Dios yja', winets tu'uk ja møk awa'an jiyujk pyidsø'ømt jam ayodaajkjøt jøts ja namajtskpi kugajpxy yik'oogiyit. ⁸ Jamts ja oo'kpi jadi'iñi tya'ant, jam ja wyibejpnit jam tuu' kujk'am, nay ja kajp ma ja nwindson'ajtim Jesucristo kyiruspejty. Nugo dø'øn jade'en yø kajp yaktiyi Sodoma jøts Egipto. ⁹ Tigøøk xøøw jagujkp yik'ejxtit yiknijawidit ja oo'kpi. Øy pøn jaa'y o magajp mye'endit jøts ka' tnankyikpidi'igy ja oo'kpi. ¹⁰ Xjats ja naxwii'ñit jaa'y jade'en agujk jotkujk ñayjawiyidi, janch nixem niyam o ti ñadyamay'atyidi ja'agøjpx ku tø y'oookti ja'adi pøn møk tø yik'ayo'ombaa'dyidi pøn ja Dios yja' tkajpxwa'kxidip. ¹¹ Xjats ku myidigøøk xøøw jagujkp'ajty, winets ja Dios tyikjajkpyiky jadigojk ja oo'kpi. Janch tsø'jkidøø ja'adi pøn jaty jam wyinaty. ¹² Winets ja namajtskpi kugajpxy møk yikmijajpxpti, tsajpjøtpty ja kyajpxy, jøts yiknimaydi:

—Pat yam.

Jøts chapajtnidi tsajpjøtpty yoots'agujkpy jøts ja myidseptøjk y'ejxidøø ñija'wiyidøø. ¹³ Jøts nay jatyi ja møk uix ñajxy, jøts wixujk mil ja jaa'y y'oookti ku ja kajp kyuya'wiyii'ñ kyujejtyii'ñ. Janch tsø'jkidip ja' pøn jaty jaaktandøø, jøts ja Dios ja tjanhja'myajtsti midi jap tsajpjøtpty.

¹⁴ Jade'en ja myimajtskpi ayo'on ñajxy; tsojks mye'ent ja myidigøøkpi.

Ja myiwixujkpi puxujx

¹⁵ Xjats ku ja myiwixujkpi ankilis ttaxuuxy ja pyuxujx, jøts møk yikmadøøy may ja ayuujk jap tsajpjøtpty jøts wya'añ:

Ixyam ja kutujk ñaxkida'aky midi ja Dios Teety jøts nwindson'ajtim Jesucristo yja'ajttip; jøts xemikøjpx ja tyiktu'undit ma y'ijty ja naxwii'ñit jaa'y yja' tyiktundi.

¹⁶ Xjats kyuxanidi jøts ñaxkowdi ja ni'ee'pxmaktaxkpi mōjaa'dyøjk pøn jam tsinaadyip Dios wyingujkp, jøts ja Dios tmōjawidi twindsø'øgidi, ¹⁷ jøts yide'en wya'andi: Janch mōj me Dios Teety, tu'ugyi me m'lity xemikøjxp.

Mōj øøts nmōjawi ngunuu'kxyjawi ku tø xyikmajada'aky ja mmøk'ajtin jøts ja mgutujk mā ja naxwii'ñit jaa'y.

¹⁸ Jøts ja naxwii'ñit jaa'y mmijot'ambikyiyi,

tø kya'pxy jøts ja ayo'on xmo'ot jøts nayide'en xiidyu'unt ja oo'kpitøjk.

Jøts xmo'ot ja øy'ajtin pøn jaty ja mja' tømbadu'unxyi pøn jaty tøm kaxjpxwa'kxy wan tmøji wan tmutski.

Tø kya'pxy jøts nayide'en xyikwindigø'øty pøn jaty tøm tmidundigøj ja naxwii'ñit jaa'y.

¹⁹ Xjats ja Dios chaptøjk y'awaajch jap tsajppøtpty jøts yik'ixy ja kaaxi mā jap y'lity ja Dios kyutujk. Xjats ja møk uyx ñajxy jøts ja anaaw, jøts ja widsuk jøts ja møk tøtst ñaxkidaajky.

12

Ja tø'øxyøjk jøts ja awa'andsaa'ñ

¹ Xjats winet kyaxi'iky tu'uk ja mōj ejxpajt jam tsajppwemp: jamts tu'uk ja tø'øxyøjk tyani po' kyubajkp. Jade'en yø møk chamamy sam ja xøøwin, jøts tkujup'aty tu'uk ja koroni midimajatsk maadsa' tjagyajp. ² Jøtpyts ja tø'øxyøjk wyinaty, ka'axwampts jøts møk ja y'u'nk ja yik'ayøyi jøts kyaxø'økt. ³ Winets jam tsajppwemp n'ijxy jadu'uk ja ejxpajt: jamts tu'uk ja awa'andsaa'ñ, amuum tsajpts ja ñine'kx jøts wixujk ja kyubajk, majk jaty ja wyaj nidu'uk nidu'uk ja kyubajk tmøøt'aty, jøts ja koroni nayide'en tu'uk jaty tkujup'aty. ⁴ Jøts ja tyu'tst ttabajaa'kxiy may ja maadsa' jam tsajppwemp, jøts naxkijxy ja tñajtswøjyiyi'ñ. Jam tyanaay'øjyiyi'ñ mā ja tø'øxyøjk jam kya'axwa'añ jøts ja y'u'nk jaty tsu'ljtsit ku ja kya'axt. ⁵ Ka'ax ja', mixyu'nk ja', ja'ats nøjkk niwindsøn'aty møk'ampy ja naxwii'ñit jaa'y. Xjats ja y'u'nk ja Dios tpojknaa jøts ja tyiknijky mā ja mōj tsinaabyajt jam; ⁶ jøts ja tø'øxyøjk kyeejky, jøts jam ja ñøjknxi mā abak et, mā ja Dios jam wyinaty ja y'et tø't'a'ejxi, jamts ja kya'aty agujk jøtkujk, jade'ents jam chøønit tigøøjk jumøjt jagujkp.

⁷ Xjats ku jade'en yjajty winets ja tsep tyuujni jap tsajppøtpty. Ja mōj ankilis Miguel møøt ja y'ankilistøjk minamyajtsi ja awa'andsaa'ñ møøt ja y'ankilistøjk ja' møøtmi. ⁸ Ka'ap ja myajadaktøø ja awa'andsaa'ñ; ka'ap ja mā y'uk'etnibajtniay tsajppøtpty. ⁹ Jøts ja jade'en yikpawøjpnaa, yikaxni naxwingijxy. Yø' dø'øn ja mōj miku' widsøn midimøjt Satanás midimøjt'øn ja naxwii'ñit jaa'y.

¹⁰ Winets nmadøøj møk ja kajpxy jap tsajppøtpty midimøjt'øn wamp:

—Tø ja Dios ja naxwii'ñit jaa'y tyiknitso'ok'aty. Tøts ja myø'ajtin tñanky'ijxyiyi jøts ja kutujk tmøøj ja Cristo sa tñanitani ja yjaa'y; tøts ja nayide'en tpaøøj ja' midimøjt'øn xanaxi tsunaxy tni'øø'nip jam Dios wyindump ja' midimøjt'øn y'oøkti Dios køjxp. ¹¹ Tø tñimajada'akti ja miku' yja', ja'agøjxp ku ja Borreek U'nk tøm tksunim tksunim ja naxwii'ñit jaa'y, jøts ku tøm tñigajpxkøxti sa tñanchjawidi ja Dios yja', wan tjaty pøni sa yjaty. ¹² Ejtmi xoni meets pøn jap tsajppøtpty, jøts janch yik'ayow meets pøn ja naxwii'ñit tyiknajtpt. Tø meets ja miku' mnimee'niyidi jøts awa'an'ampy mga'ødyunidit, ñija'wipxi ja' ku tsojk kya'pxt.

¹³ Xjats ku ja awa'andsaa'ñ tja'wiyi'ñit ku ja yā naxwii'ñit tøm yikaxni, xjats ja tø'øxyøjk ja tpaøøj pøn ja y'u'nk wyinaty tøm tyikaxi'iky. ¹⁴ Winets ja tø'øxyøjk yikmøøj majtsk ja weets myøjkajnk, jøts ja kyajknijky mā ja y'et ja jam abak etjotp. Jade'en ja tñikejky ja awa'andsaa'ñ. Jamts ja kya'aty yjøø'kxt amgujuk jøtkujk tigøøjk jumøjt jagujkp. ¹⁵ Jøts ja awa'andsaa'ñ ja mōj kom nøø tyikpidsimy y'aawjøtpty, jade'ents ja tø'øxyøjk ja tyikjø'øtwa'añ; ¹⁶ jøts ja tø'øxyøjk ja naxwii'ñit pyudøjkijy. Møj et aaw awaajts, japts ja nøø jadi'ñi tyøtskøjxnaa. ¹⁷ Jade'ents ja awa'andsaa'ñ møk tm'ambijky ja tø'øxyøjk, jøts ja tmidsepjky ja y'ap ja y'ok. Jade'en idø'øn ja'adi pøn ja Dios yja' tpaduujnidip sam ja nwindsøn'ajtim Jesucristo tñigajpxy.

13

Namajtsk ja mōj ka'øj jiyujk

¹ Jam ø mejy'agø'øm nwa'k'øjyiyi'ñit jøts ø n'ijxy jam pyidsimy tu'uk mōj ka'øj jiyujk. Wixujk ja kyubajk tmøøt'aty jøts majk ja wyaj. Tu'uk tu'uk ja wyaj tmøøt'aty ja koroni, jøts jam kyubajkøjxp yikja'ay ja letri midimøjt'øn Dios kya'øjja'wip. ² Jade'en ja kyaxi'iky ejxim ja mōj kuxibyijyn, jøts ja tyeky kyaxi'iky ejxim ja osa'an, jøts ja y'aaw ejxim ja kaajin. Ja'ats ja awa'andsaa'ñ møøjy tuki'iyi ja myø'ajtin ja kyutujk midimøjt'øn wyinaty myøøt'ajtpy. ³ Jade'en ja kyubajk tu'uk kyaxi'iky ku janch mōj tøm chaachi, tyimyk'ookwajnip. Ka'ats ja yik'o'jki, tsoojk ja'. Kuts ja t'ejxti ja naxwii'ñit jaa'y, ñigyumaap ja tja'widyøø xjats ja tpadundi ja yja'. ⁴ Nayide'ents ja tmōjawidi twindsø'øgidi ja awa'andsaa'ñ, ja'agøjxp ku wyinaty tøm tmøøj ja

myøk'ajtin ja kyutujk ja møj ka'øy jiyujk, jøts ja nayide'en yikwindsø'øgi. Yide'en ja wya'andi ja naxwii'ñit jaa'y:

—jPøn jade'en t'uktu'ump sam yø møj ka'øy jiyujk, pønts jade'en ukmajada'akp!

⁵ Xjats ja møj ka'øy jiyujk yikmøøy ja tuu' jøts ja møk'ajtin jøts tjemnøjmit ttenøjmit ja Dios yja', wixijxky myajtsk po' y'ett. ⁶ Jade'en idø'on ja ttuun; tuki'iyi tmigajpxigøøy midt ja Dios yja'ajtpy jøts ja xyøøw jøts ja chinaadyaajk, jøts midt ejtp tsajpjøtpy, tuki'iyi ja yikmigajpxigøøgyijxy. ⁷ Nayide'en yikmøøy ja tuu' jøts tmøøtseptu'unt pøn jaty ja Dios yja' tpaduujnip kunim ja tmimajada'akt; jade'en ja kyutujk yikmøøy jøts tniwindsøn'att niduki'iyi ja naxwii'ñit jaa'y. ⁸ Jøts ja naxwii'ñit jaa'y jade'en twindsø'øgi ja møj ka'øy jiyujk, ja' tpadundip jade'en pøn jaty kajaabyety jap nøkyjøtpy kuuyip ja naxwii'ñit cho'ondaajky. Yø' nøky ja Borreek U'nk myøøt'ajtpy midt tø y'øøky adømgøjxp.

⁹ Øy yikxon madowdi. ¹⁰ Pøni pøn ja myigu'uk tsump, nayide'ents ja yiktsu'umt; jøts pøni pøn ja myigu'uk tyik'ookp, nayide'ents ja yjatt. Paty chøkyi mduda'akyjaa'y'attit jøts x'ajot'attit ja Dios sam pyaat'aty pøn ja Dios yja' tpaduujnip.

¹¹ Jøts jadu'uk ø n'ijxy møj ka'øy jiyujk pyidsimy naxjøtpy. Majtsk ja wyaj tmøøt'aty jade'en sam ja borreegi wajin, jøts jade'en kyajpxy sam ja møj awa'andsaa'ñ. ¹² Nayide'en ja kyutujk tjagyepy sam ja myiga'øy jiyujk midt ja kyubajk tsaachiyi'ñ, jøts yø tnøjmit ja naxwii'ñit jaa'y jøts yikwinjawit yikwindsø'øgit. ¹³ Nayide'ents ja myilagri'ajtin tnanky'ijxyi, møj jøøn tyiktsøøn tsajpwemp jøts naxkixy tyiknaxkida'aky, jøts ja jaa'y ttuk'ixy wyemp amp. ¹⁴ Jade'en'ampy ja jaa'y twin'iiñ ku myilagri'ajtin tnanky'ijxyi, xjats ja naxwii'ñit jaa'y tnimaay jøts tyik'øyit ja tsamaxan ja awanax midt t'ejxp jade'en sam ja møj ka'øy jiyujk midt tsaachiyi'ñ. ¹⁵ Xjats ja yikmøøy ja møk'ajtin jøts tyikjuykjpyøtt tyikajpxt ja tsamaxan, pønts ja kawindsø'jkiyip, yik'ookp ja'. ¹⁶ Xjats nayide'en ja møj ka'øy jiyujk ja y'ejxa'anin tpiktaajky kyøjø'øm uk wyimbojkwemp tuki'iyi ja naxwii'ñit jaa'y, wan tmøji wan tmutski, wan tkumeeñ jaa'yi, wan t'ayoobi jaa'yi, øy ja yjawindsøndøjkidi, øy ja yjatumbitøjkidi. ¹⁷ Ka'ap pøn mibaat ti tjuy, ti tkajpxy, ti tøøky, ku ja y'ejxa'anin tkamøøt'atti midt ja møj ka'øy jiyujk tø tpikta'aky. Ja' y'ejxa'anin'ajtpy ja xyøøw jøts ja ñumeri. ¹⁸ Yø'øbi numeri ka'ap yø o pøn tnijawi; ja' yø tnija'wip pøn yikxon t'a'ejxip. Yø jade'emb i numeri, jade'en yø kyajpxy ejxim ja jaa'yxøøwin, tudujk magø'pxy ja tugi'pxyudujk jade'en ja'.

14

Ku ja tukmagø'pxy wixijxky myaktaxk milbi jaa'y y'øøwdi

¹ Kuts jade'en yjajty jøts ø n'ejxpaaty ja Borreek U'nk jam tyani kojpkøjxp ma yiktijy Siøn. Tukmagø'pxy ja wixijxky myaktaxk mil ja jaa'y tmøødi pøn wyinaty wyimbojkwemp tø yikpikta'aky ja Dios Teety xyøøw jøts ja Borreek U'nk yja'ami. Ja'ats idø'on ja y'ejxa'anin'ajttip. ² Jøts nmadøøy møk wyina'añ tsajpjøtpy ejxim ja møj nøø y'iichin jøts ja møk anaawin; jade'en yikmadøøy wyinaa'ñ ejxim ja maagyow midt yiktejp arpi. ³ Jamts ja jemy'iiy t'øøwdi ma ja møj tsinaabyajt jam, ma ja nimaktaxkpi jiyujk jam jøts ja møjaa'dyøjkti. Nipøn ja'abi iij tkajaty, ja'ayi t'ajttip pøn nitsø'ok'ajtti ja naxwiñ, tukmagø'pxy ja wixijxky myaktaxk mil jade'en ja'adi. ⁴ Wa'ats øy tsuj yjaa'y'atti jøts ka'ap ja o pøn tø'øxyøjk tmøøt'atti, tu'ugyi tpadundi ja Borreek U'nk pøni ma ja ñijxky. Yø' dø'on ojts jawyeen ñadyamiøxyidi ma ja Dios Teety jøts ja Borreek U'nk, jade'en yø ttanitso'ok'atti. ⁵ Ka'ap ja win'øø'nin, ka'ap ja taay'ajtin tjagyapti, øy tsuj wa'ats yjaa'y'atti Dios wyingujkp.

Kyugajpxy'atti ja nidigøøtkpi ankilis

⁶ Winets ø n'ejxpaaty jadu'uk ja ankilis midt kajkwidejtp jam tsajp kujk'am. Ayuujk myimimpy jøts tkajpxwa'kxwa'añ sa ttanitso'ok'attit ja naxwii'ñit jaa'y o magajp o ma'ayuujk. ⁷ Jøts møk kyajpxy yide'en:

—Windsø'øgidi winjawidi ja Dios, tø kya'pxni jøts ja tiidyu'unin ñaxkidaknit. Jade'ents xwindsø'øgidit ja Dios pøn ja tsajp ja naajx tyik'øyiyi'ñ tuki'iyi.

⁸ Xjats jadu'uk ja ankilis pyamiñi midt waan:

—Tø ja møj kajp Babilonia wyindigøøy, ja'agøjxp ku tuki'iyi ja naxwii'ñit twin'iiñ jøts ttuktuñ sam ja kya'øyjaa'y'atti.

⁹ Xjats ja ankilis jadu'uk pyamengojmiyi, jøts ja møk nayide'en wya'añ:

—Pøni pøn ja twindsø'jkip ja ka'øy jiyujk jøts ja y'awanax, jøts jade'en yik'ejxa'andit wyimbojkwemp uk kyøjø'øm, ¹⁰ yø'øts ja ayo'on yikmo'odip ja'agøjxp ku ja Dios tø tyikjotma'atti; jade'ents ja jøøn jøts ja jøky tyukpaadidit tyuk'ejxidit Dios y'ankilis wyindump jøts ma ja Borreek U'nk jam. ¹¹ Xemikøjxp ja ayo'on jap t'ejxtit, nijjuun ja poj xyuxy'ajtin tkapaajtidit. Xinaxy tsunaxy ja y'etti pøn tø twindsø'øgidi ja ka'øy jiyujk jøts ja y'awanax, sam ja tø yik'ejxandi nidu'uk ja nidu'uk. ¹² Jade'ents yø chøkyi jøts møk y'ettit tyuda'aky'attit pøn ja Dios ja'ajtidip jøts ja y'ana'amin tpaduujnidi, jøts pøn ja Jesús møøt tu'ugyi ettip.

¹³ Winets nmadøøy møk kyajpxy tsajpjøtpty jøts ø xnøjmi:

—Ja' ya'at: “Pyaattipts ja øy'ajtin xondaajkin ku y'ooktit tyigø'ødyit pøn ja nwindson'ajtim Jesucristo tjanchja'widip.” Nayide'en ja Espiritu Santo wya'añ jøts y'ejtnit ejtni xoni jøts ja y'øy'ajtin pyudøkiyt nayide'en.

Sa ja Dios tt#dyunwa'añ ja naxwii'ñit jaa'y

¹⁴ Xjats ø n'ejxpatkojmi, jam ø n'ixy tu'uk ja jaa'y chøøni poop yootskøjxp, koroni kyujup'ajtpy miditum amuum oori, jøts ja møj tsujx tkap'ity. ¹⁵ Jøts jadu'uk ja ankilis pyidsimy ma ja Dios chinaadyaajk jøts møk tmigajpxy miditum jam yootskøjxp tsinaapy:

—Kajppjøøk yø tsujx jøts xyikpidøøkt yø pikta'aky; tiempi yø jøts pyidøknit, tø yø myijaani yø pikta'aky miditum naxwii'ñit'ajtp.

¹⁶ Xjats ja' miditum tsinaapy yootskøjxp, nay jatyits ja møj tsujx ttapo'otmujky ja pikta'aky.

¹⁷ Xjats jadu'uk nayide'en ja ankilis pyidsimy ma ja Dios chinaadyaajk jap tsajpjøtpty, jam tu'uk ja møj tsujx janch jøøjp nayide'en tkapi. ¹⁸ Altajr wyingujkp jadu'uk ja ankilis chøøni miditum t'ejx'ejtp ja jøøni jam altajrkøjxp. Ja'ats møk tyajxyi'iñ miditum tsujx tmøøt'ajtp, jøts tnimaay:

—Kajppjøøk yø møj tsujx jøts xyikpidøøkt yø uvi tsa'am kumi tø yø myijaani.

¹⁹ Jøts ja ankilis ja tsujx tyiktuum naxkijxy, jade'ents ja uvi tsa'am tyikpidi'jky, japts ja t'abøjkiyi'iñ y'abøjki'i'ñjøtpty ma yikmøø'kxt, jade'en idøøni yø tijy ku ja Dios møk ja ayo'on tyiknaxkida'akt. ²⁰ Jam kajp wingon ja uvi tsa'am yikmi'kxy, jøts ja ni'jpy kom'ampy pyidsimy. Kawaay y'aawgijxy ja yja'aty jadine'en ja kyøjki, jøts yø'øy tigøøk magø'pxy kilometri.

15

Ja wixujk ayo'on miditum jankilistøjk yikme'endip

¹ Kuts jade'en yjajty jøts n'ixy tsajpwemp jadu'uk ja ejxpajt, janch adsø'jkibim: jade'ents ja niwixujkpi ankilis tmimñ ja wixujkpi ayo'on miditum tø yiktanipiky, kuts ja ayo'on ñaxt jade'ents ja Dios y'ambøjkin yjøpkøxt.

² Jøts ø n'ejxpaaty tu'uk ja meyy janch wa'ats, janch tøø'kxp, jønyowin kyaxi'iky. Jamts mejy'agøøm tyanidi niduki'iyi pøn tø tkabadundi ja ka'øy jiyujk yja' jøts ja y'awanax, sam nayide'en ja ñumeri tø tkagupøjkidi. Jamts ja kow ja tmøøt'atti miditum ja Dios tø myø'øydi. ³ Jøts ja t'øwdi ja møjaa'y Moises y'iy pøn ja Dios kyugajpxy'ajtp, jøts ja t'øømiditum ja Borreek U'nk yja', miditum nømp:

Tu'ugyi me Dios Teety ja møk'ajtin xjagyepy.

Jøts miditum xyik'øyi, janch øy janch tsuj jøts kamidaabyaadyim;

janch tiy'ajtin ja' miditum mdumpy miditum mbiktakpy, jøts xnideety'aty xnimøjaa'y'aty ja naxwii'ñit jaa'y.

⁴ Pøn Dios Teety mga'uktsø'øgiyip, jøts pønts mga'ukwindsø'øgiyip?

Pø tu'ugyixi mets mwa'qdsi.

Mwinjawiyp mjanchjawiypits niduki'iyi ja naxwii'ñit jaa'y,

ja'agøjxp ku mdiy'ajtin xnanky'ijxyi sa mduñ sa mbiky.

⁵ Nay winets ø n'ejxpaajty ku ja Dios chinaadyaajk y'awajch jap tsajpjøtpty ma yikpøjki'iky ja Dios kyutujk. ⁶ Nay japts pyidsømditum ja niwixujkpi ankilis miditum myimendip ja wixujkpi ayo'on. Ja' wyet'ajtip ja øybi wet miditum janch tøø'kxp janch tsamamp. Miditum chum'ajtpy, amuum oori ja', kyachwiiñ ja chum yja'aty. ⁷ Nay winets ja ñamaktaxkpi jiyujk nidu'uk ja niwixujkpi ankilis tmøøy kitu'uk ja kopi miditum amuum oori. Ujts ja ayo'on ja tmøøt'aty miditum ja Dios yajkpy, miditum xemikøjxp jujky'ajtp. ⁸ Jøts nayide'en ma ja Dios chinaadyaajk tø ja jøk kawinø'øn jap tø tya'tspøjki. Ja Dios myø'ajtin jade'en adøøsp jøts nipøn jam mibaat kya'uktøjkiñi kunim yjøpkøxt ja wixujkpi ayo'on miditum ja niwixujkpi ankilis yiktamigajxidip.

16

¹ Kuts jade'en yjajty xjats nmadøøy møk kyajpxy jap ma ja Dios chinaadyaajk, xjats ja niwixujkpi ankilis tnimaay:

—Nøjxk atsyiktawaatstip yø wixujkpi kopi jam naxwingøjxp, ja ayo'on yø myøøt'ajtpy miditum ja Dios yajkpy.

² Winets ja myidu'ukpi ankilis tyiktawaajch ja kyopi jam naxwingøjxp, jøts ja jaa'y pyatkøjxniyi ja tsamaax jøts ja ka'øbyu'uts. Ja' jajttip niduki'iyi pøn ja ka'øy jiyujk ja y'ejxa'anin tmøøt'ajtip jøts pøn twindsø'jkidip ja y'awanax.

³ Xjats ja myimajtskpi ankilis mejyotp ja kyopi tyiktawaajch, jøts ja yjajtnaa wa'ats ni'jpy ejxim ja jaa'y ni'jpyin ku pøn chaachi, jøts ja y'oo'køjxni niduki'iyi miditum jaty jam tsinaapy mejyotp. ⁴ Jøts ja myidigøøkpikpi ankilis ja kyopi tyiktawaajch møj nøøjotp jøts ma jaty ja

nøømu'ut. Nayide'ents ja wyimbejtñimaa wa'ats ni'jpy. ⁵ Wīnets nmadøø y ja ankilis midī tñiwindsøn'ajtp ja nøø ku wya'añ:

—Me Dios Teety, tiy'ajtin ku jade'en xuñ. Janch øy janch wa'ats mets, jøts xemikøjxp me m'ity, ⁶ ja'agøjxp jade'en yjatti ku mets ja mjanchja'wibitøjk yikjemdundi yiktedundi, tøy tøy'ookti, kawinø'on tøy tyiktsuñ tyiktaxy. Paty mets ja nøø xyikwimbejtñi wa'ats ni'jpy jøts yø t'uukti; jade'ents yø pya'at'atyidi.

⁷ Nmadøø nayide'en ku jap altajrwimpy kyajpxy yide'en:

—Mets Dios Teety, tu'ugyi mets ja møy'ajtin xjagyepy, ku naxwii'ñit jaa'y jade'en tøy xpayø'øy, tiy'ajtingøjxp idø'on ja tøy xuñ.

⁸ Jøts ja myimaktaxkpi ankilis tyiktawaajch ja kyopi jam xøøw wyingøjxp, jøts ja xøøw ja myøk'ajtin tpijky, jøts ja jaa'y chaaba'oo'kniyi ja xøø'an. ⁹ Øy ja kawinø'on ja xøø'an yjatsa'yidi ni jade'embaats ja wyimmaa'ñ ja tkayiktigatsti. Ni jade'embaat ja Dios tkaja'myatsti ku ayo'on tja'ejxti, ne'egi ja Dios tñigajpxigø'y'adø'øtsti.

¹⁰ Jøts ja myimagoxkpi ankilis tyiktawaajch ja kyopi ma ja møy ka'øy jiyujk ja myøjtsinaabyajt jam, jøts tuki'iyi kyoodsigyijxy winø'ømbaat t'ane'emy ja yjaa'y. Øy ja ayo'on ja møy tja'ejxti, jadi'ñits ja tjantyimyjajada'akti. Nugo ja tyoojts ja tjanch'atsutsukt; ¹¹ ni jade'embaats ja tkamajst'uty ja kya'øy'ajtin midī ja tyundip, ne'egi ja tñigajpxigø'y'adø'øtsti ja Dios pøn jap tsajpjøtpty, ja'agøjxp ku ayo'on ja jade'en ttuk'ijxy.

¹² Xjats ja myidudujkpi ankilis tyiktawaajch ja kyopi møy nøyøjtp midī yiktejp Eufrates. Ku jade'en ttuñ jøts ja tyijch, jøts ja tuu' jam y'awaajch, jøts ja møy windsøndøjk jam ñajxti midī tsoo'ndip xøøbidsimdsø'ampy.

¹³ Wīnets ø n'ijxy ku ja miku' pyidsimy jap awa'andsaa'ñ y'aawjøtpty. Nayide'en pyidsømi jap møy ka'øy jiyujk y'aawjøtpty, jøts nayide'enmi jap kugajpxtyøjk y'aawjøtpty midī nadyejidip ku ja Dios tkugajpxy'atti jøts twindaay'atti nugo ja jaa'y. Nidigøøk ja miku' jade'en pyidsømdi ejxim ja pokleenin. ¹⁴ Yø'øbi miku' jade'en ja møy ejxpajt ñanky'ejxip jøts niduki'iyi ja møy windsøndøjk tyiknamyukøxwa'añi pøn ya naxwiiñ. Jade'ents ja tsep t'la'ejxidit ku ja xøøw tpaagt jøts ja Dios tmime'ent ja møy'ajtin midī ka' pøn tmi'abaaty. ¹⁵ Yide'en ja Dios wya'añ: "Ukmadowdinim, adsu'uky ø nme'ent ejxim ja maa'tspa'an, nipøn tkanijawi. Tya'øy'ajttip ja Dios kyunuu'kxin pøn nay'ejx'ejtidip nabyøk'jød'kidip. Ka'ap øts xmidsø'ødyu'unt ku nme'ent." ¹⁶ Jøts ja møy windsøndøjk ñamyukøjxidøø ma jam hebreo ayuujk tejtī Armagedón.

¹⁷ Xjats ja myiwixujkpi ankilis tyiktawaajch ja kyopi pojotp jøts yikmadøø møy kyajpxy midī tsoo'mp jap tsajpjøtpty ma ja Dios chinaadyaajk, jøts wya'añ:

—Tøy y'øyigyixy jøts tyunit jøts yjatit.

¹⁸ Jøts møy ñaxkidaajky ja widsuk, jøts wyinanguejky ja anaaw, jøts ja tsaachmøy uix myiñ midī ka'anim windii yik'ijxy yiknijawi ya naxwiiñ. ¹⁹ Xjats ja møy kajp Babilonia y'ajaabajky tigøøk ween. Jade'en'ampy jade'en ja Dios tyuñidi ku ja kya'øyjaa'y'atti jøts jade'en ambøjkin'ampy tyukji'kxyidi ja ayo'on. Tuki'iyi ja kajp wyindigøøgyijxy jøts yjaajø'kijxy ya naxwiiñ. ²⁰ Wyindigøøgyijxy ja naajx midī jam mejkyujk'am jøts ja kojpk nayide'en yjaty. ²¹ Nayide'en ja jaa'y pyajtigøøjyøø ja tøst midī je'mch'ajtp wixijky kili tu'uk tu'uk. Ni jade'en ja jaa'y tkaja'myatsti ja Dios øy yø sa wyān'adø'øtsti, øy ja ayo'on møy tøyajikmø'odi.

17

Ku ja ka'ødyø'øxy tøy pyajtni'iyi ja myiwin'øø'mbi

¹ Kuts jade'en yjaty, jøts myiñ nidu'uk ja ñiwixujkpi ankilis midī tmøøt'ajttip ja wixujkpi kopi, jøts ø xnimaay:

—Men, jøts ø n'uktuk'ext sa y'ayo'ombaat ja ka'ødyø'øxy pøn jam tsinaapy mejwyingøjxp.

² Yø møy windsøndøjkti pøn ya naxwiiñ, tøy yø tmøøtpøktyundi yø ka'ødyø'øxy. Jade'ents ja naxwii'ñit jaa'dyi tøy ttuktuñ ttuknijawi ja kya'øyjaa'y'ajtin, jøts jade'en tu'ugyi tøy yikwin'øø'nidi.

³ Nayi kumaa'yjotpty ja Espiritu Santo xuk'ijxy ku øts ja ankilis xyiknijky jam møy abak etjotp, jamts ø n'ijxy tu'uk ja tøyøxyøjk ttatsøøni tu'uk ja møy ka'øy jiyujk, tsajts ja' jøts wixujk ja kyubajk, majk ja wyaj tmøøt'aty, amuum nija'ay ja y'ak midī kya'ødyamigajpxy ja Dios. ⁴ Jøts ja tøyøxyøjk ja wyet twet'aty tsuu'nk jøts tsajts, amuum oori xyox'ajtpy, jam n'ijxyimbi nga'ijxyimbi. Jamts ja kopi tu'uk tmach'ity midī amuum oori, ujts ja kopi nayide'en tmøøt'aty midī kyada'øyjaa'y'ajtpy; ⁵ jøts wyimbojkwemp ja letri tmøøt'aty midī ka' nugo ajawi yiknijawi. Yide'en ja tijy: "Ja møy Babilonia midī tñigubajk'ajtp ja ka'ødyø'øxyøjkti, ja ka'ødyunk jøts ja ka'øwyimmaa'ñ." ⁶ Jøts nay jatyi n'ijxy ku ja ka'ødyø'øxy

myu'ugyi, ja ni'jpy tam ja muujkip pøn ja Dios ja'ajtip ku ja Jesús yja' tō tku'oogidi. Nigyumaap njawi ku jade'en n'ijxy. ⁷Xjats ja ankilis xnimaay:

—Tiku nigyumaap xjawi? Ixyam n'uktuknijawit sudso'ampy idō'ōn yō jade'en tijy yō tō'ōxyōjk jōts yō ka'ōy jiyujk midī ja tō'ōxyōjk tyatsinaapy, midī wixujk ja kyubajk jōts majk ja wyaj. ⁸Yō ka'ōy jiyujk midī ixyam n'ijxpy, jekyep yō jaayi y'ijty. Ka'ap yō ixyam mā y'ukyik'ejxni; ōy jade'en tō jyaty, pidsōmgojmip jap ayodaajkōtpy jōts nōjxkt mā wyindigō'ōty xemikōjxp. Jōts ja jaa'y pøn ja xyōōw kayikja'ay jap nōkyōtpy mā jap y'ity ja jaa'xyōōw midī jujky'ajtip xemikōjxp, yō'ōts nigyumaap tjawidip ku ja t'ejxkojmīdit ja ka'ōy jiyujk ku ja nay jaa' yujky'aty.

⁹Ukmadow yikxon midī ndukmadowampy: Yide'en yō wixujkpi kubajk twandijy yō wixujkpi kojpk mā yō tō'ōxyōjk chōōni. ¹⁰Nayide'en yō wixujkpi kubajk twandijy niwixujk ja windsōndōjkti. Tō wyindigōy nimagoxk, jōts nidu'uk ixyam wyindsōn'aty, jōts jadu'uk ka'anīm ja myiñ. Kuts ja mye'ent, ka'ap ja jeky y'ett. ¹¹Jōts ja ka'ōy jiyujk midī yā ejt naxwiñ jōts ka' ixyam mā y'uk'ejtni, ja' idō'ōn etp myiduktuujkpi windsōn. Ja' idō'ōn ndejnt yjapatpy ja niwixujkpi windsōn pøn ōy sā tō yikajppaaty, jōts jade'eñi ja kyudigō'ōyin n̄axt.

¹²Ja majkpi waj midī tō x'ixy, ja' wyandijpy nimajk ja windsōndi, ka'anīm ixyam ja kutujk yiktanipōkti; pyōktipts ja kyutujk jōts tu'uk hori ja'ayi mōōt wyindsōn'attit ja ka'ōy jiyujk. ¹³Tu'ugyi ja wyinmaa'n̄ tyik'etti yō nimajkpi windsōndj jōts tmo'ōdit ja myōk'ajtin ja ka'ōy jiyujk. ¹⁴Xjats mōōt cheptu'undit ja Borreek U'nk, mimajada'akidipst ja' ja'agōjxp ku mōk ja myōk'ajtin tjagyepy; n̄ipøn yā naxwiñ kyajade'eni, pøn ja mōōtti kō'ōm ja Dios Teety ja tō wyi'ijxyidi jōts ja tō yajxyidi, myiduda'aky'ajtip ja'.

¹⁵Jōts ja ankilis nayide'en xnimaay:

—Yō mejy midī tō x'ixy mā yō tō'ōxyōjk chōōni, yō' wyandijpy niduki'iyi naxwii'n̄it kajp. ¹⁶Jōts ja nimajkpi windsōndōjkti midī wyandijpy ja ka'ōy jiyujk wyaj, ja'ats kyadami'ejxiwyampy ja ka'ōdyō'ōxy jōts tyiktuu'duktit; jōts jade'eñi tyikwindigō'ōdyit jōnjōtpy. ¹⁷Tundi jade'en sam ja Dios kō'ōm tō mwinnmaa'n̄myō'ōyidi sam ja kō'ōm t̄sōky, paty tkajpxmuktit ja windsōndōjk jōts ja kyutujk tmo'ōt ja ka'ōy jiyujk kunim yō ttu'undit jade'en sam ja Dios tō ttanibikta'agi. ¹⁸Yō ka'ōdyō'ōxy pøn tō x'ixy, jade'en yō' sam yō mōj kajp Babilonia midī niduki'iyi ja naxwii'n̄it ja windsōndōjk y'ane'empy.

18

Ku ja mōj kajp Babilonia wyindigōy

¹Xjats ku jade'en yjajty winets n'ijxy tu'uk ja ankilis ku ja tsajpjōtpy kyidaajky, mōk ja kyutujk tmimiñ jōts ja naxwii'n̄it tyikjajtaajky ku ja mōk tyi'ikxy chamamy. ²Xjats ja ankilis mōk kyajpxy jōts wya'añ:

—Tō ja mōj kajp Babilonia wyindigōy. Miku' tsinaadyaajk tō wyimbejtni jōts tum ja ka'ōy jiyujk jam tsinaadyip. ³Ja'agōjxp jade'en yjajty ku ja naxwii'n̄it jaa'y tō ttukpaduñ ja kya'ōy'ajtin. Tō ja windsōndōjk mōōt y'ōyjaa'y'aty kya'ōyjaa'y'aty. Pōnts atstooktip atsyaktip tō ja ttamōktōjkiniidi ku ja ttookti midī yiktundip ja pōkyumbi.

⁴Xjats ō nmadōy jadu'uk ja ayuujk midī tso'omp tsajpjōtpy, xjats wya'añ:

—Pidsōm̄di meets jam kajpjōtp pøn jaty ō nja'ajtpy. Kidi nugo ja pōky xpaatti jōts kidi nayide'en ja ayo'on nugo xpaatti. ⁵Tō yō jade'embi kajp ja pyōky n̄ipajtni, xjats ja Dios ka' tja'dyigōy ku jade'en kya'ōyjaa'y'atti. ⁶Wan yō tjaty nayide'en sam yō tka'ōdyuñ ja naxwii'n̄it jaa'y. Wan jawaani mōj tkubety ja kya'ōy'ajtin. ⁷Pō ōyxi n̄amyiekxyi, mōj n̄ayjawi, wants t'ixy t̄ijawi nayide'en ja ayo'on. Wampts ja' y'am yjōtp: "Windsōn'ajtpyīm ōts ixyam; ka'ap ō nmay ndajy sam ja ku'ōktyō'ōxyin, ka'ap ō s̄a njatt." ⁸Ja'agōjxp tuktoñi nōjx n̄axkida'aky mayjōjxp ja ayo'on: ja o'jkin, ja yuu, ja pa'am, jōts nayide'en nōjx tuki'iyi tyōōjyō'kōxti; ja Dios janch mōj ku ja ayo'on jade'en myo'ōjidit.

⁹Jōts ja naxwii'n̄it windsōndōjkti t̄paya'axtit t̄pajō'ōdit ja kajp mā ja tō pyōkyundi, ku t'ejxtit ku ja tō yjōnmajtsniyi, jōts ja jok nugo pyidō'kni. ¹⁰Jagam ja tsō'ōgi y'a'ejxuktit, ja ku ja nayide'en yjattit, jōts yide'en wya'andit:

—iMjanch'ayōōy meets Babilonia! Janch mōk ja mōk'ajtin y'ity xmōōt'atti. Pō tōxi tuktoñi mwindigōy.

¹¹Nayide'en ja too'kpi ajubyiōjk, pyaya'axtip ja', ja'agōjxp ku ka' pøn jade'en y'ukjuuñit sam y'ijtyin, ja tyōōky myimaadyip myidajtip ti jaty ja myōōt'ajtip: ¹²jap oori, jap plati, jap n'ijxyim nga'ijxyim, jap ja ōybi wet, tsuu'nk jōts tsajpts; jap nayide'en mayjōjxp ja kipy midī pa'akxukp, jap tsaadsech tsaagueegidi, jap bronze jōts ja nugo pujx, ¹³japts nayide'en ja kanela, tō'kx tsōōy, poom, mirra, jōts ja pa'akxukpi, jap ja vino, aceite, y'ōybi ariin way jōts ja ariinbajk; jap nayide'en ja jiyujk midī tsimchōmp, jap ja borreegi, jap ja kawaay jōts ja karreti. Nay jap ja tumbi jaa'y tyōōgyi pøn tundip sam ja jiyujkin. ¹⁴Xjats ja too'kpiōjk wya'andit:

—Tø wyindigøgyixy tuki'iyi midi y'ijty mdsojktip; tø tyigøøgyixy ja mgumeeñ'ajtin ja mjujky'ajtin, nijuuni jadigojk kya'ukyikpatnit.

¹⁵ Jøts ja too'kpitøjk, tsø'jkidip ja', jøts jagam y'a'ejxuktit ku nayide'en y'ayo'ombaattit, pyaya'axtip pyajø'ødip ja', ¹⁶ jøts wya'andit:

—iMjanch ayøøy meets Babilonia kajp! Janch tsuj meets mgajp y'ijty sam tu'uk ja tø'øxyøjk tsuj ñaxyøxyin, ku øybi wet tpikta'aky wan tsuu'ngi wan tsajpts, kuts o midi'ibi xox tpikta'aky wan ja oori jøts ja tsaadø'kxpi. ¹⁷ iPø tøxi tuktoñi kyugøxi ja mgumeeñ'ajtin ja mjujky'ajtin!

Jøts nayide'en pøn jaty jam tundip barki jotp, jagamyi ja tyandøø. ¹⁸ Jøts t'ejxpaattøø ja jok ku tø tyøøbyøjkni ja kajp, jøts møk wyandøø:

—iNima jade'en ja kajp ejxim ya'at tø y'ityin!

¹⁹ O sa yja'adø'tsnidi o sa ñadyu'uniyidi, ja' møk yja'widip ku ja kajp jade'en yjaty, chap'aawdi, jøts wya'andi:

—iMjanch'ayøøy mee Babilonia kajp! iJa mgumeeñ'ajtin ja mjujky'ajtin øø tø ndama-jada'aky pøn jaty ja barki tmøøt'ajttip yam mejyøøjty, jøts jotmøñ tø mdyimgyudigøødyi!

²⁰ Taxonda'akti meets pøn jap tsajpjøtpy, meets kugajpxtyøjk, meets janchja'wibitøjk, pø tøxi ja wyindigøy ja ka'øgyajp jøts jade'en ja Dios tø tpayø'øy ku tø myika'ødyundi.

²¹ Xjats tu'uk ja møj ankilis tkiyi'iky tu'uk ja amuum møj paandsaa jøts ja mejyotp tkuwibejpiyi'ñ, jøts ja wya'añ:

—Jade'en yø Babilonia kajp wyindigøy ejxim yø tsaa yikuwibejpi mejyotp, jøts nijuuni xøøw kya'ukyik'ejxnit. ²² Nima jadigojk ti kya'ukyikmadooni kajpjøøjty ja xuxpi ja kowbi; nima pøn ti tka'uktunidi, nima pøn kya'ukjøtsnidi. ²³ Niti jaj niti tøø'kx kya'ukaxø'kni jøts niti jade'en kya'ukyikmadooni sam ti y'ityin xyødundi. Tø yø kajp wyindigøy, øy ja too'kpi yajkpidi tø tjamøøt'atti møj, øy tuki'iyi ja naxwii'ñit kajp tø tjawin'øø'nguixy møøtpi ja kya'øy'ajtin.

²⁴ Ja'agøjxp yø kajp jade'en tø yjaty ku jam tø tyik'oockti ja Dios kyugajpxy jøts ja Dios yjanchja'wibitøjk. May ja jaa'y tø tyik'oockti o magajp.

19

¹ Kuts jade'en yjajty jøts nmadøøy ku mayjaa'y kyajpxti jap tsajpjøtpy jøts møk wya'andi: iTu'ugyi adøm nDios Teety janch møj janch øy! Ja'ats tu'ugyi xyiknitso'ok'ajtindip.

² Tiy'ajtingøjxp ja Dios ttiidyuñ; t'ayo'onmø'øy ja ka'ødyø'øxy, ja'agøjxp

ku ja naxwii'ñit jaa'y tø tyikma'aty ja' kya'øy'ajtingøjxp;

paty ja Dios ja tpayø'øy ku jade'en tø tyik'oockti ja yjanchja'wibitøjk.

³ Xjats jadigojk wyangojmidi:

—iJanch møj ja Dios! Nijuuni yø kajp kyatøøy'amø'øty, jok'ejtp yø'.

⁴ Xjats ja ñi'ee'pxmaktaxkpi møjaa'dyøjk jøts ja nimaktaxkpi jiyujk ñagyuxendyaajkidi jam Dios myøtsinaadyaajk wingujkp, Dios tjä'myatsti jøts wya'andi:

—iJade'en, ku Dios janch møj!

⁵ Jøts yikmadøøy ja kajpxy ja ayuujk ma ja møj tsinaabyajt jam, midi wamp yide'en:

Winjawidi kunuu'kxyjawidi meets ja Dios,

pøn tpadundip pøn twindsø'jkidip

wan tmøjidi wan tmutskidi.

Ku ja Borreek U'nk yikxødu'unt

⁶ Xjats nmadøøy nayide'en ejxim ja mayjaa'y kyajpxyin, sam ja møj nøø øø'tspin wyina'añ jøts ja tsaach møk anaaw, jøts wya'añ yide'en:

iJanch møj ja Dios! Tø ñaxkida'aky ja kyutujk jøts jade'en xniwindsøn'ajtindit.

⁷⁻⁸ Wan t'øy'ajtyim wan txondaajkyim, wan twinja'wa'am wan twindsø'jka'am.

Tøxi tpaaty ja yja' midi yiktejp Borreek U'nk jøts tmøøtsinaawya'añ tmøøt'etwa'añ ja yjanchja'wibitøjk pøn øy'ajttip wa'ats jaa'y'ajttip.

Jade'en idø'øn yø tijy sam ja jaa'y ja xøøw ttundi ku y'amajtskidi.

⁹ Xjats ja ankilis xnimaay:

—Ja' jade'en: “Tya'øy'ajttip pøn tø yikway ma ja Borreek U'nk xyøduñ.”

Jøts ja yjaakwa'añ:

—Yø' ayuujk midi tø xjaadyañ, tiy janch yø', Dios tyiy'ajtin yø'.

¹⁰ Xjats ø nagyuxendyaajki ankilis wyingukp jøts nwindso'øgiwya'añ, jøts ø xnimaay:

—Ka'ap jade'en m'adø'øts; pø tu'ugyixi ja Dios Teety yikwindsø'øgi. Nayide'enxi øts ja nwindso'n'ajtim Jesüs yja' nbaduujni sam metsin, sats ja mmjanchja'wibitøjkindi. Ja Jesüs kyajpxy y'ayujk nbagajpxa'amp pøn jaty ja Dios ja'ajtyip.

Ja jaa'y pøn ttatsinaapy ja poop kawaay

¹¹ Xjats ø n'ejxpaaty ja tsajp y'awaajch; jamts kyaxi'jky tu'uk ja poop kawaay, ja'ats ja tatsinaapy pøn øy pøn tiy'ajtin møøt, jøts tpayø'øwya'añ ttiidyunwa'añ ja naxwii'ñit jaa'y. ¹² Janch tøø'kxp ja wyeen ejxim ja jønyowin, jøts kyubajkøjxp may ja koroni tmøøt'aty. Jamts ja xyøøw yja'ayi wyimbojkwemp, øy ja pøn tja'ijxy ka'ap ja pøn t'ejxkapy, ja' køø'm tnija'wip. ¹³ Amuum ni'jpy ja wyet midu wyet'ajtpy, jøts ja xyøøw, Dios kyajpxy ja' Dios y'ayuujk ja'. ¹⁴ May ja myøøtseptumbi pyayø'øyi pøn tso'ondip jap tsajjōtpy. Amuum poop, øybi wet, wa'ats wet wyet'ajttip jøts tum poop kawaagyøxpti. ¹⁵ Jajts y'aawjōtpy pyidsimy tu'uk yøñchujx, janch jøøjp ja', ja'ats tyayiktsaachip ja naxwii'ñit jaa'y ku ja møk tniwindsøn'atwa'añ ja naajx ja kajp; møk ja ayo'on ja payø'øyin tyiknaxwa'añ ku ja Dios Teety tøj janchjot'ambiky. ¹⁶ Yjixki'py ja xyøøw yja'ayi jøts pyuugyixy. Jade'en ja twandijy ku møk ja kutujk tmøøt'aty, ni'pøn ya naxwii'ñ kyajade'eni.

¹⁷ Winets ø n'ijxy tu'uk ja ankilis jam xøøw wyindump, jøts tmigajpxy ja jiyujk midu kajkwidettip tsajpwemp, jøts wya'añ yide'en:

—Mendi namyukidi jøts xka'adyit x'a'uxidit ja Dios yja', ¹⁸ jøts xtsu'utstit xjøø'kxtit ja windsøndøjk ja soldaditøjk. Nayide'en xtsu'utstit ja kawaay jøts pøn ja tatsinaajyp. Niduki'iyi xjøø'kxtit pøn ja jaa'y yiktuujnip jøts pøn midundip, wan tmøji wan tmutski.

¹⁹ Xjats ø n'ijxy ja møj ka'øy jiyujk jøts ja windsøndøjk pøn ya naxwii'ñ møøt ja syoldaditøjk, ja'agøjxp tø ñamyukyidi ku cheptunwa'andi møøt ja' pøn tatsinaapy ja poop kawaay. ²⁰ Jøts ja ka'øy jiyujk yiktuuumy møøt ja' pøn nugo win'øø'ndip ñadyiyi ku Dios ja tkajpxnaxpi'aty. Jade'en ñadyiyi tñanky'ejxi ja myilagri'ajtin jøts jade'en ja jaa'y twin'ii'ñ jøts yikmo'odit ja møj ka'øy jiyujk y'ejxa'anin jøts jade'en twindsø'øgidit ja y'awanax. Xjats ja møj ka'øy jiyujk møøt ja' midu nugo win'øø'mp yikuwibejpidy mejjjotp, ma yjanchtøøy yjanča'ay ja nøø. ²¹ Ja'ats ja tya'ookøxti ja myigu'uk midu ja yøñchujx tmøøt'ajtp y'aawjōtpy, jøts ja jiyujk ja yjō'kxkøxyidi midu kajkwidettip.

20

Sa ja kutujk midu tukmil jumøjt etp

¹ Xjats ø n'ijxy tu'uk ja ankilis midu tso'omp tsajjōtpy, jøts ja tkøñ'ity ja ñi'awaajts ja ayodaajk jøts nayide'en tu'uk ja møj pujxkadeen. ² Myajts ja ankilis ja møj ka'øçhaa'ñ midu yiktejp møj miku' ja Satanás, jøts yikøxøjch, yikpakxøjch jøts tukmil jumøjt y'ett ³ y'ayo'ot ma yikuwibejpiyi'ñ ayodaajkjōtpy. Jap ñi'adujkpejty jøts ja seeyi yikpiktaajky ja agaj, jade'engøjxp jøts ka'ap ja naxwii'ñit jaa'y nugo ajawi t'ukwin'øø'nit. Tukmil jumøjt y'ayo'ot, winets yikmajtstu'utt øy winø'ønin.

⁴ Winets ø n'ijxy ja møj windsøndøjk chøøni di jam møj tsinaabyajtkøjxp. Tø yikmo'odi ja kutujk ja møk'ajtin jøts ttiidyu'unin ttu'undit. Nayide'en ja yik'ijxy ja anmija'windi pøn ja kyubajk tø wyinakti, ku ja tkajpxwa'kxti ja nwindson'ajtim Jesús yja'. Jade'ents ja Dios yja' tø tpaduujni. Ka'ap ja twindsø'øgidi twinjawidi ja møj ka'øy jiyujk jøts nika'ap ja y'ejxa'anin yikpikta'akti wyimbojkwjxp jøts kyøø'øom. Yik'ijxy ku ja yjuykpyøxøxti jøts tukmil jumøjt møøt wyindsøn'attit ja Cristo. ⁵ Yø'øts jawyeen juykpyøktøø, pønts jaaktandøø jaanimts ja yjuykpyøktit kunim ja tukmil jumøjt ñaxt. ⁶ Tya'øy'ajtp tyaxondaajkip ja Dios yja' pøn jawyeen jade'en juykpyøktøø. Ja'ats ja Dios ja'ajtidip jøts ka'ap ja y'ayo'odit ku ja yikmajtskpi o'jkin ñaxt. Pyadundip ja Dios yja' jøts møøt wyindsøn'attit ja Cristo tukmil jumøjt.

⁷ Ku wyinaty tø kya'pxy tukmil jumøjt winets yikmajtstu'utt ja Satanás. ⁸ Ku pyidsø'ømt, wyin'øø'mp ja' ja naxwii'ñit jaa'y. Nøjkx twin'ii'ñ nayide'en ja kajp ma yiktijy Gog jøts Magog, jøts ñamyukidit ja tseptumbi niduki'iyi ja syoldadi. Janch namay ja'adi, ka'ap ja myachooni. ⁹ Namyujkidøø jam møj jøgyøjxp jøts tñawidejtkøxti ma jam y'etti pøn jaty ja Dios ja'ajtidip, pøn ja chøjkpy. Xjats ja Dios ja jøøon tñajtskajxyi'ñ jap tsajjōtpy jøts niduki'iyi tyøøgyijxy. ¹⁰ Xjats ja miku' nayide'en yikmaajch ja'agøjxp ku ja jaa'y nugo twin'ii'ñ. Nay jam yikpiktaajky mejjjotp ma yjanchtøøy yjanča'ay ja nøø. Møøt ja' ja møj ka'øy jiyujk, jøts ja' midu nadyejip kugajpxy pøn nugo twin'øø'mp ja naxwii'ñit jaa'y. Jamts y'ayo'odit xemikøjxp xinaxy tsunaxy.

Ku ja Dios ttiidyu'unt ja jaa'y ma ja pyoop tsinaabyajt jam

¹¹ Jøts ø n'ijxy tu'uk ja møj tsinaabyajt, poop ja', jam ja Dios chøøni. Xjats ja tsajp, xjats ja naajx tuki'iyi wyindigøøgyijxy Dios wyingujkp, nima niti kya'uk'ejtni. ¹² Jøts ø n'ijxy ja jaa'y, Dios wyingujkp tyanidi pøn tø y'ookti, ja møj ja mutsk ja'adi. Jamts ja nøky yik'ijxy sa tø yjaa'y'atti nidu'uk nidu'uk. Nayide'ents ja nøky jam yik'ejxmi ma ja xyøøw jap yjaabyetyidi pøn jaty ja Dios yja' tø tpaduujni, xjats jade'en niduki'iyi yikpayø'ødyi. ¹³ Jam ja'adi pøn tø y'ookti mejjjotpy jøts nayide'en pøn tø y'ookti naxkijxy. Jamts ja yikpayø'ødyi tu'uk tu'uk pøni sa tø yjaa'y'atti. ¹⁴ Winets ja Dios tyikjōpkixy ja o'jkin tigø'øyin jøts ka' pøn y'uk'ooknit

jadigojk. Ja' tōōdyip pōn tō tyundigōydi jap mejyjōtpy mā yjanchtōōy yjanča'ay ja nōō. ¹⁵Ja' jade'en yikpiktaktip jam, pōn ja xyōōw jap ka'ejtīp nōkyjōtpy, pōn tkabadundip ja Dios yja'.

21

Ku ja tsajp ja naajx jadigojk y'ōyiyi'ñ jemy

¹Nay winets ø n'ijxy ja jemchajp ja jemñaajx jadigojk; pō tōxi ja tsajp ja naajx wy'indigōy midī jaweyen ejt. Nayide'ents ja mejy kya'uk'ejtnaa. ²Xjats ø n'ijxy tu'uk ja jemgyajp kyida'aky tsajpjōtpy, kunuu'kxy Jerusalen xyōōw'ajtpy, Dios wyingujkp ja chōōñ. Janch tsuj janch xōxy ja kajp, jade'en ja kyaxi'iky ejxim ja jaa'y pyōkwa'añin. ³Winets nmadōōy mōk kyajpxy jap tsajpjōtpy, xjats wya'añ:

—Ejx sã ja Dios tmōōtsinaawya'añ ja naxwii'ñit jaa'y. Ja' amuum ja'ajtidip jōts ja ja' xemikōjpx tmōōt'ett. ⁴Yiktigō'ōpy ja yjotmaydi ja yjotmay'o'jkindi. Ka'ap ja o'jkin y'uk'ejtñit y'ukpajitniyt, ka'ap ja jajyi tōōyi t'uk'ejxñit; sam tō y'uk'ityin, tō ja ñaxy.

⁵Xjats ja wya'añ pōn jam tsinaapy mōj tsinaabyajtkōjpx:

—Uk'ejxim sã øts tuki'iyi jemy nyik'ōyigyōxt.

Xjats jade'en wyangojmi:

—Jaabyat ya'at ayuujk ja'agōjpx ku tyiyi yjanči, ka' mā ndagudsō'jka'ant.

⁶Winets øts xnimaagyojmi jōts yide'en wya'añ:

—Tō y'ōyigyixy. Øts idō'ōn nyiktso'ondaajk tuki'iyi jōts nayide'en nyikjōpōkxt. Pōni pōn tōōjtīp, øts ja nōō ja nmo'op midī yikjujky'ajtp xemikōjpx, jōts may'ajt ja'. ⁷Pōni pōn tmimajadaajkip ja miku' yja', ja'ats nmo'op ja øy'ajtin; jade'ents øts ja n'u'nk'att jōts nmōōt'ett xemikōjpx. ⁸Pōn tkawamp øts nja', pōn tkamibōjpk, pōn xkatsōjkip øts nja', pōn yikjaa'y'o'kp, pōn ka'ōyjaa'y'ajtp, pōn ja miku' yja' tyiktuujñip, pōn twindsō'jkip ja maxandsaa, pōn taay'ajtip, ja' nōjkkxōxtip xemikōjpx jam mejyjōtp mā yjanchtōōy yjanča'ay ja nōō.

Tsuj kyaxi'iky ja jemgyajp Jerusalen

⁹Winets tu'ukmyiñ ja ñiwixujkpi ankilis midī ojts tyikmiñ ja wixujkpi ayō'on yã naxwiiñ, jōts ø xnimaay:

—Men, jōts ø nduk'ext ja janchja'wibitōjk pōn mōōt y'ettit ja Borreek U'nk.

¹⁰Nayī kumaa'yjōtpy ja Espiritu Santo xuk'ijxy, ku øts ja ankilis jam mōj kojpkōjpx xyikñijxy, jōts ø xuk'ijxy ja kunuu'kxy jemgyajp, ja Jerusalen midī kidaqk tsajpjōtpy jam Dios wyingujkp. ¹¹Janch tsuj janch tōō'kxp ja kajp sam ja Dios chinaadyaajkin, jade'en chamamy ejxim ja wa'ats tsaadōō'kxpa'an, tajajna xp jade'en sam ja wa'ats keega'an. ¹²Kōjpx nabojs'tawidity ja kajp jōts makmajtsk ja agaj tjagyepy, jamts ja ankilis tyanidi mā jaty ja agaj. Jam agajkōjpx kyōxja'ayidi ja xyōōw pōn ja Israelit jaa'y y'aadsip kyugōjip, namakmajtsk idō'ōn ja'adi jōts tu'uk tu'uk ja agaj ja xyōōw tmōōt'ajti. ¹³Tigōōk ja agaj tyañ aga'ñ tso'ampy, jōts ja jadigōōkpi agaj tyañ anajy tso'ampy. Xjats ja jadigōōk agaj tyānmi windujy tso'ampy, nayide'en jadigōōk agaj tyañ jixkō'ōm tso'ampy. ¹⁴Makmajtsk ja tsaa yiktapōjtsōō'ñ ja pōch, jōts tu'uk jaty ja tmōōt'aty ja xyōōw pōn jaty ja Jesús kyudanaabyi'ajtpy.

¹⁵Ja ankilis midī ø xmimadyakp jam ja takejpx ja tmōōdi, tum oori, xjats ttakijpxy winō'ōnin ñabojs'tawidity ja kajp, jōts nayide'en winō'ōnin myōji ja agaj. ¹⁶Kwadradi ja kajp, ni sudsō'ampy kyayōñi kyakoni. Majtsk mil ja majtsk magō'pxy kilometri tuktamajñ jaty, jōts nayide'en kyōpxi. ¹⁷Winets nayide'en tkijpxy ja pōch, tugui'pxy myaktaxk metri ja mayajpx'ajtin tjagyepy. Jade'en ja ankilis tkijpxy sam adōm nguipxyin.

¹⁸Amuum jaspe tsaa tō ttapōch, jōts ja kajp amuum oori ja', jōts wa'ats keegi kyaxi'iky. ¹⁹Mã ja makmajtskpi tsaa tō yiktapōjtsōō'ñ, mayjōjpx ja øybi tsaa'u'nk tō yiktaxōxy. Ja myidu'ukpi tsaa tmōōt'aty ja jaspe, jōts ja myimajtskpi tsaa tmōōt'aty ja zafiro. Ja myidigōōkpi tmōōt'aty ja ágata, jōts ja myimaktaxkpi tmōōt'aty ja esmeralda. ²⁰Ja myimagōxkpi tsaa txox'aty ja ónice, jōts ja myidudujkpi tsaa txox'aty ja cornalina. Ja myiwixujkpi tsaa txox'aty ja crisólito jōts ja myiduktujkpi txox'aty ja berilo. Ja myidaxujkpi tsaa txox'aty ja topacio jōts ja myimajkpi tsaa txox'aty ja crisoprasa. Ja myimaktu'ukpi tsaa txox'aty ja jacinto jōts ja myimakmajtskpi txox'aty ja amatista. ²¹Tum perla ja makmajtskpi agaj, jōts amuum oori ja mōj tuu' midī najxp kajpjōtp, jajp tsamamp ja'.

²²Ka'ap ja tsaptojk jam yik'ijxy jemgyajpjōtp. Ka'ap ja chōkyi, kumi amuum ja Dios ja tkajp'aty mōōt ja Borreek U'nk. ²³Ka'ap ja chōkyi jōts ja xōōw ja po' jam ya'ant kajpjōtp. Kō'ōm ja Dios Teety jōts ja Borreek U'nk ja y'aju'uk ja y'ajaj tyikjajit tyiktōō'kxt. ²⁴Nay ja' tkudōō'kxidip tkujajidip ja naxwii'ñit jaa'y pōn tō ñitso'ok'atti, jōts nayide'en ja windsōndōjkti pōn ja y'ōy'ajtin jam tō tminōjkxti. ²⁵Awa'ats jam y'ity mā ja pōch agaj jam. Nijuuni jam kyakoodsi, xiññ jam y'ity. ²⁶Xjats jam tminōjkxti ja naxwii'ñit jaa'y ja y'ōy'ajtin ja wya'ats'ajtin; ²⁷ka'ap jam tyōkit pōn ka'ōy'ajtip, pōn ja myigu'uk nugo

twin'øø'mp twindaay'ajtp jøts o ti tkadami'ejxiwya'añ. Ja'ayi jam tøjkidip pøn ja xyøøw jap jaabyety jap nøkyjøtpy, ma jap y'ity ja jaa'y ja xyøøw pøn jujky'ajttip xemikøjxp. Ja'abi nøky tmøøt'ajtp ja Borreek U'nk.

22

¹ Xjats ø xuk'ijxy ja ankilis tu'uk ja møj nøø. Midi yik'ukp janch wa'ats ja', ja'ats xyikjujky'ajtim xemikøjxp. Janch ti'kxy ja', jøts ja jam pyidsimy ma ja Dios Teety chøøni møøt ja Borreek U'nk. ² Jamts ja møj tuu' kujk'am yø'øy ja nøø. Adsow aduuk ja kipy jam yøñ nøøba'am. Ja' tyøøm yiktajujky'ajtp xemikøjxp. Wimbo' wimbo' ja tyøøm'aty jøts ja y'aay tsøøy'aty ja naxwii'ñit jaa'y. ³ Pøn jap tsinaadyip ka' pøn y'ukjemñimaa'yniyi y'uktenimaa'yniyi. Ja Dios Teety jam tu'ugyi ejtp møøt ja Borreek U'nk, ja'ats windsø'jkiiyidip ja yjanchja'wibitøjk. ⁴ Ejxiyidip nijawiyidip wemp'am ja Dios Teety, jøts nay ja xyøøw myøøt'ajtidip wyimbojkwemp. ⁵ Ka'ap ja koots'ajtin jam y'uk'ejtnit; ka'ap ja jaj ka'ap ja xøøw t'ukyiktunit; Dios Teety tkujajip tkudøø'kxip, ja'ats jam windsøn'attip xemikøjxp.

Wingomp ja' ku ja Jesucristo mye'ent

⁶ Winets ja ankilis xnimaay yide'en:

—Tiy janch ya'at ayuujk midi ixyam tø xjaadyañ, ka' nugo xkudsø'øgit. Nay ja Dios Teety pøn y'ijty tyukajpxwa'kxpy ja kyugajpxy, tøts ja nayide'en tkejxy ja y'ankilis jøts ttukmado'ot ja pyadumbi pyabøjkpi sa tsojk yjatwa'añ kyubatwa'añ.

⁷ Nøøm ja nwindson'ajtim:

—iMe'emp øts tsojk! iTya'øy'ajttip tyajotkujk'ajttip pøn ja Dios kyajpxy tmøjpiktaajkip sa yap nøkyjøtpy yjaabyetyi!

⁸ Xjats øts nmadoøy n'ijxy kø'øm sa øts ya'at nøkyjøtpy tø njaadyañ. Winets øts ja ankilis wyingujky nagyuxendyaajki sam øts ja xuk'ijxy jøts øts ja nwindson'øgit. ⁹ Jøts øts ja xnimaay: —Ka'ap jade'en ma'adø'øst; pø tu'ugyixi ja Dios Teety yikwindsø'øgi. Nayide'enxi øts ja nwindson'ajtim Jesús yja' nbaduujni sam metsin, sats ja mijanchja'wibitøjkindi, jøts niduki'iyi pøn jaty tmøjpiktakp midi yap nøkyjøtpy jaadyañ.

¹⁰ Jøts nayide'en ja ankilis xnimaay:

—Ka' nugo x'amaatsk'att ja Dios kyajpxy midi yap nøkyjøtpy jaadyañ. Wingompxi jøts yjatt kyubatt jade'en. ¹¹ Wan jade'en tjaa'y'atti pøn ka'øy'ajttip, jøts pøn ja Dios yja' tpaduujnip, wañim ja tyikyø'ødyi jade'en ja yjaa'y'ajtin.

¹² Yide'ents ja nwindson'ajtim wya'añ:

—Tsojk ø nme'ent jøts ø nmime'ent ja øy'ajtin. Ja'ats ndamay'atp nidu'uk nidu'uk sa tø yjaa'y'atti. ¹³ Øts idø'øn nyiktso'ondaajk tuki'iyi jøts nayide'en nyikjøpøkøt.

¹⁴ Tya'øy'ajttip tyajotkujk'ajttip pøn tø ñitso'ok'aty. Awa'ats ja tyuu'di jøts ja tyøkidit jam kunuu'kxy kajjotp. Jamts tpaattit ja kipy midi jam yiktajujky'ajtp xemikøjxp. ¹⁵ Ka'ap jam tyøkidit pøn ka'øyjaa'y'ajttip pøn ja miku' yja' tpaduujnidip, pøn maa'tstip, yikjaa'y'oo'ktip, jøts pøn ja myigu'uk nugo twin'øø'mp.

¹⁶ —Tø øts ja n'ankilis nguexy jøts tuki'iyi yiknigajpxkøt ya'at Dios kyajpxy, jøts jade'en yiknijawit pøn jaty ja Dios ja'ajtidip jam niwixujkpi kajp. Øts ndeety'ap'ajtpy ja møj windsøn David. Jade'en øts ja naxwii'ñit jaa'y nyikujajtaagi sam ja møj jaxyøøw midi jøpyidsømp.

¹⁷ Xjats ja Espiritu Santo jøts ja nwindson'ajtim yjanchja'wibitøjk wya'andi jøts ø nwindson'ajtim yiknøjmi:

—iMen!

Pøn jaty tmadoop yø'øbi ayuujk wan nayide'en twa'andi:

—iMen!

Jøts pøn ttsojpk ja øy'ajtin ja xondaajkin wan tmiñ jøts tpaatt ja may'ajt.

¹⁸ Xyam ø nnigajpxy pøn jaty yam tmadoop ja Dios kyajpxy sam yap nøkyjøtpy yjaabyetyi: Pøni pøn nugo tyiktigajtsip ya'at ayuujk jøts ne'egi tiy tijy midi ka' tyiy'ajtin, Diosts ja ayo'on mo'øjip sam yap nøkyjøtpy yja'ayi. ¹⁹ Pøni pøn yø Dios y'ayuujk tyiktigajtsip jøts ka'pxy tka'ukajpxnidi sam yap nøkyjøtpy yja'ayi, Diosts ja pøjkiñip ja y'øy'ajtin jøts ka' tyøkidit ma ja kunuu'kxyajp jam midi yø nøky ñigajpxpy.

²⁰ Xjats ja nwindson'ajtim wya'añ pøn ya'at tñigajpxp:

—Tsojk nme'ent.

Jøts ø n'adsojimbijty:

—Øy jade'en. iMen, nwindson'ajtim Jesús!

²¹ Ja nwindson'ajtim Jesucristo mgunuu'kxidip meets niduki'iyi. Jade'en idø'øn ja y'ejxi ty'iyi.